


Didza' cubi rucá'ana
tsahui'



New Testament in Zapotec, Rincón (MX:zar:Zapotec, Rincón)

Didza' cubi rucá'ana tsahui'
New Testament in Zapotec, Rincón (MX:zar:Zapotec, Rincón)

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 4 Mar 2019 from source files dated 1 Mar 2019
58bf86df-ae22-508c-81dc-936dbf138c25

Contents

Salmos	1
San Mateo	124
San Marcos	178
San Lucas	212
San Juan	268
Hechos	309
Romanos	360
1 Corintios	382
2 Corintios	402
Gálatas	415
Efesios	423
Filipenses	431
Colosenses	436
1 Tesalonicenses	441
2 Tesalonicenses	445
1 Timoteo	448
2 Timoteo	455
Tito	459
Filemón	462
Hebreos	464
Santiago	479
1 Pedro	485
2 Pedro	491
1 Juan	495
2 Juan	500
3 Juan	501
Judas	502
Apocalipsis	504

YUGU' SALMO

1

¹ Bica' ba bönni' biti' runë' ca naca le ta'gú'u yöl-la' lë' nupa tu'cá'ana Dios,
 en biti' ridálenë' tsözxón nupa tun dul-la',
 en biti' runë' tsözxón le tun nupa ta'zí' quidza' Dios.
² Le raza ládxë'ë nácagaca xibá naguixjë' Xanru',
 en ca nácagaca xibá na' rëla, en te dza rulaba ládxë'ë.
³ Bönni' ni náquië' ca tu yaga dxe' ga naca ra' nisa,
 le ribía sizxöni cate' ridxín dza que,
 en biti' ca' rizóa gubá' ayisö.
 Yúgu'të le runë' ta'ruáj dxi'a.
⁴ Biti' raca caní quégaca nupa tuá' dö'.
 Nácagaca ca bëbu zxe café ruá' le bö'.
⁵ Que lë ni na' biti' ulu'ruájë' tsahui' bönni' tu'ë dö' cate' Dios uchi'a usöröë' quégaquië',
 en biti' ila'cu'ë bönni' dul-la' ga tu'dubë' bönni' tsahui'.
⁶ Rapa chi'ë Xanru' Dios nöza ga ta'dé' bönni' tsahui' na',
 pero uniti tsaz nu ridá gapa ta'dá nupa tuá' dö'.

2

¹ ¿Bix que tu'tsatsa bönachi yugu' yödzö
 en tu'pá'a nítisö le ilúngaca?
² Bönni' ta'nná bë'ë luyú ta'dá'baguë'ë Dios.
 Tun tuz xtídza'gaca nupa dë lu ná'agaca
 para ila'dá'baga' Xanru', en Nu na' nabó cazë' para inná bë'ë,
³ ta'nná: "Uzxuzxaj uquínnajru' le ta'nná bé'enë' rë'u,
 en chú'unaru' yugu' le tu'zenë' bach rë'u."
⁴ Dios na' zoë' yehua' yubá uzxídxisë'.
 Xanru' Dios utitaj cazë' léguequi.
⁵ Ní'irö lu yöl-la' rilé queë' güi'ilenë' léguequi didza',
 en lu yöl-la' ridzá'a queë' uzenë' bach léguequi.
⁶ Inné': "Nuzóa caza' bönni' nabó caza' xilatjë' ga inná bë'ë.
 Inná bë'ë lu Guí'a Sión, le naca guí'a lá'ayi quia'."
⁷ Quíxjöi'ida' libí'ili' didza' nuzóë' tsaz Dios.
 Xanru' Dios gudxi cazë' neda': "Li' nacu' Zxí'ina'.
 Na'a dza nuzóa caza' Li'.
⁸ Gunábini neda', ate' guna' ga ilequi quiu' yugu' yödzö.
 Guequi ca' quiu' idútë yödzölió.
⁹ Quitsju' léguequi len tu xiyaga guíë.
 Uzxuzxju' léguequi ca run nu rilá'a tu xziga' yó'öna."
¹⁰ Que lë ni na', libí'ili' na' rinná bé'ëli', guli'tséajni'i.
 Guli'sedi cuinli', núlöli' ruchi'a rusöröli' le raca luyú.
¹¹ Lu yöl-la' ba'a ladxi' queéli' guli'gún xichinë' Xanru'.
 Lu yöl-la' rizxizi queéli' buli'sí' xibé'.
¹² Guli'gún bal Zxí'inë' Dios para cabí ilétenë',
 en para cabí udxi queéli' la' nöza.
 La' ilentë yöl-la' rilé queë'.
 ¡Bica' ba yúgu'të nupa tu'zxöni ladxi' Lë'!

3

¹ Xan, chinayángacada' nupa ta'lé neda'.
Zián nupa ta'dá'baga' neda'.

² Zián nupa ta'nné quia', ta'nná:

“Biti' usölé' Dios lè'.”

³ Pero Li', Xan, run chí'itica'su' neda'.

Nacu' yöl-la' ba quia', en Nu rutipa neda'.

⁴ Bè'a zidzaj didza', bulidza'-nè' Xanru',
ate' Lè' biyönnè' chi'a ga na' zoè' lataj lá'ayi queë'.

⁵ Neda' rata', en rasia',

ate' rubana', tu' nazóntica'sè' Xanru' Dios neda'.

⁶ Biti' gádxida' gayuá' gayuá' bönachi,

nupa na' nagú'ugaca neda' lé'ajlö.

⁷ ¡Guyasa, Xan! ¡Busölä neda', Dios quia'!

Budxía huè' xága'gaca nupa tu'dí'i neda',

en buquínnajda' nupa náagaca xihui'.

⁸ Xan, rusölä cazu' bönachi quiu'.

Ben ga gaca dxi'a quegaca bönachi quiu'.

¡Ca' gaca!

4

¹ Bubí'i didza' cate' rulidza' Li', Dios.

Nacu' Nu ruchi'a rusöró le raca quia'.

Cate' gurö'a böniga, bida cazu' Li' ga zoa', en gúcalenu' neda'.

Ruhuéchi' ladxi' neda', en ruzé nagu' le rinábida' Li'.

² Rnnè' Dios: “Libí'ili', bönachi, ¿gáca'xte ulidza dítajli' neda'?”

¿Gáca'xte caz idxí'ili' le cabí nazaca', en güí'i ládxi'li' le cabí naca?”

³ Guli'tsöjné nabó cazè' Xanru' nu radxi Lè',

ate' riyönnè' neda' cate' rulidza'-nè'.

⁴ Guli'gadxi Lè', en bíti'rö gunli' dul-la'.

Guli'sá' ladxi' ca naca lè ni cate' dèli' ga ráta'li', en guli'sóa dxisö.

⁵ Guli'cú'u lahuè' Xanru' le naca dxi'a,

en buli'zxöni ladxi' Lè'.

⁶ Zián nupa ta'nná: “¿Nuzxi caz gun ga gaca dxi'a queéru?”

Lu yöl-la' dxi'i ladxi' quiu' buyú netu', Xan.

⁷ Runu' ga rudzéjade'eröda'

ca tu'dzeja nupa tu'zí' xibé zxoá' za guizxi yu, en xisi lubá uva.

⁸ Cate' rata', la' rásitia' lu yöl-la' riböza dxi ladxi' quia',

tu' run cazu' Li', Xan, ga riböza' dxi'a tsáhui'do'.

5

¹ Ruzé nagu' didza' ruá'a, Xan.

Buyú ca rinnéda' ládxa'a lu yöl-la' ruhuí'ini quia'.

² Dios quia', Nu rinná be'e neda', ruzé nagu' cate' rinábida' Li'

gácalenu' neda', na' güí'ilena' Li' didza'.

³ Yugu' zila yönnu' chí'a.

Zílado' idxina' lo', en cöza' didza' ubi'u.

⁴ Nacu' Li' Dios bití' raza ládxi'u le cabí naca,

en bití' ru'u lataj ibiga' ga zu' nu ruá' dö'.

- ⁵ Biti' ru'u lataj nupa tun ba rahui ila'dxín lo',
en bití' rilé'enu' dxi'a nupa nácgaca xihui'.
- ⁶ Rusunítu' dërö nupa ta'z' ye'e luzé'eguequi,
en bití' rilé'enu' dxi'a nupa tuti bönachi, en ta'z' yë'.
- ⁷ Gaca tsu'a neda' lu yu'u lidxu', tu' nadxí'ide'enu' neda'.
Lu yöl-la' ba'a ladxi' quia' tsu'a ga naca yudo' lá'ayi quiu', en tseaj ládxa'a Li'.
- ⁸ Tu' nacuá' zían nupa ta'lé neda', bulu'í neda' le naca dxi'a ré'ënu' guna', Xan.
Busëdi neda' para gaca guna' ca ré'ënu' Li'.
- ⁹ Biti' gaca nu tseajlé' didza' tu'í nupa na' ta'lé neda'.
Nácgaca xihui' icja ládxi'do'guequi.
Naca ruá'agaca ca tu yeru ba nayalaj,
en lu yöl-la' rizí' yë' quéguequi tu'í yulaj didza'.
- ¹⁰ Ben léguequi xiguia', Dios.
Ben ga bití' udxín xtídza'guequi.
Guru'una léguequi tu' túntica'sö dul-la',
en tu' ta'dá'baga' xtídz'u.
- ¹¹ Ulu'dzeja nupa tu'zxöni ladxi' Li'.
Lu yöl-la' rudzeja quéguequi gúl-lagaca quiu' tu' rácalenu' léguequi.
Tu'z' xibó' nupa nadxí'igaca Li'.
- ¹² Run cazu' Li' ga raca dxi'a quégaca nupa tun ca rnna xtídz'u, Xan.
Lu yöl-la' dxi'i ladxi' quiu' run chi'u léguequi.

6

- ¹ Biti' uzenu' bach neda' lu yöl-la' rilé quiu', Xan.
Biti' gunu' neda' xiguia' lu yöl-la' ridzá'a quiu'.
- ² Buéchi' ladxi' neda', Xan, tu' rudú ládxa'a.
Bun neda', Xan, tu' riguí' rizáca'a.
- ³ Rö'ö böniga idútë le naca'.
¿Gáca'xte caz gaca caní, Xan?
- ⁴ Gudá dusöló' neda', Xan.
Tu' nadxí'inu' neda', busölá neda' lu yöl-la' guti.
- ⁵ Lu lataj chul-la cuntu nu tsöjné Li'.
Cuntu nu zoa ní' nu gaca cu'u Li' yöl-la' ba.
- ⁶ Rudú ládxa'a tu' rinnética'sö ládxa'a.
Yugu' dzö' ribisa le ráti'da' len nisa ribödxi quia'.
Rusubisa' xcúgua' len nisa ribödxi quia'.
- ⁷ Rö'ö gui guió'j lahua' tu' ribódxitica'sa'.
Biti' gaca ilé'eda' tu' nózigaca nupa tu'dí' neda'.
- ⁸ Guli'cuíta ga zoa', libí'ili', ruá'ali' dö',
tu' riyönnë' Xanru' ribödxa' neda'.
- ⁹ Ruzé' naguë' le rulidza', ráta'yua' lahuë',
en rubi'ë didza' cate' bi rinábida' Lë'.
- ¹⁰ Ulu'tuí' nupa tu'dí' neda', en ila'bó' böniga.
Lu yöl-la' rutuí' quéguequi ulu'biga' ga zoa'.

7

- ¹ Ruzxöni ládxa'a Li', gácalenu' neda', Xana' Dios.
Busölá neda' lu ná'agaca nupa ta'bía no neda', en gúcalen neda'
- ² para cabí soa nu cuéaj neda' ca runba' bédxi guixi',
en para cabí usuniti neda' ga cuntu nu zoa gácalen neda'.
- ³ Xana' Dios, channö caní nuna':

Channö nabága'a xiguia',

⁴ o channö bubi'a dö' que nu gúcalen neda',
o channö bi'a dö' que nu biti' bi ben quia' lu biti' rilé'e neda' dxi'a,
⁵ bë' lataj soa regu' neda' nu na' biti' rilé'e neda' dxi'a, en ucul-la neda'.

Bë' lataj nu na' quin neda' lu yu,
en ucá'ana neda' cá'asö.

⁶ Lu yöl-la' rilé quiu' guyasa, Xan.

Gudá'baga' nupa na' lu yöl-la' ridzá'a quéguequi tá'baga' neda'.

Guyasa, gúcalen neda' tu' nacu' Nu ruchi'a rusöró le raca quia'.

⁷ Ben ga ulu'dubi quiu' yúgu'të bönachi,
en gunná be'e léguequi ga ni' zu' xitsá'tërö.

⁸ Ruchi'a rusöróu' quéguequi yúgu'të bönachi, Xan.

Bubéaj neda' tsahui', Xan, tsca naca le tsahui' nuna', en tu' naca' idú tsahui'.

⁹ Ben ga udxí que le xihui' tun nupa tuá' dö',
pero buzóa tsutsu nupa tun le naca dxi'a,
tu' nacu' Li' idú tsahui', Dios, en ruchi'a rusöróu'
le ta'zá' ládxi'gaca bönachi, en le ta'guínnaj ícjaguequi.

¹⁰ Naca cazë' Dios Nu run chi'i neda'.

Rusölé' nupa nácagaca idú ladxi'.

¹¹ Dios ruchi'a rusöróë' queëru' ca naca le naca tsahui',
en richúgutica'së' quégaca nupa tuá' dö'.

¹² Channö cabí ulu'bí'i ladxi' bönachi, utuchë' guié tuchi' queë'.
Chinucözë' uxiti' yaga queë'.

¹³ Chinupé'ë yugu' le rudí'inë' lu gudil-la,
en nudxié' lu du uxiti' yugu' yaga túchi'do' zoa guí' láhuiguequi.

¹⁴ Buyútsöca', riguínnaj icjë' bönni' ru'ë dö' le xihui' gunë'.

Ruí'i ládxi'ë le naca dö', en rizí' yë'ë.

¹⁵ Nachó'önë' ga rë' tu yeru zxön ga nu ibixi,
pero lë cazë' yöjbixë' lu yeru na' guchó'önë'.

¹⁶ Budxín la' queézë' dö' na' bi'ë,
en dxíë' huë' ca naca xiguia' nabáguë'ë.

¹⁷ Guía'-në' Xanru': "Xclenu" tu' náquië' tsahui',
en gul-la' yöl-la' ba que Lë' Xanru', Nu nayépisëtërö.

8

¹ ¡Xana' Dios,

bica' ba Lo' idütë yödzölió!

¡Xitsá'tërö ca lúzxiba nayépisu' Li'!

² Túl-labi' bí'ido', enca' bi'i hué'ënido' yöl-la' zxön quiu'
sal-la' nacuá' nupa ta'dá'baga' Li'.

Uzóa dxíu' nupa na' biti' ta'lé'e Li' dxi'a, enca' nupa ta'dá'baga' Li'.

³ Cate' ruyúa' lúzxiba quiu', le nunu' len xibón na'zu',

enca' beu', en yugu' bölaj bení' nuzú' xilátjaguequi,

⁴ ní'irö rnníá': ¿Bizxi caz bönni', tu' röjné cazu' lë'?

¿Bizxi caz nu naca bönáchisö, tu' ruí'i ládxi'u Li' nu na'?

⁵ Nunu' ga naquië' bönni' ia'lati' cuidi' ca naca cazu' Li'.

Nuzú' queë' yöl-la' ba quiu', en yöl-la' run bal ca
tu le néquini oro dxía icjë'.

⁶ Nunu' ga rinná bé'enë' yugu' le nun cazu' Li'.
 Yúgu'të nuzú' xini'ë lë'.
⁷ Nuzú' xini'ë yúgu'tëba' bö'cu' zxila', en yúgu'tëba' bëdxi,
⁸ en lës caní nunu' ca' quégacaba' biguínido',
 en quégacaba' böla dzó'öba' nísado',
 enca' quégacaba' yúgu'tëba' böa' ta'dódiba' lu nísado'.
⁹ ¡Xana' Dios,
 bica' ba lo' idütë yödzölió!

9

¹ ¡Idú ládxa'a rigu'a Li' yöl-la' ba, Xan!
 ¡Usiyönda' bönachi ca naca yúgu'të yöl-la' huáca nunu'!
² ¡Udzéjada', en uzi'a xibó!
 ¡Gul-la' yöl-la' ba que Lo', tu' nayépisëtëru'!
³ ¡Ta'zxunnaj nupa ta'dá'baga' neda'!
 ¡Ta'dzó'ö, en tu'niti lo' Li',
⁴ tu' nubéaju' tsahui' le naca dxi'a runa'!
 ¡Rö'u ga rinná bë'u, en ruchi'a rusöróu' queétu' ca naca le naca tsahui'!
⁵ Bulidza zi'u yugu' yödzö, en busunítu' nupa tuá' dö'.
 Tsaz busulu' lu guichi quiu' gapa gula'zúaj léguequi.
⁶ Chigula'niti nupa gula'dá'baga' Li'.
 Tsaz naguínajgaca gapa gula'cuá'.
 Busunítu' yugu' yödzö gapa na' gula'cuá',
 ate' cuntu nu zoa röjné yugu' yödzö na'.
⁷ Zóatica'së' Xanru' Dios.
 Naguixjé' tsaz lataj ga rö'ë rinná bë'ë en ruchi'a rusöróë' quégaca bönachi.
⁸ Uchi'a usöróë' quégaca bönachi yödzölió lu le naca tsahui'.
 Uchi'a usöróë' quégaca yugu' yödzö lu le nácatë.
⁹ Gun chi'ë Xanru' Dios nupa náca gaca yechi'.
 Gácalenë' léguequi cate' nu gun léguequi zi'.
¹⁰ Ulu'zxöni ladxi' Li' nupa núnbë'gaca Lo'.
 Caní gaca, Xan, tu' cabí nusán ládxa'u nupa tu'guilaj Li'.
¹¹ Guli'gul-la yöl-la' ba queë' Xanru', zoë' ga na' nazí'i le Sión.
 Buli'siyón bönachi yugu' yödzö ca naca yugu' le nunë'.
¹² Biti' ral-la ládxe'ë nupa ta'guí'i ta'zaca' cate' tu'lidza Lë',
 tu' röjné léguequi Nu na' ruzí' lëbi nu ruti bönachi.
¹³ Buéchi' ladxi' neda', Xan.
 Buyú ca tun neda' zi' nupa tu'dí'i neda'.
 Ruchisu' Li' neda' cate' chirequi gátia'
¹⁴ para gaca usiyönda' bönachi yöl-la' ba quiu' Li'.
 Ga naca ga nu tsaza yödzö quiu' nazí'i le Sión,
 udzéjada' tu' nusöló' neda'.
¹⁵ Yöjbíxigaca bönachi yugu' yödzö lu yeru gula'chó'öna ga tsöjbíxigaca luzé' eguequi.
 Bila'röli ni'aguequi lu yöxaj bulu'cachi' para ila'zón léguequi.
¹⁶ Chinunë' Xanru' Dios ga núnbë'gaca bönachi Lë' tu' buchi'a busöróë' quéguequi.
 Lu lë na' nun nu ruá' dö' zón la' cuinsi.
¹⁷ Ila'yaza lataj chul-la nupa tuá' dö',

yúgu'të nupa na' nal-la ládxi'gaca Dios.

¹⁸ Calëga tsaz ulu'gá'ana cá'asö nupa ta'yadzaj ta'yudxi,
en bití' initi tsaz yöl-la' run löza quégaca nupa nácgaca yechi'.

¹⁹ Guyasa, Xan.

Bití' gu'u lataj tsépisë nu naca bönáchisö.
Buchi'a busöró quégaca bönachi yugu' yödzö.

²⁰ Buxós léguequi, Xan.

Ben ga ulu'únbë' le nácgaca, tu' nácgacasö bönachi.

10

¹ ¡Bizx que zu' zi'tu', Xan?

¡Bizx que rucachi' lo' cate' bi raca quia'?

² Lu yöl-la' run ba rahui quégaca nupa tuá' dö'
ta'bía no nupa nácgaca yechi'.

Ben ga ila'zón du yalaj na' nucáchi'gaca la' léguequisö.

³ Run ba zxön cuinë' bönni' ru'ë dö' ca naca le xihui' rizé ládxi'ë.

Bönni' ruhuídi'në' rulidza ditjé' luzé'ë, en ruzóë' Dios tsölä'alö.

⁴ Lu yöl-la' run ba zxön cuinë' bönni' huía' dö' bití' ruí' ládxi'ë Dios.

Rizá'asö ládxi'ë, rnnë': Bití' ca' zoa Dios.

⁵ Ruzi'ë xibé yúgu'të le runë'.

Bití' ca' réquibe'enë' zoë' Dios Nu ruchi'a rusöró quégaca bönachi.

Ruzóë' tsölä'alö nupa bití' ta'lé'e lë' dxi'a.

⁶ Rë' la' cuinsë': "Gatga ichíxida'.

Catu caz bi gaca quia'."

⁷ Didza' ru'ë nácgaca le rudxía dö', enca' le rizí' yë', en le rudidza' yudxi yugu' luzé'ë.

Ruí'tica'së' didza' le cabí nácatë, en le naca xihui'.

⁸ Rucachi' cuinë' yugu' lu yödzö.

Bagáchi'sö rútië' nupa bití' bi nabága'gaca.

Ruyúlanë' nu bi gaca gun que.

⁹ Ribözë' ga na' nucachi' cuinë' ca runba' bëdxi guixi'.

Ribözë' nu gaca sönë'.

Rizönë' bönni' yechi' lu du yalaj queë', en rá'ayöjë' lë' ga nagachi' queë'.

¹⁰ Riguinë' luyú nu na' nazönë'.

Zián nupa rucul-lë' len në'ë nal-la.

¹¹ Rë' la' cuinsë': "Nal-la ládxi'ë Dios.

Nucachi' lahuë', en bití' ca' rilé'enë' le runa'."

¹² ¡Guyasa, Xan!

¡Gulís no'o, Dios!

¡Bití' gal-la ládxi'u nupa ta'guí' ta'zaca'!

¹³ ¡Bizx que bönni' na' ru'ë dö' nuzóë' Dios tsölä'alö?

Gudxë' la' cuinsë': Bití' uzí' lë' Dios neda'.

¹⁴ Lí' bilé'e quézinu' lë' ni, Xan.

Ruí' ládxi'u nu riguí' rizáca', en nu risëbi ladxí',

en zóatica'su' gácalenu' léguequi.

Nu naca bayechi' rigú'u cuini lu no'o, Xan,

tu' zóatica'su' gácalenu' nu riyadza riyudxi.

¹⁵ Bugúa yöl-la' unná bë' quégaca nupa tuá' dö', en nácgaca xihui'.

Bubí' quéguequi ca naca xigua' nabága'gaca.

¹⁶ Inná bé'tica'së' Xanru' Dios.

Nupa tu'béaj ícjaguequi Xanru' ulu'niti tsaz lu xiyú cazë'.

¹⁷ Ruzé nagu', Xan, le ta'nábini Li' nupa nácagaca do' ladxi'.
Rutipu' ládxi'guequi, en ruzé nagu' chí'iguequi.

¹⁸ Ruchi'a rusöróu' quégaca nupa nácagaca uzëbi,
en nupa zoa nu ribía no léguequi,
para cabirö ulu'xösa bönachi yödzölió ni luzé'eguequi.

11

¹ Ruzxöni ládxa'a Xanru' gácalenë' neda'.

¿Naru' guíetso' neda':

“Buzxúnnaj lu guí'a ca runba' biguínido”?

² Buyútsöca', zóngaca nupa tuá' dö' yaga uxiti'.

Nuzóagaca yágado' lahui tuchi' lu du rusé,
para ilútië' bagáchi'sö nupa nácagaca dxi'a.

³ Channö ila'guínnaj yugu' le tu'zóa tsutsu le naca dxi'a,
¿bizxi caz gaca gun nu naca tsahui'?

⁴ ¿Zoa cazë' Xanru' yudo' lá'ayi queë'!

Yehua' yubá zoa ga rö'ë rinná bë'ë Xanru' Dios.

Rilé'e guiój lahuë' para uyúë' le tun bönachi.

⁵ Rizí' bë'ë Xanru' nu naca tsahui'.

Biti' rilé'enë' dxi'a nu ruá' dö', en nu raza ladxi' ta'dá'baga' yúlahui'.

⁶ Gunë' ga sáca'gaca nupa tuá' dö' le usuniti léguequi.

Ubi'ë quéguequi guí', en le ruquéla' guí', en tu bö' régui.

⁷ Caní gunë' Xanru' tu' náquië' tsahui', en nadxí'inë' le naca tsahui'.

Nupa tun le nácate' ila'lé'e lahuë'.

12

¹ Busölá neda', Xan, tu' cabirö zoa nitú nu naca dxi'a,
en bití' gaca nu idzöli nitú nu run ca rnna xtídza'a.

² Ta'zí' ye'e yúgu'të bönachi luzé'eguequi.

Lu yöl-la' rizí' yë' quéguequi tu'ilen luzé'eguequi didza' yúlajdo'.

³ Xan, buzóa dxisö nupa na' tu'i didza' yúlajdo',
en buzaga' ruí'igaca nupa tun ba zxön cuínguequi.

⁴ Ta'nná: “Gü'iru' didza' ca rizësö ládxi'ru',
ate' cuntu nu tá'baga' rë'u.

¿Nuzxi caz inná be'e rë'u ca naca didza' ru'iru'?”

⁵ Rnnë' Xanru': “Na'a guída' tu' nacuá' nupa tun zi' nupa ta'yadzaj ta'yudxi,
ate' rinné ládxi'gaca nupa ni tu' zoa nu ribía no léguequi.

Ca ta'zësö ládxi'gaca, la' guídatea' dusölá' léguequi.”

⁶ Huáca uzxöni ládxi'ru' didza' ru'ë Xanru'.

Nácagaca ca guíë plata ba nequi,
le nudxi'a gadxi luzuí tu lu guí lälë'e.

⁷ Li' caz, Xan, gun chí'u léguequi,

en usöló' léguequi lu ná'agaca nupa tuá' dö' na'a dza.

⁸ Gátitës nacuá' nupa tuá' dö',

cate' tun zxön bönachi le ruá' dö'.

13

¹ ¿Gáca'xte caz gal-la ládxi'u neda', Xan?

¿Naru' tsaz gal-la ládxa'u neda'?

¿Gáca'xte caz ucache' cuinu' lahua'?

² ¿Gáca'xte caz gun bayudxi guá' ilena' le réquida' zi'?

¿Gáca'xte caz hu'ínida' rēla, en te dza?

¿Gáca'xte caz ucúl-lágaca neda' nupa ta'dá'baga' neda'?

³ Buyú neda', Xan, en bubí'i didza'.

Butipa ládxa'a para cabí gátia'.

⁴ Ní'irö bití' gaca ila'nná nupa ta'dá'baga' neda', bití' ila'nná: "Bucúl-laru' lē'."

Bití' gaca ulu'dzeja tu' nótjada' ládxa'a neda'.

⁵ Neda' ruzxöni ládxa'a yöl-la' dxi'i ladxi' quiu'.

Rudzéjada' tu' rusöló' neda'.

⁶ Gul-la' queë' Xanru',

tu' benë' quia' le naca dxi'a.

14

¹ Lu icja ládxi'da'ahuë' rnnë' bönni' tu' canöz, rnnë': Bití' zoa caz Dios.

Nachixi nanítigaquië' bönni' caní, en tunë' le cabí rilé'enë' dxi'a Dios.

Cuntu nu zoa nu run le naca dxi'a.

² Ga zoë' Dios yehua' yubá buyúë' luyú ni ga nacuá' bönachi

para ilé'enë' channö zoa nu réajni'i, nu na' riguilaj Dios.

³ Yúgu'të' nadódigaquië' tsölá'alö.

Nachixi nanítigaquië' tu tuë'.

Cuntu nu zoa nu run le naca dxi'a, nitú bönachi.

⁴ ¿Naru' cabí ta'yéajni'i nupa tuá' dö'?

Le tun nupa na' naca tsca tagu bönachi quia' ca nu ragu yöta.

Bití' ca' tu'lidza neda', Xángaca bönachi.

⁵ Lu yöl-la' radxi ridzöbi quéguequi ta'zxizi

tu' ta'lé'e Xanru' Dios, en zóalenë' bönachi tsahui'.

⁶ Tu'titaj xtídza'gaca nupa nácagaca yechi',

pero nupa ni tu'zxöni ladxi' gácalenë' Xanru' léguequi.

⁷ Raca ládxa'a irúaj Sión Nu usölá bönachi Israel.

Cate' gunë' Xanru' ga ulu'dxín bönachi queë' nadzúngaca xilátjaguequi,

ulu'dzeja xzí'ini xi'sóë' Jacob, bönachi Israel, en ulu'zí' xibé' Dios.

15

¹ ¿Nuzxi caz bönachi tsöjsóa xilatju', Xan?

¿Nuzxi caz tsöjsóa ga naca lá'ayi quiu'?

² Nu na' naca idú ladxi', en run le naca tsahui',

en lu icja ládxi'da'ahui ruí'i didza' le nácatë.

³ Nu na' bití' rizí' quidza' bönachi,

en bití' ruá' dö' que luzé'e,

en bití' ruzé naga nu rizí' quidza' luzé'e.

⁴ Nu na' bití' run bal nu ruá' dö',
pero run bal nupa tun zxön Dios,

en sal-la' bi uniti cate' chinún xtídza', bití' ca' rutsá' didza' na'.

⁵ Nu na' bití' rizí' icja dumí cate' runödzej dumí que tu chí'ido'sö,

en bití' rizí' dumí para sí' yë' ca naca le nun nu bití' nabaga' xigua'.

Nu na' run yúgu'të' le caní bití' ca' idzá' xilataj.

16

¹ Ben chí'i neda', Dios, tu' ruzxöni ládxa'a Li'.

² Lu icja ládxi'da'ahua' gudxa'-në' Xanru':

"Li' nacu' Xana'.

Bíti'rö bi zoa quia' le naca dxi'a, pero tuzu' Li'."

³ Riyaza ládxi'lëna' nupa nácagaca queë' Dios luyú ni,
en nupa nácagaca idú ladxí'.

⁴ Ila'yán le ila'guí'i ila'zaca' nupa ta'yéaj ladxí' yugu' dios izá'a.

Biti' ca' cu'a láhuiguequi rön ca tun bönachi na',
en bití' ulidza' lágaca dios na'.

⁵ Náquië' Xanru' Dios Nu nabánida', en Nu ruzi'a xibé.

⁶ Li', Xan, nuzú' xilatja'.

Lataj na' nuzú' quia' naca le ruzi'a xibé,

en lachi naca lataj na' nequi quia'.

⁷ Gul-la' yöl-la' ba queë' Xanru', Nu rigú'u yöl-la' neda' le naca tsahui',
ga ridxintë ruzéajni'inë' neda' cate' ni' rasia'.

⁸ Chinuna' ga zóatica'sé' Xanru' lahua'.

Tu' zoë' cuita' bití' bi utsá' neda'.

⁹ Que lë ni na' budzeja ládxa'a, en buzi' xibé ládxi'da'ahua',
ate' gun löza le naca' cate' igácha'a yeru ba,

¹⁰ tu' cabí ucá'anú' neda' lataj chul-la,
en bití' gu'u lataj uniti nu nequi quez quiu'.

¹¹ Nunú' ga núnbë'a nöza iché' neda' ga soa' ibana'.

Ga zu' Li' gata' quia' yöl-la' rudzeja idú,
ate' cuitu' Li' uzí'tica'sa' xibó'.

17

¹ Ruzé nagú' neda', Xan.

Lu le naca tsahui' quia' rulidza' Li'.

Bë' ladxí' le rinábida' Li' tu' cabí ca' rizí' yë'a.

² Buchi'a busöró quia'

tu' runu' Li' le naca tsahui'.

³ Núnbë'u Li' le yu'u ládxi'da'ahua'.

Ruyú' neda' chi'i dzó'ölö.

Guzxí' bë'u neda', ate' burúaja' tsahui'.

Biti' ca' ruá'a didza' le cabí naca idú dxi'a.

⁴ Runa' ca rinná bë' xibá quiu',

en bití' ca' ruá'a dö' ca tun bal-la bönachi.

⁵ Ridática'sa' la' nöza tsahui' quiu',

en bití' ca' ridöda' tsölá'alö.

⁶ Rulidza' Li', Dios, tu' rubi'u didza'.

Ruzé nagú' yugu' didza' ruá'a.

⁷ Buluí'i lahui yöl-la' dxi'i ladxí' quiu'.

Rusölá casu' nupa tu'zxöni ladxí' Li'

lu ná'agaca nupa ta'dá'baga' léguequi.

⁸ Ben chi'i neda' ca run chi'u la' guiöj lo casu'.

Bucachi' neda' cuitu' Li' ca runba' böra, rucáchi'gacaba' bórado' zcan xílaba',

⁹ para cabí bi ilún quia' nupa tuá' dö',

nupa na' ta'lé neda', en nagú'ugaca neda' lé'ajlö.

¹⁰ Biti' ca' zóalen léguequi yöl-la' ruhuéchi' ladxí',

ate' tuí' didza' lu yöl-la' run ba zxön cuínguequi.

¹¹ Gátitës ga ridöda' ta'gú'u neda' lé'ajlö,

en té'ëni ila'guín neda' luyú.

¹² Nácagaquië' ca yugu' bédxi guíxi'do'.

Té'ënë' ulu'sunítië' neda'.

Nácagaquië' ca yugu' bédxi guixi'.

Nucachi' cuíngaquië' para ila'zönë' neda'.

¹³ Gudá, Xan, gudá'baga' nupa ta'lé neda', en bucul-la léguequi.

Busölá neda' lu ná'agaca nupa tuá' dö', ugunu' dxin guíë tuchi' quiu'.

¹⁴ Lu yöl-la' huáca zxön quiu' busölá neda', Xan,

lu ná'agaca nupa tu'z'í' xibé na'a dza,

nupa na' nuhuólaj nudzé'egaca yöl-la' tsahui' quiu'.

Nayángacabi' xzí'inigaquië',

ate' tu'cá'anë' lu ná'agacabi' le dë sizxöni quégaquië'.

¹⁵ pero neda' ilé'eda' lo' tu' naca' tsahui',

en tsaza ládxa'a gaca' ca nacu' Li' cate' ubana'.

18

¹ ¡Nadxí'ide'eda' Li', Xan!

¡Li' rutipa cazu' ládxa'a!

² Ruzóë' Xanru' neda' tsutsu, en rapa chi'ë neda', en rusölé' neda'.

Náquië' Dios quia', en Nu rutipa ládxa'a,

ate' ruzxöni ládxa'a Lë'.

Rácalenë' neda' lu gudil-la: Rusölé' neda', en rizönë' neda'.

³ Rulidza'-në' Xanru' Nu ral-la' cú'uru' yöl-la' ba,

ate' usölé' neda' lu ná'agaca nupa tu'dí'i neda'.

⁴ Ia'láti'sö la' gútiá',

ate' yöjbaga' neda' le usuniti neda', le ben ga gúdxida'.

⁵ Ia'láti'sö la' yöjtsu'a lataj chul-la que yöl-la' guti,

tu' la' gútitia'.

⁶ Lu le guca quia' bulidza'-në' Xanru'.

Bulidza'-në' Dios quia' para gácalenë' neda'.

Ga na' zoë' lataj lá'ayi queë' biyönnë' chi'a.

Buzé' naguë' le gunabi yúdxida' Lë'.

⁷ Ní'irö gudödi budó' zxu', en guzxizi luyú.

Guzxízida' xilíbigaca yugu' guí'a sibi.

Guzxízigaca tu' gulénë' Lë'.

⁸ Birúaj dzön zxínë'ë,

ate' birúaj guí' ru'ë le buzegui le dë idú gásibi'ilë',

ate' buguela' guí' yugu' bo' yalaj.

⁹ Benë' ga bötaj lúzxiba, en bötajë' Lë' cazë',

ate' guzóa zcan ni'ë le naca chul-la.

¹⁰ Gudödë' lu bö'ös dxíë' tu le nayépisë nazí'i le querubín.

Carelö gudödë' tu lu bö' budunu'.

¹¹ Busubaga' cuinë' le naca chúl-lasö.

Lë na' naca böaj gasaj le riché'lë'e nisa.

¹² Lu le rëpi yösa queë' lu böaj gasaj na'

bila'ruáj bo' yalaj, en guió'j bögui' yöla sunna.

¹³ Gunné guziú' que chi'ë Xanru' lúzxiba xitsá'.

Biyón chi'ë Dios nayépisëtë'rë',

lu dzön, en yugu' lu bo' yalaj, en lu guió'j bögui' yöla sunna.

¹⁴ Gusól-lë'ë yugu' yaga lahui tuchi' queë', en bësílásië' nupa na' tu'dí'i neda'.

Gusól-lë'ë yugu' yösa queë' yugu' le bulu'cul-la léguequi.

¹⁵ Ní'irö bilá' lahui le zoa znan nísado',
ate' bilá' lahui xilibi yödzölió,
cate' buzenu' bach nupa bití' ta'lé'e Li' dxi'a, Xan,
en lu yöl-la' rilé quiu' bulidza zi'u léguequi.

¹⁶ Bötjé' zaca' xitsá'alö, en gudélé'ë neda'.
Bubéajé' neda' lu nisa zili.

¹⁷ Busölé' neda' lu na' nu bití' rilé'e neda' dxi'a, en nál-latërö,
enca' lu ná'agaca nupa tu'dí' neda', en nál-lágacatërö ca neda'.

¹⁸ Cate' ní' chizóa inítia' gula'zóa régu'ë neda',
pero Xanru' gúcalenë' neda'.

¹⁹ Bubéajé' neda', en buzöë' neda' tu lu lataj zxon.

Busölé' neda' tu' guyaza ládxë'ë neda'.

²⁰ Bubi'ë Xanru' quia' tsca le tsahui' naca',
en benë' quia' le naca dxi'a tu' cabí nabága'a xiguia',

²¹ tu' runa' ca naca le rusédinë' Xanru' neda',
en bití' ca' ridá'baga'a Lë'.

²² Runa' ca ta'nná xibá nunë' Xanru',
en bití' ridá'baga'a le rinná bë' naguixjé' Lë'.

²³ Bití' bi le naca dö' nabága'a lahuë' Lë',
ate' ben chi'a le innía' para cabí gu'a dö'.

²⁴ Que lë ni na' bubí'ë Xanru' quia' tsca le tsahui' naca',
en tu' cabí nabága'a xiguia' lahuë' Lë'.

²⁵ Ruhuéchi' ládxu'u nupa tu'huechi' ladxi' luzé'eguequi,
en nacu' idú dxi'a len nupa nácgaca idú dxi'a.

²⁶ Rulu'i cuinu' idú ladxi' len nupa nácgaca idú ladxi',
pero ridá'bagu'u nupa ta'dá'baga' xtídzu'u.

²⁷ Rusöló' nupa ta'guí' ta'zaca',
pero ruzötju' nupa tun ba rahui.

²⁸ Ruquéla' cazu' guí' quia', Xana' Dios,
en rigú'u quia' bení' cate' ridá' ga chul-la.

²⁹ Lu yöl-la' huáca queë' Dios rucul-la' bönni' guizxi yu röjáquië' gudil-la.

Tu' zóalenë' Dios quia' neda',
rixítí'a ribixa' lu zö'ö run chí'i léguequi.

³⁰ Idú dxi'a nácgaca le runë' Dios.

Nurúaj tsahui' xtídzë'ë.

Rapa chí'ë yúgu'të nupa ta'nábini Lë' gácalenë' léguequi.

³¹ ¡Tuzë' Xanru' náquië' Dios!

¡Tuzë' Dios rapa chí'ë rë'u!

³² Dios ñi ruzalë' neda',
en runë' ga naca' idú ládxa'a.

³³ Runë' ga nácgaca ní'a ca ní'agacaba' bidxina' guixi',
en ruzöë' neda' yugu' lu guí'a zxon.

³⁴ Rusédinë' neda' para gaca tseja' gudil-la,
en para gaca uguna' dxin uxiti' yaga néquini guíë bronze.

³⁵ Lu yöl-la' rusölá quiu' run chí'u neda'.

Len no'o nál-la rizönu' neda',
en lu yöl-la' dxi'i ladxi' quiu' nunu' ga nayépisëtëra'.

³⁶ Ruchi'u nöza ga ral-la' töda',
en runu' ga biti' cuila'.

³⁷ Guzóa régu'a nupa tu'dí'i neda', en bucul-la' léguequi.
Biti' buécja' ga bidxintë busunítia' léguequi.

³⁸ Gudina' léguequi luyú, ate' biti' guca ulu'huóása.

Gula'dzó'ö zخان ni'a.

³⁹ Benu' neda' nál-la para tseja' gudil-la,
en benu' ga bucul-la' nupa gula'dá'baga' neda'.

⁴⁰ Benu' ga bulu'zxunnaj lahua' nupa biti' ta'lé'e neda' dxi'a,
ate' busunítia' nupa na' bulu'dí'i neda'.

⁴¹ Bulu'lidza nu gácalen léguequi,
pero cuntu nu zoa usölá léguequi.

Bulu'lidza ca' Xanru', pero biti' bubí'ë didza'.

⁴² Buzxuzxja' léguequi ca bëchtö yu naché' lu bö'ös.

Buliba' léguequi ca ruliba' guna' la' nöza.

⁴³ Busöló' neda' lu ná'agaca nupa ta'dá'baga',
en nunu' ga rinná bé'eda' bönachi zían yödzö.

Tun ca rnna xtídza'a bönachi biti' núnbé'a zí'alö.

⁴⁴ Cate' ta'yöni neda', la' tun ca rnna xtídza'a.

Tadxi neda' bönachi zían yugu' yödzö izá'a.

⁴⁵ Ta'cuidi' ladxi', en lu yöl-la' rizxizi quéguequi
ta'rúaj yugu' lu yödzö tsutsu quéguequi.

⁴⁶ ¡Zoë' nabanë' Xanru'!

¡Yöl-la' ba Nu na' run chí'i neda'!

¡Gulí'gún zxön Dios Nu rusölá neda'!

⁴⁷ Náquië' Dios Nu rizí' la nupa tu'dí'i neda',
en runë' ga tadxi bönachi guizxi yu neda'.

⁴⁸ Rusölé' neda' lu ná'agaca nupa biti' ta'lé'e neda' dxi'a.

Le nácatë runë' ga rucul-la' nupa ta'dá'baga' neda',
en rusölé' neda' lu na' bönni' ridzá'a.

⁴⁹ Que lë ni na' guía' Li': Xclenu' Xan, lógaca bönachi zían yödzö,
en gul-la' yöl-la' ba que Lo' La'ayi.

⁵⁰ Rusölá cazë' Xanru' bönni' rinná bë'ë uláz queë',

en nadxí'itica'së' nu na' nabó cazë',

nu na' naca David, en yugu' zxí'ini xi'sóë' ga idxinrö dza udxi.

19

¹ Yugu' le nacua' lúxiba tu'luí'i lo yöl-la' zxön queë' Dios,
ate' yugu' le raca lu bö'ös nácagaca bë' le nunë'.

² Yugu' dza tu'zéajni'i,
en yugu' dzö' tu'luí'i lo yöl-la' réajni'i.

³ Biti' zoa didza' tuí'i, en biti' riyón tu le ta'nná.

Biti' riyón chí'iguequi.

⁴ Le tu'zéajni'i ridxín ga naguéla'të luyú,
en le tu'sedi ridxín idútë yödzölió.

Ga na' nacua' nuzóë' Dios xilataj gubidza,

⁵ le naca ca tu bönni' utsaga në'ë rirúajë' yu'u,
en naca ca' ca tu bönni' nál-la rudzéjanë' cate' zéajë' carelö lu huitaj.

⁶ Ga naguela' lúzxiba rilén gubidza,
en ridödi ga ridxintë ga ribía.
Biti' bi zoa le cabí rutsë'e gubidza na'.

⁷ Tsahui' naca ca rinná bë'ë Xanru', en run ga huöaca ládxi'ru'.
Idútë li naca didza' nuzóë' Xanru', le run ga réajni'i nu naca nöxaj ládxi'.
⁸ Tsahui' nácgaca xibá queë' Xanru', le tun ga rudzeja ládxi'ru'.
Nácgaca idú dxi'a le gunná bë'ë Xanru', en ta'gú'u bení' icja ládxi'do'oru'.
⁹ Dxí'ado' naca gádxiru'-në' Xanru', para sóatica'siru'.
Idú li naca ca ruchi'a rusöröë' Xanru' bönachi, en idú tsahui'.
¹⁰ Nazáca' gacatërö didza' na' ca oro, enca' ca oro ba nequi.
Nácgacatërö zxixi ca bidxina' buz, en ca le zxixi queé'ba'.
¹¹ Didza' na' tu'zéajni'i neda', huen dxin queë'.
Uzítërö xibé nu run ca rnna xtídzë'ë na'.

¹² ¿Nuzxi caz gaca inóz channö richixi rinigui?
Busölá neda' lu dul-la' nuna' le cabí gúquibe'eda' bena'.
¹³ Ben chí'i neda' para cabí udödi cuina' lu dul-la',
para cabí inná be'e neda' lë na' naca dul-la'.
Ní'irö ugá'ana' tsahui', en bití' ibága'a xiguia'.
¹⁴ Ben ga ilaca didza' ruá'a, en le rizá' ládxa'a ca raza ládxi'u Li'.
Nacu' Xana' ruzú' neda' tsutsu, en ruhuöá'au' neda'.

20

¹ Rinábida'-në' Xanru' uzé' nague' li' cate' idxín dza qui'i sacú'u.
Dios queë' Jacob gácalenë' li'.
² Rinábida'-në' isól-lë'ë le gácalen li' le irúaj lataj lá'ayi queë'.
Lë na' irúaj Sión gun ga gacu' tsutsu.
³ Rinábida'-në' tsöjnenë' yúgu'të le gulú'u queë',
en si' lu në'ë le buzégui'u lahuë'.
⁴ Rinábida'-në' gunné' quiu' tsca naca le rizé ládxi'u,
en gunë' ga gacatë yúgu'të le rizá' ládxi'u.
⁵ Udzéjatu' cate' usölé' li',
en uchísatu' le gaca bë' rulidztu'-në' Dios queéru'.
Rinábida'-në' Xanru' gunné' quiu' yúgu'të le rinábinu' Lë'.
⁶ Na'a nözda' rusölé' Xanru' nu nabó cazë'.
Riyönnë' nu na' nabóë' ga ni' zoë' yehua' yubá la'ayi queë'.
Isól-lë'ë yöl-la' huáca idú queë' le usölá nu na'.
⁷ Nacuá' nupa tu'zxöni ládxi' yugu' carreta que gudil-la,
ate' nacuá' bönachi yúbölö tu'zxöni ládxi' yugu' böa',
pero rë'u ruzxöni ládxi'ru' Lë' Xanru' Dios.
⁸ Ta'cuídi'në' nupa na', en ta'dzö'ë,
pero rë'u ni zuíru', en zóaru' tsutsu.

⁹ Busölá netu', Xan, tu' nacu' Nu rinná be'e netu'.
Rinábitu' Li' uzé' nague' netu' cate' ulídzatu' Li'.

21

¹ Rudzéjanë' bönni' rinná bë'ë tu' zóalen lë' yöl-la' huáca quiu' Li', Xan.
Tu' busöló' lë', yénni'tërö rudzéjanë'.
² Bunödju' queë' le rizé ládxi'ë.
Biti' gudá'bagu'u le gunábinë' Li'.

³ Tu' raza ládzu'u lë' ruzú' queë' yugu' le naca dxi'a.
Nudxíu' icjë' tu le néquini oro idú.

⁴ Gunábinë' Li' gu'u queë' yöl-la' na'bán, ate' bë'u le queë'.
Nunu' ga sóatica'së' ibanë' yugu' dza si' zaca.

⁵ Zxöntë naca yöl-la' zxön queë' tu' nusöló' lë'.
Nunu' lë' bal, en nunu' ga nayépisë'.

⁶ Zóatica'sö le naca dxi'a nuzú' queë'.
Runu' ga rudzëjade'enë' tu' zóalenu' lë'.

⁷ Caní raza queë' bönni' na' rinná bë'ë tu' ruzxöni ládxe'ë Xanru'.
Biti' bi utsá' lë' tu' ruhuéchi' ládxe'ë Dios nayépisëtërë' lë'.

⁸ Huadeli' no'o ga nacua' yúgu'të nupa ta'dá'baga' Li'.
Huadeli' no'o ibëla ga nacua' nupa tu'dí'i Li'.

⁹ Cate' idxín dza usiúdxu' léguequi gaca quéguequi ca tu guí' ruzegui bla'do'.

Usunítu' léguequi, Xan, lu yöl-la' rilé quiu',
ate' tséguiguequi tu lu guí' zxön.

¹⁰ Ucuítu' yugu' xzí'ini xi'sóagaca nupa na' luyú ni,
en ubéaju' yugu' xzí'iniguequi ládjagaca bönachi.

¹¹ Caní gunu' tu' gulé'ë'niguequinë' ilu'ë dö' quiu'.
Gulún xtídza'gaquië' bi ilunë', pero biti' gaca ilunë' ca rnna xtídza'gaquië',

¹² tu' gunu' Li' ga ulu'zxúnnajë'.
Ichisu' uxiti' yaga quiu', en gunu' léguequi huë'.

¹³ Len yöl-la' huáca quiu', Xan, uxicju' lu gudil-la.
Gúl-latu', en cú'utu' yöl-la' ba que yöl-la' huáca quiu'.

22

¹ Dios quia', Dios quia', ¿bizx que nusán no'o neda'?
¿Bizx que biti' riyönnu' le rinnëda' ládxa'a, en biti' rácalenu' neda'?

² Dios quia', idú dza rulidza' Li', pero biti' bi didza' rubi'u.
Idú yëla rulidza', en biti' ca' rasia'.

³ Lá'ayi nacu' Li'.

Zu' ga riyón yöl-la' ba ta'gú'u bönachi Israel Li'.

⁴ Bulu'zxöni ládxe'ë xuz xtó'otu' Li'.
Bulu'zxöni ládxe'ë Li', ate' busöló' légaquië'.

⁵ Bulu'lidzë' Li', ate' gúcalenu' légaquië'.
Bulu'zxöni ládxe'ë Li', en biti' bulu'tuí'inë'.

⁶ Naca' neda' ca tuba' bëla guna', en calëga bönni'.
Tu'dí'i bönachi neda', en tu'cá'ana neda' cá'asö.

⁷ Yúgu'të nupa ta'lé'e neda' tu'titaj neda'.
Ta'salaj ruí'iguequi lu yöl-la' rutitaj, en tu'tá'ícjaguequi, ta'nná:

⁸ "Lë' buzöni ládxe'ë Xanru' para usölé' lë'.

Xanru' usölé' lë' channö tsaza ládxe'ë lë'."

⁹ Nacu' Li' Nu guléaj neda' lé'ënu xiná'a.

Benu' ga ruzxöni ládxa'a Li'
cate' ni' gúdx'a'a luchú'unu xiná'a.

¹⁰ Nagá'ana' lu no'o Li' ga gudéla'të gulja'.
Ga gudéla'të buzóanu xiná'a neda' nacu' Dios quia'.

¹¹ Biti' su' zi'tu' ga ni zoa', tu' zoa' gagu le gun neda' zi',
ate' cúnturö nu zoa nu gácalen neda'.

¹² Gula'gu'ë neda' lé'ajlö ca tunba' yugu' bëdxi.

Ca yugu' bēdxi que yōdzō Basán gula'bía di'ē neda'.

¹³ Ta'salaj ruá'agaquiē' lahua' neda'

ca runba' bēdxi guixi', ridunba', en ribódxí'aba'.

¹⁴ Nuhuóáca' ca nisa nalalaj luyú, ate' nazángaca bēch dxita quia'.

Nuhuóáca lādxi'da'ahua' ca bidxina' buz la lu lē'a.

¹⁵ Nacuidi' yōl-la' huáca quia' ca tu rō'ō nalá'a, ate' da' lúdxá'a chichja'.

Nuzú' neda' lu bēchtō yu que yōl-la' guti.

¹⁶ Ta'gu'ē neda' lé'ajlō ca tunba' yugu' bō'cu'.

Nagú'ugaquiē' neda' lé'ajlō bönni' tu'ē dō'.

Nuzóagaquiē' yeru blaga na'a, en ni'a.

¹⁷ Nalá'gaca yúgu'tē dxita néquinida'.

Ta'né'ē neda', en tu'yú yénniē' neda'.

¹⁸ Ta'guísiē' zxa' que queégaquiē', en tu'yúé' le gaca bē' lahui lari' rixóa cúdza'a.

¹⁹ Biti' gá'anú' zitu', Xan.

Gúcalentē neda', Li', Nu naca yōl-la' huáca quia'.

²⁰ Busölá neda' lu guíē tuchi'.

Busölá yōl-la' na'bán quia' lu ruá'agacaba' bō'cu'.

²¹ Busölá neda' lu ruá'agacaba' bēdxi guixi',

en lu lúzugacaba' bēdxi gú'una.

Li' riyón quézinu' chí'a.

²² Usiyōnda' yugu' böchi' luzá'a ca naca Lo'.

Gatsaj láhui'lō ga na' tu'dubi bönachi lo' cu'a Li' yōl-la' ba.

²³ ¡Guli'cu'ē Xanru' yōl-la' ba, libí'ili' na' rádxi'li'-né'!

¡Guli'gun zxōn Lē', yúgu'tēli' xzí'ini xi'sóé' Jacob!

¡Guli'gadxi Lē', yúgu'tēli' xzí'ini xi'sóé' Israel!

²⁴ Caní ral-la' gunli' tu' cabí bucá'anē' cá'asō,

en biti' budí'inē' nupa gula'gu'i gula'zaca',

en biti' bucachi' lahuē' para cabí ilé'enē' léguequi,

pero cate' bulu'lidza Lē', biyōnnē' léguequi.

²⁵ Cu'a Li' yōl-la' ba ga tu'dubi bönachi guizxi yu lo'.

Lógaca nupa tadxi Li' usudxina' le guzxi' lu na'a guna' quiu'.

²⁶ Ilágugaca nupa nácagaca nōxaj ladxi', en ulu'huölaj ulu'dzē'e.

Nupa ta'guilaj Xanru', en ta'gú'u Lē' yōl-la' ba ulu'zítica'sō xibé'.

²⁷ Bönachi idútē yōdzölió tsöjnégaca Xanru', en ulu'huóáca queé'.

Bönachi yúgu'tē yōdzö luyú ila'gú'u Lē' yōl-la' ba.

²⁸ Caní gaca tu' dē lu nē'ē Xanru' inná bē'ē.

Inná bē'enē' yúgu'tē bönachi luyú.

²⁹ Yúgu'tē nupa dē lu ná'agaca luyú ni ilágugaca, en ila'gú'u Lē' yōl-la' ba.

Yúgu'tē nupa ila'niti ulu'zechu zxi'bigaca lahuē' Lē',

nupa na' bití' ca' gaca ilún chí'i yōl-la' na'bán quéguequi.

³⁰ Xzí'ini xi'sóali' ilún xichinē'.

Ila'guixjö' lē ni ca naca queé' Xanru' para ila'yōni nupa tsöjsétégaca luyú ni.

³¹ Ilidē', en ulu'luí'inē' lahui náquiē' Xanru' tsahui'.

Ulu'siyōnnē' ca' nupa ral-la' ilalaj ca naca yugu' le benē' Lē'.

23

¹ Ruyú cazē' Xanru' Dios neda' ca tu nu ruyú bō'cu' zxila'.

Biti' bi riyádzjada'.

² Runë' ga ruzí' ládxa'a ca túngacaba' bö'cu' zxila' tu'zí' ládxi'ba' gapa dëda' le iláguba'.

Ga naca ra' nisa rizá' tsahui' ládxi'do' riché'ë neda'.

³ Runë' ga ruhuóaca ládxa'a.

Riché'ë neda' ga naca nöza tsahui' tu' nadxí'inë' neda'.

⁴ Sal-la' ridá' ga zoa bönadxi gátia',

biti' bi gádxida' tu' zóalen cazú' neda', Dios.

Len xiyaga quiu', en no'ó rutipu' ládxa'a.

⁵ Ga nacua' nupa ta'zóa regu' neda', ní' rucú'u quia' le gahua'.

Rigú'u icja' le za rilá' zxixi, en ruliru' le gu'jada'.

⁶ Le nácatë dusóalengaca neda' le naca dxi'a,

en yöl-la' dxi'i ládxi' queë' yúgu'të dza soa' ibana',

ate' lu yu'u lidxë' Xanru' sóatica'sa'.

24

¹ Nequi queë' Xanru' Dios luyú ni, en yúgu'të le dë lahui.

Nequi queë' yödzölió, en yúgu'të nupa nacua' ni'.

² Naguixjë' le lahui nísado' rö'ö zxánilö,

en nuzóë' xilibi luyú ga rë' znan nísado'.

³ ¿Nuzxi caz bönni' dë lu në'ë cuenë' gu'a lá'ayi queë' Xanru'?

¿Nuzxi caz gaca tsaza lu lataj lá'ayi queë'?

⁴ Huáca bönni' na' naca dxi'a ca runë', en ca rizá' ládxi'ë,

bönni' na' biti' runë' bal budó' guiój budó' yaga,

en biti' rizí' yë'ë cate' rizí' lu në'ë bi gunë'.

⁵ Gunë' Xanru' ga gaca dxi'a queë' bönni' na'.

Caní gunné' Dios, Nu rusölá' lë', en náquië' tsahui'.

⁶ Caní nácagaca nupa ta'dxín lahuë' Dios,

nupa na' ta'biga' lahuë' Dios quégaca zxf'ini xi'sóë' Jacob.

⁷ Gulí'salaj ga nu riyaza yödzö la'ayi.

Gulí'salaj ga nu riyaza xilatjë' Dios le nuzóë' tsaz,

ate' tsázië' Bönni' unná bë' nayépisëtëre'.

⁸ ¿Nuzxi caz Bönni' unná bë' nayépisëtëre' na'?

Náquië' Xanru' nál-latëre', en nápatëre' yöl-la' huáca,

Lë', Xanru', Nu rideli' lu gudil-la.

⁹ Gulí'salaj ga nu riyaza yödzö la'ayi.

Gulí'salaj ga nu riyaza xilatjë' Dios le nuzóë' tsaz,

ate' tsázië' Bönni' unná bë' nayépisëtëre'.

¹⁰ ¿Nuzxi caz Bönni' unná bë' nayépisëtëre' na'?

Náquië' Xanru' Dios quéguequi ni'a në'ë guizxi yu.

Lë' náquië' Bönni' unná bë' nayépisëtëre' na'.

25

¹ Idú ládxa'a rulidza' Li', Xan.

² Ruzxöni ládxa'a Li', Dios quia'.

Ben ga cabí utuí'ida',

en cabí ulu'dzeja nupa biti' ta'lé'e neda' dxi'a.

³ Biti' ila'bó' böniga nupa tun löza Li',

pero ulu'tuí'i nupa ta'dá'baga' xtídz'u.

⁴ Buluí'i neda' le ré'ënu' guna', Xan,
en buzéajni'i neda' le raza ládxa'u Li'.

⁵ Busedi neda' para guna' ca naca le naca idútë li quiu'.
Tu' nacu' Dios, Nu rusölá neda'
gúntica'sa' löza Li'.

⁶ Yöjné ca naca yöl-la' dxi'i ladxi' quiu', Xan,
en yöl-la' ruhuéchi' ladxi' quiu', yugu' le nacua'tica'sö.

⁷ Buniti lo neda' ca naca dul-la' bena',
en le gudá'baga'a Li' cate' ni' zoa' iz cuidi' quia'.
Lu yöl-la' ruhuéchi' ladxi' quiu',
en yöl-la' dxi'i ladxi' quiu' yöjné neda', Xan.

⁸ Náquië' Xanru' dxi'a tsahui', en li ladxi'.
Que lë ni na' rulu'inë' nupa tun dul-la' le ral-la' ilún.

⁹ Ca naca le naca tsahui' riché'ë Dios nupa nátagaca nöxaj ladxi',
en rulu'inë' nupa nátagaca do' ladxi' le ré'ënë' ilún.

¹⁰ Lu yöl-la' ruhuéchi' ladxi' queë', en yöl-la' rusudxín didza' queë',
riché'ë Xanru' nupa tun ca rinná bë' xibá naguixjë',
en ca naca didza' rucá'ana tsahui' nunë'.

¹¹ Tu' nacu' dxi'i ladxi', Xan,
buniti lo neda' ca naca dul-la' nuna', le naca dul-la' zxön.

¹² Nupa tun bal Xanru'
ulu'i quézinë' léguequi le naca dxi'a le ral-la' ilún.

¹³ Ulu'zí' xibé le naca dxi'a gunné' quéguequi,
ate' guequi quégacabi' xzí'ini xi'sóaguequi luyú ni.

¹⁴ Xanru' zóaléntica'së' nupa tun ca rnna xtídzë'ë,
en ruzéajni'inë' léguequi ca naca didza' rucá'ana tsahui' nunë'.

¹⁵ Ruyútica'sa' guídë' Xanru' gácalenë' neda',
tu' usölë' neda' lu na' nu ré'ëni sön neda'.

¹⁶ Buécja quia', Xan, en buéchi' ladxi' neda',
tu' zoa' tuza', en nacuídi'da'.

¹⁷ Nayán le tu'quí' tu'saca' neda'.
Busölá neda' lu le ruúbi ruguí' ládxi'da'ahua'.

¹⁸ Buyú ca riguí' rizáca'a, en rudú ládxa'a.
Buniti lo neda' ca naca yugu' dul-la' nabága'a.

¹⁹ Buyú ca nayán nupa tun neda' zi'.
Buyú ca tu'dí' neda'.

²⁰ Ben chi'i neda', en busölá neda'.
Biti' gu'u lataj utuí'ida' tu' ruzxöni ládxa'a Li'.

²¹ Ben ga ilún chi'i neda' le naca idú ladxi',
en le naca li ladxi', tu' runa' löza Li'.

²² Buá'au' bönachi Israel,
Dios lu yugu' le raca quéguequi.

26

¹ Guléaj neda' tsahui', Xan, tu' runa' le naca dxi'a,
en idú ládxa'a ruzxöni ládxa'a Li'.

² Buyú lu icja ládxi'da'ahua', Xan, en guzxí' bë' neda'.
Buyú le rizá' ládxa'a, en le ribequi icja',

³ tu' riché' yöl-la' dxi'i ladxi' quiu' neda',
ate' runa' ca naca le naca idútë li quiu'.

⁴ Biti' runa' tsözxón nupa ta'zì' yè',
 en bitì' ridálena' nupa tu'lu'isö cuínguequi tsahui'.
⁵ Biti' raza ládxa'a udúbilena' nupa tuá' dö',
 en bitì' guna' tuz didza' len nupa nácagaca xihui'.
⁶ Richisa na'a lo' Li', Dios, cabí dxía dö' na'a,
 en idú ládxa'a ribíga'a lo bucugu quiu', Xan,
⁷ para gul-la' le guía' Li': "Xclenu"
 en usiyönda' bönachi ca nácagaca le zxön nunu'.
⁸ Nadxí'ida' yu'u lidxu' ga na' zu', Xan,
 enca' lataj ga na' yu'u bení' lá'ayi quiu'.
⁹ Biti' usunítu' neda' tsözxón len nupa tun dul-la',
 en bitì' gútiu' neda' len nupa tuti bönachi,
¹⁰ nupa na' ta'yaza ladxi' tuá' dö',
 en nacuá'tica'sö ila'guizxaj dumí para ulu'ruáj tsahui'.
¹¹ Gúntica'sa' neda' le naca dxi'a.
 Buzá' ladxi' quia', en buá'uö neda'.
¹² Nuzóe' Dios neda' ga zoa' tsutsu ladja bönachi guizxi yu
 nudúbigaca quee' para cu'a-né' yöl-la' ba Xanru'.

27

¹ Náquië' Xanru' Dios bení' quia', en Nu rusölá neda'.
 ¿Nuzxi caz ral-la' gádxida'?
 Rapa chi'ë Xanru' Dios caz yöl-la' na'bán quia'.
 ¿Nuzxi caz gaca gun ga gadxi idzóbida'?
² Cate' gula'dá'baga' neda' nupa tuá' dö' para iluti neda',
 nupa na' bitì' ta'lé'e neda' dxi'a, en tu'dí'i neda',
 yöjchégu'gaca, en yöjbíxigaca.
³ Sal-la' ila'dá'baga' neda' bönachi guizxi yu,
 bitì' ca' tsaza yöl-la' radxi ládxi'da'ahua'.
 Sal-la' ila'díl-lalen bönachi neda',
 naca' neda' tsutsu ladxi'.
⁴ Tu le rinaba' lahuë' Xanru' Dios, læ na' güf'i ládxi'sa',
 le naca para sóatica'sa' lidxë' Xanru' yúgu'të dza soa' ibana',
 para gaca uyúa' yöl-la' lachi quee' Xanru' Dios,
 en para sa' ládxa'a ca naca quee' lu yu'u lá'ayi quee'.
⁵ Cate' idxín dza soa bönadxi quia', ucáchë'ë Lë' neda' lu yu'u lidxë'.
 Ga nagachi' lu yu'u lidxë' ucáchë'ë neda'.
 Uzóe' neda' tsutsu ca tu lu guiójt'o.
⁶ Gunë' ga ucul-la' nupa tu'dí'i neda',
 ate' lu yöl-la' rudzeja quia' códxi'atica'sa'
 cate' bi unödza' quee' lu yu'u lidxë'.
 ¡Gul-la' quee'! ¡Ön, gul-la' quee' Xanru' yöl-la' ba!

⁷ Buzé' nagu', Xan, cate' ulidza' Li'.
 Buzá' ladxi' quia', en bubí'i didza' ca naca le inábida' Li'.
⁸ Cate' Li' gudxu' neda': "Buguilaj neda'",
 idú ládxa'a bubí'a didza', gunnía': Uguilja' Li', Xan.
⁹ Bitì' ucachi' lo' lahua' neda'.
 Bitì' ta'bagu'u neda' lu yöl-la' rilé quiu'.
 Li' nacu' Nu rácalen neda'.
 Bitì' ucá'anu' neda', en bitì' usán no'o neda'.
 Nacu' Dios, Nu rusölá neda'.

¹⁰ Huáca ulu'sán ládxe'ë xuz xiná'a neda',
pero uzi' cazë' Xanru' Dios neda'.

¹¹ Busedi neda' para guna' ca ré'ënu' Li', Xan.
Bulu'i neda' para guna' le naca tsahui',
tu' nacua' nupa ta'dá'baga' neda'.

¹² Biti' usanu' neda' lu ná'agaca nupa bití' ta'lé'e neda' dxi'a
para cabí ilún quia' le té'ëni.
Ta'dá'baga' neda' nupa ta'zi' yë',
en nupa té'ëni iluá' dö' quia'.

¹³ Guzxi' lu në'ë Xanru' Dios gunë' ga ilé'eda' le naca dxi'a,
en le naca tsahui' queë' ga nacua' nupa nabángaca.
La'tu' cabí réajlë'a lë ni, chibóaj ládxa'a.

¹⁴ ¡Guli'gún lözë' Xanru'!
¡Guli'gaca tsutsu, en buli'tipa ládxi'li'!
¡Ön, guli'gún lözë' Xanru'!

28

¹ Rulidza' Li', Xan.

Nacu' Guió'j le ruzóa neda' tsutsu.

Ruzé' nagu' chi'a, tu' channö usayju' ru'u,
gaca' ca tu bönni' razië' lataj chul-la.

² Ruzé' nagu' le rulidza' Li' cate' rinábida' Li' gácalenu' neda',
cate' richisa' na'a zaca' Lataj Lá'ayi ga na' zu'.

³ Biti' ichë'u neda' tsözxón len nupa tuá' dö',
en tsözxón len nupa nácagaca xihui',
nupa na' tu'i didza' dxi'a lahui' lógaca dzaga yu'u quéguequi,
pero yu'u ládxi'do'guequi le cabí naca tsahui'.

⁴ Bubí' quéguequi tsca naca le tun, en tsca naca dö' ru'igaca.
Bubí' quéguequi tsca naca le tun né'eguequi.
Bubí' quéguequi tsca ral-la' gaca quéguequi.

⁵ Caní gaca quéguequi tu' cabí tun bal le nunë' Xanru',
en bití' tun bal le nun në'ë.
Uquínajë' léguequi, en bití' ca' uchisë' léguequi.

⁶ ¡Yöl-la' ba Xanru',
tu' riyönnë' cate' rinábida' Lë' gácalenë' neda'!

⁷ Xanru' caz náquië' yöl-la' huáca quia', en le run chi'i neda'.
Ruzxöni ládxa'a Lë', ate' rácalenë' neda'.

Que lë ni na' ruzi' xibé' ládxi'da'ahua',
ate' gul-la' le guía' Lë': "Xclenu'."

⁸ Naca cazë' Xanru' yöl-la' huáca quéguequi bönachi queë',
en náquië' ca' Nu run chi'i Bönni' na' bubéajë' quez queë' para inná bë'ë.

⁹ Busölá bönachi quiu', Dios, en ben ga gaca dxi'a quéguequi nupa néquiguequi quiu'.
Ben chi'i léguequi ca run tu nu ruyú bö'cu' zxila', en guché'tica'sö léguequi.

29

¹ ¡Guli'cu'ë yöl-la' ba Xanru', libí'ili', nácali' zxi'inigaquië' bönni' nayépisëgaquië'!

¡Guli'cu'ë yöl-la' ba Xanru', en guli'guíë': "Napu' yöl-la' huáca idú!"

² ¡Guli'cu'ë yöl-la' ba Xanru' le ral-la' gata' que Lë' tu' náquië' lá'ayi!

¡Guli'gún bal Xanru', tu' naca lachi le naca lá'ayi queë'!

³ Riyón chi'ë Xanru' lu nísado'.

Riyón chi'ë Xanru' nayépisë' ca riyón guziú' rinné.

Riyón chi'ë Xanru' lu nísado'.

⁴ Nál-latëro naca chi'ë Xanru'.

Nayépisëtëro chi'ë Xanru'.

⁵ Chi'ë Xanru' rilá'a yugu' yaga zxön.

Ön, chi'ë Xanru' riguitsaj yugu' yaga lu guí'a Líbano.

⁶ Runë' Xanru' ga ta'xiti' guí'a ca tunba' bédxido'.

Ta'xiti' guí'a Líbano, en guí'a Sirión ca tunba' bédx guí'a.

⁷ Chi'ë Xanru' run ga rëpi yösa.

⁸ Ruxizi chi'ë Xanru' la' guixi' ga dë lataj.

Ruxizi chi'ë Xanru' la' guixi' nazí'i le Cades.

⁹ Chi'ë Xanru' run ga ta'béquiba' bidxina' guixi' böa' hué'ënido' quégacaba', en run ga ta'guínnaj yúgu'të laga' dxíagaca yugu' yaga.

Lu yudo' queë' tu'í didza' yúgu'të le nacua', ta'nná: "¡Yöl-la' ba Lë'!"

¹⁰ Gurö'ë gunná bë'ë Xanru' cate' guró'ö nisa lu idútë yödzölió.

Ön, rö'ë rinná bé'tica'së' Xanru'.

¹¹ Rutipë' Xanru' ládxi'do'gaca bönachi queë'.

Gunë' Xanru' ga gaca dxi'a quégaca bönachi queë',

en gunë' ga ilá'böza dxi'a tsáhuí'do'.

30

¹ Guna' Li' zxön, Xan, tu' buchisu' Li' neda', en bití' bë'u lataj bi ilún quia' nupa bití' ta'lé'e neda' dxi'a.

² Rigu'a Li' yöl-la' ba, Xana' Dios, tu' bulidza' Li' gácalenu' neda', ate' bunu' neda'.

³ Bubéaju' yöl-la' na'bán quia' lu yeru ba, Xan.

Runu' ga zoa' nabana', para cabí tsu'a lataj chul-la ga dzö'ö nupa nátigaca.

⁴ ¡Guli'gul-la yöl-la' ba queë' Xanru', libí'ili' néquili' quez queë'!

¡Guli'guíë': "Xclenu'" ca naca Lë' le naca lá'ayi!

⁵ Tu chí'isö rilenë', pero ruzá' ládxi'tica'së' queéru'.

Channö códxiru' tu yëla,

lu yöl-la' rudzeja queéru' códxi'aru' itó yu.

⁶ Cate' guca dxi'a quia', ní'irö gunnía': "Gatga bi utsá' neda'."

⁷ Tu' buzá' ládxi'u quia', Xan, buzú' neda' ga zoa' tsutsu, en cate' bucachi' lo', gurö'a böniga.

⁸ Bulidza' Li', Xan, en gúta'yua' lo'.

⁹ ¡Bizxi xibé uzi'tso' channö gátia', en tsöjtsázia' lataj chul-la ga dzö'ö nupa nátigaca?

¡Naru' huácatsö cu'a Li' yöl-la' ba channö huöáca' bëchtö yu?

¡Naru' huácatsö ulu'a lo le naca idú quiu'?

¹⁰ Ruzé' nagu', Xan, en ruzá' ládxi'u quia'.

Gúcalen neda', Xan.

¹¹ Buí' inida', ate' benu' ga buyá'a lu yöl-la' rudzeja quia'.
 Bugú' lari' cá'só gúcua', en bugacu' neda' le ruzi'a xibé.
¹² Bil-la bö' naca caza' yöl-la' ba quiu', en biti' soa dxisö.
 Gufética'sa' Li': "Xclenu", Xana' Dios.

31

¹ Ruzxöni ládxa'a Li', Xan.
 Biti' gu'u lataj utuí'ida'.
 Tu' nacu' tsahui', busölá neda'.
² Ruzé nagu' quia', en rusöló' neda'.
 Gacu' ca tu guiójtó'o ga soa' tsutsu,
 en ca tu ga soa' dxi'a tsáhui'do' lu gudil-la.
³ Nacu' Li' guiójtó'o ga zoa' tsutsu, en le run chi'i neda'.
 Para gaca yöl-la' ba que Lo' guché' neda', en buluí'i neda' le dxi'a guna'.
⁴ Ubéaju' neda' lu du yalaj nucáchi'gaquié' bönni' tu'ë dö',
 tu' nacu' Li' yöl-la' nál-la' quia'.
⁵ Rigu'a lu no'o bö' naca caza'.
 Böá'au' neda', Xan, Dios idú.
⁶ Biti' rilé'eda' dxi'a nupa tun zxon budó' guiój budó' yaga,
 pero neda' ruzxöni ládxa'a Li', Xan.
⁷ Udzéjada', en uzi'a xibé yöl-la' dxi'i ladxi' quiu',
 tu' bilé'e quézinu' le gudí'i guzáca'a.
 Nöz quézinu' yugu' le raca quia'.
⁸ Biti' bucá'anu' neda' lu na' nu biti' rilé'e neda' dxi'a,
 pero nuzú' neda' tu lataj ga zoa' tsutsu.
⁹ Buzá' ladxi' quia', Xan, tu' zoa tu le raca quia'.
 Lu yöl-la' ruhuí'ini quia' ribödxá', en rudú ládxa'a.
¹⁰ Riyechi' dza quia' tu' ruhuí'inide'eda',
 en tu' rinné ládxa'a, en riyechi' iz quia'.
 Rudú ládxa'a tu' nözi dö' nu'a,
 ate' nadxita idúté le naca'.
¹¹ Tu' nözi le gulún nupa ta'dá'baga' neda'
 naca' tu le run gadxi yugu' dzaga yu'u quia',
 ate' nupa núnbé'gaca neda' tadxi neda'.
 Nupa ta'lé'e neda' la' nöza ta'zxunnaj ga rizá'a.
¹² Nál-la ládxi'gaca neda' ca nál-la ládxi'gaca nupa chinátigaca.
 Naca' ca tu rö'ö nayuzxaj naguinnaj.
¹³ Biyönda' didza' zi' ta'nné bönnachi zían quia' bagáchi'sö.
 Gátitës zoa le run gadxi neda'.
 Tun xtídza'gaca bi ilún quia'.
 Ta'zá' ládxi'gaca nacxi iluti neda',
¹⁴ pero neda' ruzxöni ládxa'a Li', Xan.
 Rnnía' nacu' Dios quia'.
¹⁵ Yú'ugaca lu no'o yúgu'té dza soa' ibana'.
 Busölá neda' lu ná'agaca nupa biti' ta'lé'e neda' dxi'a,
 en lu ná'agaca nupa ta'zóa regu' neda'.
¹⁶ Lu yöl-la' ruzá' ladxi' quiu' buyú neda', huen dxin quiu'.
 Lu yöl-la' dxi'i ladxi' quiu' busölá neda'.
¹⁷ Biti' gu'u lataj utuí'ida', Xan, tu' rulidza' Li'.
 Ben ga ulu'tuí'i nupa tuá' dö'.
 Ben ga ila'cuá' dxisö lu yeru ba.
¹⁸ Ben ga biti' gaca bi inná nu rizi' yé',

nu na' rinné zi' queë' bönni' tsahui',
en run ba zxön cuini, en rulidza ditaj luzé'e.

¹⁹ ¡Bica' zxön yöl-la' dxi'i ladxi' quiu',

lë na' napu' para gácalenu' nupa tadxi Li!
Runu' caní quégaca nupa tu'zxöni ladxi' Li'
lógaca nupa tun ba zxön cuíniguequi.

²⁰ Rucáchu'u légaquië' ga na' zu' bagáchi'sö,
ga bití' gaca idxín nu bönni' xihui'.

Run chí'u légaquië' bagáchi'sö ga bití' gaca idxín didza' bizxaj.

²¹ ¡Yöl-la' ba Xanru' Dios,

tu' buluí'inë' neda' ca nadxí'inë' neda' cate' ni' zoa' tu yödzö
ga nagú'ugaquië' lé'ajlö bönni' tu'tíl-lalenë' neda'!

²² Lu yöl-la' radxi ridzöbi quia' gunní'a: "Ilútië' neda' lo' Li', Xan",
pero biyönnu' le gunábida' Li', cate' ni' bulidza' Li'.

²³ ¡Guli'dxí'i-në' Xanru', libí'ili' néquili' queë'!

Rapa chí'ë Xanru' nupa ta'yéajlë' Lë',
en rubi'ë ca sa'yéaj queë' bönni' run ba zxön cuinë'.

²⁴ ¡Guli'gaca tsutsu, en buli'tipa ládxi'li',
yúgu'tëli' na' runli' löza Xanru' Dios!

32

¹ ¡Bica' ba bönni' na' Dios buniti lahuë' lë' ca naca dö' bi'ë,
en bugúë' dul-la' queë'!

² ¡Bica' ba bönni' na' Dios rnnë' bití' nabáguë'ë xigua',
en bití' zóalen lë' yöl-la' rizí' yë'!

³ Cate' guzóa' dxisö ca naca dul-la' quia',
budú ládxa'a tu' gunnética'sö ládxa'a.

⁴ Rëla, en te dza buquí'i busácu'u neda', Dios.

Budú ládxa'a ca raca cate' rö' bóchila.
⁵ Ní'irö guxóalëpa' dul-la' nabága'a lo' Li',
en bití' bucácha'a le xihui' bena'.

Gunnía': "Ixóalëpa' dö' bi'a lahuë' Xana",
ate' buniti lo' neda' ca naca xigua' gubága'a.

⁶ Que lë ni na', núti'tës nu nunbë' Li', Dios, ral-la' ulidza Li'
cate' dë lataj gü'ílen Li' didza'.

Cate' rö' nisa bach luyú ni, bití' ca' ideli' idxín ga zoa nu na'.

⁷ Li' nacu' ga gaca ucachi' cuina' cate' zoa bönadxi quia'.

Li' caz gun chí'u neda' para cabí bi gaca quia'.

⁸ Li' gunu' ga gúl-latica'sa' quiu' Li' tu' rusöló' neda'.

Rnnë' Dios: "Neda' uzéajni'ida' li', en uluí'ida' li' le ral-la' gunu'.

Usédida' li', en uyútica'sa' li'.

⁹ Bití' gacu' ca tu böa' o tu mula cabí ta'yéajni'iba'.

Ral-la' cu'u guíë en du rú'ugacaba' para inná bé'enu' légacaba'."

Channö cabí gunu' caní, bití' ca' ilunba' ca ré'ënu'.

¹⁰ Zían le tun ga tu'huí'iniguequi nupa tuá' dö',
pero bönni' ruzxöni ládxe'ë Xanru' ilé'enë' yöl-la' dxi'i ladxi' queë'.

¹¹ Buli'dzéjalënë' Xanru', en buli'sí' xibé', libí'ili' nácali' tsahui' lahuë' Lë'.

Lu yöl-la' rudzeja queéli' guli'códxi'a, libí'ili' nácali' idú dxi'a.

33

¹ Lu yöl-la' rudzeja queé'li' guli'gul-la lahuë' Xanru',
libí'ili' nácali' tsahui' lahuë' Lë'.
Nupa nácagaca tsahui' ral-la' ila'gú'u Lë' yöl-la' ba.

² Guli'guié' Lë': "Xclenu", quínnili' lë'e bihuél-la.
Guli'gul-la yöl-la' ba queë', quínnili' le zë chi du que.

³ Guli'gul-la queë' tu le rul-la cubi.

Guli'quinnaj dxí'ado', en lu yöl-la' rudzeja queé'li' guli'códx'i'a.

⁴ Xtídzë''ë Xanru' naca idú tsahui',
ate' idú ládxe''ë runë' yúgu'të bi runë'.

⁵ Nadxí'inë' le naca dxi'a, en le naca tsahui'.
Nalá' lahui yöl-la' dxi'i ladxi' queë' Xanru' idútë yödzölió.

⁶ Len didza' bé'ësë' Xanru', benë' lúzxiba,
en benë' yúgu'të bö'aj bení' len bö' rirúaj ru'ë.

⁷ Rutubë' nisa rö'ö nísado' para gaca ca tu guí'a.

Napa chi'ë nisa rö'ö zili ga na' nupé''ë xilataj.

⁸ Yúgu'të bönachi ral-la' ila'dxí'i Xanru'.

Bönachi idútë yödzölió ral-la' ila'cuá' nöxaj lahuë' Lë'.

⁹ Bé'ësë' didza' Xanru', ate' la' gúcatë ca na' gunné'.

¹⁰ Gunná bë''ë, ate' guca tsutsu le nunë'.

Runë' Xanru' ga tu'huóaca cá'asö didza' túngaca bönachi yugu' yödzö.

Runë' ga bití' ilaca le té''ëni ilúngaca bönachi.

¹¹ Sóatica'sö tsutsu didza' nunë' Xanru'.

Le rizá' ládxe''ë ulu'gá'anatica'sö quéguequi xí'ini xi'sóaru'.

¹² Bica' bágaca bönachi yödzö na' náquië' Xanru' cazë' Dios quéguequi,
bönachi na' nabó cazë' Dios para ilaca quez queë'.

¹³ Zoa cazë' Xanru' yehua' yubá, ruyúë' ga zóaru'.

Rilé'enë' le tun yúgu'të bönachi nacua' idútë yödzölió.

¹⁴ Ga na' zoa cazë' ruyúë' idú gásibi'ilö,

en rilé'enë' yúgu'të nupa nacua' idútë yödzölió ni.

¹⁵ Nun cazë' Lë' ládxi'do'gaca yúgu'tëguequi.

Réajni' quézinë' ca naca yúgu'të le túngaca.

¹⁶ Bití' ca' ulé' bönni' unná bë' nacua' queë' bönni' guizxi yu röjáquië' gudil-la.

Bití' ulé' bönni' zoë' gudil-la tu' nál-latë'rë'.

¹⁷ Bití' nazaca' gunru' löza böa' para idéli'ru' lu gudil-la,

tu' cabí gaca usö'labá nu bönni' tu' nál-latë'röba'.

¹⁸ Bulí'yú, ruyútica'së' Xanru' nupa tadxi Lë',

nupa na' tun löza yöl-la' dxi'i ladxi' queë',

¹⁹ para usölé' léguequi lu yöl-la' guti,

en para ugahuë' léguequi cate' tsu'u gubín.

²⁰ Idú ládxi'ru' runru' löza Lë' Xanru'.

Rácalen cazë' ré'u, en rapa chi'ë ré'u.

²¹ Rudzeja ládxi'lenru' Lë',

en uzxöni ládxi'ru' Lë', tu' náquië' lá'ayi.

²² Lu yöl-la' dxi'i ladxi' quiu' gúcalen netu', Xan,

tu' runtu' löza Li'.

34

¹ ¡Innética'sa' queë' Xanru' náquië' dxi'a!

¡Cú'utica'sa' Lë' yöl-la' ba!

² Bö' naca caza' gun zxon Xanru'.

Nupa nacagaca nöxaj ladxi' ila'yöni lë ni, en ulu'dzeja.

³ Guli'güi' zxonë' Xanru' tsözxón len neda',

en tsözxón usiyönru' bönachi ca naca Lë' La'ayi.

⁴ Bulidza'-në' Xanru', ate' bubí'ë didza' quia',

en busölé' neda' lu yugu' le gúdxida'.

⁵ Nupa nacagaca queë' bila'dxín lahuë', en bulu'zí' xibé'.

Bíti'rö caz ulu'tuí'i nupa na'.

⁶ Bulidza'-në' Xanru', ate' biyönnë' quia' neda', bönni' yechi',

en busölé' neda' lu yúgu'të le guca quia'.

⁷ Gubáz lá'ayi que ya'abá queë' Xanru' tapa chí'ë nupa tadxi Lë',

en tu'sölé' léguequi lu yúgu'të le raca quéguequi.

⁸ Guli'sí' bë'ë, ate' inózili' náquië' Xanru' dxi'a.

¡Bica' ba bönni' ruzxöni ládxë'ë Lë'!

⁹ Guli'gadxi Xanru', libí'ili' nácali' quez queë',

tu' cabí bi ila'yadzaj nupa tadxi Lë'.

¹⁰ Ta'yadzaj ta'yúdxiba' bëdxi guixi', en ta'dunba',

pero nupa tu'lidza Xanru' biti' ca' ta'yadzaj le naca dxi'a.

¹¹ Guli'dá libí'ili', bí'ido', en buli'zé nágalí' xtídza'a.

Uzéajni'ida' libí'ili' para gádxili'-në' Xanru'.

¹² ¡Nuzxi caz bönni' ré'ënë' soë' ibanë',

en ré'ënë' soë' iz zían para uzi'ë xibé le naca dxi'a?

¹³ Ben chí'i lúdxu'u para cabí gu'u didza' xihui',

en para cabí si' yé'enu' luzó'o.

¹⁴ Bucá'ana le cabí naca tsahui', en ben le naca dxi'a.

Bë' ladxi' cözu' dxi'a tsáhui'do',

en ben bayudxi gunu' yugu' lë ni.

¹⁵ Ruyútica'së' Xanru' nupa nacagaca tsahui',

en riyón quézínë' cate' tu'lidza Lë'.

¹⁶ Uzáguë'ë Xanru' xinózgaca nupa tuá' dö',

en gunë' ga cuntu nu tsöjné léguequi.

¹⁷ Nupa nacagaca tsahui' tu'lidza Xanru', ate' riyönnë' quéguequi,

en rusölé' léguequi lu yugu' le raca quéguequi.

¹⁸ Xanru' zóalen cazë' nupa tu'huí'ini ladxi',

en rusölé' nupa nacagaca nöxaj ladxi'.

¹⁹ Zían le riguí'i rizáquë'ë bönni' tsahui',

pero Xanru' rusölé' lë' lu yúgu'të lë na'.

²⁰ Xanru' rapa chí'ë yúgu'të dxita yu'ë,

ate' biti' gatsaj nitú dxita queë'.

²¹ Le xihui' run nu ruá' dö' gun ga gati nu na',

ate' ila'baga' xiguia' nupa biti' ta'lé'e dxi'a le naca tsahui'.

²² Xanru' caz ruhuóá'uë' bö' nacagaca caz huen dxin queë',

ate' biti' irugu que nitú nupa na' tu'zxöni ladxi' Lë'.

35

Tu le bil-lë' David

¹ Xana' Dios, gudá'baga' nupa biti' ta'lé'e neda' dxi'a.

Butíl-lalen nupa ta'díl-lalen neda'.

² Guzxón le gun chi'i neda' lu gudil-la,
en gudá gácalenu' neda'.

³ Guzxón yaga tuchi' quiu' para uzagu'u xinó'zguequi nupa ta'zóa regu' neda'.
Gudxi bö' naca caza' nacu' Li' Nu rusölá neda'.

⁴ Ben ga ulu'tuí'i, en ulu'gá'ana cá'asö nupa té'ëni iluti neda'.
Ben ga ulu'huécaj, en ulu'gá'ana cá'asö nupa té'ëni iluí'i dö' quia'.

⁵ Ben ga ilaca ca bëbu zxe café zeaj lu bö'ös,
en ben ga ulaguë' gubáz lá'ayi que ya'abá quiu' léguequi.

⁶ Ben ga gaca chul-la nöza yú'ugaca, en ga cuílagaca,
ate' soa régu'ë gubáz lá'ayi quiu' léguequi.

⁷ Bulu'cáchi' du yalaj le sön neda', en bití' bi nuna' quéguequi.

Gula'chó'öna yeru ga tsöjbixa', en bití' bi nuna' quéguequi.

⁸ Ben ga idxín quéguequi tsárido'os le usuniti léguequi,
en ben ga du yalaj na' bulu'cáchi' sön la' cuínguequi quez.

Ben ga ila'bixi lu yeru na' gula'chó'öna.

⁹ Udzeja ládxi'léna'-né' Xanru',
en uzi'a xibé yöl-la' rusölá queë'.

¹⁰ Ila'nná dxita néquinida': "Xan, ¿nuzxi caz naca ca nacu' Li'?"

Rusöló' nu riguí'i rizáca' lu na' nu nál-latërö ca le.

Rusöló' nu riguí'i rizáca', en riyadzaj riyudxi lu na' bönni' ribané' le nequi que."

¹¹ Ta'dá'baguë'ë bönni' xihui' neda', en ta'nné' quia'.
Ta'nabi yúdxiné' neda' ca naca yugu' le cabí nözda'.

¹² Tu'bi'ë quia' le naca dö' cate' runa' le naca dxi'a,
ate' ruhuí'inide'e ládxa'a.

¹³ Pero neda' gúcuá' lari' cá'asö cate' guláquië' huë'.

Bena' gubasa, en busaca' zi' bö' naca caza',
en uláz quéguequi bulidza'-né' Dios zían luzuí.

¹⁴ Buí'inide'eda' tsca guca luzá'a o bi'i böchi' caza' nu na' guca huë'.

Gurödxí yecha'a ca huí'inide'eda' channö gátinu xiná' caza',

¹⁵ pero cate' guchixi guníguida' neda', bulu'dzéjade'e, en bulu'dubi tsözxón.

Yugu' bönni' na' bulu'cá'ané' neda' cá'asö bulu'dubë' para ilunë' ga cö'a baguí'i.

Yugu' bönni' na' bití' núnbë'a gulún'natica'së' neda'.

¹⁶ Bulu'saca' zi'ë neda', en bulu'titjé' quia'.

Lu yöl-la' rilé quégaquië' neda' gulagu zxea láyi'gaquië'.

¹⁷ Xan, ¿gáca'xte caz uyú iná'asu' le tunë'?"

Busölá neda' lu dö' tu'ë quia'.

Busölá neda' lu ná'agaquië' bönni' na' nácagaquië' ca yugu' bëdxi guixi'.

¹⁸ Guía' Li': "Xclenu'" lógaca bönachi zían ulu'dúbigaca quiu'.

Cu'a Li' yöl-la' ba ga nudúbigaca ziantë bönachi.

¹⁹ Bití' gu'u lataj ulu'dzeja nupa ta'dá'baga' neda', en ta'z'í yë',

en bití' gu'u lataj ulu'titaj quia', nupa na' tu'dí'i neda', en bití' bi nuna' quéguequi.

²⁰ Catu caz tuí'i didza' le gun ga soa dxisö didza' bizxaj.

Lu yöl-la' rizí' yë' quéguequi ta'nné' quégaca nupa ta'bó' dxi'a tsáhui'do' yödzölió ni.

²¹ Bulu'salaj ruí'iguequi, en gula'nné' quia', gula'nná:

"¡Ön, bilé'e quézitu' le nunë'!"

²² ¡Bilé'e quézinu' Li' lë ni, Xan! ¡Bití' su' dxisö!

¡Bití' ucá'anú' neda', Xan!

²³ ¡Guyasa, Xan! ¡Busubán ládxu'u, Xan, para uchi'a usöróu' quia'!

¡Gúcalen neda', Xana' Dios!

²⁴ ¡Tu' nacu' tsahui', buchi'a busöró quia', Xana' Dios!
 ¡Biti' gu'u léguequi lataj ulu'dzeja ni'a que le raca quia'!
²⁵ ¡Biti' gu'u léguequi lataj ila'nná:
 "Ön, bidéli'ru' le guzé ládxi'ru'"!
 ¡Biti' gu'u lataj ila'nná: "Chibucúl-laru' lë'"!
²⁶ ¡Ben ga ulu'tuí'i, en ulu'gá'ana cá'asö nupa tu'dzeja cate' ruhu' inida'!
 ¡Ben ga ulu'tuí'i, en ulu'gá'ana cá'asö nupa ta'dá'baga' neda'!
²⁷ ¡Ben ga ila'bódxí'a lu yöl-la' rudzeja quéguequi,
 en ulu'z'í' xibé nupa tu'í' ládxi'gaca urúaja' tsahui'!
 ¡Bë' lataj ila'nnática'sö: "Nayépisëtëré' Xanru' Dios,
 tu' raza ládxi'ë gunë' ga gaca dxi'a quégaca huen dxin queë'"!
²⁸ Ní'irö guna' ba nalí quiu', innía': "¡Nacu' tsahui'!"
 en cu'a Li' yöl-la' ba idú dza.

36

¹ Le naca xihui' ru'ílen bönni' nucá'anë' Dios lu icja ládxi'da'ahuë'.
 Biti' ca' rádxi'në' Dios.
² Tu' run ba zxön cuinë'
 réquinë' bití' nózinë' Dios nabáguë'ë lë' dul-la', en bití' ichúguië' Dios queë'.
³ Ru'ë didza' xihui', en rizí' yë'ë.
 Bití' réajni'inë', en bití' runë' le naca dxi'a.
⁴ Cate' ni' dë' lu le rátí'në' rizá' ládxi'ë ca naca le xihui' gunë'.
 Ru'í ládxi'ë gunë' le cabí naca dxi'a,
 en bití' rusanë' runë' le naca xihui'.
⁵ Zxóntëro ca yehua' yubá naca yöl-la' dxi'i ladxi' quiu', Xan,
 ate' gúntica'su' ca rnna xtídz'u, tsca zoa yehua' yubá.
⁶ Naca tsutsu le tsahui' nacu' ca nácagaca tsutsu yugu' gu'á zxön quiu'.
 Ca ruchi'a rusöróu' naca ca naca nísado', tu' cabí gaca nu gúnbë'e le.
 Run chí'i cazu' bönachi, en yugu böa' guixi', Xan.
⁷ Nazáca'tëro yöl-la' dxi'i ladxi' quiu', Dios.
 Run chí'u yúgu'të bönachi ca runba' yöjede, run chí'iba' yugu' bórado' zcan xílaba'.
⁸ Tu'huölaj tu'dzë'e bönachi quiu' le nayánda' lu yu'u lidxu',
 ate' ruguí'ju' léguequi le naca yöl-la' dxi'i ladxi' quiu'.
⁹ Yúgu'të le nacuá' nabánigaca Li'.
 Tu' naca cazu' bení' rilé'etu' bení'.
¹⁰ Bidxí'ítica'sö nupa núnbë'gaca Li',
 en ben le naca dxi'a quégaca nupa nácagaca tsahui'.
¹¹ Biti' gu'u lataj bi ilún quia' nupa tun ba zxön cuínguequi,
 en bití' gu'u nupa tuá' dö' lataj ulu'laga' neda'.
¹² Nadzó'ögaca nupa tuá' dö'.
 Déguequi luyú, en bití' ca' gaca ulu'huöása.

37

¹ Biti' ubi uguí'i ládxi'do'oli' tu' tu'z'í'gaca xibé nupa tuá' dö'.
 Bití' uzxé'eli' nupa bití' tun le naca dxi'a.
² Huadóditë quéguequi ca raca que guixi' nacuadi,
 en udxí quéguequi ca raca quégaca guíxi'do' narúgugaca.
³ Buli'zxöni ládxi'ë Xanru', en guli'gún le naca dxi'a.
 Buli'gá'ana luyú queë', en guli'cóz dxi'a tsáhuí'do'.
⁴ Buli's'í' xibé' Xanru',
 ate' gunné' queé'li' le rizé ládxi'li'.

- ⁵ Buli'dödi cuinli' lu në'ë Xanru'.
Buli'zxöni ládxe'ë Lë', ate' gunë' le gácalen lib'ili'.
- ⁶ Gun cazë' Lë' ga urúajli' tsahui', en gácali' ca bení',
en cate' uchi'a usöröë' queéli', gaca queéli' ca lahui' dza.
- ⁷ Guli'sóa dxisö lahuë' Xanru', en guli'cöza le gunë'.
- Biti' cuéqui ícjali' tu' nözi bönni' ruzi'ë xibé,
bönni' na' ru'ë dö'.
- ⁸ Bítirö leli', en buli'sán yöl-la' ridzá'a.
Biti' ubi ugu'i ládxi'do'oli' tu' gun lë ni ga guá'ali' dö'.
- ⁹ Dios caz uzáguë'ë xinózguequi nupa tuá' dö',
pero nupa tu'zxöni ladxi' Xanru', guequi quéguequi luyú.
- ¹⁰ Ia'látisö xidzé, en bítirö soë' bönni' na' ru'ë dö'.
Uguíjali' xilatjé', pero bítirö soë' ni'.
- ¹¹ Nupa nácgaca nöxaj ladxi', guequi quéguequi luyú,
ate' ulu'zi' xibé yöl-la' tsahui' que.
- ¹² Tun didza' nupa tuá' dö' bi ilúngaca quégaca nupa nácgaca tsahui',
en lu yöl-la' rilé quéguequi tagu xzea láyi'guequi.
- ¹³ Ruzxidxi cazë' Xanru' quéguequi,
tu' rilé'enë' dza udxi quéguequi.
- ¹⁴ Nupa tuá' dö' chigula'béaj guíë tuchi' quéguequi,
en nuá'gaca uxiti' yaga quéguequi
para ulu'xicja nupa ta'zaca' zi', en ta'yadzaj ta'yudxi,
en para iluti nupa tun le naca dxi'a.
- ¹⁵ Guíë tuchi' quéguequi ila'chiza la' ládxi'do'guequisö,
ate' ila'guítsaj uxiti' yaga quéguequi.
- ¹⁶ Dxi'atërö le do' dësö queë' bönni' tsahui'
ca le zían dë queë' bönni' ru'ë dö'.
- ¹⁷ Huayúzxjagaca ná'agaca nupa tuá' dö',
pero Xanru' caz rácalenë' nupa nácgaca tsahui'.
- ¹⁸ Ruí'ladxi' cazë' Xanru' nupa bití' bi xiguia' nabága'gaca,
ate' guéquitica'sö xiyúgaca quéguequi.
- ¹⁹ Biti' ca' ulu'tuí'i cate' idxín dza bití' gaca dxi'a,
en cate' tsu'u gubín, gáta'dëra le ilágugaca.
- ²⁰ Ulu'niti tsaz nupa tuá' dö',
ate' nupa bití' ta'lé'e dxi'a Xanru' ilaca ca yöl-la' lachi que guixi'.
La' tóditë quéguequi, en ilaca ca dzön le rinítitë.
- ²¹ Ta'nábini nu bi gunna quéguequi tu chí'isö, pero bití' ca' ulu'bí'i lë na'.
Nu naca tsahui' ruzá ladxi' quéguequi, en runödzej quéguequi.
- ²² Gaca luyú quégaca nupa run lá'ayë' Xanru',
pero ila'niti tsaz nupa rudxië' Lë' dö'.
- ²³ Le runë' bönni' dxi'a naca le nulu'inë' Xanru' lë',
ate' raza ládxe'ë Lë' le runë' bönni' na'.
- ²⁴ Cate' röjtsö'ë, bití' ca' röjtsö'ë tsaz,
tu' röjzönë' Xanru' caz bönni' na'.
- ²⁵ Guca' ra'bando', pero na'a nagula',
en catu caz bilé'eda' nusán në'ë Dios bönni' tsahui',
en catu caz bilé'eda' riyadzaj le ilágubi' xzí'inë'.
- ²⁶ Yugu' dza ruzá ládxe'ë bönni' tsahui' quéguequi luzé'ë
en runödzej' le ta'nábini lë' unödzej' tu chí'isö,
Nácgacabi' xzí'ini xí'sóë' tu le run ga raca dxi'a queéru'.
- ²⁷ Buli'cá'ana le cabí nácatë, en guli'gún le naca dxi'a.
Channö caní gunlí', sóali' tsaz,

²⁸ tu' nadxi'inë' Xanru' nu run le naca tsahui',
 en catu caz usán në'ë nupa néquiguequi quez queë'.
 Gun chí'itica'së' léguequi,
 pero usunítië' xzí'ini xi'sóagaca nupa tuá' dö'.
²⁹ Guequi luyú quégaca nupa nácagaca tsahui',
 ate' ila'cuá'tica'sö luyú na'.
³⁰ Ru'ë bönni' tsahui' didza' le napa yöl-la' réajni'i,
 ate' raca yöl-la' ruchi'a rusöró ni'a que didza' na' ru'ë.
³¹ Yu'u icja ládxi'da'ahuë' le gunná bë'ë Dios.
 Que lë ni na' catu caz ichixi iníguinë'.
³² Ruyuda' nu ruá' dö' le runë' bönni' tsahui',
 en riguilaj nacxi gaca guti lë'.
³³ Xanru' biti' gu'ë nu na' lataj bi gun queë' bönni' tsahui' na',
 en biti' gu'ë lataj irugu queë' cate' nu uchi'a usöró queë'.
³⁴ Buli'zxöni ládxi'ë Xanru', en guli'gún ca ré'ënë' gunli',
 ate' uchisë' libí'ili' para guequi queéli' luyú.
 Cate' udxí quégaca nupa tuá' dö', hualé'e quézili' le.
³⁵ Bilé'eda'-në' bönni' huía' dö'.
 Gúquië' ca tu yaga zxön, en buzí'de'enë' xibé.
³⁶ Ní'irö gudödi queë', en bíti'rö zoë'.
 Yöjdilja' lë', pero biti' ca' guca udzólida' lë'.
³⁷ Buli'yú ca náquië' bönni' tsahui'.
 Cuntu nu gaca bi inné' queë',
 tu' ila'cuá'abi' xzí'ini xi'sóë' bönni' zxön ládxi'.
³⁸ Ulu'niti tsaz nupa tu'cá'ana le gunná bë'ë Dios.
 Usiúdxë' Xanru' yugu' xzí'ini xi'sóagaca nupa tuá' dö',
³⁹ pero rusölá cazë' nupa nácagaca tsahui'.
 Rutipë' ládxi'guequi cate' bi raca quéguequi.
⁴⁰ Rácalenë' léguequi, en rusölé' léguequi.
 Rubéajë' léguequi lu ná'agaca nupa tuá' dö', en rusölé' léguequi,
 tu' tu'zxöni ládxi'guequi Lë'.

38

¹ Biti' ilenu' neda', Xan, en biti' uzenu' neda' bach.
 Biti' gunu' neda' xiguia' lu yöl-la' rilé quiu'.
² Ben zi'u neda', en budxiú' neda' huë'.
 Nuzötju' neda' len no'o.
³ Yu'a yödzöhuë' zxön tu' rilenu' neda'.
 Dxía huë' idütë le naca' tu' nözi dul-la' nabága'a.
⁴ Xiguia' nabága'a naca ca tu nísado' ga ruchicja' nisa.
 Naca ca tu yua' zi'i nabága'a neda'.
⁵ Tu' bena' yugu' le cabí naca dxi'a,
 dxía' huë' le rilá' siguti, en rudzu'.
⁶ Narecji' cúdza'a, en nagá'ana' cá'asö.
 Idú dza ruhu' inide'eda'.
⁷ Idütë le naca' yú'uda'a xilá,
 ate' nazxí xipéla'a.
⁸ Rudú ládxa'a, en ricuídi'da'.
 Rinnëda' ládxa'a tu' ruúbi ruguí'i ládxi'da'ahua'.
⁹ Nöz quézinu' Li', Xan, le rizé ládxa'a,
 en riyönnu' le rinnética'sö ládxa'a.
¹⁰ Richunchu ládxi'da'ahua', en ricuidi' ládxa'a,

ga ridxintë richul-la guióǵ lahua'.

¹¹ Bítí'rö ta'dzaga neda' yugu' luzá'a, en yugu' bócha'a, tu' nözi xihuë'a, ate' tu'biga' di'a dza quia' ga zoa'.

¹² Nupa té'ëni iluti neda' ta'bequi le ila'zón neda', ate' nupa té'ëni ulu'cul-la neda' tun xtídzá'guequi nacxi ulu'suniti neda'. Idú dza ta'bequi ícjaguequi bi ilún quia'.

¹³ Naca' ca tu bönni' nacódzuë', en bítí'rö riyönda'. Naca' ca tu bönni' narugu lúdxë'ë, en biti' risaljë' ru'ë.

¹⁴ Naca' ca tu bönni' bítí'rö riyönnë', en que lë ni na' biti' bi didza' rubi'ë.

¹⁵ Tuzu' Li' ruzxöni ládxa'a, Xan. Ubí'i cazu' didza', Xana' Dios.

¹⁶ Bítí' gu'u lataj ulu'dzeja ni'a que le raca quia'. Bítí' gu'u lataj ilún ba zxon cuínguequi tu' nagá'ana' cá'asö.

¹⁷ Chizóa' tsöjbixa', en zóaléntica'sö xihuë'a neda'.

¹⁸ Que lë ni na' rixóalépa' xiguia' nabága'a, en risébida' ládxa'a tu' nözi dul-la' nabága'a.

¹⁹ Nacuá' dxi'a, en nál-lagaca nupa téqui neda' zi'. Nayánda' nupa tu'dí'i neda', en biti' bi nuna' quéguequi.

²⁰ Ta'dá'baga' neda' nupa tu'bí'i le cabí naca dxi'a que nu run le naca dxi'a. Caní tun tu' ruí'i ládxa'a guna' le naca dxi'a.

²¹ Bítí' usán no'o neda', Xan. Bítí' ubigu' ga zoa', Dios quia'.

²² Gudáchi gácalenu' neda', Xan, tu' naca cazu' Li' Nu rusölá neda'.

39

¹ Gunnía': Gun chi'i cuina' ca naca le runa', en biti' guna' dul-la' ca naca didza' ruá'a. Bítí' bi didza' gu'a

cate' nacua' nupa tuá' dö' gal-la' ga zoa'.

² Guzóa' dxisö, en biti' bë'a didza' ga bidxintë biti' gunnía' le naca dxi'a, pero biyali' xihuë'a.

³ Bubi buguí'i ládxi'da'ahua', en cate' guzá' ládxa'a que, guyegui gulá ládxi'da'ahua'. Que lë ni na' gunábida'-në' Xanru', gunnía':

⁴ Xan, ¿gáca'xte caz soa' ibana'?

Buluí'i neda' tsca iz soa' ibana'. Ben ga inözda' channö chizóa' caz gátia'.

⁵ Nabábasö dza nuzú' quia' soa' ibana'.

Yugu' iz soa' ibana' biti' bi zeaj naca lo' Li'.

Le nácatë biti' bi nácgaca yúgu'të bönachi nacua' luyú ni.

⁶ Nácgacasö ca tu zzul-la rigú'u böaj.

Nítisö tu'úbi tu'guí'i ládxi'do'guequi, en tun dxin.

Tu'tubi yöl-la' tsahui', pero biti' nózguequi nuzxi guequi que.

⁷ ¿Bizxi caz gaca guna' löza, Xan?

Ruzxöni ládxa'a Li'.

⁸ Busölá neda' lu xiguia' nabága'a,

en biti' gu'u lataj ulu'titaj quia' nupa nácgaca canóz.

⁹ Soa' dxisö, en biti' bi didza' gu'a,

tu' ben cazu' Li' ga riguí'i rizáca'a lë ni.

¹⁰ Bítí'rö gunu' neda' xigua'.

Chizóa gátia' tu' rusaca' zí'u neda'.

¹¹ Runu'-në' xigua' bönni' dul-la', en ruzenu' lë' bach.

Ca tu'töba' bélado' que le yú'uba', rusunítu' le ruí'i ládxe'ë bönni' na'.

Bití' bi naca cazë' bönni' dul-la' na'.

¹² Buzé' nagu' le rulidza' Li', Xan, en le rinábida' Li'.

Bití' su' dxisö cate' ribödxá' lo' Li',

en bití' gaca' ca tu bönni' zítu' lo' Li',

en ca tu bönni' ridasë' ca guláquië' xuz xtó'otu'.

¹³ Benna neda' lataj idipa ládxa'a

zí'alö ca uzá'a yödzölió ni, en bítí'rö soa'.

40

¹ Lu yöl-la' riböza zxön ladxi' quia' gulöza' gácalenë' Xanru' neda'.

Ní'irö buzé' naguë' quia', en biyönnë' le bulidza'-në'.

² Bubéajë' neda' ca tu lu yeru ga rë', en lu guna' zili.

Buzóë' neda' tu lu guiójtó'o, en guléquië' neda' tsutsu.

³ Busédinë' neda' tu le cubi le rul-la' le naca yöl-la' ba queë' Dios queëru'.

Zián nupa ila'lé'eni lë ni, en ilún Lë' zxön,

ate' ulu'zxöni ladxi'-në' Xanru'.

⁴ Bica' ba bönni' ruzxöni ládxe'ë Xanru'.

Bití' runë' tsözxön nu run ba zxön cuini, nu na' run zxön yugu' dios núngaca bönachi.

⁵ Ziántërö naca le nunu' queétu', Xana' Dios, yugu' le tun ga rubánitu'.

Ziántërö le yu'u icja ládxi'do'o ca naca le gunu' queétu'.

Bití' ca' gaca nu ulaba lo' Li' tsca nácagaca.

Channö gué'ënda' nu usiyönda' tsca nácagaca,

nayántërö tsca le gaca ulaba'.

⁶ Bití' ré'ënu' gútigaca'-ba' böa' guixi' lo', en calëga bi cu'a lo'.

Bití' rinabu' uzégui'gaca'-ba' böa' bëdxi lo',

en calëga tu le guna' lo' para ugúa dul-la',

pero gusalju' naga' para yönda' le guío' neda'.

⁷ Que lë ni na' gunnía': Ni zoa caza' neda' quiu'.

Lu guichi lá'ayi quiu' nazúaj caz ca naca quia'.

⁸ Raza ládxa'a runa' ca ré'ënu' Li', Dios quia'.

Nagu'a icja ládxi'da'ahua' xibá naguixju' Li'.

⁹ Ga tu'dubi bönachi guizxi yu quiu', Xan,

busiyönda' léguequi nacu' tsahui'.

Bití' ca' guzóa' dxisö.

Nöz quézinu' lë ni, Xan.

¹⁰ Bití' bucáchi'za' icja ládxi'da'ahua' ca ruínu' tsahui' bönachi.

Bulu'a lahui ca runu' ca rnno', en ca rusöló' bönachi.

Ga nudúbigaca bönachi quiu' bití' guzóa' dxisö,

pero bë'a didza' ca nacu' dxi'i ladxi', en ca ru'u didza' le nácatë.

¹¹ Bití' ugú' quia' yöl-la' dxi'i ladxi' quiu', Xan.

Yöl-la' dxi'i ladxi' quiu', en ca runu' ca rnna xtídzu'u ilún chí'itica'sö neda'.

¹² Zián le raca quia' nagú'ugaca neda' lé'ajlö, le cabí gaca nu ulaba.

Nabága'a yugu' dö' bi'a, en bítí'rö gaca ilé'eda'.

Nayanrö ca guitsa' icja', ate' rudú ládxa'a.

¹³ ¡Busölá neda', Xan!

¡Gudáchi gácalenu' neda', Xan!

¹⁴ Ben ga ulu'tuí'i, en ila'bó' baguí'i

nupa na' té'ëni ulu'suniti neda'.

Ben ga ulu'huécaj, en ulu'gá'ana cá'asö

nupa na' té'ëni gaca quia' le cabí naca dxi'a.

¹⁵ Ben ga ulu'dú ládxi' gaca tu' nabíxigaca

nupa na' tu'titaj neda', ta'nná: "¡Buyútsöca' le raca queë'!"

¹⁶ Ben ga ulu'dzeja, en ulu'z' xibó' yúgu'të nupa tu'guilaj Li'.

Ben ga ila'nnática'sö nupa ta'dxi'i yöl-la' rusölá quiu',

ila'nná: "Nayépsëtëre' Xanru'."

¹⁷ Nacuídi'da', en bití' bi gaca guna',

pero ruí'i ládxi' cazu' Li' neda', Xan.

Naca cazu' Nu rácalen neda', en Nu rusölá neda'.

Bití' tsenu' guídu' quia', Dios quia'.

41

¹ Bica' ba bönni' ruí'i ládxi'ë nupa nácagaca yechi'.

Xanru' gácalen cazë' bönni' na' cate' bi gaca queë'.

² Xanru' Dios gun chi'ë lë', en gunë' ga soë' ibanë'.

Gunë' ca' ga uzi'ë xibé xiyú cazë'.

Bití' usán në'ë lë' lu ná'agaca nupa bití' ta'lé'e lë' dxi'a.

³ Xanru' utipë' ládxi'ë bönni' na' cate' ré'enë'.

Uchisé' lë' lu da'a le ráti'në', en gunë' ga soë' dxi'a.

⁴ Gunnía': Bena' dul-la' lo' Li', Xan.

Buéchi' ládxi' neda', en bun neda'.

⁵ Nupa bití' ta'lé'e neda' dxi'a ta'nné' quia', ta'nná:

"¡Bátaxi gátie', en huáca gal-la ládxi' gaca bönachi lë'?"

⁶ Channö uduyúgaquië' neda', ta'z' yë'ë.

Ta'gúë' didza' ca naca le raca quia',

en cate' ta'rúajë', tu'siyönnë' bönachi.

⁷ Tu'dubi nupa bití' ta'lé'e neda' dxi'a, en ta'nné' quia'.

Ta'zá' ládxi' gaca zían le naca dö' le ilún quia'.

⁸ Ta'nné' quia', ta'nná: "Yu'ë yödzöhué' le guti lë'.

Bítí'rö caz huóásë' ga na' dë' lu le denë'."

⁹ Lësca' caní benë' böchi' luzá'a ruzxöni ládxa'a-në'.

Bönni' gudágulenë' neda' tsözxón ridá'bagüë'ë neda'.

¹⁰ Buéchi' ládxi' neda', Xan, en bun neda',
ate' ubí'i caza' quégaca nupa na' bití' ta'lé'e neda' dxi'a.

¹¹ Gácabe'eda' raza ládxi'u neda',
tu' cabí ulu'xicja neda' nupa bití' ta'lé'e neda' dxi'a.

¹² Gácclen cazu' neda' tu' runa' le naca dxi'a.

Gunu' ga sóatica'sa' lo' Li'.

¹³ ¡Yöl-la' ba Xanru', Dios quégaca bönachi Israel!

¡Gulí'cu'ë yöl-la' ba na'a dza, en yugu' dza si' zaca!

¡Ca' gaca!

¡Ön, ca' gaca!

42

¹ Ca rizé ládxi'ba' bidxina' guixi' nisa yégudo',

lësca' caní rizé ládxa'a Li', Dios.

² Ribidxi ládxa'a Li' cazu', Dios.

¿Bátaxi udxina' ga dë quia', en tsu'a le yúbölö yudo' lá'ayi quiu'?

³ Rëla, en te dza ribödxa', en biti' bi rahua'.

Yugu' dza nacua' nupa ta'nábini neda', ta'nná: "¿Gazxi caz zoa Dios quiu'?"

⁴ Risëbi ládxa'a cate' røjneda' ca guca zí'alö,

cate' guzá'lena' bönachi guizxi yu, en yójnórúa' láhuilöguequi ra' yu'u queë' Dios.

Lu yöl-la' rudzeja queétu' bíl-latu', en guyéaj ládxi'tu'-në' Xanru', en bentu' laní.

⁵ ¿Bizx que risébida' ládxa'a, en bizx que rö'a böniga?

Uzxöni ládxa'a-në' Xanru' Dios, tu' huadxín dza cu'a-në' yöl-la' ba le yúbölö.

Náquië' Nu rusölá neda', en náquië' Dios quia'.

⁶ Risébida' ládxa'a, Dios quia'.

Que lë ni na' tsøjneda' Li' tsanni ni zoa', ridá' rizxúnnaja' ra' yegu Jordán,

en tsanni ni ridá' lu guí'a Hermón, en lu guí'a Mizar.

⁷ Ca tu guziú' rinné lu nísado', en ca bö ruí'i tu budoá' nísado' queë' Dios,

caní rinné ladxi' bö' naca caza' lu yöl-la' risëbi ladxi'.

⁸ Rinábida'-në' Xanru' huéchi' ládxi'ë neda' yugu' dza.

Yugu' dzö' rul-la' yöl-la' ba queë' Lë',

en rulidza' Dios, ruí'ilená'-në' didza', Nu na' runna quia' yöl-la' na'bán.

⁹ Guía'-në' Dios, Nu ruzóa neda' tsutsu, innía': ¿Bizx que nál-la ládxi'u neda'?

¿Bizx que run bayúdx quí'i sáca'tica'sa' lu ná'agaca nupa biti' ta'lé'e neda' dxi'a'?

¹⁰ Rutsaba yúgu'të dxita yu'a tu' tu'didza' yudxi neda'.

Yugu' dza ta'nábini neda', ta'nná: "¿Gazxi caz zoa Dios quiu'?"

¹¹ ¿Bizx que risébida' ládxa'a, en bizx que rö'a böniga?

Uzxöni ládxa'a-në' Xanru' Dios,

tu' huadxín dza cu'a-në' yöl-la' ba le yúbölö,

tu' náquië' Nu rusölá neda', en náquië' Dios quia'.

43

¹ Guléaj neda' tsahui', Dios, en bë' didza' uláz quia' lógaca bönachi tuá' dö' quia'.

Busölá neda' lu na' nu rizí' yë', en biti' naca tsahui'.

² Li' cazu' nacu' Dios, Nu rutipa ládxa'a. ¿Bizx que nusán no'o neda'?

¿Bizx que ruhuí'inida' tu' ta'bía no neda' nupa tu'dí'i neda'?

³ Gusól-la' quia' bení' quiu', en le naca idútë li quiu' para ulu'luí'i neda' nöza.

Ben ga ila'ché' neda' ga naca lá'ayi quiu', ga na' zoa cazu' Li'.

⁴ Tsu'a ra' bucugu queë' Dios.

Ibígá'a lahuë' Dios, Nu run ga rudzëjade'eda'.

Gúl-lalena' bihuël-la, cu'a Li' yöl-la' ba, Dios, nacu' Dios quia'.

⁵ ¿Bizx que risébida' ládxa'a, en bizx que rö'a böniga?

Uzxöni ládxa'a-në' Xanru' Dios,

tu' huadxín dza cu'a-në' yöl-la' ba le yúbölö,

tu' náquië' Nu rusölá neda', en náquië' Dios quia'.

44

¹ Biyón quézitu' le, Dios.

Bulu'siyönné' netu' xuz xtó'otu'
ca naca yugu' le zxön benu' dza ni'te,
cate' ni' gula'cu'ë légaquié' luyú ni.

² Bulaga cazu' Li' bönachi yugu' yödzö izá'a,
en bucuásu' légaquié' luyú ni.

Busaca' zi'u bönachi izá'a na', en gurú'unu' léguequi.

³ Biti' gula'déli'né' xuz xtó'otu' luyú ni rácasö quegaquié',
en biti' bulu'sölá la' cuíngacasé',
pero ben cazu' Li' lë na' len yöl-la' huáca zxön quiu',
en lu yöl-la' zxön que le naca cazu',
ate' bulú'u lahui ca nadxí'inu' légaquié'.

⁴ Naca cazu' Li' Dios quia', en Nu rinná be'e neda'.
Busölá bönachi quiu', yugu' xí'ini xi'sóé' Jacob.

⁵ Uguntu' dxin yöl-la' huáca quiu', uxícjatu' nupa ta'dá'baga' netu',
ate' tu' zóalen cazu' netu', ucúl-latu' nupa bití' ta'lé'e netu' dxi'a.

⁶ Biti' uzxöni ládxa'a uxiti' yaga quia',
en bití' uzxöni ládxa'a guié' tuchi' quia' para ilácalen neda',

⁷ tu' rusölá cazu' Li' netu' lu ná'agaca nupa bití' ta'lé'e netu' dxi'a,
en ruzötju' nupa tu'dí'i netu'.

⁸ Cú'utica'stu' Li' yöl-la' ba,
en gué'tica'stu' Li': "Xclenu'."

⁹ Pero na'a nusán no'o netu', Dios, en bé'u lataj nu buxicja netu'.

Bítí'rö réajlenu' bönni' queétu' röjáquié' gudil-la.

¹⁰ Benu' ga buzúnajtu' lógaca nupa ta'díl-lalen netu',
ate' gula'gúé' yugu' le nequi queétu'.

¹¹ Bé'u lataj gulútié' ziantu' ca nu rúti-gacaba' bö'cu' zxila'.
Bësilásiu' netu' lád'agaca yödzö izá'a.

¹² Naca tsca béti'u netu', en láti'do'os guzxi'u.
Biti' ca' buzi'u xibé tsca guzxi'u.

¹³ Bönachi yugu' dzaga yödzö queétu' bila'lé'e lë na' benu' queétu',
ate' tu'cá'ana netu' cá'asö, en tu'titaj netu'.

¹⁴ Benu' ga tu'didza' yudxi bönachi yugu' yödzö netu'.
Tu'tá ícjaguequi lu yöl-la' rucá'ana netu' cá'asö.

¹⁵ Yugu' dza rutuí'ida' ca raca queétu',
en rö'a böniga lu yöl-la' rutuí'i quia',

¹⁶ tu' riyönda' nupa tu'didza' yudxi neda', en tu'cá'ana neda' cá'asö,
nupa na' bití' ta'lé'e neda' dxi'a, en tu'dí'i neda'.

¹⁷ Guca queétu' yúgu'të lë ni sal-la' bití' nál-la ládxi'tu' Li',
en bití' nucá'anatu' didza' dzaga bénlenu' netu'.

¹⁸ Biti' ca' böaj ládxi'tu' ca réajlé'ëtu' Li',
en bití' gudá'baga'tu' le buluí'inu' netu' guntu'.

¹⁹ pero nusán na' cazu' netu' ladaj nupa ná'agaca ca yugu' böa' gui'a sínia',
en nucá'anu' netu' ga chizóa tseajtsázatu' lataj chul-la.

²⁰ La'tu' gul-la ládxi'tu' Li', Dios queétu',
o la'tu' guyéaj ládxi'tu' tu dios izá'a,

²¹ la' gáquibe'etënu' lë ni, Dios,
tu' nöz quézinu' le rizá' ládxi'tu'.

²² Tu' néquitu' quiu' Li' zóatica'sö nu guti netu'.

Nactu' ca yugu' bö'cu' zxíla'do' lo nu guti lé'gacaba'.

²³ ¡Bubán, Xan! ¿Bizx que rásitso' Li'?
 ¡Guyasa! ¡Biti' usán no'o netu' chadía chacanna!
²⁴ ¿Bizx que nucachi' lo' lotu' netu'?
 ¿Naru' nál-la ládxa'u ca raca queé'tu', en ca rigu'i rizáca'tu'?
²⁵ Naguíngaquié' netu' luyú.
 Nadínitu' lu bëchtö yu.
²⁶ ¡Gudáchi gácalenu' netu',
 en lu yöl-la' dxi'i ladxi' quiu' busölá netu'!

45

¹ Rizá' ládxa'a tu le naca dxi'a.
 Ru'a didza' que le runé' bönni' rinná bë'ë.
 Naca lúdxá'a ca le ruzúajlené' bönni' nabé'ede'ené' ru'ë didza'.

² Nácatëru' Li' lachi ca yúgu'të bönachi.
 Nabé'ede'enu' ru'u didza'.
 Que lë ni na' nuné' Dios gaca dxi'a quiu' chadía chacanna.

³ Bega' lë'u guié' tuchi' quiu', bönni' nayépisé',
 lu yöl-la' lachi quiu', en lu yöl-la' unná bë' quiu'.

⁴ Lu yöl-la' unná bë' quiu' idéli'nu' lu gudil-la,
 ugunu' dxin le naca idútë li, en yöl-la' nöxaj ladxi', en le naca tsahui'.
 Yöl-la' huáca zxön quiu' gun ga ilá' lahui yugu' le zxóntërö.

⁵ Natúchi'gacada' yaga lahui tuchi' quiu'.
 Bönachi yugu' yödzö zi'tu' ta'dzó'ö lo', nupa na' ta'díl-lalen li'.
 Yugu' yaga lahui tuchi' quiu' nachóza'gaca ládxi'do'guequi.

⁶ ¡Chadía chacanna naguixju' ga rö'u rinná bë'u, Dios!
 ¡Ca naca le naca tsahui' rinná bë'enu' bönachi quiu'!

⁷ Nadxí'inu' le naca tsahui', en biti' rilé'enu' dxi'a le biti' nácatë.
 Que lë ni na' Dios quiu' nabó cazé' li'.
 Nachíziré' icja ládxi'do'o yöl-la' rudzeja ca le nápagaca ia'zíca'rö bönachi.

⁸ Rilá' zxixi lari' nacu' len zi' mirra, en zi' áloe, en zi' casia.
 Tuné' bönni' huil-la ga rudzéjanu' lu yu'u lidxu' zxön.

⁹ Yugu' nigula zxí'inigaquié' bönni' ta'nná bë'ë
 nútsa'gacabi' bi'i nigula nacu'abi' lidxu'.
 Nigula quiu' rinná bë'enu' zuínu' cuitu' ibëla,
 en nácunu le nazí'i biquitaj oro nazaca'.

¹⁰ Bë' ladxi' neda', nigúlado'.

Bë' ladxi' neda', en biyón xtídza'a.
 Gul-la ladxi' bönachi yödzö quiu', en yugu' di'a dza quiu'.

¹¹ Ní'irö së ládxe'ë bönni' rinná bë'ë yöl-la' lachi quiu'.
 Buzóa zxibu' lahué' tu' náquié' xanu'.

¹² Ní'irö bönachi yödzö Tiro ila'dxín lo' nuá'gaca le nazáca'da' le ilunna quiu'.
 Yugu' bönni' ta'lé'ené' yöl-la' tsahui' ila'nábiné' li' bi unödzu' quégaquié'.

¹³ Yugu' bi'i nigula queé' bönni' rinná bë'ë zóagacabi' lidxe', en nácatërögacabi' lachi.
 Lari' nácubi' nadíalen du oro.

¹⁴ Ila'ché'ë-bi' lahué' bönni' rinná bë'ë, nácubi' lari' nazáca'da'.
 Ila'dabi' yugu' bi'i nigula ra'bando' cúdzi'löbi',
 ate' ila'ché'ë légacabi' lahué' bönni' na' rinná bë'ë.

¹⁵ Lu yöl-la' rudzeja, en lu yöl-la' ruzí' xibé' quégacabi' ila'dxinbi',

en ila'yázabi' yu'u lidxë' bönni' na' rinná bē'ë.

¹⁶ Ila'cuá'abi' bi'i bönni' quiu' uláz quégaquië' xuz xto'o.

Gunu' ga ila'nná bē'ëbi' idútë yödzölió.

¹⁷ Gunu' ga tsöjnégacatica'sö bönachi ca nacu' Li'.

Que lë ni na' yúgu'të bönachi ilé li' "Xclenu" yugu' dza si' zaca.

46

¹ ¡Náquië' Dios Nu run chi'i rë'u, en Nu ruzóa rë'u tsutsu!

¡Zóatica'së' gácalenë' rë'u cate' bi raca queéru'!

² Que lë ni na' biti' gádxiru' sal-la' izxizi idútë yödzölió,

en ila'niti yugu' guí'a lu nísado',

³ en sal-la' chasa idxía, en tsu'u bö nísado' na',

en ila'zxizi guí'ado' tu' nözi le raca.

⁴ Zoa tu yegu le run ga tu'dzeja nupa nacuá' ladzë' Dios,

ga na' rö'ö yudo' lá'ayi ga zoë' Dios nayépisëtëre'.

⁵ Zoa cazë' Dios yödzö na', le catu caz initi.

Cate' ni' soa itó yu gácalenë' nupa nacuá' ni'.

⁶ Tadxi ta'dzöbi bönachi yugu' yödzö,

ate' ta'bó' baguí'i nupa ta'nná bē',

tu' ru'ë didza' Dios, ate' riniti luyú ni.

⁷ Xanru' nayépisëtëre' zóalen cazë' rë'u.

Dios quégaca zxí'ini xi'sóë' Jacob rapa chi'ë rë'u.

⁸ Guli'dá ilé'eli' le nunë' Xanru'.

Buli'yú ca nusunítië' luyú ni.

⁹ Ruzóa dxíë' gudil-la rácagaca idútë yödzölió.

Riguitsjë' yugu' uxiti' yaga,

en rusunítië' yugu' yaga lahui tuchi' que gudil-la.

Ruzégui'ë yugu' carreta que gudil-la tu lu guí' zxön.

¹⁰ Rnnë': "Guli'sóa dxisö, ate' guéquibe'eli' naca caza' Dios.

Nayépisëtëra' yugu' lu yödzö, en lu idútë yödzölió."

¹¹ Xanru' nayépisëtëre' zóalen cazë' rë'u.

Dios quégaca zxí'ini xi'sóë' Jacob rapa chi'ë rë'u.

47

¹ ¡Lu yöl-la' rudzeja queéli' guli'capa' ná'ali', bönachi yúgu'të yödzö!

¡Guli'cu'ë yöl-la' ba Dios, len yugu' le rúl-lalenli'!

² Ral-la' gunru' bal Xanru' Dios nayépisëtëre'.

Náquië' Nu rinná bē' idútë yödzölió.

³ Benë' ga bidéli'ru' yugu' lu bönachi izá'a.

Benë' ga rinná be'eru' yugu' yödzö.

⁴ Guró cazë' luyú ga ni nuzóë' rë'u.

Naca tu luyú lachi quégaca zxí'ini xi'sóë' Jacob, nupa na' nadxí'i quézinë'.

⁵ Len yöl-la' ba zxön ribenë' Dios ga rö'ë rinná bē'ë.

Le zían le tu'cödxë' cate' ribenë' Xanru' ni'.

⁶ ¡Guli'gul-la yöl-la' ba queë' Dios! ¡Guli'gul-la!

¡Guli'gul-la yöl-la' ba queë' Bönni' rinná bē'enë' rë'u! ¡Guli'gul-la!

⁷ ¡Rinná bé'ë Dios idútë yödzölió ni!
 ¡Idú ládxi'li' guli'gul-la yöl-la' ba queë'!
⁸ ¡Zoa cazë' Dios lataj lá'ayi queë' ga rö'ë rinná bé'ë!
 ¡Rinná bé'enë' bönachi yúgu'të yödzö!
⁹ Tu'dubi nupa ta'nná be'e yugu' yödzö
 tsözxón len bönachi queë' Dios queë' Abraham.
¹⁰ ¡Nequi queë' Dios yöl-la' zxön queégaca yúgu'të yödzö nacua' yödzölió!

¡Nayépisëtëre' Lë'!

48

¹ Nayépisëtëre' Xanru', ate' run bayudxi cú'uru'-në' yöl-la' ba idú ládxi'ru'
 ga zoa lu yödzö queë' Dios queéru' le zoa lu guí'a lá'ayi queë'.
² Lachi, en sibi naca guí'a lá'ayi na',
 ate' raza ládxi'gaca bönachi idútë yödzölió ca naca.
 Caní naca guí'a Sión le rö'ö tsölá'alö ga za' bö' ziaga.
 Lu yödzö na' dë ga zoa Bönni' Unná Bë' nayépisë'.
³ Rulu'ë lahui Dios sóaru' tsutsu cuitë' Lë'
 ga zoa lu yu'u lidxë'.
⁴ Gula'dá'baga' nupa ta'nná bé' lu yu ni,
 en gula'bígui'ë ra' yödzö lá'ayi na'.
⁵ Cate' bila'lé'enë' yödzö na' bulu'bánninë'.
 Gula'bö'ë böniga, en la' bulu'zxúnnajtë'.
⁶ Ra' yödzö na' gula'zxízië'.
 Gula'zaca' zi'ë ca raca queénu nigula chizóa uzóanu-bi' bí'ido'.
⁷ Risól-lë'ë Dios tu bö' budunu',
 le rusuniti yugu' barco zxön que yödzö Tarsis.
⁸ Biyönru' ca nácagaca le zxön benë' Dios,
 ate' na'a rilé'e quéziru' le runë',
 lu yödzö lá'ayi queë' Dios queégaca ni'a në'ë guizxi yu,
 en náquië' ca' Dios queéru'.
 Tsaz naguixjë' yödzö na'.

⁹ Ga zoa lu yudo' quiu', Dios,
 röjnetu' ca naca yöl-la' dxi'i ladxí' quiu'.
¹⁰ Ca nayépisëtëre' Lo', Dios,
 ca' ta'gú'u Li' yöl-la' ba bönachi idútë yödzölió.
 Ca naca le naca tsahui' rinná bé'u.
¹¹ Ulu'dzeja bönachi nacua' yödzö Sión.
 Ulu'zí'inu xibé nigula xzí'ini xi'sóë' Judá
 tu' ruchi'a rusöróu' netu' ca naca le naca tsahui'.

¹² Guli'dá idú gásibi'ilö ga dë yödzö Sión,
 en buli'laba yugu' yu'u sibi tun chi'i yödzö na'.
¹³ Buli'yú ca naca zö'ö run chi'i yödzö na',
 en buli'yú ca' le nuzóagaca le tsutsu,
 para gaca quíxjöi'ili' xzí'ini xi'sóali' ca náquië' Dios zxön ni.
¹⁴ Tsaz náquië' Dios queéru', na'a dza, en dza si' zaca.
 Ulu'ínë' ré'u nöza tödi gátiru'.

49

¹ Guli'yöni lë ni, libí'ili', bönachi yúgu'të yödzö.

Buli'zé nágali', libí'ili', zóali' idútë yödzölió.
² Libí'ili', nayépsëtëri', en libí'ili', nácali' cá'asö.
 Libí'ili', dë yöl-la' tsahui' queéli', en libí'ili', nácali' yechi'.
³ Tsöjsá' ládxa'a ca naca le nápagaca yöl-la' réajni'i,
 en gu'a didza' le nápagaca yöl-la' raca yenni'.
⁴ Güí'i ládxa'a ca naca tu le rucudzu' didza',
 en quíxjö'a ca nácagaca tsanni quinnia' lë'e bihuël-la.
⁵ Biti' bi rádxida' cate' ridxín bi raca quia',
 cate' ta'gu'ë neda' lé'ajlö bönni' tuá' dö' biti' ta'lé'enë' neda' dxi'a.
⁶ Tu'zxöni ládxe'ë bönni' na' yöl-la' tsahui' quégaquië',
 en tun ba zxön cuíngaquië' ca nácagaca le dë quégaquië'.
⁷ Biti' gaca huóá'uë' la' cuinsë' nitúë' bönni' na'.
 Biti' gaca bi unödzjë' queë' Dios le gun ga usölë' lë',
⁸ tu' naca zxöntëro le huóá'u yöl-la' na'bán que nu bönni',
 ate' catu caz gaca nu bönni' quizxjë' ca naca,
⁹ para idéli'në' sóatica'së' ibanë',
 en cabí tsázië' yeru ba ga yú'ugaquië' bönni' nati.
¹⁰ Rilé'enë' tatië' ca' bönni' ta'yéajni'inë',
 en ta'nitië' tuz ca tati nupa biti' bi nózigaca, en nupa biti' ta'yéajni'i,
 ate' tu'cá'anë' yöl-la' tsahui' quégaquië' le ulu'z'í' xibé bönachi yúbölö.
¹¹ Téquinë' ila'cuá'tica'sö lídxigaquië' bönni' na',
 ate' tsaz ila'cu'ë' ni',
 ate' ta'gu'ë' lágaca xiyúgaquië' ca naca la' lágacasë'.
¹² Pero yöl-la' ba zxön napë' bönni' na' biti' gun ga sóatica'së'.
 Gati cazë' ca tátiba' böa' guixi'.
¹³ Caní naca le gaca quégaquië' bönni' tu'zxöni ládxe'ë yöl-la' tsahui' quégaquië',
 enca' quégaca zxí'ini xi'sóagaquië',
 yugu' bi'i na' ta'yaza ládxi'gacabi' didza' gulu'ë' xúzgacabi' na'.
¹⁴ Ilátië' ca tátiba' bö'cu' zxila',
 ate' yöl-la' guti gaca quégaquië' ca tu nu uyú bö'cu' zxila'.
 Yugu' bönni' tsahui' ila'nná bé'enë' légaquië' cate' itó yu zila.
 Ila'niti le guta' quégaquië', ate' ila'cuá'tica'së' lataj chul-la ga dzö'ö nupa nátigaca.
¹⁵ Huóá'u cazë' Dios yöl-la' na'bán quia' lu yöl-la' guti,
 tu' iché'ë neda' ga tsöjsóalena' Lë'.
¹⁶ Biti' gádxinu' cate' idéli'në' nu bönni' yöl-la' tsahui' zxön,
 en cate' xön yöl-la' lachi que yu'u lidxë',
¹⁷ tu' cabí bi u'ë cate' gátië',
 en biti' tséajlen lë' yöl-la' lachi que le guta' queë'.
¹⁸ Sal-la' cate' ni' zoë' nabanë' buzí' xibé bö' naca cazë',
 ate' gula'gú'u bönachi lë' yöl-la' ba cate' bidéli'në' yöl-la' tsahui' na'.
¹⁹ Tsázië' ga na' dzö'ë xuz xtá'ahuë',
 en bítirö ilé'enë' bení'.
²⁰ Náquië' bönni' napë' yöl-la' zxön, pero riyádzjanë' yöl-la' réajni'i,
 ca böa' guixi' tati cázaba'.

50

¹ Ru'ë didza' Xanru' Dios nayépisëtëre'.
 Nutubë' dërö nupa nacuá' yödzölió ga naguéla'të ga rilén gubidza ga ridxintë ga ribía.
² Lu yödzö Sió'n rigu'ë Dios bení'.
 Napa yödzö na' yöl-la' lachi idú.
³ Zë'ë Dios queéru', en biti' soë' dxisö.
 Tsöjnöru lahuë' tu guí' zxön,

ate' tsecja tu bö' budunu' idú gasibí'ilë'.

⁴ Ulidzë' lúzxiba xitsá', enca' luyú

cate' uchi'a usöróë' quégaca bönachi queë'.

⁵ Rnnë' Dios: "Guli'túbi nupa néquiguequi quez quia',
nupa na' gulunlen neda' didza' dzaga,
en bulu'lalaj rön lahua' le ben tsutsu didza' dzaga na'."

⁶ Naca bë' náquië' tsahui' Dios lúzxiba xitsá',

tu' uchi'a usöróë' Dios bönachi queë'.

⁷ Rnnë': "Buli'zë nágali', bönachi quia', ate' gu'a didza'.

Buli'zë nágali', bönachi Israel, ate' uzéguia' libí'ili' didza'.

Naca caza' Dios.

Ön, naca' Dios queéli'.

⁸ Biti' uzéguia' libí'ili' didza' ca naca le rúnnali' quia',
en calëga ca nácagacaba' böa' bëdxi ruzégui'li'-ba' lahua'.

⁹ Biti' riquinda'-ba' bëdxi queéli',

en calëga chivo biguiú' nacuá'aba' queéli',

¹⁰ tu' néquigacaba' quia' yúgu'tëba' böa' guixi',

enca' böa'-bëdxi nacuá'aba' lu gayuá' gayuá' gu'ado'.

¹¹ Néquigacaba' ca' quia' yúgu'tëba' böa' zoa xíligacaba',
enca' yúgu'të le zoa nabán la' guixi'.

¹² La'tu' riduna' biti' guía' ca' libí'ili',

tu' nequi quia' yödzölió, enca' yúgu'të le nacuá' ni'.

¹³ ¿Naru' gágutsa' xipéla'gacaba' bëdxi,

o guí'jatsa' xichóngacaba' chivo?"

¹⁴ Le ral-la' unódzjali' queë' Dios naca yöl-la' rë Lë': "Xclenu"

ate' ral-la' gunli' lahuë' Dios nayépisëtëre' ca naca le guzxí' lu ná'ali' gunli'.

¹⁵ Rnnë' ca': "Ral-la' ulídzali' neda' cate' bi gaca queéli'.

Gácalen caza' libí'ili', ate' gunli' neda' bal."

¹⁶ Dios rë' bönni' huía' dö', rnnë':

"¿Bizx que ru'u didza' ca nácagaca xibá naguixja'?

¿Bizx que ru'u didza' ca naca didza' dzaga núnlëna' bönachi?

¹⁷ Biti' runnu' lataj usédida' li',

pero rucá'anú' cá'asö didza' ruá'a.

¹⁸ Cate' rilé'enu'-në' bönni' gubán rácalenu' lë',

en runu' tsözxón nupa ta'guitsaj xibá que yöl-la' nutsaga na'.

¹⁹ Zóatica'su' gu'u didza' xihui',

en ru'ítica'su' didza' biti' nácatë.

²⁰ Zóatica'su' uzéguiu'-në' böchi' cazu',

en rudidza' yudxu' böchi'-zan cazu'.

²¹ Caní benu', ate' biti' bi gunnía',

ate' gúquinu' naca' ca naca cazu' li',

pero na'a uzéguia' li' didza', en ulu'a lahui le nunu'.

²² Buli'zë nágali' didza' ni, nülöli' ruzóali' neda' tsölá'alö.

Channö cabí, usunítia' libí'ili', ate' cuntú nu gaca usölá libí'ili'.

²³ Nu rë neda': Xclenu', runna quia' le run neda' bal,

ate' nu run ca rna xtídza'a, usölá caza' nu na'."

51

- ¹ Dios quia', buzá' ladxi' quia' tsca naca yöl-la' dxi'i ladxi' zxön quiu',
en tsca naca le zián le ruzá' ládxi'u quia', bugúa yugu' le gudá'baga'a lo' Li'.
- ² Bugúbitica'sö neda' tsca naca dö' bi'a.
Buchi'a neda' lu dul-la' nuna'.
- ³ Nöz quézida' le gudá'baga'a,
en röjnétiqúi'sida' yugu' dul-la' nuna'.
- ⁴ Lo' Li' cazu' bena' dul-la',
en lo' Li' ca' bi'a dö'.
Naca bë' nacu' tsahui' cate' ru'u didza',
en idú dxi'a, en tsahui' nacu' cate' ruchi'a rusöróu' queétu'.
- ⁵ Buyútsöca', nabága'a dö' cate' gusí lotë gulja',
en lu dul-la' zoa caza' cate' buzóanu xiná'a neda'.
- ⁶ Ré'ënu' soa le naca idútë li icja ládxi'do'otu'.
Guchiza icja ládxi'da'ahua' yöl-la' réajni'i.
- ⁷ Buchi'a neda' len le ruchí'aninu', ate' gaca' dxi'a.
Buguibi neda', ate' huóaca' zxíla'do'os.
- ⁸ Ben ga yönda' le naché' yöl-la' ruzí' xibé, en yöl-la' rudzeja,
para huóaca ládxa'a lu le raca quia' tu' benu' ga réquibe'eda' nabága'a dul-la'.
- ⁹ Biti' uyú' yugu' dul-la' nuna',
en busulu yúgu'të le naca dö' nabága'a.
- ¹⁰ Dios quia', bun dxi'a ládxi'da'ahua',
en guchiza neda' tu bö' cubi le nuzú' tsutsu.
- ¹¹ Biti' ucuítu' neda' ga zoa' lo' Li',
en bití' ugú' Dios Bö' Lá'ayi quiu' Nu zóalen neda'.
- ¹² Bunna quia' yöl-la' rudzeja que yöl-la' rusölá quiu',
en ben ga guna' ca rnna xtídz'u idú ládxa'a.
- ¹³ Ní'irö usédida' nupa ta'guitsaj xibá quiu' ca nácagaca le ré'ënu' ilúngaca,
ate' yugu' bönni' dul-la' ulu'huécja quiu'.
- ¹⁴ Dios quia', benna neda' lataj cabí'ibága'a xiguia'.
Naca cazu' Dios, Nu rusölá neda'.
Lu yöl-la' rudzeja quia' gul-la' ca naca cazu' tsahui'.
- ¹⁵ Xana' Dios, gusalaj ruá'a,
ate' usiyönda' bönachi yöl-la' ba quiu'.
- ¹⁶ La'tu' raza ládxi'u-ba' böa'-bédxi gútitu'-ba' lo', la' gúntea' caní.
Biti' raza ládxi'u-ba' nu böa' uzégui'tu'-ba' lo'.

¹⁷ Le ré'ënë' Dios le naca ca tu le cú'uru' lahuë'
naca bö' naca cáziru' le nótaj nagula ladxi'.

Dios quia', bití' ucá'anu' cá'asö ládxi'do'otu'
le ruhui'ini ladxi', en le naca nöxaj ladxi'.

¹⁸ Lu yöl-la' ruzá' ladxi' quiu' ben le naca dxi'a
quégaca bönachi yödzö Sión.

Buchisa zö'ö le run chí'i yödzö Jerusalén.

¹⁹ Ní'irö tsaza ládxi'u yugu' le cú'utu' lo' le naca idú dxi'a,
yugu' böa' guíxi'do' gútitu'-ba' lo',
en yugu' böa'-bédxido' uzégui'tu'-ba' lo'.
Ní'irö ilútië'-ba' yugu' bédxi biguiú'do',
en ila'gu'ë-ba' lu bucugu quiu'.

52

¹ ¿Bizx que run ba zxön cuinu' ni'a que dö' ru'u, bönni' nál-la?

Zóatica'sö yöl-la' dxi'i ladxi' queë' Dios.

² Len lúdxu'u rúnlenú' luzó'o didza' para usunítu' bönachi.

Naca lúdxu'u, bönni' rizi' yë', ca tu guié tuchi'.

³ Nadxí'irönu' le naca dö' ca nadxí'inu' le naca dxi'a,
en nadxí'irönu' le cabí nácatë ca nadxí'inu' le naca idútë li.

⁴ Nadxí'inu' yúgu'të didza' tun ditaj bönachi,
li' na', bönni' rizi' yë'ë.

⁵ Tsaz uzötaj cazë' Dios li'.

Sönë' li', en ubéajë' li' lu yu'u lidxu',
en ucuítë' li' ga nacua' nupa nabángaca.

⁶ Yugu' bönni' tsahui' ila'lé'enë' lë ni, en iládxinë' Dios.

Ulu'zidxë' queë' bönni' na' rizi' yë'ë, ila'né':

⁷ "¡Buli'yútsöca! Bönni' ni bití' gú'unnë' uzxöni lúdxë'ë Dios,
pero buzxöni lúdxë'ë yöl-la' tsahui' queë',
en le zían le guzé lúdxë'ë le cabí bi nazaca'."

⁸ Naca' neda' ca tu yaga olivo ya'a le rö' ra' yu'u lidxë' Dios.
Uzxöni lúdxä'a yöl-la' dxi'i ladxi' queë' Dios yugu' iz sí' zaca.

⁹ Guíética'sa' Li': "Xclenu'" tu' ben cazu' Li' ga naca caní,
ate' guna' löza Lo' le naca dxi'a lógaca nupa néquiquequi quez quiu'.

53

¹ Ta'zá' lúdxë'ë bönni' canóz, ta'nné':
"Bití' ca' zoë' Dios."

Nácagaquië' xihui' bönni' caní, en núngaquië' le nácatëro xihui'.

Cuntu nu bönni' zoë' runë' le naca dxi'a.

² Ga na' zoë' Dios yehua' yubá ruyúë' gátitës,
en rilé'enë' bönachi nacua' idútë yödzölió,
para inózinë' channö zoa nu réajni'i,
o channö zoë' nu bönni' ru'i lúdxë'ë Dios.

³ Yúgu'të bönachi söjáquië' ga yúbölö.

Yúgu'të' nácagaquië' xihui'.

Cuntu nu zoa run le naca dxi'a, nitúë' bönni'.

⁴ ¿Naru' cabí nápagaquië' yöl-la' réajni'i bönni' na' tu'ë dö'?
Tu'sunítie' bönachi quia' ca tu nu ragu yöta,
en bití' ca' tu'lidzë' neda'.

⁵ Tadxi ta'dzöbinë' bönni' caní, en bití' bi nuna' quégaquië'.
Caní raca tu' rusunítie' Dios caz nupa ta'díl-lalen libí'ili'.

Gunli' ga ulu'tuí'inë' tu' chigurú'unë' Dios légaquië'.

⁶ Raca lúdxí'ru' irúaj Sión Nu usölá bönachi Israel.

Cate' uchisa cazë' Dios bönachi queë' nadzúngaca,
ulu'dzeja xzí'ini xísóë' Jacob, en ulu'zí' xibé bönachi Israel.

54

¹ Busölá neda', Dios, para gaca yöl-la' ba que Lo'.

Len yöl-la' huáca quiu' guléaj neda' tsahui'.

² Ruzé nagu' le rulidza' Li', Dios.

Ruzé nagu' didza' ruá'a.

³ Ta'díl-lalen bönni' zítu' neda',
tu' té'ënë' bönni' zidzaj ilútië' neda'.

Bití' ca' tádxinë' Dios.

⁴ Buli'yútsöca', naca cazë' Dios Nu rácalen neda'.

Ruzóë' tsutsu Xanru' yöl-la' na'bán quia'.

⁵ Ubi'ë quégaca nupa ta'díl-lalen neda' le usuniti léguequi.

Tu' runu' ca rnna xtídz'u, Dios, busuniti léguequi.

⁶ Idú ládxa'a gútia'-ba' böa'-bédxi lo'.

Guía' Li': "Xclenu" Xan, tu' naca dxi'a Lo'.

⁷ Busölá cazu' Li' neda' lu yugu' le guca quia',
ate' rilé'eda' zeaj nanítitica'sö nupa ta'díl-lalen neda'.

55

¹ Ruzé' nagu' le rulidza' Li', Dios,
en bití' tá'bagu' le rinábida' Li'.

² Ruzé' nagu' neda', en rubí'u didza'.

Rulidza yúdxida' Li', en rö'a böniga

³ ni'a que chi'ë bönni' bití' rilé'ené' neda' dxi'a,
en tu' tu'tsá' neda' nupa tuá' dö', en tu'saca' zi' neda',
en lu yöl-la' rilé' quéguequi ta'bía no neda'.

⁴ Réqui zi' ládxi'da'ahua',
ate' yöl-la' radxi que yöl-la' guti röjtsaza ládxi'da'ahua'.

⁵ Chigula'yaza yöl-la' radxi, en yöl-la' rizxizi neda',
ate' nabaga' yöl-la' radxi ridzöbi neda'.

⁶ Gunnía': "Gaca ládxa'a gata' quia' xílaba' gu'dödo',
para gaca töda' lu bö'ös, en idxina' tu lataj ga gaca uzí' ládxa'a.

⁷ Raca ládxa'a tseja' zi'tu',
en tsöjsóa' la' guixi' ga dë lataj.

⁸ Uyija' carelö tu lataj ga tsöjsóa' tsutsu,
para cabí' bi gun quia' le naca ca bö' budunu'."

⁹ Busuniti légaquië', Xan, en buxí' ruá'agaquië',
tu' bilé'eda' ta'dil-lé', en tu'tsatsé' lu yödzö.

¹⁰ Rëla, en te dza ta'dödé' nöza lu yödzö.
Tu'ë dö', en tuné' le xihui' idú gásibi'ilö yödzö.

¹¹ Tu'sunítië' le nacua' ni'.
Tu'saca' zi'ë bönachi, en ta'z' yë'ë la' nöza que yödz.

¹² Calëga bönni' bití' rilé'ené' neda' dxi'a nu rudidza' yudxi neda',
tu' huáca guá' ilena' le guné',

en calëga bönni' rudí'iné' neda' nu ridíl-lalen neda',
tu' huáca ucachi' cuina' lahué',

¹³ pero nacu' li', tu bönni' ca neda'.

Nacu' böchi' luzá'a, en nacu' tuz len neda'.

¹⁴ Lu yöl-la' dxi'i ladxi' queéru' gúcaru' tuz.

Ladaj bönachi zían gudarú', en bidxinru' lidxë' Dios.

¹⁵ Xana' Dios, bë' yöl-la' guti lataj idxín quégaquië' bagáchi'sö.

Ben ga tsöjtsázagaquië' nabángaquië' lataj chul-la ga nacua' nupa nátigaca,
tu' yu'u le xihui' lídxigaquië', en lu yu'u ca' gapa tu'dubë'.

¹⁶ Pero neda' ulidza'-né' Dios,
ate' usölá cazë' Xanru' neda'.

¹⁷ Chi'i dzó'ölö, en zílado', en gatsaj dza ulidza yúdxida' Lë',
en inné ládxa'a lahué', ate' yön cazë' chi'a.

¹⁸ Huöá'uë' yöl-la' na'bán quia' lu na' nupa ta'díl-lalen neda'
en uzóë' neda' lataj ga cöza' dxi'a tsáhui'do',

tu' nayánda' nupa ta'díl-lalen neda'.

¹⁹ Huayón quézine' Dios, en ubi'ë quégaquië'.

Rö'ë rinná bé'tica'së' Lë'.

Caní gunë' Dios tu' cabí tu'sané' ca tunë',

en bití' tádxine' Dios.

²⁰ Bönni' ru'ë dö' ribía nahuë' nu riböza dxi'a tsáhui'do',
en rucá'anë' cá'asö didza' dzaga nunë'.

²¹ Bë'ë didza' yúlado',

pero yu'u icja ládxi'da'ahuë' yöl-la' ridzá'a.

Bë'ë didza' zxíxido',

pero didza' na' bë'ë gulaca ca guíë tuchi'.

²² Gulú'u le nabágu'u lu në'ë Xanru', ate' utipa cazë' ládxi'u.

Bití' gu'ë lataj iguínna' tsaz nu naca tsahui'.

²³ Chú'unë' bönni' tu'ë dö' na' lataj chul-la
ga nacua' nupa nátigaca ga na' ila'nítigaquië'.

Bití' ila'cuá' gatsaj tsca ral-la' ila'cu'ë nabángaquië' bönni' tutië' bönachi,
en bönni' ta'zí' yë'ë.

Pero neda' uzxöni ládxa'a Li'.

56

¹ Buéchi' ladxi' neda', Dios, tu' ta'dá'baga' bönachi neda'.

Yugu' dza nupa tu'dí'i neda' ta'bía no neda'.

² Yugu' dza nupa bití' ta'lé'e neda' dxi'a tuá' dö' quia'.

Zián nupa ta'díl-lalen neda' lu yöl-la' run ba zxön cuínguequi.

³ Cate' radxi ridzóbida', uzxöni ládxa'a Xanru'.

⁴ Ruzxöni ládxa'a-në' Dios, en rigu'a yöl-la' ba xtídzë'ë.

Ruzxöni ládxa'a-në', en bití' bi gádxida'.

¿Bizxi caz gaca ilún quia' bönachi?

⁵ Yugu' dza tun nigui neda' nupa bití' ta'lé'e neda' dxi'a.

Ta'zá' ládxi'tica'sö nacxi iluá' dö' quia'.

⁶ Tu'dubë' ga nagáchi'sö, en tu'yúlanë' yúgu'të le runa',
para gata' quégaquië' lataj ilútië' neda'.

⁷ Bubi'ë quégaquië', Dios, ca naca dö' tu'ë,
en lu yöl-la' rilé quiu' busuniti légaquië'.

⁸ Nöz quézinu' Li' ca rö'a böniga.

Nurixu' Li' nisa ribödxu' quia'.

¿Naru' cabí nuzú' léguequi lu guichi quiu'?

⁹ Cate' ulidza' Li', la' dza ná'asö ulu'huécja gúz cúdzu'lö nupa tu'dí'i neda'.

Nöz quézida' rácalen cazu' neda', Dios.

¹⁰ Ruzxöni ládxa'a-në' Dios, en rigu'a yöl-la' ba xtídzë'ë.

Ruzxöni ládxa'a-në' Xanru', en rigu'a yöl-la' ba xtídzë'ë.

¹¹ Ruzxöni ládxa'a-në', en bití' bi gádxida'.

¿Bizxi caz gaca ilún bönachi quia'?

¹² ¿Gunna' quiu', Dios yugu' le guzí' lu na'a!

¿Cu'a Li' yöl-la' ba!

¹³ Busöló' neda' lu yöl-la' guti, en nuzú' neda' tsutsu.

Ridá caza' lo' Li', Xantu' Dios, lu bení' ru'u quégaca nupa nabángaca.

57

¹ ¡Buéchi' ladxi' neda', Dios!
 ¡Buéchi' ladxi' neda' tu' ruzxöni ládxa'a Li' gun chi'u neda'!
 Guxóa no'o neda' ca runba' böra run chí'igacaba' bórado' znan xílaba',
 ga idxinrö tödi bönadxi raca quia'.

² Rulidza'-në' Dios nayépisëtërë'.
 Náquië' Dios Nu run ga raca dxi'a quia'.

³ Ga zoa cazë' yehua' yubá ubi'ë didza', en usölë' neda'.
 Usölë' neda' lu na' nu ribía no neda'.
 Lu yöl-la' dxi'i ladxi' queë', en yöl-la' idú ladxi' queë' gácalenë' neda'.

⁴ Naca quia' tsca zoa' ladjagacaba' bédxi guixi'.
 Yugu' bönni' zidzaj nagú'ugaquië' neda' lé'ajlö.
 Nácgaca láyi'gaquië' ca yugu' yaga tuchi' que gudil-la,
 ate' nácgaca lúdxí'gaquië' ca yugu' guíë tuchi'.

⁵ Dios quia', buluí'i lahui lúzxiba yöl-la' zxön quiu',
 en yödzölió ni buluí'i lahui yöl-la' bení' quiu'.

⁶ Nupa tu'dí'i neda' nucáchi'gaca du yalaj le sön neda'.
 Rudú ládxa'a tu' rö'a böniga.
 Gula'chó'önë' yeru ga tsöjbixa' neda',
 pero gula'bixë' la' légcasë' lu yeru na'.

⁷ ¡Chinabá'a quia', Dios!
 ¡Chinabá'a quia'!
 ¡Gul-la' quiu', en cu'a Li' yöl-la' ba!

⁸ ¡Bubán, bö' naca caza'!
 ¡Guli'bán arpa, en bihuël-la!
 ¡Zílado' ubana',
⁹ en gul-la' quiu' Li', Xan, ladaj bönachi yugu' yödzö!
 ¡Cu'a Li' yöl-la' ba lógaca yúgu'të bönachi!

¹⁰ Zxóntërö naca yöl-la' ruhuéchi' ladxi' quiu', le ridxintë yehua' yubá,
 ate' ridxintë yöl-la' idú ladxi' quiu' lúzxiba xitsá'.

¹¹ Dios quia', buluí'i lahui lúzxiba yöl-la' zxön quiu',
 en yödzölió ni buluí'i lahui yöl-la' bení' quiu'.

58

¹ ¿Naru' ruí'ili' didza' idútë li, libí'ili' na', rinná bé'ëli'?
 ¿Naru' ruchi'a rusöröli' ca naca le naca tsahui'?

² ¡Biti' ca'! Rizá' ládxi'li' yugu' le xihui',
 en rusaca' zí'ili' bönachi len yugu' le cabí nácatë runli'.

³ Ta'dödi tsölá'alö nupa tuá' dö' ga gudéla'të gúl'jagaca.
 Ta'z' yë' ga gudéla'të bulu'cuá'anu xiná'aguequi léguequi.

⁴ Yu'u ruí'iguequi le naché' yöl-la' guti ca le dxía láyi'gacaba' bëla sínia'.
 Nácgaca ca tuba' bëla sínia' nacódzuba',

⁵ bëla na' biti' riyönba' chi'ë bönni' gudzá',
 o le rul-lë' bönni' runë' gudzá'.

⁶ ¡Dios quia'! ¡Buzxuzxaj láyi'gaquië'!

¡Guladzu' yugu' layi' tuchi' quégaquië'
 nácagaca ca layi' tuchi' quégacaba' bédxi guixi'!
 7 ¡Ben ga ila'nítië' ca raca que nisa yegu gubó'o cate' ruhuí'!
 ¡Ben ga ila'cuádië' ca raca que guixi' rō'ō la' nōza!
 8 ¡Ben ga ila'nítië' ca yugu' bóruhuinna tu'únaba' lu gubidza,
 o ca tubi' bí'ido' nuzóanu-bi' nigula zí'alō ca ral-la' gáljabi', en chinátitëbi'!

9 Zí'alō ca gaca utsë'e yusu' tu guí' zxön,
 ugúë' Dios légaquië' lu yöl-la' ridzá'a queë',
 bönni' nabángaquië', en bönni' chizóa ilátië'.
 10 Ulu'dzeja nupa nácagaca tsahui' cate' ila'lé'e
 uzí' lëbë' Dios bönni' tu'ë dö' na'.
 Ulu'zxinë' len ná'agaquië' xichóngaca nupa na' tuá' dö'.
 11 Ila'nná bönachi: "Le nácatë zoa le rubi'ë Dios quégaca nupa nácagaca tsahui'.
 Le nácatë zoë' Dios Nu ruchi'a rusörö quégaca nupa nacua' yödzölió."

59

1 Busölá neda', Dios, lu ná'agaca nupa ta'zóa regu' neda'.
 Buzóa neda' tsutsu ga bití' gaca ila'dxín nupa ta'díl-lalen neda'.
 2 Busölá neda' lu ná'agaca nupa tuá' dö',
 en guléaj neda' lu ná'agaca nupa tuti bönachi.
 3 Buyútsöca', ta'bó' nísie' neda' para ilútië' neda'.
 Ta'zóa régu'ë bönni' zidzaj neda',
 calëga tu' gudá'baga'a légaquië', o tu' ben zi'a légaquië', Xan,
 4 en calëga tu' bétia' bönachi, pero ta'zé'ë carelö para tíl-lalenë' neda'.
 Gudá gácalenu' neda', ate' ilé'enu' naca caní.
 5 Xantu' Dios quégaca ní'a no'o guizxi yu,
 en Dios quégaca bönachi Israel,
 gudá dujenu' xiguia' bönachi yúgu'të yödzö.
 Bití' uzá' ládxi'u quégaca nupa tuá' dö' lu yöl-la' rizí' yë' quéguequi.
 6 Tu'dxinë' chi'i dzó'ölö, ta'bödxi yeché'ë ca runba' bö'cu' ragu yéchi'ba' beo',
 ate' ta'dödë' idú gásibi'ilö yödzö.
 7 Buyútsöca', didza' tu'ë nácagaca ca le rébigaquië'.
 Nácagaca didza' tu'ë ca yugu' guíë tuchi'.
 Ta'nné': "¿Nuzxi caz yöni?"
 8 Ruzxidxu' ca naca le tunë', Xan.
 Rutitju' ca naca le tun bönachi yúgu'të yödzö.
 9 Tu' nal-la cazu' Li' guna' löza Li'.
 Nacu' Dios Nu run chi'i neda'.
 10 Tu' náquië' Dios quia' dxi'i ladxi', dutságuie' neda'.
 Uxicja cazë' Dios nupa ta'díl-lalen neda'.
 11 Bití' gútiu' nupa na' tuá' dö' para cabí ilal-la ladxi' bönachi ladza'.
 Lu yöl-la' huáca zxön quiu' bésilasi nupa tuá' dö', en buzötaj léguequi luyú.
 Naca cazu' Xantu', Nu run chi'i netu'.
 12 Ben ga sön légaquië' yöl-la' run ba zxön cúngaquië'
 tu' nözi dul-la' tunë' ca tuí'së' didza',
 enca' tu' tu'dxíë' dö' luzá'agaquië', en ta'zí' yë'ë.
 13 Lu yöl-la' rilé quiu' busuniti légaquië'.

Busuniti légaquië' tsaz para cabí ila'cuá'arë',
 en para iléquibe'e bönachi Dios caz rinná bé'enë' zxf'ini xi'sóë' Jacob,
 ga ridxintë idütë yödzölió.

¹⁴ Tu'dxinë' chi'i dzó'ölö, ta'bödxi yeché'ë ca runba' bö'cu' ragu yéchi'ba' beo',
 ate' ta'dödë' idú gásibi'ilö yödzö.

¹⁵ Ta'dé' ta'guiljé' le ilahuë',
 ate' ta'bödxi'ë channö cabí ulu'huölaj ulu'dzé'enë'.

¹⁶ Gul-la' neda' ca naca yöl-la' huáca zxon quiu'.
 Yugu' zila gul-la' lu yöl-la' rudzeja quia' ca naca yöl-la' dxi'i ladxi' quiu',
 tu' naca cazu' Li' Nu run chi'i neda',
 en nacu' Nu rácalen neda' cate' bi raca quia'.

¹⁷ ¡Naca cazu' Li' Nu rutipa ládxa'a!
 ¡Gul-la' quiu' yöl-la' ba,
 tu' nacu' Li' Nu run chi'i neda', Dios, en Nu nadxf'i neda'!

60

¹ Nusán no'o netu', Dios, en nuzötju' netu'.

Buécja queétu' na'a, en gúcalen netu'.

² Ben cazu' ga gudödi budó' zxu', en guyalaj luyú.

Bun luyú ni tu' chizóa iguinnaj.

³ Sizxöni busaca' zi'u bönachi quiu'.

Le guca queétu' guca tsca bugui'ju' netu' xis uva nal-la
 le ben ga yöjchégu'tu' ca tu bönni' nazúdxinë'.

⁴ Bunödzu' quégaca nupa tadxi Li' tu lari' ulu'chisa,
 le söjácálen cate' bi raca quéguequi,

⁵ para ulu'lágaca nupa na' nadxf'i quézinu'.

Len yöl-la' huáca zxon quiu' busölá netu', en bubí'i didza' cate' rulidztu' Li'.

⁶ Lu le naca lá'ayi queë' bë'ë didza' Dios, gunné':

“Uzi'a xibé, en quísia' xiyúgaca bönachi Siquem, en urixa' luyú dë cuita yegu Sucot.

⁷ Nequi quia' xiyúgaca bönachi Galaad, enca' xiyúgaca zxf'ini xi'sóë' Manasés.

Naca ca tu le rusubín icja' xiyúgaca zxf'ini xi'sóë' Efraín.

Xiyúgaca zxf'ini xi'sóë' Judá naca ga rinná bë'a.

⁸ Xiyúgaca bönachi Moab naca ca tu ga riguibí na'a,

ate' cu'a löla' uléaja' xiyúgaca bönachi Edom.

Códxí'a tu' uxicja' bönachi Filistea.”

⁹ ¿Nuzxi caz gaca iché' neda' lu yödzö zoa zö'ö idú gásibi'ilö le run chi'i yödzö na'?

¿Nuzxi caz iché' neda' lu xiyúgaca bönachi Edom?

¹⁰ ¿Naru' cabí nusán ládxi'u netu', Dios?

¿Naru' cabí tséajlenu' bönni' queétu' röjáquië' gudil-la?

¹¹ Gúcalen netu' cate' tíl-lalentu' nupa ridíl-lalen netu',

tu' cabí gaca gácalen netu' nu naca bönáchisö.

¹² Len yöl-la' huáca queë' Dios idéli'ru'
 tu' uxicja' cazë' Lé' nupa ta'díl-lalen netu'.

61

¹ Ruzé' nagu' le rulidza' Li', Dios.

Ruí'i ládXu'u le rinábida' Li'.

² Ga ni zoa' zi'tu' ga dë ladza' rulidza' Li' tu' rudú ládxa'a.

Guché' neda' ga zoa Nu na' naca ca tu guiójt'o, Nu na' nál-latërö ca neda'.

³ Nacu' Li' Nu run chi'i neda'.

Nacu' Nu rácalen neda' cate' zoa nu ribía no neda'.

⁴ Bë' lataj sóatica'sa' ga zoa cazu' Li'.

Bë' lataj sóalena' Li', guna' neda' ca tunba' bórado' ta'yázaba' zخان xílaba' yøjede.

⁵ Biyón quézinu' Li' le guxzí' lu na'a guna' quiu' Li', Dios.

Benu' ga nequi quia' le runödZju' quégaca nupa tadxi Li'.

⁶ Gunu' ga soë' xidzé bönni' na' rinná bë'ë uláz quiu'.

Zián iz soë' ibanë'.

⁷ Sóatica'së' lo' Li', Dios.

Bë' queë' yöl-la' dxi'i ladxi', en le naca idütë li, yugu' le ilún chi'i lë'.

⁸ ¡Gúl-latica'sa' yöl-la' ba que Lo',

para gaca guna' tu tu dza le guxzí' lu na'a!

62

¹ ¡Tuzë' Dios ruzxöni ládxa'a, en rizé ládxa'a Lë'!

¡Lë' cazë' rusölë' neda'!

² ¡Tuzë' Lë' rapa chi'ë neda', en rusölë' neda'!

¡Ruzóë' neda' tsutsu, ate' biti' gaca nu uzötaj neda'!

³ ¿Gáca'xte caz gü'i ládxi'li' ucúl-lali' neda'?

Ré'ënisili' uzótjali' neda' ca tu zö'ö chizóa iguínnej,
o ca tu lë'aj yaga le chinatëbi.

⁴ Ré'ënisili' uzótjali' neda' ga ni tunë' neda' bal.

Ruzí'ili' xibé yugu' didza' biti' nácatë.

Ruí'ili' dxi'a didza' láchui'sö,

pero lu icja ládxi'do'oli' rudidza' yúdxili' neda'.

⁵ ¡Tuzë' Dios ruzxöni ládxa'a,

en runa' löza Lë'!

⁶ ¡Tuzë' Lë' rapa chi'ë neda', en rusölë' neda'!

¡Ruzóë' neda' tsutsu, ate' biti' gaca nu uzötaj neda'!

⁷ ¡Tuzë' Dios rusölë' neda', en runë' ga naca' bica' bal!

¡Dios nuzóë' neda' tsutsu, en rapa chi'ë neda'!

⁸ Libí'ili', bönachi, buli'zxöni ládXë'ë Dios yúgu'të dza.

Buli'siyönnë' yugu' le raca queé'li', tu' run chi'i cazë' rë'u.

⁹ Le nácatë nácatë yúgutë bönachi ca tu bö' ridódísö,
en biti' bi nazáca'gaca nupa na' nadéli'gaca lataj lo.

Tu lu zxigóns biti' bi nál-lí'guequinë'.

Nácatëcarë' dzá'asö ca tu bö' riguéla'siru'.

¹⁰ Biti' uzxöni ládxi'li' bi idéli'li' len yöl-la' nál-la queézili'.

Biti' uzí'ili' xibé le cuanli'.

Channö gata' queé'li' yöl-la' tsahui', biti' gü'i ládxi'li' le.

¹¹ Tu luzuísö bë'ë didza' Dios.

Chopa luzuí' biyönda' ca naca lë ni rnna:

“Nápatërë' Dios yöl-la' huáca,

¹² ate' zóatica'sö yöl-la' dxi'i ladxi' queë'.”

Ubf'i cazu', Xan, quégaca bönachi tsca naca le núngaca.

63

¹ Dios, nacu' Dios quia', ate' idú ládxa'a ruguilja' Li'.
Ribidxi ládxa'a Li', ate' idútè le naca' rizé ladxi' Li'.
Zoa' tu luyú bidxi ga ni rudú ládxa'a, ate' biti' bi dè nisa.
² Ben ga ilé'eda' Li' lu lataj ga na' zoa cazu',
para ilé'eda' yöl-la' huáca quiu', en yöl-la' ben' quiu'.
³ Tu' nácatèrö dxi'a yöl-la' dxi'i ladxi' quiu' ca yöl-la' na'bán caz.
Que lè ni na' cu'a Li' yöl-la' ba.
⁴ Guía' Li': "Xclenu" tsanni ni zoa' nabana'.
Uchisa' na'a, en ulidza' Lo'.
⁵ Ruhüölaj rudzé'e icja ládxi'da' ahua' le nácatèrö dxi'a,
ate' lu yöl-la' rudzeja quia' rigu'a Li' yöl-la' ba.
⁶ Røjneda' Li' cate' déa' lu le ráti'da'.
⁷ Rizá' ládxa'a ca nacu' cate' rina'sa' yëla.
Rácalen cazu' neda',
en tu' run chi'u neda', lu yöl-la' rudzeja quia' rul-la' quiu'.
⁸ Nazón cazu' Li' bö' naca caza'.
Rizón cazu' Li' neda',
⁹ pero ila'yaza lataj chul-la
nupa té'ëni iluti neda'.
¹⁰ Ilátigaca lu gufé tuchi'.
Ilágugaca bö'cu' zuga' léguequi.

¹¹ Nu rinná bē' uláz queē' Xanru' udzeja ladxi' lahuē' Dios.
Ulu'zī' xibé yúgu'tè nupa tu'zxöni ladxi' Lē',
tu' usayaj cazē' Lē' ru'igaca nupa ta'zī' yē'.

64

¹ Dios, buzé nagu' chi'a le rinabi yúdxida' Li',
para gun chi'u yöl-la' na'bán quia' tu' rádxida' bi gun nu ridíl-lalen neda'.
² Bucachi' neda' para cabí bi ilún quia' bagáchi'sö nupa tuá' dö',
en para cabí ila'bía di'ë neda' bönni' tutië' bönachi.
³ Nátagaca lúdxig'gaquië' ca yugu' gufé tuchi',
ate' nátagaca didza' zī' tu'ë ca yugu' yaga lahui tuchi'.
⁴ Bagáchi'sö tu'zé yugu' yaga lahui tuchi' na'
para ilunë' huë' nupa biti' bi nabága'gaca.
Tsárido'os tu'zé léguequi, en biti' bi tádxinë'.
⁵ Biti' ca' tu'cá'anë' le naca dö' té'ënë' ilunë'.
Tu'ë didza' ca gaca ulu'cáché'ë yugu' du yalaj quégaquië', ta'nné':
"¿Nuzxi caz gaca ilé'e yugu' du na'?"
⁶ Tunë' didza' ca naca le naca dö' ilunë', ta'nné': "Chinabá'a le gunru'."
Tu'cáchi'gaquië' le ta'zá' ládxe'ë, en le ta'bequi icjë'.
⁷ Uzal-lë' Dios tu yaga lahui tuchi' le ideli' légaquië'.
Tsárido'os gunë' légaquië' huë'.
⁸ La' didza' tu'isë' ilún ga tseajchégu'gaquië'.
Lu yöl-la' rubani quéguequi ulu'tá ícjaguequi nupa ila'lé'e légaquië'.
⁹ Ní'irö yúgu'tè bönachi iladxi Dios,
en ulu'siyón luzé'eguequi ca naca le nunë' Dios,
en ila'zá' ládxi'gaca ca naca lè na' nunë'.
¹⁰ Nu bönni' tsahui' uzi'ë xibé' Xanru', en gunë' löza Lē'.

Yúgu'të nupa nácagaca idú ladxi' ulu'zì' xibé'.

65

¹ Dios, nupa nacua' yödzö Sión ila'gú'u Li' yöl-la' ba,
en ilunna quiu' le gula'zì' lu né'eguequi,

² tu' riyón quézinu' Li' cate' tu'lidza Li',
ate' yúgu'të bönachi ila'dxín lo'.

³ Tun nigui neda' dul-la' nuna',
pero runiti lo cazu' netu' ca naca le ridá'baga'tu' Li'.

⁴ Bica' ba nupa nabó cazu' quiu', en nulidzu' quiu',
para ila'cuá' yugu' lataj lá'ayi quiu'.

Huölej udzé'etu' le nácagaca dxi'a yú'ugaca lidxu',
enca' le yú'ugaca yudo' lá'ayi quiu'.

⁵ Tu' nacu' tsahui' rubi'u didza', en runu' yugu' le zxön le tácalen netu'.
Naca cazu' Dios Nu rusölá netu'.

Nupa nacua' idútë yödzölió ulu'zxöni ladxi' Li',
enca' nupa nacua' zi'tu' ia'tsölá'alö nísado'.

⁶ Len yöl-la' huáca quiu' nucu'u yugu' guí'a zxön,
le naca bé'gaca nál-latërö cazu' Li'.

⁷ Ruzóa dxíu' le riyasa ridxía lu nísado', en le ru'u bö que.
Ruzóa dxíu' bönachi cate' tu'tsatsa.

⁸ Bönachi idútë yödzölió tadxi Li' ni'a quégaca le zxön nunu'.
Le run cazu' Li' tun ga tu'dzeja bönachi idapa la'a yödzölió.

⁹ Ruí'i ládxi'u luyú, en risól-lu'u nisa guiój.
Runu' ga ruhuóaca yu ya'a.

Nucu'u luyú na' yugu' yegu yúdzugaca nisa zila,
le run ga dética'sö zxo'a'-za, tu' caní raza ládxi'u Li'.

¹⁰ Risól-lu'u nisa guiój gapa dégaca na, en rusubisu' gapa chinadúz.
Ruúnu' yúludo' luyú zidzaj, en runu' ga ta'gula guixi' cuando'.

¹¹ Runu' ga rulá' yödx yana' le nadúz luyú ni tu iz tu iz,
en ga zóatica'sö le ilé'aj ilágugaca bönachi.

¹² Nacuá'aba' böa'-bëdxi la' guixi',
ate' tu'dzeja bönachi yugu' lu guí'ado'.

¹³ Gapa naca lachi' nacua'aba' bö'cu' zxila',
ate' dxíada' zxo'a' xtila la' yëla.

Lu yöl-la' rudzeja quéguequi ta'bódxia,
en tul-la bönachi quiu'.

66

¹ ¡Guli'güí' zidzaj didza' lahuë' Dios
lu yöl-la' rudzeja queé'li' yúgu'tëli' zóali' yödzölió!

² ¡Guli'gul-la ca naca yöl-la' ba que Lë!
¡Guli'cu'ë yöl-la' ba!

³ Guli'guíë' Dios: "¡Zxöntërö nácagaca le nunu'
tu' naca zxöntërö yöl-la' huáca quiu'!"
Nupa biti' ta'lé'e Li' dxi'a ulu'luf'i cuini
ca nupa tun ca rnna xtídz'u.

⁴ Yúgu'të nupa nacua' yödzölió ilún Li' zxön,
en ilúl-la yöl-la' ba quiu'.
Ilúl-la yöl-la' ba que Lo'.

⁵ Guli'dá ilé'eli' yugu' le nunë' Dios.
 Nayépisëtërë' Dios lu le runë' quégaca bönachi.
⁶ Benë' ga böáca ca luyú bidxi ga dë nísado'.
 Gula'dödë' gatsaj láchui'lö yegu, ta'zé'esö ní'agaquië'.
 Ní' udzëjade'eru' ca náquië' Lë'.
⁷ Len yöl-la' unná bë' queë' rinná bé'tica'së'.
 Ruyútica'së' bönachi yúgu'të yödzö.
 Biti' ral-la' ilún ba zxön cuínguequi nupa ta'dá'baga' xtídzë'ë.

⁸ ¡Guli'gún zxönë' Dios queétu', libí'ili' bönachi yúgu'të yödzö,
 en guli'cu'ë yöl-la' ba gátitës!
⁹ ¡Run cazë' Lë' ga zóaru' nabanru',
 en biti' ru'ë lataj cuila ní'atu'!

¹⁰ Guzxí' bë' cazu' netu', Dios.
 Buchi'u netu' ca run nu ruchi'a guíë plata lu guí'.
¹¹ Bë'u lataj bidzuntu' lu du yalaj.
 Busubágu'u netu' tu yua' z'i'.
¹² Benu' ga gula'libë' icjtu' bönni' dxíagaquië'-ba' böa'.
 Gudóditu' lu guí', en lu nisa,
 pero guché' cazu' netu' tu lataj ga böljaj budzé'etu'.
¹³ Tsu'a lidxu', en cu'a-ba' lo' böa'do' uzégui'a-ba' lo'.
 Guna' lo' Li' le guzxí' lu na'a guna',
¹⁴ lë na' bë'a didza' que,
 le gunnía' cate' ni' riguí'i rizáca'a.
¹⁵ Cu'a-ba' lo' Li' böa'-bëdxi renni' uzégui'a-ba' lo',
 tsözxön len dzön quégacaba' chivo biguiú'.
 Gútia'-ba' lo' yugu' bëdxi, en yugu' chivo biguiú'.

¹⁶ Guli'dá uzé nágali', yúgu'tëli' rádxili'-në' Dios,
 ate' usiyönda' libí'ili' yugu' le benë' le gulácalen neda'.
¹⁷ Len ruá' cuinsa' bulidza' Lë',
 en bena' Lë' zxön len lúdxá'a.
¹⁸ Channö rucácha'a le naca dö' lu ládxi'da'ahua',
 bití' yönnë' Xanru' Dios didza' gu'a,
¹⁹ pero le nácatë biyönnë' Dios didza' bë'a.
 Buzé naguë' cate' bulidza' Lë'.

²⁰ ¡Yöl-la' ba Dios!
 ¡Biti' gudá'baguë'ë neda' cate' bulidza'-në',
 en bití' bugúë' yöl-la' nadxí'i queë' neda'!

67

¹ Xantu' Dios, buzá' ladxi' queétu', en ben ga gaca dxi'a queétu'.
 Lu yöl-la' dxi'i ladxi' quiu' buyú netu',
² para gaca bë' le ré'ënu' guntu' yödzölió ni,
 en para ila'nözi bönachi yúgu'të yödzö ca naca yöl-la' rusölá quiu'.
³ Ral-la' ila'gú'u bönachi Li' yöl-la' ba, Dios.
 Yúgu'të bönachi ral-la' ila'gú'u Li' yöl-la' ba.
⁴ Ral-la' ulu'dzeja bönachi yúgu'të yödzö,
 en ilúl-la' lu yöl-la' rudzeja quéguequi.

Tu' uchi'a usöróu' bönachi ca naca le naca tsahui',
⁵ ral-la' ila'gú'u Li' yöl-la' ba bönachi, Dios.
 Yúgu'të bönachi ral-la' ila'gú'u Li' yöl-la' ba.

⁶ Yödxí yana' runödzej luyú ni.
 Dios queéru' runë' ga raca dxi'a queéru'.
⁷ Runë' Dios ga raca dxi'a queéru',
 para iladxi Lë' yúgu'të nupa nacua' yödzölió.

68

¹ Raca ládxi'ru' chasë' Dios, en usulásië' nupa ta'díl-lalen Lë',
 en gunë' ga ulu'zxunnaj nupa biti' ta'lé'e Lë' dxi'a.

² Ca rulaga tu bö' recja dzön, ca' bulaga léguequi.

Ca na' ruúna' lu guí' quízxi'ba' buz,
 ca' ila'niti nupa tuá' dö' lahuë' Dios.

³ Ulu'dzeja nupa nácgaca tsahui', en ulu'zí' xibé' Dios.
 Lu yöl-la' rudzeja quéguequi ulu'zí' xibé'.

⁴ ¡Gulí'gul-la queë' Dios!
 ¡Gulí'gul-la yöl-la' ba que Lë'!
 Buli'pá'a nöza ga tödë' gapa dë' lataj.
 ¡Nazí' i lë' Xanru'!
 ¡Bulí'dzeja lahuë' Lë'!

⁵ Náquië' ca xúzgacabi' bi'i uzé'bido',
 enca' Nu ruchi'a rusöró quégacanu nigula uzëbi.
 Caní náquië' Dios ga na' zoë' lataj lá'ayi queë'.

⁶ Rucu'ë Dios nupa nagá'anagaca bayechi' tu yu'u.
 Rubéajë' nupa nadzúngaca, en runë' ga raca dxi'a quéguequi,
 pero ulu'gá'ana tu luyú bidxi nupa ta'dá'baga' Lë'.

⁷ Yöjnöru cazu' lógaca bönachi quiu', Dios,
 cate' guchë'u léguequi la' guixi' ga na' dë' lataj.

⁸ Gudödi budó' zxu' dza ni'.
 Lësca' gula guiójsiu' lahuë' Dios.
 Guzxizi guí'a Siná' lahuë' Dios quégaca bönachi Israel.

⁹ Benu' ga gulaj guiójsiu', Dios.
 Benu' ga böaca ya'a xiyú' ga ni' guca yu bidxi.

¹⁰ Yöjcuá' nupa néquiguequi quiu' luyú na'.
 Lu yöl-la' dxi'i ladxi' quiu', Dios,
 bucözu' le gácalen nupa nácgaca yechi' luyú na'.

¹¹ Bë' cazë' didza' Xanru' Dios.
 Ta'guísinu nigula zían didza' dxi'a queë', ta'nnanu:

¹² "¡Ta'zxúnnajë'! ¡Ta'zxúnnajë' bönni' ta'nná bë'ë,
 enca' bönni' röjáquië' gudil-la guizxi yu quégaquië'!"
 Nigula gula'bózanu lídxigacanu bulu'zí'inu xibé le gutá' quégaquië'.

¹³ Sal-la' bucachi' loli' gapa tun chí'ili' bö'cu' zxila',
 gáculi' le naca lachi ca nácgacaba' gu'dödo' néquiguequiniba' guíë' plata,
 en xitúbigacaba' néquiguequini guíë' oro.

¹⁴ Cate' bësilásië' Dios bönni' na' gula'nná bë'ë lu guí'a Salmón,

benë' ga gula guió'j bögui' lu guí'a na'.

¹⁵ Nequi queë' Dios guí'a Basán.

Naca guí'a Basán na' tu guí'a zxön.

¹⁶ ¿Bizx que ruzxé'eli', yugu' guí'a zxön?

¿Bizx que ruzxé'eli' guí'a na' guzé ladxé'ë Dios tsöjsóë' ga na'?

Le nácatë tsaz soë' Dios ni'.

¹⁷ Gayuá', en gayuá' nácagaca carreta que gudil-la queë' Dios.

Rizé'ë Xanru' lu guí'a Sinaí ga na' tseajtsazië' lataj lá'ayi queë'.

¹⁸ Buëpu' yehua' yubá richë'u bönachi zián gula'dzúngaca.

Nu'u yugu' le bulu'nödzej bönachi quiu',

en le gulunna quiu' nupa ta'dá'baga' Li',

para tsöjsóë' Dios ni' tsaz.

¹⁹ ¡Yöl-la' ba Dios, Nu ruá' sua'ru' tu dza tu dza!

¡Náquië' Dios Nu rusölá rë'u!

²⁰ ¡Dios queëru' rusölé' rë'u!

¡Rusölé' Xanru' Dios rë'u lu yöl-la' guti!

²¹ Le nácatë Dios udxíë' huë' ícjagaca nupa ta'dá'baga' Lë'.

Udxíë' huë' icjë' bönni' biti' gusanë' ca naca dö' ru'ë.

²² Ru'ë didza' Xanru', rnnë': "Ubéaja' léguequi lu guí'a Basán, en ubéaja' léguequi lu nísado',

²³ ate' ul'ibili' léguequi ga idxintë irúaj rön quéguequi,

ate' ilé'ajba' zxiculi' xichóngaca nupa ta'dil-lalen lib'ili'."

²⁴ Ta'lé'e yúgu'të bönachi nupa ta'dalen Li', Dios.

Lu yöl-la' run Li' zxön ta'dá lu lataj lá'ayi quiu', Dios quia', Nu rinná be'e neda'.

²⁵ Nupa tul-la, en nupa ta'guínnaj lé'egaca bihuël-la, ta'dá ni',

ate' bi'i nigula ra'bando' tunbi' léguequi tsözxón, ta'gápabi' lé'egaca guídido'.

²⁶ Buli'lidzë' Dios dxi'a tsáhui'do' gapa na' rudúbili' queë',

tu' náquië' Xanru', lib'ili' xzí'ini xi'sóë' Israel.

²⁷ Nacu'ë xzí'ini xi'sóë' Benjamín ga na', bönni' gúcarë' cuidi', ate' ta'nná bë'ë.

Bönni' lo quégaquië' xzí'ini xi'sóë' Judá nútsa'gaquië' ladjagaquië',

enca' ladjagaquië' bönni' lo quégaquië' xzí'ini xi'sóë' Zabulón, en Neftalí.

²⁸ Bulu'í lahui yöl-la' huáca quiu', Dios.

Bulu'í lahui yöl-la' huáca quiu', Dios, tu' chibenu' zián le gulácalen netu'.

²⁹ Tu' dë yudo' quiu' lu yödzö Jerusalén,

bönni' ta'nná bë'ë ila'ché'ë ni' le ilunnë' quiu'.

³⁰ Buzé le bach bönachi yödzö na' nácagaca ca böa' guixi',

enca' bönachi yugu' yödzö nácagaca ca yugu' bëdxi tsözxón len xzí'iniguequi.

Tu'libi bönachi yechi' tu' ta'zé ladxí'gaca dumí.

Bësilási nupa na' ta'yaza ladxi' rójaca gudil-la.

³¹ Bönni' gubáz quégaca bönachi Egipto ila'dxinë' lo'.

Bönni' Etiopía ila'chisa ná'agaquië' lo', Dios.

³² ¡Guli'gul-la queë' Dios, bönachi yúgu'të yödzö!

¡Guli'gul-la yöl-la' ba queë' Xanru'!

³³ Rö'ë yehua' yubá xitsá'tërö, le zoa caz dza ni'te.

Buli'yútsöca', ru'ë zidzaj didza', en naca chi'ë ca guziú' rinné.

³⁴ ¡Guli'gún zxönë' Dios!

Yöl-la' nayépisë queë' rusubaga' bönachi Israel.

Yöl-la' huáca zxön queë' nalá' lúxiba xitsá'.

³⁵ Rubániru' ca nacu' Li', Dios, lu lataj lá'ayi quiu'.

Runnu' quégaca bönachi quiu' yöl-la' nal-la, en yöl-la' huáca.

Náquië' Dios quégaca bönachi Israel.

¡Yöl-la' ba Lë' Xanru' Dios!

69

¹ Busölä neda', Xana' Dios,

tu' raca quia' tsca nabága'a nisa ga ridxintë ruchicja' nisa.

² Raca quia' tsca ruhuötja' ga rë' lu guna', en bití' zoa ga gaca uliba'.

Zoa' ca tu lu nisa zila, en chizóa uchicja' nisa.

³ Rudú ládxa'a tu' rulidza' nu gácalen neda', ate' da' lubá'a.

Chirichul-la guió'j lahua' tu' ruyúa' ga guídu' dusöló' neda'.

⁴ Nayántërö ca guitsa' icja' nupa bití' ta'lé'e neda' dxi'a,

en bití' bi nuna' quéguequi.

Nál-lagaca nupa ta'díl-lalen neda', en té'ëni iluti neda',

en bití' bi nuna' quéguequi.

Tunë' bayúdx ubi'a dumí le cabí gulana'.

⁵ Nöz quézinu' Li', Dios, yöl-la' canó'z quia',

en bití' nagachi' lo' Li' dul-la' nuna'.

⁶ Bití' gu'u lataj nupa tu'zxöni ladxi' Li' ulu'tuí'i ni'a quia' neda',

Xana' Dios nayépisëtëru'.

Bití' gu'u lataj nupa tun Li' zxön ila'gá'ana cá'asö ni'a quia',

Dios quégaca bönachi Israel.

⁷ Tu' nadxí'ida' Li' tu'lidza ditjé' neda',

en que lë ni na' rutuí'ida'.

⁸ Naca' ca tu bönni' zi'tu' lógacabi' bi'i bócha'a,

en ca tu bönni' zi'tu' lógaquië' di'a dza quia'.

⁹ Tu' ru'í' ládxa'a yudo' quiu' régui rilá ládxi'da'ahua'.

Naca ca tu'lidza ditaj neda' nupa tu'lidza ditaj Li'.

¹⁰ Ruzötaj cuina', en runa' gubasa,

en que lë ni na' tu'didza' yudxi neda'.

¹¹ Rácuá' lari' cá'asö ca run nu ribödxí yechi',

ate' tu'titaj neda'.

¹² Ta'nné' quia' yugu' la' nöza,

ate' nupa nazúdxigaca tul-la ca naca quia',

¹³ pero neda' ulidza' Li', Xan.

Bubí'i didza', Dios, cate' idxín dza raza ládxi'u Li'

tu' nadxí'ide'enu' neda',

en tu' guzxi' lu no'o usöló' neda'.

¹⁴ Guléaj neda' para cabí huötja' lu le naca ca guna'.

Ben ga ulá' lu ná'agaca nupa ta'díl-lalen neda',

en lu le naca ca nisa zila le chizóa ibaga' neda'.

¹⁵ Biti' gu'u lataj ibaga' neda' lë na'.

Biti' gu'u lataj uchicja' lu le naca ca nísado',
enca' cabí huötja' tu lu yeru ba.

¹⁶ Bubí'i didza', Xan, tu' nacu' dxi'i ladxi',
en tu' ruhuéchi' ládxa'u neda', gudá quia'.

¹⁷ Biti' ucachi' cuinu' lahua' neda', huen dxin quiu'.

¡Rö'a böniga! ¡Gudáchi gúcalen neda'!

¹⁸ ¡Gudá ga zoa' dusöló' neda'!

¡Ben ga ulá' lu ná'agaca nupa ta'díl-lalen neda'!

¹⁹ Nöz quézinu' Li' ca tu'didza' yudxi neda',

en ca tu'lidza ditaj neda', en tu'cá'ana neda' cá'asö.

Rilé'e quézinu' yúgu'të nupa bití' ta'lé'e neda' dxi'a.

²⁰ Rudú ládxa'a tu' tu'didza' yudxi neda', en bití' bi gaca guna'.

Gulöza' nu huéchi' ladxi' neda', pero cuntú nu guzóa.

Gú'unida' nu hué tsahui' neda', pero cuntú nu bidzöli.

²¹ Cate' guduna' bulu'gahué' neda' tu le silá',

en cate' gubidxa' nisa, bulu'gui'jé' neda' nupu zi.

²² Ben ga huöáca laní quégaquié' ca tu le sön légaquié',

en ben ga huöáca le tu'zi'ë xibé ca tu le gun ga ila'chixi ila'níguinë'.

²³ Ben ga ichul-la guió'j lógaquié' para cabirö ila'lé'ené'.

Ben ga ila'zéchutica'sö cúdzu'gaquié' zcan yua' nuá'gaquié'.

²⁴ Busubaga' légaquié' lu yöl-la' rilé quiu',

en bë' quégaquié' yöl-la' ridzá'a quiu'.

²⁵ Ben ga cuntú nu soa ládzagaquié',

en ga bíti'rö nu soa lu yu'u lídxigaquié'.

²⁶ Ta'zóa régu'ë nupa na' benu' léguequi xiguia'.

Tu'siyönné' ca ta'guí'i ta'zaca' nupa na' nunu' léguequi hué'.

²⁷ Buzúaj lu guichi yugu' dul-la' tuné',

en bití' gu'u légaquié' lataj ila'déli'né' yöl-la' rusölá quiu'.

²⁸ Busulu lágaquié' nazúajgaca lu guichi quégaca nupa nabángaca.

Bití' gu'u légaquié' lataj ila'bábalené' nupa ná'cagaca tsahui'.

²⁹ Neda' riguí'i rizáca'a, en rudú ládxa'a.

Guchisa neda', Dios, en busölá neda'.

³⁰ ¡Cu'a-né' yöl-la' ba Dios len tu le gul-la'!

¡Guna' Lë' zxon, en guía'-né': "Xclenu"!

³¹ Chaza ládxe'ë Xanru' Dios lë ni

ca raza ládxe'ë-ba' böa'-bëdxi rútia'-ba' lahué',
o ca raza ládxe'ë-ba' tuba' bëdxi zxon chinagúlaba'.

³² Nupa ta'guí'i ta'zaca' ila'lé'eni lë ni, en ulu'dzeja.

Ila'dipa ládxi'gaca nupa tu'guilaj Dios.

³³ Ruzé nague' Xanru' Dios nupa ta'yadzaj ta'yudxi,

en bití' ral-la ládxe'ë bönachi queé' nadzúngaca.

³⁴ ¡Guli'cu'ë yöl-la' ba Dios, lib'ili' yehua' yubá, en luyú ni,

enca' nísado', en yúgu'të le nacua' tu tu lataj na'!

³⁵ Usölä cazë' Dios bönachi Sión,
 en uchisë' yugu' yödzo quégaca xí'ini xi'sóë' Judá.
 Ila'cuá' bönachi queë' ga na', ate' guequi quéguequi luyú na'.
³⁶ Xí'ini xi'sóagaquië' huen xichinë' ila'z'í'ibi' luyú na',
 ate' ila'cuá'tica'sö ni' nupa nadxí'igaca Lë'.

70

¹ ¡Busölä neda', Dios!
 ¡Gudáchi gácalenu' neda', Xan!
² Ben ga ulu'tuí'i, en ila'bó' böniga nupa na' té'ëni iluti neda'.
 Ben ga ulu'huécja, en ulu'gá'ana cá'asö nupa na' té'ëni gaca bi gaca quia'.
³ Ben ga ulu'huécja lu yöl-la' rutuí'i quéguequi
 nupa na' tu'titaj neda', ta'nná: "Ja, ja."
⁴ Ben ga ulu'dzeja, en ulu'z'í' xibó' yúgu'të nupa tu'guilaj Li'.
 Ben ga ilu'ítica'sö didza' nupa ta'dxí'i yöl-la' rusölä quiu', ila'nná:
 "¡Zxóntërö náquië' Dios!"
⁵ Neda' nacuí'di'da', en bití' bi gaca guna'.
 ¡Gudáchi gácalenu' neda', Dios!
 Nacu' Nu rácalen neda', en Nu rusölä neda'.
 ¡Bití' ca' tsenu' guídu' quia', Xan!

71

¹ Nuzóa cazu' neda' dxi'a tsáhui'do' ga na' zu', Xan.
 ¡Bití' gu'u lataj utuí'ida'!
² ¡Tu' nacu' tsahui' gúcalen neda', en busölä neda'!
 ¡Buzé' nagu' neda', en busölä neda'!
³ Nacu' le uzóa neda' tsutsu,
 en le gun chí'i neda' ga gaca ucachi' cuina'.
 Chigunná bé'enu' nu usölä neda' tu' nacu' Nu ruzóa neda' tsutsu,
 en Nu run chí'i neda'.
⁴ Dios quia', busölä neda' lu na' nu ruá' dö',
 en lu na' nu ridá'baga' Li', en run dzatsa.
⁵ Tuzu' Li' runa' löza, Xan.
 Ruzxöni ládxa'a Li' ga gudéla'të naca' bí'ido'.
⁶ Ruzxöni ládxa'a Li' ga gudéla'të gulja',
 tu' guzóalen cazu' neda' cate' ni' buzóanu xiná'a neda'.
 ¡Cú'utica'sa' Li' yöl-la' ba!
⁷ Zián nupa tu'bani ca naca quia',
 tu' run chí'i cazu' Li' neda'.
⁸ ¡Rigú'utica'sa' Li' yöl-la' ba,
 en tu dza tu dza rulu'a lahui yöl-la' ba quiu'!
⁹ ¡Bití' usán no'o neda' na'a, ni naca' bönni' gula!
 ¡Bití' ucá'anu' neda' na'a cate' ni rudú ládxa'a!
¹⁰ Tuí'i didza' nupa bití' ta'lé'e neda' dxi'a ca gaca bi ilún quia',
 ate' tun tuz xtídza' gaca nupa té'ëni iluti neda'.
¹¹ Ta'nná: "¡Nusán në'ë Dios lë'!
 ¡Gulí'dá sönru'-në' tu' cuntú nu zoa gácalen lë'!"
¹² ¡Dios, bití' su' zi'tu' ga ni zoa!
 ¡Dios quia', gudáchi gácalenu' neda'!
¹³ Ben ga ulu'tuí'i, en ila'niti nupa té'ëni iluti neda'.
 Ben ga ulu'tuí'inë', en ila'bö'ë böniga bönni' té'ënë' ilu'ë dö' quia'.

14 ¡Neda' gúntica'sa' löza Li',
en cú'utica'sa' Li' yöl-la' ba!

15 Idú dza usiyönda' bönachi nacu' tsahui',
en rusöló' yúgu'të bönachi.
Biti' nözda' bal-laxi luzuí busöló' neda'.

16 ¡Gu'a didza' ca nácagaca le zxön benu' Li', Xana' Dios!
¡Usiyönda' bönachi tuzu' Li' nacu' tsahui'!

17 Dios, rusédinu' neda' ga gudéla'të ni' naca' bí'ido',
ate' ga ridxintë na'a dza ruá'a didza' ca nácagaca le zxön nunu'.

18 Na'a naca' bönni' gula, en chinagucha'.

¡Biti' usán no'o neda', Dios!

Benna neda' lataj usiyönda' yugu' xzí'ini xsoa' ca naca yöl-la' huáca quiu',
ate' quíxjöi'ida' nupa ilalaj ca naca yöl-la' nál-la quiu'.

19 ¡Le tsahui' nacu', Dios, ridxintë lúzxiba!

¡Nunu' Li' yugu' le zxóntërö!

¡Cúnturö nu zoa nu naca ca nacu' Li', Dios!

20 Gusöl-la' cazu' quia' yugu' le guca quia' le gulún neda' zi',
pero ruúnu' neda' tsutsu,
en le yúbölö uchisu' neda' para cabí gátia'.

21 Gunu' ga tsépisea',

en huë tsahú'u neda' le yúbölö.

22 ¡Le nácatë cu'a Li' yöl-la' ba, en gul-la' tu bihuël-la, Dios!

¡Gul-la' ca runu' ca rnno', en nacu' Nu naca lá'ayi lógaca bönachi Israel!

23 ¡Lu yöl-la' rudzeja quia' códxí'a cate' gul-la' quiu',
en idú ládxa'a gul-la' tu' busöló' neda'!

24 ¡Idú dza gu'a didza' ca nacu' tsahui'!

¡Tu'tuí'i, en ta'bó' baguí'i nupa gul'é'eni iluá' dö' quia'!

72

1 Dios, buzéajni'inë' bönni' rinná bē'ë

para gaca uchi'a usöróë' ca ruchi'a rusöróu' Li'.

Ben ga ilácagacabi' tsahui' xzí'inë' ca nacu' Li' tsahui'.

2 Bē'ë lataj uchi'a usöróë' quégaca bönachi quiu' ca naca le naca tsahui',
enca' quégaca bönachi quiu' ta'guí'i ta'zaca'.

3 Ben ga ila'cuá' dxi'a tsáhui'do' bönachi quiu' yugu' lu guí'a,
en ilácagaca tsahui' yugu' lu guí'ado'.

4 Bē'ë lataj ubéajë' tsahui' nupa ta'guí'i ta'zaca' ladaj bönachi quiu',
en usölé' yugu' xzí'inigaca nupa ta'yadzaj ta'yudxi,
en ucul-lé' nu ribía no léguequi.

5 Ben ga iladxi bönachi quiu' Li' tsanni ni' soa gubidza,
enca' tsanni ni' soa beo' ga idxintë dza udxí.

6 Ben ga gáquië' bönni' rinná bē'ë ca nisa guió'j ribixi lu guíxi'do',
en ca yugu' guió'j gúpa'do' tu'subisa luyú.

7 Ben ga gaca dxi'a quégaca nupa nácagaca dxi'a yugu' dza inná bē'ë lé',
en ila'cuá' dxi'a tsáhui'do' ga idxintë bíti'rö soa beo'.

8 Ben ga inná bē'ë idapa la'a yödzölió,

ga naguela' ra' yegu Eufrates ga idxintë idútë luyú.

⁹ Ben ga ulu' zechu zxíbigaca lahuë' lë' nupa nacua' luyú bidxi, en iladxi lë' nupa ta' dí-lalen lë'.

¹⁰ Ben ga ila'dxinë' lahuë' bönni' ta' nná bë'ë luyú Tarsis en yugu' lu yödzo, nuá' gaquië' yugu' le ulu'nödzjé' queë'.

Bönni' ta' nná bë'ë luyú Sabá, en luyú Seba ilá'dxinë' bi ulu'nödzjé' queë'.

¹¹ Ben ga ulu' zechu zxíbigaquië' lahuë' yúgu'të bönni' ta' nná bë'ë, en ilúngaca xichinë' bönachi yúgu'të yödzo.

¹² Usölé' nu riyadzaj riyudxi cate' ulidza lë', enca' nu riguí'i rizaca', en nu biti' zoa nu gácalen nu na'.

¹³ Huéchi' ládxe'ë nupa nácgaca yechi', en nupa ta'yadzaj ta'yudxi, en gun chi'ë yöl-la' na'bán quégaca nupa nácgaca yechi'.

¹⁴ Usölé' léguequi lu ná'agaca nupa tun léguequi zi', en lu ná'agaca nupa tuá' dö',

en güi' i ládxe'ë léguequi cate' nu gué'ëni guti léguequi.

¹⁵ Soë' ibanë', ate' iluá'gaca bönachi queë' oro que lu xiyúgaca bönachi Sabá. Ben ga ulu'lidza Dios bönachi, ila'nábitica'sö Li' gácalenu' lë'.

Ben ga ulu'lidza lë' dxi'a tsáhui'do' idú dza.

¹⁶ Ben ga unódzjada' xzoa' luyú queë', enca' yugu' lu guí'ado', le unödzej yödxi yana' xiyúé' ca run guí'a Líbano.

Ben ga ila'yán nupa nacua' ladzë' ca rö'ö guíxi'do' lu xiyúé'.

¹⁷ Ben ga tsöjnégaca le lë' ga idxintë dza udxi.

Ben ga gaca yöl-la' ba que lë' tsanni ni' soa gubidza.

Ben ga ila'nabi bönachi Li' yúgu'të yödzo

gunu' ga gaca dxi'a quéguequi ca benu' queë' lë'.

Ben ga ila'gú'u lë' yöl-la' ba bönachi yúgu'të yödzo.

¹⁸ ¡Yöl-la' ba Xanru' Dios, Dios quégaca bönachi Israel!

¡Tuzë' Lë' runë' le túngaca ga rubániru'!

¹⁹ ¡Yöl-la' ba Lë' le naca lachi ga idxintë dza udxi!

¡Rizé ládxi'ru' ilí idútë yödzölió le naca bení' queë'!

¡Ca' gaca! ¡Ön, ca' gaca!

²⁰ Chibudxi le rinábida'-në' Dios neda', David, zxf'inë' Isaí.

73

¹ Le nácatë runë' Dios ga raca dxi'a quégaca bönachi Israel, nupa na' naca dxi'a tsahui' ládxi'do'guequi.

² Ia'láti'sö guchixi guníguida'.

Ia'láti'sö tsöjdöda' tsölá'alö,

³ tu' buzxe'eda' nupa tun ba zxön cuínguequi, en tu' dëda' yöl-la' tsahui' quégaca nupa tuá' dö'.

⁴ Biti' ca' téquinë' zi' bönni' tu'ë dö' na'.

Nácagaquië' tsutsu, en nacu'ë dxi'a.

⁵ Biti' ta' guí'i ta'záquë'ë ca ta' guí'i ta'zaca' ia'zica'rö bönachi.

Biti' ca' raca quégaquië' ca raca quégaca bönachi yúbölö.

⁶ Naca yöl-la' run ba zxön cuini quégaquië'

ca tu le néquini oro dxía ícjagaquië'.

Yöl-la' rutsatsa quégaquië' naca ca zxágaquië' nácugaquië'.

⁷ Tu'zi'ë xibé le ta'dödi bë'ë të'aj tahuë',

en ta'zá ládxi'gaquië' quégaca le zían le ila'déli'në'.

⁸ Tu'titjē' ia'zica'rō bōnachi,
en tu'ē didza' lu yōl-la' run ba zxōn cuini quégaquiē'.

Tun ba zxōn cuíngaquiē',
en té'ēnē' ila'bía nahuē' ia'zica'rō bōnachi.

⁹ Ta'nné' queē' Dios zoē' yehua' yubá,
en tu'didza' yudxē' nupa nacua' yōdzōlió.

¹⁰ Que lē ni na' ta'dá' bōnachi queē' Dios légaquiē',
en ta'yéajlē' didza' tu'ē.

¹¹ Ta'nné': "Biti' ca' nōzinē' Dios,
en biti' ilé'e lē ni Nu na' zoa xitsá'aló."

¹² Caní nácagaca nupa tuá' dō'.
Dēda' yōl-la' tsahui' quéguequi, en ta'zítica'sō ia'lati'.

¹³ ¿Naru' nítisō ben chi'i cuina' para gaca' dxi'a
en para cabí ibága'a dul-la'?

¹⁴ Dios, benu' ga gudí'i guzxáca'a idú dza.
Yugu' zila benu' neda' zi'.

¹⁵ La'tu' bē'a didza' ca nácagaca lē ni
guzxí' yé'eda' bōnachi quiu'.

¹⁶ Que lē ni na' bē' ládxa'a tséajni'ida' lē ni,
sal-la' gúcada' bōniga

¹⁷ ga bidxintē dza guyu'a yudo' quiu'
en guyéajni'ida' ca gaca quégaca nupa tuá' dō'.

¹⁸ Le nácate nuzú' léguequi ga ta'chixi ta'nigui,
en runu' ga ila'niti tsaz.

¹⁹ La' ila'nítitē,
en ila'yaza ga udxi quéguequi.

²⁰ Nácagaca ca tu le rinetu' yēla le ridōdi que cate' ritó yu.
Cate' chasu', Xan, la' udóditeu' léguequi tsólá'aló.

²¹ Cate' yōjdín icja' le nácagaca ca tu le silá',
en guzá' ládxa'a yugu' le gúquida' zi',

²² guca' tu' canóz, en biti' bi guyéajni'ida'.
Guca' ca tuba' böa' guixi' lo' Li'.

²³ Zóatica'sa' lo' Li',
ate' rizón cazu' neda'.

²⁴ Rigú'u yól-lu'u neda' le rugú'u neda' nōza quiu',
en ga údxitē uzi'u neda', en gunu' neda' bal.

²⁵ ¿Núzxirō zoa yehua' yubá nu gácalen neda'?
¡Tuzu' Li'!

Tu' rácalenu' neda' cúnturō nu zoa yōdzōlió nu riquinda'.

²⁶ Ricuidi' le naca', en rudú ládxa'a.
Le ruzóa tsutsu ládxi'da'ahua',
en le ruzítica'sa' xibé naca cazu' Li', Xan.

²⁷ Le nácate ila'niti nupa tu'cá'ana Li'.
Usunítu' yúgu'tē nupa tu'zóa Li' tsólá'aló.

²⁸ Raca dxi'a quia' cate' ribiga' ga zu' Li', Dios.

¡Naca cazu' Li', Xana' Dios, Nu run chi'i neda'
para ulu'a lahui yúgu'tē le nun cazu'!

74

- ¹ Dios, ¿naru' tsaz nusán ládxi'u netu'?
¿Riléde'enu' netu', bö'cu' zxila' queë cazu'?
- ² Yöjné netu', bönachi tu'dubi quiu', nupa böá'u cazu' dza ni'te,
nupa böá'u cazu' para gácatu' bönachi queë cazu'.
Yöjné guí'a Sión, ga ni guzóa cazu' Li'.
- ³ Gudá tödu' ga ni naguinnajdërö yödzö lá'ayi quiu'.
Bulu'sunítidërö nupa gula'dá'baga' Li'
yúgu'të le gula'cuá' lataj lá'ayi quiu'.
- ⁴ Tu'tsatsa nupa na' gula'dá'baga' Li'
idú gásibi'ilö ga ni budúbitu' quiu'.
Nucua'gaquië' ni le naca bë'gaca
nuxícjagaquië' yödzö lá'ayi quiu'.
- ⁵ Nalá' lahui yödzö ni ca nalá' tu guí'a cate' nu gulú'u le bidín,
en nurixi nu na' yugu' yaga gula'cuá' lu guí'a na'.
- ⁶ Bulu'zxuzxjé' le nácgaca lachi lu yödzö ni
len yugu' guíë huága quegaquië', en yugu' yaga zidzaj.
- ⁷ Bulu'zégui'ë idútë lataj lá'ayi quiu'.
Nucá'anagaquië' cá'asö lataj ga benru' bal Lo'.
- ⁸ Lu icja ládxi'do'gaquië' gula'né': "Nuxícjadërötu' bönachi ni."
Idútë lu xiyutu' bulu'zégui'ë yúgu'të yu'u ga na' budúbitu' lo'.
- ⁹ Bítí'rö caz rilé'etu' yugu' le bulu'subán ládxi'tu' gulísatu' lu xiyutu'.
Bítí'rö zoa nu bönni' ru'ë didza' uláz quiu'.
Bítí'rö zóalen netu' nu bönni' nózinë' gáca'xte caz gaca caní queé'tu'.
- ¹⁰ Dios, ¿gáca'xte caz ulu'lidza ditaj netu' nupa ta'díl-lalen netu'?
¿Gáca'xte caz ulu'cá'ana ditaj Lo' nupa ta'dá'baga' Li'?
- ¹¹ ¿Naru' cabí gácalenu' netu'?
¿Bizx que nucáchu'u yöl-la' huáca zxön quiu'?
- ¹² Rinná be'e quézinu' netu' Li', Dios, dza ni'te quez,
en rusölá cazu' bönachi idútë yödzölió.
- ¹³ Len yöl-la' huáca zxön quiu' bubéaj cazu' choplö nísado'.
Gulá'a cazu' ícjagacaba' böa' zxön nacua'aba' nísado'.
- ¹⁴ Bzxuzxja cazu' ícjagacaba' böa' sínia' lëba' Leviatán.
Ben cazu' ga guláguba' yugu' böa' guixi' xipéla'ba' böa' sínia' na'.
- ¹⁵ Gusalaj cazu' yugu' beaj nisa, en gapa rálajda' nisa.
Busubidxi cazu' yugu' yegu nisa gula'yúdzutica'sö nisa.
- ¹⁶ Nequi queë cazu' lahui' dza, en nequi ca' quiu' chi'i dzó'ölö.
Ben cazu' Li' bení', enca' gubidza.
- ¹⁷ Naguixaj cazu' Li' yúgu'të buzá' nacua' yödzölió.
Nun cazu' Li' beo' la, en beo' ziaga.
- ¹⁸ Yöjné lë ni, Dios. Nupa ta'dá'baga' Li' nucá'anagaca ditaj Lo',
ate' nupa nácgaca canóz nucá'anagaca cá'asö Lo'.
- ¹⁹ Biti' usán no'o nupa nadxi'inu' lu ná'agaca nupa nácgaca ca yugu' böa' guixi' sínia'.
Biti' gal-la ládxi'u tsaz nupa néquiguequi quiu', en ta'guí'i ta'zaca'.
- ²⁰ Yöjné didza' dzaga na' núnlenu' netu',
tu' nacua' nupa tuti bönachi gapa naca chul-la lu xiyutu'.
- ²¹ Biti' gu'u lataj ulu'gá'ana cá'asö nupa nácgaca bayechi'.
Ben ga ila'gú'u Li' yöl-la' ba nupa ta'guí'i ta'zaca', en ta'yadzaj ta'yudxi.
- ²² ¿Guyasa, Dios, en ben ca rnna xtídzu'u!
¿Ruzé nagu' ca rulidza ditjé' Li' bönni' canóz idú dza!

²³ Biti' gal-la ládxa'u didza' zi' tu'í nupa ta'dá'baga' Li'.
Yöl-la' dzatsa tun nupa tu'cá'ana Li' cá'asö riyóntica'sö.

75

¹ ¡Rētu' Li': "Xclenu', Dios"!

¡Rētu' Li': "Xclenu",

tu' zóatica'su' gal-la' ga zóatu'!

¡Tu'í didza' bönachi ca nácagaca le zxön nunu'!

² Rnnë' Dios: "Nuzóa' dza cate' uchi'a usöróa' bönachi.

Uchi'a usöró caza' léguequi ca naca le nácate'.

³ Tu'suniti yödzölió, en nupa nacua' ni',

pero tsaz nuzóa caza' le."

⁴ Gudxa' nupa tun ba zxön cuínguequi, gunnía': "Biti' gun ba zxön cuinli'",

en gudxa' nupa tuá' dö': "Biti' huë tsahui' cuinli'.

⁵ Biti' huë tsahui' cuinli',

en bití' gü'íli' didza' lu yöl-la' run ba zxön cuinli'."

⁶ Calëga ga rilén gubidza, en calëga ga ribía gubidza,

en calëga la' guixi' ga dë lataj irúaj le huë tsahui' bönachi,

⁷ pero uchi'a usöró cazë' Dios bönachi.

Uzöjtjë' tuë' bönni', en uchisë' ia'tué'.

⁸ Nuá' cazë' Xanru' lu në'ë tu xziga' yudzu xisa le ribía lubá uva le ribixi rilëbi.

Chinugútsi'dërë' le, ate' rigü'ë le para ilë'aj le nupa tuá' dö' yödzölió ni,

ate' ilë'jadërö le silá' que.

⁹ Neda' usiyóntica'sa' bönachi lë ni,

en gul-la' yöl-la' ba queë' Dios queë' Jacob.

¹⁰ Ugúie' yöl-la' unná bë' quégaca nupa tuá' dö'.

Quíxjë' tsaz yöl-la' unná bë' quégaca nupa nácagaca tsahui'.

76

¹ Zxí'ini xi'sóë' Judá núnbë'gaquië' Dios.

Nayépisë le lë' ladaj bönachi Israel.

² Zoa caz lataj lá'ayi queë' lu yödzö Jerusalen,

ate' nazí' le Sión lataj ga na' zoa cazë'.

³ Ní' guditsjë' yugu' yaga lahui tuchi' zoa guí' láhuiguequi,

enca' yugu' guíë la, en yugu' le ta'díl-lalen bönachi lu gudil-la.

⁴ ¡Yöl-la' ba Li', Dios!

¡Nayépisëtëru' ca yugu' guí'a zxön!

⁵ Buxicju' bönni' nál-lagaquië'.

Gudödi yëla guió'j lógaquië' bönni' röjáquië' gudil-la,

en bití' guca ila'chisa ná'agaquië'.

⁶ Cate' Li', Dios queë' Jacob, gudíl-lalen cazu' légaquië'

gulátiba' böa', ate' gulati ca' nupa dxíagaca légacaba'.

⁷ Li' caz ral-la' gádxitu',

tu' cabí gaca nu soa lo' cate' ilenu'.

⁸ Ga zu' Li' yehua' yubá gunnó' uchi'a usöróu' bönachi.

Ní'irö guladxi nupa nacua' lu yu, en gula'cuá' dxisö,

⁹ cate' guzuínë' Dios para uchi'a usöróë' quégaca bönachi,

para usölé' nupa nácagaca nöxaj ladxi' yödzölió ni.

¹⁰ Sal-la' ta'léde'e bönachi, gaca yöl-la' ba queë' Lë'.

Uzi'ë xibégaca nupa ulu'gá'ana ladjaguequi.

¹¹ Guli'sí' lu ná'ali' bi gunli' lahuë' Xanru' Dios,

en guli'gún ca na' innali'.

Yúgu'të nupa nacua' ga na' zoë' ral-la' bi ulu'nödzaj queë',

tu' náquië' Nu ral-la' gádxiru'.

¹² Ubéaj cazë' bö' nácagaca caz nupa nadéli'gaca lataj lo.

Bönni' ta'nná bë'ë luyú ni tádxinë' Lë'.

77

¹ Rulidza'-në' Dios, en ruá'a zidzaj didza'.

Rulidza'-në' Dios, ate' riyönnë' chí'a.

² Cate' bi guca quia' bulidza'-në' Dios.

Chi'i dzó'ölö guchisa na'a lahuë', en bití' busana' rulidza'-në'.

Bití' guca nu huë tsahui' neda'.

³ Cate' röjneda'-në' Dios, rö'a böniga.

Cate' rinné ládxa'a, ní'irö rudú ládxa'a.

⁴ Bubéaj cazu' yëla guió'j lahua'.

Tu' ribö'a böniga bití' gaca gu'a didza'.

⁵ Chiguzá' ládxa'a ca guca dza ni'te,

ca guca yugu' iz chigula'dödi.

⁶ Tsöjneda' le bulá' chi'i dzó'ölö,

en tsöjsá' ládxa'a ca naca que, ate' rinábini cuina':

⁷ ¿Naru' tsaz nusán Xanru' neda'?

¿Naru' cabirö uzá' ládxe'ë quia'?

⁸ ¿Naru' cabirö gáquië' dxi'i ladxi'?

¿Naru' cabirö tsöjnenë' le guzxi' lu në'ë gunë'?

⁹ ¿Naru' nál-la ládxe'ë Dios tu' cabirö ruzá' ládxe'ë queëru'?

¿Naru' bíti'rö huéchi' ládxe'ë rë'u tu' rilenë'?

¹⁰ Ní'irö gudxi cuina': Raca caní quia' tu' risébida' ládxa'a,

en que lë ni na' réquida' nadzá' yöl-la' unná bë' queë' Dios nayépisë'.

¹¹ Tsöjneda' yugu' le nun cazu' Li', Xantu'.

Tsöjneda' yugu' yöl-la' huáca benu' dza ni'te.

¹² Sa' ládxa'a ca nácagaca le nunu',

en cuéqui icja' ca nácagaca le runu'.

¹³ Naca lá'ayi ca run cazu' Li', Dios.

Cúnturö nu zoa naca dios ca nacu' Li', Dios queé'tu'.

¹⁴ Naca cazu' Li' Dios, runu' yugu' yöl-la' huáca zxön.

Bulú'u lahui yöl-la' huáca quiu' lógaca bönachi yúgu'të yödzö.

¹⁵ Len yöl-la' huáca zxön quiu' busóló' bönachi quiu',

nupa nácagaca xí'ini xi'sóagaquië' Jacob, en José.

¹⁶ Bila'lé'e yugu' nísado' Li', Dios.

Bila'lé'e yugu' nísado' Li', en gula'bö' böniga.

Gula'zxízilë'e yugu' nísado'.

¹⁷ Bulu'lalaj böaj lúzxiba nisa.

Lúzxiba xitsá' gunnéda' guziú'.

Guyëpi yösa ca yugu' yaga lahui tuchi'.

¹⁸ Lu bö' budunu' biyón guziú' quiu' gunnëda'.
Yösa gula'yëpi bulu'zeni' luyú.

Gudódida' budó' xzu', en guzxizi luyú.

¹⁹ Bilá' lahui nöza quiu' gatsaj láhui'lö nísado',
ate' guzóa nöza ga gudödu' gatsaj láhui'lö nisa zila.
Biti' nalá' lahui na'a ga na' bulibu'.

²⁰ Guché'cazu' bönachi quiu' ca runë' bönni' riché'ë-ba' bö'cu' zxila' hué'ënido'.
Guché'u léguequi lu ná'agaquië' Moisés, en Aarón.

78

¹ Buli'zé nágali' le uzéajni'ida' libí'ili', bönachi quia'.

Buli'zé nágali' didza' gu'a.

² Usalja' ruá'a, en ucúdzu'a didza'.

Gu'a didza' tu le nagachi' dza ni'te quez,

³ tu didza' chibiyönru', en núnbë'ëru',

le gulé' xuz xtó'oru' rë'u.

⁴ Biti' ucáchi'ru' didza' na' lógacabi' xzí'iniru'.

Usiyönru' yugu' xzí'ini xi'sóaru' yöl-la' ba queë' Xanru',
ca naca yöl-la' huáca queë', en yugu' le zxön benë'.

⁵ Gudixjé' tu didza' naca bë' queë' Jacob,
en nuzóé' le rinná bë'ë quégaca bönachi Israel,
le gunná bé'enë' yugu' xuz xtó'oru'.

Ulu'zéajni'inë' xzí'inigaquië' ca naca,

⁶ para ilúnbë'gacabi' le, bi'i si' zá'gacabi', enca' bi'i si' iláljabi',
para ulu'lu'ibi' ca' xzí'inigacabi' ca naca lë na' gunná bë'ë Dios.

⁷ Ulu'zxöni ládxi'gacabi' Dios,

en biti' gal-la ládxi'gacabi' yugu' le nunë' Dios.

Ilunbi' ca nácagaca le gunná bë'ë,

⁸ en biti' ilácagacabi' ca guláquië' xuz xtó'ogacabi'.

Guláquië' zidzaj ladxí' tu' gula'dá'baguë'ë xtídzë'ë Dios,

en biti' guláquië' nōxaj ladxí',

ate' lu icja ládxi'do'gaquië' biti' gula'yéajlë'ë Dios.

⁹ Yugu' xzí'ini xi'sóé' Efraín guluá'gaquië' yaga uxiti',
pero bulu'zxúnnajë' lu gudil-la.

¹⁰ Biti' gula'dá'gaquië' didza' dzaga Dios bénlenë' légaquië',
en biti' gulunë' ca naca le gunná bé'enë' légaquië'.

¹¹ Gulal-la ládxi'gaquië' yugu' le benë' Dios,

en yugu' yöl-la' huáca zxön benë' lógaquië'.

¹² Benë' Dios le gulún ga bulu'báninë' xuz xtó'ogaquië'
luyú Egipto, en luyú Zoán.

¹³ Gusaljé' nísado', en benë' ga gula'dödë' gatsaj láhui'lö nísado' na'.
Benë' ga guca nísado' na' ca yugu' guí'ado' tsölá'a huéaj.

¹⁴ Bulu'inë' légaquië' nöza lahui' dza, bugunë' dxin tu böaj,
ate' chi'i dzó'ölö bugunë' dxin tu böaj ruzeni' ca guí'.

¹⁵ Bulé'ë tu guió'j ga naca la' guixi' ga dë lataj,
en bë'ë le gulé'ajë' le guca ca tu nísado'.

¹⁶ Gulé'ajë' nisa yegu le gulén lu guió'jto'o.

Benë' ga birúaj nisa ca tu yegu zxön lu guió'jto'o na'.

¹⁷ La' ní'sö gulunë' dul-la' lahuë' Lë',

en gula'dá'baguë'ë Dios nayépisëtëre' la' guixi' na'.

¹⁸ Lu icja ládxi'do'gaquië' gula'zí' bë'ë Dios quégacabië',

cate' gula'nábinë' Lë' ugahuë' légaquië' ca gula'zësö ládxi'gaquië'.

¹⁹ Ní'irö gula'nné' queë' Dios, gula'nné':

“¿Naru' huáca cu'ë Dios le gáguru' la' guixi' ni ga dë lataj?

²⁰ Buli'yútsöca', bë'ë guiójtó'o, ate' birúajda' nisa,
le guca ca nisa yegu gubó'o zxön.

¿Naru' huáca gunné' ca' queéru' yöta gáguru'?

¿Naru' gaca ugahuë' bönachi queë' le naca bëla'?”

²¹ Biyönnë' Xanru' Dios didza' ni, en guléde'enë',
ate' gulén tu guí' le buzegui zían zxí'ini xi'sóë' Jacob,
tu' guléde'enë' bönachi Israel,

²² tu' cabí gula'yéajlë'ë Dios,

en bití' bulu'zxöni ládxi'gaquië' Lë' usölé' légaquië'.

²³ Gunná bé'enë' Lë' yugu' böaj lúzxiba,
en gusaljë' yehua' yubá.

²⁴ Gusól-lë'ë yöta maná le ilahuë',
en bugahuë' légaquië' la' huagu que yehua' yubá.

²⁵ Gulahuë' bönni' ni' yöta tahuë' gubáz que yehua' yubá.

Gusól-lë'ë guizxi yu le ilahuë'.

²⁶ Benë' ga guyecja bö' birúaj ga rilén gubidza,
ate' len yöl-la' huáca queë' gunná bé'enë' bö' recja
le birúaj tsóla'alö ga ridödi gubidza beo' ziaga.

²⁷ Benë' ga böxaj bëla' ca bëchtö yu ládjalö ga na' nacu'ë,
le naca böa' zoa xíligacaba' guró'öba' ca yuzxi dë tu ra' yegu zxön.

²⁸ Benë' ga böxjagacaba' gatsaj lámui'lö ga na' nacu'ë,
en ládjagaca yugu' yu'u guídido' quégaquië'.

²⁹ Ca' guca, gulahuë', en bulu'huólaj gula'dzé'enë',
tu' bë'ë quégaquië' le gula'zësö ládxi'gaquië'.

³⁰ Zí'alö ca budxi bulu'huólaj gula'dzé'enë',
tsanni ni' yu'u ruá'agaquië' le tahuë',

³¹ gulénë' Dios légaquië',

en bëtië' bál-lagaquië', bönni' nál-latërogaquië' ládjagaquië',
en bucul-lë' bönni' Israel nayépisëtërogaquië'.

³² Sal-la' guca caní, gulunrë' dul-la',
en bití' gula'yéajlë'ë Lë' ni'a quégaca le zxön benë'.

³³ Que lë ni na' benë' ga böáca nítisö dxin gulunë',
ate' lu yöl-la' radxi gula'zöë' yugu' lu iz quégaquië'.

³⁴ Cate' bëtië' zióngaquië', ní'irö bulu'lidzë' Lë'.

Bulu'bí'i ládxi'gaquië', en yöjtá'gaquië' Dios.

³⁵ Ní'irö yöjnéguequinë' náquië' Dios Nu run chi'i légaquië',
en náquië' Dios nayépisëtëre' Nu böá'uö légaquië'.

³⁶ Gula'zí' yé'enë' Lë' len didza' gulu'ë,
tu' gulu'ë diza' bití' nácatë lahuë' Lë' len ruá'agaquië'.

³⁷ Bití' gudá'gaquië' Lë' idú ládxi'gaquië',
en bití' gulunë' ca rnna didza' dzaga na' bénlenë' légaquië'.

³⁸ Tu' buéchi' ládxe'ë Dios légaquië',
buniti lahuë' ca naca xiguia' gulunë', en bití' busunítië' légaquië'.
Bubequi lahuë' quégaquië', en bíti'rö gulénë' légaquië',
en bití' benë' ca sa'yéaj yöl-la' ridzá'a queë'.

³⁹ Ca' guca, yöjnenë' nácagaquië' bönáchisö.

Nácagaquië' ca tu bö' recja le ridódisö, en bití' rudxín.

- 40 Zián luzuí gula'dá'baguë'ë Lë' ga na' naca la' guixi',
en bulu'suhuí'inë' Lë' lu yu bidxi na'.
- 41 Zián luzuí gula'z' bë'ë Dios,
en gulunë' zi' Dios Lá'ayi quégaca bönachi Israel.
- 42 Biti' yöjnéguequinë' yöl-la' huáca zxön queë',
le bulu'e lahui dza ni' böá'uë' légaquië'
lu ná'agaca nupa bití' bila'lé'e légaquië' dxi'a,
- 43 cate' ni' benë' le gulaca bë' luyú Egipto,
en benë' yugu' yöl-la' huáca queë' luyú Zoán,
- 44 cate' benë' ga böáca nisa rön yugu' lu yegu luyú Egipto,
enca' nisa yugu' lu beaj quégaquië' para cabí guca ilé'ajë' le.
- 45 Gusól-lë'ë ladjagaquië' bótsugayu guizxi yu,
böa' gula'guídxiba' légaquië'.
Gusól-lë'ë ca' riu bulu'sunítiba' le nequi quégaquië'.
- 46 Budödë' le naz nuzóagaquië' lu ruá'agacaba' böchi' zu,
ate' guláguba' böchi' zu na' le rö'ö yugu' la' yëla quégaquië'.
- 47 Busunítië' yugu' lubá uva quégaquië' len nisa guió'j yöla sunna na',
en busunítië' yugu' yaga higo quégaquië' len bögui'.
- 48 Bëtië'-ba' böa'-bëdxi quégaquië' len nisa guió'j yöla sunna na',
en lu yösa gula'yëpi.
- 49 Lu yöl-la' rilé queë' gusól-lë'ë quégaquië' yugu' lë ni,
en lu yöl-la' ridzá'a queë' busaca' zi'ë légaquië',
en gusól-lë'ë quégaquië' gubáz que yehua' yubá para bulu'sunítië' légaquië'.
- 50 Biti' bubequi lahuë' quégaquië' para cabirö lenë' légaquië',
en bití' buniti lahuë' légaquië' para cabí ilátië'.
Budödë' légaquië' lu yöl-la' guti,
- 51 en bëtië' yúgu'tëbi' bi'i bönni' lo quégaquië' bönni' Egipto,
yugu' bi'i bönni' lo quégaquië' xzí'ini xi'sóë' Ham.
- 52 Guchë'ë bönachi queë' ca yugu' bö'cu' zxíla'do',
en buluí'inë' légaquië' nöza la' guixi' ga dë lataj.
- 53 Guchë'ë légaquië' lu në'ë para cabí bi iládxinë',
pero gubaga' nísado' nupa bití' bila'lé'e légaquië' dxi'a.
- 54 Ca' guca, guchë'ë légaquië' ga zoa luyú lá'ayi queë',
luyú ni bidéli'në' uláz quégaquië' len yöl-la' huáca queë'.
- 55 Bulágui'ë bönachi izá'a luyú ni lógaca bönachi queë',
en burixë' que queégaquië' xiyúgaquië' ga ila'cu'ë,
en benë' ga gula'cu'ë bönachi Israel yugu' lu yu'u guídido'.
- 56 Le yúbölö gula'z' bë'ë Lë', en gula'dá'baguë'ë Dios nayépisëtëre',
en bití' gulunë' yugu' le gunná bé'enë' légaquië'.
- 57 Bulu'huóá ládxi'gaquië', en bulu'cá'anë' Lë' ca gulunë' xuz xtó'gaquië'.
Gula'dödë' tsölá'alö ca run tu yaga lahui tuchi' bití' nácatë li.
- 58 Gulún lenë' Lë' tu' gulunë' xilátjagaca budó' guió'j budó' yaga yugu' lu guí'a,
en gulunë' ga budúli'në' légaquië' ni'a quégaca budó' na'.
- 59 Cate' bilé'enë' lë ni Dios, guléde'enë',
en budí'inë' bönachi Israel.
- 60 Ní'irö bucá'anë' xilatjë' lu yödzö Siló,
ga na' guzóa yu'u lá'ayi queë' ladjagaquië' bönni' ni'.
- 61 Bë'ë lataj gula'ché'ë bönni' zi'tu' guí'ina lá'ayi queë',
guí'ina na' buluí'i lahui yöl-la' zxön queë'.
- 62 Budödë' bönachi queë' lu ná'agaca nupa bëtigaca léguequi,

⁶³ en gúquinë' zi' nupa nácagaca quez queë'.
 Buzegui tu guí' zxön yugu' bi'i bönni' quégaquië',
 ate' cuntu nu bugá'ana nu ulu'tsaga na'lenbi' yugu' bi'i nigula ra'bando'.
⁶⁴ Yugu' bixúz quégaquië' gulátië' lu guié' tuchi',
 ate' biti' guca ila'bódxinu nigula uzëbi quégaquië'.
⁶⁵ Ní'irö gúquië' Xanru' ca tu bönni' rubanë' lu yöl-la' rasi.
 Gúquië' ca bönni' rejë' gudil-la gudödi bë'ë gu'ë xisi lubá uva nál-la.
⁶⁶ Bulágui'ë yugu' bönni' gula'díl-lalenë' bönachi queë',
 en tsálido'os burixë' légaquië'.
⁶⁷ Lësca' budödë' tsölá'alö yugu' xzí'ini xi'sóë' José,
 en biti' guróë' yugu' xzí'ini xi'sóë' Efraín.
⁶⁸ Guróë' yugu' xzí'ini xi'sóë' Judá,
 en yödzö Sión le nadxí'i quézinë' Lë'.
⁶⁹ Ni' benë' tu lataj lá'ayi queë' le naca ca tu guí'a zxön,
 le zoa tsutsu ca yödzölió ni nuzóë' tsaz.
⁷⁰ Guróë' ca' David, huen dxin queë',
 en bubéajë' lë' ga na' zoë' ruyúë'-ba' yugu' bö'cu' xzí'ila'do'.
⁷¹ Bubéajë' lë' ga na' rapa chi'ë-ba' yugu' bö'cu' xzí'ila' guná',
 nacuá'aba' böa' hué'ënido' quégacaba',
 para gáquië' nu uyú bönachi queë', yugu' xzí'ini xi'sóë' Jacob,
 en bönachi Israel, nupa na' nácagaca quez queë'.
⁷² Ca' guca, idú ládxë'ë buyúë' David bönachi na',
 en lu yöl-la' rácada' queë' guchë'ë légaquië' lu në'ë.

79

¹ Dios, nacuá' bönachi izá'a lu xiyúgaca bönachi quiu'.
 Nucá'anagaca cá'asö yudo' lá'ayi quiu',
 en nusunítigaca yödzö Jerusalén.
² Bulu'cá'anë' bönachi quiu' nátigaca luyú para iláguba' bíchulab léguequi,
 en bëla' rön quégaca huen xichinu' ga iláguba' böa' guixi' le.
³ Bulu'laljë' xichóngaca bönachi quiu' ca nisa idútë lu yödzö Jerusalén,
 ate' cuntu nu bugá'ana nu ucachë' léguequi.
⁴ Bönachi yugu' dzaga luyú queétu' tu'titaj netu'.
 Tu'zidxë', en tu'didza' yudxi netu'.
⁵ ¿Naru' tsaz ilenu' netu', Xan?
 ¿Naru' sóatica'sö yöl-la' rilé quiu' ca tu guí' ruzegui netu'?
⁶ Gulégaca bönachi yugu' yödzö zi'tu' biti' tun Li' bal,
 enca' bönachi biti' tu'lidza Li'.
⁷ Bétigaca bönachi quiu' nácagaca xzí'ini xi'sóë' Jacob,
 en nusunítigaca xiyutu' ga zoa cazu' Li'.
⁸ Biti' gunu' netu' xiguaia' tu' nözi dul-la' gulunë' xuz xtó'otu'.
 Buéchi' ladxi' netu' na'a, tu' rudú ládxí'tu'.
⁹ Gúcalen netu', Dios, Nu rusólá netu', para guntu' bal Lo'.
 Busólá netu', en buniti lo netu' ca naca dul-la' nabága'tu' para idxí'itu' Lo'.
¹⁰ ¿Bizx que ta'nabi bönachi yugu' yödzö izá'a netu',
 ta'nná: "Gáxité zoa Dios queéli'?"
 Bë' lataj ilé'etu', en ben ga gaca bë' lógaca yúgu'të bönachi
 rizí' lo' nupa tu'lalaj xichóngaca huen xichinu'.
¹¹ Buzé nagu' ca ta'nné ládxí'gaca nupa nadzúngaca.

Len yöl-la' huáca zxön quiu' busölä nupa na' narugu quéguequi ilátigaca,

¹² en bubí'i quégaca bönachi yugu' dzaga yödzo queétu'
ia'gadxi cö'lö ca' tsca naca didza' zi' gula'nné quiu' Li', Xan.

¹³ Netu', bönachi quiu', enca' bö'cu' zxila' ruyú cazu' Li',
guíética'stu' Li': "Xclenu",
en cú'utica'stu' Li' yöl-la' ba na'a dza, en dza si' zaca.

80

¹ Ruzé nagu' netu', Dios, Nu rapa chi'i bönachi Israel.

Nacu' Nu ruyú yugu' xzí'ini xi'sóé' José ca nu ruyú yugu' bö'cu' zxila'.

Buzení' queétu', Li' na' rö'u rinná bë'u ga nacua'
nupa nál-lágacatëro quiu' légaca querubín.

² Buluí'i yöl-la' huáca quiu' lógaca xzí'ini xi'sóagaquié' Efraín, en Benjamín, en Manasés.
Gudá queétu', en busölä netu'.

³ Ben ga huécjatu' quiu' Li', Dios.

Buluí'i netu' nadxí'inu' netu', ate' ulatu'.

⁴ Xantu' Dios quéguequi ni'a no'o guizxi yu,
¿gáca'xte caz ilenu' netu', en bití' yönnu' le rulidztu' Li'?

⁵ Rugagu' netu' nisa ribödxí queétu',
en ruguí'ju' netu' sizxöni nisa ribödxí.

⁶ Nunu' ga bönachi dzaga yödzo queétu' tu'zxidxi queétu',
ate' nupa bití' ta'lé'e netu' dxi'a tu'titaj netu'.

⁷ Ben ga huécjatu' quiu' Li', Dios quégaca ni'a no'o guizxi yu.

Buluí'i netu' nadxí'inu' netu', ate' ulatu'.

⁸ Guléaju' tu lubá uva le nácatu' netu' luyú Egipto.

Bulagu' bönachi izá'a yugu' lu yödzo luyú ni, en budó'o lubá na' ni.

⁹ Buchi'u lataj ga guzxón lubá na'.

Benu' ga ben luí ga rë', ate' bulí idútë luyú ni.

¹⁰ Gulú'u zxul-la lubá na' yúgu'të lu guí'ado',
ate' ni'a në'e gula'baga' yugu' guí'a zxön.

¹¹ Gula'tunna ni'a në'e ga bidxintë ra' nísado',
enca' ga bidxintë ra' yegu Eufrates.

¹² ¿Bizx que buquínnaju' yugu' lë'aj gulún chi'i lubá na',
en ru'u lataj nupa ta'dódisö ta'bán le ribía lubá uva na'?

¹³ Tu'líbigacaba' cuchi guixi' le,
ate' táguba' böa' guixi' le.

¹⁴ Buécja queétu', Dios quégaca ni'a no'o guizxi yu.

Ga ni' zu' yehua' yubá buyú ca raca que lubá quiu', en busölä netu'.

¹⁵ Gudá dusöló' lubá ni budá' cazu',
le naca ca tu lubá hué'ëni buxón cazu' Li'.

¹⁶ Nupa bití' ta'lé'e netu' dxi'a gula'chugu ni'a në'e lubá na', en bulu'quela' le guí'.

Buyú ca tun, en lu yöl-la' rilé quiu' busuniti léguequi.

¹⁷ Gúcalen bönni' na' guró'cazu' quiu',
netu', bönachi na' nuzóa cazu' tsaz quiu'.

¹⁸ Caní gaca, bití'rö ucá'anatu' Li'.

Bunna queétu' yöl-la' na'bán, ate' uzxöni ládxi'tu' Lo'.

¹⁹ Ben ga huécjatu' quiu' Li', Dios quégaca ni'a no'o guizxi yu.
Bulu'i netu' nadxi'inu' netu', ate' ulatu'.

81

¹ Lu yöl-la' rudzeja queéli' guli'gul-la queë' Dios.

Lë' náquië' yöl-la' nál-la queéli'.

Lu yöl-la' rudzeja queéli' guli'códxi'a lahuë' Dios queë' Jacob.

² Guli'gul-la tu le gúl-lali', cápa'li' lë'e guídido'.

Guli'quinnaj lé'egaca bihuël-la.

³ Guli'códxi luzu chivo cate' zoa beo' hué'ëni,
en cate' zoa beo' nál-la, en cate' raca laní.

⁴ Lë ni naca tu xibá quégaca bönachi Israel,

le naca tu le gunná bé'enë' Xanru' Dios xí'ini xi'sóë' Jacob.

⁵ Gudixjë' le para gaca tu le gun ba nalí queë' lógaca xí'ini xi'sóë' José,
le gudixjë' cate' gudödë' luyú Egipto,

ga ni' biyönda' didza' izá'a biti' guyéajni'ida'.

⁶ Rnnë' Dios: "Gudúa' yua' xzoa ya' zxicjagaquië',
en bucuíta' le nuá'gaquië' le bulu'subaga' légaquië'
nupa biti' bila'lë'e légaquië' dxi'a.

⁷ Bulídzali' neda' cate' bi guca queéli', ate' busölä' libí'ili'.

Bubi'a didza' cate' bi gunábili' neda', ni' nucachi' cuina' tu lu böaj gasaj.

Guzxí' bë'a libí'ili' ga zoa nisa na' lë Meriba.

⁸ Buli'zé nágali', libí'ili', bönachi quia', ate' uxösa' libí'ili'.

Raca ládxa'a uzé nágali' neda', bönachi Israel.

⁹ Biti' ral-la' soa tu dios izá'a ga na' zóali',

en biti' gunli' zxön tu dios quégaca bönachi zi'tu'.

¹⁰ Neda', Xanli', naca' Dios queéli'.

Guléaja' libí'ili' luyú Egipto.

Guli'salaj ruá'ali', ate' cu'a ruá'ali' le gáguli'.

¹¹ Biti' bulu'zé nágagaca bönachi quia' chi'a.

Biti' gulún bönachi Israel ca rnna xtídza'a.

¹² Que lë ni na' busán ládxa'a léguequi
para gulún ca sa'yéaj yöl-la' ridá'baga' quéguequi,
en para gulún ca gula'za'sö ládxi'gaca.

¹³ Guzá' ládxa'a ulu'zé nágagaca bönachi quia' xtídza'a,
para ilún bönachi Israel ca ré'ënda' neda'.

¹⁴ La'tu' ilún caní, uxicja caza' nupa biti' ta'lë'e léguequi dxi'a,
en tíl-lalena' nupa ta'díl-lalen léguequi.

¹⁵ Ulu'lu'i cúinguequi nupa biti' ta'lë'e neda' dxi'a,
ca nupa tun ca rnna xtídza'a,
pero tsaz guna' léguequi xigua'.

¹⁶ Lë'sca' ugahua' libí'ili', bönachi quia', xzoa' xtila dxi'ado',
en guna' ga huölaj idzé'eli' le zxixi que buz, le irúaj lë'e guiój."

82

¹ Zuínë' Dios ladaj nupa tu'dubi queë' ni' yehua' yubá.

Ruchi'a rusöröë' nupa ta'nná bë'.

² Rnnë': "¿Gáca'xte caz uchi'a usöróli' quégaca bönachi
lu yöl-la' biti' naca tsahui' queéli'?"

Caní naca tu' rubéajli' tsahui' nupa tuá' dö'.

³ Buli'béaj tsahui' nupa ta'cuidi', en yugu' bi'i uzëbi.

Guli'gún le naca tsahui' quégaca nupa ta'gu'í ta'zaca',
en quégaca nupa ta'yadzaj ta'yudxi.

⁴ Buli'sólá nupa ta'cuidi', en nupa nátagaca yechi'.
Buli'sólá léguequi lu ná'agaca nupa tuá' dö'.

⁵ Biti' nóziguequi, en bití' ta'yéajni'i.
Ta'dá ga chul-la.

Rixizi xilibi yödzölió."

⁶ Rnna caza' neda': "Nácali' ca yugu' dios.

Nácali' yúgu'téli' xí'iné' Dios nayépisëtère',

⁷ pero gátíli' ca tati bönachi,
en ibíxili' lu gudil-la ca ta'bixi xí'iné' bönni' lo."

⁸ Guyasa, Dios, en buchi'a busöró quégaca bönachi yödzölió ni,
tu' nátagaca queë cazu' yúgu'té yödzö bönachi.

83

¹ Biti' ugá'anú' dxisö, Dios.

Biti' su' dxisö, Dios, en bití' usayaj ru'u,

² tu' tu'tsatsa nupa ta'dá'baga' Li',
ate' nupa bití' ta'lé'e Li' dxi'a tun ba zxön cuínguequi.

³ Tun tuz xtídza'guequi bi ilún quégaca bönachi queë cazu',
en tu'pá yugu' le ilún quégaca nupa nadxí'i quézinu', ta'nná:

⁴ "Guli'dá, usunítiru' léguequi para cabirö ilaca tu yödzö bönachi,
en para cúnturö nu tsöjné bönachi Israel."

⁵ Núngaca tuz xtídza'guequi.

Nuzóagaca tsutsu xtídza'guequi ta'dá'baga' Li'.

⁶ Yugu' bönni' Edom, en yugu' bönni' Ismael,

en yugu' bönni' Moab, en yugu' bönni' Agar,

⁷ en yugu' bönni' Gebal, en yugu' bönni' Amón, en yugu' bönni' Amalec,

en yugu' bönni' Filisteo, en yugu' bönni' Tiro,

⁸ enca' yugu' bönni' Asiria núngaquié' légaquié' tsözxön.

Rácalengaquié' yugu' bönni' xí'ini xi'sóé' Lot.

⁹ Ben quégaquié' ca benu' quégaca bönachi Madián, nupa na' busunítu' dërö,
en ca na' benu' queë Sísara, en ca na' benu' queë Jabín ra' yegu Cisón,

¹⁰ nupa na' busunítu' lu yödzö Endor,
ate' gulaca ca xiqué'ëba' bédxi luyú ni'.

¹¹ Ben quégaquié' bönni' lo quéguequi
ca benu' quégaquié' Oreb, en Zeb,
en ben quégaquié' bönni' ta'nná bé'ené' léguequi
ca benu' quégaquié' Zeba, en Zalmuna,

¹² nupa na' gula'nná: "Ilequi queéru'
yugu' lataj gapa na' gulequi queë Dios."

¹³ Dios quia', ben ga ilácagaquié' ca bëchtö yu le riché' bö',
en ca bëbu xze café le ruá' bö' budunu'.

¹⁴ Ca run tu guí' zxön, ruzeguí' yugu' yaga zxön,
o ca run tu guí', ruzeguí' tu guí'a zxön,

¹⁵ gusí regu' léguequi tu lu bö' budunu',
en ben gadxi léguequi tu lu nisa guiójsiu' zili.

¹⁶ Ben ga ulu'tuí'
para ulu'guilaj Li', Xan.

¹⁷ Ben ga ulu'tuí', en ila'bó' tsaz böniga.

Ben ga ulu'gá'ana cá'asö, en tsaz ila'niti,
¹⁸ para iléquiube'e nayépisëtëru' tuzu' Li' idútë yödzölió
 en ulu'zóa zxíbiguequi lo', Xantu' Dios.

84

¹ ¡Bica' lachi gapa zoa cazu' Li', Dios!
 ¡Nacu' Xángaca ni'a no'o guizxi yu!

² Rizé ládxa'a soa' lu yu'u lidxu', Xana' Dios.
 Lu yöl-la' rudzeja quia' idú ládxa'a rul-la' quiu' Li', Dios ban.

³ Bidzóliba' biguínni chul' lataj ga nuzóaba' lídxiba',
 en bidzóliba' xiguichi guziú' ga budxíaba' xicá'aba',
 ga na' rigú'uba' biguínido' queéba',
 gala' ga dë lu bucugu quiu' Li', Xángaca ni'a no'o guizxi yu.
 Nacu' Nu rinná be'e neda', en nacu' ca' Dios quia'.

⁴ ¡Bica' ba nupa ta'yaza lu yu'u lidxu'!
 ¡Ta'gú'utica'sö Li' yöl-la' ba!
⁵ ¡Bica' ba bönni' nápagaquië' yöl-la' nál-la le nequi queë cazu',
 en ta'zé ládxi'gaquië' ila'yu'ë nöza le ridxín yödzö Sión!

⁶ Cate' ta'dödë' lu yu bidxi tunë' ga ruhuöáca gapa ralaj nisa beaj.
 Tun ga rizi' xibé yu bidxi na' yugu' nisa guió'j ta'dxin bayón.
⁷ Lu yöl-la' huáca queégaquië' röjáquië', en tu'z'ronë' yöl-la' huáca.
 Ta'dxinë' yúgu'tëgaquië' lo' Li', Dios, lu yödzö Sión.

⁸ Ruzé nagu' le rulidza' Li', Dios, Xángaca ni'a no'o guizxi yu.
 Ruzé nagu' neda', Dios queë' Jacob.

⁹ Buyúë' bönni' rinná bé'enë' netu', Dios.

Buyúë' bönni' na' nabó cazu'.

¹⁰ Nácarö dxi'a soa' tu dza lu yu'u lidxu' ca le soa' idú chi gayuá' dza ga yúbölö.
 Cóa' zí'alö gaca' huen dxin ga nu riyaza yu'u lidxë' Dios
 ca le soa caza' tu yu'u zxön ga biti' zoa Dios.

¹¹ Náquië' Xanru' Dios ca gubidza, en le rusubín rë'u.
 Xanru' caz runnë' queëru' yöl-la' ruzá' ladxi' queë', en yöl-la' zxön queë'.
 Biti' ugúë' nitú le naca dxi'a gapa nacua' nupa tun le naca tsahui'.

¹² ¡Li', Xángaca ni'a no'o guizxi yu,
 bica' ba bönni' ruzxöni ládxe'ë Li'!

85

¹ Buzá' ládxi'u quégaca bönachi quiu', Xantu' Dios.
 Buchë'u Li' xzí'ini xi'sóë' Jacob gula'dzunë'.

² Buniti lo' bönachi quiu' ca naca xiguia' gula'baga'.
 Bucáchu'u yugu' dul-la' gulúngaca.

³ Buzóa dxíu' yöl-la' rilé quiu'.

Bugú' yöl-la' ridzá'a quiu'.

⁴ Buzóa netu' xilátjatu' le yúbölö, Dios, Nu rusölá netu',
 en bitirö lenu' netu'.

⁵ ¡Naru' tsaz ilenu' netu'?

¿Naru' tsaz ilenu' yugu' xxi'ini xsoatu'?

⁶ ¿Naru' cabí usubanu' ladxí'tu' le yúbölö,
para udzeja ladxí'lentu' Li' netu', bönachi quiu'?

⁷ Lu yöl-la' dxi'i ladxí' quiu' gúcalen netu',
en busölá netu', Xan.

⁸ Uzé naga' didza' gu'ë Xanru' Dios.

Le guíë' bönachi queë' gun ga gaca dxi'a quéguequi,
nupa na' nácagaca quez queë',

pero run bayúdx bití' ulu'huóá ladxí'gaca.

⁹ Le nácate chizóë' usólé' nupa tun Lë' bal,

para soa yöl-la' ba queë' luyú queé'tu'.

¹⁰ Dzágagaca yöl-la' dxi'i ladxí', en le naca idútë li.

Tagu zxixi luzé' eguequi nu naca tsahui', en nu riböza dxi'a tsáhui'do'.

¹¹ Luyú caz rilén le naca idútë li,

ate' yehua' yubá rirúaj le naca tsahui'.

¹² Le nácate Xanru' unödzejë' queéru' le naca dxi'a,

ate' xiyuru' unödzej le uláparu'.

¹³ Le naca tsahui' röjnöru lahuë' Xanru',

en gun ga soa nöza gátitës ga ulibë'.

86

¹ Ruzé nagu', Xana' Dios, en rubí'u didza',
tu' zoa nu rusaca' zí' neda', ate' riyadzaj riyúdxida'.

² Ben chí'i bö' naca caza', Dios, tu' naca' quiu' Li'.
Busölá neda', huen dxin quiu', Dios quia', tu' ruzxöni ládxa'a Li'.

³ Buzá' ladxí' quia', Xan,

tu' rulidza' Li' idú dza.

⁴ Ben ga udzeja ládxa'a neda', huen dxin quiu',

tu' rigú'a lu no'o bö' naca caza', Xan.

⁵ Nacu' dxi'a, Xan, en chizú' uniti lo' bönachi quiu'.

Nadxí'itica'su' yúgu'të nupa tu'lidza Li'.

⁶ Ruzé nagu' le rulidza' Li', Xan,

en ru'í ládxi'u' gunu' yugu' le inábida' lo'.

⁷ Cate' bi gaca quia' ulidza' Li',

tu' ubí'i casu' didza' bi gunu' quia'.

⁸ Cúnturö nu zoa ládjagaca dios nu naca ca nacu' Li', Xan,

en bití' zoa ia'tú nu run ca nácagaca le runu' Li'.

⁹ Ila'dxín bönachi yúgu'të yödzö naguixju' Li', Xana' Dios,

en ila'yéaj ládxi'gaca Li', en ilún zxön Lo'.

¹⁰ Nayépisëtërosu' Li', en tuzu' Li' runu' yugu' yöl-la' huáca zxön.

Tuzu' Li' nacu' Dios.

¹¹ Busëdi neda' ca naca le ré'ënu' guna', Xan.

Guna' ca naca le naca idútë li naguixju' Li'.

Ben ga gádxida' Lo' idú ládxa'a.

¹² Idú ládxa'a guí'a Li': "Xclenu'", Xana' Dios,

en guna' zxön Lo' yugu' iz sí' zaca.

¹³ Nadxí'ide'enu' neda',

en chibusöló' bö' naca caza' lu lataj chul-la ga nacuá' nupa chinátigaca.

¹⁴ Dios quia', nupa ta'dá'baga' neda' ta'díl-lalen neda',

ate' yugu' bönni' zidzaj ladxí' té'ënë' ilútië' neda',

yugu' bönni' na' bití' tunë' Li' bal.

¹⁵ Nacu' Dios ruhuéchi' ládXu'u netu', Xan, en ruzá' ládXu'u queétu'.
Ridzenu' para ilenu' netu', en nadxí'ide'enu' netu', en runu' ca rna xtídzu'u.

¹⁶ Buyú neda', en buzá' ladxi' quia'.
Butipa ládxa'a neda', huen dxin quiu',
en busólá neda', zxi'ininu nigula huen dxin quiu'.

¹⁷ Buluí'i neda' tu le gaca bë' gaca dxi'a quia',
para ila'lé'e le nupa biti' ta'lé'e neda' dxi'a.
Ulu'tuí'i, tu' gúcalenu' neda',
en buë tsahú'u neda', Xan.

87

¹ Nuzóë' Dios xilibi zö'ö que yödzo queë' lu guí'a lá'ayi.

² Nadxí'irönë' Xanru' lataj ga na' tu'chi'a tu'söró bönachi Sión
ca nadxí'inë' ia'zica'rö lataj gapa nacuá' bönachi Israel.

³ Zían le lachi ta'nná bönachi ca naca
yödz na' nequi queë' Dios.

⁴ Cate' ulidza' bönachi núnbë'gaca neda', Dios,
ulidza' bönachi nníta'gaca Egipto, en Babilonia.
Ca naca quégaca bönachi Filistea, en Tiro, en Etiopía
innía' nabábagaca yödzo lá'ayi na'.

⁵ Cate' gu'a didza' que yödzo Sión innía':
Bönachi ni, en bönachi izá'a ni nabábagaca le,
ate' neda', Dios nayépisëtërë', uzóa' tsutsu yödzo na'.

⁶ Cate' ulabë' Xanru' nupa nácgaca queë' inné':
"Bönni' ni nababë' yödzo quia'."

⁷ Ní'irö ilufi' didza' nupa tul-la, en nupa tu'cödxí gui, ila'ná:
"Ruzí'itu' xibé tuzi yödzo ni."

88

¹ Xana' Dios, Nu rusólá neda',
rulidza' Li' réla, en te dza.

² Bë' lataj idxín lo' le rulidza' Li'.
Ruzé' nagu' le rinaba yúdxida' Li'.

³ Ruúbi ruguí'i ládxi'da'ahua',
en chizóa tsöjtsázia' lataj chul-la.

⁴ Chinabábalena' nupa chinátigaca.
Naca' ca tu bönni' nudú dërö ládXë'ë,

⁵ en nagá'anë' cá'asö ladaj nupa chinátigaca,
en ca nupa dégaca yeru ba,
nupa na' bítirö röjnenu',
en nusán no'o léguequi.

⁶ Nuzú' neda' tu lu yeru zila,
ga naca chul-la, en le nácada' zila.

⁷ Rilenu' neda',
en rusaca' zí'u neda' tu lu nísado' quiu'.

⁸ Nucuásu' yúgu'të nupa núnbë'a.
Nunu' neda' ca tu le ta'guti bönachi.
Nadzuna', en biti' gaca irúaja'.

⁹ Tu' riguí'i rizáca'a nudú guió'j lahua'.
Tu dza tu dza rulidza' Li', Xan.
Richisa na'a zaca' ga na' zu'.

10 ¿Naru' guntso' yugu' yöl-la' huáca zxön
para gácalenu' nupa chinátigaca?
¿Naru' ulu'yasa nupa yú'ugaca lataj chul-la,
en ila'gú'u Li' yöl-la' ba?
11 ¿Naru' ulu'luí'i lahui yöl-la' dxi'i ladxi' quiu'
nupa nagáchi'gaca yeru ba?
¿Naru' ulu'luí'i lahui nupa yú'ugaca lataj chul-la
ca runu' ca rnna xtídz'u?
12 ¿Naru' gaca bë' le zxön runu' ga na' naca chul-la?
¿Naru' gaca bë' nacu' tsahui' ga na' cuntu nu bi röjné?

13 Rulidza' Li' neda' para gácalenu' neda',
ate' yugu' zila ridxín lo' le rinábida' Li'.
14 ¿Bizx que nusán ládxi'u neda', Xan?
¿Bizx que rucachi' lo' lahua' neda'?'
15 Rigu'ri rizáca'a, en chizóa gátia' ga gudela' naca' bí'ido'.
Réquida' zi' tu' ruxösu' neda', en rudú ládxa'a.
16 Nabága'a neda' yöl-la' rilé quiu',
ate' chizóa usuniti neda' le ruxösu' neda'.
17 Idú dza naca quia' ca nabaga' neda' nisa.
Nagú'ugaca neda' lé'ajlö yugu' nisa.
18 Nucuasú' ga zoa' nu nadxí'i neda', enca' luzá'a.
Zóalensö le naca chul-la neda'.

89

1 Gúl-latica'sa' ca naca yöl-la' dxi'i ladxi' quiu', Xan.
Usiyönda' xzí'ini xsoatu' ca runu' ca rnna xtídz'u.
2 Gunnía': "Sóatica'sö yöl-la' dxi'i ladxi' quiu'.
Tsaz naca bë' yehua' yubá ca runu' ca rnna xtídz'u."
3 Rnnë' Dios: "Naguixja' tsaz didza' dzaga núnlena' nupa nabó caza' quia'.
Bena' tsutsu xtídz'a ca guna' queë' David, huen dxin quia'.
4 Gunnía': Ucuá'a tsaz xzí'ini xí'sú'.
Guna' ga sóatica'sö nu inná bë' uláz quiu'."
5 Nupa nacua' yehua' yubá quiu' ila'gú'u yöl-la' ba le nunu' le tun ga rubánitu', Xan.
Ga nudúbigaca nupa nátagaca quez quiu' ila'gú'u yöl-la' ba ca runu' ca rnna xtídz'u.
6 ¿Nuzxi caz zoa ni' yehua' yubá naca ca nacu' Li', Xan?
¿Nuzxi caz zoa ladaj nupa nayépisëgaca naca ca nacu' Li', Xan?
7 Nupa nátagaca lá'ayi tun Li' bal, Dios.
Ral-la' gúnrüru' Li' bal ca tun nupa nacua'len Li'.
8 Dios, Xángaca ni'a no'o guizxi yu, ¿nuzxi caz naca ca nacu' Li', Xantu' nayépisëtërou'?'
Naca bë' rúntica'su' ca rnna xtídz'u.
9 Rinná be'e quézinu' le riyasa ridxía que nísado'.
Cate' riyasa ridxía nísado', ruzóa cazu' le dxisö.
10 Busuniti cazu' bönachi Egipto, ate' gulaca ca nupa chinátigaca.
Bësilásiu' léguequi len no'o nál-la.
11 Nequi quiu' yehua' yubá,
en nequi ca' quiu' luyú ni, tu' nuzóa cazu' léguequi.
12 Naguixaj cazu' le dë tsölá'a ga za' bö' ziaga,
en le dë tsölá'a ga ridödi gubidza beo' ziaga.
Lu yöl-la' rudzeja quéguequi ta'bódxí'a guí'a Tabor,
en guí'a Hermón cate' ta'yöni Lo'.

13 ¡Nál-latërö naca no'o!
 ¡Nápatërö no'o yöl-la' huáca!
 ¡Nayépisëtërö no'o ibëla!

14 Le naca dxi'a, en le naca tsahui' tun tsutsu le rinná bé'u.
 Nacuá'len Li' yöl-la' dxi'i ladxi', en le naca idútë li.

15 Bica' bágaca nupa ta'yöni didza' que yöl-la' rudzeja.
 Ta'dá lu bení' que lo', Xantu' Dios.

16 Idú dza tu'dzeja tu' zóalen Lo' léguequi,
 en tu' zóalen léguequi le naca tsahui' quiu', le nayépisëtërö.

17 Naca cazu' Li' yöl-la' zxön que yöl-la' huáca quéguequi,
 en tu' ruzá' ládxu'u queétu' nazxönda' yöl-la' nál-la queétu'.

18 Nequi queë' Xanru' le run chi'i rë'u,
 ate' néquinë' queë' Dios bönni' rinná bé'enë' rë'u.
 Dios na' náquië' lá'ayi ladaj bönachi Israel.

19 Dza ni'te bé'lenu' nupa néquiguequi quiu' didza'
 lu yugu' le buluí'inu' léguequi,
 gunnó': "Gúcalena' tu nu nayépisëtërö.

Nuchisa' tu nu guró' caza' quia' ladaj bönachi.

20 Budzólida'-në' David, huen dxin quia'.
 Gulu'a-në' le za le naca lá'ayi quia'.

21 Len na' caza' naguixja' lë',
 ate' len na'a ca' utipa' ládxë'ë.

22 Biti' si' ye'e lë' nu rilé lë',
 en bití' usaca' zi' lë' nu ruá' dö'.

23 Uquínnaja' lahuë' nupa ta'díl-lalen lë',
 en gu'a nupa bití' ta'lé'e lë' dxi'a.

24 Sóalena' lë' lu yöl-la' run ca rnna xtídza'a,
 en lu yöl-la' dxi'i ladxi' quia',
 ate' tu' ulidzë' La', uxöna' yöl-la' nál-la queë'.

25 Guna' ga inná bé'ë ga naguela' ra' nísado',
 ga idxintë ra' yegu Eufrates.

26 Ulidzë' neda', inné': Li' nacu' Xuza', en Dios quia',
 enca' Nu run chi'i neda', en Nu rusölá neda'.

27 Gun caza' neda' ga gáquië' ca bí'i lo queë' caza',
 ate' tsépisëtërë' ca yugu' bönni' ta'nná bé'ë yödzölió.

28 Lu yöl-la' dxi'i ladxi' quia' gun chí'itica'sa' lë',
 en uzó'a tsaz queë' didza' dzaga quia'.

29 Ucuá'a tsaz zxí'ini xi'sóë',
 ate' sóatica'sö lataj ga inná bé'ë, tsca soa yehua' yubá.

30 Channö ulu'cá'anë' zxí'ini xi'sóë' xibá quia',
 en cabí ilunë' ca naca le buchi'a busöró'a,

31 en channö ila'guitsjé' xibá que le gunná bé'a,
 en cabí ilunë' ca nácagaca le gunná bé'eda' légaquië',

32 ní'irö guna' légaquië' xiguia' ca sa'yéaj le ta'dödi bé' tunë',
 en gu'a léguequi ca naca xiguia' nabága'gaquië'.

33 Pero bití' ugúa' queë' yöl-la' dxi'i ladxi' quia',
 en bití' usana' guna' ca rnna le guzxí' lu na'a guna'.

34 Bití' ucá'ana' cá'asö didza' dzaga nuna',
 en bití' utsá'a didza' bé'a.

³⁵ Tu le nuzó' tsutsu, en nuna' ba nalí que le naca lá'ayi quia'.
Biti' ca' si' yé'eda' David.

³⁶ Gunnía' ila'cuá'tica'së' zxi'ini xi'sóë',
en ga rö'ë rinná' bë'ë sóatica'sö lahua' ca gubidza.

³⁷ Naguixja' le tsaz ca nuzó'a' tsaz beo',
ate' nacua'tica'sö lúzxiba le tun ba nalí."

³⁸ Pero nuzú' tsölá'alö, en nusán ladxu'u,
en riléde'enu' nupa na' guró'cazu' quiu'.

³⁹ Nuzú' tsölá'alö didza' dzaga bénlenu' huen dxin quiu'.
Nuzötju' luyú' yöl-la' unná' bë' queë'.

⁴⁰ Nuquínnaju' zö'ö gulún chi'i lë',
en nusunítu' yugu' lataj tsutsu queë'.

⁴¹ Yúgu'të nupa ta'dódisö ta'bán le nequi queë',
ate' bönni' dzaga yu'u queë' tu'cá'ana lë' cá'asö.

⁴² Nuchisu' nupa ta'dá'baga' lë',
en runu' ga tu'dzeja nupa bití' ta'lé'e lë' dxi'a.

⁴³ Runu' ga bití' sequí' idéli'në' lu gudil-la,
ate' cuntu nu sequí' ucul-lë' lu gudil-la na'.

⁴⁴ Bugú' yöl-la' lachi queë',
en nuzötju' yöl-la' unná' bë' queë' lu yu.

⁴⁵ Benu' ga chinagulë' sal-la' ni zoë' iz cuidí',
en nunu' ga rutuí'në'.

⁴⁶ ¿Gáca'xte caz gunu' caní, Xan?

¿Naru' tsaz nucachi' lo'?

¿Naru' gácatíca'sö yöl-la' rilé quiu' ca tu guí' réguide'e?

⁴⁷ Yöjné nabábasö iz soa' ibana',
en tu chí'isö nacua' bönachi yödzölió ni.

⁴⁸ ¿Nuzxi caz bönni' gaca sóatica'së' ibanë', en cabí gátíë'?

¿Naru' huáca usölá' cuin cazë' lu yöl-la' unná' bë' que lataj chul-la?

⁴⁹ ¿Gázxité zoa yöl-la' dxi'i ladxi' quiu' guzóa zí'alö, Xan,
lë' na' buzú' tsutsu xtídz'u' gunu' queë' David,
len yöl-la' run ca rnna xtídz'u'?

⁵⁰ Yöjné ca tu'cá'ana cá'asö netu', huen dxin quiu', Xan,
enca' ca tu'cá'ana neda' cá'asö bönachi zían yödzö izá'a.

⁵¹ Tu'cá'ana neda' cá'asö nupa bití' ta'lé'e Li' dxi'a, Xan.

Tu'cá'ana cá'asö yugu' le runa' neda', bönni' guró'cazu' quiu'.

⁵² ¿Yöl-la' ba Xanru' Dios iz si' zaca!

¿Ca' gaca! ¿Ön, ca' gaca!

90

¹ Nacacazu' Li', Xan, ca yu'u lidxa'.

² Zí'atëlö ca gulata' yugu' guí'a, o ca guta' yödzölió,
ga naguela' cate' gusí lo ga idxintë dza udxi, tsaz nacacazu' Dios.

³ Runu' ga tu'huóaca bönachi bëchtö yu cate' rnno':
"Guli'huóaca le néquinili', bönachi."

⁴ Quiu' Li' chi gayuá' iz nacagaca
ca dza neje le chigudödi que,
o ca tu chí'isö chi'i dzó'ölö.

⁵ Bugacu' bönachi ca tu lu yegu gubó'o, ate' gúacagaca ca tu yëla rineru'.

Cate' naca zila zéaj naca ca tu guíxi'do' rilentë luyú.

⁶ Cate' naca lahui' dza rizxón, en rō' ni'a nē'e,
pero cate' chiral-la, ricuadi', en ridödi que.

⁷ Rinítitu' tu' rilenu' netu',
ate' tu' ridzó'o ruúbi rugu'itu'.

⁸ Nuzú' lo' xigua' nabága'tu',
en nubéaju' lu bení' quiu' dul-la' yu'u ládxi'do'otu'.

⁹ Tu' riléde'enu' netu' ridödi quégaca dza queétu',
ate' chibú'u iz queétu' ca tu le rinné ládxi'tu'.

¹⁰ Tsónnalalaj yu' chi ízisö zóatu' nabantu',
o channö nál-latu', huazóatu' idú tápalalaj iz,
pero runtu' dxin bayudxi, en ruhu'ínitu' yugu' iz na',
tu' ridóditë quéguequi iz na', ate' uzá'atu'.

¹¹ ¿Nuzxi caz réajni'i tsca naca yöl-la' rilé quiu'?
¿Nuzxi caz nözi ca naca tsöbi yu'u nu na' rilenu'?

¹² Que lë ni na' busëdi netu' para guéquibe'etu' tsca gácagaca iz zóatu',
para gácatu' bönachi ta'yéajni'i lo' Li'.

¹³ ¿Gáca' xte caz bití' huéchi' ládxi'u netu', Xan?
Buéchi' ladxi' netu', yugu' huen dxin quiu'.

¹⁴ Tu zila tu zila buluí'i netu' ca naca yöl-la' dxi'i ladxi' quiu',
para gúl-latu' lu yöl-la' rudzeja queétu', en uzí'itu' xibé yugu' dza na'.

¹⁵ Ben ga udzójatu' tsca chigulaca dza busaca' zi'u netu',
en tsca gulaca iz bití' guca dxi'a queétu'.

¹⁶ Buluí'i netu', yugu' huen dxin quiu', ca naca le nunu',
en buluí'i zxí'initu' ca naca yöl-la' zxön quiu'.

¹⁷ ¿Buzá' ladxi' queétu', Xantu' Dios,
en ben ga irúaj dxi'a dxin runtu'!
¿Ön, ben ga gaca dxi'a lo' dxin runtu'!

91

¹ Nu bönni' ruzxöni ládxi'ë Dios para gun chí'ë lë',
en rizi'ë Dios Nu napa idútë yöl-la' huáca, para gácalenë' lë',
² gaca guië' Xanru': "Nacu' Nu run chí'i neda', en Nu ruzóa neda' tsutsu.
Nacu' Dios quia', ate' ruzxöni ládxi'a Li'."

³ Usólá cazë' Dios Li' lu du yalaj que nu rizón bönachi,
en lu yödzhué' le rusuniti.

⁴ Usubáguë'ë li' ca rusubága'ba' böra yugu' bórado' queéba',
ate' gaca chí'u lu nē'ë ca raca quégacaba' bórado' znan xílaba' yøjede.
Le run chí'i rë'u, en le ruzóa rë'u tsutsu naca yöl-la' run ca rnna xtídzë'ë cheë'.

⁵ Bití' gádxinu' le run gadxi bönachi chí'i dzó'ölö,
en bití' gádxinu' yaga lahui' tuchi' tu'sé bönachi lahui' dza,

⁶ en bití' gádxinu' yödzhué' le rilén ga naca chul-la,
en bití' gádxinu' le naca xihui' le ruti bönachi lahui' dza.

⁷ Ilátigaca chi gayuá' bönachi cuitu' li',
en ia'chí cō' chí gayuá' cuitu' ibëla,
pero bití' bi gaca quiu' li'.

⁸ Le nácatë uyú iná'asu',
en ilé'enu' le rubí'i quégaca nupa tuá' dö'.

⁹ Tu' nuzú'-në' Xanru' Nu run chí'i li',
nuzú'-në' Dios nayépisëtë'rë' Nu gácalen li',

¹⁰ bití' bi gaca quiu' le cabí naca dxi'a,
 en nitú le naché' yödzhüé' bití' tsu'u lidxu',
¹¹ tu' cu'u cazé' Dios lí' lu ná'agaquié' gubáz lá'ayi queé',
 para ilún chi'ë lí' gáti'tës ga ridó'.
¹² Lu ná'agaquié' ila'ché'ë lí',
 para cabí tsöjchégu'u guiój.
¹³ Uléaj ulibu' bédxi guixi', en bëla sínia'.
 Usunu' lë'e labu' bédxi guíxi'do', en bëla xitsini'.
¹⁴ Rnné' Dios: "Nadxi'iné' neda', ate' que lë ni na' usölá' lë'.
 Uzóa'-né' tsaz xitsá'tërö tu' núnbë'ë La'.
¹⁵ Ulidzë' neda', ate' ubi'a didza'.
 Sóalena' lë' cate' bi gaca queé'.
 Usölá' lë', en guna' lë' bal.
¹⁶ Uzánda'a dza soé' ibané',
 en uluí'ida'-né' ca gaca usölá' lë'."

92

¹ ¡Bica' tsahui' naca rigú'utu' Lí' yöl-la' ba, Xan,
 en rúl-latu' le tun Lí' bal, Dios nayépisëtëre',
² en rusiyöntu' bönachi yugu' zila ca ruhuéchi' ládxi'u netu',
 en rulu'itu' lahui yugu' dzö' ca runu' ca rnna xtídzu'u!
³ Rúl-latu' len yugu' bihuël-la,
 en rúl-latu' yugu' le lachi ca tul-la.
⁴ Le zxön nunu' Lí', Xan, run ga rudzëjatu',
 ate' ruzi'tu' xibé le núngaca lu no'o.
⁵ Bica' zxön nácagaca le nunu' Lí', Xan.
 Zxóntërö le rizá' ládxi'u gunu'.
⁶ Zoa tu le cabí gaca inóziné' bönni' nazí icjë',
 en bití' gaca tséjni'iné' bönni' canóz le.
⁷ Nupa nucá'anagaca Dios ila'yán ca ta'yán guíxi'do',
 en ulu'zí' xibé le tun nupa tuá' dö', pero ila'niti tsaz,
⁸ tu' nayépsëtëru' Lí' tsaz, Xan.
⁹ Naca bë' le gaca quégaca nupa bití' ta'lé'e Lí' dxi'a, Xan.
 Naca bë' ila'niti nupa bití' ta'lé'e Lí' dxi'a.
 Ulu'gá'ana cá'asö yúgu'të nupa tuá' dö'.
¹⁰ Nunu' ga nácatéra' nal-la ca nácaba' bédxi.
 Nagú'u neda' le za le run ga rudzëjada'.
¹¹ Ilé'e quézida' cate' uxicju' nupa bití' ta'lé'e Lí' dxi'a,
 en yönda' cate' ila'bödxi yechi' nupa tuá' dö', nupa na' ta'díl-lalen neda'.
¹² Ila'yán nupa nácagaca tsahui' ca ta'yán yaga zina' ca'.
 Ila'zxón ca ta'zxón yaga ró'gaca lu guí'a Líbano.
¹³ Nácagaca ca yaga nudá'gacu' ra' yu'u lidxu', Xan,
 le ta'zxón lu lö'a lataj quiu', Dios queétu'.
¹⁴ Cate' ni' yú'ugaca iz zían ila'bía le zxixi quéguequi.
 Ilácagaca tsutsu, en ila'cuá'tica'sö ya'a.
¹⁵ Caní gaca para gaca bë' náquié' tsahui' Xanru', Nu run chi'i neda'.
 Bití' bi zóalen Lë' le cabí naca tsahui'.

93

¹ ¡Rinná bë'ë Xanru'!
 ¡Nácué' yöl-la' ba zxön queé'!
 ¡Nácué' zxé' Xanru', en núguié' lë'ë yöl-la' unná bë'!

¡Nuzóë' tsutsu yödzölió, ate' biti' utá cuini!

² ¡Tszaz nuzú' tsutsu ga rö'u rinná bë'u, Xan,
en zóatica'su' Li'!

³ Riyasa ridxía nisa yugu' lu nísado', Xan.

Riyasa ridxía nisa, en ru'u bö que.

Riyasa ridxía nisa yugu' lu nísado', en yugu' lu yegu.

⁴ Xanru' Dios yehua' yubá nápatëré' yöl-la' unná bë'
ca bö ru'u lu nísado' le riyón ca guziú' rinné,
enca' ca le riyasa ridxía nisa lu nísado'.

⁵ Tszaz naguixju' xibá quiu', Xan,
ate' idú lá'ayi naca ga zoa cazu' Li'.

Caní zóatica'sö na'a dza, en dza si' zaca.

94

¹ Nacu' Dios, Xan, Nu ruzí' lëbi bönachi.

Buluí' i cuinu', Dios, Nu ruzí' lëbi.

² Ruchi'a rusöró cazu' yúgu'të bönachi.

Guzé, ate' len yöl-la' huáca zxön quiu' bubí' i quégaca nupa tun ba zxön cuínguequi.

³ ¿Gáca'xte caz ulu'z'í' xibé nupa tu'cá'ana Li', Xan?

¿Gáca'xte caz ulu'z'í' xibé?

⁴ ¿Gáca'xte caz ilún ba zxön cuínguequi, en ilu'í' didza' zi'?

¿Gáca'xte caz ilún ba zxön cuínguequi ní'a que dö' tuá'gaca?

⁵ Tu'sunítie' nupa néquiguequi quiu', Xan.

Tu'saca' zi'ë nupa néquiguequi quez quiu'.

⁶ Tútigaquië' nigula uzëbi, enca' yugu' bi' i uzëbido',
en tunë' le naca xihui' ladaj bönachi zi'tu'.

⁷ Ta'nné': "Biti' ilé'enë' Xángaquië' rë'u,
en biti' ru'í' i ládxi'ë Dios queë' Jacob lë ni."

⁸ Guli'tséajni'i, bönachi biti' nózguequi,

ate' lib'í'ili', bönachi catún bal, ¿bátaxi tséajni'ili'?

⁹ Benë' Dios guiði nágaru'. ¿Naru' cabí riyón quézinë'?

Benë' Dios guiðj loru'. ¿Naru' cabí rilé'e quézinë'?

¹⁰ Ruzéajni'i quézinë' Dios bönachi yúgu'të yödzö.

¿Naru' cabí gunë' léguequi xiguia'?

Ruchiza cazë' icja ládxi'do'oru' yöl-la' réajni'i.

¿Naru' cabí réquibe'enë' bi runli'?

¹¹ Nöz quézinë' Xanru' yugu' le ta'zá' ládxi'gaca bönachi.

Nózinë' canóz naca le ta'zá' ládxi'gaca.

¹² Bica' ba bönni' na' ruzéajni'i quézinu'-në', Xan,
en rusedi quézinu'-në' ca naca xibá naguixju' Li'.

¹³ Gunu' ga uzí' ládxi'ë cate' bi gaca queë',
ga idxinrö dza tsú'ugaca yeru ba nupa tuá' dö'.

¹⁴ Biti' usán në'ë Xanru' bönachi queë',
en biti' ucá'anë' nupa néquiguequi quez queë'.

¹⁵ Ca naca le naca tsahui' uchi'a usöróë' rë'u le yúbölö,
ate' ulu'z'í' xibé nupa nácgaca tsahui'.

¹⁶ ¿Nuzxi caz tíl-lalen nupa tuti bönachi para gácalen neda?
¿Nuzxi caz gácalen neda' cate' nacuá' nupa tuá' dö' quia'?

¹⁷ La'tu' cabí gúcalenë' Xanru' neda',
la' yöjtsú'utea' lataj chul-la que yöl-la' guti.

¹⁸ Gunnía': "Chizóa' ibixa'",
ate' lu yöl-la' dxi'i ladxi' quiu' guzxönu' neda', Xan.

¹⁹ Cate' ruúbi ruguí'i ládxi'da'ahua',
ruhué' tsahú'u neda', en runu' ga rudzédada'.

²⁰ Biti' ca' gunu' tsözxón nupa tu'chi'a tu'söró netu' ca naca le cabí naca tsahui',
nupa na' tu'béaj tsahui' le cabí naca tsahui'.

²¹ Tu'dubë' tsözxón para ilútië' nupa nácgaca tsahui',
en ta'chúguië' quégaca nupa bití' bi nabága'gaca ilátigaca,

²² pero run chi'i cazë' Xanru' Dios neda'.
Nuzöë' neda' tsutsu, ate' ruzxöni ládxa'a lë'.

²³ Ubi'ë' quégaquië' ca naca dö' tu'ë,
en usunítië' légaquië' tu' nözi xigua' nabága'gaquië'.
Usunítië' dërö Xanru' Dios légaquië'.

95

¹ Guli'dá, gúl-laru' queë' Xanru' lu yöl-la' rudzeja queéru'.

Lu yöl-la' rudzeja queéru' códxi'aru' que Nu na' naca ca tu guiójtó'o ga nuláru'.

² Uyéajru' lahuë', en guiéru'-në': "Xclenu'."

Lu yöl-la' rudzeja queéru' códxi'aru' lahuë', gúl-laru' yugu' salmo.

³ Xanru' Dios náquië' Dios nayépisëtëré'.
Nápatëré' yöl-la' unná bë' ca yúgu'të dios izá'a.

⁴ Lu na' cazë' yu'u le dë ga rë' zhan luyú,
ate' néquiquequi ca' queë' guí'a sibi.

⁵ Nequi queë' nísado', tu' nun cazë' le,
en len ná'asë' benë' luyú bidxi.

⁶ Guli'dá, gunru'-në' zxon, en uzóa zxíbiru' lahuë'.
Uzóa zxíbiru' lahuë' Xanru' Nu ben rë'u.

⁷ Naca cazë' Lë' Dios queéru',
ate' nácaru' bönachi rugagu cazë', en ca bö'cu' zxila' riché' cazë'-ba' lu në'ë.

Rnna cazë' Dios: "Na'a, channö ré'ënili' yónili' chi'a,

⁸ bití' gunlí' zidzaj icja ládxi'do'oli' ca gulunë' xuz xtó'oli' lataj na' lë Meriba,
en caléga ca gulunë' la' guixi' ga dë lataj lë Masa,

⁹ cate' ni' gula'zí' bë'ë xuz xtó'oli' neda'.
Gula'zí' bë'ë neda' sal-la' bila'lé'enë' yugu' le bena'."

¹⁰ Idú choá' iz gúquida' zi' bönachi gula'cuá' dza ni',
ate' gunnía': "Ta'chixi ta'níguinë' lu icja ládxi'do'gaquië',
en bití' nózguequinë' le ré'ënda' ilunë'."

¹¹ Que lë ni na' lu yöl-la' rilé quia' bena' tsutsu xtídza'a,
gunnía': "Bití' ca' ila'yázië' ga ulu'zí' ládxi'ë tsözxón len neda'."

96

¹ ¿Guli'gul-la queë' Xanru' tu le cubi!

¿Guli'gul-la queë' Xanru', yúgu'tëli' zóali' yödzölió!

² ¿Guli'gul-la queë' Xanru'! ¿Guli'gún zxon lë'!

Tu dza tu dza buli'siyón bönachi didza' dxi'a ca rusölé' rë'u.

³ Buli'siyón bönachi yúgu'të yödzö yöl-la' ba queë'.

Buli'siyón yúgu'të bönachi le nácagaca zxön nunë'.

⁴ Zxóntërö náquië' Xanru', ate' runda' bayúdx cú'uru'-në' yöl-la' ba.

Ral-la' gádxitëru' Lë' ca tadxi bönachi izá'a dios quéguequi.

⁵ Yugu' dios quégaca bönachi izá'a nácagacasö budó' guiój budó' yaga, pero Xanru' Dios nunë' lúzxiba xitsá'.

⁶ Nacuá' yöl-la' bení', en yöl-la' ba lahuë' Lë'.

Nacuá' yöl-la' huáca, en yöl-la' lachi ga zoa cazë'.

⁷ ¡Guli'cu'ë Xanru' yöl-la' ba, bönachi yúgu'të yödzö!

¡Guli'cu'ë yöl-la' ba, en yöl-la' huáca!

⁸ ¡Guli'cu'ë Xanru' yöl-la' ba ni'a que Lë'!

¡Guli'guá' le unódzjali', en guli'dá lahuë'!

⁹ ¡Guli'gún Lë' zxön, náculi' le naca ba'a!

¡Guli'zxizi lahuë', bönachi idútë yödzölió!

¹⁰ Guli'nná lógaca bönachi yúgu'të yödzö: "Rinná bë'ë Xanru'.

Naguixjë' tsaz luyú, ate' biti' utá cuini.

Ca naca le naca tsahui' uchi'a usöröë' quégaca yúgu'të bönachi."

¹¹ Ral-la' udzeja lúzxiba, en ulu'zí' xibé luyú.

Ral-la' códxí'a nísado', en ila'bödxí yúgu'të le nacua' lu nísado'.

¹² Ral-la' udzeja guixi' caz, en yúgu'të le nacua' la' guixi'.

Lu yöl-la' rudzeja quéguequi ilúl-la yaga

¹³ lahuë' Xanru', tu' si' ulé'.

Guídë' duchi'a dusöröë' nupa nacua' yödzölió.

Ca naca le naca tsahui' uchi'a usöröë' quégaca yúgu'të bönachi, enca' quégaca bönachi yúgu'të yödzö para ilunë' ca rnna xtídzë'ë.

97

¹ ¡Rinná bë' cazë' Xanru' Dios!

¡Ral-la' ulu'dzeja bönachi idútë yödzölió!

Buli'sí' xibé', libí'ili' zóali' yúgu'të yödzö izá'a.

² Ró'gaca böaj, en le chul-la idú gásibi'ilö ga na' zoë'.

Le naca dxi'a, en le naca tsahui' tu'zóa tsutsu le rinná bë'ë.

³ Rinöru tu guí' zxön lahuë',

le uzegui' nupa ta'dá'baga' Lë'.

⁴ Tu'zení' le ta'yëpi yösa yödzölió.

Rilé'e luyú lë ni, en rizxizi.

⁵ Tu'úna' guí'ado' ca ruún bidxina' buz lahuë' Xanru'.

Náquië' Xani idútë yödzölió.

⁶ Lúzxiba xitsá' naca bë' náquië' tsahui',

ate' ta'lé'e bönachi yúgu'të yödzö yöl-la' zxön queë'.

⁷ Tu'tuí'i yúgu'të nupa tun zxön budó' guiój budó' yaga,

nupa na' tun ba zxön cuínguequi ni'a quégaca budó' quéguequi na'.

Ulu'gá'ana cá'asö yúgu'të dios quégaca bönachi izá'a lahuë' Xanru'.

⁸ Bila'yöni bönachi Sión, en bulu'dzeja,

enca' yugu' xzí'ini xi'sóë' Judá.

Tu'dzéjanë' ca ruchi'a rusöróu' netu', Xan.

⁹ Nayépisëtërö cazu' Li', Xan, ca yúgu'të nupa nacuá' yödzölió.
Nayépisëtërö cazu' Li' ca yúgu'të dios quégaca bönachi izá'a.

¹⁰ Núlöli' nadxí'ili'-në' Xanru', guli'guequi zi' le naca dö'.
Run chi'i cazë' bö' nácagaca caz nupa néquiguequi queë'.
Rusölé' léguequi lu ná'agaca nupa tuá' dö'.

¹¹ Ruzení'tica'sö bení' queë' nupa nácagaca tsahui',
ate' tu'zí' xibé' nupa nácagaca dxi'a.

¹² ¡Buli'sí' xibé' Xanru' núlöli' nácali' tsahui'!
¡Buli'subán ládxi'li' ca nunë' Dios Lá'ayi, en guli'cu'ë yöl-la' ba!

98

¹ ¡Guli'gul-la queë' Xanru' tu le cubi,
tu' nunë' le tun ga rubániru'!

Len yöl-la' unná bë' zxön queë', en yöl-la' huáca lá'ayi queë' nadéli'në' lu gudil-la.

² Nunë' Xanru' ga naca bë' le nadéli'në'.
Nulu'ínë' bönachi yúgu'të yödzö náquië' tsahui'.

³ Len yöl-la' dxi'i ladxi' queë', en yöl-la' li ladxi' queë'
benë' ca rna xtídzë' le guzxi' lu në'ë gunë' quégaca bönachi Israel.
Bila'lé'e bönachi idútë yödzölió ca busölé' rë'u Dios queéru'.

⁴ ¡Lu yöl-la' rudzeja queé'li' guli'gul-la queë' Xanru', yúgu'téli' zóali' yödzölió!
¡Idú ládxi'li' guli'cu'ë yöl-la' ba, en guli'gul-la queë' le naca lá'ayi!

⁵ ¡Guli'gul-la queë' Xanru' yugu' salmo, en guli'quinnaj yugu' bihuél-la!
¡Guli'quinnaj lé'egaca arpa, en guli'gul-la yöl-la' ba queë'!

⁶ ¡Guli'cödxí lúzugacaba' chivo, en lúzugacaba' bëdxi
lahuë' Xanru' Dios, Nu rinná bë'!

⁷ ¡Buli'lidza zidzaj, nísado', en yúgu'të le nacuá' nisa na'!
¡Guli'gul-la yödzölió, en yúgu'të nupa nacuá' ni'!

⁸ ¡Guli'capa' ná'ali', yugu' yegu,
ate' lu yöl-la' rudzeja queé'li' guli'gul-la lahuë' Xanru', lib'í'ili', gu'ado',

⁹ tu' zë'ë duchi'a dusöróë' quégaca bönachi yödzölió!

Ca naca le naca tsahui' uchi'a usöróë' quéguequi,
en ca naca le naca dxi'a tsahui' inná bé'enë' yúgu'të bönachi.

99

¹ ¡Rinná bë'ë Xanru' Dios! Ta'zxizi yúgu'të bönachi.

Rö'ë rinná bë'ë ladaj nupa nápagacatërö yöl-la' huáca,
légaca Querubín, ate' rizxizi luyú.

² Nayépisëtërë' Xanru' lu yödzö Sión,
ate' rinná bé'enë' bönachi yúgu'të yödzö izá'a.

³ Ral-la' ila'gú'u Lë' yöl-la' ba yúgu'të bönachi,
tu' caní sa'yéaj, en le run ga runru' Lë' bal.

¡Lá'ayi náquië' Lë'!

⁴ Nadxí'i quézinu' le naca tsahui', Li', Bönni' unná bë' nayépisë.

Tsaz naguixju' le naca dxi'a tsáhui'do',
en nuzú' quégaquië' xzí'ini xi'sóë' Jacob le naca tsahui', en le naca idútë li.

⁵ ¡Guli'gún zxönë' Xanru' Dios!
Buli'zechu zxíbili' lahuë' Lë' ga rö'ë rinná bë'ë.
¡Lá'ayi náquië' Lë'!

⁶ Guláquië' Moisés, en Aarón bixúz queë',
ate' benë' Samuel tsözxón nupa gula'yéaj ládxi'gaca Lë'.
Bulu'lidzë' Xanru', ate' bubí'i cazë' didza'.

⁷ Tu lu böaj bé'lenë' légaquië' didza'.
Gulunë' ca ta'nná bë' xibá queë', en yugu' le gunná bé'enë' légaquië'.

⁸ Bubi'u didza' lógaca bönachi quiu', Xantu' Dios.
Bulu'ínu' légaquië' nacu' Dios, en runiti lo' bönachi,
pero rubi'u quégaquië' ca sa'yéaj dö' tu'ë.

⁹ ¡Guli'gún zxönë' Xanru' Dios!
¡Buli'zechu zxíbili' lahui' lo gu'a lá'ayi ga zoa cazë',
tu' náquië' lá'ayi Xanru' Dios!

100

¹ ¡Lu yöl-la' rudzeja queé'li' guli'gul-la queë' Xanru',
lib'íli' zóali' idútë yödzülió!

² ¡Lu yöl-la' rudzeja queé'li' guli'cu'ë yöl-la' ba Xanru'!
¡Guli'dá lahuë' Lë', en lu yöl-la' rudzeja queé'li' guli'gul-la queë'!

³ ¡Guli'tsöjné Xanru', náquië' Dios!

Buzá' cazë' rë'u, en calëga rácasö queéru' zóaru'.
Nácaru' bönachi queë', en nácaru' ca bö'cu' zxila' queë'.

⁴ Guli'tsaza zaca' ra' yu'u queë', guié'li'-në': "Xclenu'."
Guli'tsaza gapa naca lö'a queë', cú'uli'-në' yöl-la' ba.
Guli'guié': "Xclenu'", en guli'gunë' zxön.

⁵ ¡Náquië' dxi'a tsahui' Xanru' Dios, ate' zóatica'sö yöl-la' dxi'i ladxi' queë'!
¡Zóatica'sö yöl-la' run ca rnna xtídzë'ë queë'!

101

¹ ¡Gul-la' ca runu' ca rnna xtídzü'u, en ca nacu' tsahui'!
¡Gul-la' yöl-la' ba quiu' Li', Xan!

² Güf'i ládxa'a guna' le naca idú dxi'a.

¡Bátaxi huécju' quia' neda'?

Lu yu'u lidxa' guna' le naca idú ladxi'.

³ Biti' gu'a lataj sóalen neda' nitú le naca xihui'.

Biti' rilé'eda' dxi'a le tun nupa tu'cá'ana Li'.

Biti' ca' guna' léguequi tsözxón.

⁴ Biti' ca' gaca' chopa ladxi'.

Biti' ca' guna' le naca dö'.

⁵ Usunítia' dërö nu bönni' rinnë' que luzé'ë balándo'os.

Biti' ca' guá' ilena' nu run ba zxön cuini.

⁶ Uyúa' dxi'a tsáhui'do' nupa tun ca rnna xtídzá'guequi luyú ni, para ila'cuá'len neda'.

Nu biti' bi xigua' nabaga' huáca gun xichina'.

⁷ Biti' ca' tsöjsóa lidxa' nu rizi' yë'.

Biti' gu'a lataj ugá'ana lahua' nu ru'í didza' le cabí naca.

⁸ Yugu' zila usunítia' yúgu'të nupa tuá' dö' luyú ni,
para ucuíta' lu yödzö queë' Xanru' yúgu'të nupa tuti bönachi.

102

¹ ¡Buzé nagu' le rulidza' Li', Xan!

¡Bë' lataj idxín lo' le rinaba yúdxida' Li'!

² Biti' ucache' cuinu' lahua' cate' bi rusaca' zi' neda'.

Buzé nagu' neda', en gudáchi ubi'u didza' cate' rulidza' Li'.

³ Yöl-la' na'bán quia' ruúlu ca dzön,
ate' régui rilá lu dxita lu bin quia' ca tu guí'.

⁴ Rudú ládxa'a ca raca que guixi' nabidxi,
en bítirö rizé ládxa'a bi gahua'.

⁵ Tu' rinnëda' ládxa'a nadxítalë'a.

⁶ Naca' ca tuba' bigúinni zóaba' luyú bidxi,
o ca tuba' cuturú dxíaba' tu lu yu'u nadachi.

⁷ Nabéaj yëla guió'j lahua',
ate' naca' ca tuba' bigúinnido' dxíaba' túziba' ícjo'o yu'u.

⁸ Yugu' dza nupa bití' ta'lé'e neda' dxi'a tu'didza' yudxi neda'.
Nupa tu'titaj neda' tu'gún dxin la' cate' nu tu'dxía dö'.

⁹ Naca le rahua' ca dódo'sö,
en nutsi' nisa ribödxá' le rë'ja'.

¹⁰ Caní raca quia' tu' rilenú' neda', en réquinu' neda' zi'.
Gulusu' neda', en gurú'unu' neda' tsölá'alö.

¹¹ Naca yöl-la' na'bán quia' ca tu zxul-la rilá' cate' ribía gubidza,
en rudú quia' ca raca que guixi' ricuádi.

¹² ¡Li', Xan, zóatica'su',

en zóaléntica'sö Lo' bönachi!

¹³ ¡Chasu', en huéchi' ládxi'u bönachi yödzö Sión!

¡Chibidxín dza gü'i ládxi'u léguequi!

¡Ön, chibidxín dza na'!

¹⁴ Netu', huen dxin quiu', nadxí'itu' yugu' guió'j nacuá' lu zö'ö run chi'i yödzö Sión,
en ru'í ládxi'tu' ga ridxintë bëchtö rö'ö la' nöza que.

¹⁵ Bönachi yugu' yödzö izá'a iladxi Lë' Xanru',
ate' nupa ta'nná bë' yödzölió iladxi yöl-la' zxön queë'.

¹⁶ ¡Nuchisë' Xanru' caz yödzö Sión,

ate' ulu'í lahuë' ni' lu yöl-la' zxön queë'!

¹⁷ Riyönnë' le tu'lidza Lë' nupa ta'yadzaj ta'yudxi.

Bití' ca' uzóë' tsölá'alö le tu'lidza yudxi Lë'.

¹⁸ Buli'zúaj lë ni lu guichi para ulu'laba xí'ini xi'sóali' le,
ate' nupa sí' ilalaj ila'gú'u Xanru' yöl-la' ba.

¹⁹ Ga ni' ribözë' Xanru' xitsá' lu lataj lá'ayi queë',
ga ni' zoë' Xanru' yehua' yubá, ruzé naguë'.

²⁰ Riyönnë' le ta'nné ladxí' nupa nadzúngaca,
en usanë' nupa narugu quéguequi ilátigaca.

²¹ Soa nu usiyöni bönachi yödzö Sión ca naca Lë' Xanru',
ate' ila'gú'u Lë' yöl-la' ba lu yödzö Jerusalén,

²² cate' ulu'dubi tsözxón bönachi yugu' yödzö izá'a,

en bönachi yugu' luyú,
ate' tsözxón ila'gú'u yöl-la' ba Xanru'.

²³ Benë' Xanru' ga gucuídi'da' la' nöza,
en nunë' ga soa' nabábasö dza.

²⁴ Gunnía': Dios quia', biti' gútiu' neda'
cate' ni zoa' gatsaj iza ral-la' soa' ibana'.
Zóatica'sö cazu' Li'.

²⁵ Dza ni'te gudixju' yödölió,
ate' len na' cazu' benu' lúzxiba.

²⁶ Huadödi quéguequi, pero Li', tsaz idi'u.
Ilexu' yúgu'téguequi ca riyexu' lari',
en ca tu lari' utubu' léguequi, en utsó'o léguequi.

²⁷ Li', biti' ca' utsá' cuinu', en biti' ca' guexu'.

²⁸ Zxí'inigaca huen dxin quiu' ila'böza dxi'a tsáhui'do',
ate' ucú'u tsutsu zxí'ini xi'sóagaquië' lo'.

103

¹ ¡Bil-la yöl-la' ba queë' Xanru', li', bö' naca caza',
ate' idútë le naca', bil-la yöl-la' ba que Lë' lá'ayi!

² ¡Bil-la yöl-la' ba queë' Xanru', li', bö' naca caza',
en biti' gal-la ládxi'u yúgu'të le ruzi'u xibé'!

³ Runiti lo cazë' neda' ca naca yúgu'të dul-la' nabága'a,
en rugúë' yúgu'të xihuë'a.

⁴ Ruhüö'á'uë' neda' lu lataj chul-la,
en ruzá' ládxi'ë quia' yöl-la' dxi'i ladxi', en yöl-la' ruhuéchi' ladxi'.

⁵ Rigu'ë xinöza' yugu' le naca dxi'a,
lë na' run ga ruhuö'áca' ca tu bönni' zoë' iz cuidi' queë',
ca na' raca queéba' bisia'.

⁶ Runë' yugu' le naca dxi'a,
en ruchi'a rusöröë' quégaca yúgu'të nupa zoa nu rusaca' léguequi zi'.

⁷ Buzéajni'inë' Moisés yugu' le gun cazë' Lë',
en bulu'ínë' bönachi Israel yugu' le zxön runë'.

⁸ Xanru' ruhuéchi' ladxi' cazë' bönachi, en ruzá' ládxi'ë quéguequi.
Biti' rilétenë', pero nadxí'itiqui'sinë' léguequi.

⁹ Biti' ruzétiqui'sinë' rë'u le bach,
en biti' rilétiqui'sinë'.

¹⁰ Biti' runë' rë'u xiguia' ca sa'yéaj dö' nuá'aru',
en biti' rubi'ë queëru' ca naca le xihui' nabága'ru'.

¹¹ Naca caní tu' ca na' naca xitsá'tërö lúzxiba ca luyú ni,
la' canisö naca zxön ca nadxí'inë' Xanru' nupa tadxi Lë'.

¹² Tsca nácatërö zi'tu' ga rilén gubidza ga ridxintë ga ribía,
la' canisö rucuitë' yugu' le ta'bága'ru' Lë'.

¹³ Ca na' ruhuéchi' ládxi'ë xúzgaca cázabi' yugu' zxí'inë',
la' canisö ruhuéchi' ládxi'ë Xanru' nupa tadxi Lë'.

¹⁴ Caní runë' tu' nózinë' le nácaru'.
Röjnenë' néquiniru' bëchtö yu.

¹⁵ Tsca nácgaca dza zóaru' nabanru',
nácagaca ca raca que xiyija guíxi'do'.

¹⁶ Cate' recaj bö', ruúlu runítisö xiyija na',
en biti' naca bë' ga na' guzóa.

17 Xanru', tsaz nadxi'inë' nupa tadxi Lë',
 en runë' quégaca zxi'iniguequi le naca dxi'a.
 18 Caní runë' quégaca nupa tun ca rnna xtídzë'ë,
 en quégaca nupa tun ca rinná bë' xibá queë'.
 19 Naguixjë' Xanru' xilatjë' yehua' yubá ga na' rö'ë rinná bë'ë.
 Rinná bë'enë' yúgu'të le dë.

20 ¡Guli'cu'ë yöl-la' ba Xanru', lib'ili', gubáz lá'ayi queë',
 nápatërolí' yöl-la' huáca zxön, en runli' ca rnna xtídzë'ë,
 lib'ili' na' runli' ca rnna didza' ru'ë!
 21 ¡Guli'cu'ë yöl-la' ba Xanru', lib'ili' nácali' ni'a në'ë guizxi yu,
 lib'ili', huen dxin queë' na', runli' ca ré'ëni quézinë' Lë'!
 22 ¡Guli'cu'ë yöl-la' ba Xanru', yúgu'tëli' na' nucu'ë lib'ili',
 lib'ili' zóali' yúgu'të lataj ga na' rinná bë'ë Lë'!
 ¡Bil-la yöl-la' ba queë' Xanru', li', bö' naca caza'!

104

1 ¡Gulu'ë yöl-la' ba Xanru', li', bö' naca caza'!

¡Nayépisëtëru' Li', Xana' Dios!
 ¡Xo' nacu' naca yöl-la' zxön, en yöl-la' ba!
 2 ¡Nusubaga' cuinu' bení' ca xzo' nacu' cazu',
 ate' naguixaj cazu' lúzxiba ca tu lari' zxön!
 3 Naguixju' xilataj lidxu' lahui nisa dë xitsá'alö.
 Dxía cazu' lu böaj ca tu lu carreta, en ridó' lu bö'ös.
 4 Rugunu' dxin bö' raca ca tu gubáz quiu',
 enca' yugu' guí' ca huen dxin quiu'.
 5 Nuzú' tsutsu luyú ni lu xilibi,
 en bití' ca' gaca nu utsá' xilataj.
 6 Gudixju' nisa zxön luyú ni ca tu lari' nabaga' le,
 ate' yöjbaga' nísado' na' yugu' guí'a.
 7 Buzenu' le bach nisa na', ate' burúaj,
 en cate' biyón chi'u, bayúdx buzunnaj nisa na'.
 8 Gurén yugu' lu guí'a, en bötaj ga naca ra' yegu,
 ga bidxintë yöjsóa ga nupó'o que nisa na'.
 9 Gudixju' buzá' que nísado' ga bití' gaca tödi.
 Bítí'rö caz tseajbaga' nisa na' luyú bidxi.
 10 Runu' ga ralaj beaj yugu' lë'e guí'ado',
 enca' ga ta'dödi yegu ga ró'ögaca röga'.
 11 Yudzu yugu' yegu na' nisa té'ajba' böa' guixi',
 le rugúa yöl-la' ribídx quégacaba' burro ta'dásiba' la' guixi'.
 12 Yugu' ra' yegu ró'ögaca yaga ga tu'dxíaba' biguínido' xcá'agacaba',
 en túl-laba' yugu' lu ni'a né'eguequi.
 13 Rigú'u nisa guió'j quiu' yugu' lu guí'a,
 en runu' ga tu'huöla tu'dzé'e yugu' le dzö'ö luyú.
 14 Runu' ga rizxón yö le táguba' böa' bëdx,
 en yugu' cuan guixi' tu'gún dxin bönachi,
 le ilagu ni'a que le nudó'o luyú,
 15 en xisi uva le run ga tudzeja ládxi'guequi,
 en za olivo le ta'gú'u láhuiguequi lu yöl-la' ruzí' xibé quéguequi,
 en yöta le nabániguequi.

16 Tu'zí' xibé nisa guió'j yaga cedro dzó'ö lu guí'a Líbano,
 yugu' yaga na' budó'o, Xantu'.
 17 Ni' tu'dxiaba' biguínni xcá'agacaba',
 ate' tunba' biyúz lídxigacaba' ni'.
 18 Nunu' Li' yugu' guí'a sibi ga dzó'öba' bdxina' guixi',
 enca' yugu' znan bulóaj gapa tapa chi'i cuíngacaba' bizxidxu'.
 19 Benu' beo' le naca bé' yugu' beo' que iz,
 ate' ribía gubidza ga ral-la' cuía.
 20 Benu' chi'i dzó'ölö, en cate' naca chul-la
 ta'rúajba' ta'daba' böa' guixi'.
 21 Ta'bódxí'aba' bédxi guíxi'do', ta'zóa régu'ba' le ila'zónba'.
 Tu'guílajba' le nuzóë' Dios iláguba'.
 22 Cate' rilén gubidza tu'dxinba' lídxigacaba',
 en röjóxagacaba' yugu' lu znan bulóaj quégacaba'.
 23 Ní'irö ta'rúaj bönachi söjaca huen dxin,
 en tun caz dxin ga ridxinté ribía gubidza.
 24 Xan, zióntërö yugu' le nunu' Li'.
 Len yöl-la' réajni'i zxon quiu' nunu' yúgu'të.
 Nalí luyú yödzölió ni yugu' le dxi'a nunu'.
 25 Ni' zoa nisa nácatërö zxon,
 ga na' nacua'aba' böa' guizxi yu,
 böa' cuidi', enca' böa' zxon.
 26 Ní' ta'dödi barco zxon,
 enca' böa' zxon lëba' leviatán, böa' na' nuzóa cazu'.
 27 Yúgu'tëba' ta'bózbaba' Li',
 cate' idxinrö ugagu' légacaba'.
 28 Rugagu' légacaba', ate' táguba'.
 Runödzu' le iláguba', ate' tu'huólaj ta'dzé'eba'.
 29 Cate' ruhuecju' quiu', tádxiba',
 en cate' ruzi'u bö' quiu', tátiba',
 en ruhuóaca yu le néquinigacaba'.
 30 Cate' rigú'u légacaba' bö', nabángacaba'.
 Rucubu' yúgu'të le nacua' yödzölió.

31 ¡Ral-la' gácatíca'sö yöl-la' ba queë' Xanru'!
 ¡Ral-la' ila'yaza ládxi'tíca'sö bönachi le nun cazë' Lë'!

32 Ruyúë' Xanru' luyú, ate' rizxizi.
 Riganë' yugu' guí'a, ate' rirúaj dzön.

33 ¡Gul-la' queë' Xanru' yúgu'të dza soa' ibana'!
 ¡Gul-la' yöl-la' ba queë' Dios tsanni ni zoa' nabana'!

34 ¡Zxixi naca le rizá' ládxa'a ca naca queë'!
 ¡Udzéjalenda'-në' Xanru'!

35 Ila'nítië' bönni' dul-la' nacué' yödzölió ni,
 en bíti'rö ila'cuá' nupa tuá' dö'.

¡Gulú'u yöl-la' ba Xanru', li', bö' naca caza'!
 ¡Yöl-la' ba Lë' Xanru'!

¡Buli'lidzë' Lë'!

¡Buli'siyón bönachi ca nácagaca le benë'!

² ¡Guli'gul-la queë'! ¡Guli'gul-la yöl-la' ba queë'!

¡Guli'güü' didza' ca nácagaca le zxön nunë'!

³ ¡Buli'sí' xibé Lë' lá'ayi!

Ral-la' ulu'dzeja ladxi' yúgu'të nupa ta'guilaj Xanru'.

⁴ Guli'guiljë' Xanru', enca' yöl-la' huáca queë'.

Guli'güü' ládxi'tica'sö idxinli' lahuë'.

⁵ Guli'tsöjné le nácagaca zxön benë' Lë',

lë na' tun ga rubániru', enca' ca nácagaca didza' bë'ë cate' buchi'a busöróë' bönachi,

⁶ libí'ili', xzí'ini xi'sóë' Abraham, huen dxin queë' Dios,

en libí'ili', xzí'ini xi'sóë' Jacob, nácali' nupa guró cazë' queë'.

⁷ Lë' náquië' Xanru' Dios.

Idútë yödzülió naca bë' ca buchi'a busöróë' bönachi.

⁸ Röjnétiqüi'sinë' didza' dzaga nunë',

didza' na' gunná bë'ë ila'zí' lu ná'agaquië' chi gayuá' cö' xzí'ini xi'sóë' Abraham,

⁹ didza' dzaga na' bénlenë' Abraham,

le naca didza' na' benë' tsutsu Dios ca gunë' queë' Isaac.

¹⁰ Ní'irö benë' tsutsu didza' na' lahuë' Jacob,

le naca tu le rinná bë'enë' lë' gunë',

para gaca quégaca bönachi Israel tu didza' dzaga le zoa tsaz.

¹¹ Gunnë': "Gonna' queéli' xiyúgaca bönachi Canaán,

le guequi tsaz queéli', en quégaca xzí'ini xi'sóali'."

¹² Caní gunné' Dios cate' ni' gula'cu'ë nabábagaquië' bönni' Israel.

Tu chópasë' guláquië', en guláquië' bönni' zítu' luyú.

¹³ Gula'dé' tu ia'tú yödzü izá'a.

Bulu'zé'ë tu ga nu gunná bë', en bila'dxínë' ga nacuá' bönachi izá'a,

¹⁴ pero biti' bë'ë lataj Dios nu usaca' zítu' bönachi queë' na',

en buzenë' le bach bönni' gula'nná bë'ë para gulácalenë' bönachi queë'.

¹⁵ Gunnë': "Biti' bi gunli' quégaca bönachi nabó caza' quia',

en biti' bi dö' guá'ali' quégaquië' bönni' tu'ë didza' uláz quia'."

¹⁶ Benë' ga guyú'u gubín yödzülió,

en benë' ga biyadzaj yöta ilahuë'.

¹⁷ Gusól-lë'ë tubi' bi'i bönni', bi'i bidxinbi' ni' zí'alö ca légaquië',

tu' gulúti'ë-bi' José para gácabi' bi'i nadó'o.

¹⁸ Gulúgui'ë bönni' Egipto ní'abi' len du guië,

en bulu'dé'ë yen ná'abi' bregui' guië,

¹⁹ ga bidxintë dza budxín xtídzë'ë Xanru',

tu' guzxi' bë'ë Xanru' Dios José na'.

²⁰ Ní'irö gusól-lë'ë bönni' gunná bë'ë luyú Egipto nu busán-bi'.

Bönni' na' gunná bë'enë' yödzü izá'a zían busölé'-bi'.

²¹ Benë' ga gúcabi' xan yu'u queë',

ate' guta' lu ná'abi' yúgu'të le dë queë' bönni' na' rinná bë'ë.

²² Guta' lu ná'abi' gulú'ubi' lidxi' guië bönni' ta'nná bë'ë tsca ré'ëni quézibi',

para busédibi' bönni' gula' queë' yöl-la' réajni'i.

²³ Ní'irö bila'dxín ca' bönachi Israel luyú Egipto.

Caní guca, guzóë' Jacob lu xiyúgaca xzí'ini xi'sóë' Ham.

²⁴ Benë' Dios ga gula'yántëro bönachi queë' luyú ni',

ate' guláquië' zióntëre' ca nupa gula'díl-lalen légaquië'.

- ²⁵ Benë' Dios ga gulunë' zi' bönni' Egipto bönachi queë'.
Lu yöl-la' banís quégaquië' gula'zì' yé'enë' nupa na' nácagaca huen dxin queë' Lë'.
- ²⁶ Ní'irö gusól-lë'ë Moisés, huen dxin queë', lógaquië',
enca' Aarón, bönni' na' nabó cazë' Lë'.
- ²⁷ Gulunë' chopë' ni zían yöl-la' huáca zxön queë' Dios lógaca bönachi Egipto na'.
Gulunë' zían yöl-la' huáca que yehua' yubá lu xiyúgaca xzí'ini xi'sóë' Ham.
- ²⁸ Gusól-lë'ë Dios le naca chul-la, ate' böáca chul-la lahui' dza,
en bití' guca ila'dá'baguë'ë xtídzë'ë.
- ²⁹ Benë' ga nisa yegu nacua' lu yegu quégaquië' böáca rön,
en benë' ga gulátiba' böla dzó'öba' yugu' yegu na'.
- ³⁰ Gula'yanba' riu lu xiyúgaquië',
ga bidxintë gula'yázaba' yu'u lidxë' bönni' rinná bé'enë' légaquië'.
- ³¹ Bë'ë didza' Dios, ate' gulátsjaba' bótsugayu guizxi yu,
en gulátsjaba' ca' bó'iyudo' idútë lu xiyúgaquië'.
- ³² Benë' ga guró'ö guió'j bögui' yöla sunna uláz que nisa guió'j,
ate' böxaj ca' guí' lu xiyúgaquië'.
- ³³ Guditsjë' yugu' lubá uva quégaquië', en yugu' yaga higo,
en busunítië' yaga ró'gaca lu xiyúgaquië'.
- ³⁴ Bë'ë didza', ate' bila'dxinba' bóchi'zu guizxi yu,
enca' bóchi'zu hué'ënido', cuntu nu gaca ulaba légacaba',
- ³⁵ ate' guláguba' idútë guixi' cuan rö'ö lu xiyúgaquië',
en guláguba' ca' idútë le naz nudá'agaquië' lu xiyúgaquië'.
- ³⁶ Benë' ga gulátibi' yúgu'tëbi' bi'i bönni' lo idútë lu xiyúgaquië'.
Bi'i lo na' quégaquië' bönni' nál-la.
- ³⁷ Ní'irö bubéajë' Dios yugu' bönni' Israel luyú na', nu'agaquië' dumí plata, en oro,
ate' cuntu nu yöjchegu' nu nutsa' légaquië'.
- ³⁸ Bulu'dzeja bönachi Egipto cate' bulu'zé'ë bönni' Israel lu xiyúgaquië',
ate' guladxi gula'dzöbi tu' nóziguequinë' bönni' Israel na'.
- ³⁹ Gusól-lë'ë Dios tu böaj le gulú'u bönachi queë' zxul-la,
ate' chi'i dzó'ölö gusól-lë'ë guí' le buzení' quégaquië'.
- ⁴⁰ Gula'nábinë' Lë', ate' gusól-lë'ë böra guíxi'do' zían le ilahuë',
en benë' ga bulu'huólaj gula'dzé'enë' yöta que yehua' yubá.
- ⁴¹ Bulu'ë lahui tu guió'jto'o, ate' gulalaj nisa yégudo'.
Gudödi nisa na' luyú bidxi ni' ca tu nisa yegu gubó'o.
- ⁴² Caní benë' Dios tu' yöjnenë' didza' lá'ayi queë',
le guzxi' lu në'ë gunë' queë' Abraham, huen dxin queë'.
- ⁴³ Bubéajë' bönachi queë' lu yöl-la' rudzeja quéguequi,
ate' lu yöl-la' rudzeja quéguequi gula'bódxí'a bönachi guró cazë' queë'.
- ⁴⁴ Bunödzejë' xiyúgaca bönachi yugu' yödzö izá'a quégaquië'.
Bulu'zi'ë xibé le ilá' luyú ni'a que dxin gulún bönachi izá'a na'.
- ⁴⁵ Caní benë' Dios para ilunë' ca rnna le gunná bé'enë' légaquië' ilunë',
en ilunë' ca rinná bé' xibá gudixjë' Lë'.

¡Guli'cu'ë yöl-la' ba Xanru'!

106

¹ ¡Guli'cu'ë yöl-la' ba Xanru'!

¡Guli'guíë' Xanru': "Xclenu'" tu' náquië' idú dxi'a!

¡Zóatica'sö yöl-la' dxi'i ladxi' queë'!

² ¿Nuzxi caz gaca quixjö' ca nácagaca le zxön nunë' Xanru',
en ulu'í lahui ca naca yöl-la' ba queë'?

³ ¡Bica' ba nupa tun le naca tsahui',
nupa na' túntica'sö le naca dxi'a!

⁴ Yöjné neda', Xan, cate' ruzá' ládxi'u quégaca bönachi quiu'.
Buzá' ladxi' quia' yöl-la' rusölá quiu',

⁵ para gaca ilé'eda' gata' yöl-la' tsahui' quégaca nupa naró' cazu' quiu',
en para gaca udzéalenda' bönachi quiu' cate' tu'dzeja,
en para gaca uzí'lana' xibé nupa néquiguequi quiu'.

⁶ Nuntu' dul-la' ca gulunë' xuz xtó'otu'.

Biá'atu' dö', en bentu' le naca xihui'.

⁷ Cate' gula'cu'ë xuz xtó'otu' luyú Egipto,

biti' gula'yéajni'inë' le nácagaca zxön benu'.

Biti' yöjnéguine' yugu' le benu' quégaquië' lu yöl-la' dxi'i ladxi' quiu',
pero gula'dá'baguë'ë xtídz'u cate' gula'cu'ë ra' nísado' lë Nísado' Xiná.

⁸ Busölé' Xanru' Dios légaquië' para gaca bë' runë' ca rnna xtídzë'ë,
en para ulu'e lahui yöl-la' huáca zxön queë'.

⁹ Caní guca, buzenë' le bach Nísado' Xiná na', ate' la' gubídxitë.

Guchë'ë légaquië' ga rë'do' lu nísado' na',
ate' gula'dé' lu yu bidxi ga na' guró'ö nisa.

¹⁰ Caní guca, busölé' légaquië' lu na' nu na' benë' légaquië' zi',
en buá'uë' légaquië' lu na' nu na' gudíl-lalen légaquië'.

¹¹ Ní'irö gubaga' nísado' na' nupa gula'sí regu' légaquië'.

Cuntu nu bugá'ana nu bidzaga léguequi.

¹² Ní'irö gula'yéajlë' bönachi queë' xtídzë'ë,
ate' gulul-la yöl-la' ba queë'.

¹³ Pero la' gulál-latë ládxi'gaquië' yugu' le benë'.

Biti' gula'nábinë' Lë' ulu'inë' légaquië' le ral-la' ilunë'.

¹⁴ Zián le gula'zé ládxië'ë cate' ni' gula'cu'ë la' guixi' ga dë lataj,
en gula'zi' bë'ë Dios la' guixi' na'.

¹⁵ Ní'irö bë'ë Dios quégaquië' le gula'nábinë' Lë',
pero gusól-lë'ë quégaquië' tu yödzöhuë' le bëti zióngaquië'.

¹⁶ Cate' bulu'zxé'enë' Moisés ga ni' gula'cu'ë tsözxón,
en bulu'zxé'enë' ca' Aarón, bönni' nubéajë' Xanru' quez queë',

¹⁷ la' ná'asö gualaj luyú, en bucachi' Datán.

Bucachi' ca' nupa gulún tsözxón Abiram.

¹⁸ Gulaj tu guí' zxön ga na' nudúbigaquië',
en buzegui' nupa na' guluá' dö'.

¹⁹ Lu guí'a Horeb gulunë' tu bédxido' néquiniba' oro,
en gula'yéaj ládxië'ë budó' oro na'.

²⁰ Caní guca bulu'cá'anë' Dios nayépisëtë'ë,
para gula'yéaj ládxië'ë budó' oro le naca ca tu bédxi ráguba' guixi'.

²¹ Gulal-la ládxië'ë Dios Nu busölá légaquië'.

Lë' benë' zián le zxön le gulácalen légaquië' luyú Egipto.

²² Benë' zián le tun ga rubániru' lu xiyúgaca xí'ini xi'sóë' Ham,
en zián le tun ga rádxi'ru' Lë' le benë' ra' Nísado' Xiná.

²³ Que lë ni na' gunné' Dios usunítie' légaquië', ate' la' cá'asö gunë'
la'tu' cabí guzuinë' Moisés, bönni' rö queë', lahuë' Lë',
en buzóa dxíë' yöl-la' rilé queë' para cabí usunítie' légaquië'.

- 24 Ní'irö bití' gulé'ënë' ila'yázië' luyú dxi'a na' dë lógaquië'
tu' cabí gula'yéajlë'ë xtídzë'ë Dios.
- 25 Gula'nné' zì'ë queë' Dios gapa naca lu yu'u guídi quégaquië',
en bití' bulu'zé náguië' chi'ë Xanru'.
- 26 Que lë ni na' benë' tsutsu Dios xtídzë'ë le bé'lenë' légaquië',
gunné' gunë' ga ilátië' ga na' naca la' guixi' ga dë lataj.
- 27 Gunné' gunë' ga ilasi lásië' xzí'ini xí'sóagaquië' ladaj zían yödzö izá'a,
en gúsië' légaquië' gapa nacuá' bönachi zì'tu'.
- 28 Ní'irö bulu'dödi cuíngaquië' lu na' budó' guië' lë Baal-peor,
en gulahuë' xipéla'gacaba' böa' guixi' gulútië'-ba'
para gulunë' zxön yugu' dios nati.
- 29 Ca' guca, gulún lenë' Dios ni'a que le gulunë',
ate' gulén tu yödzöhuë' zxön ládjagaquië'.
- 30 Ní'irö guzuínë' Finees, en benë' le raza ládxë'ë Dios,
ate' guzóa dxi yödzöhuë' zxön na'.
- 31 Buzóë' Dios queë' Finees na' náquië' tsahui' ni'a que
lë na' benë' le nuzóë' tsaz ca naca queë'.
- 32 Lësca' gulún lenë' Dios ga na' zoa nisa lë Meriba,
ate' Dios gulénë' Moisés tu' nözi lë na' gulunë'
- 33 tu' gula'dá'baguë'ë xtídxë'ë Bö' Lá'ayi queë',
ate' Moisés, lu yöl-la' ridzá'a queë', gunné' lizë'.
- 34 Bití' bulu'sunítië' bönachi tuá' dö' gula'cuá' lu yu ni,
ca na' gunná bé'enë' Xanru' légaquië' ilunë'.
- 35 Gulunë' léguequi tsözxón
en bila'zédë' ilunë' ca gulún bönachi na',
36 ate' gula'yéaj ládxë'ë budó' guiój budó' yaga quéguequi,
le guca quégaquië' ca tu du yalaj le guzxón légaquië'.
- 37 Gulútië'-bí' xzí'inigaquië' lógaca bö' xihui',
yugu' bí'i bönni', en nigúlado',
38 en bulu'laljë' xichóngaca nupa bití' bi nabága'gaca
tu' bulu'laljë' xichóngacabi' bí'i bönni' quégaquië', en bí'i nigula quégaquië',
yugu' bí'i na' gulútië'-bí' lógaca budó' guiój budó' yaga nacuá' luyú Canaán,
ate' gúcada' xihui' luyú ni tu' nözi rön na' bulu'laljë'.
- 39 Ca' guca, guláquië' xihui' ni'a que le gulunë'.
Guláquië' ca tu nigula udá dzaga tu' bulu'cá'anë' Dios quégaquië'.
- 40 Que lë ni na' guléde'enë' Xanru' Dios bönachi queë',
en bití' bilé'enë' dxi'a nupa na' néquiguequi queë'.
- 41 Ní'irö budödë' légaquië' lu ná'agaca bönachi zían yödzö izá'a,
ate' nupa bulu'dí'i légaquië' gula'nná be'e légaquië'.
- 42 Nupa na' bití' bila'lé'e légaquië' dxi'a gulunda' légaquië' dxin,
en bulu'zxicaj légaquië' lu yöl-la' unná bë' quéguequi.
- 43 Zían luzuí gú'unë' Dios usölé' légaquië',
pero gula'dá'baguë'ë le ré'ënë' ilunë',
ate' guzxóntë'ro xiguia' nabága'gaquië'.
- 44 Bilé'enë' Dios yöl-la' bayechi' quégaquië'
en biyönnë' ta'bödxí yeché'ë.
- 45 Yöjnenë' didza' dzaga núnlenë' légaquië',
ate' bubequi lahuë' quégaquië' tu' nazxóntë'ro yöl-la' dxi'i ladxi' queë'.
- 46 Benë' Dios ga bulu'huéchi' ladxi' légaquië'

nupa na' gula'ché' légaquië' nadzúngaquië'.

⁴⁷ ¡Busölá netu', Xantu' Dios!

Guléaj netu' ladjagaca yödzo izá'a

para guíetu' Li': "Xclenu" ni'a que Lo' lá'ayi,

en lu yöl-la' rudzeja zxön queéetu' cú'utu' Li' yöl-la' ba.

⁴⁸ ¡Yöl-la' ba Lë' Xanru', Dios quégaca bönachi Israel

na'a dza, en yúgu'të dza si' zaca!

Ral-la' ila'nná yúgu'të bönachi: "¡Ca' gaca!

¡Guli'cu'ë yöl-la' ba Xanru' Dios!"

107

¹ ¡Guli'guíë' Xanru': "Xclenu" tu' náquië' dxi'a,
en tu' zóatica'sö yöl-la' dxi'i ladxi' queë'!

² Ral-la' ila'nná caní nupa na' buá'uë' Xanru',
nupa na' buá'uë' lu ná'agaca nupa gulún léguequi zi',

³ en nubéajë' léguequi zían lu yödzo izá'a,

saca' ga rilén gubidza, en saca' ga ribía,

saca' ga za' bö' ziaga, en saca' ga ridödi gubidza beo' ziaga.

⁴ Bal-lë' gula'dé' nanítigaquië' la' guixi' ga dë lataj,
en ga ni' bití' zoa nöza.

Bití' guca ulu'dzólinë' tu yödzo ga gaca tsöjcu'ë.

⁵ Gula'dunë', en gula'bidxë' nisa,

en gudú ladxí'gaquië'.

⁶ Ní'irö lu lë na' raca quégaquië' bulu'lidzë' Xanru',
ate' busölë' légaquië' lu zían le gula'gu'i gula'záquë'ë.

⁷ Guché'ë légaquië' tu la' nöza tsahui',
en guché'ë légaquië' tu lu yödzo ga tsöjcu'ë.

⁸ Ral-la' ilé' Xanru': "Xclenu" tu' nadxí'inë' légaquië',
en tu' benë' yugu' le zxön, gúcalenë' légaquië'.

⁹ Rugui'jë' nupa ta'bidxi ladxi',
en rugahuë' nupa ta'dún le ná'agaca dxi'a queë'.

¹⁰ Bal-lë' gula'cu'ë ga chul-la, en ga zoa bönadxi ilátië'.
Gula'dzunë' yugu' lu du guíë, en gula'gu'i gula'záquë'ë

¹¹ tu' gula'dá'baguë'ë xtídzë'ë Xanru' Dios,
en bulu'zöë' tsölá'alö le rigu'ë icja ladxí'do'gaquië'.

¹² Tu' gulunë' bayúdx dxin, gudú ladxí'gaquië'.

Gula'dzö'ë lu yu znan yua' nuá'agaquië',

ate' cuntu nu zoa gácalen légaquië'.

¹³ Ní'irö lu lë na' raca quégaquië' bulu'lidzë' Xanru',
ate' busölë' légaquië' lu zían le gula'gu'i gula'záquë'ë.

¹⁴ Bubéajë' légaquië' ga na' gula'cu'ë ga chul-la,
en ga guzóa bönadxi ilátië',
ate' guditsjë' yugu' du guíë núga'gaquië'.

15 Ral-la' ilé' Xanru': "Xclenu" tu' nadxí'iné' légaquié',
en tu' bené' yugu' le zxön, gúcalené' légaquié'.

16 Ruquínnejé' le tá'baga' gapa nu riyaza lidxi guié le néquiniguequi guié bronce,
en ruzxuzxjé' yugu' vara néquiniguequi guié.

17 Bal-lé' gula'guí'i gula'záquë'ë tu' gula'dá'baguë'ë Dios,
en tu' nözi dö' gulu'ë.

18 Gula'gúti'né' bíti'tës la' huagu,
en gula'zóa ilátié'.

19 Ní'irö lu lë na' raca quégaquié' bulu'lidzë' Xanru',
ate' busölé' légaquié' lu zían le gula'guí'i gula'záquë'ë.

20 Gusól-lë'ë quégaquié' xtídzë'ë, en buné' légaquié',
en busölé' légaquié' lu yöl-la' guti.

21 Ral-la' ilé' Xanru': "Xclenu" tu' nadxí'iné' légaquié',
en tu' bené' yugu' le zxön, gúcalené' légaquié'.

22 Ral-la' ilé' Dios: "Xclenu", en bi ulu'nödzjé' queé',
en lu yöl-la' rudzeja quégaquié' ilul-lë' ca nácagaca le nuné'.

23 Bal-lé' gula'dödë' lahui nísado' yugu' lu barco zxön,
en guluné' dxin yugu' lu nísado'.

24 Bila'lé'ené' yugu' le nuné' Xanru',
en yugu' le zxön nucu'ë lu nísado'.

25 Bé'ësë' didza', ate' guyecja bö' budunu',
ate' guyasa gudxía nísado'.

26 Gula'yasa barco ca tu lu guí'ado' nisa,
en la' bótjatë ga rö'ö röga' lu nisa na'.
Tu' guzóalë'e bönadxi ilátié' gudú ládxi'gaquié'.

27 Gula'zxízié', en yöjchégu'gaquié' ca bönni' ta'zúdxiné',
ate' nítisö guca yöl-la' rácada' quégaquié'.

28 Ní'irö lu lë na' raca quégaquié' bulu'lidzë' Xanru',
ate' busölé' légaquié' lu zían le gula'guí'i gula'záquë'ë.

29 Bené' Dios ga guzóa dxisö bö' budunu' na' recja,
ate' guzóa dxi le rasa ridxía lu nísado'.

30 Bulu'dzéjané' tu' guzóa dxi lu nísado',
en tu' guché'ë Dios légaquié' dxi'a tsáhui'do' ga na' sójáquié'.

31 Ral-la' ilé' Xanru': "Xclenu" tu' nadxí'iné' légaquié',
en tu' bené' yugu' le zxön, gúcalené' légaquié'.

32 Ral-la' ulu'lu'ë lahui yöl-la' zxön queé' ga nudúbigaca bönachi queé',
en ila'gu'ë Lë' yöl-la' ba ga nudúbigaquié' bönni' gula tu'chi'a tu'söróë'.

33 Runé' Xanru' Dios ga tu'huí'i dërö yugu' yegu,
enca' yugu' beaj nisa.

34 Ga naca yu ya'a runé' ga ruhuóaca yu bidxi,
ni'a que le xihui' nabága'gaca nupa nacua' ni'.

35 Ga naca yu bidxi runé' ga ruhuóaca yu nabisa,

ate' ralaj nisa ga biti' bi nisa guzóa.

³⁶ Ni' ru'ë lataj ila'cuá' nupa ta'dún
para iluné' ni' yödzö ga ila'cu'ë.

³⁷ Tazé' yugu' le tazé', en tu'dé'ë yugu' lubá uva,
yugu' le ta'bía yödxí yana'.

³⁸ Runé' Xanru' ga raca dxi'a quégaquié',
en ga ta'cuá'bi' zíanbi' bi'i quégaquié',
en runé' ga ta'yanba' böa' bédxi quégaquié'.

³⁹ Cate' yugu' bönni' unná bé' zi'tu' tu'zxicjé' bönachi queé',
en tu'zötjé' léguequi,

en tu'saca' zi'ë léguequi, en tu'ë dö' quéguequi,

⁴⁰ rucá'ané' Dios bönni' na' dë lu ná'agaquié' cá'asö,
en runé' ga ta'dé' la' guixi' ga dë lataj, en tu luyú bidxi.

⁴¹ Rusölé' yugu' bönni' yechi' lu le ta'gu'i ta'záquë'ë,
en runé' ga ta'yanbi' zxi'inigaquié' ca ta'yanba' bö'cu' zxi'la'do'.

⁴² Ta'lé'e lë ni nupa nácagaca tsahui', en tu'dzeja,
pero biti' bi ta'nná nupa tuá' dö'.

⁴³ Nupa ta'yéajni'i ral-la' sa' ládxi'gaca ca nácagaca lë ni,
ate' iléquibe'e náquié' Xanru' Dios dxi'i ladxi'.

108

¹ ¡Chinabá'a quia', Dios!

¡Gul-la' quiu'! ¡Ön, idú ládxa'a gul-la' yöl-la' ba quiu'!

² ¡Guli'bán, lib'i'ili' riguínali' bihuél-la!

¡Gúl-laru' cate' ni' ritó yu!

³ ¡Guía' Li': "Xclenu" Xan, ládjagaca bönachi yugu' yödzö izá'a!

¡Gul-la' yöl-la' ba quiu' lógaca yúgu'të bönachi!

⁴ ¡Zxóntërö naca yöl-la' dxi'i ladxi' quiu', le ridxintë lúzxiba xitsá'!

⁵ Buluí'i lahui lúzxiba yöl-la' zxön quiu', Dios,

ate' lahui yödzölió ni buluí'i lahui yöl-la' ben' quiu',

⁶ para usöló' netu', bönachi quiu', nupa nadxí'inu'.

Len yöl-la' huáca zxön quiu' busólá netu', en bubí'i didza'.

⁷ Lu lataj lá'ayi queé' bé'ë didza' Dios, gunné':

"Uzi'a xibé, en quisia' xiyúgaca bönachi Siquem,

en urixa' luyú dë cuiti yegu Sucot.

⁸ Nequi quia' xiyúgaca bönachi Galaad,

enca' xiyúgaca zxi'ini xi'sóë' Manasés.

Naca ca tu le rusubín icja' xiyúgaca zxi'ini xi'sóë' Efraín.

Naca ga rinná bé'a xiyúgaca zxi'ini xi'sóë' Judá.

⁹ Naca ca tu ga riguibi na'a xiyúgaca bönachi Moab,

ate' lu xiyúgaca bönachi Edom chú'una' löla'.

Códxí'a tu' uxicja' bönachi Filistea."

¹⁰ ¡Nuzxi caz gaca iché' neda' lu yödzö

dë zö'ö idú gásibi'ilö le run chi'i yödzö na'?

¡Nuzxi caz gaca iché' neda' lu xiyúgaca bönachi Edom?

¹¹ ¡Naru' cabí nusán ládxi'u netu', Dios?

¡Naru' cabí tséajlenu' bönni' queétu' röjáquié' gudil-la?

¹² Gúcalen netu' cate' tíl-lalentu' nupa dutíl-lalen netu',
tu' naca dádusö gácalen netu' nu naca bönáchisö.

¹³ Len yöl-la' huáca queë' Dios idéli'ru'
tu' uxicja cazë' Lë' nupa ta'díl-lalen rë'u.

109

¹ Rigu'a Li' yöl-la' ba, Xana' Dios.

Biti' su' dxisö,

² tu' ta'nná quia' nupa tuá' dö', en ta'zí' yë'.

Lu yöl-la' rizí' yë' quéguequi tu'í' didza' le tu'zegui' neda'.

³ Nagú'ugaca neda' lé'ajlö,

en lu yöl-la' biti' rilé'e neda' dxi'a tu'ítica'sö didza'.

⁴ Sal-la' nadxí'ida' léguequi, tu'zegui' neda' didza',

pero neda' rulidza' Li'.

⁵ Bena' quéguequi le naca dxi'a, pero bulu'bí' quia' le naca dö'.

Nadxí'ida' léguequi, pero biti' ta'lé'e neda' dxi'a.

⁶ Buzóa tu bönni' huía' dö'

para uchi'a usöröë' que nu na' biti' rilé'e neda' dxi'a.

Ben ga soa gagu nu uzegui' nu na' didza'.

⁷ Cate' nu uchi'a usöró bönni' na', biti' gu'u lataj urúajë' dxi'a.

Buyú le rinábinë' Li' tsca naca dul-la' nabáguë'ë.

⁸ Ben ga ilaca nabábasö dza soë' ibanë'.

Ben ga tsu'u nu yúbölö uláz queë'.

⁹ Ben ga ilácabi' zxf'inë' bi' uzëbi,

en ga gácanu nigula queë' nigula uzëbi.

¹⁰ Ben ga ila'dásöbi' zxf'inë' ila'nábibi' nu bi unödzej quégacabi'.

Ben ga ila'gul'jabí' le ilágubi' zi'tu' ga zoa lídxigacabi' le nadachi.

¹¹ Ben ga ugúa nu bi benna lë' tu chí'isö idútë le dë queë',

en ben ga ila'banë' bönni' zi'tu' le rulá' dxin runë'.

¹² Ben ga biti' soa nu huéchi' ladxi' lë',

en biti' soa nu uzá' ladxi' quégacabi' zxf'inë' nácagacabi' bi' uzëbi.

¹³ Ben ga udxi quégaca zxf'ini xi'sóë',

en ga idxín dza bíti'rö soa nu si' la ca guzxf'i lë'.

¹⁴ Yöjné'tica'sö le xihui' gula'báguë'ë xuz xtá'ahuë', Xan,

en biti' gal-la' ládxi'u dul-la' bennu xinë'ë.

¹⁵ Ben ga ila'cuá'tica'sö dul-la' na' lo' Li', Xan,

para cabirö nu soa yödzölió nu tsöjné lë'.

¹⁶ Biti' buéchi' ládxi'ë luzé'ë,

pero gudxía nahuë' nupa gula'guí' gula'zaca',

en nupa gula'yadzaj gula'yudxi,

enca' nupa gula'sëbi ladxi', ate' bëtië' léguequi.

¹⁷ Bidxí'inë' le rudxía luzé'ë dö'.

Ben ga ulu'bí' ca' queë'.

Biti' raza ládxi'ë gaca dxi'a que luzé'ë.

Ben ga biti' gaca dxi'a queë'.

¹⁸ Gulaca ca zxë' nácuë' didza' xihui' bë'ë,

ate' gula'yaza le nayá' nabanë' ca nisa,

en gula'yú' ca' dxita queë' ca le za.

¹⁹ Ben ga ilaca queë' ca tu lari' rixóa cúdzë'ë,

en ca xipanë' rúgui'ë lë'ë.

²⁰ Bubí' caní quégaca nupa tu'zegui' neda' didza', Xan,

enca' quégaca nupa tu'í didza' zi' que bö' naca caza'.

²¹ Li', Xana' Dios, ben quia' le naca dxi'a
para gaca bë' runu' ca rnna xtídz'u.
Tu' naca dxi'a yöl-la' dxi'i ladxi' quiu', busölä neda'.

²² Riguí' rizáca'a, en riyadzaj riyúdxida',
en raca zi' ládxi'da'ahua'.

²³ Ridödi quia' ca raca que tu zxul-la cate' ribía gubidza.

Naca' ca tuba' bóchi'zu, riché' bö' recja läba'.

²⁴ Ta'cuidi' zxiba' tu' runa' gubasa.

Nadxita', en bití'rö rö'ö za lu bëla' rön quia'.

²⁵ Nupa biti' ta'lé'e neda' dxi'a tu'titaj neda'.

Cate' ta'lé'e neda', tu'tá ícjaguequi.

²⁶ Gúcalen neda', Xana' Dios.

Lu yöl-la' dxi'i ladxi' quiu' busölä neda'.

²⁷ Ben ga iléquibe'e rácalen cazu' neda'.

Nun cazu' Li' lë ni, Xan.

²⁸ Tu'dxía neda' dö', pero Li', ben ga gaca dxi'a quia'.

Cate' ila'yasë', ulu'tuí'inë',

pero udzëjada' neda', huen dxin quiu'.

²⁹ Ben ga ulu'gá'ana cá'sö nupa tu'zegui' neda' didza',
en ben ga gaca yöl-la' rutuí' quéguequi ca tu lari' nabaga' léguequi.

³⁰ Len ruá' cuina', zían luzuí' guía'-në' Xanru': "Xclenu",
en ladaj bönachi zían cu'a Lë' yöl-la' ba,

³¹ tu' zuñë' cuita lë'e ibëla nu riyadzaj riyudxi

para usölë' nu na' lu ná'agaca nupa tu'siúdxí bö' naca caz nu na'.

110

¹ Xanru' Dios gudxë' Xana': "Gurö'i cuita lë'a ibëla
cate' gunra' ga ulu'zachu zxíbigaca lo'
nupa biti' ta'lé'e Li' dxi'a."

² Ga zoë' yödzö Sión gusöl-lë'ë Xanru' yöl-la' unná bë' quiu',
gunné': "Gunná be'e nupa biti' ta'lé'e Li' dxi'a."

³ Ulu'dödi cúnguequi lu no'o bönachi quiu'

cate' si'u yöl-la' unná bë' quiu'

tu' napu' yöl-la' lachi que le naca lá'ayi."

Ila'cuá' bi'i bönni' ga zu' ca ribó'ö buzén zílado'.

⁴ Runë' tsutsu xtídzë'ë Xanru', en biti' utsé'ë le, rnnë':
"Tsaz nacu' bixúz ca na' gúquië' Melquisedec bixúz."

⁵ Zoa cazë' Xanru' cuita lë'u ibëla.

Ucul-lë' bönni' ta'nná bë'ë cate' idxín dza usiúdxë' luyú.

⁶ Uchi'a usöröë' quégaca bönachi yúgu'të yödzö izá'a,
ate' ilí yödzölió len bëla' rön quéguequi.

Uzötjë' nupa ta'nná bë' zían lu yödzö izá'a.

⁷ Guí'jë' nisa beaj ra' nöza,

en ni'a que lë ni huöaca ládxe'ë.

111

¹ ¡Guli'cu'ë yöl-la' ba Xanru'!

Idú ládxa'a rea'-në' Xanru': "Xclenu'."

Runa' caní tsaxón len bönni' tsahui' zían ga na' nudúbigaca bönachi queë'.

² Zxön ná'agaca le nunë' Xanru'.

Yúgu'të nupa ta'yaza ládxi'gaca lë na' benë' tu'sëda ca nácagaca.

³ Idútë dxi'a nácagaca, en nayépisëtërogaca le nunë' Lë',
ate' idiá'tica'sö le naca tsahui' queë'.

⁴ Chinunë' ga tsöjneru' yugu' le benë', le tun ga rubániru'.
Náquië' Xanru' dxi'i ládxi', en ruí'i ládxi'ë rë'u.

⁵ Rugahuë' nupa tadxi Lë'.

Röjnética'së' didza' dzaga núnlenë' bönachi queë'.

⁶ Buzéajni'inë' bönachi queë' ca naca yöl-la' huáca quégaca le nunë',
le benë' ga gula'déli'në' xiyúgaca bönachi izá'a.

⁷ Tsahui', en idútë li nácagaca le núngaca lu në'ë.

Nácagaca tsutsu yúgu'të xibá gunná bë'ë.

⁸ Rucúa'tica'së' tsutsu xibá queë',

en rusudxinë' léguequi lu le naca idútë li, en le naca tsahui'.

⁹ Gusól-lë'ë Nu buá'uö bönachi queë'.

Tsaz nuzóë' didza' dzaga nunë'.

Lá'ayi, en ba'a ládxi' naca Lë'.

¹⁰ Lu yöl-la' radxi queéru' Lë' risí loru' ridéli'ru' yöl-la' réajni'i.

Yúgu'të nupa tun ca ta'nná bë' xibá queë' nápagaca yöl-la' réajni'i.

Ila'cuá'tica'sö nupa ila'gú'u Lë' yöl-la' ba.

112

¹ ¡Guli'cu'ë yöl-la' ba Xanru'!

¡Bica' ba bönni' na' rádxinë' Xanru',

bönni' na' raza ládxi'ë runë' ca gunná bë'ë Dios!

² Tsépiségaca zxí'ini xi'sóë' bönni' na' yödzölió ni.

Gáquië' bica' ba bönni' na' runë' le naca dxi'a.

³ Lu yu'u lidxi' gata' yöl-la' tsahui',
ate' idiá'tica'sö le naca tsahui' runë'.

⁴ Gulén beni' ga ridé' bönni' tsahui' ga na' naca chul-la.

Ruzá' ládxi'ë que luzé'ë, en ruí'i ládxi'ë lë', en runë' le naca dxi'a.

⁵ Gaca dxi'a queë' bönni' ruzá' ládxi'ë que luzé'ë,

en runné' que tu chí'isö le riyadzaj que.

Urúajë' dxi'a cate' nu uchi'a usöró queë'.

⁶ Catu caz gaca nu utsá' bönni' na',

ate' sóatica'sö nu tsöjné lë'.

⁷ Biti' gádxinë' cate' nu usiyöni lë' le cabí' raca dxi'a.

Ridipa ládxi'ë tu' ruzxöni ládxi'ë Xanru' Dios.

⁸ Dios rutipë' ládxi'ë, ate' bití' gádxinë'

cate' idxinrö dza ilé'enë' nuhuótjagaca nupa ta'díl-lalen lë'.

⁹ Idú ládxi'ë runödzjë' quégaca bönachi yechi'.

Idiá'tica'sö le naca dxi'a runë'.

Dios uchisë' lë' ga tsépisë'.

¹⁰ Ila'lé'e lë ni nupa tuá' dö', en ila'bó' baguí'isö.

Ilagu zxe láyi'gaca, en ila'niti cuínguequi.

Tsaz initi le ta'zé ládxi'gaca nupa tuá' dö'.

113

¹ ¡Guli'cu'ë yöl-la' ba Xanru'!

¡Guli'cu'ë yöl-la' ba, libí'ili' huen dxin queë' Xanru'!

¡Guli'cú'u yöl-la' ba Lë' Xanru'!

2 ¡Cú'uru' yöl-la' ba Lë' Xanru',
cate' risí lo na'a, en yugu' iz si' zaca!
3 ¡Ga naguela' ga rilén gubidza ga ridxintë ga ribía,
cú'uru' yöl-la' ba Lë' Xanru'!
4 ¡Nayépisëtëre' Xanru' Dios ca yúgu'të yödzö izá'a!
¡Nazxóntëro yöl-la' zxön queë' ca naca lúzxiba!

5 ¿Nuzxi caz zoa naca ca náquië' Xanru' Dios?
Rö'ë rinná bë'ë ga na' nayépisëtëre'.
6 Ruzötaj cuinë' para uyúë'
le dë lúzxiba, en le dë luyú ni.
7 Ruchisë' nupa nácagaca yechi', rubéajë' léguequi lu bëchtö yu.
Ruchisë' nupa ta'yadzaj, rubéajë' léguequi lu dö bëbu.
8 Runë' ga ta'bö'len nupa ta'nná bë'.
Ta'bö'len nupa ta'nná be'e bönachi queë'.
9 Runë' ga zóanu nigula huödx yu'u lídxinu.
Rudzeja ládxi'nu tu' runë' ga nacuá'abi' zxí'ininu.

¡Guli'cu'ë yöl-la' ba Xanru'!

114

1 Cate' bila'rúaj bönachi Israel luyú Egipto
bila'rúajë' zxí'ini xi'sóë' Judá ladaj nupa tu'í didza' izá'a.
2 Zxí'ini xi'sóë' Judá guláquië' ca lidxë' Xanru' Dios,
ate' gulaca bönachi Israel nupa rinná bé'enë' Dios.
3 Lahuë' Dios bubiga' nísado',
ate' bubí'i nisa yegu Jordán.
4 Gula'xiti' guí'a zxön ca yugu' bö'cu' zxila' biguiú',
ate' gula'xiti' ca' guí'ado' ca yugu' bö'cu' zxí'la'do'.
5 ¿Bi raca quiu', nísado', tu' rubigu'?
¿Bi raca quiu', yegu Jordán, tu' rubí'i nisa quiu'?
6 ¿Bi raca queé'li', guí'a zxön, tu' rixíti'li' ca yugu' bö'cu' zxila' biguiú'?
¿Bi raca queé'li', guí'ado', tu' rixíti'li' ca yugu' bö'cu' zxí'la'do'?
7 Guzxizi lahuë' Xanru', yödzölió.
Guxxizi lahuë' Dios queë' Jacob.
8 Benë' Dios ga gulaj nisa tu' lë'e guiójt'o,
en benë' ga böáca le guca guiójt' jara tu' ga rilén nisa.

115

1 Calëga queé'tu', Xan, calëga queé'tu',
pero que lo' gaca yöl-la' ba
tu' nacu' dxi'i ladxi', en le naca idútë li.
2 ¿Bizx que ta'nná bönachi yugu' yödzö izá'a:
"Gazxi caz zoë' Dios quégaquië'?"
3 Zoë' Dios queé'ru' yehua' yubá.
Runë' le raza ládxi'ë gunë'.
4 Néquiguequini plata, en oro budó' quégaca bönachi izá'a na',
yugu' le núngaca lu ní'a lu na' bönachi.
5 Nacuá' ruí'iguequi, pero bití' gaca iluí'i didza'.

Nacuá' guió'j lógaca, pero biti' gaca ila'lé'e.

⁶ Nacuá' ná'agaca, pero biti' gaca ila'yöni.

Nacuá' zxíniguequi, pero biti' gaca ila'lé'e.

⁷ Nacuá' ná'agaca, pero biti' bi gaca ila'gán.

Nacuá' ní'agaca, pero biti' gaca ila'zá'.

Biti' gaca ilún bö lubá'agaca.

⁸ Nupa tun budó' guió'j budó' yaga ilaca ca ná'agaca budó' na',
núti'tës nu ruzxöni ladxi' budó' guió'j budó' yaga.

⁹ Libí'ili', bönachi Israel, buli'zxöni lád'xë'ë Xanru' Dios.

Rácalen cazë' libí'ili', en rapa chi'ë libí'ili'.

¹⁰ Libí'ili', zxí'ini xi'sóë' Aarón, buli'zxöni lád'xë'ë Xanru' Dios.

Rácalen cazë' libí'ili', en rapa chi'ë libí'ili'.

¹¹ Libí'ili' na' rád'xili'-në' Dios, buli'zxöni lád'xë'ë Xanru' Dios.

Rácalen cazë' libí'ili', en rapa chi'ë libí'ili'.

¹² Xanru' Dios ru'í lád'xë'ë rë'u, en gunë' ga gaca dxi'a queéru'.

Gunë' ga gaca dxi'a quegaca bönachi Israel.

Gunë' ga gaca dxi'a quegaca zxí'ini xi'sóë' Aarón.

¹³ Gunë' ga gaca dxi'a quegaca nupa tadxi Lë',

nupa na' ná'agaca cá'asö, en nupa na' nayé'pisëgaca.

¹⁴ Gunë' Xanru' Dios ga tsan le nequi queé'li',

lë na' nequi queé'li', en le nequi quegaca zxí'inili'.

¹⁵ Raca lád'xa'a gunë' Xanru' ga gaca dxi'a queé'li'.

Náquië' Nu ben lú'xiba, en luyú ni.

¹⁶ Nequi queë' Xanru' Dios lú'xiba xitsá',

pero nudödë' lu ná'agaca bönachi luyú ni.

¹⁷ Nupa chinátigaca biti' gaca ila'gú'u Xanru' yöl-la' ba,

en calëga nupa nacuá' dxisö lataj chul-la que yöl-la' guti.

¹⁸ ¡Cú'uru' yöl-la' ba Xanru' Dios

na'a dza, en yúgu'të dza si' zaca!

¡Guli'cu'ë Xanru' yöl-la' ba!

116

¹ Nadxí'ida'-në' Xanru' Dios, tu' riyönnë'

le rulidza' Lë', en le rinábida'-në'.

² Ruzé' naguë' chi'a.

Que lë ni na' ulidza' Lë' tsanni ni zoa' nabana'.

³ Guzóa bönadxi quia' gátia',

en guyu'a tsöbi que lataj chul-la que yöl-la' guti,

ate' gusëbi lád'xa'a, en buí'inide'eda' lád'xa'a.

⁴ Ní'irö bulidza'-në' Xanru' Dios, gunnía':

“Ráta'yua' lo', Xan, usöló' neda'.”

⁵ Xanru' Dios ruzá' lád'xë'ë queéru', en náquië' tsahui'.

Dios queéru' ru'í lád'xë'ë rë'u.

⁶ Rapa chi'ë Xanru' nupa ná'agaca do' ladxi'.

Bulu'xicja bönachi neda', ate' busölé' neda'.

⁷ Buzí' ladxi' bö' naca caza',

tu' runë' Xanru' Dios ga raca dxi'a quia'.

⁸ Busöló' bö' naca caza', Xan, lu yöl-la' guti.
Benu' ga bu'i nisa ribödxí guió'j lahua',
en ga bíti'rö cuílagaca ni'a.

⁹ Ta'a lahuë' Xanru' Dios
ga naca' nupa nabángaca.

¹⁰ Guyéajlé'a Lë' cate' gunnía':

“Zoa le rusaca' neda' zi'.”

¹¹ Lu yöl-la' rö' böniga quia' gunnía':

“Ta'z'í' yë' yúgu'të bönachi.”

¹² ¡Bizxi caz gu'a-në' Xanru' Dios

ni'a que yugu' le runë' le ruzi'a xibé?

¹³ Si' lu na'a yöl-la' rusólá queë' Xanru',

en ulidza'-në' Xanru' Dios.

¹⁴ Unödza' queë' Xanru' le guzxí' lu na'a unödza'.

Raca ládxa'a gaca guna' caní lógaca yúgu'të bönachi queë'.

¹⁵ Rúndë'ë Xanru' bal

yöl-la' guti quégaca nupa néquiguequi quez queë'.

¹⁶ Le nácatë naca' huen dxin quiu', Xan.

Naca' huen dxin quiu', enca' zxi'ininu nigula huen dxin quiu'.

Busedxu' le biröli neda'.

¹⁷ Cu'a lo' le unödza' quiu', en guía' Li': “Xclenu”,

en ulidza' Li', Xan.

¹⁸ Unödza' queë' Xanru' le guzxí' lu na'a unödza'.

Raca ládxa'a gaca guna' caní lógaca yúgu'të bönachi queë'.

¹⁹ Ga zoa lö'a que yu'u lidxë' Xanru',

lu yödzö Jerusalén guna' caní.

¡Guli'cu'ë yöl-la' ba Xanru' Dios!

117

¹ ¡Guli'cu'ë yöl-la' ba Xanru' Dios, lib'í'li', bönachi yúgu'të yödzö izá'a!

¡Guli'cu'ë yöl-la' ba yúgu'tëli',

² tu' buxönë' queéru' yöl-la' dxi'i ladxi' queë',

en zóatica'sö le naca idú ladxi' queë'!

¡Yöl-la' ba Lë'!

118

¹ ¡Guli'guíë' Xanru': “Xclenu”, tu' náquië' dxi'a!

¡Zóatica'sö yöl-la' dxi'i ladxi' queë'!

² Ral-la' ila'nná bönachi Israel:

“¡Zóatica'sö yöl-la' dxi'i ladxi' queë'!”

³ Ral-la' ila'nná zxi'ini xi'sóë' Aarón:

“¡Zóatica'sö yöl-la' dxi'i ladxi' queë'!”

⁴ Ral-la' ila'nná nupa tadxi Xanru' Dios:

“¡Zóatica'sö yöl-la' dxi'i ladxi' queë'!”

⁵ Cate' gudí'i guzjáca'a bulidza'-në' Xanru',
ate' bubí'ë didza', en busölé' neda'.

⁶ Zoë' Xanru' cuita' neda', ate' bití' bi gádxida'.
¿Bizxi caz gaca ilún bönachi quia'?

⁷ Zoë' Xanru' cuita' neda' ladaj nupa tácalen neda'.
Que lë ni na' idéli'da' láhuigaca nupa bití' ta'lé'e neda' dxi'a.

⁸ Nácarö dxi'a uzxöni ládxa'a-në' Xanru',
en bití' uzxöni ládxa'a nu naca bönáchisö.

⁹ Nácarö dxi'a uzxöni ládxa'a-në' Xanru',
en bití' uzxöni ládxa'a nupa ta'nná bë'.

¹⁰ Bönachi yúgu'të yödzo izá'a gula'gú'u neda' lé'ajlö.
Len yöl-la' huáca queë' Xanru' buxicja' léguequi.

¹¹ Gula'gu'ë neda' lé'ajlö. Ön, gula'gu'ë neda' lé'ajlö,
pero len yöl-la' huáca queë' Xanru' buxicja' léguequi.

¹² Gula'gu'ë neda' lé'ajlö ca yugu' buzú' rön,
pero gula'nítië' ca tu lu guí' guixi' yötsi' bidx.
Len yöl-la' huáca queë' Xanru' buxicja' léguequi.

¹³ Bulu'dxíguë'ë neda' ga bidxintë guzóa tsöjtsö'a,
pero gúcalenë' Xanru' neda'.

¹⁴ Naca cazë' Xanru' yöl-la' huáca quia', en le rul-la'.
Naca cazë' yöl-la' rusölá quia'.

¹⁵ Lu yu'u lídxigaca nupa nácgaca tsahui'
ru'u bö que nupa ta'bödxí'a lu yöl-la' rudzeja quéguequi tu' nulágaca.

¿Runda' dxin në'ë ibëla Xanru'!

¹⁶ ¿Nayépisëtë'rö në'ë ibëla Xanru'!

¿Runda' dxin në'ë ibëla Xanru'!

¹⁷ Bití' ca' gátia', pero soa' ibana',
ate' usiyönda' bönachi le nunë' Xanru'.

¹⁸ Xanru' bëndë'ë neda' xigua',
pero bití' budödë' neda' lu yöl-la' guti.

¹⁹ Guli'salaj quia' ga ta'yazë' bönni' tsahui'.
Tsu'a ni', en guía'-në' Xanru': "Xclenu'."

²⁰ Naca lataj ni ga riyaza cazë' Xanru' Dios.
Ila'yazë' ni bönni' tsahui'.

²¹ ¿Guía' Lí: "Xclenu'" Xan, tu' bubí'u didza' quia',
en tu' nacu' Nu rusölá neda'!

²² Zoa tu guió'j bulu'zóë' tsölá'alö bönni' tu'cu'ë zö'ö.
Na'a naca guió'j na' guió'j len squin zö'ö.

²³ Benë' Xanru' Dios ga naca caní.
Naca tu le run ga rubániru'.

²⁴ Dza ni naca dza nunë' Xanru' Dios.
Udzéjaru', en uzí'iru' xibé.

²⁵ Ráta'yutu' lo', Xan, usöló' netu'.

Ráta'yutu' lo', Xan, gunu' ga gaca dxi'a queé'tu'.

²⁶ Bica' ba bönni' na' zë'ë uláz queë' Xanru'.
Guntu' Li' zxön lu yu'u lidxë' Xanru'.

²⁷ Dios náquië' Xanru', ate' bennë' queé'ru' bení'.
Buli'nödzej queë' Dios yugu' bëdxi renni' uzégui'ru'-ba' lahuë' lu bucugu queë'.

²⁸ Naca cazu' Li' Dios quia', ate' guía' Li': "Xclenu'."
Naca cazu' Li' Dios quia', ate' guna' Li' zxön.

²⁹ ¡Guli'-guië' Xanru' Dios: "Xclenu'" tu' náquië' dxi'a!
¡Zóatica'sö yöl-la' dxi'i ladxi' queë'!

119

Le run le gunná bé'enë' Xanru' rë'u

¹ ¡Bica' ba nupa nácgaca idú dxi'a tsáhui'do',
nupa na' tun ca rnna xibá naguixjë' Xanru'!

² ¡Bica' ba nupa tun ca nácgaca le benë' ba nalí,
en idú ládxi'gaca ta'zë' ladxi' Lë'!

³ Biti' bi le cabí naca tsahui' tun,
pero tun ca nácgaca le nulu'ë lahui.

⁴ Nuzú' queé'tu' xibá quiu', Xan,
para idú ládxi'tu' guntu' ca ta'nná.

⁵ Raca ládxa'a gúntica'sa' ca ral-la' guna',
en guna' yugu' le gunná bë'u.

⁶ Ní'irö bití' ca' utuí'ida'
channö gapa chí'a yugu' le gunná bë'u.

⁷ Lu yöl-la' ba'a ladxi' quia' guía' Li': "Xclenu'"
cate' chinazi'a le buchi'a busöróu' le naca tsahui'.

⁸ Guna' ca ta'nná le gunná bë'u.

Biti' usán no'o neda' tsaz.

Ral-la' gunru' ca gunné' Dios

⁹ ¡Nacxi gaca gunbi' tu bi'i bönni' ga ugá'ana tsahui' ládxi'do'obi'?
Ral-la' gunbi' ca rnna xtídz'u.

¹⁰ Idú ládxa'a rizé ládxa'a Li', Xan.
Biti' gu'u lataj ucá'ana' yugu' le gunná bë'u.

¹¹ Lu icja ládxi'da'ahua' runa' ca rnna xtídz'u,
para cabí guna' dul-la' lo' Li'.

¹² ¡Bica' xibó', Xan!
Busedi neda' yugu' le gunná bë'u.

¹³ Len ruá' cuina' ru'a didza'
ca nácgaca yúgu'të le rusedi quézinu' netu'.

¹⁴ Rudzëjada' ca nácgaca le nunu' ba nalí
ca nu rudzeja tu' dë yöl-la' tsahui' que.

¹⁵ Sa' ládxa'a ca nácgaca xibá quiu'
en güi'i ládxa'a yugu' le nulú'u lahui.

¹⁶ Udzëjada' ca nácgaca le gunná bë'u.
Biti' gal-la ládxa'a xtídz'u.

Rudzëjade' eru' runru' le rnna cazë' Dios

¹⁷ Ben ga gaca dxi'a quia' neda', huen dxin quiu', Xan,
para soa' ibana', en guna' ca rnna xtídz'u.

18 Gusalaj guióǵ lahua' para gaca ilé'eda'
le tun ga rubánitu' nazúajgaca lu xibá naguixju' Li'.

19 Zoa' yödzölió ca tu bönni' ridasö.

Biti' ucachu'u yugu' xibá nunu' ga bití' gaca ilé'eda' léguequi.

20 Yúgu'të dza ruhu'ini ládxa'a tu' rizé ládxa'a
yugu' le nusédinu' netu' ca ral-la' guntu'.

21 Ruzenu' le bach nupa tun ba zxön cuínguequi, en nupa nudxíagaca dö',
nupa na' tu'zóa tsölá'aló yugu' xibá gunná bë'u.

22 Biti' gu'u lataj nu guequi neda' zi' o nu ucá'ana neda' cá'asö,
tu' runa' ca ta'nná le nunu' ba nalí.

23 Sal-la' ta'bó' nupa ta'nná bë', en ta'nné quia',
rizá' ládxa'a neda', huen dxin quiu', ca nácgaca le gunná bë'u.

24 Raza ládxa'a yugu' le nunu' ba nalí.

Nácgaca le tu'zéajni'i neda'.

Idú ládxi'ru' gunru' ca gunná cazë' Dios

25 Nadinni lu yu bö' naca caza'.

Busubán ládxa'a, ugunu' dxin xtídz'u.

26 Bulu'ida' Li' yugu' le nuna', ate' bubi'u didza'.

Busedi neda' yugu' le gunná bë'u.

27 Buzéajni'i neda' ca nácgaca xibá quiu',
ate' sa' ládxa'a ca nácgaca le nunu', le tun ga rubánitu'.

28 Ribödxí bö' naca caza' tu' risébidá ládxa'a.

Butipa ládxa'a, ugunu' dxin xtídz'u.

29 Ben ga bití' guna' le cabí sa'yéaj,
en buzá' ládxi' quia' xibá naguixju' Li'.

30 Guró'a' le naca idútë li para guna' ca rnna.

Nuzó'a' lahua' yugu' le nusédinu' netu'.

31 Nazí' lu na'a yugu' le nunu' liná' lo.

Biti' gu'u lataj bi gun ga utuí'ida', Xan.

32 Guna' ca ta'nná xibá gunná bë'u,

tu' rutipa cazu' ládxa'a.

Ré'ë niru' tséajni'iru' xtídzë'ë Dios

33 Busedi neda', Xan, ca ta'nná le gunná bë'u,

ate' gun chí'a léguequi ga idxinrö dza udxí.

34 Benna quia' yöl-la' réajni'i para gun chí'a xibá quiu',
en para idú ládxa'a guna' ca ta'nná.

35 Ben ga guna' ca ta'nná le gunná bë'u,

tu' raza ládxa'a guna' ca ta'nná xibá na'.

36 Ben ga güi'i ládxa'a yugu' le nunu' ba nalí,

para cabí güi'i ládxa'a yöl-la' ruhuidi'.

37 Buchi'a guióǵ lahua' para cabí uyúa' le cabí nazaca'.

Butipa ládxa'a para guna' le uluí'inu' netu'.

38 Ben tsutsu didza' bé'lenu' neda', huen dxin quiu',

para gádxida' Li'.

39 Bucuita ga zoa' nu rudidza' yudxi neda', læ na' rádxida'

tu' nácgaca dxi'a tsahui' le nusédinu' netu' ca guntu'.

40 Buyútsöca', rizé ládxa'a yugu' xibá quiu'.

Busubán ládxa'a, ugunu' dxin le tsahui' quiu'.

Ruzxöni ládxi'ru' xtídzë'ë Dios

41 Lu yöl-la' dxi'i ládxi' quiu' buyú neda', Xan,

en busölá neda' ca rnna xtídz'u gunu'.

⁴² Ubi'a didza' bi guía' nu run ga rutuí'ida', innía':

“Ruzxöni ládxa'a xtídz'u”, Xan.

⁴³ Biti' ucuítu' tsaz didza' idútë li lu ru'a tu' runa' löza yugu' le nusédinu' netu'.

⁴⁴ Gúntica'sa' ca ta'nná xibá naguixju' Li' yúgu'të dza, en yúgu'të iz si' zaca.

⁴⁵ Lu yöl-la' rusölá quiu' soa' ibana' tu' bë' ládxa'a guna' ca ta'nná bë' xibá quiu'.

⁴⁶ Gu'a didza' que le nunu' ba nalí lógaquië' bönni' ta'nná bë'ë en biti' ca' utuí'ida'.

⁴⁷ Tsaza ládxa'a yugu' xibá gunná bë'u, yugu' lë na' nadxí'ida'.

⁴⁸ Guna' ca' ca ta'nná xibá nunu', lë na' së ládxa'a, en sa' ládxa'a ca nácagaca le gunná bë'u.

Zóatica'sö xtídzë'ë Dios

⁴⁹ Yöjné didza' na' bé'lenu' neda', huen dxin quiu', tu' benu' ga runa' löza le.

⁵⁰ Didza' na' ruhué tsahui' neda' cate' riguí'i rizáca'a, tu' tu'subán ládxa'a didza' bë'u.

⁵¹ Tu'títjalé'e neda' nupa tun ba zxön cuínguequi, pero biti' ca' usana' xibá naguixju' Li'.

⁵² Röjneda' yugu' le busédinu' netu' dza ni'te, Xan, ate' lë na' ruhué tsahui' neda'.

⁵³ Lu yöl-la' ridzá'a quia' rö'a böniga ni'a quégaca nupa tuá' dö', nupa na' tu' cá'ana xibá naguixju' Li'.

⁵⁴ Rul-la' ca nácagaca le gunná bë'u.

Zoa' ni ca tu bönni' ridé' zi'tu'.

⁵⁵ Chi'i dzó'ölö röjneda' Lo', Xan, en run chi'a xibá naguixju' Li'.

⁵⁶ Nacuá'len neda' le ruzi'a xibé ate' runa' ca rnna yugu' xibá quiu'.

Raza ládxi'ru' xtídzë'ë Dios

⁵⁷ Nacu' Li', Xan, le ruzi'a xibé.

Chigunnía' guna' ca rnna xtídz'u.

⁵⁸ Idú ládxa'a inábida' Li' sóalenu' neda'.

Buéchi' ládxi' neda' ca rnna xtídz'u gunu'.

⁵⁹ Guzá' ládxa'a ca nácagaca le runa', ate' bubí'i ládxa'a para guna' ca rnna le nunu' liná' lo.

⁶⁰ Béndá'a bayúdx, en biti' gudzedá' para guna' ca rinná bë' xibá quiu'.

⁶¹ Bönachi zían bönachi tuá' dö' gula'gú'u neda' lé'ajlö, pero biti' gul-la ládxa'a xibá naguixju' Li'.

⁶² Gulahuéla riyasa', en rigú'a Li' yöl-la' ba tu' nácagaca tsahui' yugu' le nusédinu' netu'.

⁶³ Runa' tsözxón nupa tadxi Li', enca' nupa tun ca rnna xibá quiu'.

⁶⁴ Ridxín idútë yödzölió yöl-la' dxi'i ládxi' quiu', Xan. Busedi neda' yugu' le gunná bë'u.

Naca le saca' le gunná cazë' Dios

⁶⁵ Benu' quia' neda', huen dxin quiu', le naca dxi'a, ca rnna xtídz'u gunu', Xan.

⁶⁶ Busedi neda' yöl-la' réajni'i idú, en yöl-la' raca yenni',
tu' réajlë'a yugu' xibá gunná bë'u.

⁶⁷ Zí'alö cate' buzötju' neda' gudá' nanitia',
pero na'a runa' ca rnna xtídzu'u.

⁶⁸ Idú dxi'a tsahui' nacu', en runu' le naca dxi'a.
Busedi neda' yugu' le gunná bë'u.

⁶⁹ Nupa tun ba zxön cuínguequi ta'zí' yë' ca naca quia',
pero idú ládxa'a guna' ca rnna xibá quiu'.

⁷⁰ Chul-la niti naca icja ládxi'do'guequi,
pero raza ládxa'a neda' xibá naguixju' Li'.

⁷¹ Naca dxi'a buzötju' neda'
para bizédida' yugu' le gunná bë'u.

⁷² Nácagacarö dxi'a quia' xibá rinná bë'u
ca nácagaca gayuá' gayuá'sö dumí oro, en plata.

Naca tsahui' le gunná cazë' Dios

⁷³ Len no'o benu' neda', en buzú' neda'.
Buzéajni'i neda' para gúnbë'a xibá gunná bë'u.

⁷⁴ Nupa tadxi Li' ila'lé'e neda', en ulu'dzeja ládxi'guequi,
tu' runa' löza xtídzu'u.

⁷⁵ Nözda' naca tsahui' ca ruchi'a rusöróu' quia' neda', Xan,
ate' lu yöl-la' li ladxi' quiu' busaca' zi'u neda'.

⁷⁶ Na'a, lu yöl-la' dxi'i ladxi' quiu' buë tsahui' neda',
ca rnna didza' chibë'lenu' neda', huen dxin quiu'.

⁷⁷ Gudá duhuechi' ládxi'u neda' para soa' ibana',
tu' raza ládxa'a xibá naguixju' Li'.

⁷⁸ Ben ga ulu'tu'i nupa tun ba zxön cuínguequi,
tu' gula'nné quia', en bití' bi bena' quéguequi,
pero neda' sa' ládxa'a ca naca xibá quiu'.

⁷⁹ Ral-la' udxín quia' nupa tadxi Li',
nupa na' núnbë'gaca le nunu' ba nalí.

⁸⁰ Ben ga udxín ca rnna le gunná bë'u,
para cabí utuí'ida'.

Runë' Dios ca rnna xtídzë'ë

⁸¹ Rudú ládxa'a tu' riböza' yöl-la' rusölá quiu',
pero runa' löza xtídzu'u.

⁸² Chirequi ichul-la lahua' tu' rizëda' ládxa'a xtídzu'u,
rnníá: "¿Bátaxi huë tsaú'u neda'?"

⁸³ Caní raca tu' naxú'unida' ca tu buzudi guídi nal-la' lahui guí',
pero catu caz gal-la ládxa'a yugu' le gunná bë'u.

⁸⁴ ¿Bál-laxi dza soa' ibana' neda', huen dxin quiu'?
¿Bátaxi usiúdxu' nupa ta'bía no neda'?

⁸⁵ Nupa tun ba zxön cuínguequi gula'chó'öna tu yeru ga tsöjbixa',
nupa na' bití' tun ca rnna xibá naguixju' Li'.

⁸⁶ Idútë li nácagaca yúgu'të xibá gunná bë'u.
Lu yöl-la' rizí' yë' quéguequi ta'bía no neda'.
¿Gúcalen neda'!

⁸⁷ Gula'zóa ulu'sunítië' neda' lu yödzölió ni,
pero bití' busán na'a xibá quiu'.

⁸⁸ Lu yöl-la' dxi'i ladxi' quiu' busubán ládxa'a,
para gapa chí'a le nunu' ba nalí len ruá' cuinu'.

Réajlë'ëru' xtídzë'ë Xanru'

⁸⁹ Rulidza' Li', Xan.

Tsaz naguixju' xtídz'u yehua' yubá.

⁹⁰ Gunu' ca rnna xtídz'u quégaca bönachi na'a dza, en yúgu'të dza si' zaca.

Gudixaj cazu' yödzölió, ate' idía'tica'sö.

⁹¹ Ni'a que le gunná bë'u nacua' caz yúgu'të ga ridxintë na'a dza, tu' tun xichinu' yúgu'të lë na'.

⁹² La'tu' cabí raza ládxa'a xibá naguixju' Li', chigunítia' lu le busaca' zi' neda'.

⁹³ Catu caz gal-la ládxa'a yugu' xibá quiu', tu' busubanu' ládxa'a ni'a quéguequi.

⁹⁴ Néquida' quiu'.

¡Busölá neda', tu' ruí'i ládxa'a xibá quiu'!

⁹⁵ Nupa tuá' dö' ta'bó' nisi neda' para ulu'suniti neda', pero neda' güi'i ládxa'a le nunu' ba nalí.

⁹⁶ Chibilé'eda' ruúdxí que yúgu'të le naca idútë yödzölió ni, pero catu caz udxi que le gunná bë'u guntu'.

Nadxí'iru' xtídzë'ë Xanru'

⁹⁷ Nadxí'ide'eda' xibá naguixju' Li'.

Idú dza rizá' ládxa'a ca naca que.

⁹⁸ Réajni'iröda' ca nupa ta'dá'baga' neda'

tu' ruí'i ládxa'a yugu' le gunná bë'u, en tu' dá'tica'sa' léguequi.

⁹⁹ Réquibe'eröda' ca yúgu'të nupa tu'sedi neda', tu' rizá' ládxa'a le nunu' ba nalí.

¹⁰⁰ Réajni'iröda' ca yugu' bönni' gula, tu' rapa chi'a xibá quiu'.

¹⁰¹ Gudapa chi'i cuina' para cabí guna' le cabí naca tsahui', en para guna' ca rnna xtídz'u.

¹⁰² Biti' ca' nucá'ana' yugu' le nusédinu' netu', le nusedi quézinu' neda'.

¹⁰³ Bica' zxixi nácagaca xtídz'u.

Ön, nácagacarö zxixi ca le zxixi que buz.

¹⁰⁴ Tu'zéajni'i xibá quiu' neda'.

Que lë ni na' réquida' zi' yúgu'të le cabí naca.

Xtídzë'ë Dios ruzení' lu icja ládximo'oru'

¹⁰⁵ Ca tu bení' naca xtídz'u ga ridá', en le ruzení' nöza ga ral-la' töda'.

¹⁰⁶ Guzxi' lu na'a bi guna', en nuna' tsutsu xtídz'a'a. Gapa chi'a le nusédinu' netu' le naca tsahui'.

¹⁰⁷ Zoa le rusaca' zi' neda'.

Busubán ládxa'a, Xan, ugunu' dxin xtídz'u.

¹⁰⁸ Guzxi' yöl-la' ba rigu'a Li' len ru'a, Xan, en buzéajni'i neda' yugu' le nusédinu' netu'.

¹⁰⁹ Zóatica'sö bönadxi gátia',

pero biti' ral-la ládxa'a xibá naguixju' Li'.

¹¹⁰ Nupa tuá' dö' bulu'zé tu du yalaj le sön neda', pero biti' bucá'ana' xibá quiu'.

¹¹¹ Tsaz nazi' lu na'a le nunu' ba nalí, ate' run ga rudzeja ládxa'a.

¹¹² Ruí'i ládxa'a gúntica'sa' ca ta'nná le gunná bë'u. Guna' caní ga idxintë dza udxi.

Nagá'anaru' dxi'a ni'a que xtídzë'ë Dios

113 Réquida' zi' nupa nácagaca chopá ladxi',
pero nadxí'ida' xibá naguixju' Li'.
114 Nacu' ca tu ga rucachi' cuina', en le run chi'i neda'.
Runa' löza xtídz'u.
115 Guli' cuíta ga zoa', libí'ili' ruá'ali' dö',
tu' guna' ca ta'nná le gunná bē'ē Xana' Dios.
116 Buzóa neda' tsutsu, ugunu' dxin xtídz'u, ate' soa' ibana'.
Biti' gu'u lataj utuí'ida' ca naca le runa' löza.
117 Buzóa neda' tsutsu, ate' ulá',
en güi'itica'sa' ládxa'a le gunná bē'u.
118 Nusán no'o yúgu'tē nupa nusángaca le gunná bē'u,
tu' naca yöl-la' sina' quéguequi le cabí nazaca'.
119 Ugú' nupa tuá' dö' luyú ní ca nu rugúa bēbu.
Que lē ni na' nadxí'ida' le nunu' ba nalí.
120 Rizxizi idútē le nayá' nabana' tu' rádxida' Li',
en rádxida' le gaca cate' usiúdxu' bönachi.

Ral-la' gunru' ca rnna xtídzē'ē Dios

121 Bena' le naca tsahui', en le naca li.
Biti' usán no'o neda' lu ná'agaca nupa tu'saca' zi' neda'.
122 Nacu' quia' neda', huen dxin quiu', le naca bē' gaca dxi'a quia'.
Biti' gu'u lataj ulu'saca' zi' neda' nupa tun ba zxön cuínguequi.
123 Richí guió'j lahua' tu' riböza' yöl-la' rusölá quiu',
enca' didza' tsahui' quiu'.
124 Lu yöl-la' dxi'i ladxi' quiu' ben quia' neda', huen dxin quiu',
ca ré'ēni quézinu' gunu'.
Busedi neda' yugu' le gunná bē'u.
125 Naca' huen dxin quiu'.
Benna quia' yöl-la' réajni'i para gaca gúnbē'a le nunu' ba nalí.
126 Chibidxín dza bi gunu', Xan,
tu' gula'guítsjē' xibá naguixju' Li'.
127 Que lē ni na' nadxí'iröda' xibá naguixju' Li' ca nadxí'ida' oro.
jÖn, ca oro banéquini,
128 en réquida' nácagacarö dxi'a xibá quiu' ca yúgu'tē le dē!
Biti' rilé'eda' dxi'a yúgu'tē le cabí naca.

Raca ládxi'ru' gunru' ca rnna xtídzē'ē Dios

129 Run ga rubánida' le nunu' ba nalí.
Que lē ni na' bö' naca caza' nazí' lu nē'e le.
130 Cate' nalá' lahui xtídz'u, ruzení' queétu'.
Run ga ta'yéajni'i nupa nácagaca nöxaj ladxi'.
131 Gusalja' ru'a, en gunné ládxa'a,
tu' guzé ládxa'a xibá gunná bē'u.
132 Buyú neda', en buzá' ladxi' quia',
ca run cazu' quégaca nupa ta'dxí'i Li'.
133 Buzóa neda' tsutsu para guna' ca rnna xtídz'u.
Biti' gu'u lataj le naca xihui' inná be'e neda'.
134 Buá'u neda' lu na' nu rusaca' zi' neda',
para gaca guna' ca naca xibá quiu'.
135 Ben ga gaca bē' nazí' lu no'o neda', huen dxin quiu',
en busedi neda' yugu' le gunná bē'u.
136 Raca nisa ribödxi guió'j lahua' ca tu yegu gubó'o,
tu' cabí tun bönachi ca rinná bē' xibá quiu'.

Idutë li naca le rnna cazë' Xanru'

¹³⁷ Nacu' Li' tsahui', Xan.

Dxi'a tsahui' naca le ruchi'a rusöróu' queetu'.

¹³⁸ Nugú'u lu na'tu' le nunu' ba nalí.

Naca tsahui', en tsaz zoa.

¹³⁹ Tu' riböza' le naca quiu' run ga régui rilá ládxi'da'ahua',
ate' gulal-la ladxi' xtídz'u nupa ta'dá'baga' neda'.

¹⁴⁰ Idú dxi'a tsahui' naca xtídz'u.

Que lé ni na' neda', huen dxin quiu', nadxí'ida' le.

¹⁴¹ Nöxaj ladxi' naca', ate' tu'cá'ana bönachi neda' cá'asö,
pero biti' ral-la ládxa'a le gunná bë'u.

¹⁴² Zóatica'sö le naca tsahui' quiu',

en idútë li naca xibá naguixju' Li'.

¹⁴³ Ba bidxín le raca quia', en le rusaca' zi' neda',

pero raza ládxa'a xibá gunná bë'u.

¹⁴⁴ Nácatica'sö tsahui' le nunu' ba nalí.

Buzéajni'i neda' para soa' ibana'.

Ral-la' ulaba ládxi'ru' le gunná cazë' Dios

¹⁴⁵ Idú ládxa'a rulidza' Li'.

Bubí'i didza', Xan, ate' guna' ca naca le gunná bë'u.

¹⁴⁶ Rulídzatica'sa' Li'.

Busöla' neda', ate' guna' ca naca le nunu' ba nalí.

¹⁴⁷ Riyasa' zí'alö ca ritó yu zila, en rulidza' Li' para gácalenu' neda'.

Riböza' yugu' didza' gu'u.

¹⁴⁸ Chi'i dzó'ölö rubéaja' yëla guiój lahua',

para ulaba ládxa'a ca naca xtídz'u.

¹⁴⁹ Lu yöl-la' dxi'i ladxi' quiu' buzé nagu' chi'a.

Busubán ládxa'a, Xan, ca naca le nusédinu' netu'.

¹⁵⁰ Ta'biga' nupa tuá' dö' ga zoa' para ila'bía no neda'.

Nucá'anagaca xibá naguixju' Li'.

¹⁵¹ Zu' gala' ga zoa', Xan,

ate' idútë li naca le gunná bë'u.

¹⁵² Dza ni'te quez núnbë'a le nunu' ba nalí,

en nözda' tsaz nuzú' le.

Le gunná cazë' Dios run rë'u tsahui'

¹⁵³ Buyú le rusaca' zi' neda', en busöla' neda',

tu' cabí ral-la ládxa'a xibá naguixju' Li'.

¹⁵⁴ Bubí'i didza' uláz quia', en buá'u neda'.

Busubán ládxa'a ca naca xtídz'u.

¹⁵⁵ Zi'tu' zoa yöl-la' rusöla' ga nacuá' nupa tuá' dö',

tu' cabí tuí'i ládxi'gaca le gunná bë'u.

¹⁵⁶ Zxóntërö naca yöl-la' ruhuéchi' ladxi' quiu', Xan.

Busubán ládxa'a ca naca le nusédinu' netu'.

¹⁵⁷ Ziángaca nupa ta'bía no neda', en ta'dá'baga' neda',

pero biti' nucá'ana' le nunu' ba nalí.

¹⁵⁸ Biti' rilé'eda' dxi'a nupa nucá'anagaca Li',

en biti' tun ca rnna xtídz'u.

¹⁵⁹ Buyú ca nadxí'ida' xibá quiu', Xan.

Lu yöl-la' dxi'i ladxi' quiu' busubán ládxa'a.

¹⁶⁰ Idútë li nácagaca yúgu'të xtídz'u,

en tsaz nacuá' yúgu'të le nusédinu' netu' le nácagaca tsahui'.

Ral-la' udödi cuinru' lu në'ë Dios

¹⁶¹ Ta'bía no neda' nupa ta'nná bë', en biti' bi bena' quéguequi, pero runa' bal xtídz'u lu icja ládxi'da'ahua'.

¹⁶² Rudzéjalenda' xtídz'u, ca rudzeja nu rudzöli tu yöl-la' tsahui' zxön.

¹⁶³ Réquida' zi', en biti' rilé'eda' dxi'a le cabí nácatë, pero nadxí'ida' xibá naguixju' Li'.

¹⁶⁴ Gadxi luzuí tu dza rigu'a Li' yöl-la' ba, ni'a que le nusédinu' netu', le naca tsahui'.

¹⁶⁵ Ta'böza dxi'a tsáhui'do' nupa nadxí'igaca xibá naguixju' Li', en biti' bi run ga röjchégu'gaca.

¹⁶⁶ Runa' löza yöl-la' rusölä quiu', Xan, en runa' ca rnna xibá nunu'.

¹⁶⁷ Yugu' le nunu' ba nalí tun chi'i bö' naca caza', ate' nadxí'ide'eda' léguequi.

¹⁶⁸ Runa' ca ta'nná xibá quiu', en yugu' le nunu' ba nalí tu' rilé'e quézinu' yúgu'të le runa'.

Rudzéjalenru' xtídzë"ë Dios

¹⁶⁹ Ruzé nagu' le rulidza' Li', Xan.

Ruzéajni'i neda' ca rnna xtídz'u.

¹⁷⁰ Ruzé nagu' le rinábida' Li', en busölä neda' ca rnna xtídz'u gunu'.

¹⁷¹ Bë' neda' lataj cu'a Li' yöl-la' ba, tu' rusédinu' neda' le gunná bë'u.

¹⁷² Bë' lataj gul-la lúdx'a ca naca xtídz'u, tu' nátagaca tsahui' yúgu'të xibá nunu'.

¹⁷³ Guzóatë gácalenu' neda', tu' nabóa' xibá quiu'.

¹⁷⁴ Rizé ládxa'a yöl-la' rusölä quiu', Xan, en raza ládxa'a xibá naguixju' Li'.

¹⁷⁵ Bë' lataj soa ibán bö' naca caza' para cu'a Li' yöl-la' ba, en ben ga gácalen neda' le nusédinu' netu'.

¹⁷⁶ Ridöda' tsölä'alö ca tuba' bö'cu' zxila' nanítiba'. Gudá dudilju' neda', huen dxin quiu', tu' cabí ral-la ládxa'a xibá nunu'.

120

¹ Cate' gudí'i guzáca'a bulidza'-në' Xanru', ate' Lë' bubí'ë didza'.

² Busölä bö' naca caza', Xan, lu na' nu rizí' yë', en lu na' nu biti' run ca gunná caz.

³ ¿Bizxi gunë' quiu' Dios, en bizxi ubi'ë quiu', li' na' rizí' yë'u?

⁴ Ichizë' li' yugu' yaga lahui tuchi' que nu reaj gudil-la, en cu'ë icju' bo' yalaj que ya' yórido'.

⁵ Bica' bayechi' neda' tu' zóasa' yödzo Mesec, en zoa' tu lu yu'u guídi quégaca bönachi Cedar.

⁶ Xidzélé'ë chiguzóa bö' naca caza' len nupa tu' suniti yöl-la' riböza dxi'a tsáhui'do'.

⁷ Ré'enda' cöza' dxi'a tsáhui'do', pero cate' ruá'a didza' té'ënnë' ila'díl-lalen neda'.

121

¹ Uchisa icja' uyúa' le raca yugu' lu gu'a.

¿Gazxi za' le gácalen neda'?

- ² Le gácalen neda' za' lu nē'ë Xanru'.
Lē' benē' lúxiba, en luyú.
³ Biti' gu'ë lataj cuilu' ga ridó'.
Biti' ca' gasi Nu na' run chi'i li'.
⁴ Buyútsöca', bití' ridödi yēla guiój lahuē',
en bití' rásiē', Lē' na' rapa chi'ë bönachi Israel.
⁵ Run chi'ë Xanru' Dios li'.
Zoē' Xanru' Dios cuitu' ibēla, rigu'ë li' zxul-la.
⁶ Biti' uzegui' gubidza li' lahui' dza,
en bití' bi gun beo' quiu' chi'i dzó'ölö.
⁷ Gun chi'ë Xanru' Dios li' ga rizó'o, en ga rudxinu',
dza ni zóaru' na'a, en yugu' dza si' zaca.
⁸ Xanru' Dios gun chi'ë li' ga rizó'o, en ga rudxinu',
dza ni zóaru' na'a, en yugu' dza si' zaca.

122

- ¹ Budzējada' cate' gulé bönachi neda', gula'nná:
“Uyeajru' yu'u lidxë' Xanru' Dios.”
² Na'a zuíru' ni
ga nu riyaza yödzö Jerusalén.
³ Dxi'ado' gulunē' yödzö Jerusalén,
ate' naca lachi, en tuz ca röjlózgaca yu'u zxön que.
⁴ Ta'yaza yugu' cö' bönachi queē' Xanru' ga ni
ca na' nusédinē' Dios bönachi Israel,
para ila'gú'u yöl-la' ba Xanru' Dios.
⁵ Ta'bó' nupa tu'chi'a tu'söró queëru' ga ni,
ga ta'bó' ta'nná bē' xí'ini xi'sóē' David.
⁶ Guli'nábinē' Dios gunē' ga gaca dxi'a que Jerusalén,
en ga ulu'zí' xibé nupa ta'dxi'i yödzö ni yöl-la' tsahui'.
⁷ Dios gunē' ga ila'böza dxi'a tsáhu'ido' nupa nacua' yödzö ni,
en ga ulu'zí' xibé nupa ta'nná bē' yöl-la' tsahui'.
⁸ Tu' nadxí'ida' yugu' bócha'a, en yugu' böchi' luzá'a,
rnnía': “Gaca yöl-la' riböza dxi ladxi' lu yödzö ni.”
⁹ Tu' nadxí'ida' lidxë' Xanru' Dios,
rinábida'-nē' gunē' ga gaca dxi'a que yödzö ni.

123

- ¹ Uchisa lahua' uyúa' ga zu' Li',
rö'u rinná bē'u yehua' yubá ni'.
² Ca runē' bönni' nadó'o, ruyúē' bi ulu'ë xanē',
ate' ruyubi' bí'i nigula nadó'o bi ulú'unu nigula xanbí',
lësca' caní ruyuru' rē'u bi ulu'ë Xanru' Dios,
ga idxinrö dza uzá' ládxë'ë queéru'.
³ Buzá' ladxi' queétu', Xan. Buzá' ladxi' queétu',
tu' nacua' nupa tu'cá'ana netu' cá'asö.
⁴ Rudú' ládxí'tu' tu' tu'titaj netu' nupa tu'zí' xibé yúgu'tē le dē,
en tu' tu'cá'ana netu' cá'asö nupa tun ba zxön cuínguequi.

124

- ¹ “La'tu' cabí gúcalenē' Xanru' rē'u”,
ral-la' ila'nná bönachi Israel:
² “La'tu' cabí gúcalenē' Xanru' rē'u
cate' nupa bití' ta'lé'e rē'u dxi'a gula'díl-lalen rē'u,

³ la' gulútitë rë'u
tu' gula'léde'e rë'u.

⁴ Guca queéru' ca la' usubága'të rë'u nisa,
en la' uchícjatëru' lu nisa na'.

⁵ La' uchícjatëru' tu lu nisa zila."

⁶ ¡Bica' lá'ayi Xanru' Dios
tu' cabí bí'ë lataj nupa bití' ta'lé'e rë'u dxi'a ulu'suniti rë'u!

⁷ Bularu' ca rulaba' biguínido' tu lu le zön lëba'.
Naröza' du yalaj, ate' nuláru'.

⁸ Le rácalen rë'u za' lu në'ë Xanru' Dios.
Lë' benë' lúzxiba, en lu yu.

125

¹ Nupa tu'zxöni ládxi'gaca Xanru' Dios nácgaca ca guí'a Sión,
tu' cabí bi gaca utá guí'a na', pero tsaz zoa caz.

² Ca ró'gaca guí'a idú gásibi'ilö yödzö Jerusalén,
la' canísö zoë' Xanru' Dios idú gásibi'ilö bönachi queë',
na'a dza, en yúgu'të dza si' zaca.

³ Bití' ral-la' ila'nná bë' nupa tuá' dö' lu xiyúgaca bönachi tsahui',
para cabí iún ga ilu'ë dö' bönni' tsahui' na'.

⁴ Xan, ben ga gaca dxi'a quégaca nupa nácgaca dxi'a,
en quégaca nupa idú ládxi'gaca tun ca rnna xtídz'u.

⁵ Nupa tu'dödi cuínguequi lu le cabí nácatë,
ben léguequi xigua' tsözxón len nupa tuá' dö'.
Ben ga ila'cuá' bönachi Israel dxi'a tsáhui'do'.

126

¹ Cate' Xanru' Dios buchë'ë bönachi yödzö Sión
nupa gula'dzún zi'tu', gúquiru' yélasö rineru'.

² Ní'irö idú ládxi'ru' buzídxiru',
en lu yöl-la' rudzeja queéru' guródxí'aru'.

Ní'irö gulu'i didza' bönachi yugu' yödzö izá'a, gula'nná:
"Dios, Xángaquië', benë' le nácgaca zxön, gúcalenë' légaquië'."

³ Xanru' Dios benë' le nácgaca zxön, gúcalenë' rë'u,
ate' ruzí'iru' xibé'.

⁴ Buchë' netu', irúajtu' ga ni nadzuntu', Xan,
para gácatu' ca nisa rudxín lu yegu nuhuí'igaca.

⁵ Lu yöl-la' rudzeja ila'bódxí'a cate' ila'lapa
nupa lu yöl-la' ribödxí quéguequi röjózagaca.

⁶ Nu bönni' lu yöl-la' ribödxí rizé'ë, nu'ë bínnedo' röjözë',
lu yöl-la' rudzeja códxí'ë cate' udxiné', nu'ë le nulapë'.

127

¹ Channö cabí runë' tsutsu Xanru' Dios tu yu'u,
nítisö tunë' dxin bönni' tunë' yu'u na'.

Channö cabí run chí'ë Xanru' Dios tu yödzö,
nítisö ruyúë' bönni' na' yu'u lu në'ë yödzö na'.

² Nítisö naca rubanu' zílado', en röjöxu' cate' chigúl-lada',
en ragu' le guzxi'u ní'a que le busaca' zí' cuinu',

tu' runnë' Xanru' Dios que nu nadxí'inë' cate' ni' rasi nu na'.
³ Bulí'yú, nácagacabi' xzí'iniru' le runnë' Xanru' Dios queéru',
 ate' bí'ido' tu'cuá'anú nigula queéru'
 nácagacabi' le rubi'ë Xanru' Dios queéru'.
⁴ Ca nácagaca yaga lahui' tuchi' lu na' nu bönni' rejë' gudil-la
 nácagacabi' xzí'inë' bönni' zoë' iz cuidi' queë'.
⁵ Bica' ba bönni' nacuá'abi' queë' zióntëröbi'.
 Biti' ca' utuí'inë' cate' ru'ë didza' láhui'gaquië'
 bönni' tu'chi'a tu'söröë' queë', en lógaca nupa ta'díl-lalen lë'.

128

¹ Bica' ba yúgu'të nupa tadxi Xanru' Dios,
 nupa na' tun ca ré'ëni quëzinë' Lë'.
² Cate' gagu' le gata' quiu' ni'a que dxin nun cazu',
 uzi'u xibé lë na', en gaca dxi'a quiu'.
³ Gácanu nigula quiu' ca tu lubá uva dxía ga naca lö'a lidxu',
 ate' ilácabi' xzí'inu' ca yugu' yaga olívodo' ta'bó'öbi' ga ni' ráguli'.
⁴ Bulí'yútsöca', caní gáquië' bica' ba
 bönni' na' rádxinë' Xanru' Dios.
⁵ Xanru' Dios zoë' Sión gunë' ga gaca dxi'a quiu',
 en gu'ë li' lataj ilé'enu' le dxi'a gaca que yödzo Jerusalén
 yúgu'të dza su' ibanu'.
⁶ Dios gu'ë li' lataj ilé'enu' yugu' xzí'ini xi'sú',
 en gunë' ga ila'böza dxi'a tsáhui'do' bönachi Israel.

129

¹ “Zian luzuí gula'bía no netu' ga gudela' nácatu' ra'bando”,
 huáca ila'nná bönachi Israel:
² “Zian luzuí gula'bía no netu' ga gudela' nácatu' ra'bando',
 pero biti' gula'deli' ulu'xicja netu'.
³ Guca tsca bulu'gá'ana-ba' bëdxi lu bëla' cúdzu'tu',
 en gulún tunna ga gudödi xiyágaba' bëdxi quégaquië'.”
⁴ Tsahui' náquië' Xanru' Dios.
 Chinachúguë' du quégaca nupa tuá' dö' le gulúgui'ni netu'.
⁵ Ben ga ulu'tuí'i, en ulu'huécja guz cúdzu'lö
 yúgu'të nupa biti' ta'lé'e dxi'a netu', bönachi Sión.
⁶ Ben ga ilácagaca ca guíxi'do' da' ícjo'olö yu'u,
 le ribídxitë cate' ni' naca hué'ënido'.
⁷ Biti' gaca ulí në'e nu tsöjchugu le,
 en biti' gaca nu gachi tsölén guizxi que,
⁸ en biti' ta'nná nupa ta'dödi ni':
 “Rinábitu'-në' Xanru' Dios gunë' ga gaca dxi'a quiu'.
 Lu Lë' Xanru' rinábitu' Lë' gunë' ga gaca dxi'a quiu'.”

130

¹ Ga ni nótjada' rulidza' Li', Xan.
² Ruzé nagu' chi'a, Xana' Dios.
 Ruzëda' nagu' le rinábida' Li'.
³ La' nnaru' tsöjnenu' xigua' nabága'gaca bönachi,
 ¿nuzxi caz urúaj tsahui' lo', Xan?
⁴ Runiti lo cazu' netu', Xan,

para guntu' Li' bal.

⁵ Runa' löza Li', Xana' Dios. Run löza bö' naca caza' Li',
ate' runa' löza gaca ca rnna xtídz'u.

⁶ Bö' naca caza' runrö löza Li', Xan,
ca tunë' bönni' tapa chi'ë yödzö chi'i dzó'ölö ta'bözë' itó yu zila,
ca tunë' löza itó yu zila yugu' bönni' na'.

⁷ Guli'gún löza Xanru' Dios, libí'ili', bönachi Israel,
tu' náquië' dxi'i ladxi' Xanru',
en ruhuá'uë' bönachi Israel.

⁸ Xanru' Dios huöá'uë' bönachi Israel
lu yúgu'të xigua' nabága'gaca.

131

¹ Biti' run ba zxön cuina', Xan, en bití' rigú'u cuina' yöl-la' ba,
en bití' ulapa' na'a le nátagaca zxön, en le nátagaca böniga.

² Idú ládxa'a nuzóa cuina' nöxaj, en zoa' dxisö.

Ca runbi' bi'i hué'ëni ruzí' ládxi'bi' cuítanu xiná'abi',
ca' riböza bö' naca caza' lu icja ládxi'da'ahua'.

³ ¡Libí'ili', bönachi Israel, guli'gunë' löza Xanru' Dios
ga naguela' na'a dza, en yúgu'të dza si' zaca!

132

¹ Rinábida' Li', Xan, uláz queë' David tsöjnénu'
yúgu'të le gudí'i guzxaqué'ë,

² en ca benë' tsutsu xtídzë'ë, Xan, en guzxi' lu në'ë bi gunë' lo',
nacu' Nu nál-latërö láhuigaquië' xí'ini xí'sóë' Jacob, gunné':

³ "Biti' ca' tsu'a lidxa',
en bití' gáta'a le ráti'da',

⁴ en bití' gu'a lataj tödi yëla guiój lahua',
en bití' utsudi' lahua',

⁵ ga idxinrö dza ucöza' tu lataj ga soë' Xanru' Dios,
le gaca yu'u lidxi Nu na' nál-latërö láhuigaquië' xí'ini xí'sóë' Jacob."

⁶ Biyónitu' didza' que guí'ina lá'ayi queë' Dios cate' ni' zóatu' Efrata,
ate' budzólitu' le lu xiyúë' Jaar.

⁷ Uyéajru' ga na' zoa cazë' Xanru' Dios.
Tseaj ládxi'ru'-në' ga naca xilibi ni'ë.

⁸ Gudödi, Xan, ga na' soa cazu' Li'.

Gudá tsözxön len guí'ina lá'ayi que yöl-la' zxön quiu'.

⁹ Ben ga sóalen le naca tsahui' yugu' bixúz quiu'
ca tu lari' ta'xóë' cúdzu'gaquië'.

Ben ga ilúl-la bönachi quiu' lu yöl-la' rudzeja quéguequi.

¹⁰ Uláz queë' David, huen dxin quiu', rinábida' Li'
cabí'ucá'anu' bönni' na' guró'cazu' Li'.

¹¹ Xanru' Dios benë' tsutsu xtídzë'ë bi gunë' queë' David,
le naca idútë li, ate' Lë' bití' unítië' xtídzë'ë na', gunné':

"Uzóa' tuë' xí'ini xí'sú' xilatju' ga inná bé'ëbi'.

¹² Channö ilunbi' xí'ini xí'sú' ca rnna didza' dzaga quia',
en le nuna' ba nalí para uzéajni'ida' légacabi',
ila'nná bé'ëbi' ga rö'u rinná bë'u yúgu'të dza si' zaca."

13 Xanru' Dios nabó cazë' queë' yödzo Sión.
 Raca ládxe'ë gaca Sión ga soa cazë' Lë'.
 14 Rnnë': "Nácatíca'sö lataj ni ga soa caza' neda'.
 Soa' ni tu' raca ládxa'a soa' ni.
 15 Guna' ga gátada' le ilágugaca bönachi ni,
 en guna' ga ulu'huólaj ila'dzé'e yöta xtila
 nupa ta'yadzaj ta'yudxi lu yödzo ni.
 16 Guna' ga sóalen yöl-la' rusölá yugu' bixúz quia'
 ca tu lari' ila'xóa cúdzu'gaquië',
 ate' ilúl-la bönachi quia' lu yöl-la' rudzeja quéguequi.
 17 Guna' ni ga ilá' lahui yöl-la' unná bë' queë' David.
 Guna' ga sóatica'sö nu inná bë' xilatjé' bönni' na' nabó caza'.
 18 Guna' ga sóalen nupa bití' ta'lé'e lé' dxi'a yöl-la' rutuí'i
 ca tu lari' ilácuguequi, pero tsëpi yösa bení' le dxía icjé'."

133

1 Buli'yútsöca': ¡Bica' dxi'a tsahui' naca
 cate' nupa nácatíca böchi' luzë'e
 ta'böza lu yöl-la' tuz quéguequi!
 2 Naca ca le za ta'gú'u ícjaguequi bönachi,
 le ridzún lu guitsa' láhuiguequi,
 en bidzún lu guitsa' lúzxuë' Aarón,
 le bidzún ga ridxintë lu yeni zxë'.
 3 Naca ca buzén le ridinni lu guí'a Hermón,
 en ca le ribö'a lu guí'a Sión,
 tu' gunná bë'ë Xanru' gaca dxi'a queëru' lu guí'a na',
 en gata' yöl-la' na'bán idú queëru'.

134

1 ¡Buli'yútsöca'!
 ¡Guli'cu'ë Xanru' Dios yöl-la' ba, yúgu'tëli' runli' xichinë' Xanru',
 yúgu'tëli' na' zóali' yu'u lidxë' Xanru' chi'i dzó'ölö!
 2 ¡Guli'chisa ná'ali' ga zóali' lataj lá'ayi queë',
 en guli'nná dxi'a queë'!
 3 Xanru' Dios, zoa cazë' yödzo Sión, gunë' ga gaca dxi'a queéli'.
 Naca cazë' Nu ben yehua' yubá, en yödzoilió ni.

135

1 ¡Guli'cu'ë yöl-la' ba Xanru' Dios!
 ¡Guli'cu'ü yöl-la' ba La la'ayi queë' Xanru' Dios!
 ¡Guli'cu'ë yöl-la' ba, libí'ili' runli' xichinë' Xanru',
 2 libí'ili' na' zuíli' yu'u lidxë' Xanru',
 ga na' zóali' lö'a que yu'u lidxë' Dios queëru'!
 3 ¡Guli'cu'ë yöl-la' ba Xanru' Dios tu' náquië' dxi'a!
 ¡Guli'gul-la yöl-la' ba que La la'ayi queë', tu' naca lachi!
 4 Nabó cazë' Xanru' zxí'ini xi'sóë' Jacob para ilaca quez queë'.
 Guróë' bönachi Israel para ilequi queë'.
 5 Nözda' nayépisë' Xanru' Dios.
 Nayépisëtërë' ca yugu' dios quégaca bönachi izá'a.
 6 Run cazë' Xanru' ca riyaza ladxi' cazë' yehua' yubá ni',
 en luyú ni, en lu nísado', en zxan lu yu.

⁷ Runë' ga rö' böaj gáti'tës luyú ni,
 en runë' ga rëpi yösa cate' ralaj guió'j.
 Rubéajë' bö' recja ga rapa chi'ë le nequi queë'.
⁸ Bétië' yugu' bi'i bönni' zí'alö quégaca bönachi Egipto,
 zxi'inigaca bönachi, en böa' hué'ënido' quégacaba' böa' guixi'.
⁹ Benë' yugu' yöl-la' huáca zxön le gulaca bë' luyú Egipto,
 yugu' lë na' gulaca queë' Faraón, en quégaca huen xichinë'.
¹⁰ Busunítië' Dios bönachi zían yödzö izá'a,
 en bétië' bönni' lo ta'nná bë'ë.
¹¹ Bétië' Sehón, bönni' gunná bé'enë' bönachi Amorreo,
 en Og, bönni' gunná bé'enë' bönachi Basán,
 en bönni' gula'nná bé'enë' bönachi yödzö nacua' luyú Canaán.
¹² Budödë' xiyúgaquië' bönni' na'
 lu ná'agaquië' bönni' Israel, bönachi queë' cazë'.

¹³ Tsaz zoa caz Lo', Xan.
 Ila'cuá'tica'sö nupa tsöjnégaca Li', Xan,
¹⁴ tu' uchi'a usöróu' bönachi queu', Xantu' Dios,
 en huéchi' ládxu'u nupa tun xichinu'.

¹⁵ Budó' quégaca bönachi yugu' yödzö izá'a néquiniguequi
 plata, en oro, yugu' le núngaca lu ní'a lu ná'agaca bönachi.
¹⁶ Zóagaca ru'iguequi, pero biti' bi didza' tu'i.
 Zóagaca guió'j lóguequi, pero biti' bi ta'lé'e.
¹⁷ Zóagaca náagaca, pero biti' bi ta'yöni,
 en biti' ta'guela' bö' ru'igaca.
¹⁸ Nupa tun léguequi ilaca ca náagaca budó' na',
 en caní ilaca yúgu'të nupa tu'zxöni ladxi' léguequi.

¹⁹ Libí'ili', bönachi Israel, guli'guíë' Xanru' náquië' dxi'a.
 Libí'ili', zxi'ini xi'sóë' Aarón, guli'guíë' Xanru' náquië' dxi'a.
²⁰ Libí'ili', zxi'ini xi'sóë' Leví, guli'guíë' Xanru' náquië' dxi'a.
 Libí'ili', núlöli' rádxili'-në' Xanru', guli'guíë' Xanru' náquië' dxi'a.
²¹ Núlöli' zóali' yödzö Sión ral-la' guiéli'-në' Xanru' náquië' dxi'a,
 tu' zoa cazë' Xanru' Dios yödzö Jesusalén.

¡Guli'cu'ë yöl-la' ba Xanru'!

136

¹ ¡Xclenë' Xanru' Dios tu' náquië' dxi'a!
 Zóatica'sö yöl-la' dxi'i ladxi' queë'.
² ¡Xclenë' Dios nayépisëtëre' ca yugu' dios izá'a!
 Zóatica'sö yöl-la' dxi'i ladxi' queë'.
³ ¡Xclenë' Xanru', nayépisëtëre' ca yugu' xángaca bönachi!
 Zóatica'sö yöl-la' dxi'i ladxi' queë'.
⁴ ¡Xclenë' Dios, tuzë' Lë' runë' yugu' yöl-la' huáca zxön!
 Zóatica'sö yöl-la' dxi'i ladxi' queë'.
⁵ ¡Xclenë' Dios, len yöl-la' rácada' queë' benë' lúzxiba!
 Zóatica'sö yöl-la' dxi'i ladxi' queë'.
⁶ ¡Xclenë' Dios, gudixjë' luyú láhuilö nísado'!
 Zóatica'sö yöl-la' dxi'i ladxi' queë'.
⁷ ¡Xclenë' Dios, benë' gubidza, en beo'!

Zóatica'sö yöl-la' dxi'i ladxi' queë'.
⁸ ¡Benë' Dios gubidza para tsení' lahui' dza!
 Zóatica'sö yöl-la' dxi'i ladxi' queë'.
⁹ ¡Benë' Dios beo', en yugu' böljaj para ulu'zení' chi'i dzó'ölö!
 Zóatica'sö yöl-la' dxi'i ladxi' queë'.
¹⁰ ¡Xclenë' Dios, bétië' yugu' bi'i bönni' lo quegaca bönachi Egipto!
 Zóatica'sö yöl-la' dxi'i ladxi' queë'.
¹¹ ¡Bubéajë' bönachi Israel ladaj bönachi Egipto na'!
 Zóatica'sö yöl-la' dxi'i ladxi' queë'.
¹² ¡Len yöl-la' huáca zxön queë', en lu yöl-la' nadxi'i queë' benë' caní!
 Zóatica'sö yöl-la' dxi'i ladxi' queë'.
¹³ ¡Xclenë' Dios, bubéajë' choplö Nísado' Xiná!
 Zóatica'sö yöl-la' dxi'i ladxi' queë'.
¹⁴ ¡Benë' ga gula'dödi bönachi Israel gatsaj láhui'lö nísado' na'!
 Zóatica'sö yöl-la' dxi'i ladxi' queë'.
¹⁵ ¡Lu nísado' na' busunítië' Faraón, en bönni' queë' röjáquië' gudil-la!
 Zóatica'sö yöl-la' dxi'i ladxi' queë'.
¹⁶ ¡Xclenë' Dios, guché'ë bönachi queë' la' guixi' ga ni' naca yu bidxi!
 Zóatica'sö yöl-la' dxi'i ladxi' queë'.
¹⁷ ¡Xclenë' Dios, bétië' bönni' gula'nná bë'ë, guláquië' nal-la!
 Zóatica'sö yöl-la' dxi'i ladxi' queë'.
¹⁸ ¡Bétië' bönni' gula'nná bë'ë, dëda' lu ná'agaquië' yöl-la' unná bë'!
 Zóatica'sö yöl-la' dxi'i ladxi' queë'.
¹⁹ ¡Bétië' Sehón, bönni' gunná bé'enë' bönachi Amorreo!
 Zóatica'sö yöl-la' dxi'i ladxi' queë'.
²⁰ ¡Bétië' Og, bönni' gunná bé'enë' bönachi Basán!
 Zóatica'sö yöl-la' dxi'i ladxi' queë'.
²¹ ¡Budödë' xiyúgaquië' lu ná'agaca bönachi queë'!
 Zóatica'sö yöl-la' dxi'i ladxi' queë'.
²² ¡Budödë' le lu ná'agaca bönachi Israel, bönachi tun xichinë'!
 Zóatica'sö yöl-la' dxi'i ladxi' queë'.
²³ ¡Yöjnenë' rë'u cate' ni' bugá'anaru' cá'asö!
 Zóatica'sö yöl-la' dxi'i ladxi' queë'.
²⁴ ¡Busölë' rë'u lu ná'agaca nupa gula'díl-lalen rë'u!
 Zóatica'sö yöl-la' dxi'i ladxi' queë'.
²⁵ ¡Rugahuë' yúgu'të bönachi!
 Zóatica'sö yöl-la' dxi'i ladxi' queë'.
²⁶ ¡Xclenë' Dios, zoa cazë' yehua' yubá!
 Zóatica'sö yöl-la' dxi'i ladxi' queë'.

137

¹ Ra' yegu nacua' lu yu Babilonia guró'ötu',
 en gurödxí yéchi'tu', cate' yöjnetu' yödzö Sión.
² Lu yaga ró'gaca yugu' ra' yegu ni'
 bugála'tu' yugu' le rúl-lalentu'.
³ Caní bentu' tu' gula'nabi yudxi nupa gulaché' netu' nadzuntu' ni' gúl-latu'.
 Nupa bulu'saca' zi' netu' gula'naba queétu' yöl-la' ruzxidxi, gula'nná:
 "Gulí'gul-la queétu' tu le rul-la que yödzö Sión."
⁴ ¿Nacxi caz gaca gúl-latu' le rul-la queë' Xanru'
 ga ni nadzuntu' tu lu yödzö izá'a?

⁵ Channö gal-la ládxa'a yödzö Jerusalén,
rinábida'-në' Dios ugúë' yöl-la' raca que na'a ibëla.

⁶ Rinábida'-në' gunë' ga ta' lúdxa'a chichja'
channö cabí tsöjneda' ladza',
en channö cabí huí' zxönra' yödzö Jerusalén ca ia'tú le ruzí'ida' xibé.

⁷ Yöjné le gulunë' xí'ini xi'sóë' Edom, Xan,
le gulunë' dza busiúdxu' yödzö Jerusalén,
ca na' gula'nné': "Guli'quínnej dëra.
Guli'quinnaj dëra ga idxintë xilibi zö'ö yödzö na'."

⁸ Libí'ili', bönachi Babilonia, libí'ili' rusunítili',
bica' ba nu ubí'i queé'li' ca na' benli' queétu'.

⁹ Bica' ba nu quela' yugu' bí'ido' queé'li'
en uzxuzxaj lézacabi' yugu' lu guió'j.

138

¹ Idú ládxa'a guía' Li', "Xclenu" Xan.

Gul-la' yöl-la' ba quiu' lógaca le tun zxön bönachi yugu' yödzö izá'a.

² Uzóa zxiba' saca' yudo' lá'ayi quiu', en guía' Li', "Xclenu"
ni'a que Lo', tu' nacu' dxi'i ladxi', en runu' ca rnna didza' bë'u,
tu' benu' ca naca lu xtídzu'u, en lu le naca ca nazí'i lo.

³ La' dza ná'asö cate' bulidza' Li', bubí'u didza'.
Tu' butipu' ládxa'a, guca' rugu ladxi'.

⁴ Yúgu'të bönni' ta'nná bë'ë ilé' Li': "Xclenu" Xan,
cate' ila'yönnë' didza' ru'u.

⁵ Ilul-lë' ca nácagaca le runë' Xanru' Dios,
tu' nácaterö zxön yöl-la' ba queë' Xanru'.

⁶ Sal-la' nayépisëtë're' Xanru' Dios
ruí'i ládxe'ë nupa nácagaca cá'asö,
pero zi'tu' zí'tu' sö ruyúë' nupa tun ba zxön cúnguequi.

⁷ Sal-la' ridá' ga zoa bönadxi quia', Li' utipa cazu' ládxa'a.
Tíl-lalen cazu' nupa ta'díl-lalen neda',
ate' len yöl-la' huáca quiu' usóló' neda'.

⁸ Xanru' gun cazë' quia' ca chinuzóa cazë' gunë'.

Zóatica'sö yöl-la' dxi'i ladxi' quiu', Xan.
Biti' usán no'o le nun cazu' len na' cuinu'.

139

¹ Ruyú cazu' le yu'u icja ládxi'da'ahua', Xan, en nunbë' cazu' neda'.

² Nöz quézinu' cate' ribö'a, en cate' riyasa'.

Nózinu' le rizá' ládxa'a ni' zu' zi'tu'.

³ Ruyú cazu' neda' cate' bi runa', en cate' rasia',
en nózinu' yúgu'të le runa'.

⁴ Zí'atëlö ca bi didza' ru'a,
chi nöz quézinu' bi innía', Xan.

⁵ Röjnöru cazu' lahua', en za' cazu' cúdza'a,
en naxóatica'sö no'o neda'.

⁶ Run ga rubánida' tu' nöz quézinu' Li'.

Biti' séqui'da' tséajni'ida' ca naca.

⁷ ¿Naru' huáca tseja' ga biti' idxín Bö' quiu'?
 ¿Naru' huáca izxúnnaja' ga biti' zoa cazu' Li'?

⁸ La'tu' huabena' lúxiba, ni' soa cazu' Li',
 en la'tu' huötja' lataj chul-la, ni' zoa cazu' ca'.

⁹ La'tu' uyija' ga rilén gubidza,
 o la'tu' huadóda' ia'tsölá'alö nísado',
¹⁰ ni' caz ichë'u neda',
 ate' len no'o ibëla sön cazu' neda'.

¹¹ La'tu' innía': "Ucachi' neda' le naca chul-la",
 en la'tu' huóaca chul-la bení' zóalen neda',
¹² biti' gaca chul-la lo' Li' lë na' naca chul-la quia',
 pero chi'i dzó'ölö gaca quiu' ca lahui' dza.
 Tuz ca nácgaca lo' Li' le naca chul-la, en le naca lahui' dza.

¹³ Nun cazu' Li' le zoa icja ládxi'da'ahua'.
 Benu' ga guyá' lé'ënu xiná'a le naca caza'.

¹⁴ Guía' Li': "Xclenu" tu' run ga rubánida' ca nun cazu' neda',
 ate' rádxida' Li' tu' tun le nunu' ga rubánida',
 ate' bö' naca caza' nözi caz naca caní.

¹⁵ Biti' bigachi' lo' le naca caza' cate' ni' si' galja',
 cate' ni' yu'a lé'ënu xiná'a.

¹⁶ Bilé'e quézinu' neda' cate' ni' si' galja',
 tu' chinuzúajgaca lu guichi quiu'
 yugu' dza ral-la' soa' ibana',
 sal-la' biti' ridxini nitú dza na'.

¹⁷ Nazáca'tërögaca quia' le rizá' ládxi'u, Dios.
 Ziántërö nácgaca lë na' rizá' ládxi'u.

¹⁸ La'tu' huáca nu ulaba léguequi,
 ilácgaca ziántërö ca nácgaca guiój yuzxi.
 Cate' rubana', ni' zóalena' Li'.

¹⁹ Raca ládxa'a usunítu' nupa tuá' dö', Dios.

Que lë ni na', guli'cuíta ga zoa', núlöli' rútili' bönachi.

²⁰ Tu'i didza' zi' ca nacu' Li', Dios,
 ate' nupa ta'dá'baga' Li' ta'nné liz que Lo'.

²¹ ¿Naru' cabí rileda' nupa ta'lé Li', Xan?
 ¿Naru' cabí ruzóa' tsölá'alö nupa ta'dá'baga' Li'?

²² Idú ládxa'a biti' rilé'eda' léguequi dxi'a.
 Nuzóa' léguequi ca nupa ta'díl-lalen neda'.

²³ Buyú neda', Dios, en gúquibe'e le zoa icja ládxi'da'ahua'.
 Guzxí' bë' neda', en gúquibe'e le rizá' ládxa'a.

²⁴ Buyú channö zóalen neda' le naca dö',
 en bulufi' neda' nöza tsahui' quiu' zóatica'sö.

140

¹ Busölá neda', Xan, lu ná'agaca nupa tuá' dö'.
 Ben chi'i neda' para cabí bi ilunë' bönni' zi' quia'.

² Ta'zá' ládxi'ë le nácgaca xihui' ilunë',
 en tunë' ga ila'díl-lalen bönachi luzé'eguequi.

³ Didza' tu'ë tun ga nácgaca lúdxi'gaquië' ca yugu' bëla sínia'.

Yu'u ru'agaquië' le naché' yöl-la' guti ca le dxía lu láyi'ba' bëla na'.

⁴ Ben chi'i neda', Xan, para cabí bi ilunë' bönni' tu'ë dö' quia'.

Ben chi'i neda' para cabí bi ilunë' bönni' zidzaj quia',

bönni' na' té'ënë' ilunë' ga ichixi iníguida'.

⁵ Nupa tun ba zxön cuínguequi nucáchi'gaca le sön neda',

enca' du yalaj iröli neda'.

Nucáchi'gaca du yalaj ga ral-la' töda'.

Nucózagaca le ila'zón neda'.

⁶ Gudxa'-në' Xanru': "Nacu' Dios quia'.

Ruzé nagu', Xan, yugu' le rinábida' Li'.

⁷ Xana' Dios, naca cazu' Nu rusölá neda' len yöl-la' huáca quiu'.

Ben chi'i cazu' icja' cate' ni' zoa' lu gudil-la.

⁸ Biti' gu'u lataj, Xan, gaca quia' le ré'ënë' gunë' bönni' ru'ë dö'.

Biti' gu'u lë' lataj idéli'në' le rizá' ládxë'ë, para cabí tsépisë'.

⁹ Nacuá' nupa nagú'ugaca neda' lé'ajlö.

Busubaga' ícjagaquië' dö' té'ënë' ilu'ë quia'.

¹⁰ Ben ga ila'bixaj bo' yalaj lahui ícjagaquië'.

Bë' lataj tsöjtsázagaquië' tu lu guí' zxön,

en yugu' lu yeru zila ga bití' ila'zéqui'në' ulu'rúajë'.

¹¹ Biti' gu'u lataj soë' bönni' rizi' yë'ë luyú ni.

Ben ga udxín queë' bönni' zidzaj dö' ru'ë."

¹² Nözda' gunë' Xanru' ga ulu'rúaj tsahui' nupa ta'guí'i ta'zaca',

en uchi'a usöröë' quégaca bönachi yechi'.

¹³ Le nácatë ilé Li': "Xclenu'" nupa nácatë tsahui' tu' tu'lidza Lo'.

Ila'cuá' ga zoa cazu' Li' nupa nácatë dxi'a.

141

¹ Rulidza' Li', Xan. Gudáchi ga zoa'.

Ruzé nagu' chí'a cate' rulidza' Li'.

² Buyú le rulidza' Li' ca dzön yalaj le ridxín lo',

en cate' richisa na'a, buzí' le ca tu böa'do' uzégui'a-ba' lo'.

³ Ben chi'i ruá'a, Xan,

en gudapa chí'i guídi ruá'a para cabí gu'a didza' zi'.

⁴ Biti' gu'u lataj gaca ládxa'a le cabí nácatë,

para cabí guna' le naca xihui'

len yugu' bönni' tutië' bönachi.

Biti' gu'u lataj guna' léguequi tsözxón.

⁵ Bë' lataj gu'ë neda' bönni' tsahui' lu yöl-la' nadxí'i queë'

para uzéajni'inë' neda'.

Le gunë' gaca quia' ca le za cu'ë icja'.

Biti' gu'u lataj tá'baga' icja' le ilún nupa tuá' dö'.

Rinábida' Li' uzagu' xinózguequi.

⁶ Ila'ládzugaquië' bönni' lo quéguequi lë'e guí'a guiój,

ate' iléquibe'e gulaca dxi'a didza' bë'a.

⁷ Ca raca cate' nu rugá'ana-ba' bédxi, en rulá'a yu,

ca' gaca que dxita yú'ugaquië',

le gulásilasi ra' ba que xilátjagaca nupa nátagaca.

⁸ Richisa lahua' ruyúa' ga zu' Li', Xantu' Dios.

Rucachi' cuina' ga na' zu'. Biti' usán no'o neda'.

⁹ Ben ga bití' tsöjbixa' lu le sön neda', lë na' nucáchi'gaca,
en ga bití' tsöjtsaza' lu du yalaj nucózagaca nupa tuá' dö'.

¹⁰ Bë' lataj ila'yaza la' cuíngacasö lu du yalaj bulu'cachi' nupa tuá' dö',
pero benna lataj tódisa' neda' ga na' nagachi' du yalaj na'.

142

¹ Rulidza'-në' Xanru', ru'a zidzaj didza'.

Ráta'yua' lahuë' Xanru' uzá' ládxe'ë quia'.

² Rudöda' lahuë' yöl-la' rinaba yudxi quia',
en rusiyönda' Lë' le rácagaca quia'.

³ Cate' budú ládxa'a,
gunözi quézinu' Li' le guca quia'.

La' nöza ga ridá' neda'
bulu'cachi' le sön neda'.

⁴ Buyú cuita' ibëla

tu' cuntú nu zoa nu ruí' i ladxi' neda'.
Biti' bi zoa le gácalen neda'.

Cuntú nu run chi'i bö' naca caza'.

⁵ Guródxí'a lo' Li', Xan, gunnía':

Run chi'i cazu' neda' Li',
en naca cazu' Nu rácalen neda' ladaj nupa nabángaca.

⁶ Ruzé nagu' le rulidza' Li',
tu' nagá'ana' cá'asö.

Busöla' neda' lu ná'agaca nupa ta'zóa regu' neda',
tu' nácatërögaca nál-la ca neda'.

⁷ Guléaj bö' naca caza' lu yu'u lidxi guié,
para gaca guía' Li': "Xclenu" tu' rulidza' Lo'.

Nupa nátagaca tsahui' ulu'dubi idú gásibi'ilö ga zoa',
tu' gunnu' sizxöni quia' le riquinda'.

143

¹ Ruzé nagu' le rulidza' Li', Xan.

Ruzé nagu' le rinabi yúdxida' Li'.

Tu' runu' ca rnna didza' bë'u, en nacu' tsahui' gunnú'

² bití' ichë'u neda' lo' ga uchi'a usöróu' quia', huen dxin quiu'.

Cuntu nu zoa naca tsahui' lo' Li'.

³ Nu bití' rilé'e neda' dxi'a zoa regu' bö' naca caza'.

Nuzötjé' yöl-la' na'bán quia' lu yu.

Benë' ga zoa' lataj naca chul-la ca raca quégaca nupa gulati dza ni'te.

⁴ Que lë ni na' rudú ládxa'a, en rö'a böniga.

⁵ Röjneda' dza chigula'dödi.

Rizá' ládxa'a ca nátagaca le benu' Li'.

Ribequi icja' ca nátagaca le nun no'o.

⁶ Richisa na'a zaca' ga zu' Li'.

Rizé ládxa'a Li' ca tu luyú bidxi rizé ladxi' nisa guiój.

⁷ Bubí'itë didza', Xan, tu' rudú ládxa'a.

Bití' ucachi' lo' lahua' neda',

para cabí gaca' ca tu bönni' ru'ë lataj chul-la ga nacua' nupa nátagaca.

⁸ Ben ga yönda' yugu' zila ca naca yöl-la' dxi'i ladxi' quiu',

tu' ruzxöni ládxa'a Li'.

Busëdi neda' ca ral-la' guna',

tu' ruchisa' lo' Li' bö' naca caza'.

⁹ Busölä neda', Xan, lu ná'agaca nupa biti' ta'lé'e neda' dxi'a.

Nacu' Nu ruzóa neda' tsutsu.

¹⁰ Busedi neda' para guna' ca ré'ënu' Li',

tu' naca cazu' Li' Dios quia'.

Bë' lataj iché' Bö' Lá'ayi quiu' neda' lu nöza tsahui'.

¹¹ Butipa ládxa'a, Xan, para gaca yöl-la' ba que Lo'.

Tu' nacu' tsahui' busölä neda' lu le raca quia'.

¹² Lu yöl-la' dxi'i ladxi' quiu' guchugu quégaca nupa biti' ta'lé'e neda' dxi'a.

Busuniti yúgu'të nupa tu'saca' zi' bö' naca caza',

tu' naca' huen dxin quiu'.

144

¹ ¡Yöl-la' ba Lë', Xanru' Dios!

¡Náquië' ca tu guió'j ga zoa' tsutsu!

Rutipë' na'a para gaca tseja' gudil-la,

en rutipë' ca' xibón na'a para gaca tíl-lalena' bönni' nácagaquië' nál-la.

² Naca cazë' Xanru' yöl-la' dxi'i ladxi' quia',

enca' ca tu ga zoa' tsutsu lu gudil-la.

Rusölë' neda', en náquië' ca tu ga zoa' tsaz.

Náquië' ca tu le run chi'i neda' lu gudil-la, ate' rucachi' cuina' ga na' zoë'.

Runë' ga tun nupa rinná bé'eda' ca rnna didza' ru'a.

³ ¿Bízxatë caz náquië' bönni' tu' runu' lë' ba lá'ana, Xan?

¿Bízxatë caz náquië' bönni' tu' ruí'i ladxi' cazu' lë'?

⁴ Naca cazë' bönni' na' ca tu bö'do' recja,

ate' yugu' dza zoë' nabanë' nácagacasö ca tu zxul-la le rigú'u tu böaj ridódisö.

⁵ Buzötaj lúzxiba, en bðinne ni, Xan.

Gudán yugu' guí'a, ate' irúaj dzön lé'eguequi.

⁶ Ben ga tsëpi yösa quiu', en bésilasi lé'guequi.

Busé yugu' yaga lahui tuchi', en ben ga ila'bó' baguí'isö.

⁷ Bulí no'o ga na' zu' xitsá'alö.

Busölä neda', en guléaj neda' lu ná'agaca bönachi zi'tu',

le gaca ca rubéaju' neda' lu nisa zila.

⁸ Ta'zí' yë' bönachi na',

ate' le cabí nácatë naca yöl-la' unná bë' quéguequi.

⁹ ¡Gul-la' quiu' Li', Dios, tu le cubi!

¡Gul-la' quiu' yöl-la' ba, en quínnia' bihuël-la nuá' chi du que!

¹⁰ Rusölä cazu' bönni' ta'nná bë'ë.

Busöló' David, huen dxin quiu', lu guië tuchi' queë' bönni' ru'ë dö'.

¹¹ Gúcalen neda', en busölä neda' lu ná'agaca bönachi zi'tu'.

Ta'zí' yë' bönachi na',

ate' le cabí nácatë naca yöl-la' unná bë' quéguequi.

¹² Ben ga ilácabi' bi'i bönni' queétu' ni yu'ugacabi' iz cuidi'

ca yugu' yaga nazxóngaca,

en ben ga ilácabi' bi'i nigula queétu'

ca nácagaca ya'zxén que tu yu'u nazaca'.

¹³ Ben ga ilígaca yu'u queé'tu' zxa' za utúbitu',
en ben ga iláljaba' gayuá' gayuá'aba' chíbodo',
en bö'cu' zxíla'do' ga nucuá'atu'-ba'.

¹⁴ Ben ga ulu'cuá'aba' böa' hué'énido' quégaca böa' guixi' queé'tu',
en ga biti' bi gaca quégacaba' bédxi zxön, en bédxido' ca'.
Biti' gu'u lataj soa nu cödxi yechi' la' nöza que ládzatu'.

¹⁵ ¡Bica' bágaca bönachi raca caní quéguequi!
¡Bica' bágaca bönachi na' Xanru' Dios náquië' Dios quéguequi!

145

¹ ¡Guna' Li' zxön, Dios!

¡Nacu' Nu rinná be'e neda'!

¡Gádxítica'sa' Lo', Xana' Dios!

² ¡Tu dza tu dza cu'a Li' yöl-la' zxön,
en cú'utica'sa' Lo' yöl-la' ba!

³ ¡Nayépisëtë'rë' Xanru' Dios, ate' cú'uru'-në' yöl-la' ba!
¡Biti' ca' gaca gúnbë'ëru' ca naca yöl-la' zxön queë'!

⁴ Yúgu'të bönachi ila'gú'u yöl-la' ba le nun cazu' Li',
para ulu'siyón zxí'inigaca,
en ulu'luí'i lahui le nácagaca zxön benú'.

⁵ Sa' ládxa'a ca naca yöl-la' zxön que yöl-la' unná bë' quiu',
en ca nácagaca yöl-la' huáca zxön runu'.

⁶ Iluí'i didza' yúgu'të bönachi ca naca yöl-la' zxön
quégaca yöl-la' huáca runu'.

Usiyönda' bönachi ca naca yöl-la' zxön quiu'.

⁷ Idú ládxi'gaca iluí'i didza' cate' tsöjnégaca yöl-la' dxi'i ladxi' zxön quiu'.
Lu yöl-la' rudzeja quéguequi ila'bódxí'a tu' nacu' tsahui'.

⁸ Xanru' Dios ruzá' ládxe'ë queé'ru', en ruhuéchi' ládxe'ë rë'u.
Biti' ilética'së', ate' zxóntërö naca yöl-la' dxi'i ladxi' queë'.

⁹ Runë' Xanru' Dios le naca dxi'a quégaca yúgu'të bönachi,
en ruhuéchi' ládxe'ë yúgu'të le nunë'.

¹⁰ Yúgu'të le nunu' ilé Li': "Xclenu" Xan,
ate' nupa néquiguequi quez quiu' ilún Li' zxön.

¹¹ Iluí'i didza' ca naca yöl-la' zxön que le rinná bë'u,
en ulu'luí'i lahui yöl-la' zxön quiu',

¹² para ulu'siyón bönachi ca nácagaca le zxön runu',
en ca naca yöl-la' zxön que le rinná bë'u le nayépisëtë'rö.

¹³ ¡Zóatica'sö le rinná bë'u,

ate' idía'tica'sö yöl-la' unná bë' quiu'!

¡Lu le naca idú ladxi' queë' runë' Dios ca rnnágaca yúgu'të didza' ru'ë,
en lu yöl-la' dxi'i ladxi' queë' runë' yúgu'të le runë'!

¹⁴ ¡Röjzönë' Xanru' yúgu'të nupa röjtsó'ögaca,
en ruchisë' yúgu'të nupa ndínnegaca!

¹⁵ ¡Yúgu'të bönachi tu'yú Li', Xan,
ate' runödzu' le ilágugaca cate' ridxín dza que!

16 ¡Rusalaj cazu' no'o
en rugagu' yúgu'të le nacuá' nabángaca!

17 Náquië' tsahui' Xanru' Dios ca naca yúgu'të le runë'
en náquië' ca' dxi'i ladxi'.

18 Zoë' Xanru' gala' ga nacuá' yúgu'të nupa tu'lidza Lë',
nupa na' tu'lidza Lë' idú ládxi'guequi.

19 Gunnë' le ta'zé ládxi'gaca quégaca nupa tadxi Lë'.
Riyönnë' cate' tu'lidza Lë', en rusölë' léguequi.

20 Run chi'i cazë' Xanru' yúgu'të nupa nadxí'igaca Lë',
pero usunítië' nupa tuá' dö'.

21 Len ru'a cuina' cu'a-në' Xanru' yöl-la' ba,
ate' yúgu'të bönachi ilúntica'sö Lë' zxön.

146

1 ¡Guli'cu'ë yöl-la' ba Xanru'!

¡Li', bö' naca caza', gulu'ë yöl-la' ba Xanru'!

2 ¡Cu'a-në' Xana' yöl-la' ba tsanni ni zoa' nabana'!

¡Gul-la' yöl-la' ba queë' Dios quia' tsanni ni zoa bö' naca caza'!

3 Biti' uzxöni ládxi'li' bönni' ta'nná bë'ë,
en calëga bönni' tati cazë', bönni' biti' ca' gaca ulu'sölë' rë'u.

4 Rurúaj bö' yu'ë nu bönni', ate' ruhuóáquië' yu.

La' dza ná'asö riniti le rizá' ládxe'ë gunë'.

5 Bica' ba bönni' rácalenë' Dios queë' Jacob lë',
bönni' na' runë' löza Xanru' Dios.

6 Nunë' Xanru' Dios lúxiba, en luyú ni,
enca' nísado', en yúgu'të le nacuá' yugu' lataj na'.

Rúntica'së' Lë' ca rnna didza' bë'ë,

7 en ruchi'a rusöróë' nupa zoa nu rusaca' zi' léguequi.

Rugagu' cazë' nupa ta'dún.

Rusanë' Xanru' Dios nupa nadzúngaca.

8 Rusaljë' Xanru' Dios guió'j lógaca nupa nácagaca lo chul-la.

Ruchisë' Xanru' Dios nupa nadzó'ögaca.

Nadxí'inë' Xanru' Dios nupa nácagaca tsahui'.

9 Rapa chi'ë Xanru' Dios yugu' bönni' zi'tu'.

Rácalenë'-bi' yugu' bi'i uzëbi, enca' yugu' nigula uzëbi,

pero ruzaguë' xinó'zguequi nupa tuá' dö'.

10 Inná bë'tica'së' Xanru' Dios.

Náquië' Dios queéli', bönachi Sión.

¡Guli'cu'ë yöl-la' ba Xanru'!

147

1 ¡Guli'cu'ë yöl-la' ba Xanru'!

¡Tsahui' naca gúl-laru' yöl-la' ba queë' Dios queëru'!

¡Naca lachi, en le ral-la' gunru', cú'uru'-në' yöl-la' ba!

2 Runë' Xanru' Dios ga rizxón yödzo Jerusalén.

Rutubë' bönni' Israel násilasigaquië'.

3 Ruúnë' bönni' nácagaquië' yechi' ladxi',

en rudé'ë lari' ga dxíagaquië' huë'.

⁴ Rulabë' tsca nacua' böljaj lúzxiba.

Nucu'ë lágacaba' tu tuba' yúgu'të böljaj na'.

⁵ Nayépisëtërë' Xanru' Dios, en nál-latërë'.

Ga rë'ë dzu réajni'inë' yúgu'të.

⁶ Xanru' Dios rácalenë' nupa ta'guí'i ta'zaca'.

Ruzötjë' nupa tuá' dö' lu yu.

⁷ ¡Guli'gul-la queë' Xanru' Dios, guiéli'-në': "Xclenu"!

¡Guli'gul-la yöl-la' ba queë' Xanru', quínnili' lé'egaca bihuél-lado'!

⁸ Riguísië' yugu' böaj lúzxiba,

en risól-lë'ë nisa guiój luyú.

Runë' ga rilén yö yugu' lu guí'ado'.

⁹ Rugahuë' yugu' böa' guíxi'do',

enca' bóiquiajdo' ta'bódxí'aba'.

¹⁰ Biti' raza ládxë'ë yöl-la' nál-la queé'ba' böa',

en bití' ruzi'ë xibé yöl-la' nál-la queë' bönni'.

¹¹ Raza ládxë'ë Xanru' Dios nupa tadxi Lë',

nupa na' tun löza yöl-la' dxi'i ladxi' queë'.

¹² ¡Guli'cu'ë yöl-la' ba Xanru', libí'ili' zóali' Jerusalén!

¡Guli'cu'ë yöl-la' ba Dios queéli', libí'ili' zóali' Sión!

¹³ Bucu'ë tsutsu le tu'baga' gapa nu riyaza yödzö queéli',
en runë' ga raca dxi'a quegaca zxí'inili' ga na' zóali'.

¹⁴ Runë' ga ribózali' dxi'a tsáhui'do',

en runë' ga ruhuölaj ridzé'eli' xzoa' xtila dxí'atërö.

¹⁵ Rinná bé'enë' yödzölió ni,

ate' xtídzë'ë ridóditë gáti'tës.

¹⁶ Risól-lë'ë guiój bögui' ca zxila',

en riguísië' buzén ca dö.

¹⁷ Riguísië' bögui' ca yugu' guiój ruaj.

¿Nuzxi caz gaca guá' ilén le naca ziaga queë'?

¹⁸ Risól-lë'ë xtídzë'ë, ate' ruúna' bögui' na'.

Runë' ga recja bö', ate' ruhuóaca nisa.

¹⁹ Ruí'ilenë' zxí'ini xi'sóë' Jacob didza',

en riguíxjë' xibá queë' para ilún bönachi Israel ca rnna.

²⁰ Biti' benë' caní ni'a quegaca bönachi ia'tú yödzö izá'a,

ate' bití' nózigaca ca nácagaca le gunná bë'ë.

¡Guli'cu'ë yöl-la' ba Xanru'!

148

¹ ¡Guli'cu'ë yöl-la' ba Xanru'!

¡Guli'cu'ë yöl-la' ba, libí'ili' zóali' yehua' yubá!

¡Guli'cu'ë yöl-la' ba, libí'ili' zóali' xitsá'alö!

² ¡Guli'cu'ë yöl-la' ba, libí'ili' gubáz lá'ayi queë'!

¡Guli'cu'ë yöl-la' ba, libí'ili' tscali' dá'ali' Lë'!

³ ¡Guli'cu'ë yöl-la' ba, libí'ili' gubidza, en beo'!

¡Guli'cu'ë yöl-la' ba, libí'ili' böljaj bení'!

4 ¡Guli'cu'ë yöl-la' ba, libí'ili' zóali' znan lúzxiba!
 ¡Guli'cu'ë yöl-la' ba, libí'ili' nisa, zxóali' láhuilö lúzxiba!

5 ¡Guli'cú'u yöl-la' ba La la'ayi queë' Xanru', yúgu'téli',
 tu' bé'ësë' didza', en canísö benë' libí'ili'!

6 Naguixjë' tsaz libí'ili'.
 Naguixjë' xtídzë'ë le catu caz tödi que.

7 ¡Guli'cu'ë yöl-la' ba Xanru' idútë yödzölió,
 en libí'ili' böa' ridali' lu nísado', en nísado' caz,
 8 en libí'ili' guí', en guiój bögui' yöla sunna, bögui', en böaj,
 enca' li', bö' budunu', runu' ca rnna xtídzë'ë,
 9 en libí'ili' yugu' guí'a, en yúgu'të guí'ado',
 en libí'ili' yaga dxíagaca le ta'bía, en yugu' yaga dxi'a,
 10 en libí'ili' böa' guixi', en böa' bédxi,
 böa' tá'ayöj lé'ëba' lu yu, en böa' zoa xíligacaba',
 11 enca' libí'ili' rinná bé'ëli' yödzölió, en bönachi yugu' yödzö izá'a,
 yugu' xzí'inigaquië' bönni' ta'nná bé'ë, en bönni' ruchi'a rusöröli' yödzölió,
 12 enca' libí'ili' bi'i bönni', en bi'i nigúlado',
 yugu' bönni' zxön, en yugu' bí'ido'!
 13 ¡Guli'cú'u yöl-la' ba La la'ayi queë' Xanru'
 tu' nayépisëtëro tuzë' Lë'!
 ¡Nayépisëtëro yöl-la' ba queë' ca luyú ni, en ca lúzxiba xitsá'!

14 Nuchisë' tu le nuzóa tsutsu bönachi queë',
 le naca yöl-la' ba ta'gú'u Lë' nupa néquiguequi queë',
 yugu' xzí'ini xi'sóë' Israel, nupa na' nadxí'inë'.

¡Guli'cu'ë yöl-la' ba Xanru'!

149

1 ¡Guli'cu'ë yöl-la' ba Xanru'!
 ¡Guli'gul-la queë' Xanru' Dios tu le cubi,
 en guli'gul-la yöl-la' ba queë' ga nudúbigaca nupa néquiguequi quez queë'!

2 Ral-la' ulu'zí' xibé' Xanru' Dios bönachi Israel,
 tu' náquië' Nu ben léguequi.

Ral-la' ulu'dzéjalen Dios nupa nacua' Sión,
 tu' náquië' Nu rinná be'e léguequi.

3 Ral-la' ila'gú'u yöl-la' ba La la'ayi queë',
 en lu yöl-la' rudzeja ulu'yá'a lahuë'.
 Ral-la' ilúl-la yöl-la' ba queë', ila'capa' lë'e guídi,
 en ila'quínni lé'egaca bihuél-lado',

4 tu' raza ládxe'ë Xanru' Dios bönachi queë'.
 Uchisë' nupa ta'guí'i ta'zaca', en usölé' léguequi.

5 Nupa néquiguequi quez queë' ral-la' ulu'dzeja ládxi'gaca lu bení' queë'.
 Lu yöl-la' rudzeja quéguequi ral-la' ilúl-la queë' cate' ni' dégaca lu le ráti'gaca.

6 Yöl-la' ba queë' Xanru' Dios ral-la' sóatica'sö ruí'iguequi,
 en tu guíë' tuchi' natuchi' iropa la'a lu ná'agaca,

7 para ulu'zí' lébi bönachi yugu' yödzö izá'a,
 en ilún xigua' bönachi izá'a na',

8 para ilúguë'ë bregui' guíë ná'agaquië' bönni' ta'ná bé'enë' bönachi yödzö izá'a na',

en ulu'cu'ë bregui' guié yen ná'agaquië' bönni' lo quégaquië',
⁹ para ilunë' quéguequi ca nachuguë' Dios gaca quéguequi.
 Naca lë ni le run bal nupa néquiguequi quez queë' Dios.

¡Guli'cu'ë yöl-la' ba Xanru'!

150

¹ ¡Guli'cu'ë yöl-la' ba Xanru'!

¡Guli'cu'ë yöl-la' ba Dios lu lataj lá'ayi queë'!

¡Guli'cu'ë yöl-la' ba ga dëda' lataj queë'!

² ¡Guli'cu'ë yöl-la' ba ca nácgaca le zxön nunë'!

¡Guli'cu'ë yöl-la' ba ca naca yöl-la' zxön queë'!

³ ¡Guli'cu'ë yöl-la' ba, ucódxili' lúzugacaba' chivo!

¡Guli'cu'ë yöl-la' ba, quínnili' lé'egaca bihuël-la ca'!

⁴ ¡Guli'cu'ë yöl-la' ba, cápa'li' lë'e guídi, en uya'ali'!

¡Guli'cu'ë yöl-la' ba, quínnili' lé'egaca bihuël-la, en ucódxili' gui!

⁵ ¡Guli'cu'ë yöl-la' ba, utíl-lali' guié lë'e luzé'e!

¡Guli'cu'ë yöl-la' ba, utíl-lali' guié zxön lë'e luzé'e!

⁶ ¡Guli'cu'ë yöl-la' ba Xanru', tscali' rizi'ili' bö'!

¡Guli'cu'ë yöl-la' ba Xanru'!

DIDZA ' DXI'A BUZÚAJĚ' MATEO

*Yugu' xuz xině'e gudödi queë' Jesús
(Lc. 3:23-38)*

¹ Ni ruzúaja' lágaquië' xuz xině'e gudödi queë' Jesucristo. Nabábagaquië' David, enca' Abraham xuz gudödi queë'.

² Abraham gúquië' xuzë' Isaac.
Isaac gúquië' xuzë' Jacob.

Jacob gúquië' xúzgaquië' Judá, en yugu' bönni' bóchě'ë.

³ Judá gúquië' xúzgaquië' Fares, en Zara, ate' Tamar gúcanu xiná'agaquië'.

Fares gúquië' xuzë' Esrom.

Esrom gúquië' xuzë' Aram.

⁴ Aram gúquië' xuzë' Aminadab.

Aminadab gúquië' xuzë' Naasón.

Naasón gúquië' xuzë' Salmón.

⁵ Salmón gúquië' xuzë' Booz, ate' Rahab gúcanu xině'ë.

Booz gúquië' xuzë' Obed, ate' Rut gúcanu xině'ë.

Obed gúquië' xuzë' Isaí.

⁶ Isaí gúquië' xuzë' David.

David na' gunná bé'eně' bönachi Israel, ate' butsaga ná'aleně'-nu nigula na' gúcanu zí'alö nigula queë' Urías, ate' David, en nigula ni guláquië' xuz xině'ë Salomón.

⁷ Salomón gúquië' xuzë' Roboam.

Roboam gúquië' xuzë' Abías.

Abías gúquië' xuzë' Asa.

⁸ Asa gúquië' xuzë' Josafat.

Josafat gúquië' xuzë' Joram.

Joram gúquië' xuzë' Uzías.

⁹ Uzías gúquië' xuzë' Jotam.

Jotam gúquië' xuzë' Acáz.

Acáz gúquië' xuzë' Ezequías.

¹⁰ Ezequías gúquië' xuzë' Manasés.

Manasés gúquië' xuzë' Amón.

Amón gúquië' xuzë' Josías.

¹¹ Josías gúquië' xúzgaquië' Jeconías, en yugu' bönni' bóchě'ë.

Yugu' bönni' ni gula'cu'ë dza ni' cate' yugu' bönni' Babilonia gula'ché'ë bönachi Israel nadzúngaca lu xiyúgaquië'.

¹² Jeconías gúquië' xuzë' Salatiel.

Salatiel gúquië' xuzë' Zorobabel.

¹³ Zorobabel gúquië' xuzë' Abiud.

Abiud gúquië' xuzë' Eliaquim.

Eliaquim gúquië' xuzë' Azor.

¹⁴ Azor gúquië' xuzë' Sadoc.

Sadoc gúquië' xuzë' Aquim.

Aquim gúquië' xuzë' Eliud.

¹⁵ Eliud gúquië' xuzë' Eleazar.

Eleazar gúquië' xuzë' Matán.

Matán gúquië' xuzë' Jacob.

¹⁶ Jacob gúquië' xuzë' José.

José ni gúquië' bönni' queénu María, ate' María ni gúcanu xiné'ë Jesús, lë' ca' Cristo, Bönni' na' tun löza bönachi judío guidé' idinná bé'enë' légaquië'.

¹⁷ Caní naca, gulaca chidá' cö' di'a dza ga gusí lo zoë' Abraham ga bidxintë zoë' David, ate' gulaca ca' ia'chidá' cö' di'a dza ga gusí lo zoë' David ga bidxintë dza yugu' bönni' Babilonia gula'ché'ë bönachi Israel nadzúngaca, ate' gulaca ca' ia'chidá' cö' di'a dza ga gusí lo dza ni' gula'ché'ë léguequi ga bidxintë dza guljé' Cristo.

Yugu' le guca cate' guljé' Jesucristo
(Lc. 2:1-7)

¹⁸ Caní guca cate' guljé' Jesucristo. Cate' ni' chinazí' lu ná'abi' María, xiné'ë Jesucristo utsaga ná'aleni' José, en zí'atëlö cate' si' utsaga ná'aleni'-bi', en cabí ne sóaleni'-bi', guyú'ubi' tubi' bí'ido' lé'ëbi' María na'. Guca caní ni'a que yöl-la' huáca queë' Dios Bö' Lá'ayi. ¹⁹ Náquië' José na', bönni' queébi' María, bönni' tsahui', pero biti' gú'unnë' uzéguië'-bi' didza' lógaca bönachi. Gú'unnë' ulá'aleni'-bi' bagáchi'sö. ²⁰ Tsanni ni' rizá' ládxë'ë José ca na' gunë', buluf'i lahuë' gubáz lá'ayi queë' Xanru' lahuë' José lu yëla béchigal, en gudxë' lë':

—José, xzí'ini xzí'sóë' David. Biti' gádxinu' si'u-bi' María, para gácabi' nigula quiu', tu' yú'ubi' bi'i bönni'do' lé'ëbi' ni'a que yöl-la' huáca queë' Dios Bö' Lá'ayi. ²¹ Gáljabi' tubi' bi'i bönni'do' queébi', ate' gu'u labi' Jesús, tu' usólábi' bönachi queébi' lu dul-la' nabága'gaca.

²² Caní guca yúgu'të lë ni para gaca lë na' gunné' Xanru' lu ru'ë bönni' bë'ë didza' uláz queë' Dios, gunné':

²³ Buli'yútsöca', tu nigula ra'bando',
tsú'ubi' bí'ido' lé'ëbi',
ate' gáljabi' tubi' bi'i bönni'do',
ate' ilu'ë labi' Emanuel,
Emanuel naca tu didza' hebreo le rna: Len rë'u Dios.

²⁴ Cate' bubané' José lu yëla béchigal, benë' ca na' gudxë' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'. ²⁵ Biti' guzóaleni'-bi' cate' bidxinrö dza chigúlajbi' bi'i bönni'do' queébi', bi'i zí'alö queébi', ate' gulu'ë labi' Jesús.

2

Bönni' ta'yéajni'inë' ridiyúgaquië' bí'ido' Jesús

¹ Cate' gúljabi' Jesús lu yödzö Belén, luyú Judea, rinná bë'ë Herodes luyú ni', ate' bila'dxinë' bönni' ta'yéajni'inë' Jerusalén, narúajgaquië' tu yödzö dë saca' ga rilén gubidza. ² Gula'nabë' bönni' ni, ta'nnë':

—¿Gazxi zóabi' bí'ido' na' ral-la' inná bé'ebi' bönachi judío, bí'ido' na' si' gúljabi'? Cate' ni' zóatu' ga rilén gubidza bilé'etu'-ba' böljaj bení' naca bë' chigúlajbi', ate' za'tu' ni para tseaj ládxi'tu'-bi'.

³ Cate' gúquibe'enë' Herodes, bönni' rinná bë'ë, lë ni, guró'ödë' böniga, en lësca' caní gula'bó' böniga yúgu'të bönachi nacuá' Jerusalén. ⁴ Ní'irö Herodes na' bulidzë' yúgu'të bixúz unná bë', len bönni' yudo' tu'sedinë', ate' gunábinë' légaquië' gazxi ral-la' galjé' Cristo, bönni' na' tunë' löza bönni' judío ilá' lahuë' para inná bé'enë' légaquië'. ⁵ Të' lë':

—Lu yödzö Belén luyú Judea. Caní naca tu' buzúajë' tu bönni' bë'ë didza' uláz queë' Dios le rna caní:

⁶ Biti' nácarö cá'asö yödzö Belén luyú Judá lahuë' Dios ca nácgaca yödzö gapa nacuá' nupa ta'nná bë' luyú ni, tu' irúajë' tu bönni' yödzö Belén, en gáquië' lo, bönni' na' gun chi'ë bönachi Israel quia'.

⁷ Ní'irö Herodes bulidzë' bagáchi'sö bönni' ta'yéajni'inë' na', en gunábinë' légaquië' para inózinë' dxi'a gáca'xte chiguca buluf'i lahui böljaj na' bila'lé'enë'. ⁸ Ní'irö gusól-lë'ë légaquië' tsójáquië' Belén. Rë' légaquië':

—Guli'tséaj ni', en guli'tsöjnaba dxi'a nacxi naca queébi' bí'ido' na'. Cate' chibidzólili'-bi', ididíxjöi'ili' neda', para tseja' ca' neda', tseaj ládxa'a-bi'.

⁹ Gudödi bila'yönné' didza' bë'ë Herodes na', söjáquié' bönni' ta'yéajni'iné' na', ate' böläj na' bila'lé'ené' cate' ni' nacu'ë ládzagaquié' söjnóruba' lógaquié' ga bidxinté yöjsóa ga na' dëbi' bí'ido' na'. ¹⁰ Cate' bila'lé'ené' böläj na', bulu'dzédjade'ené'. ¹¹ Cate' gula'yázié' yu'u, bila'lé'ené'-bi' bi'i bönni'do' na', zóalenbi'-nu María, xiná'abi'. Bulu'zóa zxi'bagaquié' lobi', en gula'yéaj ládxi'gaquié'-bi'. Gudödi na' gula'saljé' yugu' yöxaj quégaquié', ate' bulu'nödzjé' queébi' oro, en yalaj, en nórido' rilá' zxixi que yaga mirra. ¹² Tu' chibuzéajni'iné' Dios légaquié' lu yëla béchigal para cabí tsöjhuójqüié' ga zoé' Herodes na', que lë ni na' yöjhuójqüié' ládzagaquié' nöza yúbölö.

José, en María, ta'ché'ë-bi' Jesús luyú Egipto

¹³ Gudödi bulu'zé'ë yugu' bönni' ta'yéajni'iné' ni', bulu'i lahué' tué' gubáz lá'ayi queé' Xanru' lu yëla béchigal, ga na' dë' José, en rë' lë':

—Guyaschi. Guché'-bi' bí'ido' ni, enca' xiná'abi', ate' buzunnaj ni. Guyéaj luyú Egipto, ate' ugá'anu' ni' cate' guiéra' li' ia'tú. Caní gunu' tu' uguiljé' Herodes bí'ido' ni para gútié'-bi'.

¹⁴ Ní'irö guyasé' José, en ni' naca chi'i dzó'ölö, guché'ë-bi' bí'ido' na', enca' xiná'abi', ate' yöjáquié' luyú Egipto. ¹⁵ Bulu'gá'ané' ni' cate' gútiré' Herodes. Caní guca para gaca lë na' gunné' Xanru' Dios lu ru'ë tu bönni' bë'ë didza' uláz queé', gunné': "Ga naca luyú Egipto bulidza' Xí'ina'."

Risól-lë'ë Herodes bönni' ilútié'-bi' bi'i hué'ënido' nacua'abi' yödzö Belén

¹⁶ Cate' gúquibe'ené' Herodes biti' guluné' bönni' ta'yéajni'iné' ca rnné', guléné', ate' gunná bé'ené' bönni' tsöjáquié' ni' para ilútié'-bi' yúgu'tëbi' bi'i bönni'do' nacua'abi' yödzö Belén, en idú gásibi'ilö ga dë Belén na', yugu' bí'ido' chiyú'ugacabi' chopá iz, en bí'ido' nahué'ënicacaröbi'. Caní bené' ca busáquié' queé' Herodes na', tsca chiguca dza bulu'i lahui böläj na', dza na' bulu'zéajni'iné' bönni' ta'yéajni'iné' na' lë'. ¹⁷ Caní guca, bidxín lë na' gunné' Jeremías, bönni' bë'ë didza' uláz queé' Dios, gunné':

¹⁸ Lu yödzö Ramá riyón chí'igaca nupa ta'bödxi, en nupa ta'bödxi yechi'.

Raquel ribódxinu ni'a quégacabi' zxi'ininu.

Biti' gaca nu hué tsahui' lënu, tu' chinátigacabi'.

¹⁹ Gudödi gútié' Herodes na', ní'irö bulu'i lahué' gubáz lá'ayi na' queé' Xanru' lu yëla béchigal lahué' José ga ni' zoé' luyú Egipto, ate' rë' lë':

²⁰ —Guyasa. Guché'-bi' bi'i bönni'do' ni, enca' xiná'abi', ate' böaj luyú Israel, tu' chigulátié' bönni' ni' gulé'ënné' ilútié'-bi' bi'i bönni'do' ni.

²¹ Ní'irö guyasé' José, ate' guché'ë-bi' bi'i bönni'do' na', enca' xiná'abi', ate' yöhuójqüié' luyú Israel. ²² Cate' gúquibe'ené' José rinná bë'ë Arquelao luyú Judea tu' chigútié' Herodes, xuzé' Arquelao na', que lë ni na' gúdxiné' José huóje' ni'. Cate' buzéajni'iné' Dios lë' lu yëla béchigal, guyijé' luyú Galilea. ²³ Cate' bidxiné' ni', yöjsóé' lu yödzö Nazaret. Caní guca para gaca lë na' gula'nné' yugu' bönni' gulu'ë didza' uláz queé' Dios ca ral-la' gaca queé' Jesús, si' Lë', Bönni' Nazaret.

3

Juan, bönni' ruquilé' bönachi nisa runé' libán lu lataj cá'asö

(Mr. 1:1-8; Lc. 3:1-9, 15-17; Jn. 1:19-28)

¹ Yugu' lu dza ni' bulu'i lahué' Juan, bönni' na' buquilé' bönachi nisa, en runé' libán lu lataj cá'asö luyú Judea. ² Juan na' rnné':

—Buli'bi' ládxi'li', tu' chizóa idxín dza idinná bë' Nu na' zoa yehua' yubá luyú ni.

³ Ca naca queë' Juan na', buzúajë' Isaías, bönni' bë'ë didza' uláz queë' Dios dza ni'të, le rnna caní:

Riyón chi'ë bönni' rulidzë' lu lataj cá'asö, rnnë':

“Buli'pá'a nöza para idxín Xanru' ga zóali'.

Guli'béaj li yugu' nöza lasi tödë' lu icja ládxido'oli'.”

⁴ Nácüë' zxë' Juan lari' néquini lítsa'ba' böa', ate' núguë'ë lë'ë le néquini guídi. Rahuë'-ba' bóchi'zu, en re'jë' bidxindo' que buzdo'. ⁵ Yugu' bönni' yödZ Jerusalén len bönachi narúajgaca idú luyú Judea, en idú gásibi'ilö ga dë yegu Jordán bila'dxinë' ga zoë' Juan na'. ⁶ Cate' gula'xóalëpë' dul-la' nabága'gaquië', Juan na' buquilë' légaquië' nisa lu yegu Jordán na'.

⁷ Cate' bilé'enë' Juan ta'dxinë' zían bönni' yudo' fariseo len yugu' bönni' yudo' saduceo ga zoë' para ila'dilé' nisa, gudxë' légaquië':

—Libí'ili', di'a dza quégacaba' bëla sínia'. ¿Zoa nu buzéajni'i libí'ili' para izxúnnajli' yöl-la' rusiúdxí na' si' gaca quégaca bönachi? ⁸ Guli'gún le gaca bë' chibubí'i ládxí'li'.

⁹ Biti' cuéqui ícjali', bití innali' nácali' tsahui' tu' naca Abraham xuz gudödi queé'li'. Rea' libí'ili', huáca gunë' Dios ga ulu'huóaca yugu' guió'j nacua' ni di'a dza queë' Abraham.

¹⁰ Chizóa riböza guië huága para ichugu yugu' yaga le rulu'i ca gaca queé'li'. Yúgu'të yaga bití ta'bía le naca dxi'a, irúgugaca, ate' ila'gu'ë léguequi lu guí'. ¹¹ Le nácatë neda' ruquila' libí'ili' nisa lu nisa, nülöli' chibubí'i ládxí'li', pero Bönni' na' ral-la' guídë' cate' tödi quia' neda', Lë' gunë' le rulu'isö yöl-la' ridila nisa ni, uchízië' libí'ili' Dios Bö' Lá'ayi len guí' queë'. Bönni' ni nácatë're' lo ca neda', ate' neda' bití naca' lesaca' ilecja' xiráchuë' nudé'ë. ¹² Zönë' lu në'ë böcö' queë', le ulúbinë' ga ridxi'a xzoa' xtila queë'. Cu'ë xzoa' xtila queë' lu yu'u ga ni' gun chi'ë le, pero uzégui'ë bëbu que lu guí', ate' guí' na' bití' ca' ulu.

Ridile' nisa Jesús

(Mr. 1:9-11; Lc. 3:21-22)

¹³ Ní'irö buzé'ë Jesús luyú Galilea, ate' bidxinë' ra' yegu Jordán ga na' zoë' Juan, para idilé' nisa lu në'ë Juan na'. ¹⁴ Juan buzáguë'ë xinözë', en rë' Jesús:

—Neda' ral-la' idila' nisa lu no'o Li'. ¿Za'tso' Li' quia' neda'?

¹⁵ Bubi'ë didza' Jesús, rë' lë':

—Benna lataj na'a, tu' caní ral-la' gunru' idütë le naca tsahui'.

Ní'irö Juan bë'ë Lë' lataj. ¹⁶ Cate' chinadilé' Jesús nisa, la' burúajtë' lu nisa. Ní'irö gualaj lúxiba lahuë' Jesús, ate' bilé'enë' ruhuötjë' Dios Bö' Lá'ayi, en bidxinë' ga na' zoë', riné'ë ca riná'aba' gu'dödo'. ¹⁷ Ní'irö biyón chi'i nu ru'i didza' yehua' yubá, rnna:

—Bönni' ni náquië' Zxí'ina'. Nadxí'ida' Lë', en raza ládxa'a Lë'.

4

Rë'ëni Satanás tu' xihui' ibaga' Jesús dul-la'

(Mr. 1:12-13; Lc. 4:1-13)

¹ Ní'irö la' guchë'të' Dios Bö' Lá'ayi Jesús lu lataj cá'asö para gata' lataj si' bë' Satanás tu' xihui' Lë'.

² Idú choá' dza choá' yëla bití bi gudahuë' Jesús, ate' gudödi ni' ridunë'. ³ Ní'irö tu' xihui', nu na' run ga tá'baga' bönachi dul-la', bidxín ga zoë' Jesús, en rë' Lë':

—Channö nacü' idú Zxí'inë' Dios, gunná na'a ulu'huóaca guió'j nacua' ni yöta xtila.

⁴ Bubi'ë didza' Jesús, rë' le:

—Nazúaj lu guichi lá'ayi le rnna: “Calégasö yöta xtila nabánigaca bönachi, pero lësca' yúgu'të didza' ru'ë Dios nabánigaca bönachi.”

⁵ Ní'irö tu' xihui' guchë' Jesús lu yödZó lá'ayi Jerusalén, ate' budxía Lë' ga naca xitsá' ícjo'olö yudo'. ⁶ Ní'irö tu' xihui' rë' Lë', rnna:

—Channö nacü' Li' idú Zxí'inë' Dios, busuladzu' cuinu' ni, tu' nazúaj lu guichi lá'ayi le rnna:

Dios isól-lë'ë gubáz lá'ayi queë' para ilún chi'ë Li',

ate' ulu'chisë' Li' lu ná'agaquië',
para cabí tsöjchégu'u guió'j, en cabí gunu' zi' ni'u.

⁷ Bubi'ë didza' Jesús, rë' le:

—Ia'stú nazúaj lu guichi lá'ayi, le rë bönachi, rnna: “Biti' ugunu' dxin Xanu' Dios.”

⁸ Ní'irö tu' xihui' guché' Jesús ga naca tu lu guí'a sibi, ate' ni' buluí'i Lë' yúgu'të yödzo nacua' yödzölió ni, en yúgu'të yöl-la' tsahui' quéguequi. ⁹ Ní'irö rë Lë':

—Yúgu'të lë ni udöda' lu no'o channö uzóa zxibu' lahua', en gunu' neda' zxön.

¹⁰ Jesús rë' le:

—Böaj quiu' li', Satanás tu' xihui', tu' nazúaj lu guichi lá'ayi le rë netu', rnna: “Xanu' Dios tseaj ladxu'u, en udödi cuinu' lu na' tuzë' Lë'.”

¹¹ Ní'irö buzá' Satanás tu' xihui' ga na' zoë' Jesús, ate' gubáz lá'ayi queë' Dios bila'dxinë' ga zoë', en gulácalenë' Lë', en gula'gu'ë le gudahuë'.

Risí lahuë' Jesús runë' libán luyú Galilea

(Mr. 1:14-15; Lc. 4:14-15)

¹² Cate' biyönnë' Jesús nadzunë' Juan lidxi guíë, guyijë' luyú Galilea. ¹³ Buzé'ë yödzo Nazaret, ate' yöjsóë' lu yödzo Capernaum ga naca ra' nísado', lu buzá' quégaca bönachi Zabulón, en bönachi Neftalí. ¹⁴ Caní guca, bidxín lë na' gunné' Isaías, bönni' bë'ë didza' uláz queë' Dios, gunné':

¹⁵ Luyú Zabulón, en luyú Neftalí,

la' nöza ra' nísado' ia'tsölá'a yegu Jordán saca' ga rilén gubidza.

Luyú Galilea, ga nacua' bönachi biti' nácagaca judío.

¹⁶ Bönachi chul-la niti ni' bila'lé'e bení',

ate' bönni' ni' nácagaquië' ca nupa chinátigaca, gulén quégaquië' bení'.

¹⁷ Cate' ní'irö gusí lahuë' Jesús runë' libán, en rë' bönachi ni':

—Buli'bf'i ladxí'li', tu' chizóa idxín dza idinná bë' Nu na' zoa yehua' yubá luyú ni.

Jesús rulidzë' tapë' bönni' uzxón böla para tsöjtá'gaquië' Lë'

(Mr. 1:16-20; Lc. 5:1-11)

¹⁸ Cate' gudé' Jesús ra' nísado' que Galilea, bilé'enë' chopë' bönni'. Tuë' lë' Simón, en zoa ia'tú lë' Pedro, ate' dzáguië' Andrés, bönni' bóché'ë, lë'. Chopë' ni ta'chiljë' yöxaj böla quégaquië' lu nísado' na' tu' nácagaquië' uzxón böla. ¹⁹ Jesús rë' légaquië':

—Guli'dutá' neda', ate' guna' ga iché'ëli' bönachi quia', gunli' ca runli' rizönli'-ba' böla.

²⁰ Chopë' ni la' bulu'cá'anatë' yugu' yöxaj böla quégaquië', ate' söjácalenë' Jesús.

²¹ Cate' gudödë' Jesús ia'lati' ní'ilö, bilé'enë' ia' chopë' bönni'. Tuë' lë' Jacobo, ate' dzáguië' Juan, bönni' bóché'ë lë'. Nácagaquië' zxf'inë' Zebedeo. Nacu'ë lë'e bárcodo' dzágagaquië' Zebedeo, xúzgaquië', en tu'ünë' yöxaj böla quégaquië'. Ní'irö Jesús bulidzë' chopë' ni para tsöjtá'gaquië' Lë'. ²² La' bulu'cá'anatë' bárcodo' na', enca' xúzgaquië', ate' söjácalenë' Jesús.

Jesús rusédinë' bönachi zían

(Lc. 6:17-19)

²³ Gudé' Jesús idú luyú Galilea, rusédinë' bönachi gapa naca lu yu'u ga tu'dubë' bönni' judío, en tu'sedë' queë' Dios. Benë' libán ni' que didza' dxi'a ca si' idinná bë'ë Dios luyú ni', en bunë' yúgu'të nupa te'e tsca naca yödzhüé' té'eguequi. ²⁴ Guzé' didza' que yöl-la' huáca queë' Jesús, ate' bila'yöni bönachi idú luyú Siria, ate' dujuá'gaquië' yúgu'të bönni' té'enë' zían yödzhüé' que queégaquië', en ta'guí'i ta'zaquië', ga zoë' Jesús. Dujuá'gaquië' ca' yugu' bönni' yú'ugaquië' bö' xihui', en yugu' bönni' té'enë' huë' xjote', en yugu' bönni' nacú'unigaquië' bin ni'a ná'agaquië', ate' Jesús bunë' yúgu'të bönni' na'. ²⁵ Bönachi zían bila'rúajgaca luyú Galilea, en yugu' yödzo Decápolis, en yödzo Jerusalén, enca' luyú Judea, en yugu' yödzo nacua' ia'tsölá'alö yegu Jordán saca' ga rilén gubidza, ate' röjácalen Jesús.

5

*Libán benë' Jesús ga naca lu guí'ado'**(Lc. 6:20-23)*

¹ Cate' bilé'enë' Jesús bönachi zían söjácálen Lë', ní'irö gurenë' tu lu guí'ado' ga naca xitsá'alö, ate' gurö'ë lu guí'a ní'. Ní'irö bulu'dubë' bönni' usëda queë' ga zoë'. ² Gusí lahuë' rusédinë' légaquië', rnnë':

³ —Bica' ba yugu' bönni' téquibe'enë' ta'yádzjanë' le naca queë' Dios, tu' nadéli'gaquië' lataj ga rinná bë'ë Bönni' na' zoë' yehua' yubá.

⁴ 'Bica' ba yugu' bönni' tu'huí'ini ládxi'gaquië' tu' nabága'gaquië' dul-la', tu' huë tsahuë'ë Dios caz légaquië'.

⁵ 'Bica' ba yugu' bönni' nácagaquië' nöxaj ládxi' lahuë' Dios, tu' gata' quégaquië' luyú ni.

⁶ 'Bica' ba yugu' bönni' ta'zé ládxi'gaquië' le naca tsahui' lahuë' Dios, ate' raca quégaquië' ca raca quégaca nupa ta'dún, en ta'bidxi nisa, tu' gunë' Dios ga ulu'zi'ë xibé lë na' ta'zé ládxi'gaquië'.

⁷ 'Bica' ba yugu' bönni' tu'huechi' ládxi'gaquië' luzá'agaquië', tu' huechi' ládxi'ë Dios légaquië'.

⁸ 'Bica' ba yugu' bönni' naca tsahui' icja ládxi'do'gaquië', en biti' bi dul-la' nabága'-gaquië', tu' ila'lé'enë' Dios.

⁹ 'Bica' ba yugu' bönni' ta'bequi dxíë' didza' bizxaj, tu' ila'zí' lágagaquië' xí'ini cazë' Dios.

¹⁰ 'Bica' ba yugu' bönni' ta'zaca' ta'gui'ë lu le ta'bía ládxi'gaca bönachi légaquië' cate' tunë' le naca tsahui', tu' dë lataj quégaquië' ga rinná bë'ë Bönni' na' zoë' yehua' yubá.

¹¹ 'Bica' ba libí'ili' cate' tu'lidza bönachi libí'ili' zi', en ta'bía ládxi'gaquië' libí'ili', ate' lu yöl-la' rizí' yë' ta'nné' queéli' le xihui' tu' dá'ali' neda'. ¹² Buli'dzeja, en guli'chaza ládxi'li', tu' uzí'da'ali' xibé yehua' yubá. Ca raca queéli', guca quégaquië' bönni' gulu'ë didza' uláz queë' Dios, en gula'cu'ë zí'atëlö ca libí'ili', tu' gula'bía ládxi'gaca ca' bönachi légaquië'.

*Bönachi dá'gaca Cristo ilaca ca zödi', en ca bení'**(Mr. 9:50; Lc. 14:34-35)*

¹³ Gunné' ca' Jesús:

—Libí'ili' nácali' ca zödi' luyú ni, pero channö initi zödi' na' yöl-la' siná'a que, biti' gaca gunru' ga huöáca siná'a. Bíti'rö naca lesaca', pero chinaca tu le chú'unaru', ate' ulu'libi bönachi le.

¹⁴ 'Libí'ili' nácali' ca bení' yödzölió ni para ulu'ili' lahui le naca queë' Dios. Ral-la' gácali' ca tu yödzö rö'ö tu lu guí'a, tu' cabí gaca igachi' yödzö na'. ¹⁵ Cate' ruquéla'ru' guí', bití' rigú'uru' le tu zxan guí'ina, pero ruzóaru' le ga liná' para uzení' yúgu'të nupa nacua' lu yu'u. ¹⁶ Ca na' run bení', ral-la' gunli' ca' libí'ili', gü'ili' lataj gaca bë' le nácali' lógaca yúgu'të bönachi, para cate' ila'lé'e le naca tsahui' runli', ila'gú'u-në' Xúzili' Dios zoë' yehua' yubá yöl-la' ba.

Rusédinë' Jesús que le gunná bë'ë Dios lu në'ë Moisés

¹⁷ Gunné' ca' Jesús:

—Biti' guéquili' bida' para usunítia' yugu' le gunná bë'ë Moisés, o xibá na' bulu'sédinë' bönni' gulu'ë didza' uláz queë' Dios. Bida', calëga para usunítia' yugu' lë na', pero para ulu'a lahui idütë le tu'sedi lë na'. ¹⁸ Le nácaté rea' libí'ili'. Tsanni nacua' lúzxiba, en yödzölió ni, bití' tödi cá'asö nitú dídza'do', en nitú le rinná bë' xibá na', cate' gácarö yúgu'të le ral-la' gaca. ¹⁹ Que lë ni na', nútí'tës bönni' quitsjë' tu xibá cuídí'do'os le zoa lu xibá na', en usédinë' bönachi para ilún caní, bönni' ni gácatërë' cuídí'do'os ca yúgu'të nupa ila'cuá' ga rinná bë' Bönni' na' zoë' yehua' yubá, pero nútí'tës bönni' gunë' ca rinná bë' xibá na', en usédinë' bönachi para ilún ca' caní, bönni' ni tsépisëtërë' ga rinná bë' Nu na' zoa yehua' yubá. ²⁰ Rea' ca' libí'ili': Channö cabí gunli' le nácaterö tsahui' ca le tunë' bönni' yudo' usedi, enca' ca tunë' bönni' yudo' fariseo, bití' ca' tsú'uli' ga rinná bë'ë Dios yehua' yubá.

Rusédiné' Jesús ca naca que nu rilé luzé'e
(Lc. 12:57-59)

²¹ Gunné' ca' Jesús:

—Chibiyónili' ca gula'nné' bönni' guta' lu ná'agaquié' le gulé' xuz xtó'oli': "Biti' gútili' bönachi. Nu bönni' gútié' bönachi, nabágué'ë xíguia', ate' huadxiné' ga uchi'a usöróé' Dios lé'." ²² Na'a, neda' rea' libí'ili': Nu bönni' rilené' böchi' luzé'ë, nabágué'ë xíguia' huadxiné' ga uchi'a usöróé' Dios lé'. Lësca' caní, nu bönni' inné' zí'ë queé' böchi' luzé'ë nabágué'ë xíguia' ulu'chi'a ulu'söróé' bönni' lo tu'chi'a tu'söróé' lé', ate' nu bönni' gufé' luzé'ë: "¡Böa' canóz!" nabágué'ë xíguia' tsöjtsu'ë lu guí' gabila.

²³ 'Caní naca, channö chizóa cu'u tu le unödzu' lu bucugu lá'ayi, ate' tsöjnenu' ni' zoa bizx que rilené' böchi' luzó'o lí', ²⁴ bucá'ana læ na' unödzu' lu bucugu ni', en böaj lidxu'. Zí'aló yöjca'ana tsahui' le benu' queé' böchi' luzó'o, ate' ní'irö gudá unödzu' læ na' nu'u.

²⁵ 'Channö zoa nu bönni' rinábiné' lí' bi ubi'u queé', en iché'ë lí' ga uchi'a usöróé' tu bönni' lí', budzágaté tsahui' bönni' na' tsanni ni' yú'ulenu' læ nöza, para cabí udödé' lí' lahué' bönni' ruchi'a rusöróé', ate' bönni' ni udödé' lí' lu në'ë bönni' rusayjé' lidxi guíë, ate' læ' cu'ë lí' lidxi guíë na'. ²⁶ Le nácaté rea' lí', bití' ca' uruju' ni' cate' idxinrö dza quizxju' ga buitë le ral-lu'u.

Rusédiné' Jesús ca naca que nu riguitsaj xibá que yöl-la' nutsaga na'

²⁷ Gunné' ca' Jesús:

—Chibiyónili' ca na' gula'nné': "Biti' gunu' dul-la' le riguitsaj xibá que yöl-la' nutsaga na'." ²⁸ Na'a, neda' rea' libí'ili': Núti'tës bönni' ruyúé' tu nigula len yöl-la' rizé ladxí' le ruá' dö', chibené' dul-la' len lænu lu icja ladxí'da'ahué'.

²⁹ 'Que læ ni na', channö guió'j lo' ibëla gun ga gunu' dul-la', guléaj le, en gurú'una le. Gácarö dxi'a quiu' unítíu' tu guió'j lo', en calëga idúteo' tsöjtsú'u lu guí' gabila. ³⁰ Channö no'o ibëla gun ga gunu' dul-la', guchugu le, en gurú'una le. Gácarö dxi'a quiu' unítíu' tu no'o, en calëga idúteo' tsöjtsú'u lu guí' gabila.

Rusédiné' Jesús ca naca que nu bönni' rulá'alené' nigula queé'
(Mt. 19:9; Mr. 10:11-12; Lc. 16:18)

³¹ Gunné' ca' Jesús:

—Lësca' gula'nné': "Núti'tës bönni' rusané'-nu nigula queé', ral-la' unödzejé' queé'nu tu guichi le rnna rulá'alené'-nu." ³² Na'a, neda' rea' libí'ili', channö zoé' nu bönni' rusané'-nu nigula queé', en bití' zoa le ruá' dö' runnu, guné' bönni' na' ga gunnu dul-la' le riguitsaj xibá que yöl-la' nutsaga na' channö utsaga ná'lennu bönni' yúbölö, ate' bönni' na' sí'ë-nu nigula na', læsca' guné' dul-la' le riguitsaj xibá que yöl-la' nutsaga na'.

Rusédiné' Jesús ca naca que nu ruzötaj La la'ayi queé' Dios

³³ Gunné' ca' Jesús:

—Lësca' biyónili' ca yugu' bönni' guta' lu ná'agaquié' gulé' xuz xtó'oli', gula'nné': "Biti' sí' yé'u cate' run tsutsu xtídz'u ni'a queé' Dios, en ral-la' gunu' lahué' Xanru' Dios iduté læ na' run tsutsu xtídz'u ni'a queé' Lë'." ³⁴ Na'a, neda' rea' libí'ili', bití' ca' gun tsutsu xtídz'a'li'. Biti' gun tsutsu xtídz'a'li' ni'a que yehua' yubá, tu' naca ga rö'ë rinná bë'ë Dios. ³⁵ Biti' gun tsutsu xtídz'a'li' ni'a que luyú ni, tu' naca luyú ni ca xilibi ni'ë Dios, en calëga ni'a que Jerusalén, tu' naca ladzë' Bönni' nayépisëtëré' rinná bë'ë. ³⁶ Biti' gun tsutsu xtídz'u ni'a que icju', tu' cabí gaca gunu' ga huóaca chiguichi o gasaj nitú guitsa' icju'. ³⁷ Ral-la' innásili': "Ön", o innásili': "Biti'", tu' naca que tu' xihui' le nadödi bë' ca nácgaca didza' ni.

Rusédiné' Jesús ca naca que nu ruzí' læbi luzé'e
(Lc. 6:29-30)

³⁸ Gunné' ca' Jesús:

—Chibiyónili' ca naca le gunná bë'ë Moisés, gunné': "Nu bi run que guió'j lahui luzé'e, ubí'i ca' que, enca' nu bi run que layi' luzé'e, ubí'i ca' que." ³⁹ Na'a, neda' rea' libí'ili': Biti' tá'baga'li' nu guá' dö' queé'li', ate' channö nu capa' xagu' ibëla, bë' lataj capa' ca' ia'tú xagu' yó'göla. ⁴⁰ Channö zoa nu gun ga uchi'a usöró'ë tu bönni' li', en cué' xzo', bë' ca' queé' lari' rixó'a cúdzu'u. ⁴¹ Channö zoa nu gun bayudxi gu'u yua' que tu chi'i, guyéajlen nu na' chopa chi'i. ⁴² Nu bi rinábini li', bunödzej que, en nu bi gué'ëni gunnu' que tu chi'i, biti' tá'bagu'u lë na' inabi li'.

Rusédinë' Jesús ca ral-la' idxí'iru' nupa bití' ta'lé'e rë'u dxi'a

(Lc. 6:27-28, 32-36)

⁴³ Gunné' ca' Jesús:

—Lësca' caní biyónili' lë na' gula'nné': "Ral-la' idxí'inu' nu nadxí'i li', en udí'inu' nu bití' rilé'e li' dxi'a." ⁴⁴ Na'a, neda' rea' libí'ili', guli'dxi'i nupa bití' ta'lé'e libí'ili' dxi'a. Guli'nábinë' Dios gácalenë' nupa tu'lidza libí'ili' zí'. Guli'gún le naca tsahui' quégaca nupa tu'dí'i libí'ili', en buli'lidzë' Dios inábili'-në' gunë' ga gaca dxi'a quégaca nupa ta'nné' queé'li', en tuá' dö' queé'li'. ⁴⁵ Channö gunli' caní, gácali' xzí'ini cazë' Xúziru' Dios, zoë' yehua' yubá, tu' runë' Lë' ga ruzení' gubidza queë' ga nacua' bönachi tuá' dö', enca' ga nacua' bönachi tsahui'. Risól-lë'ë tu nisa guió'j lu yu quégaca bönachi tsahui', enca' lu yu quégaca bönachi bití' nácagaca tsahui'. ⁴⁶ Channö nadxí'isili' bönni' nadxí'iguequinë' libí'ili', ¿nuzxi caz cu'u libí'ili' yöl-la' ba? Lësca' caní tunë' bönni' bití' nácagaca tsahui' na', bönni' tu'quixjë' uláz que yödzo zí'tu', nadxí'iguequinë' luzá'agaquië'. ⁴⁷ Channö rugápali' Dios tuzë' böchi' luzá'ali', ¿bizxi caz runli' le nácatë'ro dxi'a? Lësca' caní tunë' bönni' bití' núnbë'gaquië' Dios. ⁴⁸ Pero libí'ili', guli'gaca idú tsahui', ca na' náquië' Xúziru' Dios, zoë' yehua' yubá, náquië' idú tsahui'.

6

Rusédinë' Jesús ca ral-la' gácalenru' bönachi

¹ Gunné' ca' Jesús:

—Guli'gü' ládxi'li' gaca idú ca reaj ládxi'li'-në' Dios. Biti' gúnsili' lë ni lógaca bönachi para ila'lé'e ca na' runli'. Channö runli' caní, bití' bi gunné' Xúziru' Dios zoë' yehua' yubá queé'li'. ² Cate' bi unödzu' que nu bi riyadzaj, bití' gunu' ga ilá' lahui lë na' runu' ca tunë' bönni' tu'lu'isö tsahui' cuíngaquië' ga naca lu yu'u ga tu'dubë' bönni' judío, en tu'sëdë' queë' Dios, enca' ga naca lu yé'ëyi. Caní tunë' para ila'gú'u bönachi légaquië' yöl-la' ba. Le nácatë' rea' libí'ili', cá'asö naca yöl-la' ba gata' quégaquië'. ³ Pero li', cate' bi unödzu' que nu bi riyadzaj, bití' ca' gu'u lataj nu inözi. ⁴ Na'a, lë na' unödzu', bagáchi'sö ral-la' unödzu', ate' Xúziru' Dios, Nu rilé'e ca na' runu' bagáchi'sö, Lë' ubi'ë quiu'.

Rusédinë' Jesús ca ral-la' ulídzaru'-në' Dios

(Lc. 11:2-4)

⁵ Gunné' ca' Jesús:

—Cate' ulídzali'-në' Dios, bití' gunli' ca tunë' bönni' tu'lu'isö tsahui' cuíngaquië', tu' ta'yaza ládxi'gaquië' ta'zuinë' tu'lidzë' Dios gapa naca lu yu'u ga tu'dubë' tu'sëdë' bönni' judío queë' Dios, en gapa naca lu yé'ëyi para ila'lé'e bönachi légaquië'. Le nácatë' rea' libí'ili', cá'asö naca yöl-la' ba gata' quégaquië'. ⁶ Pero libí'ili', cate' ulídzali'-në' Dios guli'tsaza lídxili', en buli'sayaj yu'u. Buli'lidzë' Dios inábili'-në' Xúziru' Dios, zóalenë' libí'ili' ga na' zóali' queézili', ate' Xúziru' Dios, Nu rilé'e ca runli' bagáchi'sö, Lë' ubi'ë queé'li'.

⁷ Cate' ulídzali'-në' Dios bití' gunli' la' yé'ëyi la' lez ca na' tunë' bönni' bití' núnbë'-gaquië' Dios, tu' téquinë' huayönnë' Dios légaquië' tu' tu'lidzë' la' yé'ëyi la' lez. ⁸ Bití' gunli' ca na' tunë' légaquië'. Xúziru' Dios, zí'atëlö cate' si' inábali'-në', chinóz quézinë' le riyadzaj queé'li'. ⁹ Que lë ni na', ral-la' ulídzali'-në' Dios innali' caní:

Xuz netu', zu' yehua' yubá, gaca zxön Lo'.

¹⁰ Gudá inná bë'u luyú ni.

Ben ga gaca luyú ni ca raza ládxi'u Li'
ca na' raca yehua' yubá.

¹¹ Benna le gágutu' na'a dza.

¹² Buniti lo netu' le huiá' dö' bentu' Lo' Li'
ca runtu' netu', runiti lotu' nupa bi tun queé'tu'.

¹³ Biti' gu'u lataj si' bë' tu' xihui' netu',
pero busölá netu' lu na' nu ruá' dö'.

Nequi quiu' ga rinná bë'u, en yöl-la' unná bë', en yöl-la' ba.

Caní ré'ënitú' gácatíca'sö. ;Ca' gaca!

¹⁴ 'Channö uniti loli' luzá'ali', nupa tuá' dö' queéli', uniti lahuë' Xúziru' Dios, zoë' yehua' yubá, libí'ili'. ¹⁵ Channö cabí uniti loli' luzá'ali', bití' uniti lahuë' Xúziru' Dios libí'ili' ca naca dul-la' nabága'li'.

Rusédinë' Jesús ca ral-la' gunru' gubasa

¹⁶ Gunné' ca' Jesús:

—Cate' gunli' gubasa, bití' gunli' bayechi' loli' ca tunë' bönni' tu'lu'isö tsahui' cúngaquië', tu' tunë' bayechi' lógaquië' para iléquite'e bönachi tunë' gubasa. Le nácatë rea' libí'ili', cá'asö naca yöl-la' ba gata' quégaquië'. ¹⁷ Libí'ili', cate' gunli' gubasa, buli' pá'a ícjalí', en guli' quibi loli', ¹⁸ para cabí iléquite'e bönachi runli' gubasa. Bagáchi'sö ral-la' gunli' gubasa, atë' Xúziru' Dios, zóalenë' libí'ili' ga na' zóali' queézili', Lë' ubi'ë queéli'.

Yehua' yubá ral-la' utúbiru' yöl-la' tsahui' queéru'

(Lc. 12:33-34)

¹⁹ Gunné' ca' Jesús:

—Bití' utúbili' yöl-la' tsahui' luyú ni, ga ni bélado' que tu'töba' le, atë' raca ditaj, en ga ni ta'yaza gubán, ta'banë'. ²⁰ Buli'tubi yöl-la' tsahui' yehua' yubá, ga ni' bélado' que bití' ulu'töba' le, en bití' gaca ditaj, en ga ni' bití' ila'yázië' bönni' gubán, en bití' ila'banë'.

²¹ Ga ni' dë yöl-la' tsahui' queéli', ni' gü'i ládxi'li' idxinli'.

Le rigú'u bení' icja ládxi'do'oru'

(Lc. 11:34-36)

²² Gunné' ca' Jesús:

—Guiöj loru' naca ca tu le rigú'u bení' icja ládxi'do'oru'. Que lë ni na', channö guiöj loli' naca tsahui', idútëli' tsépili' yösa bení'. ²³ Channö guiöj loli' bití' naca tsahui', idútëli' nachúl-lali'. Que lë ni na', channö bení' zóalen libí'ili' nuhuóaca le naca chulla, yénni'tërö nachúl-lali'.

Dios, en dumí

(Lc. 16:13)

²⁴ Gunné' ca' Jesús:

—Cuntu nu bönni' gaca gunë' xichíngaquië' chopa xanë', tu' uzóë' tuë' tsölá'alö, atë' ia'túë' na' idxí'inë', o ugá'analenë' tuë', atë' ia'túë' na' usán ládxi'ë. Bití' gaca gunli' xichinë' Dios, enca' dumí.

Dios rapa chi'ë nupa néquiquequi queë'

(Lc. 12:22-31)

²⁵ Gunné' ca' Jesús:

—Ia'stú rea' libí'ili': Bití' ubi ugu'ili' ni'a que le gáguli' o ni'a que le guí'jali', yugu' le nabánili', o ni'a que lari' gáculi'. Nazáca'tërö yöl-la' na'bán queéli' ca le gáguli', atë' nácatërö lesaca' le nácali' ca lari' gáculi'. ²⁶ Buli'yú ca raca quégacaba' biguínido' ta'daba' lúxiba. Bití' bi taz tu'zóaba', en bití' tu'lápaba', en bití' tu'túbiba' ga bi ila'gú'uba' quégacaba', pero Xúziru' Dios zoë' yehua' yubá, rugagu cazë' légacaba'. Nazáca'tëröli'

libí'ili' ca yugu' biguínido' na'. ²⁷ ¿Nuzxi caz bönni' nútsë'ë ladjali' gaca gunë' ga soë' ibanë' ia'túz dza tu' ruúbi ruguí'inë' para gaca caní queë'?

²⁸ ¿Bizx que ruúbi ruguí'ili' ni'a que le gáculi'? Buli'yútsöca' ca raca quégaca yöjdo' ró'gaca la' guixi' ca ta'zxón. Biti' tun dxin, en bití' tun du lari'. ²⁹ Neda' rea' libí'ili', Salomón, bönni' ni' gunná bë'ë, sal-la' gúta'da' yöl-la' tsahui' queë', lari' gúcuë' bití' gunná'tërö lachi ca rinná'gaca yöjdo' na'. ³⁰ Dios caz runë' lachi yöj guíxi'do', le ró'gaca la' guixi', le nacuá' na'a dza, ate' cuxó huidzaj ila'yegui lu guí. Channö caní ruí'i ladxë'ë yöj guíxi'do', runë' léguequi lachi, gúnda'arë' ca' queéli', sal-la' bití' réajlë'ëli'-në' idú ladxí'li'. ³¹ Que lë ni na', bití' ubi uguí'ili', en bití' innali': "¿Bizxi gágutsatu'?" o "¿Bizxi guíjatsatu'?" o "¿Bizxi lari' gácutsatu'?" ³² Bönachi yödzölió ni tu'úbi tu'guí' ni'a que yúgu'të lë ni, pero zoë' Xúziru' yehua' yubá, ate' Lë' nózinë' naquínili' yúgu'të lë ni. ³³ Na'a, guli'güf'irö ladxí'li' inná bë'enë' Dios libí'ili', en gunlí' le naca tsahui' lahuë' Lë', ate' Lë' cu'ë xinózáli' yúgu'të lë ni. ³⁴ Que lë ni na', bití' ubi uguí'ili' ni'a que le ral-la' gaca cuxó huidzaj, tu' huáca güf'i ladxí'li' cuxó huidzaj le gaca queéli' dza na'. Tu tu dza ilaca le ral-la' güf'i ladxí'li' dza na'.

7

Bití' ral-la' ichugu bë'ëru' böchi' luzá'aru'
(Lc. 6:37-38, 41-42)

¹ Gunnë' ca' Jesús:

—Bití' ichugu bë'ëli' böchi' luzá'ali', para cabí ichugu bë'ë Dios queéli', ² tu' ichugu bë'ë Lë' queéli' la' leze ca na' richugu bë'ëli' queë' böchi' luzá'ali', ate' ca na' rurixi rudódili' que luzá'ali', la' cá'asö urixi udödë' Dios queéli'. ³ ¿Bizx que ruyú' bébudo' yu'u guiój lahuë' böchi' luzó'o, en bití' réquibe'enu' yu'u le zxóntërö guiój lo' li'? ⁴ ¿Guíëtso' böchi' luzó'o: "Gulóz, cueja' bébudo' yu'u guiój lo'", ate' li', le zxóntërö ca' yu'u guiój lo' li'? ⁵ Li', bönni' ruluí'isö tsahui' cuinu'. Guléaj zí'alö le zxón yu'u guiój lo' li', ate' ní'irö ilé'enu' tsahui'do' para gaca cueju' bébudo' yu'u guiój lahuë' böchi' luzó'o.

⁶ Bití' güf'ili' quégacaba' bö'cu' le naca lá'ayi, para cabí ulu'huécjaba', en iláguya'aba' libí'ili', en bití' chú'unali' le naca lesaca' queéli' láhuigacaba' cuchi, para cabí ulu'zadí' ní'aba' le.

Guli'naba, guli'guilaj, en buli'lidza ra' yu'u
(Lc. 11:9-13; 6:31)

⁷ Gunnë' ca' Jesús:

—Guli'naba, ate' Dios gunné' queéli'. Guli'guilaj, ate' gunné' lataj idzöli queéli'. Buli'lidza ra' yu'u, ate' Lë' isaljë' queéli'. ⁸ Núti'tës bönni' rinabë', ridéli'në', ate' bönni' riguiljë', ridzöli queë', ate' bönni' rulidzë' ra' yu'u, ralaj queë'.

⁹ Channö zoë' nu bönni' ladjali' libí'ili', ate' zóabi' bi'i queë', channö inábibi' lë' yöta xtila, ¿naru' unödzjë'-bi' guiój? ¹⁰ Channö inábibi' lë' tuba' böla, ¿naru' unödzjë'-bi' bëla? ¹¹ Libí'ili' nácali' huiá' dö', pero nózili' unödzjali' xí'inili' le naca tsahui'. Nácatërö löza, Xúzili' zoë' yehua' yubá unödzjë' nupa ta'nábini Lë' le naca dxi'a.

¹² Que lë ni na', ca na' ré'ënili' ilún bönachi queéli', lësca' caní guli'gún quégaquië'. Lë ni naca le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios.

Tu ga ral-la' tsú'uru' le naca tsúpi'do'
(Lc. 13:24)

¹³ Gunnë' ca' Jesús:

—Guli'tsáz ga nu riyaza le naca tsúpi'do'. Blaga' naca ga nu riyaza, en yalaj naca nöza le röjácalenë' bönni' ga ni' ila'nítië', ate' ta'yázië' bönni' zían ni'. ¹⁴ Tsúpi'do' naca ga nu

riyaza, en lásido'os naca nöza le röjácalen bönachi ga ni' ila'deli' yöl-la' na'bán idú, ate' nabábasö nupa ta'dzöli le.

Le runru' naca bë' le nácaru'
(Lc. 6:43-45)

¹⁵ Gunné' ca' Jesús:

—Guli'gún chi'i cuinli' para cabí ila'zì' yé'ené' bönni' ta'zì' yé'ë libí'ili', ta'nné' tu'ë didza' uláz queë' Dios. Ila'dxiné' bönni' caní ga zóali', en ulu'lu'í' cuíngaquié' nöxaj ládxi'do' ca nácagacaba' bö'cu' zxíla'do', pero lu icja ládxi'do'gaquié' nácagaquié' ca bö'cu' guí'a sínia'. ¹⁶ Yugu' le tuné' ilaca bë' le nácagaquié'. Biti' ruchíbiru' le ribía lubá uva lu yaga yötsi', en bití' ruchíbiru' le ribía yaga higo lu guixi' legui lásido'. ¹⁷ Caní naca, yúgu'té yaga dxi'a ta'bía le naca dxi'a, ate' tu yaga cabí naca dxi'a ribía le cabí naca dxi'a. ¹⁸ Yaga dxi'a na' bití' gaca cuía le cabí naca dxi'a, ate' yaga na' bití' naca dxi'a bití' gaca cuía le naca dxi'a. ¹⁹ Yúgu'té yaga bití' ta'bía le naca dxi'a ila'rugu, ate' ila'gu'ë léguequi lu guí'. ²⁰ Caní naca, yugu' le tuné' bönni' na' ilaca bë' le nácagaquié'.

Nupa bití' ila'yázié' ga rinná bë'ë Dios
(Lc. 13:25-27)

²¹ Gunné' ca' Jesús:

—Zian nupa të neda': "Xan, Xan", pero calëga yúgu'té' ila'yázié' ga rinná bë'ë Dios yehua' yubá. Ila'yázase' ni' bönni' tuné' ca ré'ëné' Xuza' Dios, zoë' yehua' yubá. ²² Cate' idxín dza údxi que yödzo'lió ni, bönni' zían ilé' neda', ila'nné': "Xan, Xan, bentu' libán que xtídze'ë Dios, buguntu' dxin Lo', en buguntu' ca' dxin Lo' para bubéajtu' yugu' bö' xihui', en buguntu' ca' dxin Lo' bentu' zían yöl-la' huáca zxön." ²³ Ní'irö neda' guía' légaquié': "Bití' ca' núnbe'a libí'ili'. Guli'cuíta ga zoa', libí'ili' ruá'ali' dö'."

Chopa ca gaca udxíaru' xilibi zö'ö
(Lc. 6:47-49; Mr. 1:22)

²⁴ Gunné' ca' Jesús:

—Ia'stú ca', nu bönni' riyönné' xtídza'a ni, en guné' ca rnna, bönni' ni náquié' ca tu bönni' réajni'iné', budxíé' lidxé' ga naca lu guió'j. ²⁵ Cate' gulaj guió'jsiu', en guzxón yegu gubó'o, en guyecja bö', gudibi nisa cuita yu'u na', pero bití' gubixi, tu' dxía xilibi lu guió'j. ²⁶ Na'a, nu bönni' riyönné' xtídza'a ni, en bití' runé' ca rnna, bönni' ni náquié' ca tu bönni' bití' réajni'iné', budxíé' lidxé' lu yu dzöbi. ²⁷ Cate' gulaj guió'jsiu', en guzxón yegu gubó'o, en guyecja bö', ní'irö gudá'a nisa cuita yu'u na', ate' gubíxité, en tsaz biguinnaj.

²⁸ Cate' Jesús budxi bé'lené' légaquié' didza' ni, bulu'bani bönachi zían naca' ni' ca naca le rusédiné', ²⁹ tu' rusédiné' légaquié' ca tu bönni' dë lu në'ë, en calëga ca tuné' bönni' yudo' usedi quégaquié'.

8

Ruhuóáquié' tu bönni' ré'ené' hué' nudzu' ruzödi
(Mr. 1:40-45; Lc. 5:12-16)

¹ Cate' bö'tjé' Jesús lu guí'a na', söjácalen bönachi zían Lë'. ² Bidxiné' tu bönni' ré'ené' hué' nudzu' ruzödi ga zoë' Jesús, ate' buzóa zxibé' lahué' Jesús, en rë' Lë':

—Xan, channö ré'ënu', huáca unu' neda'.

³ Ní'irö Jesús la' bulitë në'ë, en gudané' lë'. Rë' lë':

—Ré'ënda'. Huóácu' dxi'a.

La' bunítitë xihué'ë bönni' hué' na'. ⁴ Ní'irö Jesús gudxé' lë':

—Buyú, cuntu nu guío' caní, pero guyéaj, yöjlu'í' cuinu' lahué' bixúz, ate' yöjnodzaj le gunná bë'ë Moisés le ulu'í' bönachi chiböácu'.

Jesús ruúné' bi'i huen dxin queë' tu bönni' rinná bë'ë lu gudil-la
(Lc. 7:1-10)

⁵ Cate' guyázië' Jesús yödzo Capernaum, bidxinë' tu bönni' ga zoë', bönni' rinná bé'enë' tu gáyu'ë bönni' röjáquië' gudil-la, ate' gúta'yue' lahuë' Jesús, ⁶ en rë' Lë':

—Xan, bi'i huen dxin quia' dëbi' yu'u, ré'ebi' huë' nacú'unibi' bin, ate' riguí'i rizáca'da'abi'.

⁷ Jesús rë' lë':

—Neda' guída' una'-bi'.

⁸ Bubi'ë didza' bönni' na' rinná bé'enë' bönni' röjáquië' gudil-la, en rë' Jesús:

—Xan, biti' naca' zi tsáziu' lidxa', pero tsa innasu' quia', ate' huóacabi' bi'i huen dxin quia'. ⁹ Lësca' neda', zoa nu rinná bé'e neda', en nacu'ë ca' bönni' röjáquië' gudil-la rinná bé'egacada'-në'. Cate' rea'-në' tuë': "Guyéaj ni'", rejë'. Cate' rea'-në' ia'tué': "Gudá ni'", ridë'. Cate' rea'-në' bönni' huen dxin quia': "Ben dxin ni'", la' runtë' dxin na'.

¹⁰ Cate' biyönnë' Jesús didza' ni, bubánië', ate' gudxë' bönni' sójácalenë' Lë', rnnë':

—Le nácatë rea' lib'ili', ga nacua' bönachi Israel, cuntu nu bönni' röjxéqui'da'-në' réajlë'ë neda' ca runë' bönni' ni. ¹¹ Ia'stú rea' lib'ili': Ila'rúaj bönachi zían saca' ga rilén gubidza, en saca' ga ribía gubidza, ate' ila'bö'len tsözxón Abraham, en Isaac, en Jacob, yehua' yubá ni' ga rinná bé'ë Dios, ¹² pero yugu' bönni' na' guró cazë' Dios para ila'yázië' ga na' rinná bé'ë Lë', chú'unë' légaquië' ní'ilö ga na' naca chul-la, ate' ni' ila'bödxë', en ulu'til-la láyë'ë lu yöl-la' ruhu'ini quégaquië'.

¹³ Ní'irö Jesús gudxë' bönni' na' rinná bé'enë' bönni' röjáquië' gudil-la, rnnë':

—Böaj lidxu'. Ca na' réajlë'u, ca' gaca quiu'.

La' ná'asö böácatëbi' bi'i huen dxin queë' na'.

Jesús ruúnë' xiná'anu nigula queë' Pedro

(Mr. 1:29-31; Lc. 4:38-39)

¹⁴ Bidxinë' Jesús lidxë' Pedro, ate' ni' bilé'enë'-nu xiná'anu nigula queë', dënu lu da'a, en yú'unu tu xilá. ¹⁵ Gudanë' Jesús ná'anu, ate' la' burúajtë xilá na' yú'unu. Ní'irö böásanu, en bunódzjanu le gulahuë'.

Jesús ruúnë' zían nupa te'e

(Mr. 1:32-34; Lc. 4:40-41)

¹⁶ Cate' chiridzó' dza na', dujuá'agaquië' zían bönni' yú'ugaca bö' xihui' légaquië' ga zoë' Jesús, ate' len yöl-la' rinnësö queë' bubéajë' yugu' bö' xihui' na', en bunë' ca' yú'gu'të nupa te'e. ¹⁷ Caní guca para gaca ca na' gunné' Isaías, bönni' bé'ë didza' uláz queë' Dios, gunné': "Lë' bu'ë yugu' le rizáca'ru', en bu'ë ca' yugu' yödzöhuë' queéru'."

Nupa gulë'ëni tsójácalen Jesús

(Lc. 9:57-62)

¹⁸ Cate' bilé'enë' Jesús nacua' bönachi zían gásibi'ilë', gunná bé'enë' yugu' bönni' usëda queë' ila'dödë' ia'tsölá'a nísado' ni'. ¹⁹ Bidxinë' tu bönni' yudo' usedi ga na' zoë' Jesús, en rë' Lë':

—Bönni' Usedi, sá'lëna' Li' gáti'tës ga tseju'.

²⁰ Jesús rë' lë':

—Yugu' böza' nacua' znan guió'j quégacaba', ate' yugu' biguínido', nudxiágacaba' xicá'agacaba', pero neda', Bönni' Guljë' Bönachi, biti' dë ga quíxaj icja'.

²¹ Ia'tué' bönni', náquië' bönni' usëda queë' Jesús, gudxë' Lë':

—Xan, benna neda' lataj huöja' ga idxinrö dza chibucácha'a-në' xuza'.

²² Jesús gudxë' lë':

—Gudá' neda'. Bé' lataj yugu' bönni' tati cazë' ulu'cáché'ë nupa ilátigaca quégaquië'.

Jesús ribequi dxíë' bö' budunu'

(Mr. 4:35-41; Lc. 8:22-25)

²³ Gurenë' Jesús lë'e bárcodo', ate' dzágagaquië' Lë' bönni' usëda queë'. ²⁴ Ní'irö guyecja bö' budunu' lu nísado' na', ate' riyasa ridxiáda' nísado' na' ga bidxintë riyaza

nisa lë'e bárcodo' na'. Dë' rásië' Jesús lë'e barco na'. ²⁵ Ní'irö bila'dxinë' bönni' usëda queë' Jesús ga na' zoë', ate' bulu'subanë' Lë', en tē' Lë':

—Xan, busölá netu'. Chirigáchi'ru' lu nisa.

²⁶ Bubi'ë didza' Jesús, en rë' légaquië':

—¿Bizx que rádxili'? Láti'do'os réajlë'ëli'-në' Dios.

Ní'irö guyasë' Jesús, en bulidzë' bö' na' recja, en nísado' na', ate' la' guró'ötë dxi.

²⁷ Bulu'bánninë' bönni' na', ta'nné':

—¿Nuzxi caz bönni' ni? Ru'isë' didza', ate' bö' recja, en nísado' tun ca rnnë'.

Yugu' bönni' Gadara yú'ugaca bö' xihui' légaquië'

(Mr. 5:1-20; Lc. 8:26-39)

²⁸ Cate' bidxinë' Jesús ia'tsölá'a nísado' ga na' naca lu xiyú yödzo Gadara, bila'rúajë' chopë' bönni' ga nacuá' ba quegaca nupa nátigaca, dutságagaquië' Jesús. Nácagaquië' sínia', ate' cuntu nu gaca tödi la' nöza ni'. ²⁹ La' gulu'itë' zidzaj didza' chopë' ni, ta'nné':

—¿Bizxi ral-la'tu' quiu', Jesús, Zxí'inë' Dios? ¿Naru' bidxintso' ni dusaca' zi'u netu' zí'alö ca idxín dza queé'tu'?

³⁰ Ga ni' nacu'ë nacuá'aba' cuchi zían ta'daba' táguba', nacuá'aba' láti'do' ga naca zi'tu'.

³¹ Gula'naba yechi' bö' xihui' na' Jesús, en tē' Lë':

—Channö ubéaju' netu', benna lataj tsöjtsú'ugacatu'-ba' cuchi zían ni'.

³² Ní'irö Jesús gudxë' léguequi:

—Guli'tséaj.

La' bila'rúajtë bö' xihui', en yöjcházagaca cuchi zían ni'.

Ní'irö yúgu'tëba' cuchi zían na' yöjbíxitëgacaba' ga naca lë'e guió'j, en yöjcházagacaba' lu nísado', ga ni' gula'yépi'ba' nisa, en gulátiba'.

³³ Guládxinë' bönni' tu'yúë'-ba' cuchi na', ate' bulu'zxúnnajë'. Cate' bila'dxinë' lu yödzo, gula'guíxj'ë yúgu'të lë na' guca quegaquië' bönni' ni' gula'yú'u bö' xihui' légaquië'. ³⁴ Ní'irö bila'rúaj bö'nachi lu yödzo ni', yöjtságagaquië' Jesús. Cate' bila'lé'enë' Lë', guláta'yue' lahuë' uzé'ë lu xiyúgaquië' na'.

9

Jesús ruúnë' tu bönni' nacú'unië' bin

(Mr. 2:1-12; Lc. 5:17-26)

¹ Ní'irö bubenë' Jesús lë'e bárcodo', en gudödë' ia'tsölá'a nísado' ni', ate' budxinë' ga naca ladzë'. ² Ni' dujuá'gaquië' tu bönni' nacú'unië' bin ga zoë' Jesús, zxoë' lu da'a yaga. Cate' bilé'enë' Jesús ca na' ta'yéajlë'ë bönni' ni Lë', gudxë' bönni' na' nacú'unië' bin, rnnë':

—Butipa ládxi'u, zxf'ina'do'. Chibuníti lahua' dul-la' nabágu'u.

³ Nacu'ë ca' bönni' yudo' tu'sédinë' ni', ate' ta'nné' lu icja ládxi'do'gaquië', ta'nné': “Didza' ru'ë bönni' ni ruzóa Dios tsölá'alö.”

⁴ Cate' réquibe'enë' Jesús le ta'zá' ládxi'gaquië', rë' légaquië':

—¿Bizx que rizá' ládxi'li' caní le cabí naca tsahui'? ⁵ Biti' naca böniga nu guiésö bönni' ni: “Yugu' dul-la' nabágu'u chibuníti lahua'”, pero naca böniga nu gun ga huóásë', en uzé'enë'. ⁶ Na'a, ulu'ida' libí'ili' neda', Bönni' Guljë' Bönachi, dë lu na'a yöl-la' unná bë' uniti lahua' dul-la' luyú ni.

Ní'irö Jesús gudxë' bönni' na' nacú'unië' bin, rnnë':

—Guyása. Buchisa da'a yaga quiu', en böaj lidxu'.

⁷ Ní'irö la' guyásatë' bönni' na' nacú'unië' bin, en bóajë' lidxë'. ⁸ Cate' bila'lé'enë' bönni' nacu'ë ni' lë ni, bulu'bánninë', ate' gula'gu'ë Dios yöl-la' ba tu' bunödzejë' yöl-la' huáca caní quegaca bö'nachi.

Jesús rulidzë' Mateo

(Mr. 2:13-17; Lc. 5:27-32)

⁹ Cate' buzé'ë Jesús ni', bilé'ené' bönni' lè' Mateo, rö'ë ga na' ruquíxjé' uláz que yödzo zi'tu', ate' Jesús gudxé' lè':

—Gudá' neda'.

Ní'irö la' guyásatè' Mateo na', ate' sa'yéajlené' Jesús.

¹⁰ Ia'tú le guca, cate' ni' rö'ë Jesús rahué' ga naca lidxé' Mateo, zían bönni' tu'quíxjé', en yugu' bönni' cá'asö bila'dxiné' ga zoé', ate' gula'bó'lené' Jesús tsözxón len yugu' bönni' uséda queé'. ¹¹ Cate' bönni' yudo' fariseo bila'lé'ené' lè ni, gula'nábiné' yugu' bönni' uséda queé' Jesús, ta'nné':

—¿Naru' bönni' rusédiné' libí'ili' rágulentsé' tsözxón bönni' tu'quíxjé', en iá'zica'rè' bönni' dul-la'?

¹² Cate' biyönné' Jesús lè ni, rë' légaquié':

—Biti' naquíniguequiné' bönni' nácagaquié' dxi'a nu un bönachi, pero bönni' té'ené' naquíniguequiné' nu un bönachi. ¹³ Guli'tséaj, en buli'séda le rnna lè na' nazúaj lu guichi lá'ayi, le rnna caní: “Ré'ënda' ulu'huéchi' ládxi'gaquié' bönni' luzá'agaquié', en caléga ilútié'-ba' böa' bédxi lu bucugu lá'ayi quia'.” Bida' ni, caléga para ulídzagaca'-né' bönni' tsahui', pero bida' para ulídzagaca'-né' bönni' dul-la' para ulu'bí'i ládxi'gaquié'.

Rusédiné' Jesús ca ral-la' gunru' gubasa

(Mr. 2:18-22; Lc. 5:33-39)

¹⁴ Ní'irö bönni' dá'gaquié' Juan, bönni' na' buquilé' bönachi nisa, bila'dxiné' ga zoé' Jesús, ate' gula'nábiné' Lè', ta'nné':

—¿Bizx que na' netu', enca' yugu' bönni' yudo' fariseo, zían luzuí' runtú' gubasa, pero yugu' bönni' uséda quiu' Li' bití' tuné' gubasa?

¹⁵ Bubi'ë didza' Jesús, en rë' légaquié':

—¿Naru' huácatsö ila'sébi ládxi'gaca nupa nacuá' laní que yöl-la' rutsaga na' tsanni ni' bönni' rutsaga né'ë zóalené' légaquié'? Za' dza cate' idúé' bönni' na' rutsaga né'ë ga nacu'ë. Dza ní'irö iluné' gubasa.

¹⁶ Bucúdzu'ë didza' Jesús, rnné':

—Cuntu nu un tu lari' tébi len lari' cubi, tu' uxú'uni lari' cubi na' nugu'ë lari' tébi na', ate' ichóza'rö lari' tébi na'. ¹⁷ Lësca' caní, cuntu nu bönni' rigué'ëné' xisi uva cubi tu lu buzudi guídi gula, tu' galaj ilébi xisi uva cubi na', en uzxuzxaj buzudi guídi gula na', ate' gaca ditaj xisi uva na', ate' initi ca' buzudi guídi na'. Rigá'aru' xisi uva cubi tu lu buzudi guídi cubi, ate' irópatè' taca chí'i.

Rubanbi' bi'i nigula queé' Jairo, en ruhuóácanu tu nigula gudannu lari' nácué' Jesús

(Mr. 5:21-43; Lc. 8:40-56)

¹⁸ Tsanni ni' Jesús ruí'ilené' légaquié' didza' ni, tu bönni' rinná bé'ené' bönachi judío bidxiné' ga zoé', ate' buzóa zxi'bè' lahué' Jesús, en rë' Lè':

—Bi'i nigúlado' quia' la' gútitébi'. Gudá ixóa no'o lébi', ate' ubanbi'.

¹⁹ La' guzuítené' Jesús, en sa'yéajlené' lè'. Dzágagaquié' bönni' uséda queé' Lè'.

²⁰ Ní'irö bidxinu tu nigula zaca' cúdzu'lé' Jesús, chiguca chinnu iz ré'enu, bití' ruhuí'i rön queénu que hué' quégaca cázanu nigula, ate' gudannu lari' nácué' Jesús. ²¹ Caní bennu tu' rizá' ládxi'nu, rnnanu: Channö cansa' zxi', huóáca'. ²² Ní'irö buécjé' Jesús, en ruyúé' lènu, ate' rë'ë-nu:

—Butipa ládxi'u, zxi'ina'do'. Chibóácateu' tu' réajlé'u neda'.

La' ná'asö böácatènu.

²³ Cate' bidxiné' Jesús lidxé' bönni' unná bé' na', bilé'ené' nacu'ë ni' bönni' tu'cödxé' gui, en nupa ta'bödxí yechi'. ²⁴ Jesús rë' légaquié':

—Guli'cuita ni, tu' cabí nátibi' bi'i nigúlado' ni. Rásisibi' na'.

Ní'irö nupa nacuá' ni' bulu'titaj Lè'.

²⁵ Cate' chinubéajé' Jesús bönachi na' ní'ilö, guyázié', en gudélé'ë ná'abi' bi'i nigula na', ate' la' guyásatèbi'. ²⁶ Guzé didza' ca guca lè ni, ate' bila'yöni bönachi nacuá' idútè luyú na'.

Jesús ruúnë' bönni' nachul-la guió'j lógaquië'

²⁷ Cate' Jesús burúajë' ni', chopë' bönni' nachul-la guió'j lógaquië' sôjácálenë' Lë'. Tu'ë zidzaj didza', ta'nnë':

—Zxí'ini xi'sóë' David, buéchi' ladxi' netu'.

²⁸ Cate' bidxinë' Jesús ga naca lu yu'u, bila'dxinë' chopë' bönni' na' nachul-la guió'j lógaquië' ga zoë'. Jesús gunábinë' légaquië', rnnë':

—¿Ba réajlë'ëli' neda', huáca una' libí'ili'?

Légaquië' ta'nnë':

—Ön, Xan.

²⁹ Ní'irö Jesús gudanë' guió'j lógaquië', ate' rnnë':

—Ca réajlë'ëli', ca' gaca queé'li'.

³⁰ La' böáljatë guió'j lógaquië'. Ní'irö Jesús buzenë' bach légaquië', rnnë':

—Guli'gü'ítica'sö ládxi'li' cuntu nu inözi lë ni.

³¹ Cate' bulu'rúajë' ni', la' bulu'zëtë' didza' idútë luyú ni' ca naca lë na' benë' Jesús.

Jesús ruúnë' tu bönni' biti' ru'ë didza'

³² Cate' Jesús, en yugu' bönni' usëda queë' bulu'rúajë' tu lu yu'u, bila'dxinë' bönni' ga zoë' Jesús nachë'gaquië' lahuë' tu bönni' biti' ru'ë didza', tu' yu'u lë' bö' xihui'. ³³ Cate' bubéajë' Jesús bö' xihui' na', la' gunnëtë' bönni' na' biti' guca gu'ë didza'. Bulu'bánninë' bönni' nacu'ë ni', ta'nnë':

—Catu caz rilé'etu' le caní ladaj bönachi Israel.

³⁴ Ní'irö bönni' yudo' fariseo gula'nnë' queë' Jesús, ta'nnë':

—Bönni' ni rubéajë' yugu' bö' xihui', rugunë' dxin yöl-la' unná bë' que xángaca bö' xihui' na'.

Jesús ruhuéchi' ládxe'ë bönachi zían

³⁵ Gudë' Jesús idú gásibi'ilö gapa nacuá' yödzö zxön, en gapa nacuá' yödzödo', ate' gapa naca lu yu'u ga tu'dubë' tu'sëdë' bönni' judío queë' Dios. Rusédinë' Jesús bönachi nacuá' ni', en runë' libán que didza' dxi'a ca rinná bë'ë Dios. Bunë' yúgu'të nupa bi ta'gu'i ta'zaca' yugu' lu yödzö na'. ³⁶ Cate' Jesús bilé'enë' bönni' zían ni', buéchi' ládxe'ë légaquië', tu' ta'gu'i ta'záquië', en nudú ládxi'gaquië' ca raca quégacaba' bö'cu' zxila' biti' zoa nu ruyú légaacaba'. ³⁷ Ní'irö Jesús rë' yugu' bönni' usëda queë', rnnë':

—Le nácatë dëda' yöla, pero nabábasö nupa tu'lapa. ³⁸ Que lë ni na', guli'gáta'yu lahuë' Dios, náquië' Xan yöla na', inábili'-në' isól-lë'ë bönni' huen dxin ulu'lapë' yöla queë'.

10

Jesús riböë' bönni' ilácagaquië' gubáz queë'

(Mr. 3:13-19; Lc. 6:12-16)

¹ Ní'irö bulidzë' Jesús idxínnutë' bönni' usëda queë', en budödë' lu ná'agaquië' yöl-la' unná bë' para ulu'béajë' bö' xihui' yú'ugaca bönachi, en ulu'ünë' yúgu'të nupa te'e, en yúgu'të nupa bi ta'gu'i ta'zaca'.

² Caní naca lágaquië' idxínnutë' gubáz na' nasól-lë'ë Jesús:

Simón, (lë' ca' Pedro),

Andrés, (bóchë'ë Simón na'),

Jacobo, (zxí'inë' Zebedeo),

Juan, (bóchë'ë Jacobo na'),

³ Felipe, Bartolomé, Tomás,

Mateo, (bönni' uquízxaj),

Jacobo, (zxí'inë' Alfeo),

Lebeo, (lë' ca' Tadeo),

⁴ Simón, (bönni' ru'i ládxe'ë yödzö queë'),

Judas Iscariote, (bönni' udödë' Jesús lu ná'agaquië' bönni' ilútië' Lë').

Jesús risól-l'ë gubáz queë' tsöjéngaquië' libán
(Mr. 6:7-13; Lc. 9:1-6)

⁵ Ní'irö Jesús gusól-l'ë idxínnutë' bönni' ni tsöjéngaquië' libán, ate' gunná bé'enë' légaquië', rnnë':

—Biti' tséajli' ga nacua' bönachi biti' nácagaca judío, en biti' tsú'uli' ládzagaca bönachi nacua' luyú Samaria. ⁶ Guli'tséaj ga nacua' bönachi Israel, nácagaquië' ca bö'cu' zxíla'do' nanítigacaba'. ⁷ Guli'tsöjén libán, innali': "Chibidxín gala' dza Dios, Nu na' zoa yehua' yubá, inná bé'ë luyú ni." ⁸ Buli'ún nupa te'e. Buli'ún dxi'a nupa te'e huë' nudzu' ruzödi. Buli'subán nupa chinátigaca. Buli'béaj bö' xihui' yú'ugaca bönachi. Bénnasa' queéli' yöl-la' unná bé' ni. Buli'gún dxin le, en biti' bi uquízxjali'.

⁹ Biti' bi guá'ali' lu buzudi queéli', calëga dumí oro, en calëga dumí plata, en calëga dumí lásido'. ¹⁰ Biti' guá'ali' yöxaj yöta queéli' le gáguli' la' nöza. Tuz lari' ixóa yenli', en biti' guá'ali' xiráchuli' o xiyaga queéli', tu' idzöli quézinë' bönni' huen dxin le gahuë'.

¹¹ Gátitës yödzo zxön o yódzödo' ga idxinli', guli'naba nuzxi naca idú ladxi' lu yödzo ni', ate' ugá'anali' lidxi nu na' cate' gála'rö dza urúajli' yödzo na'. ¹² Cate' tsú'uli' tu lu yu'u, buli'gapa Dios bönachi nacua' lu yu'u na', inábili'-në' Dios unödzjé' quégaquië' le cuéqui dxi icja ládxi'do'gaquië'. ¹³ Channö bönachi nacua' lu yu'u ni' nácagaca lesaca', ugá'analen le ribequi dxi ladxi' na' léguequi, pero channö bönachi na' cabí nácagaca lesaca', inábali' cabí ugá'ana lë na' ribequi dxi ladxi' len léguequi. ¹⁴ Gátitës ga idxinli' ga bönachi ni' biti' ilún libí'ili' bal, en biti' ulu'zé nagui xtídzalí', buli'rúaj lu yu'u ni' o yödzo ni', ate' guli'cu'bi bëchtö da' lë'e lábali', le ulu'í léguequi nabága'gaca xíguia'. ¹⁵ Le nácate' rea' libí'ili', cate' idxín dza ichúguië' Dios quégaca bönachi, ila'gu'i ila'záca'rö bönachi yödzo na' ca ila'gu'i ila'záca' bönachi gula'cuá' yödzo Sodoma, en yödzo Gomorra, nupa ni' busunítie' Dios.

Nupa biti' ta'yéajlë' ulu'saca' zi' nupa dá'gaca Cristo

¹⁶ Gunné' ca' Jesús:

—Buli'yútsöca', neda' risól-la'a libí'ili', ate' gácali' ca bö'cu' zxíla'do' ta'daba' ga dzó'öba' bö'cu' gu'a sínia'. Guli'gaca sina' ca nácagacaba' sina' bëla sínia', pero guli'gaca ca' nöxaj ladxi' ca nácagacaba' gu'dödo'. ¹⁷ Guli'gún chi'i cuinli' quégaca bönachi, tu' ulu'dödë' libí'ili' lu ná'agaquië' bönni' yúlahui', en ila'guínë' libí'ili' gapa naca lu yu'u ga tu'dubë' tu'sëdë' bönni' judío queë' Dios. ¹⁸ Lësca' caní, ila'ché'ë libí'ili' lógaquië' bönni' lo, en lógaquië' bönni' ta'nná bé'ë, tu' dá'ali' neda'. Caní gaca para gaca gunli' ba nalí quia' lógaquië' bönni' ni', en lógaquië' bönni' biti' nácagaquië' judío. ¹⁹ Ní'irö cate' ulu'dödë' libí'ili' lu ná'agaquië' bönni' unná bé' na', biti' có'öli' böniga nacxi innali', tu' ichizë' Dios icja ládxi'do'oli' didza' gü'ili', en ca innali' la' dza ná'asö. ²⁰ Calëga libí'sili' na' innali', pero Dios Bö' Lá'ayi, Nu na' risól-l'ë Xúziru' Dios queéli', Lë cazë' sóalenë' libí'ili', en gu'ë didza'.

²¹ Ila'cuá' bönachi ulu'dödi bóchi'guequi lu ná'agaquië' bönni' ilútië' légaquië', en lësca' caní, bönni' nácagaquië' xuz ulu'dödë' xzí'inigaquië', ate' ila'cuá'abi' bi' i ila'dá'bagabi' xúzgacabi', en ilunbi' ga ilátië' xúzgacabi' na'. ²² Yúgu'të bönachi ulu'zóa libí'ili' tsölá'alö tu' dá'ali' neda', pero nu ugá'ana tsutsu ga idxinrö dza údxi, nu ni ulá. ²³ Cate' ulu'saca' zi' bönachi libí'ili' tu lu yödzo, buli'zxunnaj ni', ate' tséajli' ia'tú yödzo, tu' rea' libí'ili', huöda' neda', Bönni' Guljë' Bönachi, zí'alö cate' údxi gunli' libán gapa nacua' yugu' yödzo quégaca bönachi Israel.

²⁴ Núti'tës bönni' náquië' bönni' usëda biti' nácare' lo ca nu rusëdi lë', en lësca' caní, nu bönni' náquië' huen dxin biti' nácare' lo ca xanë'. ²⁵ Nu na' naca bönni' usëda ral-la' udzëjanë' channö huadéli'në' gáquië' ca naca nu rusëdi lë', ate' bönni' huen dxin na' ral-la' udzëjanë' channö gáquië' ca naca xanë'. Channö ta'nnë' quia' neda', bönni' xan yu'u, ta'nnë' naca' Belzebú tu' xihui', ila'nnë' zí'irë' quégaca bönachi tá'gaquië' neda'.

Nu ral-la' gádxiru'
(Lc. 12:2-9)

²⁶ Gunné' ca' Jesús:

—Que læ ni na', biti' gádxili' bönachi. Hualá' lahui yúgu'të le raca bédxi lándos, ate' huáca bē' yúgu'të le nagachi'. ²⁷ Yugu' didza' ru'ílēna' libí'ili' ga naca chul-la, guli' quixjö' ga naca lu bení', ate' le rea' libí'ili' ga nagachi', guli'nné' zidzaj ga naca lahui' lógaca bönachi. ²⁸ Biti' gádxili' nupa tuti le nácagaca caz bönachi, pero biti' gaca ulu'suniti bö' naca cázaru'. Guli'gadxi Dios, Bönni' na' gaca gútiē' idútē' le nácali', en chú'uné' bö' naca cázali' lu guí' gabila.

²⁹ 'Ta'dá'uba' chópaba' biguínido' len tu dumí lásido', pero biti' ibíxiba' tuba' lu yu channö cabí ru'ë Xúziru' Dios lataj gaca caní. ³⁰ Lësca' caní, nabábagaca yúgu'të guitsa' ícjali' lahuē' Dios. ³¹ Que læ ni na', biti' gádxili'. Ru'itērö ládxe'ë Dios libí'ili' ca ru'í ládxe'ë-ba' zianba' biguínido'.

Yugu' bönni' ta'z' lu ná'agaquiē' Cristo lógaca bönachi
(Lc. 12:8-9)

³² Gunné' ca' Jesús:

—Nu bönni' si' lu nē'ë neda' lógaca bönachi, neda' si' lu na'a bönni' na' lahuē' Xuza' zoē' yehua' yubá. ³³ Bönni' ta'dá'baguē'ë lógaca bönachi, ila'nné' biti' ta'dé'ë neda', lësca' caní neda' tá'baga'a légaquiē' lahuē' Xuza' zoē' yehua' yubá.

Jesús náquiē' le run ga ila' rúaj choplö bönachi
(Lc. 12:51-53; 14:26-27)

³⁴ Gunné' ca' Jesús:

—Biti' guéquili' za'a idigu'a le ribequi dxi bönachi yödzülió ni. Biti' za'a idigu'a le ribequi dxi, pero za'a idigu'a le gun ga ila' rúaj choplö bönachi. ³⁵ Za'a ni, ate' guna' ga ila'dá'baga' bönachi xúzguequi, ate' yugu' nigula ila'dá'baga'nu ca' xiná'agacanu. Lësca' caní, yugu' nigula xzoa' lídxigacanu ila'dá'baga'nu xto' zxí'ininu. ³⁶ Caní gaca, la' di'a dzasö quégaca bönachi ulu'saca' zi' luzé'eguequi.

³⁷ 'Nu nadxí'irö xuz xinē'e ca nadxí'i neda', biti' naca bachi nu na' ta' neda', ate' nu nadxí'irö bi'i bönni' que o bi'i nigula que ca nadxí'i neda', biti' naca bachi nu na' ta' neda'. ³⁸ Nu biti' si' lu nē'e gaca ca tu bönni' sōjté'ë læ'e yaga cruz, en ta' neda', biti' naca bachi guequi quia' neda'. ³⁹ Nu ru'í ladxi' gun chi'i yöl-la' na'bán que, uniti le, pero nu uniti yöl-la' na'bán que tu' da' neda', ulá nu na'.

Yugu' le ubi'ë Dios queéru'
(Mr. 9:41)

⁴⁰ Gunné' ca' Jesús:

—Nu gun libí'ili' bal, neda' ca' gun bal, ate' nu na' gun neda' bal, gun bal ca' Dios Xuz nasól-lē'ë neda'. ⁴¹ Nu gun bal tu bönni' ru'ë didza' uláz queē' Dios tu' ru'ë didza' uláz queē' Dios, huadeli' nu na' lu nē'ë Dios la' leze na' idéli'nē' bönni' ru'ë didza' uláz queē' Dios. Lësca' caní, nu gun bal tu bönni' tsahui' tu' náquiē' bönni' tsahui', huadeli' nu na' lu nē'ë Dios la' leze na' idéli'nē' bönni' tsahui'. ⁴² Núti'tēs nu unödzej queē' tu bönni'do' ni tu zxibíndo'os nisa tu' náquiē' bönni' usēda quia' neda', le nácate' rea' libí'ili', biti' uniti nu na' le ral-la' si' lu nē'ë Dios.

11

Ta'dxinē' bönni' nasól-lē'ë Juan ga zoē' Jesús
(Lc. 7:18-35)

¹ Cate' Jesús budxi buzéajni'inē' yugu' bönni' usēda queē', buzé'ë ni', sa'yéajē' röjsédinē' bönachi, en röjenē' libán yugu' lu ládzagaca bönachi na'.

² Juan, bönni' buquile' bönachi nisa, ni' yu'ë lidxi guié, ate' biyönné' ca nácagaca le runé' Jesús. Ní'irö Juan na' gusól-lé'ë chopé' bönni' dá'gaquié' lé', ate' bila'dxiné' ga na' zoé' Jesús. ³ Chopé' ni gula'nábiné' Jesús, té' Lé':

—¿Nacu' Li' Cristo, Bönni' na' ral-la' idxiné' yödzölió ni, o ral-la' cöztu' dza idxiné' ia'túé' bönni'?

⁴ Bubi'ë didza' Jesús, ré' légaquié':

—Guli'tséaj tsöjtíxjöi'ili'-né' Juan lé ni riyónili', en rilé'eli'. ⁵ Guli'tsöjödxe' ca raca, tu'lé'ené' bönni' guchul-la guiójlógaquié', ate' tu'zé'ë bönni' biti' guca ila'dé'. Nuhuóacagaquié' bönni' gü'iguequiné' hué' nudzu' ruzödi, ate' ta'yönné' bönni' gula'códzué'. Nnita' nabángaqüé' bönni' gulátié', ate' raca libán que didza' dxi'a lógaca bönachi yechi'. ⁶ Bica' ba nu bönni' biti' gáquié' chopa ládxé'ë, biti' ubéaj ládxé'ë neda'.

⁷ Cate' yugu' bönni' na' dá'gaquié' Juan bulu'zé'ë söjhuójgaquié', ní'irö gusí lahué' Jesús ru'ilené' bönachi nacua' ni' didza' ca naca queé' Juan na'. Ré' légaquié':

—¿Bizxi gú'unili' ilé'eli' cate' ni' guyéajli' lu lataj cá'asö? ¿Naru' gú'unili' ilé'eli'-né' tu bönni' náquié' ca tu gui ruzecaj bö' recja le? ⁸ Channö cabí, ¿bizxi gú'unili' ilé'eli'? ¿Naru' gú'unili' ilé'eli'-né' tu bönni' nácué' lari' dxí'ado'? Nöz quézili' bönni' nácugaquié' lari' dxí'ado' nacué'ë lódxigaquié' bönni' ta'nná bé'ë. ⁹ Channö cabí, ¿bizxi gú'unili' ilé'eli'? ¿Naru' gú'unili' ilé'eli'-né' tu bönni' ru'ë didza' uláz queé' Dios? Ca' naca, réquida'. Rea' libí'ili', bilé'eli'-né' tu bönni' nácatèrè' lo ca ia'zica'rè' bönni' gulu'ë didza' uláz queé' Dios. ¹⁰ Caní naca, tu' náquié' Juan bönni' na' ru'i didza' le nazúaj lu guichi lá'ayi ca naca queé', le rnna:

Buyú, risól-la'a bönni' gubáz quia', inórué' ca Li'.

Lé' upé'ë nöza ga tödu'.

¹¹ Le nácatè rea' libí'ili'. Iduté yödzölió ni, cuntú nu zoa nácarö lo ca Juan, bönni' ni' buquile' bönachi nisa, pero nu naca cuídi'do'os ga rinná bé' Nu na' zoa yehua' yubá nácatèrö lo ca Juan na'.

¹² 'Cate' ni' gusí lahué' buquile' Juan bönachi nisa, ga ridxinté na'a dza, bayudxi túngaca bönachi para ta'yaza ga rinná bé'ë Bönni' na' zoé' yehua' yubá, ate' nupa tunsö bayudxi ta'deli' le. ¹³ Ga bidxinté dza na' blé'ë Juan, le rinná bé' xibá queé' Moisés, en le bulu'zúajé' lu guichi yúgu'té bönni' gulu'ë didza' uláz queé' Dios gulu'i didza' ca rinná bé'ë Bönni' na' zoé' yehua' yubá. ¹⁴ Channö ré'ënili' si' lu ná'ali' lé ni, ral-la' inózili' Juan na' náquié' Elías, bönni' ni' bé'ë didza' uláz queé' Dios, bönni' na' Dios gunné' ral-la' ilá lahué' leyúbölö dza ni zóaru' na'a. ¹⁵ Nu zoa nagui, en riyöni ral-la' uzé nagui.

¹⁶ ¿Bizxi ubéqui'tseda' ca nácagaca bönachi nacua' dza ni zóaru' na'a? Nácagaquié' ca yugu' bí'ido' ta'bó'öbi' lu yé'ëyi. Zidzaj tu'lídzabi' luzá'agacabi', ¹⁷ ta'nnabi': "Rucódxitu' queé'li' gui. ¿Bizx que biti' ruyá'ali'? Rul-la yéchi'tu' queé'li'. ¿Bizx que biti' ribödxi yéchi'li'?" ¹⁸ Caní nácali', tu' bidé' Juan, ate' tu' cabí gü'i gudahué' ca ráguli' libí'ili', gunné'li' queé', gunnali': "Tu' xihui' dzágui lé'." ¹⁹ Ní'irö bidxina' neda', Bönni' Guljé' Bönachi, ate' re'aj rahua', ate' rnnéli' quia', rnnali': "Náquié' bönni' huágulé'ë, en bönni' re'jé'. Náquié' luzá'agaquié' bönni' uquízxaj, en ia'zica'rö huen dul-la'." Yöl-la' réajni'i queé' Dios naca bé' ni'a que le tun nupa ta'zi' lu né'eguequi le.

Le gaca que nu biti' run ca rnna xtídzé'ë Dios

(Lc. 10:13-15)

²⁰ Ní'irö gusí lahué' Jesús ruzené' bach bönachi nacua' yugu' yödzö gapa ni' bené' zían yöl-la' huáca, tu' cabí tu'bí'ini lódxigüequi. ²¹ Gudxé' léguequi:

—Bica' bayechi' libí'ili', bönachi Corazín. Bica' bayechi' libí'ili', bönachi Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca bena' ga zóali', dza ní'télö ulu'bí'i lódxigüequi bönachi yödzö Tiro, en yödzö Sidón na', en ilácugaca lari' tébi, en ulu'dxía dö ícjaguequi, le ulu'lu'i tu'bí'i lódxigüequi bönachi na'. ²² Na'a, neda' rea' libí'ili', cate' idxín dza ichúguié' Dios quégaca bönachi, qu'i sáca'röli' libí'ili' ca ila'gu'i

ila'zaca' bönachi yödzö Tiro, en yödzö Sidón, nupa na' busunítië' Dios. ²³ Libí'ili', bönachi Capernaum, guca queé'li' ca bidxíntë'li' ga nu riyaza yehua' yubá. Huótjali' lu gu' gabila. La'tu' gulaca yugu' yöl-la' huáca bena' ga zóali' lu yödzö Sodoma, ulu'gá'ana bönachi yödzö ni' ga ridxintë' na'a dza. ²⁴ Na'a, neda' rea' libí'ili', cate' idxín dza ichúguië' Dios quégaca bönachi, quí'i sáca'röli' libí'ili' ca ila'guí'i ila'zaca' bönachi Sodoma na'.

Rnnë' Jesús: "Guli'dá ga zoa', uzí' ládxi'li'"

(Lc. 10:21-22)

²⁵ Dza na' bë'ë didza' Jesús, rnnë':

—Xuza', nacu' Xani yehua' yubá, en Xani luyú ni. Rigu'a Li' yöl-la' ba, tu' bucáchu'u lë ni, para cabí ila'lé'enë' bönni' ta'yéajni'ide'enë' le, pero buluí'inu' nupa nácagaca ca yugu' b'íido' le. ²⁶ Ca' gaca, Xuza', tu' caní guyaza ládxi'u Li'. ²⁷ Yúgu'të nudödë' Xuza' lu na'a. Cuntu nu nunbë' neda', Zxí'inë' Dios, pero tuzë' Dios Xuz, en cuntu nu nunbë' Dios Xuz, pero tuza' neda', Zxí'inë' Dios, enca' nupa na' ré'ënda' ulu'ida' léguequi Dios Xuz. ²⁸ Guli'dá ga zoa' yúgu'të'li' röjxéqui'li' tu' rúntica'sili' dxin que yöl-la' yudo', en nuá'ali' yua' zi'i quégaca xibá que, ate' neda' guna' ga uzí' ládxi'li'. ²⁹ Lu yöl-la' nöxaj ladxi' queé'li' guli'gún xichina', gácali' ca bédxi ta'z'í'iba' yugu' quégacaba'. Guli'sëda lu na'a neda', tu' naca' nöxaj ladxi', en do' ladxi', ate' idzöli yöl-la' ruzí' ladxi' queé'li', le cuéqui dxi ládxi'li'. ³⁰ Yugu' na' ugu'a libí'ili', le naca le inná bé'eda' libí'ili', biti' naca böniga, ate' yua' ugu'a libí'ili' le naca le rusédida', dzá'do'os naca.

12

Ta'lecjë' do bönni' usëda queë' Jesús dza lá'ayi

(Mr. 2:23-28; Lc. 6:1-5)

¹ Dza ni', le naca dza lá'ayi quégaquië' bönni' judío, gudödë' Jesús gapa dë yöla xzoa' xtila, ate' ta'dunë' bönni' usëda queë', en gusí lógaquië' ta'lecjë' do ga dxía xzoa' xtila, en tahuë' xzoa' xtila na'. ² Cate' bila'lé'enë' bönni' yudo' fariseo lë ni, të' Jesús:

—Buyútsöca', tunë' bönni' usëda quiu' le cabí ral-la' gunru' dza lá'ayi.

³ Ní'irö Jesús gudxë' légaquië':

—¿Naru' cabí nulábanili' lu guichi lá'ayi bi benë' David cate' gudunë', ate' gula'dún ca' nupa gula'cuá'len lë'? ⁴ Guyu'ë lu yu'u queë' Dios, en gudahuë' yugu' yöta xtila nagú'ugaquië' lu bucugu lá'ayi, le cabí ral-la' gahuë' lë', en biti' ral-la' ilahuë' bönni' gula'cuá'lenë' lë', pero légacsë' bixúz dë lataj ilahuë' le. ⁵ ¿Naru' cabí nulábanili' le rinná bë' xibá queë' Moisés ca tunë' bixúz yugu' dza lá'ayi? Tunë' dxin lö'a yudo' yugu' dza lá'ayi, en biti' ta'báguë'ë xíguia'. ⁶ Na'a, neda' rea' libí'ili', zoa' neda' ni, en naca' bönni' nácarë' lo ca yudo'. ⁷ Biti' réajni'ili' lë na' nazúaj lu guichi lá'ayi, le rnna: "Ré'ënda' huéchi' ládxi'li' luzá'ali', en calëga gútigacali'-ba' böa' bédxido' ruzégui'gacali'-ba' lu bucugu lá'ayi quia'." La'tu' réajni'ili' lë ni, biti' ichúguli' quégaca nupa biti' nabága'gaca xíguia'. ⁸ Ca' naca, tu' naca' neda', Bönni' Guljë' Bönachi, Xani dza lá'ayi.

Jesús ruúnë' tu bönni' narequi' në'ë

(Mr. 3:1-6; Lc. 6:6-11)

⁹ Ní'irö buzë'ë Jesús ni', ate' guyu'ë lu yu'u ga tu'dubë' bönni' judío, en tu'sëdë' queë' Dios. ¹⁰ Lu yu'u na' zoë' tu bönni' narequi' në'ë, ate' tu' té'ënnë' bönni' judío unná bë' ila'dzölinë' bi ulu'zégui'ë Jesús didza', que lë ni na' gula'nábinë' Lë', ta'nnë':

—¿Naru' dë lataj unru' nu re'e cate' naca dza lá'ayi?

¹¹ Bubi'ë didza' Jesús, rë' légaquië':

—Nu bönni' nútsë'ë ládjali', channö zóaba' tuba' bö'cu' zxila' queë', en channö ibíxiba' lu yeru cate' naca dza lá'ayi, ¿naru' cabí tsöjxönë'-ba', en tsöjléajë'-ba'? ¹² Nazáca'tërë' tu bönni' ca tuba' bö'cu' zxila'. Que lë ni na', dë lataj gunru' le naca dxi'a quégaca bönachi cate' naca dza lá'ayi.

¹³ Ní'irö Jesús gudxë' bönni' huë' na':

—Bulí no' o.

Cate' bulí nē'ē, la' böacatē dxi'a ca naca ia'tsölá'a nē'ē.

¹⁴ Ní'irö bulu'rúajē' bönni' yudo' fariseo na', ate' gulún xtídza'gaquiē' para gaca ilútiē' Jesús.

Le gunné' tu bönni' bē'ē didza' uláz queē' Dios ca ral-la' gaca queē' Jesús

¹⁵ Cate' réquibe'enē' Jesús lē ni, buzé'ē ni', ate' sōjácálen bönachi zían Lē'. Jesús bunē' yúgu'tē nupa te'e ladaj bönachi na', ¹⁶ en gunná bé'enē' léguequi bití' usiyónguequi bönachi Nu náquiē'. ¹⁷ Caní gunné', para gaca lē na' gunné' Isafas, bönni' bē'ē didza' uláz queē' Dios, gunné':

¹⁸ Buli'yútsöca', Bönni' ni náquiē' Huen Dxin quia',

na' guró caza' neda' Lē'.

Nadxí'ida' Lē', en raza ládxa'a Lē'.

Ichiza' Lē' Bö' Lá'ayi.

Lē' usiyönnē' yúgu'tē bönachi ca guna',

uchi'a usöróa' quéguequi.

¹⁹ Cuntu nu tíl-lalenē' didza', en bití' ulidzē' zidzaj.

Cuntu nu yöni chí'ē ga naca zí'tu'.

²⁰ Tu guído' zoa bö bití' quítsjē' le,

ate' gu' chizóa ulu, bití' usúluē' le,

cate' uzóarē' le naca tsahui' queē'.

²¹ Yúgu'tē bönachi ilún löza Lē'.

Ta'nnē' bönni' judío unná bē': "Dzaga Jesús tu' xihui'"

(Mr. 3:19-30; Lc. 11:14-23; 12:10)

²² Ní'irö dujuá'gaquiē' tu bönni' ga zoē' Jesús, nachul-la lahuē', en bití' raca gu'ē didza', tu' yu'u bö' xihui' lē', ate' Jesús bunē' bönni' na'. Caní guca, rilé'enē', en ru'ē didza' bönni' na' guchul-la lahuē', en bití' guca gu'ē didza'. ²³ Que lē ni na' bulu'bani yúgu'tē bönachi nacua' ni', ta'nná:

—¿Naru' nácatsē' bönni' ni Zxí'ini Xi'sóē' David, Bönni' na' ral-la' guídē'?

²⁴ Cate' bila'yönnē' bönni' yudo' fariseo lē ni, ta'zá' ládxe'ē, ta'nnē': Bönni' ni rubéajē' yugu' bö' xihui' tu' dzaga Beelzebú tu' xihui', xángaca bö' xihui', Lē'.

²⁵ Réquibe'enē' Jesús lē na' ta'zá' ládxi'gaquiē', ate' rē' légaquiē':

—Gátitēs ga ta'nná bē' bönachi, channö bönachi ni' ila'rúaj choplö, en ila'díl-lalen luzé'eguequi, initi yöl-la' unná bē' quéguequi. Lē'sca' caní, channö ila'rúaj choplö bönachi nacua' tu yödzö o tu yu'u, en ila'dil-la, bití' gaca ila'día' bönachi nacua' yödzö na' o yu'u na'. ²⁶ Lē'sca' caní, channö ubéaj Satanás tu' xihui' la' luzé'esö, ate' yugu' bö' xihui' na' ila'díl-lalen la' léguequisö, ¿naru' idía' yöl-la' unná bē' que tu' xihui'? ²⁷ Rnnali' quia' rubéaja' yugu' bö' xihui' tu' dzaga Beelzebú tu' xihui' neda'. Channö runa' caní, ¿nuzxi dzaga nupa dá'gaca libí'ili' cate' tu'béaj yugu' bö' xihui'? Que lē ni na' le túngaca caz naca bē' nachíxili'. ²⁸ Na'a, channö neda' rubéaja' yugu' bö' xihui' tu' zóalen yöl-la' huáca queē' Dios Bö' Lá'ayi neda', le nácate' chibidxín le rinná bē'ē Dios ga zóali'.

²⁹ ¿Naru' huácatsö nu bönni' tsu'ē lidxē' bönni' nal-la, en cuéajē' yöl-la' tsahui' dzö'ö lidxē' channö cabí gúguē'ē bönni' nal-la na' zí'aló? Ní'irö gaca tsu'ē, en ulatjē' lidxē' bönni' nal-la na'.

³⁰ Nu bití' run neda' tsözxón, ridá'baga' neda', en nu bití' rutubi tsözxón len neda', rusilasi nu na'.

³¹ Que lē ni na' rea' libí'ili', ca naca yúgu'tē dul-la' tun bönachi, en yugu' didza' xihui' ta'nná, uniti lahuē' Dios léguequi, pero nu bönni' inné' zí'ē queē' Dios Bö' Lá'ayi, bití' ca' uniti lahuē' Dios lē'. ³² Lē'sca' caní, nu bönni' inné' quia' neda', Bönni' Guljē' Bönachi, Dios uniti lahuē' lē', pero nu bönni' inné' queē' Dios Bö' Lá'ayi, bití' ca' uniti lahuē' Dios lē'. Bití' uniti lahuē' lē' dza ni zóaru' na'a, en bití' uniti lahuē' lē' dza sí' za'.

Le runru' naca bë' le nácaru'
(Mt. 7:15-20; Lc. 6:43-45)

³³ Gunné' ca' Jesús:

—Channö naca dxi'a tu yaga, cuía le naca dxi'a, pero channö naca cá'asö yaga na', cuía ca' le naca cá'asö. Caní naca, le ribía tu yaga naca bë' yaga na'. ³⁴ Libí'ili' nácali' di'a dza quégacaba' bëla sínia'. ¿Nacxi gaca güi'ili' dxi'a didza', channö cabí nácali' dxi'a? Ca naca le ta'zá' ládxi'gaca bönachi, lësca' caní tu'f'i didza'. ³⁵ Tu bönni' tsahui' ru'ë didza' tsahui' tu' yu'u le naca tsahui' icja ládxi'da'ahuë', pero tu bönni' huiá' dö' ru'ë didza' bití' naca tsahui' tu' yu'u le cabí naca tsahui' icja ládxi'da'ahuë'. ³⁶ Que lë ni na' rea' libí'ili', cate' idxín dza ichúguië' Dios quégaca bönachi, uchi'a usöróë' tu tu bönni' ca naca yúgu'të didza' gula'nnazé' ca'. ³⁷ Ca naca didza' ru'u, uchi'a usöróë' li', ate' uruju' tsahui' o ibágu'u xíguia' ni'a que didza' na' bë'u.

Ta'nábinë' Jesús gunë' le gaca bë' nu náquië'
(Mr. 8:12; Lc. 11:29-32)

³⁸ Ní'irö bulu'bi'ë didza' yugu' bönni' yudo' fariseo, en yugu' bönni' yudo' tu'sédinë', en të' Jesús:

—Bönni' Usedi, ré'ënitú' ilé'etu' tu le gunu' le gaca bë' dë lu no'o yöl-la' unná bë'.

³⁹ Bubi'ë didza' Jesús, en ré' légaquië':

—Yugu' bönni' tuá' dö' ni, bití' zoa idú ládxi'do'gaquië', ta'nábinë' neda' guna' tu le gaca bë' nu naca'. Bití' bi le gaca bë' ila'lé'enë', pero le naca bë'sö na' ca guca queë' Jonás, bönni' bë'ë didza' uláz queë' Dios. ⁴⁰ Ca na' guca queë' Jonás na', bugá'anë' lé'ëba' tu böla zxon idú tsonna dza tsonna yëla, lësca' caní gaca quia' neda', Bönni' Guljë' Bönachi, tsonna dza tsonna yëla ugá'ana' zxan yu. ⁴¹ Ila'yasë' bönni' gula'cu'ë yödzo Nínive dza ichúguië' Dios quégaca bönachi cate' uchi'a usöróë' bönachi nacuá' dza ni zóaru' na'a, ate' le gulunë' usubaga' bönachi ni xíguia' tu' bulu'bf'i ládxi'gaquië' bönni' Nínive na' cate' ni' busiyönnë' Jonás légaquië' xtídzë'ë Dios, ate' na'a zoa' ni neda', en nácatëra' lo ca Jonás na'. ⁴² Lësca' caní, nigula ni' gunná bé'enu yödzo dë saca' ga ridödi gubidza beo' ziaga chásanu dza ichúguië' Dios quégaca bönachi cate' uchi'a usöróë' bönachi nacuá' dza ni zóaru' na'a, ate' le bennu usubaga' légaquië' xíguia', tu' birúajnu nigula na' ga nácatëro zi'tu' para yóninu didza' réajni'i bë'ë Salomón, ate' na'a zoa' ni neda', en nácatëra' lo ca Salomón na'.

Cate' rudxín tu bö' xihui' xilataj
(Lc. 11:24-26)

⁴³ Gunné' ca' Jesús:

—Cate' rirúaj tu bö' xihui' yu'u bönni', ridá gapa nabidxi, riguilaj ga uzí' ladxi'. Channö cabí idzöli ga na' uzí' ladxi', ⁴⁴ ní'irö inná: "Huöja' xilatja' ga ni' birúaja'." Cate' udxín ga ni' birúaj, tsöjxaca' bönni' na', náquië' ca tu yu'u nadachi', en nalúaj, en chinabá'a para nu tsöjsóa ni'. ⁴⁵ Ní'irö tseaj, tsöjzxi' ia'gadxi bö' xihui' nacagacatëro xihui' ca le, ate' ila'yaza yúgu'të, en ila'cuá' icja ládxi'da'ahuë' bönni' na', ate' ga údxi huayáli'tëro ca gaca queë' bönni' na' ca guca queë' zí'alö. Lësca' caní gaca quégaca bönachi tuá' dö' ni.

Xiné'ë Jesús, en yugu' bönni' bóchë'ë
(Mr. 3:31-35; Lc. 8:19-21)

⁴⁶ Cate' ni' ru'ílenë' Jesús bönachi didza' ni, xiné'ë, en yugu' bönni' bóchë'ë bila'dxinë' ni'. Gula'cu'ë ló'alö, en gulé'ëniaguequinë' ilu'ílenë' Jesús didza'. ⁴⁷ Ní'irö tu bönni' busiyönnë' Jesús, en ré' Lé':

—Buyútsöca', nacu'ë xinó'o, en yugu' bönni' bóchu'u ló'alö, en té'ënnë' ilu'ílenë' Li' didza'.

⁴⁸ Bubi'ë didza' Jesús, en ré' bönni' na' busiyönnë' Lé' caní, rnnë':

—¿Nózili' nuzxi caz xiná'a, en nupxi caz bönni' bócha'a?

⁴⁹ Ní'irö bulí në'ë, en bulu'e yugu' bönni' usëda queë', en rnnë':

—Buli'yútsöca', bönni' ni nácagaquië' ca xiná' caza', en yugu' böchi' caza'. ⁵⁰ Núti'tës nu run ca ré'ëni quézinë' Xuza' zoë' yehua' yubá, nu ni naca bi'i böchi' caza', en bi'i zan caza', en xiná' caza'.

13

Rucúdzu'ë didza' Jesús ca naca queë' tu bönni' guz

(Mr. 4:1-9; Lc. 8:4-8)

¹ La' dza ní'isö birúajë' Jesús niu' yu'u, ate' yöjchö'ë ra' nísado'. ² Tu' bila'dxin bönachi zián ga zoë' Jesús, gurenë' tu lë'e bárcodo', en gurö'ë ni', ate' bönachi zián na' gula'cuá' luyú bidxi ra' nísado' na'. ³ Ní'irö Jesús bé'lenë' légaquië' didza', zián le busédinë' légaquië'. Bucúdzu'ë didza', rnnë':

—Buli'yútsöca', birúajë' tu bönni' guz, söjésië' xisedo'. ⁴ Tsanni ni' söjésië', bal-la xisedo' na' gulasi ra' nöza, ate' bila'dxinba' biguinnido', en gulé'ajba' xisedo' na'. ⁵ Gulasi ia'zica'rö xisedo' na' luyú ga rö'ö guió'j, ga na' rö'ö láti'sö yu, ate' la' gula'lentë, tu' cabí ró'öda' yu ni'. ⁶ Ní'irö cate' budzá'a gubidza, lë na' bësië' la' gula'cuáditë, en gula'bidxi, tu' cabí dë ga ilún luí. ⁷ Gula'lén ia'zica'rö xisedo' na' ga bulu'lén lubá yötsi', ate' gula'zxón lubá yötsi' na', en bila'röli lë na' bësië', en gulún ditaj le. ⁸ Gulasi ia'zica'rö xisedo' na' ga naca luyú bëbu, ate' bulu'nödzaj. Bal-la lë na' bësië' bulu'nödzaj ia'tú gayuá'tërö ca'. Ia'zica'rö bulu'nödzaj ia'tsónnalalaj ca', ate' ia'zica'rö bulu'nödzaj ia'chí uruá' ca'. ⁹ Nu zoa nagui, en riyöni, ral-la' uzé nagui.

Le té'ëni ilún le bucúdzu'ë Jesús didza'

(Mr. 4:10-12; Lc. 8:9-10)

¹⁰ Ní'irö bila'dxinë' bönni' usëda queë' Jesús ga zoë', en gula'nábinë' Lë', ta'nnë':

—¿Bizx que ru'ilenu' bönachi didza' yugu' le rucúdzu'u didza'?

¹¹ Bubi'ë didza' Jesús, en rë' légaquië':

—Dios ru'ë libí'ili' lataj tséajni'ili' le nagachi' ca rinná bë'ë Lë' yehua' yubá, pero bönachi ni bití' té'ëni ila'yéajni'i. ¹² Nu si' xtídzë'ë, Dios unödzjë' que ia'lati', ate' gáta'da'arö que, pero nu bití' si' le, la's dui le dë que udúa. ¹³ Que lë ni na' ru'ilena' légaquië' didza' yugu' le rucúdzu'a didza', tu' tu'yúé' pero bití' ta'lé'enë'. Ta'yönnë' pero bití' tu'zé nágagaquië', en bití' ta'yéajni'inë'. ¹⁴ Caní raca quégaquië' para gaca ca na' gunné' Isafas, bönni' bë'ë didza' uláz queë' Dios, gunné':

Le nácatë yónili' pero bití' tséajni'ili'.

Uyuli' iná'ali' pero bití' ilé'eli'.

¹⁵ Caní raca tu' nazidi ládxi'do' gaca bönni' ni, en bití' bi riyaza icja nágagaquië'.

Nadzudi' guió'j lógaquië',

para cabí ila'lé'enë' len guió'j lógaquië' na'.

Bití' ulu'zé nágagaquië',

en bití' ulu'zéajni'i ládxi'gaquië',

en bití' ulu'huóáquië' quia' neda'

para gaca una' légaquië'.

¹⁶ Na'a, bica' ba libí'ili', tu' rilé'e guió'j loli', en riyöni nágali'. ¹⁷ Le nácatë rea' libí'ili', zián bönni' gulu'ë didza' uláz queë' Dios en yugu' bönni' tsahui' gulé'ënnë' ila'lé'enë' le rilé'eli' libí'ili' pero bití' bila'lé'enë' le. Gulé'ënnë' ila'yönnë' le riyónili' libí'ili' pero bití' bila'yönnë' le.

Rigu'xjö'ë Jesús le bucúdzu'ë didza'

(Mr. 4:13-20; Lc. 8:11-15)

¹⁸ Gunné' ca' Jesús:

—Buli'zé nágali' ca naca le bucúdz'u'a didza' que bönni' guz. ¹⁹ Núti'tës nu riyöni didza' ca rinná bé'ë Dios yehua' yubá, en biti' réajni'i le, raca que didza' riyöni nu na' ca guca que xisedo' na' gulasi ra' nöza. La' za'të tu' xihui', en rugúa didza' na' guyú'u icja ládxi'da'ahué' bönni' na'. ²⁰ Xisedo' na' gulasi luyú ga rö'ö guiój rulu'i ca raca queé' bönni' riyönné' didza' na', en la' ruzëtë náguié' lu yöl-la' rudzeja queé', ²¹ pero ca na' biti' ridía' xisedo' na' tu' cabí dë ga gun luí, lësca' caní raca queé' bönni' ni. Cate' idxín tu le usaca' zí' lë', atë' ila'bía ná'gaca bönachi lë' tu' nazí' lu në'ë didza' na', la' gátatë chopa ládxi'ë. ²² Xisedo' na' gulasi ga na' bulu'lén lubá yötsi' rulu'i ca raca queé' bönni' na' riyönné' didza' na', pero ru'i ládxi'ë yugu' le dë yödzölió ni, atë' nazí' yé'ë bönni' na', tu' ru'i ládxi'ë yugu' yöl-la' tsahui' que. Yugu' lë ni ta'röli didza' na', en tun ga biti' gun dxin lu icja ládxi'da'ahué'. ²³ Xisedo' na' gulasi luyú bëbu rulu'i ca raca queé' bönni' riyönné' didza' na', en réajni'iné' le, atë' run dxin didza' na' lu icja ládxi'da'ahué'. Nácagaca bal-la bönachi ca xisedo' na' bulu'nödzaj ia'tú gayuá'tërö ca'. Nácagaca ia'zica'rö bönachi ca xisedo' na' bulu'nödzaj ia'tsónnalalaj ca', atë' nácagaca ia'zica'rö bönachi ca xisedo' na' bulu'nödzaj ia'chí uruá' ca'.

Tu guíxi'do' cané le nalá' ca rilá' yöla xzoa' xtila

²⁴ Ia'tú le bucúdz'u'ë didza' Jesús, atë' rë' légaquié':

—Ca gaca cate idxín ni le rinná bé'ë Dios yehua' yubá naca ca guca que xisedo' dxi'a le guzë' tu bönni' ga naca lu xiyúé'. ²⁵ Tsanni na' tasié' bönni' nacué' lidxë', bidxín tu nu biti' rilé'e xan yu'u na' dxi'a, atë' yöjza lu xiyúé' xisedo' guíxi'do' cané le nalá' ca naca yöla xzoa' xtila, atë' böaj xilataj. ²⁶ Cate' gulén xzoa' xtila na', en guró'ö do que, ga na' dxía xui'i, ní'irö gulaca bë' guíxi'do' cané na'. ²⁷ Ní'irö bila'dxiné' bönni' huen dxin ga zoé' bönni' xan la' yëla na', en të' lë': “Xan, channö guzu' xisedo' dxi'a lu yu quiu', ¿nacxi guca gula'lén guíxi'do' cané na'?” ²⁸ Xan yu na' gudxë' légaquié', rnné': “Tu bönni' biti' rilé'ené' neda' dxi'a bené' caní.” Ní'irö gula'nábiné' huen dxin queé' lë', ta'nné': “¿Ba ré'ënu' tséajtu' tsöjólajtu' guíxi'do' cané na'?” ²⁹ Xángaquié' rë' légaquié': “¿Biti' ca! Nadx ca' cate' iládzu'li' guíxi'do' cané na', iládzu'lentéli' ca' yöla xzoa' xtila. ³⁰ Gácarö dxi'a güi'ili' lataj ila'zxóngarö tsözxón cate' idxinrö dza tsöjtúbiru' le, atë' ní'irö guía' nupa ulu'tubi le: Buli'tubi zí'aló guíxi'do' cané na', en guli'guga' tsöjxili huéaj para uzégui'ru' le, atë' ní'irö utúbili' xzoa' xtila lu yu'u quia'.”

Rucúdz'u'ë didza' Jesús ca naca que xisé mostaza

(Mr. 4:30-32; Lc. 13:18-19)

³¹ Ia'tú le bucúdz'u'ë didza' Jesús, atë' rë' légaquié':

—Ca gaca ga idxín le rinná bé'ë Dios yehua' yubá, gaca ca raca que tu xisé mostaza, le guzë' tu bönni' ga naca lu xiyúé'. ³² Le nácatë xisé mostaza na' nácatërö cuidi' ca yúgu'të xisedo' ia'zica'rö, pero cate' chinadúz, rizxóntërö ca yúgu'të guixi' cuan, en rizxón ca naca tu yaga, atë' ta'dxinba' biguínido', en tunba' xicá'agacaba' lu ni'a në'e.

Rucúdz'u'ë didza' Jesús que cúa zi que yöta xtila

(Lc. 13:20-21)

³³ Ia'tú le bucúdz'u'ë didza' Jesús, atë' rë' légaquié':

—Ca gaca ga idxín le rinná bé'ë Dios yehua' yubá gaca ca le run cúa zi que yöta xtila, le buchíxinu tu nigula len tsonna libixi yöjza xzoa' xtila, atë' guyazxa idútë cúa na'.

Le ré'ëni gun le rucúdz'u'ë didza' Jesús

(Mr. 4:33-34)

³⁴ Yúgu'të lë ni bucúdz'u'ë didza' Jesús, le bé'lené' bönachi nacua' ni' didza', en biti' bi didza' bé'lené' légaquié' le cabí bucúdz'u'ë didza'. ³⁵ Caní bené' para gaca lë na' buzúajë' lu guichi tu bönni' bé'ë didza' uláz queé' Dios, gunné': Gu'a didza' yugu' le ucúdz'u'a didza'. Innía' yugu' le nagachi' cate' ni' gusí lo si' guta' yödzölió.

Rigúxjö'ë Jesús le bucúdzu'ë didza' que guíxi'do' cané

³⁶ Ní'irö buzenë' Jesús bönachi nacuá' ni' didza', en gusól-lë'ë légaquië', ate' guyu'ë yu'u. Ní'irö bila'dxinë' bönni' usëda queë' ga zoë', en të' Lë':

—Gudíxjö'i netu' le ré'ëni inná lë na' bucúdzu'u didza' que guíxi'do' cané le nalá' ca naca yöla xzoa' xtila.

³⁷ Bubi'ë didza' Jesús, ate' rë' légaquië':

—Bönni' razë' xisedo' dxi'a naca' neda', Bönni' Guljë' Bönachi. ³⁸ La' yëla na' naca yödzölió ni, ate' xisedo' dxi'a na' tu'luí'i ca nácagaca nupa nabábagaca ga rinná bë'ë Dios. Guíxi'do' cané na' le nalá' ca naca yöla xzoa' xtila tu'luí'i ca nácagaca nupa néquiguequi que tu' xihui'. ³⁹ Nu na' biti' rilé'e dxi'a xan la' yëla na', en yöjöza guíxi'do' cané na', tu' xihui' caz naca. Dza ulu'tubë' na' ruluí'i ca gaca dza údxi que yödzölió ni, ate' nupa na' tu'tubi nácagaca gubáz lá'ayi queë' Dios. ⁴⁰ Ca na' guca, bulu'tubë' guíxi'do' cané na', en bulu'zégui'ë le lu guí', lëasca' caní gaca cate' údxi que yödzölió ni. ⁴¹ Neda', Bönni' Guljë' Bönachi, isól-la'gaca'-në' gubáz lá'ayi quia', ate' ulu'béajë' ga rinná bë'ë Dios yúgu'të nupa tun ga tun dul-la' luzé'eguequi, enca' nupa tuá' dö'. ⁴² Yugu' gubáz lá'ayi na' ila'gu'ë bönni' tuá' dö' na' lu guí' gabila. Ni' ila'bödxë', en ulu'tíl-la' láyi'gaquië'. ⁴³ Ní'irö ila'yëpi yösa bení' bönachi tsahui', en ilácagaquië' ca gubidza ga ni' rinná bë'ë Dios yehua' yubá. Nu zoa nagui, en riyöni ral-la' uzé nagui.

Rucúdzu'ë didza' Jesús que tu yöl-la' tsahui' nagachi'

⁴⁴ Lëasca' caní bucúdzu'ë didza' Jesús, rnnë':

—Le rinná bë'ë Dios yehua' yubá naca ca tu yöl-la' tsahui' nagachi' tu la' yëla. Cate' bidzölinë' tu bönni' le, bucáchë'ë le leyúbölö ga na' bigachi', ate' lu yöl-la' rudzeja queë' guyijë', yöjëti'ë yúgu'të le dë queë' ate' gú'uë' la' yëla na' para gata' yöl-la' tsahui' na' queë'.

Rucúdzu'ë didza' Jesús que tu bugá le nazáca'da'

⁴⁵ Gunné' ca' Jesús:

—Ca ral-la' së ládxi'li' le rinná bë'ë Dios yehua' yubá naca ca benë' tu bönni' rá'uë', en ruúti'ë, en riguiljë' bugá nazáca'gaca. ⁴⁶ Cate' bidzölinë' tu bugá le nazáca'da', guyijë', yöjëti'ë yúgu'të le dë queë', ate' gú'uë' bugá na'.

Rucúdzu'ë didza' Jesús que tu yöxaj böla

⁴⁷ Lëasca' caní gunné' Jesús:

—Ca gaca ga ridxín le rinná bë'ë Dios yehua' yubá, gaca ca run tu yöxaj böla le ta'chiljë' bönni' lu nísado', le röjxi' zían böla izá'a. ⁴⁸ Cate' chibidzá' yöxaj na', bulu'béajë' le luyú bidxi ra' nísado' na', ate' gula'bö'ë ni', en gula'gu'ë-ba' yugu' böla dxi'a tu lu ga'böra, pero gula'ru'unë'-ba' yugu' böla cá'asö. ⁴⁹ Lëasca' caní gaca cate' údxi que yödzölió ni. Ila'rúajë' gubáz lá'ayi queë' Dios, ate' ulu'béajë' quez yugu' bönachi tsahui', ate' ulu'cuítie' légaquië' ladaj bönachi tuá' dö'.

⁵⁰ Ní'irö ila'gu'ë bönachi tuá' dö' na' lu guí' gabila. Ni' ila'bödxë', en ulu'tíl-la' láyë'ë.

Yöl-la' tsahui' le naca gula, en le naca cubi

⁵¹ Ní'irö Jesús gunábinë' yugu' bönni' usëda queë', rnnë':

—¿Ba réajni'ili' yúgu'të lë ni?

Bulu'bi'ë didza', të' Lë':

—Ön, Xan.

⁵² Jesús gudxë' légaquië':

—Cate' tu bönni' yudo' usedi chinazí' lu në'ë le rinná bë'ë Dios yehua' yubá, náquië' ca tu bönni' xan yu'u, rubéajë' ladaj yöl-la' tsahui' queë' le naca cubi, en le naca gula, le nácagaca tsahui' le ruzi'ë xibé.

*Le benë' Jesús lu yödzö Nazaret
(Mr. 6:1-6; Lc. 4:16-30)*

⁵³ Cate' budxi bucúdzu'ë Jesús yugu' didza' ni, buzé'ë ni'. ⁵⁴ Cate' budxiné' ladzë', busediné' bönachi nacua' lu yu'u ga tu'dubë' bönni' judío, en tu'sedë' queë' Dios, ate' bulu'bánninë, ta'nné':

—¿Gazxi caz guzëdë' bönni' ni yöl-la' réajni'i ni? ¿Nacxi caz naca, runë' yugu' yöl-la' huáca ni? ⁵⁵ Náquië' bönni' ni xzí'inë' bönni' gubëdxi yaga, ate' xiné'ë lënu María. Náquië' bóchi'gaquië' Jacobo, en José, en Simón, en Judas. ⁵⁶ Lësca' nigula zanë' nacua'lennu rë'u ni. ¿Gazxi caz guzëdë' yúgu'të lë ni?

⁵⁷ Que lë ni na' gulaca chopa lãdxi'gaquië', ate' bulu'cá'anë' Lë'. Ní'irö Jesús gudxë' légaquië':

—Yúgu'të bönachi tun bal tu bönni' ru'ë didza' uláz queë' Dios, pero bönachi uládz queë', en bönachi nacua' lidxë' biti' tun lë' bal.

⁵⁸ Que lë ni na' biti' benë' Jesús zían yöl-la' huáca ni', tu' cabí ta'yéajlë'ë Lë'.

14

Ca bëtgaquië' Juan, bönni' buquilé' bönachi nisa

(Mr. 6:14-29; Lc. 9:7-9)

¹ Lu dza ni', biyönnë' Herodes, bönni' rinná bë'ë luyú Galilea, ca nácagaca yugu' yöl-la' huáca runë' Jesús. ² Herodes na' gudxë' yugu' ni'a në'ë, rnnë':

—Bönni' na' Juan, bönni' buquilé' bönachi nisa. Chibubanë' lu yöl-la' guti. Que lë ni na' dë lu në'ë yöl-la' huáca zxön na'.

³ Caní gunné' Herodes tu' gusól-lë'ë lë cazë' bönni' gula'zönë' Juan, en gulúgui'ë lë' du guíë, ate' gula'gu'ë lë' lidxi guíë tu' gú'uninu Herodías ilunë' caní. Herodías na' gúcanu nigula queë' Felipe, bóché'ë Herodes na'. ⁴ Caní benë' Herodes, tu' gudxë' Juan na' lë': "Biti' ral-la' sóalenu'-nu."

⁵ Que lë ni na' gú'unnë' Herodes gútië' Juan, pero gúdxinë' ila'dá'baga' bönachi lu yödzo ni' lë', tu' téquiguequi bönachi náquië' Juan na' tu bönni' ru'ë didza' uláz queë' Dios. ⁶ Ní'irö cate' guca laní que dza guyé'enë' iz Herodes, birúajbi' bi'i nigula queënu Herodías na', en buyá'abi' lógaca nupa nacua' laní na', ate' guyaza lãdxë'ë Herodes le benbi'. ⁷ Guzxi' lu në'ë Herodes, en benë' tsutsu xtídzë'ë unödzejë' queébi' bíti'tës bi inábibi' lë'. ⁸ Tu' chibusédinu-bi' zí'aló xiná'abi', gúdxibi' lë':

—Benna quia' na'a icjë' Juan, bönni' buquilé' bönachi nisa. Gulú'u le tu lu zxiga' zxön.

⁹ Ní'irö buí'innë' Herodes, pero tu' chibenë' tsutsu xtídzë'ë, en tu' bila'yöni nupa te'aj tágulen lë', que lë ni na' gunná bé'enë' nu tsöjnödzej icjë' Juan na' queébi'. ¹⁰ Caní guca, gusól-lë'ë nu tsöjrixí yenë' Juan ga ni' yu'ë lidxi guíë. ¹¹ Bönni' na' nasól-lë'ë bu'ë icjë' Juan na', zxoá lu zxiga' zxön, ate' bunödzejë' le queébi' bi'i nigula na', ate' lébi' buá'abi' le queënu xiná'abi'.

¹² Ní'irö bila'dxinë' bönni' gula'dé'ë Juan na', ate' bulu'ú'ë lë', en bulu'cáché'ë lë'. Gudödi ni', yöjtíxjöi'iguequinë' Jesús ca gulaca lë ni.

Jesús rugahuë' zíanrö ca chi-un gayuá' bönachi

(Mr. 6:30-44; Lc. 9:10-17; Jn. 6:1-14)

¹³ Cate' réquibe'enë' Jesús lë ni, buzé'ë ni', ate' gurenë' tu lë'e bárcodo', en sa'yéajë' la' queéze' tu lataj cá'asö. Cate' bila'yöni bönachi zéajë' ni', bila'rúaj yugu' yödzo ni', en yöjaca ga ni' idxinë' Jesús, ta'zë'e ní'aguequi. ¹⁴ Cate' burúajë' Jesús lë'e barco, bilé'enë' nacua' bönachi zían ni', ate' buéchi' lãdxë'ë léguequi, en bunë' nupa te'e, nútsa'gaca lãdjaguequi. ¹⁵ Cate' chiridzó' dza na', bila'dxinë' yugu' bönni' usëda queë' Jesús ga zoë', en të' Lë':

—Chiridzó' na'a, ate' cá'asö naca lataj ni. Busöl-la' bönachi ni para tsöjaca gapa dë yödzödo' para gá'ugaca bi ilagu.

¹⁶ Ní'irö Jesús gudxë' légaquië':

—Biti' run bayudxi tsöjáquië'. Buli'nödzej lib'í'ili' le ilahuë'.

¹⁷ Ní'irö tē' Lē':

—Gáyu'sö yöta xtila dē, en chópasöba' böla dēba' queétu' ni.

¹⁸ Jesús rē' légaquiē':

—Buli'dödi le lu na'a.

¹⁹ Ní'irö Jesús gunná bé'enē' bönachi na' ila'bó' ga yu'u daca'. Gudödi na' gudélé'ē gayu' yöta xtila na', en chópaba' böla na', ate' guchisa lahuē', ruyúē' zaca' yehua' yubá. Gudxē' Dios: "Xclenu'." Ní'irö buzuxzjē' yöta xtila na', en budödē' le lu ná'agaquiē' bönni' usēda queē', ate' légaquiē' gula'guísiē' le lógaca bönachi zían na'. ²⁰ Gulahuē' yúgu'tēgaquiē', en bulu'huóljanē'. Ní'irö bulu'tubē' yugu' bizxaj nagá'anagaca, en bulu'lié' chinnu ga'böra. ²¹ Bönni' ni' gulahuē' guláquiē' idú chi-un gáyu'ē, pero cuntú nu bulaba yugu' nigula, en bí'ido'.

Jesús rizē'e ni'ē lu nísado'

(Mr. 6:45-52; Jn. 6:16-21)

²² Ní'irö la' bentē' Jesús ga gula'benē' bönni' usēda queē' lē'e bárcodo', en tsöjáquiē', ila'nóruē' lahuē' Lē', para ila'dödē' ia'tsölá'a nísado' ni', tsanni na' uzenē' Lē' bönachi nacua' ni' didza'. ²³ Cate' chibusól-lē'ē Jesús bönachi na', gurenē' tu lu guí'ado' ga ni' yöjsóē' tuzē'. Ni' bulidzē' Dios. Cate' chigul-la, tuzē' zoē' ni'. ²⁴ Bárcodo' ga na' nacué' bönni' usēda queē' ridödi gatsaj láhui'lö nísado' na', ate' riyasa bárcodo' na' tu' riyasa ridxía nísado' na', ate' ruzaga' bö' recja barco na'. ²⁵ Gudödi guluhuēla, gubígui'ē Jesús gala' ga na' nacué', rizē'e ni'ē lu nísado'. ²⁶ Cate' yugu' bönni' usēda queē' bila'lē'enē' Lē', rizē'e ni'ē lu nísado', gula'bó'dē'ē böniga tu' tádxinē'. Gula'bó'dxi'ē, ta'nnē':

—Tu' ridasö na'.

²⁷ Ní'irö Jesús la' bulidztē' légaquiē', rnnē':

—Buli'zxöni ládxi'li'. Neda' ni. Biti' gádxili'.

²⁸ Ní'irö ubi'ē didza' Pedro, rē' Jesús:

—Xan, channö nacú' Li', gunná be'e neda' guída' ga na' zu' lu nisa.

²⁹ Jesús gudxē' lē':

—Gudá.

Ní'irö böjtjē' Pedro lē'e bárcodo' na', en guzē'e ni'ē lu nísado', sa'yéajē' ga na' zoē' Jesús.

³⁰ Ní'irö cate' bilé'enē' Pedro ca bö' na' recja rutá nisa, gúdxinē'. Ní'irö gusí lahuē' rötjē' lu nisa, ate' guró'dxi'ē. Bulidzē' Jesús, rnnē':

—Xan, busölá neda'.

³¹ Jesús la' bulitē' nē'ē. Buguélē'ē lē', en rē' lē':

—Láti'sö réajlē'u neda'. ¿Bizx que guca chopa ládxi'u?

³² Cate' bulu'benē' lē'e bárcodo' na', guró'ö dxi bö' na' recja. ³³ Ní'irö bönni' nacué' lē'e bárcodo' na' gula'yéaj ládxi'gaquiē' Jesús, ta'nnē':

—Le nácatē, Zxí'inē' Dios nacú'.

Jesús ruünē' yugu' bönni' huē' nacué' yödzö Genesaret

(Mr. 6:53-56)

³⁴ Cate' chigula'dödē' ia'tsölá'a nísado' na', la' bila'dxintē' lu xiyú yödzö Genesaret.

³⁵ Cate' bulu'únbē'ē bönni' yödzö ni' Jesús, gula'sól-lē'ē didza' idútē luyú ni', ate' dujuá'gaquiē' yúgu'tē nupa te'e ga na' zoē' Jesús. ³⁶ Guláta'yue' lahuē' Jesús gu'ē légaquiē' lataj ila'gansē' ru'i lari' nácuē', ate' la' bulu'huócatē yúgu'tē nupa na' bila'gán lari' na'.

15

Le tun ga bití' nácaru' tsahui' lahuē' Dios

(Mr. 7:1-23)

¹ Ní'irö yugu' bönni' yudo' fariseo, en bönni' yudo' tu'sédinē', narúajgaquiē' Jerusalén, bila'dxinē' ga zoē' Jesús, ate' tē' Lē':

² —¿Bizx que tunē' bönni' usēda quiu' le ridödi bē' ca naca le nulaga loru' runru' ca gulunē' xuz xtó'oru'? Biti' ta'guíbi nē'ē ca naca que yudo' cate' si' ilahuē'.

³ Bubi'ë didza' Jesús, en gunábinë' légaquië', rnnë':

—¿Bixz que libí'ili' ca' rucá'anali' cá'asó xibá queë' Dios para gunli' le nulaga loli' runli'?

⁴ Caní raca, tu' gunná bé'enë' Dios libí'ili', gunné': "Ben bal xuz xino'o", en gunné' ca': "Nu inné'zi' que xuz xiné'e, tsaz gati nu na'." ⁵ Pero libí'ili' rnnali': "Channö nu guíe' xuz xiné'e: Biti' bi gaca gunna' quiu' tu' chiguzxi' lu na'a gunna' yúgu'të queë' Dios, ⁶ bíti'rö bi run bayudxi gun nu na' que xuz xiné'e." Caní runli', rucá'anali' cá'asó le gunná bë'ë Dios, para gunli' le nulaga loli' runli'. ⁷ Libí'ili', bönni' rulu'isö tsahui' cuinli', idú ca nácali' gudíxjö'ë Isaías, bönni' bë'ë didza' uláz queë' Dios, gunné':

⁸ Bönni' ni, len rú'agacsë' tunë' neda' bal, en calëga idú ládxi'gaquië'.

⁹ Nítisö naca le ta'yéaj ládxi'gaquië' neda', tu' tu'sédinë' yugu' le gula'nná bë' bönachi.

¹⁰ Ní'irö bulidzë' Jesús bönachi nacua' ni', en rë' léguequi:

—Buli'zé nágali' le guía' libí'ili', en guli'tséajni'i. ¹¹ Calëga le riyaza ru'ë nu bönni' run ga bití' náquië' tsahui' lahuë' Dios, pero le rirúaj ru'ë, lë ni run ga bití' náquië' tsahui' lahuë' Dios.

¹² Ní'irö yugu' bönni' usëda queë' Jesús gula'bígüi'ë ga zoë', en të' Lë':

—¿Naru' nóztsenu' gula'lenë' yugu' bönni' yudo' fariseo cate' bila'yönnë' didza' ni bë'u?

¹³ Ní'irö bubí'ë didza' Jesús, en rë' légaquië':

—Yúgu'të le nadúz, le cabí guzë' Xuza' zoë' yehua' yubá, huadúl jagaca idú luí.

¹⁴ Buli'cá'ana légaquië'. Chinachúl-la lógaquië', en ta'ché'ë nupa nachul-la lógaca. Channö tu bönni' lo chul-la iché'ë ia'túë' bönni' lo chul-la, iropë' ila'bixë' tu lu yeru.

¹⁵ Ní'irö bubí'ë didza' Pedro, en rë' Jesús:

—Buzéajni'i netu' lë ni rucúdz'u didza'.

¹⁶ Jesús rë' légaquië':

—¿Naru' cabí réajni'itseli' ca' libí'ili'? ¹⁷ ¿Naru' cabí réajni'itseli' riyaza lé'ëru' yúgu'të le riyaza ruá'aru', ate' rurúaj lé'ëru'? ¹⁸ Na'a, le rirúaj rúa'ali', lu icja ládxi'do'oli' za', ate' lë ni run ga bití' nácali' tsahui' lahuë' Dios. ¹⁹ Caní raca, tu' ta'lén lu icja ládxi'do'oli' yugu' le rizá' ládxi'li' le ruá' dö', le ilún ga gútili' bönachi, en le ilún ga quítsjali' xibá que yöl-la' nutsaga na', en le ruá' dö' runli', en yugu' le rizé ládxi'li' cuanli', en yugu' le rinnëli' que luzá'ali' le cabí nácate, en yugu' le rinné xihui'li'. ²⁰ Yugu' le caní tun ga bití' náquië' tu bönni' tsahui' lahuë' Dios, pero channö cabí nayari në'ë ca naca que yudo' cate' bi gahuë', bití' gun ga bití' náquië' tsahui' lahuë' Dios.

Tu nigula izá'a réajlë'ënu Jesús

(Mr. 7:24-30)

²¹ Ní'irö buzé'ë Jesús ni', en guyéajë' lu xiyú yödzo Tiro, en yödzo Sidón. ²² Tu nigula nabábanu luyú Canaán birúajnu yödzo ni', ate' bë'ënu zidzaj didza', rënu Jesús:

—Xan, xzí'ini xi'sóë' David, buéchi' ladxí' neda'. Bi'i nigúlado' quia' riguí'i rizáca'-da'abi' tu' yu'u bö' xihui' lëbi'.

²³ Bití' bi didza' bubí'ë Jesús. Ní'irö gula'bígüi'ë bönni' usëda queë' ga zoë', ate' gulé' Lë', ta'nné':

—Busól-la'-nu, tu' zá'anu cúdz'u'ru' ribódxí'anu.

²⁴ Ní'irö bubí'ë didza' Jesús, ate' rë'ë-nu:

—Dios nasól-lë'ë neda' gácalena' bönachi Israel, nupa nácagaca ca bö'cu' xzíla'do' nanítigacaba'.

²⁵ Ní'irö gubíga'nu nigula na' ga zoë' Jesús, en guyéaj ládxi'nu Lë', ate' rënu Lë':

—Xan, gúcalen neda'.

²⁶ Bubi'ë didza' Jesús, rnnë':

—Bití' naca dxí'a ugúaru' yöta quégacabi' bí'ido', en chú'unaru' le lógacaba' bö'cu'do'.

²⁷ Ní'irö nigula na' rënu Jesús, rnnanu:

—Ön, Xan, pero táguba' bó'cu'do' na' le bizxaj tu'huóxaj ga tagu xángacaba'.

²⁸ Ní'irö bubi'ë didza' Jesús, rnnë':

—Nigúlado'. Idú naca ca réajlë'u neda'. Gaca quiu' ca ré'ënnu'.

La' ní'isö böácatëbi' bi'i nigúlado' queénu.

Jesús ruúnë' zían nupa te'e

²⁹ Ní'irö buzë'ë Jesús ni', en gudödë' ga naca ra' nísado' que Galilea. Gurenë' tu lu guí'ado', ate' gurö'ë ni'. ³⁰ Bönachi zían dujuá'gaquië' nupa biti' guca ila'zá', en nupa nachul-la guió'j lógaca, en nupa biti' guca ila'nnë', en nupa narugu ni'a né'eguequi, en ia'zica'rö zían nupa te'e, ate' gula'guixaj léguequi xini'ë Jesús, ate' Lë' bunë' léguequi.

³¹ Bulu'bani bönachi ni' ca naca le benë' Jesús, tu' bila'lë'e tu'nnë' nupa biti' guca ila'nnë', ate' nuhuóacagaca nupa gurugu ni'a né'eguequi, ate' tu'zá' nupa biti' guca ila'zá', ate' tu'lë'e nupa guchul-la lógaca. Que lë ni na' gula'gu'ë yöl-la' ba Dios quégaca bönachi Israel.

Jesús rugahuë' zíanrö ca choá' gayuá' bönachi

(Mr. 8:1-10)

³² Ní'irö Jesús bulidzë' yugu' bönni' usëda queë', en rë' légaquië':

—Ruhuechi' ládxa'a bönachi zían ni, tu' chiguca tsonna dza zá'lenguequi neda', en biti' bi dë le ilagu. Biti' ré'ënda' usól-la'gaca'-në' tsøjhuóajgaquië' lídxigaquië' ta'dunsë' ca', nadxi ca' udú ládxi'gaquië' la' nöza.

³³ Ní'irö yugu' bönni' usëda queë' të' Lë', ta'nnë':

—¿Gazxi caz idzólitu' yöta xtila zían lu lataj cá'asö ni, le ugágutu' bönachi zían ni?

³⁴ Gunábinë' Jesús légaquië', rnnë':

—¿Bal-laxi yöta xtila dë queéli'?

Bulu'bi'ë didza', ta'nnë':

—Gadxi, ate' nabásöba' böla cuidi' dëba' queé'tu' ni.

³⁵ Ní'irö Jesús gunná bé'enë' bönachi zían na' ila'bó' lu yu. ³⁶ Gudélë'ë gadxi yöta xtila na', en yugu' böla na', ate' gudxë' Dios: "Xclenu'." Ní'irö buzuxzjë' iroptë na', en bunödzejë' quégaquië' bönni' usëda queë', ate' légaquië' gula'guísië' le lógaca bönachi zían na'. ³⁷ Gulahuë' yúgu'të', en bulu'huóljanë'. Gudödi ni' bulu'tubë' le bizxaj nagá'anagaca, ate' bulu'lié' gadxi ga'böra. ³⁸ Yugu' bönni' na' gulahuë' nácagaquië' choá' gáyü'ë, pero cuntú nu bulaba yugu' nigula, en bí'ido'. ³⁹ Ní'irö busöl-lë'ë Jesús bönachi na' tsøjhuóajgaquië' lídxigaquië', ate' gurenë' lë'e bárcodo' ni', en sa'yéajë' lu xiyú yödzö Magdala.

16

Ta'nábinë' Jesús gunë' tu le gaca bë' nuzxi náquië'

(Mr. 8:11-13; Lc. 12:54-56)

¹ Ní'irö yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zí' bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'. ² Bubi'ë didza' Jesús, en rë' légaquië':

—Cate' ridzó', rnnali' caní: "Gun dxi'a cuxó, tu' rö'ö böaj xiná lúzxiba." ³ Cate' naca zílado', rnnali' caní: "Biti' gun dxi'a na'a dza tu' rö'ö böaj xiná, en ruchul-la lúzxiba." Lib'ili', bönni' rulu'isö tsahui' cuinli'. Raca innë' ya'ali' naca gun lúzxiba, pero biti' gaca tséajni'ili' le tu'sedi le taca dza ni zóaru' na'a. ⁴ Yugu' bönachi tuá' dö' ni, en biti' zoa idú ládxi'gaca ta'nábini neda' guna' tu le gaca bë' Nu naca', pero biti' bi le gaca bë' ila'lë'enë'. Ila'lë'esinë' lë na' guca bë' ca guca queë' Jonás, bönni' bë'ë didza' uláz queë' Dios.

Ní'irö Jesús bucá'anë' légaquië', söhuó'jë'.

Le tu'sédinë' bönni' yudo' naca ca cúa zi que yöta xtila
(Mr. 8:14-21)

⁵ Cate' bila' dxinë' ia' tsölä' a nísado' ni', guléquiibe' enë' bönni' usëda queë' Jesús gulál-la ládxi' gaquië' ilu'ë le ilahuë'. ⁶ Ní'irö Jesús gudxë' légaquië':

—Buli'yútsöca'. Guli'gún chi'i cuinli' que le naca ca cúa zi que yöta xtila quegaquië' bönni' yudo' fariseo, en quegaquië' bönni' yudo' saduceo.

⁷ Ní'irö la' légacasë' gulún xtídza' gaquië' bönni' usëda queë', ta'nnë':

—Rnnë' caní tu' cabí nuá'aru' yöta xtila.

⁸ Réquibe'enë' Jesús lë ni, ate' rë' légaquië':

—¿Bizx que run xtídza'li' la' libí'isili' tu' cabí nuá'ali' yöta xtila? Láti'do'os réajlë'ëli' neda'. ⁹ ¿Naru' cabí réajni'itseli', en bití' röjnétseli' ca guca quégaca gayu' yöta xtila ni', lë na' gulahuë' chi-un gáyu'ë bönni', ate' tsca xö ga'böra butúbili'? ¹⁰ ¿Naru' cabí röjnétseli' ca' ca guca quégaca gadxi yöta xtila ni', lë na' gulahuë' choá' gáyu'ë bönni', ate' tsca xö ga'böra butúbili'? ¹¹ ¿Naru' cabí réajni'ili'? Bití' bë'a didza' que yöta xtila cate' gudxa' libí'ili' gun chi'i cuinli' que le naca ca cúa zi que yöta xtila quegaquië' bönni' yudo' fariseo, en quegaquië' bönni' yudo' saduceo.

¹² Ní'irö gula'yéajni'inë' bití' gudxë' Jesús légaquië' ilún chi'i cuíngaquië' que cúa zi que yöta xtila, pero ral-la' ilún chi'i cuíngaquië' que le tu'sédinë' yugu' bönni' yudo' fariseo, en yugu' bönni' yudo' saduceo.

Pedro rnnë' Jesús náquië' Cristo
(Mr. 8:27-30; Lc. 9:18-21)

¹³ Cate' bidxinë' Jesús lu xiyú yödzo Cesarea, ga na' rinná bë'ë Filipo, gunábinë' yugu' bönni' usëda queë', rnnë':

—¿Bizxi ta'nná bönachi nu naca' neda', Bönni' Guljë' Bönachi?

¹⁴ Bulu'bi'ë didza', ta'nnë':

—Bal-lë' ta'nnë': “Juan nacu', bönni' ni' buquilë' bönachi nisa.” Ia'zícá'rë' ta'nnë': “Elías nacu', bönni' ni' bë'ë didza' uláz queë' Dios dza ni'te.” Ia'zícá'rë' ta'nnë': “Jeremías nacu', o ia'tué' bönni' bë'ë didza' uláz queë' Dios.”

¹⁵ Ní'irö Jesús gudxë' légaquië':

—Naru' libí'ili', ¿nuzxi rnnali' naca' neda'?

¹⁶ Bubi'ë didza' Simón Pedro, en rë' Lë':

—Li' nacu' Cristo, Zxí'inë' Dios ban.

¹⁷ Bubi'ë didza' Jesús, rë' lë':

—Bica' xibó' li', Simón, zxí'inë' Jonás, tu' cabí bulu'finë' nu bönni' li' lë ni. Xuza' zoë' yehua' yubá bulu'finë' li' lë ni. ¹⁸ Neda' rea' li', li' nacu' Pedro, ate' lu guió'j ni ucuá'a nupa ulu'dubi quia', ate' yöl-la' unná bë' que tu' xihui' bití' sequi' uzaga' xinó'zgaquië'. ¹⁹ Gunna' quiu' yugu' zxi'ini guíë que lataj ga rinná bë' Nu zoa yehua' yubá. Le inná bë'u luyú ni, chigunná bë' ca' Nu na' zoa yehua' yubá, ate' le gu'u lataj gaca luyú ni, chibë' lataj gaca lë na' Nu na' zoa yehua' yubá ni'.

²⁰ Ní'irö Jesús gunná bé'enë' yugu' bönni' usëda queë' cuntú nu ilé'ë náquië' Lë' Cristo.

Jesús riguíxjö'ë ca si' ilútië' Lë'
(Mr. 8:31-9:1; Lc. 9:22-27)

²¹ La' dza ní'isö gusí lahuë' Jesús riguíxjöi'inë' yugu' bönni' usëda queë' run bayudxi tsejë' Jerusalén, ga ni' yugu' bixúz unná bë' en bönni' gula tu' zéajni'inë', en bönni' yudo' tu'sédinë' ulu'saca' zi'ë Lë', ate' ní'irö ilútië' Lë', pero cate' gaca tsonna dza ubanë' lu yöl-la' guti. ²² Ní'irö Pedro guchë'ë Jesús quez, en gusí lahuë' ridil-lë' Lë' didza', rnnë':

—Xan, bití' gu'ë Dios lataj. Bití' ca' gaca quiu' ca rnnó'.

²³ Ní'irö buécjë' Jesús, en rë' Pedro:

—Gucuita ga zoa'. Runu' ca run Satanás, tu' xihui'. Runu' ga gaca chopá ládxa'a tu' cabí naca le rizá' ládxi'u li' ca rizá' ládxi'ë Dios, pero ca ta'za'sö ládxi' gaca bönachi.

²⁴ Ní'irö Jesús gudxë' yugu' bönni' usëda queë', rnnë':

—Channö zoë' tu bönni' ré'ënë' tē'ë neda', ral-la' uzóë' tsölá'alö yugu' le ré'ëni quézinë', en gáquië' ca tu bönni' sa'yéajë' zeajtë'ë lē'e yaga cruz, ate' ní'irö gaca tē'ë neda'. ²⁵ Nu bönni' gué'ënnë' gun chi'ë yöl-la' na'bán queë', unítie' le, pero bönni' unítie' yöl-la' na'bán queë' tu' dē'ë neda', gata' yöl-la' na'bán idú queë'. ²⁶ ¿Naru' uzi'tsë' xibé tu bönni' channö utubë' yúgu'të le dē yödzölió ni pero unítie' yöl-la' na'bán idú queë'? Biti' bi gaca unödzjé' tu bönni' para gata' yöl-la' na'bán idú queë'. ²⁷ Caní rnnía', tu huöda' neda', Bönni' Guljë' Bönachi, en idzaga yöl-la' unná bē' queë' Xuza' Dios neda', ate' idzágagaquië' gubáz lá'ayi quia' neda'. Ní'irö ubi'a que queë' bönachi tsca naca le núngaca. ²⁸ Le nácatë rea' libí'ili': "Biti' ca' ilátigaca bal-la nupa nacuá' ni cate' ila'lé'erö idinná bē'a neda', Bönni' Guljë' Bönachi."

17

Ridzá' ca nalá' lahuë' Jesús

(Mr. 9:2-13; Lc. 9:28-36)

¹ Gudödi xopa dza, Jesús gudélë'ë Pedro len Jacobo, en Juan, bóchë'ë Jacobo na', en guchë'ë légaquië', ate' yöjáquië' quez tu lu guí'a sibi. ² Ni' bidzá' ca nalá' lahuë' Jesús lógaquië'. Guyëpi yösa bení' lahuë' Jesús ca ruzení' gubidza, ate' lari' nácuë' böaca chiguíchido'os ca bení'. ³ Ní'irö bila'lé'enë' bönni' usëda queë' buluí'i lógaquië' Moisés, en Elías, ate' tu'ílenë' Jesús didza'. ⁴ Ní'irö Pedro rē' Jesús:

—Xan, naca dxí'a zóaru' ni. Channö ré'ënu', guna' ni tsonna yu'u lága'do', tu quiu', ia'tú queë' Moisés, en ia'tú queë' Elías.

⁵ Tsanni ni' ru'ë Pedro didza' ni, la' guró'ötë tu böaj bení' le guzxóa légaquië', ate' lu böaj na' biyón chi'i nu rnna:

—Bönni' ni Zxí'ini caza'. Nadxí'ida'-në', en raza ládxa'a Lē'. Buli'zé nágali' didza' gu'ë.

⁶ Cate' bila'yönnë' bönni' usëda queë' chi'i na', gula'dzö'ë gusurú'alö, en guladxi bila'dzöbinë'. ⁷ Ní'irö gubígui'ë Jesús ga na' nacu'ë, ate' gudanë' légaquië', rnnë':

—Gulí'chasa. Biti' gádxili'.

⁸ Cate' gula'chisa lógaquië', en bulu'yúë', cúnturö nu bila'lé'enë', pero tuzë' Jesús.

⁹ Cate' ni' tu'dínnië' lu guí'a na', Jesús gunná bé'enë' légaquië', rnnë':

—Cuntu nu guiéli' ca guca lē ni bilé'eli' cate' ubanra' lu yöl-la' guti neda', Bönni' Guljë' Bönachi.

¹⁰ Ní'irö yugu' bönni' usëda queë' gula'nábinë' Lē', ta'nnë':

—¿Bizx que ta'nnë' bönni' yudo' usëdi run bayudxi uluí'i lahuë' Elías zí'alö ca uluí'i lahuë' Cristo?

¹¹ Bubi'ë didza' Jesús, rē' légaquië':

—Le nácatë uluí'i lo cazë' zí'alö Elías, en ucá'anë' tsahui' yúgu'të. ¹² Neda' rea' libí'ili': "Chibuluí'i lahuë' Elías na', pero bití' bulu'únbë'ë lē", ate' yúgu'të ca rnnasö quégaquië' gulunë' queë'." Lësca' caní ilunë' quia' neda', Bönni' Guljë' Bönachi, ulu'saca' zí'ë neda'.

¹³ Ní'irö gula'yéajni'inë' bönni' usëda queë', bé'lenë' Jesús légaquië' didza' ca guca queë' Juan, bönni' na' buquilë' bönachi nisa.

Ruúnë'-bi' Jesús tubi' bi'i bönni' ré'ebi' xjote'

(Mr. 9:14-29; Lc. 9:37-43)

¹⁴ Cate' bila'dxinë' ga na' nacuá' bönachi zían, gubígui'ë tu bönni' ga zoë' Jesús, ate' buzóa zxibë' lahuë' Lē', ¹⁵ en rē' Lē':

—Xan, buéchi' ladxi'-bi' bi'i bönni'do' quia', tu' ré'ebi' xjote', en riguí'i rizáca'da'abi', ate' zían luzuí' ridzó'öbi' lu guí' o lu nisa. ¹⁶ Chidiguá'a-bi' lógaquië' bönni' usëda quiu' pero bití' guca ulu'únë'-bi'.

¹⁷ Bubi'ë didza' Jesús, rnnë':

—Libí'ili', bönachi cabí réajlë'ëli', en biti' nácali' tsahui'. ¿Gáca'xte caz ral-la' sóalena' libí'ili' para tséajlë'ëli' neda'? ¿Gáca'xte caz ral-la' guá' ilena' queé'li'? Guli'diguá'-bi' quia' ni.

¹⁸ Ní'irö Jesús buzenë' le bach bö' xihui' na' yu'u lëbi', ate' la' burúajtë lëbi', ate' la' ná'asö böácátëbi' bi'i bönni'do' na'.

¹⁹ Ní'irö, yugu' bönni' usëda queë' Jesús gula'biguë'ë quez ga zoë', ate' gula'nábinë' Lë', ta'nnë':

—¿Bizx que na' biti' guca ubéajtu' netu' bö' xihui' na'?

²⁰ Jesús rë' légaquië':

—Biti' guzxëqui'li' tu' cabí réajlë'ëli' Dios idú ládxi'li'. Le nácatë rea' libí'ili', sal-la' cuídi'sö naca yöl-la' réajlë' queé'li' Dios, nácatë ca tu xisedo' mostaza, huáca guié'li' gu'ado' ni: “Gucuíta ni, en yöjsóa ní'ilö”, ate' la' icuítatë gu'ado' na'. Biti' bi zoa le cabí gaca gunli' channö réajlë'ëli' Dios idú ládxi'li'. ²¹ Tu bö' xihui' caní gácasö ubéajli' channö ulídzali'-në' Dios, en gunli' gubasa.

Riguíxjö'ë Jesús leyúbölö ca si' ilútië' Lë'

(Mr. 9:30-32; Lc. 9:43-45)

²² Tsanni ni' ta'dé' luyú Galilea, Jesús gudxë' yugu' bönni' usëda queë', rnnë':

—Zoa nu udödi neda', Bönni' Guljé' Bönachi, lu ná'agaca bönachi. ²³ Ilútië' neda', pero cate' gaca tsonna dza Dios usubanë' neda'.

Ní'irö bulu'hu'innë' bönni' usëda queë'.

Jesús riguixxaj lazë' que yudo'

²⁴ Cate' bulu'dxinë' Jesús, en yugu' bönni' usëda queë' lu yödzö Capernaum, bila'dxinë' yugu' bönni' tu'quixxjé' bönachi lázagaca que yudo' ga zoë' Pedro, ate' të' lë':

—¿Naru' cabí quixxaj lazë' que yudo' bönni' rusédinë' libí'ili'?

²⁵ Bubi'ë didza' Pedro, rnnë':

—Ön, huaguixxjé'.

Cate' buázië' Pedro lu yu'u, Jesús la' bulidztë' lë', en rë' lë':

—¿Nacxi rusaca' quiu', Simón? Bönni' ta'nná bë'ë luyú ni, ¿nupxi tu'quixxjé' le riguixxaj laz, en lazxaj que yu? ¿Naru' tu'quixxjé' bönachi uládz quégaquië' o bönachi izá'a?

²⁶ Bubi'ë didza' Pedro, rë' Lë':

—Bönachi izá'a tu'quixxjé'.

Ní'irö Jesús rë' lë':

—Que lë ni na', biti' run bayudxi quixxaj laza' que yudo' tu' naca' Zxí'inë' Dios ca na' biti' bi ta'guixxaj nupa nácatë bönachi uládz queë' bönni' na' ruquixxjé'. ²⁷ Na'a, para cuntú nu gun lëru', guyéaj ra' nísado', yöjzaj lu nisa le rizóninu'-ba' böla, ate' böla cueju'-ba' zí'alö, guzxí'i-ba'. Cate' isalju' ruá'aba', ni' idzólínu' tu dumí lásido'. Guzxí'i le, ate' gudixxaj laza', en lazu'.

18

¿Núzxilö gaca lo?

(Mr. 9:33-37; Lc. 9:46-48)

¹ La' dza ní'isö bila'dxinë' bönni' usëda queë' Jesús ga zoë', ate' gula'nábinë' Lë', ta'nnë':
—¿Núzxilë' bönni' ni gáquië' lo ga rinná bë'ë Dios yehua' yubá?

² Bulidzë'-bi' Jesús tubi' bi'i bönni'do', ate' buzóë'-bi' gatsaj láchui'lö ga na' nacu'ë.

³ Ní'irö rë' légaquië':

—Le nácatë rea' libí'ili', channö cabí huóacali' ca zeaj nacabi' bí'ido', biti' ca' tsú'uli' ga ni' rinná bë'ë Dios yehua' yubá. ⁴ Que lë ni na', núti'tës nu gaca nöxaj ladxi', en huóaca ca nacabi' bí'ido' ni, nu ni gaca lo ga ni' rinná bë'ë Dios yehua' yubá. ⁵ Núti'tës nu gun bal tubi' bí'ido' caní tu' néquibi' quia', neda' caz gun bal.

Le tun ga nu gun dul-la'
(Mr. 9:42-48; Lc. 17:1-2)

⁶ Gunné' ca' Jesús:

—Nu gun ga gunbi' dul-la' tubi' bí'ido' caní réajlë'ëbi' quia', gácarö dxi'a queë' bönni' na' la'tu' ugalë'ë guióy riyétuni yaga yenë', ate' tsöjsuladzu' cuinë' lu nísado'. ⁷ Bica' bayechi' bönachi yödzölió ni tun ga gun dul-la' luzé'eguequi. Nacuá'tica'sö le tun ga nu gun dul-la', pero bica' bayechi' nu run ga nu gun dul-la'.

⁸ 'Que lë ni na', channö gun no'o o ni'u ga gunu' dul-la', guchugu le, en gurú'una le. Gácarö dxi'a quiu' tsöjtsáziu' ga su' ibanu' biti' rizó'o o narugu ni'a no'o, en calëga nacua' chopo no'o, en chopo ni'u ate' tsöjtsáziu' lu guí' gabila le catu caz ulu. ⁹ Channö gun guióy lo' ga gunu' dul-la', guléaj le, en gurú'una le. Gácarö dxi'a quiu' tsöjtsáziu' ga su' ibanu', zoa tuz guióy lo', en calëga nacua' chopo guióy lo', ate' tsöjtsáziu' lu guí' gabila.

Jesús rucúdzu'ë didza' que tu bö'cu' zxila' nanítiba'
(Lc. 15:3-7)

¹⁰ Gunné' ca' Jesús:

—Gulí'gún chi'i cuinli' para cabí uzóali'-bi' tsölá'alö tubi' bí'ido' caní. Neda' rea' libí'ili', gubáz lá'ayi tapa chi'ë légcabi' nacua'tica'së' lahuë' Xuza' zoë' yehua' yubá. ¹¹ Bida' ni neda', Bönni' Guljë' Bönachi, para usölá' nu ni naniti.

¹² ¿Nacxi rusáca'li' queéli'? Tu bönni', nacua'aba' tu gayuá' bö'cu' zxila' queë', channö nítiba' tuba', ¿naru' cabí ucá'anë'-ba' tápalalaj yu' chénnaba' na', ate' tsejë' gapa naca lu guí'a, para tsöjtiljë'-ba' bö'cu' zxila'do' na' nanítiba'? ¹³ Channö udzólinë'-ba', le nácatë rea' libí'ili', udzëjarönë' ni'a queéba' bö'cu' zxila'do' na' ca gunë' quégacaba' ia'tápalalaj yu' chénnaba' ni' biti' gula'nítiba'. ¹⁴ Lësca' caní, Xúziru' Dios, zoë' yehua' yubá, biti' ré'ënë' nítibi' tubi' bí'ido' caní.

Ca ral-la' uniti loru' böchi' luzá'aru'
(Lc. 17:3)

¹⁵ Gunné' ca' Jesús:

—Channö böchi' luzó'o guá' dö' quiu', guyéajtsöca', en yöjca'analenë' tsahui' la' libí'isili'. Channö uzé' náguië' li', chibuguélu'u böchi' luzó'o. ¹⁶ Channö cabí uzé' náguië' xtídz'u, guchë'ë ia'túë' o ia' chopë' bönni' para urúaj li xtídz'u lógaquië' chopo tsonnë' bönni', nupa gaca ilún ba nalí que xtídz'a'li'. ¹⁷ Channö cabí uzé' náguië' xtídz'a'gaquië', gudxi ca' bönachi tu'dubi tu'sëdi queë' Dios, en channö cabí uzé' náguië' xtídz'a'gaca bönachi na', ní'irö bönni' na' gáquië' quiu' ca tu bönni' biti' réajlë'ë Dios, en ca tu bönni' ruquíxjë' uláz que yödzö zi'tu'.

¹⁸ 'Le nácatë rea' libí'ili', yúgu'të le inná bé'ëli' lu yödzölió ni, naca le chigunná bë'ë Dios yehua' yubá, ate' yúgu'të le güí'ili' lataj lu yödzölió ni, naca le chibë'ë lataj Dios yehua' yubá.

¹⁹ 'Lësca' caní rea' libí'ili', channö chópasili' gun tuz xtídz'a'li' lu yödzölió ni ca naca tu le inábili'-në' Dios, gunë' Xuz caza' Dios, zoë' yehua' yubá, lë na' rinábili'-në'. ²⁰ Ga nacua' chopo tsonna nupa ni nudúbigaca quia' neda', zoa caza' neda' gatsaj láhui'lö ga na' nacué'.

²¹ Ní'irö gubígui'ë Pedro ga zoë' Jesús, en gunábinë' Lë', rnnë':

—Xan, ¿bál-laxitë luzuí ral-la' uniti lahua' böchi' luzá'a, nu na' ruá' dö' quia'? ¿Naru' gadxi luzuí?

²² Jesús rë' lë':

—Neda' rea' li', calëgasö gadxi luzuí, pero idú tsónnalalaj yu' chi cuía le naca gadxi luzuí.

Jesús rucúdzu'ë didza' que tu bönni' huen dxin biti' buniti lahuë' luzé'ë

²³ Gunné' ca' Jesús:

—Ia'stú, ca gun Nu na' rinná bē' yehua' yubá naca ca benē' tu bönni' rinná bē'ē. Gú'unnē' ucá'analenē' tsahui' yugu' bönni' huen dxin queē'. ²⁴ Cate' gusí lahuē' rucá'analenē' légaquiē' tsahui', dujuá'gaquiē' ga zoē' tu bönni' ral-lē'ē queē' zían gayuá' dumí. ²⁵ Tu' cabí guca quíxjē', gunná bē'ē xanē' idó'ogaquiē' lē', en nigula queē', en yugu' bi'i queē', en yúgu'tē le dē queē', ate' ní'irö gazxaj le ral-lē'ē queē' xanē' na'. ²⁶ Ní'irö bönni' huen dxin na' buzóa zxi bē' lahuē' xanē', en gunábinē' lē', rnnē': "Xan, ben zxon ladxu'u neda'. Huaguizxaj caza' li' idutē." ²⁷ Ní'irö xanē' na' buéchi' ladxē'ē bönni' huen dxin queē' na', en buniti lahuē' lē' lē' na' ral-lē'ē queē', ate' busanē' lē'. ²⁸ Cate' burúajē' bönni' huen dxin na', la' yöjtsá gatē' tu bönni' rúnlenē' lē' tsözxón dxin, ate' bönni' na' ral-lē'ē queē' láti'do'os dumí. Ní'irö guzxönē' lē', en guzxínnajē' yenē', ate' rē' lē': "Gudíxjatē lē' na' ral-lu'u quia'." ²⁹ Ní'irö luzé'ē na' buzóa zxi bē' lahuē', en gunaba yeché'ē lahuē', rnnē': "Ben zxon ladxu'u neda'. Huaguizxaj caza' li' idutē." ³⁰ Biti' gú'unnē' bönni' huen dxin na', ate' yöjlu'ē lē' lidxi guíē dza quíxjarē' lē' na' ral-lē'ē queē'. ³¹ Cate' bila'lē'enē' lē' ni ia'zica'rē' huen dxin, bulu'huí'inide'enē' ni'a queē', ate' yöjtíxjoi'iguequinē' xángaquiē' yúgu'tē lē' na' guca. ³² Ní'irö xángaquiē' bulidzē' bönni' huen dxin na', ate' rē' lē': "Li', huen dxin catsahui'. Yúgu'tē dumí na' gúl-lu'u quia' buniti lahua' li'. Busúlua' lē' na' gúl-lu'u quia' tu' gunaba yechu'u lahua'. ³³ ¿Naru' cabí ral-la' huéchi' ladxu'u ca' luzó'o ca na' bena' neda', buéchi' ladxá'a li'?" ³⁴ Ní'irö guléde'enē' xanē', en budödē' lē' lu ná'agaca nupa ulu'saca' zi' lē' dza quíxjarē' idútē le ral-lē'ē queē'.

³⁵ Ní'irö rnnē' Jesús:

—Lē'sca' caní gunē' Xuza' zoē' yehua' yubá queéli' channö cabí uniti loli' idú ladxí'li' yugu' böchi' luzá'ali'.

19

Nupa tu'lá'a yöl-la' nutsaga na'
(Mr. 10:1-12; Lc. 16:18)

¹ Cate' budxi bē'ē Jesús yugu' didza' ni, buzé'ē luyú Galilea, ate' bidxinē' luyú Judea le dē ia'tsölá'a yegu Jordán saca' ga rilén gubidza. ² Bönachi zían söjácálen Jesús, ate' bunē' léguequi ni'.

³ Ní'irö bila'dxinē' bal-lē' bönni' yudo' fariseo ga zoē' Jesús para ila'zi' bē'ē Lē', ate' gula'nábinē' Lē', ta'nnē':

—¿Naru' dē lataj bönni' nutsaga nē'ē usanē' nigula queē' tu' nözi bíti'tēs bi' raca?

⁴ Bubi'ē didza' Jesús, rē' légaquiē':

—¿Naru' cabí nulábanili' le nazúaj lu guichi lá'ayi ca benē' Dios bönachi cate' si' benē' yödzölió? Bönni', en nigula benē' légaquiē'. ⁵ Caní gunné' Dios: "Que lē' ni na', ral-la' usanē' tu bönni' xuz xiné'ē, ate' tsaz tsöjsóalenē'-nu nigula queē', ate' iropē' na' ulu'huóáquiē' tuz bönachi." ⁶ Caní naca, bíti'rö nácaquiē' chopē' pero tuz bönachi chinuhuóáquiē'. Que lē' ni na', bití' ral-la' ulu'lé'ē bönni' nupa na' benē' Dios tuz.

⁷ Ní'irö bönni' yudo' na' gula'nábinē' Jesús, ta'nnē':

—¿Bixz que na' gunná bé'enē' Moisés légaquiē' le ruí'i lataj nu bönni' unödzjē' tu guichi queénu nigula queē' le rnna nulá'a yöl-la' nutsaga na', ate' usanē'-nu nigula queē' na'?

⁸ Jesús rē' légaquiē':

—Caní benē' Moisés tu' nazidi icja ladxí'do'oli'. Bennē' libí'ili' lataj usanli'-nu nigula queéli', pero cate' gusí lo guta' guró'ö yödzölió, bití' guca caní. ⁹ Neda' rea' libí'ili', channö tu bönni' usanē'-nu nigula queē', en bití' gudálennu bönni' yúbölö, ate' utsaga ná'alēnē'-nu nigula yúbölö, gunē' dul-la' le riguitsaj xibá que yöl-la' nutsaga na'. Lē'sca' caní, channö nu bönni' utsaga ná'alēnē'-nu nigula na', nusanē'-nu bönni' queénu, gunē' dul-la' le riguitsaj xibá que yöl-la' nutsaga na'.

¹⁰ Ní'irö yugu' bönni' usēda queē' Jesús gulé' Lē', ta'nnē':

—Channö caní naca queë' tu bönni' zóalenë'-nu nigula queë', gácarö dxi'a queë' la'tu cabí utsaga caz në'ë, ugá'anë' tuzë'.

¹¹ Bubi'ë didza' Jesús, rë' légaquië':

—Biti' gaca ila'zí' lu ná'agaca yúgu'të bönachi didza' ni, pero núpasö na' Dios ruzéa-jni'inë' léguequi. ¹² Nacu'ë bönni' biti' tu'tsaga ná'alengaquië' nigula tu' cabí nácagaquië' idú bönni' biguiú', tu' gulaljé' ca', atë' ia'zica'rë' bönni' biti' tu'tsaga ná'alengaquië' nigula tu' bulu'zaga' bönachi xinózgaquië', atë' ia'zica'rë' bönni' biti' tu'tsaga ná'alengaquië' nigula para gaca ilunë' xichiné' Dios, Nu rinná bë' yehua' yubá. Nu sequi' si' lu në'e didza' ni ral-la' si' lu në'e le.

Jesús rulidza tsáhuë'ë-bi' yugu' bí'ido'

(Mr. 10:13-16; Lc. 18:15-17)

¹³ Ní'irö yugu' xuz xiná'agacabi' bí'ido' dujuá'agaquië'-bi' ga zoë' Jesús para ixóa në'ë légacabi', en ulidzë' Dios ni'a quégacabi', atë' bönni' usëda queë' bulu'záguië' xinózgaquië'. ¹⁴ Ní'irö Jesús rë' légaquië', rnnë':

—Gulí'güf'i-bi' yugu' bí'ido' lataj ila'dxinbi' ga zoa', en biti' uzága'li' xinózga'ca'bi', tu' ila'zí' lataj nupa nácagaca ca yugu' bí'ido' caní ga ni' rinná bë'ë Dios yehua' yubá.

¹⁵ Jesús guxóa në'ë légacabi', atë' ní'irö buzé'ë ni'.

Tu bönni' unná bë' cuidi' dë' yöl-la' tsahui' queë'

(Mr. 10:17-31; Lc. 18:18-30)

¹⁶ Tu bönni' ni zoë' iz cuidi' queë' buduyúë' Jesús, en rë' Lë':

—Bönni' Usedi idú tsahui'. ¿Bizxi le naca tsahui' ral-la' guna' para gata' yöl-la' na'bán idú quia'?

¹⁷ Bubi'ë didza' Jesús, rë' lë':

—¿Naru' nóztsenu' lë na' rno' quia', rno' naca' idú tsahui'? Cuntu nu bönni' náquië' idú tsahui'. Tuzë' Dios náquië' idú tsahui'. Channö ré'ënu' gata' yöl-la' na'bán idú quiu', ben ca rinná bë' xibá queë' Dios.

¹⁸ Ní'irö bönni' na' rë' Jesús, rnnë':

—¿Bí'xilö xibá na'?

Jesús rë' lë':

—Xibá na' gunná bë'ë Moisés:

Biti' gútiu' bönachi.

Biti' gunu' dul-la' le riguitsaj xibá que yöl-la' nutsaga na'.

Biti' cuanu'.

Biti' innió' que böchi' luzó'o le cabí nácate.

¹⁹ Ben bal xuz xinó'o.

Bidxí'i böchi' luzó'o ca nadxí'i cuinu'.

²⁰ Bönni' na' ni zoë' iz cuidi' queë' gudxë' Jesús, rnnë':

—Yúgu'të lë ni runa' ga gudela' naca' bí'ido'. ¿Naru' zoa ia'tú le ral-la' guna'?

²¹ Jesús rë' lë':

—Channö ré'ënu' gacu' tsahui', guyéaj, yöjëti' le dë quiu', atë' dumí na' si'u, bunödzej quégaca bönachi yechi'. Caní gata' yöl-la' tsahui' quiu' ni' yehua' yubá. Ní'irö gudá, gudá' neda'.

²² Cate' bönni' na' ni zoë' iz cuidi' queë' biyönnë' didza' ni, söhuójë' ruhu'innë' tu' dëda' yöl-la' tsahui' queë'.

²³ Ní'irö Jesús gudxë' yugu' bönni' usëda queë', rnnë':

—Le nácate rea' libí'ili', böniga naca tsázië' nu bönni' dë yöl-la' tsahui' queë' ga rinná bë'ë Dios yehua' yubá. ²⁴ Ia'stú rea' libí'ili', nácáro böniga tsázië' tu bönni' dë yöl-la' tsahui' queë' ga ni' rinná bë'ë Dios ca tódiba' böa' lu nagui yötsi'.

²⁵ Cate' bila'yönnë' yugu' bönni' usëda queë' didza' ni, bulu'bánninë', ta'nnë':

—¿Nuzxi caz gaca ulá, channö?

²⁶ Jesús buyúë' légaquië', en rë' légaquië':

—Biti' gaca ilún bönachi lë ni, pero Dios huáca gunë' yúgu'të.

²⁷ Ní'irö bubi'ë didza' Pedro, en rë' Jesús:

—Buyútsöca', netu' chibucá'anatu' yúgu'të, en zá'lentu' Li'. ¿Bízxirö gata' queé'tu'?

²⁸ Jesús rë' légaquië':

—Le nácatë rea' libí'ili', dza ni' cate' ucubi yödzülió, ate' cö'a inná bë'a neda', Bönni' Guljé' Bönachi, ga ni' gácatëra' lo, lësca' libí'ili' zá'lenli' neda' na'a, có'öli' chinnu lataj ga inná bé'ëli', en uchi'a usöröli' quégaca idxinnu cö'të yödzo quégaca zxf'ini xi'sóe' Israel.

²⁹ Nu bönni' rucá'anë' lidxë', o yugu' bóché'ë, o yugu' zanë', o xuzë', o xinë'ë, o nigula queë', o yugu' zxf'inë', o yugu' xiyúë', para gunë' xichina', bönni' ni si'ë ia'tú gáyua'tërö ca' queë', en gata' ca' yöl-la' na'bán idú queë'. ³⁰ Zián nupa nácatëra' lo na'a, ulu'gá'ana cá'asö, ate' nupa nagá'anagaca cá'asö na'a, hualácagaca lo.

20

Rucúdzü'ë didza' Jesús ca tunë' bönni' huen dxin

¹ Gunnë' ca' Jesús:

—Ca gun Bönni' na' rinná bë'ë yehua' yubá naca ca benë' tu bönni' xan yu'u. Birúajë' zílado', yöjdiljé' yugu' bönni' ilunë' dxin ga naca lu xiyúë' ga na' nadúzgaca lubá uva.

² Cate' chibugá'analenë' tsahui' yugu' bönni' huen dxin na', quizxjé' légaquië' tu dumí lazxaj que tu dza, gusól-lë'ë légaquië' ilunë' dxin ga naca lu xiyúë'. ³ Cate' burúajë' idú xsila, bilé'enë' ia'zica'rë' bönni' nacua'asë' ca' ga naca lu yé'ëyi. ⁴ Rë' légaquië': "Guli'tséaj ca' libí'ili' ga naca lu xiyúa', ate' quizxja' libí'ili' le naca tsahui'." La' yójacatë' ca' légaquië'.

⁵ Burúajë' bönni' xan yu'u na' leyúbölö idú huagubidza, enca' idú xihuó udzó', en la' tuz ca benë', gusól-lë'ë yugu' bönni' yójxáquië' lu xiyúë'. ⁶ Burúajë' ca' cate' ni' zoa ia'látí'do'os gubidza, en yójxáquië' ia'zica'rë' bönni' nacua'asë' ca' ni', ate' rë' légaquië':

"¿Bízx que zóatsali' ni cá'asö idú dza, biti' bi dxin runli'?" ⁷ Yugu' bönni' na' të' lë', ta'nnë': "Cuntu nu benna xichintu'." Ní'irö rë' légaquië': "Guli'tséaj ca' libí'ili' ga naca lu xiyúa', ate' quizxja' libí'ili' le naca tsahui'."

⁸ Cate' chizóa gal-la, bönni' xan yu na' rë' bönni' yu'u lu në'ë yugu' huen dxin na', rnnë': "Bulidza yugu' bönni' huen dxin na', ate' gu'u láxjagaquië'. Quizxju' zí'alö yugu' bönni' na' bila'dxinë' yójsetë. Udxí na' quizxju' yugu' bönni' na' bila'dxinë' zí'atëlö."

⁹ Ní'irö bila'dxinë' bönni' yójéngaquië' dxin cate' ni' zoa ia'látí'do'os gubidza, en gula'zi'ë tu tuhuéajë' dumí lazxaj que tu dza. ¹⁰ Cate' bila'dxinë' bönni' yójéngaquië' dxin zí'atëlö, guléquinë' huazí'gaquië' ia'lati', pero lësca' gula'zi'ë tu tuhuéajë' dumí lazxaj que tu dza. ¹¹ Cate' gula'zi'ë le, gula'nnë'dë'ë queë' bönni' xan yu'u na', ¹² ta'nnë': "Yugu' bönni' ni bila'dxinë' ga yójsetë, tu chí'isö gulunë' dxin, en tuz ca gudíxjatso' légaquië' ca netu', ate' netu' ni bentu' dxin idú dza, en gúguida'atu' gubidza."

¹³ Bubi'ë didza' xan yu na', en rë' tuë': "Bócha'a, biti' bi runa' quiu' le cabí naca tsahui'. ¿Naru' cabí bugá'ana tsáhui'ru' si'u tu dumí lazxaj que tu dza?" ¹⁴ Guzxi' lazxju', en böaj lidxu'. Neda' ré'ënda' quizxja' bönni' ni yöjenë' dxin ga yójsetë la' leze ca na' riguíxja' li'.

¹⁵ ¿Naru' cabí dë lu na'a guna' ca ré'ënda' len le nequi quia'? ¿Naru' ruzxé'etsenu'në' luzó'o tu' rúnnada'a queë'?" ¹⁶ Caní naca, bal-lë' bönni', tu' cá'ana bönachi légaquië' cá'asö, ilácagaquië' lo, ate' ia'zica'rë' bönni', nácatëra' lo na'a, ulu'gá'anë' cá'asö. Zián nupa nulidza', pero nabábasö nupa narógaca.

Rigúxjö'ë Jesús leyúbölö ca si' ilútië' Lë'

(Mr. 10:32-34; Lc. 18:31-34)

¹⁷ Cate' ni' yu'ë Jesús nöza, sa'yéajë' Jerusalén, guché'ë quez idxínnutë' bönni' usëda queë', en rë' légaquië':

¹⁸ —Buli'yútsöca', ribenru' zéajru' Jerusalén, ate' ni' soa nu udödi neda', Bönni' Guljé' Bönachi, lu ná'agaquië' bixúz unná bë', en lu ná'agaquië' bönni' yudo' usëdi, ate' ila'chúguië' quia' gátia'. ¹⁹ Ulu'dödë' neda' lu ná'agaquië' bönni' zi'tu' para ulu'titjé'

neda'. Ila'guinë' neda', en ulu'dé'ë neda' lë'e yaga cruz, pero cate' gaca tsonna dza, Dios usubanë' neda' lu yöl-la' guti.

*Le gunábanu xiná'agaquië' Jacobo, en Juan
(Mr. 10:35-45)*

²⁰ Ní'irö bidxinnu xiná'agaquië' Jacobo, en Juan, yugu' xzí'inë' Zebedeo, ga zoë' Jesús, dzágagaquië'-nu chopë' ni, ate' buzóa xzíbinu lahuë' Jesús, en gunábinu Lë' tu le uzá' ládxë'ë queénu. ²¹ Jesús gunábinë'-nu, rnnë':

—¿Bizxi ré'ënu'?

Rënu Lë':

—Gunná bë' có'öbi' tubi' xzí'ina' ni cuita lë'u ibëla, en ia'tubi' có'öbi' cuita lë'u yógöla ga ni' inná bë'u.

²² Bubi'ë didza' Jesús, rë' légaquië':

—Biti' nózili' le rinábali'. ¿Naru' huáca guá' ilenli' le qui'i saca' neda', en idílali' nisa ca idila' neda' nisa, gátia'?

Të' Lë':

—Huácatu'.

²³ Ní'irö Jesús rë' légaquië':

—Le nácatë le ral-la' qui'i saca'a neda', gaca ca' queéli', en le ral-la' idila' neda' nisa, gátia', idílali' ca' nisa libí'ili', pero que có'öli' cuita lë'a ibëla o cuita lë'a yógöla, biti' dë lu na'a nu gu'a que, pero gata' quégaca nupa ni' chinupé'ë Xuza' quéguequi.

²⁴ Cate' ia'chië' bönni' usëda queë' Jesús bila'yönnë' lë ni, gula'lenë'. ²⁵ Ní'irö Jesús bulidzë' légaquië', rnnë':

—Nözquézili' ca tunë' yugu' bönni' ta'nná bé'enë' bönachi izá'a, ridóditë bë' ta'nná bé'enë' légaquië', ate' nupa ni' nácacacarö lo ta'nná be'e la' luzé'eguequisö. ²⁶ Biti' gaca caní queéli'. Núti'tëslöli' libí'ili' nu ré'ëni gaca zxön ga zóali', nu ni ral-la' gun dxin que ia'zíca'röli'. ²⁷ Lësca' caní, núti'tëslöli' libí'ili' nu gué'ëni gaca lo, ral-la' gaca ca tu bönni' nadó'o que ia'zíca'röli'. ²⁸ Lësca' neda', Bönni' Guljé' Bönachi, bida' ni, calëga para nu gun xichina', pero para guna' xichíngaca bönachi, en udóda' yöl-la' na'bán quia', le quízxjada' ni'a quégaca bönachi zían para ulu'lágaca.

*Ruúnë' Jesús chopë' bönni' nachul-la lógaquië'
(Mr. 10:46-52; Lc. 18:35-43)*

²⁹ Cate' ni' tu'ruájë' yödzö Jericó, bönachi zían söjácálen Jesús. ³⁰ Nacu'ë chopë' bönni' nachul-la lógaquië' ni', ró'gaquië' ra' nöza. Cate' bila'yönnë' ridödë' Jesús ni', gulu'ë zidzaj didza', ta'nnë':

—Xan, xzí'ini xi'sóë' David, buéchi' ladxi' netu'.

³¹ Bönachi zían nacuá' ni' gulé' légaquië' ila'cu'ë dxisö, pero zídzejrö gulu'ë didza', ta'nnë':

—Xan, xzí'ini xi'sóë' David, buéchi' ladxi' netu'.

³² Ní'irö guzé' ribözë' Jesús, en bulidzë' légaquië', ate' gunábinë' légaquië', rnnë':

—¿Bizxi ré'ënili' guna' queéli'?

³³ Të' Jesús:

—Xan, ré'ënitú' gunu' ga huöálaj guiój lotu'.

³⁴ Ní'irö Jesús buéchi' ládxë'ë légaquië', ate' gudanë' guiój lógaquië'. La' böáljatëgaca guiój lógaquië', ate' yöjácálenë' Jesús.

21

*Ridxinë' Jesús yödzö Jerusalén len yöl-la' ba zxön
(Mr. 11:1-11; Lc. 19:28-40; Jn. 12:12-19)*

¹ Cate' bila' dxíngalë' yödzö Jerusalén, en ni' nacu'ë ga dë yödzö Betfagé ga na' zoa Guí'a Yaga Olivo, ní'irö gusól-lë'ë Jesús chopë' bönni' usëda queë', ² ate' rë' légaquië':

—Guli'tséajtsöca' yöldzödo' ni' ca dódilö ga ni zóaru', ate' la' tsöjxáca'tëli'-ba' tuba' burro guná' nága'ba', ate' dzaga lëba' tuba' burro biguiú'do'. Guli'tsöjsexi-ba', en iché'ëli'-ba' quia' ni. ³ Channö nu bi guié libí'ili', guli'guié nu na': "Xanru' riquinnë'-ba'." Ní'irö isól-lë'ë légacaba' quia'.

⁴ Caní guca para gaca lë na' buzúajë' lu guichi bönni' bë'ë didza' uláz queë' Dios, gunné':

⁵ Guli'guié nupa nacua' yöldzö Sión,

Buli'yútsöca', zë'ë Bönni' inná bé'enë' libí'ili'.

Lu yöl-la' nöxaj ladxi' queë' dxíë'-ba' tuba' burro.

Dxíë' cúdzu'ba' búrrodo' nácaba' xzí'iniba' böa' ruá'aba' yua'.

⁶ Ní'irö bönni' usëda queë' yöjáquië' ni', ate' gulunë' ca na' gunná bé'enë' Jesús légaquië'. ⁷ Gula'ché'ë-ba' burro guná' na', en burro biguiú'do' na', ate' bulu'dxíë' cúdzu'gacaba' yugu' lari' guitsa' quégaquië', ate' gudxíë' Jesús lahui' lari' na'. ⁸ Nacua' ca' bönachi zían ni', ate' gula'chilaj yugu' lari' ta'xóa cúdzu'guequi la' nöza. Ia'zica'rë' bulu'chibë' zin le bulu'zxóë' ga naca la' nöza. ⁹ Gulu'í zidzaj didza' bönachi na' nanórugaca, en nupa na' söjácálen Jesús, ta'nná:

—¡Yöl-la' ba Lë', xzí'ini xi'sóë' David! ¡Bica' ba nu ni za' ni'a que Lë' Xanru'! ¡Yöl-la' ba Dios!

¹⁰ Cate' guyázië' Jesús yöldzö Jerusalén, bulu'dzatsa yúgu'të bönachi lu yöldzö na', ate' zían nupa gulé luzé'eguequi, ta'nná:

—¿Nuzxi caz bönni' ni?

¹¹ Ia'bal-la bönachi ni' ta'nná:

—Nu ni Jesús, bönni' ru'ë didza' uláz queë' Dios, ate' naca ladzë' Nazaret luyú Galilea.

Jesús rulatjë' lö'a yudo'

(Mr. 11:15-19; Lc. 19:45-48; Jn. 2:13-22)

¹² Cate' guyázië' Jesús lö'a yudo' queë' Dios, bulágui'ë ní'ilö yúgu'të nupa tuti' to'o ga naca lö'a yudo' na'. Burixë' ca' yugu' blaga quégaquië' bönni' tu'tsé'ë dumí yöldzö zí'tu', en yugu' le ta'bö'i nupa tuti' gu'dödo'. ¹³ Rë' légaquië':

—Nazúaj lu guichi lá'ayi le rnna: "Lidxa' sí'i le, yu'u ga nu ulidza Dios", pero libí'ili' chinunli' lataj ni ca naca yu'u lídxigaca gubán.

¹⁴ Cate' ni' zoë' Jesús chila yudo', bal-lë' bönni' nachul-la lógaquië', en bönni' biti' raca ila'zë'ë bila'dxinë' ga na' zoë', ate' Lë' bunë' légaquië'. ¹⁵ Gula'lenë' yugu' bixúz unná bë', en bönni' yudo' tu'sédinë' cate' bila'lë'enë' yugu' yöl-la' huáca ni runë' Jesús, en bila'yönnë' tu'í'ibi' bí'ido' zidzaj didza' ga naca chila yudo', ta'nnabi':

—¡Bica' ba Lë', xzí'ini xi'sóë' David!

¹⁶ Ní'irö të' Jesús:

—¿Naru' cabí riyönnu' ca ta'nnabi' bi'i ni?

Bubi'ë didza' Jesús, rnnë':

—Ön, riyönda'. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rnna: "Lí' benu' ga yugu' bi'i cuidi', en yugu' bí'ido' ni' tádxí'bi' gulúl-labi' yöl-la' ba le naca idú."

¹⁷ Ní'irö Jesús bucá'anë' légaquië', ate' burúajë' Jerusalén. Guyijë' yöldzö Betania ga ni' bugá'anë' idú yëla.

Jesús rulidza zí'ë yaga higo

(Mr. 11:12-14, 20-26)

¹⁸ Cate' za' rení', ate' ni' söhuójë' Jesús Jerusalén, ridunë'. ¹⁹ Bilé'enë' tu yaga higo rö' gal-la' cuite nöza, ate' gubígui'ë ga na' rö', pero biti' bi bidzólinë' lu yaga na'. Xilágui'sö dxía. Ní'irö Jesús gudxë' le:

—Bíti'rö cuía le ribía quiu'.

La' gubídxitë yaga higo na'. ²⁰ Cate' bila'lé'enë' bönni' usëda queë' lë ni, bulu'bábinë', ate' gula'nábinë' Jesús, ta'nné':

—¿Nacxi caz guca, gubídxitë yaga ni?

²¹ Bubi'ë didza' Jesús, rë' légaquië':

—Le nácatë rea' libí'ili', channö tséajlë'ëli' Dios, en biti' gaca chopa ládxi'li', calégasö huáca gunli' ca na' bena' que yaga ni, pero channö guiéli' guí'a ni: Gucuíta, en yöjsóa lu nísado', gaca ca na' innali'. ²² Lësca' caní, yúgu'të le inábali' cate' ulídzali'-në' Dios, channö huayéjlë'ëli' gunné' Dios queéli', huazí'ili' lë na' inábali'.

Yöl-la' unná bë' dë lu në'ë Jesús

(Mr. 11:27-33; Lc. 20:1-8)

²³ Ní'irö guyázië' Jesús chila yudo', ate' tsanni ni' rusédinë' bönachi nacua' ni', bila'dxinë' yugu' bixúz unná bë' len bönni' gula tu'zëajni'inë' ga zoë', ate' gula'nábinë' Jesús, ta'nné':

—¿Bizxi yöl-la' unná bë' dë lu no'o, runtso' yugu' lë ni? ¿Nuzxi budödi lu no'o yöl-la' unná bë' ni?

²⁴ Bubi'ë didza' Jesús, rë' légaquië':

—Lësca' neda' inábatsöqui'da' libí'ili' tu didza'. Channö quíxjöi'ili' neda' ca naca, neda' ca' guía' libí'ili' bizxi yöl-la' unná bë' dë lu na'a runa' caní. ²⁵ ¿Nuzxi caz gusöl-la' Juan para buquilë' bönachi nisa? ¿Naru' Dios gusól-lë'ë lë', o gula'sól-lë'ë yugu' bönni' lë'?

Ní'irö gula'sí lógaquië' bönni' yudo' na' ta'nné' la' légacasë':

—Channö innaru': Dios gusól-lë'ë lë', la' guiétë' rë'u: “¿Bizx que biti' guyéajlë'ëli' lë'?”

²⁶ Na'a, channö innaru': Gula'sól-lë'ë yugu' bönni' lë', rádxiru' le ilún bönachi lu yödzö tu' ta'yéajlë'ë yúgu'të' Juan na' bë'ë didza' uláz queë' Dios.

²⁷ Que lë ni na' bulu'bi'ë didza', të' Jesús:

—Biti' nöztu'.

Jesús rë' légaquië':

—Neda' ca', biti' guía' libí'ili' bizxi yöl-la' unná bë' dë lu na'a runa' lë ni.

Rucúdzü'ë didza' Jesús ca gulunbi' chópabi' xí'inë' tu bönni'

²⁸ Ní'irö Jesús gudxë' yugu' bönni' yudo' na':

—¿Nacxi rusáca'li' queéli'? Guzöë' tu bönni' nacua'abi' chópabi' bi'i bönni' queë', ate' yöjödxe'-bi' tubi' bi'i queë' na', gunné': “Zxí'ina', guyéaj na'a tsöjenu' dxin ga naca luyú quia' ga rógaca lubá uva.” ²⁹ Bubí'ibi' didza' bi'i na', gúdxibi'-në': “Biti' ré'ënda' tseja.” Gudödi ni' bubí'i ládxi'bi', ate' yöjenbi' dxin. ³⁰ Ní'irö bönni' na' yöjödxe'-bi' ia'tubi' bi'i queë' na', en la' tuz ca gunné', ate' bubí'ibi' didza' bi'i ni, gúdxibi'-në': “Huaca, Dad. Uyéaja.” Biti' guyéajbi' bi'i ni. ³¹ ¿Núzxilöbi' bi'i chopa ni benbi' le guyaza ládxë'ë xúzibi'?

Bulu'bi'ë didza', të' Jesús:

—Bi'i zí'alö na'.

Ní'irö Jesús rë' légaquië':

—Le nácatë rea' libí'ili', ila'nóruë' bönni' uquíxzaj tuá dö', en yugu' nigula udá dzaga ca libí'ili', ate' ila'yázië' ga ni' rinná bë'ë Dios. ³² Caní gaca, tu' bidë' Juan, bönni' buquilë' bönachi nisa, ga zóali', en busédinë' libí'ili' le naca tsahui' ca ral-la' gunli', ate' libí'ili' biti' guyéajlë'ëli' lë', pero yugu' bönni' uquíxzaj, en yugu' nigula udá dzaga gula'yéajlë'ë lë'. Sal-la' bilé'eli' lë ni, biti' bubí'i ládxi'li' para tséajlë'ëli' lë'.

Rucúdzü'ë didza' Jesús ca béngaquië' bönni' huen dxin biti' nacagaquië' tsahui'

(Mr. 12:1-12; Lc. 20:9-19)

³³ Gunné' ca' Jesús:

—Bulizé' nágali' ia'tú le ucúdzü'a didza'. Guzöë' tu bönni' xan yu'u, ate' bönni' ni budë'ë yugu' lubá uva luyú queë'. Guléquië' lë'aj que, en guchó'önë' tu lerui guió'j ga isíë'

xisi uva na'. Benë' ca' tu yu'u xitsá' ga gaca nu uyú idútë luyú queë'. Ní'irö budödë' luyú na' lu ná'agaquië' bönni' huen dxin, para ila'zi'ë quégaquië' gatsaj huéaj, ate' sa'yéajë' yödzö zi'tu'.

³⁴ Cate' chibidxin dza ulu'chibë' yugu' lubá uva na', gusól-lë'ë bönni' xan luyú na' bal-lë' ni'a në'ë ga na' nacu'ë bönni' huen dxin ni' para ulu'zi'ë lu ná'agaquië' uláz queë'. ³⁵ Ní'irö gula'zönë' bönni' huen dxin na' yugu' ni'a në'ë na'. Gulunë' huë' tuë', en ia'túë' bétigaquië' lë', en ia'túë' bulu'ladxë' lë' guió'j. ³⁶ Leyúbölö bönni' xan luyú na' gusól-lë'ë ca' ia'zica'rë' ni'a në'ë, ate' guláquië' ziantërë' ca nupa na' gusól-lë'ë zí'alö, ate' la' tuz ca gulunë' bönni' huen dxin ni' quégaquië'.

³⁷ Ga yöjsete, gusól-lë'ë ca' xzí'inë' ga na' nacu'ë. Guzá' ladxë'ë, rnnë': Hualunë' bal bi'i quia'. ³⁸ Cate' yugu' bönni' huen dxin na' bila'lë'enë'-bi' xzí'inë', la' gula'nnatë' la' légacasë': "Bi'i ni guequi queébi' luyú ni. Guli'dá, gútiru'-bi', ate' le ral-la' guequi queébi' guequi queéru'." ³⁹ Ní'irö gula'zönë'-bi', ate' bulu'béajë'-bi' ní'ilö luyú ga na' ró' gaca lubá uva, ate' bétigaquië'-bi' ni'.

⁴⁰ Ní'irö Jesús gunábinë' légaquië', gunné':

—Cate' udxinë' bönni' xan luyú na', ¿nacxi gunë' quégaquië' bönni' huen dxin ni'?

⁴¹ Bulu'bi'ë didza' bönni' yudo' na', të' Jesús:

—Usunítië' bönni' tuá' dö' na', ate' luyú queë' na' udödë' lu ná'agaquië' ia'zica'rë' bönni' huen dxin, bönni' ilu'ë lë' uláz queë' cate' idxín dza ulu'chibë' le.

⁴² Ní'irö Jesús gudxë' légaquië':

—¿Naru' catu caz nulábanili' lë' na' nazúaj lu guichi lá'ayi ca naca lë' ni? Caní' rna:

Guió'j na' gula'ru'unë' bönni' tu'cu'ë zö'ö,

la' guió'j ná'asö chinaca guió'j len zö'ö.

Lë' cazë' Xanru' benë' ga naca caní,

ate' naca tu le run ga rubániru'.

⁴³ Que lë' ni na' rea' libí'ili', xilátjali' ga na' rinná bë'ë Dios idúa queéli', en gata' quégaca bönachi ilún ca ral-la' gun nu nadeli' lataj ni'. ⁴⁴ Nu tsöjchegu' lu guió'j ni, la' cuinsi quitsaj, ate' channö guió'j ni tseajbaga' bönni' na', uzxuzxaj lë'.

⁴⁵ Cate' yugu' bixúz unná bë', en yugu' bönni' yudo' fariseo bila'yönnë' lë' na' bucúdzu'ë didza' Jesús, téquibe'enë' bë'ë Jesús didza' ca naca quégaquië'. ⁴⁶ Gula'zóa gula'bö'ë ila'zönë' Jesús, pero guládxinë' bi ilún bönachi zían nacuá' ni' tu' ta'yéajlë' náquië' Jesús bönni' ru'ë didza' uláz queë' Dios.

22

Rucúdzu'ë didza' Jesús ca naca que laní que yöl-la' rutsaga na'

¹ Jesús bé'lenë' légaquië' didza' leyúbölö, ate' bucúdzu'ë didza', rnnë':

² —Ca gaca quégaca nupa ila'yaza ga rinná bë'ë Dios yehua' yubá naca ca guca quégaca nupa bulidzë' tu bönni' rinná bë'ë cate' benë' laní que dza utsaga ná'abi' bi'i bönni' queë'. ³ Gusól-lë'ë ni'a në'ë tsöjxí'gaquië' yugu' bönni' chinulidzë' para guídagaquië' laní queébi', pero biti' gulé'ënë' guídagaquië'. ⁴ Ní'irö gusól-lë'ë ia'zica'rë' ni'a në'ë, en gudxë' légaquië': "Guli'tsöjódxitsöca' nupa na' chinulidza', na' guiéli' légaquië': Buli'yútsöca', chinupá'a la' huagu. Chibétia'-ba' yugu' xpëdxa', en yugu' böa' bëdxi renni' quia'. Yúgu'të chinupá'a. Guli'dá, sóaru' laní queébi' bi'i bönni' quia' utsaga ná'abi'." ⁵ Yugu' bönni' na' yöjlídzagaquië' biti' gulunë' légaquië' bal, ate' yöjáquië' que quégaquië'. Tuë' yöjenë' dxin, en ia'túë' guyijë' tsöjö'u tsöjéti'ë. ⁶ Ia'zica'rë' gula'zönë' yugu' ni'a në'ë na', ate' gulu'ë dö' quégaquië', en bétgaquië' légaquië'. ⁷ Cate' bönni' na' rinná bë'ë biyönnë' lë' ni, gulénë', en gusól-lë'ë yugu' bönni' queë' röjáquië' gudil-la, ate' bétigaquië' yugu' bönni' hueti bönachi na', en bulu'quélë'ë guí' ládzaquië'. ⁸ Ní'irö bönni' na' rinná bë'ë

gudxë' yugu' ni'a në'ë, gunné': "Le nácatë chinupá'a que laní na', pero yugu' bönni' bulidza' biti' guláquië' lesaca' guídagaquië' laní quia'.⁹ Guli'tséajtsöca' gapa naca la' nöza, en buli'lidza yúgu'të nupa tsöjxáca'li' ni' para guídagaca laní queébi' bi'i bönni' quia' utsaga ná'abi'." ¹⁰ Ní'irö bila'rúajë' ni'a në'ë na', söjáquië' gapa naca la' nöza, ate' bulu'tubë' yúgu'të nupa yöjxáca'gaquië', yugu' bönni' dxi'a, en yugu' bönni' tuá' dö', ate' ga na' raca laní bilíró bönachi.

¹¹ 'Cate' guyázië' bönni' na' rinná bë'ë para uyúë' nupa ni' nudúbigaca, bilé'enë' tu bönni' biti' nácuë' lari' tsahui' le bunödzejë' quégaquië' bönni' nacu'ë laní na'. ¹² Ní'irö gudxë' bönni' na': "Bönni'do', ¿zóatso' ni, en biti' nacu' lari' tsahui' bunödza' quégaca nupa nacua' laní?" Bönni' na' busayaj ru'ë. ¹³ Ní'irö bönni' na' rinná bë'ë gudxë' nupa na' tun xichinë', gunné': "Guli'guga' ni'a në'ë bönni' ni. Guli'tsöjchú'un-në' ní'ilö ga na' rö'ö chul-la. Ní' cödxë', en utíl-la láyë'ë, lu yöl-la' ruhu'ini queë'."

¹⁴ Ní'irö Jesús gudxë' légaquië':

—Zian nupa nulidza', pero nabábasö nupa ila'rógaca.

Jesús ru'ë didza' ca naca le riguixaj lázaru'

(Mr. 12:13-17; Lc. 20:20-26)

¹⁵ Ní'irö yugu' bönni' yudo' fariseo na' bulu'zë'ë ni', ate' gulún xtídza'gaquië' ilunë' ga bi innë' Jesús para gaca ulu'zéguië' Lë' didza'. ¹⁶ Para ilunë' caní, gula'sól-lë'ë bal-lë' bönni' dá'gaquië' légaquië', len bönni' dá'gaquië' Herodes, ga zoë' Jesús, nupa na' gulé Jesús:

—Bönni' Usedi, nöztu' Li' ru'u didza' cátëze naca, en naca idútë li ca rusédinu' ca naca queë' Dios, en biti' ru'i ládxi'u le ta'nná quiu' bönachi, tu' cabí ruchi'a rusöróu' bönachi ca naca le ta'nasö bönachi na'. ¹⁷ Gudíxjöi'i netu'. ¿Nacxi runi lí? ¿Naru' run bayudxi, o biti' run bayudxi quizxaj laztu' queë' César, bönni' yödzö zi'tu' na' rinná bë'enë' rë'u?

¹⁸ Réquibe'enë' Jesús té'ënnë' ulu'béajë' Lë' didza', ate' gudxë' légaquië':

—Libi'ili', bönni' rulu'isö tsahui' cuinli', ¿bizx que ru'ili' didza' le ruzóa neda' ra' gu'a?

¹⁹ Buli'lu'i neda' dumí le riguixaj lázali'.

Ní'irö bulu'lu'inë' Lë' tu dumí que yödzö Roma. ²⁰ Jesús gunábinë' légaquië', rnnë':

—¿Nuzxi lahui da' ni, en nuzxi le nazúaj lë'e dumí ni?

²¹ Të' Lë':

—Queë' César na'.

Ní'irö Jesús gudxë' légaquië':

—Guli'guixjë' César le nequi queë' César, ate' Dios le nequi queë' Dios.

²² Cate' bila'yönnë' lë ni, bulu'bánninë' ca naca didza' tsahui' bubí'ë Jesús, ate' bulu'cá'anë' Lë', söhuóajtëgaquië'.

Ta'nabi yúdxinë' Jesús ca ulu'bán nupa chinátigaca

(Mr. 12:18-27; Lc. 20:27-40)

²³ La' dza ná'asö yugu' bönni' yudo' saduceo, bönni' na' ta'nnë' biti' ulu'bán nupa chinátigaca, bila'dxinë' ga zoë' Jesús, ate' gula'nábinë' Lë', ²⁴ ta'nnë':

—Bönni' Usedi, Moisés gunné': "Channö gátie' tu bönni' zóanu nigula queë', en cuntu nu bi'i zóabi' queë', ní'irö bi'i bóchë'ë bönni' na' ral-la' utsaga ná'alénbi'-nu nigula uzëbi queë', para cabí initi di'a dza queë' bönni' bóchi'bi' na'." ²⁵ Gula'cuá'abi' gadxi bi'i bönni' ga zóatu', naca bóchi'gacabi'. Bi'i zí'alö na' butsaga ná'alénbi'-nu nigula, ate' gútitébi'. Tu' cuntu nu bi'i queébi' zóabi', bi'i buropi na' butsaga ná'alénbi'-nu nigula uzëbi queébi' bi'i bóchi'bi' na'. ²⁶ Lësca' caní guca queébi' bi'i buropi na', enca' queébi' bi'i bunny, en la' tuz ca guca quégacabi' igádxitébi', gulátibi' yúgu'tëbi'. ²⁷ Ga búdxité gútinu ca' nigula na'. ²⁸ Cate' idxín dza ulu'bán nupa chinátigaca, ¿núzxilögacabi' bi'i gadxi ni' guéquinu nigula na' queébi', tu' bulu'tsaga ná'alénbi'-nu yúgu'tëbi' nigula na'?

²⁹ Ní'irö bubí'ë didza' Jesús, ate' rë' légaquië':

—Nachíxili' libí'ili' tu' cabí réajni'ili' le nazúaj lu guichi lá'ayi, en tu' cabí núnbë'ëli' yöl-la' huáca queë' Dios. ³⁰ Cate' idxín dza ulu'bán nupa chinátigaca, bíti'rö gaca yöl-la' rizóalen nigula, en bití' ulu'tsaga ná'agaquië', pero gácagaquië' ca nácagaquië' gubáz lá'ayi queë' Dios nacué' yehua' yubá. ³¹ Ca na' ral-la' ulu'bán nupa chinátigaca, ¿narú' cabí nulábanili' lë na' gudxi cazë' Dios libí'ili'?' ³² Caní gunné': "Neda' naca' Dios queë' Abraham, en Dios queë' Isaac, en Dios queë' Jacob." Dios na' bití' náquië' Dios quégaca nupa nátigaca tsaz, pero náquië' Dios quégaquië' bönni' ni nabángaquië' sal-la' gulátië'.

³³ Cate' bila'yöni bönachi nacua' ni' didza' ni, bulu'bani ca naca lë na' rusédinë' Jesús léguequi.

Xibá queë' Dios le naca lo

(Mr. 12:28-34)

³⁴ Cate' guléquibe'enë' bönni' yudo' fariseo ca benë' Jesús, busayjë' ruá'agaquië' bönni' yudo' saduceo, ní'irö bulu'dubë' yúgu'të'. ³⁵ Tuë' bönni' nútsë'ë ládjagaquië', en nazëdë' xibá queë' Moisés, gú'unnë' si' bë'ë Jesús. ³⁶ Que lë ni na' gunábinë' Jesús, rnnë':

—Bönni' Usedi, ¿bízxilö xibá queë' Dios naca lo?

³⁷ Jesús rë' lë':

—Idxí'inu' Xanu' Dios idú ládxi'u, en idú icja ládxi'do'o, enca' len idú yöl-la' réajni'i quiu'. ³⁸ Xibá ni naca lo, en nazáca'tërö. ³⁹ Xibá na' naca buropi, la' ca nácatë, en caní rna: "Idxí'inu' böchi' luzó'o ca nadxi'i cuinu'." ⁴⁰ Chopa xibá ni nácagaca ga röjlöz yúgu'të le rinná bë' xibá queë' Dios, en yúgu'të le bulu'sédinë' bönni' gulu'ë didza' uláz queë' Dios.

¿Nuzxi xí'ini náquië' Cristo?

(Mr. 12:35-37; Lc. 20:41-44)

⁴¹ Tsanni ni' nacué' tsözxón bönni' yudo' fariseo na', Jesús gunábinë' légaquië', ⁴² rnnë':

—¿Nacxi rusáca'li' queé'li' queë' Bönni' na' lë' Cristo? ¿Nuzxi xí'ini náquië'?

Bulu'bi'ë didza', ta'nnë':

—Zxi'ini xi'sóë' David náquië'.

⁴³ Ní'irö Jesús rë' légaquië':

—¿Bizx que na' lë cazë' David bulidzë' Lë', gunné': "Xana"?' Caní gunné' cate' ni' bë'ë didza' uláz queë' Dios Bö' Lá'ayi, gunné':

⁴⁴ Xanru' Dios gudxë' Xana':

"Guró'ö cuita lë'a ibëla, cate' gunra' ga ulu'zachu xzíbigaca Lo' nupa tequi Li' zi'."

⁴⁵ Channö David na' gunné' queë' náquië' Xané', ¿nacxi caz naca, rnnali' náquië' xzí'ini xi'sóë' David na'?

⁴⁶ Cuntu nu guca ubí' didza', atë' ga gusí lo dza na', cúnturö nu burugui bi inábini Lë'.

23

Jesús ruzégui'ë yugu' bönni' yudo' didza'

(Mr. 12:38-40; Lc. 11:37-54; 20:45-47)

¹ Ní'irö Jesús bë'lenë' bönachi nacua' ni' len yugu' bönni' usedi queë' didza'. ² Rë' légaquië':

—Yugu' bönni' yudo' fariseo, en yugu' bönni' yudo' usedi nuhuóazagaquië' xilatjë' Moisés, en tu'sédinë' bönachi. ³ Que lë ni na', guli'gún yúgu'të le ilé' libí'ili', pero bití' gunli' libí'ili' ca na' tunë' légaquië', tu' tu le ta'nnë', en ia'tú le tunë'. ⁴ Le ta'nná bé'enë' bönachi naca ca tu yua' zi'i le cabí sequi' nu guá', atë' tu'gu'ë le ya'zxicjagaca bönachi, pero légaquië' bití' té'ënnë' ulu'tenë' le, calëga len tuze xibón ná'agaquië'. ⁵ Yúgu'të le tunë', tunë' para ila'lé'e bönachi légaquië', tu' tunë' zxön le túgui'ë yen ná'agaquië', en ra' xigágaquië' ga na' nuzúajgaquië' tu le nazúaj lu guichi lá'ayi, en tu'tunnë' luzxi lari' nácugaquië'. ⁶ Té'ënnë' ila'bö'ë ga naca lataj lo ga na' tu'dubë' tahuë', enca' ga na' naca

lataj lo lu yu'u ga tu'dubë' tu'sedë' queë' Dios. ⁷ Lësca' caní, té'ënnë' ulu'gapa bönachi légaquië' didza' ba zxön gapa naca lógaca bönachi, en té'ënnë' ilé bönachi légaquië': "Padiux, bönni' usedi."

⁸ Pero libí'ili', bití' ral-la' gunli' ga nu guíë libí'ili': Bönni' Usedi, tu' zoa tuz Nu naca Bönni' Usedi queéli', neda', Cristo, ate' yúgu'tëli' nácali' bóchi'li' tuli' ia'tuli'. ⁹ Cuntu nu guiéli' luyú ni, bití' innali': Xuz, tu' zoa tuz Nu naca Xúzili', zoë' yehua' yubá. ¹⁰ Bití' gunli' ga nu guíë libí'ili': Xan, tu' zoa tuz Nu naca Xanli', neda', Cristo. ¹¹ Nu nutsá' ladjali' nu run xichinli' ia'zíca'röli', nu ni na' gácarö lo ga zóali'. ¹² Channö nu uzóa cuini lataj lo, cá'asö ugá'ana nu na', pero nu naca nöxaj ladxi', gaca lo.

¹³ Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruzága'li' nöza sójacalen bönachi para ila'dxín ga ni' rinná bë'ë Dios yehua' yubá. La' libí'isili' bití' sequi' tsú'uli', en bití' ru'ili' lataj ila'yú'u nupa té'ëni ila'yú'u.

¹⁴ Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Rugúali' yugu' lídxigacanu nigula uzé'bido', en para ulu'isö tsahui' cuinli', xidzé rulfdzali'-në' Dios. Que lë ni na', zí'tërö irugu queéli' qu'í sáca'li'.

¹⁵ Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ridódili' idú lu nísado', en idú yödzölió ni para gunli' ga tseaj ládxë'ë tu bönni' Dios tsözxón len libí'ili', en cate' chiguzxéqui'li'-në', runli' ga nabága'rë' xíguia' ca libí'ili', ate' tsöjtsu'ë lu gu' gabila.

¹⁶ Bica' bayechi' libí'ili'. Nachul-la loli', ate' ré'ënili' ulu'ili' nöza bönachi. Caní naca queéli' tu' rnnali': "Channö bi rizí' lu në'ë tu bönni' ni'a que yudo', bití' run bayudxi, pero channö runë' le ni'a que oro dzö'ö yudo', bayudxi gun." ¹⁷ Libí'ili', bönni' lo chul-la, en tu' caréajni'i. ¿Bízxilö nácáro lo? ¿Naru' oro na', o yudo' le run lá'ayi oro na'? ¹⁸ Lësca' caní rnnali': "Channö nu bönni' gunë' le ni'a que bucugu lá'ayi, bití' gun bayudxi, pero channö gunë' le ni'a que gun zxoá lahui, bayudxi gun." ¹⁹ Libí'ili', nazídili', en nachul-la loli'. ¿Bízxilö nácáro lo? ¿Naru' gun zxoá láhüisö, o bucugu lá'ayi na' run lá'ayi gun na'? ²⁰ Que lë ni na', channö nu bönni' runë' le ni'a que bucugu lá'ayi, runë' le ni'a que le, enca' ni'a que yúgu'të le zxóagaca láhüisö. ²¹ Lësca' caní, channö nu bönni' runë' le ni'a que yudo', runë' le ni'a que le, enca' ni'a queë' Dios, nun cazë' xilatjé' ni'. ²² Lësca' caní, channö nu bönni' runë' le ni'a que yehua' yubá, runë' le ni'a que lataj ga rö'ë rinná bë'ë Dios, enca' ni'a que Lë cazë' Dios rö'ë ni'.

²³ Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Caní naca queéli' tu' riguízxjali' que yudo' tu cö' huéaj tu' chi cö' le rizí'ili' que xöhuéaj, en que guixi' anís, en que comino la' huagu, pero rucá'anali' le nácáro lo le rinná bë' xibá queë' Dios, tu' cabí runli' le naca tsahui', en bití' ruhuéchi' ládxi'li' luzá'ali', en bití' réajlé'ëli'-në' Dios. Yugu' lë ni run bayudxi gunli', en lës bití' ucá'anali' ia'zíca'rö lë na' runli', le riguízxjali' que yudo'. ²⁴ Libí'ili', nachul-la loli', en ré'ënili' ulu'ili' nöza bönachi. Ca na' runli' naca ca rudódili' bödzádzado' le ré'jali', rubéajgacali'-ba' bó'iyudo', pero ré'jali'-ba' böa' ta'bíë'-ba' bönni'.

²⁵ Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Nácali' ca zxíga'do' ré'jali', en yó'öna ráhuili'. Riguíbili' le nuá' cuita lë'e, pero lu icja ládxi'do'oli' nalí yugu' le ribanli', en yugu' le ruá' dö' runli'. ²⁶ Libí'ili', bönni' yudo' fariseo lo chul-la. Zí'alö guli'quibi le nuá' lu zxíga'do', en lu yó'öna, lë na' sa'yéaj gácali' tsahui' lu icja ládxi'do'oli', para gácali' ca' tsahui' cuita lé'ëli'.

²⁷ Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Caní naca queéli' tu' nácali' ca yugu' yeru ba quégaca nupa chinátigaca, le nácagaca chiguíchido'os cuita lë'e, en le nácaté lachi nalá'gaca, pero nalá'gaca dxita quégaca nupa chinátigaca, enca' yúgu'të le siguti. ²⁸ Lësca' caní nácali'

libí'ili'. Le nácatë láhuisö rulu'i cuinli' tsahui' lógaca bönachi, pero lu icja ládxi'do'oli' nalili' yugu' le rulu'isö tsahui' cuini, en le ruá' dö' runli'.

²⁹ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruchísali' biquitaj que ba gapa nagáchi'gaquië' bönni' gulu'ë didza' uláz queë' Dios, en ru'ili' biquitaj gapa nagáchi'gaca bönachi tsahui'. ³⁰ Lësca' caní rnnali': "La'tu' zóatu' dza ni'te cate' gula'cu'ë xuz xtó'otu', biti' guntu' légaquië' tsözxón cate' gulútië' yugu' bönni' gulu'ë didza' uláz queë' Dios." ³¹ Tu' rnnali' caní, la' libí'isili' runli' ba nalí nácali' xzí'ini xi'sóagaca nupa ni' bétigaca yugu' bönni' gulu'ë didza' uláz queë' Dios. ³² Caní naca, rusubaga' cuinli' xíguia' na' gula'báguië' xuz xtó'oli'.

³³ 'Libí'ili' na', nácali' ca yugu' bëla sínia', en di'a dza quégacaba' bëla sínia'. ¿Nacxi caz uláli' lu le usaca' zi' libí'ili' lu guí' gabila? ³⁴ Que lë ni na', neda' isól-la'a queéli' yugu' bönni' ilu'ë didza' uláz queë' Dios, enca' yugu' bönni' ta'yéajni'inë', en yugu' bönni' usedi. Yugu' bönni' ni, bal-lë' gútili'-në', en ia'zica'rë' udá'ali' lë'e yaga cruz, en ia'zica'rë' quinli' gapa naca lu yu'u ga rudúbili' rusédali' queë' Dios, ate' ulágali' légaquië' tu ia'tú yödzö. ³⁵ Caní gaca, ibága'li' libí'ili' xíguia' que idütë rön quégaquië' bönni' tsahui' le gulalaj luyú, ga gudela' nu bëti Abel, bönni' tsahui', ga ridxintë nupa bétigaca Zacarías, xzí'inë' Berequías, bönni' na' bétili'-në' gatsaj láhui'lö ga dë yudo', en ga dë bucugu lá'ayi ga na' tu'zégui'ë' böa' bédxido' lahuë' Dios. ³⁶ Le nácatë rea' libí'ili', yúgu'të lë ni ila'baga' bönachi nacua' dza ni zóaru' na'a.

Jesús ribödxë' ni'a que yödzö Jerusalén
(Lc. 13:34-35)

³⁷ Lësca' caní gunné' Jesús:

—Jerusalén, Jerusalén, libí'ili' na' rútigacali'-në' bönni' tu'ë didza' uláz queë' Dios, en ruládxi'gacali' guió'j nupa nasól-lë'ë Dios. Zían luzuí gú'unida' utuba' libí'ili' quia', ca runba' yöjede, rutúbiba' bórado' queéba' zxan xíliba', pero biti' gú'unili'. ³⁸ Buli'yútsöca', cá'asö ugá'ana yu'u lídxili'. ³⁹ Caní gaca, tu' rea' libí'ili', na'a isí lo biti' ulé'eli' neda' cate' innáröli': "Lá'ayi náquië' Bönni' na' zë'ë uláz queë' Xanru'."

24

Rigúxjö'ë Jesús ca si' ulu'quínnajë' yudo'
(Mr. 13:1-2; Lc. 21:5-6)

¹ Birúajë' Jesús chila yudo', en tsanni ni' rizé'ë ni', gula'bígui'ë bönni' usëda queë' ga na' zoë', ate' bulu'lu'inië' Lë' ca nátagaca zö'ö nagú'ugaca lë'a yudo'. ² Bubi'ë didza' Jesús, ate' rë' légaquië':

—¿Rilé'etseli' yúgu'të lë ni? Le nácatë rea' libí'ili', biti' ca' ugá'ana guió'j nabaga' luzé'e ni, le cabí iguínnaj.

Le ilaca bë' chizóa idxín dza údxi que yödzölió
(Mr. 13:3-23; Lc. 21:7-24; 17:22-24)

³ Cate' ni' rö'ë Jesús ga naca lu Guí'a Yaga Olivo, bila'dxinë' bönni' usëda queë' ga na' zoë' queé'zë', en të' Lë':

—Gudíxjö'i netu', ¿bátaxi ilaca lë ni, en bizxi gaca bë' dza huödu', en dza údxi que yödzölió ni?

⁴ Ní'irö bubi'ë didza' Jesús, ate' rë' légaquië':

—Buli'yú para cabí nu si' ye'e libí'ili', ⁵ tu' zá'gaquië' zían bönni' légaquië' ca lea' neda'. Ila'nnë' nátagaquië' Cristo, en ila'z' yé'enë' bönachi zían. ⁶ Huayónili' raca gudil-la, en le ru'i didza' que gudil-la, pero biti' có'öli' böniga, tu' ral-la' ilaca yúgu'të lë ni, pero cabí ridxini dza údxi cate' ilácarö lë ni. ⁷ Til-la tu yödzö len ia'tú yödzö, ate' tu ga nu rinná bë' len ia'tú ga nu rinná bë'. Ilatsaj yödzöhuë' zxon, en gaca gubín, ate' zían lataj tödi budó' zxu'. ⁸ Yúgu'të lë ni nátagaca le isí lógaca yugu' le ila'guí'i ila'zaca' bönachi.

⁹ Ní'irö ulu'dödi bönachi libí'ili' lu na' nu usaca' zi' libí'ili'. Yúgu'tè bönachi ulu'dí'i libí'ili' tu' dá'ali' neda', en ilútiè' bál-lali' libí'ili'. ¹⁰ Cate' gaca caní, gaca chopá ládxi' gaca zían bönachi, en ulu'cá'ana neda', ate' udödi tu ia'tú luzé'e, en tu ia'tú udí'i luzé'e. ¹¹ Ní'irö ulu'lú'i lógaquié' zían bönni' ta'z'í' yé'è. Ulu'lú'i cuíngaquié' ca yugu' bönni' tu'è didza' uláz queé' Dios, en ila'z'í' yé'ené' bönachi zían. ¹² Iluá'ada' dö' bönachi, ate' que lè ni na' bíti'rö ila'dxí'i böchi' luzé'eguequi. ¹³ Nu guequi tsaz queé' Dios ga idxintè dza údxi, nu ni ulá. ¹⁴ Idú yödzülió gaca libán que didza' dxi'a ca rinná bē'è Dios para gaca ba nalí que lógaca yúgu'tè bönachi izá'a, ate' ní'irö idxín dza údxi.

¹⁵⁻¹⁶ Nu ulaba lè ni ral-la' uzéajni'i ladxi'. Gunné' Daniel, bönni' bē'è didza' uláz queé' Dios, gunné': "Tsaza le rudí'iné' Dios lataj lá'ayi queé' Dios, lè na' rusuniti." Cate' ilé'eli' gaca caní, ní'irö nuli' zóali' luyú Judea ral-la' tsöjzxúnajli' saca' gu'ado'. ¹⁷ Nu dxía ícjo'olö bití' gal-la' huötaj tsöjzxi' bi dè que lu yu'u, pero ral-la' izxúnajtè. ¹⁸ Nu zoa la' guixi', bití' gal-la' huóaj tsöjzxi' lari' que. ¹⁹ Bica' bayechi' yugu' nigula si' ulu'zóanu bí'ido' quégacanu, enca' nigula ni' tu'gádxi'nu-bi' bí'ido' quégacanu cate' idxín dza ni'. ²⁰ Buli'lidzè' Dios inábili'-né' cabí idxín dza ni' izxúnajli' cate' raca beo' ziaga o cate' naca dza lá'ayi, ²¹ tu' ila'gu'i ila'záca'tèrö bönachi dza ni' ca gula'gu'i gula'záca' bönachi dza ni'te cate' si' guta' guró'ö yödzülió, ga ridxintè na'a dza, en calèga dza zá'gaca bití' ila'gu'i ila'záca' caní. ²² Cate' idxín dza ni', channö Dios bití' cuéqui lahué' quégaquié', cuntú nu ulá, pero cuéqui lahué' quégaquié' dza ni', en gácalenè' nupa guró' cazè' Lè'.

²³ Ní'irö bití' tséajlè'eli' channö nu idxín queéli', en guié' libí'ili': "Buli'yútsöca', ni zoè' Cristo", o inná: "Ni' zoè'." ²⁴ Ulu'lú'i lógaquié' zían bönni' ta'z'í' yé'è, en ila'nné' nácagaquié' Cristo, o ila'nné' tu'è didza' uláz queé' Dios. Ilunè' le ilaca bē', en le ilún ga ulu'bani bönachi, ate' ila'z'í' yé'ené' nupa guró' cazè' Dios channö hualá'zéqui'né'. ²⁵ Buli'yútsöca', chigudxi caza' libí'ili' yúgu'tè lè ni z'atèlö ca si' ilaca. ²⁶ Que lè ni na', bití' irúajli' channö ila'dxín queéli' nupa ilé' libí'ili': "Buli'yútsöca', ni' zoè' Cristo lu lataj cá'asö." Lèasca' caní, bití' tséajlè'eli' channö ila'nná: "Buli'yútsöca', lu yu'u zoè'." ²⁷ Ca na' raca cate' rēpi yösa ga rilén gubidza, en ruzení' ga ribía gubidza, lèasca' caní gaca cate' huöda' neda', Bönni' Guljè' Bönachi. ²⁸ Ilácatè caní, ca na' ta'nná bönachi: "Gátí'tès ga dè tu le nati, ni' ulu'dubi cázaba' bíchulab."

Ca gaca cate' huödè' Bönni' Guljè' Bönachi

(Mr. 13:24-37; Lc. 21:25-33; 17:26-30, 34-36)

²⁹ Gunné' ca' Jesús:

—Tödi yugu' dza ni' cate' ila'gu'i ila'záca' bönachi caní, ichul-la gubidza, ate' beo' bití' gunna bení' que. Ila'guínnajba' böljá lúzxiba, ate' ila'zxízi le nalá'gaca naca tsutsu lúzxiba. ³⁰ Ní'irö ilá' lahui lúzxiba le gaca bē' huöda' neda', Bönni' Guljè' Bönachi, ate' ila'bödxi yechi' yúgu'tè bönachi yödzülió ni, cate' ila'lé'e neda', Bönni' Guljè' Bönachi, suzá'a lu böaj lúzxiba, dè lu na'a yöl-la' unná bē', en yöl-la' huáca zxön. ³¹ Ní'irö isól-la'gaca'-né' gubáz lá'ayi quia'. Ulu'cödxè' zidzaj lúzuba' böa' guixi', ate' ulu'tubè' nupa nabóa' quia', nacua' idapa la'atè yödzülió, en yúgu'tè lataj zxan lúzxiba.

³² Buli'zéajni'i ládxi'li' le rusedi libí'ili' le raca que yaga higo. Cate' ta'lén ni'a nē'e yúludo', en chirubía xilagui' yúludo', inózili' chizóa idxín cusubá. ³³ Lèasca' caní, cate' ilé'eli' taca yúgu'tè lè ni, inózili' chizóa idxín dza údxi na', en chiridzaga lahui. ³⁴ Le nácatè rea' libí'ili', yúgu'tè lè ni ilaca z'atèlö ca ilátigaca bönachi nacua' dza ni'. ³⁵ Huadödi quégaca lúzxiba, en luyú ni, pero yugu' xtí'dza'a bití' ila'dödi cá'asö.

³⁶ Cate' idxín dza ni' cuntú nu nözi. Bití' nózguequinè' gubáz lá'ayi queé' Dios nacué' yehua' yubá, en bití' nözda' neda', Zxí'iné' Dios, pero tuzè' Dios Xuz nóziné'.

³⁷ Ca na' guca dza cate' ni' zoè' Noé, lèasca' caní gaca cate' huöda' neda', Bönni' Guljè' Bönachi. ³⁸ Yugu' dza ni' z'atèlö ca si' idxín nisa guíój le busuniti yödzülió, gulè'aj gulahué', bulu'tsaga ná'agaquié', en bulu'dödè' zxi'inigaquié' lu yöl-la' rutsaga

na' ga bidxintë dza guyázië' Noé lë'e barco zxön ni' benë', ³⁹ en biti' guléquibe'enë' cate' bidxintë nisa guiój le busuniti yödölió, ate' gula'nítië' yúgu'të'. Lësca' caní gaca cate' si' huöda' neda', Bönni' Guljé' Bönachi, cuntu nu guéquibe'e. ⁴⁰ Dza huöda' ila'cu'ë chopë' bönni' la' guixi'. Tuë' uchë'a-në' quia', ate' ia'túë' ucá'ana'-në'. ⁴¹ Ila'cuá'anu chópanu nigula nacuá'anu huëtu. Tunu uchë'a-nu quia', ate' ia'tunu ucá'ana'-nu.

⁴² Buli'subán ládxi'li' tu' cabí nózili' bizxi dza huöda' neda', Xanli'. ⁴³ Na'a, guli'tséajni'i lë ni. La'tu' nózine' xan yu'u bizxi dza guídë' gubán, huané'ë yëla, en biti' gu'ë lataj nu quidaj zö'ö para cuan le dzö'ö lidxë'. ⁴⁴ Que lë ni na', buli'subán ládxi'li' ca' libí'ili', tu' huöda' neda', Bönni' Guljé' Bönachi, tu dza biti' nuzóa icjali'.

Bönni' huen dxin tsahui', en bönni' huen dxin biti' náquië' tsahui'

(Lc. 12:41-48)

⁴⁵ Gunné' ca' Jesús:

—¿Nuzxi caz bönni' huen dxin náquië' tsahui', en réajni'inë', bönni' huen dxin na', xané' cu'ë lu në'ë bönachi nacuá' lidxë' para gu'ë le ilágugaca cate' idxín dza? ⁴⁶ Bica' ba bönni' huen dxin na' náquië' tsahui', bönni' na', cate' udxiné' xané', uduxáquië' lë' caní runë' le nudödë' xané' lu në'ë. ⁴⁷ Le nácatë' rea' libí'ili', yúgu'të' le dë' queë' xané', udödë' lu në'ë bönni' huen dxin na' runë' caní. ⁴⁸ Channö huöáquië' bönni' huen dxin queë' huiá' dö', en sa' ládxi'ë, innë': "Huadzenë' xana', en biti' huódatië'", ⁴⁹ en channö isí lahuë' gundë' zi' bönni' túnlenë' lë' tsözxón dxin, en isí lahuë' ca' gu'aj gágulenë' nupa ta'zudxi, ⁵⁰ ní'irö huödë' xané' bönni' huen dxin na' tu dza cate' biti' zoë' ribözë', o tu yëla biti' réquinë'. ⁵¹ Ní'irö xané' na' usaca' zí'dë'ë bönni' huen dxin na', en gunë' ga gaca queë' ca na' ral-la' gaca quégaca nupa tu'lu'isö tsahui' cuínguequi. Ní'irö cödxí yechë'ë, en gagu zxea láyë'ë.

25

Rucúdzü'ë didza' Jesús ca naca quégacabi' chibi' bi'i nigula ra'bando'

¹ Gunné' ca' Jesús:

—Ca gaca quégaca nupa ila'yaza ga rinná bë'ë Dios yehua' yubá naca ca guca quégacabi' chibi' bi'i nigula ra'bando'. Gula'zí'ibi' le nuá'gaca guí' quégacabi', ate' bila'rúajbi' tsöjtságacabi' bönni' utsaga në'ë. ² Gáyu'bi' nácagacabi' bi'i biti' ta'yéajni'ibi' ate' ia'gáyu'bi' nasína'gacabi'. ³ Yugu' bi'i nigula biti' ta'yéajni'ibi' na' gula'zí'ibi' le nuá'gaca guí' quégacabi' pero biti' guluá'abi' ia'lati' za régui. ⁴ Yugu' bi'i sina' na' guluá'abi' za régui lu bóga'do' quégacabi' len le nuá'gaca guí' quégacabi'. ⁵ Tu' gudzenë' bönni' utsaga në'ë, gudödi yëla lógacabi', en gulásitëbi'. ⁶ Cate' bidxín idú guluhuëla, biyón chí'i nu rinnë' zidzaj, rna: "¿Chizë'ë bönni' utsaga në'ë! ¿Guli'rúaj tsöjtságali'-në'!" ⁷ Ní'irö gula'yásabi' yúgu'tëbi' bi'i nigula na', ate' bulu'pá'abi' le nuá'gaca guí' quégacabi'. ⁸ Gulu'ibi' didza' bi'i biti' ta'yéajni'ibi' na', en gulëbi' yugu' bi'i sina' na': "Guli'gunna queëtu' láti'do' za régui queéli' tu' tu'úlu le nuá'gaca guí' queëtu' ni." ⁹ Bulu'bí'ibi' didza' bi'i sina' na', gula'nnabi': "Biti' gaca, tu' cabí bi' ugá'ana queëtu', en queéli'. Guli'tséajtsöca' ga ridó'o za régui, tsöj'ó'uli' queéli'." ¹⁰ Tsanni ni' sójacabi' sójxí'gacabi' le, bidxiné' bönni' utsaga në'ë. Yugu' bi'i na' nacuá'abi' sina', en ta'bözabi' lë' gula'yú'ulentëbi' lë' ga na' raca laní que utsaga na', ate' la' guyáyajtë yu'u. ¹¹ Gudödi ni' ia'zica'röbi' bi'i nigula ra'bando' na' bila'dxinbi' ni', ate' bulu'lídzabi'-në', en gula'nnabi': "Xan, Xan, gusalaj queëtu'." ¹² Lë' bubí'ë didza', rnnë': "Le nácatë' rea' libí'ili', biti' nözda' gazxi libí'ili'."

¹³ Ní'irö Jesús gudxë' légaquië':

—Buli'subán ládxi'li', tu' cabí nózili' bizxi dza o bizxi yëla huöda' neda', Bönni' Guljé' Bönachi.

Rucúdzü'ë didza' Jesús ca naca que dumí zaca'

¹⁴ Gunné' ca' Jesús:

—Ca gun Nu na' rinná bē' yehua' yubá naca ca benē' tu bönni', chizóa tsejē' zi'tu'. Bulidzē' yugu' bönni' huen dxin queē' en gulu'ē yugu' le dē queē' lu ná'agaquiē'.

¹⁵ Tuē' bönni' huen dxin na', gulu'ē gayu' dumí nazaca' lu nē'ē, ate' ia'túē' gulu'ē chopa dumí nazaca' lu nē'ē. Ia'túē' gulu'ē tu dumí nazaca' lu nē'ē. Tu tuē' gulu'ē lu nē'ē tsca huéaj le ila'zéqui'nē'. Ní'irö la' guzá'atē' ga naca zi'tu'. ¹⁶ Guyijē' bönni' huen dxin na' guzxi'ē gayu' dumí nazaca' na', en yöjtíljalenē' le ia'gayu' dumí nazaca'. ¹⁷ Lēasca' caní, bönni' na' guzxi'ē chopa dumí na', yöjtíljalenē' le ia'chopa ca'. ¹⁸ Bönni' na' guzxi'ē tu dumí guyijē', en yöjchö'önē' lu yu, ate' bucáchē'ē dumí queē' xanē' lu yu ni'.

¹⁹ 'Cate' chigudzé, budxinē' xángaquiē' bönni' huen dxin na', ate' bucá'analenē' légaquiē' tsahui'. ²⁰ Ga gusí lo bidxintē' bönni' na' guzxi'ē gayu' dumí nazaca' na', en sunu'ē ia'gayu' dumí ca', ate' rē' xanē': "Xan, gayu' dumí gulu' u lu na'a. Ni dē ia'gayu' dumí ca' yöjtíljalena' le." ²¹ Xanē' na' rē' lē': "Naca dxi'a. Nacu' huen dxin tsahui'. Tsáhui'do' benu' cate' ni dē lu no'o láti'do'os. Na'a yénni'tērö cu'a lu no'o. Guyaza ga zoa', udzéalenu' neda'." ²² Gudödi ni' bidxinē' ca' bönni' huen dxin na' guzxi'ē chopa dumí nazaca', ate' rñnē': "Xan, chopa dumí gulu' u lu na'a. Ni dē ia'chopa dumí ca' yöjtíljalena' le." ²³ Ní'irö xanē' na' rē' lē': "Naca dxi'a. Nacu' huen dxin tsahui'. Tsáhui'do' benu' cate' ni dē lu no'o láti'do'os. Na'a, yénni'tērö cu'a lu no'o. Guyaza ga zoa', udzéalenu' neda'." ²⁴ Ní'irö cate' bidxinē' bönni' huen dxin na' guzxi'ē tu dumí nazaca' na', rñnē': "Xan, nözda' nacu' bönni' bizxaj, tu' rulapu' ga bití' guzu', en rutubu' ga bití' guchilju'. ²⁵ Que lē ni na' gúdxida' lí', ate' guyija', yöjchácha'a dumí quiu' lu yu. Ni dē na'a le nequi quiu'." ²⁶ Ní'irö bubi'ē didza' xanē', en rē' lē': "Nacu' huen dxin bití' naca tsahui', en xöhuēdi. Nöz quézinu' rulapa' ga bití' guza', en rutuba' ga bití' guchilja'. ²⁷ Que lē ni na', gácarö dxi'a quiu' la'tu' bunödzu' dumí quia' lu ná'agaquiē' bönni' ulu'gunē' le dxin, ila'gulíjalenē' le ia'lati', para cate' huöda' neda', uzi'a le nequi quia' len icja ca'." ²⁸ Ní'irö xanē' na' gudxē' nupa nacuá' ni': "Guli'cúa dumí na' dē lu nē'ē bönni' ni, en guli'cú'u le lu nē'ē bönni' na' dē queē' chi dumí." ²⁹ Núti'tēs nu rugún tsahui' dxin le dē queē', zoa nu unödzej queē' ia'lati', ate' gáta'da' queē', pero nu na' bití' rugún tsahui' dxin le dē lu nē'e, la's dui le dē queē' idúa. ³⁰ Na'a, bönni' huen dxin bití' naca tsahui' ni, guli'tsöjchú'una-nē' ní'ilö ga naca chul-la. Ni' cödxí yéché'ē, en gagu zxea láyē'ē.

Cristo uchi'a usöröē' quégaca bönachi

³¹ Gunné' ca' Jesús:

—Cate' ni' huöda' neda', Bönni' Guljē' Bönachi, idinná bē'a, ate' dzágagaquiē' neda' yúgu'tē gubáz lá'ayi quia', ní'irö cō'a lataj tsahui' quia', ga na' uchi'a usöröa' quégaca bönachi. ³² Ulu'dubi dērö lahua' neda' bönachi yödzölió ni, ate' ucu'a léguequi tsölá'a huéaj ca runē' bönni' uyú bö'cu' zxila', rucu'ē-ba' tsölá'a huéajba' yugu' chivo, en yugu' bö'cu' zxila'. ³³ Yugu' bö'cu' zxila' na' ucu'ē-ba' cuita lē'ē ibēla, ate' yugu' chivo na' ucu'ē-ba' cuita lē'ē yögöla. ³⁴ Ní'irö, neda', bönni' unná bē', guía' nupa nacuá' cuita lē'a ibēla, innía': "Guli'dá ga zoa', libí'ili' bubéajē' Xuza' libí'ili' quez queē'. Nequi queéli' lataj ga na' rinná bē'ē, lē na' bupé'ē queéli' dza ni'te cate' ni' benē' yödzölió. ³⁵ Caní nequi queéli' tu' guduna', ate' bénnali' le gudahua'. Gubidxa' nisa, ate' bénnali' le gu'a. Guca' ca tu bönni' ridá zi'tu', ate' gulú'uli' neda' lídxili'. ³⁶ Biyadzaj le gácua', ate' bugáculi' neda' le ráculi'. Güf'ida', ate' buduyúli' neda'. Guyu'a lidxi guíē, ate' buduyúli' neda'." ³⁷ Ní'irö ulu'bi'ē didza' bönni' tsahui' na', ilé' neda': "Xan, ¿bátaxi bilé'etu' Li' gudunu', ate' bugágutu' Li'? ¿Bátaxi gubidxu', ate' bénnatu' le gu'u? ³⁸ ¿Bátaxi bilé'etu' Li' gudó' zi'tu', ate' gulú'utu' Li' lídxitu'? ¿Bátaxi biyadzaj le gacu', ate' bugácutu' Li' le rácutu'? ³⁹ ¿Bátaxi bilé'etu' Li' güí'inu', o guyú'u lidxi guíē, ate' buduyútu' Li'?" ⁴⁰ Ubi'a didza' neda', bönni' unná bē', ate' guía' légaquiē': "Le nácatē rea' libí'ili', tu' benli' caní queē' nu bönni' bócha'ado' ni, sal-la' náquiē' bönni' cá'asö, quia' neda' caz benli' ca'."

⁴¹ Ní'irö guía' nupa nacuá' cuita lē'a yögöla, innía': "Guli'cuíta ga zoa', libí'ili' na' nabága'li' xíguia', tsöjtsázali' lu guí' na' bití' ulu, lē na' bupé'ē Dios ní'a que tu' xihui',

en quéguequi gubáz dá'gaca le. ⁴² Caní gaca queé'li' tu' guduna', ate' biti' bénnali' le gahua'. Gubidxa' nisa, ate' biti' bénnali' le guí'ja'. ⁴³ Guca' ca bönni' ridé' z'i'tu', ate' biti' gulú'uli' neda' lídxili'. Biyadzaj le gácu'a', ate' biti' bugáculi' neda' le ráculi'. Güí'ida', enca' guyu'a lidxi guíë, ate' biti' buduyúli' neda'." ⁴⁴ Ní'irö ila'nná ca' nupa na', ilé neda': "Xan, ¿bátaxi bilé'etu' Li' gudunu', o gubidxu', o gucu' ca bönni' ridé' z'i'tu', o biyadzaj le gacu', o güí'inu', o guyú'u lidxi guíë, ate' biti' gúcalentu' Li'?" ⁴⁵ Ní'irö ubi'a didza' neda', bönni' unná bë', guía' légaquië': "Le nácatë rea' libí'ili', tu' cabí bi benli' que tu nu nutsa' ladaj nupa nacua' ni, sal-la' naca cá'asö nu na', biti' bi benli' quia' neda'." ⁴⁶ Ní'irö bönachi tuá' dö' na' la' tsöjtsázagacatë ga ni' ila'guí'i ila'záca'tica'sö, pero bönachi tsahui' ni' gata' yöl-la' na'bán idú quéguequi.

26

Tun xtí'dza'gaquië' bönni' yudo' ila'zönë' Jesús

(Mr. 14:1-2; Lc. 22:1-2; Jn. 11:45-53)

¹ Cate' budxi bë'ë Jesús yugu' didza' ni, gudxë' yugu' bönni' usëda queë', ² rnnë':

—Nöz quézili' ia'chopa dza idxín Laní Pascua, ate' dza na' neda', Bönni' Guljë' Bönachi, ulu'dödë' neda' lu ná'agaca nupa ulu'dá' neda' lë'e yaga cruz.

³ Ní'irö bila'dxinë' yugu' bixúz unná bë' len yugu' bönni' yudo' usedi, en bönni' gula tu'zëajni'inë' bönachi judío, ate' bulu'dübë' ga naca lö'a lidxi bixúz lo, lë' Caifás.

⁴ Ni' gulún xtí'dza'gaquië' ila'zönë' Jesús, lu yöl-la' rizí' yë' quégaquië', para ilútië' Lë'.

⁵ Ta'nnë':

—Biti' gunru' lë ni dza laní, para cabí ila'dzatsa bönachi.

Tu nigula rigú'unu le rilá' zxixi icjë' Jesús

(Mr. 14:3-9; Jn. 12:1-8)

⁶ Cate' ni' zoë' Jesús lu yödzö Betania lu yu'u lidxë' Simón, bönni' na' güí'inë' huë' nudzu' ruzödi, ⁷ bidxinnu' cúdzu'lë' Jesús tu nigula, nuá'anu tu bóga'do' néquini guió'j nazaca', en yudzu tu le rilá' zxixi le nazáca'da', ate' gulú'unu le icjë' Jesús cate' ni' rö'ë rahuë'. ⁸ Cate' bila'lë'enë' bönni' usëda queë' Jesús lë ni, gula'lenë', ta'nnë':

—¿Bizx que réqui ditaj lë ni? ⁹ Guca nu guti' lë ni, en si' dumí zían para gácalenru' yugu' bönachi yechi'.

¹⁰ Cate' biyönnë' Jesús lë ni, rë' légaquië':

—¿Bizx que rnnëli' queénu nigula ni? Tsahui' naca le bennu quia'. ¹¹ Yugu' bönachi yechi' ila'cuá'lentica'sö libí'ili', pero neda' biti' ugá'analentica'sa' libí'ili'. ¹² Le bennu nigula ni, gulú'unu neda' le rilá' zxixi ni, naca le rupá'anu neda' para dza igácha'a yeru ba. ¹³ Le nácatë rea' libí'ili', gáti'tës luyú yödzölió ga gaca libán que didza' dxi'a ni, lësca' ila'guixjö' bönachi le bennu nigula ni quia' para nu tsöjné lënu.

Rizí' lu në'ë Judas udödë' Jesús lu ná'agaquië' bönni' unná bë'

(Mr. 14:10-11; Lc. 22:3-6)

¹⁴ Ní'irö guyijë' Judas Iscariote ga na' nacu'ë bixúz unná bë'. Náquië' bönni' dzáguië' chínnuë' na' dá'gaquië' Jesús, ¹⁵ ate' gudxë' légaquië':

—¿Bizxi gúnnali' quia' channö neda' udöda'-në' Jesús lu ná'ali'?

Bulu'gá'analenë' lë' tsahui' ilu'ë lë' chi uruá' dumí plata. ¹⁶ Ní'irö gusí lahuë' Judas na' risí ribö'ë udödë' Jesús lu ná'agaquië'.

Le ráguru' le rusá' ládxi'ru' ca gútië' Xanru'

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Cate' naca dza risí lo laní quégaquië' bönni' judío cate' tahuë' yöta xtila le cabí nazí'i cúa zi que, gula'bígui'ë bönni' usëda queë' Jesús ga zoë', en të' Lë':

—¿Gazxi ré'ënu' tsöj'pá'atu' queëru' para gáguru'-ba' bö'cu' zxíla'do' dzö' Laní Pascua?

¹⁸ Jesús rë' légaquië':

—Guli'tséajtsöca' yödzo ni' ga na' zoë' tu bönni', en guli'guié': "Bönni' rusédinë' netu' rnnë': Chizá' gala' dza quia'. Lu yu'u lidxu' gágulengaca'-në' bönni' usëda quia' bö'cu' zxíla'do' dzö' Laní Pascua."

¹⁹ Ní'irö gulunë' bönni' usëda queë' ca na' gunná bé'enë' Jesús légaquië', ate' bulu'pé'ë le ilahuë' dzö' Laní Pascua.

²⁰ Cate' chigudzó' dza na', Jesús guró'lenë' idxínnutë' bönni' usëda queë' tahuë'.

²¹ Tsanni ni' tahuë', Jesús rë' légaquië':

—Le nácatë rea' libí'ili', tu nu nutsa' ladjali' ni udödi neda'.

²² Ní'irö bulu'huí'ini láchxi'gaquië', en gula'nábinë' Jesús tu tuë', ta'nnë':

—Xan, ¿naru' neda'?

²³ Bubi'ë didza' Jesús, rnnë':

—Bönni' ni runé' në'ë tsözxón len na'a lu yó'öna, bönni' ni udödë' neda'. ²⁴ Le nácatë neda', Bönni' Guljé' Bönachi, uyija' ga gátia' ca na' nazúaj lu guichi lá'ayi ca ral-la' gaca quia', pero bica' bayechi' nu na' udödi neda' gátia'. Gácarö dxi'a queë' bönni' na' la' cabí guljé'.

²⁵ Ní'irö bubí'ë didza' Judas, bönni' na' udödë' Jesús, rnnë':

—Bönni' Usedi, ¿naru' neda'?

Jesús rë' lë':

—Ön, li' na'.

²⁶ Tsanni ni' tahuë', gudélë'ë Jesús yöta xtila, en gudxë' Dios: "Xclenu'." Ní'irö buzxuzxjé' le, en bunödzejé' quégaquië' bönni' usëda queë', rnnë':

—Guli'sí', guli'gagu. Lë ni le naca caza'. Ca bena' que yöta xtila ni ruluí'i ca gaca que le naca caza'.

²⁷ Gudélë'ë ca' tu zxíga'do', en gudxë' Dios: "Xclenu'." Ní'irö bunödzejé' ca' quégaquië', rnnë':

—Guli'gui'aj yúgu'tëli'. ²⁸ Lë ni ruluí'i ca naca xichöna' le run tsutsu didza' cubi rucá'ana tsahui'. Xichöna' na' ilalaj ni'a quégaca bönachi zían para gaca uniti lahuë' Dios yugu' dul-la' nabága'gaquië'. ²⁹ Rea' ca' libí'ili', bíti'rö guí'ja' xisi le ribía lubá uva ni cate' idxinrö dza ni' guí'jalena' libí'ili' tu le cubi ga ni' rinná bë'ë Xuza'.

Jesús rnnë' innë' Pedro biti' núnbë'ë Lë'

(Mr. 14:26-31; Lc. 22:31-34; Jn. 13:36-38)

³⁰ Cate' budxi gulúl-lë' yöl-la' ba queë' Dios, yójáquië' lu Guí'a Yaga Olivo. ³¹ Ní'irö Jesús rë' légaquië':

—Yúgu'tëli' gaca chopa láchxi'li', en ucá'anali' neda' na'a dzö' ni, tu' nazúaj lu guichi lá'ayi ca gaca quia', le rnna: "Guna' ga gátie' Bönni' Uyú Bö'cu' Zxila', ate' ilásilasiba' bö'cu' zxíla' na'." ³² Cate' ubana' lu yöl-la' guti, ní'irö tséaja' tsöjnórúa' loli' saca' luyú Galilea.

³³ Ní'irö bubí'ë didza' Pedro, en rë' Jesús:

—Sala' ilaca chopa láchxi'gaquië', en ulu'cá'anë' yúgu'të' Li', neda' biti' gaca chopa láchxa'a, biti' ucá'ana' Li'.

³⁴ Jesús gudxë' lë':

—Le nácatë rea' li', na'a dzö' ni, cate' si' códxilöba' böra, li' innó' tsonna luzuí' biti' núnbë'u neda'.

³⁵ Ní'irö Pedro gudxë' Jesús:

—Sal-la' gátilentea' Li', biti' ca' innía' biti' núnbë'a Li'.

Lësca' caní gula'nnë' yúgu'të bönni' usëda queë'.

Jesús rulidzë' Dios la' yëla Getsemaní

(Mr. 14:32-42; Lc. 22:39-46)

³⁶ Ní'irö Jesús bidxínlenë' légaquië' la' yëla Getsemaní, ate' gudxë' yugu' bönni' usëda queë' na', rnnë':

—Guli'có'tsöca' ni tsanni tséaja' ia'lati' ní'ilö, tsöjlidza'-në' Dios.

³⁷ Jesús guché'ë Pedro len iropë' zxi'inë' Zebedeo, ate' gusí lahuë' ruhuí'innë', en risëbi lãdxë'ë. ³⁸ Ní'irö Jesús gudxë' légaquië':

—Ruhuí'ini lãdxa'a, en huáti caza' lu yöl-la' risëbi ladxi'. Guli'gá'ana ni, en guli'ná' yëla tsözxón len neda'.

³⁹ Gudödë' Jesús ia'láti'do' ní'ilö, ate' ni' biyéchuë'. Busudxín lahuë' lu yu, en bulidzë' Dios, gunné':

—Xuza', channö huáca, ben ga bití' gun bayudxi qui'i saca'a lë ni, calëga ca ré'ënda' neda', pero ca ré'ënu' Li' gunu'.

⁴⁰ Cate' budxinë' Jesús ga na' nacu'ë bönni' usëda queë', yöjxáquië' légaquië' tasië', ate' rë' Pedro:

—¿Naru' cabí gúcatsö iná'alenu' neda' tsözxón yëla tu chí'ido'? ⁴¹ Guli'ná' yëla, en buli'lidzë' Dios inábili'-në' gácalenë' lib'ili', para cabí gü'ili' Satanás tu' xihui' lataj si' bë' lib'ili' le xihui'. Bö' naca cázali' nasína'tica'sö, pero lu yöl-la' bönáchisö queé'li' nacuí'di'li'.

⁴² Ní'irö guyijë' Jesús le buropi luzuí, en bulidzë' Dios, rnnë':

—Xuz, channö cabí gaca gunu' ga bití' qui'i saca'a lë ni, ben ca raza lãdxu'u Li'.

⁴³ Cate' bóajë', leyúbölö buduxaquië' légaquië' tasië' tu' nadódirö yëla guiój lógaquië'.

⁴⁴ Ní'irö bucá'anë' Jesús légaquië', ate' guyijë' leyúbölö, en bulidzë' Dios le bunni luzuí, ate' tuz ca gunné' z'älö rnnë'. ⁴⁵ Leyúbölö bóajë' ga na' nacu'ë bönni' usëda queë', en rë' légaquië':

—¿Rásitsali' na'a, en ruzi'tsö lãdxi'li'? Buli'yútsöca', chibudzaga lo. Neda', Bönni' Guljë' Bönachi, chinadöda' lu ná'agaquië' bönni' dul-la'. ⁴⁶ ¿Guli'chasa, uyéajru! Buli'yútsöca', bönni' na' rudödë' neda' chibidxinë' ni.

Ta'ché'ë Jesús nadzunë'

(Mr. 14:43-50; Lc. 22:47-53; Jn. 18:2-11)

⁴⁷ Tsanni ni' ru'ë Jesús didza' ni, Judas, bönni' nabábalenë' idxínnutë' na', la' bidxintë' ni', ate' dzágagaquië' bönni' zían lë', nuá'agaquië' guíë tuchi', en yugu' yágado'. Yugu' bixúz unná bë', en bönni' gula tu'zëajni'inë' bönachi judío nasól-la'gaquië' légaquië'.

⁴⁸ Judas, bönni' na' rudödë' Jesús, chibuluí'inë' légaquië' tu le gunë' le gaca bë' nu naca Jesús, gunné':

—Bönni' na' utsaga lahua'-në', Lë' na' Jesús. Guli'sönë'.

⁴⁹ Ní'irö gubígui'ë Judas ga na' zoë' Jesús, rnnë':

—Padiux, Bönni' Usedi.

Ní'irö la' busudxín lotë' Lë'. ⁵⁰ Jesús rë' lë':

—Böcha'a, ¿bizxi huen zo'o ni?

Ní'irö gula'biguë'ë bönni' na', ate' gula'zönë' Jesús. ⁵¹ Tuë' bönni' dzáguië' Jesús gulecjë' guíë tuchi' queë', en benë' huë', guchúguië' guídi náguië' bönni' huen dxin queë' bixúz lo. ⁵² Jesús gudxë' lë':

—Bugú' guíë tuchi' quiu' lidxi. Yúgu'të nupa tu'dí'ini guíë tuchi', lu guíë tuchi' ilátigaca. ⁵³ ¿Naru' cabí nózinu' huáca ulidza' Xuza', ate' Lë' la' isól-la'të' zióntërö ca chinnu cö' gubáz lá'ayi le naca zían gáyu'ë tu cö' huéaj? ⁵⁴ Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

⁵⁵ Ní'irö Jesús gudxë' yugu' bönni' ni':

—¿Birúajtsali' nuá'ali' guíë tuchi', en yágado' para sönli' neda' ca runli' rizönli'-në' gubán? Yugu' dza gurö'a loli' ga naca lu chila yudo', en busédigacada' bönachi, pero bití' guzxönli' neda'. ⁵⁶ Raca caní yúgu'të lë ni para udxín le nazúaj lu guichi lá'ayi, ca na' gula'nnë' bönni' gulu'ë didza' uláz queë' Dios.

Ní'irö yúgu'të bönni' usëda queë' Jesús bulu'cá'anë' Lë', en bulu'zxúnnajë' ni'.

Ridxinë' Jesús lógaquië' bönni' yudo'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ní'irö yugu' bönni' na' zóngaquié' Jesús gula'ché'ë Lë', ate' bila'dxiné' lahué' Caifás, bixúz lo, ga ni' nudúbigaquié' ca' yugu' bönni' yudo' usedi len bönni' gula tu'zéajni'iné'.

⁵⁸ Pedro söjnhuë' Jesús zí'tu' zí'tu'sö, en bidxiné' ga naca lö'a lidxi bixúz lo na', para ilé'ené' nacxi utságuié' Jesús.

⁵⁹ Yugu' bixúz unná bé' len bönni' gula tu'zéajni'iné', en bönni' yudo' tu'chi'a tu'söröé', bulu'guiljé' nu uzegui Jesús didza' sal-la' si' yé'ë bönni' na', para gaca ila'chúguié' queé' gátie'. ⁶⁰ Cuntu nu bila'dzöliné' sal-la' bila'dxiné' bönni' zían, en gula'nné' queé' le cabí nácaté. Ga búdxitë bila'dxiné' chopé' bönni', ate' lu yöl-la' rizí' yé' quégaquié' gula'nné' queé', ⁶¹ ta'nné':

—Bönni' ni gunné': "Huaca uquínnaja' yudo' queé' Dios, ate' uchisa' le ia'tsonna dzasö."

⁶² Ní'irö guzuíné' bixúz lo na', en ré' Jesús:

—¿Naru' cabí rubí'tso' didza'? ¿Bizxi caz lë ni ta'nné' bönni' ni quiu'?

⁶³ Jesús bití' bi gunné'. Ní'irö bixúz lo gudxé' Lë':

—Ni'a queé' Xanru' Dios ban rinná bé'eda' Li' quíxjö'u le nácaté. Gudíxjö'i netu' channö nacu' Li' Cristo, Zxí'iné' Dios.

⁶⁴ Jesús ré' lë':

—Ca na' rno' naca'. Le nácaté rea' libí'ili', ilé'eli' neda', Bönni' Guljé' Bönachi, rö'a cuita lë'ë ibëla Dios, ga ni' dë lu na'a yöl-la' unná bé', ate' guída' lu böaj lúxiba, en idxina' ga zóali'.

⁶⁵ Ní'irö lu yöl-la' rilé queé' guchözé' bixúz lo lari' nácué', rnné':

—¿Gunné' zí'ë bönni' ni queé' Dios! ¿Núzxirö naquíniru' nu inné' queé' bönni' ni? Chibiyón quézili' didza' zí' bé'ë queé' Dios. ⁶⁶ ¿Nacxi rusáca'li' queéli'?

Bulu'bi'ë didza', gula'nné':

—Nabágué'ë xíguia' gátie'.

⁶⁷ Ní'irö bulu'chejé' zxöna' lahué' Jesús, en gulu'ë dö' queé'. Gula'gápé'ë ru'ë Jesús ia'zíca'rë', ⁶⁸ en të' Lë':

—¿Nácatso' Li' Cristo? Gunné'ya'atsöca' na'a, ¿nuzxi na' gudapa' Li'?

Pedro rnné': "Bití' núnbé'a-né' Jesús"

(Mr. 14:66-72; Lc. 22:56-62; Jn. 18:15-18, 25-27)

⁶⁹ Tsanni ni' gulaca lë na', rö'ë Pedro ló'alö, ate' bidxinnu tunu nigula huen dxin ga na' zoé', ate' rnnanu:

—Lësca' li' gudálenü' Jesús, bönni' Galilea na'.

⁷⁰ Gudá'bagué'ë Pedro lógaca bönachi nacuá' ni', rnné':

—Bití' nözda' nuzxi que na' ru'u didza'.

⁷¹ Cate' birúajé' Pedro ga nu riyaza lö'a, bilé'enu-né' ia'tunu nigula, ate' gúdxinu nupa nacuá' ni':

—Bönni' ni gudálené' ca' Jesús, bönni' Nazaret na'.

⁷² Leyúbölö gudá'bagué'ë Pedro, en buzötjé' Dios, rnné':

—Bití' ca' núnbé'a-né' bönni' ni.

⁷³ Iá'látí'do'os gudzé, gula'biga' nupa nacuá' ni' ga na' zoé' Pedro, en të' lë':

—Le nácaté li' nunu' ca' tsözxón légaquié' tu' naca bé'u yöl-la' ru'isö quiu' didza'.

⁷⁴ Ní'irö gusí lahué' Pedro rudxía dö' cuiné', en ruzötjé' Dios, rnné':

—Bití' ca' núnbé'a-né' bönni' ni.

La' ná'asö gurödxitëba' böra. ⁷⁵ Ní'irö yöjnené' Pedro didza' gudxé' Jesús lë', gunné': Cate' si' códxilöba' böra, tsonna luzuí chigunnó' bití' núnbé'u neda', ate' burúajé' Pedro ni', en gurödxí yéchi'dë'ë.

¹ Cate' za' reni' dza na', gulún xtídza'gaquië' yúgu'të bixúz unná bë' len bönni' gula tu'zéajni'inë' bönni' judío para ilútië' Jesús. ² Gula'ché'ë Jesús náguë'ë, ate' bulu'dödë' Lë' lu në'ë Poncio Pilato, bönni' rinná bë'ë uláz que yödzö Roma.

Ratië' Judas

³ Cate' chinózinë' Judas, bönni' na' budödë' Jesús lu ná'agaquië' bönni' yudo', narugu queë' Jesús gátië', buí'innë', ate' yöju'ë chi uruá' dumí plata na' lu ná'agaquië' bixúz unná bë', en yugu' bönni' gula na'. ⁴ Rë' légaquië':

—Bena' dul-la' tu' budöda'-në' bönni' tsahui' gátië'.

Ní'irö të' lë':

—Biti' gun lë ni ga có'ötu' böniga. Le ben cazu' li' na'.

⁵ Ní'irö gurú'unë' Judas yugu' dumí plata na' ga naca chila yudo', ate' buzë'ë ni', en yöjsí yenë'.

⁶ Bulu'zi'ë bixúz unná bë' yugu' dumí plata na', ta'nnë':

—Biti' sa'yéaj cú'uru' dumí ni ga rigú'uru' dumí que yudo', tu' naca lazjé' tu bönni' ratië' bönachi.

⁷ Ní'irö gulún xtídza'gaquië', ate' gulá'uinë' dumí na' tu la' yëla queë' tu bönni' huen rö'ö para gaca ga ila'gáchë'ë bönni' zi'tu'. ⁸ Que lë ni na', ga ridxintë na'a dza nazí'i le lataj na', La' Yëla Rön. ⁹ Caní guca ca na' gunné' Jeremías, bönni' bë'ë didza' uláz queë' Dios, gunné': "Gula'guélé'ë chi uruá' dumí plata na', tsca le gula'zéqui'në' bönni' Israel Lë', ¹⁰ ate' dumí na' gulá'uinë' la' yëla queë' tu bönni' huen rö'ö. Lë ni bulu'inë' Xana' neda'."

Ridxinë' Jesús lahuë' Pilato

(Mr. 15:2-5; Lc. 23:3-5; Jn. 18:33-38)

¹¹ Cate' bulu'sudxinë' Jesús lahuë' Pilato, bönni' na' rinná bë'ë uláz que yödzö Roma, bönni' ni gunábinë' Jesús, rë' Lë':

—¿Nacu' Li' Bönni' inná bé'enë' bönachi judío?

Jesús rë' lë':

—Ca nácasö rno'.

¹² Cate' yugu' bixúz unná bë' len bönni' gula tu'zéajni'inë' bulu'zégui'ë Jesús didza', biti' bi didza' bubí'ë Jesús. ¹³ Ní'irö Pilato rë' Jesús:

—¿Naru' cabí riyóntsenu' cate' xö le ta'nnë' quiu'?

¹⁴ Jesús biti' bi didza' bubí'ë. Caní guca, bubáninë' bönni' unná bë' na'.

Rirugu queë' Jesús gátië'

(Mr. 15:6-20; Lc. 23:13-25; Jn. 18:38-19:16)

¹⁵ Cate' naca dza Laní Pascua na', dë caz tu le runë' Pilato, bönni' unná bë' na', ca ta'naba bönachi rusanë' tuë' bönni' yu'ë lidxi guíë, núti'tës nu té'ëni usanë'. ¹⁶ Dza na' tu bönni' nabáguë'ë xíguia', lë' Barrabás, yu'ë lidxi guíë ni'. ¹⁷ Cate' bulu'dubi bönachi zían ni', Pilato gunábinë' légaquië', rnnë': —¿Nuzxi ré'ënili' usana' queéli'? ¿Naru' Barrabás o Jesús, Bönni' na' lë' Cristo?

¹⁸ Caní gunné' Pilato tu' réquibe'enë' bulu'dödë' bönni' yudo' Jesús lu në'ë tu' zxe'enë' Lë'.

¹⁹ Tsanni ni' rö'ë Pilato ga na' ruchi'a rusöröë', nigula queë' gusól-la'nu nu tsöjödxi lë', rna:

—Biti' bi gunu' queë' bönni' tsahui' ni, tu' gúdxide'eda' guduyëla lu yëla béchigal tu' nózinë' Lë'.

²⁰ Yugu' bixúz unná bë' len bönni' gula tu'zéajni'inë' gula'gú'u yól-lë'ë bönachi zían na' para ila'nabi Pilato usanë' Barrabás na', ate' gútië' Jesús. ²¹ Leyúbölö bë'ë didza' bönni' unná bë' na', rë' légaquië':

—¿Núzxilë' chopë' ni ré'ënili' usana'-në' queéli'?

Gula'nnë':

—Barrabás.

²² Ní'irö Pilato gunábinë' légaquië', rnnë':

—¿Nacxi guna' queë' Jesús, bönni' na' lë' Cristo?

Yúgu'të' ta'nné':

—¡Budé'ë lë'e yaga cruz!

²³ Ní'irö bönni' unná bë' na' rë' légaquië':

—¿Bizxi dö' benë'?

Zídzajrö gulu'ë didza', ta'nné':

—¡Budé'ë lë'e yaga cruz!

²⁴ Cate' réquibe'enë' Pilato biti' birúaj xtídzë'ë, pero gula'dzátsarö bönachi, ní'irö gudélë'ë nisa, en gudibi në'ë lógaquië', rnnë':

—Biti' bi xíguia' nabága'a neda' tu' nözi yöl-la' guti queë' bönni' tsahui' ni. Le gun cázali' libí'ili' lë' ni.

²⁵ Bulu'bí'i didza' yúgu'të bönachi ni', ta'nná:

—¡Yöl-la' guti queë' bönni' ni ibága'tu' netu', en ila'baga' ca' xzí'initu'!

²⁶ Ca' guca, Pilato busanë' Barrabás na' lu ná'agaquië'. Ní'irö gunná bé'enë' bönni' rójáquië' gudil-la ila'guínë' Jesús, ate' gudödi ni' budödë' Lë' lu ná'agaquië' para ulu'dé'ë Lë' lë'e yaga cruz.

²⁷ Yugu' bönni' rójáquië' gudil-la nacu'ë lu në'ë bönni' unná bë' na' gula'ché'ë Jesús lu yu'u yúlahui' nazí'i le pretorio, ate' ni' bulu'tubë' yúgu'të bönni' rójáquië' gudil-la nacu'ë ni' ga na' zoë' Jesús. ²⁸ Ní'irö gula'lecjë' lari' nácuë' Jesús, en bulu'gácuë' Lë' tu lari' xiná chul-la, ca rácu gaca nupa ta'nná bë'. ²⁹ Bulu'dxië' icjë' tu le néquini ni'a në'e yaga yötsi' le naca ca le dxia icjë' bönni' rinná bë'ë, en bulu'zóë' tu guído' lu në'ë ibëla le rulu'i ca tu yaga que bönni' yúlahui'. Ní'irö bulu'zóa zxi bë' lahuë', en bulu'titjë' Lë', ta'nné':

—¡Bica' ba Li', rinná bé'enu' bönachi judío!

³⁰ Ní'irö bulu'chejë' Lë' zxóna', ate' bulu'guélë'ë gui na', en gula'guínë' icjë'. ³¹ Gudödi bulu'titjë' Jesús, gula'lecjë' lari' na' nácuë', ate' bulu'gácuë' Lë' lari' que cazë'. Ní'irö gula'ché'ë Lë' para tsöjdá'agaquië' Lë' lë'e yaga cruz.

Tu'dé'ë Jesús lë'e yaga cruz

(Mr. 15:21-32; Lc. 23:26-43; Jn. 19:17-27)

³² Cate' ni' bila'rúajë' bönni' na', yöjxáca'gaquië' Simón, tu bönni' Cirene, ate' gulunë' ga bi'ë yaga cruz queë' Jesús.

³³ Cate' bila'dxinë' lataj nazí'i le Gólgota, le rnna lu didza' xidza', Lataj Que Böga' Ícjaru', ³⁴ bulu'guijë' Jesús nupi zi nutsí'i xígála'aba' böa' guixi'. Cate' buxí'i ru'ë Jesús, biti' gú'unnë' gu'jë'.

³⁵ Cate' chinudá'agaquië' Lë' lë'e yaga cruz, gula'guísië' lari' nácuë', en bulu'quitjë' lahui le gaca bë' núzxilë' guequi queë'. Caní guca, budxín lë' na' gunné' bönni' bë'ë didza' uláz queë' Dios, gunné': "Gula'guísië' lari' nácuë', en bulu'quitjë' lahui le gaca bë'." ³⁶ Ní'irö gula'bö'ë ni', tu'yúë' Jesús. ³⁷ Lësca' bulu'zóë' lë'e yaga cruz ícjalë' Jesús tu didza' le riguixjö' le nabáguë'ë le rnna caní: "Bönni' ni Jesús, Bönni' rinná bé'enë' bönachi judío."

³⁸ Ga ni' dé'ë Jesús, bulu'dé'ë ca' lé'egaca yaga cruz chopë' bönni' gubán. Tuë' bulu'dé'ë cuita lë'ë ibëla, en ia'túë' na' cuita lë'ë yógöla. ³⁹ Gula'dödë' ni' yugu' bönni' bulu'lidza zi'ë Jesús, en bulu'tá ícjagaquië', tu'titjë' Lë', ⁴⁰ ta'nné':

—¡Ön, Li' na' uquínnaju' yudo', ate' tsonna dzasö ca' uchísatso' le! ¡Busölá cuinu' na'a channö nacu' Li' Xzí'inë' Dios! ¡Bótjatsöca' lë'e yaga cruz na'!

⁴¹ Lësca' caní bulu'titjë' Lë' yugu' bixúz unná bë' len yugu' bönni' yudo' usedi, en yugu' bönni' yudo' fariseo, len bönni' gula tu'zéajni'inë', ta'nné':

⁴² —Yugu' nu yúbölö busölé' bönni' ni, pero biti' gaca usölá cuiné'. Channö náquié' Bönni' inná bé'ené' bönachi Israel, huótjatsöquié' na'a lè'e yaga cruz, ate' tséajlè'èru' Lè'.

⁴³ Lè' buzxöni ládxè'è Dios. Dios usölá cazè' Lè' na'a channö raza ládxè'è Lè', tu' gunné': "Zxí'iné' Dios naca'."

⁴⁴ Lësca' caní yugu' bönni' gubán na' dá'gaquié' lé'egaca yaga cruz ga ni' dè'è Jesús bulu'lidza zi'è Lè'.

Ratié' Jesús

(Mr. 15:33-41; Lc. 23:44-49; Jn. 19:28-30)

⁴⁵ Cate' bidxín huagubidza, guchul-la idútè yödzülió ga bidxintè idú ridödi xihuó.

⁴⁶ Idú ridödi xihuó na', bë'è zidzaj didza' Jesús, rnné':

—Elí, Elí, ¿lama sabactani?

Didza' ni rnná lu didza' xidza': "Dios quia', Dios quia', ¿bizx que nubéaj ládxu'u neda'?"

⁴⁷ Cate' nupa nacua' ni' bila'yöni didza' ni, ta'nná:

—Bönni' ni rulidzè' Elías, bönni' ni' bë'è didza' uláz queé' Dios.

⁴⁸ La' guxítitè' tué' bönni' nútsè'è ládjagaquié', en gudélè'è tu le bululu rizxupi nisa, ate' buxúpinè' le nupi zi, en buzóè' le tu lu gui, ate' butságuié' le ru'è Jesús para xupè'.

⁴⁹ Ní'irö ia'zica're' bönni' ni' ta'nné':

—¿Gulózagaro! ¿Uyútsöca'ru' channö huidè' Elías usölé' Lè'!

⁵⁰ Leyúbölö guródxí'è zidzaj Jesús, ate' burúajtè bö' naca cazè', gútité'. ⁵¹ La' ná'asö biróza'tè lari' nal-la' lu yudo', birúaj choplö, le gudela' icjlö ga bidxintè xiní'i. Ní'irö gudödi budó' zxu', en gula'lá'a guió'j. ⁵² Gula'yajal yeru ba quégaca nupa chinátigaca, nupa ni' gula'yéajlè' Dios, ate' bulu'bán bönachi na'. ⁵³ Gudödi bubané' Jesús, bulu'rúajé' bönni' na' yeru ba quégaquié', en gula'yázié' yödzo lá'ayi Jerusalén, ga ni' bila'lé'e bönachi zían légaquié'.

⁵⁴ Ní'irö gúdxiné' bönni' na' rinná bé'ené' bönni' rójáquié' gudil-la, enca' yugu' bönni' rójáquié' gudil-la nacua'lenè' lè' tu'yúé' Jesús, ate' gunné':

—Le nácatè bönni' ni guquié' Zxí'iné' Dios.

⁵⁵ Zí'tu'sö gula'cuá'anu nigula zían tu'yunu Jesús, nigula na' gula'dálennu Jesús cate' ni' buzé'è luyú Galilea, ate' gulunnu xichiné', gula'gú'unu le gulahué'. ⁵⁶ Lësca' María Magdalena, en María, xiná'agaquié' Jacobo, en José, nútsa'gacanu ládjagacanu, ate' zóanu ca' ni' xiná'agaquié' yugu' zxi'iné' Zebedeo.

Ta'gu'è Jesús yeru ba le nadaj lè'e guí'a guió'j

(Mr. 15:42-47; Lc. 23:50-56; Jn. 19:38-42)

⁵⁷ Cate' chiridzó' dza na', bidxiné' José, bönni' Arimatea, tu bönni' rilé'ené' yöl-la' tsahui' queé', en dè'è ca' Jesús. ⁵⁸ Bönni' ni yöjyúé' Pilato, en gunabè' lataj u'è Jesús. Ní'irö Pilato gunná bë'è ulu'nödzjé' queé' Jesús. ⁵⁹ Guzxi'è José Lè', en buchóliné' Lè' tu lari' nazaca'. ⁶⁰ Ní'irö gulu'è Lè' lu yeru ba cubi queé' le naguidjé' lè'e guí'a guió'j. Budé'è tu guió'j blaga zxon ga nu riyaza yeru ba na', ate' söhuó'jé'. ⁶¹ Gula'cuá'anu María Magdalena, en ia'tunu María ni', ró'gacanu ra' yeru ba na'.

Yugu' bönni' rójáquié' gudil-la tapa chi'è ba queé' Jesús

⁶² Cate' za' rení' ia'tú dza, gudödi bulu'pé'è que dza lá'ayi quégaquié' bönni' judío, bulu'dubé' yugu' bixúz unná bë', en yugu' bönni' yudo' fariseo ga zoé' Pilato. ⁶³ Tè' Pilato:

—Bönni', rójnetu' bi gunné' bönni' rizi' yé'è na', cate' ni' zoé' nabané', gunné': "Cate' gaca tsonna dza ubana' lu yöl-la' guti." ⁶⁴ Que lè' ni na' gunná be'e nupa ilún chi'i ba ni' ga idxintè dza bunny, para cabí ídigaquié' bönni' uséda queé' chi'i dzó'ölö, en ulu'béajé' Lè'. Ní'irö ilé' bönachi: "Bubané' Jesús lu yöl-la' guti." Channö caní gaca, didza' cabí nácatè ni ilu'è gúntèrö huiá' dö' ca ben didza' cabí nácatè na' gulu'è zí'alö.

⁶⁵ Pilato gudxè' légaquié':

—Ni nacu'ë bönni' röjáquië' gudil-la. Guli'ché'ë queéli'. Guli'tséaj, guli'gún chi'i yeru ba na' tsca séqui'li' gunli'.

⁶⁶ Ní'irö yójáquië' ni', en bulu'sayjé' dxi'a yeru ba na', en bulu'dé'ë lé'e guió'j na' tu le gaca bé' channö isalaj, ate' bulu'cá'ané' ni' bönni' röjáquië' gudil-la ilún chi'ë le.

28

Rubanë' Jesús lu yöl-la' guti

(Mr. 16:1-8; Lc. 24:1-12; Jn. 20:1-10)

¹ Cate' chigudödi dza lá'ayi quégaquië' bönni' judío, en chizá' rení' dza domingo, yöjyúgacanu María Magdalena en ia'tunu María na' yeru ba queë' Jesús. ² Tsárido'os gudödi budó' zxu'. Caní guca, tu' bö'tjé' tué' gubáz lá'ayi queë' Xanru' narúajé' yehua' yubá. Bidxiné' ra' yeru ba na', ate' gudúé' guió'j blaga zxön na', en gurö'ë lu guió'j na'. ³ Nalá' lahui gubáz lá'ayi na' ca yösa bení', ate' zxíla'do'os naca lari' nácué'. ⁴ Cate' yugu' bönni' na' röjáquië' gudil-la tapa chi'ë yeru ba na' bila'lé'ené' lé', guládxiné', en gula'zxízié'. Gula'dzö'ë lu yu, en guláquië' ca bönni' nati caz. ⁵ Ní'irö gubáz lá'ayi na' gudxé' yugu' nigula na', rnné':

—Biti' gádxili'. Nözda' rugufljali'-né' Jesús, bönni' na' bulu'dé'ë lé'e yaga cruz. ⁶ Biti' zoé' ni tu' chibubané' ca na' chigunná cazé' Lë'. Guli'dá, uyuli' ga ni' guté' Xanru'. ⁷ Guli'tséaj na'a, guli'tsöjdxixi yugu' bönni' uséda queë' chibubané' Jesús lu yöl-la' guti, ate' na'a Lë cazé' inórué' loli' saca' luyú Galilea. Ni' ulé'eli'-né'. Chigudxa' libí'ili' le gulu'ë Dios lu na'a.

⁸ Ní'irö la' bulu'zá'tënu ra' yeru ba na', tádxinu, en tu'dzéjanu, ate' carelö söjácacu söjtíxjöi'iguequinu yugu' bönni' uséda queë'. ⁹ Tsanni ni' söjácacu, Jesús yöjtságuië' légacanu, ate' ré' légacanu:

—Padiux.

Ní'irö gula'bíga'nu ga zoé' Jesús, en bulu'nída'nu ni'ë. Gula'yéaj ládxi'gacanu Lë'. ¹⁰ Ní'irö Jesús ré' légacanu:

—Biti' gádxili'. Guli'tséaj, guli'tsöjtíxjöi'i yugu' bócha'a tsöjáquië' saca' luyú Galilea, ate' ni' ulu'lé'ené' neda'.

Le gula'guíxjö'ë yugu' bönni' röjáquië' gudil-la

¹¹ Tsanni ni' söjácacu nigula na', yugu' bönni' na' röjáquië' gudil-la gulún chi'ë yeru ba na' bulu'dxiné' lu yödzö ni', ate' gula'guíxjöi'iné' yugu' bixúz unná bé' yúgu'té lé na' gulaca. ¹² Cate' chibulu'tubé' yugu' bönni' gula tu' zéajni'iné', gulún xtídza'gaquië'. Ní'irö bulu'nödzjé' dumí zían quégaquië' bönni' na' röjáquië' gudil-la. ¹³ Té' légaquië':

—Caní innali': "Bila'dxiné' bönni' uséda queë' chi'i dzó'ölö, en bulu'béajé' Lë' tsanni ni' rásitu'." ¹⁴ Channö huayönné' bönni' rinná bé'ë lé ni, netu' uzéajni'itu' lé', en guntu' ga biti' bi guné' queéli'.

¹⁵ Ní'irö yugu' bönni' röjáquië' gudil-la na' gula'zi'ë dumí na' ate' yöjéngaquië' ca na' chinazédagaquië'. Caní guca, tu' zé' bönni' judío didza' ni ga ridxinté na'a dza.

Jesús risól-lé'ë yugu' bönni' gubáz queë'

(Mr. 16:14-18; Lc. 24:36-49; Jn. 20:19-23)

¹⁶ Ní'irö idxinéajté' bönni' uséda queë' Jesús yöjáquië' luyú Galilea, ate' bila'dxiné' lu guí'ado' na' chibulu'iné' Jesús légaquië'. ¹⁷ Cate' bulu'lé'ené' Jesús, gula'yéaj ládxi'-gaquië' Lë', pero bal-lé' gulaca chopa ládxi'gaquië'. ¹⁸ Ní'irö gubígui'ë Jesús ga na' nacu'ë, en ré' légaquië':

—Dios chinudödé' lu na'a yúgu'té yöl-la' unná bé' yehua' yubá, en luyú ni. ¹⁹ Que lé ni na', guli'tséaj, guli'tsöjsédi yúgu'té bönachi idúté yödzölió. Buli'quíla légaquië' nisa, ugunli' dxin Lë' Dios Xuz, en Lë' Dios Zxí'ini, en Lë' Dios Bö' Lá'ayi. ²⁰ Guli'sédi légaquië' iluné' yúgu'té lé na' gunná bé'eda' libí'ili'. Buli'yútsöca', neda' caz zóalena' libí'ili' yúgu'té dza ga idxinrö dza údxi que yödzölió. Ca' gaca.

DIDZA' DXI'A BUZÚAJĚ' MARCOS

Libán beně' Juan, bönni' buquile' bönachi nisa

(Mt. 3:1-12; Lc. 3:1-9, 15-17; Jn. 1:19-28)

¹ Caní gusí lo didza' dxi'a ca guca quee' Jesucristo, Zxí'iné' Dios.

² Budxín lě na' buzúajě' lu guichi Isaías, bönni' bē'ē didza' uláz quee' Dios, le gunné' Dios:

Buyútsöca', risól-la'a bönni' gubáz quia', inóruē' Lo'.

Lě' upé'ē nōza ga tödu'.

³ Yōn chi'ē tu bönni' ulidzě' zidzaj lu lataj cá'asö, inné':

“Bulí'pá'a nōza para idxín Xanru' yichaj lázxdó'oli'.

Bulí'béaj li yugu' nōza lasi ga tödē'.”

⁴ Caní budxín, tu' ruquile' Juan bönachi nisa lu lataj cá'asö, en runě' libán para ila'dila bönachi nisa, bönni' na' bulu'bí'i lādxi'gaquie' para uniti lahuē' Dios dul-la' nabága'gaquie'. ⁵ Bila'rúaj bönachi zían yúgu'tě yōdzö luyú Judea, enca' yōdzö Jerusalén, en yōjáquie' ga na' zoē' Juan, ate' Juan na' buquile' légaquie' nisa lu yegu Jordán, bönni' na' gula'xóalēpē' dul-la' nabága'gaquie'.

⁶ Nácue' Juan lari' néquini lítsa'ba' böa', en núguē'ē lē'ē tu guídi. Rahuē'-ba' bóchi'zu, en re'jě' le zxixi que buzdo'. ⁷ Runě' Juan libán, rnně':

—Sí' zē'ē bönni' tōdi na'a, náparē' yöl-la' unná bē' ca neda'. Biti' naca' neda' lesaca' yéchua', para ilecja' xiráchuē' nudé'ē. ⁸ Neda' ruquila' libí'ili' nisa, pero Lě' guně' le rulu'isö yöl-la' ridila nisa ni, uchíziē' libí'ili' Dios Bö' Lá'ayi.

Ridilē' Jesús nisa

(Mt. 3:13-17; Lc. 3:21-22)

⁹ Tu dza ni' birúajě' Jesús yōdzö Nazaret luyú Galilea, ate' Juan na' buquile' Lě' nisa lu yegu Jordán. ¹⁰ Cate' burúajě' Jesús lu nisa, la' ná'asö bilé'eně' gualaj lúzxiba, en ruhuōtjě' Dios Bö' Lá'ayi, rulu'i cuiné' ca tuba' gu'dōdo', en bidisóalenē' Lě'. ¹¹ Biyón chi'i nu ru'i didza' yehua' yubá, rnna:

—Li' nacu' Zxí'ina'. Nadxí'ida' Li', en raza lādxa'a Li'.

Rě'ēni tu' xihui' gun ga ibáguē'ē Jesús dul-la'

(Mt. 4:1-11; Lc. 4:1-13)

¹² Ní'irö Dios Bö' Lá'ayi guché'ē Jesús bayudxi lu lataj cá'asö. ¹³ Guzōē' Jesús lataj cá'asö na' idú choá' dza, ate' gú'uni Satanás tu' xihui' gun ga ibáguē'ē Jesús dul-la'. Guzōē' Jesús ga ni' ta'daba' böa' guixi' dzó'ōba' gu'ado'. Yugu' gubáz lá'ayi quee' Dios gulácalenē' Jesús, en gula'gu'ē le gudahuē'.

Rusédinē' Jesús bönachi luyú Galilea

(Mt. 4:12-17; Lc. 4:14-15)

¹⁴ Gudōdi gula'gu'ē Juan na' lidxi guíē, sa'yéajě' Jesús luyú Galilea. Runě' libán ni' que didza' dxi'a ca rinná bē'ē Dios. ¹⁵ Caní rnně':

—Chibidxín dza. Chizóa idinná bē'ē Dios. Bulí'bí'i lādxi'li', en guli'tséajlě' didza' dxi'a ni.

Rulidzě' Jesús tapē' bönni' uzxón böla

(Mt. 4:18-22; Lc. 5:1-11)

¹⁶ Tsanni ni' ridě' Jesús ra' nísado' luyú Galilea, bilé'eně' Simón len Andrés, bönni' bóchē'ē Simón na'. Nácagaquie' uzxón böla, en ta'chiljě' yōxaj böla quégaquie' lu nisa na'. ¹⁷ Jesús gudxě' légaquie', rnně':

—Guli'dutá' neda', ate' guna' ga iché'éli' bönachi quia' neda', gunli' ca runli' rizönli'-ba' böla.

¹⁸ La' bulu'cá'anatë' yöxaj quégaquië', en söjácalenë' Jesús.

¹⁹ Gudödë' Jesús ia'láti'do' ní'ilö, ate' bilé'enë' Jacobo, en Juan, yugu' xzí'inë' Zebedeo, nacu'ë lë'e bárcodo' quégaquië', tu'únë' yöxaj böla quégaquië'. ²⁰ Jesús la' bulidztë' légaquië', ate' bulu'cá'anë' xúzgaquië' Zebedeo, dzáguië' yugu' huen dxin queë' lë'e bárcodo' na', ate' söjácalenë' Jesús.

Tu bönni' yu'u lë' bö' xihui'

(Lc. 4:31-37)

²¹ Bila'dxinë' Jesús, en yugu' bönni' dá'gaquië' Lë' lu yödzö Capernaum. Cate' ni' naca dza lá'ayi quégaquië' bönni' judío, guyázië' Jesús yu'u ga tu'dubë' bönni' judío, en tu'sëdë' queë' Dios, ate' gusi'lahuë' rusédinë' nupa nudúbigaca ni'. ²² Bulu'báinë' ca na' rusédinë' Jesús, tu' rusédinë' ca runë' tu bönni' dë lu në'ë, en calëga ca tunë' bönni' yudo' usëdi. ²³ Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' guródxi'ë bönni' na', rnnë':

²⁴ —¿Bizxi rál-la'tu' quiu', Jesús, bönni' Nazaret? ¿Za'tsu' usunítu' netu'? Núnbë'a Li', nacu' Bönni' Lá'ayi queë' Dios.

²⁵ Jesús buzenë' le bach, rnnë':

—Busayaj ru'u, en burúaj lu bönni' ni.

²⁶ Ní'irö bö' xihui' na' buxízida' bönni' na' yu'u lë', ate' guródxi'a zidzaj, en la' burúajtë.

²⁷ Bulu'báinë' yúgu'të bönni' nacu'ë ni', ate' gula'nabi luzé'egaquië', ta'nnë':

—¿Bizxi caz lë ni? ¿Naru' nácatsö xibá cubi? ¿Len yöl-la' unná bë' rinná bë'enë' yugu' bö' xihui', ate' tun ca rnnë'!

²⁸ La' guzëtë didza' que yöl-la' huáca queë' Jesús, ate' bila'yöni bönachi idútë luyú Galilea na'.

Ruúnë' Jesús xiná'anu nigula queë' Pedro

(Mt. 8:14-15; Lc. 4:38-39)

²⁹ Ní'irö burúajë' Jesús lu yu'u ga na' tu'dubë' tu'sëdë' queë' Dios, en la' guyéajlentë' Jacobo, en Juan, ate' bila'dxinë' lídxigaquië' Simón, en Andrés. ³⁰ Ní' dënu xiná'anu nigula queë' Pedro, yú'unu tu xilá. La' gula'guíxjöi'itenë' Jesús ca raca queënu. ³¹ Ní'irö gubígui'ë Jesús, ate' gudélë'ë ná'anu, en guchisë'-nu. La' burúajtë tu xilá na' yú'unu, ate' bupá'anu le gulahuë'.

Ruúnë' Jesús zían nupa te'e

(Mt. 8:16-17; Lc. 4:40-41)

³² Cate' chiridzó', ca gudxía gubidza, la' dujuá'gacatë' yúgu'të nupa te'e, en yugu' bönni' yu'u légaquië' bö' xihui' ga zoë' Jesús. ³³ Yúgu'të bönachi lu yödzö bila'guírö ga nu riyaza yu'u ga na' zoë' Jesús. ³⁴ Jesús bunë' zían nupa te'e, naca zían yödzöhuë' té'enë'. Bubéajë' ca' zían bö' xihui' yú'ugaca bönachi na'. Biti' bë'ë lataj ila'nnë' bö' xihui' na' tu' núnbë'gaca Lë' Nu náquië'.

Runë' libán Jesús luyú Galilea

(Lc. 4:42-44)

³⁵ Zí'acado' guyasë' Jesús, ni' naca chul-la. Burúajë' yödzö na', en sa'yéajë' tu lataj cá'asö, ate' ni' bulidzë' Dios. ³⁶ Simón, en nupa nacua'len lë' söjdíljagaquië' Jesús. ³⁷ Cate' yöjxáca'gaquië' Lë', të' Lë':

—Yúgu'të bönachi tu'guílaj Li'.

³⁸ Ní'irö Jesús gudxë' légaquië', rnnë':

—Uyéajru' yugu' dzaga yödzö, para guna' ca' libán ni'. Que lë ni na' birúaja'.

³⁹ Caní guca, gudödë' Jesús idú luyú Galilea, runë' libán lu yu'u gapa tu'dubë' bönni' judío, tu'sédinë' queë' Dios, ate' rubéajë' bö' xihui' yú'ugaca bönachi.

Tu bönni' ré'enë' huë' nudzu' ruzödi
(Mt. 8:1-4; Lc. 5:12-16)

⁴⁰ Tu bönni' ré'enë' huë' nudzu' ruzödi bidxinë' ga zoë' Jesús. Buzóa zxibë', en gúta'yuë' lahuë', rnnë':

—Channö ré'ënu', huáca unu' neda'.

⁴¹ Jesús buéchi' ládxë'ë lë'. Bulí në'ë, gudanë' lë', en gudxë' lë':

—Ré'ënda'. Chinuhuóacu'.

⁴² Ca gunné' ca', la' bunítitë huë' ré'enë', en böáquië' dxí'ado'. ⁴³ Ní'irö Jesús buzenë' bach bönni' na', en la' busól-la'të' lë'. ⁴⁴ Caní gudxë' lë':

—Cuntu nu guío' ca bena' quiu', pero guyéaj, yöjluí'i cuinu' lahuë' bixúz, en yöjnödzej para le böácanu' li' que yudo' ca na' gunná bë'ë Moisés, lë na' uluí'i bönachi chinuhuóacu'.

⁴⁵ Burúajë' bönni' ni, en gusí lahuë' riguíxjöi'inë' bönachi zían ca guca queë'. Tu' buzë' didza' ni, bíti'rö guca tsázië' Jesús yálajdo' tu lu yödzö, pero guzóasë' ní'ilo gapa naca lu lataj cá'asö. Bönachi yúgu'të yödzö bila'dxín ga na' zoë' Jesús.

2

Bönni' ré'enë' huë' nacú'unië' bin
(Mt. 9:1-8; Lc. 5:17-26)

¹ Cate' chigudödi chopa tsonna dza, buázië' Jesús yödzö Capernaum, ate' guzé didza' zoë' yu'u. ² La' bulu'dúbitë bönachi zían ga na' zoë' Jesús, ga bidxintë bíti'rö guzxequí' ila'cuá' ni', ni ra' yu'u, ate' Jesús benë' libán que xtídzë'ë lógaquië'. ³ Ní'irö bila'dxinë' ga na' zoë' Jesús tapë' bönni', nuá'agaquië' tu bönni' huë' nacú'unië' bin. ⁴ Biti' guca ila'dxinë' lahuë' Jesús tu' nacuá' bönachi zían ni'. Que lë ni na' gula'saljë' ícjo'olö ca dódilö ga zoë' Jesús. Cate' budxi bulu'dxíë' yeru na', ni' bulu'zötjë' le denë' bönni' huë' na'.

⁵ Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Zxí'ina', chibunít lahua' li' ca naca dul-la' nabágu'u.

⁶ Ró'ógaquië' bal-lë' bönni' yudo' usedi ni'. Ta'zá' ládxí'gaquië', ta'nnë': ⁷ ¿Bizx que ru'ë caní didza' bönni' ni? Rucá'anë' cá'asö Dios. Cuntu nu bönni' gaca uniti lahuë' dul-la'. Tuzë' Dios gaca gunë' lë ni. ⁸ La' gúquibe'etenë' Jesús le ta'zá' ládxí'gaquië', ate' gudxë' légaquië':

—¿Bizx que rizá' ládxí'li' caní? ⁹ Biti' naca böniga nu guiésö bönni' huë' ni chibuníti lo dul-la' nabáguë'ë, pero naca böniga nu gun ga huóásë', en u'ë le denë', en uzë'e ni'ë.

¹⁰ Guna' le gaca bë' neda', Bönni' Guljë' Bönachi, dë lu na'a luyú ni uniti lahua' dul-la' nabága'gaca bönachi.

Ní'irö Jesús gudxë' bönni' huë' na':

¹¹ —Li' rea': Guyasa. Buá' le denu', en böaj lidxu'.

¹² La' guyásatë' bönni' huë' na', bu'ë le gúti'në', en burúajë' lógaca yúgu'të nupa nacuá' ni'. Bulu'bánninë' yúgu'të, en gula'gu'ë Dios yöl-la' ba, ta'nnë':

—Catu caz rilé'etu' le caní.

Jesús rulidzë' Leví
(Mt. 9:9-13; Lc. 5:27-32)

¹³ Burúajë' Jesús yödzö Capernaum, na' gudödë' leyúbölö ra' nísado'. Bulu'dubi bönachi zían ga zoë' Jesús, ate' Lë' busédinë' légaquië'. ¹⁴ Cate' ridödë' Jesús ni', bilé'enë' Leví, zxí'inë' Alfeo, rö'ë ga ruquíxjë' uláz que yödzö zi'tu'. Jesús gudxë' lë':

—Gudá' neda'.

La' guyásatë' Leví na', sa'yéajlenë' Jesús.

¹⁵ Gudödi guca lë ni, rö'ë Jesús rahuë' lu yu'u lidxë' Leví na', ate' zían bönni' uquíxaj, en ia'bal-lë' bönni' cá'asö ró'ölengaquië' tsözxón Jesús, en yugu' bönni' usëda queë'. Caní guca, tu' rójaca bönachi zían len Jesús. ¹⁶ Cate' yugu' bönni' yudo' usedi, en yugu' bönni' yudo' fariseo, bila'lé'enë' Lë' rö'ë rágulenë' tsözxón yugu' bönni' uquíxaj, en ia'bal-lë' bönni' cá'asö, gulé' yugu' bönni' usëda queë' Jesús, ta'nnë':

—¿Bizxi caz runtsë'? ¿Rë'aj rágulentse' yugu' bönni' uquíxzaj, en ia'bal-lë' bönni' dul-la'!

¹⁷ *Biyönnë' Jesús didza' ni tu'ë, en gudxë' légaquië':*

—Nupa nacua' dxi'a bití' naquíniguequi nu un bönachi, pero nupa te'e naquíniguequi nu un bönachi. Za'a neda', calëga dulídzagaca' bönachi tsahui', pero rulídzagaca' bönachi dul-la' para ulu'bí'i ládxi'gaca.

Ru'ë Jesús didza' que yöl-la' run gubasa

(Mt. 9:14-17; Lc. 5:33-39)

¹⁸ Tu dza ni' tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bila'dxín nupa gula'nabi Jesús, ta'nná:

—¿Bizx que tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, pero bönni' dá'gaquië' Li' bití' tunë' gubasa?

¹⁹ *Bubi'ë didza' Jesús, rë' légaquië':*

—¿Naru' réquitseli' ilún gubasa nupa nacua' laní queë' bönni' rutsaga në'ë tsanni ni' bönni' na' rutsaga në'ë zóalenë' légaquië'? Tsanni ni' bönni' na' rutsaga në'ë zóalenë' légaquië', bití' gaca ilunë' gubasa. ²⁰ Idxín dza cate' udúë' bönni' na' rutsaga në'ë, en bíti' rō sóalenë' légaquië', ate' dza ní'irō ilunë' gubasa.

²¹ 'Cuntu nu bönni' udé'ë tu lari' cúbido' lu lari' chinatëbi, tu' utsupi' lari' cubi na', en huachöza' lari' tēbi na', ate' huaróza'rō lari' tēbi na'. ²² Lësca' caní cuntu nu bönni' quë'ë xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

Bönni' dá'gaquië' Jesús ta'lecjë' do dza lá'ayi

(Mt. 12:1-8; Lc. 6:1-5)

²³ Tu dza lá'ayi quégaquië' bönni' judío, gudödë' Jesús gapa dë yöla xzoa' xtila, ate' bönni' usëda queë' gula'sí lógaquië' ta'lecjë' do ga dxía xzoa' xtila. ²⁴ Ní'irō bönni' yudo' fariseo gulé' Jesús, ta'nné':

—Buyútsöca'. ¿Bizx que tunë' bönni' dá'gaquië' Li' le cabí ral-la' gunru' dza lá'ayi?

²⁵ *Jesús gudxë' légaquië':*

—¿Naru' cabí nulábanili' ca benë' David cate' gudunë'? Biyadzaj le ilahuë' lë', en nupa nacua'len lë' ²⁶ ate' guyázië' lu yu'u queë' Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Dios, lë na' bití' dë lataj nu gagu, pero tuz bixúz dë lataj ilahuë' le. Bë'ë ca' le ilahuë' bönni' nacua'lenë' lë'.

²⁷ *Ní'irō Jesús gudxë' légaquië':*

—Dios benë' dza lá'ayi le ulu'zí' xibé bönachi, calëga benë' bönachi para ilún chi'i dza lá'ayi. ²⁸ Que lë ni na', neda', Bönni' Guljë' Bönachi, naca' Xani dza lá'ayi.

3

Ruúnë' Jesús tu bönni' narequi' në'ë

(Mt. 12:9-14; Lc. 6:6-11)

¹ Leyúbölö guyu'ë Jesús tu lu yu'u ga tu'dubë' tu'sëdë' bönni' judío queë' Dios, ate' zoë' ca' ni' tu bönni' narequi' në'ë. ² Bönni' yudo' nacu'ë ni' tu'yúë' Jesús channö únë' bönni' na' dza lá'ayi, tu' té'ënnë' ulu'zégui'ë Lë' didza'. ³ Ní'irō Jesús gudxë' bönni' na' narequi' në'ë, rnnë':

—Guyasa, en guzuí lógaca bönachi ni.

⁴ *Jesús gunábinë' bönachi ni, rnnë':*

—¿Naru' dë lataj gunru' le naca dxi'a cate' naca dza lá'ayi o gunru' le ruá' dö'? ¿Naru' dë lataj gunru' ga ila'deli' bönachi yöl-la' na'bán o usunítiru' le?

Gula'cuá' dxisö bönachi ni'. ⁵ Ní'irō len yöla-rilë queë', buyúë' Jesús bönachi na' nacua' gásibi'ilë'. Ruhuí'innë' tu' nácagaquië' zidi ladxi'. Gudxë' bönni' na' narequi' në'ë, rnnë':

—Bulí no' o.

Ní'irö bulí nē'ë bönni' na', ate' böacatē dxí'ado' nē'ë. ⁶ Ní'irö bulu'rúajē' bönni' yudo' fariseo, ate' la' guluntē' tsözxón didza' len bönni' dá'gaquiē' Herodes bi ilunē' queē' Jesús, para ilútiē' Lē'.

Tu'dubi bönachi zían ra' nísado'

⁷ Buzé'ë Jesús ni' tsözxón len bönni' dá'gaquiē' Lē', en bidxinē' ra' nísado', ate' sójácalen Lē' bönachi zían narúajgaca luyú Galilea, en luyú Judea. ⁸ Bönachi zían narúajgaca Jerusalén, en luyú Idumea, en ia'tsölá'a yegu Jordán, en yugu' yödzö nacua' idú gásibi'ilö ga nacua' yödzö Tiro, en yödzö Sidón bila'dxín ca' ga zoē' Jesús. Caní gulunē', tu' bila'yönnē' ca nácagaca yugu' le zxón runē' Jesús. ⁹ Que lē ni na' Jesús gunná bé'enē' bönni' dá'gaquiē' Lē' ulu'cörtica'sē' tu bárcodo' ga gaca cuenē', para cabí ulu'quí bönachi zían na' Lē'. ¹⁰ Caní guca tu' chibunē' zían nupa te'e, ate' bila'guirö bönachi zían na' ga zoē' para ila'gán Lē'. ¹¹ Cate' bö' xihui' yú'ugaca bönachi bila'lē'e Jesús, bulu'dxiga' bönachi na' yú'ugaca xini'ë Jesús, ate' gula'bódxí'a, ta'nná:

—Nacu' Lí' Zxí'inē' Dios.

¹² Jesús buzenē' le bach bö' xihui' na', cabí ila'guixjö' nu náquiē' Lē'.

Ribóē' Jesús chinnu bönni' ilácagaquiē' gubáz queē'

(Mt. 10:1-4; Lc. 6:12-16)

¹³ Ní'irö gurenē' Jesús tu lu guí'ado', ga ni' bulidzē' nupa ré'ënē'. Gula'biguē'ë bönni' ni gásibi'ilē'. ¹⁴ Jesús bucu'ë chínnuē' bönni' ni, para ila'cuá'lenē' Lē', en para isól-lē'ë légaquiē' tsójéngaquiē' libán. ¹⁵ Budödē' lu ná'agaquiē' yöl-la' huáca ulu'únē' nupa te'e, en ulu'béajē' bö' xihui' yú'ugaca bönachi. ¹⁶ Caní nácagaca lágaquiē':

Simón, (buzóē' Jesús ia'tú lē', Pedro),

¹⁷ Jacobo,

Juan, (bönni' bóchē'ë Jacobo, ate' nácagaquiē' zxí'inē' Zebedeo. Chopē' ni, Jesús buzóē' ia'tú lágaquiē', Boanerges, le rnna lu didza' xidza': Bönni' sínia' ca guziú'),

¹⁸ Andrés, Felipe, Bartolomé, Mateo, Tomás,

Jacobo, (zxí'inē' Alfeo),

Tadeo,

Simón, (bönni' ru'í ládxe'ë yödzö queē'),

¹⁹ Judas Iscariote, (bönni' udödē' Jesús lu ná'agaquiē' bönni' ilútiē' Lē').

Yugu' bönni' yudo' ta'nnē': "Tu' xihui' dzaga Jesús"

(Mt. 12:22-32; Lc. 11:14-23; 12:10)

Gudödi ni' Jesús len bönni' dá'gaquiē' Lē' bulu'dxinē' tu lu yu'u. ²⁰ Leyúbölö bila'guirö bönachi zían ga zoē' Jesús, ate' bití'rö guta' lataj bi ilahuē' Jesús, en bönni' na' dá'gaquiē' Lē'. ²¹ Cate' dí'a dza queē' Jesús bila'yönnē' ca raca queē', bila'dxinē' ni' para ulu'ché'ë Lē', ta'nnē': Richixi icjē'.

²² Lēscá' caní bönni' yudo' usedi, narúajgaquiē' Jerusalén gula'nnē' queē', ta'nnē':

—Dzaga Belzebú, xángaca bö' xihui' Lē', ate' len yöl-la' unná bé' que rubéajē' yugu' bö' xihui'.

²³ Ní'irö Jesús bulidzē' yugu' bönni' yudo' usedi na', en bucúdzu'ë didza', rnnē':

—¿Naru' ubéaj la' cuinsi Satanás tu' xihui'? ²⁴ Channö ila'rúaj choplö bönachi tu yödzö, en ila'díl-lalen luzé'eguequi, bití' gaca idía' yödzö na'. ²⁵ Lēscá' caní channö ila'rúaj choplö bönachi nacua' tu yu'u, en ila'díl-lalen luzé'eguequi, bití' gaca ila'día' bönachi nacua' yu'u na'. ²⁶ Que lē ni na', channö Satanás tu' xihui' tá'baga' luzé'e, narúajgaca choplö bö' xihui'. Bití' gaca idía' yöl-la' unná bé' que, pero chizóa údxi que.

²⁷ Cuntu nu gaca tsu'u lidxē' tu bönni' nál-la, en cuéaj yöl-la' tsahui' queē' channö cabí gaga' z'älö bönni' nál-la na', ate' ní'irö sequi' cuéaj le dzö'ö lidxē'.

²⁸ 'Le nácatë rea' libí'ili': Dios gaca uniti lahuë' bönachi ca naca yúgu'të dul-la' nabága'gaca, en ca naca yúgu'të didza' schanni' ta'nná, ²⁹ pero núti'tës nu inné schanni' queë' Dios Bö' Lá'ayi, catu caz uniti lahuë' Dios nu na'. Tsaz nabaga' xíguia' nu na'.

³⁰ Caní gunné' Jesús tu' ta'nné' queë' bönni' yudo' usedi na', ta'nné':
—Tu' xihui' dzaga Lë'.

Nu naca xiné'ë Jesús, en bönni' bóché'ë
(Mt. 12:46-50; Lc. 8:19-21)

³¹ Ní'irö bila'dxiné' yugu' bönni' bóché'ë Jesús, enca' xiné'ë ga zoë'. Gula'cu'ë ló'alö, en gula'sól-lë'ë nu tsöjlidza Jesús. ³² Bönachi zían na' ró'gaca cuitë' Jesús gulé' Lë', ta'nná:

—Yugu' bönni' bóchu'u, enca' xinó'o nacu'ë ló'alö, tu'lidzë' Li'.

³³ Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' bócha'a?

³⁴ Ní'irö buyúé' nupa na' ró'gaca gásibi'ilë', rnnë':

—Buli'yútsöca'. Nupa ni nácgaca ca xiná'a, en yugu' bönni' bócha'a. ³⁵ Nu run ca ré'ënë' Dios, nu ni naca ca bi'i bócha'a, en bi'i zana' enca' xiná'a.

4

Rucúdzü'ë didza' Jesús ca naca queë' bönni' guz
(Mt. 13:1-9; Lc. 8:4-8)

¹ Leyúbölö gusí lahuë' Jesús rusédiné' bönachi ga naca ra' nísado'. Bulu'dubi bönachi zían ga zoë', ate' gurenë' Jesús tu lë'e bárcodo' zxoá lu nisa na', en gurö'ë ni', ate' yúgu'të bönachi na' gula'cuá' luyú ra' nisa na'. ² Zían le busédiné' Jesús légaquië', bucúdzü'ë didza'. Tsanni ni' rusédiné' légaquië', rnnë':

³ —Gulí'zé nágali' didza' ni. Birúajë' tu bönni' guz, söjësië' xisedo'. ⁴ Tsanni ni' rúsië', gulasi bal-la xisedo' na' ra' nöza, ate' bila'dxinba' biguínido', gulé'ajba' le. ⁵ Gulasi ia'bal-la xisedo' na' ga rö'ö guiój ga bití' rö'ö yenni' yu. Bayón gula'lén xisedo' na' tu' cabí rö'ö yenni' yu. ⁶ Ní'irö cate' gulén gubidza, buquexu' le, ate' gubidxi, tu' cabí nun luí ga rë'. ⁷ Gulasi ia'bal-la xisedo' na' ga tu'lén lubá yötsi'. Cate' gula'lén xisedo' na', bulu'lén ca' lubá yötsi' na', en gula'röli le, ate' lë na' bësië' bití' bi bunödzej. ⁸ Gulasi ia'bal-la xisedo' na' ga naca luyú bëbu, ate' gula'zxón, en xitsá' ra' gula'bó'. Bulu'nödzej lë na' bësië'. Tu dxigu' xisedo' na' bësië' bunödzej ia'chí uruá' xisedo' ca'. Ia'tú bunödzej ia'tsónnalalaj ca', ate' ia'tú na' bunödzej ia'tú gayuá' ca'.

⁹ Ní'irö Jesús gudxë' légaquië', rnnë':

—Nu zoa nagui, en riyöni ral-la' uzé nagui.

Riguíxjö'ë Jesús bizx que rucúdzü'ë didza'
(Mt. 13:10-17; Lc. 8:9-10)

¹⁰ Cate' chibugá'anë' tuzë' Jesús, bila'dxín nupa dá'gaca Lë' ga zoë', núngaca tsözxón idxínnutë' bönni' uséda queë', ate' gula'nábinë' Lë' bi sa'yéaj lë na' bucúdzü'ë didza'.

¹¹ Jesús gudxë' légaquië', rnnë':

—Libí'ili' nadéli'li' tséajni'ili' le nagachi' ca rinná'bë'ë Dios, pero nupa na' bití' nácgaca tuz len rë'u, ruí'lena' légaquië' didza' yugu' le rucúdzü'a didza'. ¹² Caní runa' para gaca lë na' nazúaj lu guichi lá'ayi, rnna:

Ulu'yúë', en bití' ila'lé'enë'.

Ulu'zé nágagaquië', en bití' ila'yéajni'inë'.

Bití' ulu'bi'i ládxi'gaquië' para gaca uniti lahua' légaquië' ca naca dul-la' nabága'gaquië'.

Riguíxjö'ë' Jesús le bucúdzü'ë didza'
(Mt. 13:18-23; Lc. 8:11-15)

¹³ Jesús gudxë' ca' yugu' bönni' dá'gaquië' Lë', rnnë':

—¿Naru' cabí réajni'itseli' lë na' bucúdz'u' didza'? ¿Nacxi caz gaca tséajni'ili' ia'zica'rö le ucúdz'u' didza'? ¹⁴ Bönni' guz na' náquië' nu ruzé xtídzë'ë Dios.

¹⁵ 'Nácagaca bal-la bönachi ca xisedo' na' gulasi ra' nöza. Ta'yönnë' xtídzë'ë Dios, en ca ta'yónisinë' ca', la' za'të Satanás tu' xihui', en rigúa didza' na' bidxín lu icja ládxi'do'gaquië'.

¹⁶ 'Nácagaca ia'bal-la bönachi ca xisedo' na' gulasi ga rö'ö guió'j. Ta'yönnë' didza' na', ate' len yöl-la' rudzeja quégaquië' ta'zi'ë le. ¹⁷ Biti' riyaza icja ládxi'do'gaquië', ate' tu chí'isö ta'dé'ë le. Cate' bi raca quégaquië', o zoa nu ribía ladxi' légaquië' tu' ta'dé'ë didza' na', la' tu'huóatë ládxi'gaquië'.

¹⁸ 'Nácagaca ia'bal-la bönachi ca xisedo' na' gulasi ga na' tu'lén lubá yötsi'. Ta'yönnë' didza' na', ¹⁹ pero tuí'i ládxi'gaquië' le nácagaca que yödzölió ni. Nazi' yé'eguequinë' tu' nadxí'iguequinë' yugu' yöl-la' tsahui', en ta'zé ládxi'gaquië' yugu' le dë. Ta'yaza icja ládxi'do'gaquië' yúgu'të lë ni, en tu'suniti didza' na', para cabí gun dxin lu icja ládxi'do'gaquië'.

²⁰ 'Nácagaca ia'bal-la bönachi ca xisedo' na' gulasi ga naca luyú bëbu. Ta'yönnë' didza' na', en ta'zì lu ná'agaquië' le, ate' run dxin lu icja ládxi'do'gaquië'. Nácagaca bal-la bönachi caní ca xisedo' na' bulu'nödzaj ia'chí uruá' huéaj. Nácagaca ia'bal-lë' ca xisedo' na' bulu'nödzaj ia'tsónnalalaj ca', ate' nácagaca ia'bal-la bönachi ca xisedo' na' bulu'nödzaj ia'tú gayuá' ca'.

Rucúdzu'ë didza' Jesús que tu le rigú'u beni'

(Lc. 8:16-18)

²¹ Jesús gudxë' ca' bönni' dá'gaquië' Lë', rnnë':

—¿Naru' rigála'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní. Ruzóaru' guí' ga naca xitsá' ga cu'u beni'. ²² Yúgu'të le nagachi' ilá' lahui, ate' yúgu'të le raca balándo'os ila'rúaj ga liná'. ²³ Nu zoa nagui, en riyóni ral-la' uzé nagui.

²⁴ Gudxë' ca' légaquië':

—Guli'güü' ládxi'li' le riyónili'. Ca naca le ruríxili', la' leze urixë' Dios queéli', ate' gunné' queéli' ia'lati'. ²⁵ Nu nazi'i le za' que, gu'ë que ia'lati', pero nu bití' nazi'i le, la's dui le dë que, udúa.

Rucúdzu'ë didza' Jesús ca rizxón zxa' xtila

²⁶ Gunné' ca' Jesús:

—Ca raca ni le rinná bë'ë Dios naca ca raca cate' ruchejë' tu bönni' zxa' xtila lu yu. ²⁷ Chi'i dzó'ölö rásië', en riyasë' cate' za' rení'. Ta'lén zxa' xtila na', en ta'zxón, pero bití' nózinë' lë' nacxi raca ta'zxón. ²⁸ La' cuinsi luyú na' ruxón le nadúzgaca luyú na', zí' aló xiyazi, ní'irö za' do que, en tödi na' cuía xui'i nál-la lu do que. ²⁹ Cate' chinal-la xui'i na', la' tséajtë' tsöjchibë' do na' tu' chibidxín dza uzi'ë xui'i.

Rucúdzu'ë didza' Jesús ca raca que xisé mostaza

(Mt. 13:31-32; Lc. 13:18-19)

³⁰ Gunné' ca' Jesús:

—¿Bizxi caz innaru' ca raca ni le rinná bë'ë Dios? ¿Bizxi ucúdzu'ru' didza' ca raca? ³¹ Raca ca raca que tu xisedo' mostaza. Cate' riyaza luyú naca tu xisedo' nácatërö cuidí' ca yúgu'të xisedo' dzó'ö luyú, ³² pero cate' chinadúz, rilén, en rizxóntërö ca yúgu'të guixi' cuan ró'gaca luyú. Tsca run yana' ní'a në'e, gaca ila'dxinba' biguínido', en ulu'dxíaba' xicá'agacaba' lu zxul-la que.

Ca rugunë' dxin Jesús le rucúdzu'ë didza'

(Mt. 13:34-35)

³³ Caní guca, busédinë' Jesús légaquië', en zianró ca' le bucúdzu'ë didza' tsca guca ila'yéajni'inë'. ³⁴ Yúgu'të didza' bé'lenë' bönachi bucúdzu'ë didza', ate' yúgu'të didza' ni buchila lá'anë', buzéajni'inë' légacasë' bönni' usëda queë'.

Jesús ribequi dxíë' bö' budunu'

(Mt. 8:23-27; Lc. 8:22-25)

³⁵ La' dza ná'asö, cate' ridzó', Jesús gudxë' yugu' bönni' dá'gaquië' Lë', rnnë':

—Tóditsöca'ru' ia'tsölá'a nísado' ni.

³⁶ Ní'irö bulu'lá'alënë' bönachi zían nacua' ni', ate' bulu'së'ë bárcodo' ga na' chizóasë' Jesús. Gula'cuá' ca' ni' ia'zica'rö bárcodo' sójácalen légaquië'. ³⁷ Gusí lo recja bö' budunu' lu nisa na', ate' gudá'a nisa lë'e bárcodo' na'. Ca' guca, zeaj ridzá' nisa lë'e bárcodo' na'. ³⁸ Dë' rásie' Jesús lu xicúgüë' ga naca xitsá'alö lë'e bárcodo' na', ate' bulu'subanë' Lë'. Të' Lë':

—¡Bönni' Usedi! ¿Naru' cabí ruí'i ládxi'tso' netu'? ¡Huáti caztu' lu nisa ni!

³⁹ Ní'irö guyasë' Jesús, en gunná bé'enë' bö' na' recja, gunné':

—Guró'ö dxi.

Gudxë' ca' nisa na', gunné':

—Dxisö guzóa.

Guró'ö dxi bö' na' guyecja, en guzóa dxi lu nísado' na'. ⁴⁰ Ní'irö Jesús gudxë' yugu' bönni' dá'gaquië' Lë', rnnë':

—¿Bizx que radxi ridzóbili' caní? ¿Naru' cabí réajlë'ëli' Dios?

⁴¹ Ni' tádxinë' gulé luzé'ë tuë' ia'túë':

—¿Nuzxi caz bönni' ni? ¡Tun bö' recja, en nísado' ca rnna xtídzë'ë!

5

Bönni' Gadara yu'u bö' xihui' lë'

(Mt. 8:28-34; Lc. 8:26-39)

¹ Ní'irö bila'dxinë' Jesús, en yugu' bönni' dá'gaquië' Lë' ia'tsölá'a nísado' ga naca lu xiyúgaca bönachi Gadara. ² Cate' burúajë' Jesús lë'e bárcodo' na', tu bönni' rirúajë' znan bulóaj ga nacua' yeru ba la' dutságate' Lë'. Bönni' ni yu'u bö' xihui' lë', ³ ate' nun xilatjë' ga na' nacua' yeru ba. Cuntu nu guca guga' bönni' na', calëga len du guíë. ⁴ Zían luzuí bulu'zóë' bregui' guíë yen në'ë, en ni'ë, en gulúguí'ë lë' du guíë. Yugu' du guíë na' bulé'ë, ate' bregui' guíë na' guditsjë'. Biti' rizéqui'në' nu bönni' inná bé'enë' lë'. ⁵ Ridática'së' ribódxí'ë rëla, en të dza ga na' nacua' yeru ba, en gapa naca lu gu'ado', run huë' cuinë' yugu' lu guíój dzö'ö ni'. ⁶ Cate' bilé'enë' zë'ë zítu' Jesús, guxíti'ë guyijë' ga na' zë'ë, ate' buzóa zxibë' lahuë' Lë'. ⁷ Bë'ë zidzaj didza', rë' Jesús:

—¿Bizxi ral-la'a quiu' Jesús, Zxí'inë' Dios nayépisëtë'rë'? Ní'a queë' Xanru' Dios ráta'yua' lo', bití' usaca' zítu' neda'.

⁸ Caní gunné' bönni' na' tu' chigudxë' Jesús bö' xihui' na':

—Lí', bö' xihui', burúaj lu bönni' ni.

⁹ Jesús gunábinë' le, rnnë':

—¿Bi leu'?

Bubí'i didza' le, gudxi Lë':

—Lea': Le Zían, tu' rö'ö ziantu'.

¹⁰ Gula'nabi yechi' yugu' bö' xihui' na' Jesús para cabí isól-lë'ë léguequi zítu' luyú ni'. ¹¹ Nacua'aba' cuchi zían lu guí'ado' ní'isö, ta'daba' táguba' ni'. ¹² Gula'nabi yechi' bö' xihui' na' Jesús, ta'nná:

—Gusöl-la' netu' ga ni' dzó'öba' cuchi zían. Bë' netu' lataj tsöjtsú'ugacatu'-ba'.

¹³ La' bë'të' Jesús léguequi lataj, ate' bila'rúaj bö' xihui' na', en yöjtsú'ugaca cuchi zían na', ate' gula'xíti'ba' cuchi zían na', yöjbíxigacaba' ga naca ra' guí'a, yöjcházagacaba' nísado'. Lu nísado' na' gula'yépiba' nisa, gulátiba', en nácagacaba' ca galaj gayuá'aba'.

¹⁴ Ní'irö bulu'zxunnaj nupa ni' gulún chi'i cuchi zían na'. Yöjtíxjöi'iguequiné' bönachi lu yödzö ni', enca' bönachi nacua' la' guixi' ni'. Bila'rúaj bönachi lu yödzö, söjyúgaquié' bizxi na' guca ni'. ¹⁵ Cate' bila'dxiné' ga ni' zoé' Jesús, bila'lé'ené' bönni' na' zí'alö yú'ugaca bö' xihui' lé'. Bönni' ni rö'ë ni', nácué' lari', en zoé' dxí'ado', ate' guladxi bönachi na'. ¹⁶ Nupa na' bila'lé'e le bené' Jesús gula'guíxjöi'i bönachi na' bila'rúaj lu yödzö ca na' guca queé' bönni' na' zí'alö yú'ugaca bö' xihui' lé', enca' ca guca quégacaba' cuchi na'. ¹⁷ Ní'irö gula'sí lógaca bönachi zían na' ta'ta'yu lahué' Jesús urúajé' lu xiyúguequi.

¹⁸ Cate' bubené' Jesús lé'e bárcodo', bönni' na' zí'alö yú'ugaca bö' xihui' zían lé', gúta'yué' lahué' Jesús gu'ë lé' lataj tséajlené' Lé'. ¹⁹ Jesús biti' bé'ë lé' lataj, pero gudxé' lé':

—Böaj lidxu'. Yöjtíxjöi'i di'a dza quiu' yugu' le zxön bena' quiu' neda', naca' Xanu', en ca bena' buéchi' ládxa'a li'.

²⁰ Söhuójé' bönni' na', en ruzé' didza' yugu' yödzö Decápolis ca nácgaca le zxön bené' Jesús queé', ate' bulu'bani yúgu'té bönachi nacua' yugu' yödzö ni'.

Bi'i nigula queé' Jairo, en nigula na' gudannu lari' nácué' Jesús

(Mt. 9:18-26; Lc. 8:40-56)

²¹ Cate' budxiné' Jesús ia'tsölá'a nísado' na', ní'irö bulu'dubi bönachi zían ga na' zoé' ra' nísado'. ²² Bönni' lé' Jairo, bönni' rinná bé'ë lu yu'u ga tu'dubé' bönni' judío, en nazédé' queé' Dios, bidé' ga zoé' Jesús. Cate' bilé'ené' Jesús, buzóa zxibé' lahué', ²³ en gúta'yué' lahué', rnné':

—Chiraqui gátibi' bi'i nigúlado' quia'. Gudá ixóa no'o lébi' para huóacabi', en biti' gátibi'.

²⁴ Sa'yéajlené' Jesús lé', ate' bönachi zían söjácalen Jesús, tu'quirö Lé'. ²⁵ Tu nigula, chinaca chinu iz ré'enu, zóanu ca' ni'. Biti' ruhu'i rön queénu que hué' quégaca cázanu nigula. ²⁶ Yenni' chigudí'i guzácá'nu lu ná'agaquié' zían bönni' tu'úné' bönachi. Nítisö chibutönu dëra le dë queénu, tu' cabi' bi gúcalen lënu, pero riyali' queénu. ²⁷ Cate' biyóninu tu'i didza' bönachi ca naca queé' Jesús, gudódinu ládjalö bönachi zían na', en bidxinu zaca' cúdzulé' Jesús, en gudannu lari' nácué'. ²⁸ Caní bennu tu' rnnanu: "Channö cansa' le nácué', huóaca'." ²⁹ La' buí'té rön queénu, ate' réquibe'enu chibóacanu que le guca queénu.

³⁰ La' gúquibe'etené' Jesús ben dxin yöl-la' huáca queé', ate' buécjé', ruyúé' bönachi zían na'. Rnné':

—¿Nuzxi na' gudán neda'?

³¹ Ní'irö bönni' dá'gaquié' Lé' té' Lé', ta'nné':

—Rilé'e quézinu' bönachi zían ni tu'quirö Li', en rnnatso': "¿Nuzxi na' gudán neda'?"

³² Ruyúé' Jesús gásibi'ilé' para ilé'ené' nuzxi na' gudán Lé'. ³³ Ní'irö nigula na' gubíga'nu lahué'. Rádxinu, en rizxízinu tu' chinózinu bi na' guca queénu, ate' buzóa zxíbinu lahué' Jesús, en gúdxinu Lé' idúté le nácaté. ³⁴ Jesús ré'ë-nu:

—Nigúlado'. Chibóacu' tu' réajlé'u neda'. Böaj lidxu' idú ládXu'u. Tsaz nuhuóacu' que le guca quiu'.

³⁵ Tsanni ni' ru'ë caní didza' Jesús, bönni' narúajgaquié' lidxé' bönni' na' rinná bé'ë lu yu'u ga tu'dubé' tu'sédé' queé' Dios bila'dxné' ni', en té' bönni' na':

—Chigútibi' bi'i nigúlado' quiu'. Bítí'rö upízxjanu' Bönni' Usedi.

³⁶ Biti' bé' ládXé'ë Jesús lé na' ta'nné', ate' gudxé' bönni' unná bé' na', rnné':

—Biti' gádxinu'. Guyéajlé'ësé' Dios.

³⁷ Biti' bé'ë lataj Jesús tsójácalen Lé' ia'zícá'rö bönachi, pero légacasé' Pedro, en Jacobo, en Juan, bóchë'ë Jacobo na'. ³⁸ Cate' bidxiné' lidxé' bönni' na' rinná bé'ë ga tu'dubé' tu'sédé' queé' Dios, bilé'ené' raca dzatsa, enca' nupa ni' ta'bödxi, en nupa ta'bödxi yechi'.

³⁹ Guyázié' Jesús, en gudxé' légaquié':

—¿Bizx que rutsátsali', en ribódxili' caní? Biti' nátibi' bi'i nigúlado' ni. Rásisibi' na'.

⁴⁰ Ní'irö bulu'titjé' Jesús, pero Lë' bubéajé' yúgu'të bönachi na' ní'ilö, ate' guché'ë xuz xiná'abi' bi'i nigúlado' na', enca' nupa nacua'len Lë', ate' guyázié' ga na' dëbi'. ⁴¹ Gudélé'ë ná'abi' bi'i nigúlado' na', en gudxé'-bi':

—Talita, cumi.

Didza' hebreo ni rnna lu didza' xidza': Bi'i nigúlado', guyasa. ⁴² La' guyásatëbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacua' ni'. ⁴³ Ní'irö Jesús gunná bé'ené' légaquié' cuntu nu ulu'siyönné' lë na' guca. Gudxé' légaquié':

—Guli'gü' le gágubi' bi'i nigúlado' ni.

6

Ridxiné' Jesús Nazaret, le naca ladzé'

(Mt. 13:53-58; Lc. 4:16-30)

¹ Buzé'ë Jesús ni', budxiné' ladzé', ate' yugu' bönni' dá'gaquié' Lë' sójacalené' Lë'. ² Cate' bidxín dza lá'ayi quégaquié' bönni' judío, gusí lahué' Jesús rusédiné' bönachi ga na' tu'dubé' tu'sédé' queé' Dios. Gula'cuá' bönachi zían ni' ta'yöni Lë'. Bulu'bani, ta'nná:

—¿Gazxi caz bizédé' bönni' ni yugu' lë ni? ¿Bizxi caz yöl-la' réajni'i ni nadéli'né'? ¿Nacxi caz runé' le náacagaca bé' na' zá'gaca yehua' yubá? ³ Náquié' bönni' ni gubédxi yaga na', en xí'ininu María. Náquié' bóchi'gaquié' Jacobo, en José, en Judas, en Simón. Nígula zané' nacua'lennu ca' ré'u.

Que lë ni na' bulu'cá'ané' Lë' cá'asö. ⁴ Ní'irö Jesús gudxé' légaquié', rnné':

—Gátitës tuné' bal nu bönni' ru'ë didza' uláz queé' Dios, pero bönachi uládz queé', en bönachi di'a dza queé', en bönachi nacua' lidxé' biti' tun lë' bal.

⁵ Que lë ni na' biti' guca guné' Jesús nitú yöl-la' huáca zxön ni'. Bunsé' nabábasö bönachi te'e cate' guxóa në'ë léguequi. ⁶ Bubániné' Jesús tu' cabí ta'yéajlë' Lë'. Gudödi na' gudödé' yugu' yódzödo' nacua' gásibi'ilö, rusédiné' bönachi ni'.

Risól-lë'ë Jesús bönni' dá'gaquié' Lë' tsjöngaquié' libán

(Mt. 10:5-15; Lc. 9:1-6)

⁷ Ní'irö bulidzé' Jesús idxínnutë' bönni' dá'gaquié' Lë', en gusí lahué' risól-lë'ë légaquié' chopa huéajgaquié'. Budödé' lu ná'agaquié' yöl-la' unná bé' ulu'béajé' yugu' bö' xihui' yú'ugaca bönachi. ⁸ Gunná bé'ené' légaquié' biti' bi' ilu'ë la' nöza, calëga yöxaj, calëga yöta, en calëga dumí biti' ila'gu'ë lu buzudi quégaquié', pero ilu'asé' xiyágado'. ⁹ Ral-la' ulu'dé'ë xiráchugaquié', pero calëga chopa lari' ulu'xóa yéngaquié'. ¹⁰ Gudxé' ca' légaquié':

—Gátitës ga tsú'uli' tu yu'u, guli'sóa yu'u na' cate' uzá'aröli' yödzö na'. ¹¹ Channö tsú'uli' tu yödzö ga biti' ilún bönachi lu yödzö na' libí'ili' bal, en biti' ulu'zé' nágagaquié' xtídzá'li', buli'rúaj ni', en buli'quínnaj bëchtö da' lë'e lábali'. Lë ni gaca bé' nabága'gaquié' xíguia'. Le nácatë rea' libí'ili', cate' idxín dza ichúguié' Dios quégaca bönachi, ila'gu'i ila'záca'rö bönachi lu yödzö na' ca ila'gu'i ila'záca' bönachi Sodoma, en Gomorra, yugu' yödzö na' busunítié' Dios.

¹² Ní'irö bila'rúajé' bönni' dá'gaquié' Lë', yjöngaquié' libán ca ral-la' ulu'bí'i ládxi'gaca bönachi. ¹³ Bulu'béajé' zían bö' xihui' yú'ugaca bönachi. Gula'gu'ë le za zían nupa te'e, ate' bulu'huóáquié'.

Ca bétigaquié' Juan, bönni' buquilé' bönachi nisa

(Mt. 14:1-12; Lc. 9:7-9)

¹⁴ Bijönné' Herodes, bönni' unná bé', ca naca le runé' Jesús, tu' rizé' didza' gátitës que yöl-la' huáca queé'. Bal-la bönachi ta'nná:

—Chibubané' Juan, bönni' ni' buquilé' bönachi nisa, lu yöl-la' guti. Que lë ni na' napé' yöl-la' huáca runé' yugu' lë ni.

¹⁵ Ia'bal-la bönachi ta'nná:

—Naquié' Elías, bönni' bé'ë didza' uláz queé' Dios dza ni'te.

Ia'bal-la bönachi ta'nná:

—Naquië' bönni' ru'ë didza' uláz queë' Dios ca guláquië' bönni' gulu'ë didza' uláz queë' dza ni'te.

¹⁶ Cate' biyönnë' Herodes yugu' lë ni, gunné':

—Naquië' Juan, bönni' na' burixa' yenë'. Chibubanë' lu yöl-la' guti.

¹⁷ Caní gunné' Herodes tu' gusól-lë'ë lë cazë' bönni' yöjxóngaqüë' Juan na', ate' gulúgui'ë lë' du guié lu yu'u lidxi guié. Caní benë' Herodes tu' rilenu Herodías Juan na'. Nácanu nigula na' gúcanu nigula queë' Felipe, bóchë'ë Herodes na'. Herodes gudúë'-nu Herodías na', en butsa ná'alënë'-nu. ¹⁸ Juan na' gudxë' Herodes:

—Biti' ral-la' sóalenu'-nu nigula queë' bóchu'u.

¹⁹ Que lë ni na' gusí guró'önu Herodías. Gú'uninu bi gunnu queë' Juan, tu' gú'uninu gútinu lë', pero biti' bi guxzéqui'nu ²⁰ tu' rádxinë' Herodes Juan. Nózinë' náquië' Juan na' tsahui', en lá'ayi. Que lë ni na' gudapa chi'ë lë', en buzé náguië' lë' idú láchë'ë sal-la' lë na' rnnë' Juan ben ga guró'ë böniga Herodes na'. ²¹ Ní'irö bidxín tu dza guxzéqui'nu Herodías na', le naca dza runë' Herodes laní que dza guyé'enë' iz. Bupé'ë le ilë'aj ilahuë' bönni' dë lu ná'agaquië' uláz queë', en bönni' ta'nná bé'enë' bönni' röjáquië' gudil-la, enca' bönni' nácagaquië' lo luyú Galilea. ²² Guyázabi' bi'i nigula queënu Herodías ga na' tē'aj tahuë', en buyá'abi' lógaquië'. Guyaza láchë'ë Herodes ca runbi', en gula'yaza láchxi'gaca ca' nupa tē'aj tágulen lë'. Ní'irö Herodes gudxë'-bi' bi'i nigula na', gunné':

—Gunaba bi ré'ënu' gunna' quiu', ate' guna' ca'.

²³ Benë' tsutsu xtídzë'ë, gudxë'-bi':

—Ní'a queë' Xanru' Dios gunna' quiu' bíti'tës bi inabu' ga idxintë gatsaj ga rinná bé'a.

²⁴ Burúajbi' lëbi', ate' gunábabi' xiná'abi':

—¿Bizxi inábatsa'?

Lënu gúdxinu-bi':

—Icjë' Juan, bönni' buquilë' bönachi nisa, inabu'.

²⁵ La' buázatëbi' ga na' zoë' Herodes, en rëbi'-në':

—Rë'ënda' ixú' quia' na'a lu zxiga' zxön icjë' Juan, bönni' na' buquilë' bönachi nisa.

²⁶ Ní'irö buí'innë' Herodes, pero tu' buzötjë' Dios, en tu' bila'yöni ca' nupa tágulen lë', biti' gú'unnë' initi xtídzë'ë na' guxzí' lu në'ë queë'bi'. ²⁷ Herodes la' gusól-la'të' tu bönni' rejë' gudil-la zoë' rapa chi'ë, ate' gunná bé'enë' lë' tsöjxi'ë icjë' Juan. ²⁸ Bönni' na' rejë' gudil-la guyijë' lidxi guié, yöjrixë' yen Juan na', ate' bu'ë icjë', nuxóë' le tu lu zxiga' zxön. Budödë' le lu ná'abi' bi'i nigula na', ate' lëbi' bunódzjabi' le queënu xiná'abi'.

²⁹ Cate' bönni' dá'gaquië' Juan na' bila'yönnë' didza' chiguca lë na', bila'dxinë' ni', en bulu'ú'ë lë', ate' yöjcháchi'gaquië' lë' yeru ba.

Rugahuë' Jesús zíanrö ca chi-un gayuá' bönachi

(Mt. 14:13-21; Lc. 9:10-17; Jn. 6:1-14)

³⁰ Gudödi ni' bulu'dubë' bönni' gubáz queë' Jesús ga zoë', en gula'guíxjöi'inë' Lë' yúgu'të le gulunë', en yugu' le bulu'sédinë' bönachi. ³¹ Nacuá' bönachi zían ni', nupa zá'gaca, en nupa söjaca, ga bidxintë bíti'rö dë lataj ilahuë' Jesús, en yugu' bönni' dá'gaquië' Lë'. Que lë ni na' Jesús gudxë' légaquië', rnnë':

—Gulí'dá. Uyéaj cázaru' ga naca lataj cá'asö, en uzí' láchxi'ru' tu chi'i.

³² La' légacasë' yöjáquië' tu lë'e bárcodo', ate' bila'dxinë' tu lataj cá'asö. ³³ Bila'lë'e bönachi zían légaquië' söjáquië' ni', en núnbë'gaca Jesús. Que lë ni na' bönni' yúgu'të yödzö ni' carelö yöjáquië' ni'. Gula'zë'e ní'agaquië', ate' bila'dxinë' ni' zí'atëlö ca Jesús, en yugu' bönni' dá'gaquië' Lë'. ³⁴ Cate' burúajë' Jesús lë'e bárcodo' na', bilé'enë' bönachi zían na', ate' buéchi' láchë'ë légaquië' tu' nácagaquië' ca bö'cu' zxíla'do' biti' zoa nu gapa chi'i légacaba'. Gusí lahuë' rusédinë' légaquië' le zían. ³⁵ Cate' chiridzó' dza na', yugu' bönni' dá'gaquië' Jesús bila'dxinë' ga zoë', en tē' Lë':

—Chiridzó', ate' lataj cá'asö naca ni. ³⁶ Busöl-la' bönachi zían ni para tsöjaca yugu' yú'udo', en yugu' yódzodo' nacua' gásibi'ilö, tsöj'ógaca yöta, tu' cabí bi dë ni le ilagu.

³⁷ Bubi'ë didza' Jesús, gudxë' légaquië':

—Guli'güi' libí'i cázali' le ilahuë'.

Gulé' Lë':

—¿Naru' tsöj'ó'utsatu' yöta xtila len lázxjatu' que idú xunu' beo', ate' güi'itu' le ilahuë'?

³⁸ Jesús gudxë' légaquië':

—¿Bal-laxi yöta xtila dë queéli'? Guli'tsöjyútsöca'.

Cate' chinóziguequinë', të' Lë':

—Gáyu'sö yöta xtila dë, en chópasöba' böla dëba'.

³⁹ Ní'irö gunná bë'ë Jesús ilunë' ga ila'bó' bönachi zían na', ila'cuá' tu cö' huéajguequi ga naca lachi' lu daca'. ⁴⁰ Gula'cu'ë tu cö' huéajgaquië', tu gayuá' huéajgaquië', en chi-un huéajgaquië'. ⁴¹ Ní'irö gudélë'ë Jesús igáyu'të yöta xtila na', en irópaba' böla na'. Buyúë' zaca' lúxiba, en gudxë' Dios: "Xclenu'." Ní'irö buzuxzjé' yöta xtila na', en bë'ë quégaquië' bönni' usëda queë' para ila'guísië' quégaca bönachi zían na'. Gudísië' ca' irópateba' böla na' quégaca yúgu'të bönachi na'. ⁴² Gulahuë' yúgu'të', en bulu'huóljanë'. ⁴³ Ní'irö bulu'tubë' le bizxaj que yöta xtila na', en quégacaba' böla, ate' chinnu ga böra bulu'lié'. ⁴⁴ Guláquië' ca chi-un gáyu'ë bönni' na' gulahuë'.

Rizë'e ni'ë Jesús lu nísado'

(Mt. 14:22-27; Jn. 6:16-21)

⁴⁵ La' bentë' Jesús ga gula'benë' yugu' bönni' dá'gaquië' Lë' lë'e bárcodo', para ila'nóruë' lahuë', ila'dödë' lu nísado' na', para ila'dxinë' lu yödzö Betsaida, tsanni ni' Lë' rusöl-lë' bönachi zían na' lídxiguequi. ⁴⁶ Cate' chibudxi busöl-lë' légaquië', guyijë' tu lu guí'ado', ate' ni' ruí'ilenë' Dios didza'. ⁴⁷ Cate' chizá' ral-la, zeaj bárcodo' na' gatsaj láhui'lö nísado', ate' zoë' Jesús tuzë' luyú bidxi na'. ⁴⁸ Bilé'enë' Jesús légaquië', böniga tu'së'ë bárcodo' na' tu' recja bö' za' ga na' ta'dödë'. Gudödi guluhuëla bidxinë' Jesús ga na' nacué, rizë'e ni'ë lu nísado' na', ate' gú'unnë' tódisë' ga na' nacué. ⁴⁹ Cate' bila'lé'enë' Lë' rizë'e ni'ë lu nísado', guléquinë' bixín na', ate' gula'bódxí'ë ⁵⁰ tu' bila'lé'enë' yúgu'të' Lë', en guladxi gula'dzóbínë'. Ní'irö la' bulidztë' Jesús légaquië', rnnë':

—Buli'tipa ládxi'li'. Neda' caz. Biti' gádxili'.

⁵¹ Gurenë' Jesús lë'e bárcodo' ga na' nacué, ate' guró'ö dxi bö' na' recja, ate' légaquië' gula'niti gula'tíqui'sinë' bulu'bánninë'. ⁵² Biti' ta'yéajni'ininë' le rulu'í'i lë na' benë' Jesús que yöta xtila na'. Ni' naca zidi icja ládxi'do'gaquië'.

Ruúnë' Jesús nupa te'e lu yödzö Genesaret

(Mt. 14:34-36)

⁵³ Gula'dödë' Jesús, en yugu' bönni' dá'gaquië' Lë' ia'tsölá'a nísado', ate' bila'dxinë' ga naca lu xiyúgaca bönachi Genesaret. Bulu'dxíguë'ë bárcodo' luyú bidxi ni'. ⁵⁴ Cate' bulu'rúajë' lë'e bárcodo' na', la' bulu'únbë'të bönachi ni' Jesús. ⁵⁵ Gula'xiti' bönachi na', yöjaca yúgu'të yödzodo' idú gásibi'ilö, en gula'sí lógaquië' dujuá'agaquië' yúgu'të nupa te'e ga zoë' Jesús, zxóagaca yugu' le déguequini, ate' bila'dxinë' gáti'tës ta'yönnë' zoë' Jesús. ⁵⁶ Gáti'tës ga ridödë' Jesús, yugu' lu yödzodo', en yugu' yödzö zxön, en yugu' yú'udo', tu'cu'ë nupa te'e quégaquië' gapa naca la' nöza, en gapa naca lu yé'ëyi, en ta'tá'yüë' lahuë' Jesús gu'ë légaquië' lataj ila'gansë' luzxi lari' nácuë'. Yúgu'të nupa na' bila'gán lari' nácuë' bulu'huóacatë dxí'ado'.

7

Le tun ga biti' nácgaca bönachi tsahui' lahuë' Dios

(Mt. 15:1-20)

¹ Ní'irö bal-lë' bönni' yudo' fariseo len bal-lë' bönni' yudo' usedi narúajgaquië' Jerusalén, bulu'dubë' ga zoë' Jesús. ² Bönni' yudo' ni bila'lé'enë' bönni' usëda queë' Jesús tahuë' yöta, biti' nuchi'agaquië' ná'agaquië', lë na' rna: Biti' nayárigaca ca nalébiguequinë' tunë' bönni' yudo' na'. Que lë ni na' gula'nnë' quégaquië'. ³ Yugu' bönni' yudo' fariseo na', en ia'zica'rö bönachi judío tunë' ca gulébiguequinë' gulunë' xuz xtó'ogaquië', ate' channö cabí ta'guíbi ná'agaquië' zían luzuí ca na' nalébiguequinë' tunë', biti' ca' tahuë'. ⁴ Cate' tu'dxinë' röjó'ugaquië' lu yé'ëyi, channö cabí ta'guibë' lë na' ca nalébiguequinë' tunë', biti' ca' tahuë'. Zíanrö ca' tunë', yugu' le nalébiguequinë' tunë'. Caní ta'guibë' zxiga' yó'öna, en yugu' zxiga' guíë, en yugu' le táti'në'. ⁵ Que lë ni na' yugu' bönni' yudo' fariseo, en yugu' bönni' yudo' usedi gula'nábinë' Jesús, ta'nnë':

—¿Naru' cabí tunë' yugu' bönni' usëda quiu' ca gulébiguequinë' gulunë' xuz xtó'oru', pero tahuë' yöta biti' nuchi'agaquië' ná'agaquië'?

⁶ Bubi'ë didza' Jesús, rë' légaquië':

—Libi'ili', bönni' rulu'isö tsahui' cuinli'. Nácate le gudíxjö'ë Isaías, bönni' ni' bë'ë didza' uláz queë' Dios, ca naca queéli'. Buzúajë' lu guichi, gunné':

Yugu' bönni' ni, len rú'agacasë' tunë' neda' bal,
calëga idú ládxi'gaquië'.

⁷ Ní'ti'sö naca yöl-la' ba ta'gu'ë neda'

tu' tu'sédinë' le ta'nná bë' bönachi,
calëga xibá quia'.

⁸ Caní naca, tu' rucá'anali' le gunná bë'ë Dios, ate' runli' yugu' le nazi' láhuili' lu ná'agaca bönachi.

⁹ Gudxë' ca' légaquië':

—Idú ládxi'li' rucá'anali' cá'asö le gunná bë'ë Dios para gunli' ca naca le nulaga loli' runli'. ¹⁰ Moisés gunné' caní: “Ben bal xuz xin'ó.” Gunné' ca': “Nu ulidza zi' xuzi o xiné'e, guli'gútité nu na'.” ¹¹⁻¹² Libi'ili' rnnali' caní: “Channö nu bönni' guíë' xuzë' o xiné'ë: Biti' gaca bi gunna' queéli', tu' naca Corbán.” (Didza' ni rna lu didza' xidza': Tu' nuzó'a' quez queë' Dios yúgu'të.) Ní'irö rnnali': “Biti' run bayudxi bi gunë' bönni' na' quégaquië' xuz xiné'ë.” ¹³ Caní naca, rucá'anali' cá'asö xtídzë'ë Dios para gunli' le nulaga loli' runli', yugu' le rudódili' lu ná'agaca xzí'ini xí'sóali'. Zíanrö ca' le caní runli'.

¹⁴ Ní'irö Jesús bulidzë' bönni' zían na' nacu'ë ni', en rë' légaquië':

—Guli'zé nágali' didza' gu'a, yúgu'tëli', en guli'tséajni'i. ¹⁵ Biti' bi dë le riyaza nu bönni' le gaca gun ga biti' náquië' tsahui' lahuë' Dios, pero le rirúaj lë', lë ni gaca gun ga biti' náquië' tsahui' lahuë' Dios. ¹⁶ Channö zoa nágali', en riyónili', buli'zé nágali'.

¹⁷ Cate' Jesús bulá'alënë' bönachi zían na', guyu'ë tu yu'u, ate' yugu' bönni' usëda queë' gula'nábinë' Lë' ca naca lë na' bucúdzü'ë didza'. ¹⁸ Jesús gudxë' légaquië':

—¿Riyádzjatsö ca' queéli' yöl-la' réajni'i? ¿Naru' cabí réajni'ili', yúgu'të le riyaza nu bönni', biti' gaca gun ga biti' náquië' tsahui' lahuë' Dios? ¹⁹ Naca caní tu' cabí riyaza icja ládxi'da'ahuë', pero lé'ësë' riyaza, ate' rurúaj lë'ë.

Tu' gunné' caní Jesús, bulu'inë' rë'u naca dxi'a yúgu'të le rë'aj ráguru'. ²⁰ Gunné' ca' Jesús:

—Le rirúaj lu bönni' run ga biti' náquië' tsahui' lahuë' Dios. ²¹ Caní naca, tu' ta'rúaj icja ládxi'do'gaquië' bönni' yugu' le ta'zá' ládxi'gaquië' le naca xihui', yugu' le tun ga tunë' dul-la' ta'guitsjé' xibá que yöl-la' nutsaga na', en yugu' le ruá' dö'. Tun ga tútië' bönachi, ²² en ta'banë', en ta'zé ládxi'gaquië' le dë que luzá'agaquië', en tu'ë dö', en ta'zí yë'ë, en tu'zxé'ë, en ta'nná zi'ë que luzá'agaquië', en tun ba zxön cúngaquië', en tunë' le canóz. ²³ Yúgu'të le xihui' caní ta'rúaj icja ládxi'da'ahuë' nu bönni', en tun ga biti' náquië' tsahui' lahuë' Dios.

*Tu nigula izá'a réajlé'ënu Jesús
(Mt. 15:21-28)*

²⁴ Buzé'ë Jesús ni', ate' bidxiné' gala' ga nacua' yödzö Tiro, en yödzö Sidón. Guyázié' tu yu'u ni', en gú'unné' cuntú nu inözi, pero bití' ca' guca ucachi' cuiné'. ²⁵ Tu nigula zóabi' bi'i nigúlado' queénu, yu'u bö' xihui' lëbi', biyóninu didza' rizé' ca naca queé' Jesús, ate' la' bídatënu ga zoé' Jesús, en buzóa zxíbinu xini'ë. ²⁶ Nigula ni bití' nácanu judío, pero nabábanu bönachi Sirofenicia. Gúta'yunu lahué' Jesús ubéajé' bö' xihui' na' yu'u-bi' bi'i nigúlado' queénu. ²⁷ Ní'irö Jesús gudxé'-nu, rnné':

—Bé' lataj ulu'huölaj zí'alö nupa nácacaca ca zxí'ini xan yu'u, tu' cabí naca dxi'a ugúaru' yöta quégacabi' bi'i na', en chú'unaru' le lógacaba' bó'cu'do'.

²⁸ Bubí'inu didza' nigula na', gúdxinu Jesús:

—Ön, Xan, pero yugu' bó'cu'do' nacua'aba' zxani ga tágubi', táguba' le bizxaj tu'huóxaj ga na' tágubi'.

²⁹ Ní'irö Jesús gudxé'-nu, rnné':

—Tu' gunnó' caní, huáca huóaju'. Chiburúaj bö' xihui' na' guyú'u-bi' bi'i nigúlado' quiu'.

³⁰ Cate' budxinu lídxinu, bilé'enu-bi' bi'i nigúlado' queénu na', dëbi' lu da'a, en chinurúaj bö' xihui' na' guyú'u lëbi'.

Jesús ruüné' tu bönni' nacódzué', en bití' gaca inné'

³¹ Burúajé' Jesús lataj na' nababa yödzö Tiro, ate' gudödé' gapa dë yödzö Sidón, en yugu' yödzö Decápolis, ate' bidxiné' ra' nísado' lu xiyú Galilea. ³² Bönachi ni' dujuá'gaca tué' bönni' nacódzué', en bití' raca inné' ga zoé' Jesús, ate' ta'ta'yu lahué' Jesús ixóa nē'ë lē'. ³³ Jesús bubéajé' lē' tsölá'alö ladjagaca bönachi na', ate' buné'ë xibón nē'ë yeru náguié' bönni' na'. Gurú'uné' zxóna'do', en gudané' lúdxé'ë. ³⁴ Ní'irö buyúé' lúzxbálö, en gunné' lúdxé'ë, rnné':

—Efata.

Didza' hebreo ni rna lu didza' xidza': Guyalaj.

³⁵ La' böáljaté' náguié', en la' buguítjaté' lúdxé'ë, en gunnēté' dxí'ado'. ³⁶ Jesús gunná bé'ené' légaquié' cuntú nu ilé' ca', pero tsca gunná bé'ené' légaquié', bulu'zétéré' ca' didza' que lē na' bené'. ³⁷ Bulu'bánni, ta'nné':

—Tsáhui'do' runé' yúgu'té. Runé' ga tu'yóni nupa gulaca cödzu, en ga tu'i didza' nupa bití' guca ila'nné.

8

*Rugahué' Jesús zíanró ca choá' gayuá' bönachi
(Mt. 15:32-39)*

¹ Yugu' dza na' bulu'dubi bönachi zían ga zoé' Jesús. Tu' cabí dë le ilágugaca, Jesús bulidzé' bönni' uséda queé', ate' bé'lené' légaquié' didza'. ² Gudxé' légaquié':

—Ruhuechi' ládxa'a bönachi zían ni tu' chinaca tsonna dza nacua'len neda' ni, en bití' dë le ilágugaca. ³ Channö usól-la'a léguequi lídxigaca ta'dunsö ca', huala'cuídi' la' nöza, tu' zá'gaca zi'tu' bál-lagaca.

⁴ Bulu'bi'ë didza' bönni' uséda queé', tē' Lē':

—¿Bizxi ugágutsaru' bönachi guizxi yu ni, ga ni naca lataj cá'asö?

⁵ Gunábiné' Jesús légaquié', rnné':

—¿Bál-laxi yöta xtila dë queéli'?

Tē' Lē':

—Gádxisö.

⁶ Ní'irö Jesús gunná bé'ené' bönachi zían na' ila'bó' lu yu. Gudélé'ë gadxi yöta xtila na', ate' gudxé' Dios: "Xclenu'." Ní'irö buzuxxjé' léguequi, en bé'ë quégaquié' bönni' uséda queé' para ila'guísié' lógaca bönachi zían na'. ⁷ Guta' ca' quégaquié' tu chópaba' böla

cuidi'. Jesús gudxë' Dios: "Xclenu'", ate' gunná bé'enë' légaquië' ila'guisië' ca' légacaba' lógaca bönachi. ⁸ Gulagu yúgu'të bönachi na', en bulu'huólaj. Ní'irö bulu'tübë' le bizxaj nagá'anagaca, ate' gula'lí idú gadxi ga'böra. ⁹ Bönachi na' gulagu gulaca idú ca choá' gayuá'gaca. Jesús busöl-lë' léguequi lídxigaca, ¹⁰ ate' gurenë' lë'e bárcodo' tsözxón len yugu' bönni' usëda queë', ate' bila'dxinë' lu xiyúgaca bönachi Dalmanuta.

Ta'nábinë' Jesús gunë' tu le gaca bë' nuzxi náquië'

(Mt. 16:1-4; Lc. 12:54-56)

¹¹ Ní'irö bila'dxinë' bönni' yudo' fariseo ga zoë' Jesús, en gula'sí lógaquië' ta'díl-lalenë' Lë' didza'. Gulë'ennë' ila'zì' bë'ë Jesús. Que lë ni na' gula'nábinë' Lë' gunë' tu le naca bë' za' yehua' yubá. ¹² Gunnëda' ládxë'ë Jesús, rnnë':

—¿Bizx que ta'nábitsö bönachi ni neda' guna' tu le naca bë' za' yehua' yubá? Le nácatë rea' libí'ili', bití' ca' ilé'eli' tu le naca bë' za' yehua' yubá.

¹³ Ní'irö bulá'alenë' légaquië'. Bubenë' lë'e bárcodo', en sa'yéajë' ia'tsölá'a nísado'.

Le tu'sédinë' bönni' yudo' naca ca cúa zi que yöta xtila

(Mt. 16:5-12)

¹⁴ Gulal-la ládxì'gaquië' bönni' usëda queë' Jesús ilu'ë bi ilahuë', ate' tuz yöta xtila dë lë'e bárcodo' na'. ¹⁵ Ní'irö Jesús buzéajni'inë' légaquië', rnnë':

—Bulí'yútsöca' queéli'. Guli'gún chi'i cuinli' para cabí sí'ili' le naca ca cúa zi que yöta xtila quégaquië' bönni' yudo' fariseo, en queë' Herodes.

¹⁶ Gula'sí lógaquië' tu'ë didza' bönni' usëda queë' la' légacasë', ta'nnë':

—Gunnë' caní tu' cabí dë yöta xtila gáguru'.

¹⁷ Réquibe'enë' Jesús le ta'nnë', ate' rë' légaquië':

—¿Bizx que ruí'ili' caní didza' tu' cabí dë yöta xtila gáguru'? ¿Naru' cabí réajni'itseli', en bití' réquibe'itseli'? ¿Ni nácatsö zidi icja ládxì'do'oli'? ¹⁸ ¿Zóatsö guiój loli', en bití' rilé'eli', en zóatsö guídì nágali', en bití' riyónili'? ¿Naru' cabí röjnétseli'? ¹⁹ Cate' ni' buzuxzja' gayu' yöta xtila, ate' gulahuë' chi-un gáyü'ë bönni', ¿bál-laxi ga'böra bulili' le bizxaj butúbili'?

Gula'nnë':

—Chinnu.

²⁰ Gunnë' ca' Jesús:

—Cate' ni' buzuxzja' gadxi yöta xtila, ate' gulagu choá' gayuá' bönachi, ¿bál-laxi ga'böra bulili' le bizxaj butúbili'?

Gula'nnë':

—Gadxi.

²¹ Ní'irö Jesús gudxë' légaquië':

—¿Naru' cabí réajni'itseli' na'a, bë'a didza' que le tu'sédinë' bönni' na'?

Jesús ruünë' bönni' Betsaida nachul-la lahuë'

²² Cate' Jesús, en bönni' dá'gaquië' Lë' bila'dxinë' yödzö Betsaida, bila'dxín ga zoë' Jesús nupa dujuá'gaquië' queë' tu bönni' nachul-la lahuë'. Ta'tá'yuë' lahuë' canë' bönni' na'.

²³ Jesús gudélé'ë në'ë bönni' na' nachul-la lahuë', ate' guché'ë lë' ní'ilö ra' yödzö. Ní'irö gunábinë' lë', rnnë':

—¿Ba rilé'enu' lati'?

²⁴ Buyúë' bönni' na' nachul-la lahuë', rnnë':

—Rilé'egacada' bönachi, nalá'gaca ca yugu' yaga, pero ta'dá bönachi na'.

²⁵ Leyúbölö guxóa në'ë Jesús guiój lahuë', ate' buyúde'ë bönni' na' nachul-la lahuë', ate' böacaté dxí'ado' guiój lahuë'. Na'a rilé'enë' dxí'ado' yúgu'të. ²⁶ Ní'irö Jesús gusól-lë'ë lë' lidxë', rnnë':

—Bití' tsöjdödu' lahui' yödzö, en cuntú nu guío' le bena' nu zoa lu yödzö ni.

Rnnë' Pedro: "Jesús náquië' Cristo"

(Mt. 16:13-20; Lc. 9:18-21)

²⁷ Gudödi na', bulu'zé'ë Jesús, en yugu' bönni' usëda queë' ni', ate' gula'dödë' yugu' yódzödo' nabábagaca Cesarea, ga na' rinná bë'ë Filipo. Tsanni ni' yú'ugaquië' nöza, Jesús rinabi yudxë' yugu' bönni' usëda queë', rnnë':

—¿Nuzxi ta'nná bönachi naca'?

²⁸ Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-la nacu' Elías, bönni' bë'ë didza' uláz queë' Dios dza ni'te. Ta'nná ia'bal-la nacu' bönni' yúbölö bë'ë didza' uláz queë' Dios dza ni'te.

²⁹ Ní'irö Jesús gunábinë' légaquië', rnnë':

—Nazxi libí'ili', ¿nuzxi rnnali' naca'?

Bubi'ë didza' Pedro, rnnë':

—Lí' nacu' Cristo.

³⁰ Ní'irö Jesús gunná bé'enë' légaquië' cuntú nu ulu'siyönnë' Nu náquië'.

Riguíxjö'ë Jesús ca si' ilútië' Lë'

(Mt. 16:21-28; Lc. 9:22-27)

³¹ Ní'irö gusí lahuë' Jesús rusédinë' bönni' dá'gaquië' Lë', rnnë':

—Run bayudxi qui'i saca'a neda', Bönni' Guljë' Bönachi. Bönni' gula tu'zëajni'inë', en yugu' bixúz unná bë', en bönni' yudo' tu'sédinë' ulu'zöë' neda' tsölá'alö. Ilútië' neda', pero cate' gaca tsonna dza ubana'.

³² Yálajsö bé'lenë' légaquië' didza' ni. Ní'irö Pedro guché'ë Jesús tsölá'alö, en gusí lahuë' ridil-lë' lë' didza'. ³³ Buécjë' Jesús, en buyúë' ia'zica'rë' bönni' usëda queë', ate' buzenë' bach Pedro, rnnë':

—Gucuita ga zoa'. Nacu' ca Satanás, tu' xihui'. Le rizá' ládxi'u biti' za' lu në'ë Dios, pero ca ta'zá' ládxi'gaca bönachi naca.

³⁴ Ní'irö Jesús bulidzë' yugu' bönni' usëda queë', enca' bönachi nacua' ni', en gudxë' légaquië':

—Channö ré'ënë' nu bönni' të'ë neda', ral-la' uzöë' tsölá'alö le ré'ëni quézinë', en gáquië' ca tu bönni' sa'yéajë' söjtë'ë lë'e yaga cruz, ate' ní'irö huáca të'ë neda'. ³⁵ Nu bönni' ru'í'ida' ládxi'ë' yöl-la' na'bán queë', unítië' le, pero nu bönni' unítië' yöl-la' na'bán queë' tu' dë'ë neda', o tu' dë'ë didza' dxi'a quia', udéli'në' bönni' ni yöl-la' na'bán queë'.

³⁶ ¿Naru' uzi'tsë' xibé tu bönni' channö utubë' yúgu'të le dë' yödzölió ni, pero uniti cuinë'?

³⁷ Biti' bi gaca unödzejë' tu bönni' le huóá'ui cuinë'. ³⁸ Channö zoë' nu bönni' rutuí'inë' quia' neda', en que xtídza'a lógaca bönachi ni nucá'anagaca Dios, en tun dul-la', lësca' caní neda', Bönni' Guljë' Bönachi, utuí'ida' queë' bönni' na' cate' guídalena' yöl-la' huáca zxön queë' Xuza', ate' dzágagaquië' gubáz lá'ayi neda'.

9

¹ Jesús gudxë' ca' légaquië', rnnë':

—Le nácatë rea' libí'ili', nacua' ni nupa biti' ilátigaca cate' ila'lé'erö idinná bë'ë Dios lahuyú ni, en ilá' lahui yöl-la' huáca zxön queë'.

Ridzá'a ca riná' lahuë' Jesús

(Mt. 17:1-13; Lc. 9:28-36)

² Cate' chigudödi xopa dza, Jesús guché'ë Pedro, en Jacobo, en Juan, ate' légasasë' yójáquië' tu lu gu'á sibi. Ní' bidzá'a ca riná' lahuë' Jesús lógaquië' yonnë' na'. ³ Guyëpi yösa bení' lari' nácuë' Jesús, ate' guca chiguíchido'os. Zxíla'do'os guca, le cuntú nu ra' lari' yödzölió ni gaca gun chiguíchido'os ca guca lari' na'. ⁴ Bulu'luí'i lógaquië' Elías, en Moisés, tu'ílenë' Jesús didza'. ⁵ Ní'irö Pedro gudxë' Jesús:

—Bönni' Usedi, bica' ba rë'u zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

⁶ Caní gunné' Pedro tu' cabí nóziné' bi na' rnné', tu' tádxiné' bönni' uséda queé' Jesús na'. ⁷ Ní'irö guró'ö böaj le gulú'u zxul-la légaquié', ate' biyón chi'i nu ru'i didza' lu böaj na', rna:

—Bönni' ni Zxí'ina'. Nadxí'ida' Lë'. Buli'zé nágali' Lë'.

⁸ La' bulu'yuté' pero cúnturö nu ta'lé'ené'. Tuzé' Jesús zóalené' légaquié'.

⁹ Tsanni ni' yú'ugaquié' nöza, tu'dínnié' lu guí'a sibi na', Jesús gunná bé'ené' légaquié' cuntú nu ulu'siyönné' ca', lë na' bila'lé'ené', cate' ubanré' lu yöl-la' guti Lë', Bönni' Guljé' Bönachi. ¹⁰ Que lë ni na' gula'gú'usé' ícjagaquié' didza' ni bé'ë, ate' la' légacasé' ta'nabi yúdxiné' luzá'agaquié' bizxi sa'yéaj didza' na' bé'ë, gunné' ubané' lu yöl-la' guti.

¹¹ Gula'nábiné' Jesús, ta'nné':

—¿Bizx que ta'nné' bönni' yudo' usedi run bayudxi guídé' Elías zí'alö ca guídé' Cristo?

¹² Bubi'ë didza' Jesús, rnné':

—Le nácaté guídé' Elías zí'alö, en ucu'ë yúgu'té ca ral-la' gaca. Na'a, ¿bizxi sa'yéaj le nazúaj lu guichi rna run bayudxi qui'i sáquë'ë Bönni' Guljé' Bönachi, ate' cá'asö ulu'cá'ana bönachi Lë'? ¹³ Rea' libí'ili': Chibidé' Elías, ate' guluné' queé' tsca gulé'ënné', tsca nazúaj lu guichi lá'ayi ca ral-la' gaca queé'.

Jesús ruúné'-bi' bi'i bönni' yu'u lëbi' bö' xihui'

(Mt. 17:14-21; Lc. 9:37-43)

¹⁴ Cate' ni' bulu'dxiné' Jesús, en bönni' dzágagaquié' Lë' ga na' nacu'ë ia'zica're' bönni' uséda queé' Jesús, bila'lé'ené' nacua' bönachi zían ni', ate' bönni' yudo' tu'sédiné' ta'díl-lalené' yugu' bönni' uséda queé' na' didza'. ¹⁵ Cate' bönachi zían na' bila'lé'e Jesús, bulu'bani, en carelö zá'gaca ga na' zë'ë, dijódxigaca Lë': "Padiux."

¹⁶ Ní'irö Jesús gunábiné' yugu' bönni' uséda queé' na', rnné':

—¿Bizxi didza' na' ridíl-lalenli' légaquié'?

¹⁷ Bubi'ë didza' tu bönni' nütse'ë ladaj bönachi zían na', rnné':

—Bönni' Usedi, naché'a-bi' bi'i bönni'do' quia' ni quiu', yu'u lëbi' bö' xihui' le run ga biti' raca innébi'. ¹⁸ Cate' bö' xihui' na' ru'u lëbi', rurixi rutula lëbi' lu yu, ate' ribía bidxina' zidi' ruá'abi', en rutil-la láya'bi'. Que lë ni na' zeaj ridxítabi'. Gunábigacada'-né' bönni' uséda quiu' ulu'béajé' bö' xihui' na', pero biti' gula'zéqui'né'.

¹⁹ Bubi'ë didza' Jesús, rnné':

—Libí'ili', bönni' cabí ta'yéajlé'ë. ¿Gáca'xte caz ral-la' sóalena' libí'ili'? ¿Gáca'xte caz ral-la' guá' ilena' queé'li'? Guli'diguá'-bi' quia' ni.

²⁰ Dujuá'agaquié'-bi' ga na' zoé' Jesús. Cate' bö' xihui' na' bil'é Lë', la' buxízité lëbi'. Gudzó'öbi' lu yu, ate' burixi butula lëbi', ate' bidxía bidxina' zidi' ruá'abi'. ²¹ Ní'irö Jesús gunábiné' xúzibi' bi'i na', rnné':

—¿Gáca'xi chiguca raca caní queé'bi'?

Rnné' xúzibi' na':

—Ni' nácatébi' bí'ido' ré'ebi' caní. ²² Zían luzuí rirú'una lëbi' lu guí', en lu nisa para guti lëbi'. Que lë ni na', channö racu' lati', buéchi' ladxi' netu', gácalenu' netu'.

²³ Jesús gudxé' lë':

—Channö huáca tséajlé'u, yúgu'té huáca channö tséajlé'u Dios.

²⁴ La' bé'té' zidzaj didza' xúzibi' bi'i na', rnné':

—¿Réajlé'a! ¿Gúcalen neda' para tséajlé'ëra' Lë'!

²⁵ Cate' bilé'ené' Jesús zá'gaca bönachi zían, tu'quí Lë', buzené' bach bö' xihui' na', ré' le:

—Li', bö' xihui' runu' ga biti' raca inná, en biti' raca yöni bönachi, rinná bé'eda' li' uruju' lu bi'i ni, en bítirö tsu'u lëbi'.

²⁶ Guródxí'a bö' xihui' na', en burixi butúlada' bi'i na'. Ní'irö burúajté, en bucá'ana bi'i na' ca bi'i nati cázabi'. Ca' naca, gulu'i didza' bönachi zían ni', ta'nná:

—Chinátibi'.

²⁷ Ní'irö Jesús gudélë'ë ná'abi', en buchisë'-bi', ate' guzu'íbi' bi'i na'.

²⁸ Ní'irö guyázië' Jesús tu yu'u, ate' la' légacasë' gula'nábinë' bönni' usëda queë' Lë', ta'nnë':

—¿Bizx que biti' guca ubéajtu' netu' bö' xihui' na'?

²⁹ Jesús gudxë' légaquië':

—Biti' gaca ubéajli' cá'asö bö' xihui' caní, pero tuz channö ulídzali'-në' Dios, en gunli' gubasa.

Jesús rigu'xjö'ë leyúbölö ca si' ilútië' Lë'

(Mt. 17:22-23; Lc. 9:43-45)

³⁰ Cate' bulu'zë'ë Jesús, en yugu' bönni' dá'gaquië' Lë' ni', gula'dödë' luyú Galilea. Biti' ré'ënë' Jesús nu inözi ga na' zoë' ³¹ tu' rusédinë' yugu' bönni' usëda queë'. Ré' légaquië':

—Ulu'dödë' neda', Bönni' Guljë' Bönachi, lu ná'agaquië' bönni' ilútië' neda', pero tödi gátia', cate' gaca tsonna dza ubana'.

³² Biti' gula'yéajni'inë' didza' ni ré' légaquië', ate' tu' tádxinë', biti' bi gula'nábinë' Lë'.

Nu naca lo

(Mt. 18:1-5; Lc. 9:46-48)

³³ Ní'irö Jesús, en bönni' dá'gaquië' Lë' bila'dxinë' yödzö Capernaum, ate' tsanni ni' nacu'ë lu yu'u, Jesús gunábinë' légaquië', rnnë':

—¿Bizxi didza' na' gudí'l-lalen luzá'ali' cate' ni' yú'uli' nöza?

³⁴ Légaquië' bulu'sayaj rú'ugaquië', tu' gula'dí'l-lalen luzá'agaquië' didza' la' nöza ni' núzxilögaquië' gáquië' bönni' lo. ³⁵ Ní'irö gurö'ë Jesús, en bulidzë' idxínnutë' bönni' usëda queë'. Ré' légaquië':

—Nu ré'ëni gaca lo ral-la' gaca ca tu bönni' cuídi'sö, enca' ca ni'a ná'ali' yúgu'tëli'.

³⁶ Ní'irö Jesús gudélë'ë-bi' tubi' bí'ido', en buzöë'-bi' gatsaj láhui'lö ga na' nacu'ë. Ni' runidë'-bi', ré' légaquië':

³⁷ —Nu bönni' si' lu në'ë tu bí'ido' caní tu' néquibi' quia', si' lu në'ë ca' neda', ate' nu bönni' si' lu në'ë neda', calëga néda'sö si' lu në'ë, pero si' lu në'ë ca' Xuza', Bönni' na' nasól-lë'ë neda'.

Nu biti' ridá'baga' rë'u, rácalen rë'u

(Mt. 10:42; Lc. 9:49-50)

³⁸ Ní'irö Juan gudxë' Jesús:

—Bönni' Usedi, bilé'etu'-në' tu bönni' rubéajë' yugu'bö' xihui', rugunë' dxin lo'. Gunná bé'etu' lë' bíti'rö gunë' ca', tu' cabí dë'ë rë'u.

³⁹ Ní'irö Jesús gudxë' lë':

—Biti' inná bé'eli'-në', tu' channö zoë' nu bönni' runë' tu yöl-la' huáca le za' yehua' yubá, en rugunë' dxin La' neda', biti' ca' gaca bönni' na' inné' zi'ë quia'. ⁴⁰ Caní naca, nu biti' ridá'baga' rë'u, rácalen nu na' rë'u. ⁴¹ Núti'tës nu gunna queéli' tu zxíga'do' nisa gu'jali' tu' dá'ali' neda', Cristo, si'i caz nu na' le ral-la' gata' que.

Zoa bönadxi queéru' gunru' ga nu gun dul-la'

(Mt. 18:6-9; Lc. 17:1-2)

⁴² Gunnë' ca' Jesús:

—Núti'tës nu gun ga gunbi' dul-la' tubi' bí'ido' caní réajlë'ëbi' neda', gácarö dxi'a ugal-la' nu na' guichi riyëtu yaga yeni, en tsöjchú'una cuini lu nísado'. ⁴³ Channö tu no'o gun ga gunu' dul-la', guchugu le. Dxí'arö gaca quiu' tsöjtsáziu' ga su' ibanu' zoa tuz no'o, calëga zoa chopá no'o, ate' tsöjtsáziu' lu guí' gabila, ga ni' biti' ulu guí' que. ⁴⁴ Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu. ⁴⁵ Lësca' caní, channö tu ni'u gun ga gunu' dul-la', guchugu le. Gácarö dxi'a quiu', tsöjtsáziu' ga su' ibanu' zoa tuz ni'u, calëga zoa chopá ni'u, ate' tsöjtsáziu' lu guí' gabila, ga ni' biti' ulu guí' que. ⁴⁶ Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu. ⁴⁷ Lësca' caní, channö tu guió'j lo' gun ga gunu' dul-la', guléaj le. Gácarö dxi'a quiu'

tsöjtsáziu' ga rinná bē'ē Dios zoa tuz guió'j lo', calēga zoa chopa guió'j lo', ate' tsöjtsáziu' lu guí' gabila. ⁴⁸ Lataj ni' bití' ilátiba' buzuga' yú'ugacaba' nupa tsöjcuá' ni', ate' guí' na' bití' ca' ulu.

⁴⁹ 'Ruxi'iru' bēla' zōdi', en rugála'ru' le ra' guí', para cabí' gaca ditaj. Lē ni rusedi rē'u ca ulu'huó'aca dxi'a yúgu'tē bōnachi. Lē'sca' caní, ré'ēnē' Dios izxí'i zōdi' yúgu'tē bōa' bédxido' tu'zégui'gaquiē'-ba' lu bucugu lá'ayi queē'. ⁵⁰ Dxi'a naca zōdi', pero channō initi yōl-la' siná'a que, ¿nacxi úniru' le siná'a? Guli'gaca la' libí'isili' ca zōdi' dxi'a, sóali' dxí'ado' tuli' len ia'tuli'.

10

Rusédinē' Jesús que nu rulá' yōl-la' nutsaga na'

(Mt. 19:1-12; Lc. 16:18)

¹ Buzé'ē Jesús yōdzō Capernaum, ate' guyijē' luyú' Judea, en gudödē' ia'tsölá'a yegu Jordán saca' ga rilén gubidza. Bulu'dubi leyúbölö bōnachi zían ga zoē', ate' leyúbölö busédinē' légaquiē' ca run cazē'. ² Ní'irō bila'dxinē' bōnni' yudo' fariseo ga zoē' Jesús, ate' té'ēnnē' ilunē' ga bi innē' Jesús para gaca ulu'zéguiē' Lē' didza'. Gula'nábinē' Lē', ta'nnē':

—¿Dē lataj bōnni' nutsaga nē'ē usanē'-nu nigula queē'?

³ Bubi'ē didza' Jesús, rnnē':

—¿Bizxi gunná bē'enē' Moisés libí'ili'?

⁴ Gula'nnē':

—Moisés bē'ē lataj nu bōnni' uzúajē' lu guichi le rnna rulá'alenē'-nu nigula queē' na', ate' ní'irō usanē'-nu.

⁵ Bubi'ē didza' Jesús, rnnē':

—Gunná bē'enē' Moisés libí'ili' caní tu' naca zidi icja lādxi'do'oli', ⁶ pero cate' gusí lo rata' yōdzōlió, Dios benē' légaquiē' bōnni', en nigula. ⁷ Gunné': "Que lē ni na' ucá'anē' bōnni' xuz xiné'ē, en tsöjsóalenē'-nu nigula queē', ⁸ ate' chopē' ni ulu'huó'áquiē' ca tuz bōnachi." Que lē ni na' bítí'rō nácagaquiē' chopē' pero tuz chinácagaquiē'. ⁹ Que lē ni na' ca', nu naca bōnachi bití' ral-la' ulá'a nupa na' chinutságuiē' Dios.

¹⁰ Cate' gula'yáziē' yu'u, gula'nabi yúdxinē' bōnni' usēda queē' Jesús ca naca didza' na' bē'ē. ¹¹ Jesús gudxē' légaquiē':

—Núti'tēs bōnni' ulá'alenē'-nu nigula queē', en utsaga ná'alenē'-nu nigula yúbölö, runē' dul-la' le riguitsaj xibá que yōl-la' nutsaga na' tu' rsubáguē'ē-nu dul-la' nigula na' guzóalenē'-nu zí'aló. ¹² Lē'sca' caní channō tu nigula nutsaga ná'lennu bōnni' usannu-nē', en sí'inu-nē' bōnni' yúbölö, runnu ca' dul-la' le riguitsaj xibá que yōl-la' nutsaga na'.

Jesús rulidza tsáhuē'ē-bi' yugu' bí'ido'

(Mt. 19:13-15; Lc. 18:15-17)

¹³ Ní'irō bila'dxín bōnachi ga zoē' Jesús dujuá'gaquiē' bí'ido' quéguequi. Té'ēni ixóa nē'ē légacabi', ate' gula'sí lógaquiē' bōnni' usēda queē' Jesús ta'dil-la' dídza'gaquiē' nupa na' dujuá'agaca légacabi'. ¹⁴ Cate' bilé'enē' Jesús lē ni, gulénē' légaquiē', en gunné':

—Gulí'güi'-gácabi' bí'ido' lataj ila'dxinbi' quia'. Bití' uzága'gacali'-bi', tu' gata' quégaca nupa nácagaca ca bí'ido' ni, lataj ga rinná bē'ē Dios. ¹⁵ Le nácate' rea' libí'ili': Nu cabí' sí' lu nē'e le rinná bē'ē Dios ca runbi' tu bí'ido', bití' ca' tsaza ga ni' rinná bē'ē.

¹⁶ Ní'irō Jesús bunidē'-bi' yugu' bí'ido' na'. Guxóa nē'ē légacabi', en bulidza tsáhuē'ē-bi'.

Bōnni' cuidi' napē' yōl-la' tsahui'

(Mt. 19:16-30; Lc. 18:18-30)

¹⁷ Cate' bu'ē Jesús nōza, carelö bidē' tu bōnni', en buzóa zxibē' lahuē' Jesús, en gunábinē' Lē', rnnē':

—Bōnni' Usedi idú dxi'a, ¿nacxi guna' para idéli'da' yōl-la' na'bán idú?

¹⁸ Jesús gudxē' lē':

—¿Bizx que ru'u neda' didza', rnno': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. ¹⁹ Chinóz quézinu' yugu' le gunná bë'ë Dios, gunné': Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innió' que luzó'o le cabí nácatë.

Biti' ucáchi'lanu'.

Ben bal xuz xinó'o.

²⁰ Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni' nácatea' b'ido'.

²¹ Len yöl-la' dxi'i ladxi' queë', Jesús buyúë' lë', rnnë':

—Tu le riyadzaj quiu'. Guyéaj, yöjëti' yúgu'të le dë quiu', en bunödzej quégaca bönachi yechi' lë na' si'u, atë' gata' quiu' yöl-la' tsahui' yehua' yubá. Ní'irö huödu' quia', gacu' ca tu bönni' sa'yéajë' söjtë'ë lë'e yaga cruz, atë' to'o neda'.

²² Cate' biyönnë' didza' ni, bu'innë', atë' söhuójë' risëbi ládxë'ë tu' dëda' yöl-la' tsahui' queë'.

²³ Ní'irö buyúë' Jesús gásibi'ilë', en gudxë' yugu' bönni' usëda queë':

—Böniga naca ila'yaza nupa ta'lë'e yöl-la' tsahui' ga rinná bë'ë Dios.

²⁴ Bulu'bábinë' bönni' usëda queë' ca naca xtídzë'ë, atë' leyúbölö Jesús gudxë' légaquië':

—Libi'ili', xzí'ina'do', böniga naca ila'yázië' bönni' tu'zxöni ládxi'gaquië' yöl-la' tsahui' quégaquië' ga rinná bë'ë Dios. ²⁵ Nácarö böniga tsázië' nu bönni' rilë'enë' yöl-la' tsahui' ga rinná bë'ë Dios, ca tódiba' böa' ta'bía-ba' bönachi lu nagui yötsi'.

²⁶ Cate' bila'yönnë' didza' ni, bulu'bánitëronë' ca'. Ta'nnë' la' légacasë':

—¿Nuzxi caz gaca ulá, channö?

²⁷ Buyúë' Jesús légaquië', rnnë':

—Biti' gaca gun bönachi lë ni, pero huáquië' Dios, tu' rizéqui'në' Dios yúgu'të.

²⁸ Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Li'.

²⁹ Bubi'ë didza' Jesús, rnnë':

—Le nácatë rea' lib'i'ili', nu bönni' ucá'anë' lidxë', o bóchë'ë, o zanë', o xuzë', o xinë'ë, o nigula queë', o yugu' xzí'inë', o xiyúë', tu' runë' xichina' o tu' runë' libán que didza' dxi'a quia', ³⁰ bönni' ni huazí' queë' ia'tú gayuá'tërö ca' dza ni zóaru' na'a, yugu' lidxë', en yugu' bóchë'ë, en yugu' zanë', en yugu' xinë'ë, en yugu' xzí'inë', en yugu' xiyúë', enca' yugu' le ila'bía ládxi'gaca bönachi lë', atë' lu yödzölió si' za', gata' yöl-la' na'bán idú queë'. ³¹ Zián nupa nácacaga lo na'a, ilaca cuídi'sö ni', atë' nupa nácacaga cuídi'sö na'a, ilaca lo ni'.

Leyúbölö rigúxjö'ë Jesús ca si' ilútië' Lë'

(Mt. 20:17-19; Lc. 18:31-34)

³² Cate' ni' yú'ugaquië' nöza, ta'benë' söjáquië' Jerusalén, nanóruë' Jesús lógaquië' bönni' usëda queë'. Nanítiguequinë', en lu yöl-la' rádxisö söjácalenë' Lë'. Leyúbölö Jesús guchë'ë quez idxínnutë' na'. Gusí lahuë' ruí'ilenë' légaquië' didza' ca naca le ral-la' gaca queë'. ³³ Rnnë':

—Rilë'e quézili' ribenru' zéajru' Jerusalén ga ni' zoa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usedi, atë' chúguië' quia' gátia', en ulu'dödë' neda' lu ná'agaquië' bönni' zi'tu'. ³⁴ Bönni' na' ulu'titjë' neda', en ilúndë'ë neda' zi'. Ulu'chejë' neda' zxöna'. Ní'irö ilútië' neda', pero cate' gaca tsonna dza ubana' lu yöl-la' guti.

Jacobo en Juan ta'nábinë' Jesús bi gunë' quégaquië'

(Mt. 20:20-28)

³⁵ Ní'irö gula'bigüë'ë Jacobo, en Juan, xzí'inë' Zebedeo, lahuë' Jesús, en të' Lë':

—Bönni' Usedi, ré'ënitü' gunu' queëtu' le inábatu'.

³⁶ Jesús gudxë' légaquië':

—¿Bizxi ré'ënili' guna' queéli'?

³⁷ Gulé' Lë':

—Cate' idxín dza cö'u ga inná bë'u, ben ga có'ötu' tutu' cuitu' ibëla, en ia'tutu' cuitu' yógöla.

³⁸ Ní'irö Jesús gudxë' légaquië':

—Biti' nózili' bi rinábalí'. ¿Naru' huáca sí'ili' le ral-la' sí'a neda', le naca le qui'i saca'a? ¿Naru' huáca idílali' nisa ca idila' neda' nisa, gátia'?

³⁹ Bulu'bi'ë didza', ta'nné':

—Huácatu'.

Jesús gudxë' légaquië':

—Le nácatë, le qui'i saca'a neda', sí'ili' ca' libí'ili', en ca idila' neda' nisa, idílali' ca' nisa, ⁴⁰ pero bití' dë lu na'a cóa' nu cuía cuita' ibëla, en nu cuía cuita' yógöla. Dios unödzejë' quégaquië' bönni' chinupé'ë quégaquië' yugu' lataj na'.

⁴¹ Cate' bila'yönnë' ia'chíë' bönni' usëda queë' Jesús didza' ni, gula'lenë' Jacobo, en Juan na'. ⁴² Ní'irö Jesús bulidzë' légaquië', rnnë':

—Nöz quézili' ca tun nupa ta'nná be'e yugu' yödzö, tu'zenë' bach bönachi, ate' nupa nácgaca lo ladjagaquië' ta'nná be'e luzé'eguequi. ⁴³ Biti' gaca caní queéli', pero nu gué'ëni gaca zxön ga zóali', ral-la' gun xichinli' ia'zica'röli', ⁴⁴ ate' núti'tëslöli' nu gué'ëni gaca lo ral-la' gaca ca bönni' huen dxin tsaz queéli' yúgu'tëli'. ⁴⁵ Caní ral-la' gunli' tu' bida' ni neda', Bönni' Guljë' Bönachi, calëga para nu gun xichina', pero para guna' xichíngaca bönachi, en udöda' yöl-la' na'bán quia' le huóá'uuda' bönachi zían.

Jesús ruúnë' Bartimeo, bönni' lo chul-la

(Mt. 20:29-34; Lc. 18:35-43)

⁴⁶ Ní'irö bila'dxinë' Jesús, en yugu' bönni' dá'gaquië' Lë' yödzö Jericó. Cate' ni' rurujë' Jesús yödzö ni, dzágagaquië' Lë' yugu' bönni' usëda queë', enca' bönachi zían. Ra' nöza ni' rö'ë tu bönni' nachul-la lahuë', lë' Bartimeo, xzí'inë' Timeo. Rinabë' nu bi gúnna'sö queë'. ⁴⁷ Cate' biyönnë' Bartimeo ridödë' Jesús, bönni' Nazaret, ni', gusí lahuë' ru'ë zidzaj didza', rnnë':

—¿Jesús, xzí'ini xi'sóë' David! ¿Buéchi' ladxi' neda'!

⁴⁸ Nupa ta'dödi ni' gula'dil-la lë' didza'. Të lë':

—Busayaj ru'u.

Ní'irö zídzejrö bulidzë', rnnë':

—¿Xzí'ini xi'sóë' David! ¿Buéchi' ladxi' neda'!

⁴⁹ Ní'irö guzóë' dxisö Jesús, ribözë', ate' ré' légaquië':

—Buli'lidzë'.

Bulu'lidzë' bönni' na' nachul-la lahuë'. Të lë':

—¿Butipa ladxu'u! ¿Guyaschi! ¿Rulidzë' li'!

⁵⁰ Ní'irö gurú'unë' tsölä'alö lari' naxóa yenë'. La' guyásatë', en bidë' ga na' zoë' Jesús. ⁵¹ Jesús gunábinë' lë', rnnë':

—¿Bizxi ré'ënu' guna' quiu'?

Bubi'ë didza' bönni' na' nachul-la lahuë', rnnë':

—Bönni' Usedi, ré'ënda' gunu' ga huóalaj guió'j lahua'.

⁵² Jesús gudxë' lë':

—Böaj lidxu'. Chinuhuóacu' tu' réajlë'u neda'.

La' böáljatë guió'j lahuë', ate' sa'yéajlenë' Jesús.

11

*Riyazië' Jesús yödzo Jerusalén**(Mt. 21:1-11; Lc. 19:28-40; Jn. 12:12-19)*

¹ Bila'dxinë' Jesús, en yugu' bönni' dá'gaquië' Lë' gala' ga dë Jerusalén, ga na' nacua' yödzo Betfagé, en yödzo Betania, en ga na' dë ca' Guí'a Yaga Olivo. Ní'irö Jesús gusól-lë'ë chopë' bönni' usëda queë', ² en rë' légaquië':

—Guli'tséaj lu yódzodo' dë loru' ni', en cate' tsú'uli' ni', tsöjxáca'li'-ba' tuba' búrrodo' nága'ba' ni', en cuntú nu ribíani lëba'. Guli'sedxi-ba', en guli'ché'-ba' quia' ni. ³ Channö nu bi guíë libí'ili' tu' runli' lë ni, guli'guíë nu na': "Xanru' riquinnë'-ba', ate' la' usól-la'të'-ba' quiu'."

⁴ Ní'irö yójáquië', en yöjxáca'gaquië'-ba' búrrodo' na', nága'ba' ra' nöza ga nu riyaza lö'a, ate' gula'sedxë'-ba'. ⁵ Nupa nacua' ni' tē légaquië':

—¿Bizxi ni runli'? ¿Bizx que risédxili'-ba' búrrodo' na'?

⁶ Bulu'bi'ë didza' bönni' usëda queë' Jesús, gulé' légaquië' ca na' chigudxi cazë' Jesús légaquië', ate' gulu'ë légaquië' lataj. ⁷ Ní'irö gula'ché'ë-ba' búrrodo' na' ga na' zoë' Jesús. Gula'xóë' lari' quégaquië' cúdzu'ba', ate' Jesús gudxíë'-ba'. ⁸ Zián bönni' nacué' ni' gula'chiljé' lari' quégaquië' gapa naca la' nöza. Ia'bal-la bönachi ni' gula'guítsaj zin le bulu'zxóa la' nöza.

⁹ Gula'sí lo nupa nanórugaca lahuë' Jesús, en nupa na' zá'gaca cúdzu'lë' tu'i zidzaj didza', ta'nnë':

—¿Yöl-la' ba! ¿Xanru' Dios gun lá'ayë' Bönni' zë'ë ni, nasól-lë'ë Dios Lë'! ¹⁰ ¿Dios gun lá'ayë' Bönni' ni si' inná bē'ë, ca na' gunná bē'ë xuz xtó'oru' David! ¿Yöl-la' ba Dios!

¹¹ Caní guca, bidxinë' Jesús Jerusalén, ate' guyazië' lö'a yudo'. Cate' budxi buyúë' yúgu'të le nacua' idú gásibi'ilö ni', burúajë' zaca' yödzo Betania tu' chiridzó', ate' dzágagaquië' Lë' yugu' bönni' usëda queë'.

*Jesús rulidza zi'ë tu yaga higo**(Mt. 21:18-19)*

¹² Cate' za' rení' ia'tú dza, ate' tu'rúajë' Jesús, en yugu' bönni' dá'gaquië' Lë' yödzo Betania, ridunë' Jesús. ¹³ Zi'tu' bilé'enë' tu yaga higo dxía xilagui'. Gubígui'ë ga na' zoa yaga na' channö utsöjxaquië' lati' le ribía. Cate' bidxinë' ni' bití' bi yöjxáquië' le ribía. Xilágui'sö dxía tu' cabí ridxini dza cuía. ¹⁴ Ní'irö Jesús bulidzë' yaga na', rnnë':

—Bíti'rö nu gagu le ribía quiu'.

Yugu' bönni' usëda queë' bila'yönnë' didza' ni.

*Jesús rulatjé' lö'a yudo'**(Mt. 21:12-17; Lc. 19:45-48; Jn. 2:13-22)*

¹⁵ Cate' bila'dxinë' Jesús, en yugu' bönni' dá'gaquië' Lë', yödzo Jerusalén, guyazië' Jesús lö'a yudo', en gusí lahuë' rubéajë' ní'ilö nupa tuti', en nupa to'o lu lö'a yudo'. Burixë' yugu' blaga quégaca nupa tu'tsá' dumí izá'a, enca' yugu' ga ta'bó' nupa tuti' yugu' gu'dödo'. ¹⁶ Bití' ca' bē'ë lataj nu bi guá', uzóa nöza ga naca lö'a yudo'. ¹⁷ Busédinë' nupa nacua' ni', rnnë':

—Nazúaj lu guichi lá'ayi, rnna: "Lidxa' si'i le, yu'u ga bönachi idútë yödzülió ulu'lidza Dios." Libí'ili' chinunli' le ca naca lídxigaca gubán.

¹⁸ Cate' yugu' bixúz unná bē', en yugu' bönni' yudo' usedi bila'yönnë' didza' ni, gula'sí lógaquië' tu'guiljé' nacxi ilútië' Jesús, pero tu' tádxinë' le ilún bönachi, bití' bi gulunë' queë', tu' tu'bani yúgu'të bönachi ca naca le rusédinë' Jesús. ¹⁹ Cate' chiridzó' burúajë' Jesús lu yödzo na'.

*Ribidxi yaga higo bulidza zi'ë Jesús**(Mt. 21:20-22)*

²⁰ Cate' za' rení' ia'tú dza, gula'dödë' Jesús, en yugu' bönni' dá'gaquië' Lë' ga zoa yaga higo na' bulidza zi'ë Jesús, en bila'lé'enë' le, chinabidxi idú luí. ²¹ Ní'irö yójnenë' Pedro bi guca, ate' gudxë' Jesús:

—Bönni' Usedi, buyútsöca'. Chinabidxi yaga higo ni bulidza zi'u néaje.

²² Bubi'ë didza' Jesús, rë' légaquië':

—Guli'tseajlë' Dios. ²³ Le nácatë rea' libí'ili', channö nu bönni' guíë' guí'ado' ni: “Gucuíta ni, yójsóa lu nísado”, en biti' gaca chopá ládxe'ë bönni' na', pero idú ládxe'ë tseajlë'ë gunë' Dios ca na' rnnë', ca' gaca. ²⁴ Que lë ni na' rea' libí'ili': Yúgu'të le inábali' cate' ulídzali'-në' Dios, guli'tséajlë' chibennë' Dios queéli' lë na' rinábali', ate' gunnë' queéli'. ²⁵ Cate' ni' rulídzali'-në' Dios, channö zoa nu rileli' nu bi ben queéli', buli'niti lo nu na', para uniti lahuë' ca' libí'ili' Xúzili' na' zoë' yehua' yubá ca naca dul-la' nabága'li'. ²⁶ Channö cabí uniti lolí' bönachi, biti' uniti lahuë' Xúzili' zoë' yehua' yubá libí'ili' dul-la' nabága'li'.

Yöl-la' unná bë' dë lu në'ë Jesús

(Mt. 21:23-27; Lc. 20:1-8)

²⁷ Ní'irö Jesús, en yugu' bönni' dá'gaquië' Lë' yójhuójgaquië' Jerusalén. Cate' ni' ridé' Jesús ga naca chila yudo', bila'dxinë' yugu' bixúz unná bë', en yugu' bönni' yudo' usedi, en bönni' gula tu'zéajni'inë', ga zoë'. ²⁸ Gula'nábinë' Jesús, ta'nnë':

—¿Bizxi yöl-la' unná bë' dë lu no'o runu' yugu' lë ni? ¿Nuzxi caz budödi lu no'o yöl-la' unná bë' gunu' caní?

²⁹ Bubi'ë didza' Jesús, rë' légaquië':

—Neda' ca' inábida' libí'ili' tu didza'. Channö ubí'ili' quia' didza', ní'irö guía' libí'ili' bi yöl-la' unná bë' rúnida' yugu' lë ni. ³⁰ ¿Nuzxi budödi lu në'ë Juan uquilë' bönachi nisa? ¿Naru' Dios o bönachi? Guli'nnátsöca'.

³¹ Gula'sí lógaquië' tun xtídza'gaquië' la' légacasë', ta'nnë':

—Channö innaru' Dios gusól-lë'ë lë', guíë' rë'u: “¿Bizx que biti' guyéajlë'ëli' lë'?”

³² ¿Naru' guíëtsaru'-në': Gula'sól-lë'ë bönni' lë'?

Caní ta'zá' ládxi'gaquië' tu' tádxinë' le ilún bönachi zían nacuá' ni' tu' téquiguequi yúgu'të bönachi na' bë'ë didza' Juan na' uláz queë' Dios. ³³ Que lë ni na' gulé' Jesús:

—Biti' nöztu'.

Ní'irö Jesús gudxë' légaquië':

—Neda' ca' biti' quíxjöi'ida' libí'ili' bi yöl-la' unná bë' dë lu na'a rúnida' yugu' lë ni.

12

Rucúdzü'ë didza' Jesús ca gaca quégaca huen dxin biti' nácagaca tsahui'

(Mt. 21:33-46; Lc. 20:9-19)

¹ Ní'irö gusí lahuë' Jesús ru'ílenë' yugu' bönni' dá'gaquië' Lë' didza' yugu' le rucúdzü'ë didza', rnnë':

—Guzóë' tu bönni', budé'ë lubá uva zían ga naca lu xiyúë'. Guléquië' lë'a que, en guchó'önë' tu röga' guíój ga isíë' xisi uva na'. Budxíë' tu yu'u gupa ga naca xitsá' ga nu uyú xiyúë' na'.

Ní'irö budödë' xiyúë' na' lu ná'agaquië' huen dxin, ila'zi'ë gatsaj huéaj le unödzej, ate' guyijë' yödzo zi'tu'. ² Cate' bidxín dza ulu'chibë' le ribía, gusól-lë'ë-bi' bi'i huen dxin tsójxí'ibi' lu ná'agaquië' huen dxin na' le ral-la' sí'ë xanbi' que le gula'bía lubá uva na'. ³ Ní'irö yugu' huen dxin na' gula'guélé'ë-bi' bi'i na', en gulundë'-bi' zi', ate' bulu'sól-lë'ë-bi' ca'asöbi'. ⁴ Ní'irö bönni' xan luyú na' gusól-lë'ë-bi' ia'tubi' bi'i huen dxin queë', ate' bi'i ni bulu'ládxë'-bi' guíój. Bulu'lë'ë ícjabí'. Gulu'ë dö' queébi'. ⁵ Ní'irö bönni' xan luyú na' gusól-lë'ë-bi' ca' ia'tubi' bi'i huen dxin queë', ate' bi'i ni gulútië'-bi'. Gusól-lë'ë-bi' ca' zíanróbi', ate' bál-labi' gulúngacadë'-bi' zi', en ia'bál-labi' gulútigaquië'-bi'.

⁶ 'Cúnturö nu nagá'ana queë' xan luyú na'. Nagá'anasibi' xzí'iné', ate' nadxí'ide'ené'-bi'. Ga yöjsetë, gusól-lë'ë-bi' xzí'iné', rnnë': "Ilunë' bal xzí'ina'." ⁷ Ní'irö yugu' bönni' huen dxin na' gula'nné' la' légacasë', ta'nné': "Bi'i ni ral-la' guequi queé'bi' luyú ni. Guli'dá, gútiru'-bi', ate' guequi queéru' luyú ni." ⁸ Que lë ni na' gula'zönë'-bi', en gulútië'-bi'. Gula'ru'unë'-bi' ní'ilö ga dá'gaca lubá uva na'.

⁹ Ní'irö Jesús gunábinë' bönni' nacu'ë ni', rnnë':

—¿Nacxi gunë' bönni' xan luyú na', channö? Huidë', en gútigaquië' bönni' huen dxin na', ate' udödë' luyú na' lu ná'gaquië' bönni' yúbölö.

¹⁰ ¿Naru' cabí nulábanili' lë na' nazúaj lu guichi lá'ayi? Caní rnna:

Guió'j na' gula'ru'unë' bönni' tu'cu'ë zö'ö, na'a naca guió'j len, squin zö'ö.

¹¹ Xanru' Dios benë' ga naca caní ate' rubániru' ca naca lë ni rilé'eru'.

¹² Ní'irö ta'zóa ta'bö'ë ila'zönë' Jesús tu' téquibe'enë' bucúdzu'ë didza' ca naca quégaquië', pero tádxinë' le ilún bönachi zían nacua' ni', en que lë ni na' bulu'cá'anë' Lë', söhuó'jgaquië'.

Ca naca le ta'guíxaj lázagaca bönachi

(Mt. 22:15-22; Lc. 20:20-26)

¹³ Gudödi lë ni yugu' bönni' yudo' unná bë' na' gula'sól-lë'ë bal-lë' bönni' yudo' fariseo len bönni' dá'gaquië' Herodes ga zoë' Jesús para ilunë' ga bi inné' para gaca ulu'zéguië' Lë' didza'. ¹⁴ Bila'dxinë' bönni' ni ga na' zoë' Jesús, en të' Lë':

—Bönni' Usedi, nózitu' ru'u didza' idútë li. Biti' ru'i ládxi'u bi ta'nnasö bönachi, tu' cabí ruyusu' le tu'lu'isö cuínguequi bönachi, pero rusédinu' ca nácatë le ré'ënë' Dios ilún bönachi. ¿Ru'i netu' lataj xibá queë' Moisés quíxaj laztu' le tu'quixjë' uláz queë' César? ¿Naru' uguíxajtu' o bití' quíxajtu'?

¹⁵ Réquibe'enë' Jesús tu'ë didza' lu yöl-la' riguí'aj ladxi' quégaquië', ate' rë' légaquië':

—¿Bíx que rubéajli' neda' didza'? Guli'diguá'tsöca' tu dumí ridá para ilé'eda' le.

¹⁶ Diguá'agaquië' le, ate' Jesús gunábinë' légaquië', rnnë':

—¿Nuzxi lahui dá' lë'e ni, en nuzxi lë ni?

Bulu'bi'ë didza', ta'nné':

—Queë' César na'.

¹⁷ Ní'irö Jesús gudxë' légaquië', rnnë':

—Buli'nödzej queë' César le nequi queë' César, ate' queë' Dios le nequi queë' Dios.

Bulu'bábinë' ca naca didza' bubí'ë Jesús.

Ca naca que yöl-la' rubán lu yöl-la' guti

(Mt. 22:23-33; Lc. 20:27-40)

¹⁸ Ní'irö bila'dxinë' bal-lë' bönni' yudo' saduceo ga zoë' Jesús. Bönni' ni ta'nné' bití' ulu'bán nupa chinátigaca. Que lë ni na' gulé' Jesús, ta'nné':

¹⁹ —Bönni' Usedi, Moisés nuzúajë' queéru' lu guichi channö gátië' tu bönni' bití' zoa bi'i queë', ate' ugá'ananu nigula queë', bi'i bóché'ë bönni' na' ral-la' utsaga ná'alénbi'-nu, en uzóabi' bí'ido' gácabi' bi'i queé'bi' bóchi'bi'. ²⁰ Gula'cuá'abi' gádxibi' bi'i ná'cagacabi' bóchi'gacabi'. Bi'i huáca na' butsaga ná'alénbi'-nu nigula, ate' gútibi', cuntú nu zoa bí'ido' queé'bi'. ²¹ Bi'i buropi na' butsaga ná'alénbi'-nu nigula uzébi na', ate' gútibi' ca', cuntú nu zoa bí'ido' queé'bi'. Lësca' caní guca queé'bi' bi'i bunny. ²² Caní guca, bulu'tsaga ná'alénbi'-nu yúgu'tëbi', cuntú nu zoa bí'ido' quégacabi'. Ga yöjsetë, gútinu ca' nigula na'. ²³ Na'a, cate' ulu'bán nupa chinátigaca, ¿núxilöbi' guéquinu nigula na' queé'bi', tu' bulu'tsaga ná'alénbi'-nu igádxitëbi'?

²⁴ Bubi'ë didza' Jesús, rë' légaquië':

—Richíxili' tu' cabí núnbë'ëli' le nazúaj lu guichi lá'ayi, en bití' nózili' ca naca yöl-la' huáca queë' Dios. ²⁵ Cate' ulu'bán nupa chinátigaca, bití' ca' ulu'tsaga ná'agaquië', ate' yugu' bönni' bití' ila'cuá'lenë' nigula, pero ilá'cagaquië' ca ná'cagaquië' gubáz lá'ayi queë'

Dios, nacu'ë yehua' yubá. ²⁶ Na'a, ca naca quégaca nupa chinátigaca channö ulu'bán, ¿naru' cabí nulábanili' le buzúajé' lu guichi Moisés? Ruí'i didza' ca na' bulidzë' Dios lë' lu yaga yótsi'do' régui. Gudxë' lë': "Neda' naca' Dios queë' Abraham, en Dios queë' Isaac, en Dios queë' Jacob." Tu' gunné' caní quégaquië', naca bë' nabángaquië' sal-la' gulatië' zí'alö. ²⁷ Dios náquië' Dios quégaca nupa nabángaca, calëga quégaca nupa nátigaca tsaz. Richíxiteröli'.

Le naca lo le gunná bë'ë Dios

(Mt. 22:34-40)

²⁸ Bidë' ca' tu bönni' yudo' usedi ga zoë' Jesús. Biyönnë' ca na' gulu'ilenë' Jesús didza', en nózinë' dxí'ado' bubí'ë Jesús didza'. Que lë' ni na' gunábinë' Jesús, rnnë':

—¿Bízxilö le gunná bë'ë Dios nácatërö lo ca yúgu'të le gunná bë'ë?

²⁹ Bubi'ë didza' Jesús, rë' lë':

—Le gunná bë'ë le nácatërö lo ca yúgu'të naca lë' na' rnna: "Guli'yöni bönachi Israel. Xanru' Dios, tuzë' Lë' náquië' Xanru'. ³⁰ Ral-la' idxí'inu' Xanu' Dios idú ládxi'u, en lu idú icja ládxi'do'o, en lu idú yöl-la' réajni'i quiu', en lu idú yöl-la' huáca quiu'." Lë' ni naca le gunná bë'ë le nácatërö lo. ³¹ Le gunná bë'ë le naca buropi, lébisö ca naca. Caní rnna: "Ral-la' idxí'inu' luzó'o ca nadxí'i cuinu'." Biti' ca' zoa ia'tú le gunná bë'ë le nácarö lo ca chopa ni gunná bë'ë.

³² Ní'irö bönni' yudo' usedi na' gudxë' Jesús, rnnë':

—Dxí'ado' gunnó', Bönni' Usedi. Le nácatë' rnno'. Tuzë' náquië' Dios, en cúnturö nu zoa naca Dios. ³³ Para idxí'iru'-në' Dios idú ládxi'ru', en lu idú yöl-la' réajni'i queéru', en lu idú icja ládxi'do'oru', en lu idú yöl-la' huáca queéru', en para idxí'iru' luzá'aru' ca nadxí'i cuinru', nácarö lesaca' ca yúgu'të böa' bédxido' rútigacaru'-ba' lu bucugu lá'ayi queë' Dios, enca' ca yúgu'të böa' bédxido' ruzégui'gacaru'-ba' lu bucugu na'.

³⁴ Cate' biyönnë' Jesús dxí'ado' rubi'ë didza' bönni' ni, ní'irö gudxë' lë', rnnë':

—Ia'láti'sö riyadzaj quiu' gúnbë'u le rinná bë'ë Dios.

Cúnturö nu burugui bi inábini Jesús.

¿Nuzxi xzí'ini náquië' Cristo?

(Mt. 22:41-46; Lc. 20:41-44)

³⁵ Cate' ni' rusédinë' Jesús bönachi ga naca chila yudo', rnnë':

—¿Bizx que ta'nnë' bönni' yudo' usedi náquië' Cristo xzí'ini xi'sóë' David? ³⁶ Lë' cazë' David na' bë'ë didza', zóalenë' Dios Bö' Lá'ayi lë', gunné':

Xanru' Dios gudxë' Xana':

"Guró'ö cuita lë'a ibëla

cate' gunra' ga ulu'zóa zxíbigaca lo'

nupa bití' ta'lé'e Li' dxí'a."

³⁷ ¿Naru' nácatsë' Cristo xzí'ini xi'sóë' David channö lë' cazë' David na' rnnë' queë' náquië' Xanë'?

Bönachi zían nacué' ni' tu'zë' nágagaca Lë' gula'yaza ládxi'gaca didza' ni.

Jesús ruzégui'ë didza' bönni' yudo' tu'sédinë'

(Mt. 23:1-36; Lc. 11:37-54; 20:45-47)

³⁸ Ni' rusédinë' Jesús yugu' bönni' dá'gaquië' Lë', rë' légaquië':

—Guli'gún chi'i cuinli' quégaquië' bönni' yudo' tu'sédinë'. Ta'yaza ládxi'gaquië' ta'dé' nilö na'lö, nácuagaquië' lari' tunna. Ta'yaza ládxi'gaquië' ca' tu'lidza tsahui' bönachi légaquië' gapa naca lu yé'ëyi. ³⁹ Ta'bö'ë yugu' lataj lo lu yu'u ga tu'dubë' tu'sédë' queë' Dios, enca' gapa tu'dubë' t'é'aj tahuë'. ⁴⁰ Rugúagaquië' lídxigacanu nigula uzëbi, en para ulu'lu'isö tsahui' cuíngaquië', xidzé tu'lidzë' Dios. Bönni' ni, gúnda'rë' Dios légaquië' xíguia'.

Le bunódzjanu tu nigula uzébidó' queé' Dios
(Lc. 21:1-4)

⁴¹ Tsanni ni' rō'ë Jesús chila yudo' ga zoa guí'ina ga ta'gú'u bönachi dumí que yudó', ruyúe' ca tun bönachi ta'gú'u dumí lu guí'ina. Dumí zían ta'gu'ë bönni' dē yöl-la' tsahui' quégaquié'. ⁴² Ní'irō bidxinnu tu nigula yechi' uzébidó' ni', ate' gulú'unu chopa dumí lásido', le nazáca'gaca láti'do'os. ⁴³ Ní'irō bulidzē' Jesús yugu' bönni' usēda queé', en rē' légaquié':

—Le nácatē rea' libí'ili', nigula yechi' uzébidó' ni' gulú'urōnu ca yúgu'tē nupa bi ta'gú'u lu guí'ina que yudo'. ⁴⁴ Yúgu'tē bönni' ni' ta'gu'ë que le nagá'anasō quégaquié', pero nigula ni, lu yöl-la' yéchi'do' queénu gulú'unu idútē la's dui tsca le dēsō queénu, le ral-la' gáhuinu.

13

Rigúxjö'ë Jesús ca si' ulu'quínnejé' yudo'
(Mt. 24:1-2; Lc. 21:5-6)

¹ Cate' burúajé' Jesús chila yudo', tué' bönni' usēda queé' gudxē' Lē', rnnē':

—Bönni' Usedi, buyútsöca' náctiga yugu' yu'u zxön ni, en náctiga yugu' guió'j lē'e zō'ö quéguequi.

² Bubi'ë didza' Jesús, rē' lē':

—Rilé'enu' yugu' yu'u zxön ni, pero biti' ca' ugá'ana guió'j lahui luzé'e ni, tu' ulu'quínnej bönachi léguequi.

Le ilaca bē' cate' si' údxi que yödzölió
(Mt. 24:3-28; Lc. 21:7-24; 17:22-24)

³ Ní'irō yójáquié' Jesús, en yugu' bönni' dá'gaquié' Lē' lu Guí'a Yaga Olivo, guí'a na' dē ca dódilō ra' yudo'. Cate' chirō'ë Jesús ni', la' légacasē' Pedro, en Jacobo, en Juan, en Andrés, gulé' Lē', ta'nné':

⁴ —Gudíxjöi'i netu' bátaxi ilaca lē ni. ¿Bizxi gaca bē' chizóa ilaca yúgu'tē lē ni?

⁵ Bubi'ë didza' Jesús, rusédinē' légaquié', rnnē':

—Gulí'gún chí'i cuinli' para cabí nu si' ye'e libí'ili'. ⁶ Ila'lá' lahué' zían bönni' si' lágaquié' ca lea' neda', ila'nné' nácaquié' Cristo. Caní ila'z'í ye'enē' bönachi zían.

⁷ 'Ní'irō cate' yónili' raca gudil-la nilō ná'alō, biti' gádxili'. Yúgu'tē lē ni ral-la' ilaca, pero biti' ridxini dza údxi. ⁸ Tu yödzö tíl-lalen ia'tú yödzö, en tu ga nu rinná bē' tsöjtíl-lalen ia'tú ga nu rinná bē'. Zían lataj tōdi budó' zxu', en tsu'u gubín. Ila'tsatsa bönachi. Yugu' lē ni ilaca le isí lo ila'guí'i ila'zaca' bönachi dza ni'.

⁹ 'Ní'irō gulí'gún chí'i cuinli', tu' ulu'dödē' libí'ili' lu ná'agaquié' bönni' yúlahui'. Ila'guiné' libí'ili' gapa tu'dubē' tu'sédē' queé' Dios bönni' judío. Idxinli' lógaquié' bönni' ta'nná bé'enē' libí'ili', en lógaquié' bönni' ta'nná bé'enē' yödzö z'itu'. Ilunē' caní queé'li' tu' dá'ali' neda', pero gunli' ba nálí quia' neda' ni'. ¹⁰ Zí'alō ca idxín dza údxi, run bayudxi gaca libán que didza' dxi'a quia' lógaca bönachi idútē yödzölió. ¹¹ Cate' ni' ila'ché'ë libí'ili', en ulu'dödē' libí'ili' lu ná'agaquié' bönni' yúlahui', biti' güi'i lādxi'li' bizxi innali'. La' dza ní'isō Dios gunné' queé'li' didza' güi'ili', ate' lē ni innali'. Cate' ni' güi'ili' didza', calēga libí'isili' na' innali', pero Dios Bö' Lá'ayi inné'. ¹² Ulu'dōdi bönachi la' bóchi'gacasō lu ná'agaquié' bönni' ilútié' légaquié'. Yugu' bönni' nacua'abi' bi'i quégaquié' ulu'dödē' la' xzí'inigaca cazē' ca', ate' xzí'inigaquié' na' ulu'dódibi' la' xuz xiná'agaca cázabi' lu ná'agaquié' bönni' ilútié' légaquié'. ¹³ Yúgu'tē bönachi ulu'zóa libí'ili' tsölá'alō tu' dá'ali' neda', pero núlōli' guá' ilenli' lē na' ga idxinrō dza údxi, uláli'.

¹⁴ 'Nupa tu'laba didza' ni ral-la' ila'yéajni'i. Buzúajé' lu guichi Daniel, bönni' ni' bē'ë didza' uláz queé' Dios, le rnna caní: "Tsaz tu le xihui' le rucá'ana cané ga naca la'ayi." Dza ní'irō ral-la' ila'zxunnaj nupa nacua' luyú Judea, en tsöjaca gapa naca lu gu'ado'.

¹⁵ Nu zoa ícjo'olō dza ni' ral-la' izxúnnajtē, en biti' huötaj zxan yu'u para tsöjzxi' bi dē

que lu yu'u. ¹⁶ Nu zoa la' guixi' ral-la' izxúnajtë, en bití' huóaj tsöjzxi' lari' rixóa yeni. ¹⁷ Bica' bayechi' yugu' nigula dza ni' nuá'agacanu-bi' bí'ido', enca' nigula tu'gádxí'nu-bi' bí'ido'. ¹⁸ Buli'lidzë' Dios inábili'-në' cabí' gun bayudxi izxúnajli' cate' raca beo' ziaga ca'. ¹⁹ Yugu' dza ni' ila'guí'ila'zaca'rö bönachi ca le guca zí'atëlö cate' si' guta' yödzölió le benë' Dios ga ridxintë na'a dza, ate' dza zá'gaca bití' gaca caní'. ²⁰ La'tu' cabí' nunë' Dios ga ulu'huóaca nabábasö yugu' dza ni', cuntú nu ulá, pero tu' nadxí'inë' nupa chiguró cazë', chinunë' queë' gunë' ga ulu'huóaca nabábasö yugu' dza ni'.

²¹ Na'a, channö nu guíë libí'ili': "Buli'yútsöca', ni zoë' Cristo", o inná: "Buli'yútsöca', ni zoë'", bití' ca' tséajlë'ëli' nu na'. ²² Ila'lá' lahuë' zían bönni' ila'zí' yé'enë' bönachi. Ila'nnë' nácagaquië' Cristo, en ila'nnë' nácagaquië' bönni' tu'ë didza' uláz queë' Dios. Ulu'luí'inë' le ilaca bë', en ilunë' yugu' yöl-la' huáca zxön. Huala'zí' yé'enë' ca' nupa guró cazë' Dios channö ila'zéqui'në'. ²³ Ní'irö libí'ili', guli'sóa ban ladxi'. Yúgu'të chigudxa' libí'ili' zí'atëlö ca gaca.

Ca huödë' Bönni' Guljë' Bönachi

(Mt. 24:29-35, 42-44; Lc. 21:25-36)

²⁴ Gunnë' ca' Jesús:

—Yugu' dza ni', tödi gaca dza na' ila'guí'ila'zaca' caní bönachi, ichul-la gubidza, en bití' cu'u bení' beo'. ²⁵ Ila'guínnaj böläj lúzxiba, en ila'zxizi le nál-lagaca nalá'gaca lúzxiba na'. ²⁶ Ní'irö ila'lé'eni neda', Bönni' Guljë' Bönachi, za'a lu böaj lúzxiba, napa' yöl-la' huáca zxön, en yöl-la' bení' quia'. ²⁷ Isól-la'gaca'-në' gubáz lá'ayi quia', ate' ulu'tubë' bönachi guró caza' quia' nacua' idapa la'a yödzölió, ga naguéla'të luyú bidxi, ga ridxintë ga naguéla' lúzxiba.

²⁸ 'Guli'tséajni'i le rusedi yaga higo ni'. Cate' ta'lén ni'a në'e hué'ënido', en rubía xilagui' yulu, nózili' chizóa idxín beo' cusubá. ²⁹ Lësca' caní, cate' ilé'eli' taca lë ni, inózili' chizóa idxín dza údxi na', en chiridzaga lo. ³⁰ Le nácatë rea' libí'ili', yúgu'të lë ni ilaca zí'atëlö ca ilátigaca nupa nacua' dza na'. ³¹ Huadödi que lúzxiba, en que luyú ni, pero xtídza'a catu caz tödi que.

³² 'Cate' idxín dza ni' o rëla ni', cuntú nu nözi. Bití' nózguequinë' gubáz lá'ayi nacu'ë yehua' yubá, en bití' nözda' neda', Zxí'inë' Dios. Tuzë' Dios Xuz nózinë'. ³³ Que lë ni na', buli'subán ládxi'li'. Guli'sóa sina', en buli'lidzë' Dios tu' cabí' nózili' bizxi dza gaca lë ni. ³⁴ Gaca ca raca cate' sa'yéajë' zí'tu' tu bönni'. Cate' chizóa uzé'ë lidxë', udödë' lu ná'agaquië' huen dxin queë' yugu' le dë queë'. Que queé'gaquië' gu'ë xichíngaquië', en inná bë'ë soa ban ladxi' nu zoa huen chí'i ga nu riyaza. ³⁵ Guli'sóa libí'ili' ban ladxi' tu' cabí' nózili' bátaxi huödë' xan yu'u, cate' chiridzó', o gatsaj lahui' yëla, o cate' ribódxiba' böra, o zílado'. ³⁶ Guli'gún caní, para cabí' idixáquië' libí'ili' rásili' channö huödë' tsálido'os. ³⁷ Lë ni rea' libí'ili', rea' ca' yúgu'të bönachi: Guli'sóa ban ladxi'.

14

Tun xtídza'gaquië' bönni' yudo' ila'zönë' Jesús

(Mt. 26:1-5; Lc. 22:1-2; Jn. 11:45-53)

¹ Ia'chopa dza ca' gaca Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. Naca laní cate' tahuë' yöta xtila bití' nazí' cúa zi que. Ta'zóa ta'bö'ë yugu' bixúz unná bë', en bönni' yudo' tu'sédinë' ila'zönë' Jesús bagáchi'sö para ilútië' Lë'. ² Ta'nnë':

—Bití' gaca sönru'-në' dza laní tu' ila'tsatsa bönachi.

Nigula rigú'unu le rilá' zxixi icjë' Jesús

(Mt. 26:6-13; Jn. 12:1-8)

³ Zoë' Jesús yödzö Betania, lu yu'u lidxë' Simón, bönni' güf'inë' huë' nudzu' ruzödi. Tsanni ni' rö'ë rahuë' Jesús, guyázanu tu nigula, nuá'anu tu bóga'do' néquini guió'j zaca',

yudzu le rilá' zxixi que yöj susén lasi idú, le nazaca' yenni'. Gulá'anu bóga'do' na', en gulú'unu le rilá' zxixi na' icjé' Jesús. ⁴ Gula'lélané' bal-lé' bönni' nacu'ë ni'. Ta'nné' la' légacasé':

—¿Bizx que guca ditaj le zxixi na'? ⁵ La'tu' nu guti' lé na', huazí' que ia'lati' ca lázxjaru' que tu iz para nu quisi le quégaca bönachi yechi'.

Gula'nnédé'ë queénu.

⁶ Ní'irö Jesús bë'ë didza', rnné':

—Gulí'güf'i-nu lataj. ¿Bizx que rinné' zí'ili' queénu? Naca dxi'a le bennu quia'. ⁷ Nacuá'lentica'sö bönachi yechi' libí'ili', en bátati'tës gué'ënili', huáca gunli' dxi'a quégaquié', pero neda' biti' sóatica'sa' ga zóali'. ⁸ Tsca le guzxéqui'nu bennu nigula ni. Cate' gulú'unu le rilá' zxixi ni neda', bupá'anu neda' zí'atélö ca igácha'a yeru ba. ⁹ Le nácaté rea' libí'ili', gáti'tës ga gaca libán que didza' dxi'a quia' idú yödzülió, soa nu quixjö' ca' lé ni bennu nigula ni quia'. Caní gaca para nu tsöjné lënu.

Rizí' lu në'ë Judas udödé' Jesús

(Mt. 26:14-16; Lc. 22:3-6)

¹⁰ Ní'irö birúajé' Judas Iscariote, bönni' nabábalené' chínnué' na' dá'gaquié' Jesús. Guyijé' ga nacu'ë bixúz unná bë' para udödé' Jesús lu ná'agaquié'. ¹¹ Cate' bila'yönné' xtídzé'ë Judas na', bulu'dzéjané', ate' gula'zí' lu ná'agaquié' ilu'ë lé' dumí. Ní'irö gusí lahué' Judas rizóa ribö'ë udödé' Jesús lu ná'agaquié'.

Le rë'aj ráguru' rusubanru' ca gútié' Xanru'

(Mt. 26:17-29; Lc. 22:7-23; Jn. 13:21-30; 1Co. 11:23-26)

¹² Naca dza risí lo laní cate' tahué' yöta xtila biti' nazí'i cúa zi que, dza na' tutié'-ba' bö'cu' xzila'do' tahué'-ba' dzö' Laní Pascua na', cate' tu'subané' ca bené' Dios busölé' bönachi judío luyú Egipto. Ní'irö bönni' uséda queé' Jesús gula'nábiné' Lé', ta'nné':

—¿Gazxi ré'ënu' tséajtu' tsöjpa'atu' le gáguru' xtsö' que Laní Pascua?

¹³ Ní'irö Jesús gusól-lé'ë chopé' bönni' uséda queé', en rë' légaquié':

—Gulí'tséaj lu yödzü. Ni' huadzágali' tu bönni' nu'ë tu rö'ö nisa. Gulí'tséajlené'.

¹⁴ Ga na' tsázié', gulí'guié' xan yu'u na': "Rnné' Bönni' Usedi: ¿Gazxi zoa yu'u ga na' gágulengaca'-né' bönni' uséda quia' xtsö' que Laní Pascua?" ¹⁵ Ní'irö ulu'íné' libí'ili' tu yu'u xzön ga naca buropi cuía ga chinabá'a. Bulí'pá'a le gáguru' ni'.

¹⁶ Bila'rúajé' bönni' uséda queé' na', en bila'dxiné' lu yödzü, ate' yöjxáca'gaquié' yúgu'té ca na' chigudxé' légaquié' Jesús. Bulu'pé'ë le ilahué' ni' que Laní Pascua.

¹⁷ Cate' chizá' ral-la, bidxiné' Jesús ni', dzágagaquié' idxínnuté' bönni' uséda queé' Lé'.

¹⁸ Tsanni ni' ró'ögaquié' tahué', bë'ë didza' Jesús, rnné':

—Le nácaté rea' libí'ili', zoa nu dzaga libí'ili', nu rágulen neda' tsözxón, nu udödi neda' lu ná'agaca bönachi.

¹⁹ Ní'irö bulu'huí'inné', en gula'sí lógaquié' tu tué' té' Lé':

—¿Naru' neda'?

Ia'túé' ca' gunné':

—¿Naru' neda'?

²⁰ Bubi'ë didza' Jesús, rë' légaquié':

—Naca tu nu nutsa' ladaj chínnuli' ni, bönni' na' nuné'ë në'ë tsözxón len na'a lu yö'öna.

²¹ Tseja' ga gátia' neda', Bönni' Guljé' Bönachi, ca na' nazúaj lu guichi lá'ayi ca gaca quia', pero bica' bayechi' bönni' na' udödé' neda' lu ná'agaquié' bönni' ilútié' neda'. Gácarö dxi'a queé' bönni' na' la'tu' cabí guljé'.

²² Tsanni ni' tahué', gudélé'ë Jesús yöta xtila. Gudxé' Dios: "Xclenu'." Buzxuzxjé' le, en bë'ë quégaquié', rnné':

—Gulí'gagu. Lé ni naca bëla' rön quia'.

²³ Gudélë'ë ca' tu xzíga'do', en gudxë' Dios: "Xclenu'." Ní'irö bë'ë quégaquië', ate' yúgu'të' gulé'ajë' le. ²⁴ Jesús rë' légaquië':

—Lë ni xichöna' le run tsutsu didza' cubi rucá'ana tsahui', le núnlenë' Dios bönachi. Rön ni ilalaj ní'a quégaca bönachi zían. ²⁵ Le nácatë rea' libí'ili', bíti' rö guí'ja' xisi uva ga idxinrö dza guí'ja' le cubi ga ní' rinná bë'ë Dios.

Jesús rnnë' innë' Pedro biti' núnbë'ë Lë'
(Mt. 26:30-35; Lc. 22:31-34; Jn. 13:36-38)

²⁶ Gudödi gulúl-lë' yöl-la' ba, bila'rúajë' sójáquië' Guí'a Yaga Olivo. ²⁷ Ní'irö Jesús gudxë' légaquië', rnnë':

—Yúgu'tëli' gaca chopa ládxi'li', ucá'anali' neda' na'a dzö', tu' nazúaj lu guichi lá'ayi, rna: "Gutia'-në' uyú bö'cu' zxila', ate' ilásilasiba' bö'cu' zxila' na'." ²⁸ Tödi ubana' lu yöl-la' guti, tseja' luyú Galilea zí'alö ca libí'ili'.

²⁹ Ní'irö Pedro gudxë' Jesús, rnnë':

—Sal-la' yúgu'të' ilaca chopa ládxi'gaquië', en ulu'cá'anë' Li', biti' ca' gaca chopa ládxa'a neda'.

³⁰ Jesús gudxë' lë', rnnë':

—Le nácatë rea' li', la' dzö' nisö, si' códxilöba' böra le buropi luzuí, tsonna luzuí innó' biti' núnbë'u neda'.

³¹ Ní'irö Pedro buzötjë' Dios, rnnë':

—Sal-la' gátilentea' Li' tsözxón, biti' ca' innía' biti' núnbë'a Li'.

Lësca' caní gula'nnë' yúgu'të'.

Jesús rulidzë' Dios la' yëla Getsemaní
(Mt. 26:36-46; Lc. 22:39-46)

³² Ní'irö Jesús, en bönni' dá'gaquië' Lë' bila'dxinë' la' yëla Getsemaní, ate' Jesús gudxë' légaquië', rnnë':

—Gulí'cö' ni, tsanni tseja' neda', tsöjlidza'-në' Dios.

³³ Jesús guchë'ë Pedro, en Jacobo, en Juan, ate' gusí lahuë' ridzóbínë', en risëbi ládxë'ë.

³⁴ Gudxë' légaquië', rnnë':

—Huati caza' lu yöl-la' risëbi ladxi'. Gulí'cöz ni, en guli'ná' yëla.

³⁵ Ní'irö guzé'ë Jesús ia'láti'do', en busudxín lahuë' lu yu, bulidzë' Dios. Gunábinë' Lë', channö huáca, ucuítë' queë' le ral-la' qui'i sáquë'ë dza na'. ³⁶ Ní' rulidzë' Dios, rnnë':

—Xúza'do', yúgu'të huáca gunu' Li'. Gucuíta lë na' ral-la' qui'i saca'a, pero calëga ca ré'ënda' neda', pero ca ré'ënu' Li', gunu'.

³⁷ Ní'irö bóajë' Jesús ga na' nacu'ë bönni' usëda queë', ate' yöjxáquië' légaquië' tasië'. Gudxë' Pedro:

—Simón, ¿rásitso'? ¿Naru' cabí rubéajtso' yëla lo' tu chí'ido'? ³⁸ Gulí'ná' yëla, en bulí'lidzë' Dios, inábili'-në' para cabí gata' lataj tu' xihui' idilú'u yöl-la' libí'ili'. Le nácatë bö' naca cázali' zoa caz sina', pero lu yöl-la' bönáchisö queéli' ricuídi'li'.

³⁹ Ní'irö sa'yéajë' Jesús leyúbölö, rulidzë' Dios, en la' tuz ca gunné'. ⁴⁰ Cate' bóajë' leyúbölö ga na' nacu'ë, yöjxáquië' légaquië' tasië' tu' nadóditë yëla lógaquië'. Biti' nózguequinë' bizxi didza' ulu'bi'ë, le ilé' Lë'. ⁴¹ Cate' bóajë' le bunni luzuí ga na' nacu'ë, rë' légaquië':

—¿Rásitsali'? ¿Ruzi'tsa ládxi'li'? ¿Tsa'ti' gaz! ¿Chibidxín dza! ¿Bulí'yútsöca', Neda', Bönni' Guljë' Bönachi, chinadóda' lu ná'agaca bönachi dul-la'! ⁴² ¿Gulí'chasa, uyéajru'! ¿Bulí'yútsöca', chizë'ë bönni' na' udödë' neda' lu ná'agaca bönachi!

Ta'zönë' Jesús
(Mt. 26:47-56; Lc. 22:47-53; Jn. 18:2-11)

⁴³ Ní' ru'ë Jesús didza' ni, bidxinë' Judas, bönni' nabábalenë' chínnuë' na' dá'gaquië' Jesús, ate' zá'lengaquië' bönni' zían lë', nuá'agaquië' guíë tuchi', en yaga. Yugu' bixúz

unná bē', en yugu' bönni' yudo' usedi, en bönni' gula tu'zéajni'inē' nasól-la'gaquiē' légaquiē'. ⁴⁴ Judas, bönni' na' rudödē' Jesús lu ná'agaquiē' chinulu'iniē' légaquiē' tu le gunē' le gaca bē' nu naca Jesús, gunné':

—Bönni' na' utsaga lahua'-nē', Lē' na' Jesús. ¡Guli'sönē', en guli'ché'ē! ¡Guli'yútsöquiē'!

⁴⁵ Cate' bidxinē' Judas ni', la' gubíga'tē' ga na' zoē' Jesús, en gudxē' Lē':

—Bönni' Usedi, Bönni' Usedi.

Ní'irö busudxín lahuē' Jesús. ⁴⁶ Ní'irö gula'zönē' Jesús, en gula'ché'ē Lē' nadzunē'.

⁴⁷ Ní'irö tuē' bönni' ni' dē'ē Jesús guléajē' guíē tuchi', en benē'-bi' huē' bi'i huen dxin queē' bixúz lo. Guchúguiē' guídi nágabi'. ⁴⁸ Jesús gudxē' bönachi na', rnnē':

—¿Narúajtsali' nuá'ali' guíē tuchi', en yaga para sönli' neda', runli' ca runli' cate' rizönli'-nē' gubán? ⁴⁹ Yugu' dza guzóalena' libí'ili' rusédigacada' bönachi ga naca chila yudo', ate' bití' guzxönli' neda', pero raca caní para gaca le nazúaj lu guichi lá'ayi.

⁵⁰ Ní'irö yúgu'tē bönni' usēda queē' Jesús bulu'cá'anē' Le', ta'zxúnajē'.

Rixúnajbi' tubi' bi'i ra'bán

⁵¹ Zóabi' ca' ni' tubi' bi'i ra'bán sönobi' Jesús, nuxóasö cuinbi' tu lari' blaga'. Yugu' bönni' na' naché'gaquiē' Jesús gula'zönē'-bi' ⁵² pero busanbi' lari' na', en xiguídisöbi' buzxúnajbi'.

Ridxinē' Jesús lógaquiē' bönni' yúlahui' lo

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Gula'ché'ē Jesús lahuē' bixúz lo, ate' bulu'dubē' ni' yúgu'tē bixúz unná bē', en bönni' gula tu'zéajni'inē', en yugu' bönni' yudo' usedi. ⁵⁴ Pedro yójnahuē' Jesús zí'tu' zí'tu'sö, en guyáziē' lö'a lidxi bixúz lo na', en guró'ölenē' tsözxón yugu' ni'a nē'ē bixúz lo na', rutsē'e cuiné' ra' guí'.

⁵⁵ Yugu' bixúz unná bē' len yúgu'tē bönni' yúlahui' lo bulu'guiljē' tu le ulu'subáguiē' Jesús para gaca ila'chúguiē' queē' gátíē' pero bití' bi bulu'dzólínē'. ⁵⁶ Bönni' zían gula'nnē' queē' Jesús le cabí nácatē, pero bití' yöjlózagaca le gula'nnē' queē'. ⁵⁷ Ní'irö gula'zuínē' yugu' bönni' gula'nnē' queē' Jesús le cabí nácatē, ta'nnē':

⁵⁸ —Netu' biyónitu' didza' bē'ē bönni' ni, gunné': “Uquínnaja' yudo' ni, lē ni nequi lu ni'a lu na' bönachi, ate' tsonna dzasö uchisa' ia'tú le cabí nequi lu ni'a lu na' bönachi.”

⁵⁹ Lē'sca' lē ni, bití' yöjlózagaca xtídza'gaquiē'.

⁶⁰ Ní'irö guyasē' bixúz lo na' gatsaj láhui'lö bönachi nacuá' ni', en gunábinē' Jesús, rnnē':

—¿Naru' cabí rubi'itso' didza'? ¿Bizxi na' ta'nnē' quiu' bönni' ni?

⁶¹ Jesús, dxisö zoē'. Bití' bi didza' rubi'ē. Gunábinē' Lē' leyúbölö bixúz lo na', rnnē':

—¿Naru' nacu' Li' Cristo, Zxí'inē' Dios Lá'ayi?

⁶² Bubi'ē didza' Jesús, rnnē':

—Naca'. Ilé'eli' neda', Bönni' Guljē' Bönachi, soa' cö'a cuitē' ibēla Dios napa cazē' yöl-la' huáca cate' ni' huöda' lu böaj lúzxiba.

⁶³ Ní'irö bixúz lo na', lu yöl-la' rilé queē' guchözē' lari' nácuē', rnnē':

—¿Núzxirö naquíniru' nu quixjö'? ⁶⁴ ¡Riyón quézili' rucá'anē' Dios cá'asö len didza' ru'ē! ¿Nacxi rusáca'li' queé'li'?

Yúgu'tē' gula'chúguiē' queē' gátíē'.

⁶⁵ Ní'irö gula'sí lógaquiē' bal-lé' tu'chejē' Jesús zxöna'. Bulu'sayjē' lahuē', en gulundē' Lē' zí', ta'nnē':

—Gunnē' yá'atsöca' nuzxi na' bē' Li'.

Yugu' bönni' ni'a nē'ē bixúz lo gula'gápē'ē ru'ē Jesús.

Rnnē' Pedro bití' núnbē'ē Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Cate' ni' zoë' Pedro lö'a zxan yu'u, bidxinbi' tubi' bi'i nigula huen dxin queë' bixúz lo na' ga na' zoë'. ⁶⁷ Cate' bilé'ebi' Pedro, rö'ë rutsé'e cuinë' ra' guí', buyubi' lë', rnnabi':

—Do'o ca' li' Jesús, bönni' Nazaret na'.

⁶⁸ Gudá'baguië' Pedro, rnnë':

—Biti' núnbë'a-në', en biti' nözda' bizxi na' rno'.

Burúajë' Pedro yöjsóë' ga nu riyaza lö'a. Ní'irö guródxiba' böra. ⁶⁹ Buyubi' lë' leyúbölö bi'i nigula huen dxin na', en gusí lobi' rëbi' nupa nacuá' ni':

—Bönni' ni dzáguië' légaquië'.

⁷⁰ Leyúbölö gudá'baguië' Pedro. Ia'lati' gudzé nupa nacuá' ni' tē Pedro, ta'nná:

—Le nácatë dzagu' légaquië', tu' nacu' bönni' Galilea. Yöl-la' ru'isö quiu' didza' naca bë'u, tu' tuz ca ru'ili' didza'.

⁷¹ Gusí lahuë' Pedro rudxía dö' cuinë', en ruzójtjē' Dios, rnnë':

—Biti' ca' núnbë'a-në' bönni' na' ru'ili' didza' ca naca queë'.

⁷² La' guródxitëba' böra le buropi luzuí. Ní'irö yöjnenë' Pedro didza' na' bë'ë Jesús, gudxë' lë': “Zi'alö códxiba' böra le buropi luzuí, tsonna luzuí innó' biti' núnbë'u neda'.” Cate' yöjnenë' didza' ni, gusí lahuë' ribódxidë'ë.

15

Ridxinë' Jesús lahuë' Pilato, bönni' rinná bë'ë

(Mt. 27:1-2, 11-14; Lc. 23:1-5; Jn. 18:28-38)

¹ Ni' naca zílado', yugu' bixúz unná bë' len bönni' gula tu'zéajni'inë', en yugu' bönni' yudo' usedi, en yúgu'të bönni' yúlahui' lo gulún xtídza'gaquië'. Ní'irö gula'ché'ë Jesús náguë'ë, en bulu'dödë' Lë' lu në'ë Pilato, bönni' rinná bë'ë uláz que yödz Roma. ² Pilato gunábinë' Jesús, rnnë':

—¿Naru' nacu' Li' Bönni' inná bé'enë' bönachi judío?

Bubi'ë didza' Jesús, rnnë':

—Ca nácatë rno'.

³ Yugu' bixúz unná bë' bulu'zéguië' Jesús didza' le zían. ⁴ Ní'irö Pilato gunábinë' Lë' leyúbölö, rnnë':

—¿Naru' cabí rubi'itso' didza'? Buzétsöca' nagu' cate' xö zían le ta'nné' quiu'.

⁵ Biti' bi didza' bubí'ë Jesús. Ca' guca, bubábinë' Pilato.

Ta'chúguië' queë' Jesús gátie'

(Mt. 27:15-31; Lc. 23:13-25; Jn. 18:38-19:16)

⁶ Dë tu le runë' Pilato cate' raca laní na', rusanë' lu ná'agaca bönachi tu bönni' nadzunë' lidxi guíë, núti'tës nu ta'naba. ⁷ Nadzunë' tu bönni' lë' Barrabás lidxi guíë, ate' dzágagaquië' lë' ia'bal-lë' luzé'ë, yugu' bönni' gulútië' bönachi cate' gula'dá'báguië' yúlahui'. ⁸ Cate' bila'dxín bönachi zían ni', gula'sí lógaquië' ta'nabë' lahuë' Pilato gunë' quégaquië' ca run cazë'. ⁹ Bubi'ë didza' Pilato, rnnë':

—¿Ré'ënilí usana'-në' queé'li' Bönni' Inná Bé'enë' Bönachi Judío?

¹⁰ Caní gunné' Pilato tu' réquibe'enë' bulu'dödë' yugu' bixúz unná bë' Jesús lu në'ë tu' tu'zxé'enë' Lë'. ¹¹ Yugu' bixúz unná bë' na' gula'gu'ë xilá ládxi'gaca bönachi zían na', para ila'nabë' lahuë' Pilato usanë' lu ná'agaquië' Barrabás. ¹² Ní'irö Pilato gunábinë' légaquië' leyúbölö, rnnë':

—¿Bizxi ré'ënilí guna' queë' bönni' na' ru'ili' lë', Bönni' Inná Bé'enë' Bönachi Judío?

¹³ Gulu'ë zidzaj didza', ta'nné':

—¿Budé'ë lë'e yaga cruz!

¹⁴ Gunábinë' Pilato légaquië', rnnë':

—¿Bizxi caz dö' nu'ë'?

Leyúbölö tu'ë zidzaj didza', ta'nné':

—¿Budé'ë lë'e yaga cruz!

¹⁵ Tu' gú'unnë' Pilato gunë' ga ila'yaza ládxi'gaca bönachi zían na', busanë' Barrabás lu ná'agaquië'. Ní'irö gunná bé'enë' nu quin Jesús, ate' budödë' Lë' lu ná'agaquië' bönni' ulu'dé'ë Lë' lë'e yaga cruz.

¹⁶ Ní'irö yugu' bönni' röjáquië' gudil-la gula'ché'ë Jesús lö'a yúlahui', ate' bulu'tubë' luzá'agaquië' ní'. ¹⁷ Bulu'gácuë' Jesús tu lari' xiná gul-la, en gulunë' tu bregui' ni'a në'e yötsi', le bulu'dxíë' icjë'. ¹⁸ Ní'irö gula'sí lógaquië' tu'lidzë' Jesús, ta'nnë':

—¡Yöl-la' ba li', rinná bé'enu' bönachi judío!

¹⁹ Gula'guínë' gui icjë', en bulu'chejë' Lë' zxöna'. Bulu'zóa zxfbigaquië' lahuë', en lu yöl-la' rutitaj gulunë' Lë' bal. ²⁰ Cate' budxi bulu'titjë' Lë', bulu'gúë' lari' xiná chul-la na' nácuë' ate' bulu'gácuë' Lë' lari' que cazë'. Ní'irö gula'ché'ë Lë' ní'ilo yúlahui' na' para tsöjda'gaquië' Lë' lë'e yaga cruz.

Tu'dé'ë Jesús lë'e yaga cruz

(Mt. 27:32-44; Lc. 23:26-43; Jn. 19:17-27)

²¹ Gulunë' ga bi'ë tu bönni' Cirene yaga cruz queë' Jesús, ridódisë' ni' suzé'ë la' guixi'. Lë' Simón, xúzgacabi' Alejandro, en Rufo.

²² Gula'ché'ë Jesús lataj na' nazí'i le Gólgota, tu didza' hebreo le rna lu didza' xidza', Lataj Que Böga' Ícjaru'. ²³ Gulu'ë le guíjë' Jesús xisi uva nutsi' nöri silá' que yaga mirra, pero Lë' biti' gu'ë le. ²⁴ Ní'irö bulu'dé'ë Jesús lë'e yaga cruz, ate' gula'guísië' lari' nácuë', le gula'zí' que queégaquië' bönni' na' röjáquië' gudil-la. Bulu'béajë' le gaca bé' para ila'nózinë' bízxilö idela' que queégaquië'.

²⁵ Naca idú xsila cate' bulu'dé'ë Lë' lë'e yaga cruz. ²⁶ Didza' na' bulu'zöë' lë'e yaga cruz ícjalë' Jesús ca naca le tu'quíë' Lë' rna caní: "Bönni' Rinná Bé'enë' Bönachi Judío." ²⁷ Bulu'dá'lenë' Jesús tsözxón lé'egaca yaga cruz chopë' gubán, tuë' cuita lë'ë ibëla, en ia'túë' cuita lë'ë yógöla. ²⁸ Caní guca lë na' nazúaj lu guichi lá'ayi, rna: Gubábalenë' bönni' tuá' dö'.

²⁹ Yugu' bönni' ta'dödë' ni' tu'lidza zi'ë Jesús, en tu'tá ícjagaquië', ta'nnë':

—¡Ön! ¿Naru' uquínajtso' yudo' queë' Dios, ate' tsonna dzasö uchísatsu' le? ³⁰ ¡Busölá cuinu' na'a, en bötaj lë'e yaga cruz na'!

³¹ Lësca' caní yugu' bixúz unná bé', en yugu' bönni' yudo' usedi tu'titjë' Lë'. Të' luzá'agaquië' tuë' ia'túë':

—Bönachi yúbölö busölë', pero biti' gaca usölá cuinë'.

³² Ta'nnë' ca':

—¡Ön! ¿Nácatsu' Cristo, Bönni' Inná Bé'enë' Bönachi Israel? ¡Bótjatsöca' na'a lë'e yaga cruz para ilë'etu', ate' tséajlë'ëtu' Li'!

Yugu' bönni' na' dá'gaquië' tsözxón len Lë' lé'egaca yaga cruz bulu'lidza zi'ë ca' Lë'.

Le guca cate' gútië' Jesús

(Mt. 27:45-56; Lc. 23:44-49; Jn. 19:28-30)

³³ Cate' bidxín idú huagubidza, guchul-la idütë yödzölió. Guca caní ga bidxintë idú ridödi xihuó. ³⁴ Idú ridödi xihuó na' bé'ë Jesús zidzaj didza', rnnë':

—Eloi, Eloi, ¿lama sabactani?

Didza' hebreo ni rna lu didza' xidza': Dios quia', Dios quia', ¿bizx que nubéaj ládxi'u neda'?

³⁵ Yugu' bönni' nacu'ë ni' bila'yönnë' didza' ni, ate' ta'nnë':

—Buli'zëtsöca' nágali'. Elías rulidzë'.

³⁶ Ní'irö guxítí'ë tu bönni' nútsë'ë ládjagaquië', en buxúpinë' nupi zi tu le bululu rë'aj nisa. Budé'ë le lahui gui, en bé'ë le xupë' Jesús, rnnë':

—Cóztsöca'ru', uyuru' channö huidë' Elías uzötjë' Lë'.

³⁷ Guródxí'ë zidzaj Jesús, en la' gútitë'. ³⁸ Biróza' lari' yödx nala' lu yudo'. Birúaj choplö, gudela' icjlö, en birúajtë zxánilö. ³⁹ Bönni' na' rinná bé'enë' bönni' röjáquië' gudil-la zuínë' lahuë' Jesús, en bilé'enë' ca na' guca guródxí'ë Jesús, en la' gútitë', ate' gunné':

—Le nácatë bönni' ni gúquië' Zxí'inë' Dios.

⁴⁰ Nacuá'anu ca' ni' nigula, zí'tu'sö tu'yunu. Nútsa'gacanu ladjagacanu María Magdalena, en Salomé, en María, xiná'agacabi' Jacobo cuidi', en José. ⁴¹ Nigula ni yöjácalennu Jesús cate' ni' gudé' luyú Galilea, en gulácalennu Lë', gula'gú'unu le gulahuë'. Nacuá'anu ca' ni' ia'bál-lanu nigula zían gula'zá'lennu Lë' lu yödzö Jerusalén.

Ta'gu'ë Jesús yeru ba

(Mt. 27:57-61; Lc. 23:50-56; Jn. 19:38-42)

⁴² Chizá' ral-la, en naca dza tu'pé'ë, dza si' idxín dza lá'ayi quégaquië' bönni' judío. ⁴³ Que lë ni na' bidë' José, bönni' yödzö Arimatea, bönni' lo ladjagaquië' bönni' yúlahui' lo. Ribözë' ca' dza idinná bë'ë Dios. Idú láchxë'ë guyázië' ga na' zoë' Pilato, en gunábinë' lë' gu'ë lë' lataj u'ë Jesús. ⁴⁴ Bubáninë' Pilato tu' gunné' chigútië' Jesús, ate' bulidzë' bönni' na' rinná bé'enë' bönni' röjáquië' gudil-la para inábinë' lë' channö chinátië' Jesús. ⁴⁵ Cate' biyönnë' ca na' gunné' bönni' na' rinná bé'enë' bönni' röjáquië' gudil-la, bë'ë José lataj u'ë Jesús. ⁴⁶ Ní'irö José na' gú'uë' tu lari' xtila dxí'ado', ate' buzötjé' Jesús lë'e yaga cruz, en buchólinë' Lë' lari' na'. Ní'irö gulu'ë Lë' yeru ba nadaj lë'e gu'a guió'j. Budé'ë tu guió'j blaga zxön ga nu riyaza ba na'. ⁴⁷ María Magdalena, en María, xiné'ë José tu'yunu ga na' ta'gu'ë Jesús.

16

Rubanë' Jesús lu yöl-la' guti

(Mt. 28:1-10; Lc. 24:1-12; Jn. 20:1-10)

¹ Cate' chinadödi dza lá'ayi quégaca bönachi judío le naca dza gadxi, María Magdalena, en Salomé, en María, xiné'ë Jacobo, ta'zí'inu yugu' le rilá' zxixi para tsöjlú'ugacanu Jesús. ² Ni' naca zílado' dza risí lo, yöjácanu ra' yeru ba queë'. Bila'dxinnu ni' cate' si' gulén gubidza. ³ Gula'nábinu luzá'agacanu:

—¿Nuzxi cúatsö queéru' guió'j na' da' ga nu riyaza ba queë'?

⁴ Cate' bila'dxinnu ni', bulu'yunu, en bila'lé'enu chinadúa guió'j na', ate' guió'j zxön naca. ⁵ Gula'yú'unu yeru ba lë'e gu'a guió'j na', ate' ni' bila'lé'enu-bi' tubi' bi'i bönni' ra'bán, nácabí' gubáz lá'ayi queë' Dios. Ró'öbi' tsölá'a ibëla lu yeru ba na', nácubi' lari' tunna chiguíchido'os. Guládxide'enu. ⁶ Ní'irö bi'i na' gúdxibi' lé'gacanu, rnnabi':

—Bíti'rö gádxili'. Ruguílajli' Jesús, Bönni' Nazaret, Bönni' na' gudé'ë lë'e yaga cruz. Chibubanë'. Biti' zoë' ni. Buli'yú ga ni gula'gu'ë Lë'. ⁷ Guli'tséaj na'a, guli'tsöjtíxjöi' ca' yugu' bönni' usëda queë', enca' Pedro. Guiéli' lé'gaquië': “Tsejé' Jesús luyú Galilea zí'alö ca libí'ili'. Ni' ulé'eli'-në' ca na' chigudxi cazë' libí'ili'.”

⁸ Ní'irö bulu'rúajnu ni', bulu'zxúnnajnu ra' yeru ba na' tu' ta'zxízinu lu yöl-la' radxi ridzöbi quégacanu. Cuntu nu gulënu ca' tu' tádxinu.

Rulu'i lahuë' Jesús lonu María Magdalena

(Jn. 20:11-18)

⁹ Cate' bubané' Jesús zílado' dza na', bulu'i lahuë' zí'alö lonu María Magdalena, nigula na' bubéajé' gadxi bö' xihui' gula'yú'u lënu. ¹⁰ Guyéajnu yöjtíxjöi'inu nupa na' gula'dalen Jesús. Nupa ni ta'sëbi láchxigaca, en ta'bödxí yechi'. ¹¹ Cate' bila'yöni didza' ru'ínu, zoë' nabanë' Jesús, ate' bilé'e quézinu Lë', bití' gula'yéajlé' lënu.

Chopë' bönni' usëda queë' Jesús tu'lé'enë' Lë'

(Lc. 24:13-35)

¹² Gudödi na', nadzá'alö buluí'i lahué' Jesús lógaquié' chopé' bönni' usëda queé' yú'ugaquié' nöza, söjáquié' ga naca ladaj guixi'. ¹³ Ní'irö bulu'dxiné', dutíxjöi'iguequiné' ia'zíca'rè', ate' ni xtídza'gaquié' biti' gula'yéajlè'è.

Le rigu'ë Jesús lu ná'agaquié' bönni' gubáz queé'

(Mt. 28:16-20; Lc. 24:36-49; Jn. 20:19-23)

¹⁴ Ga yöjsetë, buluí'i lahué' Jesús lógaquié' idxinéajtë' tsanni ni' ta'bö'ë tahué', ate' gudil-lë' légaquié' didza' tu' cabí ta'yéajlè'è Lë', en tu' naca zidi icja ládxi'do'gaquié', tu' cabí gula'yéajlè'è xtídza'gaca nupa na' bila'lé'e Lë' nubanë'. ¹⁵ Ní'irö gudxë' légaquié', rnnë':

—Guli'tséaj idútë yödzölió tsöjenli' libán que didza' dxi'a lógaca yúgu'të bönachi. ¹⁶ Nu tséajlè' neda', en idila nisa, ulá nu na', pero nu biti' tséajlè', irugu que gati nu na'. ¹⁷ Le ilaca bë' ni ilunë' bönni' ila'yéajlè'è neda'. Ulu'gunë' dxin La' neda', en ulu'béajë' yugu' bö' xihui' yú'ugaca bönachi, en ilu'ë didza' izá'a. ¹⁸ Channö ila'zönë'-ba' bëla sínia' lu ná'agaquié', o channö ile'jë' le naché' yöl-la' guti, biti' bi gun quégaquié'. Ila'xóa në'ë nupa te'e, ate' ulu'huöácätë.

Ruhuëpë' Jesús yehua' yubá

(Lc. 24:50-53; Hc. 1:6-11)

¹⁹ Cate' Xanru' budxi bé'lenë' légaquié' didza' ni, buchisë' Dios Lë' yehua' yubá ga ni' gurö'ë cuitë' ibëla Lë'. ²⁰ Bila'rúajë' légaquié', yöjéngaquié' libán yúgu'të yödzö. Gúcalenë' Xanru' légaquié', en benë' ga gulunë' le nácagaca bë' naca idútë li didza' tu'ë. Ca' naca.

DIDZA' DXI'A BUZÚAJĚ' LUCAS

Didza' rigu'ë Lucas lu në'ë Teófilo

¹ Zián nupa chigulún bayudxi ulu'zúaj lu guichi idútë le nácatë, le guca ga zóaru', ² ca na' bila'lé'e nupa ni' dza ni'te, ate' bulu'lu'í rë'u, en bulu'zé didza' que. ³ Teófilo, bönni' tsáhui'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguílaj bubéquia' ga ze lo dzö' ca naca yúgu'të lë na' guca dza ni'te. ⁴ Ruzúaja' quiu' lu guichi ni para inózinu' naca idútë li lë na' chinazëdu'.

Rulu'inë' gubáz lá'ayi queë' Dios ca si' gálajbi' Juan, bönni' uquilë' bönachi nisa

⁵ Dza ni'te cate' gunná bë'ë Herodes luyú Judea, ni' zoë' tu bixúz lë' Zacarías. Nabábalenë' cö' bixúz, nazí'i le Cö' Queë' Abías. Elisabet, nigula queë' Zacarías na' nácanu ca' xzí'ini xí'sóë' Aarón, bönni' gúquië' bixúz lo dza ni'te. ⁶ Nácagaquië' Zacarías, en Elisabet tsahui' lahuë' Dios, ate' idú ládxi'gaquië' tunë' ca rna xtídzë'ë Dios, en le rinná bë' xibá queë'. Caní guca, cuntu nu guca bi innë' quégaquië'. ⁷ Cuntu nu zoa bí'i quégaquië', tu' nácanu Elisabet nigula huödx, ate' chinagúлагаquië' irópatë'.

⁸ Guca beo' gul-la' uláz que cö' na' nabábalenë' Zacarías ilunë' dxin lahuë' Dios, lu yöl-la' bixúz quégaquië'. ⁹ Ca naca le nulaga lógaquië' tunë' bixúz, gul-la' uláz queë' Zacarías guyázië' lu lataj lá'ayi que yudo' para uzégui'ë yalaj lahuë' Xanru' Dios. ¹⁰ Tsanni ni' ruzégui'ë Zacarías na' yalaj, gula'cuá' yúgu'të bönachi ní'ilö, tu'lidza Dios. ¹¹ La' ná'sö bulu'í lahuë' gubáz lá'ayi queë' Xanru' ga zoë' Zacarías na'. Zuínë' gubáz na' tsólá'a ibëla bucugu lá'ayi ga na' régui yalaj. ¹² Cate' bilé'enë' Zacarías gubáz lá'ayi na', gurö'ë böniga, en gudxi bidzöbinë'. ¹³ Ní'irö gubáz lá'ayi na' gudxë' lë', gunné':

—Zacarías, bití' gádxinu', tu' chibiyönnë' Dios le rinabu' lahuë', ate' Elisabet, nigula quiu', uzóanu-bí' tubi' bí'i bönni'do', ate' gu'u labi' Juan. ¹⁴ Gata' quiu' le uzi'u xibé, en udzéjanu', ate' zián nupa ulu'dzeja ládxi'gaca cate' gálajbi' bí'ido' na', ¹⁵ tu' gácatëbi' zxön lahuë' Dios. Bití' guí'ajbi' xisi uva, en calëga tu le rusudxi bönachi, ate' sóalenë'-bi' Dios Bö' Lá'ayi cate' isí lo si' gálajbi'. ¹⁶ Gunë' Juan ni ga ulu'huóaca zián bönachi Israel queë' Xanru'. ¹⁷ Inóruë' lë' ca Xanru', ate' ila'cuá'alén lë' Bö' na', en yöl-la' huáca na' gula'cuá'alén Elías, bönni' bë'ë didza' uláz queë' Dios dza ni'te. Caní gunë' para únë' tuz nupa nácagaca xuz len xzí'inigaquië', en uzéajni'inë' nupa ta'dá'baga' para ilácagaca tsahui', en cocözë' bönachi para ila'zí' lu né'eguequi Xanru'.

¹⁸ Zacarías gunábinë' gubáz lá'ayi na', rnnë':

—¿Bizxi gaca bë' para inözda' ilaca lë ni? Chinagúla' neda', en chinagúlanu ca' nigula quia'.

¹⁹ Bubi'ë didza' gubáz lá'ayi na', rnnë':

—Neda' lea' Gabriel. Runa' dxin lahuë' Dios. Lë cazë' gusól-lë'ë neda' para güi'ilena' lí' didza', en usiyönda' lí' didza' dxi'a ni. ²⁰ Na'a, tu' cabí guyéajlë'u xtídz'a, icödzu', en bí'ti rö gaca innó' cate' gácarö lë ni. Yúgu'të lë ni udxín cate' idxín dza que.

²¹ Tsanni ni' raca lë ni, nacua' bönachi ní'ilö, ta'böza Zacarías, ate' tu'bani tu' ridzenë' xidzé ga na' zoë' lu lataj lá'ayi. ²² Cate' burúajë' Zacarías, bití' guca güi'ilenë' légaquië' didza', ate' guléquibe'enë' bilé'enë' tu le bulu'inë' Dios lë' lu lataj lá'ayi. Bulá'a bulu'isë' Zacarías, buzéajni'inë' légaquië', tu' cabí raca innë'.

²³ Cate' bizá'a yugu' dza na' ral-la' gunë' dxin Zacarías lahuë' Dios, ní'irö bóajë' lidxë'.

²⁴ Gudödi yugu' dza na' Elisabet, nigula queë' Zacarías na', biá'anu-bi' lé'ënu bí'ido', ate' idú gayu' beo' bugá'anasinu ga zoa lídxigaquië'. Guzá' ládxi'nu, rnanu: ²⁵ "Caní runë' Xanru' quia'. Ruzá' ládxi'ë quia' bí'ido', en runë' ga bí'ti rö utuí'ida' lógaca bönachi."

Rigúxjö'ë gubáz lá'ayi ca si' gálajbi' Jesús

²⁶ Cate' chiguca xopa beo', buluí'i lahué' gubáz lá'ayi na', tu' gusól-lé'ë Dios læ cazé' Gabriel, tsejé' Nazaret, tu yödzö luyú Galilea. ²⁷ Dios gusól-lé'ë læ' ni' tsöjyúé'-bi' tubi' bi'i nigula ra'bando' læbi' María. Chinazí' lu ná'abi' María utsaga ná'aleni'-nè' bönni' læ' José. Nababé' José dí'a dza queé' David, bönni' gunná bé'ené' bönachi Israel dza ni'te. ²⁸ Cate' guyázié' Gabriel na' ga zóabi' María, gudxé'-bi':

—Padiux. Dios ruzá' ládxé'ë quiu'. Xanru' Dios zóalené' li'. Læ cazé' bené' ga nácaru' li' bica' ba ca yúgu'tè nigula.

²⁹ Cate' bilé'ebi' María gubáz lá'ayi na', guró'öbi' böniga tu' nözi didza' na' bë'ë, en rubani ládxi'bi' nacxi sa'yéaj didza' na' bulidzé'-bi' gubáz lá'ayi na'. ³⁰ Ní'irö gubáz lá'ayi na' gudxé'-bi', rnné':

—María, biti' gádxinu', tu' chibidéli'nu' le ruzá' ládxé'ë Dios quiu'. ³¹ Na'a, tsú'ubi' tubi' bí'ido' læ'u, ate' uzú'-bi' tubi' bi'i bönni'do', ate' gu'u labi' Jesús. ³² Jesús ni tsépisëtèrè', en si' Lè' Zxí'iné' Dios, Nu nayépisëtèrö. Xanru' Dios guné' ga inná bë'ë ca na' gunná bë'ë David, xuz gula gudödi queé'. ³³ Jesús na' inná bé'etica'siné' bönachi Israel, ate' le inná bë'ë Lè' catu caz tödi que.

³⁴ Ní'irö María gunábibi' gubáz lá'ayi na', rnnabi':

—¿Nacxi caz gaca læ ni, tu' cabi' zóalena' bönni'?

³⁵ Bubi'ë didza' gubáz lá'ayi na', rë'ë-bi':

—Guidé' Dios Bö' Lá'ayi ga zu', ate' yöl-la' huáca queé' Dios, Nu nayépisëtèrö, sóalen li', le gaca ca tu zzul-la rigú'u böaj ga zu'. Que læ ni na' bi'i bönni'do' na' ral-la' gálajbi', tsú'ubi' lu në'ë Dios, ate' si' labi' Zxí'iné' Dios. ³⁶ Cá'anqueze Elisabet, nigula dí'a dza quiu', chinuá'anu-bi' lé'ënu tubi' bi'i bönni'do' sal-la' chinagúlanu. Gula'nné' queé'nu: “Nácanu nigula huödx”, pero chizéaj xopa beo' nuá'anu-bi' lé'ënu bí'ido' na'. ³⁷ Biti' bi' zoa le cabi' séqui'né' Dios.

³⁸ Ní'irö María gunabi':

—Ni zoa'. Tsaz naca' huen dxin queé' Xanru'. Gaca quia' ca na' chigunnó'.

Ní'irö la' buza'tè' gubáz lá'ayi na' ga zóabi' María.

María söjyubi'-nu Elisabet

³⁹ La' dza ní'isö guyú'ubi' nöza María, ate' carelö sa'yéajbi' ga naca gu'ado', en bidxinbi' tu yödzö luyú Judea. ⁴⁰ Ní' guyázabi' lidxé' Zacarías, en gúdxibi'-nu Elisabet:

—Padiux.

⁴¹ Cate' biyóninu Elisabet didza' na' bé'ëbi' María, la' butátè cuinbi' bi'i hué'ënido' na' yú'ubi' lé'ënu, ate' bidisóalené'-nu Dios Bö' Lá'ayi. ⁴² Ní'irö bë'ënu Elisabet zidzaj didza', rnnanu:

—¿Chinuné' Dios ga nácaru' li' bica' ba ca yúgu'tè nigula, en chinuné' ca' ga nácabi' bica' ba bí'ido' na' yú'ubi' læ'u! ⁴³ ¿Núxité neda', zá'anu xiné'ë Xana' quia'? ⁴⁴ Cate' biyönda' didza' bë'u, bulidzu' neda', lu yöl-la' rudzeja queé'bi' la' butátè cuinbi' bi'i hué'ënido' ni yú'ubi' læ'a. ⁴⁵ ¿Bica' ba li' tu' guyéajlè'u xtídzé'ë gubáz lá'ayi, ate' udxín caz læ na' gudxé' li' uláz queé' Xanru'!

⁴⁶ Ní'irö gunabi' María:

¡Idútè le naca' rigú'u Xanru' yöl-la' ba,

⁴⁷ en rudzeja ládxi'léna'-nè' Dios, Nu rusölá neda'!

⁴⁸ ¡Dios caz buzá' ládxé'ë quia' neda'!

Yu'a lu në'ë, en tsaz naca' huen dxin queé'.

Na'a isí lo, ca naca' quia' ila'nná:

Bica' ba nigula na'.

⁴⁹ ¡Zxóntèrö naca' le bené' Dios unná bë' quia'!

¡Lá'ayi naca' Lè'!

⁵⁰ Lè' ruhuéchi' ládxi'tica'sé' bönachi tadxi Lè' na'a dza, en dza zá'gaca.

⁵¹ Yugu' yöl-la' huáca zxön chibenë' Lë'.
Buzötjé' nupa gulún zxön yöl-la' réajni'i quéguequi.

⁵² Bugúë' yöl-la' unná bë' quégaca nupa gulaca lo,
en benë' ga gulaca lo nupa gulaca nöxaj ladxi'.

⁵³ Benë' ga bulu'huólaj bulu'dzé'e nupa gula'dún,
en bucá'anë' cá'asö nupa bila'lé'e yöl-la' tsahui'.

⁵⁴ Gúcalenë' bönachi Israel, nupa na' tun xichinë',
tu' yöjnenë' légaquië', en buéchi' láchxë'ë légaquië'.

⁵⁵ Benë' ca guzxí' lu në'ë gunë' quégaquië' xuz xtó'oru'
enca' queë' Abraham, en quégaca di'a dza queë'.

⁵⁶ María bugá'analenbi'-nu Elisabet idú ca tsonna beo', ate' gudödi ni' böajbi' lídxibi'.

Le guca cate' gúlajbe' Juan, bönni' uquilë' bönachi nisa

⁵⁷ Cate' bidxín dza ral-la' sóabi' bí'ido' queénu Elisabet, buzóanu-bi' tubi' bi'i bönni'do'.
⁵⁸ Bila'yöni dzaga yu'u queénu, en yugu' di'a dza queénu ca na' guca, buéchi' láchxë'ë-nu
Dios, ate' bulu'dzëjalen lënu. ⁵⁹ Cate' chiguca xunu' dza zóabi' bí'ido' na', bila'dxinë' di'a
dza queénu para ila'chúguië' lu xipéla'bi' bi'i bönni'do' na' lë na' gaca bë' néquibi' queë'
Dios, ate' té'ennë' ilu'ë labi' Zacarías ca na' lë' xúzibi'. ⁶⁰ Ní'irö bubí'inu didza' Elisabet,
xiná'abi', rnnanu:

—Calëga. Juan si' labi'.

⁶¹ Gula'nábinë'-nu, ta'nnë':

—¿Bizx que? Cuntu nu di'a dza quiu' lë' Juan.

⁶² Ní'irö bulu'lá' bulu'lu'isinë', gula'nábinë' xúzibi' nacxi ré'ënë' gu'ë labi'. ⁶³ Zacarías
na' gunabë' tu blágado', ate' buzúajë' lahui caní: Juan lëbi'. Bulu'bábinë' yúgu'të'. ⁶⁴ La'
ní'isö böáljatë ru'ë Zacarías na', en buguíjtatë lúdxë'ë, ate' bë'ë didza' le gulu'ë Dios yöl-
la' ba. ⁶⁵ Ní'irö guládxinë', en bulu'bábinë' yúgu'të dzaga yu'u quégaquië', ate' yúgu'të
yódzödo' nacuá' lu guí'ado' luyú Judea, guzé didza' ca guca lë ni. ⁶⁶ Gula'zá' láchxí'gaca
yúgu'të nupa bila'yöni ca na' guca, ta'nná: "¿Nacxi caz gácabi' bi'i bönni'do' ni? Le nácatë
Xanru' zóalenë'-bi'."

Didza' bë'ë Zacarías uláz queë' Dios

⁶⁷ Ní'irö Dios Bö' Lá'ayi bidisóalenë' Zacarías, xúzibi' Juan, ate' bë'ë didza' uláz queë'
Dios, rnnë':

⁶⁸ ¿Yöl-la' ba Dios, Xángaca bönachi Israel
tu' buduyúë' rë'u, bönachi queë', en böá'uë' rë'u!

⁶⁹ ¿Gusól-lë'ë queéru' Bönni' usölë' rë'u,
len yöl-la' huáca zxön queë'!

Bönni' ni guljé' ládajgaca di'a dza queë' David,
huen dxin queë' Dios.

⁷⁰ ¿Dza ni'te guzxí' lu në'ë gunë' ga gaca caní!

Raca ca na' gunné' lu ruá'agaquië' bönni' gulu'ë didza' uláz queë'.

⁷¹ Guzxí' lu në'ë usölë' rë'u

lu ná'agaca nupa tequi rë'u zi',
enca' lu ná'agaca nupa biti' ta'lé'e rë'u dxi'a.

⁷² Guzxí' lu në'ë huéchi' láchxë'ë xuz gudödi queéru',
en tsöjnenë' le guzxí' lu në'ë le naca lá'ayi.

⁷³ Lë ni benë' tsutsu xtídzë'ë, en guzxí' lu në'ë,
le gunë' queë' Abraham, xuz gudödi queéru',
le naca tu le ral-la' gunë' queéru' rë'u.

⁷⁴ Guzxí' lu në'ë usölë' rë'u

lu ná'agaca nupa biti' ta'lé'e rë'u dxi'a
para cabirö gádxiru' gunru' xichinë' Lë',

⁷⁵ en para gácaru' ba'a ladxi', en idú dxi'a lahuë' Lë' yúgu'të dza sóaru' ibanru'.

⁷⁶ Li', xzí'ina'do', si' lo' bönni' ru'ë didza' uláz queë' Dios unná bë' tu' tsöjnöru' ca Xanru' caz, en upó'o nöza ga tödë'.

⁷⁷ Gunu' ga ila'nözi bönachi queë' ca gaca ulu'lágaca, en ca na' uniti lahuë' Dios dul-la' nabága'gaca.

⁷⁸ Caní gaca, tu' ruhuéchi'da' ládxë'ë Dios rë'u, en runë' ga tsení' queéru' Bönni' na' náquië' bení' idú.

⁷⁹ Lë' uzení'ë quégaca nupa nacua' gapa naca chul-la, en gapa nacua' nupa chizóa ilátigaca para ugú'ë rë'u nöza ga cö'ö dxi ládxi'do'oru'.

⁸⁰ Guzxönbi' bi'i bönni'do' na', en bidipa ládxi'bi'. Guzóasibi' gapa naca lu lataj cá'asó cate' bidxinrö dza buluf'i lobi' lógaca bönachi Israel.

2

Le guca cate' gúlajbi' Jesús

(Mt. 1:18-25)

¹ Lu dza na' gunná bë'ë Augusto César, bönni' Roma, ila'yaza lu guichi yúgu'të bönachi nacua' yödzölió. ² Cate' gusi lo ta'yaza lu guichi caní, rinná bë'ë bönni' lë' Cirenio luyú Siria. ³ Yúgu'të bönachi yöjaca yödzö que queé'guequi ga na' zeaj nababa para ila'yaza lu guichi. ⁴ Guzé'ë José yödzö Nazaret luyú Galilea, sa'yéajë' luyú Judea, en bidxinë' yödzö Belén, ga ni' guljé' David, tu' guljé' José ládajgaca di'a dza queë' David na'. ⁵ Guyijë' José ni' para tsázië' lu guichi, ate' dzágabi'-në' María, bi'i nigula nazí' lu ná'abi' utsaga ná'aleni' lë', en chizóa sóabi' bí'ido' queébi'. ⁶ Cate' ni' nacué lu yödzö Belén, bidxín dza sóabi' bí'ido' queébi'. ⁷ Buzóanu-bi' tubi' bi'i bönni'do', bi'i huáca queénu. Buchólinu-bi' yugu' lári'do', ate' gudíxjanu-bi' tu lu yú'udo' ga tun chí'i le táguba' böa' quégaca bönachi yú'ugaca nöza. Caní guca, tu' cabí bidzöli lataj ila'cu'ë lu yu'u ga ni' ta'dxín bönachi yú'ugaca nöza.

Tu'lu'i lahuë' gubáz lá'ayi queë' Dios ga nacué bönni' tu'yúë'-ba' bö'cu' zxila'

⁸ Gala' ra' yödzö Belén nacué bönni' tu'yúgaquië'-ba' bö'cu' zxila' la' guixi', tapa chí'igaquië'-ba' chí'i dzó'ölö. ⁹ La' buluf'itë lahuë' gubáz lá'ayi queë' Xanru' ga na' nacué. Yöl-la' bení' queë' Xanru' buzení' ga na' nacué, ate' guládxiné'. ¹⁰ Ní'irö gubáz lá'ayi na' gudxë' légaquië', rnnë':

—Biti' gádxili'. Na'a rusiyönda' libí'ili' didza' le gun ga udzëjade'eli', le ulu'zì' ca' xibë yúgu'të bönachi. ¹¹ Na'a chigúlajbi' lu ladzë' David Nu usöla' libí'ili'. Nu ni naca Cristo, Xanru'. ¹² Lë ni gaca bë'ëbi'. Udzólili'-bi' Bí'ido' na', narólibi' yugu' lári'do', en dëbi' tu lu yú'udo' ga tun chí'i le táguba' böa' quégaca bönachi yú'ugaca nöza.

¹³ Ga na' zoë' gubáz lá'ayi na', tsárido'os bulu'lu'i lógaquië' zíanrö ca' gubáz lá'ayi queë' Dios, narúajgaquië' yehua' yubá, en ta'gu'ë Dios yöl-la' ba, ta'nnë':

¹⁴ ¡Yöl-la' ba Dios zoë' xitsá',
ate' luyú gaca le cuéqui dxi ládxi'do'gaquië'
bönni' raza ládxe'ë Dios légaquië'!

¹⁵ Cate' bulu'zë'ë gubáz lá'ayi na' ga ni' nacué, söjhuójgaquië' yehua' yubá, ní'irö gulé luzé'ë tuë' ia'tué' bönni' uyú bö'cu' zxila' na', ta'nnë':

—Uyéajtsöca'ru' Belén para ilé'eru' lë ni chiguca ca na' chibusiyönnë' Xanru' rë'u.

¹⁶ La' yöjcatië', ate' yöjxáca'gaquië' María len José, enca' bí'ido' na', dëbi' tu lu yú'udo' ga tun chí'i le táguba' böa' quégaca bönachi yú'ugaca nöza. ¹⁷ Cate' bila'lé'enë' lëbi', gula'guíxjö'ë lë na' si' busiyönnë' gubáz lá'ayi na' légaquië' ca naca queébi' bí'ido' na'.

¹⁸ Bulu'bani yúgu'të nupa bila'yöni didza' gulu'ë bönni' tu'yúë' bö'cu' zxila' na'. ¹⁹ María gulú'usö icja náganu didza' ni, ate' guzá' ládxi'nu ca naca que. ²⁰ Söjhuójgaquië' bönni'

na' tu'yúë'-ba' bö'cu' zxila', tunë' zxön Dios, en ta'gu'ë Lë' yöl-la' ba ni'a que yúgu'të lë na' bila'yönnë', en bila'lé'enë', le guca ca na' busiyönnë' gubáz lá'ayi na' légaquië'.

Ta'gu'ë-bi' bí'ido' Jesús lu në'ë Dios

²¹ Cate' chiguca xunu' dza zóabi' bí'ido' na', gula'chúguië' lu xipéla'bi' lë na' naca bë' néqui'bi' queë' Dios, ate' gulu'ë labi' Jesús ca na' chibé' cazë' labi' gubáz lá'ayi na' zí'alö cate' si' tsú'ubi' lé'ënu xiná'abi'.

²² Cate' chibizá'a dza que le tu'pá'a cuíngacanu nigula ca rinná bë' xibá queë' Moisés, gula'ché'ë-bi' bí'ido' Jesús yödzö Jerusalén para ila'gu'ë-bi' lu në'ë Xanru' Dios. ²³ Caní gulunë', tu' nazúaj lu guichi lu xibá queë' Xanru' le rnna: "Yúgu'tëbi' bi'i bönni'do' nácagacabi' bi'i zí'alö queënu xiná'agacabi', ulu'béajë'-bi' quez queë' Xanru' Dios." ²⁴ Que lë ni na' yöjáquië' ni' para ilútië'-ba', en ila'gú'ë-ba' lahuë' Dios chópaba' gúgudo' o chópaba' budödu' ca na' rinná bë' xibá queë' Xanru' Dios.

²⁵ Dza ní'isö zoë' tu bönni' lë' Simeón lu yödzö Jerusalén. Bönni' ni náquië' tsahui', en reaj ládxë'ë Dios. Ribözë' Bönni' na' isól-lë'ë Dios, Bönni' na' gácalenë' bönachi Israel. Dios Bö' Lá'ayi zóalenë' Simeón na', ²⁶ en chibulu'ínë' lë' biti' gátie' cate' ilé'erönë' Cristo, Bönni' na' isól-lë'ë Xanru' Dios. ²⁷ Bidxinë' Simeón na' chila yudo' tu' guchë'ë Dios Bö' Lá'ayi lë' ni'. Cate' xuz xiná'abi' gula'ché'ë-bi' bí'ido' Jesús chila yudo' para ilunë' queëbi' ca rinná bë' xibá na', ²⁸ ní'irö bunidë'-bi' Simeón na', en guyéaj ládxë'ë Dios, rnnë':

²⁹ Xana', na'a huáca gunnu' neda' lataj gátia', soa dxi ládxa'a tu' chiguca le gudxu' neda', huen dxin quiu'.

³⁰ Chibilé'eda' Nu na' buzóa cazu', Nu usöla' bönachi,

³¹ Nu na' ulú'u lahui lógaca yúgu'të bönachi.

³² Lëbi' nácabi' bení' le uzení' bönachi izá'a, en nácabi' ca' bení' quégaca bönachi Israel quiu'.

³³ Bulu'báninë' José, en María, xiná'abi' bí'ido' Jesús, ca naca lë na' gunné' Simeón ca naca queëbi' Jesús. ³⁴ Simeón na' gunábinë' Dios gunë' ga gaca dxi'a quégaquië', ate' gudxë'-nu María, xiná'abi' Jesús, rnnë':

—Buyútsöca'. Bi'i ni nuzóë'-bi' Dios para gunbi' ga ila'chixi bönachi zían, ate' ulu'huóása bönachi zían ladaj bönachi Israel. Gácabi' tu le naca bë', ate' ila'nnë' bönachi queëbi'. ³⁵ Gaca caní para ila'lá' lahui le ta'zá' ládxi'gaca bönachi zían. Yugu' lë ni ilaca quiu' ca tu guíë tuchi' le tsaza ládxi'do'.

³⁶ Ana, nigula ru'ínu didza' uláz queë' Dios, zóanu ca' ni'. Nácanu xzí'inë' Fanuel, bönni' nababë' di'a dza queë' Aser. Chinagúlada'anu Ana na', tu' guzóalennu bönni' queënu idú gadxi iz gudödi gúcanu ra'bando', ³⁷ ate' bugá'ananu tuzi cate' bidxintë dza chiyú'unu idú ca tápalalaj yu' tapa iz. Biti' ca' rubí'i ruzá'anu ga naca chila yudo'. Rëla, en te dza reaj ládxi'nu-në' Dios, runnu gubasa, en rulídzanu-në' Dios. ³⁸ La' náasö bidxintënu ni', rënu-në' Dios: "Xclenu'." Gudíxjöi'ínu yúgu'të bönachi ca naca queëbi' bí'ido' Jesús, bönachi na' nacua' Jerusalén, nupa ta'böza dza idxín Nu na' isól-lë'ë Dios para gácalen bönachi.

Söjhuójgaquië' José, en María yödzö Nazaret

³⁹ Gudödi gulunë' José, en María yúgu'të le rinná bë' xibá queë' Xanru' Dios, yöjhuójgaquië' ládzagaquië' Nazaret luyú Galilea. ⁴⁰ Guzxönbi' bí'ido' Jesús, en bidipa ládxi'bi'. Guta' queëbi' yöl-la' réajni'i, ate' zxön naca le ruzá' ládxë'ë queëbi' Dios.

Rudxinbi' bí'ido' Jesús chila yudo'

⁴¹ Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subanë' bönni' judío ca benë' Dios, bubéajë' xuz xtó'ogaquië' luyú Egipto. ⁴² Cate' chiyú'ubi' chinnu iz bi'i Jesús, yöjáquië' Jerusalén ca tun cazë' cate' raca laní na'. ⁴³ Cate' gudödi laní, söjhuójgaquië', ate' bugá'anabi' bí'ido' Jesús Jerusalén, pero biti' téquibe'enë' José, en

María, xiná'abi' Jesús. ⁴⁴ Tu' téquiné' nútsa'bi' ladaj bönachi zían yú'ulengaca légaquié' nöza, tu dza nayá' gula'zé'ë. Ní'irö cate' bulu'guiljé'-bi' gapa nacua' di'a dza quégaquié', en gapa nacua' nupa núnbé'gaquié' ⁴⁵ bití' bulu'dzóliné'-bi'. Que lë ni na' yöjhuó'jgaquié' Jerusalén, söjdíljagaquié'-bi'.

⁴⁶ Cate' chiguca dza bunni, bulu'dzóliné'-bi' ga naca chila yudo', ró'öbi' gatsaj láhui'lé' bönni' yudo' tu'sédiné'. Ruzé nágabi' didza' tu'ë, en rinaba yúdxibi' légaquié'. ⁴⁷ Bulu'bani yúgu'té nupa bila'yöni didza' bé'ëbi' ca naca yöl-la' réajni'i queébi', en ca nácagaca didza' bubí'ibi'. ⁴⁸ Cate' bila'lé'ené'-bi' xuz xiná'abi', bulu'bánniné', ate' gúdxinu-bi' xiná'abi', rnnanu:

—Zxi'ina', ¿bixx que benu' caní queétu'? Buyútsöca', len yöl-la' ruúbi ruguí'i neda', en xuzu' buguúljatu' lí'.

⁴⁹ Ní'irö gúdxibi' Jesús légaquié', rnnabi':

—¿Bixx que buguúljali' neda'? ¿Naru' cabí nózili' run bayudxi guna' xichiné' Xuza'?

⁵⁰ Bití' gula'yéajni'iné' xuz xiná'abi' didza' na' gúdxibi' légaquié'.

⁵¹ Jesús bóajlenbi' légaquié', budxinbi' Nazaret, ate' benbi' ca rna xtídza'gaquié' xuz xiná'abi'. María, xiná'abi' Jesús, gulú'usönu icja ládxi'do'onu yúgu'té lë ni. ⁵² Ráta'rö yöl-la' réajni'i queébi' bi'i Jesús, en rizxönbi'. Burúajbi' dxi'a lahué' Dios, en lógaca bönachi.

3

Libán runé' Juan, bönni' ruquilé' bönachi nisa

(Mt. 3:1-12; Mr. 1:1-8; Jn. 1:19-28)

¹ Cate' chiguca chinu iz rinná bé'ené' Tiberio César idúté yödzólió, rinná bé'ë Poncio Pilato luyú Judea, ate' Herodes rinná bé'ë ca' luyú Galilea. Felipe, bóché'ë Herodes na', rinná bé'ë luyú Iturea, en luyú Traconite, ate' Lisaniás rinná bé'ë luyú Abilinia. ² Yugu' dza na' nácagaquié' bixúz lo Anás, en Caifás, ate' la' ná'asö Dios bé'lené' Juan, xzí'iné' Zacarías, didza' cate' ni' zoé' Juan lu lataj cá'asö. ³ Ridé' Juan ni yúgu'té lataj nacua' ra' yegu Jordán, runé' libán ca ral-la' ila'dila nisa nupa tu'bí'i ládxi'gaca para uniti lahué' Dios dul-la' nabága'gaca. ⁴ Guca caní ca na' nazúaj lu guichi lá'ayi yugu' didza' bé'ë Isaías, bönni' bé'ë didza' uláz queé' Dios, rnna:

Riyón chi'ë bönni' rulidzé' lu lataj cá'asö, rnné':

“Buli'pá'a nöza lu icja ládxi'do'oli' para idxín Xanru' queé'li'.

Buli'béaj li yugu' nöza lasi ga tödë'.

⁵ Ral-la' ulígaca yúgu'té gapa naca röga', en ulu'huó'aca lachi' yúgu'té guí'a sibi, en guí'ado'.

Ral-la' ulu'rúaj li nöza nayecja nabí'igaca,

ate' ulu'huó'aca dxi'a nöza guió'j.

⁶ Ila'lé'eni yúgu'té bönachi Bönni' na' isól-lé'ë Dios, Nu usölá bönachi.”

⁷ Cate' bila'rúaj bönachi zían para ila'dila nisa lu në'ë Juan, lë' gudxé' légaquié':

—Libí'ili', di'a dza quégacaba' bëla sínia'. ¿Zoa nu buluf'i libí'ili' ral-la' izxúnnajli' yöl-la' rusiúdxí si' gaca quégaca bönachi? ⁸ Na'a, guli'gún le ilaca bé' chibubí'i ládxi'li', en bití' sa' ládxi'li', bití' innali': “Nácatu' tsahui' tu' nácatu' di'a dza queé' Abraham”, tu' rea' libí'ili', huáca quelé'ë Dios yugu' guió'j ni, en guné' ga ulu'huó'aca di'a dza queé' Abraham. ⁹ Nácali' ca yugu' yaga. Chizóa riböza guí'ë huága para ichugu yugu' yaga. Yúgu'té yaga bití' ta'bía le naca dxi'a, ila'chúguié' yaga na', en ila'gu'ë léguequi lu guí'.

¹⁰ Ní'irö bönachi nacua' ni' gula'nabi lë', ta'nná:

—¿Nacxi gúntsatu'?

¹¹ Bubi'ë didza' Juan, ré' légaquié':

—Nu dë chopa cö' zxe ral-la' unödzej que nu bití' dë que, ate' nu dë le gagu, lësca' caní ral-la' quisi quégaca nupa bití' dë le ilágugaca.

¹² Bal-lë' bönni' tu'quizxjë' lázagaca bönachi uláz que yödzö zi'tu' bila'dxinë' ca' ni' para ila'dilë' nisa, ate' gula'nábinë' lë', ta'nnë':

—Bönni' usëdi, ¿nacxi gúntsatu' netu'?

¹³ Juan gudxë' légaquië':

—Biti' uquízjaröli' tsca le chigunnë' bönni' yú'uli' lu në'ë.

¹⁴ Bal-lë' bönni' röjáquië' gudil-la gula'nábinë' ca' lë', ta'nnë':

—¿Nazxi netu', nacxi guntu'?

Juan gudxë' légaquië':

—Bíti'rö gun gádxili' bönachi para cúali' le dë quéguequi. Bíti'rö innëli' quégaca bönachi le cabí nácatë para gunli' ga ila'guizxaj libí'ili', pero guli'tsaza ládxi'li' tsca rázxfali'.

¹⁵ Ta'zá' ládxi'gaca bönachi na' ta'böza Bönni' na' ral-la' isól-lë'ë Dios, channö náquië' Juan na' Bönni' lë' Cristo. ¹⁶ Bubi'ë didza' Juan, gudxë' yúgu'të', rnnë':

—Le nácatë neda' ruquila' libí'ili' nisa, pero zë'ë Bönni' gunë' le rulu'isö yöl-la' ridila nisa ni, ichízië' libí'ili' Dios Bö' Lá'ayi, en le naca guí' queë'. Bönni' ni náparë' yöl-la' unná bë' ca neda', ate' neda' bití' naca' lesaca' ilecja' le nudé'ë ni'e. ¹⁷ Zönë' lu në'ë böcóc' queë', ate' ulubë' ga rilubi zxoá' xtila queë', lë' ni rulu'í le gaca quégaca bönachi. Utubë' zxoá' xtila, en cu'ë le xilataj, pero bëbu que uzégui'ë lu guí' le catu caz ulu.

¹⁸ Ca nácgaca didza' ni, en ia'zica'rö zían didza' le guchízië' icja nácgaca bönachi, benë' libán Juan lógaquië' que didza' dxi'a. ¹⁹ Juan na' buzégui'ë didza' Herodes, bönni' rinná bë'ë, tu' zóalënë'-nu Herodías, nigula queë' Felipe, bönni' bóchë'ë, enca' tu' runë' zían le ruá' dö'. ²⁰ Ní'irö benë' Herodes tu le nácarö huiá' dö', gulu'ë Juan na' lidxi guíë.

Ridíle' Jesús nisa

(Mt. 3:13-17; Mr. 1:9-11)

²¹ Dza na' cate' cabí nadzunë' Juan lidxi guíë, cate' ni' ruquilë' bönachi nisa, bidilë' ca' Jesús nisa. Cate' ni' rulidzë' Dios, gualaj lúzxiba, ²² ate' bötjë' Dios Bö' Lá'ayi, bidxinë' ga na' zoë' Jesús. Bulu'í lahuë', riné'ë ca riná' tuba' gu'dödo', ate' biyón chi' i Nu ru'í didza' yehua' yubá, rnna:

—Li' nacu' Zxí'ina'. Nadxfí'ida' Li', en raza ládxa'a Li'.

Yugu' xuz xinë'e gudödi queë' Jesús

(Mt. 1:1-17)

²³ Cate' gusí lahuë' runë' xichinë' Jesús, yu'ë ca chi uruá' iz. Téquiguequi bönachi náquië' zxfí'inë' José. Jesús náquië' zxfí'ini xí'sóë' Elí, nu na' náquië' xúzinu María, nigula queë' José na'.

²⁴ Elí na' gúquië' zxfí'inë' Matat,

nu ni guca zxfí'inë' Leví,

nu ni guca zxfí'inë' Melqui,

nu ni guca zxfí'inë' Jana,

nu ni guca zxfí'inë' ia'túë' José.

²⁵ José ni gúquië' zxfí'inë' Matatías,

nu ni guca zxfí'inë' Amós,

nu ni guca zxfí'inë' Nahum,

nu ni guca zxfí'inë' Esli,

nu ni guca zxfí'inë' Nagai.

²⁶ Nagai na' gúquië' zxfí'inë' Mat,

nu ni guca zxfí'inë' ia'túë' Matatías,

nu ni guca zxfí'inë' Semei,

nu ni guca zxfí'inë' ia'túë' José,

nu ni guca zxfí'inë' Judá.

²⁷ Judá na' gúquië' zxfí'inë' Joana,

nu ni guca zxfí'inë' Resa,

nu ni guca xzí'inë Zorobabel,
 nu ni guca xzí'inë Salatiel,
 nu ni guca xzí'inë Neri.
²⁸ Neri na' gúquië' xzí'inë' ia'túé' Melqui,
 nu ni guca xzí'inë' Adi,
 nu ni guca xzí'inë' Cosam,
 nu ni guca xzí'inë' Elmodam,
 nu ni guca xzí'inë' Er.
²⁹ Er na' gúquië' xzí'inë' Josué,
 nu ni guca xzí'inë' Eliezer,
 nu ni guca xzí'inë' Jorim,
 nu ni guca xzí'inë' ia'túë' Matat.
³⁰ Matat na' gúquië' xzí'inë' Leví,
 nu ni guca xzí'inë' Simeón,
 nu ni guca xzí'inë' Judá,
 nu ni guca xzí'inë' ia'túé' José,
 nu ni guca xzí'inë' Jonán,
 nu ni guca xzí'inë' Eliaquim.
³¹ Eliaquim na' gúquië' xzí'inë' Melea,
 nu ni guca xzí'inë' Mainán,
 nu ni guca xzí'inë' Matata,
 nu ni guca xzí'inë' Natán.
³² Natán na' gúquië' xzí'inë' David,
 nu ni guca xzí'inë' Isaí,
 nu ni guca xzí'inë' Obed,
 nu ni guca xzí'inë' Booz,
 nu ni guca xzí'inë' Salmón,
 nu ni guca xzí'inë' Naasón.
³³ Naasón na' gúquië' xzí'inë' Aminadab,
 nu ni guca xzí'inë' Aram,
 nu ni guca xzí'inë' Esrom,
 nu ni guca xzí'inë' Fares,
 nu ni guca xzí'inë' ia'túé' Judá.
³⁴ Judá na' gúquië' xzí'inë' Jacob,
 nu ni guca xzí'inë' Isaac,
 nu ni guca xzí'inë' Abraham,
 nu ni guca xzí'inë' Taré,
 nu ni guca xzí'inë' Nacor.
³⁵ Nacor na' gúquië' xzí'inë' Serug,
 nu ni guca xzí'inë' Ragau,
 nu ni guca xzí'inë' Peleg,
 nu ni guca xzí'inë' Heber,
 nu ni guca xzí'inë' Sala.
³⁶ Sala na' gúquië' xzí'inë' Cainán,
 nu ni guca xzí'inë' Arfaxad,
 nu ni guca xzí'inë' Sem,
 nu ni guca xzí'inë' Noé,
 nu ni guca xzí'inë' Lamec.
³⁷ Lamec na' gúquië' xzí'inë' Matusalén,
 nu ni guca xzí'inë' Enoc,
 nu ni guca xzí'inë' Jared,
 nu ni guca xzí'inë' Mahalalel,

nu ni guca xzí'ině' ia'túě' Cainán.
³⁸ Cainán na' gúquiě' xzí'ině' Enós,
 nu ni guca xzí'ině' Set,
 nu ni guca xzí'ině' Adán,
 nu ni guca ca xzí'ini cazě' Dios.

4

Satanás tu' xihui' rě'ěni usubaga' Jesús dul-la'
 (Mt. 4:1-11; Mr. 1:12-13)

¹ Buzě'ě Jesús ra' yegu Jordán, zóaleně' Dios Bö' Lá'ayi Lě', ate' Dios Bö' Lá'ayi na' guchě'ě Jesús lu lataj cá'asö. ² Guzóě' Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahuě' Jesús yugu' dza na', ate' gudödi ni' riduně'. ³ Ní'irö tu' xihui' na' gudxi Jesús, rnna:

—Channö naca cazu' Li' Xzí'ině' Dios, gunnátsöca' ulu'huóaca guió'j ni yöta xtila.

⁴ Bubi'ě didza' Jesús, rě' le:

—Nazúaj lu guichi, rnna: “Calé'gasö yöta xtila nabánigaca bönachi, pero nabánigaca ca' yúgu'tě xtídzě'ě Dios.”

⁵ Ní'irö guchě' tu' xihui' na' Jesús ga naca tu lu gu'a sibi ate' tu chí'ido'osö buluí'i Lě' yúgu'tě xilátjagaca nupa ta'nná bě' yödzölió. ⁶ Tu' xihui' na' rě Jesús, rnna:

—Gunna' quiu' yúgu'tě xilátjagaca nupa ta'nná bě' ni, en yöl-la' tsahui' quéguequi, tu' nadödi lu na'a yúgu'tě lě ni, ate' nu rě'ěnisida' ruá'a que. ⁷ Channö Li' uzóa zxibu' lahua', en gunu' neda' zxön, yúgu'tě lě ni guequi quiu'.

⁸ Bubi'ě didza' Jesús, rě' le:

—Gucuita ga zoa', Satanás, tu' nazúaj lu guichi lá'ayi le rě netu', rnna: “Xanu' Dios tseaj ládxi'u-ně', en tuzě' Lě' gunu' xichině'.”

⁹ Ní'irö tu' xihui' na' guchě' Jesús Jerusalén, ate' budxía Lě' lu zö'ö ícjo'olö yudo', en rě Lě':

—Channö nacu' Xzí'ině' Dios, busuládzu'tsöca' cuinu' ni ¹⁰ tu' nazúaj lu guichi lá'ayi, rnna:

Dios isól-lě'ě gubáz lá'ayi queě', ilácaleně' Li'.

¹¹ Lu ná'agaquiě' ulu'chisě' Li' para cabí tsöjchégu'u guió'j, en bití' gunu' zi' ni'u.

¹² Bubi'ě didza' Jesús, rě' le:

—Nazúaj lu guichi lá'ayi le rě netu': “Biti' si' bě'u Xanu' Dios.”

¹³ Cate' bití' budzöli tu' xihui' na' ia'tú le si' bě' Jesús, buzá' ga zoě' tu chí'ido'.

Risí lahuě' Jesús runě' xichině' luyú Galilea
 (Mt. 4:12-17; Mr. 1:14-15)

¹⁴ Bóajě' Jesús luyú Galilea, dē lu nē'ě yöl-la' huáca queě' Dios Bö' Lá'ayi. Guzě' didza' ca naca queě', ate' bila'yöni bönachi nacua' yúgu'tě yödzö idú gásibi'ilö. ¹⁵ Busédině' Jesús bönachi gapa naca lu yu'u ga tu'dubě' tu'sedě' bönni' judío queě' Dios, ate' yúgu'tě bönachi gulún Lě' zxön.

Le beně' Jesús yödzö Nazaret, ga naca ladzě'
 (Mt. 13:53-58; Mr. 6:1-6)

¹⁶ Ní'irö budxině' Jesús yödzö Nazaret ga ni' guzxöně'. Cate' bidxín dza lá'ayi quégaquiě' bönni' judío, ca run cazě' Jesús, guyáziě' lu yu'u ga tu'dubě' tu'sedě' bönni' judío queě' Dios, ate' guzuíně' para ulabě' tu le nazúaj lu guichi lá'ayi. ¹⁷ Bulu'dödě' lu nē'ě Jesús guichi ga na' nazúaj didza' bē'ě Isafas, bönni' bē'ě didza' uláz queě' Dios. Cate' gusaljě' guichi na', budzölině' ga nazúaj lu guichi le rnna:

¹⁸ Zóaleně' Bö' Lá'ayi queě' Xanru' neda' tu' nubéajě' neda' quez queě'

para usiyönda' bönachi yechi' didza' dxi'a.

Gusól-lë'e neda' para una' nupa raca zi' ládxi'do'guequi,
en usiyönda' nupa nadzúngaca, ca gaca ulu'lágaca,
en úna' bönachi nachul-la lóguequi,
en usöla' bönachi zoa nu run léguequi zi',

¹⁹ en guna' libán que dza ruzá' ládxe'e Xanru' Dios quégaca bönachi.

²⁰ Ní'irö butubë' Jesús guichi na', en bugu'e le lu në'e bönni' rapa chi'e yugu' guichi lá'ayi, ate' gurö'e. Ní'irö yúgu'të nupa nudúbigaca lu yu'u na' gula'ná' Jesús. ²¹ Gusí lahuë' Jesús rë' légaquië':

—Na'a dza ni zóali' libí'ili', rudxín caz le nazúaj lu guichi ni.

²² Yúgu'të' gula'nné' dxi'a queë', en bulu'bánninë' ca naca didza' dxi'a ru'e, ate' ta'nné':

—¿Naru' calëga bönni' ni zxí'inë' José?

²³ Jesús rë' légaquië', rnnë':

—Nadxi huëli' neda' lë ni ta'nná bönachi, le rna: “Li', bönni' ruún bönachi, bun cuinu'.” Lësca' caní huëli' neda': “Yugu' le biyónitu' benu' Capernaum, ben ca' ga ni naca ladzu'.”

²⁴ Gunnë' ca' Jesús:

—Le nácatë rea' libí'ili', channö zoë' nu bönni' ru'e didza' uláz queë' Dios, biti' tun bönachi uládz queë' lë' bal. ²⁵ Le nácatë rea' libí'ili', gula'cuá'anu zían nigula uzëbi luyú Israel yugu' dza ni' zoë' Elías, bönni' bë'e didza' uláz queë' Dios, cate' ni' biti' gulaj guióaj idú ca tsonna iz yu' xopa beo', ate' guca gubín luyú na', ²⁶ pero Dios biti' gusól-lë'e Elías na' ga nacuá'anu nigula uzëbi nabábagacanu Israel, pero gusól-lë'e lë' ga na' zóanu tu nigula uzëbi lu yödzo Sarepta, le nababa yödzo Sidón. ²⁷ Lësca' caní, gula'cuá' zían nupa te'e huë' nudzu' ruzödi luyú Israel dza ni' zoë' Eliseo, bönni' bë'e didza' uláz queë' Dios, pero biti' böáquië' nu bönni' nútsë'e ladaj bönachi Israel na', pero böáquië' tuzë' Naamán, bönni' nababë' luyú Siria.

²⁸ Cate' bila'yönnë' didza' ni, gula'lenë' yúgu'të bönni' nacu'e lu yu'u ga na' tu'dubë' tu'sedë' queë' Dios. ²⁹ Ní'irö gula'yasë', en bulu'béajë' Jesús ní'ilö ra' yödzo. Gula'ché'e Lë' ga naca lë'e gu'a guióaj ga na' dë ládzaquië' para ulu'suládzuë' Lë' ga naca lë'e gu'a guióaj na'. ³⁰ Ní'irö gudödë' Jesús gatsaj láhui'lö ga na' nacu'e, söhuóajtë'.

Tu bönni' yu'u lë' bö' xihui'

(Mr. 1:21-28)

³¹ Ní'irö guyijë' Jesús yödzo Capernaum luyú Galilea, ate' busédinë' bönachi yugu' dza lá'ayi quégaquië' bönni' judío. ³² Bulu'bánninë' ca naca le rusédinë' Jesús légaquië', tu' bë'e didza' ca tu bönni' dë lu në'e yöl-la' unná bë'.

³³ Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sedë' queë' Dios, ate' bë'e zidzaj didza', ³⁴ rnnë':

—¿Busán netu'! ¿Bizxi rála'tu' quiu', Jesús, bönni' Nazaret? ¿Naru' zo'o para usunítu' netu'? Núnbë'a Li' Nu nacu'. Bönni' Lá'ayi queë' Dios nacu'.

³⁵ Jesús buzenë' le bach bö' xihui' na', en rë' le:

—Busayaj ru'u, en burúaj lu bönni' ni.

Ní'irö bö' xihui' na' gurú'una bönni' na' lu yu lógaca bönachi nacuá' ni'. Burúajtë lu bönni' na', en bíti'rö bi ben queë'. ³⁶ Bulu'bánninë' yúgu'të', en gulu'e didza' tuë' len ia'túë', ta'nné':

—¿Bizxi didza' ni ru'e? Len yöl-la' unná bë', en yöl-la' huáca zxön rinná bé'enë' yugu' bö' xihui', ate' tu'rúajtë bö' xihui' na'.

³⁷ Guzë' didza' ca naca queë' Jesús, ate' bila'yöni bönachi yúgu'të yödzo idú gásibi'ilö.

Ruúnë' Jesús xiná'anu nigula queë' Pedro

(Mt. 8:14-15; Mr. 1:29-31)

³⁸ Ní'irö guyasë' Jesús, en burúajë' lu yu'u ga na' tu'dubë' tu'sëdë' queë' Dios, ate' guyázië' lidxë' Simón. Xiná'anu nigula queë' Simón na' zóanu ni', en yú'unu xilá, ate' guláta'yuë' lahuë' Jesús únë'-nu. ³⁹ Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bé'ënu le gulahuë'.

Ruúnë' Jesús zían nupa te'e
(Mt. 8:16-17; Mr. 1:32-34)

⁴⁰ Cate' chiribía gubidza, yúgu'të nupa nacua'len léguequi nupa na' te'e que queéguëqui yödzhue' bila'dxín ni', ate' dujuá'gaca léguequi ga na' zoë' Jesús. Lë' guxóa në'ë nupa na' te'e, en bunë' léguequi. ⁴¹ Bulu'rúaj ca' zían bö' xihui' yú'ugaca bönachi te'e na'. Ta'bódxí'a bö' xihui' na', ta'nná:

—Li' nacu' xzí'inë' Dios.

Ní'irö Jesús buzenë' le bach yugu' bö' xihui' na', en bití' bé'ë lataj ila'nná, tu' nóziguequi náquië' Cristo.

Runë' Jesús libán luyú Galilea
(Mr. 1:35-39)

⁴² Cate' za' rení' ia'tú dza, burúajë' Jesús Capernaum na', ate' guyijë' tu lataj cá'asö. Bila'dxín bönachi zían ni', tu'guílaj Jesús. Cate' bila'dxinë' ga na' zoë', gulë'ëniaguequinë' ulu'tsenë' Lë', para cabí uzë'ë ga na' nacu'ë. ⁴³ Ní'irö Jesús gudxë' légaquië', rnnë':

—Run bayudxi tseja' gapa nacua' ia'zica'rö yödzo, tsöjena' ca' libán ni' que didza' dxi'a ca rinná bé'ë Dios. Que lë ni na' gusól-lë'ë neda' ni.

⁴⁴ Caní guca, benë' libán yugu' yödzo luyú Galilea gapa naca lu yu'u ga tu'dubë' bönni' judío, en tu'sëdë' queë' Dios.

5

Ta'dzunba' böla zían
(Mt. 4:18-22; Mr. 1:16-20)

¹ Cate' ni' zoë' Jesús ra' nísado' nazí'i le Genesaret, lu xiyú Galilea, bulu'quída' bönachi zían Lë' para ila'yöni xtídzë'ë Dios. ² Ní'irö bilé'enë' Jesús chopá bárcodo', zxoágaca lu nísado' ga na' naca ra' yu bidxi, ate' narúajgaquië' bönni' uzxón böla lé'egaca bárcodo' na', en ta'guibë' yöxaj böla quégaquië'. ³ Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxíguië' le ia'látí'do' zi'tu' ga naca ra' yu bidxi na'. Ní'irö gurö'ë Jesús lë'e bárcodo' na', en ró'ösë' ca' ni' rusédinë' bönachi zían nacua' lu yu bidxi na'. ⁴ Cate' budxi bé'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' rö'ö zila, ate' ni' guli'zalaj yöxaj böla queéli' para sönli'-ba' böla.

⁵ Bubi'ë didza' Simón, rë' Jesús:

—Bönni' Usëdi, idú yëla chibentu' dxin, en bití' bi böla nazónitu'-ba', pero didza' quiu' izáljagara' yöxaj.

⁶ Cate' chigula'zaljë' le, gula'zönë' zióntëröba' böla, ate' réquitiqui' iröza' yöxaj böla na'. ⁷ Ní'irö bulu'lá'a bulu'lu'isinë', bulu'lidzë' luzá'agaquië' nacu'ë ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzë'ë-ba' böla irópatë bárcodo' na', ate' chirequi ulu'huótaj bárcodo' na' lu nisa. ⁸ Cate' bilé'enë' Simón Pedro lë ni, ní'irö buzóa zxi'bë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

⁹ Caní gunné' tu' radxi ridzóbinë' Pedro ni'a quégacaba' böla zían na' gula'zóngaqüë'-ba', en lësca' caní guca quégaca nupa nacua'len lë'. ¹⁰ Guladxi gula'dzóbinë' ca' Jacobo, en Juan, yugu' xzí'inë' Zebedeo, nupa ni nácagaca luzé'ë Simón Pedro na'. Ní'irö Jesús rë' Simón na', rnnë':

—Bití' gádxinu'. Na'a isí lo' ichë'u quia' bönachi ca runu' rizönu'-ba' böla.

¹¹ Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' sôjácalenë' Jesús.

Ruúnë' Jesús tu bönni' ré'enë' huë' nudzu' ruzödi
(Mt. 8:1-4; Mr. 1:40-45)

¹² Cate' zoë' Jesús tu lu yödzo ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bilé'enë' Jesús, busudxín lahuë' lu yu, en gúta'yuë' lahuë', rnnë':

—Xan, channö ré'ënu', huáca unu' neda'.

¹³ Ní'irö bulí në'ë Jesús, en gudanë' lë'. Ré' lë':

—Ré'ënda'. Gacu' dxi'a.

La' gubídxitë huë' nudzu' queë' bönni' na'. ¹⁴ Ní'irö Jesús gunná bé'enë' lë' cuntu nu guíë' ca'. Gudxë' lë':

—Guyéaj, yöjlu'i cuinu' lahuë' bixúz, ate' yöjnödzej que yudo' le rulu'i nuhuóacu' dxi'a ca gunná bë'ë Moisés, lë' na' ulu'i légaquië' chiböacu'.

¹⁵ Guzëtëro didza' que yöl-la' huáca queë' Jesús, ate' bulu'dubi bönachi zían ga na' zoë' para ila'yöni xtídzë'ë, en para únë' léguequi, ugúë' yödzöhuë' té'eguequi. ¹⁶ Ní'irö buzë'ë Jesús ni', en guyijë' tu lataj cá'asö, ate' ni' bulidzë' Dios.

Ruúnë' Jesús tu bönni' huë' nacú'unië' bin
(Mt. 9:1-8; Mr. 2:1-12)

¹⁷ Ia'tú dza, cate' ni' rusédinë' Jesús bönachi, ró'ögaquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzö luyú Galilea, en luyú Judea, en lu yödzö Jerusalén. Naca bë' dë lu në'ë Jesús yöl-la' huáca queë' Xanru' Dios tu' ruúnë' bönachi te'e nacua' ni'. ¹⁸ Ní'irö bönni' nuá'agaquië' le denë' tu bönni' huë' nacú'unië' bin bila'dxinë' ga ni', ate' bulu'guiljë' nacxi ilunë' para ila'gu'ë lë' lu yu'u para ila'guixjë' lë' lahuë' Jesús. ¹⁹ Cate' bití' gula'dzölinë' nacxi ilunë', tu' nacua' bönachi zían ni', gula'benë' ícjo'olö yu'u na', en gula'saljë' ícjo'o na'. Ní'irö bulu'zötjë' le denë' bönni' huë' na', ate' gula'guixjë' lë' gatsaj láchui'lö bönachi ni' lahuë' Jesús. ²⁰ Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Bönni', yugu' dul-la' nabágu'u chibuníti lahua'.

²¹ Ní'irö gula'sí lógaquië' ta'zá' ládxi'gaquië' bönni' yudo' tu'sédinë' na', en yugu' bönni' yudo' fariseo, ta'nnë': “¿Nuzxi caz bönni' ni rnnë' le rucá'ana Dios cá'asö? ¿Nuzxi caz gaca uniti lo dul-la'? Tuzë' Dios runiti lahuë' dul-la'.”

²² Réquibe'enë' Jesús le ta'zá' ládxi'gaquië', ate' ré' légaquië':

—¿Bízx que rizá' ládxi'li' caní? ²³ Bití' naca böniga nu guiésö bönni' ni: “Yugu' dul-la' nabágu'u chibuníti lahua'”, pero naca böniga nu gun ga chasë', en së'e ni'ë. ²⁴ Guna' ga inözili' dë lu na'a neda', Bönni' Guljë' Bönachi, yöl-la' unná bë' uniti lahua' dul-la' luyú ni.

Ní'irö gudxë' bönni' na' nacú'unië' bin, rnnë':

—Li' rea', guyasa. Buá' le denu', en böaj lidxu'.

²⁵ La' guyásatë' bönni' huë' na' lógaquië', ate' bu'ë lë' na' gúti'në', en söhuójë' lidxë', rigu'ë Dios yöl-la' ba. ²⁶ Gula'nítitiqui'sinë' yúgu'të, ate' gula'gu'ë Dios yöl-la' ba, en tádxisinë' ca', ta'nnë':

—Na'a bilé'ëru' le run ga rubániru'.

Jesús rulidzë' Leví
(Mt. 9:9-13; Mr. 2:13-17)

²⁷ Gudödi gulaca yugu' lë' ni burúajë' Jesús ni', ate' bilé'enë' tu bönni' uquízxaj lázagaca bönachi, lë' Leví, rö'ë ga na' ruquíxjë', ate' Jesús ré' lë':

—Gudá' neda'.

²⁸ La' guyásatë' Leví, ate' bucá'anë' yúgu'të, en sa'yéajlenë' Jesús.

²⁹ Gudödi ni' benë' Leví na' tu güi'i huagu queë' Jesús ga naca lu yu'u lidxë', ate' gula'cu'ë zían bönni' uquízxaj ni' len ia'bal-lë' bönni' ta'bó'lenë' légaquië' tahuë'. ³⁰ Ní'irö

bönni' yudo' tu'sédiné' len yugu' bönni' yudo' fariseo gula'nné' quégaquié' bönni' uséda queé' Jesús, ta'nné':

—¿Bizx que ré'aj rágulenli' yugu' bönni' uquízxaj, en ia'zíca'ré' bönni' dul-la'?

³¹ Bubi'ë didza' Jesús, ré' légaquié':

—Yugu' bönni' nacu'ë dxi'a bití' naquíniguequiné' nu un bönachi, pero bönni' té'ené' naquíniguequiné' nu un bönachi. ³² Za'a, caléga ulídzagaca'-né' bönni' tsahui', pero za'a ulídzagaca'-né' bönni' dul-la' para ulu'bí'i ládxi'gaquié'.

Ta'nábiné' Jesús ca naca que yöl-la' run gubasa

(Mt. 9:14-17; Mr. 2:18-22)

³³ Ní'irö bönni' yudo' na' gula'nábiné' Jesús, ta'nné':

—¿Bizx que tuné' gubasa zían luzuí bönni' dá'gaquié' Juan, en tu'lidzë' Dios, ate' tuné' ca' caní bönni' dá'gaquié' yugu' bönni' yudo' fariseo, pero bönni' dá'gaquié' Li' té'aj tahué'?

³⁴ Jesús ré' légaquié':

—¿Naru' huácatsö gunli' ga iluné' gubasa bönni' nacu'ë laní que yöl-la' rutsaga na' tsanni ni' bönni' rutsaga né'ë zóalené' légaquié'? ³⁵ Huadxín dza cate' udúé' bönni' rutsaga né'ë ga nacu'ë. Dza ní'irö iluné' gubasa.

³⁶ Ní'irö bucúdzu'ë didza' Jesús ca naca lë ni, ate' ré' légaquié':

—Cuntu nu bönni' ichúguié' tu lari' cubi chinadía, en cuejë' tsötaca' le udé'ë lë'e lari' tēbi. Channö guné' caní, calégasö gaca ditaj lari' cubi na', pero lári'do' na' birúaj lë'e lari' cubi na' bití' tsöjlóza lari' tēbi na'. ³⁷ Lësca' caní, cuntu nu bönni' rigué'ë xisi uva cubi lu buzudi guídi gula. Channö nu gun caní, xisi uva cubi na' uchöza' buzudi guídi gula, ate' ilalaj xisi uva na', ate' gaca ditaj buzudi guídi gula na'. ³⁸ Que lë ni na' ral-la' cá'aru' xisi uva cubi lu buzudi guídi cubi, ate' irópaté' ilaca chí'i. ³⁹ Channö zoa nu ré'aj xisi uva gula, bití' gué'ënité' gu'aj xisi uva cubi, tu' rnna: "Nácarö sizxí' xisi uva gula na'."

6

Bönni' uséda queé' Jesús ta'lecjé' do zxoá' xtila dza lá'ayi

(Mt. 12:1-8; Mr. 2:23-28)

¹ Cate' naca tu dza lá'ayi quégaquié' bönni' judío, ridödë' Jesús gapa dë yöla zxoá' xtila, ate' bönni' uséda queé' ta'lecjé' do ga dxía zxoá' xtila. Ta'zxúbi'ni ná'agaquié' le, en tahué'. ² Ní'irö gula'nábiné' bönni' yudo' fariseo légaquié', ta'nné':

—¿Bizx que runli' le cabí ral-la' gunru' dza lá'ayi?

³ Bubi'ë didza' Jesús, ré' légaquié':

—¿Naru' cabí nulábanili' ca bené' David cate' guduné', ate' gula'dún ca' nupa nacua'len lë'? ⁴ Guyázié' lu yu'u queé' Dios, en guzxi'ë yöta xtila tu'cu'ë lahué' Dios, lë na' bití' ral-la' gáguru', pero tuz bixúz dë lataj ilahué', ate' gudahué' David le, en bē'ë ca' quéguequi nupa nacua'len lë'.

⁵ Ní'irö Jesús gudxé' légaquié', rnné':

—Neda', Bönni' Guljé' Bönachi, naca' xani dza lá'ayi.

Tu bönni' narequi' nē'ë

(Mt. 12:9-14; Mr. 3:1-6)

⁶ Cate' naca ia' tú dza lá'ayi quégaquié' bönni' judío, guyázié' Jesús lu yu'u ga tu'dubé' tu'sédë' queé' Dios, en busédiné' nupa nacua' ni'. Zoé' ca' tu bönni' ni' narequi' nē'ë ibëla. ⁷ Yugu' bönni' yudo' tu'sédiné', en yugu' bönni' yudo' fariseo tu'yúé' Jesús para ila'lé'ené' channö úné' bönni' na' cate' naca dza lá'ayi quégaquié' para ulu'dzóliné' nacxi ulu'zéguié' Lë' didza'. ⁸ Réquibe'ené' Jesús le ta'zá' ládxi'gaquié', ate' gudxé' bönni' na' narequi' nē'ë, rnné':

—Guyasa. Guzú' gatsaj láhui'lö ni.

La' guyásatë' bönni' na', guzuíné'. ⁹ Ní'irö Jesús gudxé' yugu' bönni' yudo' na', rnné':

—Unábitsöqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxi'a o gunru' le ruá' dö'? ¿Naru' dë lataj uguéla'ru' yöl-la' na'bán quégaca bönachi, o ugúaru' le?

¹⁰ Ní'irö buyúé' Jesús yúgu'të bönni' na' nacu'ë gásibi'ilé', ate' gudxë' bönni' hué' na':
—Bulí' no'o.

Bulí' në'ë bönni' na', ate' la' böacatë në'ë na'. ¹¹ Ní'irö gula'lenë' bönni' yudo' na', ate' gulún xtídza'gaquië' la' léguasë' nacxi bi ilunë' queë' Jesús.

Ribóë' Jesús chínnuë' bönni' ilácagaquië' gubáz queë'
(Mt. 10:1-4; Mr. 3:13-19)

¹² Dza ni' guyijë' Jesús ga naca tu lu guí'ado'. Bulidzë' Dios ni', ate' idú yëla bé'lenë' Dios didza'. ¹³ Cate' za' rení', bulidzë' yugu' bönni' dá'gaquië' Lë', ate' guróë' chínnuë' para iláquië' gubáz queë'. ¹⁴ Bulidzë':

Simón, (lë' ca' Pedro),
Andrés, (bóchë'ë Pedro),
Jacobo, en Juan, en Felipe, en Bartolomé,

¹⁵ Mateo, en Tomás,
Jacobo, (zxí'inë' Alfeo),
Simón, (bönni' ru'í' láchxë'ë yödzö queë'),

¹⁶ Judas, (bóchë'ë Jacobo),
en Judas Iscariote, (bönni' udödë' Jesús lu ná'agaquië' bönni' ilútië' Lë').

Ruúnë' Jesús bönachi zían
(Mt. 4:23-25)

¹⁷ Jesús bótjalënë' yugu' bönni' gubáz queë' na' lu guí'ado' na', ate' bila'dxinë' tu ga naca lachi', ga ni' nacu'ë zíanrö ca' bönni' usëda queë', ate' nacua'len légaquië' bönachi zían narúajgaca yúgu'të yödzö luyú Judea, en yödzö Jerusalén, en yugu' yödzödo' dégaca ra' nísado' ga na' nacua' yödzö Tiro, en yödzö Sidón. Bila'dxín bönachi ni ga ni' para ulu'zé nágagaca xtídzë'ë Jesús, en ulu'huóaca lu yödzöhué' té'eguequi. ¹⁸ Bulu'huóaqüië' ca' bönni' ni' ta'guí' ta'záquië' lu ná'agaca bö' xihui'. ¹⁹ Yúgu'të bönachi zían na' tuí' láchxi'gaca ila'gán Jesús tu' ruúnë' léguequi len yöl-la' huáca queë'.

Nupa nácagaca bica' ba, en nupa nácagaca bica' bayechi'
(Mt. 5:1-12)

²⁰ Ní'irö buyúé' Jesús yugu' bönni' usëda queë' nacu'ë ni', en gudxë' légaquië':

—Bica' ba libí'ili', réquibe'eli' riyadzjali' le naca queë' Dios, tu' gata' queé'li' lataj ga rinná bé'ë Dios.

²¹ 'Bica' ba libí'ili' ridunli' le gunnë' Dios queé'li', tu' huóljali'.

'Bica' ba libí'ili' ribódxili' tu' bi nadéli'li' le naca tsahui', tu' huadxín dza uzxídxili'.

²² 'Bica' ba libí'ili', tu' za' dza cate' biti' ila'lé'e bönachi libí'ili' dxi'a, en ulu'béaj libí'ili' ga nacua', en ila'nné'zi' queé'li', en ulu'cá'ana cá'asö le nazí'li' ca' tu le naca xihui' tu' dá'ali' neda', Bönni' Guljë' Bönachi. ²³ Buli'sí' xibé dza na', en buli'dzeja, tu' naca zxön le guequi queé'li' yehua' yubá. Lësca' caní gulunë' xuz xtó'ogaca bönachi ni quégaquië' bönni' gulu'ë didza' uláz queë' Dios.

²⁴ 'Bica' bayechi' libí'ili', dë yöl-la' tsahui' queé'li', tu' chidé le ruzí'ili' xibé.

²⁵ 'Bica' bayechi' libí'ili' nuhuólaj nudzé'eli' na'a, tu' huadunli'.

'Bica' bayechi' libí'ili' ruzídxili' na'a, tu' huí'inili', en cödxí yéchi'li'.

²⁶ 'Bica' bayechi' libí'ili' ta'nné' yúgu'të bönachi dxi'a queé'li'. Lësca' caní gulunë' xuz xtó'oli', gula'nné' dxi'a quégaquië' bönni' gula'zí' yë'ë, gula'nné' nácagaquië' bönni' tu'ë didza' uláz queë' Dios.

Ral-la' idxí'iru' nupa biti' ta'lé'e rë'u dxi'a
(Mt. 5:38-48; 7:12)

²⁷ Gunné' ca' Jesús:

—Libí'ili' zóali' ni, en riyónili' xtídza'a, rea' libí'ili': Guli'dxí'i nupa bití' ta'lé'e libí'ili' dxi'a. Guli'gún le naca dxi'a quégaca nupa tu'dí'i libí'ili'. ²⁸ Guli'nabi Dios gaca dxi'a quégaca nupa tua' dö' queéli', en buli'lidzë' Dios inábili'-në' gácalenë' nupa ta'nné' zí' queéli'. ²⁹ Channö nu capa' tsölá'a xagu', buzé' ia'tsölá'a ca' xagu'. Channö nu cúa lari' naxóa cúdzu'u, bë' lataj cúa ca' xzo'. ³⁰ Núti'tës nu bi inaba le dë quiu', bunödzaj que, ate' nu cúa le nequi quiu', bití' unabu' le. ³¹ Ca ré'ënili' ilún bönachi queéli', lësca' caní guli'gún quéguequi.

³² 'Channö nadxí'isili' nupa nadxí'igaca libí'ili', ¿bizxi yöl-la' ba idéli'li'? Lësca' caní tunë' bönni' dul-la', ta'dxí'inë' nupa nadxí'igaequi légaquië'. ³³ Channö runli' le naca dxi'a quégacasö nupa tun dxi'a queéli', ¿bizxi yöl-la' ba idéli'li'? Lësca' caní tunë' bönni' dul-la'. ³⁴ Channö runödzejali' quégaca nupa runli' löza ulu'bí'i queéli', ¿bizxi yöl-la' ba idéli'li'? Lësca' caní tunë' bönni' dul-la', tu'nödzjé' quégaca nupa tun dul-la', tu' tunë' löza ulu'bí'i quégaquië' lë na' bulu'nödzjé'. ³⁵ Neda' rea' libí'ili': Guli'dxí'i nupa bití' ta'lé'e libí'ili' dxi'a, en guli'gún le naca dxi'a. Buli'nödzaj quégaca bönachi sal-la' bití' runli' löza nu ubí'i queéli'. Channö caní gunli', zxön naca le gata' queéli', ate' gácali' zxí'ini cazë' Dios, Nu nácatërö lo, tu' runë' Lë' le naca dxi'a quégaca bönachi bití' ta'yaza ládxi'gaca, en quégaca bönachi tuá' dö'. ³⁶ Buli'huéchi' ládxi'li' bönachi ca na' runë' Xúzili' Dios, ruhuéchi' ládxi'ë yúgu'të bönachi.

Bití' ral-la' ichugu bë'ëru' que luzá'aru'

(Mt. 7:1-5)

³⁷ Gunné' ca' Jesús:

—Bití' ichugu bë'ëli' que luzá'ali', ate' cuntu nu ichugu bë' queéli'. Bití' cuéaj bë'ëli' que luzá'ali', ate' cuntu nu cuéaj bë' queéli'. Buli'niti lo luzá'ali', ate' Dios uniti lahuë' ca' libí'ili'. ³⁸ Buli'nödzaj que luzá'ali', ate' Dios gunné' queéli'. Ulu'nödzjé' queéli' le ulu'rixë' len tu guí'ina ribixi le naca idú, le naguirö, en naguí gate ga rë', en zóatica' gubá. Ca naca le ruríxili', la' cá'asö urixë' Dios ca' queéli'.

³⁹ Bucúdzu'ë didza' Jesús, rë' légaquië':

—¿Naru' huácatsö nu bönni' lo chul-la' iché'ë ia'túë' bönni' lo chul-la? Bití' ca' gaca, tu' ila'bixë' iropë' tu lu yeru. ⁴⁰ Bití' ca' gácarë' lo tu bönni' usëda ca nu rusëdi lë', pero cate' údxi izëdë' bönni' na', gáquië' ca naca nu na' rusëdi lë'.

⁴¹ ¿Bizx que ruyú' bëbudo' yu'u guiój lahuë' böchi' luzó'o, en bití' rilé'enu' le zxön yu'u guiój lo cazu'? ⁴² ¿Naru' huácatsö guío'-në' böchi' luzó'o: "Bócha'a, benna lataj cueja' bëbudo' yu'u guiój lo", en bití' rilé'enu' le zxön yu'u guiój lo cazu'? Li', bönni' rulu'isö tsahui' cuinu', guléaj zí'alö le zxön yu'u guiój lo cazu', ate' ní'irö ilé'enu' dxi'a para cueju' bëbudo' yu'u guiój lahuë' böchi' luzó'o.

Le runru' naca bë' le nácaru'

(Mt. 7:17-20; 12:34-35)

⁴³ Gunné' ca' Jesús:

—Tu yaga dxi'a bití' cuía le naca cá'asö. Lësca' caní, tu yaga guí'a bití' gaca cuía le naca dxi'a. ⁴⁴ Caní naca, le ribía tu yaga naca bë' ca naca yaga na'. Bití' ruchíbiru' le ribía yaga higo lu yaga yötsi', en calëga lu bisequi' yötsi' bití' ruchíbiru' le ribía lubá uva. ⁴⁵ Tu bönni' dxi'a ru'ë didza' dxi'a tu' yu'u le naca dxi'a icja ládxi'da'ahuë', ate' didza' xihui' ru'ë bönni' xihui' tu' yu'u icja ládxi'da'ahuë' le xihui'. Rinné' ruá'aru' ca naca le yu'u icja ládxi'do'oru'.

Chopa ca gaca cuéquiru' xilibi yu'u

(Mt. 7:24-27)

⁴⁶ Gunné' ca' Jesús:

—¿Bizx que rulídzali' neda', rnnali': "Xantu', Xantu'", pero biti' runli' ca rinná bé'eda' libí'ili'? ⁴⁷ Ulu'ida' libí'ili' ca naca nu na' za' quia', en riyöni xtídza'a, en run ca rnna xtídza'a. ⁴⁸ Nu ni naca ca tu bönni', cate' bené' lidxé', guchó'öné' ga rē', en guléquié' xilibi yu'u ga naca lu guiój. Cate' bötaj yegu gubó'o, guchó'öna cuita yu'u na', pero biti' guca uquínnaj le, tu' nulibi ga naca lu guiój. ⁴⁹ Na'a, nu riyöni xtídza'a, en biti' run ca rnna, nu ni naca ca tu bönni' bené' lidxé' ga naca lu yu cá'asö. Biti' bené' xilibi. Cate' guchó'öna yegu gubó'o cuita yu'u na', la' biguínnajtē, ate' gubixi dērö zō'ö que.

7

Jesús ruúné'-bi' bi'i huen dxin queé' tu bönni' unná bē'
(Mt. 8:5-13)

¹ Cate' Jesús budxi bé'lené' légaquié' didza' ni, guyázié' yödzo Capernaum. ² Lu yödzo ni' zoé' tu bönni' Roma rinná bé'ené' bönni' röjáquié' gudil-la. Zóabi' bi'i huen dxin queé' nadxí'ide'ené'-bi', ate' bi'i ni ré'ebi', en chirequi gátibi'. ³ Cate' biyönné' bönni' ni didza' tu'ē bönachi ca naca queé' Jesús, la' gusól-la'tē' bal-lē' bönni' gula tu'zéajni'iné' bönni' judío ga na' zoé' Jesús, tsöjótá'yugaquié' lahué' Lē' guídē' uduhuéné'-bi' bi'i huen dxin queé' na' ré'ebi'. ⁴ Bönni' gula tu'zéajni'iné' na' bila'dxiné' ga zoé' Jesús, ate' guláta'yué' lahué' idú lādxi'gaquié', ta'nné':

—Náquié' lesaca' bönni' na' gunu' queé' lē ni, ⁵ tu' runé' bal bönachi uládz queéru', en bené' tu yu'u queéru' ga rudúbiru' rusédaru' queé' Dios.

⁶ Ní'irö Jesús guyéajlené' légaquié'. Cate' chizóa ila'dxiné' lidxé' bönni' na', lē' gusól-lē'ē bal-lē' böchi' luzé'ē ga zē'ē Jesús, ate' tē' Lē':

—Xan, rnné' bönni' na': "Biti' uguí'inu', tu' cabí naca' lesaca' tsáziu' lidxa', ⁷ en biti' naca' lesaca' guída' ga zu'. Que lē ni na' biti' burúguida' guída' ga zu'. Bé'ēsö didza', ate' huóacatébi' bi'i huen dxin quia'. ⁸ Neda' ca', zoa nu rinná be'e neda', ate' nacu'ē ca' bönni' röjáquié' gudil-la rinná bé'eda' légaquié'. Rea'-né' tué': Guyéaj ni', ate' rejé'. Rea'-né' ia'túé': Gudá ni, ate' ridé'. Rea'-né' ca' huen dxin quia': Ben dxin ni, ate' runé' dxin na'."

⁹ Cate' biyönné' Jesús didza' ni, bubániné' queé' bönni' na', ate' buécjē', en gudxé' bönachi na' zá'gaca cúdzu'lē', rnné':

—Le nácatē rea' libí'ili', cuntú nu bönni' Israel biti' röjxáqui'da'-né' réajlē'ē quia' ca réajlē'ē quia' bönni' ni.

¹⁰ Cate' bulu'dxiné' bönni' na' gusól-lē'ē bönni' rinná bé'ené' bönni' röjáquié' gudil-la, gula'yázié' ga naca lu yu'u lidxé', en bila'lé'ené' chiböacabi' bi'i huen dxin na'.

Jesús rusubané'-bi' bi'i bönni' queénu tu nigula uzébi

¹¹ Gudödi guca lē ni, sa'yéajē' Jesús yödzo Naín, ate' dzágagaquié' bönni' usēda queé' Lē', len bönachi zían. ¹² Cate' bidxiné' gala' ra' yödzo na', bilé'ené' yugu' bönni' nuá'agaquié'-bi' tubi' bi'i bönni' nati. Söjácachi'gaquié'-bi'. Bi'i nati na' nácabi' la's dui bi'i queénu tu nigula uzévido'. Zían bönachi uladza queénu nigula uzébi na' söjácálen-nu. ¹³ Cate' Xanru' bilé'ené'-nu, buéchi' lādxe'ē-nu, ate' gudxé'-nu:

—Bíti' rö cödxu'.

¹⁴ Ní'irö gubígu'ē Jesús, en gudanē' da'a yaga ga na' dēbi' bi'i nati na'. Gula'bözē' bönni' na' nuá'agaquié'-bi', ate' Jesús gunné':

—Bi'ido', li' rea', guyasa.

¹⁵ Ní'irö bubanbi'. Guró'öbi' bi'i na' zí'alö nátibi', ate' gusí lobi' ru'íbi' didza'. Jesús budödē'-bi' lu ná'anu xiná'abi'. ¹⁶ Cate' bönni' ni' bila'lé'ené' lē ni, guládxiné' yúgu'tē', ate' gula'gu'ē Dios yöl-la' ba, ta'nné':

—Bidxín queéru' tu bönni' lo, ru'ē didza' uláz queé' Dios. Dios caz rácalenē' bönachi queé'.

¹⁷ Guzé didza' ca naca yöl-la' huáca queé' Jesús, ate' bila'yöni bönachi yúgu'të yödzö luyú Judea, en yúgu'të yödzö idú gásibi'ilö.

Le rinabë' Juan, bönni' buquilé' bönachi nisa

(Mt. 11:2-19)

¹⁸ Bönni' dá'gaquié' Juan gula'guíxjöi'iné' lé' yúgu'të lé' ni runé' Jesús. Ni' yu'é Juan lidxi guíé, bulidzë' chopë' bönni' na' dá'gaquié' lé', ¹⁹ ate' gusól-lé'ë légaquié' ga na' zoé' Jesús para ila'nábiné' Lë', ila'nné': "¿Nacu' Li' Cristo, bönni' ral-la' guídë', o naru' ral-la' cöztu'-né' bönni' yúbölö?" ²⁰ Cate' bila'dxiné' bönni' na' nasól-lé'ë Juan ga na' zoé' Jesús, té' Lë':

—Juan, bönni' buquilé' bönachi nisa, nasól-lé'ë netu' para inábitu' Li', innatu': "¿Nacu' Li' Cristo, bönni' na' ral-la' guídë', o naru' ral-la' cöztu'-né' bönni' yúbölö?"

²¹ La' náasö ruúné' Jesús zían nupa te'e, yugu' bönni' hué', en bönni' yú'ugaca légaquié' bö' xihui', ate' zían bönni' lo chul-la busaljé' guiój lógaquié'. ²² Bubi'ë didza' Jesús, rë' chopë' bönni' na' nasól-lé'ë Juan, rnné':

—Guli'tséaj, guli'tsöjtíxjöi'-né' Juan ca naca le bilé'eli', en le biyónili'. Tu'lé'ené' bönni' guchul-la lógaquié'. Tu'zé'ë bönni' gulatsjé'. Nuhuóacagaquié' bönni' gü'iguequiné' hué' nudzu' ruzödi. Tu'yönné' bönni' gula'códzué'. Nubángaquié' bönni' gulátie'. Ta'yönné' bönni' yechi' didza' dxi'a. ²³ Bica' ba nu biti' gaca chopa ladxi', ate' za'len neda' sal-la' biti' runa' ca réqui nu na' ral-la' guna'.

²⁴ Cate' bönni' na' gusól-lé'ë Juan bulu'zé'ë ni', gusí lahué' Jesús rulu'íné' bönachi ni' ca naca queé' Juan na', rnné':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le? ²⁵ ¿Bizxi caz birúajli' yöjyuli'? ¿Naru' birúajli' yöjyuli'-né' tu bönni' nácué' lari' nazáca'de'e? Nöz quézili' nupa nácugaca lari' nazáca'de'e, en tu'z'í xibé yöl-la' tsahui', nacuá' lídxigaquié' bönni' ta'nná bë'ë. ²⁶ ¿Bizxi caz birúajli' yöjyuli'? ¿Naru' birúajli' yöjyuli'-né' tu bönni' ru'ë didza' uláz queé' Dios? Ön, rea' lib'í'ili', ate' nayépisëtëré' ca nu ru'í' didza' uláz queé' Dios. ²⁷ Náquié' Juan bönni' na' nazúaj lu guichi lá'ayi ca naca queé', rna:

Buyútsöca', risól-la'a-né' gubáz quia', inórué' ca Li'.

Bönni' ni uchi'ë nöza ga tödu'.

²⁸ Neda' rea' lib'í'ili': Gapa nacuá' bönachi, channö zoé' nu bönni' ru'ë didza' uláz queé' Dios, biti' nácaré' lo ca Juan, bönni' na' buquilé' bönachi nisa, pero nu nácatëro cuíd'í' sö ga rinná bë'ë Dios nayépisëtëro ca Juan na'.

²⁹ Cate' bönachi ni', en bönni' tu'quixjé' lázagaca bönachi bila'yönné' didza' ni bë'ë Juan, guléquibe'ené' le naca tsahui' lahué' Dios, en bila'dilé' nisa lu në'ë Juan, ³⁰ pero yugu' bönni' yudo' fariseo, en bönni' yudo' tu'sédiné' xibá queé' Moisés biti' bila'dilé' nisa lu në'ë Juan, ate' caní guca, bulu'cá'ané' cá'asö le gú'unné' Dios guné' quégaquié'.

³¹ Gunné' ca' Xanru':

—¿Nacxi uséqui'tseda' bönachi nacuá' dza ni zóaru' na'a? ¿Nacxi caz nácagaquié'?

³² Nácagaquié' ca bí'ido' ta'guítjabi'. Ta'bó'öbi' lu yé'ëyi, en ta'bódxí'abi'. Ta'nnabi' tubi' ia'tubi': "Rucódxitu' queé'li' gui, pero biti' ruyá'ali'. Rul-la yéchi'tu', pero biti' ribódxili'."

³³ Caní nácali' tu' bidé' Juan, bönni' buquilé' bönachi nisa, en biti' gudahué' yöta xtila, en biti' gu'ë xisi uva, ate' rnnali' queé': "Tu' xihui' dzaga lé'." ³⁴ Cate' bida' neda', Bönni' Guljé' Bönachi, en rë'aj rahua', rnnali' quia': "Bönni' ni náquié' bönni' huágulë'ë, en bönni' re'jé'. Náquié' luzá'agaquié' bönni' tu'quixjé', en ia'z'íca'rë' bönni' dul-la'." ³⁵ Rea' lib'í'ili': Naca bë' nupa nápagaca yöl-la' réajni' queé' Dios ni'a que le túngaca.

Le bené' Jesús lidxé' tu bönni' yudo' fariseo

³⁶ Tu bönni' yudo' fariseo bulidzë' Jesús gágulené' lé' tsözxón, ate' guyázié' Jesús lidxé' bönni' na', en gurö'ë rahué'. ³⁷ Zóanu lu yödzö na' tu nigula udá dzaga, en cate' nózinu

rö'ë rahuë' Jesús lidxë' bönni' yudo' fariseo na', ní'irö bidxinu ni' nuá'anu tu bóga'do néquini guió'j nazaca' le yudzu tu le rilá' zxixi. ³⁸ Cate' bidxinu zaca' cúdzu'lë' Jesús, guró'önu xini'ë ribódxinu. Ní'irö gusí lonu rigú'unu nisa ribódxinu ni'ë Jesús, en ruzxinu ni'ë len guitsa' ícjanu. Butsaga lonu ni'ë, en gulú'unu ni'ë lë na' rilá' zxixi. ³⁹ Cate' bönni' yudo' fariseo na' nulidzë' Jesús bilé'enë' lë ni, guzá' ládxë'ë, rnnë': "La'tu' náquië' bönni' ni bönni' ru'ë didza' uláz queë' Dios, huéquite' enë' nuzxi na', en nacxi nácanu nigula ni rigannu Lë', tu' nácanu nigula udá dzaga." ⁴⁰ Ní'irö Jesús gudxë' bönni' fariseo na', rnnë':

—Simón, dë tu le ral-la' guía' li'.

Bubi'ë didza' bönni' na', rnnë':

—Gunná, Bönni' Usedi.

⁴¹ Jesús rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazjë' que chopa iz, ate' ia'tué' na' ral-lë'ë queë' lazjë' que chopa beo'. ⁴² Tu' cabí dë quégaquië' dumí ulu'guízxjë' lë na' tál-lë'ë queë', que lë ni na' buniti lahuë' iropë' lë na' tál-lë'ë queë'. Gunnátsöca' na'a. ¿Núzxilë' bönni' chopë' ni idxí'irönë' bönni' na' buniti lahuë' légaquië'?

⁴³ Bubi'ë didza' Simón na', rnnë':

—Réquida' neda', bönni' na' rála'rë' queë' dumí, lë na' buniti lahuë'.

Jesús gudxë' lë':

—Le nácasö rno'.

⁴⁴ Ní'irö buécjë' Jesús, ate' ni' ruyúë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' bití' bennu' quia' nisa quívida' ni'a, pero nigula ni gulú'unu ni'a nisa ribódxinu, en buzxinu ni'a len guitsa' ícjanu. ⁴⁵ Bití' butsaga lo' neda', pero cate' bidxíntea' lidxu', bití' ruzóa dxinu nigula ni, rutsaga lonu ni'a. ⁴⁶ Bití' gulú'u icja' le za, pero nigula ni gulú'unu ni'a lë na' rilá' zxixi. ⁴⁷ Que lë ni na' rea' li', dul-la' zían gubága'nu nigula ni, chiguyú'u yöl-la' runiti lo quéguequi, ate' nadxí'ide'enu neda'. Nu na' Dios runiti lahuë' le láti'do'os, láti'do'os nadxí'i Dios nu na'.

⁴⁸ Ní'irö Jesús gudxë'-nu nigula na', rnnë':

—Dul-la' gubágu'u chiguyú'u yöl-la' runiti lo que.

⁴⁹ Yugu' bönni' na' ta'bó'lenë' Jesús tahuë' gula'sí lógaquië' të' luzá'agaquië', ta'nnë':

—¿Nuzxi caz bönni' ni, runiti lotsë' ca' dul-la'?

⁵⁰ Ní'irö Jesús gudxë'-nu nigula na', rnnë':

—Tu' réajlë'u neda', chibuló' li'. Böaj lidxu', zoa dxi ládxu'u.

8

Yugu' nigula tácalennu Jesús, ta'gú'unu le tahuë'

¹ Gudödi gulaca lë ni, gudé' Jesús gapa nacuá' zían yödzö zxön, en yugu' yödzödo', ate' benë' libán ni', en bë'ë didza' que didza' dxi'a ca rinná bë'ë Dios, ate' idxínnutë' bönni' usëda queë' dzágagaquië' Lë'. ² Bál-lanu nigula bunë' Jesús légacanu dzágagacanu ca' Lë'. Bubéajë' bö' xihui' yú'ugaca légacanu, en bugúë' yugu' yödzöhuë' gü'iguequinu. Nútsa'nu ládjagacanu María, lënu ca' Magdalena, nigula na' bubéajë' gadxi bö' xihui' yú'ugaca lënu. ³ Juana, nigula queë' Chuza, bönni' yu'u lu në'ë le dë lidxë' Herodes, nútsa'nu ca' ládjagacanu, ate' cá'anqueze Susana nútsa'nu ca' légacanu. Ta'gú'unu nigula ni, en zíanrönu ca', le tahuë' Jesús, en yugu' bönni' usëda queë'. Tu'nódzjanu le dë quégacanu.

Rucúdzu'ë didza' Jesús ca naca queë' bönni' guz

(Mt. 13:1-9; Mr. 4:1-9)

⁴ Bila'rúaj bönachi zían yugu' yödzö ni', en bilá'gaca ga na' zoë' Jesús. Cate' bulu'dubë' ga na' zoë', Lë' bucúdzu'ë didza', rë' légaquië':

⁵ —Bírúajë' bönni' guz, söjësië' xisedo'. Cate' ni' söjësië', bulu'huöxaj bal-la xisedo' na' ga naca la' nöza, ate' bulu'libi bönachi léguequi. Bila'dxinba' ca' biguínido', en gulé'ajba'

xisedo' na' dzö'ö la' nöza. ⁶ Bulu'huöxaj ia'bal-la xisedo' na' lu yu ga rö'ö guió'j. Cate' gula'lén xisedo' na', la' gula'bídxitë tu' cabí nalupa' yu na'. ⁷ Bulu'huöxaj ia'bal-la xisedo' na' ga bulu'lén lubá yötsi'. Tsözxón gula'zxón lubá yötsi' na', en xisedo' na', ate' lubá yötsi' na' bila'röli xisedo' na' gula'lén, en gulún ditaj léguequi. ⁸ Bulu'huöxaj ia'bal-la xisedo' na' ga naca luyú bëbu. Cate' chigula'zxón, bulu'nödzej. Tu dxigu' na' bunödzej ia'tú gayuá'tërö xisedo' ca'.

Cate' budxi gunné' caní Jesús, bë'ë zidzej didza', rnnë':

—¡Nu zoa nagui, en riyöni ral-la' uzé nagui!

Bizx que rucúdzu'ë Jesús didza'

(Mt. 13:10-17; Mr. 4:10-12)

⁹ Ní'irö yugu' bönni' usëda queë' Jesús gula'nábinë' Lë', ta'nnë':

—¿Bizxi sa'yéaj lë na' bucúdzu'u didza'?

¹⁰ Jesús gudxë' légaquië':

—Dios ruzéajni'inë' libí'ili' le nagachi' ca rinná bë'ë Lë', pero ia'zica'rö bönachi ni, ru'ílena' léguequi didza' le rucúdzu'a didza' para cate' ulu'yúë', bití' ila'lé'enë', en cate' ila'yönnë', bití' ila'yéajni'inë'.

Riguíj'ë Jesús le rulu'i le bucúdzu'ë didza'

(Mt. 13:18-23; Mr. 4:13-20)

¹¹ Gunné' ca' Jesús:

—Caní naca le rulu'i lë na' bucúdzu'a didza'. Xisedo' na' naca xtídzë'ë Dios. ¹² Xisedo' na' bulu'huöxaj la' nöza tu'lu'i ca raca quégaca bönni' ta'yönnë' didza' na', pero la' za'të tu' xihui', en rigúa didza' na' bidxín lu icja ládxi'do'gaquië', para cabí ila'yéajlë'ë, en cabí ulu'lé'. ¹³ Xisedo' na' bulu'huöxaj lu yu ga rö'ö guió'j tu'lu'i ca raca quégaquië' bönni' ta'yönnë' didza' na', en tu'dzéjanë' ta'zi'ë le, pero nácagaquië' ca xisedo' na' bití' ben lui. Tu chí'isö ta'yéajlë'ë, tu' ridxín le rizí' bë' légaquië', ate' la' tu'huóatë ládxi'gaquië'. ¹⁴ Xisedo' na' bulu'huöxaj ga bulu'lén lubá yötsi' tu'lu'i ca raca quégaquië' bönni' ta'yönnë' didza' na', en cate' chibila'yönnë', yugu' le tu'í ládxi'gaquië' yödzölió ni, en yugu' yöl-la' tsahui' que, en yugu' le ta'yaza ládxi'gaquië' le taca ni, tun nigui légaquië', ate' bití' run dxin didza' na' lu icja ládxi'do'gaquië'. ¹⁵ Xisedo' na' bulu'huöxaj ga naca luyú bëbu tu'lu'i ca raca quégaquië' bönni', idú ládxi'gaquië' ta'yönnë' didza' na', en ta'gu'ë tsutsu le lu icja ládxi'do'gaquië', ate' lu yöl-la' riböza zxön ladxí' tunë' ca rnna didza' na'.

Rucúdzu'ë didza' Jesús que le rigú'u bení' lédxiru'

(Mt. 4:21-25)

¹⁶ Gunné' ca' Jesús:

—Cuntu nu bönni' ruquélë'ë guí', ate' la' rudúsi'të' le guí'ina, en bití' rigú'ë le zxani le ráti'në', pero ruzóë' le xilataj ga naca liná' lu yu'u, ate' nupa ila'yaza ní' ulu'zí' xibé guí' na'. ¹⁷ Ilá' lahui yúgu'të le nagachi', ate' gaca bë', ate' irúaj ga liná' yúgu'të le raca balándo'os.

¹⁸ 'Que lë ni na', buli'zé nágali', tu' huadéli'në' ia'lati' bönni' ruzóë' tsutsu icja ládxi'da'ahuë' didza' riyönnë', en huazi'rë' xtídzë'ë Dios, pero bönni' bití' ruzóë' tsutsu icja ládxi'da'ahuë' didza' riyönnë', huadúa didza' na' biyönnë'.

Xiné'ë Jesús, en yugu' bönni' bóchë'ë

(Mt. 12:46-50; Mr. 3:31-35)

¹⁹ Ní'irö bila'dxinë' xinë'ë Jesús, en yugu' bönni' bóchë'ë ga na' zoë', pero bití' guca ila'bíguë'ë gala' ga zoë' tu' nacuá' bönachi zían ni'. ²⁰ Zoa ní' nu bulidza Jesús, rnna:

—Nacu'ë xinó'o, en yugu' bönni' bóchu'u lö'a. Té'ënnë' ilu'ílenë' Li' didza'.

²¹ Bubi'ë didza' Jesús, rë' légaquië':

—Nupa ni ta'yöni xtídzë'ë Dios, en tun ca rnna, bönni' ni nácagaquië' ca xiná' caza', en yugu' bönni' böchi' caza'.

Jesús ribequi dxíë' bö' budunu'

(Mt. 8:23-27; Mr. 4:35-41)

²² Tu dza gurenë' Jesús tu lë'e bárcodo', dzágagaquië' bönni' usëda queë' Lë', ate' Jesús rë' légaquië':

—Udóditsöca'ru' ia'tsölá'a nísado' ni.

Ní'irö sōjácate'. ²³ Tsanni ni' ta'dödë' lu nísado' na', rásië' Jesús. Ní'irö gusí lo recja bö' budunu' lu nísado' na', ate' chirequi huötaj bárcodo' na' znan nisa, en zoa bōnadxi quégaquië'. ²⁴ Ní'irö gula'biguë'ë ga dë' Jesús, en bulu'subanë' Lë', ta'nnë':

—¡Bönni' Usedi! ¡Bönni' Usedi! ¡Chirequi huötjaru' lu nisa!

Cate' bubanë' Jesús, bulidzë' bö' na' recja, en nisa na' riyasa ridxíada', ate' guzóa dxi bö' na' recja, en guró'ö dxi lu nísado' na'. ²⁵ Ní'irö Jesús gudxë' yugu' bönni' usëda queë', rnnë':

—¿Naru' cabí réajlë'ëli' Dios?

Guládxinë' légaquië', en tu'bánninë'. Gulé luzá'agaquië' tuë' ia'túë':

—¿Nuzxi caz bönni' ni? Rinná bé'enë' bö' recja, en nísado', ate' tun ca rnna xtídzë'ë.

Tu bönni' yödzö Gadara yu'u lë' bö' xihui'

(Mt. 8:28-34; Mr. 5:1-20)

²⁶ Ní'irö bila'dxinë' lu xiyúgaquië' bönni' Gadara, le dë ia'tsölá'a nísado' ca dódilö ga dë luyú Galilea. ²⁷ Cate' birúajë' Jesús lë'e bárcodo' na' ga naca lu yu na', dutságuië' tu bönni' yödzö na' Lë'. Chigudzé yu'u bö' xihui' lë', ate' bíti'rö rácuë' lari', en bíti'rö rizóë' lu yu'u, pero nun xilatjé' lu znan bulóaj ga nádjagaca yeru ba. ²⁸ Cate' bönni' na' yu'u bö' xihui' lë' bilé'enë' Jesús, guródxí'ë zidzaj, ate' buzóa zxi bë' lahuë' Jesús, en bë'ë zidzaj didza', rnnë':

—¿Bizxi ral-la'a quiu', Jesús, Zxí'inë' Dios nayépisëtëre'? Ráta'yua' lo' cabí usaca' zí'u neda'.

²⁹ Caní gunné' tu' chigunná bé'enë' Jesús bö' xihui' na' urúaj lu bönni' na'. Zían luzuí zí'atëlö burixi butúluda' bö' xihui' na' bönni' na', ate' yugu' bönni' yödzö ni' gulúgui'ë lë' du guíë, en bulu'xéjanë' bregui' guíë ni'a në'ë, pero blë'ë yugu' du guíë na', ate' bö' xihui' na' yu'u lë' guchë' lë' lu lataj cá'asö. ³⁰ Ní'irö Jesús gunábinë' bö' xihui' na', rnnë':

—¿Bi leu'?

Bö' xihui' na' gudxi Lë':

—Le Zían lea'.

Caní gunná tu' yú'ugaca bö' xihui' zían bönni' na'. ³¹ Ní'irö yugu' bö' xihui' na' guláta'yugaca lahuë' Jesús cabí isól-lë'ë léguequi lataj chul-la quégaca nupa nátigaca. ³² Nacuá'aba' ca' tu có'öba' cuchi zían ta'daba' táguba' lu guí'ado' ni', ate' bö' xihui' na' gula'naba yechi' Jesús gu'ë léguequi lataj tsöjtsú'ugaca cuchi zían na'. Jesús bë'ë léguequi lataj. ³³ Bulu'rúaj yugu' bö' xihui' lu bönni' na', en yöjtsú'ugaca cuchi zían na', ate' yöjácaba' cuchi zían na' ga naca tu lë'e guíó'j. Yöjbíxigacaba' lu nísado', ate' ni' gula'yé'piba' nisa, gulátiba'.

³⁴ Cate' bila'lë'enë' bönni' tu'yúgaquië'-ba' cuchi zían na' ca na' guca quégacaba', guladxi gula'dzöbinë'. Bulu'zxúnnajë' ni', ate' yöjhuó'jgaquië' yöjtxjói'iguequinë' nupa nacua' yödzö na', en nupa nacua' la' guixi' ni'. ³⁵ Ní'irö bila'rúajë' bönni' yödzö na', yöjyúgaquië' lë' na' guca. Cate' bila'dxinë' ga na' zoë' Jesús, bila'lë'enë' bönni' na' gula'yú'u bö' xihui' lë', rö'ë xini'ë Jesús. Nacuë' lari', en dxí'ado' chizóë', ate' guládxinë'.

³⁶ Nupa na' bila'lë'e lë' na' guca gula'guíxjói'i légaquië' ca guca, böáquië' bönni' na' gula'yú'u bö' xihui' lë'. ³⁷ Ní'irö yúgu'të bōnachi zían na' quégaca yödzö nabábagaca Gadara na' guláta'yua lahuë' Jesús urúajë' lu xiyúguequi, tu' tádxinë'. Bubenë' Jesús lë'e

bárcodo' na', en söhuójjé'. ³⁸ Bönni' na' bulu'ru'aj bö' xihui' na' lë' gúta'yue' lahué' Jesús gu'ë lë' lataj tséajlené' Lë' tsözxón. Gunná bé'ené' Jesús lë' ugá'ané' ni', rnné':

³⁹ —Böaj lidxu'. Yöjtíxjöi'i bönachi uládz quiu' yugu' le zxön bené' Dios quiu'.

Bóajé' bönni' na' lidxé', ate' buzé' didza' idú lu yödzö ni' ca naca le zxön bené' Jesús queé'.

Jesús ruúné'-bi' bi'i nigula queé' Jairo enca' nigula na' gudannu lari' nácué'

(Mt. 9:18-26; Mr. 5:21-43)

⁴⁰ Cate' budxiné' Jesús ia'tsólá'a nísado' na', bulu'dzeja bönachi zían nacua' ni' ni'a queé' Lë', tu' ta'böza Lë'. ⁴¹ Ní'irö bidxiné' Jairo ga zoé' Jesús. Náquié' bönni' lo que yu'u ga tu'dubé' bönni' judío, en tu'sédé' queé' Dios. Biyéchué' xini'ë Jesús, en gúta'yue' lahué' tsejé' lidxé'. ⁴² Caní bené' tu' zóabi' tubi' bi'i nigula queé', chirequi gátibi'. Nácabi' bi'i la's dui queé', en yú'ubi' ca chinnu iz. Tsanni ni' sa'yéajé' Jesús, sönógaca tu'quirö bönachi zían Lë'.

⁴³ Nútsa'nu tu nigula ladaj bönachi zían na', chiguca chinnu iz riguí'i rizáca'nu. Biti' ruhu'i rön queé'nu que hué' quégaca cázanu nigula, ate' chibutönu dëra le dë queé'nu, riguízxjanu nupa tu'ún bönachi, pero bití' guca nu bönni' úné'-nu. ⁴⁴ Gubíga'nu zaca' cúdzulë' Jesús, en gudannu ru'i lari' nácué', ate' la' bu'itë hué' rön queé'nu.

⁴⁵ Ní'irö Jesús gunábiné' nupa nacua' ni', rnné':

—¿Nuzxi na' gudán neda'?

Gula'dá'bagui'ë yúgu'të'. Ní'irö Pedro, en nupa nacua'len lë' gulé' Lë', ta'nné':

—Bönni' Usedi, nacua' bönachi zían ni, tu'quirö Li', en tu'dxiga' Li', ate' ¿rnnatso' "¿Nuzxi na' gudán neda'?"

⁴⁶ Ní'irö Jesús gunné':

—Zoa nu gudán neda', tu' gúquibe'eda' birúaj yöl-la' huáca neda' le ruún bönachi.

⁴⁷ Cate' réquibe'enu nigula na' nóziné' Jesús le bennu, ní'irö guzxízinu. Biyéchunu xini'ë Jesús, en gudíxjöi'inu Lë' lógaca bönachi zían na' bizx que na' gudannu lari' nácué', en ca na' guca, la' böácatënu. ⁴⁸ Ní'irö Jesús gudxé'-nu:

—Nigúlado', tu' réajlé'u neda' chiböácu'. Böaj lidxu', zoa dxi ladxu'u.

⁴⁹ Cate' ni' ru'ë Jesús didza' ni, bidxiné' tu bönni' ni', zë'ë lidxé' bönni' lo na' que yu'u ga tu'dubé' tu'sédé' queé' Dios, ate' gudxé' bönni' lo na':

—Chigútibi' bi'i nigúlado' quiu'. Bítirö upízxjanu'-né' Bönni' Usedi.

⁵⁰ Cate' biyönné' Jesús lë' ni, ubi'ë didza', ré' bönni' lo na':

—Biti' gádxinu'. Guyéajlé'ësö Dios. Huöácabi' bi'i nigúlado' quiu'.

⁵¹ Cate' guyázié' Jesús yu'u na', bití' bé'ë lataj nu tsázalen Lë', pero légasasé' Pedro, en Jacobo, en Juan, enca' xuz xiná'abi' nigúlado' na'. ⁵² Ta'bödxi nupa nacua' ni'. Ta'bödxi yeché'ë ni'a queé'bi' bi'i nigúlado' na', ate' Jesús ré' légaquié', rnné':

—Bítirö códxili'. Biti' nátibi' nigúlado' ni. Rásisibi'.

⁵³ Bulu'titjé' Lë' tu' nózguequiné' chinátibi'. ⁵⁴ Ní'irö gudélé'ë Jesús ná'abi', en bë'ë zidzaj didza', rnné':

—Bi'i nigúlado', guyaschi.

⁵⁵ Ní'irö bu'u bö' naca cázabi', bubanbi', ate' la' guyásatëbi'. Jesús gunná bé'ené' légaquié' ilu'ë le gágubi'. ⁵⁶ Bulu'bánniné' xuz xiná'abi', pero Jesús gunná bé'ené' légaquié' cuntú nu ilé' ca na' guca.

9

Risól-lë'ë Jesús bönni' usëda queé' tsöjéngaquié' libán

(Mt. 10:5-15; Mr. 6:7-13)

¹ Ní'irö butubé' Jesús idxínnutë' bönni' usëda queé', ate' budödë' lu ná'agaquié' yöl-la' huáca, en yöl-la' unná bë' para ulu'béajé' bö' xihui' yú'ugaca bönachi, en ulu'úné' nupa

te'e. ² Gusól-lë'ë légaquië' tsöjéngaquië' libán ca rinná bë'ë Dios, en tsöjhuéngaquië' nupa te'e. ³ Jesús gudxë' légaquië':

—Biti' bi guá'ali' para la' nöza, calëga xiyágado', en calëga yöxaj, en calëga yöta, en calëga dumí, en biti' ixóa yenli' chopa lari'. ⁴ Bítí'tës yu'u ga tsú'uli', guli'sóa ni' cate' uzá'aröli' yödzö na'. ⁵ Gátí'tës ga biti' ilún bönachi libí'ili' bal, buli'rúaj yödzö na', en guli'cu'bi bëchtö da' lë'e lábali', le ulu'í légaquië' nagá'ana xíguia' nabága'gaquië'.

⁶ Ní'irö bila'rúajë' bönni' usëda queë' na'. Gula'dödë' yúgu'të yödzödo', tunë' libán que didza' dxi'a, en tu'únë' nupa te'e yúgu'të lu yödzö na'.

Ca gútië' Juan, bönni' buquilë' bönachi nisa

(Mt. 14:1-12; Mr. 6:14-29)

⁷ Biyönnë' Herodes, bönni' rinná bë'ë, ca naca yúgu'të le runë' Jesús, ate' gurö'ë böniga, tu' ta'nná bönachi:

—Juan na' chibubanë' lu yöl-la' guti.

⁸ Ia'bal-lë' ta'nnë':

—Chibulé'ë Elías, bönni' na' bë'ë didza' uláz queë' Dios.

Ia'bal-lë' ta'nnë':

—Chibubanë' tu bönni' bítsë'ë yugu' bönni' gulu'ë didza' uláz queë' Dios dza ni'te.

⁹ Herodes na' gunné':

—Juan na' burixa' yenë'. ¿Nuzxi caz bönni' ni, riyönda' queë' runë' yugu' lë ni?

Rizóa ribö'ë Herodes ilé'enë' Jesús.

Rugahuë' Jesús chi-un gayuá' bönachi

(Mt. 14:13-21; Mr. 6:30-44; Jn. 6:1-14)

¹⁰ Cate' bulu'dxinë' bönni' gubáz nasól-lë'ë Jesús ga zoë' Lë', bulu'siyönnë' Lë' yúgu'të le gulunë'. Ní'irö guchë'ë Jesús légaquië' quez. Yöjáquië' tu lataj cá'asö lu xiyú yödzö Betsaida. ¹¹ Cate' chinóziguequi bönachi lë ni, yöjnóguequi Lë', ate' Jesús benë' léguequi bal, en bé'lenë' léguequi didza' ca rinná bë'ë Dios, ate' bunë' nupa te'e.

¹² Cate' chizá' ral-la dza na', idxínnutë' bönni' gubáz queë' Jesús gula'bíguë'ë ga zoë', en të' Lë':

—Busöl-la' bönachi ni tsöjaca gapa dë yödzödo', en gapa dë yú'udo' idú gásibi'ilö para tsöjtíljagaquië' gapa ulu'gá'anë', en bi ilahuë', tu' naca lataj cá'asö ga ni zóaru'.

¹³ Ní'irö Jesús rë' légaquië':

—Guli'gu'ë libí'ili' le ilahuë'.

Të' Lë':

—Gáyu'sö yöta xtládo' dë, en chópasöba' böla dëba' queëtu', o ¿naru' huayéajtsatu' tsöjööutu' le ilágugaca bönachi zían ni?

¹⁴ Nacu'ë ca chi-un gáyu'ë bönni' ga na'. Ní'irö Jesús gudxë' yugu' bönni' usëda queë', rnnë':

—Guli'gún ga ila'bö'ë tu cö' huéajgaquië', ilaca ca chi-un huéajgaquië'.

¹⁵ Caní gulunë', ate' gula'bö'ë yúgu'të'. ¹⁶ Ní'irö gudélë'ë Jesús gayu' yöta xtila na', en chópaba' böla na', ate' guchisa lahuë' ruyúë' lúxiba, en rë' Dios: "Xclenu'." Ní'irö buzuxxjë' léguequi, en bë'ë quégaquië' bönni' usëda queë' para ulu'cu'ë lógaca bönachi na'. ¹⁷ Gulahuë' yúgu'të', en bulu'huóljanë'. Gudödi na' bulu'tubë' yugu' bizxaj bugá'ana, ate' bulu'lié' idú chinnu ga'böra.

Rnnë' Pedro Jesús náquië' Cristo

(Mt. 16:13-19; Mr. 8:27-29)

¹⁸ Tu dza tsanni ni' zoë' quez Jesús, rulidzë' Dios, bila'dxinë' bönni' usëda queë' ga zoë', ate' gunábinë' légaquië', rnnë':

—¿Nuzxi ta'nná bönachi naca' neda'?

¹⁹ Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilé' bönachi nisa. Ta'nná ia'bal-lé' nacu' Elías, ate' ta'nná ia'bal-lé' nacu' tu bönni' bítsé'ë yugu' bönni' gulu'ë didza' uláz queé' Dios dza ni'te, en nubané' lu yöl-la' guti.

²⁰ Ní'irö Jesús gunábiné' légaquié', rnné':

—Názxi libí'ili', ¿nuzxi rnnali' naca'?

Bubi'ë didza' Pedro, rnné':

—Nacu' Cristo nasól-lé'ë Dios.

Riguíxjö'ë Jesús ca si' ilútié' Lë'

(Mt. 16:20-28; Mr. 8:30-9:1)

²¹ Ní'irö Jesús gúdxidé'ë légaquié', en gunná bé'ené' légaquié' cuntú nu ilé' Nu náquié' Lë'. ²² Ní'irö ré' légaquié':

—Run bayudxi qui'í saca'a neda', Bönni' Guljé' Bönachi, zían le gaca quia'. Ulu'cá'ané' neda' cá'asó yugu' bönni' gula tu'zéajni'iné', en yugu' bixúz unná bé', en yugu' bönni' yudo' usedi. Ilútié' neda', pero dza tsonna dza Dios usubané' neda' lu yöl-la' guti.

²³ Gudxé' ca' yúgu'té':

—Channö ré'ëné' nu bönni' té'ë neda', ral-la' uzóé' tsölá'aló le dë queé', en gáquié' ca tu bönni' sa'yéajé' sötjé'ë lé'e yaga cruz, ate' ní'irö gaca té'ë neda'. ²⁴ Núti'tés bönni' ru'í ládxe'ë gun chí'ë yöl-la' na'bán queé', unítié' le, pero channö unítié' yöl-la' na'bán queé' tu' dë'ë neda', bönni' ni gata' yöl-la' na'bán idú queé'. ²⁵ Biti' bi uzi'ë xibé tu bönni' channö utubé' queé' yúgu'té le dë yödzölió ni, pero unítié' tsaz yöl-la' na'bán queé'. ²⁶ Nu bönni' rutuí'iné' neda', en rutuí'iné' ca' xtídzá'a, lësca' neda', Bönni' Guljé' Bönachi, utuí'ida' bönni' na' cate' huöda' idinná bé'a, dzágagaca neda' yöl-la' zxon queé' Xuza', en yöl-la' zxon quégaquié' gubáz lá'ayi queé' Dios. ²⁷ Le nácaté' rea' libí'ili', nacua' bal-lé' bönni' ni bití' ilátié' cate' ila'lé'eröné' dza idinná bé'ë Dios.

Ridzá' ca riná' lahué' Jesús

(Mt. 17:1-8; Mr. 9:2-8)

²⁸ Cate' bizá'a xunu' gubidza gudödi bé'ë Jesús yugu' didza' ni, ní'irö guché'ë Pedro, en Juan, en Jacobo, ate' gurené' tu lu guí'ado', ga na' bulidzé' Dios. ²⁹ Tsanni ni' ru'ílené' Dios didza', bidzá' ca riná' lahué', ate' böáca chiguíchido'os lari' nácué', en guyépi yösa bení'.

³⁰ Ní'irö bulu'lu'í lógaquié' chopé' bönni' ga zoé' Lë' tu'ílené' Lë' didza'. Nácagaquié' Moisés, en Elías. ³¹ Chopé' ni gula'yépé' yösa bení', ate' tu'ílené' Jesús didza' ca si' uzé'ë yödzölió ni, gátié' lu yödzö Jerusalén. ³² Sal-la' chirácada' ilásié' Pedro, en nupa nacua'len lé', bayudxi gula'ná'asé', ate' bila'lé'ené' yöl-la' bení' queé' Jesús, en chopé' na' nacua'lené' Lë'. ³³ Cate' bulu'zé'ë chopé' na' ga na' zoé' Jesús, ní'irö Pedro gudxé' Lë':

—Bönni' Usedi, dxi'a naca zóaru' ni. Gúntsöca'tu' tsonna yu'u lága'do', tu quiu', ia'tú queé' Moisés, en ia'tú queé' Elías.

Biti' réquibe'ené' Pedro bi na' rnné'. ³⁴ Tsanni ni' ru'ë didza' ni, la' guró'öté böaj le bugacu légaquié', ate' guládxiné' tu' nacué' lu böaj na'. ³⁵ Ní'irö biyón chí'í Nu ru'í didza' lu böaj na', rnna:

—Bönni' ni náquié' Zxí'ina'. Nadxí'ida' Lë'. Buli'zé' nágali' didza' gu'ë.

³⁶ Cate' budxi bé' didza' chí'í na', tuzé' Jesús nagá'analené' légaquié'. Ta'cuá' dxíé' bönni' uséda queé', ate' dza na' cuntú nu gulé' ca naca le bila'lé'ené'.

Ruúné' Jesús bi'í bönni' yu'u bö' xihui' lébi'

(Mt. 17:14-21; Mr. 9:14-29)

³⁷ Cate' za' rení' ia'tú dza bulu'huötjé' Jesús, en bönni' na' dzágagaquié' Lë' lu guí'ado' na', ate' bila'rúaj bönachi zían dutságagaca Jesús. ³⁸ Ní'irö bé'ë zidzaj didza' tu bönni' nútsé'ë ladaj bönachi zían na'. Bulidzé' Jesús, rnné':

—Bönni' Usedi, ráta'yua' lo' duyú'-bi' bi'í bönni' quia' tu' nácabi' bi'í la's dui quia'.

³⁹ Yu'u bö' xihui' lébi' le run ga ribódxí'abi', en ruxízida' lébi'. Run ga ribía bidxina' zxöna'

ruá'abi', en rurixi rutúluda' lëbi', ate' catu caz rusán lëbi'. ⁴⁰ Gúta'yua' lógaquië' bönni' usëda quiu' ulu'béajë' le, pero biti' gula'zëqui'në'.

⁴¹ Bubi'ë didza' Jesús, rnnë':

—Libi'ili', biti' réajlë'ëli', en nachixi ícjali'. ¿Gáca'xte ral-la' sóalena' lib'ili', en guá' ilena' queé'li'? Dijuá'a-bi' bi'i bönni' quiu' ni.

⁴² Cate' ni' zá'abi' ribíga'bi' ga na' zoë' Jesús, burixi butúluda' bö' xihui' na' lëbi'. Jesús gudil-lë' bö' xihui' na', en bunë'-bi' bi'i bönni' na'. Ní'irö bugu'ë-bi' lu në'ë xúzibi'.

⁴³ Bulu'bani yúgu'të bönachi ni' ca naca yöl-la' huáca zxön queë' Dios.

Jesús ru'ë didza' leyúbölö ca si' ila'zönë' Lë'

(Mt. 17:22-23; Mr. 9:30-32)

Tsanni ni' tu'bani yúgu'të bönachi ca naca le zxön runë' Jesús, Lë' gudxë' yugu' bönni' usëda queë', ⁴⁴ rnnë':

—Gulí'cú'u icja nágalí' didza' ni, tu' si' ulu'dödë' neda', Bönni' Guljë' Bönachi, lu ná'agaca bönachi.

⁴⁵ Biti' gula'yéajni'inë' bönni' usëda queë' didza' ni, tu' cabí ru'ínë' Dios légaquië' lataj ila'yéajni'inë', pero biti' bulu'rúguinë' ila'nábinë' Jesús ca naca didza' ni.

Nu naca lo

(Mt. 18:1-5; Mr. 9:33-37)

⁴⁶ Ní'irö gula'sí lógaquië' bönni' usëda queë' Jesús tu'ë didza'. Ta'nábini luzá'agaquië' tuë' ia'túë' núzxilé' gáquië' lo. ⁴⁷ Réquibe'enë' Jesús le ta'zá' ládxi'gaquië', ate' gudélë'ë-bi' tubi' bí'ido', en buzóë'-bi' cuitë'. ⁴⁸ Ní'irö rë' légaquië':

—Núti'tës bönni' gunë' bal tu bí'ido' caní tu' néquibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasól-lë'ë neda'. Que lë ni na' bönni' nútsë'ë ládjalí' nácarë' nöxaj ladxí', bönni' ni náquië' lo.

Nu biti' ridá'baga' rë'u, rácalen rë'u

(Mr. 9:38-40)

⁴⁹ Ní'irö Juan bulidzë' Jesús, rnnë':

—Bönni' Usedi, bilé'etu'-në' tu bönni' rugunë' dxin Lo' rubéajë' bö' xihui', ate' gunná bé'etu'-në' tu' cabí dë'ë rë'u.

⁵⁰ Jesús rë' lë':

—Biti' inná bé'eli'-në', tu' rácalen rë'u nu biti' ridá'baga' rë'u.

Jesús ridil-lë' Jacobo, en Juan

⁵¹ Cate' chizá' gal-la' dza ral-la' gátie' Jesús, en huëpë' yehua' yubá, benë' bayudxi tsejë' Jerusalén. ⁵² Gusól-lë'ë yugu' bönni' gubáz queë' ila'nóruë' ca Lë', ate' yójáquië' tu yódzödo' quégaca bönachi Samaria para tsöjpá'agaquië' ga ugá'anë' Jesús tu yëla.

⁵³ Yugu' bönni' yódzö na' biti' gulunë' Jesús bal tu' chinaca queë' sa'yéajë' Jerusalén.

⁵⁴ Cate' Jacobo, en Juan, bönni' usëda queë' Jesús, bila'lé'enë' lë ni, të' Lë':

—Xan, ¿naru' inábatsöca'tu' huötaj guí' le za' yehua' yubá, en usuniti légaquië', guntu' ca na' benë' Elías?

⁵⁵ Buécjë' Jesús, en gudil-lë' légaquië', rnnë':

—Biti' nózili' bizxi bö' dzáguí libí'ili'. ⁵⁶ Bida' ni neda', Bönni' Guljë' Bönachi, calëga para usunitia' yöl-la' na'bán quégaca bönachi, pero bida' dusölä' bönachi.

Ní'irö yójáquië' yódzö yúbölö.

Nupa té'ëni tsójácalen Jesús

(Mt. 8:19-22)

⁵⁷ Tsanni ni' yú'ugaquië' nöza Jesús, en yugu' bönni' dá'gaquië' Lë', bidxinë' tu bönni' yódzö Jerusalén, en rë' Jesús:

—Xan, ré'ënda' sá'lëna' Li' gátitës ga tseju'.

⁵⁸ Jesús rë' lë':

—Yúgu' böza', nacua' znan bulóaj quégacaba', ate' biguinnido', dxíagaca xcá'agacaba', pero neda', Bönni' Guljé' Bönachi, biti' dē quia' ga gáta'a uzí' ládxa'a.

⁵⁹ Ní'irö Jesús gudxé' tu bönni' yúbölö, rnné':

—Gudá' neda'.

Bönni' ni gudxé' Lē':

—Xan, benna neda' lataj huöja' lidxa' ga idxinrö dza chibucácha'a-né' xuza'.

⁶⁰ Jesús gudxé' lē':

—Bé' lataj bönni' chizóa ilátié' ulu'cáché'ē nupa chinati quégaquié', pero li', guyéaj, yójén libán ca inná bé'ē Dios.

⁶¹ Ní'irö bidxiné' ia'túé' ca', en ré' Jesús:

—Xan, ré'ēnda' sá'lena' Li', pero benna neda' lataj tseja' tsöjzégacada'-né' didza' di'a dza quia'.

⁶² Jesús gudxé' lē':

—Núti'tés bönni' ru'í ládxe'ē le raca yödzölió náquié' ca tu bönni' rugá'ané'-ba' bēdxi, en ruyúé' zaca' cúdzu'lé'. Nu run caní biti' naca lesaca' tsaza ga rinná bé'ē Dios.

10

Risól-lé'ē Jesús tsónnalalaj yu' chié' bönni' tsöjéngaquié' libán

¹ Gudödi gulaca yugu' lē ni, guróé' Xanru' ia'tsónnalalaj yu' chié' bönni' usēda queé', ate' gusól-lé'ē légaquié' chopa huéajgaquié' para ila'nórué' ca Lē', en tsöjajúé' yúgu'tē yödzö, en yódzödo' gapa chizóa tödē' Lē'. ² Gudxé' légaquié':

—Le nácatē, dēda' dxin quia', le naca ca tu la' yēla zxon ga nu tsöjlapa', pero nabábasö huen dxin quia' nacua'. Que lē ni na', guli'gáta'yu lahué' Dios, náquié' Xan la' yēla na', isól-lé'ē yugu' huen dxin ga naca la' yēla queé'. ³ Guli'tséaj na'a. Buli'yútsöca', neda' risól-la'a lib'ili', nácali' ca yugu' bö'cu' zxila' söjácaba' ladjagacaba' bö'cu' gu'á sīnia'. ⁴ Biti' guá'ali' yöxaj dumí, en calēga buzudi yöta, en biti' guá'ali' ia'tú cö' xiráchuli', en biti' tseli' para gü'ilenli' bönachi didza' gapa naca la' nöza. ⁵ Gáti'tés yu'u ga tsú'uli', innali': "Le ribequi dxi ladxi' gaca quégaca bönachi nacua' yu'u ni." ⁶ Channö zoa ni' nu bönni' si'ē yöl-la' ribequi dxi ladxi', ugá'analen lē' le ribequi dxi ladxi' na' inábali', pero channö cabí zoa ni' nu bönni' caní, ugá'analen lib'ili' le ribequi dxi ladxi' na' inábali'. ⁷ Guli'gá'ana yu'u ga na' tsú'uli', en guli'gu'aj guli'gagu bi ilunné' queéli', tu' udzöli quéziné' bönni' huen dxin le gahué'. Biti' tódili' yu'u yu'u. ⁸ Gáti'tés yödzö ga tsú'uli', ate' ilún lib'ili' bal, guli'gagu le ulu'cu'ē loli'. ⁹ Buli'ún nupa te'e nacua' yödzö na', en guli'gué' léguequi: "Chibidxín le rinná bé'ē Dios ga zóali'." ¹⁰ Gáti'tés yödzö ga tsú'uli', channö cabí ilún lib'ili' bal, guli'rúaj, tsöjsóali' la' nöza que yödzö na', en innali': ¹¹ "Béchtö que ládza'li' le da' lē'e lābatu' ruquínajtu', le rulu'í nabága'li' xíguia', pero ral-la' inózili' lē ni, chibidxín le rinná bé'ē Dios ga zóali'." ¹² Neda' rea' lib'ili', cate' idxín dza ichúguié' Dios quégaca bönachi, ila'gu'í ila'zaca'rö bönachi yödzö ni' ca ila'gu'í ila'zaca' bönachi yödzö Sodoma, nupa ni' busunítié' Dios.

Le gaca quégaca nupa biti' ulu'bf'i ládxi'gaca

(Mt. 11:20-24)

¹³ Gunné' ca' Jesús:

—Bica' bayechi' lib'ili', bönachi yödzö Corazín. Bica' bayechi' lib'ili', bönachi yödzö Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca rubani ca yugu' le bena' ga zóali', dza ni'te ulu'bf'i ládxi'gaquié' bönni' ni', ate' ilácué' lari' cá'asö, en ila'gu'ē dö ícjagaquié', le ulu'ígaca chibulu'bf'i ládxi'gaquié'. ¹⁴ Que lē ni na', cate' idxín dza ichúguié' Dios quégaca bönachi, qu'í sáca'röli' ca ila'gu'í ila'záquié' bönni' yödz Tiro, en yödz Sidón. ¹⁵ Lib'ili', bönachi Capernaum. Réquili' tsázali' yehua' yubá. Huótjali' tsöjtsázali' lataj chul-la' quégaca nupa nátigaca.

¹⁶ Ní'irö Jesús gudxé' yugu' bönni' usēda queé', rnné':

—Nu ruzé nagui libí'ili', ruzé nagui ca' neda', ate' nu rucá'ana libí'ili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasól-lë'ë neda'.

Bönni' yöjéngaquië' libán tu' dxinë' ga zoë' Jesús

¹⁷ Cate' tsónnalalaj yu' chië' bönni' na' gusól-lë'ë Jesús bulu'dxinë' ga zoë' Lë', bönni' na' yöjéngaquië' libán, ta'nné':

—Xan, tun bö' xihui' ca rnnatu' cate' ruguntu' dxin Lo'.

¹⁸ Jesús gudxë' légaquië':

—Neda' bilé'eda' Satanás tu' xihui', gubixi zxan lúzxiba ca run yösa, le riyaza luyú.

¹⁹ Buli'yútsöca', neda' nudöda' lu ná'ali' yöl-la' unná bë' para gaca sóngacali'-ba' bëla sínia', en xöjnó', en bití' bi gaca queé'li', ate' ucúl-lali' yöl-la' unná bë' que tu' xihui', nu bití' rilé'e rë'u dxí'a. ²⁰ Na'a, buli'dzeja, calé'gasö tu' tun bö' xihui' ca rnnali', pero tu' nuzúajgaca lali' lu guichi ni' yehua' yubá.

Rudzéjanë' Jesús

(Mt. 11:25-27; 13:16-17)

²¹ La' ní'isö rudzéjanë' Jesús, dzáguië' Dios Bö' Lá'ayi Lë', rnnë':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë' ni lógaquië' bönni' táquië' yenni', en bönni' ta'yéajni'inë', pero buluí'iguequinu'-bi' bí'ido' ca naca. ¡Ca' gaca, Xuza', tu' caní' guyaza ládxi'u!

²² Ní'irö gunné':

—Yúgu'të budödë' Xuza' lu na'a. Cuntu nu bönni' nózinë' Nu náquië' Zxí'inë' Dios, pero tuzë' Dios Xuz nózinë', ate' cuntu nu nözi Nu náquië' Dios Xuz, pero tuzë' Zxí'inë' nózinë', ate' inózigaca ca' nupa na' Zxí'inë' ré'ënë' uluí'inë' léguequi Xuzë'.

²³ Ní'irö Jesús buyúë' yugu' bönni' usëda queë', en rë' légaquië':

—Bica' bágaca nupa ta'lé'e le rilé'eli' libí'ili', ²⁴ tu' rea' libí'ili': Zían bönni' gulu'ë didza' uláz queë' Dios, enca' bönni' gula'nná bë'ë, gulé'ënnë' ila'lé'enë' le rilé'eli', pero bití' bila'lé'enë' le. Gulé'ënnë' ila'yönnë' le riyónili', pero bití' bila'yönnë' le.

Tu bönni' Samaria, bönni' tsahui'

²⁵ Ní'irö guyasë' tu bönni' yudo' usedi, en para si' bë'ë Jesús, gunábinë' Lë', rnnë':

—Bönni' Usedi, ¿bizxi ral-la' guna' para idéli'da' yöl-la' na'bán idú?

²⁶ Jesús rë' lë':

—¿Bizxi caz nazúaj lu guichi lu xibá queë' Moisés? ¿Nacxi rusaca' quiu' lë' na' rulabu'?

²⁷ Bubi'ë didza' bönni' na', rnnë':

—Caní' rna: "Ídxí'ínu' Xanu' Dios idú ládxi'u, en len idú icja ládxi'do'o, en len idú yöl-la' run quiu', en len idú yöl-la' réajni'i quiu', ate' idxí'ínu' bönni' luzó'o ca nadxí'i cuinu'."

²⁸ Jesús rë' lë':

—Dxí'ado' bubí'u didza'. Ben caní, ate' gata' quiu' yöl-la' na'bán na'.

²⁹ Tu' gú'unnë' bönni' na' ubéaj dxí'a cuinë', rë' Jesús:

—¿Nuzxi na' bönni' luzá'a?

³⁰ Bubi'ë didza' Jesús, rë' lë':

—Buzé'ë tu bönni' Jerusalén, rudínnië', sa'yéajë' yödzö Jericó. La' nöza ni' gula'zönë' gubán lë'. Gula'gúë' lari' nácuë', en gulunë' lë' huë'. Ní'irö bulu'zë'ë ni', en nucá'ana-gaquië' lë', chirati cazë'. ³¹ Ní'irö gudödë' tu bixúz la' nöza ni'. Cate' bilé'enë' bönni' huë' na', tsólá'alö gudödë'. ³² Gudödë' ca' ni' tu bönni' nababë' zxí'ini xi'sóë' Leví, yugu' bönni' na' tunë' dxin que yudo'. Cate' bilé'enë' lë', tsólá'alö ca' gudödë'. ³³ Lësca' yu'ë tu bönni' Samaria nöza na', ate' bidxinë' gala' ga dë' bönni' huë' na'. Cate' bilé'enë' lë', buéchi' ládxi'ë lë'. ³⁴ Gubígui'ë ga na' dë', ate' gulu'ë le za, en xisi uva nál-la lu huë' queë', ate' buchólinë' le lari'. Ní'irö budxíë' lë' cúdzu'ba' böa' queë', en bu'ë lë' yu'u ga ta'dxinë' bönni' yú'ugaquië' nöza, ate' ni' gudapa chi'ë lë'. ³⁵ Cate' za' rení' ia'tú dza, en chizóa

uzé'ë bönni' Samaria na', guléajë' láxjaru' que chopa dza, le bucá'anë' lu në'ë bönni' xan yu'u na', en rë' lë': "Gudapa chi'ë bönni' ni, en channö utóu' ia'lati' dumí, ubi'a neda' quiu' cate' huöda'." ³⁶ Na'a, ¿nacxi runi li? ¿Núzxilë' bönni' yonna ni gúquië' bönni' luzé'ë bönni' na' gulu'ë dö' bönni' gubán queë'?

³⁷ Bubi'ë didza' bönni' yudo' usedi na', rë' Jesús:

—Bönni' na' buéchi' ládxë'ë lë'.

Ní'irö Jesús gudxë' lë':

—Guyéaj na'a, yöjén ca' li'.

Le benë' Jesús lídxigacanu Marta, en María

³⁸ Ní'irö bu'ë nöza Jesús, ate' bidxinë' tu yódzödo' ga ni' tu nigula lënu Marta guché'ënu Lë' lídxinu. ³⁹ Marta ni zóanu nigula zxlánu lënu María, ate' María na' guró'ötënu ga naca xini'ë Jesús, en ruzé' náganu xtídzë'ë. ⁴⁰ Marta na' bubi buguí'inu, zían dxin runnu, ate' gubíga'nu ga na' zoë' Jesús, en rënu Lë':

—Xan, ¿naru' cabí ruí'i ládxí'tso' neda' tu' nucá'anabi' bi'i zxila' ni neda', ate' tuza' runa' dxin? Gudxi-bi' gácalenbi' neda'.

⁴¹ Bubi'ë didza' Jesús, rë'ë-nu:

—Marta, Marta, ruúbi ruguí'ide'enu', en zían le ruí'i ládxu'u runu'. ⁴² Tuz le run bayudxi nu gun, ate' María ni guröbi' lë na' nácatëro dxi'a, ate' lë na' guröbi' bití' udúa queébi'.

11

*Ca ral-la' ulídzaru'-në' Dios
(Mt. 6:9-15; 7:7-11)*

¹ Tu dza ni' Jesús rulidzë' Dios. Cate' budxi bé'lenë' Dios didza', tuë' bönni' usëda queë' rë' Lë', rnnë':

—Xan, busedi netu' ulídzatu'-në' Dios gü'íilentu'-në' didza', ca benë' Juan, busédinë' bönni' dá'gaquië' lë'.

² Ní'irö Jesús rë' légaquië':

—Cate' ulídzali'-në' Dios gü'íilenli'-në' didza', guli'ná:
Xuztu', zu' yehua' yubá, gá'ana zxon Lo'.

Gudá inná bë'u.

Gaca ca raza ládxu'u Li' luyú ni, ca na' raza yehua' yubá.

³ Benna le gágutu' na'a dza.

⁴ Buniti lo netu' dul-la' nabága'tu'

ca netu' ca' runiti lotu' nupa tua' dö' queé'tu'.

Biti' gu'u lataj si' bë' tu' xihui' netu',

pero busölá netu' lu na' nu ruá' dö'.

⁵ Jesús rë' ca' légaquië':

—Channö zoë' nu bönni' ladjali', en zoë' böchi' luzé'ë, en channö huidë' ga na' zoë' guluhuëla, ate' ulidzë' lë', innë': "Bócha'a, benna quia' tsonna yöta xtila ⁶ tu' si' bidxinë' quia' böchi' luzá'a, zë'ë zi'tu', pero bití' bi dë le gu'a-në' gahuë'." ⁷ ¿Naru' ubi'ë didza' caní bönni' na' zoë' yu'u, guíë' lë': "Biti' utsó'o neda' tu' chinayayaj yu'u, en chidélengacabi' bi'i quia' neda', ate' bití' gaca chasa' bi gunna' quiu'?" ⁸ Neda' rea' libí'ili': Sal-la' bití' chasë' bi unödzjë' queë' tu' náquië' böchi' luzé'ë, pero chasë', en unödzjë' queë' idutë le riquinnë' para cabirö upízxjanë' lë'. ⁹ Que lë ni na' rea' libí'ili': Guli'naba, ate' Dios gunnë' queé'li'. Guli'quilaj, ate' idzöli queé'li'. Buli'lidza ra' yu'u, ate' tsalaj queé'li'. ¹⁰ Nu rinaba, rizí' que, ate' nu riguilaj, ridzöli que, ate' nu rulidza ra' yu'u, ralaj que.

¹¹ Channö zoë' nu bönni' ladjali', en náquië' xuz, ate' channö zxf'inë' inábibi' lë' yöta xtila, ¿naru' unödzjatsë' queé'bi' guíój? Channö inábibi' lë' tuba' böla, ¿naru' unödzjatsë' queé'bi' bëla? ¹² Channö inábibi' lë' dxita que böra, ¿naru' unödzjatsë' queé'bi' xöjné'?

¹³ Caní naca, nácali' libí'ili' huiá' dö', pero nózili' unódzjali' quégacabi' zxf'inili' le naca dxi'a. Nácatërö löza Xúzili' zoë' yehua' yubá gunnë' queéli' Dios Bö' Lá'ayi, núlöli' inábili' Lë'.

Ta'nnë' runë' dxin Jesús len yöl-la' huáca que tu' xihui'

(Mt. 12:22-30; Mr. 3:19-27)

¹⁴ Tu dza bubéajë' Jesús bö' xihui' yu'u tu bönni', le run ga biti' raca innë'. Cate' burúaj bö' xihui' na', bë'ë didza' bönni' na' biti' guca innë', ate' bulu'bani bönachi nacua' ni'.

¹⁵ Bal-la bönachi nacua' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajë' yugu' bö' xihui' na'.

¹⁶ Ia'bal-la bönachi na' gulé'ëni ila'z'í' bë' Jesús, ate' gula'nabi Lë' gunë' tu le gaca bë' le za' yehua' yubá. ¹⁷ Réquibe'enë' Jesús le ta'zá' ládxi'gaquië', ate' rë' légaquië':

—Gátitës ga ta'nná be'e bönachi luzé'eguequi, channö ila'rúaj choplö la' léguequisö bönachi na', ila'niti. Channö ila'rúaj choplö bönachi nacua' tu yu'u, údxi quéguequi.

¹⁸ Lësca' caní raca que Satanás, tu' xihui', nazí'i le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bë' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'? ¹⁹ Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna quégaca nupa dá'gaca libí'ili' yöl-la' huáca tu'béaj yugu' bö' xihui'? Que lë ni na', le tun nupa ni naca bë' nachíxili'. ²⁰ Channö neda', len yöl-la' huáca queë' Dios rubéajgaca' bö' xihui', le nácatë chibidxín le rinná bë'ë Dios ga zóali'.

²¹ Cate' tu bönni' nál-la dë lu në'ë le rudí'inë', en rapa chi'ë lidxë', naca chi'i dërö le dë queë'. ²² Na'a, channö zë'ë ia'tué' bönni' nál-latërë' ca lë', en ucul-lë' lë', ní'irö cuë' yúgu'të le rudí'inë', lë na' ruzxöni ládxi'ë, ate' quísië' le dë queë' bönni' na'.

²³ Nu biti' rácalen neda', ridá'baga' neda'. Nu biti' rutúbilen neda', rusilasi nu na'.

Ca naca que bö' xihui' rudxín xilataj

(Mt. 12:43-45)

²⁴ Gunnë' ca' Jesús:

—Cate' rirúaj bö' xihui' lu bönni', ridá gapa nabídx, riguilaj ga uzí' ladxí'. Channö cabí idzöli que, inná: “Huöja' xilatja' ga ni' birúaja'.” ²⁵ Cate' rudxín ni', röjxaca' bönni' na', náquië' ca tu yu'u chinulúa, en chinabá'a para nu tsöjsóa ni'. ²⁶ Ní'irö reaj, en röjxi' ia'gadxi bö' xihui', nácatërö xihui' ca le, ate' ta'yú'u bönni' na'. Na'a, le raca queë' bönni' na' nayáli'tërö ca le guca queë' zí'alö.

Le naca bica' ba le naca idú

²⁷ Tsanni ni' ru'ë Jesús didza' ni, tu nigula nútsa'nu ladaj bönachi zían na' bé'ënu zidzaj didza', rnnanu:

—Bica' ba nigula na' biá'anu Li' lé'ënu, en bica' ba ca' luchú'unu ga na' gúdxu'u.

²⁸ Bubi'ë didza' Jesús, gunnë':

—Nácatërö bica' ba nupa ta'yöni xtídzë'ë Dios, en tun ca rnna.

Ta'nábinë' Jesús gunë' le gaca bë' nuzxi náquië'

(Mt. 12:38-42; Mr. 8:12)

²⁹ Tsanni ni' ta'biga' bönachi zían ga zoë' Jesús, gusí lahuë' ru'ë didza', rnnë':

—Ta'nába bönachi tuá' dö' ni guna' le gaca bë' ga za' yöl-la' huáca quia', pero biti' bi le gaca bë' ila'lé'enë'. Tuz le gaca bë' ca na' guca queë' Jonás ila'lé'enë'. ³⁰ Ca na' guca queë' Jonás, gúquië' tu le naca bë' lógaca bönachi yödzo Nínive, lësca' caní gaca quia' neda', Bönni' Guljë' Bönachi, gaca' tu le gaca bë' lógaca bönachi dza ni zóaru' na'a. ³¹ Cate' idxín dza ichúguië' Dios quégaca bönachi ila'gu'i ila'zaca', en uchi'a usöröë' bönachi dza ni zóaru' na'a, Dios uchisë'-nu nigula gunná bé'ënu bönachi dza ni'te luyú ni' dë tsölá'a ga ridödi gubidza beo' ziaga, ate' le bennu uluí'i nabága'gaca bönachi ni xíguia', tu' bídanu lënu, birúajnu ga naca zí'tu' para uduzë' náganu didza' réajni'i bë'ë Salomón,

bönni' gunná bé'enë' bönachi Israel, pero na'a, zoa' neda' ni, en nayépisëtëra' ca Salomón na'. ³² Lësca' caní, Dios uchisë' bönni' gula'cu'ë yödzo Nínive cate' idxín dza ichugu bë'ë quégaca bönachi, en uchi'a usöröë' bönachi dza ni zóaru' na'a, ate' le gulunë' uluí' nabága'gaca bönachi ni xíguia', tu' bulu'bí'í ládxi'gaquië' bönni' Nínive cate' bila'yönnë' libán benë' Jonás, ate' na'a zoa' neda' ni, en nayépisëtëra' ca Jonás na'.

Le rigú'u bení' lu icja ládxi'do'oru'
(Mt. 5:15; 6:22-23)

³³ Gunnë' ca' Jesús:

—Cate' nu ruquela' guí', biti' rigú'u le ga nagachi', en biti' rudusi' le guí'ina, pero ruzóa le xitsá' ga liná', para uzení' quégaca nupa ta'yú'u yu'u na'. ³⁴ Guió'j loru' naca ca tu le rigú'u bení' lu icja ládxi'do'oru'. Channö guió'j lo' naca dxi'a, idúteo' yudzu le naca bení', pero channö naca xihui' guió'j lo', idúteo' yudzu le naca chul-la. ³⁵ Ben chi'i cuinu' na'a, para cabí huó'aca chul-la lë na' rigú'u bení' lu icja ládxi'do'o. ³⁶ Caní naca, channö idúteo' nalísinu' le naca bení', en biti' bi zóalen lí' le chul-la, yúgu'të ilé'enu' dxi'a ca raca cate' ruzení' quiu' guí'.

Jesús ruzéqui'ë yugu' bönni' yudo' didza'
(Mt. 23:1-36; Mr. 12:38-40; Lc. 20:45-47)

³⁷ Cate' budxi bë'ë didza' ni Jesús, tu bönni' yudo' fariseo bulidzë' Lë' para tsójtágulenë' lë'. Cate' guyázië' Jesús lidxë' bönni' yudo' na', gurö'ë rahuë'. ³⁸ Cate' bönni' yudo' fariseo na' bilé'enë' Lë', bubáninë' tu' cabí gudibi në'ë Jesús cate' si' gahuë'. ³⁹ Xanru' rë' lë':

—Libí'ili', bönni' yudo' fariseo, riguibi cuinli' ca riguíbili' láhuilögaca le ré'aji ráhuili', pero lu icja ládxi'do'oli' ruhuídí'li', en rizá' ládxi'li' le ruá' dö'. ⁴⁰ Libí'ili', bönni' biti' réajni'ili'. ¿Naru' cabí nózili', Nu ben le zoa láchuisö ben ca' le yu'u lé'elö? ⁴¹ Na'a, guli'gún gun le dë queé'li', ate' ní'irö huó'aca dxi'a yúgu'të le dë queé'li'.

⁴² 'Bica' bayechi' libí'ili', bönni' yudo' fariseo. Riguí'zjali' que yudo' tu cö' huéaj tu' chi cö' le rizí'ili' que xöhuéaj, en que guixi' ruda, en quégaca guixi' cuando', pero rudódisili' le naca tsahui', en yöl-la' nadxí'i queé'li' Dios. Yugu' lë ni run bayudxi gunli', en biti' ucá'anali' ia'zica' lë na' runli'.

⁴³ 'Bica' bayechi' libí'ili', bönni' yudo' fariseo. Ré'ënili' có'öli' gapa naca lo lu yu'u ga rudúbili' rusédali' queë' Dios, en ré'ënili' ulu'lidza bönachi libí'ili' ba zxön gapa naca láhuilöguequi bönachi.

⁴⁴ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli', tu' nácali' ca nácgaca yeru ba quégaca nupa nátigaca le cabí nalá'gaca, ate' ta'dá bönachi láhuigaca yeru ba na', en biti' téquibe'e.

⁴⁵ Ní'irö ubi'ë didza' tu bönni' yudo' usedi raquië' xibá queë' Moisés. Rë' Jesús:

—Bönni' Usedi, cate' rnno' caní, netu' ca' runu' zí'.

⁴⁶ Jesús rë' lë':

—Bica' bayechi' ca' libí'ili', bönni' yudo' usedi rácali' xibá queë' Moisés, tu' rusubága'-gacali' bönachi tu yua' zi'i le cabí gaca nu guá', pero libí'ili' calëga láti'do'os biti' ruláhuil'li' le len ná'ali'.

⁴⁷ 'Bica' bayechi' libí'ili', tu' richísali' biquitaj quégaca ba ga nagáchi'gaquië' bönni' gulu'ë didza' uláz queë' Dios, ate' gulútië' xuz xtó'oli' légaquië'. ⁴⁸ Caní naca, runli' ba nalí runli' tuz le gulunë' xuz xtó'oli' tu' gulútië' xuz xtó'oli' na' légaquië', ate' libí'ili' richísali' biquitaj quégaca ba ga nagáchi'gaquië'.

⁴⁹ 'Que lë ni na', lu yöl-la' réajni'i queë', Dios gunné' caní: "Isól-la'a queé'li' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lë' gútili', en ia'bal-lë' cuia na'li' légaquië'." ⁵⁰ Caní gunë' Dios tu' uchi'a usöröë' quégaca bönachi dza ni zóaru' na'a, ni'a que rön quégaca yúgu'të bönni' gulu'ë didza' uláz queë', bönni' ni' bétigaca bönachi légaquië' cate' gusí lo rata' yödzölió, ⁵¹ ga gusí lo nu bëti Abel, ga bidxintë gulútië' Zacarías, bönni' na' gulútië' gatsaj láhui'lö ga dë bucugu lá'ayi ga na'

tu'zégui'gaquië'-ba' böa' bédxido' lahuë' Dios, en ga dë lataj lá'ayi. Que lë ni na', rea' libí'ili', Dios uchúguë' quégaca bönachi dza ni zóaru' na'a, ni'a que rön quégaca yúgu'të bönni' na' gulútië' xuz xtó'oli' légaquië'.

⁵² 'Bica' bayechi' libí'ili', bönni' yudo' usedi, rácali' xibá queë' Moisés. La' libí'isili' dë lu ná'ali' xzí'ini guíë que lataj ga ta'dzöli bönachi yöl-la' réajni'i. Libí'ili' biti' riyázali', ate' ruzága'li' xinózigaca nupa té'ëni ila'yaza.

⁵³ Cate' Jesús budxi bé'lenë' légaquië' didza' ni, bönni' yudo' tu'sédinë', en yugu' bönni' yudo' fariseo gula'léde'enë' Lë', ate' gula'sí lógaquië' ta'naba yúdxide'enë' Lë' ca naca zían le taca, ⁵⁴ en tu'béajë' Lë' didza' para gaca ulu'zéguië' Lë' didza' ni'a que didza' ubi'ë.

12

Rusédinë' Jesús ca naca yöl-la' rulu'isö tsahui' cuini

¹ La' dza na' bulu'dubi zían gayuá' bönachi ga zoë' Jesús ga bidxintë ta'rólisö luzé'eguequi bönachi na'. Ní'irö gusí lahuë' Jesús rë' yugu' bönni' usëda queë cazë', rnnë':
—Gulí'gún chí'i cuinli' que le naca ca cúa zi que yöta xtila quégaquië' bönni' yudo' fariseo, le naca yöl-la' rulu'isö tsahui' cuini quégaquië'. ² Biti' bi dë le naca balándo'os le cabí ilá' lahui, en biti' bi dë le nagachi' le cabí gaca bë'. ³ Que lë ni na', yúgu'të le chigunnáli' ga naca chul-la, ila'yöni bönachi ga naca lu bení', ate' didza' bé'ëli' bagáchi'sö ga guzóa lu yu'u nayayaj, gaca libán que ga naca lógaca bönachi.

Nu ral-la' gádxiru'

(Mt. 10:28-31)

⁴ Gunnë' ca' Jesús:

—Bócha'ado', rea' libí'ili': Biti' gádxili' bönni' tútigaquië' bönachi, ate' tödi na' bíti'rö bi gaca ilunë' quéguequi. ⁵ Ulu'ida' libí'ili' nu ral-la' gádxili'. Gulí'gadxi Nu na' gaca ugúa yöl-la' na'bán queé'li', en tödi na' dë lu në'ë yöl-la' unná bë' chú'unë' libí'ili' lu gu' gabila. Ön, rea' libí'ili', gulí'gadxi Nu na'.

⁶ 'Túti'gaquië'-ba' gáyu'ba' biguínido' len chopa dumí lásido'. Biti' ral-la ládxe'ë-ba' Dios tu biguínido' na'. ⁷ Lësca' caní, yúgu'të guitsa' ícjali' nabábagaca lahuë' Dios. Que lë ni na', biti' gádxili'. Nazáca'tëröli' libí'ili' ca zianba' biguínido'.

Nupa ta'nmasö néquiquequi queë' Jesús

(Mt. 10:32-33; 12:32; 10:19-20)

⁸ Gunnë' ca' Jesús:

—Rea' libí'ili': Yúgu'të bönni' ta'nnë' néquiquequinë' quia' neda' lógaca bönachi, lësca' neda', Bönni' Guljë' Bönachi, innía' néquiquequinë' quia' lógaquië' gubáz lá'ayi queë' Dios, ⁹ ate' bönni' ta'dá'baguë'ë néquiquequinë' quia' lógaca bönachi, lësca' neda' tá'baga'a néquiquequinë' quia' lógaquië' gubáz lá'ayi queë' Dios.

¹⁰ 'Yúgu'të nupa bi ila'nnë' quia' neda', Bönni' Guljë' Bönachi, gaca uniti lahuë' Dios léguequi, pero nu innë' zi' queë' Dios Bö' Lá'ayi, biti' uniti lahuë' Dios nu na'.

¹¹ 'Cate' ila'ché'ë libí'ili' gapa naca lu yu'u ga tu'dubë' bönni' judío, en tu'sédë' queë' Dios, en lógaquië' bönni' ulu'chi'a ulu'söróë' libí'ili', en lógaquië' bönni' dë lu ná'agaquië', biti' ubi ugu'ili' nacxi gunli' o bizxi didza' ubí'ili', o bizxi innali'. ¹² La' dza ná'asö usédinë' Dios Bö' Lá'ayi libí'ili' le ral-la' innali'.

Huáca gun yöl-la' tsahui' queéru' ga gal-la ládxi'ru'-në' Dios

¹³ Tu bönni' nútsë'ë ladaj bönachi zían na' rë' Jesús, rnnë':

—Bönni' Usedi, gudxë' bócha'a gunné' uláz quia' le guta' queë' xuztu'.

¹⁴ Jesús rë' lë':

—Bönni'. ¿Naru' zoa nu buzóa neda' ca nu uchi'a usöró libí'ili', o nu gun gatsaj le dë queé'li'?

¹⁵ Ní'irö Jesús gudxë' bönachi nacua' ni', rnnë':

—Buli'yútsöca'. Guli'gún chi'i cuinli' para cabí uhuídi'li'. Le uzi'ë xibé nu bönni' biti' nácasö le zían le dë queë'.

¹⁶ Ní'irö Jesús bé'lenë' légaquië' didza', bucúdzu'ë didza', rnnë':

—Zoë' tu bönni' rilé'enë' yöl-la' tsahui' queë', ate' runódzjada' gulapa lu xiyúë'.

¹⁷ Ní'irö guzá' ládxë'ë bönni' na', rnnë': “¿Nacxi guntsa'? Biti' dë ga gapa chi'a le rulá' quia'.” ¹⁸ Ní'irö rnnë': “Caní guna'. Uquínnajgaca' yu'u ga rapa chi'a le rulá' quia', ate' guna' yugu' yu'u zxóntëro' ca', ate' gapa chi'a le rulá' quia' ni', len yugu' le dë quia'.

¹⁹ Ní'irö gaca guíë' cuina': Chidéda' quia' zían le chinutuba', le gáhuída' zían iz. Uzí' ládxa'a. Gu'aj gahua', en udzëjada'.” ²⁰ Ní'irö Dios rë' lë': “Li', bönni' biti' bi nózinë'. Na'a dzö' gátíu'. Na'a, ¿nuzxi caz guequi que, lë na' chinutubu'?” ²¹ Caní raca queë' bönni' rutubë' la' queëzé' yöl-la' tsahui', en biti' runë' le naca ca yöl-la' tsahui' lahuë' Dios.

Dios run chi'ë yugu' bönachi queë'

(Mt. 6:25-34)

²² Gudödi ni' Jesús gudxë' yugu' bönni' usëda queë', rnnë':

—Que lë ni na' rea' libí'ili': Biti' ubi uguí'ili' ni'a que le gu'aj gáguli', lë na' nabánili', o ni'a que lari' gáculi'. ²³ Nácáro lesaca' yöl-la' na'bán queé'li' ca le ráguli', ate' nácáro lesaca' idú le nácali' ca lari' ráculi'. ²⁴ Buli'yutëz ca raca quégacaba' boíquij. Biti' tázaba', en biti' ta'lápaba', en biti' nacua' quégacaba' ga ilún chí'iba' le rulá' quégacaba', pero Dios rugahuë' léga'caba'. ¿Naru' cabí nazáca'tëröli' libí'ili' ca yugu' biguínido'? ²⁵ ¿Nuzxi caz bönni' ladjali' gaca gunë' ga soë' ibanë' ia'tú chí'ido'os tu' ruúbi rugu'í ládxi'da'ahuë'? ²⁶ Que lë ni na', channö cabí gaca gunli' lë ni naca cuídi'sö, ¿bizx que ruúbi rugu'í'ili' ni'a que le naca zxóntëro'?

²⁷ Buli'yutëz ca ta'zxón yöjdo'. Biti' tun du lari', en biti' taba lari', pero rea' libí'ili', biti' gúcarö lachi le gúcuë' Salomón ca nácagaca yöjdo' ni, sal-la' gúta'da' yöl-la' tsahui' queë'.

²⁸ Channö Dios runë' lachi yöj guíxi'do' ró'gaca na'a la' guixi', ate' cuxó huidzaj ila'gu'ë léguequi lu guí', ¿naru' cabí gunë' le nácáro dxi'a queé'li', libí'ili' na' biti' réajlë'ëli' Dios idú ládxi'li'? ²⁹ Que lë ni na', biti' güí'ili' ládxi'li' le ral-la' gáguli', en le ral-la' guí'jali', en biti' ubi uguí'ili' ládxi'do'oli'. ³⁰ Yúgu'të lë ni ta'guilaj bönachi yödzülió ni, pero chinóz quézinë' Xúzili' Dios le riquínili'. ³¹ Guli'güí' ládxi'li' tsú'uli' ga rinná bé'ë Dios, ate' yúgu'të lë ni cu'ë xinöza queé'li'.

Yöl-la' tsahui' rigú'uru' yehua' yubá

(Mt. 6:19-21)

³² Gunnë' ca' Jesús:

—Biti' gádxili', libí'ili' na' nácali' bö'cu' xzla'do' quia'. Nabábasili' zóali', pero raza ládxe'ë Xúzili' Dios gunnë' queé'li' lataj tsú'uli' ga ni' rinná bé'ë Lë'. ³³ Guli'guti' le dë queé'li', en buli'nödzej quégaca bönachi yechi'. Caní gaca, gunli' queé'li' yöxaj dumí le cabí gaca ditaj, en cú'uli' yöl-la' tsahui' na' yehua' yubá le biti' ubidxi udú, ga ni' biti' idxinë' bönni' gubán, en biti' usunítiba' böa'do' le. ³⁴ Ga ni' dë yöl-la' tsahui' queé'li', ni güí'ili' ládxi'li' idxinli'.

Ral-la' sóaru' ban ládxi'

³⁵ Gunnë' ca' Jesús:

—Guli'sóa sina', en guli'quela' guí' le uzení' queé'li'. ³⁶ Guli'gaca ca bönni' huen dxin ta'bözë' dza huödë' xángaquië', bönni' sa'yéajë' laní que yöl-la' rutsaga na', para cate' udxinë', en ulidzë', la' ila'sáljatë' queë' tsu'ë. ³⁷ Bica' bágaca huen dxin na' ila'cu'ë ban ládxi' cate' huödë' xángaquië'. Le nácatë' rea' libí'ili', upá'a cuinë' xángaquië' na', ate' gunë' ga ila'bö'ë ga ilahuë', ate' cu'ë le ilahuë'. ³⁸ Sal-la' huödë' cate' chiral-la o idú guluhuëla, channö idixáquië' légaquië' nacu'ë ban ládxi', bica' bágaca huen dxin na'.

³⁹ Lë ni ral-la' inózili'. La'tu' nózinë' xan yu'u bizxi dza huadxinë' bönni' gubán, usubán lãdxë'ë, en bití' gu'ë lataj bönni' na' udxíë' yeru lidxë', para cabí cuanë' le dzö'ö lidxë'.

⁴⁰ Que lë ni na', guli'sóa ban lãdxi' ca' libí'ili', tu' huöda' neda', Bönni' Guljë' Bönachi, tu dza bití' ribózáli' neda'.

Bönni' huen dxin tsahui', en bönni' huen dxin bití' náquië' tsahui'

(Mt. 24:45-51)

⁴¹ Ní'irö Pedro gunábinë' Jesús, rnnë':

—Xan, ¿naru' reo' nétu'sö lë ni rucúdz'u didza', o reo' ca' caní yúgu'të bönachi?

⁴² Rë' Xanru' lë':

—¿Nuzxi na' bönni' huen dxin tsahui', en réajni'inë', dë lu në'ë uláz queë' xanë'? Bönni' ni, xanë' udödë' lu në'ë lidxë' para cate' gála'rö ilahuë' bönni' nacu'ë lidxë', gu'ë que queégaquië' le ilahuë'. ⁴³ Bica' ba bönni' huen dxin na' cate' huödë' xanë', idixáquië' lë' runë' caní dxin na' nudödë' lu në'ë. ⁴⁴ Le nácatë rea' libí'ili', udödë' xanë' lu në'ë bönni' huen dxin tsahui' na' idutë' le dë queë'. ⁴⁵ Channö guéquinë' bönni' huen dxin na' huadzenë' huödë' xanë', ate' isí lahuë' gu'ë dö' quegaquië' ia'zica'rë' huen dxin, bönni' en nigula, en isí lahuë' guí'aj gahuë', en súdxinë', ⁴⁶ ní'irö huödë' xanë' bönni' huen dxin na' cate' bití' ribözë' lë', en cate' bití' réquibe'enë', ate' usaca' zi'ë bönni' huen dxin bití' náquië' tsahui' na', en ichúguië' queë' qui'i sáquië' ca narugu quegaquië' bönni' bití' ta'yéajlë'ë.

⁴⁷ 'Bönni' huen dxin na' nózinë' le ré'ënë' xanë', en bití' zoë' sina', en bití' runë' ca rnnë' xanë', bönni' ni, quínitë're' xanë' lë'. ⁴⁸ Channö cabí nózinë' tu bönni' huen dxin le ré'ënë' xanë', en gunë' le gun ga ibáguë'ë le quinë' xanë' lë', bönni' ni quinë' lë' láti'do'os. Tu bönni' yu'u lu në'ë yenni', yenni' unabë' xanë' lu në'ë, ate' bönni' na' xanë' nuzxöni lãdxë'ë lë' le zxön, le zxóntë'rö ca' unabë' xanë' lu në'ë bönni' huen dxin na'.

Le náquië' Jesús gun ga ila'rúaj choplö bönachi

(Mt. 10:34-36)

⁴⁹ Gunnë' ca' Jesús:

—Bida' neda' dujéna' ga tsegui guí' yödzölió ni, en caba lãdxa'a chinaguéla' guí' na'. ⁵⁰ Na'a, dë tu le ral-la' qui'i saca'a le naca ca tu le idí'ida' nisa, ate' rö'a böniga ga idxintë gaca caní quia'. ⁵¹ ¿Naru' réquili' bida' dulequi dxía' le raca yödzölió ni? Rea' libí'ili': ¡Caléga! Bida' duléquia' le gun ga ila'rúaj choplö bönachi. ⁵² Na'a isí lo ulu'lá'alén luzé'eguequi gayu' bönachi nacuá' tu yu'u. Tsonné' ila'dá'baguë'ë chopë' nazí'igaquië' xtídza'a, ate' chopë' na' ila'dá'baguë'ë tsonné' na'. ⁵³ Nu bönni' zóabi' bi'i bönni' queë' tá'baguë'ë xzí'inë' na', ate' bi'i bönni' na' tá'baga'bi' xúzibi'. Nigula zóabi' bi'i nigula queë'nu tá'baga'nu xzí'ininu na', ate' bi'i nigula na' tá'baga'bi' xiná'abi'. Nigula zóanu nigula xzoa' lídxinu tá'baga'nu xzoa' lídxinu na', ate' nigula xzoa' lídxinu na' tá'baga'nu xto' xzí'ininu.

Le nácgaca bë' le taca na'a dza

(Mt. 16:1-4; Mr. 8:11-13)

⁵⁴ Jesús gudxë' ca' bönachi zían nacuá' ni', rnnë':

—Cate' rilé'eli' za' böaj saca' ga ribía gubidza, la' rnnátëli': “Hualaj guió’j”, ate' caní raca. ⁵⁵ Cate' recja bö' za' saca' ga ridödi gubidza beo' ziaga, rnnali': “Udzá'a na'a”, ate' caní raca. ⁵⁶ Libí'ili', bönni' rulu'isö tsahui' cuinli'. Nózili' le rulu'i le raca lúzxiba, en le raca luyú ni, pero bití' réquibe'eli' le rulu'i le nácgaca bë' taca dza ni zóaru' na'a.

Ral-la' ugá' analenru' tsahui' nu rilé' rë'u

(Mt. 5:25-26)

⁵⁷ Gunnë' ca' Jesús:

—¿Bizx que bití' ruchi'a rusöröli' la' libí'isili' ca naca le naca tsahui'? ⁵⁸ Channö zoa nu bi unabi yudxi li', ate' zéajli' idxinli' yúlahui', bë' lãdxi' ugá' analenu' tsahui' nu na' tsanni ni' yú'uli' nöza, para cabí uzegui li' lahuë' bönni' uchi'a usöróë' libí'ili', ate' bönni' uchi'a

usöróë' na' udödë' li' lu në'ë bönni' rusayjë' lidxi guíë, ate' bönni' na' rusayjë' lidxi guíë cu'ë li' lidxi guíë na'. ⁵⁹ Rea' li', biti' uruju' ni' cate' údxirö quizzju' yúgu'të dumí lásido' ral-lu'u que nu na'.

13

Run bayudxi ubí'i ládxi'ru'

¹ La' dza ní'sö bila'dxinë' bönni' ta'guíxjöi'inë' Jesús ca benë' Pilato, bétie' bal-lë' bönni' Galilea, en guzxi'ë rön quégaquië', le bugútsi'në' xichóngacaba' böa' bédxi chigulútië' légaçaba' para ila'gu'ë xichóngacaba' na' lahuë' Dios. ² Bubi'ë didza' Jesús, rë' légaquië':

—¿Naru' réquili' gulácarë' bönni' dul-la' bönni' Galilea na' ca ia'zica'rë' bönni' Galilea, tu' gula'gu'i gula'zaquië' caní? ³ Rea' libí'ili': ¡Calëga! Channö cabí ubí'i ládxi'li', nítili' ca' yúgu'tëli'. ⁴ Lësca' caní guca quégaquië' chizxunë' bönni' ni', yöjbaga' yu'u sibi na' nazí'i le Siloé légaquië', ate' gulátië'. ¿Naru' réquili' gula'bága'tërë' légaquië' xíguia' ca ia'zica'rö bönachi nacua' Jerusalén? ⁵ Rea' libí'ili': ¡Calëga! Channö cabí ubí'i ládxi'li', nítili' ca' yúgu'tëli'.

Rucúdzü'ë didza' Jesús que yaga higo biti' bi ribía

⁶ Ní'irö bucúdzü'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyúë'. Røjtiljë' le ribía yaga na', pero biti' bi ridzólinë'. ⁷ Ní'irö gudxë' bönni' runë' dxin lu xiyúë' na', rnnë': "Chiguca tsonna iz rida' rududilja' le cuía yaga higo ni, en biti' bi ridzólida'. Guchugu le. ¿Bizx que run nigui luyú ni?" ⁸ Ní'irö bubi'ë didza' bönni' huen dxin na', rë' lë': "Xan, bucá'anagarö le ia'tú ízatëz, ate' uzatsa' yu zxani, en cu'a bëbu zxani. ⁹ Channö cuía yaga ni, gaca dxi'a, pero channö cabí bi cuía, ní'irö ichugu' le."

Ruúnë' Jesús tu nigula ré'enu cate' naca dza lá'ayi

¹⁰ Tu dza rusédinë' Jesús bönachi nacua' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi quégaquië'. ¹¹ Zóanu tu nigula ni' chiguca chizxunu' iz ré'enu, tu' yu'u lënu bö' xihui' run ga te'e bönachi, ate' nayéçhutica'sinu ridanu, en biti' ca' raca ulí cuinnu. ¹² Cate' bilé'enë'-nu Jesús, bulidzë'-nu, rnnë':

—Nigúlado', chiböácu' que yödzöhuë' quiu'.

¹³ Ní'irö Jesús guxóa në'ë lënu, ate' la' bulitë cuinnu, en gulú'unu-në' Dios yöl-la' ba. ¹⁴ Ní'irö gulënë' bönni' lo que yu'u ga na' tu'dubë' tu'sëdë' queë' Dios. Rilenë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacua' ni', rnnë':

—Xopa dza nacua' cate' runru' dxin. Dë lataj yugu' dza ni guídali' para nu un libí'ili', en calëga dza lá'ayi.

¹⁵ Ní'irö bubi'ë didza' Xanru', rnnë':

—Libí'ili', bönni' rulu'isö tsahui' cuinli', ¿naru' cabí rusédxigacali'-ba' böa' bédxi que queé'li' ga na' dá'gacaba' cate' naca dza lá'ayi, ate' tsöjuá'agacali'-ba' para ilé'ajba' nisa?

¹⁶ Nácanu nigula ni zxí'ini xi'sóë' Abraham, ate' idú chizxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

¹⁷ Cate' bë'ë didza' ni Jesús, bulu'tu'inë' yúgu'të bönni' nacu'ë ni' ta'lenë' Lë', pero bulu'dzeja ia'zica'rö bönachi, yúgu'të nupa nacua' ni', tu' ta'lé'enë' yugu' le zxon runë' Jesús.

Rucúdzü'ë didza' Jesús que xisedo' mostaza

(Mt. 13:31-32; Mr. 4:30-32)

¹⁸ Ní'irö rnnë' Jesús:

—¿Nacxi caz raca rizxón le rinná bë'ë Dios, o bizxi uséqui'tseru' le? ¹⁹ Raca ca raca que xisedo' mostaza, le guzxi'ë tu bönni', ate' guzë' le ga naca lu xiyúë'. Guzxón yaga mostaza na', en guca ca tu yaga zxon, ate' bila'dxinba' biguínido', gulunba' xcá'agacaba' lu ni'a në'e yaga mostaza na'.

Rucúdzu'ë didza' Jesús que cúa zi que yöta xtila

(Mt. 13:33)

²⁰ Lësca' caní rnnë' Jesús:

—¿Bizxi caz uséqui'tseda' le rinná bë'ë Dios? ²¹ Naca ca cúa zi que yöta xtila, le guzxí'inu tu nigula, en bugútsi'nu tsonna cö' cúa yöta xtila, ate' guyazxaj idútë cúa na'.

Tu ga tódiru' le naca guído'

(Mt. 7:13-14, 21-23)

²² Tsanni ni' yu'ë nöza Jesús, sa'yéajë' Jerusalén, ridödë' yugu' yödzö zxön, en yugu' yödzödo', ate' rusédinë' bönachi nacua' gapa na'. ²³ Tu bönni' zoë' ni' gunábinë' Jesús, rnnë':

—Xan, ¿naru' nabábasö nupa ulu'lágaca?

Jesús rë' nupa nacua' ni', rnnë':

²⁴ —Guli'güf'i ládxi'li' tsú'uli' saca' ga nu ridödi le naca guído', tu' rea' libí'ili': Zían nupa ilé'ëni ila'yaza ni', pero biti' ila'zéqui'në'. ²⁵ Tödi chasë' Xan yu'u, en usayjë' yu'u, isí loli' libí'ili' na' zóali' ní'ilö ulídzali'-në' ra' yu'u na', ate' guiéli'-në': "Xan, Xan, gusalaj queé'tu'." Ní'irö ubi'ë didza' Lë', en guíë' libí'ili': "Biti' nözda' nuzxi libí'ili'." ²⁶ Ní'irö isí loli' innali': "Güi' gudágulentu' Li', ate' busédinu' gapa naca lu yé'ëyi queé'tu'." ²⁷ Ní'irö guíë' libí'ili': "Rea' libí'ili', biti' nözda' gazxi bönachi libí'ili'. Guli'cuíta ga zoa', yúgu'téli' ruá'ali' dö'." ²⁸ Ní'irö cödxí yéchi'li', en gagu zxea láya'li' cate' ilé'egacali'-në' Abraham, en Isaac, en Jacob, en yúgu'të bönni' gulu'ë didza' uláz queë' Dios, nacu'ë ga ni' rinná bë'ë Dios, pero libí'ili' sóali' ní'ilö. ²⁹ Ila'dxín bönachi ila'rúaj saca' ga rilén gubidza, en saca' ga ribía gubidza, en saca' ga za' bö' ziaga, en saca' ga ridödi gubidza beo' ziaga, ate' ila'bö'ë ilahuë' ga ni' rinná bë'ë Dios. ³⁰ Ní'irö ilaca lo bal-la bönachi náacagaca cá'asö na'a, ate' ulu'gá'ana cá'asö bal-la nupa náacagaca lo na'a.

Ribödxí yeché'ë Jesús ni'a quégaca bönachi Jerusalén

(Mt. 23:37-39)

³¹ La' dza ní'isö bila'dxinë' bal-la bönni' yudo' fariseo ga zoë' Jesús en të' Lë':

—¿Burúaj! ¿Buzxunnaj ni! ¿Ré'ënë' Herodes gútië' Li'!

³² Jesús rë' légaquië':

—Guli'tséaj, guli'tsöjödxe' bönni' na' náquië' ca tuba' böza', innali': "Buyútsöca', rubéajgaca' bö' xihui', en ruúna' bönachi na'a, en cuxó, en cate' gaca lidzaj, údxi guna' dxin quia'." ³³ Run bayudxi tséajlensa' ca' nöza na'a, en cuxó, en huidzaj, ate' idxina' Jerusalén, tu' tútigaquië' bönni' tu'ë didza' uláz queë' Dios ni'.

³⁴ 'Libí'ili', zóali' Jerusalén. Rútigacali'-në' bönni' tu'ë didza' uláz queë' Dios, en ruládxi'gacali'-në' guiój bönni' gubáz risól-lë'ë Dios ga zóali'. Cate' xö zían luzuí gú'unida' utuba' libí'ili' quia' ca runba' yöjede, rutúbiba' bórado' queé'ba' zxañ xíliba', pero biti' gú'unili'. ³⁵ Buli'yútsöca', cá'asö ugá'ana lídxili', ate' rea' libí'ili', bíti'rö ilé'eli' neda' cate' idxinrö dza innali': "Bica' ba Nu na' za' uláz queë' Xanru'."

14

Ruúnë' Jesús tu bönni' ré'enë' huë' gui

¹ Cate' naca dza lá'ayi quégaquië' bönni' judío, guyu'ë Jesús lidxë' tu bönni' unná bë', bönni' yudo' fariseo. Rö'ë Jesús rahuë', ate' nacu'ë bönni' yudo' fariseo ni' ta'né'ë Lë'. ² Zoë' ca' tu bönni' ré'enë' huë' gui ga na' zoë' Jesús. ³ Ní'irö Jesús gunábinë' bönni' yudo' usedi táquië' xibá queë' Moisés, en yugu' bönni' yudo' fariseo, rnnë':

—¿Naru' dë' lataj unru' nu re'e cate' naca dza lá'ayi?

⁴ Légaquië' bulu'sayaj ruá'agaquië'. Ní'irö Jesús gudélë'ë bönni' huë' na', en bunë' lë', ate' la' busól-la'të' lë'. ⁵ Ní'irö Jesús rë' yugu' bönni' yudo' na', rnnë':

—Channö nu bönni' ladjali' nacu'aba' queë' böa' bēdxi, ate' ibixiba' tuba' lu yeru, ¿naru' cabí tsöjléajtē'-ba', sal-la' naca dza lá'ayi?

⁶ Biti' bi didza' guca ulu'bi'ë ca naca lē ni.

Nu cō' lataj lo

⁷ Cate' bilé'enē' Jesús ca tunē' bönni' yudo' fariseo na', ta'bō'ë lataj lo ga na' ta'bō'ë tahuē', ní'irō bucúdzu'ë didza', ate' rē' légaquiē':

⁸ —Cate' nu bönni' ulidzē' li' guídu' ga raca laní que yöl-la' rutsaga na', bití' cō'u lataj lo. Nadxi ca' nulidzē' ca' tu bönni' nácatē'ē' lo ca lí'. ⁹ Ní'irō bönni' na' bulidzē' li' huidē' ga zu', en guí' li': “Bē' lataj bönni' ni cō'ë ga zu'”, ate' ní'irō lu yöl-la' rutu'í quiu' tsöjchō'u zxánitēlō. ¹⁰ Que lē ni na', cate' nu bönni' ulidzē' li', guyéaj yōjchō' zxánitēlō, para cate' idxinē' bönni' na' bulidzē' li', huē' li': “Bócha'a, gudōdi ia'lati' nilō.” Ní'irō gácaru' li' lo lógaca nupa ta'bō'len li' tsözxón. ¹¹ Nu run ba zxön cuini, ilunē' ga huōta' huōxaj, pero nu zoa nöxaj ladxi', ilunē' ga gácarō lo nu na'.

¹² Jesús rē' ca' bönni' na' bulidzē' Lē', rnnē':

—Cati' gunu' tu gü'i huagu o tu lanído', bití' ulídzagacu'-nē' yugu' böchi' luzó'o, en yugu' bönni' bóchu'u, en yugu' di'a dza quiu', en dzaga yu'u quiu' ta'lē'enē' yöl-la' tsahui' quégaquiē', tu' ulu'lidzē' ca' lí', ate' caní gaca, ubí' quiu'. ¹³ Cate' gunu' tu gü'i huagu, bulidza yugu' bönachi yechi', en nupa nabixi ni'a ná'agaca, en nupa bití' raca sá'gaca, en yugu' bönni' lo chul-la. ¹⁴ Ní'irō gacu' bica' ba, tu' cabí gaca bi ulu'bi'ë bönni' caní quiu', pero ubí' quiu' cate' idxín dza ulu'bán nupa gulún le naca tsahui', en gulátigaca.

Rucúdzu'ë didza' Jesús que tu laní zxön

¹⁵ Cate' tu bönni' rō'ë rágulenē' Jesús biyönnē' didza' ni, rē' Lē':

—Bica' ba nu gagu ga ni' rinná bē'ë Dios.

¹⁶ Jesús rē' lē':

—Zoē' tu bönni' benē' laní zxön, ate' zían nupa bulidzē'. ¹⁷ Cate' chinabá'a la' huagu, gusól-lē'ë bönni' huen dxin queē' tsöjōdxē' nupa na' chinulidzē', gunné': “¿Guli'dá! ¿Yúgu'tē chinabá'a!” ¹⁸ Gula'sí lógaquiē' yúgu'tē' ta'nabē' lataj cabí tsöjáquiē'. Bönni' zí'alō na' rnnē': “Sí' guzxi'a tu luyú, en runda' bayudxi tsöjyúa' le. Ráta'yua' lo' gunnu' neda' lataj.” ¹⁹ Ia'túē' rnnē': “Sí' guzxi'a gayu' nózaba' bēdxi, ate' tsöjzxi' bē'a légacaba' ugúngaca'-ba' dxin. Ráta'yua' lo' gunnu' neda' lataj.” ²⁰ Ia'túē' rnnē': “Sí' butsaga na'a, en que lē ni na' bití' gaca guída'.” ²¹ Cate' bóajē' bönni' huen dxin na', yōjtíxjōi'inē' xanē' yúgu'tē lē ni. Ní'irō gulénē' bönni' xan yu'u na', ate' gudxē' bönni' huen dxin na', rnnē': “Guyéajtē na'a gapa naca lu yē'ëyi, en gapa naca la' nöza que yödzo ni, ate' ichē'u yugu' bönachi yechi' ni, en nupa nabixi ni'a ná'agaca, en nupa bití' raca sá'gaca, en yugu' bönni' lo chul-la.” ²² Cate' chinunē' bönni' huen dxin na' caní, rnnē': “Xan, chibena' ca na' gunná bé'enu' neda', ate' ni dē' lataj.” ²³ Ní'irō xanē' gudxē' bönni' huen dxin na', rnnē': “Guyéaj gapa naca la' nöza, en gapa naca nöza lasi, ate' ben bayudxi guídigaca nupa nacuá' ni' para ílí lidxa', ²⁴ tu' rea' libí'ili': Bití' gahuē' que laní quia' nitúē' bönni' ni' bulidza' zí'alō.”

Le sáca'ru' cate' zéajlenru'-nē' Cristo

²⁵ Yugu' dza ni' röjácalen Jesús bönachi zían, ate' buécjē' Jesús, en rē' légaquiē':

²⁶ —Channö guídalenē' neda' tu bönni', en bití' idxí'irönē' neda' ca nadxí'inē' xuz xinē'ë, en nigula queē', en yugu' zxi'inē', en yugu' bi'i bóché'ë, en yugu' bi'i zanē', en yöl-la' na'bán queē', bití' gaca gáquiē' bönni' usēda quia'. ²⁷ Nu bönni' bití' gáquiē' ca tu bönni' sa'yéajē' söjtē'ë lē'e yaga cruz, ate' tē'ë neda', bití' gaca gáquiē' bönni' usēda quia'. ²⁸ Channö zoē' nu bönni' ladaj libí'ili' gué'ënnē' gunē' tu yu'u zían cuía, ¿naru' cabí cō'ë zí'alō ulabē' gáca'xi dumí ral-la' utóē' para inózinē' channö dē queē' tsca le riquinnē' para údxi gunē' yu'u na'? ²⁹ Channö cabí gunē' caní, en isí lahuē' cuéquiē' xilibi yu'u na', ate' bití' gaca údxi gunē' yu'u na', ní'irō ila'sí lógaca yúgu'tē nupa ila'lē'e le ulu'titaj lē',

³⁰ ila'nná: “Bönni' ni gusí lahuë' runë' yu'u, pero biti' guca údxi gunë' le.” ³¹ Lësca' caní, channö zoë' nu bönni' rinná bë'ë, en ral-la' tsejë' gudil-la tsöjtíl-lalenë' ia'túë' bönni' rinná bë'ë, ¿naru' cabí cö'ë zí'alö, en cuéqui icjë' channö séqui'në' tsöjtíl-lalenë' bönni' ni' naché'ë galaj milë' bönni', ate' lë' chi milsë' bönni' naché'ë? ³² Channö cabí séqui'në', cate' ni' zoë' zí'tu' ia'túë' bönni' na' rinná bë'ë, isól-lë'ë bönni' gubáz queë', ate' inábinë' lë' nacxi ral-la' gunë' para ulu'dzáguië' dxi'a. ³³ Caní naca, channö zoë' nu bönni' ladaj libí'ili' biti' ucá'anë' yúgu'të le dë queë', biti' gaca gáquië' bönni' usëda quia'.

Zödi' le naniti yöl-la' siná'a que
(Mt. 5:13; Mr. 9:50)

³⁴ Gunnë' ca' Jesús:

—Dxi'a naca zödi', pero channö initi yöl-la' siná'a que, ¿nacxi gaca úniru' le siná'a?
³⁵ Bítirö nazaca' zödi' na', calëga para luyú, en calëga para ga rirú'uniru' bëbu, pero chú'unaru' le ní'ilö. Nu zoa nagui, en riyöni, ral-la' uzé nagui nu na'.

15

Rucúdzü'ë didza' Jesús ca naca queë'ba' bö'cu' zxila' gunítiba'
(Mt. 18:10-14)

¹ Bulu'dubë' yúgu'të bönni' tu'quíxjë' lázagaca bönachi, en yugu' bönni' cá'asö ga zoë' Jesús para ulu'zé náguië' Lë'. ² Que lë ni na' yugu' bönni' yudo' fariseo, en yugu' bönni' yudo' usedi gula'nnë' queë' Jesús, ta'nnë':

—Bönni' ni runë' bal yugu' bönni' dul-la', en rágulenë' légaquië'.

³ Ní'irö bucúdzü'ë didza' Jesús, rë' légaquië':

⁴ —Channö zoë' tu bönni' ladaj libí'ili', nacuá'aba' queë' tu gayuá'aba' bö'cu' zxila', en channö nítiba' tuba', ¿naru' cabí ucá'anë' ia'zica'röba' tápalalaj yu' chënnaba' na' ga naca lu lataj cá'asö, ate' tsejë' tsöjdiljë'-ba' bö'cu' zxila' na' nanítiba', cate' udzólirönë'-ba'?
⁵ Cate' udzólinë'-ba', lu yöl-la' rudzeja queë' ixóë'-ba' ya' zxicjë', ⁶ en cate' udxinë' lidxë' utubë' yugu' böchi' luzé'ë, en yugu' dzaga yu'u queë', ate' guíë' légaquië': “Buli'dzëjalen neda', tu' chibudzólida'-ba' bö'cu' zxila' quia' gunítiba'.” ⁷ Rea' libí'ili': Lësca' caní gácatërö yöl-la' rudzeja yehua' yubá ni'a queë' tuë' bönni' dul-la' ubí'i lãdxë'ë ca gaca quégaquië' tápalalaj yu' chënnë' bönni' tsahui', bönni' téquinë' biti' naquíniguequinë' ulu'bí'i lãdxi'gaquië'.

Rucúdzü'ë didza' Jesús que tu dumí guniti

⁸ Rnnë' ca' Jesús:

—Channö zóanu tu nigula, dë queënu chi dumí plata, en channö initi tu dumí plata na', ¿naru' cabí uquëla'nu guí, ate' ulúanu yu'u, uguilaj yúdxinu le cate' udzólirönu le?
⁹ Cate' udzólinu le, utúbinu yugu' nigula luzá'anu, en yugu' nigula dzaga yu'u queënu, ate' guíënu légacanu: “Buli'dzëjalen neda', tu' chibudzólida' dumí plata na' guniti.” ¹⁰ Rea' libí'ili': Lësca' caní, ulu'dzëjade'erönë' gubáz lá'ayi queë' Dios ni'a queë' tuë' bönni' dul-la' ubí'i lãdxë'ë.

Rucúdzü'ë didza' Jesús queë'bi' tu bi'i gunítibi'

¹¹ Rnnë' ca' Jesús:

—Zoë' tu bönni' nacuá'abi' chópabi' bi'i bönni' queë'. ¹² Bi'i cuidi' na' rëbi'-në' xúzibi': “Dad, benna quia' le dë quiu' le ral-la' guequi quia'.” Ní'irö xúzibi' na' gudísië' quégacabi' le dë queë'. ¹³ Nabábasö dza gudzé, bi'i cuidi' na' butúbibi' yúgu'të, ate' guyéajbi' tu yödzo zí'tu', ate' ni' butöbi' dërö le dë queë'bi'. Le ruá' dö' benbi'. ¹⁴ Cate' chibutöbi' dërö le dë queë'bi', guca gubín lu yödzo ga na' zóabi', ate' biyadzaj queë'bi'. ¹⁵ Ní'irö guyéajbi' yöjsóabi' huen dxin queë' tu bönni' lu yödzo ni', ate' bönni' na' gusól-lë'ë-bi' ga dë xiyüë' tsöjgágubi'-ba' yugu' cuchi queë'. ¹⁶ Guca lãdxi'bi' gágubi' guixi' cá'asö na' táguba' cuchi,

pero cuntu nu bi bē' le gágubi'. ¹⁷ Ní'irö bubí'i láchxi'bi', rnnabi': "Cate' xö bönni' huen dxin nacu'ë lidxē' xuzá', en dēda' le tahuē', pero neda' ni huáti caza' yöl-la' ridún. ¹⁸ Uzá'a ni, huöja' ga zoē' xuzá', en tsöjödxa'-nē': Dad, bena' dul-la' lahuē' Dios, zoē' yehua' yubá, en lo' lí'. ¹⁹ Bítirö naca' neda' lesaca' gaca' xzí'inu'. Ben neda' ca bönni' huen dxin quiu'."

²⁰ Ní'irö guyú'ubi' nöza, söhuóajbi' ga zoē' xúzibi'.

'Cate' ní' zóabi' zí'tu' suzá'abi', bilé'enē'-bi' xúzibi', en buéchi' láchxē'ë-bi'. Carelö yöjzxi'galē'-bi' xúzibi', en yöjnidē' yenbi', gudahuē'-bi' zixi. ²¹ Ní'irö xzí'inē' na' rēbi'-nē': "Dad, bena' dul-la' lahuē' Dios, zoē' yehua' yubá, en lo' lí'. Bítirö naca' neda' lesaca' gaca' xzí'inu'." ²² Ní'irö xúzibi' rē' yugu' bönni' huen dxin queē', rnnē': "Gulí'tsöjléajtē lari' nazáca'tērö, en guli'gacu-bi'. Guli'cú'u le nazaca' xibón ná'abi', en bulí'dá' huarache ní'abi'. ²³ Gulí'tsöjzxi'i-ba' bēdxi renni', ate' guli'guti-ba'. Gáguru'-ba', en gunru' laní, ²⁴ tu' guca bi'i bönni' quia' ni ca tu bi'i chinátibi', ate' bubanbi'. Gunítibi', ate' chibulá'abi' na'a." Ní'irö gula'sí lógaquiē' tu'dzéjanē'.

²⁵ Tsanni ní' raca lē ni, zóabi' bi'i bönni' zí'alö queē' bönni' na' la' guixi'. Cate' suzá'abi' rudxinbi' galá' ra' yu'u, riyónibi' raca huila, en raca huö'a lu yu'u na'. ²⁶ Ní'irö bulídzabi'-nē' tuē' bönni' huen dxin zoē' ní', en gunábibi' lē' bizxi na' raca. ²⁷ Bönni' huen dxin na' rē'ë-bi': "Bi'i bóchu'u na' budxinbi', ate' gunná bē'ë xuzu' gulútiē'-ba' bēdxi renni', tu' budxinbi' lu nē'ë dxi'a tsáhui'do'." ²⁸ Ní'irö gulébi' bi'i zí'alö na', en biti' gú'unibi' tsú'ubi' yu'u. Ní'irö birúajē' xúzibi', en gúta'yuē' lobi' tsú'ubi'. ²⁹ Bubí'ibi' didza' bi'i zí'alö na', rēbi'-nē' xúzibi': "Nöz quézinu' cate' xö iz bena' dxin lo', en catu caz gudá'baga'a lí', pero catu caz bennu' quia' tuba' bö'cu' xzí'la'do' para gü'ílēna' xibé yugu' luzá'a. ³⁰ Na'a, cate' budxinbi' bi'i quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútiē'-ba' bēdxi renni' ní'a queébi'." ³¹ Ní'irö xúzibi' rē'ë-bi', rnnē': "Xzí'ina', lí' zóalen cazu' neda' ate' yúgu'tē le dē quia', quiu' nequi. ³² Ben bayudxi gunru' laní, en udzéjaru', tu' gúcabí' bi'i bóchu'u ni ca tu bi'i chinati cázabi', ate' nubanbi'. Gunítibi' ate' chibulá'abi'."

16

Rucúdzü'ë didza' Jesús queē' bönni' huen dxin biti' náquiē' tsahui'

¹ Jesús rē' ca' yugu' bönni' dá'gaquiē' Lē', rnnē':

—Zoē' tu bönni' dē yöl-la' tsahui' queē', en zoē' ca' queē' tuē' bönni' huen dxin dē lu nē'ë uláz queē'. Bila'dxinē' yugu' bönni' tu'zéguiē' bönni' huen dxin na' lahuē' xanē', ta'nnē' queē' rutösē' le dē queē' xanē' na'. ² Ní'irö xan yu'u na' bulidzē' bönni' huen dxin na', en rē' lē': "¿Bizxi didza' ni riyönda' quiu'? Buluí'i neda' le naca bē' dxin nunu', tu' cabirö gata' lu no' o uláz quia'." ³ Ní'irö gúzá' láchxē'ë bönni' huen dxin na', rnnē': ¿Nacxi guntsa'? Rubéajē' xana' neda' lataj lo ga runa' dxin. Biti' séqui'da' guna' dxin gú'una, en utuí'ida' inaba' nu bi gúnna'sö quia'. ⁴ Na'a nözda' naca guna' para cate' ubéajē' neda' lataj lo ni, ila'cuá' nupa ulu'z' neda' lídxiguequi. ⁵ Ní'irö bönni' huen dxin na' bulidzē' yugu' bönni' bi tál-lē'ë queē' xanē', ate' rē' bönni' zí'alö: "¿Gáca'xi ral-lu'u queē' xana'?" ⁶ Lē' rnnē': "Tu gayuá' rō'ö chugu le za ral-la'a." Bönni' huen dxin lo na' rē' lē', rnnē': "Ni dē guichi ga nazúaj le ral-lu'u. Guró'ötē ni, en buzúaj ia'tú lu guichi le inná chi-un rō'ö chugu ral-lu'u." ⁷ Gudödi ní' gunábinē' ia'túē', rnnē': "Nazxi lí', ¿gáca'xi ral-lu'u?" Lē' rnnē': "Tu gayuá' da'a xzoa' xtila." Ní'irö bönni' huen dxin lo na' rē' lē', rnnē': "Ni dē guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u." ⁸ Réquibe'enē' xanē' na' sína'tē benē' bönni' huen dxin biti' náquiē' tsahui' na'. Caní naca, nácagacarē' sina' bönni' yödzölió ni lu le tunē' la' légacasē', ca nácagaca bönachi ta'dalen Dios lu bení' queē'.

⁹ Neda' rea' libí'ili': Guli'cózalen bönachi dxi'a, ugunli' dxin yöl-la' tsahui' dē queé'li' yödzölió ni, para cate' idxín dza ucá'anali' yugu' lē ni, ilunē' libí'ili' bal lataj ní' zóatica'sö.

¹⁰ Nu rugún dxi'a dxin tu le cuídí'sö dē lu nē'e, lē'sca' ugún dxi'a dxin tu le zxön gata' lu nē'e. Nu biti' rugún dxi'a dxin tu le cuídí'sö dē lu nē'e, biti' ugún dxi'a dxin tu le zxön

gata' lu në'e. ¹¹ Que lë ni na', channö cabí rugunli' dxi'a dxin yöl-la' tsahui' dë queé'li' yödzülió ni, ¿nuzxi caz udödi lu ná'ali' yöl-la' tsahui' le naca idú? ¹² Channö cabí rugunli' dxi'a dxin le dë lu ná'ali' le nequi que nu yúbölö, ¿nuzxi caz udödi lu ná'ali' le ral-la' guequi que quézili'?

¹³ Biti' gaca nitúë' bönni' huen dxin gunë' xichíngaca chopaxanë', tu' udí'inë' tuë', en idxí'inë' ia'túë', o gunë' bal tuë', en uzöë' tsölá'alö ia'túë' na'. Biti' gaca gunli' xichinë' Dios, en gunli' ca' dxin para uzí'ili' xibé yöl-la' tsahui' que yödzülió.

¹⁴ Bila'yönnë' bönni' yudo' fariseo didza' ni, ate' tu' nadxí'iguequinë' yöl-la' tsahui' quégaquië', que lë ni na' bulu'titjë' Jesús. ¹⁵ Ní'irö Jesús rë' légaquië':

—Libí'ili' rubéaj dxi'a cuinli' lógaca bönachi, pero nózinë' Dios le yu'u icja ládxi'do'oli', tu' naca lë na' tun zxön bönachi tu le ruzöë' Dios tsölá'alö.

Xibá queë' Moisés, en le rinná bë'ë Dios

¹⁶ Gunnë' ca' Jesús:

—Ga bidxintë dza zoë' Juan, ben dxin le rinná bë' xibá queë' Moisés, en le bulu'zúajë' lu guichi yugu' bönni' gulu'ë didza' uláz queë' Dios. Ní'irö cate' bidxinë' Juan na', gusí lo raca libán ca gaca nu tsaza ga rinná bë'ë Dios, ate' tun bayudxi yúgu'të bönachi ila'yaza ni'.

¹⁷ Sal-la' raca caní, gácarö ila'dödi que lúzxiba, en que luyú ni ca initi tu dídza'sö nazúaj lu guichi lu xibá queë' Dios.

Le rulá'a yöl-la' nutsaga na'

(Mt. 19:1-12; Mr. 10:1-12)

¹⁸ Gunnë' ca' Jesús:

—Channö tu bönni' ulá'alenë' nigula queë', ate' utsaga ná'alenë'-nu nigula yúbölö, gunë' dul-la' le riguitsaj xibá que yöl-la' nutsaga na', ate' nu utsaga ná'alen nigula na' nusanë'-nu bönni' queë'nu, gun ca' dul-la' le riguitsaj xibá que yöl-la' nutsaga na'.

Bönni' dë yöl-la' tsahui' queë', en Lázaro

¹⁹ Ní'irö bucúdzü'ë didza' Jesús, rnnë':

—Zoë' tu bönni' rilé'enë' yöl-la' tsahui' queë'. Rácuë' lari' xiná, en lari' nazáca'da, ate' yugu' dza rúntica'së laní, ate' tē'aj tahuë' le banéquiní. ²⁰ Zoë' ca' ni' tu bönni' yéchi'do' lë' Lázaro, bönni' rinabë' nu bi unödzej queë', ate' hué'tezë' rö'ë ra' yu'u queë' bönni' na' rilé'enë' yöl-la' tsahui'. ²¹ Raca ládxe'ë bönni' yéchi'do' na' gahuë' le bizxaj tu'huöxaj zxani ga rahué' bönni' na' rilé'enë' yöl-la' tsahui'. Ta'dxinba' ca' bö'cu', en ta'lé'ëba' lu hué' queë' bönni' yéchi'do' na'. ²² Bidxín dza gútië' bönni' yéchi'do' na', ate' gubáz lá'ayi queë' Dios gula'ché'ë lë' tsöjsóalenë' Abraham ga naca lataj lachi queë' Dios. Gútië' ca' bönni' na' bilé'enë' yöl-la' tsahui', ate' bulu'cáché'ë lë' yeru ba. ²³ Cate' ni' riguí' rizáquë'ë bönni' na' bilé'enë' yöl-la' tsahui', zoë' lataj quégaca nupa nátigaca, guchisa lahuë', en bilé'enë' Abraham zoë' zí'tu', en dzáguie' Lázaro na' lë'. ²⁴ Ní'irö bë'ë zidzaj didza', rnnë': "Xuza', Abraham, buéchi' ladxi' neda'. Gusól-la' Lázaro quia' para usubisé' xibón në'ë, en udusuhuöälë' lúdxá'a, tu' riguí' rizáca'a lu guí' ni." ²⁵ Abraham rë' lë', rnnë': "Zxí'ina', busá ládxi'u ca guca quiu', buzi'u xibé yöl-la' tsahui' tsanni ni' zu' nabanu', pero Lázaro ni, guca queë' yöl-la' yéchi', ate' na'a, ruzí' zxönë' Lázaro ni, pero li' riguí' rizácu'u. ²⁶ Ia' stú, tu ra' guí'a sibi rö', le zoa gatsaj láhui'lö ga ni' zóali' libí'ili', en ga ni zóatu' netu'. Que lë ni na' nupa nacuá' ni, en ilé'ëni ila'dödi ga zóali' libí'ili', bití' ca' gaca ilunë' ca', en bití' gaca ilida ni nupa nacuá' ni'." ²⁷ Ní'irö bönni' na' bilé'enë' yöl-la' tsahui' rë' lë', rnnë': "Xuza' Abraham, ráta'yua' lo' isól-lu'u-në' Lázaro tsejë' lidxë' xuza', ²⁸ tu' nacu'ë gáyu'ë bönni' bócha'a ni'. Gusól-lë'ë tsöjenë' liná' lo que le raca ni, para cabí guídigaquië' ca' lataj ga ni riguí' rizáca'a." ²⁹ Ní'irö Abraham rë' lë', rnnë': "Dë quégaquië' le buzúajë' lu guichi Moisés, en le bulu'zúajë' lu guichi bönni' gulu'ë didza' uláz queë' Dios. Yugu' didza' quégaquië' na' ral-la' ulu'zé' náguie'." ³⁰ Bubi'ë didza' bönni' na' bilé'enë' yöl-la'

tsahui', rnnë': "Xuza' Abraham, biti' gaca caní, pero channö ubané' tu bönni' lu yöl-la' guti, en tsejé' ga na' nacu'ë, ulu'bí'i ládxi'gaquié'." ³¹ Abraham rë' lë', rnnë': "Channö cabí tu'zé náguié' didza' bë'ë Moisés, en le gula'nné' bönni' gulu'ë didza' uláz queé' Dios, biti' ila'yéajlë'ë sal-la' nu ubán lu yöl-la' guti."

17

Run bönadxi queéru' gunru' ga nu gun dul-la'

(Mt. 18:6-7, 21-22; Mr. 9:42)

¹ Jesús rë' yugu' bönni' dá'gaquié' Lë', rnnë':

—Nacuá'tica'sö le tun ga ilún bönachi dul-la', pero bica' bayechi' bönni' na' runé' ga nu gun dul-la'. ² Dxí'arö gaca queé' bönni' na' runé' caní, nu ugal-la' tu guiój riyëtu yaga yené', en tsöjchú'una lë' lu nísado', cáte'lö guné' ga gun dul-la' nu bí'i néquibi' quia'. ³ Guli'gún chí'i cuinli'. Channö böchi' luzó'o gu'ë dö' quiu', buzéajni'i-në', en channö ubí'i ládxi'ë, buniti lo lë'. ⁴ Sal-la' gadxi luzuí tu dza gu'ë dö' quiu', en gadxi luzuí ca' guidé' ga zu', en guié' li': "Rubí'i ládxa'a", ral-la' uniti lo' lë'.

Yöl-la' huáca que le réajlë'ëru' Cristo

⁵ Ní'irö yugu' bönni' gubáz queé' Xanru' të' Lë', ta'nné':

—Ben ga tséajlë'ërötu'-në' Dios.

⁶ Xanru' rë' légaquié', rnnë':

—La'tu' naca cuídi'sö yöl-la' réajlë' queéli' Dios, nácasö ca tu xisedo' mostaza, huáca guié'li' yaga zxön ni: "Gucuíta ni, en yöjsóa lu nísado'", ate' gun yaga na' ca rnnali'.

Le ral-la' gun nu naca huen dxin

⁷ Gunné' ca' Jesús:

—Channö zoé' tué' bönni' ladaj libí'ili', en zoé' queé' tué' bönni' nadó'o rugá'ané'-ba' bédxi o rulapë', cate' údxi guné' xichiné' xané', ¿naru' huëtsé' xané' lë', inné': "Gudá, guró'ö gagu'?" ⁸ ¿Calëga! Caní guié' lë': "Bupá'a le gahua'. Guzóa sina' cu'u le guí'aj gahua', ate' tódirö na' huáca guí'aj gagu' li'." ⁹ ¿Naru' huëtsé' bönni' nadó'o queé' na': "Xclenu'", tu' bené' ca gunná bé'ené' lë'? Runi neda', biti' guné' caní. ¹⁰ Lësca' caní gaca queéli'. Cate' chinunli' yúgu'të le gunná bé'ené' Dios libí'ili', ral-la' innali': "Nácatu' huen dxin cabí nácatu' lesaca', tu' bénsötu' le run bayudxi guntu'."

Chié' bönni' té'ené' hué' nudzu' ruzödi

¹¹ Tsanni ni' yu'ë Jesús nöza, sa'yéajé' Jerusalén, ridödë' gapa dë yódzödo' nabábagaca luyú Samaria, en luyú Galilea. ¹² Cate' guyázié' tu yódzödo', bila'rúajé' dutságagaquié' Lë' chié' bönni' té'ené' hué' nudzu' ruzödi, ate' gula'cu'ë zí'tu'sö, ¹³ en tu'ë zidzaj didza', ta'nné':

—¿Jesús, Bönni' Usedi! ¿Buéchi' ladxi' netu'!

¹⁴ Cate' bilé'ené' Jesús légaquié', rë' légaquié':

—Guli'tséaj, guli'tsöjlu'i cuinli' lógaca bixúz.

Tsanni ni' söjáquié', bulu'huóáquié' dxi'a. ¹⁵ Ní'irö tué' bönni' nútsé'ë ladjagaquié', cate' réquibe'ené' chinuhuóáquié' dxi'a, bóajé' ga na' zoé' Jesús, ru'ítica'sé' zidzaj didza', rigü'ë Dios yöl-la' ba. ¹⁶ Biyéchué', en busudxín lahué' lu yu lahué' Jesús, en rë' Lë': "¿Xclenu'!"

Bönni' ni nababë' Samaria. ¹⁷ Ní'irö Jesús rë' lë':

—¿Naru' cabí bulu'huóáquié' dxi'a chié' bönni'? ¿Gazxi nacué'tsë' ia'zica'rë' bönni' na'? ¹⁸ ¿Naru' cabí zoa nu huöda cu'u Dios yöl-la' ba, pero tuzé' bönni' zí'tu' ni?

¹⁹ Ní'irö Jesús gudxé' bönni' na', rnnë':

—¿Guyasa, en böaj lidxu'! ¿Chiböácu' dxi'a tu' réajlë'u neda'!

Ca idxín le rinná bë'ë Dios

(Mt. 24:23-28, 36-41)

²⁰ Cate' yugu' bönni' yudo' fariseo ta'nábinë' Jesús bátaxi ral-la' idxín le rinná bë'ë Dios, Lë' bubí'ë didza', rë' légaquië':

—Ca idxín le rinná bë'ë Dios, bití' naca le ilé'eli'. ²¹ Cuntu nu gaca inná: “¡Ni bidxín!”, o inná: “¡Ni' bidxín!” ¡Buli'yútsöca'! ¡Rinná bë'ë Dios lu icja ládxi'do'gaca bönachi!

²² Ní'irö Jesús gudxë' yugu' bönni' usëda queë', rnnë':

—Huadxín dza cate' gué'ënili' ilé'eli' dza huöda' neda', Bönni' Guljé' Bönachi, pero bití' ilé'eli' le. ²³ Ila'cuá' nupa ilé' libí'ili': “¡Ni zoë'!” o ila'nná: “¡Ni' zoë'!” Bití' tséajli' ni', en bití' tséajlenli' légaquië'. ²⁴ Ca raca cate' rëpi yösa, ruzení' idá'alö lúzxiba, lësca' caní gaca cate' idxín dza huöda' neda', Bönni' Guljé' Bönachi. ²⁵ Zí'alö ca gaca lë ni, run bayudxi quí'i sáca'da', ate' bönachi dza ni zóaru' na'a ulu'cá'ana neda' cá'asö. ²⁶ Ca na' guca dza ni' zoë' Noé, lësca' caní gaca cate' idxín dza huöda' neda', Bönni' Guljé' Bönachi. ²⁷ Dza ni'te na' gulë'aj gulahuë'. Bulu'tsaga ná'agaquië', en bulu'dödë' zxí'inigaquië' lu yöl-la' rutsaga na' ga bidxintë dza guyázië' Noé lë'e barco zxön na' nazí'i le arca, ate' bidxintë nisa guió'j usuniti yödzölió le busuniti yúgu'të'. ²⁸ Lësca' caní guca dza ni' zoë' Lot. Gulë'aj gulahuë'. Gulá'uë', en gulúti'ë. Gulazë' xiyúgaquië', en gulunë' yugu' yu'u quégaquië'. ²⁹ Cate' bidxín dza na' burúajë' Lot lu yödzö Sodoma, böxaj guí' ca tu nisa guió'j, enca' le ruzéguida' nazí'i le azufre, ate' bulu'suniti yúgu'të'. ³⁰ Lësca' caní gaca cate' idxín dza ulu'í' lahua' neda', Bönni' Guljé' Bönachi.

³¹ 'Cate' idxín dza na', channö zoë' tu bönni' ícjo'olö, en dzö'ö le dë queë' lu yu'u na', bití' ral-la' huötjé' tsöjzxi'ë le dë queë', ate' nu zoa la' guixi', lësca' caní, bití' ral-la' huöjé' lidxë'. ³² Guli'sá' ládxi'li' ca guca queë'nu nigula queë' Lot. ³³ Nu bönni' ré'ënë' gun chí'ë yöl-la' na'bán queë', unítie' le, pero bönni' udödë' yöl-la' na'bán queë' ni'a quia', udélé'ë le.

³⁴ 'Rea' libí'ili': Cate' idxín rëla na', ila'cu'ë chopë' bönni' tsözxón ga tasië', ate' tuë' uduzxi'a-në', en ia'túë' ucá'ana' lë'. ³⁵ Ila'cuá'anu huëtu tsözxón chópanu nigula, ate' tunu uduzxi'a-nu, en ia'tunu ucá'ana'-nu. ³⁶ Ila'cu'ë chopë' bönni' la' guixi', ate' tuë' uduzxi'a-në', en ia'túë' ucá'ana' lë'.

³⁷ Cate' bila'yönnë' lë ni bönni' usëda queë' Jesús, gula'nábinë' Lë', ta'nné':

—Xan, ¿gazxi gaca lë ni?

Jesús rë' légaquië':

—Ga dë tu le nati, ni' ulu'dubi quéziba' bíchulab.

18

Tu nigula uzëbi, en bönni' ruchi'a rusöröë'

¹ Ní'irö bucúdu'ë didza' Jesús, rë' légaquië' ca run bayudxi ulídzatica'siru'-në' Dios, en bití' gaca chopa ládxi'ru'. ² Rnnë':

—Zoë' tu bönni' ruchi'a rusöröë' tu yödzö, bönni' bití' rádxi'në' Dios, en bití' runë' nu bönni' bal. ³ La' yödzö ná'asö zóanu tu nigula uzëbi, ate' bidxinnu nigula ni ga zoë' bönni' ruchi'a rusöröë' na', rnnanu: “Buchi'a busöró le run quia' nu ruá' dö' quia'.” ⁴ Xidzé bití' gú'unnë' bi gunë' queë'nu, pero gudödi ni' guzá' ládxi'ë, rnnë': “Bití' rádxi'da'-në' Dios, en bití' runa' nu bönni' bal, ⁵ pero tu' rupízxjanu nigula uzëbi ni neda', que lë ni na' uchi'a usöróa'-nu, para cabí guídatica'sinu ni, en para cabí tödi bë' upízxjanu neda'.”

⁶ Ní'irö Xanru' rë' légaquië', rnnë':

—Guli'zé nágali' ca na' gunné' bönni' ruchi'a rusöröë' na', bönni' bití' náquië' tsahui'. ⁷ ¿Naru' cabí uchi'a usöröë' Dios bönachi guró cazë' queë', nupa na' tu'lidza Lë' rëla te dza? ¿Naru' huadzétsenë' gácalenë' légaquië'? ⁸ Rea' libí'ili': La' uchi'a usörótenë' légaquië'. Cate' huöda' neda', Bönni' Guljé' Bönachi, ¿naru' idzólida' nupa ta'yéajlë' neda' luyú ni?

Tu bönni' yudo' fariseo, en tu bönni' uquízxaj

⁹ Bucúdzu'ë didza' Jesús ca naca quégaquië' bönni' tu'béaj tsahui' cuíngaquië', en tu'cá'anë' cá'asö ia'zica'rö bönachi. ¹⁰ Gunnë':

—Bila'dxinë' chopë' bönni' ga naca chila yudo' para ulu'lidzë' Dios. Tuë' bönni' na' náquië' bönni' yudo' fariseo, ate' ia'túë' na' náquië' bönni' ruquízxjë' lázagaca bönachi. ¹¹ Guzuínë' bönni' yudo' fariseo na', en caní bulidzë' Dios, rnnë': "Dios, rea' Li': Xclenu', tu' cabí naca' ca nácagaquië' ia'zica'rë' bönni', nácagaquië' gubán, en bití' nácagaquië' tsahui'. Ta'guitsjë' xibá que yöl-la' nutsaga na'. Lësca' bití' naca' ca bönni' uquízxaj ni. ¹² Neda' runa' gubasa chopa luzú tu' xunu' dza huéaj, en runödza' que yudo' tu' cö' huéaj tu' chi cö' que yúgu'të le rata' quia'." ¹³ Guzózazë' zi'tu' bönni' uquízxaj na', en bití' böázxjanë' ichisa lahuë' uyúë' lúxiba, pero gudapë' luchu'ë, rnnë': "Dios, buéchi' ladxi' neda', bönni' dul-la'." ¹⁴ Neda' rea' libí'ili': Bóajë' lidxë' bönni' uquízxaj na', nuhuóáquië' tsahui' lahuë' Dios, calëga ia'túë' bönni' ni'. Núti'tës bönni' run ba zxon cuinë', gunë' Dios ga huöta' igulé', pero nu bönni' rizóë' nöxaj ladxi', gunë' Dios ga gácarë' lo.

Jesús rulidza tsáhuë'ë-bi' yugu' bí'ido'

(Mt. 19:13-15; Mr. 10:13-16)

¹⁵ Ní'irö bila'dxinë' yugu' bönni', en nigula ga zoë' Jesús, naché' gaquië'-bi' yugu' bí'ido' quégaquië' para ixóa në'ë Jesús légacabi'. Cate' bila'lé'enë' yugu' bönni' usëda queë' Jesús lë ni, gula'dil-lë' légaquië'. ¹⁶ Ní'irö Jesús bulidzë' yugu' bönni' dá'gaquië' Lë', rnnë':

—Gulí'güf'i-bi' lataj ila'dxinbi' bí'ido' ni ga zoa'. Bití' uzága'li' xinózagacabi', tu' gata' quégaca nupa nácagaca ca bi'i caní lataj ga rinná bë'ë Dios. ¹⁷ Le nácatë rea' libí'ili': Nu cabí si' lu në'e le rinná bë'ë Dios, ca runbí' tubi' bí'ido', bití' ca' tsaza ga ni' rinná bë'ë Lë'.

Tu bönni' rilé'enë' yöl-la' tsahui'

(Mt. 19:16-30; Mr. 10:17-31)

¹⁸ Tu bönni' unná bë' gunábinë' Jesús, rnnë':

—Bönni' Usedi idú dxi'a. ¿Bizxi ral-la' guna' para idéli'da' yöl-la' na'bán idú?

¹⁹ Jesús rë' lë':

—¿Bizx que rë'u neda': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. ²⁰ Nöz quézinu' yugu' le gunná bë'ë Dios:

Bití' gunu' dul-la' le riguitsaj xibá que yöl-la' nutsaga na'.

Bití' gútigacu' bönachi.

Bití' cuanu'.

Bití' innío' que luzó'o le cabí nácatë.

Ben bal xuz xinó'o.

²¹ Bönni' na' rë' Jesús, rnnë':

—Yúgu'të lë ni runa' ga gudela' naca' bí'ido'.

²² Cate' biyönnë' Jesús didza' ni, rë' lë':

—Ia'tú le riyadzaj quiu' gunu'. Bëti' yúgu'të le dë quiu', ate' lë na' si'u bunödza' quégaca bönachi yechi', ate' gata' quiu' yöl-la' tsahui' yehua' yubá. Ní'irö gudá, gudá' neda'.

²³ Cate' bönni' na' biyönnë' didza' ni, ruhu'innë', tu' dëda' yöl-la' tsahui' queë'. ²⁴ Cate' bilé'enë' Jesús ca na' ruhu'innë' bönni' na', rnnë':

—¿Bica' böniga gaca, ila'yaza nupa ta'lé'e yöl-la' tsahui' ga rinná bë'ë Dios! ²⁵ Gácarö tódiba' böa' nagui yötsi, ca tsázië' tu bönni' rilé'enë' yöl-la' tsahui' ga rinná bë'ë Dios.

²⁶ Ní'irö nupa bila'yöni didza' ni gula'nná:

—¿Nuzxi caz gaca ulá, channö?

²⁷ Jesús gudxë' légaquië':

—Le bití' gaca ilunë' bönni', huáca gunë' Dios.

²⁸ Ní'irö Pedro rë' Jesús:

—Buyútsöca', netu' nucá'anatu' yúgu'të le dë queëtu', en dá'atu' Li'.

²⁹ Ní'irö Jesús rë' légaquië':

—Le nácatë rea' libí'ili', nu bönni' ucá'ané' lidxé', o xuz xiné'ë, o yugu' böchi' zané', o nigula queé', o yugu' xzí'iné', tu' ru'í'í ládxe'ë inná bé'ë Dios, ³⁰ bönni' ni huazí'iré' dza ni zóaru' na'a, ate' dza si' za' idéli'né' yöl-la' na'bán idú.

Jesús riguixjō'ë leyúbölö ca si' ilútiē' Lē'

(Mt. 20:17-19; Mr. 10:32-34)

³¹ Jesús guché'ë quez queé' idxínnuté' bönni' uséda queé', en rē' légaquiē':

—Buli'yútsöca', ribenru' zéajru' Jerusalén, ga ni' ilaca yúgu'të le nazúajgaca lu guichi ca gula'nné' bönni' gulu'ë didza' uláz queé' Dios ca ral-la' gaca quia' neda', Bönni' Guljé' Bönachi. ³² Yugu' bönni' Jerusalén ulu'dödé' neda' lu ná'agaquiē' bönni' zí'tu', ate' ulu'titjé' neda', en ulu'lidza zí'ë neda', en ulu'chejé' neda' zxöna'. ³³ Ila'guiné' neda', ate' tódirö ni' ilútiē' neda', pero cate' gaca tsonna dza ubana'.

³⁴ Biti' gula'yéajni'iné' bönni' uséda queé' didza' ni, en bití' guléquibe'ené' ca sa'yéaj le ru'í'ilené' légaquiē' didza' que, tu' naca le cabí sequi' ila'yéajni'iné'.

Jesús ruúnē' tu bönni' yödzö Jericó nachul-la lahuē'

(Mt. 20:29-34; Mr. 10:46-52)

³⁵ Cate' chizóa idxiné' Jesús yödzö Jericó, zoé' tu bönni' ni' nachul-la lahué'. Rö'ë ra' nöza rinabé' nu bi gúnna'sö queé'. ³⁶ Bönni' ni' biyönné' ta'dödi bönachi zían ni', ate' gunabé' bizxi na' raca. ³⁷ Bönachi ni' të lē':

—Jesús, bönni' Nazaret, ridödé' ni.

³⁸ Ní'irö bönni' na' nachul-la lahué' bé'ë zidzaj didza', rnné':

—¡Jesús, xzí'ini xí'sóé' David, buéchi' ladxi' neda'!

³⁹ Yugu' bönni' nanórugaquiē' lahué' Jesús gula'dil-lé' bönni' na' nachul-la lahué' para usayaj ru'ë, pero lē' zídzejrö bé'ë didza', rnné':

—¡Zzí'ini xí'sóé' David, buéchi' ladxi' neda'!

⁴⁰ Ní'irö guzé' dxiz Jesús ribözé', ate' gunná bé'ené' nu tsöjlidza lē' para idxiné' lahué'. Cate' bönni' na' nachul-la lahué' bidxiné' lahué' Jesús, gunábiné' Jesús lē', rnné':

⁴¹ —¿Bizxi ré'ënu' guna' quiu'?

Bönni' na' nachul-la lahué' rnné':

—Ré'ënida' huóalaj guió'j lahua'.

⁴² Jesús rē' lē':

—Chibóalaj guió'j lo'. Chibóácu' tu' réajlé'u neda'.

⁴³ La' ní'isö bulé'etené', ate' sa'yéajlené' Jesús, rigu'ë Dios yöl-la' ba. Lésca' yúgu'të bönachi nacua' ni', en bila'lé'e lē' na' guca gula'gú'u Dios yöl-la' ba.

19

Jesús, en Zaqueo

¹ Ní'irö guyáziē' Jesús yödzö Jericó, en ridödé' lu yödzö na'. ² Zoé' tu bönni' lē' Zaqueo ni', bönni' lo ládjagaquiē' bönni' uquízaxaj, ate' dē yöl-la' tsahui' queé'. ³ Ru'í'í ládxe'ë bönni' ni ilé'ené' Jesús, pero bití' guca queé' tu' nacua' bönachi zían ni', en náquiē' bönni' ga ré'ëdo'. ⁴ Ní'irö carelö yöjnóruē' lógaca bönachi zían na', ate' yöjchené' tu lu yaga para gaca ilé'ené' Jesús, tu' ral-la' tödé' ni'. ⁵ Cate' bidxiné' Jesús ni', guchisa lahué' ruyúé' ga na' dxíē' Zaqueo na', en rē' lē':

—Zaqueo, bótjaté lu yaga na', tu' run bayudxi tsöjgá'ana' lidxu' na'a.

⁶ Ní'irö la' bótjaté' Zaqueo lu yaga, ate' lu yöl-la' rudzeja queé' guché'ë Jesús lidxé'.

⁷ Cate' bila'lé'e bönachi nacua' ni' lē' ni, gula'sí lógaquiē' yúgu'të ta'nné' queé', ta'nné':

—Guyáziē' Jesús ugá'analené' bönni' dul-la'.

⁸ Ní'irö guzuíné' Zaqueo, en rē' Xanru':

—Xan, buyútsöca'. Gatsaj le dē quia' gu'a quégaca bönachi yechi', en channö bi gudödi bé' buquixja' bönachi, ubi'a quégaca bönachi na' tapa có'télö ca'.

⁹ Jesús rē' lē':

—Na'a dza ni bidxín yöl-la' rusölá quégaca nupa nacua' yu'u ni, tu' nababë' bönni' ni di'a dza queë' Abraham. ¹⁰ Bida' neda', Bönni' Guljë' Bönachi, ududilja', en udusölá' nupa nanítigaca.

Rucúdzu'ë didza' Jesús que chi cö' dumí

¹¹ Tsanni ni' ta'yönnë' didza' ni ru'ë Jesús, rë' légaquië' le rucúdzu'ë didza', tu' chizóa ila'dxinë' yödzö Jerusalén, ate' téquinë' chizóatë ilá' lahui le rinná bé'ë Dios. ¹² Caní rnnë' Jesús:

—Zoë' tu bönni' lo, sa'yéajë' tu yödzö zi'tu' para si' lu në'ë yöl-la' unná bé', ate' ní'irö huödë'. ¹³ Cate' chizóa tsejë' ni' bulidzë' chië' bönni' huen dxin queë', en bé'ë que queégaquië' tu cö' huéaj dumí, ate' rë' légaquië': "Guli'guílajlen dumí ni tsanni huöda'." ¹⁴ Yugu' bönni' uládz queë' biti' ta'lé'enë' lë' dxi'a, ate' gula'sól-lë'ë yugu' gubáz quégaquië' ga ni' tsejë', ila'nnë': "Biti' ré'ënitú' inná bé'enë' bönni' ni netu'." ¹⁵ Ní'irö guzxi' lu në'ë yöl-la' unná bé', ate' budxinë' ladzë'. Cate' bidxinë' ni' gunná bé'enë' nu tsöjlidza yugu' bönni' huen dxin na' budödë' lu ná'agaquië' dumí na', para inózinë' gáca'xi bulu'guílajlenë' le tu tuë'. ¹⁶ Cate' bönni' z'íalö na' bidxinë' lahuë', rnnë': "Xan, tu cö' dumí quiu' na' chibén icja ia'chí cö' ca'." ¹⁷ Xanë' na' rë' lë': "Tsahui' benu'. Nacu' huen dxin tsahui'. Tu' dxí'ado' bugunu' dxin láti'do'os na' guta' lu no'o, na'a, guna' ga inná bé'enu' chi yödzö." ¹⁸ Ní'irö bidxinë' ia'túë' bönni' huen dxin na' lahuë' lë', rnnë': "Xan, tu cö' dumí quiu' na' chibén icja ia'gayu' cö' ca'." ¹⁹ Xanë' na' rë' ca' lë': "Inná bé'enu' gayu' yödzö." ²⁰ Ní'irö bidxinë' ia'túë' lahuë' lë', rnnë': "Xan, ni dë tu cö' dumí quiu' na'. Ben chí'a le, butúlida' le lari'. ²¹ Caní'bena' tu' rádxida' li', tu' nacu' bönni' bizxaj. Runu' ca na' ta'nná bönachi: Ruzi'u le cabí buzú', en rulapu' ga biti' guzu'." ²² Ní'irö xanë' na' rë' lë': "Nacu' huen dxin biti' naca tsahui'. Ni'a que didza' bé'u uchi'a usöróa' li'. ¿Réquibe'enu' naca' bönni' bizxaj: Ruzi'a le cabí buzóa', en rulapa' ga biti' guza'?" ²³ Na'a, ¿bizx que biti' yöjlu' dumí quia' na' ga gun icja, para cate' huöda', uzi'a le idú len icja na'?" ²⁴ Ní'irö rë' nupa nacua' ni': "Guli'cúa lu në'ë dumí na', ate' guli'gü'i queë' bönni' na' dë queë' chi cö' dumí." ²⁵ Légaquië' të' lë': "Xan, chidé queë' chi cö' dumí." ²⁶ Ní'irö bubi'ë didza' xángaquië', rnnë': "Rea' libí'ili': Nu rugún dxi'a dxin le do' dë lu në'e, ulu'zxöni ládxi'gaca lë' ia'late', pero nu biti' rugún dxi'a dxin le do' dë lu në'e, ulu'béaj lu në'e lë na' guta' lu në'e. ²⁷ Ca naca quégaquië' bönni' ni' biti' ta'lé'enë' neda' dxi'a, en biti' gulé'ënnë' inná bé'eda' légaquië', guli'tsöjzxi' légaquië' para ídigaquië' ni, ate' guli'guti légaquië'."

Len yöl-la' ba zxön razië' Jesús yödzö Jerusalén

(Mt. 21:1-11; Mr. 11:1-11; Jn. 12:12-19)

²⁸ Cate' budxi gunné' caní Jesús, buguelë'ë xinözë', sa'yéajë' zaca' yödzö Jerusalén. ²⁹ Cate' bila'dxinë' gala' ga nacua' yödzö Betfagé, en yödzö Betania, ga naca ra' guí'ado' nazí'i le Guí'a Yaga Olivo, gusól-lë'ë Jesús chopë' bönni' usëda queë', ³⁰ ate' rë' légaquië':

—Guli'tséaj yödzödo' ni' ca dódilö ga zoáru', en cate' idxinli' ni', tsöjxáca'li'-ba' tuba' búrrodo' nága'ba' ni', búrrodo' na' cuntú nu ribíani lëba'. Guli'sedxi-ba', en guli'duché'-ba' quia' ni. ³¹ Channö zoa nu rinábini libí'ili', inná: "¿Bizx que risédxili'-ba'?", ubí'ili' didza' caní innali': "Xanru' riquinnë'-ba'."

³² Söjajúquië' bönni' usëda queë' na' nasól-lë'ë, ate' yöjxáca'gaquië'-ba' ca na' chigudxë' Jesús légaquië'. ³³ Cate' gula'sedxë'-ba' búrrodo' na', yugu' bönni' xanba' të' légaquië':

—¿Bizx que risédxili'-ba' búrrodo' na'?

³⁴ Bulu'bi'ë didza', ta'nnë':

—Xanru' riquinnë'-ba'.

³⁵ Gula'ché'ë-ba' ga na' zoë' Jesús. Cate' chigula'xöë' yugu' lari' tsölá'a quégaquië' cúdzu'ba' búrrodo' na', bulu'dxië' Jesús cúdzu'ba' lahui lari' na'. ³⁶ Gapa ral-la' tödë' Jesús, gula'chiljë' lari' quégaquië' la' nöza. ³⁷ Cate' chibila'dxinë' gala' ga zoa lidinni que Guí'a Yaga Olivo, lu yöl-la' rudzeja quégaquië' gula'sí lógaquië' yúgu'të bönni' dá'gaquië' Jesús,

tu'ë zidzaj didza', ta'gu'ë Dios yöl-la' ba, ni'a quégaca yugu' yöl-la' huáca zxön bila'lé'ené' bené' Jesús. ³⁸ Ta'nné':

—¡Yöl-la' ba bönni' unná bé' ni zè'ë uláz queé' Xanru' Dios! ¡Yehua' yubá za' le ribequi dxi ládxi'ru'! ¡Yöl-la' ba Dios!

³⁹ Ní'irö yugu' bönni' yudo' fariseo nútsa'gaquié' ladaj bönachi zían ni' tē' Jesús, ta'nné':

—¡Bönni' Usedi, gudil-la yugu' bönni' uséda quiu'!

⁴⁰ Bubi'ë didza' Jesús, rē' légaquié':

—Rea' lib'ili': Channö ila'cuá' dxíé' bönni' ni, yugu' guió'j hualu'i caz zidzaj didza'.

⁴¹ Cate' bidxiné' Jesús gala' ra' yödzo na', en rilé'ené' le, ní'irö ribödxé' que, ⁴² rnné':

—Raca ládxa'a huanó'zili' na'a dza le gaca gun ga cuéqui dxi ládxi'li' lahué' Dios, pero na'a chinagachi' queé'li', para cabí ilé'eli' le. ⁴³ Huala'dxín queé'li' dza cate' nupa biti' ta'lé'e lib'ili' dxi'a ila'bequi zö'ö idú gásibi'ilö ga zóali', en ila'gú'u lib'ili' lé'alö, ate' yúgu'tē lataj idú gásibi'ilö ilúnlené' lib'ili' gudil-la. ⁴⁴ Ulu'quínnejé' zö'ö run chi'i yödzo queé'li', en ilútié' nupa nacuá' lu yödzo ni. Biti' ugá'ana guió'j lahui luzé'e. Yúgu'tē lé ni gaca queé'li' tu' cabí gúquibe'eli' dza bidé' Dios buduyúé' lib'ili'.

Rulatjé' Jesús lö'a yudo'

(Mt. 21:12-17; Mr. 11:15-19; Jn. 2:13-22)

⁴⁵ Ní'irö guyázié' Jesús lö'a yudo', en gusí lahué' rubéajé' ní'ilö yúgu'tē nupa tuti', en nupa to'o ga naca lö'a yudo'. ⁴⁶ Rē' légaquié':

—Nazúaj lu guichi lá'ayi, rna: “Lidxa' naca yu'u ga ulu'lidza bönachi Dios”, pero lib'ili' chinunli' le ca tu lídxi'gaca bönni' gubán.

⁴⁷ Yugu' dza rusédiné' Jesús bönachi ga naca chila yudo', ate' gula'zóa gula'bö'ë bixúz unná bé', len bönni' yudo' tu'sédiné', en yugu' bönni' lo que lu yödzo ilútié' Lē'. ⁴⁸ Biti' bulu'dzöliné' nacxi ilútié' Lē', tu' idú ládxi'gaca tu'zē nágagaca yúgu'tē bönachi xtídzé'ë.

20

Yöl-la' unná bé' dē lu nē'ë Jesús

(Mt. 21:23-27; Mr. 11:27-33)

¹ Tu dza, cate' ni' rusédiné' Jesús bönachi ga naca chila yudo', en riguíxjö'ë didza' dxi'a, bila'dxiné' yugu' bixúz unná bé', en bönni' yudo' tu'sédiné', len bönni' gula tu'zéajni'iné', ga na' zoé', ² ate' tē' Jesús:

—Gudixjö'i netu'. ¿Bizxi yöl-la' unná bé' dē lu no'o runu' caní? ¿Nuzxi caz budödi lu no'o yöl-la' unná bé' ni?

³ Bubi'ë didza' Jesús, rē' légaquié':

—Inábida' ca' lib'ili' tu didza', ate' ubí'ili' innali'. ⁴ ¿Nuzxi gusól-la' Juan ruquilé' bönachi nisa? ¿Naru' Dios, o bönachi?

⁵ Gulún xtídzagaquié' la' légacasé' bönni' yudo' na', ta'nné':

—Channö innaru': Gusól-lé'ë Dios lé', guié' rē'u: “¿Bizx que biti' guyéajlé'ëli'-né'?”

⁶ Channö guiéru'-né': Gula'sól-lé'ë yugu' bönni' lé', bönachi lu yödzo ni ulu'ladxi' rē'u guió'j, tu' nóziguequi bé'ë didza' Juan na' uláz queé' Dios.

⁷ Ní'irö bulu'bi'ë didza', ta'nné':

—Biti' nöztu' nuzxi na' gusól-la' Juan.

⁸ Ní'irö Jesús rē' légaquié':

—Neda' ca' biti' guía' lib'ili' bi yöl-la' unná bé' rúnida' caní.

Yugu' bönni' huen dxin biti' nácagaquié' tsahui'

(Mt. 21:33-44; Mr. 12:1-11)

⁹ Ní'irö la' gusí loté' Jesús ru'ilené' bönachi nacuá' ni' didza'. Rucúdzu'ë didza', rnné':

—Zoë tu bönni' budé'ë yugu' lubá uva lu xiyúë', ate' budödë' luyú na' lu ná'agaquië' bönni' huen dxin para ilún gatsjé' len lë' le ulu'zi'ë, ate' guyijé' zi'tu' ga ni' bugá'anë' xidzé. ¹⁰ Cate' bidxín dza ulu'chibë' uva luyú na', gusól-lë'ë tuë' bönni' gubáz queë' ga na' nacu'ë huen dxin na' para si'ë uláz queë' que le ulu'zi'ë, pero huen dxin na' gulúndë'ë lë' zi', en bulu'sól-lë'ë lë' cá'asö. ¹¹ Leyúbölö gusól-lë'ë ia'túë' gubáz queë', ate' légaquië' gulúndë'ë lë' ca' zi', en gulu'ë dö' queë', ate' bulu'sól-lë'ë lë' cá'asö. ¹² Leyúbölö gusól-lë'ë quégaquië' bönni' bunni gubáz queë', ate' bulu'dxíë' ca' lë' huë', en bulu'béajé' lë' ní'ilö luyú na'.

¹³ Ní'irö guzá' ládxe'ë xani luyú na', gunné': "¿Nacxi guntsa'? Isól-la'a xzí'ini caza' nadxí'ida'-bi' quégaquië'. Cate' ila'lé'enë'-bi', nadxi ca' ilunë'-bi' bal." ¹⁴ Ní'irö, cate' yugu' bönni' huen dxin na' bila'lé'enë'-bi', gulún xtídza'gaquië' la' légacasë', ta'nné': "Bi'i ni guequi queé'bi' luyú ni. Guli'dá, gútiru'-bi', para guequi queé'ru' le ral-la' guequi queé'bi'." ¹⁵ Bulu'béajé'-bi' ní'ilö luyú na', en gulútië'-bi'.

'Na'a, ¿nacxi caz gunë' xani luyú na' quégaquië'? ¹⁶ Guídë', en gútië' yugu' huen dxin na', ate' udödë' luyú queë' lu ná'agaca bönachi yúbölö.

Cate' bönachi nacua' ni' bila'yöni lë ni, gula'nné':

—¡Inná Dios biti' gaca caní!

¹⁷ Ní'irö buyúë' Jesús légaquië', rnnë':

—¿Bizxi sa'yéaj lë na' nazúaj lu guichi lá'ayi, rnna:

Guiój na' gula'ru'unë' bönni' huen zö'ö,

guiój ni chinaca guiójlen squin zö'ö?

¹⁸ Núti'tës nu ibixi lahui guiój ni, quitsaj nu na', ate' nu bönni' tsöjbága' guiój ni lë', uzxuzxaj lë'.

Ca naca dumí ta'guixxaj lázagaca bönachi

(Mt. 21:45-46; 22:15-22; Mr. 12:12-17)

¹⁹ La' dza ní'isö, yugu' bixúz unná bë' len bönni' yudo' tu'sédinë' gula'zóa gula'bö'ë ila'zönë' Jesús, tu' téquibe'enë' gunné' quégaquië' lë na' bucúdzü'ë didza', pero guládx-inë' bi ilún bönachi zían nacua' ni'. ²⁰ Ní'irö bulu'yúyenië' Jesús, en gula'sól-lë'ë yugu' bönni' para ulu'béajé' Lë' didza', bönni' ulu'lu'í' cuíngaquië' ca bönni' tsahui', para ilunë' ga bi inné' Jesús, para gaca ulu'dödë' Lë' lu në'ë bönni' rinná bë'enë' uláz queë' César.

²¹ Para ilunë' caní, gula'nábinë' Jesús, ta'nné':

—Bönni' Usedi, nöztu' rnno' le nácatë, en rusédinu' le nácatë, en biti' ruchi'a rusöróu' ca naca le tu'lu'í'isö lahui bönachi, pero idútë li naca ca rusédinu' xibá queë' Dios.

²² Gudíxjöi'i netu'. ¿Naru' run bayudxi quixxaj laztu' queë' César, bönni' Roma rinná bë'ë, o cabí?

²³ Réquibe'enë' Jesús le té'ënnë' ilunë' queë', ate' rë' légaquië':

—¿Bizx que rizí' bé'ëli' neda'? ²⁴ Buli'lu'í'tsöqui' neda' tu dumí ridá. ¿Nuzxi lahui da' lë'e ni, en nuzxi le nazúaj ni?

Bulu'bi'ë didza', ta'nné':

—Queë' César na'.

²⁵ Ní'irö Jesús rë' légaquië':

—Buli'nódzaj queë' César le nequi queë' César, ate' queë' Dios le nequi queë' Dios.

²⁶ Biti' guca ilunë' ga bi inné' Jesús para gaca ulu'zéguië' Lë' didza' lógaca bönachi zían na', pero bulu'bábinë' ca naca didza' bubí'ë, ate' bulu'sayaj ruá'agaquië'.

Ca gaca quégaca nupa ulu'bán lu yöl-la' guti

(Mt. 22:23-33; Mr. 12:18-27)

²⁷ Ní'irö yugu' bönni' yudo' saduceo, nupa na' ta'nná biti' ulu'bán nupa chinátigaca, bila'dxinë' ni', ate' gula'nábinë' Jesús, ta'nné':

²⁸ —Bönni' Usedi, Moisés buzúajë' queéru' lu guichi, le rnna: "Channö gátië' nu bönni', ate' ugá'ananu nigula queë', en channö cunttu nu zoa bi'i queë', ní'irö bi'i bóchi'bi' ral-la' sí'ibi'-nu nigula queë' na', para uzóabi' bi'i queëbi' bóchi'bi' na' gútibi'." ²⁹ Gula'cuá'abi' gadxi bi'i bönni' nácacacabi' bóchi'bi', ate' bi'i zí'alö na' butsaga ná'aleni' bi'i nigula, en gútibi', biti' zóabi' bi'i queébi'. ³⁰ Ní'irö bi'i buropi na' butsaga ná'aleni'-nu nigula na', ate' gútibi' ca' bi'i ni, biti' zóabi' bi'i queébi'. ³¹ Butsaga ná'aleni'-nu bi'i bunni na', ate' la' tuz ca gulunbi' igádxitëbi', ate' gulátibi', biti' zóabi' bi'i quégacabi'. ³² Ga búdxitë, gútinu ca' nigula na'. ³³ Na'a, cate' ulu'bán nupa chinátigaca, ¿núzxilöbi' guéquinu nigula na' queébi', tu' bulu'tsaga ná'aleni'-nu igádxitëbi'?

³⁴ Ní'irö bubi'ë didza' Jesús, rë' légaquië':

—Tu'tsága ná'agaca bönachi dza ni zóaru' na'a, en tu'nödzjë'-bi' xzí'inigaquië' para ulu'tsaga ná'agacabi'. ³⁵ Na'a, nupa nácacaca lesaca' ulu'bán lu yöl-la' guti, en tsöjcuá' yödzölió sí' gata', biti' ilún yöl-la' rizóalen nigula, en biti' ulu'tsaga ná'agaca. ³⁶ Caní gaca, tu' cabirö ilati nupa na' ulu'bán lu yöl-la' guti, pero ilácagaca ca nácacagacabi' gubáz lá'ayi queë' Dios, en ilácagaca xzí'ini cazë' Dios. ³⁷ Ca na' ral-la' ulu'bán nupa chinátigaca, rulu'inë' rë'u Moisés caz ga na' nazúaj lu guichi ca naca que yaga yötsi' régui, ga ni' ru'ë didza' Xanru', rnnë' náquië' Dios queë' Abraham, en Dios queë' Isaac, en Dios queë' Jacob. ³⁸ Dios náquië' Dios, caléga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të bönachi, sal-la' gulati luyú ni.

³⁹ Ní'irö bulu'bi'ë didza' bal-lë' bönni' yudo' usedi, ta'nnë':

—Bönni' Usedi, dxí'ado' gunnó'.

⁴⁰ Bítirö bulu'rúguinë' ila'nábinë' Lë' didza'.

¿Nuzxi xzí'ini náquië' Cristo?

(Mt. 22:41-46; Mr. 12:35-37)

⁴¹ Ní'irö Jesús rë' légaquië':

—¿Nacxi caz na' ta'nnë': "Cristo náquië' xzí'inë' David"? ⁴² David caz bë'ë didza' le nazúaj lu guichi lá'ayi ga nazúajgaca salmo, le rnna:

Xanru' Dios gudxë' Xana':

"Gurö'i cuita lë'a ibëla

⁴³ cate' gunra' ga ulu'zechu xzí'bigaca lo' nupa ta'dá'baga' Li'."

⁴⁴ David caz na' gunné' queë' náquië' Xanë'. ¿Nacxi caz naca, rnnali' libí'ili' náquië' xzí'inë'?

Jesús ruzégui'ë diza' bönni' yudo' tu'sédinë'

(Mt. 23:1-36; Mr. 12:38-40; Lc. 11:37-54)

⁴⁵ Tsanni ni' yúgu'të bönachi nacua' ni' tu'zë' nágagaca Jesús, rë' yugu' bönni' usëda queë':

⁴⁶ —Guli'gún chí'i cuinli' quégaquië' bönni' yudo' tu'sédinë', tu' ta'yaza ládxi'gaquië' ta'dé' nácuagaquië' lari' tunna, en té'ënnë' ulu'lidza bönachi légaquië' zxön gapa naca lu yé'ëyi, en ta'yaza ládxi'gaquië' ca' ta'bö'ë lataj lo gapa tu'dubë' tu'sedë' queë' Dios, en gapa ta'bö'ë tahuë'. ⁴⁷ Ta'gúë' lídxigacanu nigula uzébidu', ate' para ulu'lu'í tsahui' cuíngaquië', xidzé tu'lidzë' Dios. Yugu' bönni' ni, yénni'tërö gunë' Dios ga ila'gu'í ila'záquië'.

21

Gun le gulú'unu tu nigula yechi' lahuë' Dios

(Mr. 12:41-44)

¹ Ga na' zoë' Jesús chila yudo', guchisa lahuë', en rilé'enë' yugu' bönni' dë yöl-la' tsahui' quégaquië', ta'gu'ë dumí lu gu'ina que dumí gun que yudo'. ² Bilé'enë' ca' tu nigula yechi' uzébidu', rigú'unu chopa dumí lásido', le nazáca' gaca láti'do'os. ³ Rnnë' Jesús:

—Le nácatë rea' libí'ili', tu le zxóntërö gulú'unu nigula yechi' uzé'bido' ni ca ia'zica'rö bönachi na' ta'gu'ë dumí. ⁴ Yúgu'të', tsca le nadödi bé' dë quégaquië', gula'gu'ë dumí que yudo', pero nigula ni, lu yöl-la' yechi' queénu gulú'unu idútë le dë queénu, le ral-la' gáhuinu.

Riguíxjö'ë Jesús ca ulu'sunítie' yudo'

(Mt. 24:1-2; Mr. 13:1-2)

⁵ Nacuá' ni' nupa tu'í didza' ca naca que yudo' na', ca na' nazí'i biquitaj que, yugu' guió'j nazacalë'egaca, en yugu' gundo' nátagaca lachi, ate' Jesús rë' légaquië', rnnë':

⁶ —Yúgu'të' lë ni rilé'eli', huadxín dza cate' bíti'rö ugá'ana guió'j lahui luzé'e ni, tu ulu'suníti bönachi yudo' ni.

Le ilaca bé' cate' si' idxín dza údxi

(Mt. 24:3-28; Mr. 13:2-23)

⁷ Ní'irö gula'nábinë' Jesús, ta'nnë':

—Bönni' Usedi, ¿bátaxi gaca lë ni? ¿Bizxi gaca bé' chizóa gaca caní?

⁸ Bubi'ë didza' Jesús, rnnë':

—Guli'gún chi'i cuinli', para cabí nu si' ye'e libí'ili', tu' ila'lá'gaquië' bönni' zían, en ila'z'í' lágaquië' ca lea' neda', ila'nnë' nátagaquië' Cristo, en ila'nnë': “Chizá' gala' dza údxi.” Neda' rea' libí'ili': Biti' tséajlenli' légaquië'. ⁹ Cate' yónili' raca gudil-la, en ta'dá'baga' bönachi yúlahui', bití' gadxi idzóbili', tu' run bayudxi ilaca le caní, pero bití' zuítëni dza údxi.

¹⁰ Ní'irö rë' ca' légaquië':

—Til-la tu yödzo len ia'tú yödzo, ate' bönachi tu ga nu rinná bé' ila'díl-lalen bönachi ia'tú ga nu rinná bé'. ¹¹ Tódigaca budó' zxu', ate' zían lataj gaca gubín, en ilatsaj yödzo'hué' zxon. Ila'lá' lahui lúzxiba le ilún gadxi bönachi, en le ilaca bé'.

¹² 'Zí'atëlö cate' si' ilaca lë ni, ila'zón bönachi libí'ili', en ila'bía ládxi'gaca libí'ili'. Ila'ché'ë libí'ili' gapa tu'dubë' tu'sëdë' queë' Dios para ilútië' libí'ili', en ila'gu'ë libí'ili' lidxi guíë. Ila'ché'ë libí'ili' lógaquië' bönni' ta'nná bé'ë, en lógaquië' bönni' lo, tu' dá'alí' neda'. ¹³ Gaca caní queéli' para séqui'li' gunli' ba nalí quia' neda'. ¹⁴ Tsutsu guli'gún ládxi'li', para cabí cuéqui ícjali' zí'alö nacxi innali' uláz queéli', ¹⁵ tu' gunna' queéli' didza' ubí'ili', en yöl-la' réajni'i, para cabí gaca ulu'cul-lë' libí'ili', en para cabí gaca bi ila'nnë' que xtídza'li' bönni' ni' bití' ila'lé'enë' libí'ili' dxi'a. ¹⁶ Ní'irö xuz quézili' ulu'dödë' libí'ili', en cá'anqueze yugu' bönni' böchi' quézili', en yugu' di'a dza que quézili', en yugu' böchi' luzé'e quézili', ate' ilútië' bál-lali'. ¹⁷ Yúgu'të' bönachi ulu'zóa libí'ili' tsölá'alö tu' dá'alí' neda', ¹⁸ pero bití' iníti nitú guitsa' ícjali'. ¹⁹ Channö ugá'anali' tsutsu, idéli'li' yöl-la' na'bán idú.

²⁰ 'Cate' ilé'eli' bönni' röjáquië' gudil-la nagú'ugaquië' lë'a Jerusalén, inózili' chibidxín dza iníti yödzo ni. ²¹ Ní'irö nupa nacua' luyú Judea ral-la' ila'zxunnaj ni, en tsöjaca gapa naca guí'ado', ate' nupa nacua' lu yödzo ni ral-la' ila'rúaj ni, ate' nupa nacua' la' guixi', bití' ral-la' ulu'dxín lu yödzo ni. ²² Yugu' dza ni' Dios gunë' xíguia' nupa nacua' yödzo ni para gaca yúgu'të' le nazúaj lu guichi lá'ayi ca ral-la' gaca quégaquië'. ²³ Cate' idxín dza ni', bica' bayechi' yugu' nigula nuá'gacanu-bi' bí'ido' si' ilaljbi', en nigula tu'gádxí'nu-bi' bí'ido', tu' ila'gu'í' ila'záca'da' bönachi nacua' ni', ate' Dios gúndë'ë bönachi ni' xíguia'. ²⁴ Ilátië' zianë' lu gudil-la na', ate' ila'ché'ë ia'bal-lë' nadzúngaquië' ga ila'dxinë' idútë yödzo'lió, ate' yödzo Jerusalén ni, ulu'léaj ulu'libë' le bönni' zi'tu', cate' izá'arö dza quégaquië'.

Le ilaca bé' si' huödë' Bönni' Guljë' Bönachi

(Mt. 24:29-35, 42-44; Mr. 13:24-37)

²⁵ Gunnë' ca' Jesús:

—Ni'irö ila'cuá' le ilaca bë' lu gubidza, en lu beo', en yugu' lu böljaj lúzxiba, ate' luyú ni ulu'chixi bönachi, en iládxiguequi, tu' yön chi'i guziú' yu que nísado', en que le riyasa ridxía nisa na'. ²⁶ Ulu'dú ládxi'gaca lu yöl-la' radxi quéguequi tu' ila'zá' ládxi'gaca quégaca le ral-la' ilaca lu yödzölió, en ila'zxizi le nalá'gaca lúzxiba. ²⁷ Ni'irö ila'lé'ené' neda', Bönni' Guljé' Bönachi, guída' lu böaj lúzxiba, dë lu na'a yöl-la' unná bë', ate' ilá lahui yöl-la' zxön quia'. ²⁸ Cate' isí lo ilaca lë ni, buli'tipa ládxi'li', en guli'chisa loli', tu' chizóa udxina' neda', para huó'ua' libí'ili'.

²⁹ Jesús gudxé' ca' légaquié' tu le bucúdzu'ë didza', rnnë':

—Buli'yútsöca' ca raca que yaga higo, en que bíti'tës yaga yúbölö. ³⁰ Cate' rilé'eli' ta'lén ni'a në'e hué'énido', nöz quézili' chizá' gala' cusu ba. ³¹ Lësca' caní, cate' ilé'eli' chitaca yugu' lë ni, inózili' chizá' gala' dza idinná bë'ë Dios luyú ni.

³² 'Le nácatë rea' libí'ili', bití' ilátigaca bönachi ila'cuá' dza ni' cate' ilaca yúgu'të lë ni. ³³ Ila'dödi que lúzxiba, en que luyú ni, pero xtídz'a, bití' tödi cá'asó, tu' idxín caz ca rna.

³⁴ 'Guli'gún chi'i cuinli' para cabí'gü'ili' lataj tsaza icja ládxi'do'oli' le gun ditaj libí'ili', lë na' naca yöl-la' rágulë'e, en yöl-la' rizudxi, en yöl-la' ruúbi ruguí'i, para cate' idxín dza ni', cabí' sóali' niti ladxi', ³⁵ en para cabí' gaca queéli' ca tu le rizón bönachi, ca naca le gaca quégaca yúgu'të bönachi nacua' idútë yödzölió. ³⁶ Que lë ni na', guli'sóa ban ladxi', en buli'lídzatica'sé' Dios, para gaca uláli' lu lë na' ral-la' ilaca, en para cabí' utuí'ili' cate' idxinli' lahua' neda', Bönni' Guljé' Bönachi.

³⁷ Lahui' dza rizóë' Jesús chila yudo', rusédinë' bönachi, ate' chi'i dzó'ölö rirúajé' ni', en rejé' lu guí'ado' nazí'i le Guí'a Yaga Olivo. ³⁸ Yugu' zila'bxín yúgu'të bönachi ga zoë' Jesús chila yudo' para ulu'zé' nágagaca xtídzë'ë.

22

Tun xtídz'a'gaquié' ilútié' Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Cate' chizóa idxín laní cate' tahué' yöta xtila cabí' nazí'i cúa zi que, nazí'i le Pascua laní na', ² bulu'dubé' yugu' bixúz unná bë' len bönni' yudo' tu'sédinë'. Ta'zóa ta'bö'ë ilútié' Jesús, pero bití' gula'zéqui'né' tu' tádxiné' bi ilún bönachi.

³ Ni'irö Satanás tu' xihui' yöjtsaga Judas. Judas lë' ca' Iscariote, en nababë' idxínnutë' gubáz nasól-lë'ë Cristo. ⁴ Guyijé' Judas na', yöjé'lenë' didza' yugu' bixúz unná bë', en bönni' dë lu ná'agaquié' que yudo', naxi guné' para udödë' Jesús lu ná'agaquié'. ⁵ Bulu'dzéjanë' bönni' yudo' na', en gula'zí' lu ná'agaquié' ulu'nödzjé' queë' dumí. ⁶ Raza ládxe'ë Judas lë ni, ate' rizóa ribö'ë udödë' Jesús lu ná'agaquié' bagáchi'sö.

Le ráguru' le rusá' ládxi'ru' ca gútié' Xanru'

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidxín dza na' tahué' yöta xtila cabí' nazí'i cúa zi que, cate' ral-la' ilútié'-ba' bö'cu' zxila' le tahué' dzö' Laní Pascua. ⁸ Jesús gusól-lë'ë Pedro, en Juan, rnnë':

—Guli'tséaj, guli'tsöjpa'a queéru' le gáguru' dzö' Laní Pascua.

⁹ Të' Lë':

—¿Gazxi ré'ënu' tsöjpa'atu' queéru'?

¹⁰ Jesús ré' légaquié', rnnë':

—Buli'yútsöca', cate' tsú'uli' lu yödzö ni, irúajé' tu bönni' dutságuié' libí'ili', söjnu'ë tu rö'ö nisa. Guli'tséajlenë' ga idxíntëli' yu'u ga tsázié'. ¹¹ Guli'guíé' xan yu'u na': "Bönni' Usedi ré' li': ¿Gazxi zoa yu'u laní ga gágulena' yugu' bönni' uséda quia' dzö' Laní Pascua?"

¹² Ni'irö ulu'ine' libí'ili' tu yu'u zxön xitsá' ga ni' chinabá'a. Buli'pá'a ni' le gáguru'.

¹³ Ni'irö yöjáquié', en yöjxáca'gaquié' ca na' chigudxé' Jesús légaquié', ate' bulu'pé'ë ni' le ilahué' dzö' Laní Pascua.

¹⁴ Cate' bidxín dzö' na', gurö'ë Jesús ga ilahué', ate' bönni' gubáz queë' na' gula'bó'lenë' Lë' tsözxón. ¹⁵ Ni'irö Jesús ré' légaquié':

—Gúcada' ládxa'a gágulena' libí'ili' tsözxón xtsö' ni zí'atëlö cate' si' qui'i saca'a, en gátia'. ¹⁶ Rea' libí'ili': Bítirö gahua' lë ni cate' idxinrö dza gaca le rulu'isö xtsö' ni ga ni rinná bē'ë Dios.

¹⁷ Gudélë'ë Jesús tu zxíga'do', en gudxë' Dios: "Xclenu'." Ní'irö rë' légaquië':

—Guli'sí' lë ni, en guli'gu'aj lati' huéaj, ¹⁸ tu' rea' libí'ili': Bítirö guí'ja' xisi uva cate' idxinrö le rinná bē'ë Dios.

¹⁹ Ní'irö gudélë'ë yöta xtila, en gudxë' Dios: "Xclenu'." Gudödi ni' buzuzxjë' le, en bē'ë que queégaquië', rnnë':

—Lë ni naca idútë le naca' le rudöda' uláz queé'li'. Guli'gún caní para usá ládxi'li' neda'.

²⁰ Cate' budxi gulahuë', lësca' caní bē'ë didza' que zxíga'do' na', rnnë':

—Zxíga'do' ni rulu'i ca naca didza' cubi rucá'ana tsahui', ate' rön quia' run tsutsu le, rön na' ilalaj ni'a queé'li'.

²¹ Na'a, bönni' na' udödë' neda' lu ná'agaca bönachi rö'ë rágulenë' neda' tsözxón. ²² Le nácatë huayija' ga ilútië' neda', Bönni' Guljë' Bönachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bönni' na' udödë' neda'.

²³ Ní'irö gula'sí' lógaquië' ta'nábinë' Lë' tu tuë', ta'nnë':

—¿Núzxilötu' nu gun caní?

Tu'i xtídza'gaquië' núzxilögaquië' gáquië' lo

²⁴ Ní'irö gulu'ë didza' la' légacasë' núzxilögaquië' idéli'në' lataj lo. ²⁵ Jesús gudxë' légaquië':

—Yugu' bönni' unná bē' tu'gunë' dxin yöl-la' unná bē' quegaquië', ta'nná bé'enë' bönachi, ate' nupa ni dë lu ná'agaca yöl-la' unná bē', légaquië' bönni' tácalen. ²⁶ Libí'ili' bití' ral-la' gunlí' caní, pero nu naca lo ládjali' ral-la' gaca ca nu naca cuídí'tërö, ate' nu rinná bē' ral-la' gaca ca nu run dxin quéguequi luzé'e. ²⁷ ¿Núzxilö na' nácarö lo, nu na' rö'ö ragu, o nu rupá' la' huagu? ¿Naru' calëga nu na' rö'ö ragu nácarö lo? Neda' zóalena' libí'ili' ca nu rupá' la' huagu.

²⁸ Libí'ili' ni guzóaleni' neda' cate' ni' bi guca quia', yugu' le gula'zí' bē' neda'. ²⁹ Que lë ni na' udöda' lu ná'ali' tu ga inná bé'ë'li', ca na' benë' Xuza', budödë' lu na'a ga inná bē'a neda'. ³⁰ Caní guna' para gaca có'öli', en guí'aj gágulenli' neda' ga ni' inná bē'a, ate' có'öli' xilataj cázali' ga uchi'a usöröli' idxinnu cö' zxf'ini xi'sóë' Israel.

Rnnë' Jesús innë' Pedro bití' núnbë'ë Lë'

(Mt. 26:31-35; Mr. 14:27-31; Jn. 13:36-38)

³¹ Gunnë' ca' caní Xanru':

—Simón, Simón. Buyútsöca'. Chigunaba Satanás tu' xihui' libí'ili', para urixi udödi libí'ili' ca nu rurixi rudödi xzoa' xtila, ³² pero chibulidza'-në' Dios, en gunábida' Lë' gácalenë' li', para cabí údxi udú yöl-la' réajlë' quiu' neda'. Na'a, cate' huóacu' quia', butipa ládxi'gaquië' böchi' luzó'o.

³³ Pedro rë' Lë':

—Xan, chizóa' sá'lena' Li', calégasö tseja' lidxi gufë, pero lësca' gátilena' Li'.

³⁴ Jesús rë' lë':

—Pedro, rea' lí': Zí'alö códxiba' böra na'a, chigudá'bagu'u tsonna luzuí, innó' cabí núnbë'u neda'.

Le benë' Jesús cate' chizóa' ilútië' Lë'

³⁵ Jesús gunábinë' légaquië', rnnë':

—Cati' gusól-la'a libí'ili' cabí nuá'ali' yöxaj yöta, en calëga buzudi dumí, en calëga chopá có' xiráchuli', ¿naru' bi biyadzaj queé'li'?

Légaquië' ta'nnë':

—Bití' bi.

³⁶ Ní'irö rë' légaquië':

—Na'a, nu dë yöxaj yöta que ral-la' guá' le, ate' lësca' caní ral-la' gun nu dë que buzudi dumí, ate' nu biti' dë que guíë tuchi' ral-la' guti' lari' rixóa yeni, en si' tu guíë tuchi'.
³⁷ Rea' libí'ili': Run bayudxi gaca quia' lë na' nazúaj lu guichi lá'ayi, rnna: "Gulunë' queë' ca tunë' quégaca nupa tua' dö'", ate' ilaca yúgu'të le nazúajgaca lu guichi ca ral-la' gaca quia'.

³⁸ Ní'irö légaquië' ta'nné':

—Xan, ni dë chopa guíë tuchi'.

Lë' rë' légaquië':

—Chinaca.

Jesús rulidzë' Dios la' yëla Getsemani

(Mt. 26:36-46; Mr. 14:32-42)

³⁹ Ní'irö birúajë' Jesús, en ca run cazë' sa'yéajë' lu Gu'á Yaga Olivo, ate' yugu' bönni' usëda queë' sójacalenë' Lë'. ⁴⁰ Cate' bila'dxinë' ni', Jesús rë' légaquië', rnnë':

—Buli'lídzë' Dios, inábili'-në' cabí gata' lataj si' bë' tu' xihui' libí'ili'.

⁴¹ Ní'irö Jesús guzë'ë ga na' nacu'ë, en gudödë' ia'lati' tsca ga ridxín tu guió'j rirú'uniru', ate' ni' buzóa zxi'bë', en rulidzë' Dios. ⁴² Rnnë':

—Xúz, channö ré'ënu', bucuása ga zoa' lë na' ral-la' quí'i saca'a, pero calëga ca ré'ënda' neda', pero ca ré'ënu' Li' gunu'.

⁴³ Ní'irö buluí'i lahuë' gubáz lá'ayi queë' Dios, zë'ë yehua' yubá, ate' butipë' ládxë'ë Jesús. ⁴⁴ Lu yöl-la' risëbi ladxi' queë', idú ládxë'ë Jesús bulidzë' Dios, ate' nisa yösa queë' guca ca rön raba' luyú.

⁴⁵ Cate' budxi bulidzë' Dios, guyasë', en bóajë' ga na' nacu'ë bönni' usëda queë', ate' duxáquië' légaquië' tásië' tu' tu'huí'inigaquië'. ⁴⁶ Ní'irö Jesús rë' légaquië':

—¿Rásitsali'? ¿Guli'chasa, en buli'lídzë' Dios! Inábili'-në' cabí gata' lataj si' bë' tu' xihui' libí'ili'.

Ta'zönë' Jesús

(Mt. 26:47-56; Mr. 14:43-50; Jn. 18:2-11)

⁴⁷ Tsanni ni' ru'ë didza' Jesús, la' bila'dxintë' bönni' zían ni', ate' Judas, bönni' na' nababë' idxínnuë' bönni' usëda queë' Jesús dzáguië' légaquië', ate' nanóruë' lógaquië' bönni' zían na'. Gubígui'ë ga zoë' Jesús para utsaga lahuë' Lë'. ⁴⁸ Ní'irö Jesús rë' lë':

—Judas, ¿naru' rudóditso' caní neda', Bönni' Guljë' Bönachi, rutsaga lo' neda'?

⁴⁹ Cate' yugu' bönni' na' nacuá'lenë' Jesús bila'lé'enë' ca na' raca queë' Lë', të' Lë':

—Xan, ¿naru' gü'itu' légaquië' guíë tuchi'?

⁵⁰ Tuë' bönni' usëda queë' Jesús benë' huë' guídi náguië' bönni' huen dxin queë' bixúz lo. Burixë' guídi náguië' ibëla. ⁵¹ Jesús rnnë':

—Chinaca na'a. Tsca' gaz.

Gudanë' Jesús guídi náguië' bönni' huen dxin na', en bunë' le. ⁵² Ní'irö rë' yugu' bixúz unná bë', en bönni' dë lu ná'agaquië' que yudo', en bönni' gula tu' zéajni'inë', bönni' na' biti' ta'lé'enë' Lë' dxi'a, rnnë':

—¿Narúajtsali' nuá'ali' guíë tuchi', en yaga para sönli' neda' ca runli' rizönli'-në' gubán? ⁵³ Yugu' dza guzóalen caza' libí'ili' chila yudo', ate' biti' bi benli' quia', pero na'a chibidxín dza queé'li', le naca dza dë lu në'e nu na' zoa lataj chul-la.

Rnnë' Pedro: "Biti' núnbë'a-në' Jesús"

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

⁵⁴ Ní'irö gula'zönë' Jesús, en gula'ché'ë Lë' ga na' bulu'sudxinë' Lë' lidxë' bixúz lo. Pedro yöjnahué' Jesús zi'tu' zí'tu'sö. ⁵⁵ Cate' ni'a në'ë bixúz lo chigula'béquië' guí' lö'a lidxë' bixúz lo na', gula'bö'ë idú gásibi'ilö ra' guí' na', ate' Pedro guró'lenë' légaquië' tsözxón. ⁵⁶ Cate' tubi' bi'i nigula huen dxin bilé'ebi'-në' Pedro, ni' ró'ösë' ra' guí', buyubi' lë', en rnnabi':

—Bönni' ni dë'ë ca' Jesús.

⁵⁷ Gudá'baguië' Pedro, rnnë':

—Nigúla, biti' ca' núnbë'a-në' bönni' na'.

⁵⁸ Ia'láti' gudzé ia'túë' bönni' bilé'enë' Pedro, ate' rnnë':

—Li' do'o ca' légaquië'.

Pedro gunné':

—Bönni', calëga neda'.

⁵⁹ Ia'láti'sö gudzé, gunné' ia'túë' bönni':

—Le nácatë bönni' ni dë'ë Jesús, tu' náquië' bönni' Galilea.

⁶⁰ Ní'irö Pedro gunné':

—Bönni', biti' nözda' bizxi na' ru'u didza' que.

Tsanni ni' ru'ë didza' ni, la' guródxitéba' böra. ⁶¹ Ní'irö buécjé' Xanru', en ruyúë' Pedro, ate' yöjnenë' Pedro xtídzë'ë Xanru', ca na' gudxë' lë': "Zí'alö códxiba' böra na'a, li' chigudá'bagu'u tsonna luzuí, innó' biti' núnbë'u neda'." ⁶² Burúajë' Pedro ní'ilö, ate' rön caz guródxë'.

Tu'titjé' Jesús

(Mt. 26:67-68; Mr. 14:65)

⁶³ Yugu' bönni' na' nazóngaquië' Jesús bulu'titjé' Lë', ate' gula'guiné' Lë'. ⁶⁴ Ní'irö bulu'sayjé' lahuë' Jesús, ate' gula'gápë'ë lahuë', en gula'nábinë' Lë', ta'nné':

—¿Gunné'ya'atsöca! ¿Nuzxi na' gudapa' Li'?

⁶⁵ Ziánrö ca' gula'nné' queë' le gulu'ë dö' queë'.

Ridxinë' Jesús lógaquië' bönni' yudo' tu'chi'a tu'söröë'

(Mt. 26:59-66; Mr. 14:55-64; Jn. 18:19-24)

⁶⁶ Cate' chizá' rení' dza na', bulu'dubë' bönni' gula tu'zëajni'inë' bönachi judío len yugu' bixúz unná bë', en bönni' yudo' tu'sédinë', ate' gula'ché'ë Jesús lógaquië' bönni' yudo' tu'chi'a tu'söröë', ate' gula'nábinë' Lë', ⁶⁷ ta'nné':

—Gudíxjöi' netu'. ¿Naru' nactso' Li' Cristo?

Jesús rë' légaquië':

—Channö guía' libí'ili' naca' Cristo, biti' tséajlë'ëli' neda', ⁶⁸ en channö inábida' libí'ili' tu didza', biti' ubí'ili' didza', en biti' usanli' neda'. ⁶⁹ Na'a isí lo, neda', Bönni' Guljé' Bönachi, cö'a cuita lë'ë ibëla Dios, nápatërë' yöl-la' unná bë'.

⁷⁰ Gula'nábinë' Lë' yúgu'të', ta'nné':

—¿Naru' nactso' Li' Zxí'inë' Dios?

Lë' gudxë' légaquië':

—Le nácasö rnnali'.

⁷¹ Ní'irö ta'nné':

—¿Núzxirö naquíniru' nu gun ba nalí queë'? La' ré'usö chibiyóniru' didza' ru'ë.

23

Ridxinë' Jesús lahuë' Pilato, bönni' rinná bë'ë uláz queë' César

(Mt. 27:1-2, 11-14; Mr. 15:1-5; Jn. 18:28-38)

¹ Ní'irö gulazuiné' yúgu'të' bönni' zían ni', ate' gula'ché'ë Jesús lahuë' Pilato, ² ga ni' gula'sí lógaquië' tu'zéguië' Lë' didza', ta'nné':

—Bönni' ni, budzólitu' ca runë'. Runë' ga ta'dá'baga' bönachi uládz queëtu' yúlahui', en ruzáguë'ë xinózigaca nupa ta'guíxaj laz ruquíxjé' César, en rnnë' lë' cazë' náquië' Cristo, bönni' ral-la' inná bë'ë.

³ Ní'irö Pilato gunábinë' Jesús, rnnë':

—¿Naru' nacu' Li' nu inná bë'e bönachi judío?

Bubi'ë didza' Jesús, rnnë':

—Le nácasö rnnó'.

⁴ Ní'irö Pilato gudxë' yugu' bixúz unná bé', en bönachi nacuá' ni', rnnë':

—Biti' bi rudzólida' le naca xíguia' nunë' bönni' ni.

⁵ Ní'irö gulunrë' tsutsu xtídza' gaquië', ta'nnë':

—Runë' ga tu'tsatsa bönachi, en rusédinë' caní bönachi idú luyú Judea. Gusí lahuë' benë' caní luyú Galilea ga ridxintë runë' ca' ni.

Ridxinë' Jesús lahuë' Herodes, bönni' rinná bé'ë luyú Galilea

⁶ Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquië' channö náquië' Jesús bönni' Galilea. ⁷ Cate' gunózinë' nababë' Jesús ga ni' rinná bé'ë Herodes, gusól-lë'ë Lë' lahuë' Herodes na', tu' zoë' ca' Herodes Jerusalén yugu' dza na'.

⁸ Cate' Herodes na' bilé'enë' Jesús, budzéjanë', tu' chiguca xidzé ré'ënë' ilé'enë' Lë' tu' chibiyönnë' le zían ca naca queë' Jesús, en runë' löza ilé'enë' tu yöl-la' huáca gunë'.

⁹ Ní'irö Herodes gunábinë' Jesús le zían, pero Jesús biti' bi didza' bubí'ë. ¹⁰ Nacu'ë ca' ni' yugu' bixúz unná bé', len bönni' yudo' tu' sédinë', ate' bulu' zéguidë'ë Jesús didza'. ¹¹ Ní'irö Herodes, en bönni' queë' röjáquië' gudil-la bulu' cá'anë' Jesús cá'asö, en para ulu'titjé' Lë', bulu'gácuë' Lë' tu lari' nazaca' ca rácuë' tu bönni' unná bé', ate' leyúbölö bulu'sudxinë' Lë' lahuë' Pilato. ¹² Dza na' bulu'dzáguië' dxi'a Pilato, en Herodes, tu' zí'alö gula'lé luzé'ë tuë' ia'tué'.

Ta'chúguië' queë' Jesús gátie'

(Mt. 27:15-26; Mr. 15:6-15; Jn. 18:39-19:16)

¹³ Ní'irö butubë' Pilato yugu' bixúz unná bé', en bönni' dë lu ná'agaquië', en bönachi lu yödzö, ¹⁴ ate' rë' légaquië':

—Dujuá'ali'-në' bönni' ni lahua' neda', rnnali' queë' runë' ga tu'tsatsa bönachi, pero cate' gunabi yúdxida'-në', ate' zóatëli' ca' ni, biti' bi budzólida' le naca xíguia' nabáguë'ë, yugu' lë na' ruzéguii'-në' didza'. ¹⁵ Cate' gusól-la'a libí'ili' lahuë' Herodes, biti' bi budzólinë' le benë' bönni' ni le naca xíguia' nabáguë'ë para nu ichugu queë' gátie'. ¹⁶ Na'a usaca' zi'a-në', ate' tödi na' usana'-në'.

¹⁷ Run bayudxi tu le gunë' Pilato, usanë' lu ná'agaca bönachi tuë' bönni' nadzunë' cate' raca laní na', ca na' run cazë'. ¹⁸ Ní'irö gulu'ë zidzaj didza' yúgu'të bönni' nacu'ë ni', ta'nnë':

—Bëtië' bönni' ni, en busanë' queë'tu' Barrabás.

¹⁹ Nadzunë' Barrabás na' lidxi guié' tu' gudíl-lalenë' yúlahui' lu yödzö na', en tu' bëtië' bönachi. ²⁰ Bulidzë' Pilato légaquië' leyúbölö, tu' ré'ënë' usanë' Jesús. ²¹ Leyúbölö gulu'ë zidzaj didza', ta'nnë':

—¡Budé'ë lë'e yaga cruz! ¡Budé'ë lë'e yaga cruz!

²² Ní'irö Pilato gudxë' légaquië' le bunny luzuí, rnnë':

—¡Bizxi caz le ruá' dö' benë' bönni' ni? Biti' bi budzólida' nunë' le run ga nabáguë'ë xíguia' gátie'. Usaca' zi'a-në', ate' ní'irö usana'-në'.

²³ Zidzajrö gulu'ë didza', ta'nabë' tē'ë Jesús lë'e yaga cruz. Tu' gula'bódxí'ë yenni' yugu' bönni' na', en yugu' bixúz unná bé', gula'délinë' gaca ca na' té'ënnë'. ²⁴ Ní'irö Pilato guchúguië' queë' Jesús, para gaca queë' ca na' ta'nabë'. ²⁵ Busanë' quégaquië' bönni' na' nadzunë' lidxi guié' tu' gudíl-lalenë' yúlahui', en bëtië' bönachi, bönni' na' chigula'nabë', ate' budödë' Jesús para gaca queë' ca na' té'ënnë'.

Dë'ë Jesús lë'e yaga cruz

(Mt. 27:32-44; Mr. 15:21-32; Jn. 19:17-27)

²⁶ Cate' ni' ta'ché'ë Jesús tsöjda'gaquië' Lë' lë'e yaga cruz, gula'zönë' Simón, bönni' yödzö Cirene, suzé'ë la' guixi', ate' gula'xóë' yen zxicjé' yaga cruz na' para gu'ë le, en tsejé' cúdzu'lë' Jesús.

²⁷ Bönachi zián, enca' yugu' nigula söjñógaca Jesús, ta'bódxinu nigula na', en ta'bódxu yéchi' nu queé' Lë'. ²⁸ Ní'irö buécjé' Jesús, en ruyúé' légacanu, ate' rë' légacanu:

—Libí'ili' nigula Jerusalén. Biti' códxili' quia' neda', pero guli'cödxu que quézili', en quegacabi' xzí'inili' ²⁹ tu' huadxín dza ila'nná: “Bica' bágaca yugu' nigula huödx, en nigula bitu' guluá'anu-bi' bí'ido', en bitu' bulu'gádxu'nu-bi' bí'ido'.” ³⁰ Ní'irö ila'sí lógaca ila'nná bönachi, ilé' yugu' guí'a sibi: “Guli'dubága' netu'”, en ilé' ca' yugu' guí'ado': “Guli'cachi' netu'.” ³¹ Channö caní tuné' quia' neda', naca' ca tu yaga ya'a, ¿naru' cabí ilúnteré' ca' queé'li', nácali' ca yaga bidxi?

³² Gula'ché'ë ca' chopé' bönni' tuá' dö', para ilútié' légaquié' tsözxón len Jesús. ³³ Cate' bila'dxiné' lataj nazí'i le Calavera, le rna len didza' xidza' Lataj Que Böga' Íjaru', bulu'dé'ë Jesús lë'e yaga cruz. Bulu'dé'ë ca' lé'egaca yaga cruz chopé' bönni' tuá' dö'. Tué' bulu'dé'ë cuita lë'ë ibëla Jesús, en ia'túé' bulu'dé'ë cuita lë'ë yógöla. ³⁴ Ní'irö Jesús rnné':

—Xuz, buniti lo légaquié', tu' cabí nózguequiné' bi tuné'.

Bönni' röjáquié' gudil-la nacué' ni' bulu'lé'ë que queégaquié' le nácué' Jesús, en bulu'quitjé' le gaca bé' lahui. ³⁵ Bönachi nacué' ni' tu'yú, en yugu' bönni' dë lu ná'agaquié' bulu'titjé' Jesús, ta'nné':

—Yugu' nu yúbölö busölé' bönni' ni. Na'a ral-la' usölá cuiné' channö náquié' Cristo, bönni' guró cazé' Dios.

³⁶ Yugu' bönni' na' röjáquié' gudil-la bulu'titjé' ca' Jesús. Gula'bigué'ë ga na' zoé', en bulu'gui'jé' Lë' nupi zi, ³⁷ ta'nné':

—Channö nacué' Li' bönni' inná bé'ené' bönachi judío, busölá cuinu'.

³⁸ Da' ca' lë'e yaga cruz icjlé' Jesús tu le nazúaj lu guichi lu didza' griego, en lu didza' latín, en lu didza' hebreo, le rna caní: “Bönni' Rinná Bé'ené' Bönachi Judío.” ³⁹ Tué' bönni' huiá' dö' na' dë'ë lë'e yaga cruz bulidza zi'ë Jesús, rnné':

—Channö nacué' Li' Cristo, busölá cuinu', enca' netu'.

⁴⁰ Bubi'ë didza' ia'túé' bönni' huiá' dö' na', en gudil-lë' luzé'ë na', rnné':

—¿Naru' cabí rádxinu'-né' Dios? Lësca' li' narugu quiu' gátiau'. ⁴¹ Le nácaté rë'u, le rál-la'sö gaca queéru' riguí'i rizáca'ru', ca na' sa'yéaj dö' biá'aru', pero Bönni' ni, bitu' bi dö' nu'ë.

⁴² Ní'irö bönni' ni rë' Jesús:

—Yöjné neda' cate' idxinu' ga ni' inná bé'u.

⁴³ Jesús rë' lë':

—Le nácaté rea' li', na'a dza ni sóalenu' neda' lataj lachi quia'.

Ratié' Jesús

(Mt. 27:45-56; Mr. 15:33-41; Jn. 19:28-30)

⁴⁴ Cate' bidxín idú huagubidza, guchul-la idúté yödölió ga bidxinrö idú ridödi xihuó. ⁴⁵ Guchul-la gubidza, ate' lari' nal-la' lu yudo' biröza' chopa dí'ilö. ⁴⁶ Ní'irö bé'ë zidzaj didza' Jesús, rnné':

—Xuz, rigú'a lu no'o bö' naca caza'.

Cate' budxi gunné' caní, birúajté bö' naca cazé', gútié'.

⁴⁷ Cate' bönni' rinná bé'ené' bönni' röjáquié' gudil-la bilé'ené' ca na' guca, gulu'ë Dios yöl-la' ba, rnné':

—Le nácaté bönni' ni gúquié' bönni' tsahui'.

⁴⁸ Cate' yúgu'té bönni' nacué' ni' tu'yúé' bila'lé'ené' lë na' guca, yöjhuójgaquié' yödö, ta'gapa' luchú'ugaquié' tu' tu'bánniné'. ⁴⁹ Zí'tu'sö bulu'gá'ana yúgu'té nupa ni' núnbé'gaca Jesús, en yugu' nigula na' yöjácalennu Lë' cate' ni' gudé' luyú Galilea, ate' tu'yúé' lë ni raca.

Rigáchë'ë Jesús yeru ba

(Mt. 27:57-61; Mr. 15:42-47; Jn. 19:38-42)

⁵⁰ Zoë' ca' ni' tu bönni' yödzo Arimatea que luyú Judea, lë' José. Bönni' ni náquië' dxi'a, en tsahui', en nabábalenë' yugu' bönni' yudo' tu'chi'a tu'söróë'. ⁵¹ Biti' benë' tuz nupa na' gula'chugu queë' Jesús gátië', tu' ribözë' ca' José ni le rinná bë'ë Dios. ⁵² Ní'irö guyijë' José na' lahuë' Pilato, en gunabë' lataj u'ë Jesús. ⁵³ Cate' chinuzötjë' Lë', buchólinë' Lë' lari', ate' gulu'ë Jesús yeru ba, le nadaj lë'e guí'a guió'j, ate' lu ba na', cuntunu nagü'iguequinë'.

⁵⁴ Dza na' naca dza tu'pé'ë que dza lá'ayi quégaquië' bönni' judío, tu' si' idxín dza na'.

⁵⁵ Yójácanu ca' ni' nigula na' gula'zá'lennu Jesús, cate' ni' gudé' luyú Galilea, ate' bila'lé'enu yeru ba na', en ca na guca, gula'gu'ë Lë' ni'. ⁵⁶ Cate' yójhuó'jgacanu yu'u, bulu'pá'anu nöri rilá' zxixi, en yugu' le za rilá' zxixi. Ní'irö bulu'z'í ládxi'gacanu dza lá'ayi na' quégaquië' bönni' judío ca na' rinná bë' xibá queë' Dios.

24

Rubanë' Jesús lu yöl-la' guti

(Mt. 28:1-10; Mr. 16:1-8; Jn. 20:1-10)

¹ Cate' bidxín dza risí lo ia'gadxi dza na', cate' ni' naca zílado', bila'dxinnu nigula na' ra' yeru ba queë' Jesús. Nuá'gacanu yugu' le rilá' zxixi, lë na' chinupá'gacanu, ate' dzágagacanu lé'gacanu ia'bál-lanu nigula. ² Cate' bila'dxinnu ni', bila'lé'enu chinadúa guió'j na' gudá' ga nu riyaza yeru ba queë'. ³ Cate' gula'yázanu yeru ba na', bití' bulu'dzólinu zoa Xanru' Jesús ni'. ⁴ Cate' ni' ta'bó'önu böniga ni'a que lë ni, chopë' bönni' nácugaquië' lari' répi yösa bení' la' bila'dxintë' ni', en gula'zuínë' ga na' nacuá'anu. ⁵ Ní'irö guládxinu, en bulu'zötaj íc'gacanu, tu'yunu lu yu, ate' chopë' gubáz lá'ayi na' tē' lé'gacanu, ta'nné':

—¿Bizx que rugu'íajli' nu zoa nabán xilataj nu nati? ⁶ Biti' zoë' ni, tu' chibubanë'. Guli'tsójné lë na' chigudxi cazë' libí'ili' cate' ni' zoë' luyú Galilea. ⁷ Gunné': "Run bayudxi nu udödi neda', Bönni' Guljë' Bönachi, lu ná'agaquië' bönni' dul-la', ate' ulu'dé'ë neda' lë'e yaga cruz, ate' ubana' cate' gaca tsonna dza."

⁸ Ní'irö yöjnégacanu didza' na' bë'ë Jesús, ⁹ ate' bulu'zá'anu ra' yeru ba na', yöjtíxjoi'iguequinu idxinéajtë' bönni' gubáz queë' Cristo, en ia'zica'rë' ca', ca naca lë na' guca. ¹⁰ Nigula na' yöjtíxjoi'iguequinu bönni' gubáz na' yugu' lë ni, nácagacanu María Magdalena, en Juana, en María, xiné'ë Jacobo, en ia'bál-lanu nigula na' dzágagacanu lé'gacanu. ¹¹ Guléquinë' bönni' gubáz na' tu'ínu didza' chixi, en bití' gula'yéajlë' lé'gacanu.

¹² Ní'irö guyasë' Pedro, en carelö sa'yéajë' ra' yeru ba na'. Cate' buyúë' lu ba na', bilé'enë' yugu' lári'sö nacuá' ni', ate' ní'irö bóajë' lidxë', rubáninë' ca naca lë na' guca.

Le guca la' nöza ridxintë Emaús

(Mr. 16:12-13)

¹³ La' dza ná'asö söjáquië' chopë', yú'ugaquië' nöza le ridxintë Emaús, le rö'ö ca chopa hora rizá'aru' Jerusalén. ¹⁴ Yú'ugacasë' ca' nöza, tu'ë didza' ca naca yúgu'të lë na' guca. ¹⁵ Tsanni ni' yú'ugaquië' nöza, tu'ë didza' la' lé'gacasë', gubígui'ë gala' Lë cazë' Jesús, ate' gudálenë' lé'gaquië' tsözxón. ¹⁶ Biti' bulu'únbë'ë Lë' tu' naca ca tu le nabaga' guió'j lógaquië'. ¹⁷ Ní'irö Jesús gunábinë' lé'gaquië', rnné':

—¿Bizxi didza' na' ru'í'ili' la' libí'isili' yú'uli' nöza? ¿Bizx que na' ruhu'ínili'?

¹⁸ Bubi'ë didza' bönni' na' lë' Cleofas, rë' Lë':

—¿Nácatso' bönni' zitu' lu yödzo Jerusalén, en tuzu' li' bití' nózinu' lë na' guca néaje nasi ni'?

¹⁹ Ní'irö Jesús rë' lé'gaquië':

—¿Bizxi na' guca?

Të' Lë':

—Lë na' guca queë' Jesús, bönni' Nazaret. Gúquië' bönni' bë'ë didza' uláz queë' Dios, ate' len yöl-la' huáca zxön benë' dxin, en bë'ë didza' lahuë' Dios, en lógaca yúgu'të bönachi. ²⁰ Yugu' bixúz unná bë', len bönni' ta'nná bé'enë' netu' bulu'dödë' Lë', en gulunë' ga nu guchugu queë' gátie', ate' bulu'dé'ë Lë' lë'e yaga cruz. ²¹ Netu' bentu' löza gúquië' Lë' bönni' na' ral-la' huóá'uë' bönachi Israel, pero na'a chiguca tsonna dza cate' gulaca lë ni. ²² Ia'stú, bál-lanu nigula nútsa'gacanu netu' gulunnu ga guró'ötu' böniga. Yójácanu ra' yeru ba queë' cate' si' gulén gubidza na'a dza, ²³ en cate' biti' bulu'dzólinu Lë', buduhuójgacanu, en gulënu netu' bila'lé'enu yugu' gubáz lá'ayi queë' Dios, nupa ni' gulé légacanu zoë' nabanë' Jesús. ²⁴ Ní'irö bal-lë' bönni' luzá'atu' yójáquië' ra' yeru ba na', en bila'lé'enë' naca ca na' gula'nnanu nigula na', pero biti' bila'lé'enë' Jesús.

²⁵ Ní'irö Jesús gudxë' légaquië':

—Libi'ili', bönni' biti' réajni'ininë'. Nazidi icja ládxi'do'oli' para cabí tséajlë'ëli' yúgu'të le gula'nnë' bönni' gulu'ë didza' uláz queë' Dios. ²⁶ ¿Naru' cabí ben bayudxi qui'i sáquë'ë Cristo yugu' lë ni, en tsázië' ga ni' tsépisëtëre'?

²⁷ Ní'irö gusí lahuë' Jesús riguixjöi'inë' légaquië' yúgu'të le ru'í didza' ca naca queë' le nazúajgaca lu guichi lá'ayi, ca na' gusí lo bë'ë didza' Moisés ga bidxintë yugu' le gula'nnë' yúgu'të bönni' gulu'ë didza' uláz queë' Dios.

²⁸ Cate' bila'dxinë' yódzödo' ga na' söjáquië', benë' Jesús ca tu bönni' zéajtëre' zi'tu'. ²⁹ Gulunë' bayudxi ugá'analenë' légaquië', ta'nnë':

—Bugá'analen netu', tu' chiridzó' na'a, en chizóa gal-la.

Ní'irö guyázië' Jesús yu'u, en bugá'analenë' légaquië'. ³⁰ Cate' ni' Jesús rö'ë rágulenë' légaquië', gudélé'ë yöta xtila, en gudxë' Dios: "Xclenu'." Ní'irö buzuxzjë' le, en bë'ë quégaquië'. ³¹ La' ní'isö bidúa lë na' gubaga' guiój lógaquië', ate' bulu'únbë'ë Jesús, ate' Lë' buniti cuinë' lógaquië'. ³² Ní'irö gulé luzé'ë tuë' ia'túë':

—¿Naru' cabí böála'tica' ládxi'do'oru' tsanni ni' ru'ílenë' rë'u didza' la' nöza, en cate' ni' ruchila lá'anië' le nazúaj lu guichi lá'ayi?

³³ La' ní'isö gula'zuinë' yöjhuójgaquië' Jerusalén, ate' yöjxáca'gaquië' nudúbigaquië' idxinéajtë' bönni' gubáz queë' Jesús, en nupa nacua'len légaquië'. ³⁴ Ní'irö yugu' bönni' na' nacu'ë ni' gulé' chopë' na':

—Chibubán cazë' Xanru', en buluí'i lahuë', ate' bilé'enë' Simón Lë'.

³⁵ Ní'irö chopë' na' gula'guixjö'ë ca na' guca quégaquië' la' nöza, en ca na' bulu'únbë'ë Jesús cate' ni' buzuxzjë' yöta xtila na'.

*Bönni' usëda queë' Jesús tu'lé'enë' Lë'
(Mt. 28:16-20; Mr. 16:14-18; Jn. 20:19-23)*

³⁶ Tsanni ni' tu'ë didza' ca nácagaca lë ni, la' yöjsóatë' Jesús gatsaj láchui'lö ga na' nacu'ë, ate' rë' légaquië':

—Gulí'sóa dxi ládxi'li'.

³⁷ Ní'irö guladxi gula'dzóbinë' tu' téquinë' bixín ta'lé'enë'. ³⁸ Jesús rë' légaquië':

—¿Bizx que ró'öli' böniga? ¿Bizx que rizá' ládxi'li' yugu' lë ni? ³⁹ Buli'yútsöca' na'a, en ni'a. Neda' caz ni. Gulí'cán neda', en buli'yú neda', tu' cabí da' bixín bëla', en biti' yu'u dxita ca ni rilé'eli' naca quia' neda'.

⁴⁰ Ni' ru'í'së' ca' didza' ni, buluí'inë' légaquië' në'ë, en ni'ë. ⁴¹ Tu' tu'dzéjaguequinë' biti' gula'yéajlë'ë, en gula'bö'ë baniga. Que lë ni na' Jesús gudxë' légaquië':

—¿Dë queé'li' ni le gahua'?

⁴² Ní'irö bulu'nödzjë' queë' láti'do'oba' böla chinégui'ba', en tu quízxi'ba' buz.

⁴³ Guzxi'ë Jesús le, en gudahuë' lógaquië'. ⁴⁴ Ní'irö rë' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ni' zóalena' libí'ili', gunnía': Run bayudxi gaca yúgu'të le nazúaj lu guichi lu xibá queë' Moisés, en le gula'nnë'

bönni' gulu'ë didza' uláz queë' Dios, en le nazúaj lu guichi nazi'i le Yugu' Salmo, ca ral-la' gaca quia' neda'.

⁴⁵ Ní'irö buzéajni'iné' légaquië' lë na' nazúajgaca lu guichi lá'ayi. ⁴⁶ Rë' légaquië':

—Caní nazúaj lu guichi ca run bayudxi gaca queë' Cristo, qui'i sáquë'ë, en ubané' lu yöl-la' guti cate' gaca tsonna dza, ⁴⁷ ate' idútë yödölió ral-la' gaca libán ca naca quia' neda' para ulu'bí'i ládxi'gaca bönachi para uniti lahuë' Dios dul-la' nabága'gaquië'. Lu yödö Jerusalén isí lo gaca libán na' ⁴⁸ ate' libí'i cázali' na' bilé'eli' yugu' lë ni ral-la' gunli' ba nalí que. ⁴⁹ Buli'yútsöca', isól-la'a queéli' le guzxi' lu në'ë Xuza' gunné' queéli', pero buli'gá'anasö Jerusalén cate' idxinrö queéli' yöl-la' huáca na' za' yehua' yubá.

Ruhuëpë' Jesús yehua' yubá

(Mr. 16:19-20)

⁵⁰ Ní'irö Jesús guché'ë yugu' bönni' dá'gaquië' Lë', söjáquië' yödö Betania, ate' ni' guchisa në'ë, en bulidza tsáhuë'ë légaquië'. ⁵¹ Tsanni ni' rulidza tsáhui'së' ca' légaquië', buzá'atë' ga na' nacu'ë, buëpë' yehua' yubá. ⁵² Gudödi gula'yéaj ládxi'gaquië' Lë', lu yöl-la' rudzeja quégaquië' yöjhuó'jgaquië' Jerusalén. ⁵³ Gula'cuá'tica'së' chila yudo', ta'gu'ë Dios yöl-la' ba, en tun zxönë' Lë'. ¡Ca' naca!

DIDZA' DXI'A BUZÚAJĚ' JUAN

Bönni' na' nazí'i lě' Didza' gúlajě' bönachi

¹ Cate' gusí lo, zí'atělö cate' si' gata' yödžölió, ni' zoa cazě' Bönni' lě' Didza', ate' Bönni' na' náquiě' Didza' zóaleně' Dios, ate' Didza' na' naca caz Dios. ² Bönni' na' náquiě' Didza' zóaleně' Dios cate' ni' gusí lo si' rata' yödžölió. ³ Lu ně'ě Bönni' ni, Dios beně' yúgu'tě le dě, en biti' bi dě le nuně' Dios le cabí beně' lu ně'ě Bönni' na'. ⁴ Dě caz queě' yöl-la' na' bán, ate' yöl-la' na' bán na' naca ca tu bení' le ruzení' lu icja ládxi' do'gaca bönachi. ⁵ Ruzení' bení' na' ga naca chul-la que dul-la', pero biti' ca' sequi' le chul-la na' usulu bení' na'.

⁶ Dios gusól-lě'ě ni tu bönni' lě' Juan. ⁷ Bidě' bönni' ni para gáquiě' nu gun ba nalí. Bidě' para guně' ba nalí queě' Bönni' na' náquiě' bení', para tséjlě' gaca yúgu'tě bönachi Dios ni'a que lě na' runě' ba nalí. ⁸ Biti' náquiě' Juan bení' na', pero bidě' para guně' ba nalí queě' Bönni' na' náquiě' bení'. ⁹ Bönni' na' náquiě' bení' le naca idú ni' raziě' yödžölió ni, ate' ruzení'ě lu icja ládxi' do'gaca yúgu'tě bönachi.

¹⁰ Bönni' na' náquiě' bení' bidxině' yödžölió ni, ate' lu ně'ě Lě' Dios beně' yödžölió ni, pero bönachi yödžölió biti' bulu'únbě'ě Lě'. ¹¹ Bidxině' ga nequi queě', pero biti' ca' gula'zí' lu ná'agaquiě' Lě' bönni' nabábaleně'. ¹² Yúgu'tě bönni' gula'zí' lu ná'agaquiě' Lě', bönni' ni' gula'yéajlě'ě Jesús, Lě' beně' ga dě lu ná'agaquiě' ilácagaquiě' xzí'ině' Dios. ¹³ Bönni' ni ná'agaquiě' xzí'ině' Dios, calěga tu' ná'agaquiě' xzí'ině' nu bönni', en calěga tu' nálajgaquiě' ni'a que le rizě' ládxe'ě nu bönni', o ni'a que tu le ré'ěně' nu bönni', pero ná'agaquiě' caní tu' naca le ré'ěni quézine' Dios.

¹⁴ Bönni' na' náquiě' Didza' guljě' bönachi, en tu chí'isö guzóaleně' rě'u, idú dzágagaca Lě' le ruzá' ládxe'ě Dios queéru', en le naca idútě li. Bilé'etu' yöl-la' zxön queě', ate' yöl-la' zxön queě' na' naca le ruí'i queébi' bi'i la's dui que, Nu na' naca Xúzibi'. ¹⁵ Juan na' beně' ba nalí queě' Bönni' na', en bě'ě zidzaj didza', rnně':

—Bönni' ni náquiě' Nu na' gudíxjö'a que, gunní'a: Bönni' si' zá'tělě' ca neda' nayépisětěřě' ca neda', tu' zoa cazě' Lě' zí'alö ca neda'.

¹⁶ Le naca idú queě' buzí'iru' xibé yúgu'těru', lě na' buzá' ládxe'ě queéru' Dios, en zíanrö ca' le ruzá' ládxe'ě queéru'. ¹⁷ Bidxín queéru' xibá queě' Dios lu ně'ě Moisés, pero le ruzá' ládxe'ě queéru' Dios, en le naca idútě li bila'dxín queéru' lu ně'ě Jesucristo. ¹⁸ Catu caz nu bilé'e Dios, pero Lě', la's dui Xzí'ině' Dios, Bönni' na' nadxí'ide'eně' Dios Xuz, Bönni' ni na' beně' ga núnbě'ěru'-ně' Dios.

Le beně' ba nalí Juan, bönni' buquile' bönachi nisa, ca náquiě' Jesús

(Mt. 3:1-12; Mr. 1:7-8; Lc. 3:1-17)

¹⁹ Lě ni naca le beně' ba nalí Juan, cate' ni' bönni' judío unná bě' nacu'ě Jerusalén gula'sól-lě'ě yugu' bixúz, en bönni' nabábagaquiě' Leví, nupa ni ná'agaca ni'a ná'agaquiě' bixúz, para ila'nábině' Juan na', ila'nně':

—¿Nuzxi bönni' li'?

²⁰ Yálajdo' bě'ě didza' Juan, en biti' gudá'baguiě', pero gudíxjö'ě catěz naca, rnně':

—Biti' naca' Cristo, Bönni' na' guxzí' lu ně'ě Dios isól-lě'ě queéru'.

²¹ Ní'irö gula'nábině' lě' leyúbölö, tě' lě':

—¿Nuzxi caz li'? ¿Naru' nacu' li' Elías, bönni' bě'ě didza' uláz queě' Dios dza ni'tě?

Gunně' Juan:

—Biti' naca'.

Ní'irö tě' lě':

—¿Naru' nacu' li' bönni' na' ral-la' guídě' gu'ě didza' uláz queě' Dios?

Bubi'ě didza' Juan, rnně':

—Calěga neda'.

²² Ní'irö tē' lē':

—¿Nuzxi caz nacu'? Gudíxjöi'i netu' para gaca usiyöntu' nupa gula'sól-la' netu'. ¿Bizxi rno' li' nuzxi nacu'?

²³ Bubi'ë didza' Juan, rē' légaquiē':

—Neda' naca' bönni' na', nazúaj lu guichi lá'ayi ca naca queē', rna: Riyón chi'i nu rulidza lu lataj cá'asö, rna: Buli'béaj li nöza para idxín Xanru' queéli'. Caní gunné' Isaías, bönni' na' bē'ë didza' uláz queē' Dios.

²⁴ Yugu' bönni' ni nácagaquiē' bönni' yudo' fariseo nasól-la'gaquiē' bönni' judío unná bē'. ²⁵ Gula'nábinē' Juan, tē' lē':

—¿Bizx que ruquilu' bönachi nisa channö cabí nacu' li' Cristo, en biti' nacu' Elías, en caléga bönni' na' ral-la' guidé' gu'ë didza' uláz queē' Dios?

²⁶ Bubi'ë didza' Juan na', rē' légaquiē':

—Neda' ruquila' bönachi nisa lu nisa, pero gatsaj láhui'lö ga zóali' zoē' tu bönni' biti' núnbē'ëli'-nē'. ²⁷ Bönni' ni náquiē' Bönni' na' si' zá'telē' ca neda', en nayépisētēre' ca neda', ate' biti' naca' neda' lesaca' uleca' xiráchuē' nudé'ë.

²⁸ Yúgu'tē lē' ni guca lu xiyú yödzö Betábara, ga naca ia'tsölá'a yegu Jordán, zaca' ga rilén gubidza, ga ni' buquilé' Juan bönachi nisa.

Jesús náquiē' ca bö'cu' zxíla'do' tutiē'-ba' lahuē' Dios tu' nözi dul-la'

²⁹ Dza buropi ni' Juan bilé'enē' Jesús, zē'ë ga zoē', ate' rnnē':

—Buli'yútsöca'. Bönni' ni náquiē' bö'cu' zxíla'do' queē' Dios, gátiē' para ugúē' dul-la' nabága'gaca bönachi yödzölió. ³⁰ Lē' náquiē' bönni' na' gunnía' queē': "Si' zá'telē' ca neda' tu bönni', nayépisētēre' ca neda', tu' zoa cazē' zí'alö ca neda'." ³¹ Neda' biti' bénbē'a-nē' zí'alö, pero bida', ruquila' bönachi nisa para ilúnbē'e bönachi Israel Lē'.

³² Benē' ba nalí Juan ca naca queē' Jesús, rnnē':

—Bilé'eda'-nē' Dios Bö' Lá'ayi, bötjē' birúajē' yehua' yubá, guné'ë ca riná'aba' gu'dödo', ate' bidxinē' ga zoē' Jesús, en bugá'analenē' Lē'. ³³ Biti' bénbē'eda' Lē' zí'alö. Gudxi neda' Nu na' gusól-la' neda' para uquila' bönachi nisa, gunné': "Cate' ilé'enu'-nē' huötjē' Dios Bö' Lá'ayi, tsöjsóalenē' Bönni' na', en ugá'analenē' Lē', Bönni' ni guné' le rulu'isö yöl-la' ridila nisa ni, uchíziē' bönachi Dios Bö' Lá'ayi." ³⁴ Na'a, chibilé'eda' lē' na', en runa' ba nalí queē' Bönni' ni, náquiē' Zxí'inē' Dios.

Yugu' bönni' usēda zí'alö queē' Jesús

³⁵ Ia'tú dza ca', leyúbölö zoē' Juan ni', ate' nacua'lenē' lē' chopē' bönni' dá'gaquiē' lē'. ³⁶ Cate' Juan na' bilé'enē' Jesús, ridödē' ni', ní'irö gudxē' bönni' na' dá'gaquiē' lē', rnnē':

—Buli'yútsöca'. Ni' zoē' bönni' na' náquiē' bö'cu' zxíla'do' queē' Dios, gatiē' uláz quegaca bönachi dul-la'.

³⁷ Chopē' bönni' na' dá'gaquiē' Juan bila'yönnē' didza' ni bē'ë lē', ate' yöjnéhoquiē' Jesús. ³⁸ Ní'irö buécjē' Jesús, en buyúē' chopē' ni söjnéhoquiē' Lē', ate' rē' légaquiē':

—¿Bizxi riguíljali'?

Tē' Lē':

—Bönni' Usedi, ¿gazxi zu'?

³⁹ Bubi'ë didza' Jesús, rē' légaquiē':

—Gulí'dá, uyulí'.

Ní'irö yöjácalenē' Lē', en bila'lé'enē' ga na' zoē', ate' bulu'gá'analenē' Lē' dza na', tu' chizá' ral-la.

⁴⁰ Andrés, bóché'ë Simón Pedro, náquiē' tuē' bönni' chopē' ni' bila'yönnē' didza' bē'ë Juan, en yöjnéhoquiē' Jesús. ⁴¹ Andrés na', zí'alö yöjdiljē' bönni' bóché'ë, lē' Simón, ate' rē' lē':

—Chibidzólitu'-nē' Mesías.

Mesías naca tu didza' hebreo le rna lu didza' griego: Cristo, ate' lu didza' xidza': Bönni' nasól-lē'ë Dios.

⁴² Ní'irö Andrés na' la' guchë'të' Simón ga na' zoë' Jesús. Cate' Jesús bilé'enë' lë', rë' lë':
—Li' nacu' Simón, xí'inë' Jonás. Na'a, si' lo' Cefas.

Cefas naca ca' tu didza' hebreo le rnna: Pedro, lu didza' xtila, ate' lu didza' xidza': Guió'j.

Jesús rulidzë' Felipe, en Natanael

⁴³ Cate' za' rení' ia'tú dza, gú'unnë' Jesús tsejë' luyú Galilea, ate' yöjxáquië' Felipe, en rë' lë':

—Gudá' neda'.

⁴⁴ Náquië' Felipe bönni' yödzö Betsaida, le naca ládzagaquië' Andrés, en Pedro.

⁴⁵ Felipe budzólinë' Natanael, en rë' lë':

—Chibidzólitu'-në' bönni' na' buzúajë' Moisés ca naca queë' lu guichi lu xibá queë' Dios, ate' bulu'zúajë' ca' ca naca queë' bönni' gulu'ë didza' uláz queë' Dios. Bönni' ni Jesús, xí'inë' José, bönni' yödzö Nazaret.

⁴⁶ Natanael rë' lë':

—¿Naru' huala'tsö Nazaret tu le naca dxi'a?

Felipe rë' lë':

—Gudá uyú'.

⁴⁷ Cate' bilé'enë' Jesús zë'ë Natanael na' ga zoë', rnnë':

—Buli'yú ni tu bönni' náquië' idú bönni' Israel, en biti' rnnasë' ca' bönni' ni.

⁴⁸ Ní'irö Natanael gunábinë' Jesús, rë' Lë':

—¿Naru' núnbë'tso' neda'?

Bubi'ë didza' Jesús, rë' lë':

—Cate' si' ulídzatërë' Felipe li', cate' ni' zu' znan yaga higo, bilé'eda' li'.

⁴⁹ Ní'irö bubí'ë didza' Natanael, rë' Lë':

—Bönni' Usedi, Li' nacu' Xí'inë' Dios. Li' nacu' Nu inná be'e bönachi Israel.

⁵⁰ Bubi'ë didza' Jesús, rë' lë':

—¿Réajlë'tso' tu' gudxa' li': Bilé'eda' li' znan yaga higo? Yugu' le zxóntërö ca lë ni hualé'enu'.

⁵¹ Lësca' caní rë' Jesús légaquië', rnnë':

—Le nácatë rea' libí'ili', ilé'eli' nayalaj lúzxiba, en ta'benë', en tu'huójtjë' gubáz lá'ayi queë' Dios ga zoa' neda', Bönni' Guljë' Bönachi.

2

Laní que yöl-la' rutsaga na' le guca lu yödzö Caná

¹ Cate' chiguca tsonna dza, guca laní que yöl-la' rutsaga na' lu yödzö Caná luyú Galilea, ate' zóanu xiné'ë Jesús ni'. ² Lësca' zoa nu bulidza Jesús, en yugu' bönni' usëda queë' dijáquië' laní na'. ³ Cate' biyadzaj xisi uva ilé'ajë', ní'irö xiné'ë Jesús gúdxinu Lë', rnnanu:

—Biti'rö dë xisi uva ilé'ajë'.

⁴ Bubi'ë didza' Jesús, rë'ë-nu:

—Nigúlado'. ¿Bixx que rulidzu' neda'? Biti' ca' ridxini dza ulu'a lahui yöl-la' huáca quia'.

⁵ Ní'irö xiné'ë Jesús gúdxinu bönni' huen dxin ta'gu'ë le tahuë', rnnanu:

—Guli'gún yúgu'të le guíë' libí'ili'.

⁶ Nacuá' ni' xopa yusu' guió'j tu'gunë' dxin bönni' judío cate' tu'pá'a cuíngaquië' ca nalébiguequinë' tunë', en rúdzugaca chopá tsonna rö'ö nisa tu tu yusu' na'. ⁷ Jesús gudxë' yugu' bönni' huen dxin na', rnnë':

—Buli'lí yugu' yusu' ni nisa.

Bulu'lié' yugu' yusu' na' nisa. ⁸ Ní'irö Jesús rë' légaquië':

—Guli'gachi' na'a, en guli'tsöjuá' lahuë' bönni' zoë' ra' yusu'.

Yöjuá'gaquië' na'. ⁹ Buyüë' bönni' na' zoë' ra' yusu' channö nazxí'i nisa na' nuhuóaca xisi uva, pero biti' réquibe'enë' gazxi za'. Nóziguequinë' bönni' huen dxin na' guláchë'ë nisa na'. Ní'irö bönni' na' zoë' ra' yusu' bulidzë' bönni' rutsaga në'ë, ¹⁰ en rë' lë':

—Zí'alö tu'nödzejë' yúgu'të bönni' xisi uva nácarö sizxí'i, en cate' chigulé'ajë' yenni', ní'irö tu'nödzejë' le cabí nazxí'i. Lí', ga bidxintë na'a ben chí'u xisi uva nácarö sizxí'i.

¹¹ Yöl-la' huáca naca bë' ni benë' Jesús lu yödzö Caná luyú Galilea naca le risí lo yugu' yöl-la' huáca gunë'. Caní guca, bulu'e lahui yöl-la' zxön queë', ate' gula'yéajlé'ë Lë' bönni' usëda queë'.

¹² Gudödi na' guyijë' Jesús yödzö Capernaum, ate' dzágagaquië' xiné'ë, en yugu' bönni' bóchë'ë, en yugu' bönni' usëda queë' Lë', ate' zían dza gula'cu'ë Capernaum na'.

Rulatjë' Jesús lö'a yudo', rubéajë' nupa tun le cabí ral-la' ilún ni'

(Mt. 21:12-13; Mr. 11:15-18; Lc. 19:45-46)

¹³ Cate' chizóa idxín Laní Pascua cate' tu'subanë' bönni' judío ca benë' Dios, ca na' bubéajë' xuz xtó'ogaquië' luyú Egipto, guyijë' Jesús yödzö Jerusalén. ¹⁴ Lu yödzö na' yöjxáquië' Jesús nacu'ë bönni' lö'a yudo' ga na' túti'ë-ba' yugu' bëdxi, en yugu' bö'cu' zxila', en yugu' gu'dödo', böa' bëdxi na' tútigaquië'-ba' lahuë' Dios. Ró'ögaquië' ca' ní' bönni' tu'tsé'ë dumí za' idütë yödzölió. ¹⁵ Cate' bilé'enë' Jesús lë ni, buzalë' yugu' du lasi le quindë' bönachi na', ate' bulágui'ë yúgu'të ní'ilö lö'a yudo', en bulágui'ë-ba' ca' ní'ilö yugu' bö'cu' zxila', en yugu' bëdxi. Bësië' dumí quégaquië' bönni' na' tu'tsé'ë dumí lu yu, en burixë' yugu' blaga quégaquië'. ¹⁶ Ní'irö Jesús gudxë' bönni' na' túti'ë-ba' yugu' gu'dödo', rnnë':

—Gulí'cúa yugu' lë ni. Biti' únili' lidxë' Xuza' tu yé'ëyi.

¹⁷ Ní'irö yöjnéguequinë' bönni' usëda queë' Jesús le nazúaj lu guichi lá'ayi, rna: Tu ruí'ida' ládxa'a lidxu', régui rilá ládxi'da'ahua'.

¹⁸ Ní'irö bulu'bi'ë didza' bönni' judío unná bë' nacu'ë ní', të' Jesús:

—¿Bizxi yöl-la' huáca uluí'inu' netu' le gaca bë' dë lu no'o runu' yugu' lë ni?

¹⁹ Bubi'ë didza' Jesús, rë' légaquië':

—Gulí'quinnaj yudo' ni, ate' tsonna dzasö uchisa' le.

²⁰ Ní'irö të' Lë' bönni' judío, ta'nnë':

—Idú xopa-un iz guyá' yudo' ni, ate' Lí', ¿tsonna dzasö uchísatso' le?

²¹ Yudo' na' bë'ë didza' que Jesús naca la' cuin cazë'. ²² Que lë ni na', cate' bubanë' Jesús lu yöl-la' guti, yöjnéguequinë' bönni' usëda queë' Jesús ca na' gunné', ate' gula'yéajlé'ë le nazúaj lu guichi lá'ayi, enca' yugu' didza' bë'ë Jesús.

Jesús núnbë'ë yúgu'të bönachi

²³ Cate' ní' zoë' Jesús Jerusalén, cate' raca Laní Pascua na', gula'yéajlé' bönachi zían Lë', tu' bila'lé'enë' yugu' yöl-la' huáca runë'. ²⁴ Biti' buzöni ládxi'ë Jesús légaquië', tu' nunbë' cazë' yúgu'të bönachi. ²⁵ Biti' naquínnë' Jesús nu quíxjöi'i Lë' ca nácagaca bönachi, tu' nöz quézinë' Lë' le yu'u icja ládxi'do'gaca bönachi.

3

Jesús, en Nicodemo

¹ Nicodemo, tu bönni' yudo' fariseo, nabábalenë' yugu' bönni' judío unná bë'. ² Bidë' bönni' ni ga zoë' Jesús chí'i dzó'ölö, en rë' Lë':

—Bönni' Usedi. Réquibe'etu' nasól-lë'ë Dios Lí' para usédinu' netu'. Biti' séqui'në' tu bönni' gunë' yugu' yöl-la' huáca nácagaca bë' ca nácagaca le caní runu' Lí' channö cabí zóalenë' Dios lë'.

³ Bubi'ë didza' Jesús, rë' lë':

—Le nácate' rea' lí', nu cabí galaj leyúbölö, bití' ca' ilé'e lataj ga ní' rinná bë'ë Dios.

⁴ Nicodemo gunábinë' Lë', rnnë':

—¿Nacxi caz séqui'në' tu bönni' galjë' leyúbölö cate' chináquië' bönni' gula? ¿Naru' huácatsö tsu'ë leyúbölö lé'ënu xiné'ë, ate' galjë' ia'tú?

⁵ Bubi'ë didza' Jesús, rë' lë':

—Le nácatë rea' li'. Nu bönni' cabí galjé' ni'a que nisa, en ni'a queë' Dios Bö' Lá'ayi, biti' gaca tsázië' ga rinná bé'ë Dios. ⁶ Nu na' nalaj lu ni'a lu na' bönachi, bönáchisö naca, pero nu nalaj ni'a queë' Dios Bö' Lá'ayi, Bö' Lá'ayi nabani nu na'. ⁷ Biti' ubáninu' tu' rea' li', run bayudxi galju' leyúbölö. ⁸ Gátí'tës recja bö', ate' riyönnu' rnnë bö' na', pero biti' nózinu' gazxi za', o gazxi zeaj. Lësca' caní raca quégaca nupa náljagaca ni'a queë' Dios Bö' Lá'ayi.

⁹ Ní'irö Nicodemo gunábinë' Jesús, rnnë':

—¿Nacxi caz gaca lë ni?

¹⁰ Bubi'ë didza' Jesús, rë' lë':

—¿Ruséditsenu' li' bönachi Israel, en biti' nózinu' yugu' lë ni? ¹¹ Le nácatë rea' li', le nöztu' ru'ítu' didza' que, en le bilé'etu' runtu' ba nalí que, pero biti' rizi' lu ná'ali' lë na' runtu' ba nalí. ¹² Channö cabí réajlë'ëli' neda' cate' ru'ílena' libí'ili' didza' ca naca le raca yödzölió ni, ¿nacxi caz gaca tséajlë'ëli' channö guá' libí'ili' le raca yehua' yubá?

¹³ 'Catu caz gurenë' nu bönni' yehua' yubá, pero tuza' neda', Bönni' Guljé' Bönachi, bötja' birúaja' yehua' yubá, ate' zoa caza' ni' yehua' yubá. ¹⁴ Ca na' benë' Moisés lu lataj cá'asö, buchisë'-ba' bëla néquiniba' guié, budé'ë-ba' lë'e yaga, lësca' caní run bayudxi gaca quia' neda', Bönni' Guljé' Bönachi, ulu'chisë' neda' xitsá'. ¹⁵ Caní gaca quia', para cabí ila'niti yúgu'të nupa ila'yéajlë' neda', pero gata' quéguequi yöl-la' na'bán idú.

Dios nadxí'ide'enë' bönachi yödzölió

¹⁶ Tu' bidxí'ide'enë' Dios bönachi yödzölió, buzá' ládxë'ë quéguequi Zxí'inë' la' buduínë', para cabí ila'niti yúgu'të nupa ila'yéajlë' Lë', pero gata' yöl-la' na'bán idú quéguequi. ¹⁷ Dios gusól-lë'ë Zxí'inë' yödzölió ni, calëga para ichúguië' quégaca bönachi yödzölió ni gátigaca, pero para ulu'lágaca bönachi yödzölió ni ni'a queë' Lë'.

¹⁸ Nu bönni' réajlë'ë Zxí'inë' Dios, biti' ca' narugu queë' inítië', pero bönni' na' biti' réajlë'ë Lë', chinarugu queë' gátie', tu' cabí réajlë'ë Zxí'inë' Dios la' buduínë'. ¹⁹ Que lë ni na' chinarugu quégaca bönachi gátigaca, tu' bidxinë' Bönni' na' náquië' bení' yödzölió ni, pero gulunrö zxön bönachi ni le naca chul-la' que dul-la' ca gulunë' zxön Bönni' na' náquië' bení', tu' nacagaca xihui' le tunë'. ²⁰ Yúgu'të bönni' tu'ë dö' biti' raza ládxí'gaquië' bení', en biti' rídigaquië' lu bení', para cabí ilá' lahui le tunë'. ²¹ Nu run le naca idútë li ridxín lu bení' para gaca bë' núngaca ni'a queë' Dios le run nu na'.

Juan, bönni' ruquilë' bönachi nisa, ru'ë didza' ca naca queë' Jesús

²² Gudödi na', Jesús guyéajlenë' bönni' dá'gaquië' Lë', ate' bila'dxinë' luyú Judea, en gúzöalenë' légaquië' ni', ga na' tu'quilë' bönachi nisa. ²³ Lësca' ruquilë' Juan bönachi nisa ga nazí'i le Enón, gala' ga dë yödzö Salim, tu' dë nisa zila lataj na', ate' ta'dxín bönachi ni', en ta'dila nisa. ²⁴ Raca caní zí'atëlö cate' biti' idzunë' Juan na' lidxi guié.

²⁵ Ní'irö gula'sí lógaquië' bal-lë' bönni' dá'gaquië' Juan ta'díl-lalenë' yugu' bönni' judío didza' ca naca que yöl-la' ruchi'a cuini que yudo'. ²⁶ Bila'dxinë' ga zoë' Juan, en të' lë':

—Bönni' usedi. Buyútsöca'. Bönni' na' gúzöalenë' li' ia'tsölá'a yegu Jordán, bönni' na' benu' ba nalí queë', ruquilë' bönachi nisa, ate' ta'dxín yúgu'të bönachi ga zoë'.

²⁷ Ní'irö bubí'ë didza' Juan, rë' légaquië':

—Biti' bi dë lu në'ë nu bönni', channö cabí nudödë' Dios le lu në'ë. ²⁸ Biyón quézili' lë na' bena' ba nalí, gunnía': “Biti' naca' neda' Cristo”, pero Dios nasól-lë'ë neda' para guá' bönachi si' zë'ë Lë'. ²⁹ Bönni' na' rizi'ë-bi' bi'i nigula rutsaga ná'abi' náquië' bönni' rutsaga në'ë, pero böchi' luzé'ë bönni' rutsaga në'ë, en dzáguië' lë', ruzé' náguië' didza' ru'ë, en rudzéjanë' tu' riyönnë' didza' ru'ë bönni' rutsaga në'ë. Lësca' caní, rudzéjade'eda' neda' tu' raca lë ni caní. ³⁰ Run bayudxi gácarë' zxön Cristo, pero neda', run bayudxi gácará' cuídí'sö.

Nu za' zaca' yehua' yubálo

³¹ Gunné' ca' Juan:

—Bönni' na' zë'ë zaca' xitsá'alö nayépisëtëre' ca yúgu'të bönachi. Nu bönni' náquië' bönachi yödzülió ni, que yödzülió ni náquië', en ru'ë didza' que le raca yödzülió ni, pero Bönni' na' zë'ë zaca' yehua' yubáló nácatëre' lo ca yúgu'të bönachi. ³² Bönni' na' runë' ba nalí que le bilé'enë', en le biyönnë', pero cuntú nu rizí' lu në'e le runë' ba nalí. ³³ Núti'tës bönni' rizí' lu në'ë lë na' runë' ba nalí, bönni' ni rulu'ë lahui réajlë'ë naca idútë li didza' ru'ë Dios. ³⁴ Bönni' na' nasól-lë'ë Dios, didza' queë' Dios ru'ë, tu' nuzóadëre' Dios Bö Lá'ayi queë' lu Bönni' na'. ³⁵ Dios Xuz nadxí'inë' Zxí'inë', ate' yúgu'të le dë chinudödë' lu në'ë Zxí'inë' na'. ³⁶ Nu bönni' réajlë'ë Dios Zxí'ini, dë yöl-la' na'bán idú queë', pero bönni' na' bití' réajlë'ë Dios Zxí'ini, bití' idéli'në' yöl-la' na'bán na', pero nabáguë'ë xíguia' lahuë' Dios.

4

Jesús ruí'ilenë'-nu didza' tu nigula Samaria

¹ Bila'yönnë' bönni' yudo' fariseo ca na' dá'gaca Jesús zíanrö bönachi ca dá'gaca Juan, ate' ruquilë' ca' nisa zíanrö bönachi ca ruquilë' nisa Juan. ² Calëga Jesús caz ruquilë' bönachi nisa, pero bönni' usëda queë' tu'quilë' bönachi nisa. ³ Cate' gúquibe'enë' Jesús lë ni, buzë'ë luyú Judea, ate' sa'yéajë' leyúbölö luyú Galilea.

⁴ Ga ni' sa'yéajë', run bayudxi tödë' luyú Samaria. ⁵ Caní guca, bidxinë' Jesús tu yödzüdö' luyú Samaria, nazí'i le Sicar, gala' ga dë yu na' bunödzejë' Jacob queë'bi' José, zxi'inë' Jacob na', dza ni'te. ⁶ Lataj na' zoa tu yeru nisa nachó'onë' Jacobo na' ga rë'. Cate' bidxinë' Jesús ni', gurö'ë ra' yeru nisa na' tu' yöjxëqui'në' yu'ë nöza. Guca idú huagubidza. ⁷ Ní'irö bidxinu tu nigula Samaria ni' para sí'inu nisa. Jesús rë'ë-nu:

—Benna le guí'ja'.

⁸ Tuzë' zoë' Jesús tu' chisöjáquië' bönni' usëda queë' lu yödzü söjxí'gaquië' le ilahuë'. ⁹ Ní'irö nigula Samaria na' rënu Jesús, rnanu:

—¿Rinábitsenu' neda' le guí'ju', en nacu' bönni' judío? Neda' ni naca' nigula Samaria. Caní gunnúnu tu' cabí ta'dzaga dxi'a bönachi Samaria len bönachi judío.

¹⁰ Bubi'ë didza' Jesús, rë'ë-nu:

—La'tu' núnbë'u le runödzejë' Dios, en Nuzxi na' rë li': "Benna le guí'ja'", li' inabu', ate' Lë' gunné' quiu' nisa runna yöl-la' na'bán.

¹¹ Ní'irö nigula na' rënu Lë', rnanu:

—Bönni', bití' nu'u le cuéaju' nisa, ate' yeru nisa ni, dxí'tërö rë'. ¿Gazxi dë nisa na' runna yöl-la' na'bán? ¹² ¿Naru' nácatërotso' Li' zxon ca xúziru' gudödi Jacob, bönni' ni' bennë' queë'tu' yeru nisa ni, ga ni guzxi'ë nisa gu'ë, en gulé'ajbi' ca' zxi'inë', en gulé'ajba' ca' böa' bëdxi queë'?

¹³ Bubi'ë didza' Jesús, rë'ë-nu:

—Núti'tës nu guí'aj nisa ni, leyúbölö ubidxi nisa, ¹⁴ pero nu guí'aj nisa na' unödzejä' neda', bíti'rö ubidxi icja ládxi'da'ahuë', tu' unödzejä' queë' nisa na' gaca lu icja ládxi'-da'ahuë' ca tu ga ralaj nisa, le güí'i yöl-la' na'bán idú queë'.

¹⁵ Ní'irö nigula na' rënu Lë', rnanu:

—Bönni', benna quia' nisa na', para cabirö ubidxa', en cabirö uduzxi'a nisa ni.

¹⁶ Jesús rë'ë-nu:

—Guyéaj, yöjlidzë' bönni' quiu', ate' huödu' ni.

¹⁷ Bubi'inu didza' nigula na', rënu Lë':

—Cuntu nu zoa bönni' quia'.

Ní'irö Jesús rë'ë-nu:

—Ca nácatë rno': "Cuntu nu zoa bönni' quia'", ¹⁸ tu' chiguzóalenu' gayu' bönni', ate' bönni' na' zóalenu'-në' na'a, bití' náquië' bönni' quiu'. Didza' ni ru'u, ca nácatë rno'.

¹⁹ Ní'irö nigula na' rënu Lë', rnanu:

—Bönni', runi neda' nacu' bönni' ru'ë didza' uláz queë' Dios. ²⁰ Xuz xtó'oru' guléquinë' Dios le bach lu guí'a ni, pero rnnalí' libí'ili' Jerusalén naca ga ral-la' ilequi bönachi Dios le bach.

²¹ Jesús rē'ē-nu:

—Nigula, guyéajlë' neda'. Za' dza cate' tseaj ládxi'li'-në' Dios Xuz sal-la' biti' idisóali' gu'ado' ni, en biti' tsöjsóali' Jerusalén. ²² Libí'ili' reaj ládxi'li' Nu biti' núnbë'ëli', pero netu' núnbë'ëtu' Nu na' reaj ládxi'tu', tu' benë' queë' Dios ilá' lahui yöl-la' rusólá ni'a quégaquië' bönni' judío. ²³ Na'a, za' dza, en chiridxín dza na', cate' nupa le nácatë ta'yéaj ládxi'gaca Dios, ila'yéaj ládxi'gaca Lë', zóalenë' Dios Bö' Lá'ayi léguequi, en le naca idútë li, tu' ré'ënë' Dios Xuz ilácagaquië' queë' bönni' ila'yéaj ládxi'gaquië' Lë' caní. ²⁴ Dios náquië' Bö', ate' nupa ta'yéaj ládxi'gaca Lë', run bayudxi ila'yéaj ládxi'gaca Lë', zóalenë' Dios Bö' Lá'ayi léguequi, en le naca idútë li.

²⁵ Ní'irö nigula na' rënu Lë', rnnanu:

—Nözda' ral-la' guídë' Mesías, Bönni' na' lë' Cristo. Cate' guídirë' Lë' quíxjöi'inë' rë'u yúgu'të.

²⁶ Jesús rē'ē-nu:

—Lë' cazë' ru'ilenë' li' didza'.

²⁷ La' ná'asö bulu'dxinë' bönni' usëda queë' Jesús, ate' bulu'báininë' tu' ru'ilenë'-nu nigula didza', pero biti' burúguinë' nitúë' inábinë' Lë', cabí innë': "¿Bizxi rinábinu' lënu?" o: "¿Bizxi didza' ru'ilenu'-nu?" ²⁸ Ní'irö nigula na' bucá'ananu xichö'önu ni', ate' bóajnu la' yödzo, söjódxinu nupa nacuá' ni', rnnanu:

²⁹ —¿Guli'dá, ilé'eli'-në' tu bönni' gudxë' neda' yúgu'të le chinuna! ¿Naru' cabí nácatsë' Lë' Cristo?

³⁰ Ní'irö bila'rúaj bönachi yödzo na', en bila'dxín ga zoë' Jesús.

³¹ Tsanni ni' söhuóajnu nigula na', bönni' usëda queë' Jesús gulunë' bayudxi, të' Lë':
—Bönni' Usedi, gudagu.

³² Jesús rē' légaquië':

—Dë tu le rahua', le cabí réquibe'eli'.

³³ Ní'irö gula'nabi luzá'agaquië' bönni' usëda queë' tuë' ia'túë', ta'nnë':

—¿Zoa nu chidiguá'tsö le gudahuë'?

³⁴ Ní'irö Jesús rē' légaquië':

—Le nabánida' naca guna' ca ré'ënë' Xuza' nasól-lë'ë neda', en údxi guna' xichinë'.

³⁵ Caní rnnali' libí'ili': "Ia'tapa beo' huadxín dza uláparu'." Neda' rea' libí'ili': Guli'chisa loli' uyuli' bönachi nácagaca ca gapa nadúzgaca, le chinabídxigaca para tsöjláparu'.

³⁶ Bönni' na' rulapë' rizi'ë lazxjë', ate' lë na' rulapë' bönni' na', naca para gata' yöl-la' na'bán idú quégaca bönachi, para gaca ulu'dzeja tsözxón nu raza, en nu rulapa. ³⁷ Naca idútë li lë na' rna caní: Tu nu raza, ate' ia'tú nu rulapa. ³⁸ Neda' gusól-la'a libí'ili' tsöjlápali' ga biti' gúzali'. Gulún bönachi yúbölö dxin guláz, ate' libí'ili' ruzí'ili' xibé dxin na' núnagaquië'.

³⁹ Zián bönachi Samaria nacuá' yödzo Sicar na' gula'yéajlë' Jesús ni'a que xtídz'a nu nigula na' bennu ba nalí queë', gunnánu: "Gudxë' neda' yúgu'të le chinuna'." ⁴⁰ Cate' bila'dxinë' bönni' Samaria ga ni' zoë' Jesús, guláta'yue' lahuë' ugá'analenë' légaquië'. Jesús bugá'anë' ni' ia'chopa dza. ⁴¹ Caní guca, zióntërë' ca' bönni' ni' gula'yéajlë' Jesús ni'a que didza' bë'ë. ⁴² Ní'irö bönni' ni' gulë'-nu nigula na', ta'nnë':

—Na'a réajlë'ëtu' Lë', calégasö ni'a que didza' bë'u li', pero lësca' tu' biyónitu' netu' Lë', en nöztu' le nácatë bönni' ni náquië' Cristo, Nu rusólá bönachi yödzo'lió.

Ruúnë' Jesús zxi'inë' tuë' bönni' dë lu në'ë

⁴³ Ia'chopa dza ca', buzë'ë Jesús luyú Samaria, en sa'yéajë' luyú Galilea. ⁴⁴ Caní benë', tu' gudíxjö'ë Lë' cazë' Jesús, gunné': "Bönachi uládz queë' nu bönni' ru'ë didza' uláz queë' Dios biti' tun lë' bal." ⁴⁵ Cate' bidxinë' Jesús luyú Galilea, gulunë' bönni' Galilea na' Lë' bal tu' yöjáquië' ca' Jerusalén cate' guca Laní Pascua, en bila'lë'enë' le benë' Jesús ni'.

⁴⁶ Ní'irö bóajë' Jesús yödzo Caná luyú Galilea, ga ni' benë' ga böaca nisa xisi uva. Lu yödzo Capernaum na' zoë' tu bönni' dë lu në'ë uláz queë' bönni' rinná bë'ë, ate' ré'ebi'

bi'i bönni' quee' bönni' na' dë lu në'ë. ⁴⁷ Cate' biyönnë' bönni' ni chibuzé'ë Jesús luyú Judea, en budxinë' luyú Galilea na', ní'irö guyijë' ga na' zoë' Jesús, en gúta'yuë' lahuë' guídë' lidxë', para uduhuënë'-bi' bi'i bönni' quee' na', tu' chirequi gátibi'. ⁴⁸ Ní'irö Jesús rë' lë':

—Biti' ca' tséajlë'ëli' channö cabí ilé'eli' le nácagaca bë', en yugu' yöl-la' huáca guna'.

⁴⁹ Ní'irö bönni' na' dë lu në'ë uláz quee' bönni' rinná bë'ë gudxë' Jesús, rnnë':

—Bönni', gudía'të para cabí gátibi' bi' quia'.

⁵⁰ Ní'irö Jesús rë' lë':

—Böaj lidxu'. Nabanbi' bi' quiu'.

Bönni' ni guyéajlë'ë didza' bë'ë Jesús, ate' söhuóje'. ⁵¹ Tsanni ni' yu'ë nöza söhuóje', duxxi'gala'gaquie' lë' bönni' huen dxin quee' ate' gula'guíxjöi'inë' lë', ta'nnë':

—Nabanbi' bi' quiu'.

⁵² Gunábinë' légaquie' bátaxi gusí lo ruhuóaca ládxi'bi'. Të' lë':

—Ba'ayi, idú huagubidza, burúaj xilá yú'ubi'.

⁵³ Ní'irö gúquibe'enë' xúzibi' bi' na', böácabi' cate' ni' bé'lenë' Jesús lë' didza', en gudxë' lë': “Nabanbi' bi' quiu'.” Que lë' ni na' guyéajlë'ë Jesús, ate' gula'yéajlë' ca' Lë' bönachi nacua' lidxë'.

⁵⁴ Yöl-la' huáca ni naca le buropi benë' Jesús cate' ni' zoë' luyú Galilea, gudödi buzé'ë luyú Judea.

5

Ruúnë' Jesús tu bönni' nacú'unië' bin ga nazí'i le Betesda

¹ Gudödi guca lë' ni, guca laní' quégaquie' bönni' judío, ate' guyijë' Jesús Jerusalén. ² Lu yödzo na', gala' ga tu'ú'uba' bö'cu' zxila', dë tu le zxon yudzu nisa, nazí'i le Betesda lu didza' hebreo, en nacua' gayu' chila don que. ³ Yugu' lu chila na' dégaquie' zían bönni' té'enë', bönni' nachul-la lógaquie', en bönni' biti' gaca sá'gaquie', en bönni' nacú'unigaquie' bin. Ta'bözë' bata utá cuini nisa na'. ⁴ Caní' raca, tu' ruhuójtë' tu gubáz lá'ayi quee' Dios tu chi' huéaj, en röjtsu'ë lu nisa na', en ruté' nisa na'. Huóacaté' nu bönni' tsöjtsú'utië' lu nisa na' cate' rutá cuini ca naca bíti'tës yödzo'hué' raca quee'. ⁵ Zoë' tu bönni' ni', chiguca chixxunu' uruá' iz ré'enë'. ⁶ Cate' bilé'enë' Jesús dë' bönni' huë' na' ni', réquibe'enë' chiguca zían iz ré'enë', ate' gunábinë' lë', rnnë':

—¿Ba ré'ënu' huóacu'?

⁷ Bubi'ë didza' bönni' huë' na', rë' Jesús:

—Bönni', cuntu nu zoa cu'u neda' lu nisa na' cate' rutá cuini. Tsanni sa'yéaja' neda', röjtsu'ë bönni' yúbölö zí'alö ca neda'.

⁸ Jesús rë' lë':

—Guyaschi. Buá' le denu', en guzë'e.

⁹ La' böacaté' bönni' na', ate' bu'ë le gúti'në', en guzë'ë. Dza na' raca caní' naca dza lá'ayi quégaquie' bönni' judío. ¹⁰ Ní'irö bönni' judío unná bë' gulé' bönni' na' nuhuóáquie', ta'nnë':

—Dza lá'ayi naca na'a. Biti' ral-la' u'u le ráti'nu'.

¹¹ Bubi'ë didza' bönni' na', rë' légaquie':

—Bönni' na' bunë' neda' gudxi cazë' neda', gunné': “Buá' le denu', en guzë'e.” Bönni' na' bunë' neda'.

¹² Ní'irö gula'nábinë' lë', ta'nnë':

—¿Nuzxi na' gudxi caní' li': “Buá' le denu', en guzë'e”?

¹³ Biti' nózinë' bönni' na' nuhuóáquie' nuzxi na', tu' chibuzé'ë Jesús lataj ni' tu' nacua' bönachi zían ni'. ¹⁴ Gudödi guca lë' ni, Jesús yöjxáquie' bönni' na' ga naca chila yudo', ate' rë' lë':

—Buyútsöca'. Chiböacu'. Bíti'rö gunu' dul-la', para cabí gaca quiu' tu le nácáro' zi' ca lë' na' guca quiu'.

¹⁵ Guyijë' bönni' na', yöjtíxjöi'inë' yugu' bönni' judío unná bë' Jesús na' bunë' lë'. ¹⁶ Que lë ni na' bönni' judío unná bë' gula' bía ládxi' gaquië' Jesús, en gul'é'ennë' ilútië' Lë', tu' runë' yugu' lë ni cate' naca dza lá'ayi quégaquië'. ¹⁷ Bubi'ë didza' Jesús, rë' légaquië':

—Xuza' ná'atë runë' dxin, ate' neda' ca' runa' dxin.

¹⁸ Que lë ni na' gul'é'ënirönë' bönni' judío unná bë' ilútië' Jesús, calégasö tu' guditsjë' xibá que dza lá'ayi quégaquië', pero lësca' tu' gunné' Dios caz náquië' Xuzë', ate' caní naca nun cuinë' ca náquië' Dios.

Yöl-la' unná bë' dë lu në'ë Zxí'inë' Dios

¹⁹ Ní'irö bubí'ë didza' Jesús, rë' légaquië':

—Le nácatë rea' libí'ili'. Biti' bi gaca guna' neda', Zxí'inë' Dios, rácasö quia', pero tuz lë na' rilé'eda' runë' Dios Xuz. Yúgu'të le runë' Dios Xuz, lësca' caní runa' neda', Zxí'inë'. ²⁰ Dios Xuz nadxí'inë' neda', Zxí'inë', en rulu'inë' neda' yúgu'të le runë', ate' yugu' le zxóntërö ca lë ni uluí'inë' neda', le ilún ga ubánili' libí'ili'. ²¹ Ca na' runë' Dios Xuz, rusubanë' nupa nátigaca, en rugú'ë légaquië' yöl-la' na'bán, lësca' caní runa' neda', Zxí'inë', runödza' quégaca bönachi yöl-la' na'bán ca ré'ëni quézida'. ²² Cuntu nu ruchi'a rusöröë' Dios Xuz, pero chinudödë' lu na'a neda', Zxí'inë', yúgu'të yöl-la' unná bë' para uchi'a usöröa' bönachi. ²³ Caní naca para ilún bal yúgu'të bönachi neda', Zxí'inë', ca na' tun bal Dios Xuz. Nu bití' run bal neda', Zxí'inë', bití' run bal Dios Xuz, nasól-lë'ë neda', Zxí'inë' na'.

²⁴ Le nácatë rea' libí'ili'. Bönni' na' riyönnë' didza' ruá'a, en réajlë'ë Dios Xuz na' nasól-lë'ë neda' dë yöl-la' na'bán idú queë', ate' bití' irugu queë'. Náquië' ca nu chinubán lu yöl-la' guti tu' chidé yöl-la' na'bán idú queë'. ²⁵ Le nácatë rea' libí'ili', za' dza, en chiridxín dza na', cate' ila'yöni nupa chinátigaca chí'a neda', Zxí'inë' Dios, ate' nupa ila'yöni xtí'dza'a, en ilún ca rnna, huóata' yöl-la' na'bán quéguequi. ²⁶ Ca na' dë lu në'ë Dios Xuz unödzejë' yöl-la' na'bán quégaca bönachi, lësca' caní benë' ga dë lu na'a neda', Zxí'inë', unödza' yöl-la' na'bán quégaca bönachi. ²⁷ Lësca' caní budödë' lu na'a yöl-la' unná bë' uchi'a usöröa' bönachi, tu' naca' Bönni' Guljë' Bönachi. ²⁸ Bití' ubánili' ca naca lë ni, tu' huadxín dza cate' yúgu'të nupa chinátigaca ila'yöni chí'a, ²⁹ en ulu'ruáj yeru ba. Ulu'bán nupa na' gulún le naca tsahui', en huóata' yöl-la' na'bán quéguequi, pero nupa na' gulún le bití' naca tsahui', ulu'bán, ate' irugu quéguequi ilátigaca tsaz.

Le naca bë' le náquië' Jesús

³⁰ Gunné' ca' Jesús:

—Bití' bi gaca guna' la' néda'sö. Ca naca le riyönda' rë' Xuza' neda', caní ruchi'a rusöröa', ate' ca na' ruchi'a rusöröa' naca tsahui', tu' cabí runa' ca ré'ënisida' neda', pero ca ré'ëni quézinë' Xuza' nasól-lë'ë neda', runa'. ³¹ Channö neda' runa' ba nalí que la' cuin caza', bití' naca lesaca' lë na' runa' ba nalí. ³² Zoa Nu yúbölö Nu run ba nalí quia' neda', Lë' Xuza', ate' nözda' naca lesaca' le runë' ba nalí quia'. ³³ Libí'ili' gusól-la'li' bönni' yöjnábiguequinë' Juan, ate' lë na' benë' ba nalí quia' naca idútë li. ³⁴ Neda' bití' naquinda' nu bönni' gunë' ba nalí quia', pero ruá'a didza' caní para uláli'. ³⁵ Didza' bë'ë Juan na' gulaca ca tu guí yöri, le guyegui, en buzení, ate' libí'ili', tu chí'isö guyaza ládxi'li' uzí'ili' xibé bení queë'. ³⁶ Na'a, zoa le run ba nalí quia' neda' le nácarö idú li ladxe' ca lë na' benë' ba nalí quia' Juan. Yugu' le budödë' Dios Xuz lu na'a guna', la' leze na' runa', ate' yugu' lë na' runa', tun ba nalí quia', en nácagaca bë' gusól-lë'ë Dios Xuz neda'. ³⁷ Lësca' Dios Xuz nasól-lë'ë neda' runë' ba nalí quia'. Catu caz biyónili' chí'ë, en catu caz bilé'eli' lahuë', ³⁸ en cabí nazí lu ná'ali' xtí'dzë'ë, tu' cabí réajlë'ëli' neda', Nu na' gusól-lë'ë. ³⁹ Rusédali' le nazúaj lu guichi lá'ayi, tu' réquili' huáta' yöl-la' na'bán idú queéli' ní'a que lë na' nazúaj lu guichi lá'ayi, ate' lë na' nazúaj lu guichi run ba nalí quia' neda'. ⁴⁰ Bití' ré'ënilí' guídali' quia' neda' para gata' yöl-la' na'bán queéli'.

⁴¹ Biti' riguilja' yöl-la' ba le ila'gú'u bönachi neda'. ⁴² Neda' núnbë'a libí'ili', en nözda' biti' nadxí'ili'-në' Dios. ⁴³ Bidxina' ni uláz queë' Dios Xuz, ate' libí'ili' biti' rizí' lu ná'ali' neda', pero channö huadxín nu yúbölö nu guídi rácasö que, si' lu ná'ali' nu na'. ⁴⁴ ¿Nacxi caz gaca tséajlë'ëli' Dios channö rizí'ili' yöl-la' run zxön que luzá'ali' tuli' ia'tuli', en biti' riguíljali' yöl-la' run zxön na' za' lu në'ë la's dui Dios? ⁴⁵ Biti' uzóa ícjali' uzéguia' libí'ili' didza' lahuë' Xuza'. Nu na' uzegui libí'ili' didza' naca lë cazë' Moisés, bönni' na' ruzxöni láchxi'li'-në', sal-la' gútië' dza ni'te. ⁴⁶ La'tu' réajlë'ëli'-në' Moisés, tséajlë'ëli' ca' neda', tu' buzúajë' Moisés lu guichi ca naca quia' neda'. ⁴⁷ Na'a, ¿nacxi caz gaca tséajlë'ëli' didza' ruá'a neda' channö cabí réajlë'ëli' yugu' le buzúajë' Moisés lu guichi?

6

*Rugahuë' Jesús zíanrö ca chi-un gayuá' bönachi**(Mt. 14:13-21; Mr. 6:30-44; Lc. 9:10-17)*

¹ Gudödi guca lë ni, guyijë' Jesús ia'tsolá'a Nísado' Que Galilea, nazí'i le ca' Nísado' Queë' Tiberias. ² Bönachi zían yöjnógaca Jesús tu' bila'lé'e yugu' yöl-la' huáca benë', cate' bunë' bönni' té'enë'. ³ Ní'irö gurenë' Jesús, guyijë' ga naca tu lu gu'ado', ga ni' guró'ölenë' yugu' bönni' usëda queë'. ⁴ Chizóa idxín Laní Pascua cate' tu' subanë' bönni' judío ca benë' Dios, bubéajë' xuz xtó'ogaquië' luyú Egipto. ⁵ Cate' guchisa lahuë' Jesús, en bilé'enë' bönachi zían zá'gaca ga zoë', ní'irö rë' Felipe:

—¿Gazxi tsöj'uru' yöta xtila le ilágugaca bönachi zían ni?

⁶ Caní gunné' Jesús para si' bë'ë Felipe na', tu' chinózinë' Lë' naca gunë'. ⁷ Bubi'ë didza' Felipe, rnnë':

—La'tu' sí'uru' yöta xtila len lázxjaru' que idú xunu' beo', biti' guequi láti'do' huéaj le ilágugaca bönachi zían ni.

⁸ Ní'irö tu bönni' usëda queë' Jesús, lë' Andrés, bóché'ë Simón Pedro, rë' Lë', rnnë':

⁹ —Ni zóabi' tubi' bí'i bönni', nuá'abi' gayu' yöta xtila néquiguequini zxoá' cebada, en chópaba' böla cuídí'do'. ¿Naru' huéqui'tse ugagu le do' ni cate' xö bönachi?

¹⁰ Ní'irö Jesús rë' légaquië':

—Gulí'gún ga ila'bó' bönachi zían ni lu yu.

Lataj na', ró'öda' daca', ate' gula'bó'ë idú ca chi-un gáyu'ë bönni' ni'. ¹¹ Ní'irö gudélé'ë Jesús yugu' yöta xtila na'. Cate' chigudxë' Dios: “Xclenu”, gudísië' le quégaquië' bönni' usëda queë', ate' légaquië' gula'guísië' le quégaca yúgu'të nupa na' ró'gaca lu daca' ni'. Lësca' caní gulunë' quégacaba' böla cuídí'do' na', ate' gulahuë' tsca gulé'ënnë' ilahuë'.

¹² Cate' chibulu'huóljanë', Jesús gudxë' yugu' bönni' usëda queë', gunné':

—Bulí'túbi le bizxaj nagá'anagaca, para cabí ilaca ditaj.

¹³ Bulu'tübë' ca', ate' bulu'líë' chinnu ga'bórado' yugu' le bizxaj quégaca gayu' yöta xtila néquiguequini zxoá' cebada na', le bulu'gá'ana quégaquië' bönni' na' gulahuë'.

¹⁴ Cate' bila'lé'enë' bönni' ni' yöl-la' huáca na' benë' Jesús, ta'nnë':

—Le nácatë bönni' ni náquië' bönni' na' ru'ë didza' uláz queë' Dios, bönni' na' ral-la' guidé' yödzólió ni.

¹⁵ Tu' réquibe'enë' Jesús té'ënnë' ila'ché'ë Lë' bayudxi para ilunë' ga inná bé'enë' légaquië', que lë ni na' buzé'ë ni', sa'yéajë' tuzë' tu lu guí'a.

*Rizë'ë ni'ë Jesús lu nísado'**(Mt. 14:22-27; Mr. 6:45-52)*

¹⁶ Cate' chizá' ral-la, yójáquië' bönni' usëda queë' Jesús, ate' bila'dxinë' ra' nísado'. ¹⁷ Gula'benë' tu lë'e bárcodo' ni', en söjáquië' ta'dödë' lu nísado' na', para ulu'dxinë' Capernaum. Chinaca chul-la ate' Jesús biti' ridxíninë' ga na' nacu'ë. ¹⁸ Gusí lo recja bö' budunu' lu nísado' na', ate' riyasa ridxía nisa na'. ¹⁹ Cate' chibulu'sé'ë bárcodo' na', le

guzá' le naca tsca rizá'aru' tu hórásö, ní'irö bila'lé'enë' Jesús rizë'e ni'ë lu nísado' na', en zë'ë ribíguë'ë ga na' zeaj barco na', ate' guladxi gula'dzóbinë'. ²⁰ Ní'irö Jesús rë' légaquië':

—Neda' caz ni. Biti' gádxili'.

²¹ Ní'irö len yöl-la' rudzeja quégaquië' bulu'guélë'ë Lë' lë'e bárcodo' na', ate' la' bidxintë bárcodo' na' lu yu bidxi ga ni' sójáquië'.

Bönachi zían tu'guilaj Jesús

²² Dza buropi ni', guléquië'e bönachi zían na' nagá'anagaca ia'tsölá'a nísado' bidxín tuz bárcodo' ni', ate' Jesús bití' gurénlenë' yugu' bönni' usëda queë' lë'e bárcodo' na', pero légacasë' na' yöjáquië'. ²³ Ní'irö bila'rúaj ia'bal-la bárcodo' lu yödzö Tiberias, ate' bila'dxín tu lataj le dë gála'sö ga ni' gulahuë' yöta xtila cate' ni' Xanru' Jesús gudxë' Dios: "Xclenu" que. ²⁴ Tu' bila'lé'enë' bítí'rö zoë' Jesús ni', en bití' nacu'ë bönni' usëda queë' ni', que lë ni na' gula'benë' lé'egaca bárcodo' na', ate' yöjáquië' Capernaum, tu'guiljé' Jesús.

Náquië' Jesús yöta xtila nabánigaca tsaz bönachi

²⁵ Cate' bila'dxín bönachi zían na' ia'tsölá'a nísado' na', yöjxáca'gaquië' Jesús, en të' Lë':

—Bönni' Usedi, ¿bátaxi bidxinu' ni?

²⁶ Bubi'ë didza' Jesús, rë' légaquië':

—Le nácatë rea' libí'ili': Ruguílajli' neda', calëga tu' bilé'eli' yugu' yöl-la' huáca bena', pero tu' gudáguli' yöta xtila ni', en bóljali'. ²⁷ Gulí'gún dxin, calëga para sí'ili' la' huagu ridödi que, pero para sí'ili' la' huagu na' ugá'anatica'sö, en runna yöl-la' na'bán idú. Lë ni naca la' huagu neda', Bönni' Guljé' Bönachi, gunna' queéli', tu' bulu'ë lahui Xuza' Dios naca' Zxí'inë'.

²⁸ Ní'irö gula'nábinë' Lë', ta'nnë':

—¿Bizxi run bayudxi guntu' para guntu' le raza ládxë'ë Dios?

²⁹ Bubi'ë didza' Jesús, rë' légaquië':

—Lë ni le raza ládxë'ë Dios, tséajlë'ëli' neda', naca' nu gusól-lë'ë Lë'.

³⁰ Ní'irö gula'nábinë' Lë', ta'nnë':

—¿Bizxi le naca bë' runu', le ilé'etu' para tséajlë'ëtu' Li'? ¿Bizxi yöl-la' huáca runu'?

³¹ Gulahuë' xuz gudödi queëru' yöta xtila nazí'i le maná lu lataj cá'asö, ca nazúaj lu guichi lá'ayi, rna: "Yöta xtila que yehua' yubá Moisés bë'ë quégaquië', gulahuë'."

³² Bubi'ë didza' Jesús, rë' légaquië':

—Le nácatë rea' libí'ili': Calëga Moisés na' bennë' queéli' yöta xtila que yehua' yubá, pero Xuza' Dios runnë' queéli' yöta xtila le naca idú que yehua' yubá. ³³ Yöta xtila na' runnë' Dios quégaca bönachi naca' neda', lë na' birúaj yehua' yubá, en runödzaj yöl-la' na'bán quégaca bönachi yödzölió ni.

³⁴ Ní'irö të' Lë':

—Xan, bénatica'sö queëtu' yöta xtila na'.

³⁵ Jesús rë' légaquië':

—Neda' caz naca' yöta xtila nabánigaca tsaz bönachi. Nu za'len neda', huölaj udzé'e tsaz nu na' le naca queë' Dios, ate' nu tséajlë' neda', chinë'aj tsaz le naca queë' Dios.

³⁶ Naca ca na' chigudxi caza' libí'ili': "Sal-la' rilé'eli' neda', bití' ca' réajlë'ëli' neda'."

³⁷ Yúgu'të nupa na' runnë' Xuza' quia', ídigaca quia', ate' nupa na' zaca quia', bití' usá'gaca'-në'. ³⁸ Caní naca, tu' bö'tja' birúaja' yehua' yubá, calëga para guna' ca ré'ënda' neda' caz, pero para guna' ca ré'ënë' Dios Xuz, nasól-lë'ë neda'. ³⁹ Lë ni le ré'ënë' Xuza' nasól-lë'ë neda', ré'ënë' cabí unítia' nitú nupa na' bennë' quia', pero usubana' léguequi dza údxi. ⁴⁰ Lë ni le ré'ënë' Dios Xuz nasól-lë'ë neda', ré'ënë' gata' yöl-la' na'bán quéguequi, yúgu'të nupa na' ila'lé'e neda', Zxí'inë', en ila'yéajlë' neda', ate' neda' usubana' léguequi dza údxi na'.

⁴¹ Ní'irö gula'nné' queë' Jesús bönni' judío unná bë' tu' gunné': "Neda' caz naca' yöta xtila na' bötaj, birúaj yehua' yubá." ⁴² Que læ ni na' ta'nné':

—¿Naru' cabí bönni' ni Jesús, xzí'iné' José? Nunbë' cázaru' xuz xiné'ë. ¿Nacxi caz naca na', rnnë' bönni' ni: "Bötja' birúaja' yehua' yubá"?

⁴³ Ní'irö bubí'ë didza' Jesús, rë' légaquië':

—Biti' innëli' quia' la' libí'isili'. ⁴⁴ Biti' séqui'në' nitúë' bönni' guídë' quia' channö cabí idigu'ë quia' Xuza' nasól-lë'ë neda' nu na', ate' neda' usubana' nu na' dza údxi. ⁴⁵ Nazúaj lu guichi lá'ayi ca gula'nné' bönni' gulu'ë didza' uláz queë' Dios, le rnna caní: Dios usédinë' yúgu'të bönachi. Que læ ni na', yúgu'të bönni' ta'yönnë' chi'ë Xuza', en nazédagaquië' lu në'ë Lë' zá'gaquië' quia'.

⁴⁶ Cuntu nu bönni' bilé'enë' Dios Xuz, pero tuzë' Bönni' na' birúajë' ga zoë' Dios. Bönni' ni rilé'e quézinë' Dios Xuz. ⁴⁷ Le nácatë rea' libí'ili': Núti'tës bönni' réajlë'ë neda' dë yöl-la' na'bán idú queë'. ⁴⁸ Neda' caz naca' yöta xtila nabánigaca tsaz bönachi. ⁴⁹ Gulahuë' xuz xtó'oli' yöta xtila na' nazí'i le maná lu lataj cá'asö, en cate' bizá'a dza quégaquië' gulátië'. ⁵⁰ Neda' naca' yöta xtila ruhuötaj rirúaj yehua' yubá, ate' núti'tës bönni' gahuë' le, bití' ca' gátië' bönni' na'. ⁵¹ Neda' caz naca' yöta xtila na' nabánigaca bönachi, le bötaj birúaj yehua' yubá, ate' channö núti'tës bönni' gahuë' yöta xtila na', gaca bántica'së' bönni' na'. Yöta xtila na' runödza' neda' naca xipéla'a, le runödza' para gata' yöl-la' na'bán quégaca bönachi yödzölió.

⁵² Ní'irö bönni' judío unná bë' gula'chixi luzá'agaquië', ta'nné':

—¿Naru' huácatsö bönni' ni gunné' queëru' xipélë'ë le gáguru'?

⁵³ Que læ ni na' Jesús rë' légaquië':

—Le nácatë rea' libí'ili': Channö cabí gáguli' xipéla'a neda', Bönni' Guljë' Bönachi, en channö cabí guí'jali' xichöna', bití' ca' zóalen libí'ili' yöl-la' na'bán na'. ⁵⁴ Núti'tës nu gagu xipéla'a, en guí'aj xichöna', dë que yöl-la' na'bán idú, ate' neda' usubana' nu na' dza údxi. ⁵⁵ Caní gaca, tu' naca xipéla'a la' huagu idú, ate' xichöna' naca tu le naca idú para nu guí'aj le. ⁵⁶ Núti'tës bönni' gahuë' xipéla'a, en guí'jë' xichöna', sóalenticasë' bönni' na' neda', ate' neda' sóalenticas'a' læ'. ⁵⁷ Ca na' zoë' nabanë' Dios Xuz nasól-lë'ë neda', ate' neda' nabánida' Lë', læsca' caní íbaninë' neda' núti'tës bönni' gahuë' neda'. ⁵⁸ Lë ni yöta xtila bötaj birúaj yehua' yubá, en bití' naca ca yöta xtila na' nazí'i le maná, læ na' gulahuë' xuz xtó'oli', en cate' bizá'a dza quégaquië', gulátië'. Núti'tës bönni' gahuë' yöta xtila ni sóatica'së' íbanë'.

⁵⁹ Yugu' didza' ni bë'ë Jesús ga naca tu lu yu'u ga tu'dubë' bönni' judío, en tu'sëdë' queë' Dios, ate' guca læ ni tsanni ni' rusédinë' bönachi Capernaum.

Didza' rúnnagaca queëru' yöl-la' na'bán idú

⁶⁰ Cate' bila'yönnë' didza' ni, zían bönni' usëda queë' Jesús gula'nné' que, ta'nné':

—Banígatë didza' ni. ¿Nuzxi caz gaca si' lu në'e le?

⁶¹ Réquibe'enë' Jesús ta'nné' bönni' usëda queë' que xtídzë'ë, ate' gunábinë' légaquië', rnnë':

—¿Naru' run didza' ni libí'ili' zi'? ⁶² ¿Nacxi caz gaca channö hualé'eli' neda', Bönni' Guljë' Bönachi, huëpa' huöja' ga ni' zoa' zí'aló? ⁶³ Le naca queë' Dios Bö' Lá'ayi naca le runna yöl-la' na'bán queé'li'. Le naca béla'sö cuntu nu uzí' xibé. Didza' na' bé'lëna' libí'ili' nátagaca queë' Dios Bö' Lá'ayi, en rúnnagaca yöl-la' na'bán quégaca bönachi. ⁶⁴ Na'a, bál-lali' bití' réajlë'ëli'.

Gunné' caní Jesús tu' nózinë' dza ni'te nupa na' bití' ta'yéajlë', enca' nu na' udödi Lë' lu ná'agaquië' bönni' ilútië' Lë'. ⁶⁵ Que læ ni na' gunné':

—Que læ ni na' chigudxi caza' libí'ili': Biti' séqui'në' nitúë' bönni' të'ë neda' channö Dios Xuz cabí gu'ë læ' lataj.

⁶⁶ Dza na' gulaca chopa ládxi'gaquië' zían bönni' usëda queë', en bíti'rö gula'dálenë' Lë'. ⁶⁷ Ní'irö Jesús gunábinë' idxínnutë' bönni' usëda queë' na', rë' légaquië':

—¿Naru' ubíga'tsali' ca' libí'ili'?

⁶⁸ Bubi'ë didza' Pedro, rë' Lë':

—Xan, ¿nuzxi que tséajtu'? Li' napu' didza' rúnnagaca queëtu' yöl-la' na'bán idú.

⁶⁹ Netu' réajlë'ëtu' Li', en núnbë'ëtu' Li', nacu' Cristo na' nasól-lë'ë Dios, en nacu' ca' Zxí'inë' Dios ban.

⁷⁰ Bubi'ë didza' Jesús, rë' légaquië':

—Guró caza' libí'ili' chínnuli' ni, pero tuë' bönni' ládajli' libí'ili' dzaga tu' xihui' lë'.

⁷¹ Didza' ni bë'ë Jesús ca naca queë' Judas Iscariote, zxí'inë' tu bönni' lë' Simón, tu náquië' Judas bönni' na' udödë' Jesús lu ná'agaquië' bönni' ilútië' Lë', en nabábalenë' ia' chinéajë' bönni' usëda queë' Jesús.

7

Bönni' böchi' cazë' Jesús biti' ta'yéajlë'ë Lë'

¹ Gudödi guca lë ni ridé' Jesús luyú Galilea. Biti' gú'unnë' tsejë' luyú Judea tu' té'ënnë' bönni' judío unná bë' nacu'ë ni' ilútië' Lë'. ² Dza ni' chizóa idxín laní quégaquië' bönni' judío cate' tu'subanë' ca gula'cu'ë xuz xtó'ogaquië' znan libín lága'do'. ³ Que lë ni na' yugu' bönni' bóché'ë Jesús gulé' Lë', ta'nnë':

—Birúaj ni, en guyéaj luyú Judea para ila'lé'enë' ca' bönni' usëda quiu' nacu'ë ni' yugu' yöl-la' huáca runu'. ⁴ Channö ré'ënë' nu bönni' ilúnbë'e bönachi lë', biti' runë' bagáchi'sö le runë'. Tu' runu' yugu' yöl-la' huáca caní, buluí'i cuinu' lógaca yúgu'të bönachi.

⁵ Caní gula'nnë', tu' cabí ta'yéajlë'ë bönni' bóché'ë Jesús Lë'. ⁶ Ní'irö Jesús rë' légaquië':

—Biti' ridxini dza quia' para uluí'i lahua' lógaca bönachi, pero dza queé'li' tséajli' ni' chizóa caz. ⁷ Bönachi yödzölió ni biti' tu'zóa libí'ili' tsölá'alö, pero tu'zóa neda' tsölá'alö tu' runa' ba nalí quégaquië', rnnía' naca xihui' le tunë'. ⁸ Gulí'tséaj libí'ili' laní na'. Biti' tseja' laní na' na'a tu' biti' ridxini dza quia'.

⁹ Cate' chigudxë' légaquië' lë ni, bugá'anë' luyú Galilea.

Sa'yéajë' Jesús laní quégaca bönachi judío

¹⁰ Gudödi söjáquië' bönni' bóché'ë Jesús laní na', ní'irö sa'yéajë' ca' Lë', calëga yálajdo', pero bagáchi'sö sa'yéajë'. ¹¹ Ga na' raca laní na', bulu'guiljë' bönni' judío unná bë' Jesús, ta'nnë':

—¿Gazxi zoë' bönni' na'?

¹² Bönachi zían ni' gulu'ida' didza' ca naca queë' Jesús. Bal-lë' ta'nnë':

—Náquië' dxi'a.

Ia'bal-lë' ta'nnë':

—Biti' náquië' dxi'a tu' rizí' yé'enë' bönachi.

¹³ Biti' bë'ë nitüë' bönni' didza' yálajdo' ca naca queë' Jesús, tu' tadxi bönachi zían na' le ilunë' yugu' bönni' judío unná bë'.

¹⁴ Cate' chibidxín gatsaj laní na', blë'ë Jesús ra' yudo', en busédinë' bönachi nacuá' ni'.

¹⁵ Bulu'bábinë' bönni' judío, ta'nnë':

—¿Nacxi caz naca, rácadë'ë bönni' ni, en biti' ca' nazëdë' que yudo'?

¹⁶ Bubi'ë didza' Jesús, rë' légaquië':

—Le rusévida' neda', calëga quia' naca, pero queë' Dios Xuz na' nasól-lë'ë neda'.

¹⁷ Channö ré'ënë' nu bönni' gunë' ca ré'ënë' Dios, huéquibe'enë' bönni' na' channö nequi queë' Dios le rusévida' bönachi o channö rácasö quia' ruá'a didza'. ¹⁸ Nu bönni' ru'ë didza' rácasö queë', runë' caní para ilún bal bönachi lë', pero Bönni' na' ré'ënë' ilún bönachi bal Nu nasól-la' lë', Bönni' ni ru'ë didza' idútë li, en biti' ca' rizí' yë'ë.

19 'Moisés bennë' queé'li' xibá queë' Dios, pero bití' runli' ca rinná bë' xibá na'. ¿Bizx que rizóa ribó'öli' gútili' neda'?

20 Bulu'bí'i didza' bönachi zían na', tē Lē':

—Tu' xihui' dzaga lí'. ¿Nuzxi caz rizóa ribó'ö guti lí'?

21 Bubi'ë didza' Jesús, rē légaquië':

—Tu yöl-la' huáca bena', ate' rubánili' yúgu'tēli'. 22 Le nácatē Moisés bennë' queé'li' lē na' narugu lu xipéla'li' le naca bë', pero calēga Moisés caz bennë' queé'li' lē na', pero guzxi'ē le lu ná'agaquië' xuz xtá'ahuë'. Na'a, sal-la' naca dza lá'ayi, richúguli' lu xipéla'gacabi' bi'i bönni'do' lē na' naca bë' néquiguequibi' queë' Dios. 23 Channö ta'z'í'ibi' lu xipéla'gacabi' lē na' naca bë' cate' naca dza lá'ayi, para cabí quítsjali' xibá queë' Moisés, ¿naru' rilétseli' neda' tu' buna'-nē tu bönni', ate' böáquië' dxí'ado' cate' naca dza lá'ayi? 24 Biti' ral-la' uchi'a usöró lízili' ca', pero buli'chi'a buli'söró ca naca le naca idútē li.

Rigúixjō'ë Jesús ga narúajē'

25 Ní'irö gulu'ë didza' bal-lē' bönni' nacu'ë Jerusalén, ta'nnē':

—¿Naru' calēga bönni' ni Nu na' tu'guiljē' bönni' judío unná bë' para ilútiē' Lē'?

26 Buli'yútsöca', yálajdo' ru'ë didza', en bití' bi tē' Lē'. ¿Naru' téquibe'enē' bönni' ta'nná bé'enē' rē'u, le nácatē bönni' ni náquië' Cristo, Nu na' ral-la' inná be'e rē'u? 27 Bönni' ni, nöz quéziru' gazxi bönni' Lē'. Cate' guídē' Cristo, cuntú nu inözi gazxi bönni' Lē'.

28 Ní' zoë' Jesús rusédinē' bönachi chila yudo', en cate' biyönnē' didza' ni, ní'irö bë'ë zidzaj didza', rnnē':

—¿Naru' núnbe'etseli' neda', en nözitseli' gazxi bönni' neda'? Bida' ni, calēga rácasö quia', pero Dios caz nasól-lē'ë neda', ate' Lē', bití' núnbē'ëli'-nē' libí'ili'. 29 Neda' núnbe'eda'-nē', tu' za'a queë' Lē', ate' Lē' cazē' nasól-lē'ë neda'.

30 Ní'irö gulunē' bayudxi ila'zönē' Lē', pero cuntú nu guzxon Lē', tu' cabí ridxini dza queë' tsu'ë lu ná'agaquië'. 31 Gula'yéajlē' zían bönachi ni' Lē', ta'nná:

—Cate' guídē' Cristo, ¿naru' gunē' zíanrö yöl-la' huáca ca le runē' bönni' ni?

Bönni' yudo' ta'sól-lē'ë nupa ila'zón Jesús

32 Bila'yönnē' bönni' yudo' fariseo yugu' didza' ni tu'i bönachi ca naca queë' Jesús, ate' yugu' bixúz unná bë', en yugu' bönni' yudo' fariseo na' gula'sól-lē'ë ni'a ná'agaquië' para tsöjxóngaqië' Lē'. 33 Ní'irö Jesús gunné':

—Ia'tú chí'isö sóalena' libí'ili', ate' ní'irö huöja' ga zoë' Xuza' nasól-lē'ë neda'.

34 Uguíljali' neda', pero bití' udzólili' neda'. Ga ni' tsöjsóa' neda' bití' gaca guídali' libí'ili'.

35 Ní'irö tē' luzá'agaquië' bönni' judío, ta'nnē':

—¿Gazxi tséajtsē' bönni' ni, ga ni' bití' udzóliru'-nē'? ¿Naru' huayéajtsē' ga nacu'ë bönni' judío násilasigaquië' idútē yödzölió, en usédinē' yugu' bönni' zítu' ni'? 36 ¿Bizxi ré'ëni inná didza' na' bë'ë: “Uguíljali' neda', pero bití' udzólili' neda'”, enca': “Ga ni' tsöjsóa' neda' bití' gaca guídali' libí'ili'”?

Nisa yegu le runna yöl-la' na'bán queéru'

37 Cate' ni' naca dza údxí que laní na', dza na' naca lo, guzuínē' Jesús, en bë'ë zidzaj didza', rnnē':

—Channö zoë' nu bönni' ribidxi icja ládxi'da'ahuë', ral-la' guídē' bönni' na' ga zoa', en guíjē'. 38 Nu bönni' réajlē'ë neda', gaca queë' ca na' nazúaj lu guichi lá'ayi, rnna: Lu icja ládxi'da'ahuë' bönni' na' ilén le naca ca nisa yegu, lē na' ulu'z'í' xibé bönachi, gata' yöl-la' na'bán queéguqui.

39 Didza' ni bë'ë Jesús ca naca queë' Dios Bö' Lá'ayi, Nu ral-la' idisóalen bönni' na' ila'yéajlē'ë Jesús. Caní gunné' Jesús tu' cabí ridxíninē' Dios Bö' Lá'ayi, tu' cabí ruhuépinē' Jesús ga tsépisëtērē'.

Ta'ruáj choplö bönachi

⁴⁰ Cate' bila'yöni didza' ni, gula'nná bal-la bönachi zían na', ta'nná:

—Le nácaté Bönni' ni náquié' Bönni' na' ru'ë didza' uláz queé' Dios, Bönni' na' guzxi' lu në'ë Dios isól-lë'ë queéru'.

⁴¹ Ta'nné' ia'bal-lë':

—Bönni' ni náquié' Cristo.

Ta'nná bal-la bönachi:

—¿Naru' irúajtsé' Cristo luyú Galilea? ⁴² Nazúaj lu guichi lá'ayi le rnna: “Cristo galjé' ladaj di'a dza queé' David, en gáquié' ca' bönni' Belén le guca ladzé' David na'.”

⁴³ Caní guca, bila'ruáj bönachi na' choplö tu' nóziné' Jesús. ⁴⁴ Té'ënné' bal-lë' ila'zöné' Jesús, pero cuntú nu bi ben queé'.

Biti' ta'yéajlé'ë Jesús bönni' unná bë'

⁴⁵ Ní'irö bulu'dxiné' ni'a ná'agaquié' yugu' bixúz unná bë', en yugu' bönni' yudo' fariseo ga na' nacu'ë bönni' yudo' na', ate' légaquié' gulé' ni'a ná'agaquié' na', ta'nné':

—¿Bixz que biti' diché'ëli'-në'?

⁴⁶ Bulu'bi'ë didza' ni'a ná'agaquié', ta'nné':

—Cuntu nu bönni' ru'ë didza' ca ru'ë didza' Bönni' ni.

⁴⁷ Ní'irö bulu'bi'ë didza' bönni' yudo' fariseo na', ta'nné':

—¿Naru' bé'tsali' lataj guzxi' yé'ené' ca' libí'ili'? ⁴⁸ ¿Naru' guyéajlé'tsé' Lë' nu bönni' unná bë' o nu bönni' yudo' fariseo? ⁴⁹ Libí'ili' dxáli' dö' tu' cabí rácali' xibá queé' Dios.

⁵⁰ Zoé' ca' Nicodemo ni', bönni' na' bidxiné' ga zoé' Jesús chi'i dzó'ölö, tu' náquié' ca' bönni' yudo' fariseo, ate' rë' légaquié':

⁵¹ —¿Naru' richúguru' queé' tu bönni' gátié' lu xibá queéru' channö cabí yóniru' lë' zí'alö para inóziru' bi bené'?

⁵² Ní'irö bulu'bi'ë didza' ia'zica'rë' na', të' lë':

—¿Nácatso' ca' li' bönni' Galilea? Bulaba le nazúaj lu guichi lá'ayi, ate' uyú' catu caz birúaj nitúé' bönni' ru'ë didza' uláz queé' Dios luyú Galilea.

⁵³ Ní'irö yøjhuójgaquié' lidxi que queégaquié'.

8

¹ Guyijé' Jesús ga naca lu Guí'a Yaga Olivo.

Nigula naguítsjanu xibá que yöl-la' nutsaga na'

² Cate' za' rení' budxiné' Jesús ra' yudo', ate' bila'dxín yúgu'të bönachi ga zoé'. Gurö'ë Jesús, rusédiné' légaquié'. ³ Ní'irö yugu' bönni' yudo' usedi, en yugu' bönni' yudo' fariseo duché'ëgaquié'-nu tu nigula ga zoé' Jesús, tu' gula'dzóliné'-nu ni' riguítsjanu xibá que yöl-la' nutsaga na'. Bulu'sudxiné'-nu lógaca bönachi na' tu'zé' nágagaca Jesús, ⁴ ate' të' Lë':

—Bönni' Usedi, nigula ni guzöntu'-nu ni' runnu dul-la' riguítsjanu xibá que yöl-la' nutsaga na'. ⁵ Lu xibá queé' Moisés, gunná bé'ené' netu' uládxí'tu'-nu guiój nu nigula runnu caní, para gátinu. ¿Náxziga Li', nacxi rnno'?

⁶ Caní gula'nné' para ila'zí' bë'ë Jesús para ila'zéqui'né' ulu'zéguié' Lë' didza'. Ní'irö biyéchué' Jesús, ruyúé' lu yu, en ruzúajé' lu yu na' len xibón në'ë. ⁷ Cate' gula'nábide'ené' Lë', ní'irö buzuíné' Jesús, en rë' légaquié':

—Núli' cabí nunli' dul-la' isí loli' uládxí'li'-nu guiój.

⁸ Leyúbölö biyéchué' Jesús, ruyúé' lu yu, en buguélé'ë ruzúajé' leyúbölö lu yu na'.

⁹ Cate' bila'yönné' didza' ni, bulu'xösa ládxí'do'gaquié' légaquié', ate' bila'ruájé' tu tué'. Gula'sí lógaquié' bönni' gúlarö ga bidxinté bönni' cuidi'. Nagá'ané' Jesús ni', dzáganu nigula na' Lë' gatsaj láhui'lö nupa na' tu'zé' nágagaca Lë'. ¹⁰ Ní'irö buzuíné' Jesús leyúbölö, en cuntú nu bilé'ené' nu ruzegui lënu didza', pero túzinu nigula na', ate' rë'ë-nu:

—Nigúla, ¿gazxi nacua' nupa na' bulu'zegui li' didza'? ¿Naru' cabí zoa nu bönni' richúguië' quiu'?

¹¹ Lënu rnnanu:

—Cuntu nu caz, Xan.

Ní'irö Jesús rë'ë-nu:

—Lëzca' neda', biti' richuga' quiu'. Böaj lidxu', en bíti'rö gunu' dul-la'.

Náquië' Jesús bení' quégaca bönachi yödzölió

¹² Leyúbölö Jesús bé'lenë' bönachi didza', rnnë':

—Neda' naca' bení' quégaca bönachi yödzölió. Nu bönni' zá'lenë' neda', biti' të' ga naca chul-la que dul-la', pero tu bení' sóalen bönni' na' le uluí'i lë' naca gata' yöl-la' na'bán idú queë'.

¹³ Ní'irö të' Lë' bönni' yudo' fariseo, ta'nnë':

—Li' runu' ba nalí que la' cuinsu'. Biti' naca lesaca' le runu' ba nalí. Nítisö naca.

¹⁴ Bubi'ë didza' Jesús, rë' légaquië':

—Sal-la' runa' ba nalí que la' cuinsa', idütë li naca le runa' ba nalí, tu' nözda' ga birúaja', en ga tseja', pero libí'ili' biti' nózili' gazxi za'a, en calëga gazxi tseja'. ¹⁵ Libí'ili' ruchi'a rusöröli' ca nátagaca le taca yödzölió ni, pero neda', rácasö quia' cuntu nu bönni' ruchi'a rusöróa' queë'. ¹⁶ La'tu' uchi'a usöróa', ca nácatë uchi'a usöróa', tu' calëga néda'sö uchi'a usöróa', pero Xuza' nasól-lë'ë neda' gunë' neda' tsözxón. ¹⁷ Lëzca' caní lu xibá queë' Moisés nazúaj lu guichi le rnna: Le tunë' ba nalí chopë' bönni', idütë li naca. ¹⁸ Neda' runa' ba nalí que la' cuinsa', ate' Xuza' nasól-lë'ë neda', runë' ca' ba nalí quia'.

¹⁹ Ní'irö bönni' yudo' fariseo na' gula'nábinë' Lë', ta'nnë':

—¿Gazxi zóatsë' Xuzu'?

Bubi'ë didza' Jesús, rë' légaquië':

—Biti' núnbë'ëli' neda', en biti' núnbë'ëli'-në' Xuza'. La'tu' núnbë'ëli' neda', lëzca' Xuza' gúnbë'ëli'-në'.

²⁰ Yugu' didza' ni bë'ë Jesús cate' ni' zoë' rusédinë' bönachi lu chila yudo', ga na' nacua' guí'ina gapa ta'gu'ë gun que yudo', pero cuntu nu guzxón Lë', tu' cabí ridxini dza queë' tsu'ë lu ná'agaquië'.

Rnnë' Jesús: "Ga tseja' neda', biti' gaca guídali'"

²¹ Leyúbölö Jesús rë' légaquië', rnnë':

—Uzá'a yödzölió ni, ate' uguí'jali' nu usólá libí'ili', pero ugá'ana dul-la' nabága'li', en gátili'. Ga tseja' neda', biti' gaca guídali'.

²² Ní'irö gulu'ë didza' bönni' judío unná bë', ta'nnë':

—¿Naru' guti cuinë'? Rnnë': "Ga tseja' neda', libí'ili' biti' gaca guídali'."

²³ Jesús rë' légaquië':

—Libí'ili' nácali' que luyú dë cadxí'ilö ni, pero neda' za'a yehua' yubá xitsá'. Libí'ili' nácali' bönachi yödzölió ni, pero neda' biti' naca' bönni' yödzölió ni. ²⁴ Que lë ni na' gudxa' libí'ili': Ugá'ana dul-la' nabága'li', en gátili'. Channö cabí tséajlë'ëli' naca caza' Nu usólá, ugá'ana dul-la' nabága'li', en gátili'.

²⁵ Ní'irö gula'nábinë' Lë', ta'nnë':

—¿Nuzxi caz nacu'?

Jesús rë' légaquië':

—Naca' la' leze ca na' chigudxa' libí'ili' dza ni'te. ²⁶ Zían le ral-la' guía' libí'ili', en uchi'a usöróa' le naca queé'li'. Didza' idütë li ru'ë Xuza' nasól-lë'ë neda', ate' didza' riyönda' ru'ë Lë', ruí'ilena' bönachi yödzölió ni.

²⁷ Biti' gula'yéajni'inë' ruí'ilenë' légaquië' didza' ca naca queë' Dios Xuz. ²⁸ Que lë ni na' Jesús rë' légaquië':

—Cate' idxín dza uchísali' neda', Bönni' Guljé' Bönachi, gútili' neda', ní'irö guéquite'ëli' naca caza' Nu rusólá, en biti' bi runa' rácasö quia', pero ca na' ruluí'inë'

Xuza' neda', ca' ruá'a didza'. ²⁹ Xuza' nasól-lë'ë neda' zóalenë' neda'. Biti' nucá'anë' Xuza' neda' tuza', tu' rúntica'sa' le raza ládxe'ë Lë'.

³⁰ Cate' bë'ë Jesús didza' ni, bönni' zían gula'yéajlë'ë Lë'.

Nupa nácaté zxi'inë' Dios, en nupa nadzúngaca lu na' dul-la'

³¹ Ní'irö Jesús gudxë' yugu' bönni' judío na' ta'yéajlë'ë Lë', rnnë':

—Channö gúntica'sili' ca rna xtídza'a, gácali' idú bönni' uséda quia'. ³² Gúnbë'ëli' le naca idútë li, ate' le naca idútë li na' usólá libí'ili'.

³³ Bulu'bi'ë didza', të' Lë':

—Abraham naquië' xuz gudödi queëtu', en cuntú nu ben netu' bönni' nadó'ogaca. ¿Rnnatso': "Usólá libí'ili'?"

³⁴ Jesús rë' légaquië':

—Le nácatë rea' libí'ili': Yúgu'të nupa tun dul-la', nadzúngaca lu na' dul-la'. ³⁵ Nu naca bönni' nadó'o bití' ugá'anatica'sö lidxë' xan yu'u, pero nu naca zxi'inë' xan yu'u na' rugá'anatica'sö lidxi nu na' naca xan yu'u. ³⁶ Caní naca, channö Nu na' naca Zxi'inë' Dios usólá libí'ili', le nácatë uláli'. ³⁷ Nözda' naquië' Abraham xuz gudödi queëli', pero rizóa ribó'öli' gútili' neda', tu' cabí nazí' lu ná'ali' xtídza'a. ³⁸ Neda' ruá'a didza' ca naca le bilé'eda' ga na' zoë' Xuza', pero libí'ili' runli' le biyónili' ga zoa xuz quézili'.

³⁹ Bulu'bi'ë didza', të' Lë':

—Abraham náquië' xuztu'.

Ní'irö Jesús rë' légaquië':

—La'tu' nácali' idú zxi'ini xi'sóë' Abraham, gunli' ca na' benë' Abraham. ⁴⁰ Na'a, rizóa ribó'öli' gútili' neda', sal-la' ru'ílena' libí'ili' didza' idútë li, didza' na' biyönda' bë'ë Dios. Biti' benë' Abraham caní. ⁴¹ Libí'ili' runli' ca run xuz quézili'.

Ní'irö të' Lë':

—Netu' bití' ca' nácatu' bi'i lando'. Tuzë' Dios náquië' Xuztu'.

⁴² Ní'irö Jesús rë' légaquië':

—La'tu' náquië' Dios idú Xúzili', huadxí'ili' neda', tu' birúaja' neda' ga zoë' Dios, en bida' luyú ni, ate' calëga rácasö quia' bida', pero Dios caz gusól-lë'ë neda'. ⁴³ ¿Bizx que bití' gaca tséajni'ili' didza' ruá'a? Naca tu' cabí ré'ënili' uzé nágali' xtídza'a. ⁴⁴ Xuz quézili' naca tu' xihui'. Néquili' que tu' xihui', en ré'ënili' gunli' le rizé ladxi' xúzili' na'. Dza ni'te naca tu' xihui' nu guti bönachi, en cabí nazí' lu në'e le naca idútë li, tu' cabí ru'í didza' idútë li. Cate' rizí' yë' tu' xihui', ca naca caz ru'í didza', tu' naca nu rizí' yë', en naca ca xúzgaca caz nupa ta'z' yë'. ⁴⁵ Tu' ruá'a neda' didza' idútë li bití' réajlë'ëli' neda'. ⁴⁶ ¿Núzxilöli' gaca usubága'li' neda' dul-la'? Channö ruá'a didza' idútë li, ¿bizx que bití' réajlë'ëli' neda'? ⁴⁷ Nu naca queë' Dios, ruzé nagui xtídzë'ë Dios, pero libí'ili', tu' cabí nácali' queë' Dios, bití' ruzé nágali' xtídzë'ë.

Cristo zoa cazë' z'atëlö ca Abraham

⁴⁸ Ní'irö bulu'bi'ë didza' yugu' bönni' judío, të' Jesús:

—Catëz gunnatu' cate' gunnatu' nacu' bönni' Samaria, ate' dzaga tu' xihui' Li'.

⁴⁹ Bubi'ë didza' Jesús, rë' légaquië':

—Bití' dzaga tu' xihui' neda'. Neda' runa' Xuza' bal, ate' libí'ili' ruzóali' neda' tsölá'alö.

⁵⁰ Bití' runa' zxön cuina'. Zoa Nu run zxön neda', ate' Lë' ruchi'a rusöröë' rë'u. ⁵¹ Le nácatë rea' libí'ili': Nu bönni' si' lu në'ë xtídza'a, bití' ca' gátië' bönni' na'.

⁵² Ní'irö yugu' bönni' judío na' të' Lë', ta'nné':

—Na'a réquibe'etu' dzaga tu' xihui' Li'. Abraham gútië', ate' gulátië' ca' bönni' gulu'ë didza' uláz queë' Dios, pero Li' rno': "Nu bönni' si' lu në'ë xtídza'a, bití' ca' gátië' bönni' na'." ⁵³ ¿Naru' nácatërötso' Li' zxön ca xúziru' Abraham? Gútië' lë', ate' gulátië' ca' bönni' gulu'ë didza' uláz queë' Dios. ¿Nuzxi caz run cuinu'?

⁵⁴ Bubi'ë didza' Jesús, rë' légaquië':

—Channö neda' guna' zxön cuina', yöl-la' zxön na' bití' bi gaca. Xuza' runë' neda' zxön, ate' libí'ili' rnnali' náquië' Dios queëli'. ⁵⁵ Libí'ili' bití' núnbë'ëli'-në' Dios Xuz, pero

neda' núnbë'a-në'. La'tu' innía': Biti' núnbë'a-në', gaca' nu rizi' yë' ca na' nácali' libí'ili', rizi' yé'ëli'. Na'a, le nácate núnbë'a-në', en nazí' lu na'a xtídzë'ë. ⁵⁶ Xúzili' Abraham budzéjanë' tu' ral-la' ilé'enë' dza soa' yödzölió ni, en sal-la' gútië' dza ní'te, bilé'enë' le, en budzéjade'enë'.

⁵⁷ Ní'irö yugu' bönni' judío na' tē' Jesús, ta'nné':

—Biti' yuí'inu' chi-un iz. ¿Naru' bilé'etsenu' Abraham?

⁵⁸ Jesús rē' légaquië':

—Le nácate rea' libí'ili': Zí'atëlö ca soë' Abraham, neda' zoa caza'.

⁵⁹ Ní'irö gula'guélé'ë guió'j para ulu'laxë' Jesús, pero Lē' bunítitë cuinë', en burúajë' lö'a yudo' na'. Gudödë' gatsaj láhui'lö ga na' nacu'ë, ate' söhuó'jë'.

9

Ruúnë' Jesús tu bönni' guljë' nachúl-latë lahuë'

¹ Cate' gudödë' Jesús tu lataj, bilé'enë' tu bönni' ni' guljë' nachúl-latë lahuë'.

² Gula'nábinë' Jesús bönni' usëda queë', ta'nné':

—Bönni' Usedi, ¿nuzxi ben dul-la'? ¿Naru' bönni' ni o xuz xiné'ë tu' guljë' nachúl-latë lahuë'?

³ Bubi'ë didza' Jesús, rē' légaquië':

—Biti' naca tu' benë' dul-la' bönni' ni, en calëga tu' gulunë' dul-la' xuz xiné'ë, pero naca para ilá' lahui yöl-la' huáca queë' Dios ní'a queë' bönni' ni. ⁴ Run bayudxi gunru' xichinë' Xuza' nasól-lë'ë neda', tsanni ni naca ca lahui' dza. Huadxín dza gaca chul-la que yöl-la' guti, cate' cuntú nu gaca gun dxin. ⁵ Tsanni ni zoa' yödzölió ni, naca' bení' quégaca bönachi yödzölió.

⁶ Cate' Jesús budxi bë'ë didza' ni, gurú'unë' zxöna' lu yu, en benë' gúna'do' len zxöna' na', ate' bugu'ë guna' na' guió'j lahuë' bönni' na' nachul-la lahuë'. ⁷ Ní'irö rē' lë':

—Guyéaj yójtibi lo' lu beaj nisa nazí'i le Siloé.

Siloé naca tu didza' hebreo le rna: Nasöl-la'.

Ní'irö bönni' na' nachul-la lahuë' guyijë' ni', yójtibi lahuë'. Cate' buzé'ë ni' chirilé'enë'.

⁸ Ní'irö bulu'bani bönachi dzaga yu'u queë', en nupa ni' bila'lé'e lë' zí'atëlö cate' ni' nachul-la lahuë', ta'nná:

—¿Naru' calëga bönni' ni bönni' na' ribö'ë rinabë' nu bi unödzej queë'?

⁹ Bal-lë' ta'nné':

—Lë' na'.

Ia'bal-lë' ta'nné':

—Calëga lë', pero ca rna' lahuë' bönni' na', rna' lahuë' ca' bönni' ni.

Lë' rnnë':

—Neda' na'.

¹⁰ Ní'irö gula'nábinë' lë', ta'nné':

—¿Nacxi caz guca, gualaj guió'j lo'?

¹¹ Bubi'ë didza', rē' légaquië':

—Bönni' na' lë' Jesús benë' gúna'do', ate' gudëbë' gúna'do' na' guió'j lahua', en gudxë' neda': “Guyéaj ra' beaj nisa nazí'i le Siloé, yójtibi lo'.” Guyija' ni', yójtibi lahua', ate' gualajtë guió'j lahua'.

¹² Ní'irö gula'nábinë' lë', ta'nné':

—¿Gazxi zoë' bönni' na'?

Lë' rē' légaquië':

—Biti' nözda'.

Yugu' bönni' yudo' ta'náb yúdxinë' bönni' na' gualaj guió'j lahuë'

¹³ Ní'irö gula'ché'ë bönni' na' zí'alö nachul-la lahuë', en bulu'sudxinë' lë' lógaquië' bönni' yudo' fariseo. ¹⁴ Tu' naca dza lá'ayi quégaquië' cate' benë' Jesús gúna'do' na', en

gusaljé' guió'j lahué' bönni' na' zí'alö nachul-la lahué', ¹⁵ que læ ni na' yugu' bönni' yudo' fariseo na' gula'nábiné' læ' leyúbölö nacxi guca gualaj guió'j lahué'. Læ' gudxé' légaquié':

—Budxié' gúna'do' guió'j lahua', ate' yójtiba' le, en rilé'eda'.

¹⁶ Ní'irö gulu'ë didza' bal-lé' bönni' yudo' fariseo na', ta'nné':

—Biti' nasöl-lé' Dios bönni' na', tu' cabí rapa chi'ë dza lá'ayi.

Ia'bal-lé' ta'nné':

—¿Naru' huácatsö tu bönni' dul-la' guné' yugu' yöl-la' huáca runé' bönni' na'?

Caní guca, bila'rúajé' choplö. ¹⁷ Leyúbölö gula'nábiné' bönni' na' zí'alö nachul-la lahué', ta'nné':

—¿Bizxi rnno' li' queé' bönni' na', gusaljé' guió'j lo'?

Læ' rnné':

—Náquié' bönni' ru'ë didza' uláz queé' Dios.

¹⁸ Biti' gula'yéajlé'ë bönni' judío unná bë' na' guljé' nachúl-laté lahué' bönni' na', en gualaj guió'j lahué', cate' bulu'lídzaré' xuz xiné'ë bönni' na' gualaj guió'j lahué', ¹⁹ ate' gula'nábiné' légaquié', ta'nné':

—¿Naru' náquié' bönni' ni xzí'inili', rnnali' guljé' nachúl-laté lahué'? ¿Nacxi caz naca rilé'ené' na'a?

²⁰ Bulu'bi'ë didza' xuz xiné'ë na', tē' légaquié':

—Nóztu' bönni' ni náquié' xzí'initu', en guljé' nachúl-laté lahué', ²¹ pero nacxi guca, rilé'ené' na'a, biti' nöztu', en nuzxi na' gusalaj guió'j lahué', biti' nöztu'. Guli'nabi-né' læ', tu' chináquié' bönni' chinaca. Læ' cazé' quíxjö'ë.

²² Caní gula'nné' xuz xiné'ë bönni' na' zí'alö nachul-la lahué', tu' tádxiné' yugu' bönni' judío unná bë', tu' chigulún xtídza'gaquié' bönni' judío na' channö nu bönni' si' lu në'ë Jesús náquié' Cristo, tsaz ulu'béajé' bönni' na' lu yu'u ga tu'dubé' bönni' judío, en tu'sédé' queé' Dios. ²³ Que læ ni na' gula'nné' xuz xiné'ë: “Guli'nabi-né' læ', tu' chináquié' bönni' chinaca.”

²⁴ Ní'irö yugu' bönni' judío unná bë' bulu'lidzé' leyúbölö bönni' na' zí'alö nachul-la lahué', ate' tē' læ':

—Ní'a queé' Xanru' Dios gudixjö' le nácaté. Netu' réquibe'etu' bönni' na' náquié' bönni' dul-la'.

²⁵ Ní'irö bubi'ë didza', rnné':

—Channö náquié' bönni' dul-la' biti' nözda'. Tu le nözda'. Zí'alö nachul-la lahua', ate' na'a rilé'eda'.

²⁶ Gula'nábiné' læ' leyúbölö, ta'nné':

—¿Bizxi bené' quiu'? ¿Nacxi bené' gusaljé' guió'j lo'?

²⁷ Bubi'ë didza', rē' légaquié':

—Chigúdxí caza' libí'ili', pero biti' gú'unili' si' lu ná'ali' xtídza'a. ¿Bizx que na' ré'ënili' yónili' leyúbölö? ¿Naru' ré'ënili' tá'ali' ca' Læ'?

²⁸ Ní'irö bulu'lidza' zí'ë læ', ta'nné':

—Li' do'o Læ', pero netu' dá'atu' Moisés. ²⁹ Netu' nöztu' Dios bé'lené' Moisés didza', pero ca naca queé' bönni' ni, biti' nöztu' nuzxi caz gusöl-la' Læ'.

³⁰ Ní'irö bubi'ë didza' bönni' na', rē' légaquié':

—Læ' ni run ga rubánida'. Libí'ili' biti' nózili' nuzxi gusöl-la' bönni' ni, ate' Læ' gusaljé' guió'j lahua'. ³¹ Nóziru' biti' riyönné' Dios yugu' bönni' dul-la', pero channö reaj ládxé'ë tu bönni' Dios, en runé' ca ré'ëné' Læ', Dios riyönné' bönni' ni. ³² Dza ni'te biti' riyón nu gunná channö nu bönni' gusaljé' guió'j lahué' tu bönni' guljé' nachúl-laté lahué'. ³³ La'tu' cabí náquié' bönni' ni queé' Dios, biti' bi gaca guné'.

³⁴ Ní'irö bulu'bi'ë didza', tē' læ':

—Ca gulju' naca bë' nabágu'u dul-la'. ¿Naru' li' ruséditsenu' netu'?

Ní'irö bulu'béajé' læ' ní'ilö.

Nupa nácaqaca chul-la niti

³⁵ Biyönnë' Jesús ca gulunë' bönni' judío unná bë', bulu'béajë' bönni' na' zí' alö nachul-la lahuë'. Cate' budzáguë' lë', gudxë' lë':

—¿Ba réajlë'u Zxí'inë' Dios?

³⁶ Bubi'ë didza' lë', rë' Jesús:

—¿Nuzxi na', Xan, para tséajlë'a Lë'?

³⁷ Jesús rë' lë':

—Chibilé'enu' Lë', ate' neda' ni ru'í'lena' li' didza', naca' Zxí'inë' Dios.

³⁸ Ní'irö bönni' na', gyalaj guió'j lahuë', guyéaj ladxë'ë Jesús, en rë' Lë':

—Xan, réajlë'a Li'.

³⁹ Jesús rnnë':

—Para uchi'a usöró'a bönachi bida' yödzölió ni, para ulu'lé'e nupa nachul-la nanítiga-gaca, en ilaca ca nu nachul-la lahui nupa téquiguequi ta'lé'e.

⁴⁰ Cate' yugu' bönni' yudo' fariseo na' nacua'lenë' Jesús bila'yönnë' didza' ni, ní'irö tē' Lë':

—¿Naru' nachul-la nanítitsatu'?

⁴¹ Bubi'ë didza' Jesús, rë' légaquië':

—La'náru' nachúl-lasö guió'j loli', bití' ibága'li' dul-la'. Na'a rnnali': "Rilé'etu'." Que lë ni na' nabága'li' dul-la'.

10

Rucúdzu'ë didza' Jesús que lë'a quégacaba' bö'cu' zxila'

¹ Gunnë' ca' Jesús:

—Le nácatë rea' libí'ili': Nu bönni' bití' razië' saca' ga nu riyaza lë'a quégacaba' bö'cu' zxila', pero tsázië' saca' ga yúbölö, bönni' ni náquië' gubán, en ribán cazë'. ² Nu bönni' razië' saca' ga nu riyaza náquië' bönni' run chí'i cazë' bö'cu' zxila' na'. ³ Para tsázië' bönni' ni, risalaj nu zoa run chí'i ga nu riyaza, ate' ta'yóniba' bö'cu' zxila' na' chí'ë, en tu'únbë'ëba'-në'. Lë' rulidzë'-ba' que queé'ba' ca lé'gacaba', en rubéajë' yugu' bö'cu' zxila' na'. ⁴ Cate' chinubéajë'-ba' yúgu'tëba' bö'cu' zxila' néquigacaba' queë', röjnórue' lógacaba', ate' bö'cu' zxila' na' röjnógacaba' lë', tu' tu'únbë'ëba' chí'ë. ⁵ Bönni' yúbölö bití' tsöjnógacaba' lë', pero ulu'zxúnnajba' queë', tu' cabí núnbë'gacaba' chí'igaquië' bönni' yúbölö.

⁶ Le rucudzu' didza' ni gudxë' Jesús légaquië', pero bití' gula'yéajni'inë' lë na' rë' légaquië'.

Náquië' Jesús ca bönni' rapa chí'ë-ba' bö'cu' zxila'

⁷ Ní'irö Jesús rë' légaquië' leyúbölö, rnnë':

—Le nácatë rea' libí'ili': Neda' naca' ca tu ga ta'yázaba' bö'cu' zxila'. ⁸ Chigula'lé'ë zían bönni' gula'nnë' nácaquië' Cristo, pero yúgu'të bönni' na' bila'dxinë' zí'alö ca neda', nácaquië' gubán, en ta'bán cazë', ate' bití' bulu'zé nágaba' bö'cu' zxila' na' légaquië'.

⁹ Neda' naca' ca tu ga nu riyaza. Núti'tës bönni' tsázalenë' neda', ulé' bönni' na', en gáquië' ca tuba' bö'cu' zxila' rázaba', en rurúajba', en ridzóliba' le ráguba'.

¹⁰ 'Za'zë' bönni' gubán para cuanë'-ba', en gútië'-ba', en usunítie'-ba'. Neda' bida' para gata' yöl-la' na'bán idú quégaca bönachi nácaqaca ca bö'cu' zxila' quia'. Le nácatë gata' quégaquië' yöl-la' na'bán idú na'. ¹¹ Neda' run chí'igaca' bönachi quia' ca runë' bönni' na', lu yöl-la' dxi'i ladxi' queë' rapa chí'ë yugu' bö'cu' zxila'. Bönni' na' rapa chí'ë-ba' bö'cu' zxila' caní zoa cazë' udödë' yöl-la' na'bán queë' ni'a quégacaba' bö'cu' zxila' queë'.

¹² Tu bönni' nazxjë' rapa chí'ë-ba' bö'cu' zxila', cate' rilé'enë' zá'aba' bö'cu' gu'a sínia', rucá'anë'-ba' bö'cu' zxila' na', en ruzxúnnajë', ate' bö'cu' gu'a sínia' na' ráguya'aba' yugu' bö'cu' zxila' na', en rusilásiba' lé'gacaba'. Caní runë' bönni' na' rapa chí'ë-ba' bö'cu' zxila' tu' cabí náquië' idú nu run chí'i-ba' bö'cu' zxila', ate' bití' néquigacaba' que cazë' bö'cu'

zxila' na'. ¹³ Ruzxúnnajë' bönni' nazxjë' na' tu' rapa chi'ë-ba' bö'cu' zxila' na' para sí'sisë' dumí, en bití' ruí'i ládxi'ë-ba' bö'cu' zxila' na'.

¹⁴⁻¹⁵ 'Neda' naca' bönni', lu yöl-la' dxi'i ladxi' quia' run chí'igaca'-ba' bö'cu' zxila'. Ca na' núnbë'ë Xuza' neda', ate' neda' núnbë'a-në' Xuza', lësca' caní núnbe'egacada' bönachi quia' nácagaca ca bö'cu' zxila' quia', en rudöda' yöl-la' na'bán quia' ni'a quégacaba' bö'cu' zxila' na', ate' bö'cu' zxila' na' néquiqueuiba' quia' núnbë'gacaba' neda'. ¹⁶ Lësca' nacuá'aba' ia'zica'röba' bö'cu' zxila' quia' bití' nabábagacaba' ni. Lësca' légacaba' ral-la' tsöjxí'gaca'-ba'. Léga'caba' ulu'zé nágaba' chi'a, en ilácaba' tuz len ia'zica'röba' bö'cu' zxila' quia', ate' neda' caz gun chí'igaca'-ba'.

¹⁷ 'Que lë ni na' nadxi'inë' Xuza' neda', tu' rudöda' yöl-la' na'bán quia', gu'a lataj nu guti neda', ate' uzi'a le leyúbölö, ubana' lu yöl-la' guti. ¹⁸ Cuntu nu bönni' séqui'në' gútië' neda', pero neda' rudödi caza' yöl-la' na'bán quia', gátia'. Dë lu na'a udöda' le, en dë lu na'a uzi'a le leyúbölö. Caní naca le gunná bé'enë' Xuza' neda'.

¹⁹ Cate' yugu' bönni' judío bila'yönnë' didza' ni, leyúbölö bila'rúajë' choplö ca téquinë' queë'. ²⁰ Zíanë' ta'nnë':

—Yu'u bö' xihui' Lë', en nachixi icjë'. ¿Bizx que ruzé nágali' Lë'?

²¹ Ia'bal-lë' ta'nnë':

—Bití' ca' ru'ë caní didza' bönni' yu'u bö' xihui' lë'. ¿Naru' huácatsö bö' xihui' usalaj guiój lógaquië' bönni' nachul-la lógaquië'?

Yugu' bönni' judío unná bë' tu'zöë' Jesús tsölä'alö

²² Raca beo' ziaga, en naca dza na' tunë' laní yödzo Jerusalén, tu'subanë' ca gula'gu'ë yudo' quégaquië' lu në'ë Dios. ²³ Ridé' Jesús ra' yudo' ga naca chila que, nazí'i le Chila Queë' Salomón. ²⁴ Yugu' bönni' judío unná bë' gula'gu'ë Jesús lé'alö, en të' Lë':

—¿Bátaxi caz usanu' runu' ga ró'ötu' böniga? Channö nacu' li' Cristo, ca nácate' gudíxjö'i netu'.

²⁵ Jesús rë' légaquië':

—Chigudxi caza' libí'ili', pero bití' réajlë'ëli' neda'. Yugu' dxin runa' tu' dë lu na'a uláz queë' Xuza' nácagaca bë' Nu naca'. ²⁶ Libí'ili' bití' réajlë'ëli' neda', tu' cabí nabábalenlí' nupa nácagaca bö'cu' zxila' quia', ca na' chigudxi caza' libí'ili'. ²⁷ Ta'yóniba' bö'cu' zxila' quia' chi'a, en tu'únbe'eba' neda', ate' neda' núnbe'egacada'-ba', ate' ridijácalenba' neda'. ²⁸ Neda' runödza' yöl-la' na'bán idú quégacaba', ate' bití' ca' ila'nítiba', ate' cuntu nu sequi' ubéaj léga'caba' lu na'a neda'. ²⁹ Xuza' Dios bennë' quia' léga'caba', ate' Lë' nápatë're' yöl-la' huáca ca yúgu'të bönachi, ate' cuntu nu sequi' ubéaj léga'caba' lu në'ë Xuza'. ³⁰ Neda', en Dios Xuz, tuz nácatu'.

³¹ Leyúbölö yugu' bönni' judío unná bë' na' bulu'guéle'ë guiój ulu'ladxë' Jesús. ³² Jesús rë' légaquië':

—Zian le naca dxi'a bena' loli' tu' dë lu na'a uláz queë' Xuza'. ¿Ni'a que bízxilö dxin dxi'a ni uládxí'li' neda' guiój?

³³ Bulu'bi'ë didza' bönni' judío unná bë' na', të' Lë':

—Ni'a que dxin dxi'a bití' uládxí'tu' li' guiój, pero tu' cabí rnníó' dxi'a queë' Dios, tu' nacu' li' bönáchisö, en run cuinu' Dios.

³⁴ Bubi'ë didza' Jesús, rë' légaquië':

—¿Naru' cabí nazúaj lu guichi lu xibá queéli' ca gunné' Dios, rnna: “Neda' rnnía': Nácali' yugu' dios”? ³⁵ Nöz quéziru' le nazúaj lu guichi lá'ayi nazúaj tsaz. Lu guichi lá'ayi na' ruí'i lágaquië' dios, bönni' ni' Dios bé'lenë' légaquië' didza'. ³⁶ Dios bubéajë' neda' quez queë', en gusól-lë'ë neda' yödzölió ni. ¿Naru' rnnátsali' quia': “Li' bití' rnníó' dxi'a queë' Dios”, tu' gunnía': Zxí'inë' Dios naca'? ³⁷ Channö cabí runa' dxin budödë' Xuza' Dios lu na'a, bití' ral-la' tséajlë'ëli' neda'. ³⁸ Channö runa' dxin budödë' Dios lu na'a, sal-la' bití' réajlë'ëli' neda' caz, guli'tséajlë' le nácagaca bë' dxin na' runa', para guéquibe'eli' náquië' Dios Xuz tuz len neda', ate' neda' ca' naca' tuz len Xuza'.

³⁹ Leyúbölö gula'zóa gula'bö'ë ila'zönë' Jesús, pero Lë' bulé' lu ná'agaquië'.

⁴⁰ Ní'irö guyijë' Jesús leyúbölö ia'tsölá'a yegu Jordán, ga ni' buquilë' Juan bönachi nisa zí'atëlö, ate' bugá'anë' Jesús ni'. ⁴¹ Bila'dxin bönachi zían ga zoë' Jesús, ta'nná:

—Le nácatë bití' benë' Juan nitú yöl-la' huáca zxön, pero yúgu'të le gunné' Juan na' ca ral-la' gaca queë' bönni' ni, idútë li zeaj naca.

⁴² Que lë ni na' gula'yéajlë'ë bönni' zían Jesús ga na' zoë'.

11

Le guca cate' gútië' Lázaro

¹ Dza ni' ré'enë' Lázaro, bönni' Betania, le naca ládzagacanu María, en Marta. Nácanu Marta na' zxílanu María na'. ² Nácanu María na' nigula zanë' Lázaro, bönni' na' ré'enë', en nácanu ca' nigula na' gulú'unu le rilá' zxixi ni'ë Xanru', en buzxinu ni'ë len guitsa' ícjanu. ³ Gula'sól-la'nu nigula zanë' Lázaro na' nu yójódx Jesús, gunná:

—Xan, buyútsöca', ré'enë' Lázaro, bönni' na' nadxí'inu'-në'.

⁴ Cate' biyönnë' Jesús didza' ni, gudxë' nupa nacuá' ni', rnnë':

—Yödzöhué' ni bití' naca le guti lë' tsaz, pero naca para ilá' lahui yöl-la' zxön queë' Dios, ate' ni'a que yödzöhué' ni ilá' lahui ca' yöl-la' zxön quia' neda', Zxí'inë' Dios.

⁵ Jesús nadxí'inë' Marta, en nigula zxílanu Marta na', en Lázaro na'. ⁶ Sal-la' nadxí'inë' Jesús légaquië', cate' biyönnë' ré'enë' Lázaro, bugá'anë' ga na' zoë' ia'chopa dza ca'.

⁷ Cate' bizá'a chopa dza na', Jesús gudxë' yugu' bönni' usëda queë', rnnë':

—Uyéajru' leyúbölö luyú Judea.

⁸ Ní'irö yugu' bönni' usëda queë' të' Lë', ta'nnë':

—Bönni' Usedi, si' gula'zóa gula'bö'ë bönni' judío unná bë' ni' ulu'ladxë' Li' guiój. ¿Naru' uyéajtso' leyúbölö ni'?

⁹ Bubi'ë didza' Jesús, rë' légaquië':

—Nacuá' caz chinnu hora lahui' dza. Nu bönni' ridé' lahui' dza, bití' tsöjchégu'ë, tu' rilé'enë', tu' zóalen lë' bení' zoa yödzölió ni. ¹⁰ Channö ridé' bönni' na' chí'i dzó'ölö, röjchégu'ë, tu' cabí zóalen bení' lë'.

¹¹ Cate' budxi bë'ë Jesús didza' ni, ní'irö gudxë' légaquië':

—Rásië' Lázaro, böchi' luzá'aru', ate' tseja' neda', en usubana'-në'.

¹² Ní'irö yugu' bönni' usëda queë' të' Lë', ta'nnë':

—Xan, channö rásië', huóáquië'.

¹³ Gunné' caní Jesús tu' chigútië' Lázaro, pero légaquië' téquinë' gunné': Rásisë' Lázaro.

¹⁴ Ní'irö Jesús gudxë' légaquië' yálajdo', gunné':

—Chigútië' Lázaro. ¹⁵ Rudzëjada' tu' cabí zoa' ni', tu' gaca na'a tu le uzí'ili' xibé, le gun ga tséajlë'ëli' neda'. Uyéajru' na' ga na' dë' Lázaro.

¹⁶ Ní'irö Tomás, bönni' na' tu'ë lë', Bönni' Bilidí' gudxë' ia'zica'rë' bönni' usëda queë' Jesús, rnnë':

—Uyéajru' ca' rë'u, en gátillenru'-në'.

Náquië' Jesús Nu rusubán nupa chinátigaca, enca' Nu nabániru'

¹⁷⁻¹⁹ Dë yödzö Betania gála'sö ga dë Jerusalén na', le naca ca rizá'aru' tu hóratëz. Que lë ni na' chibila'dxinë' zían bönni' judío ga na' nacuá'anu Marta, en María, en tu'hué tsáhuë'ë légacanu tu' gútië' bönni' zángacanu. Cate' Jesús bidxinë' ni', biyönnë' chiguca tapa dza yu'ë Lázaro na' yeru ba. ²⁰ Cate' biyóninu Marta didza' zë'ë Jesús, ní'irö birúajnu yu'u, yöjtságanu Lë', pero María bugá'ananu yu'u na'. ²¹ Marta na' rënu Jesús:

—Xan, la'tu' zu' ni, bití' gátie' bönni' zana'. ²² Lësca' na'a, nözda' yúgu'të le inábinu' Dios, Lë' gunné' quiu'.

²³ Jesús rë'ë-nu:

—Ubanë' bönni' zanu'.

²⁴ Marta rënu Lë':

—Nözda' ubanë' cate' idxín dza údxi cate' ulu'bán nupa chinátigaca.

²⁵ Ní'irö Jesús rë'ë-nu:

—Naca caza' neda' Nu rusubán nupa chinátigaca, enca' Nu nabánigaca bönachi. Nu tséajlë' neda', sal-la' gati nu na', ubán caz, ²⁶ ate' yúgu'të bönni' nabángaquië', en ta'yéajlë'ë neda', biti' ca' ilátië' tsaz. ¿Réajlë'u lë ni?

²⁷ Marta rënu Lë':

—Ön, Xan. Réajlë'a nacu' Li' Cristo, Zxí'inë' Dios, Bönni' na' guzxi' lu në'ë Dios isól-lë'ë yödzölió ni.

Ribödxë' Jesús tu' ru'i ládxë'ë nigula zanë' Lázaro

²⁸ Cate' budxi bé'ënu Marta na' didza' ni, bóajnu yu'u, yöjlídzanu María, zxlánu, ate' bagáchi'sö rënu lënu:

—Bönni' Usedi zoë' ni, rulidzë' li'.

²⁹ Cate' biyóninu María didza' ni, la' guyástënu, zéajnu ga na' zoë' Jesús. ³⁰ Biti' rázinë' Jesús la' yödzödo' na', pero zóasë' ga na' yöjtságanu Marta Lë'. ³¹ Cate' yugu' bönni' judío na' nacuá'lenë' María na', en tu'hué tsáhuë'ë-nu bila'lé'enë'-nu guyásanu, en birúajnu carelö ga naca lu yu'u, ní'irö yöjnógaquië'-nu, ta'nnë':

—Uyéajnu ra' yeru ba tsöjchódxinu ni'.

³² Ní'irö bidxinnu María ga na' zoë' Jesús. Cate' bilé'enu Lë', biyéchunu xini'ë, en rënu Lë':

—Xan, la'tu' zu' ni, biti' gátië' bönni' zana'.

³³ Cate' bilé'enë' Jesús ribódxinu, en ta'bödxë' ca' bönni' judío na' dzágagaquië'-nu, ní'irö buí'innë', en gunnéda' ládxë'ë. ³⁴ Rnnë':

—¿Gazxi bucáchi'li'-në'?

Të' Lë':

—Gudá uyú'.

³⁵ Gurödxë' Jesús. ³⁶ Ní'irö gula'nnë' bönni' judío na', ta'nnë':

—Bulí'yútsöca' ca nadxí'ide'enë' lë'.

³⁷ Bal-lë' ta'nnë':

—Bönni' ni benë' ga rilé'enë' bönni' na' zí'alö nachul-la lahuë'. ¿Naru' cabí gúcatsö gunë' ga biti' gátië' Lázaro?

Rubanë' Lázaro lu yöl-la' guti

³⁸ Leyúbölö gunnéda' ládxë'ë Jesús, ate' bidxinë' ra' yeru ba na'. Ba na' naca tu yeru nadaj lë'e guí'a guiój, ate' da' tu guiójta'a le nusayaj ga nu riyaza le. ³⁹ Jesús gudxë' nupa nacuá' ni', rnnë':

—Gulí'cúa guiój ni.

Ní'irö Marta, nigula zanë' bönni' nati na', rënu Lë':

—Xan, chirilé'ë siguti tu' chiguca tapa dza nátië'.

⁴⁰ Jesús rë'ë-nu:

—¿Naru' cabí chigudxi caza' li' channö réajlë'u, hualé'enu' yöl-la' zxön queë' Dios?

⁴¹ Ní'irö gula'güë' guiójta'a na' nusayaj ga nu riyaza yeru ba ga na' yu'ë bönni' nati na'. Buyüë' Jesús zaca' lúzxibalö, rnnë':

—Xuza', rea' Li', xclenu' tu' riyönnu' neda'. ⁴² Neda' nözda' riyóntiqui'sinu' neda', pero ruá'a didza' ni para ulu'zí' xibé bönachi zían ni, en ila'yéajlë' Li' na' nasól-lu'u neda'.

⁴³ Cate' budxi bé'ë Jesús didza' ni, zidzaj bulidzë', rnnë':

—Lázaro, burúaj nilö.

⁴⁴ Burúajë' bönni' na' gúquië' bönni' nati lu yeru ba, naróligacarö ni'a në'ë yugu' lári'do', en nagachi' ca' lahuë' ia'tú lári'do'. Ní'irö Jesús rë' légaquië':

—Bulí'lí lari' na' naröli ni'a në'ë, en guli'gu'ë lataj së'ë.

Tun xtídzë'ë yugu' bönni' judío unná bë' ilútië' Jesús
(Mt. 26:1-5; Mr. 14:1-2; Lc. 22:1-2)

⁴⁵ Ní'irö zían bönni' judío na' gula'yéajlë'ë Jesús, bönni' na' yöjácalenë' tsözxón María, en bila'lé'enë' lë na' benë' Lë'. ⁴⁶ Bal-lë' yöjáquië' ga nacu'ë bönni' yudo' fariseo, en bulu'siyönnë' légaquië' ca na' benë' Jesús. ⁴⁷ Ní'irö bönni' yudo' fariseo na' bulu'dúbilenë' tsözxón bönni' yudo' tu'chi'a tu'söröë', en yugu' bixúz unná bë', ta'nnë':

—¿Nacxi caz gunru'? Runë' bönni' ni zían yöl-la' huáca zxön. ⁴⁸ Channö güi'isiru'-në' lataj gunë' ca ni run cazë', ila'yéajlë' yúgu'të bönachi Lë', ate' idijáquië' bönni' Roma ni, duquínnajgaquië' yudo' lá'ayi queéru', en yödzö queéru'.

⁴⁹ Ní'irö bë'ë didza' Caifás, bixúz lo iz na', en dzáguië' légaquië', rë' légaquië':

—Libí'ili' biti' bi nózili', ⁵⁰ en biti' réquibe'eli' run bayudxi gátië' tuë' bönni' ni'a quégaca bönachi, para cabí initi idú yödzö.

⁵¹ Calëga rácasö queë' bë'ë didza' ni, pero tu' náquië' bixúz lo iz na', que lë ni na' bë'ë didza' uláz queë' Dios ca ral-la' gátië' Jesús ni'a quégaca bönachi yödzö na'. ⁵² Gátië' Jesús, calégasö ni'a que yödzö na', pero gátië' ca' para utubë' yugu' xzí'inë' Dios násilasigaquië', para ilácaquië' tuz. ⁵³ Caní guca, la' dza ná'asö gulún xtídza'gaquië' ilútië' Jesús.

⁵⁴ Que lë ni na' bíti'rö gudé' Jesús yálajdo' gapa nacuá' bönachi judío, pero buzé'ë ni', sa'yéajë' tu lataj gala' ga naca lataj cá'asö, ate' bidxinë' yödzö Efraín, ga ni' bugá'anë', ate' dzágagaquië' bönni' usëda queë' Lë'.

⁵⁵ Dza na' chizá' gala' Laní Pascua quégaquië' bönni' judío cate' tu'subanë' ca benë' Dios, bubéajë' bönachi queë' luyú Egipto. Bila'ruaj bönachi zían yugu' yödzö ni', ate' gula'benë', söjáquië' Jerusalén cate' si' idxín laní na' para tsöjpa'a cuíngaquië' ca naca que yudo'. ⁵⁶ Yugu' bönni' na' nacu'ë Jerusalén tu'guiljë' Jesús, en cate' ni' nacu'ë chila yudo', gula'nabi luzá'agaquië' tuë' ia'túë', ta'nnë':

—¿Bizxi rusáca'li'? ¿Huídatsë' laní, o biti' guídë'?

⁵⁷ Chigula'nná bë'ë yugu' bixúz unná bë', en yugu' bönni' yudo' fariseo channö nu nözi ga zoë' Jesús, ral-la' ududíxjöi' i légaquië' para gaca tsöjxóngaqië' Lë'.

12

María rigú'unu le rilá' zxixi ni'ë Jesús
(Mt. 26:6-13; Mr. 14:3-9)

¹ Cate' ni' nagá'anagaca ia'xopa dza cate' idxín Laní Pascua cate' tu'subanë' bönni' judío ca benë' Dios, bubéajë' bönachi queë' luyú Egipto, ní'irö bidxinë' Jesús lu yödzö Betania, ga na' zoë' Lázaro, bönni' na' gútië', en bubanë' lu yöl-la' guti. ² Gula'gu'ë tu güi' i huagu ni' le gahuë' Jesús. Gulú'unu María le ilahuë', ate' nútsë'ë Lázaro ladaj bönni' ró'ölengaquië' Jesús ga na' tahuë'. ³ Ní'irö gudéla'nu María ca tu guíë' le rilá' zxixi que yöj susén lasi idú, le nazáca'da', en gulú'unu le ni'ë Jesús. Buzxínu ni'ë len guítsa' ícjanu. Idútë lu yu'u na' guzé bö' zxixi. ⁴ Ní'irö bë'ë didza' tu bönni' usëda queë' Jesús, lë' Judas Iscariote, xzí'inë' tu bönni' lë' Simón, en náquië' bönni' na' udödë' Jesús lu ná'agaquië' yugu' bönni' yudo', rnnë':

⁵ —¿Bizx que biti' gudó'o le rilá' zxixi na', le nazaca' lázxjaru' que tu iz, ate' huáca nu quisi dumí na' quégaca bönachi yechi'?

⁶ Gunnë' caní, calëga tu' ru'í ládxe'ë bönachi yechi', pero tu' náquië' gubán, en lë cazë' nu'ë buzudi dumí quégaquië', en rubéajlanë' dumí na' tu'chejë' lu buzudi na'. ⁷ Ní'irö Jesús rë' lë':

—Bë'ë-nu lataj, tu' naca lë ni bennu tu le nabá'a para dza igácha'a. ⁸ Yugu' bönachi yechi' ila'cuá'lentica'sö libí'ili', pero neda' biti' ugá'anatica'sa' ga zóalí'.

Tun xtídza'gaquië' bönni' judío unná bë' ilútië' Lázaro

⁹ Cate' bila'yönnë' bönni' judío zoë' Jesús yödz Betania, bila'dxinë' zíanë' ni', calégasö tu' zoë' Jesús ni', pero lësca' tu' té'ennë' ila'lé'enë' Lázaro, bönni' na' busubanë' Jesús lu

yöl-la' guti. ¹⁰ Ní'irö gulún xtídza'gaquië' yugu' bixúz unná bë', ilútië' ca' Lázaro, ¹¹ tu' ta'yéajlë'ë zían bönni' judío Jesús ni'a queë' Lázaro na', en chinulá'alengaquië' yugu' bixúz unná bë' na'.

Len yöl-la' ba zxön razië' Jesús Jerusalén

(Mt. 21:1-11; Mr. 11:1-11; Lc. 19:28-40)

¹² Bönachi zían bila'dxín Jerusalén dza Laní Pascua, ate' dza buropi na' ta'yöni zë'ë Jesús ni'. ¹³ Ní'irö gula'guítsjë' zin, en bila'rúajë' sòjxi'gala'gaquië' Jesús, ate' gulu'ë zidzaj didza', ta'nné':

—Yöl-la' ba Dios! ¡Yöl-la' ba Bönni' ni zë'ë uláz queë' Xanru', para inná bé'enë' bönachi Israel!

¹⁴ Budzólinë' Jesús tuba' búrrodo', ate' gudxië'-ba' ca na' nazúaj lu guichi lá'ayi, rnna:

¹⁵ ¡Biti' gádxili', libí'ili', zóali' yödzö Sión!

¡Buli'yútsöca', zë'ë Bönni' inná bé'enë' libí'ili'!

¡Dxië'-ba' tuba' búrrodo'!

¹⁶ Cate' ni' si' guca lë ni, biti' gula'yéajni'inë' bönni' usëda queë' Jesús, pero gudödi ni', cate' bubanë' Jesús lu yöl-la' guti, en buëpë' yehua' yubá queë', ní'irö yöjnéguequinë' lë ni nazúaj lu guichi lá'ayi ca ral-la' gaca queë', ate' guca queë' caní.

¹⁷ Lëscá' yugu' bönni' na' gula'cuá'lenë' Jesús cate' ni' bulidzë' Lázaro, bönni' na' yu'ë yeru ba, en busubanë' lë' lu yöl-la' guti, gulunë' ba nalí queë'. ¹⁸ Que lë ni na' ca' bila'rúajë' bönni' yöjxi'gala'gaquië' Jesús, tu' bila'yönnë' ca naca yöl-la' huáca ni benë' Lë'. ¹⁹ Ní'irö gula'nné' la' légacasë' bönni' yudo' fariseo, ta'nné':

—Chinaca bë' biti' bi séqui'ru' gunru'. Buli'yú ca dá'gaca yúgu'të bönachi Lë'.

Yugu' bönni' zi'tu' tu'guiljë' Jesús

²⁰ Bal-lë' bönni' zi'tu' dzágagaquië' nupa na' bila'dxín Jerusalén dza Laní Pascua na' para ila'yéaj ládxi'gaquië' Dios. ²¹ Yugu' bönni' zi'tu' na' bila'dxinë' ga zoë' Felipe, bönni' Betsaida que luyú Galilea, ate' guláta'yue' lahuë', ta'nné':

—Bönni', ré'ënitú' ilé'etu'-në' Jesús.

²² Guyijë' Felipe na', en yöjödxe' ca' Andrés. Ní'irö Andrés, en Felipe na' gulë' ca' Jesús.

²³ Bubi'ë didza' Jesús, ré' légaquië':

—Chizóa idxín dza gátia' neda', Bönni' Guljë' Bönachi, huöja' xilatja' yehua' yubá. ²⁴ Le nácatë rea' libí'ili': Ugá'ana cá'asö tu xisedo' channö cabí igachi' luyú, en údxi que. Channö údxi que xisedo' na', ate' ilén, yénni'tërö unödzej. ²⁵ Nu bönni' ruí'i ládxi'dë'ë yöl-la' na'bán queë', unítië' le, tu' gátië' tsaz bönni' na'. Nu bönni' biti' ruí'i ládxi'ë yöl-la' na'bán dë queë' yödzölió ni gun chi'ë le ga idxinrö dza gata' yöl-la' na'bán idú queë'.

²⁶ Channö ré'ënë' nu bönni' gunë' xichina', ral-la' të'ë neda' bönni' na', ate' ga ni' tsöjsóá' neda', ni' tsöjsóë' ca' bönni' na' runë' xichina'. Channö runë' xichina' nu bönni', Xuza' Dios gunë' bal bönni' na'.

Rigúxjö'ë Jesús ca si' ilútië' Lë'

²⁷ Gunné' ca' Jesús:

—Na'a rö'a böniga neda'. ¿Nacxi innatsa'? ¿Naru' innía': Xuza', busölá neda' lu le gaca quia' na'a? Que lë ni na' bida', para guá' ilena' le ral-la' gaca quia' na'a. ²⁸ Xuza', ben ga ilá' lahui yöl-la' zxön quiu'.

Ní'irö biyón chi'i Nu ruí'i didza' yehua' yubá, rnna:

—Chibéna' ga nalá' lahui yöl-la' zxön quia', ate' leyúbölö guna' ga ilá' lahui yöl-la' zxön quia' na'.

²⁹ Bila'yöni bönachi zían nacuá' ni' chi'i ni, ate' ta'nná:

—Guziú' na' gunné.

Ia'bal-la bönachi na' ta'nná:

—Tu gubáz lá'ayi queë' Dios bé'lenë' Lë' didza'.

³⁰ Ní'irö bubí'ë didza' Jesús, ré' légaquië':

—Biyón chi'i ni, calëga para uzi'a xibé neda', pero para uzí'ili' xibé libí'ili'. ³¹ Chibidxín dza uchi'a usöróë' Dios bönachi yödzülió ni. Na'a chú'unë' Dios tu' xihui' ní'ilö, nu na' rinná be'e bönachi yödzülió ni. ³² Na'a, channö ilútië' bönni' neda', en ulu'chisé' neda' xitsá', guna' ga ulu'dubi yúgu'të bönachi ga zoa'.

³³ Didza' ni bë'ë Jesús naca bë' ca gátië'. ³⁴ Bönachi zían na' të Jesús, ta'nná:

—Netu' biyónitu' nupa bulu'laba le rnna xibá queë' Dios, lë na' rnna: Sóatica'së' Cristo. ¿Nacxi caz naca, rnno' Li': "Run bayudxi Bönni' Guljë' Bönachi, ulu'chisé' Lë' xitsá'?" ¿Nuzxi na' Bönni' Guljë' Bönachi?

³⁵ Ní'irö Jesús rë' légaquië':

—Ia'tú chí'ido'osö sóalena' neda' libí'ili', en naca' bení' queé'li'. Guli'tá tsanni ni zóalena' libí'ili', en zóalen bení' libí'ili', para cabí ichul-la inítili'. Nu bönni' ridé' ga chul-la niti bití' nózinë' gazxi sa'yéajë'. ³⁶ Tsanni ni zóalena' libí'ili', naca' bení' queé'li'. Guli'tséajlë' neda' naca' bení' queé'li' para ilé'eli' bení' na' naca idú.

Cate' Jesús budxi bë'ë didza' ni, yöjhuöjë' yöjcachi' lahuë' lógaquië'.

Le run nigui bönachi judío, para cabí ila'yéajlë' Jesús

³⁷ Sal-la' benë' Jesús zían yöl-la' huáca lógaquië', bití' gula'yéajlë'ë Lë'. ³⁸ Caní guca lë na' buzúajë' Isaías lu guichi, bönni' na' bë'ë didza' uláz queë' Dios, gunné':

Xan, ¿nuzxi caz guyéajlë' didza' bë'ëtu'?

¿Nuzxi caz bulu'ínë' Xanru' yöl-la' huáca queë'?

³⁹ Caní guca, bití' guca ila'yéajlë'ë Jesús. Guca ca na' gunné' ca' Isaías:

⁴⁰ Dios benë' ga gula'chul-la gula'nítie',

ate' guca zidi ládxi'do'gaquië'

para cabí ila'lé'enë' len guió'j lógaquië',

en cabí ila'yéajni'inë' lu icja ládxi'do'gaquië'.

Bití' ulu'huóáquië' quia' para úngaca'-né'.

⁴¹ Bë'ë Isaías didza' ni tu' bilé'enë' yöl-la' zxön queë' Cristo, en bë'ë didza' ca naca queë' Lë'. ⁴² Sal-la' raca caní, gula'yéajlë' bönachi zían Jesús, ga bidxintë gula'yéajlë'ë bal-lë' bönni' unná bë' Lë', pero tu' tádxinë' yugu' bönni' yudo' fariseo, bití' gulunë' ba nalí queë' yálajdo', para cabí ulu'béajë' légaquië' tsaz ga na' tu' dubë' tu'sedë' queë' Dios.

⁴³ Caní gulunë' tu' tunrë' zxön le tun bönachi légaquië' bal ca le runë' Dios légaquië' bal.

Ilún didza' bë'ë Jesús ga irugu quégaca bönachi ilátigaca

⁴⁴ Bë'ë zidzaj didza' Jesús, rnnë':

—Nu bönni' réajlë'ë neda', calëga néda'sö réajlë'ë, pero réajlë'ë ca' Xuza' nasól-lë'ë neda'. ⁴⁵ Lëscá' caní, nu bönni' rilé'enë' neda', rilé'enë' ca' Xuza' nasól-lë'ë neda'. ⁴⁶ Neda' naca' bení', en bida' yödzülió ni, para cabí ulu'gá'anë' ga chul-la yúgu'të bönni' ila'yéajlë'ë neda'. ⁴⁷ Channö riyönnë' nu bönni' xtídza'a, en bití' runë' le bal, calëga neda' ichuga' queë' bönni' na' gátië', tu' bida' ni, calëga para ichuga' quégaca bönachi yödzülió ni, pero para usölá' bönachi yödzülió ni. ⁴⁸ Nu bönni' ruzóë' neda' tsölá'alö, en bití' rizí' lu në'ë xtídza'a, chizóa le ichugu queë' bönni' na'. Didza' na' chibé'lëna' libí'ili' naca tu le ichugu queë' bönni' na' dza údxi. ⁴⁹ Caní naca, ruá'a didza', calëga rácasö quia', pero Xuza' nasól-lë'ë neda' gudxë' neda' le ral-la' inní'a, enca' ca ral-la' gu'a didza'. ⁵⁰ Nözda' gunná bë'ë Dios caní para gata' yöl-la' na'bán idú quégaca bönachi. Caní naca, didza' na' ruá'a, ruá'a didza' ca na' Xuza' chigudxi cazë' neda'.

13

Jesús riguibë' ní'agaquië' bönni' usëda queë'

¹ Ní' naca dza si' idxín Laní Pascua cate' tu'subanë' bönni' judío ca benë' Dios, bubéajë' bönachi queë' luyú Egipto. Nózinë' Jesús chibidxín dza queë' gátië', cate' ral-la' uzë'ë

yödzölió ni, en huöjé' ga zoé' Xuzé'. Ca na' nadxí'iné' bönachi queé' nacuá' yödzölió ni, na'a nadxí'iné' légaquié' ga idxinté gátié' uláz quegaquié'.

² Satanás tu' xihuí' chinagú'u yöl-la' Judas Iscariote, xzí'iné' tu bönni' lè' Simón, para udödé' Jesús lu ná'agaca nupa iluti Lè'. ³ Nóziné' Jesús ca naca, birúajé' ga zoé' Dios, en huöjé' ca' ga na' zoé' Dios, ate' Dios Xuzé' chinudödé' lu në'ë Lè' iduté yöl-la' unná bé' queé'. ⁴ Que lè ni na', cate' ni' tahué', guzuíné' Jesús, en gudúé' lari' rixóa yené'. Gudélé'ë tu lari' ruzxini ná'aru' le budé'ë lè'ë. ⁵ Ní'irö gudé'ë nisa tu lu zxiga' guíé, ate' gusí lahué' riguibé' ní'agaquié' bönni' uséda queé', en ruzxiné' ní'agaquié' len lari' na' da' lè'ë.

⁶ Cate' bidxiné' ga rö'ë Simón Pedro, Pedro na' rë' Lè':

—Xan, ¿naru' Li' quíbitso' ni'a?

⁷ Bubi'ë didza' Jesús, rë' lè':

—Lè ni runa', bití' réajni'ininu' na'a, pero huadzé tséajni'inu'.

⁸ Ní'irö Pedro rë' Lè':

—Bití' ca' quíbi cazu' Li' ni'a.

Jesús rë' lè':

—Channö neda' bití' quiba' li', bití' ca' séqui'nu' gunu' neda' tsözxón.

⁹ Ní'irö Simón Pedro rë' Lè':

—Xan, calégasö ni'a quibu', pero quibu' ca' na'a, en icja'.

¹⁰ Jesús rë' lè':

—Nu nayari, ní'asö run bayudxi tsari, tu' naca cazé' dxi'a iduté', ate' libí'ili' nácali' dxi'a, pero caléga yúgu'téli'.

¹¹ Gunné' caní Jesús: “Caléga yúgu'téli' nácali' dxi'a”, tu' nóziné' nálögaquié' na' udödi Lè'.

¹² Gudödi gudibé' Jesús ní'agaquié', buguélé'ë lari' na' buxóa yené'. Bubö'ë ga tahué', ate' rë' légaquié':

—¿Réajni'ili' lè na' si' bena' queé'li'? ¹³ Libí'ili' ru'í'ili' La': Bönni' Usedi enca': Xan. Dxi'a naca ca rnnali', tu' caní naca'. ¹⁴ Na'a, channö neda' naca' Xanli', en Bönni' Usedi queé'li', ate' gudiba' ní'ali', lésca' caní ral-la' gunli' libí'ili', quíbili' ni'a luzá'ali' tuli' ia'tuli'. ¹⁵ Tu le buluí'ida' libí'ili' para gunli' libí'ili' ca na' bena' neda'. ¹⁶ Le nácaté rea' libí'ili': Bití' nayépisëtéré' tu bönni' huen dxin ca xané', ate' bönni' gubáz bití' nayépisëtéré' ca nu nasöl-la' lè'. ¹⁷ Channö réajni'ili' yúgu'tè lè ni, bica' ba libí'ili' channö gunli' caní. ¹⁸ Didza' ni ruá'a bití' rea' yúgu'téli'. Nöz quézida' nupa guró' caza' neda', pero run bayudxi gaca lè na' nazúaj lu guichi lá'ayi, le rnná: “Nu rágulen neda' tsözxón, nu ni tá'baga' neda'.” ¹⁹ Na'a riguíxjöi'ida' libí'ili' zí'alö ca gaca, para cate' gaca caní, tséajlé'ëli' zoa caza' neda'. ²⁰ Le nácaté rea' libí'ili': Nu bönni' guné' bal gubáz isól-la'a neda', neda' ca' guné' bal, ate' nu bönni' guné' neda' bal, guné' ca' bal Xuza', nasól-lè'ë neda'.

Riguíxjö'ë Jesús ca guné' Judas, udödé' Lè'

(Mt. 26:20-25; Mr. 14:17-21; Lc. 22:21-23)

²¹ Cate' Jesús budxi bé'ë didza' ni, buí'inné', ate' yálajdo' gunné':

—Le nácaté rea' libí'ili': Tu bönni' núts'ë ladjali' udödé' neda'.

²² Ní'irö buluí'yú lo luzá'agaquié' tué' ia'tué' bönni' uséda queé', en gula'cu'ë böniga, ate' ta'naba ladxí'gaquié' nuzxi que na' gunné' Jesús caní. ²³ Tué' bönni' uséda queé' Jesús, bönni' na' Jesús nadxí'iné' lè', zoé' cuita lè'ë. ²⁴ Simón Pedro bulá'a buluí'isé' bönni' ni para inábiné' Jesús nuzxi que na' gunné' caní. ²⁵ Ní'irö bönni' na' zoé' cuita lè'ë Jesús rë' Lè':

—Xan, ¿nuzxi na' ru'u didza' que?

²⁶ Bubi'ë didza' Jesús, rë' lè':

—Náquié' bönni' na' gu'a-né' yöta xtila nabisa.

Ní'irö busubísië' yöta xtila na', en bē'ë queë' Judas Iscariote, zxí'inë' tu bönni' lē' Simón. ²⁷ Gudödi gudahuë' Judas yöta xtila na', guyaza Satanás tu' xihui' icja lādxi'da'ahuë'. Ní'irö Jesús rē' lē':

—Lē na' gunu', yōjentē na'a.

²⁸ Biti' ta'yéajni'inē' ia'zica'rē' bönni' usēda queë' rō'ōgaquië' tahuë' bizx que na' Jesús gudxē' lē' caní. ²⁹ Tu' nu'ē Judas buzudi dumí quegaquië', téquinē' bal-lē' Jesús gudxē' lē': Yōxi' le gáguru' laní, o gunné': Bē' lati' quégaca bōnachi yechi'. ³⁰ Cate' budxi gudahuë' Judas yöta xtila na', en ni' naca chi'i dzó'ölö, la' birúajtē'.

Tu xibá cubi

³¹ Cate' chibirúajtē' Judas na', ní'irö gunné' Jesús:

—Na'a chizóa ilá' lahui yöl-la' zxön quia' neda', Bönni' Guljē' Bōnachi, en ilá' lahui ca' yöl-la' zxön queë' Dios. ³² Channö ilá' lahui yöl-la' zxön queë' Dios ni'a quia' neda', Zxí'inē', lēasca' Lē cazē' Dios gunē' ga ilá' lahui yöl-la' zxön quia' neda', Zxí'inē', en la' guntē' caní. ³³ Libí'ili', zxí'ina'do', ia'tú chí'isö zóalena' libí'ili'. Uguíljali' neda', ate' ca na' chigúdxigaca'-nē' bönni' judío, lēasca' rea' libí'ili' na'a: Ga na' tseja' neda', bití' gaca guídali' rácasö queé'li'. ³⁴ Rea' libí'ili' tu xibá cubi le rnna caní: Guli'dxí'i luzá'ali' tuli' ia'tuli'. Ca na' neda' nadxí'ida' libí'ili', lēasca' caní ral-la' idxí'ili' luzá'ali' tuli' ia'tuli'. ³⁵ Channö huadxí'i luzá'ali' tuli' ia'tuli', ilēquibe'e yúgu'tē bōnachi dá'ali' neda'.

Rnnē' Jesús innē' Pedro bití' núnbē'ē Lē'

(Mt. 26:31-35; Mr. 14:27-31; Lc. 22:31-34)

³⁶ Ní'irö Simón Pedro gunábinē' Jesús, rnnē':

—Xan, ¿gazxi caz tseju'?

Bubi'ē didza' Jesús, rnnē':

—Ga na' tseja' neda', bití' gaca sá'lenu' neda' na'a, pero huadzé guídu' ga tseja' neda'.

³⁷ Pedro rē' Lē':

—Xan, ¿bizx que bití' gaca sá'lenu' Li' na'a? Chizóa' udöda' yöl-la' na'bán quia', gátia' tu' nadxí'ida' Li'.

³⁸ Bubi'ē didza' Jesús, rē' lē':

—¿Naru' udödu' yöl-la' na'bán quiu' tu' nadxí'inu' neda'? Le nácatē' rea' li', z'älö ca códxiba' böra, li' tá'bágu'u tsonna luzuí, innó' bití' núnbē'u neda'.

14

Náquië' Jesús nöza tséajlenru' para idxinru' ga zoë' Dios Xuz

¹ Rnnē' Jesús:

—Biti' cō'li' baniga lu icja lādxi'do'oli'. Guli'tséajlē' Dios, en guli'tséajlē' ca' neda'. ² Lu yu'u lidxē' Xuza' lataj zían nacua'. La'tu' cabí naca caní, neda' chigudxi caza' libí'ili'. Tseja' na'a, tsöjpa'a lataj queé'li' ga tsöjsóali'. ³ Channö huayéaja', en tsöjpa'a lataj queé'li' ga tsöjsóali', huöda' leyúbölö, ate' uchē'a libí'ili' lataj quia', para ga na' tsöjsó'a neda', tsöjsóali' ca' libí'ili'. ⁴ Nöz quézili' ga ni' tseja', en núnbē'ēli' ca' nöza.

⁵ Tomás rē' Lē':

—Xan, bití' nöztu' gazxi na' tseju'. ¿Nacxi caz gaca gúnbē'ētū' nöza?

⁶ Bubi'ē didza' Jesús, rē' lē':

—Neda' naca caza' nöza, en naca' ca' le naca idütē li, en naca' ca' Nu nabánigaca bōnachi. Ni'a quia' néda'sö gaca nu idxín ga zoë' Dios Xuz. ⁷ La'tu' núnbē'ēli' neda', Xuza' ca' núnbē'ēli'-nē'. Na'a, núnbē'ēli'-nē', en chibilé'eli'-nē'.

⁸ Ní'irö Felipe rē' Lē':

—Xan, buluí'i netu' Xuzu', ate' nácatē' queé'tu'.

⁹ Bubi'ē didza' Jesús, rē' lē':

—Felipe, xidzé chiguca zóalena' libí'ili'. ¿Naru' cabí núnbē'ētso' neda'? Nu bönni' rilé'enē' neda', rilé'enē' ca' Xuza'. ¿Rnnatso': "Buluí'i netu' Xuzu'?" ¹⁰ ¿Naru' cabí réajlē'u zóalen caza'-nē' Xuza', ate' Xuza' zóalen cazē' neda'? Yugu' didza' ni ru'ilena' libí'ili',

calëga rácasö quia' ruá'a didza' ni, pero Xuza' zóalen cazë' neda', Lë cazë' runë' dxin ni. ¹¹ Guli'tséajlë' neda', zóalen caza'-në' Xuza', ate' Xuza' zóalen cazë' neda'. Channö cabí gaca gunli' caní, guli'tséajlë' neda' ni'a quégaca dxin ni runa'. ¹² Le nácatë rea' libí'ili': Yugu' dxin ni runa' neda', lëscá' gunë' bönni' na' réajlë'ë neda', ate' le zxóntërö ca' gunë' bönni' na' tu' huöja' ga zoë' Dios Xuz. ¹³ Yúgu'të le inábili' Dios Xuz, en ugunli' dxin La' neda', neda' guna' lë na' inábali', para ulu'a lahui neda', Zxí'inë', yöl-la' zxön queë' Dios Xuz. ¹⁴ Bítí'tës bi inábali', en ugunli' dxin La' neda', neda' guna' le.

Jesús isól-lë'ë Dios Bö' Lá'ayi, para idisóalenë' bönachi queë'

¹⁵ Rnnë' ca' Jesús:

—Channö nadxí'ili' neda', guli'gún le rea' libí'ili', ¹⁶ ate' neda' gáta'yua' lahuë' Dios Xuz, ate' Lë' isól-lë'ë queé'li' Nu yúbölö Nu gácalen libí'ili', Nu utipa ládxi'li', en sóalenticá'sö libí'ili'. Nu ni naca Dios Bö' Lá'ayi, Nu ru'í didza' idútë li. ¹⁷ Biti' gaca ulu'z' bönachi yödzölió ni xibé' Lë', tu' cabí gaca ila'lé'e Lë', en bití' gaca ilúnbe'e Lë'. Zóalen cazë' libí'ili', ate' soë' lu icja ládxi'do'oli'. ¹⁸ Biti' ucá'ana' libí'ili' ca yugu' bi'i uzé'bido'. Huöda' udusóalena' libí'ili'. ¹⁹ Ia'tú chí'ido'osö bítí'rö ila'lé'e bönachi yödzölió ni neda', pero libí'ili' ulé'eli' neda'. Tu' zoa caza' nabana' neda', libí'ili' ca', tsaz sóali' ibanli'. ²⁰ Dza ní'irö cate' Dios Bö' Lá'ayi na' idisóalenë' libí'ili', inóz quézili' zóalen caza'-në' Xuza' Dios, ate' libí'ili' zóalenli' neda', ate' neda' ca' zóalen caza' libí'ili'. ²¹ Nu bönni' rizí' lu në'ë xtídza'a, en runë' ca rnna, naca bë' nadxí'inë' neda'. Xuza' Dios idxí'inë' bönni' na' nadxí'inë' neda', ate' neda' idxí'ida'-në' bönni' na', en ulu'í lahua' lahuë'.

²² Judas rë' lë', pero calëga Judas Iscariote, rnnë':

—Xan, ¿nacxi caz gaca ulu'í lo' lotu' netu', en bití' ulu'í lo' lógaca bönachi yödzölió?

²³ Bubi'ë didza' Jesús, rë' lë':

—Nu bönni' nadxí'inë' neda' gunë' ca rnna xtídza'a, ate' Xuza' Dios idxí'inë' bönni' na', ate' guídatu' idisóalentu'-në' bönni' na' lu icja ládxi'da'ahuë'. ²⁴ Bönni' na' bití' nadxí'inë' neda' bití' runë' ca rnna xtídza'a. Didza' na' biyónili' bë'a neda', calégasö quia' na', pero naca queë' Dios Xuz nasól-lë'ë neda'.

²⁵ Rë' caza' libí'ili' yugu' lë ni tsanni ni zóalena' libí'ili', ²⁶ pero Dios Bö' Lá'ayi gácalenë' libí'ili', en utipë' ládxi'li'. Xuza' Dios isól-lë'ë Lë' queé'li' tu' ugunli' dxin La' neda'. Usédinë' libí'ili' yúgu'të, en usé'ë ládxi'li' ca naca yúgu'të didza' na' chigudxa' libí'ili'.

²⁷ Rucá'ana' queé'li' le cuéqui dxi ládxi'li'. Runna' queé'li' yöl-la' rö'ö dxi ládxi' quia'. Yöl-la' rö'ö dxi ládxi' na' runna' queé'li' bití' naca ca le tunna queé'li' bönachi yödzölió ni. Bití' ichixi icja ládxi'do'oli', en bití' gadxi idzóbili'. ²⁸ Chibiyónili' ca na' chigudxa' libí'ili': Huöja', ate' huöda' udusóalena' libí'ili'. La'tu' nadxí'ili' neda', udzëjali' cate' ni' gudxa' libí'ili' huöja' ga zoë' Dios Xuz, tu' nayépisëtërë' Dios Xuz ca neda'. ²⁹ Na'a, chigudxa' libí'ili' z'álö ca si' gaca, para cate' gaca caní, tséajlë'ë'li' neda'.

³⁰⁻³¹ Bítí'rö gü'ílena' libí'ili' didza' zían, tu' za' tu' xihui', nu rinná be'e bönachi yödzölió ni. Sal-la' bití' bi dë lu në'e bi gun quia' neda', ral-la' gaca caní para iléquibe'e bönachi yödzölió ni nadxí'ida'-në' Dios Xuz, en runa' ca na' chigudxë' neda' guna'. Guli'chasa, uzá'aru' ni.

15

Ca naca que lubá uva, en ni'a në'e lubá na'

¹ Lëscá' caní Jesús gudxë' légaquië':

—Naca' neda' ca tu lubá uva le naca idú dxi'a, ate' Xuza' náquië' ca bönni' guz gú'una rapa chi'ë lubá na'. ² Ugúë' yúgu'të ni'a në'e lubá na' naca' neda', le cabí bi ta'bía, ate' uchi'ë yúgu'të ni'a në'e na' ta'bía, para ila'bía ia'lati'. ³ Libí'ili' chinácali' dxi'a ni'a que didza' na' chibé'lëna' libí'ili'. ⁴ Guli'dá'tica'sö neda', ca na' neda' dá'tica'sa' ca' libí'ili'. Ca naca que ni'a në'e lubá na', bití' gaca bi cuía rácasö que, channö cabí dá'tica'sö lubá na', lëscá' caní naca queé'li', bití' bi gaca gunli' channö cabí tá'tica'sili' neda'.

⁵ Naca' neda' ca lubá na', ate' libí'ili' nácali' ca ni'a nē'e. Nu bönni' dá'tica'sē' neda', ca na' neda' dá'tica'sa' lē', bönni' ni náquiē' ca ni'a nē'e lubá na' ribía yenni', tu' channö nulá'alenli' neda', biti' bi gaca gunli'. ⁶ Nu bönni' biti' dá'tica'sē' neda', gaca queē' ca raca quégaca ni'a nē'e lubá na' biti' nácagaca dxi'a, ta' rú'unē' ni'a nē'e na', ate' ila'bidxi. Cate' chinabídxigaca ni'a nē'e na', ulu'tubē' léguequi, en ila'gu'ē' léguequi lu guí', ate' tséguigaca.

⁷ Channö tá'tica'sili' neda', en gunli' ca rnna xtídza'a, huáca inábali' bi gué'ēnili', ate' neda' guna' lē na' inábali'. ⁸ Gunli' bal Xuza' Dios cate' gunli' xichiné', ate' gácali' ca ni'a nē'e lubá na' ta'bía, en caní gaca bē' nácali' idú bönni' ta'dé'ē neda'. ⁹ Ca na' nadxí'inē' Dios Xuz neda', lēscá' caní nadxí'ida' libí'ili'. Guli'gúntica'sō ca ral-la' gunē' bönni' nadxí'ida'-nē'. ¹⁰ Channö gunli' ca rea' libí'ili', gunli' ca ral-la' gunē' bönni' nadxí'ida'-nē', ca na' neda' ca' runa' ca chigudxē' Xuza' Dios neda' guna', en rúntica'sa' le raza ládxi'ē' Lē', Bönni' na' nadxí'inē' neda'.

¹¹ Yugu' didza' ni rea' libí'ili' para udzējalenli' tsözxón neda', en gaca idú ca na' udzējali'. ¹² Lē ni naca le rea' libí'ili' gunli': Guli'dxí'i luzá'ali' tuli' ia'tuli', ca na' neda' ca' nadxí'ida' libí'ili'. ¹³ Biti' gaca idxí'irönē' nu bönni' luzé'ē ca nu bönni' udödē' yöl-la' na'bán queē', gátiē' para gácalenē' yugu' böchi' luzé'ē tu' nadxí'inē' légaquiē'. ¹⁴ Libí'ili' nácali' böchi' luzá'a channö gunli' ca na' chigudxa' libí'ili' gunli'. ¹⁵ Bítirö innía' queé'li' nácali' huen dxin quia', tu' cabí nózine' bönni' huen dxin naca gunē' xanē'. Neda' chigunnía' queé'li' nácali' böchi' luzá'a, tu' chibena' ga nózili' yúgu'tē le chigudxē' Xuza' neda' guna'. ¹⁶ Calēga libí'ili' guröli' neda', pero neda' guró caza' libí'ili', en buzóa' libí'ili' para tséajli' bi tsöjenli', ca na' tun ni'a nē'e lubá na' ta'bía yenni', ate' ugá'anatica'sō lē na' gunli'. Caní gaca, Xuza' Dios gunnē' queé'li' yúgu'tē le inábali' Lē', en ugunli' dxin La' neda'. ¹⁷ Lē ni naca le rea' libí'ili' gunli': Guli'dxí'i luzá'ali' tuli' ia'tuli'.

Bönachi yödzülió tu'zóa tsölá'alö Jesús, en nupa dá'gaca Lē'

¹⁸ Gunné' ca' Jesús:

—Channö bönachi yödzülió ni tu'zóa libí'ili' tsölá'alö, nózili' chibulu'zöé' neda' tsölá'alö zí'alö ca tu'zöé' libí'ili' tsölá'alö na'a. ¹⁹ La'tu' nácali' tuz len bönachi yödzülió ni, hualá'dxí'i bönachi yödzülió ni libí'ili' ca na' ta'dxí'i luzé'eguequi, pero tu'zóa bönachi yödzülió ni libí'ili' tsölá'alö tu' cabí nácali' tuz len léguequi, tu' guró caza' neda' libí'ili', en guléaja' libí'ili' ladaj bönachi yödzülió ni. ²⁰ Guli'tsöjné didza' na' chigudxa' libí'ili', gunnía': Biti' nayépisētēre' nu bönni' huen dxin ca xanē'. Channö gula'bía ládxi'gaca bönachi neda', ila'bía ládxi'gaca ca' libí'ili'. Channö nacuá' nupa tun ca rnna xtídza'a, ilún ca' ca rnna xtídza'li' libí'ili'. ²¹ Yúgu'tē lē ni ilún bönachi queé'li' tu' dá'ali' neda', tu' cabí núnbē'gaca Dios Xuz nasól-lē'ē neda'.

²² La'tu' cabí bida', en la'tu' cabí bé'lēna' légaquiē' didza', biti' ila'báguē'ē dul-la', pero na'a tu' bida' ni, biti' bi gaca ila'nné' que dul-la' nabága'gaquiē' le ubéaj légaquiē' dxi'a. ²³ Nu bönni' ruzóé' neda' tsölá'alö, ruzóé' ca' Xuza' Dios tsölá'alö. ²⁴ La'tu' cabí bena' yugu' yöl-la' huáca ga nacu'ē, yugu' le cuntu nu ben ca gulaca, biti' ila'báguē'ē dul-la'. Na'a, bila'lē'enē' yugu' lē na' bena', ate' tu'zöé' neda' tsölá'alö, en tu'zöé' ca' Xuza' tsölá'alö. ²⁵ Caní raca, para gaca ca rnna xtídzē'ē Dios, le nazí' lu ná'agaquiē', le rnna: Tu'zöé' neda' tsölá'alö, en biti' zoa bizx que.

²⁶ Cate' idxinē' Dios Bö' Lá'ayi, Bönni' ru'ē didza' idútē li, en gácalenē' libí'ili', utipē' ládxi'li'. Isól-la'a Bönni' na' queé'li' uláz queē' Dios Xuz, ate' gunē' ba nalí quia' neda'.

²⁷ Libí'ili' ca' gunli' ba nalí quia', tu' zóalen cázali' neda' tsözxón dza ni'te.

—Yugu' didza' ni chigudxa' libí'ili', para cabí gaca chopá ládxi'li'. ² Yugu' bönni' judío ulu'béajé' libí'ili' tsaz ga tu' dubé' tu' sädé' queé' Dios, ate' idxín dza cate' nu bönni' gútié' libí'ili' guéquiné' dxin queé' Dios runé'. ³ Caní iluné', tu' cabí núnbé'gaquié' Dios Xuz, en cabí núnbé'gaquié' neda'. ⁴ Rea' libí'ili' yugu' didza' ni, para cate' idxín dza na', tsöjnéli' didza' ni chigudxi caza' libí'ili'.

Le guné' Dios Bö' Lá'ayi

Gunné' ca' Jesús:

—Yugu' didza' ni bití' gudxa' libí'ili' dza ni'te, tu' ni' zóalen caza' libí'ili'. ⁵ Na'a huöja', tsöjsóalena'-né' Dios Xuz, nasól-lé'ë neda'. Bití' inábili' neda' nituli' libí'ili', bití' innali': ¿Gazxi tseju? ⁶ Na'a, tu' rea' libí'ili' yugu' didza' ni, risébi ládxi'li'. ⁷ Neda' rea' libí'ili' le naca idúté li. Gácarö dxi'a queé'li' huöja', tu' channö cabí huöja', bití' idisóalené' Dios Bö' Lá'ayi libí'ili', Bönni' na' gácalené' libí'ili', en utipé' ládxi'li', pero channö huöja', isól-la'a-né', na' idisóalené' libí'ili'. ⁸ Cate' guídé' Lë', guné' ga iléquibe'e bönachi yödzülió ni nabága'gaca dul-la', en bití' núnbé'gaca le naca tsahui', ate' ichúguié' Dios quéguequi ilátigaca. ⁹ Nabága'gaquié' dul-la' tu' cabí ta'yéajlé'ë neda'. ¹⁰ Bití' núnbé'gaquié' le naca tsahui' tu' ilútié' neda', ate' huöja' ga zoé' Dios Xuz, Bönni' na' náquié' tsahui', ate' bítí'rö ila'lé'ené' neda'. ¹¹ Ichúguié' Dios quégaquié' ilátíé' tu' chiguchúguié' que tu' xihui' nu rinná be'e bönachi yödzülió ni.

¹² Ia'zica' zían didza' ré'ënda' gü'ílena' libí'ili', pero bití' gaca tséajni'ili' na'a. ¹³ Cate' guídé' Dios Bö' Lá'ayi, Bönni' na' ru'ë didza' idúté li, Lë' usediné' libí'ili' yúgu'té le naca idúté li na', tu' cabí gu'ë didza' rácasö queé', pero gu'ë yúgu'té didza' na' yönné' ru'ë Xuza', en guné' ga inózili' yúgu'té le ral-la' gaca. ¹⁴ Lë' guné' neda' bal, tu' si'ë le nequi quia', en guné' ga inózili' le. ¹⁵ Yúgu'té le nequi queé' Dios Xuz nequi quia'. Que lë ni na' gunní'a' si'ë le nequi quia', en guné' ga inózili' le.

Yöl-la' risébi ládxi' queé'li' huóaca yöl-la' rudzeja

¹⁶ Gunné' ca' Jesús:

—Yetú chí'ido'osö, en bítí'rö ilé'eli' neda', ate' ia'tú chí'ido'osö ca' ulé'eli' neda', tu' huöja' ga zoé' Dios Xuz.

¹⁷ Ní'irö bönni' uséda queé' gulé luzá'agaquié' tué' ia'túé', ta'nné':

—¿Bizxi rna didza' ni ré' rë'u? Rnné': “Ia'tú chí'ido'osö, en bítí'rö ilé'eli' neda', ate' ia'tú chí'ido'osö ca' ulé'eli' neda', en naca tu' huöja' ga zoé' Dios Xuz.”

¹⁸ Ní'irö gula'nné':

—¿Bizxi caz ré'ëni inná didza' ni, gunné': “Ia'tú chí'ido'osö”? Bití' réajni'itu' didza' ni ru'ë.

¹⁹ Réquibe'ené' Jesús té'ënné' ila'nábiné' Lë', ate' ré' légaquié':

—¿Naru' rinábítsö luzá'ali' ca naca que didza' na' bé'a, gunní'a': Ia'tú chí'ido'osö, en bítí'rö ilé'eli' neda', ate' ia'tú chí'ido'osö ca' ulé'eli' neda'? ²⁰ Le nácaté rea' libí'ili': Códxili', en isébi ládxi'li', pero bönachi yödzülió ni ulu'dzeja cate' iluti neda'. Ní'irö sal-la' isébi ládxi'li', yöl-la' risébi ládxi' queé'li' huóaca yöl-la' rudzeja cate' ulé'eli' neda'. ²¹ Tu nigula cate' chizóa gáljabi' bí'ido' queé'nu, riguí' rizáca'nu, tu' chibidxín dza queé'nu, pero cate' chizóabi' tubi' bí'i bönni'do' queé'nu, bítí'rö röjnenu lë na' butságanu, tu' rudzéjanu tu' chigúlajbi' tubi' bí'i bönni'do' yödzülió ni. ²² Lësca' caní raca queé'li', risébi ládxi'li' na'a, pero huóda' uduyúa' libí'ili', ate' ní'irö udzeja ládxi'li', ate' bití' séqui'né' nu bönni' ugúé' yöl-la' rudzeja queé'li' na'.

²³ Dza ní'irö bití' bi inábili' neda'. Le nácaté rea' libí'ili': Yúgu'té le inábili' Dios Xuz, en ugunli' dxin La' neda', Lë' gunné' queé'li'. ²⁴ Ga ridxinté na'a dza bití' rugunli' dxin La' neda' cate' bi rinábili'-né' Dios Xuz. Gulí'naba caní, ate' idé'li'li' lë na' inábali', para gaca idú yöl-la' rudzeja queé'li'.

Ridéli'nē' Jesucristo lu le raca yödzölió ni

²⁵ Gunné' ca' Jesús:

—Yugu' lē na' chibé'lena' libí'ili' didza' bucúdzu'a didza'. Huadxín dza cate' bíti'rō güí'ilena' libí'ili' didza' le rucúdzu'a didza', pero yálajdo' güí'ilena' libí'ili' didza' ca naca queé' Dios Xuz. ²⁶⁻²⁷ Dza na' inábili'-nē' Dios, en ugunli' dxin La' neda', ate' rea' libí'ili', bití' gun bayudxi gáta'yua' lahuē' Dios Xuz uláz queé'li', tu' nadxí'inē' Lē cazē' Dios Xuz libí'ili'. Nadxí'inē' libí'ili' tu' nadxí'ili' neda', en réajlé'éli' birúaja' ga zoē' Dios. ²⁸ Birúaja' ga zoē' Dios Xuz, en bidxina' yödzölió ni. Ia'tú ca', ucá'ana' yödzölió ni, ate' huója' ga zoē' Dios Xuz.

²⁹ Ní'irō yugu' bönni' usēda queé' gulé' Lē', ta'nné':

—Na'a ru'u didza' yálajdo', en bíti'rō rucúdzu'u didza'. ³⁰ Na'a réquibe'etu' nöz quézinu' Li' yúgu'tē, en bití' run bayudxi nu bi inabi yudxi Li', tu' riguíxjöi'inu' netu' le sí' inábatu'. Que lē ni na' réajlé'ētu' birúaju' ga zoē' Dios.

³¹ Bubi'ē didza' Jesús, rē' légaquiē':

—¿Naru' réajlé'tsali' neda' na'a? ³² Buli'yú, huadxín dza, en chiridxín dza na', cate' gásilasili' que queé'li', en ucá'anali' neda' tuza', pero bití' soa' tuza', tu' zóalen cazē' Dios Xuz neda'. ³³ Yugu' didza' ni chigudxa' libí'ili' para cuéqui dxi lādxi'li', tu' nácali' quia' neda'. Lu yödzölió ni gaca queé'li' le usaca' zí' libí'ili', pero buli'tipa lādxi'li'. Neda' chibidéli'da' lu le raca yödzölió ni.

17

Jesús rinábinē' Dios gácalenē' nupa dá'gaca Lē'

¹ Cate' budxi bē'ē Jesús yugu' didza' ni, guchisa lahuē', ruyúē' yehua' yubálö, ate' rnnē':

—Dios Xuz, chibidxín dza. Ben ga ilá' lahui yöl-la' zxon quia' neda', Zxí'inu', para gaca guna' ga ilá' lahui yöl-la' zxon quiu' Li'. ² Ben caní tu' chinudödu' lu na'a yöl-la' unná bē' para inná bē'eda' yúgu'tē bönachi, en gu'a yöl-la' na'bán idú quégaca yúgu'tē nupa na' chibennu' quia'. ³ Lē ni naca yöl-la' na'bán idú na', tu' núnbē'gaquiē' Li', nacu' la's dui Dios idú, en tu' núnbē'gaquiē' ca' neda', Jesucristo, ate' Li' nasól-lu'u neda'.

⁴ 'Neda' chibena' ga nalá' lahui yöl-la' zxon quiu' yödzölió ni, en chibudxi bena' dxin na' budödu' lu na'a. ⁵ Na'a, Xuz, ben ga ilá' lahui yöl-la' zxon napa' tsözxón len Li', para gaca quia' yöl-la' zxon guta' quia' tsözxón len Li' dza ni'te quez cate' sí' gata' yödzölió.

⁶ 'Chibulu'a lahui le nacu' Li' lógaquiē' bönni' ni bennu' quia', nupa na' guró'cazu' Li' ladaj bönachi yödzölió. Guléquinē' bönni' ni quiu', ate' bennagacu'-nē' quia', ate' tunē' ca rnna xtídzu'u. ⁷ Na'a nózguequinē' yúgu'tē lē na' bennu' quia' zá'gaca lu no'o Li', ⁸ tu' chibudöda' lu ná'agaquiē' didza' na' budödu' Li' lu na'a neda', ate' légaquiē' nazí' lu ná'agaquiē' le, en téquibe'enē' birúaja' ga zu' Li', ate' ta'yéajlé'ē Li' nasól-lu'u neda'.

⁹ 'Neda' ráta'yua' Lo' gácalenu' légaquiē'. Ráta'yua' Lo', caléga gácalenu' yúgu'tē bönachi yödzölió, pero gácalengacu'-nē' bönni' ni chibénnagacu'-nē' quia', tu' néquiguequinē' quiu'. ¹⁰ Yúgu'tē nupa néquiguequi quia' néquiguequi ca' quiu', ate' nupa na' néquiguequi quiu' néquiguequi ca' quia', ate' ca nácagaca nupa na' rulu'í' lahui yöl-la' zxon quia'.

¹¹ 'Na'a, bíti'rō ugá'ana' yödzölió ni, pero yugu' bönni' ni ulu'gá'anē' yödzölió, ate' neda' udusóalena' Li'. Xuz Lá'ayi, len yöl-la' huáca quiu' ben chí'i nupa ni chibennu' quia', para ilácagaca tuz, ca na' nácaru' rē'u tuz. ¹² Cate' ni' guzóalena' légaquiē' yödzölió ni, ben chí'igaca'-nē', buguna' dxin yöl-la' huáca na' bennu' quia'. Nupa na' bennu' quia', ben chí'igaca'-nē', ate' nitúē' bití' bunítia'-nē', pero tuzē' bönni' na' náquiē' ca zxí'ini tu' xihui', en narugu queé' gátiē' tsaz. Caní raca ca nazúaj lu guichi lá'ayi.

¹³ 'Na'a udusóalena' Li', ate' tsanni ni zoa' yödzölió ni, ruá'a yugu' didza' ni para gaca idú yöl-la' rudzeja quégagaciē' ca na' raca quia' neda' yöl-la' rudzeja. ¹⁴ Neda' chibudöda' lu ná'agaquiē' xtídzu'u, ate' bönachi yödzölió ni tu' zóa légaquiē' tsölá'aló tu' cabí nácagaciē' tuz len léguequi, ca na' naca quia' neda', bití' naca' tuz len bönachi

yödzölió ni. ¹⁵ Ráta'yua' Lo', calëga cúagacu'-në' yödzölió ni, pero gun chí'igacu'-në', para cabí ila'dzunë' lu na' tu' xihui'. ¹⁶ Biti' nácagaquië' tuz len bönachi yödzölió ni ca na' naca quia' neda', bití' naca' tuz len bönachi yödzölió. ¹⁷ Guléaj quez quiu' légaquië', ugunu' dxin le naca idútë li. Le naca idútë li na' naca xtídz'u. ¹⁸ Ca na' benu' Li', gusól-lu'u neda' ladaj bönachi yödzölió ni, lësca' caní runa' neda', risól-la'gaca'-në' ladaj bönachi yödzölió. ¹⁹ Tu' nadxí'igacada'-në' rudödi cuina' quiu', para ulu'ruájë' ca' légaquië' quez quiu' tu' nazí' lu ná'agaquië' le naca idútë li.

²⁰ 'Ráta'yua' Lo', calëga quégacasë' bönni' ni, pero lësca' quégaquië' bönni' ni' ila'yéajlë'ë neda' ni'a que didza' ilu'ë bönni' ni. ²¹ Ráta'yua' Lo' gunu' ga ilácagaquië' tuz yúgu'të', en ilácagaquië' ca' tuz len rë'u, ca na' nacu' Li', Xuza', nacu' tuz len neda', ate' neda' ca', naca' tuz len Li'. Caní ral-la' ilácagaquië' para ila'yéajlë' ia'zíca'rö bönachi yödzölió ni, Li' caz gusól-lu'u neda'. ²² Yöl-la' zxön na' bennu' quia', neda' bë'a ca' quégaquië', para ilácagaquië' tuz, ca na' nácaru' tuz rë'u. ²³ Li' nacu' tuz len neda', ate' neda' naca' tuz len légaquië', para gaca idú ca nácagaquië' tuz, en caní iléquibe'e ia'zíca'rö bönachi yödzölió ni, Li' caz gusól-lu'u neda', ate' nadxí'igacanu'-në' ca na' nadxí'inu' neda'.

²⁴ 'Xúza'do', ré'ënda' ila'cuá'lenë' neda' bönni' ni bënnagacu'-në' quia' ga na' tsöjsóa', para ila'lé'enë' yöl-la' zxön na' bennu' quia' dza ni'te cate' si' gunu' yödzölió tu' nadxí'inu' neda'. ²⁵ Xuza' tsahui', bönachi yödzölió ni bití' núnbë'gaca Li', pero neda' nunbë' caza' Li', ate' yugu' bönni' ni chinóziguequinë' Li' caz gusól-lu'u neda'. ²⁶ Bena' ga nóziguequinë' le nacu' Li', en gunra' ca' ga ila'nózinë' lë ni para ca na' nadxí'inu' Li' neda', lësca' caní ila'dxí'i luzá'agaquië', ate' gaca caza' tuz len légaquië'.

18

Ta'zönë' Jesús

(Mt. 26:47-56; Mr. 14:43-50; Lc. 22:47-53)

¹ Cate' budxi bë'ë Jesús yugu' didza' ni, birúajë' ni', ate' sa'yéajlenë' yugu' bönni' usëda queë'. Gudödë' ia'tsölá'a yegu Cedrón, en bidxinë' ga ni' nacuá' yaga olivo ca', ate' lataj ni guyázalenë' yugu' bönni' usëda queë'. ² Lësca' Judas, bönni' na' udödë' Jesús, núnbë'ë la' yëla na', tu' butubë' Jesús yugu' bönni' usëda queë' ni' zían luzuí. ³ Ní'irö guchë'ë Judas tu cö' bönni' rójáquië' gudil-la, en yugu' bönni' ni'a ná'agaquië' bixúz unná bë', en ni'a ná'agaquië' yugu' bönni' yudo' fariseo, ate' yöjáquië' ga ni' zoë' Jesús, nuá'agaquië' yugu' guí' yöri, en yugu' le tu'dí'inë'. ⁴ Ní'irö, tu' nózinë' Jesús yúgu'të le ral-la' gaca queë', birúajë' ga ni' zoë', en rë' légaquië':

—¿Nuzxi riguíljali'?

⁵ Bulu'bi'ë didza', të' Lë':

—Jesús, bönni' Nazaret, riguíljatu'-në'.

Jesús rë' légaquië':

—Neda' caz.

Judas, bönni' na' rudödë' Jesús lu ná'agaquië', zóalenë' légaquië'. ⁶ Cate' Jesús gudxë' légaquië': “Neda' caz”, ní'irö bulu'bíguë'ë cusi zxanlö, en gula'dzö'ë lu yu. ⁷ Jesús gunábinë' légaquië' leyúbölö, rnnë':

—¿Nuzxi riguíljali'?

Të' Lë':

—Jesús, bönni' Nazaret, riguíljatu'-në'.

⁸ Ní'irö bubi'ë didza' Jesús, rnnë':

—Chigúdx'a lib'ili': Neda' caz. Channö riguíljali' neda', guli'güf'-gáquië' lataj tsöjhuój-gaquië' bönni' ni.

⁹ Caní gunné' Jesús para idxín didza' na' bë'ë, gunné': “Nupa ni bennu' quia', nitúë' bití' bunítia'-në'.” ¹⁰ Ní'irö, tu' nu'ë Simón Pedro tu guíë tuchi', gulecjë' le, en bentë'

huë' Malco, tu bönni' huen dxin queë' bixúz lo, guchúguië' guídi náguië' ibëla bönni' na'.
¹¹ Ní'irö Jesús rë' Pedro na':

—Bugú'u guíë tuchi' quiu' lidxi. ¿Naru' cabí ral-la' quí'i saca'a lë na' chinunë' Xuza' ca gaca quía'?

Ridxinë' Jesús lahuë' bixúz lo

(Mt. 26:57-58; Mr. 14:53-54; Lc. 22:54)

¹² Yugu' bönni' na' röjáquië' gudil-la, en bönni' na' nacu'ë lu në'ë, enca' yugu' bönni' ni'a ná'agaquië' bönni' judío unná bë' gula'zönë' Jesús, en gulúgui'ë Lë'. ¹³ Ní'irö gula'ché'ë Lë' zí'alö lahuë' Anás, tu' náquië' xto' xzí'inë' Caifás, bönni' náquië' bixúz lo iz na'. ¹⁴ Náquië' Caifás bönni' na' buzéajni'inë' yugu' bönni' judío unná bë', buluí'inë' légaquië' dxí'arö gaca gátië' tuzë' bönni', en calëga initi idútë yödzo quégaquië'.

Rnnë' Pedro: "Biti' núnbë'a-në' Jesús"

(Mt. 26:69-70; Mr. 14:66-68; Lc. 22:55-57)

¹⁵ Simón Pedro, en ia'túë' bönni' usëda queë' Jesús yöjáquië' cúdzu'lë' Lë', söjnéhoquië' Lë'. Bönni' usëda ni guyázalenë' Jesús lö'a que lidxi bixúz lo, tu' núnbë'ë bixúz lo na' lë'.

¹⁶ Bugá'anë' Pedro ní'ilö ga nu riyaza lö'a na'. Que lë ni na' burúajë' bönni' usëda na' núnbë'ë bixúz lo lë', ate' bé'lenë'-nu didza' nigula na' run chí'inu ga nu riyaza lö'a na', ate' benë' ga guyázië' Pedro lö'a. ¹⁷ Ní'irö nigula na' run chí'inu ga nu riyaza lö'a rënu Pedro, rnnanu:

—¿Naru' cabí do'o ca' li' bönni' ni?

Bubi'ë didza' Pedro, rnnë':

—Calëga neda'.

¹⁸ Tu' run ziaga, yugu' bönni' huen dxin, en yugu' bönni' ni'a ná'agaca bönachi yudo' nabéquiagaquië' guí', ate' zúgüequinë' ra' guí' na', en tu'tsë'e cuíngaquië'. Lësca' Pedro zuílenë' légaquië', rutsë'e cuinë'.

Bixúz lo rinabi yúdxinë' Jesús

(Mt. 26:59-66; Mr. 14:55-64; Lc. 22:66-71)

¹⁹ Ní'irö gunabi yúdxinë' bixúz lo Jesús para inózinë' nupxi dá'gaca Lë', en nacxi naca le rusedinë' Jesús bönachi. ²⁰ Bubi'ë didza' Jesús, rë' lë':

—Lahui' lo bé'lëna' yúgu'të bönachi didza'. Buseditiqui'sida' légaquië' gapa naca lu yu'u ga tu'dubë' tu'sëdë' queë' Dios, enca' chila yudo', ga ni' tu'dubë' yúgu'të bönni' judío, en bití' bi didza' bë'a bagáchi'sö. ²¹ ¿Bizx que rinabi yúdxinu' neda'? Gunabi yudxi nupa ni' bila'yöni didza' bé'lëna' léguequi. Nózguequi quézinë' bönni' na' didza' na' bé'lëna' légaquië'.

²² Cate' budxi bë'ë Jesús didza' ni, tu bönni' ni'a ná'agaca bönachi yudo' gudápë'ë ru'ë Jesús, rnnë':

—¿Naru' caní rubí'tso' didza' lahuë' bixúz lo?

²³ Bubi'ë didza' Jesús, rë' lë':

—Channö bití' gunniá' dxí'a, gudixjö' bízxilö didza' bë'a bití' naca dxí'a, en channö guca dxí'a didza' bë'a, ¿bizx que na' gudápu'u neda'?

²⁴ Ní'irö Anás na' gusól-lë'ë Jesús náguë'ë, ate' bulu'sudxinë' Lë' lahuë' Caifás, bönni' náquië' idú bixúz lo.

Leyúbölö rnnë' Pedro: "Biti' núnbë'a-në' Jesús"

(Mt. 26:71-75; Mr. 14:69-72; Lc. 22:58-62)

²⁵ Cate' ni' zuínë' Pedro ra' guí' rutsë'e cuinë', yugu' bönni' nacu'ë ni' gulé' lë', ta'nnë':

—¿Naru' cabí do'o ca' li' Jesús na'?

Gudá'baguië' Pedro, rnnë':

—Calëga neda'.

²⁶ Zoë' ni' tu bönni' huen dxin queë' bixúz lo, náquië' di'a dza queë' bönni' na' Pedro guchúguië' guídi náguië', ate' bönni' huen dxin na' rë' Pedro:

—¿Naru' cabí bilé'e quézida' li' la' yëla ni', dzagu'-në' Jesús?

²⁷ Leyúbölö gudá'baguië' Pedro, ate' la' guródxitëba' böra.

Ridxinë' Jesús lahuë' Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Ní'irö gula'ché'ë Jesús, en bulu'zé'ë lidxë' Caifás na', ate' bila'dxinë' yúlahui' queë' bönni' yu'u lu në'ë uláz que yödz Roma, le nazí'i le Pretorio. Chizá' rení' dza na', ate' biti' gula'yázië' yugu' bönni' judío yúlahui' na', tu' téquinë' ila'báguë'ë xíguia' channö ila'yázië' ni', le gun ga biti' gaca ilahuë' xtsö' Laní Pascua, laní na' tu'subanë' ca benë' Dios, bubéajë' bönachi Israel luyú Egipto. ²⁹ Ní'irö birúajë' Pilato, bönni' na' yu'u lu në'ë, en bidxinë' ga na' nacu'ë, ate' rë' légaquië':

—¿Bizxi ruzégui'li'-në' bönni' ni didza'?

³⁰ Bulu'bi'ë didza', të' lë':

—La'tu' cabí nu'ë bönni' ni dö', biti' udóditu'-në' lo'.

³¹ Ní'irö Pilato rë' légaquië', rnnë':

—Libí'i cázali' guli'ché'ë, en buli'chi'a buli'söró Lë' ca rinná bë' xibá queéli'.

Yugu' bönni' judío të' lë', ta'nnë':

—Biti' dë lu na'tu' nu gútitu'.

³² Caní guca para idxín xtídzë'ë Jesús, le bë'ë naca ral-la' gátië'. ³³ Ní'irö buázië' Pilato yúlahui' na', ate' bulidzë' Jesús, en rë' Lë':

—¿Nacu' Li' Bönni' Rinná Bé'enë' Bönachi Judío?

³⁴ Bubi'ë didza' Jesús, rë' lë':

—¿Naru' rácasö quiu' rnno' caní, o gulé bönachi li' caní ca naca quia'?

³⁵ Pilato rë' Lë':

—¿Naru' réquitsenu' naca' judío? Yugu' bönni' uládz quiu', en yugu' bixúz unná bë' bulu'dödë' Li' lu na'a. ¿Bizxi caz benu'?

³⁶ Ní'irö bubí'ë didza' Jesús, rë' lë':

—Rinná bë'a neda', pero calëga ca ta'nná bë' bönachi yödzölió ni. La'tu' rinná bë'a ca ta'nná bë' bönachi yödzölió, ila'dil-lë' bönni' dá'gaquië' neda', para cabí ilu'ë lataj nu udödi neda' lu ná'agaquië' bönni' judío. Ca rinná bë'a neda' biti' naca ca ta'nná bë' bönachi yödzölió ni.

³⁷ Ní'irö Pilato rë' Lë':

—¿Nácatso' bönni' rinná bë'ë?

Bubi'ë didza' Jesús, rë' lë':

—Naca' ca na' rnno'. Que lë ni na' bida' ga gulja' yödzölió ni, para guna' ba nalí que le naca idútë li. Yúgu'të nupa ni tun le naca idútë li tu'zé nágagaca didza' ruá'a.

³⁸ Pilato rë' Lë':

—¿Bizxi na' le naca idútë li?

Ta'chúguië' queë' Jesús gátië'

(Mt. 27:15-31; Mr. 15:6-20; Lc. 23:13-25)

Cate' budxi gunné' Pilato caní, burúajë' leyúbölö ga na' nacu'ë bönni' judío unná bë' na', en rë' légaquië':

—Biti' bi dö' ridzólida' nu'ë bönni' ni. ³⁹ Libí'ili' dë tu le nulaga loli' runli' cate' raca Laní Pascua ni, rinábili' neda' usana'-në' queéli' tuë' bönni' nadzunë'. ¿Ré'ënili' usana'-në' queéli' Bönni' Rinná Bé'enë' Bönachi Judío?

⁴⁰ Ní'irö yúgu'të' gulu'ë zidzaj didza' leyúbölö, ta'nnë':

—¿Calëga bönni' ni, pero Barrabás usanu'-në' queétu'!

Barrabás na' náquië' gubán.

19

¹ Ní'irö Pilato guché'ë Jesús, en bené' ga gula'guíné' yugu' bönni' röjáquié' gudil-la Lë'.
² Bönni' röjáquié' gudil-la na' guluné' tu bregui' ni'a në'e yötsi', ate' bulu'dxié' le icjë' Jesús, en bulu'gácué' Lë' tu lari' tunna xiná chul-la ca naca le tácué' bönni' ta'nná bë'ë.

³ Ní'irö gula'biguë'ë lahué' Jesús, en të' Lë':

—¡Bica' bo' Li', Bönni' Rinná Bé'ené' Bönachi Judío!

Ní'irö gula'gápë'ë lahué'.

⁴ Ní'irö burúajë' Pilato, en rë' yugu' bönni' judío unná bë', rnnë':

—Buli'yú, rubéaja'-në' loli' ni para inózili' biti' bi rudzólida' le naca dö' nu'ë bönni' ni.

⁵ Ní'irö birúajë' Jesús, dxía icjë' bregui' ni'a në'e yötsi' na', en nácué' lari' tunna xiná chul-la na'. Pilato rë' légaquié':

—Ni zoë' bönni' ni.

⁶ Cate' yugu' bixúz unná bë', en yugu' bönni' ni'a ná'agaquié' bila'lé'ené' Jesús, zidzaj gulu'ë didza', ta'nné':

—¡Budé'ë lë'e yaga cruz! ¡Budé'ë lë'e yaga cruz!

Pilato rë' légaquié':

—Lib'i cázali' guli'ché'ë, en guli'tsöjdé'ë lë'e yaga cruz. Neda' biti' bi dö' budzólida' nu'ë bönni' ni.

⁷ Ní'irö bönni' judío na' të' lë':

—Dë queétu' tu xibá, ate' rinná bë' xibá queétu' na' ral-la' gátié' bönni' ni tu' gunné' náquié' Zxí'iné' Dios.

⁸ Cate' biyönné' Pilato didza' ni, gúdxiröné'. ⁹ Leyúbölö buázié' yúlalui' na', en rë' Jesús:

—¿Gázxité bönni' Li'?

Biti' bi didza' bubi'ë Jesús.

¹⁰ Ní'irö Pilato rë' Lë':

—¿Naru' cabí ubí'tso' didza', quíxjöi'inu' neda'? ¿Naru' cabí nózinu' dë lu na'a udá'a Li' lë'e yaga cruz, en dë lu na'a usana' Li'?

¹¹ Bubi'ë didza' Jesús, rë' lë':

—Biti' bi dë lu no'o gunu' quia' la'tu' cabí nudödë' Dios yöl-la' unná bë' na' lu no'o. Que lë ni na', bönni' na' budödë' neda' lu no'o nabága'rë' xíguia' ca li'.

¹² La' ní'isö rizóa ribö'ë Pilato usané' Jesús, pero gulu'ë zidzaj didza' bönni' judío unná bë', ta'nné':

—Channö usanu'-në' bönni' ni, biti' ridzagu'-në' dxi'a César, bönni' rinná bé'ené' iduté yödzölió. Nu bönni' run cuiné' bönni' rinná bë'ë, ridá'báguë'ë César na'.

¹³ Cate' biyönné' Pilato didza' ni, gunná bé'ené' nupa diguá'gaca Jesús, ate' gurö'ë xilatjë' ga ruchi'a rusöróë', lataj na' nazí'i le Lö'a Ga Zxóagaca Guiójta'a, en ca naca didza' hebreo nazí'i le Gabata. ¹⁴ La' dza ná'asö naca dza si' idxín Laní Pascua, en naca idú hua gubidza. Ní'irö Pilato gudxë' yugu' bönni' judío unná bë' na', rnnë':

—Ni zoë' bönni' rinná bé'ené' libí'ili'.

¹⁵ Gulu'ë zidzaj didza', ta'nné':

—¡Bétié'! ¡Bétié'! ¡Budé'ë lë'e yaga cruz!

Pilato rë' légaquié':

—¿Rinábitseli' neda' udá'a-në' lë'e yaga cruz bönni' rinná bé'ené' libí'ili'?

Bulu'bi'ë didza' bixúz unná bë', ta'nné':

—Cúnturö nu zoa rinná bé'e netu'. Tuzë' César rinná bé'ené' netu'.

¹⁶ Que lë ni na' Pilato budödë' Jesús lu ná'agaquié', para tsöjdá'agaquié' Lë' lë'e yaga cruz. Ní'irö gula'guélë'ë Jesús, en gula'ché'ë Lë' ní'ilö.

Tu'dé'ë Jesús lë'e yaga cruz

(Mt. 27:32-44; Mr. 15:21-32; Lc. 23:26-43)

¹⁷ Birúajë' Jesús ni', nu'ë yaga cruz queë', sa'yéajë' lataj na' naz'i le Lataj Que Böga' Ícjaru', en ca naca didza' hebreo naz'i le Gólgota. ¹⁸ Bulu'dé'ë Jesús lë'e yaga cruz ni', ate' bulu'dá'lenë' Lë' tsözxón lé'egaca yaga cruz ia' chopë' bönni'. Tsölá'a huéaj ta'dé'ë, ate' Jesús dé'ë gatsaj láhui'lö chopë' bönni' na'. ¹⁹ Gusól-lë'ë Pilato tu bönni' nu'ë le buzúajë' lu guichi le buzóë' lë'e yaga cruz icjlë' Jesús, le rnna caní: "Jesús, Bönni' Nazaret, Bönni' Rinná Bé'enë' Bönni' Judío." ²⁰ Bulu'labë' zían bönni' judío didza' ni, tu' zoa ga na' bulu'dé'ë Jesús lë'e yaga cruz gála'sö ra' yödzo, ate' didza' na' nuzúajë' len didza' hebreo, en len didza' griego, en len didza' latín. ²¹ Yugu' bixúz unná bë' quégaquië' bönni' judío të' Pilato, ta'nnë':

—Biti' uzúaju', "Bönni' Rinná Bé'enë' Bönni' Judío." Buzúaj caní: "Bönni' ni gunné': Inná bé'eda' bönni' judío."

²² Bubi'ë didza' Pilato, rë' légaquië':

—Le chinuzúaja', tsaz chinuzúaja'.

²³ Cate' yugu' bönni' na' röjáquië' gudil-la budxi bulu'dé'ë Jesús lë'e yaga cruz, gula'guélë'ë lari' gúcuë'. Gula'béajë' tápalö, tu cö' huéaj guta' que quégaquië'. Gula'guélë'ë ca' lari' guxóa yenë' Jesús, ate' lari' na' bití' nadía, pero naduba tuz ca naduba. ²⁴ Ní'irö yugu' bönni' na' röjáquië' gudil-la gulé' luzá'agaquië' tuë' ia'túë', ta'nnë':

—Biti' ichúguru' le, pero dxí'arö gaca uyuru' le gaca bë' para inóziru' nuzxi guequi que.

Caní guca, budxín ca nazúaj lu guichi lá'ayi, le rnna:

Gula'guísië' que quégaquië' lari' nacua', en que lari' quia' bulu'yúë' le naca bë'.

Caní gulunë' bönni' na' röjáquië' gudil-la.

²⁵ Xiné'ë Jesús, en nigula zxílanu xiné'ë, en María, nigula queë' Cleofas, en María Magdalena gula'cuá'anu gala' ga na' dé'ë Jesús lë'e yaga cruz. ²⁶ Cate' Jesús bilé'enë'-nu xiné'ë, en bilé'enë' ca' zoë' ni' bönni' usëda queë' na' nadxí'inë', gudxë'-nu xiné'ë:

—Na'a, na' zoë' xzí'inu'.

²⁷ Ní'irö gudxë' bönni' usëda queë' na':

—Na' zóanu xinó'o.

Bönni' usëda na' benë' ga yöjsóanu lidxë' la' dza ní'isö.

Le guca cate' gutië' Jesús

(Mt. 27:45-56; Mr. 15:33-41; Lc. 23:44-49)

²⁸ Gudödi ni, tu' nózinë' Jesús yúgu'të chibóa budzaga lahui, en para udxín le nazúaj lu guichi lá'ayi, gunné':

—Ribidxa' nisa.

²⁹ Dë ni' tu xziga' yudzu nupi zi. Ní'irö yugu' bönni' na' röjáquië' gudil-la bulu'gui'jë' nupi zi na' tu le bululu rizxupi nisa, ate' bulu'zóë' le tu lahui gui, en bulu'dé'ë le ru'ë Jesús para xupë'. ³⁰ Budxi gu'ë Jesús nupi zi na', gunné':

—Chinácatë.

Ní'irö buzötaj icjë'. Burúajtë bö' naca cazë', gútië'.

Tu bönni' reajë' gudil-la runë'ë yaga tuchi' cuita lë'ë Jesús

³¹ Ní'irö, tu' naca dza si' idxín Laní Pascua na', en tu' cabí ral-la' ulu'gá'ana nupa nátigaca lé'egaca yaga cruz cate' naca dza lá'ayi quégaquië', le naca tu dza lá'ayi zxöntë, que lë ni na' yugu' bönni' judío gulá'tayuë' lahuë' Pilato guíë' bönni' röjáquië' gudil-la tsöjtítsjagaquië' xiguíchjagaquië' bönni' dá'gaquië' lé'egaca yaga cruz, en ulu'zötjë' légaquië' lé'egaca yaga cruz na'. ³² Que lë ni na' gula'biguë'ë bönni' röjáquië' gudil-la, ate' gula'guítsjë' xiguichjë' bönni' zí'alö, en lësca' caní gulunë' queë' ia'túë' bönni' na' dá'lenë' Jesús lë'e yaga cruz. ³³ Cate' bila'dxinë' ga na' dé'ë Jesús, en bila'lé'enë' chinátië', bití' gula'guítsjë' xiguichjë'.

³⁴ Ní'irö tuë' bönni' na' reaje' gudil-la buné'ë yaga tuchi' cuita lë'ë Jesús, ate' la' birúajtë rön, en nisa. ³⁵ Neda', Juan, bilé'eda' lë ni, en runa' ba nalí que, ate' le runa' ba nalí naca idútë li. Nöz quézida' ruá'a didza' idútë li, para tséajlë'ëli' ca' libí'ili' ca naca queë' Jesús. ³⁶ Gulaca yugu' lë ni para budxín le nazúaj lu guichi lá'ayi, le rnna: "Biti' gatsaj nitú dxita yu'ë." ³⁷ Ia'tú le nazúaj ca' lu guichi rnna caní: "Ulu'yúë' bönni' na' bulu'né'ë lë' yaga tuchi'."

Tu'cáché'ë Jesús

(Mt. 27:57-61; Mr. 15:42-47; Lc. 23:50-56)

³⁸ Gudödi guca yúgu'të lë ni, guyijë' José, bönni' yödzö Arimatea, bönni' dë'ë Jesús, pero bagáchi'sö tu' rádxiñë' yugu' bönni' judío unná'bë', ate' gunábinë' Pilato gu'ë lë' lataj u'ë Jesús. Pilato bë'ë lë' lataj. Ní'irö bidxiñë' José ga na' dë'ë Jesús lë'e yaga cruz, ate' bu'ë Lë'. ³⁹ Lësca' bidxiñë' Nicodemo ni', bönni' na' guyijë' zí'alö yöjyúë' Jesús chi'i dzó'ölö, nu'ë tu le nutsí'i nöri silá' que mirra, en tu le rilá' zixixi, le naca ca tu gayuá' guíë. ⁴⁰ Ní'irö José, en Nicodemo na' gula'guélë'ë Jesús, en bulu'chólinë' Lë' yugu' lári'do', ate' gula'gu'ë láhuilö lë na' nutsí'i nöri silá' que mirra, en le rilá' zixixi. Gulunë' ca nalébiguequinë' tunë' bönni' judío cate' tu'cáché'ë tu bönni' nati. ⁴¹ Gala' ga na' bulu'dé'ë Jesús lë'e yaga cruz dë tu luyú ga zeaj da' yaga olivo, ate' gatsaj láhui'lö lataj na' zoa tu yeru ba cubi le nadaj lë'e guí'a guíoj, yeru ba na' cuntu nu ta'güí'inë'. ⁴² Lu yeru ba na' gula'gu'ë Jesús tu' dë gála'sö yeru ba na', en tu' naca dza tu'pé'ë bönni' judío que Laní Pascua.

20

Rubanë' Jesús lu yöl-la' guti

(Mt. 28:1-10; Mr. 16:1-8; Lc. 24:1-12)

¹ Cate' chinaca zílado' dza domingo, en ni' naca chul-la, guyéajnu María Magdalena ra' yeru ba na', ate' bilé'enu chinadúa guíojta'a na' busayaj ga nu riyaza yeru ba na'. ² Ní'irö bóajnu carelö ga zoë' Simón Pedro, dzáguie' lë' ia'túë' bönni' usëda, bönni' na' Jesús nadxí'inë' lë', ate' rënu légaquië':

—Bulu'béajë' Xanru' yeru ba ni', en bití' nöztu' gazxi gula'gu'ë Lë'.

³ Ní'irö bila'ruájë' Pedro, en ia'túë' bönni' usëda na', söjáquië' ra' yeru ba na'. ⁴ Tsözxón ta'xíti'ë iropë', pero ia'túë' bönni' usëda na' guxíti'rë' carelö ca Pedro, ate' zí'alö lë' bidxiñë' ra' yeru ba na'. ⁵ Biyéchuë', en buyúë' lu yeru ba na', ate' bilé'enë' yugu' lári'do' na' bila'röli-në' Jesús, nacuá' ni', pero bití' guyázië' yeru ba na'. ⁶ Ní'irö bidxiñë' Simón Pedro cúdzu'lë' ia'túë' bönni' usëda na', ate' guyázië' lë' yeru ba na', en bilé'enë' lári'do' na' nacuá' ni'. ⁷ Lësca' bilé'enë' lári'do' na' gula'xóë' icjë' Jesús, bití' dëlen ia'zica'rö lári'do' na', pero tsölá'alö nudubi quez. ⁸ Ní'irö guyázië' ca' ia'túë' bönni' usëda na' bidxiñë' zí'alö ra' yeru ba na', en bilé'enë' ca na' naca, ate' guyéajlë'ë didza' bë'ë Jesús. ⁹ Caní guca, tu' cabí ta'yéajni'ininë' le nazúaj lu guichi lá'ayi ca run bayudxi gaca queë' Jesús, ate' ubanë' lu yöl-la' guti. ¹⁰ Ní'irö iropë' bönni' usëda na' yöjhuójgaquië' lídxigaquië'.

Rulu'i lahuë' Jesús lonu María Magdalena

(Mr. 16:9-11)

¹¹ Bugá'ananu María ní'ilö ra' yeru ba na', ribódxinu. Tsanni ni' ribódxinu, biyéchunu, buyunu lu yeru ba na'. ¹² Bilé'enu chopë' gubáz lá'ayi queë' Dios ni', nácugaquië' lari' chiguichi. Ró'ögaquië' ni', tuë' ícjälö ba na', en ia'túë' xini'alö ba na' ga ni' gula'gu'ë Jesús. ¹³ Yugu' gubáz lá'ayi na' të' lënu, ta'nné':

—Nigúlado', ¿bizx que ribödxu'?

Rënu légaquië':

—Tu' bulu'ú'ë Xana', en bití' nözda' gazxi gula'gu'ë Lë'.

¹⁴ Cate' budxi gunnánu caní, buécjanu, en bilé'enu-né' Jesús, zoé' ni', pero biti' réquibe'enu Jesús na'. ¹⁵ Ní'irö Jesús gudxé'-nu:

—Nigúlado', ¿bizx que ribödxu'? ¿Nuzxi ruguilju'?

Tu' réquinu náquié' Lë' bönni' rapa chi'é latja na', rënu Lë':

—Bönni', channö li' bu'u-né', gudíxjöi' neda' gazxi gulú'u-né', ate' neda' u'a-né'.

¹⁶ Ní'irö Jesús gudxé'-nu:

—María.

Ní'irö buécjanu, en lu didza' hebreo rënu Lë':

—Raboni.

Didza' ni rnna: Bönni' Usedi quia'.

¹⁷ Jesús rë'ë-nu:

—Biti' canu' neda', tu' cabí ruhuépinida' ga zoé' Xuza'. Na'a, guyéaj ga nacué böchi' luzá'a, ate' yöjödxi-gáquié': "Caní rnné' Jesús: Huëpa' ga zoé' Xuza', náquié' ca' Xúzili'. Náquié' Dios quia', en Dios queé'li'."

¹⁸ Ní'irö guyéajnu María Magdalena na', yöjtíxjöi' inu yugu' bönni' usëda queé' Jesús chibilé'enu-né' Xanru', en ca naca didza' na' gudxé'-nu.

Rulu'i lahué' Jesús lógaquié' bönni' usëda queé'

(Mt. 28:16-20; Mr. 16:14-18; Lc. 24:36-49)

¹⁹ Cate' chigul-la la' dza ná'asö, le naca dza risí lo gadxi dza, nudúbigaquié' bönni' usëda queé' Jesús, ate' nayayaj yu'u ga na' nacué tu' tádxiné' bönni' judío unná bë'. Ní'irö bulu'i lahué' Jesús gatsaj láhui'lö ga na' nacué, en rë' légaquié':

—Guli'zóa dxi ládxi'li'.

²⁰ Cate' budxi gudxé' légaquié' didza' ni, bulu'iné' légaquié' në'ë, en cuita lë'ë. Ní'irö tu'dzéjané' yugu' bönni' usëda na' tu' tu'lé'ené' Xanru'. ²¹ Ní'irö Jesús rë' légaquié' leyúbölö, rnné':

—Guli'zóa dxi ládxi'li'. Ca bené' Xuza', gusól-lë'ë neda', lëasca' caní risól-la'a lib'ili' tsöjenli' xichina'.

²² Cate' budxi gunné' caní, bulubë' lógaquié', en rë' légaquié':

—Guli'sí' Dios Bö' Lá'ayi. ²³ Núti'tës nu uniti loli', nu na' ben dul-la', chiyú'u yöl-la' runiti lo que, ate' núti'tës nu biti' uniti loli' le, ugá'ana dul-la' que nu na' nun dul-la'.

Biti' réajlë'ë Tomás

²⁴ Tomás biti' zóalené' légaquié' cate' Jesús buduyúé' légaquié'. Náquié' Tomás tué' bönni' chínnuë' ni', en tu'ë ca' lë' Bönni' Bilidi'. ²⁵ Gudödi ni' ia'zica'rë' bönni' usëda na' gulé' Tomás, ta'nné':

—Chibilé'etu'-né' Xanru'.

Tomás rë' légaquié':

—Channö cabí ilé'eda' në'ë ga gunné' bididaj, en uné'a xibón na'a ga na' guné' gaca bididaj na', en uné'a na'a cuita lë'ë ga na' gunné' yaga tuchi', biti' ca' tséajlë'a.

²⁶ Cate' chigudödi ia'xunu' dza, nudúbigaquié' bönni' usëda na' leyúbölö lu yu'u, ate' Tomás na' zóalené' légaquié'. Sal-la' nayayaj yu'u ga na' nacué, bulu'i lahué' Jesús gatsaj láhui'lö ga na' nacué, en rë' légaquié':

—Guli'zóa dxi ládxi'li'.

²⁷ Ní'irö Jesús rë' Tomás na':

—Buné' xibón no'o ni, en buyú na'a ni. Buné' no'o cuita lë'a ni, en bíti'rö gaca chopa ládxi'u, pero guyéajlë' neda'.

²⁸ Ní'irö bubí'ë didza' Tomás, rë' Lë':

—Xána'do', en Dios quia'.

²⁹ Jesús rë' lë':

—Tomás, tu' bulé'enu' neda', réajlë'u. Bica' ba nupa ni' ila'yéajlë' neda' sal-la' biti' ila'lé'eni neda'.

Le ré'ëni gun didza' nazúaj lu guichi ni

³⁰ Benë' Jesús zíanrö ca' yöl-la' huáca lógaquië' bönni' usëda queë', le cabí nazúajgaca lu guichi ni. ³¹ Yugu' lë ni nuzúaja' lu guichi para tséajlë'ëli' náquië' Jesús Bönni' na' ru'ë Dios lë' Cristo, Zxí'inë' Dios, en cate' tséajlë'ëli', gata' queëli' yöl-la' na'bán idú tu réajlë'ëli'-në'.

21

Rulu'i lahuë' Jesús lógaquië' gadxë' bönni' usëda queë'

¹ Gudödi guca lë ni, leyúbölö bulu'i lahuë' Jesús lógaquië' bönni' usëda queë' ga naca ra' nísado' que Tiberias, ate' caní guca ca na' bulu'i lahuë' lógaquië'. ² Nudúbigaquië' Simón Pedro, en Tomás, bönni' na' tu'ë ca' lë' Bönni' Bilidi', en Natanael, bönni' yödzo Caná que luyú Galilea, en chopë' bönni' zxí'inë' Zebedeo, en ia' chopë' ca' bönni' usëda queë' Jesús. ³ Simón Pedro rë' légaquië':

—Tseaja' tsöjxöna'-ba' böla.

Të' lë' ia' zíca'rë', ta'nnë':

—Guntu' li' tsözxón.

Ní'irö yójáquië', en gula'benë' tu lë'e bárcodo', ate' rëla ni' nituba' böla bití' gula'zönë'-ba'. ⁴ Cate' chizá' rení', yöjsóë' Jesús luyú ra' nisa na', pero bití' téquibe'enë' bönni' usëda queë' Jesús Lë' na'. ⁵ Ní'irö Jesús rë' légaquië':

—Zxí'ina'do', ¿naru' cabí deba' lati' böla queëli'?

Bulu'bi'ë didza', të' Lë':

—Nítuba'.

⁶ Ní'irö Jesús rë' légaquië':

—Gulí'chí'aj yöxaj böla queëli' tsölá'a ibëla barco, ate' sóngacali'-ba'.

Ní'irö gula'chiljé' le, ate' bítí'rö guca ulu'béajé' le, tu' naguíraba' böla lë'e yöxaj böla na'. ⁷ Ní'irö bönni' usëda na' nadxí'inë' Jesús lë' rë' Pedro, rnnë':

—¿Xanru' na'!

Cate' biyönnë' Simón Pedro, “Xanru' na'”, böácuë' lari' gúcuë', tu' nagüë' le z'älö, ate' guyázië' lu nisa. ⁸ Bila'dxinë' ia' zíca'rë' bönni' usëda na', tu'séë barco na', suná'yöjgaquië' yöxaj ga na' dzó'öba' böla, tu' cabí naca zítu' ga dë luyú bidxi. Nácate ca tu gayuá' löga' ní'aru'. ⁹ Cate' bila'dxinë' luyú bidxi na', bila'lé'enë' rö'ö tu guí' bo' yalaj ni', en zxóaba' tuba' böla láhuilö, en dë ca' yöta ni'. ¹⁰ Jesús rë' légaquië':

—Gulí'diguá'a-ba' ni böla na' si' guzxóngacali'-ba'.

¹¹ Gurenë' Pedro lë'e barco na', ate' gú'uyöjé' yöxaj na' zaca' luyú bidxi, nalí'ró-ba' böla zxon, idú tu gayuá' yu' chí'inu-unba'. Sal-la' nácagacaba' böla zían, bití' biröza' yöxaj na'.

¹² Ní'irö Jesús rë' légaquië':

—Gulí'dá gáguli'.

Bití' burúguinë' nitúë' bönni' usëda queë' na' inábinë' Lë', innë': “¿Nuzxi Li'?” Nózguequi quézinë' náquië' Xanru'. ¹³ Ní'irö gubígui'ë Jesús, en gudélë'ë yöta na', enca' böla na', ate' bë'ë quégaquië'.

¹⁴ Lë ni naca le bunni luzuí bulu'i lahuë' Jesús lógaquië' bönni' usëda queë' gudödi bubané' lu yöl-la' guti.

Jesús ru'ilenë' Simón Pedro didza'

¹⁵ Cate' budxi gulahuë', Jesús rë' Simón Pedro:

—Simón, zxí'inë' Jonás, ¿naru' nadxí'irönu' neda' ca nadxí'iguequinë' bönni' ni neda'?

Bubi'ë didza' Pedro, rë' Lë':

—Ön, Xan. Li' nöz quézinu' raza ládxa'a Li'.

Jesús rë' lë':

—Bugagu yugu' bö'cu' zxfí'la'do' quia'.

¹⁶ Jesús rë' lë' le buropi luzuí, rnnë':

—Simón, zxí'inë' Jonás, ¿naru' nadxí'inu' neda'?

Bubi'ë didza' Pedro, rë' Lë':

—Ön, Xan. Li' nöz quézinu' raza ládxa'a Li'.

Jesús rē' lē':

—Bugagu yugu' bö'cu' zxila' quia'.

¹⁷ Jesús rē' lē' le bunni luzuí:

—Simón, xzí'inē' Jonás, ¿raza ládxa'u neda'?

Buí'innē' Pedro tu' le chibunni luzuí rinabi yúdxinē' lē', gunné': "¿Raza ládxa'u neda'?"
Bubi'ē didza' Pedro, rē' Lē':

—Xan, yúgu'tē nöz quézinu' Li'. Nózinu' raza ládxa'a Li'.

Jesús rē' lē':

—Bugagu yugu' bö'cu' zxila' quia'. ¹⁸ Le nácatē rea' li', cate' ni' nacu' ra'bando', rácasö quiu' bugacu cuinu', en ca gunnásö quiu' gudó'. Cate' igulu', ulí no'o, ate' nu yúbölö ugacu li' lari', en iché' li' ga ni' biti' gué'ennu' tseaju'.

¹⁹ Yugu' didza' ni bē'ē Jesús naca bē' naca gátie' Pedro, tsöjté'ē lē'e yaga cruz, para gaca yöl-la' ba queē' Dios. Cate' budxi gunné' caní Jesús, gunné' ca' ia'tú:

—Gudá' neda'.

Ru'ē didza' Jesús ca gaca queē' bönni' usēda na' nadxí'inē'

²⁰ Buécjē' Pedro, en bilé'enē' söjnáhuē' légaquiē' bönni' usēda na' Jesús nadxí'inē' lē'. Náquiē' bönni' usēda na' gurö'ē cuita lē'ē Jesús cate' ni' gulahuē', en gudxē' Jesús: "Xan, ¿nuzxi na' udödi Li'?" ²¹ Cate' Pedro bilé'enē' lē', rē' Jesús:

—Xan, ¿bizxi gunē' bönni' ni?

²² Jesús rē' lē':

—Channö ré'ēnda' ugá'anē' bönni' ni ga idxinrö dza huöda', biti' ral-la' cö'u böniga. Gudá'a neda' li'.

²³ Guzé didza' ni ga nacu'ē bóchi'ru' ta'yéajlē'ē Cristo. Téquinē' biti' gátie' bönni' usēda na'. Jesús biti' gudxē' lē' biti' gátie', pero caní gunné': "Channö ré'ēnda' ugá'anē' bönni' ni ga idxinrö dza huöda', biti' ral-la' cö'u böniga."

²⁴ Bönni' usēda ni naca' neda', Juan. Runa' ba nalí quéguequi lē ni, en nuzúaja' yugu' lē ni lu guichi, ate' nózili' naca idútē li le runa' ba nalí.

²⁵ Ziánrö ca' le benē' Jesús. Channö nu uzúaj léguequi lu guichi tu tu, rusaca' quia' biti' guequi yödzölió ni ila'cuá' guichi na' ral-la' nu uzúaj. Ca' caz.

LE GULUNĒ' BÖNNI' GUBÁZ NASÖL-LĒ'Ē CRISTO Los Hechos

Le guzxi' lu në'ë Dios, isól-lë'ë Dios Bö' Lá'ayi

¹ Cate' buzúaja' lu guichi zí' alö, quiu' lí', Teófilo, neda', Lucas, buzúaja' yúgu'të le gusi lahuë' runë' Jesús, en rusédinë' ² ga bidxintë dza buëpë' yehua' yubá. Cate' si' huëpë' Jesús yehua' yubá, dzáguie' Dios Bö' Lá'ayi Lë', gunná bë'ë ca ral-la' ilunë' gubáz queë', yugu' bönni' na' guró cazë'. ³ Gudödi gud'í' guzxaquë'ë Jesús, gútië'. Ní'irö bubanë', en bulu'í' lahuë' lógaquie' gubáz queë' na'. Bulu'ínë' légaquie' zían le gulaca bë' zoë' nabanë', le cabí gaca nu tá'baga'. Zían luzuí bulu'í' lahuë' lógaquie' idú ca choá' dza, en bé'lenë' légaquie' didza' ca rinná bë'ë Dios.

⁴ Cate' ni' nacu'ë tsözxón, gunná bé'enë' légaquie' cabí ulu'zé'ë Jerusalén. Jesús gudxë' légaquie', rnnë':

—Gulí' cóz ni' le guzxi' lu në'ë Xuza' isól-lë'ë queéli' ca na' chibusiyón quezida' libí'ili'.

⁵ Gunnë' ca':

—Le nácatë Juan buquile' bönachi nisa lu nisa. Na'a bití' tse xidzé gaca queéli' le rulu'í' yöl-la' ridila nisa ni, idisóalenë' Dios Bö' Lá'ayi libí'ili'.

Ruhuëpë' Jesús yehua' yubá

⁶ Ní'irö yugu' bönni' ta'yéajlë'ë Jesús, nudúbigaquie' ni', gula'nábinë' Lë', ta'nnë':

—Xan, ¿naru' gunu' ga ila'nná bë' bönachi Israel leyúbölö dza ni zóaru' na'a?

⁷ Jesús gudxë' légaquie':

—Bití' nequi queéli' inózili' bizxi dza o bizxi dzö' gunë' Dios Xuz le nuzóë' lu na' cazë'.

⁸ Sí'ili' yöl-la' huáca cate' guídë' Dios Bö' Lá'ayi idisóalenë' libí'ili'. Ní'irö gunlí' ba nalí quia' neda' lu yödzö Jerusalén, en idú luyú Judea, en luyú Samaria, en ga idxíntëli' idútë yödzölió.

⁹ Cate' budxi bé'lenë' légaquie' didza' ni, tsanni ni' tu'yusë' ca' Lë', la' buëpitë' xitsá' ga rö'ö tu böaj le bucache' Lë', ate' bíti'rö bila'lé'enë' Lë'. ¹⁰ Tsanni ni' tu'yúë' lúzxibalö cate' ni' buëpë' Jesús, bulu'í' lógaquie' chopë' gubáz lá'ayi ga na' nacu'ë, nácugaquie' lari' chiguíchido'os. ¹¹ Chopë' ni gulé' légaquie', ta'nnë':

—Bönni' Galilea, ¿bizx que ruyuli' lúzxibalö? Lë' cazë' Jesús ni si' guzë'ë ga zóali', buëpë' yehua' yubá, lësca' caní huödë' leyúbölö ca na' chibilé'eli'-në' söhuóje' yehua' yubá.

Ta'böö' Matías para tsázië' xilatje' Judas

¹² Ní'irö gula'zé'ë ga na' rö'ö guí'ado' na' nazí' le Guí'a Yaga Olivo, ate' yöjhuójgaquie' Jerusalén. Guí'ado' ni dë gála'sö ga dë Jerusalén, tsca nazí'gaquie' lataj ta'zé'ë dza lá'ayi quégaquie'. ¹³ Cate' bulu'dxinë' yödzö ni', gula'benë' ga naca buropi cuía lu yu'u, ga ni' ta'cu'ë Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, xí'inë' Alfeo, en Simón, bönni' na' ru'í' lódxë'ë ladzë', en Judas, bóché'ë Jacobo. ¹⁴ Yúgu'të bönni' ni tu'lidzë' Dios tsözxón, ate' yugu' bóché'ë Jesús, en María, xinë'ë Jesús, en ia'zica'rönu nigula ca' núngaquie' légaquie' tsözxón.

¹⁵ La' dza ná'asö guzuínë' Pedro gatsaj láhui'lö ga nacu'ë böchi' luzá'aru' na' ta'yéajlë'ë Cristo. Gulaca idú ca xópalalaj bönachi nupa nudúbigaca ni'. ¹⁶ Pedro gudxë' légaquie', rnnë':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunné' Dios Bö' Lá'ayi dza ni'të, le buzúajë' David lu guichi, ca guca queë' Judas, bönni' na' guché'ë nupa ni' gula'zón Jesús. ¹⁷ Judas na' gubábalenë' rë'u, en bënlenë' rë'u tsözxón dxin ni. ¹⁸ Gula'zí'inë' tu la' yëla lazxaj que dö' na' bi'ë bönni' ni. Judas ni gubixë', en biröza' lë'ë,

ate' bila'ruáj yúgu'të le dzö'ö lë'ë. ¹⁹ Cate' bila'yöni bönachi nacuá' Jerusalén lë ni, gulu'ë le la' yëla na' Acéldama, tu didza' hebreo le rnna lu didza' xidza': La' Yëla Rön. ²⁰ Caní guca queë' Judas, ca na' nazúaj lu guichi lá'ayi nazi'i le Salmos, le rnna:

Ugá'ana cá'asö lidxë',
en bití' idzöli nu soa yu'u na'.

Rnna ca':
Nu yúbölö tsaza xilatjé'.

²¹⁻²² 'Run bayudxi na'a cöru'-në' tu bönni' gunë' rë'u tsözxón para gunë' ba nalí queë' Jesús, ca guca, bubanë' lu yöl-la' guti. Ral-la' gáquië' bönni' nabábalenë' bönni' ni' gula'cuá'lenë' rë'u dza ni'te cate' ni' Xanru' Jesús gudálenë' rë'u. Gula'sí lógaquië' nacuá'lenë' rë'u cate' ni' buquilë' Juan bönachi nisa, ga bidxintë dza buëpë' Jesús yehua' yubá, cate' buzé'ë ga zóaru'.

²³ Ní'irö bulu'lu'ë chopë', José, en Matías. José na' lë' ca' Barsabás, en zoa ia'tú lë' Justo. ²⁴ Ní'irö bulu'lidzë' Dios, ta'nné':

—Xantu' Dios, nunbë' cazu' icja ládxi'do'gaca yúgu'të bönachi. Bulu'í netu' nulë' chopë' ni chiguró cazu' Li' ²⁵ para tsázië' lu dxin ni para gáquië' gubáz quiu'. Tsázië' xilatjé' Judas, bönni' ni' bunítië' xilatjé' tu' benë' dul-la', ate' guyijë' xilataj cazë' lataj chul-la.

²⁶ Ní'irö bulu'zúajë' yugu' lu guichi lágaquië', tu queë' José, en ia'tú queë' Matías. Bulu'gútsi'në' luzé'eguequi, en bulu'béajë' tu, ate' birúaj le nazúaj lë' Matías. Caní guca, Matías na' gubábalenë' ia'chinéajë' gubáz queë' Cristo.

2

Dios Bö' Lá'ayi ridisóalenë' légaquië'

¹ Cate' chibidxín dza Pentecostés, nudúbigaquië' tsözxón yúgu'të bönni' ta'yéajlë'ë Cristo. ² Tsárido'os biyón bö le birúaj lúzhiba, le biyón ca riyón cate' recja bö' budunu', ate' biyón idütë lu yu'u ga na' ró'ögaquië'. ³ Bulu'lu'í lahui yugu' bululu guí'do' lu bö'ös lógaquië', ate' gula'guísi que queé'gaquië'. Bidisóalengaca tu tuë'. ⁴ Caní guca, Dios Bö' Lá'ayi bidisóalenë' yúgu'të', ate' gula'sí lógaquië' tu'ë didza' yúbölö, tsca naca le bë'ë Dios Bö' Lá'ayi que queë' gu'ë didza' yúbölö na'.

⁵ Nacu'ë zían bönni' judío yödzö Jerusalén dza na', nácagaquië' bönni' ta'yéaj ládxi'gaquië' Dios, en zá'gaquië' narúajgaquië' yúgu'të yödzö idütë yödzölió ni. ⁶ Cate' bila'yönnë' bö na', bulu'dubë' bönni' zían, ate' gula'bó'ë böniga, tu' bila'yönnë', ca naca xtídza'gaquië' que queé'gaquië', tu'ë didza' bönni' na' ta'yéajlë'ë Cristo. ⁷ Gula'ná' badxë' yúgu'të', en bulu'bánninë, ta'nné':

—Buli'yútsöca'. ¿Naru' caléga bönni' Galilea yúgu'të bönni' ni tu'ë didza'? ⁸ ¿Nacxi caz naca riyóniru' tu'ë xtídza'ru' ca naca didza' ru'iru' tu turu'? ⁹ Rë'u ni nácaru' bönni' zían yödzö, bönni' narúajgaquië'

luyú Partia, en luyú Media, en luyú Elam,
en luyú Mesopotamia, en luyú Judea, en luyú Capadocia,
en luyú Ponto, en luyú Asia,

¹⁰ en luyú Frigia, en luyú Panfilia, en luyú Egipto,
en luyú Africa, ga nácarö zi'tu' ga dë luyú Cirene.

'Lësca' nacu'ë bönni' yödzö Roma ni. Bal-lë' nácagaquië' bönni' judío, en ia'bal-lë' nazi' lu náagaquië' le ta'yéajlë'ë bönni' judío Dios. ¹¹ Lësca' nacu'ë ni yugu' bönni' narúajgaquië' Creta, en luyú Arabia. Riyóniru' tu'ë didza' ru'iru' que queëru', ate' ta'guíxjö'ë yugu' le zxön benë' Dios, le tun ga rubániru'.

¹² Caní guca, bulu'bánninë yúgu'të', en gula'bó'ë böniga. Gulé luzá'agaquië' tuë' ia'tué', ta'nné':

—¿Bizxi caz lë ni?

¹³ Bulu'titjè' bal-lè', ta'nné':
—¡Ta'zúdxinë'!

Libán benè' Pedro lógaca bönachi zían

¹⁴ Ní'irö Pedro guzuílenè' ia'chinéajè' gubáz na' nasól-lè'è Cristo, ate' gusí lahuè' ru'è zidzaj didza', rë' légaquiè':

—¡Libí'ili', bönni' Judea, en yúgu'téli' nacuá'ali' yödzö Jerusalén! ¡Lè ni ral-la' inózili'! ¡Buli'zé nágali' le guía' libí'ili'! ¹⁵ Netu' ni biti' rizúdxitu' ca na' réquili' libí'ili', tu' ni zóaru' si' gala' xsila, ate' cuntu nu rizudxi hora caní. ¹⁶ Lè ni naca le gunné' Joel, bönni' bë'è didza' uláz queè' Dios, gunné':

¹⁷ Caní rnnè' Dios: Lè ni le gaca dza tsöjsétégaca.

Isól-la'a Bö' Lá'ayi quia', tsöjsóalenè' yúgu'tè bönachi.
Zxí'inili', bönni', en nigula, ilu'í'ibi' didza' uláz quia' neda'.

Yugu' bi'i ra'bán ila'lé'ebi' le ulu'a lahui,
ate' yugu' bönni' gula ila'nenè' yëla.

¹⁸ Cate' idxín dza ni' quísia' Bö' Lá'ayi quia',
tsöjsóalenè' huen dxin quia', bönni', en nigula,
ate' ilu'è didza' uláz quia' neda'.

¹⁹ Ulu'a lahui lúzxiba xitsá' le ilún ga ulu'bani bönachi,
ate' yödzölió ulu'a lahui le ilaca bë',
rön, en guí', en dzön ca böaj.

²⁰ Ichul-la gubidza, ate' gaca beo' xiná ca naca rön.

Caní gaca cate' idxín dza ni' chibulu'è Dios.

Gaca dza ni' le catu caz rilé'eru'.

²¹ Ulu'lágaca yúgu'tè nupa ni' ulu'lidza Lè' Xanru',
lu yöl-la' réajlè' quéguequi Lè'.

²² 'Buli'zé nágali' lè ni guía' libí'ili', bönachi Israel. Dios caz benè' bal Jesús, bönni' Nazaret ga zóali'. Dios bë'è Lè' lataj benè' le tun ga rubániru', yugu' yöl-la' huáca, en le taca bë'. Yúgu'tè lè na' benè' Dios lu në'è Jesús, ca na' chinóz quézili'. ²³ Lësca' caní, Dios bë'è lataj nu budödi Jesús lu ná'ali'. Caní guca, ca na' chigunná ládxe'è Dios gunè', en ca naca le chibucözè' dza ni'te. Libí'i cázali' guzxönli'-nè' Jesús, en bétili'-nè' lu ná'agaquiè' yugu' bönni' tuá' dö', bönni' gulútiè' Lè' cate' ni' bulu'dá'gaquiè' Lè' lè'e yaga cruz. ²⁴ Ní'irö Dios caz busubanè' Jesús na'. Bubéajè' Lè' lu yöl-la' guti, tu' cabí guca ugá'anè' tsaz lu yöl-la' guti na'. ²⁵ Ca naca lè ni, bë'è didza' David uláz queè' Dios ca naca queè' Jesús, gunné':

Bilé'etiqui'sida'-nè' Xanru', zoè' lahua'.

Lè' zoè' cuita lè'a ibëla, rizönè' neda',
para cabí gaca nu bi gun quia'.

²⁶ Que lè ni na' budzeja ládxa'a,
ate' lu yöl-la' rudzeja quia' bil-la'.

Que lè ni na' guna' löza Lè'
cate' idxín dza gátia'.

²⁷ Xantu' Dios, nözda' biti' ucá'anu' neda'
lataj chul-la ga nacuá' nupa nátigaca.

Biti' gu'u lataj initi idútè le naca'.

Naca' bönni' nadxí'i quézinu' Li'.

²⁸ Buzéajni'inu' neda' ca ral-la' guna'
para idéli'da' yöl-la' na'bán idú.

Gunu' ga udzédada' tu' zóalen cazu' neda'.

²⁹ 'Na'a, libí'ili', bócha'a. Naca bë' gútiè' xuz xtó'oru' David, en bigáchè'è yeru ba, ate' ba queè' na' dè ga zóaru' ga ridxintè na'a dza. ³⁰ David na' bë'è didza' uláz queè' Dios, en

gunózinë' benë' tsutsu Dios didza' le guzxi' lu në'ë queë', gunë' ga galjë' Cristo ladaj di'a dza queë' si' zá'gaca, ate' Cristo na' inná' bë'ë xilatjë' David na'. ³¹ Tu' bilé'enë' David lë ni zí'alö, bë'ë didza' ca guca, bubanë' Cristo, en ca guca, biti' bugá'anë' lataj chul-la ga nacua' nupa nátigaca, en biti' guniti le naca cazë'. ³² Dios busubanë' Jesús lu yöl-la' guti, ate' ca guca lë ni yúgu'tëtu' runtu' ba nalí que. ³³ Caní guca, len yöl-la' huáca queë', Dios buchisë' Lë' xitsá' ga ni' nácatë'rë' zxön. Na'a, Cristo chigusól-lë'ë Dios Bö' Lá'ayi ni, ate' raca ca na' guzxi' lu në'ë Dios gunë' lu në'ë Cristo, ate' Dios Bö' Lá'ayi na' runë' yugu' lë ni rilé'eli', en riyónili'. ³⁴ Biti' buëpë' David na' yehua' yubá, pero lë cazë' David na' gunné':

Xanru' Dios gudxë' Xana':
Gurö'i cuita lë'a ibëla ga naca lo

³⁵ cate' gunra' ga ulu'zechu zxi'bigaca nupa ta'dá'baga' Li' lo' Li'.

³⁶ Na'a, bönachi Israel, ral-la' inózili' le nácatë. Dios benë' ga náquië' Lë cazë' Jesús ni Xanru', en Bönni' Rusólá, bönni' na' budá'ali'-në' lë'e yaga cruz.

³⁷ Cate' yugu' bönni' ni' bila'yönnë' lë ni, gula'bö'ë böniga, ate' gulé' Pedro, en ia'zica'rë' bönni' gubáz queë' Cristo, ta'nnë':

—Bóchi'ru', ¿nacxi gúntsatu'?

³⁸ Ní'irö Pedro gudxë' légaquië':

—Buli'bfi' ládxi'li', en guli'dila nisa tu tuli' lu Lë' Jesucristo para uniti lahuë' Dios dul-la' nabága'li', ate' Dios Bö' Lá'ayi idisóalenë' libí'ili', Nu na' isól-lë'ë Dios. ³⁹ Queéli' nequi le guzxi' lu në'ë Dios, en quégaca zxi'inili', enca' quégaca yúgu'të bönachi izá'a, yúgu'të bönni' ni' ulidzë' Xanru' Dios légaquië'.

⁴⁰ Yugu' didza' ni, en ia'bal-la' zían didza' benë' ba nalí Pedro, le guchízië' icja nágagaquië', gunné':

—Guli'gún ga uláli', irúajli' ládjagaca bönachi tuá' dö' nacua' dza ni zóaru' na'a.

⁴¹ Caní guca, gula'dila nisa nupa ni' gula'zi' lu në'ë eguequi didza' na' bë'ë Pedro. Dza na' ca chi uruá' gayuá' bönachi gulún légaquië' tuz. ⁴² Gulunë' yúgu'të idútë le bulu'sédinë' gubáz nasól-lë'ë Cristo légaquië'. Guláquië' tuz tuë' len ia'tué', en gulahuë' tsözxón le rusá' ládxi'ru' ca gútië' Jesús, ate' gulunë' tsözxón, bulu'lidzë' Dios.

Ca tun bönachi queë' Cristo

⁴³ Gulunë' gubáz queë' Cristo zían le run ga rubániru', en zían le taca bë', pero guladxi gula'dzöbi ia'zica'rö bönachi. ⁴⁴ Yúgu'të nupa na' ta'yéajlë' Cristo gulaca tuz, ate' bulu'ún tuz yúgu'të le dë quéguequi. ⁴⁵ Cate' bila'lë'enë' ta'yadzaj nupa nútsa'gaca ládjagaquië', ní'irö yugu' bönni' bi dë quégaquië' gulúti'ë le, ate' gula'guísië' dumí na' que queégaca nupa ni' bi ta'yadzaj. ⁴⁶ Bulu'dübë' tsözxón chila yudo' yugu' dza, ate' gulahuë' le rusá' ládxi'ru' ca gútië' Xanru'. Caní gulunë' gapa naca lu yu'u lídxigaquië'. Gulahuë' tsözxón, ate' bulu'dzëjanë', en gulaca idú ládxi'gaquië'. ⁴⁷ Gula'gu'ë Dios yöl-la' ba, ate' yúgu'të bönachi gulún légaquië' bal. Buzanë' Xanru' nupa tu'dubi queë', nupa na' tu'lá tu tu dza.

3

Ruhuóáquië' tu bönni' biti' raca së'ë

¹ Tu dza ni' gula'benë' Pedro, en Juan, söjáquië' tsözxón lu chila yudo', cate' tu'dubi bönachi tu'lidza Dios ni', le naca idú ridödi xihuó. ² Ga ni' ta'dödë' zoë' tu bönni' biti' raca së'ë dza ni'te ni' náquië' bí'ido'. Yugu' dza röjuá'gaquië' lë' ni', en ta'béquië' lë' ra' yudo' ga nazí'i le Ra' Yu'u Lachi, para inábinë' nu bi unódzjasö queë' ladaj nupa ni' ta'yaza lö'a yudo'. ³ Bönni' ni, cate' bilé'enë' Pedro, en Juan, söjáquië' ta'yázië' lö'a yudo', gúta'yue' lógaquië' bi ulu'nódzjasë' queë'. ⁴ Ní'irö bulu'yúë' Pedro, en Juan lë', ate' Pedro gudxë' lë':

—Buyú netu'.

⁵ Ní'irö bönni' na' buzëda' náguië' légaquië' tu' runë' löza bi ulu'nódzjasë' queë'.
⁶ Pedro gudxë' lë':

—Biti' dë dumí plata, dumí oro quia', pero le dësö quia' gunna' quiu'. Ni'a que yöl-la' huáca que Lë' Jesucristo, bönni' Nazaret, guyasa, en guzë'e.

⁷ Ní'irö gudëlë'ë Pedro në'ë ibëla bönni' huë' na', en buchisë' lë', ate' la' böacatë ni'ë, en buguitaj bëchaj ni'ë bönni' na'. ⁸ Ní'irö guzuinë' bönni' na', ate' guxíti'ë, en guzë'ë. Guyázalenë' tsözxón Pedro, en Juan, lö'a yudo', rizë'e ni'ë, en rixíti'ë, en rigü'ë Dios yöl-la' ba. ⁹ Yúgu'të bönachi nacua' ni' ta'lé'e lë' rizë'e ni'ë, en rigü'ë Dios yöl-la' ba. ¹⁰ Caní guca, guládxinë', en bulu'báxinë' ca naca lë na' guca, tu' bulu'únbë'ë lë', náquië' bönni' na' ribö'ë ra' yudo' ga nazí'i le Ra' Yu'u Lachi, rinabë' nu bi unódzjasö queë'.

Didza' bë'ë Pedro chila yudo'

¹¹ Tsanni ni' bönni' na' biti' guca së'ë, ate' böaquië', zönë' ná'agaquië' Pedro, en Juan, bulu'dubi yúgu'të bönachi ga na' nacu'ë chila yudo' nazí'i le: Chila Queë' Salomón, ate' gula'ná' badxë'. ¹² Cate' bilé'enë' Pedro lë ni, gudxë' bönachi na':

—Libí'ili', bönni' Israel, ¿bizx que rubánili' ca naca lë ni? ¿Bizx que ruyuli' netu', en réquitseli' nétu'sö buntu'-në' bönni' ni, en bentu' ga rizë'e ni'ë len yöl-la' huáca queéztu', o ni'a que le reaj ládxi'tu'-në' Dios? ¹³ Naca lë ni le benë' Dios. Náquië' Dios quegaquië' xuz gudödi queëru' Abraham, en Isaac, en Jacob. Lë cazë' béntërë' bal Jesús, Zxí'inë'. Jesús ni, libí'i cázali' bëtili'-në' lu ná'agaquië' bönni' ta'nná bé'enë' libí'ili'. Cate' gu'unnë' Pilato usané' Jesús, gudá'baga'li'-në'. ¹⁴ Buzóali' tsölá'alö Bönni' Tsahui', en Lá'ayi, ate' gunábili'-në' Pilato usané' queéli' tu bönni' rútië' bönachi. ¹⁵ Caní guca, bëtili'-në' Bönni' runna cazë' yöl-la' na'bán idú queëru'. Ní'irö Dios busubanë' Lë' lu yöl-la' guti, ate' ca naca lë ni runtu' ba nalí que. ¹⁶ Tu' guyéajlë'ë bönni' ni Jesús, böaca ni'ë. Rilé'eli'-në', en núnbë'eli'-në'. Tu' réajlë'ë Jesús, Lë' bunë' dxí'ado' bönni' ni, ate' rilé'eli' yúgu'tëli' le nácatë na'.

¹⁷ Na'a, bócha'a, nözda' benli' caní, bëtili'-në' Jesús tu' cabí guyéajni'ili', en biti' gula'yéajni'inë' bönni' ta'nná bé'enë' libí'ili'. ¹⁸ Caní busudxinë' Dios didza' na' bë'ë zí'alö, le gula'nnë' bönni' gulu'ë didza' uláz queë' ca ral-la' qui'i sáquë'ë Cristo. ¹⁹ Que lë ni na', buli'bí'i ládxi'li', en buli'huóaca queë' Dios, para ugúë' dul-la' nabága'li', en gunë' ga huóaca ládxi'li'. ²⁰ Ní'irö isól-lë'ë leyúbölö Jesús, Bönni' na' buzóë' dza ni'te para gáquië' Cristo, Bönni' Rö queë', Bönni' na' inná bé'enë' libí'ili'. ²¹ Na'a, run bayudxi ugá'anë' yehua' yubá ni' cate' idxinrö dza uduhuënë' tsahui' yúgu'të le raca, en gaca ca na' chigunná cazë' Dios, lë na' gula'nnë' bönni' gulu'ë didza' uláz queë', bönni' ni' gula'cu'ë dza ni'te. ²² Lësca' caní Moisés gudxë' xuz xtó'oru', gunné': "Xanru' Dios isól-lë'ë queéli' tu bönni' galjë' ládjacaca di'a dza queéli'. Gáquië' bönni' gu'ë didza' uláz queë' Dios. Isól-lë'ë Lë' queéli' ca na' gusól-lë'ë neda'. Run bayudxi uzë' nágali'-në' ca naca yúgu'të le guíë' libí'ili'. ²³ Yúgu'të nupa biti' ulu'zé' nágagaca bönni' ni' gu'ë didza' uláz queë' Dios ila'niti, en ulu'lá'alén bönachi queë' Dios."

²⁴ Ca naca dza ni zóaru' na'a, gula'guíxjö'ë yúgu'të bönni' gulu'ë didza' uláz queë' Dios ga gudéla'të zoë' Samuel, en gudödi ni'. ²⁵ Libí'ili' nácali' zxí'ini xi'sóagaquië' bönni' gulu'ë didza' uláz queë' Dios, ate' nequi queéli' didza' rucá'ana tsahui', le benlenë' Dios xuz xtó'oru', cate' ni' gudxë' Abraham: "Ni'a que le gunë' zxí'ini xi'sú' ilaca bica' ba yúgu'të bönachi yödzölió." ²⁶ Cate' Dios busubanë' Zxí'inë' lu yöl-la' guti, gusól-lë'ë Lë' zí'alö queéli' para gunë' ga gácali' bica' ba, en ucá'anali' le cabí naca dxi'a runli'.

4

Ta'dxinë' Pedro, en Juan lógaquië' bönni' yudo' tu'chi'a tu'söröë'

¹ Tsanni ni' bönachi na' tu'ílenë' Pedro, en Juan, didza', yugu' bixúz judío, en yugu' bönni' yudo' saduceo, en bönni' ta'nná bé'enë' ni'a ná'agaquië' bönni' yudo', bila'dxinë'

tsárido'os ga na' nacu'ë. ² Gula'lenë' bönni' ni tu' tu'sédinë' Pedro, en Juan, bönachi, en tē' léguequi ulu'bán nupa chinátigaca tu' bubanë' Jesús. ³ Ní'irö gula'zönë' Pedro, en Juan, ate' gula'gu'ë légaquië' lidxi guíë ga idxinrö dza yúbölö tu' chiridzó' dza na'. ⁴ Zían nupa ni' bila'yöni didza' gulu'ë Pedro, en Juan, gula'yéajlé' Cristo. Na'a, yugu' bönni' biguiú'sö ta'yéajlé'ë Cristo nácagaquië' idú chi-un gáyu'ë.

⁵ Dza buropi ni', yugu' bönni' unná bē', en bönni' gula tu'zéajni'inë' bönachi judío, en yugu' bönni' yudo' usëdi, bulu'dubë' lu yödzö Jerusalén. ⁶ Lësca' Anás, bixúz lo, en Caifás, en Juan, en Alejandro, enca' yúgu'të bönni' dí'a dza quégaquië' bixúz lo bulu'dubë' ni'. ⁷ Ní'irö duché'gaquië' Pedro, en Juan, ate' bulu'sudxinë' légaquië' gatsaj láhui'lö ga na' nacu'ë, en gula'nábinë' légaquië', ta'nnë':

—¿Bizxi yöl-la' unná bē' dē lu ná'ali' runli' lē ni? ¿Nuzxi budödi lu ná'ali' yöl-la' unná bē' ni?

⁸ Ní'irö Pedro gudxë' légaquië', zóalenë' Dios Bö' Lá'ayi lē', rnnë':

—Libí'ili', nülöli' rinná bé'eli' netu', bönachi Israel, en libí'ili', bönni' gula. ⁹ Na'a, ¿rinábitseli' netu' ca naca dxin dxi'a bentu' queë' bönni' huë' ni, en nacxi guca, böáquië' bönni' ni? ¹⁰ Rigú'xjöi'itu' libí'ili' para ila'nözi yúgu'të bönachi Israel. Zoë' bönni' ni loli', nuhuöáquië' tu' ben dxin yöl-la' huáca queë' Jesucristo, bönni' Nazaret, Bönni' ni' budá'ali'-nē' lē'e yaga cruz, pero Dios busubanë' Lē' lu yöl-la' guti. ¹¹ Dios bē'ë didza' ca naca queë' Jesús ni, cate' ni' gunné': "Libí'ili', bönni' rucua'ali' zö'ö, gurú'unali' guió'j na', pero guró' caza' neda' guió'j na' para gaca guió'jlen zö'ö." ¹² Cúnturö nu zoa nu gaca usölá bönachi, tu' cabí zoa yödzölió ni ia'túé' bönni' nuzóë' Dios, nu gaca usölá rē'u.

¹³ Cate' bila'lé'enë' nácagaquië' rugu ladxi' Pedro, en Juan, en gulé'quibe'enë' bití' nazédagaquië' que yudo', en nácagaquië' bönni' cá'asö, bulu'bábinë', ate' yöjnéguequinë' Pedro, en Juan na', gula'cuá'lenë' Jesús. ¹⁴ Lësca' bila'lé'enë' bönni' na' böáquië', zuínë' lógaquië', ate' bití' guca bi ila'nnë' quégaquië'. ¹⁵ Ní'irö gula'nná bé'enë' nupa ulu'béaj légaquië' ló'alö yu'u ga na' nudúbigaquië', ate' gulún xtidzë'ë la' légacasë'. ¹⁶ Gula'nnë':

—¿Nacxi gúntsaru' quégaquië' bönni' ni? Le nácate' gulunë' tu le run ga tu'bani bönachi, ate' nózigaca yúgu'të bönachi nacua' Jerusalén lē ni. Bití' gaca tá'baga'ru' le. ¹⁷ Na'a, para cabí sërö didza', en ila'yöni zíanrö ca' bönachi, uzeru' bach légaquië' para cabí ilu'ilenrë' bönachi didza' ca naca queë' Jesús na'.

¹⁸ Ní'irö bulu'lidzë' Pedro, en Juan, ate' bulu'zenë' bach légaquië' para cabí ilu'ilenrë' bönachi didza', en para cabí ulu'sédinë' légaquië' ca naca queë' Jesús. ¹⁹ Ní'irö bulu'bi'ë didza' Pedro, en Juan. Gulé' légaquië':

—Bulí'chi'a bulí'söró libí'ili' channö naca tsahui' lahuë' Dios uzërö nágatu' xtídza'li' libí'ili' ca xtídzë'ë Dios. ²⁰ ¡Bití' gaca soa dxitu'! ¡Run bayudxi gü'f'itu' didza' que le bilé'etu', en le biyónitu'!

²¹ Ní'irö yugu' bönni' yudo' tu'chi'a tu'söróë' bulu'zenë' bach légaquië', pero bulu'sanë' légaquië' tu' cabí gula'dzólinë' nacxi ilunë' légaquië' xíguia'. Caní gulunë' tu' guládxinë' le ilún bönachi lu yödzö ni', tu' ta'gú'u Dios yöl-la' ba ni'a que lē na' guca. ²² Bönni' na' böáquië', en guca queë' lē na' run ga rubániru', chiyú'urë' ca choá' iz.

Ta'nábinë' Dios gunë' ga ilácagaquië' rugu ladxi'

²³ Cate' bönni' yudo' bulu'sanë' Pedro, en Juan, böajgaquië' ga na' nacu'ë luzá'agaquië', ate' bulu'siyönnë' légaquië' yúgu'të lē na' gula'nnë' yugu' bixúz unná bē', en bönni' gula tu'zéajni'inë' bönachi judío. ²⁴ Cate' bila'yönnë' lē ni, bulu'lidzë' Dios tsözxón, gula'nnë':

—Xantu' Dios, ¡zxon'tërö nacu' Li'! ¡Li' nacu' Dios! ¡Benu' lúxiba! ¡Benu' luyú! ¡Benu' nísado'! ¡Benu' yúgu'të le nacua' tu tu lataj na'! ²⁵ Uláz quiu' Li' bē'ë didza' David, bönni' huen dxin quiu', ni' zóalenë' Dios Bö' Lá'ayi lē', gunné':

¿Bizx que tun dzatsa bönachi,
en ta'zá' ládxi'gaca le ruá' dö'?

²⁶ Yugu' bönni' ta'nná bē'ē yōdzōlió ni gulún dzatsē',
ate' guláquiē' tuz bönni' unná bē'.

Gula'dá'báguē'ē Xanru' Dios,
enca' Cristo, bönni' guró cazē' Lē'.

²⁷ Le nácatē guláquiē' tuz Herodes, en Poncio Pilato, en yugu' bönni' izá'a, en yugu' bönni' Israel lu yōdzō ni. Gula'dá'báguē'ē Jesús, Zxí'inu' lá'ayi, Bönni' na' buzú' queé'tu'.

²⁸ Gulunē' yúgu'tē le bucōzu' zí'atēlō, en guzxi' lu no'o, ate' guca ca na' benu' tsutsu xtídz'u ca ral-la' gaca. ²⁹ Na'a, Xantu', buyú le tu'zenē' bach netu', en ben ga gácatu' rugu ladxi', para gü'itu' xtídz'u, netu' bönni' huen dxin quiu'. ³⁰ Ben ga gaca úngacatu' nupa te'e, tu' sóalen yōl-la' huáca quiu' netu', en ben ga gaca gúngacatu' le ilún ga ubánitu', en le ilaca bē'. Gaca caní tu' zóalenē' Jesús, Zxí'inu' lá'ayi, netu'. ¡Ca' gaca!

³¹ Cate' budxi bulu'lidzē' Dios, guxzizi lataj ga na' nacu'ē, ate' Dios Bö' Lá'ayi guzóalenē' yúgu'tē', ate' len yōl-la' rugu ladxi' quégaquiē' gulu'ē xtídzē'ē Dios.

Tu'únē' tuz le dē quégaquiē'

³² Bönachi zían na' ta'yéajlé' Cristo, tuz ca ta'zá' lādxi'guequi, en tuz ca gulúngaca. Biti' gunné' nu bönni' nútsē'ē lādjagaquiē' nequi queé'zē' le dē queē', pero bulu'únē' tuz le dē quégaquiē'. ³³ Len yōl-la' huáca zxön gula'guíxjö'ē gubáz na' nasól-lē'ē Xanru' Jesús ca bubané' Lē', ate' le buzá' lādxē'ē Dios quégaquiē' gúcalen yúgu'tē'. ³⁴ Cuntu nu bi biyadzaj nu nutsa' lādjagaquiē'. Caní guca tu' yúgu'tē bönni' zoa bi dē quégaquiē', xiyúgaquiē', o lídxigaquiē', gulúti'ē le, ate' dumí que na' yöjuá'gaquiē', ³⁵ en bulu'dödē' le lu ná'agaquiē' gubáz na' nasól-lē'ē Cristo, ate' légaquiē' gula'guísiē' le que queégaca nupa bi biyadzaj quéguequi. ³⁶ Zoē' José ni', bönni' bulu'zóē' gubáz na' nasól-lē'ē Cristo ia'tú lē' Bernabé, le rnna lu didza' xidza', Bönni' Ruhué' Tsáhuē'ē. Nabábalenē' zxi'ini xi'sóē' Leví, en guljē' luyú Chipre. ³⁷ Bēti'ē bönni' ni tu cō' xiyúē', ate' yöju'ē dumí que na', en budödē' le lu ná'agaquiē' gubáz na' nasól-lē'ē Cristo.

5

Dul-la' gulunē' Ananías, en Safira

¹ Tu bönni' yúbölō lē' Ananías, bēti'ē tu cō' xiyúē'. Safira, nigula queē', benu tsözxón lē'. ² Ananías na' bucachi' lanē' late' dumí que yu na', ate' nōzinu ca' nigula queē'. Le bugá'anasö yöju'ē, en gulu'ē le lu ná'agaquiē' gubáz nasól-lē'ē Cristo. Rnnē':

—Tasca nisö guzxi'a.

³ Pedro gudxē' lē':

—Ananías, ¿naru' guyázatsö Satanás tu' xihui' lu icja lādxi'do'o, en ben ga rizí' yé'enu' Dios Bö' Lá'ayi, ate' bucachi' lanu' late' dumí que xiyú' na'? ⁴ Tsanni ni' nagá'ana yu na' lu no'o, ¿naru' cabí nequi quez quiu'? Gudödi bēti'u le, ¿naru' cabí dē caz lu no'o dumí que na'? ¿Bizx que guró'ö icju' gunu' caní? Dios caz guzxi' yé'enu', calégasö bönachi.

⁵⁻⁶ Cate' biyönnē' Ananías didza' ni, gudzö'ē, en gútité'. Ní'irö gula'bíga'tēbi' bi'i ra'bán, ate' bulu'chólibi' lē' lari', en gulu'á'abi' lē', en yöjcáchi'gacabi' lē'. Guladxi gula'dzöbi yúgu'tē nupa ni' bila'yöni ca guca lē ni.

⁷ Ca tsonna hora gudödi ni', bidxinnu nigula queē' Ananías na' ni', en biti' nōzinu lē na' guca queē' bönni' queé'nu. ⁸ Ní'irö Pedro gudxē'-nu:

—Gudíxjöi' neda'. ¿Naru' guzxi'ili' tsca nisö xiyulí' na'?

Gunnánu:

—Ön, tsca nisö guzxi'itu'.

⁹ Ní'irö Pedro gudxē'-nu:

—¿Bizx que ben tuz xtídzali' guzxi' bē' xihui'li' Dios Bö' Lá'ayi? Buyútsöca'. Chizóa ulu'dxinbi' yugu' bi'i bulu'cáchi'bi'-nē' bönni' quiu', ate' ulu'béajbi' ca' li'.

¹⁰ Ní'irö la' gudzó'tënu xini'ë Pedro, en gútiténu. Cate' gula'yázabi' bi'i ra'bán na', gula'lé'ebi'-nu chinátinu. Ní'irö bulu'béajbí'-nu, en yöjcáchi'gacabi'-nu cuita lë'ë bönni' queé'nu. ¹¹ Que lë ni na' guladxi gula'dzöbi yúgu'të bönachi queé' Dios, ate' guladxi ca yúgu'të nupa bila'yöni ca guca lë ni.

Tunë' bönni' gubáz nasól-lë'ë Cristo le taca bë'

¹² Gulunë' bönni' gubáz na' nasól-lë'ë Cristo zían le taca bë', en zían yöl-la' huáca zxon lógaca bönachi lu yödzö. Yúgu'të' bulu'dübë' tsözxón ga naca chila yudo' nazí'i le Chila Queé' Salomón. ¹³ Ladaj nupa ni' biti' ta'yéajlë' Cristo, cuntu nu burugui tsöjtá' légaquië', ate' bönachi lu yödzö ni' gulún légaquië' bal. ¹⁴ Ní'irö ia'bal-la bönachi zían ca' gula'yéajlë' Cristo, bönni', en nigula. ¹⁵ Cate' bila'lé'e bönachi yugu' le tunë' bönni' ni' ta'yéajlë'ë Cristo, yöjuá'agaca nupa te'e gapa naca la' nöza, ate' gula'xóé' léguequi lu da'a yaga, en ia'bal-la lu dá'asö, para cate' tödë' ni' Pedro, tsa zxúl-lasö queé' cu'u zxul-la bal-la bönachi hué' na', para ulu'huóaca. ¹⁶ Lësca' bila'ruáj bönachi yugu' dzaga yödzö, en bila'dxín Jerusalén, nuá'agaca nupa te'e, en nupa ta'guí'i ta'zaca' tu' yú'ugaca bö' xihui' léguequi, ate' bulu'huóaca yúgu'téguequi.

Bönni' yudo' ta'bía ládxi'gaquië' bönni' gubáz nasól-lë'ë Cristo

¹⁷ Que lë ni na' bixúz lo, en bönni' yudo' saduceo na' dá'gaquië' bixúz lo, bulu'zxé'enë' Pedro. ¹⁸ Ní'irö bixúz lo na', en bönni' na' dá'gaquië' lë' gula'zönë' gubáz na' nasól-lë'ë Cristo, ate' gula'gu'ë légaquië' lidxi guíë. ¹⁹ Ní'irö bidxinë' gubáz lá'ayi queé' Xanru' chi'i dzó'ölö, ate' gusaljé' lidxi guíë na', en bubéajé' légaquië'. ²⁰ Gubáz lá'ayi na' gudxë' légaquië', rnnë':

—Gulí'tséaj, guli'tsöjsóa chila yudo', en guli'tsöjé'len bönachi ni' didza', quíxjöi'ili' légaquië' ca naca yöl-la' na'bán idú ni, en ca gaca ila'déli'në' le.

²¹ Cate' bila'yönnë' didza' ni ru'ë gubáz lá'ayi na', gula'yázië' chila yudo' cate' za' rení' zílado', en bulu'sédinë' bönachi.

La' ní'isö bulu'dübë' bixúz lo, en nupa nacua'len lë' tsözxón, len bönni' yudo' tu'chi'a tu'söröë', en bönni' gula tu'zéajni'inë' bönachi Israel, ate' gula'sól-lë'ë nupa tsöjaca lidxi guíë para tsöjxi'gaquië' yugu' gubáz na' nasól-lë'ë Cristo, tu' téquinë' ni' nacu'ë lidxi guíë na'. ²² Cate' ni'a ná'agaquië' bönni' yudo' na' bila'dxinë' ni', biti' yöjxáca'gaquië' légaquië' lu yu'u lidxi guíë na', ate' ní'irö bulu'huóajé' tsöjtíxjö'gaquië' ca'. ²³ Gulé' bönni' yudo' tu'chi'a tu'söröë' na', ta'nnë':

—Le nácatë yöjxáca'tu' nayáyajtë lidxi guíë, ate' nacua' nupa tun chi'i ra' lidxi guíë na', pero cate' gusalajtu', cuntu nu yöjxáca'tu' lu yu'u na'.

²⁴ Cate' bixúz lo, en yugu' bixúz unná bë', en bönni' nacua' lu në'ë ni'a ná'agaca bönachi yudo', bila'yönnë' didza' ni, gula'bó'dë'ë böniga tu' cabí nóziguequinë' bizxi guntë lë na' raca. ²⁵ Ní'irö bidxinë' tu bönni' ni', en gudíxjöi'inë' légaquië', rnnë':

—Buli'yútsöca'. Yugu' bönni' na' gulú'ugacali'-në' lidxi guíë nacu'ë chila yudo' tu'sédinë' bönachi.

²⁶ Ní'irö guyijë' bönni' na' rinná bé'enë' ni'a ná'agaca bönachi yudo', dzágagaquië' lë' ni'a ná'agaquië' na', ate' gula'ché'ë yugu' gubáz na' nasól-lë'ë Cristo, pero biti' bi gulunë' quégaquië', tu' guládxinë' ulu'laxi' bönachi nacua' ni' légaquië' guió'j. ²⁷ Cate' chinaché'gaquië' yugu' gubáz na', bulu'sudxinë' légaquië' lógaquië' bönni' yudo' tu'chi'a tu'söröë' na', ate' bixúz lo gunábinë' légaquië', rnnë':

²⁸ —¿Naru' cabí gúdxida'atu' libí'ili' biti' usédili' bönachi ca naca queé' bönni' na'? Na'a, chigudísili' xibá ni idútë yödzö Jerusalén, en ré'ënili' usubága'li' netu' xíguia' tu' nözi yöl-la' guti queé' bönni' na'.

²⁹ Ní'irö bulu'bi'ë didza' Pedro, en ia'zica'rë' gubáz na' nasól-lë'ë Cristo, ta'nnë':

—Run bayudxi uzërö nágatu' xtídzë'ë Dios ca xtídzá'gaca bönachi. ³⁰ Libí'ili' bétili'-në' Jesús cate' ni' budá'ali'-në' lë'e yaga cruz, pero Dios quégaquië' xuz xtó'oru' busubanë' Lë'. ³¹ Jesús ni, Dios buzóa cazë' Lë' ga nayépisëtërë' cuita lë'ë ibëla, para gáquië' Bönni' Lo, en Bönni' Rusólá, en gunë' ga ulu'bí'i ládxi'gaca bönachi Israel, para gaca uniti lahuë' dul-la' nabága'gaquië'. ³² Ca naca lë ni, runtu' netu' ba nalí que, ate' lësca' runë' Dios Bõ' Lá'ayi ba nalí que, Bõ' na' risól-lë'ë Dios quégaca nupa tun ca rna xtídzë'ë.

³³ Cate' bila'yönnë' bönni' yudo' tu'chi'a tu'söröë' na' lë ni, gula'lenë', en gulé'ënnë' ilútië' légaquië'. ³⁴ Ní'irö guzuínë' tu bönni' yudo' ruchi'a rusöröë' lógaquië', lë' Gamaliel, tu bönni' yudo' fariseo. Rácadë'ë bönni' ni xibá queë' Moisés, ate' yúgu'të bönachi tun lë' bal. Gudxë' nupa na' ulu'béaj yugu' gubáz na' nasól-lë'ë Cristo ló'alö tu chí'ido'. ³⁵ Ní'irö gudxë' bönni' yudo' tu'chi'a tu'söröë' na', gunné':

—Libi'ili', bönni' Israel, buli'yutëz queé'li' ca naca le ré'ënili' gunli' quégaquië' bönni' ni. ³⁶ Ral-la' tsöjnëli' ca guca zí'atëlö cate' si' idxín dza ni zóaru' na'a. Birúajë' Teudas, ate' ben cuinë' ca tu bönni' nayépisëtërë'. Guláquië' bönni' yöjtá'gaquië' lë' idú tapa gáyu'ë bönni'. Yugu' bönni' rójáquië' gudil-la gulútië' lë', ate' gulásilasi yúgu'të nupa ni' yöjtá'gaca lë', ate' gunítisö ca' yúgu'të le benë' bönni' na'. ³⁷ Gudödi guca lë ni, birúajë' ca' Judas, tu bönni' Galilea. Benë' caní cate' ni' gula'yú'u lu guichi bönachi ta'guíxaj lázagaquië', ate' yöjtá'gaca bönachi zían lë'. Lësca' gulútië' bönni' ni, ate' gulásilasi yúgu'të nupa ni' yöjtá'gaca lë'. ³⁸ Que lë ni na' rea' libí'ili': Guli'sán-gaquië' bönni' ni, en bití' bi gunli' quégaquië'. Channö naca quégacasö bönachi lë ni ta'nnë' o lë ni tunë', initi caz, ³⁹ pero channö naca queë' Dios, bití' gaca usunítili' le. ¡Buli'yú cuinli' cabí tíl-lalenli'-në' Dios!

⁴⁰ Ní'irö gulunë' tuz didza' len lë'. Bulu'lidzë' yugu' gubáz na' nasól-lë'ë Cristo, ate' gula'guinë' légaquië', en bulu'zenë' légaquië' bach para cabirö ilu'ilenë' bönachi didza' ca naca queë' Jesús. Ní'irö bulu'sanë' légaquië'. ⁴¹ Bila'rúajë' gubáz na' nasól-lë'ë Cristo lógaquië' bönni' yudo' tu'chi'a tu'söröë' na'. Tu'dzéjanë' tu' bë'ë Dios légaquië' lataj gula'guí'i gula'záquë'ë tu' dá'gaquië' Jesús. ⁴² Yugu' dza bulu'séditiqui'sinë' bönachi, en gulunë' libán queë' Jesucristo lu chila yudo', en gapa naca lu yu'u lídxigaca bönachi.

6

Ta'bóë' gadxi bönni' para ilácalenë' bönachi queë' Cristo

¹ Dza ni', tu' gula'yán bönachi ta'yéajlë' Cristo, yugu' bönni' judío tu'ë didza' griego gula'nnë' quégaquië' bönni' judío tu'ë didza' hebreo tu' nözi le raca cate' ta'guísië' le ilágunu nigula uzëbi, tu' cuntú nu ru'í le ilágunu nigula uzëbi quégaquië' bönni' ni' tu'ë didza' griego. ² Ní'irö idxínnutë' bönni' gubáz na' nasól-lë'ë Cristo bulu'tubë' yúgu'të bönachi ni' ta'yéajlë' Cristo, ate' të' légaquië':

—Bití' naca dxi'a soa dxitu', en cabí guntu' libán que xtídzë'ë Dios, para guntu' dxin cú'utu' le ilágugaca bönachi. ³ Que lë ni na', böchi' luzá'atu', guli'có gadxë' bönni' ladjali', para ugú'uru' lu ná'agaquië' dxin ni. Yugu' bönni' na' run bayudxi ilácagaquië' bönni' tun yúgu'të bönachi légaquië' bal, en nácagaquië' bönni' ta'yéajni'i, en naca bë' Dios Bõ' Lá'ayi zóalenë' légaquië'. ⁴ Netu' ni ulídzatica'stu'-në' Dios, en uséditu' bönachi xtídzë'ë Dios.

⁵ Yúgu'të' gula'yaza ládxi'gaquië' didza' ni, ate' gula'bóë' Esteban, tu bönni' réajlë'ë Cristo idú ládxe'ë, en zóalenë' Dios Bõ' Lá'ayi lë'. Lësca' gula'bóë' Felipe, en Prócoro, en Nicanor, en Timón, en Parmenas, en Nicolás, bönni' yödzö Antioquía, bönni' zí'alö butsé'ë ca runë' para tseaj ládxe'ë Dios ca tunë' yugu' bönni' judío. ⁶ Ní'irö bulu'sudxinë' bönni' na' gula'bóë' lógaquië' gubáz na' nasól-lë'ë Cristo. Yugu' bönni' gubáz na' gula'xóa ná'agaquië' légaquië', ni' tu'lidzë' Dios.

⁷ Guzërö xtídzë'ë Xanru', ate' gula'yanda' bönachi ta'yéajlë' Cristo nacua' Jerusalén. Lësca' zían bixúz judío gula'zi' lu ná'agaquië' le réajlë'ëru' Cristo.

Ta'zönë' Esteban

⁸ Esteban na' benë' le tun ga rubániru', en yugu' le taca bë' lógaca bönachi lu yödzö, zóalen yöl-la' huáca queë' Dios lë' le buzá' ládxë'ë queë'. ⁹ Ní'irö gula'yasë' bal-lë' bönni' nabábagaquië' yu'u ga tu'dubë' bönni' judío, en tu'sedë' queë' Dios, nazí'i le Yu'u Quégaquië' Bönni' Nadzángaquië'. Bönni' narúajgaquië' yödzö Cirene, en yödzö Alejandría, en luyú Cilicia, en luyú Asia, gulunë' légaquië' tsözxón. Bönni' ni gula'díl-lalenë' Esteban didza'. ¹⁰ Biti' guca tá'baga'gaquië' didza' ru'ë Esteban na', tu' bë'ë didza' len yöl-la' réajni'i, tu' zóalenë' Dios Bö' Lá'ayi lë'. ¹¹ Ní'irö gula'guíxjé' bönni' ila'zi' yë'ë, ila'nné': "Netu' biyónitu' didza' ru'ë Esteban ni, rnnë' zi'ë queë' Moisés, en queë' Dios." ¹² Caní guca, bönni' ni gula'gu'ë xilá ládxí'gaca bönachi, tsözxón len bönni' gula tu'zéajni'inë', en yugu' bönni' yudo' usëdi. Yúgu'të bönni' ni gula'bía di'ë Esteban na'. Gula'zönë' lë', en gula'ché'ë lë' lógaquië' bönni' yudo' tu'chi'a tu'söróë'. ¹³ Lësca' bulu'cu'ë lógaquië' nupa gula'guíxjö' le cabí nácatë, bönni' na' gula'nné':

—Biti' zoë' dxisö bönni' ni rnnë' zi'ë que yudo' lá'ayi ni, en que xibá queë' Dios. ¹⁴ Biyónitu' didza' bë'ë bönni' ni ca gunë' Jesús, bönni' Nazaret, rnnë' usunítië' yudo' ni, en utsé'ë yugu' le nalébiru' runru', yugu' lë na' gunná bé'enë' Moisés rë'u.

¹⁵ Ní'irö bönni' yudo' tu'chi'a tu'söróë', en yúgu'të nupa ró'gaca ni' bulu'yúë' Esteban, ate' bila'lé'enë' lahuë', rna' ca rna' lahuë' tu gubáz lá'ayi queë' Dios.

7

Didza' bë'ë Esteban, le gunné' uláz queë'

¹ Ní'irö bixúz lo gunábinë' Esteban na', rnnë':

—¿Naru' nácatë caní?

² Bubi'ë didza' Esteban, rnnë':

—Libí'ili', bönni' gula, en libí'ili', bócha'a. Buli'zé nágali' le guía' libí'ili'. Dios, Bönni' nayépisëtërë', bulu'i lahuë' ga zoë' Abraham, xúziru' gudödi, cate' ni' zoë' luyú Mesopotamia, cate' si' tsöjsóë' yödzö Harán. ³ Dios gudxë' lë': "Birúaj ladzu', en bulá'alén di'a dza quiu', ate' guyéaj luyú ni' ulu'ida' lí'." ⁴ Ní'irö birúajjé' Abraham luyú Mesopotamia le naca xiyúgaca bönachi Caldea, ate' yöjsóë' yödzö Harán. Lu yödzö ni' gútië' xuzë' Abraham na', ate' lë' buzé'ë ni', ate' Dios guché'ë lë' luyú ga ni zóaru' na'a. ⁵ Dios biti' bë'ë lë' lataj guequi queë' luyú ni. Calëga láti'sö bunödzjé' queë' ga soë' luyú ni, pero guxzí' lu në'ë Dios unödzjé' queë' luyú ni, ate' tödi gátië' Abraham guequi luyú ni quegaca xzí'ini xi'sóë', sal-la' biti' nacu'ínibi' bi'i queë'. ⁶ Lësca' caní Dios gudxë' Abraham: "Tsöjáquië' xzí'ini xi'sú' lu xiyúgaca bönachi izá'a, ate' ni' ilácagaquië' ca bönachi zi'tu'. Ilunë' bönni' luyú ni' ga ilácagaquië' xzí'ini xi'sú' bönni' nadó'ogaquië'. Ulu'saca' zi'ë légaquië' idú ca tapa gayuá' iz." ⁷ Lësca' Dios gudxë' lë': "Neda' uzötja' bönachi luyú ni', ga ni' ilácagaquië' xzí'ini xi'sú' bönni' nadó'ogaquië', ate' tödi ni' ulu'rúajjé' ni', ate' ilunë' xichina' luyú ni." ⁸ Dios bénlenë' Abraham tu didza' rucá'ana tsahui', en gunná bé'enë' lë' ichúguië' lu xipéla'gaquië' bönni' biguiú' nacu'ë lidxë' tu le gaca bë' nazí' lu ná'agaquië' didza' na' rucá'ana tsahui'. Gudödi ni' gúquië' Abraham xúzibi' bi'i Isaac, en cate' chigúquibi' xunu' gubidza, guchúguië' lu xipéla'bi' lë na' naca bë'. Isaac na', lësca' caní benë' queébi' bi'i Jacob, xzí'inë', en caní benë' ca' Jacob quegaca idxínnutëbi' bi'i bönni' queë', nupa ni' gulaca xuz xtó'ogaca idxinnu cö' bönachi Israel.

⁹ Yugu' xuz xtó'oru' na', lu yöl-la' ruzxë'e quégaquië', gulúti'ë-bi' bi'i José, bóchi'gaquië', lu ná'agaquië' bönni' ni' gulúti'gaquië'-bi' luyú Egipto. Dios guzóalenë'-bi' bi'i José na' ¹⁰ en busölë'-bi' lu le gulaca queébi'. Dios bë'ë-bi' yöl-la' réajni'i, le ben ga guyaza ládxë'ë-bi' Faraón, bönni' rinná bé'enë' bönachi Egipto, ate' Faraón na' budödë' lu ná'abi'

bi'i José yöl-la' unná bë' para gunná bé'ebi' bönachi luyú Egipto, en yúgu'të bönachi nacua' lidxë' Faraón na'.

¹¹ Ní'irö gúcada' gubín idú luyú Egipto, en luyú Canaán ni, ate' gula'gu'í gula'zaca' yúgu'të bönachi dza ni'. Biti' bidzöli le ilahuë' xuz xtó'oru'. ¹² Cate' biyönnë' Jacob dë zxa' xtila luyú Egipto, gusól-lë'ë yugu' xzí'inë', bönni' ni' nácagaquië' xuz xtó'oru', luyú ni'. Caní guca le zí'aló luzuí yójáquië' ni'. ¹³ Cate' le buropi luzuí yójáquië' luyú Egipto, benë' José ga bulu'únbë'ë böchë'ë lë'. Caní guca, gunózinë' Faraón nupa nácagaca di'a dza queë' José. ¹⁴ Ní'irö gusól-lë'ë José didza', en benë' ga bidxinë' Jacob, xuzë', luyú Egipto, ate' dzágagaca di'a dza queë' lë'. Gulaca idú tsónnalalaj yu' chinu bönachi. ¹⁵ Caní guca, bidxinë' Jacob luyú Egipto, ga ni' gútië' lë', ate' gulátië' ca' xuz xtó'oru' luyú ni' cate' bizá'a dza que queégaquië'. ¹⁶ Cate' gulátië' tu tu xuz xtó'oru', xzí'ini xi'sóagaquië' yójuá'agaquië' légaquië' luyú Siquem, ate' ni' bulu'cá'hë'ë légaquië' yeru ba lu zxan bulóaj na' gú'uë' Abraham lu ná'agaca xzí'inë' Hemor, bönni' Siquem na'.

¹⁷ Gudödi zían iz, cate' bidxín dza ral-la' gaca le guxzí' lu në'ë Dios, lë na' benë' tsutsu xtídzë'ë gunë' queë' Abraham, gula'yán bönachi yugu' cö' Israel, ate' gulaca bönachi zían cate' ni' gula'cuá' luyú Egipto. ¹⁸ Ní'irö guyázië' bönni' yúbölö gunná bë'ë luyú Egipto na', en catu caz biyönnë' ca naca le benë' José, gúcalenë' bönachi Egipto. ¹⁹ Bönni' unná bë' na' bi'ë dö' quégaca bönachi uládz queëru'. Busaca' zi'ë yugu' xuz xtó'oru' na', en benë' ga bulu'sané'-bi' bi'i bönni' hué'énido' que queégaquië', para ilátibi'. ²⁰ La' dza ní'isó gúljabí' ca' bí'ido' Moisés, ate' Dios guyaza ládxë'ë-bi'. Xuz xiná'abi' bulu'sculë'-bi' lídxigaquië' idú ca tsonna beo'. ²¹ Cate' bidxín dza ulu'sané'-bi' xuz xiná'abi' para gátibi' bí'ido' Moisés na', bidxinnu nigula xzí'inë' Faraón ga ni' bulu'cá'anë'-bi', ate' yójxzí'inu-bi', en buscúlunu-bi' ca bi'i que cázanu. ²² Caní guca, bizédabi' bi'i Moisés yúgu'të le táquië' bönni' Egipto, en gúcatë'röbi' zxon ca naca didza' bé'ëbi', en ca nácagaca le benbi'.

²³ Cate' Moisés na' chiyú'ubi' choá' iz, gunná ládxí'bi' tsöjyubi' bönachi uládz queébi', bönachi Israel. ²⁴ Cate' bidxinbi' ga na' nacu'ë, bilé'ebi'-në' tu bönni' Egipto, rusaca' zi'ë tu bönni' uládz queébi'. Ní'irö gúcalenbi'-në' bönni' uládz queébi' na', en bétibi'-në' bönni' Egipto na'. Caní guca, buzí' labi' bi'i Moisés bönni' na' uládz queë' bönni' uládz queébi'. ²⁵ Gúquibi' Moisés huala'yéajni'inë' bönni' bóchi'bi' gunë' Dios ga usölábi' lë cázabi' légaquië', pero légaquië' bití' gula'yéajni'inë'. ²⁶ Ia'tú dza ca' yójxáca'bi' ia' chopë' bönni' Israel, ta'dil-lë', ate' gú'unibi' cuéqui dxibi' légaquië', en gúdxibi' légaquië': "Libí'ili', bóchi'li' naca. ¿Bizx que ruá'ali' luzá'ali' dö'?" ²⁷ Ní'irö bönni' na' ru'ë dö' que luzé'ë budxíguë'ë-bi' bi'i Moisés, gunné': "¿Núzxitë buzóa li' para inná bé'enu' netu', en uchi'a usöróu' le runtu'?" ²⁸ ¿Naru' ré'énitsenu' gútiu' ca' neda' ca benu' néaje, bétiu'-në' bönni' Egipto na'?" ²⁹ Cate' Moisés biyónibi' didza' ni, buzxúnajbi' ni', en yöjsóabi' luyú Madián ga ni' guzóabi' ca tu bönni' zi'tu'. Luyú Madián na' butsaga ná'aleni'-nu nigula lu yödzo ni', ate' gúl'jagacabi' chópabi' bi'i bönni' queë'.

³⁰ Cate' chigudödi choá' iz zoë' ni', bulu'í lahuë' tu gubáz lá'ayi queë' Dios ga zoë' lu gu' que yaga yótsi'do' régui, ga ni' naca lu lataj cá'asö, le rö'ö ra' gu'í a nazí' le Sinaí. ³¹ Cate' Moisés bilé'enë' gu'í na', bubáninë', ate' gubígui'ë gala' para ilé'enë' dxi'a, ate' biyönnë' chi'ë Xanru'. ³² Caní gudxë' Xanru' lë': "Neda' naca' Dios quégaquië' xuz xto'o. Naca' Dios queë' Abraham, en Dios queë' Isaac, en Dios queë' Jacob." Ní'irö lu yöl-la' radxi queë', guxzízidë'ë Moisés, en bí'ti' rö burúguinë' uyúë'. ³³ Xanru' gudxë' lë': "Guléaj xirachu' nudó'o, tu' naca lá'ayi ga ni' zu' tu' zoa caza' neda', Dios, ni. ³⁴ Le nácate' chibilé'eda' le ta'gu'í ta'zaca' bönachi quia' nacua' luyú Egipto, en chibiyönda' ta'bödxi yeche'. Bötja', zoa' ni para usölá' légaquië'. Gudá na'a, isól-la'a li' luyú Egipto."

³⁵ Sal-la' bönni' uládz queë' Moisés, bulu'cá'anë' lë' cá'asö, gula'nnë': "¿Núzxitë buzóa li' para inná bé'enu' netu', en uchi'a usöróu' le runtu'?" Dios gusól-lë'ë lë' para gáquië' bönni' unná bë', en bönni' rusölá, ca na' gubáz lá'ayi na' queë' Dios gudxë' Moisés, cate'

buluf'i lahuë' lu yaga yótsi'do' régui ga na' zoë'. ³⁶ Moisés ni bubéajë' bönni' uládz queéru' luyú Egipto. Guca caní gudödi benë' le gulún ga bulu'bani bönachi ni', en le taca bë' benë' luyú ni'. Lësca' caní benë' lu nísado' nazí'i le Nísado' Xiná. Caní benë' lógaquië' idú ca choá' iz lu lataj cá'asö. ³⁷ Lë cazë' Moisés na' gudxë' bönachi Israel ni', gunné': "Xanru' Dios isól-lë'ë queéli' tu bönni' galjë' ladaj di'a dza queéli', ate' gáquië' bönni' gu'ë didza' uláz queë' Dios. Isól-lë'ë lë' queéli' ca na' gusól-lë'ë neda'. Lë cazë' run bayudxi uzé nágali'-në'." ³⁸ Lësca' lë cazë' Moisés na' guzóalenë' bönachi nudúbigaca queë' Dios lu lataj cá'asö, ate' gudzáguië' gubáz lá'ayi queë' Dios lë', Nu na' bé'len lë' didza' lu gu'a Sinaí na'. Moisés na' guzóalenë' xuz xtó'oru', ate' Dios budödë' lu në'ë xibá lá'ayi queë', le ru'í didza' ca gaca ila'deli' bönachi yöl-la' na'bán, ate' budödë' Moisés xibá ni lu ná'agaca xzí'ini xí'sógaquië' ga ridxintë queéru' rë'u.

³⁹ 'Biti' gulé'ënnë' xuz xtó'oru' ilunë' ca rnna xtídzë'ë Moisés, pero bulu'zóë' lë' tsölá'alö, en gulé'ënnë' tsöjhuójgaquië' luyú Egipto. ⁴⁰ Cate' ni' zoë' Moisés na' lu gu'a Sinaí na', légaquië' gulé' Aarón, bóché'ë Moisés na', gula'nnë': "Ré'ënitú' gunu' yugu' dios queé'tu', tu budó' guië', para tsöjnórugaca lotu'. Biti' nöztu' bi guca queë' Moisés, bönni' na' nubéajë' netu' luyú Egipto." ⁴¹ Ní'irö gulunë' tu budó' oro le naca ca tu bédxido', ate' gulútië'-ba' bö'cu' xzí'la'do', en gulú'ugaquië'-ba' lo budó' oro na', ate' gulunë' laní lo budó' na' núngaquië'. ⁴² Que lë ni na' Dios bucá'anë' légaquië', en guléaj ládxi'ë légaquië'. Ní'irö gula'yéaj ládxi'gaquië' yugu' le ta'yëpi lúzxiba. Ca naca lë ni nazúaj lu guichi le gula'nnë' bönni' gulu'ë didza' uláz queë' Dios, le rnna:

Libí'ili', bönachi Israel,
¿naru' gulú'ugacatsali'-ba' quia' neda' böa' bédxi ni'
bétigacali'-ba', en buzégui'gacali'-ba',
lë na' benli' lu lataj cá'asö idú ca choá' iz?

⁴³ Biti' gulú'ugacali'-ba' quia' neda',
pero biá'ali' le nequi que Moloc, budó' guió'j queéli'.
Biá'ali' ca' tu le naca ca bölj lúzxiba nazí'i le Refán,
lë na' buzóali' ca dios queéli'.

Yugu' budó' guió'j budó' yaga ni,
la' libí'isili' benli' para guyéaj ládxi'li' léguequi.
Que lë ni na', ubéaja' libí'ili' lu xiyuli',
en ichë'a libí'ili' zí'tu'rö ga dë luyú Babilonia.

⁴⁴ 'Cate' ni' gula'cu'ë xuz xtó'oru' lu lataj cá'asö, guta' quégaquië' yu'u lari' na' ga gulún chi'ë xibá queë' Dios, lë na' naca bë' Dios caz zóalenë' légaquië'. Gulunë' tu yu'u lari' na' ca na' Dios gunná bé'enë' Moisés, cate' ni' gudxë' lë' gunë' le ca naca lë na' bilé'enë', le buluf'inë' Dios lë' lu gu'a ni'. ⁴⁵ Lësca' bulu'dödë' yu'u lari' na' lu ná'agaquië' xzí'inigaquië' ga bidxintë dza ni' gulu'ë xuz xtó'oru' le luyú ni, cate' ni' dzáguië' Josué légaquië', ate' gula'gúë' xiyúgaca bönachi izá'a, nupa ni' bulágui'ë Dios lógaquië' xuz xtó'oru'. Caní gulunë' zían iz ga bidxintë dza zoë' David. ⁴⁶ Dios guyaza ládxi'ë David na', ate' lë' gunábinë' Dios gu'ë lë' lataj gunë' tu yu'u ga soë' Dios queë' Jacob. ⁴⁷ Biti' bë'ë Dios lë' lataj, ate' Salomón, xzí'inë' David na' benë' yu'u queë' Dios. ⁴⁸ Caní benë' sal-la' bití' zoë' Dios, Nu nácatërö lo, tu lu yudo' núngaca bönachi. Ca naca lë ni gunné' tu bönni' bë'ë didza' uláz queë' Dios, gunné':

⁴⁹ Yehua' yubá naca ga rö'a rinná bë'a,
ate' yödzölió naca xilibi ni'a.
Rnnë' Xanru': "¿Naru' gúntsali' tu yu'u ga soa'?
¿Naru' zóatsö tu lataj ga ral-la' uzí ládxa'a?

⁵⁰ ¿Naru' cabí len na'a caza' bena' yúgu'të lë ni?"

⁵¹ Ní'irö Esteban na' gudxë' yugu' bönni' yudo' tu'chi'a tu'söröë' na', gunné':

—Libí'ili', bönni' zidi, biti' bi raza icja nágalí'. Nazidi icja ládxi'do'oli' ca raca quégaca bönachi biti' núnbë'gaquië' Dios. Ridá'baga'tica'sili'-në' Dios Bö' Lá'ayi. Ca na' gulunë' xuz xtó'oli', runli' ca' libí'ili'. ⁵² Gula'bía ládxi'gaquië' xuz xtó'oli' na' yúgu'të bönni' ni' gulu'ë didza' uláz queë' Dios. Lësca' gulútië' bönni' ni' gula'guíxjö'ë zí'aló ca ral-la' guidë' Cristo, Bönni' Tsahui', ate' na'a, cate' ni' bidxinë' Bönni' Tsahui' na', libí'i cázali' bétili'-në' lu ná'agaquië' bönni' gulútië' Lë'. ⁵³ Libí'i cázali' dë lu ná'ali' xibá queë' Dios, lë na' gubáz lá'ayi queë' Dios bulu'dödë' lu ná'agaquië' xuz xtó'oli', pero biti' runli' ca rnna.

Tútië' Esteban

⁵⁴ Cate' bönni' yudo' tu'chi'a tu'söröë' na' bila'yönnë' didza' ni, gula'léde'enë' Esteban, ate' lu yöl-la' rilé quégaquië' lë' gulagu zxéatica' láyë'ë. ⁵⁵ Ní'irö buyúë' Esteban na' lúzxibalö, ate' zóalenë' Dios Bö' Lá'ayi lë', bilé'enë' lataj bení' ga zoë' Dios, enca' Jesús, zuínë' cuita lë'ë ibëla Dios ga nayépisëtëre'. ⁵⁶ Ní'irö gunné':

—Bulí'yútsöca'. Rilé'eda' nayalaj lúzxiba, ate' zuínë' Bönni' Guljë' Bönachi cuita lë'ë ibëla Dios.

⁵⁷ Ní'irö bönni' yudo' tu'chi'a tu'söröë' na' bulu'sayaj nágagaquië'. Gula'bódxí'ë zidzaj, en tsözxón gula'bía di'ë Esteban na'. ⁵⁸ Bulu'béajë' lë' ní'ilö ra' yödzö na', ga ni' bulu'ladxë' lë' guió'j. Yugu' bönni' ni' tunë' ba nalí le tu'zéguië' Esteban didza' bulu'cu'ë lari' ta'xóa yéngaquië' xini'ë tu' bönni' lë' Saulo cate' ni' bulu'ladxë' Esteban guió'j. ⁵⁹ Cate' ni' tu'ladxë' Esteban guió'j, lë' bulidzë' Dios, gunné':

—Xána' Jesús. Buzí' bö' naca caza'.

⁶⁰ Ní'irö biyéchuë', buzóa zxibë', en bë'ë zidzaj didza', gunné':

—¡Xan! ¡Biti' usubágu'u légaquië' dul-la' ni!

Cate' budxi bë'ë didza' ni, gútitë'.

8

Saulo ribía ládxi'ë bönachi queë' Cristo

¹⁻³ Saulo benë' tsözxón yugu' bönni' ni' gulútië' Esteban.

La' ní'isö yugu' bönni' ta'yéaj ládxi'gaquië' Dios guluá'agaquië' Esteban, ate' yöjcáchi'-gaquië' lë'. Gula'bódxidë'ë ni'a queë'.

Dza na' yugu' bönni' judío cabí ta'yéajlë'ë Cristo gula'bía ládxi'da'gaquië' bönachi queë' Cristo nacua' Jerusalén. Lësca' Saulo gudxía ládxi'ë bönachi queë' Cristo. Guyázië' gapa naca lu yu'u quégaquië', ate' guzxönë' yugu' bönni', en nigula, ate' gulu'ë légaquië' lidxi guíë.

Ní'irö gulásilasi ia'láti'sö cabí bidáchigaca yúgu'të bönachi queë' Cristo idú luyú Judea, en luyú Samaria, ate' légacasë' gubáz na' nasól-lë'ë Cristo bulu'gá'anë' Jerusalén.

Raca libán que didza' dxi'a luyú Samaria

⁴ Yugu' bönni' na' gulásilasië' yöjáquië' yúgu'të lataj, ate' gulunë' libán que didza' dxi'a. ⁵ Ní'irö Felipe, tu' bönni' dzáguië' nupa na' gulásilasi, guyijë' luyú Samaria, ate' benë' libán ni' ca naca queë' Cristo. ⁶ Bulu'dübë' yugu' bönni' ni', ate' idú ládxi'gaquië' bulu'zé nágagaquië' didza' ru'ë Felipe na', tu' bila'yönnë' xtídzë'ë, en bila'lé'enë' yugu' le taca bë' runë'. ⁷ Caní guca, tu' benë' ga bulu'rúaj zían bö' xihui' yú'ugaca bönachi, ta'bódxí'a zidzaj, ate' bulu'huóaca zían nupa te'e huë' nacú'uni bin, en nupa biti' guca sá'gaca. ⁸ Caní guca, bulu'dzeja bönachi yödzö ni'.

⁹ Zoë' Simón, tu' bönni' zí'aló gúquië' bönni' udzá' uné' ya'a lu yödzö na', bönni' guzxí' yé'enë' bönachi Samaria na', gunné' lë' cazë' náquië' bönni' nayépisëtëre'. ¹⁰ Yúgu'të bönachi bulu'zëda' nágagaca bönni' ni, ga riguela' yugu' bönni' cá'asö ga ridxintë yugu' bönni' lo, gula'nné': "Bönni' ni dë lu në'ë yöl-la' huáca zxön queë' Dios." ¹¹ Caní guca, gulunë' lë' bal, tu' xidzé nazi' yé'enë' légaquië' len yöl-la' gudzá' uné' ya'a queë'.

¹² Cate' gula'yéajlë'ë libán runë' Felipe que didza' dxi'a ca rinná bë'ë Dios, en ca naca queë' Jesucristo, ní'irö gula'dilë' nisa, bönni', en nigula. ¹³ Ní'irö guyéajlë'ë ca' Simón na', en bidilë' nisa, ate' gudálientica'së' tsözxón Felipe na'. Cate' bilé'enë' yugu' yöl-la' huáca zxön, en yugu' le taca bë' runë' Felipe, bubáninë' Simón na'.

¹⁴ Cate' yugu' gubáz na' nasól-lë'ë Cristo nacu'ë Jerusalén bila'yönnë' ca guca lë ni, chinazí' lu ná'agaca bönachi luyú Samaria xtídzë'ë Dios, ní'irö gula'sól-lë'ë Pedro, en Juan ni'. ¹⁵ Cate' Pedro, en Juan na' bila'dxinë' ni', bulu'lidzë' Dios uláz quégaca bönachi ni' ta'yéajlë' Cristo para idisóalenë' Dios Bö' Lá'ayi léguequi. ¹⁶ Ga bidxintë dza na', bití' ridxíninë' Dios Bö' Lá'ayi quégaquië'. Nadílagacasë' nisa para ilácagaquië' tuz len Xanru' Jesús. ¹⁷ Ní'irö Pedro, en Juan na', gula'xóa ná'agaquië' bönachi Samaria na'. Bulu'lidzë' Dios, ate' bidisóalenë' Dios Bö' Lá'ayi légaquië'.

¹⁸ Cate' bilé'enë' Simón, bönni' udzá' na', le guca cate' gubáz na' nasól-lë'ë Cristo gula'xóa ná'agaquië' bönachi ni', bidisóalenë' Dios Bö' Lá'ayi légaquië', gú'unnë' quíxjé' légaquië' dumí, ¹⁹ ate' rë' légaquië':

—Benna ca' yöl-la' huáca ni quia', para cate' ixóa na'a nútí'tës bönachi, idisóalenë' Dios Bö' Lá'ayi nu na'.

²⁰ Ní'irö Pedro gudxë' lë', rnnë':

—Initi dumí quiu' tsözxón len li', tu' réquinu' len dumí idéli'nu' yöl-la' huáca queë' Dios. ²¹ Bití' nacu' bachi gútsu'u lë ni, tu' dxía le naca ruá' dö' icja ládxi'do'o lahuë' Dios. ²² Bubí'i ládxi' ca naca huiá' dö' ni runu', en gúta'yu lahuë' Dios, nadxi ca' uniti lahuë' li' ca naca lë ni rizá' ládxi'u. ²³ Réquibe'eda' nabágu'u xíguia', en nadzunu' lu yalaj que tu' xihui'.

²⁴ Ní'irö bubí'ë didza' Simón na', rë' légaquië':

—Bulí'lídzë' Dios, gáta'yuli' lahuë' Xanru' ní'a quia' neda' para cabí gaca quia' nitú lë na' chigunnáli'.

²⁵ Cate' Pedro, en Juan na' budxi gulunë' ba nalí queë' Cristo lu yödzö ni', en bulu'siyönnë' légaquië' xtídzë'ë Dios, gulunë' ca' libán que didza' dxi'a yugu' lu ládzagaquië' bönni' Samaria, ate' gudödi ni' yójhuójgaquië' Jerusalén.

Felipe, en tu bönni' Etiopía

²⁶ Ní'irö tu gubáz lá'ayi queë' Xanru' bé'lenë' Felipe didza', en gudxë' lë':

—Guyasa, en guyéaj saca' ga ridödi gubidza beo' ziaga. Idxinu' ga ni' nalá' nöza zeaj Jerusalén zéajtë yödzö Gaza, nöza na' ridödi lu lataj cá'asö.

²⁷ Ní'irö guyu'ë nöza Felipe na', sa'yéajë'. La' nöza ni' yöjtságuie' tu bönni' Etiopía, náquië' bönni' huödx. Luyú Etiopía náquië' bönni' huen dxin lo queénu Candace, nigula na' rinná bé'enu bönachi Etiopía na', en yu'u lu në'ë yúgu'të yöl-la' tsahui' queénu dzö'ö lídxinu. Guyijë' Jerusalén bönni' ni para guyéaj ládxië'ë Dios. ²⁸ Na'a, söhuójë' ladzë', rö'ë lu carreta queë', en rulabë' le nazúaj lu guichi ca gunné' Isaías, bönni' bë'ë didza' uláz queë' Dios. ²⁹ Ní'irö Dios Bö' Lá'ayi gudxë' Felipe na':

—Gubíga' ga zeaj carreta na', en guyéajlen le.

³⁰ Cate' chigubíguë'ë Felipe ni', biyönnë' ru'ë didza' bönni' huödx na', rulabë' le nazúaj lu guichi ca gunné' Isaías, ate' gudxë' lë':

—¿Naru' réajni'inu' lë na' rulabu'?

³¹ Bubi'ë didza' bönni' Etiopía na', gunné':

—¿Nacxi gaca tséajni'ida' channö cuntu nu zoa uzéajni'i neda'?

Ní'irö gúta'yue' lahuë' Felipe cuenë', en có'lenë' lë' tsözxón lu carreta na'.

³² Lë na' nazúaj lu guichi rulabë', rna caní:

Ca bö'cu' zxíla'do',

gula'ché'ë Lë' para ilútië' Lë',

en ca bö'cu' zxíla'do',

bití' rnnëba' cate' nu richugu lítsa'ba',

ca' benë' Lë', biti' gusalaj ru'ë bi innë'.

³³ Bulu' cá'anë' Lë' cá'asö,

en biti' gulu'ë lataj nu uchi'a usöró Lë'.

¿Nuzxi caz gaca inözi xíguia' nabága'gaca bönachi uládz queë'?

La' légacasë' gulútië' Lë'.

³⁴ Bönni' huödx na' gunábinë' Felipe, rë' lë':

—Ráta'yua' lo' quíxjöi'inu' neda'. ¿Nuzxi que gunné' caní bönni' na' bë'ë didza' uláz queë' Dios? ¿Naru' queë' cazë', o que nu yúböló?

³⁵ Ní'irö la' didza' nisö buguelë'ë Felipe, en busiyönnë' lë' didza' dxi'a ca naca queë' Jesús. ³⁶ Cate' ni' yú'ugaquië' nöza sójáquië', bila'dxinë' ga dë nisa, ate' bönni' huödx na' rë' Felipe, rnnë':

—Buyútsöca'. Ni dë nisa. ¿Naru' huácatsö idila' nisa?

³⁷ Felipe gudxë' lë':

—Channö réajlë'u idú ládXu'u, huáca idilu' nisa.

Lë' bubí'ë didza', rnnë':

—Réajlë'a Jesucristo, náquië' Zxi'inë' Dios.

³⁸ Ní'irö benë' ga guzóa dxisö carreta queë' na', ate' bulu'huötjë' irópatë', yöjtsáza-gaquië' lu nisa. Ní'irö Felipe buquilé' bönni' huödx na' nisa. ³⁹ Cate' bulu'rúajë' lu nisa, Dios Bö' Lá'ayi buchë'ë Felipe, ate' bönni' huödx na' bíti'rö bilé'enë' lë'. Ní'irö buguelë'ë xinözë', söhuóje' rudzëjanë'. ⁴⁰ Cate' chiréquië'enë' Felipe, zoë' lu yödzö Azoto. Gudödë' yúgu'të yödzö ni', ate' benë' libán que didza' dxi'a, ga bidxintë' yödzö Cesarea.

9

Saulo ruhuóáquië' queë' Cristo

¹ Ni' ruzenë' bach Saulo nupa ta'yéajlë' Xanru', gú'unnë' gútië' légaquië'. Para gunë' caní bidxinë' lahuë' bixúz lo, ² en gunábinë' lë' tu guichi unná bë', le tsöju'ë lógaquië' bönni' unná bë' quégaca yu'u gapa tu'dubë' bönni' judío, en tu'sëdë' queë' Dios lu yödzö Damasco, ate' channö utsöjxáquië' yugu' bönni', en nigula ta'yéajlë'ë Jesús ni', gaca ichë'ë légaquië' nadzúngaquië' lu yödzö Jerusalén. ³ Tsanni ni' yú'ugaquië' nöza Saulo, en nupa nacua'len lë', sójáquië', en cate' chizóa ila'dxinë' Damasco, tsálido'os buzeni'da' tu bení' za' lúzxiba, le buzeni' ga ni' sójáquië'. ⁴ Ní'irö gudzö'ë Saulo lu yu, en biyönnë' chi'i Nu rë lë':

—Saulo, Saulo, ¿bizx que ribía ládXu'u neda'?

⁵ Saulo gunábinë' Lë', gunné':

—¿Nuzxi lí', Xan?

Lë' gunné':

—Neda' Jesús, Nu ribía ládXu'u. Run zi' cuinu', ridá'bagu'u neda'. Raca quiu' ca na' raca queéba' bëdxi, run zi' cuinba' richégu'ba' yaga tuchi' túndë'ë-ba' zi'.

⁶ Ní'irö Saulo guxzíidë'ë, gúdxinë', en gunné':

—Xan, ¿bizxi ré'ënu' guna'?

Xanru' gudxë' lë':

—Guyasa, en guyáz lu yödzö, ate' ni' isól-la'a quiu' nu guíë lí' le ral-la' gunu'.

⁷ Guládxinë' yugu' bönni' na' sójácalenë' Saulo, tu' bila'yönnë' chi'i na', sal-la' cuntu nu bila'lé'enë'. ⁸ Ní'irö böasë' Saulo luyú, en cate' guxá' guiój lahuë', biti' ca' rilé'enë'. Que lë' ni na' gula'guélé'ë në'ë, en gula'ché'ë lë' Damasco. ⁹ Guzóë' ni' tsonna dza nachul-la lahuë', en biti' bi güi'i gudahuë'.

¹⁰ Zoë' ca' Ananías, bönni' réajlë'ë Cristo, yödzö Damasco, ate' Xanru' buluí'i lahuë' ga zoë' ca tu lu yëla béchigal, en gudxë' lë':

—Ananías.

Lë' bubí'ë didza', gunné':

—Ni zoa', Xan.

¹¹ Xanru' gudxé' lè':

—Guyasa, en guyéaj ga naca la' nöza na' nazi'i le Nöza Li, ate' lu yu'u lidxé' Judas gunaba didza' queé' Saulo, bönni' Tarso. Lu yu'u na' rulidzé' Dios. ¹² Chibilé'ené' tu bönni' ca tu lu yéla béchigal zé'ë tsázié' ga zoé', lè' Ananías, en ixóa në'ë lè' para huóalaj guió'j lahué'.

¹³ Ní'irö bubí'ë didza' Ananías, rë' Lè':

—Xan, zían nupa chibulu'siyónné' neda' ca runé' bönni' ni, zían le naca dö' nu'ë le bené' quégaca bönachi ta'yéajlé' Li', nacua' Jerusalén. ¹⁴ Zé'ë ca' ni, dö lu në'ë uláz quégaquié' bixúz unná bé' söné' yúgu'té nupa tu'lidza Dios len Lo' Li'.

¹⁵ Ní'irö Xanru' rë' Ananías na', rnné':

—Guyéaj, tu' guró caza' neda' bönni' ni para guné' libán ca naca quia' lógaca bönachi izá'a, en lógaquié' bönni' ta'nná bé'ené' légaquié', enca' lógaca bönachi Israel. ¹⁶ Ulu'ida' lè' le zían le qui'i sáqué'ë uláz quia' neda', guné' xichina'.

¹⁷ Ní'irö guyijé' Ananías ni', ate' guyázié' yu'u, en guxóa në'ë Saulo, ate' rë' lè':

—Böcha'a Saulo, Xanru' Jesús, Nu na' buluf'i lahui la' nöza ga ni' zo'o, gusól-lé'ë neda' para huóalaj guió'j lo', en idisóalené' Dios Bö' Lá'ayi li'.

¹⁸ La' ní'isö gula'guínnaj le naca ca xilácuba' böla lu guió'j lahué', ate' la' böáljaté guió'j lahué'. Ní'irö guyasé' Saulo, en bidilé' nisa. ¹⁹ Gudödi ni' gudahué', en böáca ládxé'ë. Ca chopa tsonna dza guzóalené' yugu' bönni' ta'yéajlé'ë Cristo nacué' Damasco.

Runé' libán Saulo lu yödzo Damasco

²⁰ La' gusí loté' Saulo runé' libán queé' Cristo gapa naca lu yu'u ga tu'dubé' bönni' judío, en tu'sedé' queé' Dios, rnné':

—Jesús náquié' Zxí'ini cazé' Dios.

²¹ Bulu'bánniné' yúgu'té bönni' ni' ta'yönné' lè', ta'nné':

—¿Naru' caléga bönni' ni bönni' na' busunítié' nupa nacua' Jerusalén, en tu'lidza Dios lu Lè' Jesús? Para guné' caní bidé' ca' ni para iché'ë légaquié' nadzúngaquié' lógaquié' bixúz unná bé'.

²² Bidíparö ládxé'ë Saulo, en bené' ga gula'bö'ë böniga bönni' judío nacué' Damasco, tu' bulu'iné' légaquié' Jesús naca cazé' Cristo, bönni' na' tuné' löza idinná bé'ené' légaquié'.

Rulé' Saulo lu ná'agaquié' bönni' judío

²³ Cate' chigudödi zían dza, gulún xtídza'gaquié' bönni' judío nacué' ni' ilútié' Saulo. ²⁴ Rëla, en té dza gula'bó' nísié' yugu' bönni' judío ga nu ridödi lu zö'ö run chí'i yödzo na' para ilútié' lè', pero gúquibe'ené' Saulo le té'ënné' iluné' queé'. ²⁵ Ní'irö yugu' bönni' ta'yéajlé'ë Cristo gula'guélé'ë Saulo chí'i dzó'ölö, ate' gula'gu'ë lè' tu lu ga'böra zxon naga' du, en bulu'zötjé' lè' ní'ilö lu zö'ö run chí'i yödzo na'.

Rudxiné' Saulo Jerusalén

²⁶ Cate' budxiné' Saulo Jerusalén, gú'unné' tsöjené' tsözxón bönni' ni' ta'yéajlé'ë Cristo, pero yúgu'té' guládxiné' lè', tu' cabí téquiné' réajlé'ë Saulo na' Cristo. ²⁷ Ní'irö bönni' na' lè' Bernabé gudélé'ë Saulo, en guché'ë lè' ga na' nacué' bönni' gubáz nasól-lé'ë Cristo. Busiyönné' légaquié' ca na' guca queé' Saulo, bilé'ené' Xanru' la' nöza, ate' Xanru' caz bé'lené' lè' didza', en ca na' bené' Saulo lu yödzo Damasco, len yöl-la' rugu ladxi' bené' libán ca naca queé' Jesús. ²⁸ Ní'irö Saulo guzóalené' légaquié' lu yödzo Jerusalén, ate' gudálené' légaquié' tsözxón. ²⁹ Lu yöl-la' rugu ladxi' bené' libán Saulo ca naca queé' Xanru', en gudíl-lalené' didza' bönni' judío tu'ë didza' griego, ate' légaquié' gula'zóa gula'bö'ë ilútié' lè'. ³⁰ Cate' guléquibe'ené' bóchi'ru' ta'yéajlé'ë Cristo lè ni, gula'ché'ë Saulo lu yödzo Cesarea, ate' gula'sól-lé'ë lè' yödzo Tarso, le naca ladzé' Saulo.

³¹ Ní'irö guca tsahui' quégaca yúgu'té cö' bönachi queé' Cristo, nacua' idú luyú Judea, en luyú Galilea, en luyú Samaria, ate' bila'dipa ládxi'gaquié'. Gula'cu'ë lu yöl-la' radxi quégaquié' Xanru', ate' gula'yané' tu' gúcalené' Dios Bö' Lá'ayi légaquié'.

Pedro ruúnë' tu bönni' lë' Eneas

³² Ia'tú le guca, cate' Pedro yöjyúë' yugu' bóchi'ru', bidxinë' ga nacu'ë bönni' ta'yéajlë'ë Jesús lu yödzö Lida. ³³ Yöjxáquië' tu bönni' ni' lë' Eneas, chiguca xunu' iz dë' ré'enë', nacú'unië' bin. ³⁴ Pedro gudxë' lë':

—Eneas, Jesucristo ruúnë' li'. Guyasa, en butubi xto'o.

La' guyásatë' Eneas na'. ³⁵ Yúgu'të nupa nacuá' yödzö Lida, en yödzö Sarón bila'lé'e lë', atë' bulu'huóaca queë' Xanru', tu' chita'yéajlë' Lë'.

Rátinu Dorcas, en rubannu

³⁶ Ia'stú le guca, lu yödzö Jope zóanu tu nigula réajlë'ënu Cristo, lënu Tabita, en ca naca didza' griego lënu Dorcas. Benu nigula ni zían le náacagaca dxi'a le tácalen bönachi yechi'. ³⁷ Le guca dza ni', gúí'ínu Dorcas na', en gútinu. Gudödi gula'gu'binu lënu, gula'gu'xjë'-nu tu lu yu'u ga naca buropi cuía. ³⁸ Tu' dë yödzö Lida gála'sö ga na' dë yödzö Jope, ga na' zoë' Pedro, bila'yönnë' bönni' Jope na' ta'yéajlë'ë Cristo zoë' Pedro ni', atë' que lë ni na' gula'sól-lë'ë chopë' bönni' ga na' zoë', atë' guláta'yue' lahuë', të' lë':

—Biti' tsenu' guídu' queëtu'.

³⁹ Ní'irö la' guyásatë' Pedro, sa'yéajlenë' légaquië'. Cate' bidxinë' ni', la' gula'chë'të' lë' ga naca lu yu'u ga dënu nigula nati na'. Ní'irö yugu' nigula uzëbi bulu'dúbinu gásibi'ilë', ta'bódxinu, en tu'luí'ínu lë' lari' quégaquië' bönni', en nigula, yugu' le benu Dorcas cate' ni' zóalennu légacanu. ⁴⁰ Ní'irö Pedro bubéajë' ní'ilö yúgu'të nupa nacuá' ni', atë' buzóa zxibë', rulidzë' Dios. Ní'irö buécjë' ga dënu Dorcas na', gunné':

—Tabita, guyasa.

La' buxa'të guió' lonu Dorcas. Cate' bilé'enu-në' Pedro, la' guyástënu, guró'önu. ⁴¹ Gudélë'ë Pedro ná'anu, en buchisë'-nu. Ní'irö bulidzë' bönni' na' ta'yéajlë'ë Jesús, len yugu' nigula uzëbi na', atë' busudxinë' Dorcas na' lógaquië', nabannu. ⁴² Ca guca lë ni gúzë didza' idú lu yödzö Jope, atë' gula'yéajlë' bönachi zían Xanru' Jesús. ⁴³ Bugá'anë' Pedro yödzö Jope na' zían dza lu yu'u lidxë' Simón, bönni' runë' tsahui' guídi xza bëdxi.

10

Le benë' Pedro lidxë' Cornelio

¹ Zoë' yödzö Cesarea tu bönni' lë' Cornelio, bönni' rinná bé'enë' tu gáyu'ë bönni' röjáquië' gudil-la, nazí'i lágaquië' Bönni' Italia Röjáquië' Gudil-la. ² Cornelio na' reaj ládxë'ë Dios, en rádxinë' Lë', atë' yúgu'të bönachi nacuá' lidxë' núngaca lë' tsözxón. Runödzjë' Cornelio dumí zían le rácalen bönachi yechi', en rulídzatica'së' Dios. ³ Tu dza idú ridödi xihuó bilé'enë' Cornelio ca tu lu yëla béchigal, razië' tu gubáz lá'ayi queë' Dios ga na' zoë', en rë' lë':

—Cornelio.

⁴ Gúdxinë' Cornelio. Buyúë' gubáz lá'ayi na', en gudxë' lë':

—¿Bizxi rnno', Xan?

Gubáz lá'ayi na' gudxë' lë', rnnë':

—Dios riyönnë' le rulidzu'-në', en nózinë' ca runu', rácalenu' bönachi yechi'. ⁵ Na'a, gusól-la' yugu' bönni' tsöjáquië' yödzö Jope tsöjlídzagaquië' bönni' na' lë' Simón, zoa ia'tú lë' Pedro. ⁶ Bönni' ni zoë' lidxë' tu bönni' runë' tsahui' guídi xza bëdxi. Bönni' ni, lësca' lë' Simón, atë' zoa lidxë' ra' nísado'. Pedro na' guíë' li' le ral-la' gunu'.

⁷ Cate' chibuzë'ë gubáz lá'ayi na' bé'lenë' lë' didza', bulidzë' Cornelio chópabi' bi'i huen dxin queë', en tuë' bönni' rejë' gudil-la reaj ládxë'ë Dios, en dzáguië' bönachi nacuá' lidxë' Cornelio. ⁸ Cate' budxi busiyönnë' légaquië' yúgu'të le guca, gusól-lë'ë légaquië' yödzö Jope.

⁹ Dza buropi, tsanni ni' yú'ugaquië' nöza, en ta'dxinë' gala' ga dë Jope na', la' ní'isö gurenë' Pedro ícjo'olö yu'u para ulidzë' Dios, ni' naca idú huagubidza. ¹⁰ La' ná'asö ridunë' Pedro, en gú'unnë' gahuë', atë' tsanni ni' tu'pé'ë queë', bilé'enë' le naca ca tu lu yëla

béchigal. ¹¹ Bilé'ené' nayalaj lúzxiba, en ruhuötaj tu le naca ca tu lari' guitsa' zxön ga zoë', le naga' idapa la'a. ¹² Lahui lari' na' dxíagacaba' yugu' böa' guixi' izá'a nacuá' tapa ni'a ná'agacaba', en yugu' böa' tá'ayöj lé'egacaba' lu yu, en yugu' böa' zoa xíligacaba'. ¹³ Ní'irö biyönné' chi'i nu rë lé':

—Pedro, guyasa. Béti-gacaba', en gudagu.

¹⁴ Bubi'ë didza' Pedro, rnné':

—¿Calëga, Xan! Catu caz gudahua' le cabí ral-la' gágutu', o le cabí naca dxi'a.

¹⁵ Le buropi luzuí biyönné' chi'i nu na' gudxi lé':

—Le nuné' Dios dxi'a, biti' innó' que: "Biti' naca dxi'a."

¹⁶ Tsonna luzuí guca caní, ate' ní'irö la' buépitë lari' zxön na' lúzxiba. ¹⁷ Tsanni ni' rö'ë böniga Pedro, rizá' ládxë'ë bizxi sa'yéaj lé na' bilé'ené' ca tu lu yëla béchigal, bila'dxiné' bönni' na' nasól-lë'ë Cornelio légaquié' ra' yu'u, ta'nabë' gazxi zoa lidxë' Simón na'. ¹⁸ Cate' bila'dxiné' ni', bulu'lidzë' nupa nacuá' yu'u na', en gula'nábiné' légaquié' channö zoë' tu bönni' lé' Simón ni', zoa ia'tú lé' Pedro. ¹⁹ Tsanni ni' rizá' ládxë'ë Pedro ca naca lé na' bilé'ené', Dios Bö' Lá'ayi gudxë' lé', rnné':

—Buyútsöca'. Chibila'dxiné' tsonné' bönni' ni, tu'guiljé' li'. ²⁰ Guyaschi na'a, en bötaj znan yu'u. Biti' gaca chopá ládxa'u tséajlenu' légaquié', tu' nasól-la'a neda' yugu' bönni' ni.

²¹ Ní'irö bötjé' Pedro znan yu'u ga na' nacu'ë bönni' na' nasól-lë'ë Cornelio, en gudxë' légaquié':

—Neda' bönni' ruguflajli'. ¿Bizxi huen zá'ali' ni?

²² Bulu'bi'ë didza', të' lé':

—Cornelio, tu bönni' rinná bé'ené' bönni' röjáquié' gudil-la, nasól-lë'ë netu'. Náquié' bönni' tsahui', en rádxiné' Dios. Yúgu'të bönni' judío tuné' bal bönni' ni, en nadxí'iguené' lé'. Ia'tú le guca, tu gubáz lá'ayi queë' Dios bé'lené' lé' didza', en gudxë' lé' isól-lë'ë nu udulídza li' guídu' lidxë' para yönné' didza' gu'u.

²³ Ní'irö Pedro gulu'ë légaquié' lu yu'u, en bë'ë ga ila'cu'ë. Cate' za' rení' ia'tú dza, guyasë' Pedro, en guyéajlené' légaquié'. Bal-lë' bóchi'ru' nacu'ë Jope na' guluné' lé' tsözxón.

²⁴ Dza bunni ni', bila'dxiné' Cesarea. Chizóë' Cornelio ribözë' légaquié', ate' chinutubë' yugu' dí'a dza queë', en yugu' bóchi' luzé'ë nadxí'iröné' lidxë'. ²⁵ Cate' guyázié' Pedro lö'a, birúajé' Cornelio yu'u, yöjtságuié' lé'. Biyéchué' xini'ë Pedro, en guyéaj ládxe'ë lé' ca runru' queë' Dios caz. ²⁶ Pedro buchisë' lé', en gudxë' lé':

—Guyasa. Lësca' bönachi yödzölió naca' ca nacu' li'.

²⁷ Ni' tu'isë' ca' didza', guyázatë' Pedro yu'u, en yöjxáquié' nudúbigaca bönachi zían ni'. ²⁸ Ní'irö Pedro gudxë' légaquié', rnné':

—Libi'ili' nöz quézili' ca rinná bë' xibá queë' Moisés, rna biti' ral-la' guné' tu bönni' judío tsözxón o tsázalené' nu bönni' izá'a. Na'a, Dios bulu'iné' neda' biti' ral-la' inná' queë' nitúé' bönni' náquié' cá'asó o biti' náquié' dxi'a. ²⁹ Que lé ni na' cate' bulídzali' neda', la' bídatea', en biti' guca chopá ládxa'a. Rinaba' na'a, ¿bizx que na' bulídzali' neda'?

³⁰ Ní'irö bubí'ë didza' Cornelio, gunné':

—Chiguca tapa dza ca zóaru' na'a, idú ridödi xihuó, cate' ni' runa' gubasa, en rulidza'-né' Dios lu yu'u lidxa' ni, bilé'eda'-bi' tubi' bönni' ra'bán nácubi' lari' rëpi yösa bení', dului' lobi' neda'. ³¹ Caní gúdxibi' neda': "Cornelio. Dios riyönné' le rulidzu'-né', en nóziné' ca runu', rácalenu' yugu' bönachi yechi'. ³² Na'a, isól-lu'u nu bönni' lu yödzö Jope para tsöjlídze' tu bönni' lé' Simón, zoa ia'tú lé' Pedro. Bönni' ni zoë' lidxë' tu bönni' runé' tsahui' guídi zxa bédxi, en lé' ca' Simón. Zoa lidxë' bönni' ni ra' nísado'. Cate' idxiné' Pedro na' ga zu', usiyönné' li' didza' dxi'a." ³³ Caní guca, la' gusól-la'tea' nu tsöjlídza' li', ate' tsáhu' do' benu'bidu' ga zóatu' ni. Que lé ni na' zóatu' ni yúgu'tëtu', nudúbitu' lahué' Dios para uzé' nágatu' le inná bé'ené' Dios li' innó'.

Didza' bë'ë Pedro lidxë' Cornelio

³⁴ Ní'irö gusí lahuë' Pedro ru'ë didza', rnnë':

—Le nácatë réajni'ida' na'a, bití' ruyusë' Dios yöl-la' rinnësö quégaca bönachi, pero tuz ca rilé'enë' rë'u. ³⁵ Dios raza ládxë'ë bönachi idútë yödzülió, nupa na' tadxi Lë', en tun le naca dxi'a. ³⁶ Gusól-lë'ë Dios xtídzë'ë ga nacua' bönachi Israel, en gusól-lë'ë nu ben libán que didza' dxi'a, le run ga raza dxi'a quégaca bönachi, lë na' bidxín queéru' lu në'ë Jesucristo. Lë cazë' náquië' Xanru' yúgu'tëru'. ³⁷ Libí'ili' nöz quézili' lë na' guca luyú Judea, le gusí lo guca luyú Galilea gudödi benë' libán Juan para ila'dila bönachi nisa. ³⁸ Nózili' ca benë' Dios le guca queë' Jesús, bönni' Nazaret. Gusól-lë'ë Dios Bö' Lá'ayi, en yöl-la' huáca queë' para sóalengaca Lë'. Nózili' ca na' gudé' Jesús, runë' le naca tsahui', en ruúnë' yúgu'të nupa gula'gu'í gula'zaca' lu na' tu' xihui'. Caní benë', tu' guzóalenë' Dios Lë'. ³⁹ Na'a, netu' runtu' ba nalí que yúgu'të lë na' benë' Jesús luyú Judea, en lu yödzü Jerusalén, en ca na' guca, gulútië' Jesús, cate' bulu'dé'ë Lë' lë'e yaga cruz. ⁴⁰ Ní'irö Dios busubanë' Lë' cate' guca tsonna dza nátië', en benë' ga bulu'í lahuë' ga zóatu' netu'. ⁴¹ Bití' bulu'í lahuë' lógaca yúgu'të bönachi, pero lotu' netu' bulu'í lahuë'. Dios guróë' netu' dza ni'te para guntu' ba nalí queë' Jesús, ate' gü'í gudágulentu' Lë' tsözxón gudödi bubanë' lu yöl-la' guti. ⁴² Gunná bé'enë' Dios netu' guntu' libán lógaca bönachi, ate' runtu' ba nalí queë' Cristo, náquië' Nu buzóa cazë' Dios para uchi'a usöróë' nupa nabángaca, en nupa chinátigaca. ⁴³ Lësca' yúgu'të bönni' gulu'ë didza' uláz queë' Dios gulunë' ba nalí queë' Jesús, gula'nnë': “Yúgu'të nupa ila'yéajlë' Lë', Dios uniti lahuë' dul-la' nabága'gaquië' ni'a que le benë' Lë'.”

Dios Bö' Lá'ayi ridisóalenë' bönachi izá'a

⁴⁴ Ni' ru'isë' caní didza' Pedro, la' bidxintë' Dios Bö' Lá'ayi, bidisóalenë' légaquië', yúgu'të nupa ni' ta'yöni libán runë' lë'. ⁴⁵ Gula'ná' badxë' bönni' judío ta'yéajlë'ë Cristo, nupa na' bila'dxín ni' tsözxón len Pedro, tu' bidë' Dios Bö' Lá'ayi, Nu na' nasól-lë'ë Dios Xuz. Bidisóalenë' bönachi ni' bití' nácatë' judío. ⁴⁶ Caní gulunë' tu' bila'yönnë' tu'ë bönni' zí'tu' na' didza' yúbölö, en tunë' Dios zxön. ⁴⁷ Ní'irö bë'ë didza' Pedro, gunné':

—¿Naru' huácatsö nu inná be'e bönachi ni para cabí ila'dila nisa? Naca bë' Dios Bö' Lá'ayi bidisóalenë' légaquië', ca na' bidisóalenë' netu'.

⁴⁸ Gunná bë'ë Pedro ila'dilé' nisa tu' nazi' lu ná'agaquië' Lë' Xanru' Jesús. Ní'irö yugu' bönni' ni' guláta'yue' lahuë' Pedro ugá'analenë' légaquië' ca chopa tsonna dza.

11

Didza' bë'ë Pedro lógaca bönachi queë' Cristo nacua' Jerusalén

¹ Bila'yönnë' gubáz nasól-lë'ë Cristo, en bóchi'ru' nacua' luyú Judea ca na' bönni' bití' nácatë' judío gula'zí' lu ná'agaquië' xtídzë'ë Dios. ² Cate' budxinë' Pedro Jerusalén, bóchi'ru' judío gula'díl-lalenë' lë' didza'. ³ Gulé' Pedro:

—¿Bizx que yöjtsú'ulenu' bönni' bití' nácatë' judío, en gudágulenu' légaquië' tsözxón?

⁴ Ní'irö gusí lahuë' Pedro rusiyönnë' légaquië' idútë lë na' guca, rnnë':

⁵ —Guzóa' lu yödzü Jope, en cate' ni' rulidza'-në' Dios, bilé'eda' ca tu lu yëla béchigal tu le bulu'ínë' Dios neda'. Bilé'eda' bötaj birúaj lúzxiba tu le naca ca tu lari' guitsa' zxön, naga' idapa la'a, ate' bidxín ga na' zoa'. ⁶ Cate' ni' ruyúa' le para ilé'eda' le dxía láhuilö, bilé'egacada'-ba' böa' guixi' nacua' tapa ní'agacaba', yugu' böa' guixi' sínia', en böa' tá'ayöj lé'egacaba' lu yu, en böa' zoa xíligacaba'. ⁷ Biyönda' chí'i nu gudxi neda': “Pedro, guyasa. Bëti-ba', en gudagu.” ⁸ Ní'irö gudxa'-në': “Bití' ca', Xan. Catu caz gudahua' tu le cabí ral-la' gágutu', o tu le cabí naca dxi'a.” ⁹ Ní'irö le buropi luzuí bulidza chí'i lúzxiba na' neda', en gudxi neda': “Le nunë' Dios dxi'a, bití' innó' bití' naca dxi'a.”

¹⁰ Tsonna luzuí guca caní, ate' ní'irö idútë lë na' bilé'eda' la' buépitë lúzxiba. ¹¹ La'

ní'isö bila'dxintë' tsonnë' bönni' ra' yu'u ga na' zoa', narúajgaquië' yödzö Cesarea, nasól-lë'ë légaquië' tu bönni' lë' Cornelio. Sududíljagaquië' neda'. ¹² Dios Bö' Lá'ayi gudxë' neda': "Guyéajlen légaquië", en cabí gaca chopa ládxu'u." Lësca' izxópatë' bóchi'ru' ni gula'zá'lenë' neda' tsözxón. Guyéajtu' Cesarea, ate' guyaztu' lidxë' tu bönni' zoë' ni'. ¹³ Bönni' ni' gudíxjöi'inë' netu' ca na' bilé'enë', bidxinë' tu gubáz lá'ayi queë' Dios lu yu'u lidxë'. Guzuínë' lahuë', en gudxë' lë': "Na'a isól-la'gacu'-në' bönni' tsöjajúquië' yödzö Jope, tsöjlídzagaquië' Simón, zoa ia'tú lë' Pedro. ¹⁴ Bönni' na' usiyönnë' li' naca gaca uló' li', en ulu'lágaca ca' yúgu'të bönachi nacua' lidxu'." ¹⁵ Cate' ni' gusí lahua' ru'ílëna' légaquië' didza', bidisóalenë' Dios Bö' Lá'ayi légaquië' ca na' bidisóalenë' rë'u zí'atëlö. ¹⁶ Ní'irö yöjneda' didza' na' bë'ë Xanru', gunné': "Le nácatë Juan buquilë' bönachi nisa lu nisa, pero lib'í'ili', gaca queéli' le rulu'isö yöl-la' ridila nisa na', idisóalenë' Dios Bö' Lá'ayi lib'í'ili'." ¹⁷ Que lë ni na', channö Dios gusól-lë'ë Dios Bö' Lá'ayi quégaquië', la' tuz ca benë' queë'ru' rë'u réajlë'ëru' Xanru' Jesucristo, ¿núzxitë neda' inná bé'eda'-në' Dios?

¹⁸ Ní'irö, cate' bila'yönnë' lë ni, gula'cuá' dxíë', en gula'gu'ë Dios yöl-la' ba, ta'nnë':

—Caní naca, Dios ru'ë lataj bönni' biti' nácaagaquië' judío, tu'bí'i ládxi'gaquië' para ila'déli'në' yöl-la' na'bán idú.

Yugu' bönni' nacu'ë Antioquía ta'yéajlë'ë Cristo

¹⁹ Cate' ni' yugu' bönni' judío biti' ta'yéajlë'ë gulútië' Esteban, en gula'bía ládxi'gaquië' ia'zica'rö bönachi ta'yéajlë' Cristo, bulu'zxunnaj bönachi ni, en gulásilasi zían yödzö luyú Fenicia, en luyú Chipre, en lu yödzö Antioquía. Gulunë' libán ni' que xtídzë'ë Dios, pero lógacasö bönachi judío. ²⁰ Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzö Antioquía, gulu'ílenë' ca' didza' yugu' bönni' izá'a. Gulunë' libán lógaquië' que didza' dxí'a ca naca queë' Xanru' Jesús. ²¹ Yöl-la' huáca queë' Xanru' guzóalen légaquië', ate' bönachi zían gula'yéajlë' Xanru', en bulu'huóaca queë'.

²² Cate' bidxín didza' ca guca lë ni, ate' bila'yönnë' bönni' queë' Cristo nacu'ë Jerusalén, gula'sól-lë'ë Bernabé tséajë' Antioquía na'. ²³ Cate' Bernabé na' bidxinë' Antioquía, bilé'enë' le ruzá' ládxë'ë Dios quégaquië', en budzéjanë'. Guchízië' icja nágagaquië' para ila'día'tica'së' queë' Xanru' idú ládxi'gaquië'. ²⁴ Náquië' Bernabé na' tsahui', en idú zóalenë' Dios Bö' Lá'ayi lë', en idú ládxë'ë réajlë'ë Cristo. Ní'a que libán benë' Bernabé na', bönachi zían lu yödzö na' gula'yéajlë' Xanru'.

²⁵ Gudödi ni', guyijë' Bernabé na' yödzö Tarso, yöjdiljë' Saulo. Cate' budzólinë' lë', buchë'ë lë' Antioquía. ²⁶ Idú ca tu iz gula'cu'ë ni', tunë' tsözxón bönachi queë' Cristo, en tu'sédinë' bönachi zían. Lu yödzö Antioquía na', gusí lo gula'zí' lágagaquië' cristiano le rna len didza' xidza': Bönachi Queë' Cristo, nupa ni' ta'yéajlë' Lë'.

²⁷ Dza ni' bila'rúajë' Jerusalén, en yöjajúquië' Antioquía bal-lë' bönni' tu'ë didza' uláz queë' Dios. ²⁸ Guzuínë' Agabo, bönni' dzáguíë' yugu' bönni' na', en uláz queë' Dios Bö' Lá'ayi buzéajni'inë' légaquië', gunné':

—Sí' gaca gubín idütë yödzölió.

Guca gubín na' cate' ni' rinná bë'ë Claudio, lu yödzö Roma. ²⁹ Ní'irö gula'zí' lu ná'agaquië' bönni' ta'yéajlë'ë Cristo nacu'ë Antioquía, ila'sól-lë'ë tsca le dësö que queë'gaquië', le gácalen bóchi'ru' nacu'ë luyú Judea. ³⁰ Caní gulunë', ate' lë na' bulu'nödzjë', gula'gu'ë lu ná'agaquië' Bernabé, en Saulo para ilu'ë le lógaquië' bönni' gula'tapa chi'ë bönachi queë' Cristo nacu'ë Judea.

12

Tútië' Jacobo, en ta'gu'ë Pedro lidxi guíë

¹ Dza na' Herodes, bönni' unná bë', benë' ga gula'zönë' bal-lë' bönni' queë' Cristo para ulu'saca' zí'ë légaquië'. ² Gunná bé'enë' bönni' gulútië' Jacobo, bóchë'ë Juan. Gulu'ë lë'

guié tuchi'. ³ Cate' gúquibe'enë' Herodes gula'yaza ládxi'gaquië' bönni' judío lë ni, benë' ga gula'zönë' ca' Pedro. Gulaca lë ni dza ni' raca laní cate' tahuë' yöta xtila biti' nazí'í cúa zi que. ⁴ Gudödi gula'zönë' Pedro, gula'gu'ë lë' lidxi guié, en bulu'dödë' lë' lu ná'agaquië' tapa cö' bönni' röjáquië' gudil-la, nacu'ë tapë' tu huéaj cö' na', para uyúgaquië' lë'. Yu'u ládxi'ë Herodes ubéajë' Pedro lógaca bönachi tödi Laní Pascua, laní na' tu'subanë' ca benë' Dios, bubéajë' bönachi judío luyú Egipto. ⁵ Caní guca, nun chí'igacrë' Pedro lu yu'u lidxi guié na', pero bönachi queë' Cristo bulu'lídzatica'sö Dios, ta'nábini Dios gácalenë' Pedro.

Dios rubéajë' Pedro lidxi guié

⁶ Cate' si' idxín dza yu'u ládxi'ë Herodes ubéajë' Pedro lidxi guié na', la' dzö' ní'isö dë' rásië' Pedro, ate' nacu'ë chopë' bönni' röjáquië' gudil-la cuita lë'ë Pedro na', en núga'gaquië' lë' chopa du guié. Gula'cu'ë ia'bal-lë' bönni' röjáquië' gudil-la tapa chí'ë ga nu riyaza lidxi guié na'. ⁷ Tsárido'os buluí'í lahuë' tu gubáz lá'ayi queë' Xanru' ni', ate' buzení'da' bení' lidxi guié. Gudanë' gubáz lá'ayi na' cuita lë'ë Pedro, ate' busubanë' lë', en gudxë' lë':

—Guyaschi.

Ní'irö bulu'huédxi du guié na' naga' ni'a në'ë Pedro. ⁸ Gubáz lá'ayi na' gudxë' lë', gunné':

—Béga' lë'u, en gudá' xirachu'.

La' bentë' Pedro caní. Ní'irö gubáz lá'ayi na' gudxë' lë', rnnë':

—Guxóa lari' cúdzu'u, en gudá len neda'.

⁹ Burúajë' Pedro, sa'yéajlenë' gubáz lá'ayi na', pero biti' réquibe'enë' nácatë le runë' gubáz lá'ayi na'. Gúquinë' yélasö rinenë'. ¹⁰ Cate' chigula'dödë' ga nacu'ë bönni' zí'alö, en bönni' buropi cö', bönni' na' röjáquië' gudil-la tapa chí'ë, bila'dxinë' ga zoa le néquini guié le nusayaj ga nu riyaza lidxi guié na', ga nu rurúaj la' nöza que yödzö. Ga nu riyaza na', rácasö que guyalaj. Cate' bila'rúajë' ni', gula'zé'ë ga ridzaga ia'turö nöza, ate' ni' gubáz lá'ayi na' la' bulá'alentë' Pedro. ¹¹ Ní'irö réquibe'enë' Pedro, ate' lu icja ládxi'da'azë' gunné':

—Na'a chinözda' le nácatë gusól-lë'ë Xanru' gubáz lá'ayi queë', en busölë' neda' lu në'ë Herodes, en lu yúgu'të le gulé'ënnë' bönni' judío ilunë' quia'.

¹² Tsanni ni' yu'ë nöza Pedro, rizá' ládxi'ë ca naca lë na' guca, ate' bidxinë' lídxinu María, xiná'abi' Juan, bi'í na' zoa ia'tú labi' Marcos. Lu yu'u na' nudúbigaca bönachi zían ta'yéajlë' Cristo, en tu'lidza Dios. ¹³ Cate' bulidzë' Pedro ra' yu'u lö'a, birúajbi' bi'í nigula lëbi' Rode para inózibi' nuzxi na'. ¹⁴ Cate' búbënë'ëbi' bi'í nigula ni chí'ë Pedro, lu yöl-la' rudzeja queébi' biti' gusaljbi' yu'u, pero carelö bóajbi' lu yu'u, yöjtíxjöi'ibi' nupa nacuá' ni', rnnabi':

—Zoë' Pedro ra' yu'u.

¹⁵ Ní'irö gulé' lëbi':

—Nachixi icju'.

Lëbi' tsútsurö ben xtídza'bi' naca caní. Ní'irö gula'nnë':

—Calëga lë'. Bixín queë' na'.

¹⁶ Tsanni na' biti' zoa dxíë' Pedro rulidzë' nupa nacuá' lu yu'u. Cate' gula'saljë' yu'u, gula'nítisinë' cate' bila'lé'enë' lë'. ¹⁷ Ní'irö guchisa në'ë Pedro para ila'cu'ë dxisö, ate' busiyönnë' légaquië' ca benë' Xanru', bubéajë' lë' lidxi guié. Ní'irö gudxë' légaquië':

—Guli'siyönnë' ca' Jacobo, en yugu' bóchi'ru' ca na' guca.

Ní'irö burúajë' Pedro, sa'yéajë' ga yúbölö.

¹⁸ Cate' za' rení' dza na', bönni' röjáquië' gudil-la gula'bö'ë böniga nacxi guca, bíti'rö yu'ë Pedro lidxi guié. ¹⁹ Ní'irö gusól-lë'ë Herodes nupa tsöjxi'gaca Pedro. Cate' biti' bulu'dzölinë' lë', Herodes gunabi yúdxinë' yugu' bönni' na' röjáquië' gudil-la, bönni'

gulún chi'ë Pedro. Gudödi ni' gunná bé'ené' nupa bétigaca yugu' bönni' na' röjáquié' gudil-la. Ní'irö buzé'ë Herodes luyú Judea, sa'yéajé' Cesarea, ate' bugá'ané' ni'.

Ca gútié' Herodes

²⁰ Dza ní'isö rilené' Herodes bönachi yödzö Tiro, en yödzö Sidón. Zí'alö bönachi lu xiyúé' Herodes na' gula'sól-la' le biyadzaj quégaca bönachi lu xiyúgaca yödzö Tiro, en Sidón na', pero tu' rilené' Herodes légaquié', bíti'rö bi ta'sól-lé'ë quégaquié'. Ní'irö guluné' tuz bönni' Tiro, en Sidón na', ate' guluné' ga soé' Blasto uné' quégaquié' lahué' Herodes na'. Náquié' Blasto na' huen dxin nadéli'né' lataj lo lahué' Herodes. Gul'é'enné' bönni' Tiro, en Sidón na' ila'dxiné' lahué' Herodes, para ila'nábiné' lé' ugá'ana tsahui' didza' bizxaj quégaquié'. ²¹ Ní'irö budxié' bé' Herodes dza yönné' légaquié', ate' dza na' guró'ë xilatjé' ga ruchi'a rusöróé' bi raca, nácué' lari' nazaca', en bené' libán lógaquié'. ²² Ní'irö bulu'lidzé' zidzaj bönni' na', ta'nné':

—¡Calëga bönni'sö ni! ¡Dios caz ni ru'ë didza'!

²³ La' ná'asö la' bë'té' gubáz lá'ayi queé' Xanru' lé' tu' buzi'ë lé' cazé' yöl-la' ba ral-la' gaca queé' Dios. Ní'irö guró'ë Herodes na' buzuga', ate' gútié' tu' táguba' lé'.

²⁴ Ní'irö guca libán que xtídzé'ë Xanru', ate' gula'yán nupa nazí' lu ná'agaca le.

Le zí'alö luzuí röjéngaquié' Bernabé, en Saulo libán

²⁵ Cate' Bernabé, en Saulo chibulu'dödé' dumí na' lu ná'agaquié' bönni' gula tapa chi'ë bönachi queé' Cristo nacué' Jerusalén, bulu'zé'ë ni', yöjhuójgaquié' yödzö Antioquia. Gula'ché'ë-bi' ca' bi'i Juan, zoa ia'tú labi' Marcos.

13

¹ Dza ná'asö gula'cu'ë bönni' tu'ë didza' uláz queé' Dios, en bönni' tu'sédiné' bönachi lu yödzö Antioquia, tuné' tu' zxön bönachi queé' Cristo lu yödzö na'. Caní légaquié':

Bernabé,

Simón, (lé' ca' Bönni' Gasja),

Lucio, (bönni' Cirene),

Saulo,

Manaén, (bönni' na' guzxónlené' tsözxón Herodes, bönni' rinná bë'ë luyú Galilea).

² Tsanni ni' nudúbigaquié' bönni' ni queé' Xanru', en tuné' gubasa, Dios Bö' Lá'ayi gudxé' légaquié', rnné':

—Guli'béaj-gáquié' quez quia' Bernabé, en Saulo para tsöjéngaquié' dxin na' bulidza' légaquié' iluné'.

³ Budxi guluné' gubasa, en gulu'ilené' Dios didza', ní'irö gula'xóa ná'agaquié' chopé' ni, en gula'sól-lé'ë légaquié'.

Yugu' gubáz nasól-lé'ë Cristo tuné' libán luyú Chipre

⁴ Ní'irö yöjgaquié' Bernabé, en Saulo yödzö Seleucia, tu' gusól-lé'ë Dios Bö' Lá'ayi légaquié' ni', ate' ni' gula'bené' tu' lé'e barco le guché' légaquié' ga naca tu luyú bidxi lu nísado', nazí'i le Chipre. ⁵ Cate' bila'dxiné' lu yödzö Salamina luyú na', gulu'ë xtídzé'ë Dios gapa naca lu yu'u ga tu'dubé' bönni' judío luyú na', en tu'sedé' queé' Dios. Naché'gaquié'-bi' bi'i Juan para gunbi' légaquié' tu' zxön. ⁶ Budxi gula'dödé' idú gapa dë yödzödo' luyú bidxi na' lu nisa zxön, ní'irö bila'dxiné' yödzö Pafos. Yöjxáca'gaquié' Barjesús, tu' bönni' judío ni'. Náquié' bönni' udzá' rinné' yé'ë, en rnné' ru'ë didza' uláz queé' Dios. ⁷ Bönni' ni dzáguié' Sergio Paulo, bönni' réajni'i rinná bë'ë. Bönni' unná bë' na' bulidzé' Bernabé, en Saulo, tu' ré'ëné' yönné' xtídzé'ë Dios. ⁸ Ní'irö bönni' udzá' na' gudá'baguié' Bernabé, en Saulo, tu' gú'unné' guné' ga biti' tséajlé'ë Dios bönni' rinná bë'ë. Bönni' udzá' na' lé' ca' Elimas tsca naca xtídzé'gaca bönachi izá'a ga na'. ⁹ Ní'irö Saulo,

lë' ca' Pablo, buzóa tsutsu lahuë', zóalenë' Dios Bö' Lá'ayi lë'. Ruyúé' Elimas na' ¹⁰ en rë' lë':

—Li', bönni' rizi' yë', en bönni' huiá' dö', nacu' ca xzí'ini caz tu' xihui', en bönni' biti' rilé'enë' dxi'a yúgu'të le naca tsahui'. ¿Naru' cabí soa dxitso' ca runu', ridá'bagu'u didza' tsahui' queë' Xanru', en ruzágu'u xinöza nu ré'ëni tséajlë' Lë'? ¹¹ Na'a, Xanru' usaca' zi'ë li', ate' ichul-la lo', en biti' ilé'enu' gubidza nababa dza.

La' guchúl-latë lahuë' Elimas na', ate' gudé' nilö ná'alö, riguiljé' nuzxi sön në'ë para iché' lë'. ¹² Cate' bilé'enë' bönni' unná bë' na' lë na' guca, bubáninë' ca naca xtídzë'ë Xanru', ate' guyéajlë'ë Cristo.

Le gulunë' Pablo, en Bernabé lu yödzö Antioquía luyú Pisidia

¹³ Ní'irö buzé'ë Pablo lu yödzö Pafos na' len yugu' bönni' dzágagaquië' lë', nacu'ë tu lë'e barco, ate' bila'dxinë' yödzö Perge luyú Panfilia. Lu yödzö na' bi'i Juan bulá'aleni' légaquië', en bóajbi' Jerusalén. ¹⁴ Gudödi ni' bulu'zé'ë Perge na', en yöjáquië' yödzö Antioquía luyú Pisidia. Lu yödzö na', cate' ni' naca dza lá'ayi quégaquië' bönni' judío, gula'yázië' lu yu'u ga tu'dubë' tu'sedë' queë' Dios, ate' lu yu'u na' gula'bö'ë. ¹⁵ Ní'irö tu bönni' zoë' ni' bulabë' guichi ga nazúaj xibá queë' Dios, enca' le nazúaj lu guichi ca gula'nnë' bönni' gulu'ë didza' uláz queë' Dios. Gudödi ni' yugu' bönni' unná bë' que yu'u na' gula'sól-lë'ë nu yöjódx Saulo, en Bernabé, gunné':

—Libi'ili', bóchi'tu'. Channö nuá'ali' bi innali' le uzéajni'i netu', guli'nnë'.

¹⁶ Ní'irö guzuínë' Pablo, en guchisa në'ë para ila'cu'ë dxisö, gunné':

—Buli'zé' nágali' le guía' libí'ili', bönni' Israel, en libí'ili', núlöli' rádxili'-në' Dios. ¹⁷ Xanru' Dios, Nu ta'yéaj ládxi'gaca bönachi Israel, guró cazë' xuz xtó'oru', en benë' ga gula'yándë'ë cate' ni' nácagaquië' bönni' zi'tu' luyú Egipto. Len yöl-la' huáca zxön queë' bubéajë' légaquië' luyú ni'. ¹⁸ Idú choá' iz Dios biá' gulénë' quégaquië' cate' ni' gula'dé' idú luyú bidxi lu lataj cá'asö. ¹⁹ Cate' budxi busunítië' gadxi cö' yödzö gula'cuá' luyú Canaán, bunödzejë' xiyúgaca bönachi ni' quégaquië' xuz xtó'oru'. ²⁰ Gudödi ni', le guca idú ca tapa gayuá' yu' chi-un iz, Dios bucu'ë yugu' bönni' bulu'chi'a bulu'söröë' légaquië' ga bidxintë zoë' Samuel, bönni' bë'ë didza' uláz queë' Dios. ²¹ Ní'irö gula'nábinë' Dios uzöë' tu bönni' unná bë' quégaquië'. Dios guröë' Saúl, xzí'inë' Cis, bönni' nababë' di'a dza queë' Benjamín. Idú ca choá' iz gunná bé'enë' Saúl na' légaquië'. ²² Gudödi ni' Dios gudúé' Saúl na', ate' buzóë' David quégaquië' para inná bë'ë. Dios benë' ba nalí queë' David ni, gunné': “Nözda' runë' David, xzí'inë' Isaí, le raza ládxa'a, en gunë' yúgu'të le ré'ënda' neda'.” ²³ Ladaj xzí'ini xi'sóë' David na' benë' Dios ga guljé' Jesús para gáquië' bönni' usölë' bönachi Israel, ca na' guzxi' lu në'ë Dios zí'atëlö gunë'. ²⁴ Zí'alö cate' si' ilá' lahuë' Jesús, benë' Juan libán lógaca yúgu'të bönachi Israel para ulu'bí'i ládxi'gaca, en ila'dila nisa. ²⁵ Cate' ni' chizóa údxi gunë' libán Juan na', gunné': “¿Nuzxi réquili' naca neda'? Biti' naca' Cristo, bönni' na' ral-la' guidë'. ¡Na'a, buli'yútsöca! Chizóë' idxinë' bönni' na' ga zoa' ni, ate' neda' biti' naca' lesaca' ilecja' xiráchuë' nudé'ë.”

²⁶ Libí'ili', bócha'a, yugu' xzí'ini xi'sóë' Abraham, en núlöli' zóali' ni, en rádxili'-në' Dios. Dios caz gusól-lë'ë queé'li' didza' ni para uláli'. ²⁷ Nupa nacuá' Jerusalén, en bönni' ta'nná bé'enë' légaquië' biti' bulu'únbë'ë Jesús, en biti' gula'yéajni'inë' le nazúaj lu guichi le gula'nnë' yugu' bönni' gulu'ë didza' uláz queë' Dios, sal-la' tu'laba cazë' yugu' didza' ni yugu' dza lá'ayi. Lu yöl-la' cabí réajni'i quégaquië' gulunë' ga budxín ca rnna didza' ni cate' ni' gula'chúguië' queë' Jesús gátië'. ²⁸ Sal-la' biti' budzöli le nabáguë'ë Jesús gátië', gula'nábinë' Pilato inná bé'enë' bönni' ilútië' Lë'. ²⁹ Cate' budxi gulunë' queë' yúgu'të le nazúaj lu guichi ca ral-la' gaca queë', bulu'zötjé' Lë' lë'e yaga cruz, en bulu'cáché'ë Lë' yeru ba. ³⁰ ¡Ní'irö Dios busubanë' Lë' lu yöl-la' guti! ³¹ Zían dza buluf'i lahuë' Jesús lógaca

nupa yójácálen Lë' tsözxón cate' ni' buzë'ë luyú Galilea, en bidxinë' Jerusalén. Na'a, yugu' bönni' na' tunë' ba nalí queë' lógaca bönachi.

³² Caní naca, lësca' netu' ni rusiyöntu' libí'ili' didza' dxi'a ca naca lë na' guzxí' lu në'ë Dios gunë' quégaquië' xuz xtó'oru'. ³³ Lë na' guzxí' lu në'ë Dios quégaquië', Lë cazë' benë' ga budxín queéru', nácaru' xzí'ini xi'sóagaquië'. Caní benë' cate' busubanë' Jesús. Guca ca na' nazúaj lu guichi ga zoa salmo buropi, le rnna caní: "Li' nacu' Xzí'ina'. Neda' buzóa caza' Li'." ³⁴ Ca naca na', Dios busubanë' Lë' lu yöl-la' guti para cabí initi le naca cazë', Lë cazë' Dios gunné' caní: "Gunna' quiu' le nácagaca bica' ba guzxí' lu na'a lahuë' David." ³⁵ Que lë ni na' nazúaj ca' lu guichi, ga zoa ia'tú salmo, le rnna caní: "Biti' gu'u lataj ugá'anë' bönni' lá'ayi quiu' ga initi le naca cazë'." ³⁶ Le guca queë' David naca bë'. Gudödi benë' dxin lógaca bönachi uládz queë', ca na' gunná bé'enë' Dios lë', ní'irö gútië', ate' gula'gu'ë lë' yeru ba ga nacu'ë xuz xtá'ahuë', ate' guniti le naca cazë'. ³⁷ Na'a, ca naca queë' Jesús na', Dios busubanë' Lë', ate' bití' guniti le naca cazë' lu yeru ba. ³⁸ Libí'ili', bócha'a, ral-la' inózili' lë ni rusiyöntu' libí'ili'. Dios runiti lahuë' libí'ili' ca naca dul-la' nabága'li' ní'a que le benë' Jesús ni. ³⁹ Na'a, Dios ruúnë' tsahui' yúgu'të nupa ta'yéajlë' Jesús, rugúë' yugu' dul-la' na' le cabí guca ugúa xibá queë' Dios, le bë'ë Moisés. ⁴⁰ Guli'gún chi'i cuinli' na'a para cabí gaca queéli' le nazúaj lu guichi le gula'nnë' bönni' gulu'ë didza' uláz queë' Dios, le rnna caní:

⁴¹ Buli'yútsöca', libí'ili', bönni' cabí tunë' neda' bal.

Ubánili', pero lu yöl-la' cabí réajlë' queéli' gátili'.

Neda' guna' tu dxin dza ni zóali',

en sal-la' nu uluí'i libí'ili' le rulu'i dxin na', bití' ca' tséajlë'ëli'.

⁴² Cate' bulu'rúajë' Pablo, en yugu' bönni' na' dzágagaquië' lë' lu yu'u ga na' tu'dubë' bönni' judío, en tu'sedë' queë' Dios, ní'irö bönachi ni' guláta'yu lógaquië' ulu'sédinë' légaquië' ca naca lë ni cate' idxín ia'tú dza lá'ayi quégaquië'. ⁴³ Cate' ni' bulu'rúajë' lu yu'u na' bönni' nudúbigaquië' ni', zían bönni' judío, en bönni' nuhuöácagaquië' judío, yugu' bönni' ta'yéaj ládxi'gaquië' Dios, gulunë' tsözxón Pablo, en Bernabé. Chopë' ni gulu'ilenë' légaquië' didza', en bulu'sé'ë ládxi'gaquië' para ilácatíca'së' tsutsu, ilunë' löza le ruzá' ládxi'ë Dios quégaquië'.

⁴⁴ Ia'xunu' gubidza ca' cate' bidxín ia'tú dza lá'ayi quégaquië', bulu'dubë' látu'biquí' yúgutë bönachi lu yödzo na' para ila'yönnë' xtídzë'ë Dios. ⁴⁵ Ní'irö bulu'zxé'enë' bönni' judío bití' ta'yéajlë'ë, cate' bila'lé'enë' bönachi zían na', ate' gula'nnë' que didza' ru'ë Pablo, en gula'dá'báguë'ë le. ⁴⁶ Ní'irö lu yöl-la' rugu ladxí' quégaquië' Pablo, en Bernabé, gulé' yugu' bönni' judío na', ta'nnë':

—Ben bayudxi usiyöntu' libí'ili' zí'alö xtídzë'ë Dios, pero tu' rucá'anali' cá'asö didza' ni, en rusáca'li' queéli' bití' nácali' lesaca' sí'ili' yöl-la' na'bán idú ni, que lë ni na', na'a uyéajtu' ga nacuá' bönachi izá'a. ⁴⁷ Lësca' caní gunná bé'enë' Xanru' Dios netu' guntu' libán queë' Cristo lógaca bönachi izá'a, en naca ca rnna didza' na' bë'ë Dios ca naca queë' Cristo, gunné':

Nuzóa' Li' para gacu' bení' quégaca bönachi izá'a,

en gacu' Nu usölá bönachi idútë yödzölió.

⁴⁸ Cate' bila'yöni bönachi izá'a nacuá' ni' didza' ni, bulu'dzéjanë', en gula'gu'ë Xanru' yöl-la' ba ní'a que xtídzë'ë, yúgu'të nupa ni' chinunë' Dios quéguequi gata' quéguequi yöl-la' na'bán idú. ⁴⁹ Caní guca, guzé xtídzë'ë Xanru', ate' bila'yöni bönachi yúgu'të yödzö nacuá' luyú ni'. ⁵⁰ Ní'irö bönni' judío bití' ta'yéajlë'ë na' gula'gú'u yöl-lë'ë yugu' bönni' lo que yödzö ni' para cabí ila'lé'enë' dxi'a Pablo, en Bernabé. Lësca' caní gula'gú'u yöl-lë'ë nigula lo ta'yéaj ládxi'nu Dios. Caní guca, gulunë' ga gula'bía ládxi'gaquië' Pablo, en Bernabé, ate' bulu'láguë' chopë' ni ní'lö lu xiyúgaquië'. ⁵¹ Ní'irö Pablo, en Bernabé bulu'quínajë' yu bëchtö da' la' lábagaquië' le rulu'i nagá'ana xíguia' nabága'gaca

bönachi lu yödzö na', ate' yöjáquië' lu yödzö Iconio. ⁵² Bulu'dzéjanë' bönni' yödzö Antioquía na', bönni' ta'yéajlë'ë Xanru', ate' guzóalenë' Dios Bö' Lá'ayi légaquië'.

14

Le gulunë' Pablo, en Bernabé lu yödzö Iconio

¹ Cate' bila'dxinë' Pablo, en Bernabé yödzö Iconio, gula'yu'ë tsözxón lu yu'u ga tu'dubë' bönni' judío, en tu'sëdë' queë' Dios, ate' gulu'ë didza' ni'. Caní guca, zían bönachi judío, enca' zían bönachi izá'a gula'yéajlë' Cristo. ² Ní'irö bönni' judío biti' ta'yéajlë'ë gula'gú'u yól-lë'ë bal-lë' bönni' izá'a, para cabí ila'lé'enë' dxi'a bóchi'ru' ta'yéajlë'ë Cristo. ³ Tu' gula'yéajlë' bönachi zían na' Cristo, gula'cu'ë Pablo, en Bernabé ni' zían dza, ate' lu yöl-la' rugu ladxí' gulu'ë xtídzë'ë Dios, tu' tu'zxöni ladxí'gaquië' Xanru'. Lë cazë' Xanru' bulu'e naca idútë li didza' tu'ë ca naca le ruzá' ladxë'ë Dios quégaca bönachi, tu' bë'ë légaquië' lataj gulunë' yugu' le taca bë', en le tun ga tu'bani bönachi. ⁴ Ní'irö bönachi lu yödzö na' bila'ruáj choplö. Bal-lë' gula'dé'ë bönni' judío biti' ta'yéajlë'ë, ate' ia'bal-lë' gula'dé'ë Bernabé, en Pablo, gubáz na' nasól-lë'ë Cristo. ⁵ Ní'irö bönni' judío biti' ta'yéajlë'ë na', en yugu' bönni' izá'a ni' gulunë' tuz bönni' ta'nná bé'enë' légaquië', ate' bulu'dubë' para ilu'ë dö' quégaquië' gubáz na' nasól-lë'ë Cristo, en ulu'ladxë' légaquië' guió'j. ⁶ Cate' téquibe'enë' Pablo, en Bernabé lë ni, bulu'zxúnnajë' ni', yöjáquië' yödzö Lистра, en Derbe luyú Licaonia, ate' gula'dödë' yúgu'të yódzödo' idú gásibi'ilö ni', ⁷ gapa ni' gulunë' libán que didza' dxi'a ca naca queë' Cristo.

Tu'ladxë' Pablo guió'j lu yödzö Lистра

⁸ Zoë' tu bönni' lu yödzö Lистра biti' raca së'ë. Ró'ösë' ni' tu' cabí rizé'ë cate' ni' guljë', en catu caz guzë'e ni'ë. ⁹ Bönni' ni ruzé' náguië' didza' ru'ë Pablo. Pablo buyúë' lë', en gúquibe'enë' réajlë'ë Cristo para huóáquië'. ¹⁰ Ní'irö Pablo bë'ë zidzaj didza', en rë' lë':

—Guzuí.

La' guxítitë' bönni' na', en guzë'e ni'ë. ¹¹ Cate' yugu' bönni' Lистра bila'lé'enë' lë na' benë' Pablo, gula'sí lógaquië' tu'ë zidzaj didza' lu didza' tu'ë bönni' Licaonia na', ta'nnë':

—¡Yugu' dios bönni' ni! ¡Nuhuó'tjagaquië' ga zóaru', en tu'lu'i cúngaquië' ca nácagaquië' bönni'!

¹² Gula'nnë' Bernabé na' náquië' Júpiter, ca lë' dios lo quégaquië', ate' gula'nnë' náquië' Pablo Mercurio, ia'tú dios quégaquië'. Caní gula'nnë' tu' ru'ë didza' Pablo ca na' ta'nnë' runë' Mercurio na'. ¹³ Zoa yudo' que Júpiter ga ni' nacué', cuita nöza ga ni' ta'yaza bönachi lu yödzö na'. La' bidxintë' bixúz que Júpiter na', naché'ë-ba' yugu' bëdxi, en nu'ë ca' yugu' breguí' yöj, ate' dzágagaca bönachi zían lë'. Gulé'ënnë' ilútië'-ba' bëdxi na' lógaquië' Pablo, en Bernabé para ila'yéaj ladxí'gaquië' légaquië' ca tunë' quégaca dios quégaquië'. ¹⁴ Cate' Bernabé, en Pablo, gubáz na' nasól-lë'ë Cristo, gulé'quibe'enë' lë ni, gula'chözë' lari' nácugaquië'. Tu'hu'íinë' tu' tunë' bönni' ni le cabí ral-la' ilunë', ate' gula'xítitë', en yöjcu'ë gatsaj láhui'lö bönachi zían na', en gulu'ë zidzaj didza', të' légaquië':

¹⁵ —¡Libí'ili' bönachi! ¿Bizx que runli' caní? Lësca' bönni' ca libí'ili' nácatu', en rigu'xjöi'itu' libí'ili' lë ni caz ral-la' ucá'anali', le cabí nácate', para guéquili' queë' Dios ban. Dios ni benë' lúzxiba, en yödzölió, en nísado', en yúgu'të le nacué' tu tu lataj na'.

¹⁶ Yugu' iz chigula'dödi, gulún yúgu'të bönachi ca rnasö que queëguequi, ate' Dios biti' buzáguë'ë xinó'zguequi, ¹⁷ pero benë' ga gulaca le tun ba nalí queë', yugu' le nácagaca dxi'a benë' quégaquië'. Risól-lë'ë queéru' nisa guió'j, en runë' ga ta'yán le rázaru'. Ruzölaj rudzé'enë' rë'u, en runë' ga rudzeja ladxí'ru'.

¹⁸ Sal-la' Bernabé, en Pablo gulé' légaquië' caní, cánnisö bila'déli'në' bulu'záguë'ë xinó'zguequi bönachi zían na', para cabí ilútië'-ba' bëdxi na' lógaquië'.

¹⁹ Ní'irö bal-lë' bönni' judío biti' ta'yéajlë'ë, narúajgaquië' Antioquía, en Iconio, bila'dxinë' ni', ate' gula'gú'u yól-lë'ë bönachi zían na'. Ní'irö yúgu'të' bulu'ladxë' Pablo guiój, en gulá'ayöjë' lë' ní'ilö ra' yödzö na', tu' téquinë' chinátie'. ²⁰ Ní'irö bulu'dubë' yugu' bönni' ta'yéajlë'ë Cristo idú gásibi'ilö ga dë' Pablo. Guyasë' lë', en buázië' lu yödzö na'. Cate' za' rení' ia'tú dza, burúajlenë' Bernabé, yójáquië' yödzö Derbe.

²¹ Lu yödzö ni' gulunë' libán que didza' dxi'a ca naca queë' Jesucristo, ate' bönachi zían ni' gula'yéajlë' Cristo. Gudödi ni' yójhuójgaquië' Listra, en Iconio, en Antioquía. ²² Cate' gula'dödë' Bernabé, en Pablo yugu' yödzö na', bulu'tipë' ládxi'gaquië' bönni' ni' ta'yéajlë'ë Cristo, en bulu'sé'ë ládxi'gaquië' ulu'gá'anë' tsutsu ca na' ta'yéajlë'ë Lë'. Gulé' légaquië':

—Rë'u tsaza cázaru' ga rinná bë'ë Dios, run bayudxi quí'i sáca'ru' zían le gaca queëru'.

²³ Bulu'cu'ë yugu' bönni' gula'ilún chi'ë bönachi queë' Cristo tu cö' huéaj bönachi ni' queë' Cristo. Cate' chigulufílenë' Dios didza', en gulunë' gubasa, ní'irö gula'gu'ë légaquië' lu në'ë Xanru', Nu na' ta'yéajlë'ë.

Pablo, en Bernabé tu'dxinë' Antioquía luyú Siria

²⁴ Ní'irö Pablo, en Bernabé gula'dödë' luyú Pisidia, ate' bila'dxinë' luyú Panfilia.

²⁵ Budxi gulunë' libán que xtídzë'ë Cristo lu yödzö Perge, yójáquië' yödzö Atalia.

²⁶ Bulu'zé'ë ni', ate' gula'benë' tu lë'e barco, en bulu'dxinë' yödzö Antioquía, ga na' nacu'ë bönni' queë' Cristo, bönni' na' gula'sól-lë'ë légaquië' tsöjéngaquië' libán, cate' ni' gula'gu'ë légaquië' lu në'ë Dios, Nu na' ruzá' ladxí' quégaquië' ilunë' xichinë', dxin na' chibudxi gulunë'. ²⁷ Cate' ni' bulu'dxinë' Antioquía, bulu'dubi bönachi queë' Cristo nacuá' ni'. Ní'irö Pablo, en Bernabé bulu'siyönnë' légaquië' ca nácagaca le zön benë' Dios lu ná'agaquië', enca' ca benë' Dios, bë'ë yugu' bönachi izá'a lataj ta'yéajlë' ca' Lë'.

²⁸ Pablo, en Bernabé bulu'gá'analënë' bönachi ni' ta'yéajlë' Cristo zían dza.

15

Tu'dubë' huen dxin queë' Cristo lu yödzö Jerusalén

¹ Ní'irö bal-lë' bönni' narúajgaquië' luyú Judea bila'dxinë' yödzö Antioquía, ate' bulu'sédinë' bóchi'ru', bönni' izá'a ni', ta'nné':

—Channö cabí irugu lu xipéla'li' ca nalébitu' runtu' ca na' gunná bë'ë Moisés, biti' gaca uláli'.

² Ní'irö Pablo, en Bernabé gula'díl-lalenë' légaquië' didza', ate' gúcada' dzatsa. Gudödi ni', gula'bóë' Pablo, en Bernabé len ia'bal-lë' bönni' bóchi'ru' ni', para tsöjáquië' Jerusalén, en ila'dxinë' lógaquië' gubáz ni' queë' Cristo, enca' lógaquië' bönni' gula'tapa chi'ë bönachi queë' Cristo ni', para ilufílenë' légaquië' didza' ca naca lë ni raca, tu'sédinë' bönni' na' bönachi le nachixi.

³ Ní'irö yugu' bönni' queë' Cristo nacu'ë Antioquía bulu'gu'ë légaquië' nöza, ate' gula'dödë' lu xiyú yödzö Fenicia, en luyú Samaria, ate' bulu'siyönnë' bóchi' luzá'aru' yugu' lataj ni' ca guca, bulu'huóáquië' bönni' izá'a queë' Cristo. Lë ni ben ga bulu'dzéjanë' yúgu'të bóchi' luzá'aru' ni'.

⁴ Cate' bila'dxinë' Pablo, en Bernabé lu yödzö Jerusalén, yugu' bönni' queë' Cristo nacu'ë ni', enca' yugu' gubáz nasól-lë'ë Lë', en yugu' bönni' gula'tapa chi'ë gulunë' légaquië' bal. Pablo, en Bernabé bulu'siyönnë' légaquië' yúgu'të le benë' Dios lu ná'agaquië'. ⁵ Ní'irö gula'zuínë' bal-lë' bönni' yudo' fariseo, bönni' ta'yéajlë'ë Cristo, en ta'nné':

—Run bayudxi irugu lu xipéla'gaquië' bönni' izá'a na' ta'yéajlë'ë Cristo, en inná bé'eru' légaquië' ilunë' ca rna bë' xibá queë' Moisés.

⁶ Ní'irö bulu'dubë' gubáz nasól-lë'ë Cristo len bönni' gula'tapa chi'ë bönachi queë', para ulu'chi'a ulu'söróë' lë ni raca. ⁷ Gudödi gulu'ë zían didza', guzuínë' Pedro, en gudxë' légaquië':

—Libí'ili', bócha'a. Nöz quézili' ca guca dza ni'te, Dios guró cazé' neda' para guna' libán lógaca bönachi izá'a para ila'yöni didza' dxi'a, en ila'yéajlé' Cristo. ⁸ Dios, Nu nunbë' caz le yu'u icja ládxi'do'gaca bönachi, buzóe' le naca bë' runë' légaquië' bal, gusól-lë'ë Dios Bö' Lá'ayi quégaquië', ca na' gusól-lë'ë Lë' queéru'. ⁹ Biti' butsé'ë ca benë' quégaquië', en queéru', en lësca' bunë' dxi'a icja ládxi'do'gaquië' tu' ta'yéajlé'ë Cristo. ¹⁰ Na'a, ¿bizx que run leli'-në' Dios, rusubága'li' yua' xiyéngaca böchi' luzá'aru'? Yua' ni, le naca le ta'nná bë' xibá queë' Moisés, bití' guca guá'aru' rë'u, en bití' guca ilu'ë xuz xtó'oru' le. ¹¹ Rë'u ni, réajlé'ëru' nuláru' ni'a que le buzá' ládxi'ë Xanru' Jesús queéru', en ca na' nuláru' rë'u, ulu'lé' ca' légaquië'.

¹² Cate' budxi bë'ë Pedro didza' ni, yúgu'të' gula'cu'ë dxisö, ate' bulu'zé nágagaquië' didza' gulu'ë Bernabé, en Pablo. Bulu'siyönnë' légaquië' yugu' le taca bë', en le tun ga tu'bani bönachi, yugu' le benë' Dios lu ná'agaquië' ga nacuá' bönachi izá'a. ¹³ Cate' Bernabé, en Pablo budxi gulu'ë didza' ni, bubí'ë didza' Jacobo, gunné':

—Libí'ili', bócha'a. Buli'zé nágali' le guía' libí'ili'. ¹⁴ Simón Pedro chigudíxjöi' i quézinë' rë'u ca benë' Dios, bulu'e lahui yöl-la' huáca queë' le zí'alö luzuí lógaca yugu' bönachi izá'a para bubéajë' quez queë' bönachi nútsa'gaca ládjagaquië'. ¹⁵ Ca naca lë ni röjllözgaca xtídza'gaquië' bönni' gulu'ë didza' uláz queë' Dios, ca na' nazúaj lu guichi lá'ayi, rnna:

¹⁶ Dza tödi lë ni huöda', en uchisa' Nu inná bë', bönni' na' tsázië' xilatjë' David.

Guna' ca run nu ruchisa tu yu'u naguinnaj.

Uchisa' ca' bönachi ila'cuá' lidxë', nupa nagá'anagaca.

Guna' ca run nu ruchisa tu zö'ö yexu'.

Caní uchisa' le gunná bë'ë David

¹⁷ para ulu'guilaj ia'zica'rö bönachi Xanru'.

Ulu'guilaj bönachi izá'a Lë',

ate' si' láguequi: Bönachi Queë' Dios.

¹⁸ Caní rnnë' Xanru',

Nu na' dza ni'te ben ga naca bë' yúgu'të lë ni.

¹⁹ 'Que lë ni na' runi neda' bití' ral-la' gun níguiru' bönachi izá'a, nupa tu'huóaca queë' Dios. ²⁰ Ral-la' uzúajru' lu guichi quégaquië' ulu'cá'anë' yugu' le bití' ral-la' ilahuë', le nadödi lógaca budó' guió'j budó' yaga, en cabí ilunë' le ruá' dö', en cabí ilahuë' xipéla'gacaba' böa' guixi' bití' narúaj-gacaba' rön, en cabí ilahuë' xichönba' bíti'tës böa' guixi'. ²¹ Dza ni'te nacuá' yúgu'të yödzo nupa tun libán lu yu'u gapa tu'dubë' bönni' judío, en tu'sédë' queë' Dios. Tunë' libán ni' que le buzúajë' lu guichi Moisés. Tu'laba cazé' le yugu' dza lá'ayi.

²² Ní'irö gula'yaza ládxi'gaquië' gubáz nasól-lë'ë Cristo, en bönni' gula tapa chi'ë, en yúgu'të bönachi queë' Cristo, ila'böë' bal-lë' bönni' ládjagaquië', en ila'sól-lë'ë légaquië' Antioquía. Tsöjácalenë' Pablo, en Bernabé. Chopë' na' gula'böë', légaquië' Judas, zoa ia'tú lë' Barsabás, enca' Silas. Nácagaquië' bönni' lo ládjagaquië' böchi'ru' ni'. ²³ Bulu'zúajë' lu guichi le bulu'dödë' lu ná'agaquië' ilu'ë, le rnna caní:

“Netu', gubáz nasól-lë'ë Cristo, en bönni' gula tun chi'ë, en yugu' böchi'ru', rugápatu' libí'ili' Dios, böchi'tu', nácali' bönachi izá'a zóali' Antioquía, en yugu' yödzo luyú Siria, en Cilicia. ²⁴ Biyónitu' ca tun bal-la bönachi bila'rúaj ga zóatu', nupa na' bití' nasól-la'tu'. Dutsá'agaquië' libí'ili' len le ta'nné', en tu'bequi böniga icja ládxi'do'oli', tu' ta'nná bë'ë irugu lu xipéla'li', en gunli' ca rinná bë' xibá queë' Moisés. ²⁵ Que lë ni na' guyaza ládxi'tu' cate' chibén tuz xtídza'tu', gurötu' chopë' bönni', nupa isól-la'tu' para uduyúgaquië' libí'ili'. Guídlengaquië' Bernabé, en Pablo, nupa na' nadxí'iru'. ²⁶ Chiyöjáquië' Bernabé, en Pablo gapa guzóa bönadxi ilátië' tu' nadxí'iguequinë' Xanru' Jesucristo. ²⁷ Caní naca, risól-la'tu' Judas, en Silas ga zóali'. Chopë' ni ulu'siyönnë' libí'ili' lë ni ruzúajtu' lu guichi

ni. ²⁸ Dios Bö' Lá'ayi buluf'inë' netu' le raza lãdxë'ë, en lësca' caní raza lãdxi'tu' netu', bití' usubága'rötu' libí'ili' yua', le naca le rinná' bë' xibá' queë' Moisés, pero yugu' lë nisö run bayudxi gunli':

²⁹ Bití' gáguli' le nadödi lógaca budó' guió'j budó' yaga.

Bití' gáguli' rön.

Bití' gáguli' xipéla'gacaba' böa' guixi' bití' narúaj-gácaba' rön.

Bití' gunli' le ruá' dö'.

Channö gun chí'i cuinli' para gunli' ca rna yugu' lë ni, gunli' dxi'a."

³⁰ Caní guca, yugu' bönni' na' nasól-la'gaquië' bila'dxinë' Antioquía. Bulu'tubë' bönachi queë' Cristo nacua' ni', ate' gula'gu'ë guichi na' lu ná'agaquië'. ³¹ Cate' chibudxi bulu'labë' le, bulu'dzéjanë' ca naca le nazúaj lu guichi na', le ruhué' tsahui' légaquië'. ³² Tu' nácagaquië' Judas, en Silas bönni' tu'ë didza' uláz queë' Dios bulu'hué' tsáhuë'ë légaquië', en bulu'tipë' lãdxi'gaquië' bóchi'ru' ni', bulu'gunë' dxin didza' zian' le gulu'ilenë' légaquië'. ³³ Gudödi bulu'dzënë' Judas, en Silas ni' nababa dza, ní'irö bóchi'ru' ni' bulu'zenë' légaquië' dxi'a didza' para tsöjhuóajgaquië' Jerusalén ga nacu'ë bönni' gula'sól-lë'ë légaquië'. ³⁴ Guyaza lãdxë'ë Silas bugá'anë' Antioquía. ³⁵ Bulu'gá'anë' ca' Pablo, en Bernabé Antioquía na', ate' bulu'sedinë' bönachi, en gulunë' libán que xtídzë'ë Xanru'. Lësca' caní gulún zianrö ca' bönachi.

Risí lahuë' Pablo röjenë' libán le buropi luzuí

³⁶ Gudödi nababa dza Pablo gudxë' Bernabé:

—Uyëajru' leyúbölö tsöjyúgacaru'-në' bóchi'ru' nacu'ë yúgu'të yödzo gapa chiyöjenru' libán que xtídzë'ë Xanru', para ilé'eru' nacxi raca quégaquië'.

³⁷ Gú'unne' Bernabé ila'ché'ë-bi' bi'i Juan Marcos, tséajlenbi' légaquië', ³⁸ pero bití' guyaza lãdxë'ë Pablo ila'ché'ë-bi' tséajlenbi' légaquië' tu' bulá'aleni' légaquië' luyú Panfilia, en bíti'rö yójénlenbi' légaquië' dxin queë' Xanru'. ³⁹ Bití' guca tuz xtídza'gaquië' Bernabé, en Pablo ga bidxintë bulu'lá'aleni' tu' ia'túë'. Bernabé guché'ë-bi' bi'i Marcos, ate' gula'benë' tu' lë' barco, yójáquië' luyú Chipre. ⁴⁰ Pablo guróë' Silas para tséajlenë' lë'. Ní'irö yugu' bóchi'ru' gula'gu'ë légaquië' lu në'ë Xanru', en gula'nábinë' Lë' uzá' lãdxë'ë quégaquië', ate' bulu'zé'ë Pablo, en Silas ni'. ⁴¹ Gula'dödë' yugu' yödzo luyú Siria, en Cilicia, ate' bulu'tipë' lãdxi'gaca bönachi queë' Cristo nacua' ni'.

16

Bi'i Timoteo runbi' tsözxón Pablo, en Silas

¹ Gudödi ni' bila'dxinë' Pablo, en Silas yödzo Derbe, en yödzo Listra. Zóabi' tu bi'i bönni' ni', réajlë'ëbi' Cristo, lëbi' Timoteo. Nácabi' xí'ininu tu nigula judío réajlë'ënu Cristo, pero xúzibi' bití' náquië' judío. ² Yugu' bóchi'ru' nacu'ë Listra, en Iconio tunë' ba nalí queë'bi', ta'nnë' runbi' le naca dxi'a. ³ Gú'unne' Pablo tséajlenbi' bi'i ni' lë', ate' gudélë'ë-bi', en guchúguië' lu xipéla'bi' ca tun bönachi judío. Caní benë' para cabí ila'nnë' queë'bi' bönni' judío nacu'ë yugu' yödzo ni', tu' nóziguequinë' yúgu'të' xúzibi' bití' náquië' judío. ⁴ Cate' Pablo, en nupa dzágagaca lë' gula'dödë' gapa nacua' yödzo ni', tu tu yödzo na' bulu'dödë' lu ná'agaquië' yugu' bóchi'ru' nacu'ë gapa ni' yugu' xibá na' gulunë' gubáz nasól-lë'ë Cristo, en bönni' gula tapa chí'ë bönachi queë', nacu'ë Jerusalén. Bulu'dödë' yugu' xibá ni lu ná'agaquië' para ilunë' ca rinná' bë' xibá na'. ⁵ Caní guca, bönachi yúgu'të cö' bönachi queë' Cristo bila'dipa lãdxi'gaca ca naca le réajlë'ëru' Cristo, ate' gula'yán tu tu dza.

Tu bönni' Macedonia rulidzë' Pablo lu yëla béchigal

⁶ Pablo, en bönni' dzágagaquië' lë' gula'dödë' luyú Frigia, en luyú Galacia, tu' buzáguë'ë Dios Bö' Lá'ayi xinó'zgaquië', para cabí ilunë' libán que xtídzë'ë Xanru' luyú Asia. ⁷ Cate'

bila'dxinë' luyú Misia, gulé'ënnë' tsöjáquië' luyú Bitinia, pero Dios Bö' Lá'ayi, Nu risól-lë'ë Jesús queéru', biti' bë'ë légaquië' lataj. ⁸ Ní'irö gula'dödë' gala' ga dë Misia, ate' yöjáquië' lu yödzö Troas. Neda' Lucas, ruzúaja' lu guichi lë ni, guzóa' Troas na', ate' yöjsóalena'-në' Pablo. ⁹ Lu yödzö ni' Dios buluí'inë' Pablo tu le bilé'enë' lu yëla béchigal. Tu bönni' Macedonia buluí'i lahuë' lë', zuñë', en ráta'yuë' lahuë' Pablo, rnnë': "Gudödi ladztu', lu xiyú Macedonia, en gúcalen netu'." ¹⁰ Cate' bilé'enë' Pablo lë ni, lë na' buluí'i lahui lë', la' bë' ládxi'tëtu' tséajtu' luyú Macedonia, tu' gúquibe'etu' Dios chibulidzë' netu' tsöjentu' libán que didza' dxi'a lógaca bönachi luyú ni'.

Le gulunë' Pablo, en Silas lu yödzö Filipos

¹¹ Ní'irö gurentu' lë'e barco, en buzá'atu' Troas. Gudóditu' lirá ga bidxintu' yödzö Samotracia, ate' gudödi ia'tú dza bidxintu' yödzö Neápolis. ¹² Buzá'atu' ni', ate' bidxintu' Filipos, yödzö na' nácarö lo ca yúgu'të yödzö nabábagaca tsölá'a ni' luyú Macedonia. Lu yödzö ni' yugu' bönni' Roma nucuá'agaquië' bönachi uládz quegaquië'. Lu yödzö nisö guzóatu' nababa dza. ¹³ Cate' bidxín tu dza lá'ayi, birúajtu' lu yödzö, en guyéajtu' ra' yegu ga na' tu'dubi caz bönachi yödzö na', en tu'lidza Dios. Guró'ötu' ni', en busiyöntu' yugu' nigula nudúbigacanu ni' ca naca xtídzë' Xanru'. ¹⁴ Nútsa'nu ládjagacanu Lidia, tu nigula Tiatira. Nácanu nigula rúti'nu lari' xiná chul-la le nazáca'da'. Reaj ládxi'nu Dios, ate' buzé náganu didza' ru'ë Pablo, ate' Xanru' gúcalenë'-nu para guxzí' lu ná'anu didza' na' bë'ë. ¹⁵ Ní'irö bidílanu lënu nisa, ate' gula'dila ca' nisa bönachi nacuá' lídxi'nu. Gudödi ni' gúta'yunu lotu', gunnánu:

—Channö réquibe'eli' réajlë'a Xanru', guli'tsaza lidxa', en guli'sóa ni'.

Bennu bayudxi ugá'anatu' ni'.

¹⁶ Ia'tú le guca tu dza tsanni ni' zéajtu' ga na' rulidztu'-në' Dios, birúajbi' dutságabi' tu bi'i nigula netu' yu'u lëbi' bö' le run ga rinné yá'abi'. Len yöl-la' rinné ya'a queébi' runbi' ga ta'zí'dë'ë dumí yugu' bönni' xanbi'. ¹⁷ Bi'i nigula ni' sudunóbi'-në' Pablo, en netu', ruí'ibi' zidzaj didza', rnnabi':

—¡Yugu' bönni' ni tunë' xichinë' Dios nayépisëtë'rë'! ¡Tu'siyönnë' libí'ili' naca gaca uláli'!

¹⁸ Caní benbi' zían dza. Cate' bíti'rö guyaza ládxi'ë Pablo, buécjë', en bulidzë' bö' na' yu'u lëbi', rnnë':

—Lu Lë' Xanru' Jesucristo, rinná bé'eda' li'. ¡Burúaj icja ládxi'do'obi' bi'i nigula ni!

La' ní'isö burúajtë bö' na'.

¹⁹ Cate' bila'lé'enë' xanbi' chiburúaj bö' na' run ga rinné yá'abi', en bíti'rö naca löza ila'zi'ë dumí ni'a queébi', que lë ni na' gula'zönë' Pablo, en Silas, ate' gula'ché'ë légaquië' lógaquië' bönni' yúlahui', nudúbigaquië' ga naca lu yé'ëyi. ²⁰ Bulu'cu'ë légaquië' lógaquië' bönni' yúlahui' na', ta'nnë':

—Yugu' bönni' ni nácagaquië' judío, en tunë' ga tu'tsatsa bönachi yödzö ni.

²¹ Tu'sédinë' le cabí ral-la' si' lu ná'aru', en biti' ral-la' gunru', tu' nabábaru' Roma.

²² Ní'irö bönachi zían ni' gula'dá'baga' Pablo, en Silas, ate' yugu' bönni' yúlahui' gula'nná bé'enë' nupa gula'lecja lari' nácagaquië' Pablo, en Silas, ate' gula'guínnë' légaquië' gubá'ayi. ²³ Gudödi gula'guíndë'ë légaquië', gula'gu'ë légaquië' lidxi guíë. Gula'nná bé'enë' bönni' rusayjë' lidxi guíë na' gun chí'idë'ë légaquië'. ²⁴ Bönni' ni, cate' chigula'nná bé'enë' lë' caní, gulu'ë légaquië' lu yu'u lë'e dxi' lidxi guíë na', en gulu'ë ní'agaquië' yeru yaga ta'zón ní'agaquië'.

²⁵ Idú guluhuëla Pablo, en Silas tu'lidzë' Dios, en tul-lë' yöl-la' ba queë' Dios, ate' ta'yönnë' yugu' bönni' nadzúngaquië' lidxi guíë na'. ²⁶ Ní'irö tsáldi'os gudödi budó' zxu' bach. Caní guca ga bidxintë guxzizi xilibi zö'ö lidxi guíë na', ate' la' gula'yálatë yúgu'të gapa nu riyaza, ate' bulu'huédxi ca' yugu' du guíë nága'gaca bönni' nadzúngaquië' ni'.

²⁷ Bubanë' bönni' na' rusayjë' lidxi guíë. Cate' bilé'enë' nayálgagaca gapa nu riyaza lidxi

guié na', gulecjé' guié tuchi' queé' para guti cuiné', tu' réquiné' chibulu'zxúnnajé' bönni' nadzúngaquié' lidxi guié na'. ²⁸ Ní'irö Pablo zidzaj bulidzé' lé', gunné':

—¡Biti' bi gúni cuinu', tu' zóatu' ni yúgu'tétu'!

²⁹ Ní'irö bönni' na' gunabé' guí', ate' gudá'até' lu yu'u lidxi guié na'. Guzxízidé'ë lu yöl-la' radxi, ate' biyéchué' xiní'agaquié' Pablo, en Silas. ³⁰ Cate' chinubéajé' légaquié' lidxi guié na', gudxé' légaquié':

—Libi'ili', bönni', ¿bizxi ral-la' guna' para ulá'?

³¹ Légaquié' té' lé':

—Guyéajlé'ë Xanru' Jesucristo, ate' uló' li', en lésca' caní ulu'lágaca bönachi nacua' lidxu'.

³² Gulu'ilené' lé' didza' ca naca xtídzé'ë Xanru', dzágagaca lé' yúgu'té bönachi nacua' lidxé'. ³³ La' ná'asö, ni' naca chi'i dzó'ölö la' guché'té' légaquié', ate' yöjtibé' légaquié' ga dxíagaquié' hué'. Gudödi ni', la' bidílaté' nisa, ate' gula'dila ca' nisa yúgu'té bönachi nacua' lidxé'. ³⁴ Ní'irö guché'ë légaquié' lidxé', en bé'ë le gulahué'. Rudzéjané' lé', en tu'dzeja ca' yúgu'té bönachi nacua' lidxé' tu' ta'yéajlé'ë Dios.

³⁵ Cate' za' rení' dza na', yugu' bönni' yúlahui' gula'sól-lé'ë ni'a ná'agaquié', ate' gulé' bönni' na' rusayjé' lidxi guié:

—Busán-gáquié' bönni' na'.

³⁶ Ní'irö bönni' na' rusayjé' lidxi guié gudíxjöi'iné' Pablo didza' ni, gunné':

—Gula'sól-lé'ë bönni' yúlahui' didza' usana' libí'ili'. Na'a, guli'rúaj, en buli'huóaj dxí'ado' ga rizóali'.

³⁷ Ní'irö birúajé' Pablo, en gudxé' yugu' ni'a ná'agaquié' bönni' yúlahui' na', gunné':

—Chigula'guiné' netu' lógaca bönachi sal-la' biti' narúguini queétu' ca rinná bé' xibá, en gula'gu'é netu' lidxi guié, ate' netu' ni nabábatu' Roma. ¿Naru' tu'santsé' netu' bagáchi'sö? ¡Biti' ca' gaca! ¡lídigaré' légaquié' udusángaquié' netu'!

³⁸ Yöjhuóajgaquié' ni'a ná'agaquié' bönni' yúlahui' na', en bulu'siyönné' yugu' bönni' yúlahui' didza' ni, ate' légaquié' guládxiné' cate' bila'yönné' nabábagaquié' Pablo, en Silas Roma. ³⁹ Cate' bila'dxiné' lidxi guié ni', guláta'yué' lógaquié' Pablo, en Silas cabí ulu'subágué'ë légaquié' xíguia'. Ní'irö gula'béajé' légaquié' lidxi guié na', en guláta'yué' lógaquié' ulu'rúajé' yödzö na'. ⁴⁰ Ní'irö bila'rúajé' Pablo, en Silas lidxi guié na', ate' gula'yázié' lídxinu Lidia. Cate' chibila'lé'ené' bóchi'ru' nacué'ë ni', bulu'chízié' didza' icja náagaquié', en la' bulu'zá'até' ni'.

17

Yugu' bönachi Tesalónica tuné' dzatsa

¹ Gula'dödé' Pablo, en Silas lu yödzö Anfípolis, en lu yödzö Apolonia, ate' bila'dxiné' lu yödzö Tesalónica, ga ni' zoa tu yu'u ga tu'dubé' bönni' judío, en tu'sedé' queé' Dios.

² Bugá'ané' Pablo ni' idú galaj dza, ate' ca run cazé', guyijé' ga zoa yu'u na' cate' naca dza lá'ayi quégaquié' bönni' judío, ate' bé'lené' légaquié' didza'. ³ Buchila lá'ané', en bulu'iné' légaquié' rusédi le nazúaj lu guichi lá'ayi run bayudxi qui'i sáqué'ë Cristo, Bönni' na' tuné' löza bönni' judío udusölé' légaquié', ate' tödi gátié' ubané' lu yöl-la' guti. Ní'irö Pablo gudxé' légaquié':

—¡Caní guca queé' bönni' na' lé' Jesús, runa' libán queé' ga ni zóali'! ¡Bönni' ni náquié' Cristo!

⁴ Ní'irö bal-lé' gula'yéajlé'ë Cristo, ate' guluné' tsözxón Pablo, en Silas. Lésca' caní zían bönni' izá'a, bönni' ta'yéaj ládxi'gaquié' Dios, gula'yéajlé'ë Cristo. Lésca' zían nigula lo gula'yéajlé'ënu Cristo. ⁵ Ní'irö yugu' bönni' judío biti' ta'yéajlé'ë, lu yöl-la' ruzxé'e quégaquié' Pablo, bulu'tubé' yugu' bönni' biti' nácagaquié' tsahui', bönni' ta'dasé' ca'. Cate' chibulu'túbé' bönachi zían, guluné' ga gulún dzatsa idú lu yödzö na', ate' bayudxi gula'yázié' lidxé' Jasón para ulu'béajé' Pablo, en Silas lógaca bönachi na' tun dzatsa.

⁶ Cate' biti' bulu'dzöliné' Pablo, en Silas, gula'béajé' Jasón, en ia'zica'rè' bóchi'ru' nacu'é ni', ate' gula'ché'è légaquié' lógaquié' bönni' yúlahui'. Gulu'è zidzaj didza', ta'nné':

—Yugu' bönni' na' nutsá'gaquié' bönachi idúté yödzülió chibila'dxiné' ca' ni. ⁷ Jasón ni gulu'è légaquié' lidxé'. Yúgu'té bönni' ni ta'dá'baguè'è xibá queé' César, bönni' rinná bé'ené' rē'u, ta'nné': “Zoë' ia'túé' bönni' rinná bé'è, lē' Jesús.”

⁸ Cate' bila'yönné' yugu' bönni' lu yödzö, en yugu' bönni' yúlahui' na' lē ni, gula'bö'è böniga. ⁹ Ní'irö, gudödi gula'zi'è bönni' yúlahui' dumí le bulu'cá'anagaré' Jasón, en ia'zica'rè' bönni' na', bulu'sané' légaquié'.

Le guluné' Pablo, en Silas lu yödzö Berea

¹⁰ Ní'irö yugu' bóchi'ru' ni' la' gula'sól-la'té' Pablo, en Silas, ni' naca chi'i dzó'ölö, ate' söjáquié' yödzö Berea. Cate' bila'dxiné' ni', gula'yázié' lu yu'u ga tu'dubé' bönni' judío nacu'é ni', en tu'sédé' queé' Dios. ¹¹ Gulácaré' tsahui' bönni' ni ca bönni' nacu'é Tesalónica, tu' gula'zì' lu ná'agaquié' xtídzé'è Xanru' idú ládxi'gaquié'. Yugu' dza bulu'labé' dxi'a le nazúaj lu guichi lá'ayi, para iléquibe'ené' channö nácate' lē na' rñné' Pablo. ¹² Caní guca, zían bönni' judío gula'yéajlé'è Cristo. Lē'sca' caní, zían bönni' izá'a, yugu' nigula lo, en yugu' bönni' gula'yéajlé'è Cristo. ¹³ Ní'irö cate' guléquibe'ené' bönni' judío nacu'é Tesalónica, lē'sca' riguíxjö'è Pablo xtídzé'è Dios lu yödzö Berea, yöjáquié' ni', en guluné' ca' ni' ga gulún dzatsa bönachi zían. ¹⁴ Ní'irö yugu' bóchi'ru' ni' la' gula'sól-la'té' Pablo, para tsejé' ga naca ra' nísado', pero bulu'gá'anasé' Silas, en bi'i Timoteo lu yödzö Berea. ¹⁵ Yugu' bönni' Berea na' gula'ché'è Pablo lu yödzö Atenas. Ní'irö la' yöjhuó'jgacaté' lu yödzö Berea, tu'ú'è xtídzé'è Pablo, para ilé' Silas, en bi'i Timoteo, tsójacaté' ga ni' zoé' Pablo.

Le bené' Pablo lu yödzö Atenas

¹⁶ Tsanni ni' zoé' Pablo ribözé' Silas, en bi'i Timoteo, lu yödzö Atenas, ruhu'ini ládxi'è tu' rilé'ené' ta'yéaj ládxi'gaca yúgu'té bönachi yödzö na' yugu' budó' guió'j budó' yaga. ¹⁷ Que lē ni na' bé'lené' bönni' judío, en bönni' ta'yéaj ládxi'gaquié' Dios didza' ga naca lu yu'u ga tu'dubé' tu'sédé' queé' Dios. Yugu' dza bé'lené' nupa ta'dá lu yé'eyi didza' ca naca xtídzé'è Cristo. ¹⁸ Bal-lé' bönni' dá'gaquié' le tu'sédiné' bönni' epicúreo, en le tu'sédiné' bönni' estoico gulu'ilené' Pablo didza'. Bal-lé' gula'nné':

—¿Bizxi ré'énitsené' inné' bönni' hué' didza' ni?

Ia'bal-lé' gula'nné':

—Réquitu' náquié' nu run libán quégaca dios zi'tu'.

Caní gula'nné' tu' runé' libán Pablo lógaquié' que didza' dxi'a queé' Jesús, en que yöl-la' rubán. ¹⁹ Ní'irö gula'guélé'è né'è Pablo, en gula'ché'è lē' lu gu'a ga tu'dubé' tu'è didza', nazí'i le Areópago, ta'nné':

—¿Naru' huácatsö yónitu' didza' cubi ni rusiyönnu' netu'? ²⁰ Rusiyönnu' netu' le tun ga rubánitu'. Ré'énitu' inözitu' bizxi rñna didza' ni ru'u.

²¹ Bítì'rö ta'yaza ládxi'gaquié' iluné' bönni' Atenas na', en bönni' izá'a nacu'é ni', pero ila'yónisiné', en ilu'isé' didza' tu le cubi.

²² Ní'irö guzuíné' Pablo gatsaj láhui'lö lö'a Areópago na', gunné':

—Bönni' Atenas, yúgu'té le rilé'eda' naca bé' reaj ládxi'da'ali' yugu' dios queé'li'. ²³ Cate' gudöda' lu yödzö, en buyúgaca' yugu' le reaj ládxi'li', yöjxáca'a ca' tu nichu ga ni' nazúaj le rñna caní: “Tu Dios, Cuntu Nu Nunbé' Lē'.” Dios na' reaj ládxi'li'-né' sal-la' biti' núnbé'éli'-né', Dios ni runa' libán queé' loli'.

²⁴ ¡Dios ni bené' yödzülió, en yúgu'té le nacua' yödzülió ni! ¡Náquié' Xani yehua' yubá, en Xani luyú ni, en biti' ca' zoé' tu yudo' núngaca bönachi! ²⁵ Bítì' bi riyadzaj queé' le gaca ulu'nödzaj bönachi, tu' runödzjé' Lē' cazé' quégaca yúgu'té bönachi yöl-la' na'bán, en yúgu'té le riqúiniru'.

²⁶ Lë' benë' tuzë' bönni' ga zá'gaca yúgu'të bönachi izá'a para ila'cuá' idú yödzölió, en bulu'e dza ila'cuá', en gapa ral-la' ila'cuá'. ²⁷ Dios bucu'ë légaquië' para ulu'guiljë' Lë', channö nácati'tës ila'dzölinë' Lë' sal-la' ila'gán ila'zönsë'. Caní raca sal-la' bití' zoë' zítu' ga zóaru' tu turu'. ²⁸ Lë' cazë' runë' ga zóaru' nabanru', en bi gaca gunru', en le nácaru'. Naca ca na' gula'nnë' bal-lë' bönni' nútsa'gaquië' libí'ili', nupa bulu'zúaj le do' rúl-lali', le ta'nná: "Dí'a dza queë' Dios nácaru'." ²⁹ Na'a, channö nácaru' dí'a dza queë' Dios, bití' ral-la' innaru' náquië' Dios ca tu budó' guiój budó' yaga, o tu le néquini oro, o plata, o guiój, le núngaca bönachi ca naca tu le ta'guínnajsö ícjaguequi. ³⁰ Dios budödë' cá'asö yugu' le gulunë' lu yöl-la' bití' réajni'i quégaquië' yugu' iz chigula'dödi, pero na'a rinná bé'enë' yúgu'të bönachi idútë yödzölió ulu'bí'i ládxi'gaca. ³¹ Dios chinulu'ë tu dza cate' uchi'a usöröë' yúgu'të bönachi. Idú tsahui' naca ca uchi'a usöröë' légaquië' lu në'ë Jesús, bönni' na' buzóa cazë' Lë', ate' lógaca yúgu'të bönachi benë' tsutsu gaca caní tu' busubanë' Lë' lu yöl-la' guti.

³² Cate' bila'yönnë' didza' bë'ë Pablo ca guca, zoa nu bubán lu yöl-la' guti, bulu'titjë' bal-lë', ate' ia'bal-lë' gula'nnë':

—Yóniguëtu' ia'tú lë ni ru'u didza' que.

³³ Ní'irö burúajë' Pablo gatsaj láhui'lö ga na' nacu'ë, söhuójë'. ³⁴ Bal-lë' gula'yéajlë'ë Cristo, en gulunë' tsözxón Pablo. Nútsë'ë Dionisio, bönni' areópago, ládjagaquië', ate' nútsa'nu ca' ládjagaquië' nigula na' lënu Dámaris. Ia'bal-lë' na' gula'yéajlë'ë ca' Cristo.

18

Le benë' Pablo lu yödzö Corinto

¹ Gudödi guca lë ni, buzë'ë Pablo yödzö Atenas na', ate' guyijë' yödzö Corinto. ² Yöjxáquië' Aquilo, tu bönni' judío ni'. Guljë' bönni' ni luyú Ponto, en si' bidxíngazë' yödzö Corinto na'. Buzë'ë luyú Italia len nigula queë', lënu Priscila, tu' gunná bë'ë Claudio, bönni' unná bë', ulu'rúajë' yúgu'të bönni' judío yödzö Roma. Guyijë' Pablo ga nacu'ë Aquilo, en Priscila na' ³ tu' naca tuz dxin tunë' Aquilo, en Pablo. Bugá'analenë' légaquië', ate' tsözxón gulunë' dxin, tunë' yugu' yu'u guídido'. ⁴ Cate' nácagaca dza lá'ayi quégaquië' bönni' judío, razië' Pablo lu yu'u ga tu'dubë' tu'sëdë' queë' Dios, ga ni' bé'lenë' légaquië' didza'. Gú'unnë' ulu'ínë' yugu' bönni' judío, en yugu' bönni' izá'a nacu'ë ni', naca idútë li le riguíxjö'ë ca naca queë' Jesucristo.

⁵ Cate' bila'dxinë' Silas, en bí'i Timoteo ni', nuzá'agaquië' luyú Macedonia, nugu'ide'enë' Pablo, runë' libán que xtídzë'ë Dios, en runë' ba nalí lógachië' bönni' judío, rnnë':

—Jesús náquië' Cristo, Nu na' tunë' löza yugu' bönni' judío udusölë' légaquië'.

⁶ Cate' bönni' judío nacu'ë ni' gula'dá'báguë'ë xtídzë'ë, en gula'nnë' zítë que, ní'irö Pablo gudxibë' lari' nácuë' para ulu'ínë' légaquië' bíti'rö nabáguë'ë lë' ni'a quégaquië', ate' gudxë' légaquië':

—La' cuínsili' nabága'li' xíguia' que yöl-la' guti queéli', calëga neda' nabága'a le. Na'a, uyija' ga nacuá' bönachi izá'a.

⁷ Ní'irö burúajë' Pablo ni', en guyijë' lidxë' Justo, bönni' reaj ládxië'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sëdë' queë' Dios. ⁸ Crispo, bönni' lo que yu'u ga na' tu'dubë' tu'sëdë' queë' Dios guyéajlë'ë Xanru' Jesús, ate' dzágagaca lë' yúgu'të bönachi nacuá' lidxë'. Cate' bila'yönnë' xtídzë'ë Dios, zían bönni' Corinto gula'yéajlë'ë Cristo, ate' gula'dilë' nisa. ⁹ Ní'irö Lë' cazë' Xanru' gudxë' Pablo lu yëla béchigal, gunné':

—Bití' gádxinu', en bití' su' dxisö, quíxjö'u xtídzá'a, ¹⁰ tu' zóalen caza' neda' li', ate' cuntú nu uzapa' në'e li' para guá' dö' quiu', tu' néquiguequi quia' bönachi zían lu yödzö ni.

¹¹ Bugá'anë' Pablo ni' idú ca tu iz yu' gatsaj, ate' busëdinë' légaquië' xtídzë'ë Dios.

¹² Cate' bidxín dza rinná bë'ë Galión luyú Acaya, guláquië' tuz bönni' judío biti' ta'yéajlë', ate' gula'dá'báguë'ë Pablo, en gula'ché'ë lë' ga rö'ë ruchi'a rusöröë' Galión na'.

¹³ Gulé' Galión na':

—Bönni' ni rigú'u yól-lë'ë bönachi para ilunë' bal Dios, ca ridá'baga' xibá queé'tu'.

¹⁴ Cate' chizóa gu'ë didza' Pablo, Galión na' gudxë' yugu' bönni' judío, rnnë':

—Libí'ili', bönni' judío, la'tu' guca tu le riguitsaj xibá queë' César, o tu le ruá' dö', guá' ilena' uzé naga' xtídza'li' ca ral-la' guna', ¹⁵ pero channö naca didza' bizxaj que dídza'sö, o que lágaca bönachi, en ca naca xibá queézili', guli' cá'ana tsahui' libí'isili', tu' cabí ré'ënda' neda' gaca' nu uchi'a usöró yugu' le caní.

¹⁶ Ní'irö Galión bulágui'ë légaquië' lu yu'u yúlahui'. ¹⁷ Ní'irö yúgu'të bönni' uládz na' gula'guélë'ë Sóstenes, bönni' lo que yu'u ga tu'dubë' bönni' judío, en tu'sedë' queë' Dios, ate' gula'guiné' lë' lö'a yúlahui', pero biti' bë' ládxë'ë Galión lë na' raca.

¹⁸ Pablo bugá'anë' lu yödzö na' zían dza, ate' gudödi busiyönnë' bóchi'ru' nacu'ë ni' didza', guyijë' yödzö Cencrea, ga ni' benë' yútusö icjë', tu' dö tu le nazi' lu në'ë lahuë' Dios gunë'. Ní'irö gurenë' tu lë'e barco, para tsejë' luyú Siria, dzágagaquië' lë' Priscila, en Aquilo. ¹⁹ Cate' bila'dxinë' yödzö Éfeso, Pablo bulá'alenë' légaquië' ni'. Guyázië' lu yu'u ga tu'dubë' bönni' judío, en tu'sedë' queë' Dios, ate' bé'lenë' nupa nacuá' ni' didza'.

²⁰ Yugu' bönni' ni' gulá'ta'yue' lahuë' Pablo ugá'analenë' légaquië' ia'lati' xidzé, pero lë' biti' gú'unnë'. ²¹ Bé'lenë' légaquië' didza', gunné':

—Run bayudxi soa' gapa' laní si' gaca Jerusalén, ate' leyúbölö huöda' ga ni zóali', channö gué'ënnë' Dios.

Ní'irö gurenë' Pablo tu lë'e barco, en buzé'ë Éfeso na'.

Ridxinë' Pablo Antioquia, ate' risí lahuë' röjenë' libán le bunni luzú

²² Gudödi bidxinë' Pablo yödzö Cesarea, gurenë' guyijë' Jerusalén, ga ni' yöjyúë' bönachi queë' Cristo, ate' ní'irö buzé'ë ni', en guyijë' Antioquia. ²³ Gudödi zoë' ni' nababa dza, buzé'ë ni', sa'yéajë' tu tu yödzö luyú Galacia, en Frigia. Benë' tsutsu bóchi'ru' nacu'ë ni' ca naca le ta'yéajlë'ë Cristo.

Runë' libán Apolos lu yödzö Éfeso

²⁴ Tu dza ni' bidxinë' Apolos, tu bönni' judío lu yödzö Éfeso. Guljë' bönni' ni lu yödzö Alejandría, en nabé'ede'enë' ru'ë didza', en nazédadë'ë le nazúaj lu guichi lá'ayi.

²⁵ Chinazédë' bönni' ni ca naca le réajlë'ëru' Xanru'. Idú ládxë'ë bë'ë didza', en ca nácatë busédinë' bönachi ca naca queë' Jesús, sal-la' núnbë'ë tuz le ruquíla bönachi nisa ca benë' Juan. ²⁶ Gusí lahuë' Apolos ru'ë didza' idú ládxë'ë ga naca lu yu'u ga tu'dubë' bönni' judío, en tu'sedë' queë' Dios. Cate' Priscila, en Aquilo bila'yönnë' didza' ru'ë Apolos na', gula'ché'ë lë' quez, en bulu'zëajni'irönë' lë' xibá queë' Dios. ²⁷ Cate' gú'unnë' Apolos tödë' luyú Acaya, bulu'tipë' ládxë'ë, ate' bulu'zúajë' tu lu guichi le tsöjuá'gaquië' quégaquië' bönni' teaj ládxë'ë Cristo luyú Acaya na', para ilunë' Apolos na' bal. Cate' bidxinë' Apolos luyú na', yugu' bönni' ni' teaj ládxë'ë Cristo bulu'zí'dë'ë xibé didza' ru'ë Apolos na', tu' ruzá' ládxë'ë Dios quégaquië'. ²⁸ Caní guca, tu' bucul-lë' Apolos na' yugu' bönni' judío ni' lógaca yúgu'të bönachi, tu' bugunë' dxin le nazúaj lu guichi lá'ayi, en bulu'e bönni' na' Jesús naca cazë' Cristo.

19

Le benë' Pablo lu yödzö Éfeso

¹ Tsanni ni' zoë' Apolos lu yödzö Corinto, gudödë' Pablo gapa nacuá' yödzö ia'lati' ra'lö, ate' bidxinë' Éfeso. Yöjxáquië' bal-lë' bönni' ta'yéajlë'ë Cristo ni'. ² Pablo gunábinë' légaquië', rnnë':

—¿Naru' bidisóalenë' Dios Bö' Lá'ayi libí'ili' cate' ni' guyéajlë'ëli' Cristo?

Gulé' lë':

—Biti' nayónitu' channö zoë' Dios Bö' Lá'ayi.

³ Ní'irö Pablo gunábinë' légaquië', rnnë':

—¿Nacxi guca le bidíflali' nisa?

Ta'nnë':

—Ca buquílë' Juan bönachi nisa.

⁴ Pablo gunné':

—Buquílë' Juan bönachi nisa, nupa ni' bulu'bí'i ládxi'guequi, ate' Juan caz gudxë' léguequi ral-la' ila'yéajlë' Bönni' na' si' zá'tëlë' ca lë', ate' Bönni' ni naquië' Jesús, Lë' Cristo.

⁵ Cate' yugu' bönni' na' bila'yönnë' didza' ni ru'ë Pablo, bila'dilë' nisa tu' chita'yéajlë'ë Xanru' Jesús. ⁶ Cate' guxóa në'ë Pablo légaquië', en ni' rulidzë' Dios, bidisóalenë' Dios Bö' Lá'ayi légaquië', ate' gulu'ë didza' yúbölö, en gulu'ë didza' uláz queë' Dios. ⁷ Guláquië' bönni' ni idú chínnuë'.

⁸ Guzöë' Pablo idú ca tsonna beo' ni', ate' guyázië' lu yu'u ga tu'dubë' bönni' judío, en tu'sedë' queë' Dios, ate' lu yöl-la' rugu ladxí' benë' libán lógaquië'. Bé'lenë' légaquië' didza', en gú'unnë' uluí'inë' légaquië' nácatë le riguíxjö'ë ca rinná bé'ë Dios. ⁹ Ní'irö bizídi icja ládxi'do'gaquië' bal-lë', en bití' gula'yéajlë'ë Cristo, ate' gula'nnë' zi'ë que xtídzë'ë Xanru' ga nacuá' bönachi zían na'. Ní'irö Pablo bulá'alenë' légaquië', ate' bubéajë' quez nupa ta'yéajlë' Cristo. Bé'lenë' bönachi ni ta'yéajlë' Cristo didza' yugu' dza ga na' tu'dubë' lu yu'u ga rusédinë' Tiranno bönachi. ¹⁰ Caní béntica'së' Pablo idú ca chopá iz, ate' caní guca, bila'yöni yúgu'të bönachi didza' ca naca queë' Xanru' Jesús, bönachi nacu'ë yugu' yödzo luyú Asia, bönachi judío, en bönachi izá'a. ¹¹ Dios benë' yugu' yöl-la' huáca zxön lu në'ë Pablo. ¹² Caní guca, bal-lë' bönni' gula'zi'ë yugu' lári'do' béguë'ë icjë' Pablo, en yugu' lári' tsólá'a bugalë' lë'ë, ate' yöjuá'gaquië' léguequi gapa nacuá' nupa te'e, ate' bulu'huóáquië' ca naca yödzöhué' que queé'gaquië', en bulu'rúaj bö' xihui' yú'ugaca bönachi na'.

¹³ Ní'irö bal-lë' bönni' judío udá dzaga tu'béajë' bö' xihui' gulé'ënnë' ulu'gunë' dxin Lë' Xanru' Jesús para ulu'béajë' yugu' bö' xihui' yú'ugaca bönachi, ta'nnë':

—Ní'a que Lë' Jesús, Nu na' runë' libán que Pablo, rinná bé'etu' libí'ili' urúajli'.

¹⁴ Caní gulunë' gadxi bönni' zxí'inë' Esceva, tu bönni' judío náquië' bönni' lo ládja-gaquië' bixúz unná bé'. ¹⁵ Bubí'i didza' bö' xihui' na', gunná:

—Núnbe'a-në' Jesús, en núnbe'eda' bönni' lë' Pablo, pero libí'ili', ¿núzxitë libí'ili'?

¹⁶ Ní'irö guxítí'ë bönni' na' yu'u lë' bö' xihui', yöjenë' légaquië' zi', en bucul-lë' yúgu'të', tu' guzxéqui'rönë' ca légaquië'. Caní guca, xiguídigacasë', en hué'gacatzë' bulu'zxúnnajë' gadxë' bönni' na' lu yu'u ni'. ¹⁷ Guzë' didza' ca guca lë' ni, ate' bila'yöni yúgu'të' nupa nacuá' lu yödzo Éfeso, bönachi judío, en bönachi izá'a, ate' yúgu'të' guládxinë' Dios. Que lë' ni na' gulunë' zxön Lë' Xanru' Jesús.

¹⁸ Lësca' bila'dxinë' zían bönni' ta'yéajlë'ë Cristo, en gula'xóalëpë' dul-la' nabága'-gaquië', en gula'guíxjö'ë le chigulunë'. ¹⁹ Lësca' caní gulunë' zían bönni', zí'alö gulunë' yöl-la' udzá'. Dujuá'agaquië' yugu' guichi udzá' quégaquië', ate' bulu'zégui'ë léguequi lógaca yúgu'të' bönachi. Bulu'labë' tscá nazáca'gaca guichi na', le guca idú chi un mil dumí plata. ²⁰ Caní guca, guzëda' xtídzë'ë Xanru', en bidéli'da' bönachi zían. Idú ládxi'gaquië' gula'yéajlë'ë Cristo.

²¹ Gudödi gulaca lë' ni, benë' queë' Pablo tsejë' Jerusalén, pero zí'alö ral-la' tödë' yugu' yödzo luyú Macedonia, en luyú Acaya, ate' gunné':

—Tödi tseja' Jerusalén, run bayudxi tseja' ca' Roma.

²² Ní'irö gusól-lë'ë-bi' chópabi' bí'i bönni' tácalenbi' lë', légacabi' Timoteo, en Erasto, luyú Macedonia, pero bugá'anë' lë' nababa dza luyú Asia na'.

Tu'tsatsa bönachi lu yödzo Éfeso

²³ Bulu'tsatsa bönachi Éfeso dza ni', ate' gula'dá'baguë'ë xtídzë'ë Xanru'. ²⁴ Benë' Demetrio, bönni' gubëdxi guié plata ga bulu'tsatsë'. Run cazë' yugu' lidxi budó' guió' budó' yaga néquiguequini plata que dios quégaquië', lënu Diana. Gula'zi'ë bönni' tunë' dxin ni dumí bach. ²⁵ Butubë' Demetrio na' ia'zica'rë' bönni' tunë' la' dxin nisö, ate' gudxë' légaquië':

—Böcha'a, nöz quézili' ca naca dxin runru', runna dumí queéru'. ²⁶ Rilé'eli', en riyónili' ca runë' Pablo na'. Calégasö Éfeso ni, pero idú luyú Asia chibidéli'në' bönachi zían, ate' chibutsë'ë ca tunë', tu' rë' légaquië': "Yúgu le núngaca bönachi biti' nácagaca dios."

²⁷ Calégasö zoa bönadxi ugá'ana cá'asö dxin ni runru', pero lësca' zoa bönadxi ugá'ana cá'asö yudo' que dios zxön lënu Diana. Caní gaca, ugá'ana cá'asö yöl-la' zxön queénu, dios ni ta'yéaj ládxi'gaca-nu bönachi idütë luyú Asia, enca' idütë yödzülió.

²⁸ Cate' yugu' bönni' na' bila'yönnë' didza' ni, gula'léde'enë', ate' gulu'ë zidzaj didza', ta'nnë':

—Nácatërönu zxön Diana, dios queéru' rë'u, bönachi Éfeso.

²⁹ Caní guca, bulu'tsatsa bönachi idütë lu yödzo na', ate' guláquië' tuz, en carelö yójáquië' lö'a yúlalui'. Gulá'ayöjë' Gayo, en Aristarco, bönni' Macedonia túngaquië' Pablo tsözxón, ga ni'. ³⁰ Cate' gú'unnë' Pablo tsázië' ga nacuá' bönachi zían na', biti' ca' gulu'ë lë' lataj bönni' ta'yéajlë'ë Cristo. ³¹ Lësca' caní gulunë' bal-lë' bönni' yúlalui' que luyú Asia, bönni' ta'lë'enë' Pablo dxi'a. Gula'sól-lë'ë queë' nupa guláta'yu lahuë' biti' tsazië' lö'a yúlalui' na'. ³² Ga ni' tu'tsatsë', en ta'bódxie', tu le ta'nnë' bal-lë', en ia'tú le ta'nnë' ia'zica'rë', tu' ró'ögacasë' baröli bönni' zían na' tu'tsatsë', en lá'tu'biqui' yúgu'tëgaquië' biti' nózguequinë' bizx que na' nudúbigaquië' ni'. ³³ Ní'irö yugu' bönni' judío gula'béajë' Alejandro ladaj bönachi zían na', ate' bulu'dxíguë'ë lë' lógaca bönachi zían na'. Bulu'e Alejandro na' len në'ë para ila'bó' dxisö, tu' gú'unnë' gu'ë didza' le gácalen yugu' bönni' judío na' lógaca yúgu'tëguequi. ³⁴ Cate' guléquië' enë' náquië' judío, yúgu'të' gulu'ë tsözxón zidzaj didza' idú ca chopá hora, ta'nnë':

—¡Nácatërönu zxön Diana, dios queéru' rë'u bönachi Éfeso!

³⁵ Ní'irö bönni' uzúaj que yúlalui' benë' ga gula'bó' dxisö bönachi zían na', gunné':

—Bönni' Éfeso, nózigaca yúgu'të bönachi zoa yudo' queénu Diana, dios zxön, ni. Rë'u ni, bönachi Éfeso, run chí'iru' yudo' na', enca' budó' na' böxaj ga zóaru', le birúaj lúzxiba. ³⁶ Cuntu nu gaca tá'baga' lë ni. Que lë ni na' run bayudxi sóali' dxisö, en biti' bi gúntëzili'. ³⁷ Naché'gacali'-në' bönni' ni, en biti' ta'banë' le dzö'ö yudo', en biti' ta'nnë' xihuë'ë queénu dios queéli'. ³⁸ Que lë ni na', channö zoa didza' bizxaj quégaquië' Demetrio, en yugu' bönni' gubëdxi guié plata nacuá'lenë' lë', len núti'tës bönni', dë lataj ga nu uzé nagui légaquië', en zoa nu uchi'a usöró légaquië'. Ni' huáca ulu'zegui luzá'agaquië' didza' tuë' ia'túë'. ³⁹ Na'a, channö dë ia'tú le inábali', huáca ucá'anaru' tsahui' le cate' ulu'dubi bönni' yúlalui' ca na' rinná bë' yúlalui'. ⁴⁰ Zoa bönadxi nu uzegui rë'u didza' ni'a que dzatsa ni guca na'a, inná ridá'baga'ru' yúlalui'. Biti' bi gaca innaru' bizx que guca dzatsa ni.

⁴¹ Cate' budxi bë'ë didza' ni, busól-lë'ë bönachi zían na' nudúbigaca ni' tsöhuó'jgaca lídxiguequi.

20

Sa'yéajë' Pablo luyú Macedonia, en luyú Grecia

¹ Cate' guró'ö dxi dzatsa na' guca lu yödzo Éfeso, bulidzë' Pablo yugu' bönni' ta'yéajlë'ë Cristo, ate' guchízië' icja nágagaquië' didza'. Gudödi ni' bunidë' légaquië', en la' bulá'alentë' légaquië'. Birúajë' ni', ate' sa'yéajë' luyú Macedonia. ² Gudödë' yugu' yödzo luyú ni', ruzéajni'ide'enë' bóchi'ru' nacu'ë ni', ate' gudödi ni' bidxinë' luyú Acaya. ³ Guzóë' Pablo ni' idú ca tsonna beo'. Cate' chizóa cuenë' tu lë'e barco para tsejë' luyú

Siria, gúquibe'ené' ta'bó' nísie' bönni' judío lè' para ila'zöné' lè'. Que lè ni na' buguelé'ë nõza söhuóje' luyú Macedonia, ate' bidxiné' yödzö Filipo. ⁴ Sópater, xzí'iné' Pirro, bönni' Berea, en Aristarco, en Segundo, yugu' bönni' Tesalónica, en Gayo, bönni' Derbe, enca' bi'i Timoteo, en Tíquico, en Trófimo, yugu' bönni' Asia, söjácalené' tsözxón lè'. ⁵ Ní'irö yugu' bönni' ni yöjnórugaquié' lahué' Pablo, yöjácié' yödzö Troas, ga ni' gula'bözé' lè'. ⁶ Lu yödzö Filipo na', neda', Lucas, yöjtsaga'-né' Pablo. Cate' chigudödi laní' cate' tahué' bönni' judío yöta xtila biti' nazí'í' cúa zi que, gurentu' tu lè'e barco, en buzá'atu' Filipo na'. Gudödi gayu' dza budzágatu' bönni' ni' yöjnórugaquié' lahué' Pablo, yöjácié' Troas, ate' ni' bugá'anatu' gadxi dza.

Le bené' Pablo lu yödzö Troas

⁷ Dza risí' lo le gadxi dza bulu'dubé' bönni' ta'yéajlé'ë Cristo para ilahué' yöta xtila le rusá' ládxi'ru' ca gútié' Jesucristo. Ni' rusédiné' Pablo légaquié', en tu' ral-la' uzé'ë ni' cate' za' rení' dza na', xidzé' bë'ë didza', ga bidxinté' gudödi guluhuéla. ⁸ Ga ni' nudúbigaquié' naca lu yu'u xitsá', ate' nacua' zían le ta'gú'u bení' ga na'. ⁹ Zóabi' bi'i Eutico ni', ró'öbi' ga ra'a lení' que yu'u na', ate' nadódirö yéla lobi' tu' ritunna libán runé' Pablo. Ga ni' ró'öbi' rásibi' bi'i na' naca ga bunni' cuía lu yu'u, ate' rásibi' ca' gubíxitebi', bóxjabi' ga bidxintébi' znan yu'u. Nátitebi' bulu'lisé'-bi'. ¹⁰ Bötjé' Pablo znan yu'u na', ate' yöjxóé' lébi', en bunidé'-bi'. Ní'irö gudxé' nupa nacua' ni':

—Biti' gadxi idzóbili'. Nabanbi'.

¹¹ Cate' chibubené' Pablo xitsá', gudélé'ë yöta xtila, gudahué'. Ní'irö Pablo bé'lené' légaquié' didza' ga bidxinté' zila balö. Gudödi ni' burúajé' ni'. ¹² Bi'i bönni' ra'bán na' gubíxibi', bulu'ché'ë-bi' nabanbi', en bulu'zí' zxóndé'ë.

Ca guca bidxintu' Mileto

¹³ Gunórutu' lahué' Pablo, en yöjchentu' tu lè'e barco, ate' gudóditu' ga bidxintu' yödzö Asón para tsöjtságatu'-né' Pablo ni', para gaca ca na' chibén' xtídza'tu', tu' gú'unné' Pablo tsejé' ni' sé'esi ni'ë. ¹⁴ Cate' chibudzágatu'-né' lu yödzö Asón na', gurénlené' netu' lè'e barco, ate' guyéajtu' yödzö Mitilene. ¹⁵ Buzá' barco ni', ate' dza buropi bidxintu' tödi li ga zoa luyú bidxi nazí'í' le Quío, ate' ia'tú dza ca' gudóditu' tödi li ga dè yödzö Samos, en bidxintu' yödzö Trogilio ga ni' guzóatu' tu chí'í. Ia'tú dza ca' bidxintu' yödzö Mileto. ¹⁶ Caní' bentu' tu' chibené' queé' Pablo tódise' yödzö Éfeso, para cabí' tsené' luyú Asia, tu' run bayudxi soé' Jerusalén cate' naca dza Pentecostés channö séqui'né'.

Didza' bë'ë Pablo lu yödzö Mileto

¹⁷ Cate' ni' zoé' Pablo lu yödzö Mileto, gusól-lé'ë nu yöjlidza bönni' gula tapa chí'ë bönachi queé' Cristo nacué' Éfeso. ¹⁸ Cate' bila'dxiné' ga zoé' Pablo, lè' gudxé' légaquié':

—Libí'ili' chinóz quézili' ca béntica'sa' ga zóali' ga gudela' bidxina' luyú Asia. ¹⁹ Yugu' dza bena' xichiné' Xanru' lu yöl-la' nõxaj ládxi', ga bidxinté' guródxa' ni'a queé'li', ate' zían le guca quia' le guzxi' bë' neda' ni'a que le ruá' dö' guluné' quia' bönachi judío biti' ta'yéajlé' Cristo. ²⁰ Béntica'sa' libán ga zóali' que yúgu'té le ruzí'ili' xibé, en busédida' libí'ili' yálajdo' ga nudúbili', en gapa naca lu yu'u lídxili'. ²¹ Bena' ba nalí' lógaca bönachi judío, en lógaca bönachi izá'a para ulu'bí'í ládxi'gaca, en ulu'huóaca queé' Dios, en ila'yéajlé' Xanru' Jesucristo. ²² Na'a, Dios Bö' Lá'ayi chinuné' quia' tseja' Jerusalén, en biti' nõzda' bizxi gaca quia' ni'. ²³ Yúgu'té yödzö ga ridá', riguíxjöi'iné' Dios Bö' Lá'ayi neda', ré' neda' ila'gu'ë neda' lidxi guié' bönni' judío biti' ta'yéajlé', en ulu'saca' zí'ë neda'. ²⁴ Biti' bi' runi neda' que lè na' gaca, sal-la' gátia' o cabí' gátia', pero ruí'í ládxi'sida' údxi guna' le chigudéla'a runa', para guna' dxin na' budödé' Xanru' Jesús lu na'a, le naca guna' libán que didza' dxi'a ca naca le ruzá' ládxi'ë Dios queé'ru'. Caní' guna' len yöl-la' rudzeja.

²⁵ Na'a, yúgu'téli' na' chibena' libán loli' ca rinná' bë'ë Dios, nõzda' bíti'rö ulé'eli' neda'.

²⁶ Que lè ni na', le nácaté' rea' libí'ili' na'a dza. Biti' nabága'a neda' queé'li' nituli' libí'ili'.

²⁷ Biti' bi bucáchi'da' libí'ili', pero gudíxjöi'ida' libí'ili' yúgu'të le rnnë' Dios. ²⁸ Que lë ni na', guli'gún chí'i cuinli', en guli'gún chí'i yúgu'të bönachi queë' Cristo, tu' nuzóë' Dios Bö' Lá'ayi libí'ili' para gácalenli' légaquië', en gun chí'ili' bönachi queë' Xanru', Bönni' na' gútië' uláz quégaquië', bulaljë' xichönë' le böá'uinë' légaquië'. ²⁹ Chinözda', tödi uzá'a ga zóali', ila'yaza nupa ilé'ëni ulu'suniti bönachi queë' Cristo ga zóali', ilunë' ca tunba' bö'cu' guí'a sínia', tu' sunítiba' yugu' bö'cu' zxila'. ³⁰ Ila'rúajë' bönni' nútsa'gaquië' ladjali', ate' ilu'ë didza' biti' nácatë para ulu'béajë' quégacasë' nupa ta'yéajlë' Cristo nútsa'gaca ladjali'. ³¹ Que lë ni na', guli'sóa ban ladxi', en guli'tsöjné ca bena' neda' idú ca tsonna iz, rëla, en të dza buchízia' icja nágali' tu tuli' ga bidxintë gurödxá' queéli'.

³² 'Na'a, böchi' luzá'ado', rigu'a libí'ili' lu në'ë Dios. Rinábida' Lë' uzá' ladxë'ë queéli', en gunë' ca rnna xtídzë'ë. Dios gunë' libí'ili' tsutsu, en gunë' ga idéli'li' gunli' tsözxón yugu' bönni' rö queë'. ³³ Catu caz guzé ladxá'a le nequi quégaquië' böchi' luzá'a. Biti' guzé ladxá'a dumí, o lari' quégaquië'. ³⁴ Nöz quézili' dxi'a, len na'a caza' bena' dxin para gaca gá'ua' le biyadzaj quia', en quégaca nupa gula'cuá'len neda'. ³⁵ Ca naca yúgu'të le bena', buluí'ida' libí'ili' caní ral-la' gunru' dxin para gaca gácalenru' nupa bi ta'yadzaj. Ral-la' tsöjneru' didza' bë'ë Xanru' Jesús, gunné': "Uz'irö xibé nu bi runödzej ca nu bi rizí'."

³⁶ Cate' budxi bë'ë Pablo didza' ni, buzóa zxibë', ate' benë' tsözxón yúgu'të', bulu'lidzë' Dios. ³⁷ Ní'irö gula'bödxë' yúgu'të'. Bulu'nidë' yenë' Pablo, en bulu'tsaga lahuë' lë'. ³⁸ Caní gulunë' tu' bulu'huí'innë' ni'a que didza' na' bë'ë Pablo, gunné': "Bíti'rö ulé'eli' neda'." Yójacalenë' tsözxón lë' ga na' gurenë' lu barco.

21

Sa'yéajë' Pablo Jerusalén

¹ Gudödi bulá'alentu' légaquië', guyú'utë nöza barco na', ate' lirá guyéajtu' ga zoa luyú bidxi nazí'i le Cos. Dza buropi na', gudóditu' ia'tú lataj nazí'i le Rodas, ate' buzá'atu' ni', en bidxintu' yödzö Pátara. ² Yöjxáca'tu' tu barco yúbölö ni' le zeaj luyú Fenicia. Gurentu' lë'e barco na', ate' guyú'utë nöza. ³ Gudóditu' ga nalá' Chipre, le guta' tsólá'a yögöla, ate' guyéajtu' luyú Siria, ga ni' guyaza barco na' lu yödzö Tiro, tu' ral-la' tsöjca'ana yua' ni' le dzö'ö lë'e barco na'. ⁴ Lu yödzö Tiro na' yöjxáca'tu' tu bönni' réajlë'ë Cristo, ate' bugá'analentu' lë', en yugu' bóchi'ru' ni' idú gadxi dza. Tu' chibulu'ínë' Dios Bö' Lá'ayi légaquië' le ral-la' gaca queë' Pablo, gulé' lë' biti' tsejë' Jerusalén. ⁵ Cate' chibizá'a dza na', burúajtu' ni', ate' gula'zá'lenë' netu' tsözxón yúgu'të' len nigula que quégaquië', en yugu' bi'i quégaquië', ga bidxintëtu' ní'ilo ra' yödzö na'. Ra' nísado' ni' buzóa zxíbitu', en bulidztu'-në' Dios. ⁶ Budxi bunida' luzá'atu' tutu' ia'tutu', bubentu' lë'e barco, ate' légaquië' yöjhuójgaquië' lídxigaquië'.

⁷ Buzá'atë barco na' lu yödzö Tiro, ate' ga yöjsé bidxín lu yödzö Tolemaida. Burúajtu' lë'e barco na' ni'. Bugápatu' Dios bóchi'ru' nacu'ë ni', ate' bugá'analentu' légaquië' tu dza. ⁸ Cate' za rení' ia'tú dza, burúajë' Pablo ni', ate' dzágatu'-në' netu' guyéajtu' yödzö Cesarea. Ni' guyú'utu' lu yu'u lidxë' Felipe, ate' bugá'analentu' lë'. Runë' Felipe na' libán que didza' dxi'a. Bítse'ë gadxë' bönni' ni' bulu'cu'ë dza ni'te para ilácalenë' bönachi queë' Cristo. ⁹ Nacuá'abi' tapa bi'i nigula ra'bán queë' Felipe na', tu'íbi' didza' uláz queë' Dios. ¹⁰ Gudödi gudzetu' chopá tsonna dza ni', ní'irö bidxinë' Agabo ni', bönni' ru'ë didza' uláz queë' Dios, narúajë' luyú Judea. ¹¹ Bönni' ni buduyúë' netu', ate' gudélé'ë pan le néquini guídi queë' Pablo. Béguë'ë ni'a na' cuinë', en gunné':

—Caní rnnë' Dios Bö' Lá'ayi: "Caní ilunë' bönni' judío nacu'ë Jerusalén. Ilúguië' bönni' ni nequi queë' pan guídi ni, ate' ulu'dödë' lë' lu ná'agaca bönachi izá'a."

¹² Cate' biyónitu' didza' ni, gúta'yutu' lahuë' Pablo, netu', en nupa nacuá' ni', para cabí tsejë' Jerusalén. ¹³ Bubi'ë didza' Pablo, gunné':

—¿Bizxi ni runli', ribódxili', en rusuhú' inili' neda'? Neda' chizóa caza' sina', calégasö ilúguié' neda', pero gátia' ca' lu yödzö Jerusalén ni'a queé' Xanru' Jesús.

¹⁴ Tu' cabí guxzéqui'tu'-nè' didza', bíti'rö bi gúdxitu'-nè', ate' gunnatu':

—Gaca ca raza ládxé'è Xanru'.

¹⁵ Cate' chigula'dödi dza na', bupa'atu' queé'tu', ate' guyéajtu' Jerusalén.

¹⁶ Gula'zá'lené' netu' bal-lè' bönni' ta'yéajlé'è Cristo, nacu'è Cesarea, ate' dzáguié' Mnasón, tu bönni' Chipre, légaquié'. Réajlé'è Cristo dza ni'te, ate' ral-la' tsöjgá'anatu' lidxé' bönni' ni.

Pablo röjyúé' Jacobo

¹⁷ Cate' bidxintu' Jerusalén, len yöl-la' rudzeja quégaquié' bóchi'ru' ni' ta'yéajlé'è Cristo guluné' netu' bal. ¹⁸ Dza buropi na' Pablo guyázalené' netu' lu yu'u, yöjyutu'-nè' Jacobo, ate' nudúbigaquié' ni' yúgu'tè bönni' gula tapa chi'è bönachi queé' Cristo nacu'è Jerusalén. ¹⁹ Cate' Pablo chibugapè légaquié' Dios, busiyönné' légaquié' yúgu'tè le bené' Dios lu në'è lé' ga nacua' bönachi izá'a. ²⁰ Cate' bila'yönné' lé ni, gula'gu'è Dios yöl-la' ba. Ní'irö gulé' Pablo:

—Nöz quézinu', bóchi'tu', cate' xö zían gáyu'è bönni' judío ta'yéajlé'è Cristo, ate' yúgu'tè' túndé'è bal xibá queé' Moisés. ²¹ Chibila'yönné' yugu' le tu'i didza' bönachi le ta'nné' quiu', ta'nná rigú'u yól-lu'u yúgu'tè bönni' judío nútsa'gaquié' ladaj bönachi izá'a, para ulu'cá'ané' le gunná bë'è Moisés, en rinná bé'enu' légaquié' bití' ila'chúguié' lu xpéla'gacabi' bi'i bönni'do' quégaquié', en bití' iluné' bal yugu' le nalébiru' runru' rë'u, bönachi judío. ²² ¿Nacxi caz gunru' na'a? Ulu'rúaj bönachi zían cate' ila'yöni chibidxínu' ni. ²³ Na'a, ben lé ni rëtu' lí'. Nacua'lené' netu' ni tapé' bönni', chinazí' lu ná'agaquié' lahué' Dios tu le iluné'. ²⁴ Guché'è yugu' bönni' ni, en ben légaquié' tsözxón gun dxi'a cuinli' ca naca que yudo', en gudizxaj lí' le ral-la' ila'guizxjé' para ilún yútusö ícjagaquié'. Ní'irö ila'nóziné' yúgu'tè bönni' judío bití' nácaté' lé na' ta'nné' quiu', pero lësca' lí' runu' le naca dxi'a, en runu' ca rinná bë' xibá queé' Moisés. ²⁵ Ca naca quégaca bönachi izá'a, nupa ni' chita'yéajlé' Cristo, chibén xtídza'tu', en buzúajtu' lu guichi ca ral-la' iluné'. Bití' run bayudxi ilún chi'è yugu' lé ni tuné' bönni' judío, pero tuz:

Bití' ilahué' le ta'gú'u bönachi lógaca budó' guiój budó' yaga.

Bití' ilahué' rön.

Bití' ilahué' xipéla'gacaba' böa' guixi' bití' narúaj-gácaba' rön.

Bití' iluné' le ruá' dö'.

Ta'zöné' Pablo lö'a yudo'

²⁶ Ní'irö Pablo guché'è queé' tapé' bönni' na', ate' dza buropi ni' ben dxi'a cuiné' tsözxón len légaquié' ca naca que yudo'. Ní'irö guyázié' lö'a yudo', para gaca bë' bizxi dza údxi iluné' le tu'ún dxi'a cuíngaquié', dza ni' ral-la' tsöjuá'agaquié' le ila'gu'è lahué' Dios que queégaquié'. ²⁷ Cate' chizóa izá'a gadxi dza na', bal-lè' judío narúajgaquié' luyú Asia bila'lé'ené' Pablo, zoé' lö'a yudo'. Guluné' ga gulún dzatsa bönachi zían, ate' gula'zöné' Pablo. ²⁸ Gulu'è zidzaj didza', ta'nné':

—¡Guli'gácalen netu', bönni' Israel! Bönni' ni rusédiné' yúgu'tè bönachi yúgu'tè lataj ulu'cá'ana cá'asö yödzö queé'ru', en xibá queé' Moisés, en yudo' queé'ru' ni. Na'a, chigulu'è yugu' bönni' izá'a lu yudo' ni. Caní runé', run dí'tjané' lataj lá'ayi ni.

²⁹ Caní gula'nné' tu' bila'lé'ené' Pablo zí'alö lu yödzö dzáguié' Trófimo, bönni' Éfeso, en téquiné' gulu'è bönni' ni lu yudo'.

³⁰ Caní guca, bulu'dubi yúgu'tè bönachi yödzö, ate' bila'guíré' ni'. Ní'irö gula'zöné' Pablo, en gulá'ayöjé' lé', bulu'béajé' lé' lö'a yudo', ate' la' bulu'sáyjaté' ga nu riyaza lö'a yudo' na'. ³¹ Cate' chitequi quéziné' ilútié' Pablo, bidxín didza' lahué' bönni' lo rinná bé'ené' bönni' röjáquié' gudil-la. Biyönné' tun dzatsa yúgu'tè bönachi Jerusalén.

³² Bönni' lo ni la' butúbité' bönni' röjáquié' gudil-la, len bönni' ta'nná bé'ené' légaquié',

ate' carelö guyéajlenë' légaquië' ga na' tun dzatsa bönachi na'. Cate' bila'lé'e bönachi ni' bönni' lo na' rinná bé'enë' bönni' röjáquië' gudil-la, en bönni' na' röjáquië' gudil-la, bulu'sané' ta'guinë' Pablo. ³³ Ní'irö gubígui'ë bönni' lo na', en guzxönë' Pablo, ate' gunná bé'enë' bönni' röjáquië' gudil-la ilúguië' lë' len chopa du guié. Gudödi ni' gunábinë' bönachi zían ni', rnnë':

—¿Nuzxi caz bönni' ni, en bizxi benë'?

³⁴ Ta'bódxí'a bönachi zían na', que queégaca ca ta'nná. Caní guca, biti' bi guca tséajni'inë' bönni' lo na', tu' tu'tsatsa bönachi na', ate' gunná bé'enë' bönni' röjáquië' gudil-la ila'ché'ë Pablo lu yu'u zxön ga nagá'anagaquië' bönni' na' röjáquië' gudil-la.

³⁵ Cate' bila'dxinë' ga naca ni'yëpi' que yu'u zxön na', bönni' na' röjáquië' gudil-la gulu'ínë' Pablo, tu' dxíadi'igaca bönachi zían légaquië', ³⁶ en zá'gaca cúdzu'lögaquië', ta'bódxí'a, ta'nná:

—Gulí'gútië'.

Didza' bë'ë Pablo uláz queë' lógaca bönachi

³⁷ Cate' ni' gula'sí lógacië' ila'gu'ë Pablo lu yu'u zxön ni', lë' gudxë' bönni' lo na' rinná bé'enë' bönni' röjáquië' gudil-la, gunné':

—¿Naru' gunnu' neda' lataj guía' li' tu didza'?

Bönni' lo na' gudxë' Pablo:

—¿Rácatso' didza' griego? ³⁸ ¿Naru' calëga li' bönni' Egipto na' dza lahui nisö butubë' yugu' bönni' gula'dá'baguë'ë yúlahui', ate' guchë'ë idú choá' gáyu'ë bönni' huëti bönachi lu lataj cá'asö?

³⁹ Ní'irö Pablo gudxë' lë', gunné':

—Le nácatë naca' neda' bönni' judío. Gulja' Tarso, tu yödzö lo luyú Cilicia. Ráta'yua' lo' gunnu' neda' lataj gu'a didza' lógaca bönachi ni.

⁴⁰ Bönni' lo na' bë'ë lë' lataj, ate' guzuínë' Pablo ga naca ni'yëpi', en guchisa në'ë para ila'cuá' dxisö bönachi zían ni'. Cate' chigula'cu'ë dxisö, Pablo bé'lenë' légaquië' didza' lu didza' hebreo.

22

¹ Caní gunné' Pablo:

—Libí'ili', bönni' gula, en libí'ili' bócha'a. Bulí'zé nágali' le guía' libí'ili' ca naca le runa'.

² Cate' bila'yönnë' ru'ë didza' hebreo, gula'cuá'arë' dxisö. Pablo gudxë' légaquië', rnnë':

³ —Naca caza' neda' bönni' judío. Gulja' lu yödzö Tarso luyú Cilicia, pero guzxöna' lu yödzö ni, ate' busédinë' Gamaliel neda' idú ca naca xibá quégaquië' xuz xtó'oru'. Bé'tica'sö ládxa'a guyéaj ládxa'a Dios ca runli' libí'ili' na'a. ⁴ Zí'alö gudxía ládxi'gaca'-në' bönni' nazi' lu ná'agaquië' xtídzë'ë Cristo, en guchë'gaca'-në' ga ilátië'. Guzxóngaca'-në', en gulú'ugaca'-në' lidxi guié, yugu' bönni', en nigula. ⁵ Lësca' huáca ilunë' ba nalí yugu' bixúz unná bë', en yugu' bönni' gula tu'zéajni'inë' que le gulunë'. Gulunë' guichi unná bë' le yöju'a ga nacu'ë bóchi'ru' judío lu yödzö Damasco. Guyija' ni' para tsöjxóngaca' nupa ni' ta'yéajlë' Cristo, para idichë'gaca'-në' nága'gaquië' Jerusalén ni, para ilácagaquië' xíguia'.

Rigúxjö'ë Pablo ca böáquië' queë' Cristo

⁶ Ní'irö gunné' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagubidza, tsárido'os guyëpi yösa bení' le za' lúxhiba, le buzení' ga na' sa'yéaja'. ⁷ La' yöjóta'tea' lu yu, en biyönda' chi'i Nu gudxi neda': "Saulo, Saulo, ¿bizx que ribía ládxi'u neda'?"

⁸ Ní'irö gunábida' lë', gunná': "¿Nuzxi li', Xan?" Lë' gudxë' neda': "Neda' ni Jesús, bönni' Nazaret. Neda' caz ribía ládxi'u." ⁹ Nupa ni' gula'cuá'len neda' bila'lé'e caz bení' na', en guladxi, pero biti' bila'yöni chi'i Nu na' bulidza neda'. ¹⁰ Ní'irö gudxa'-në': "¿Nacxi guna',

Xan?” Xanru' gudxë' neda': "Guyasa, en guyéaj Damasco. Zoë' ni' tu bönni' guié' li' ca naca yúgu'të le ral-la' gunu'." ¹¹ Tu' cabirö rilé'eda' tu' budí'i yösa bení' na' guyépidá' lahua', que lë ni na' yugu' bönni' dzágagaquië' neda' gula'guélé'ë na'a, ate' gula'ché'ë neda' ga bidxíntea' Damasco.

¹² Zoë' Ananías ni', tu bönni' runë' idútë ca rinná' bë' xibá queë' Dios, ate' yugu' bönni' judío nacu'ë Damasco tunë' lë' bal. ¹³ Bidxinë' Ananías na' ga zoa', en gudxë' neda': "Saulo, bócha'a, huóalaj guió'j lo'." La' ní'isö böálaj guió'j lahua', ate' bilé'eda' lë'. ¹⁴ Lë' gudxë' neda': "Dios quégaquië' xuz xtó'oru', dza ni'te guró' cazë' li' para inózinu' le ré'ëni quézinë' Lë', en ilé'enu'-në' Bönni' Tsahui', Lë' cazë' Zxí'inë', en yönnu' le guié' Lë' cazë' li'. ¹⁵ Caní' gaca, tu' ral-la' gunu' ba nalí' queë' Lë' lógaca yúgu'të bönachi, usiyönnu' légaquië' ca naca le chibilé'enu', en le chibiyóninu'. ¹⁶ Na'a, ¿bizx que ridzenu'? ¿Guyasa, en bidila nisa! Bulidzë' Xanru' para únë' li' dxi'a, en ugúë' dul-la' nabágu'u."

Cristo gusól-lë'ë Pablo para gunë' libán lógaca bönachi izá'a

¹⁷ Gunnë' ca' Pablo:

—Gudódi ni', cate' budxina' Jerusalén, en tsanni ni' rulidza'-në' Dios lu chila yudo', bilé'eda' tu le naca ca tu lu yëla béchigal. ¹⁸ Bilé'eda'-në' Xanru', ate' gudxë' neda': "¿Guyéaj carelö! ¿Burúajtë Jerusalén ni, tu' cabí ilunë' bal bönni' ni le gunu' ba nalí quia!" ¹⁹ Neda' gudxa'-në': "Xan, nózgaca quézinë' ca bena' neda'. Guyázia' gapa naca lu yu'u ga tu'dubë' tu'sëdë' bönni' judío queë' Dios. Gudina' nupa ni' ta'yéajlë' Li', en gulú'ugaca'-në' lidxi guié. ²⁰ Cate' ni' gulútië' Esteban, bönni' ni' benë' ba nalí quiu', lësca' zoa' neda' ni', en bena' tuz yugu' bönni' gulútië' lë' tu' ben chi'a lari' nácugaquië' bönni' na' bulu'ladxë' lë' guió'j." ²¹ Ní'irö Xanru' gudxë' neda': "Guyéaj, tu' risól-la'a li' lógaca bönachi izá'a."

Pablo ru'ilenë' bönni' lo didza', bönni' rinná bé'enë' bönni' röjáquië' gudil-la

²² Nisö ze lo yugu' bönni' judío bulu'zé nágagaquië' didza' bë'ë Pablo, ate' ní'irö gula'bódx'i'ë. Gulu'ë zidzaj didza', ta'nnë':

—¿Gulí'gútië' bönni' ni! ¿Bíti'rö ral-la' soë' ibanë'!

²³ Ní'irö tu' ta'bódx'i'ë, en ta'chözë' le nácugaquië' lu yöl-la' rilé' quégaquië', en tu' chejë' bëchtö yu lu bö'ös, ²⁴ bönni' lo na' rinná bé'enë' bönni' röjáquië' gudil-la gunná bë'ë ulu'gu'ë Pablo lu yu'u zxön na'. Lësca' gunná bé'enë' légaquië' ila'guinë' Pablo para quíxjö'ë le nácaté, para ila'nózinë' bizx que na' ta'bódx'i'ë bönni' judío caní' queë' Pablo. ²⁵ Cate' gulúgui'ë lë' du guídi para ila'guinë' lë', Pablo gudxë' tu bönni' nacu'ë lu në'ë bönni' röjáquië' gudil-la zoë' ni', rnnë':

—¿Naru' dë lataj quínili' neda'? Nababa' Roma, ate' cuntu nu buchi'a busöró neda' channö nabága'a xíguia'.

²⁶ Cate' bönni' na' biyönnë' lë ni, guyijë' yöjtíxjöi'inë' bönni' lo na' rinná bé'enë' bönni' röjáquië' gudil-la. Rë' lë':

—¿Bizxi caz ni runru'? ¿Bönni' ni nababë' Roma!

²⁷ Ní'irö bidë' bönni' lo na' ga zoë' Pablo, en gudxë' lë':

—¿Gudíxjö'! ¿Naru' nababu' li' Roma?

Pablo gudxë' lë':

—Ön, nababa'.

²⁸ Bubi'ë didza' bönni' lo na', gunné':

—Neda' ni, dumí zían gudizxja' para ibaba' Roma.

Ní'irö Pablo gudxë' lë':

—Neda' gubaba' Roma cate' ni' gulja' tu' nabábagaquië' xuz xiná'a Roma.

²⁹ Cate' bönni' na' chizóa ila'guinë' lë' bila'yönnë' lë' ni, la' bulu'bíga'të' ga zoë' Pablo. Lësca' gúdxinë' bönni' lo na' cate' gunózinë' nababë' Pablo Roma, tu' chigunná bë'ë ilúguië' lë'.

Ridxinë' Pablo lógaquië' bönni' yudo' tu'chi'a tu'söróë'

³⁰ Dza buropi ni', gú'unnë' bönni' lo na' inózinë' gazxi ga rë' bizxi na' yugu' bönni' judío tu'zéguië' Pablo didza'. Gunná bë'ë bulu'sedxë' du guíë' na' náguë'ë Pablo, ate' gunná bë'ë ulu'dubë' bixúz unná bë' judío, en yúgu'të bönni' yudo' tu'chi'a tu'söróë'. Ní'irö bubéajë' Pablo ga na' nagú'ugaquië' lë', ate' buzóë' lë' lógaquië'.

23

¹ Ní'irö buyúdë'ë Pablo lógaquië' bönni' yudo' tu'chi'a tu'söróë' na', en gunné':

—Libí'ili', bócha'a. Ga ridxintë na'a riböza' dxí'ado'. Caní naca, biti' zoa le ruxösa ládxi'da'ahua' neda' lahuë' Dios.

² Ní'irö Ananías, bixúz lo, gunná bé'enë' nupa nacua' cuita lë'ë Pablo ila'gápë'ë ru'ë.

³ Pablo gudxë' lë':

—Lëzca' caní Dios ubi'ë quiu', li', rulu'isö tsahui' cuinu'. ¿Naru' rö'ö cazu' ruchi'a rusöróu' neda' ca rinná bë' xibá, pero ridödi bë'tso' ca rinná bë' xibá na', na' rinná bé'enu' ila'gápë'ë neda'?

⁴ Nupa nacua' ni' tē Pablo:

—¿Naru' rulidza zi'tso'-në' bixúz lo queë' Dios?

⁵ Pablo gudxë' légaquië':

—Libí'ili', bócha'a. Nazúaj lu guichi, rnna: “Biti' ulidza zi'u nu rinná bé'e bönachi uládz quiu'”, pero neda' biti' gúquibe'eda' náquië' bixúz lo.

⁶ Ní'irö gúquibe'enë' Pablo bal-lë' nácagaquië' bönni' yudo' saduceo, ate' ia'bal-lë' bönni' yudo' fariseo. Ní'irö bë'ë zidzaj didza' lógaquië' bönni' yudo' tu'chi'a tu'söróë' na', gunné':

—¿Libí'ili', bócha'a! ¡Naca' bönni' fariseo, en naca' xzí'inë' tu bönni' fariseo! ¡Na'a ruchi'a rusöröli' neda' tu' runa' löza ulu'bán nupa chinátigaca!

⁷ Cate' bë'ë Pablo didza' ni, bila'rúajë' choplö yugu' bönni' yudo' fariseo, en yugu' bönni' yudo' saduceo, ate' gula'dil-la dídžë'ë la' légacasë'. ⁸ Caní gulunë' tu' ta'nnë' bönni' saduceo na' biti' ulu'bán nupa chinátigaca, en biti' nacu'ë gubáz lá'ayi, en biti' nacua' bö' nácagaca caz bönachi, pero ta'yéajlë'ë bönni' yudo' fariseo nácagaca yúgu'të lë' ni. ⁹ Que lë' ni na' gula'bódxí'ë. Ní'irö gula'yasë' bönni' nazédagaquië' xibá queë' Dios, yugu' bönni' yudo' fariseo, en gula'dil-la dídžë'ë, ta'nnë':

—Rusáca'tu' queëtu' biti' bi dö' nu'ë bönni' ni. Channö tu bö' naca caz bönachi bé'len lë' didza', o channö tu gubáz lá'ayi queë' Dios bé'lenë' lë' didza', biti' ral-la' tá'baga'ru'-në' Dios.

¹⁰ Cate' chita'díl-lada' dídžë'ë bönni' judío na', gúdxinë' bönni' lo na' rinná bé'enë' bönni' röjáquië' gudil-la, tu' réquinë' ulu'zxuzxaj ulu'quínnajë' Pablo. Ní'irö gunná bé'enë' bönni' röjáquië' gudil-la tsöjléajgaquië' Pablo ladaj bönni' judío na', en ulu'ché'ë lë' lu yu'u zxön ga na' nagá'anagaquië' bönni' na' röjáquië' gudil-la.

¹¹ Cate' chinaca chi'i dzó'ölö la' dza ná'asö, buluí'i lahuë' Xanru' ga zoë' Pablo, en gudxë' lë':

—Butipa ládxi'u, Pablo. Ca na' chibenu' ba nalí quia' Jerusalén ni, lësca' run bayudxi gunu' ba nalí quia' lu yödzö Roma.

Tun xtídza'gaquië' ilútië' Pablo

¹² Cate' za' rení' ia'tú dza, gulún xtídza'gaquië' bal-lë' bönni' judío, en gulún tsutsu xtídza'gaquië', ta'nnë' gunë' Dios légaquië' xíguia' channö cabí ilunë' lë' na' gulún xtídza'gaquië', gula'nnë' biti' ca' ilë'aj ilahuë' ga idxinrö chigulútië' Pablo. ¹³ Nayanrö ca

choá'gaquié' bönni' na' gulún tsutsu xtídza'gaquié' caní. ¹⁴ Yöjáquié' bönni' ni ga nacu'é yugu' bixúz unná bé', en bönni' gula tu' zéajni'iné' bönachi judío, ate' gula'nné':

—Chiben tsutsu xtídza'tu', gunnatu' guné' Dios netu' xíguia' channö cabí guntu' caní. Biti' guí'aj gágutu' ga gútirötu'-né' Pablo. ¹⁵ Na'a, libí'ili', en bönni' yudo' tu'chi'a tu'söröé', guli'guié' bönni' lo rinná bé'ené' bönni' röjáquié' gudil-la idiché'ë Pablo cuxó para idxiné' ga nudúbili', innali' ré'ënili' inábili'-né' Pablo tu didza' gate ga ré'. Netu' cö'ö nistu'-né' la' nöza, ate' gútitu'-né' zí'alö ca idxiné' ni.

¹⁶ Biyónibi' bi'i bönni' queénu nigula zané' Pablo ca na' ila'bó' nísie' Pablo, ate' guyéajbi', en guyú'ubi' yu'u zxön na', ate' yöjtíxjöi'ibi'-né' Pablo. ¹⁷ Pablo bulidzé' tué' bönni' nacu'é lu né'ë bönni' röjáquié' gudil-la en gudxé' lé':

—Guché'ë-bi' bi'i ni lahué' bönni' lo, tu' nuá'abi' didza' guié'bi'-né'.

¹⁸ Ní'irö bönni' na' gudélé'ë-bi', en guché'ë-bi' ga na' zoé' bönni' lo na', ate' gudxé' lé':

—Bulídzé' Pablo, bönni' na' yu'ë lidxi guié, neda', en gúta'yué' lahua' idigu'a-bi' bi'i ni lo, tu' ré'ënibi' güí'ilenbi' li' didza'.

¹⁹ Bönni' lo na' gudélé'ë ná'abi', en guché'ë-bi' quez, ate' gunábiné'-bi', rnné':

—¿Bizxi na' ral-la' guío' neda'?

²⁰ Lëbi' gúdxibi'-né':

—Chinúngaquié' didza' bönni' judío iláta'yué' lo' iché'u-né' Pablo cuxó, para idxiné' lógaquié' bönni' yudo' tu'chi'a tu'söröé'. Ilé' li' té'ënné' ila'nábiné' lé' tu didza' gate ga ré', ²¹ pero biti' tséajlé'u le ila'nné' tu' nadödi choá'gaquié' ila'bó' nísie' Pablo. Chigulún tsutsu xtídzé'ë gula'nné' guné' Dios légaquié' xíguia' channö cabí ilútié' lé'. Biti' bi ilé'aj ilahué' ga idxinró ilútié' lé'. Chizóagaquié' ta'bözé' si' lu no'o gunu' le ila'nábiné' li'.

²² Ní'irö bönni' lo na' rinná bé'ené' bönni' röjáquié' gudil-la gunná bé'ené'-bi' cuntu nu guié'bi' lé' na' chigúdxibi' lé', ate' ní'irö busól-lé'ë-bi' bi'i ni.

Ridxiné' Pablo lahué' Félix, bönni' rinná bé'ë luyú na'

²³ Ní'irö bönni' lo na' bulidzé' chopé' bönni' nacu'é tu gáyu'ë bönni' röjáquié' gudil-la lu ná'agaquié' tu tué', ate' gunná bé'ené' légaquié' ulu'cözé' chopa gáyu'ë bönni' röjáquié' gudil-la ta'z'é ní'agaquié', en tsónnalalaj yu' chié' bönni' röjáquié' gudil-la dxíagaquié' böa', en chopa gáyu'ë bönni' röjáquié' gudil-la ilu'ë yaga tuchi' para tsójáquié' yödzö Cesarea idú ridödi xtsö'. ²⁴ Lësca' gunná bé'ené' légaquié' ulu'cözé'-ba' tu böa' cué'ë-ba' Pablo, ate' ila'ché'ë lé' dxí'ado', cabí bi gaca queé', para idxiné' lahué' Félix, bönni' lo rinná bé'ë uláz que Roma.

²⁵ Gusól-lé'ë ca' tu guichi le rnna caní:

²⁶ “Neda', Claudio Lisias, ruzúaja' quiu' lu guichi, bönni' lo unná bé', Félix. Rugapa' Dios li'.

²⁷ Bönni' ni risól-la'a-né' quiu', gula'zöné' bönni' judío lé', en gulé'ënné' ilútié' lé'. Cate' gúquibe'eda' nababé' Roma, guché'gaca'-né' bönni' röjáquié' gudil-la, en busólá'-né' lu ná'agaquié' judío na'. ²⁸ Gú'unida' inözda' bizxi bené', lé' na' tu zéguié' lé' didza' bönni' judío, ate' guché'a-né' lógaquié' bönni' yudo' tu'chi'a tu'söröé' légaquié'. ²⁹ Cate' buédxi didza', gunözda' tu zéguié' lé' didza' ca naca le rinná bé' xibá quégaquié', en biti' bi nabágué'ë bönni' ni para nu guti lé', o nu cu'u lé' lidxi guié. ³⁰ Ní'irö cate' bidxín nu gudíxjöi'i neda' ta'bó' nísie' yugu' bönni' judío lé', la' gusól-la'tea' lé' ga zu', ate' gunná bé'egacada'-né' bönni' ni tu zéguié' lé' didza' ila'dxiné' lo' li', para ila'guíxjöi'iné' li' bi didza' nápaqaquié' lé'. ¡Dios gun tsáhué'ë li'!”

³¹ Ní'irö bönni' na' röjáquié' gudil-la gula'guélé'ë Pablo, en guluné' ca na' chigunná bé'ené' légaquié', ate' gula'ché'ë lé' yödzö Antípatris, ni' naca chi'i dzó'ölö. ³² Cate' za' rení' ia'tú dza bönni' röjáquié' gudil-la ta'z'é ní'agaquié' yöjhuójgaquié' Jerusalén, ate' bönni' röjáquié' gudil-la dxíagaquié' böa' bulu'ú'ë nöza, dzágagaquié' Pablo. ³³ Cate' bönni' na' röjáquié' gudil-la naché'gaquié' Pablo bila'dxiné' Cesarea, bulu'nödzjé' guichi

na' lu në'ë bönni' rinná bë'ë uláz que Roma, en bulu'sudxinë' Pablo lahuë'. ³⁴ Gudödi bulabë' bönni' unná bë' guichi na', gunábinë' Pablo gazxi bönni' lë'. Cate' gúquibe'enë' nababë' luyú Cilicia, ³⁵ gudxë' lë':

—Yónida' le innó' cate' ila'dxín ni nupa tu'zegui li' didza'.

Ní'irö gunná bé'enë' ilún chi'ë lë' lu yu'u yúlahui' ga ribö'ë Herodes, bönni' rinná bë'ë, para uchi'a usöröë' bönachi.

24

Pablo ru'ë didza' uláz queë' lahuë' Félix

¹ Cate' chibizá'a gayu' dza, bidxinë' Ananías, bixúz lo, ni', ate' dzágagaquië' lë' bal-lë' bönni' gula tu'zéajni'inë', en Tértulo, tu bönni' nazé'ede'enë' didza'. Bila'dxinë' lahuë' bönni' unná bë', ate' gula'nné' queë' Pablo. ² Cate' chibulu'lidzë' Pablo, ate' bidxinë' ni', gusí lahuë' Tértulo ruzégui'ë lë' didza', rnnë':

—Bönni' lo unná bë', Félix. Ni'a quiu' li' ruzi'tu' xibé le run tsahui' netu', ate' lu yöl-la' réajni'i quiu' rinná bé'enu' dxi'a bönachi uládz queë'tu'. ³ Yúgu'të lë' ni ruzí'tica'stu' xibé gáti'tës, ate' idú ládxi'tu' rëtu' li': "Xclenu'." ⁴ Na'a, para cabí upízxjarötu' li', ráta'yua' lo' gun zxön ládxi'u, yönnu' tu le do' guíëtu' li'. ⁵ Gúquibe'etu' bönni' ni rigú'u yól-lë'ë bönachi, en runë' ga ta'dá'baguë'ë yúlahui' yugu' bönni' judío nacu'ë idútë yödzölió, en náquië' bönni' lo quégaquië' bönni' dá'gaquië' bönni' Nazaret na'. ⁶ Lësca' gú'unnë' gun dítjanë' yudo' queë'tu'. Que lë' ni na' guzxöntu'-në', en gú'unitu' uchi'a usörötu' lë' ca naca xibá queë'tu'. ⁷ Ní'irö Lisias, bönni' lo rinná bé'enë' bönni' röjáquië' gudil-la bidxinë' ga zóatu', en lu yöl-la' sínia' zxön bugúë' bönni' ni lu na'tu'. ⁸ Ní'irö gunná bé'enë' Lisias na' ídigaca nupa tu'zegui lë' didza' lo' li'. Na'a, li' caz, cate' rinabi yúdxinu'-në' Pablo ni, huáca inózinu' gate ga rë' yúgu'të lë' ni ruzéguitu' lë' didza'.

⁹ Lësca' caní gula'nné' yugu' bönni' judío ni', gula'nné' naca caz caní. ¹⁰ Ní'irö butásö në'ë bönni' rinná bë'ë uláz que Roma na' para gu'ë didza' Pablo, ate' lë' bubí'ë didza', gunné':

—Idú ládxa'a quíxjö'a ca naca le runa', tu' chinaca zían iz ruchi'a rusöróu' le raca quégaca bönachi ladztu'. ¹¹ Le bena' huáca inabu'. Biti' réquini chinnu dza bidxina' Jerusalén para tseaj ládxa'a-në' Dios. ¹² Biti' yöjxáca'gaquië' neda' nu ridíl-lalena' didza', en biti' bena' ga ulu'tsatsa bönachi ga naca chila yudo', en cabí lu yu'u ga tu'dubë' tu'sëdë' queë' Dios, en cabí lu yödzö. ¹³ Biti' ca' gaca ulu'béaj lië' yugu' lë' ni tu'zéguië' neda' didza'. ¹⁴ Lë' ni rixóalëpa' lo'. Ca runa' xichinë' Dios quégaquië' xuz xtó'otu' nalëbi ca le tu'sédinë' légaquië', però bönni' judío ni tu'ë le: Le ridá'baga' Dios, tu' réajlë'a yúgu'të le rinná bë' xibá queë' Dios, enca' yúgu'të le bulu'zúajë' bönni' gulu'ë didza' uláz queë' Dios. ¹⁵ Ca na' légaquië' tunë' löza Dios, lësca' neda' runa' löza Dios, usubanë' nupa chinátigaca, bönachi tsahui', en bönachi bití' nácagaca tsahui'. ¹⁶ Que lë' ni na' ruí'i ládxi'tica'sa' cabí ibága'a le gun ga uxós ládxi'da'ahua' neda' lahuë' Dios o lógaca bönachi.

¹⁷ Gudödi zoa' ga yúbölö idú chopá tsonna iz, budxina' ga nacuá' bönachi uládz quia' para unödza' dumí le gácalen bönachi yechi', en unödza' le rigú'a lahuë' Dios. ¹⁸ Tsanni ni' runa' caní, bal-lë' bönni' judío narúajgaquië' luyú Asia bidixáca'gaquië' neda'. Ni' zoa' lö'a yudo', nubéaj dxi'a cuina' ca naca que yudo', en cabí nutuba' bönachi zían, en cabí nuna' ga ulu'tsatsa bönachi. ¹⁹ Yugu' bönni' judío ni' ral-la' ila'dxinë' lo' li', en ulu'zéguië' neda' didza' channö nápagaquië' neda' didza'. ²⁰ Ila'nnátsöquië' bönni' judío ni channö bulu'dzölinë' bi le cabí naca dxi'a bena' cate' ni' bidxina' lógachië' bönni' yudo' tu'chi'a tu'söröë' légaquië'. ²¹ Tuz cate' ni' zoa' lógachië', bë'a zidzaj didza', gunniá': "Ruchi'a rusöröli' neda' na'a tu' runa' löza ulu'bán nupa chinátigaca."

²² Cate' biyönnë' Félix didza' ni, en dxí'ado' chinózinë' ca naca que lë' na' rusédinë' Pablo, buzé láchui'së' ca' didza' bizxaj ni, gunné':

—Cati' idxinë' Lisias, bönni' lo rinná bé'enë' bönni' röjáquië' gudil-la, údxi yónida' ca naca didza' bizxaj queé'li'.

²³ Ní'irö Félix gunná bé'enë' tu bönni' nacu'ë lu në'ë bönni' röjáquië' gudil-la zoë' ni', gun chi'ë Pablo, pero gu'ë lë' lataj të' lö'a, en bití' uzáguë'ë xinó'zgaquië' böchi' luzé'ë duyúgaquië' lë' bi dxin ilunë' queë'.

²⁴ Chopa tsonna dza gudzé, bidë' leyúbölö Félix na'. Drusila, nigula queë' dzáganu lë'. Nácanu nigula judío. Félix bulidzë' Pablo, ate' buzé' náguië' xtídzë'ë ca naca le réajlë'ëru' Jesucristo. ²⁵ Cate' bë'ë didza' Pablo ca ral-la' gácaru' tsahui', en inná be'e cuinru', ate' idxinru' ga uchi'a usöröë' Dios rë'u dza si' za', ní'irö gudxi bidzöbinë' Félix, en gudxë' Pablo:

—Guyéaj na'a. Cate' gapa' lataj ulidza' li'.

²⁶ Lë'sca' gú'unnë' Félix si'ë dumí le unödzejë' Pablo lë' para usanë' lë', ate' que lë ni na', zían luzuí bulidzë' Pablo, en bé'lenë' lë' didza'. ²⁷ Cate' bizá'a chopa iz guyázië' Porcio Festo xilatjë' Félix, ate' tu' gú'unnë' Félix gunë' le tsaza ládxi'gaquië' bönni' judío, bucá'anë' Pablo nadzunë' lidxi gufé.

25

Ridxinë' Pablo lahuë' Festo, bönni' unná bë'

¹ Bidxinë' Festo yödzö Cesarea para tsázië' xilatjë', gáquië' bönni' unná bë' ulaz que Roma. Cate' bizá'a tsonna dza buzé'ë yödzö na', sa'yéajë' Jerusalén. ² Cate' bidxinë' Festo ni' yugu' bixúz unná bë', en yugu' bönni' lo quégaca bönachi judío bila' dxinë' lahuë' para ila'nnë' queë' Pablo, ate' guláta'yue' lahuë' Festo ³ bi uzá' ládxi'ë quégaquië', isól-lë'ë nupa tsöjxí'gaca Pablo, para udxinë' Jerusalén. Gulé'ënnë' ila'bó' nísie' lë' la' nöza para ilútië' lë'. ⁴ Bubi'ë didza' Festo, gudxë' légaquië':

—Lu yödzö Cesarea nadzunë' Pablo, ate' ral-la' tseja' ni' cuxó' huidzaj nisö. ⁵ Que lë ni na', núti'tëslöli' dë lu ná'ali', ral-la' sá'lenli' neda', en channö nabáguë'ë bönni' ni' xíguia', huáca uzéguili'-në' didza' ni'.

⁶ Gudzenë' Festo Jerusalén idú ca xunu' gubidza, ate' ní'irö bóajë' Cesarea. Cate' guzá' rení' ia'tú dza gurö'ë ga ruchi'a rusöröë', en gunná bé'enë' nupa tsöjxí'gaca Pablo. ⁷ Cate' chibidxinë' Pablo ni', yugu' bönni' judío narúajgaquië' Jerusalén gula'gu'ë lë' lé'alö, en zían le gula'nnë' queë'. Bulu'zéguië' lë' le tu'subáguë'ë lë' xíguia', pero bití' guca ulu'béaj lië' yugu' lë na' gula'nnë' queë'. ⁸ Ní'irö bë'ë didza' Pablo uláz queë', gunné':

—Bití' bi le ruá' dö' bena' que xibá quégaquië' bönni' judío, en cabí que yudo' quégaquië', en cabí queë' César, bönni' Roma, rinná bé'enë' rë'u.

⁹ Gú'unnë' Festo gunë' le ila'yaza ládxi'gaquië' bönni' judío, ate' bubí'ë didza', gudxë' Pablo:

—¿Ré'ënu' so'o Jerusalén, ga na' soa nu uchi'a usörö li' ca nácagaca lë ni ta'nnë' quiu'?

¹⁰ Bubi'ë didza' Pablo, gudxë' lë':

—Zoa caza' ga rö'ö nu ruchi'a rusörö uláz queë' César, ga na' ral-la' uchi'a usörö'u neda'. Bití' bi huiá' dö' nuna' quégaquië' bönni' judío, ate' chinóz quézinu' lë ni. ¹¹ La'tu' nuna' tu le ruá' dö', o bítí'tës le run ga ibága'a xíguia' gátia', bití' tá'baga'a gátia'. Na'a, channö cabí nuna' ca ta'nnë' quia' bönni' ni, cuntu caz nu dë lu në'e udödi neda' lu ná'agaquië'. Rinaba' tseja' lahuë' César ga udxí'a uró quia'.

¹² Cate' Festo chibé'lenë' yugu' bönni' yúlahui' didza', bubí'ë didza', gudxë' Pablo:

—Chigunábu' tseju' lahuë' César. Lahuë' César uyiju'.

Ru'ë didza' Pablo lahuë' Agripa, bönni' unná bë'

¹³ Gudödi chopa tsonna dza, bidxinë' Agripa, bönni' rinná bë'ë lu yödzö Cesarea, dzáganu Berenice lë', duyúgaquië' Festo. ¹⁴ Cate' chigula'cu'ë ni' zían dza, Festo buluí'inë' Agripa, bönni' rinná bë'ë, ca naca queë' Pablo. Gudxë' lë':

—Zoë' tu bönni' ni buca'anë' Félix lë' lidxi guié. ¹⁵ Cate' guzóa' Jerusalén, yugu' bixúz unná bë', en bönni' gula tu'zëajni'inë', bila'dxinë' lahua', ate' gula'nnë' queë' bönni' ni. Gula'nábinë' neda' ichuga' queë' gátië'. ¹⁶ Neda' bubí'a didza', gudxa' légaquië' bití' nalébiguequinë' bönni' Roma ila'chúguië' queë' tu bönni' gátië' channö cabí ila'dxini lahuë' nupa tu'zegui lë' didza', para gaca ubi'ë didza' ca naca lë na' ta'nnë' queë'. ¹⁷ Que lë ni na', cate' bila'dxinë' légaquië' ni, bití' ca' gudzedá', pero cate' guzá' guyeaní' ia'tú dza gurö'a ga ruchi'a rusöröa', ate' gunná bé'eda' nupa yöjxí'gaca bönni' ni. ¹⁸ Cate' gula'cu'ë ni bönni' na' tu'zëguië' lë' didza', bití' bi gula'nnë' queë' ca busaca' quia' ila'nnë'. ¹⁹ Gula'nnë' queë' bal-la didza' bizxaj ca naca le ta'yéajlë'ë Dios, en ca naca queë' tu bönni' lë' Jesús, nu na' guti, pero Pablo runë' tsutsu xtídzë'ë rnnë' ni zoë' nabanë' leyúbölö. ²⁰ Tu' buchíxida' ca nácagaca lë ni, gunábida'-në' Pablo channö ré'ënë' tsejë' Jerusalén, ga ni' soa nu uchi'a usörö lë' ca nácagaca lë ni. ²¹ Ní'irö cate' gunabë' Pablo tsejë' lahuë' Augusto César para uchi'a usöröë' lë' ni', gunná bé'eda' bönni' röjáquië' gudil-la ilún chí'igarë' lë' cate' gála'rö dza isól-la'a-në' lahuë' César.

²² Ní'irö Agripa gudxë' Festo na':

—Lëzca' neda' ré'ënda' yónida' le innë' bönni' na'.

Festo gudxë' lë':

—Cuxó yönnu' le innë'.

²³ Cate' za' rení' ia'tú dza, len ba zxön bila'dxinë' Agripa, en Berenice ni'. Gula'yázië' ga ral-la' ilu'ë didza', dzágagaquië' légaquië' bönni' unná bë', ate' gula'sól-lë'ë nupa tsöjxí'gaca Pablo. ²⁴ Ní'irö Festo gudxë' Agripa, bönni' unná bë':

—Bönni' unná bë', Agripa, en yúgu'tëli' zóali' ni tsözxón len netu'. Ni zoë' rilé'eli'-në' bönni' na', ta'nnë' queë' yúgu'të bönni' judío nacu'ë Jerusalén, enca' nupa nacuá' ni, të' neda' ral-la' gátië'. ²⁵ Runi neda' bití' bi benë' le nabáguë'ë xíguia' gátië', pero tu' gunabë' lë' cazë' tsejë' ga uchi'a usöröë' Augusto César lë', que lë ni na' chinuna' quia' isól-la'a-në' lahuë' Augusto. ²⁶ Tu' cabí nözda' bi ral-la' uzúaja' lu guichi le uzegui bönni' ni didza' para isól-la'a lu në'ë César, xana', que lë ni na' nachë'a-në' loli', en le nácáro lo, nachë'a-në' lo' li', Agripa, bönni' unná bë', para cate' údxi rinábini yudxu'-në', ní'irö inözda' bi ral-la' uzúaja' lu guichi ca naca queë' bönni' ni. ²⁷ Réquida' bití' naca dxi'a isól-la'a-në' nu bönni' náguë'ë ni' channö cabí gaca ulu'a le nabáguë'ë.

26

Didza' bë'ë Pablo uláz queë' lahuë' Agripa, bönni' unná bë'

¹ Ní'irö Agripa gudxë' Pablo:

—Dë lataj gu'u didza' uláz quiu'.

Buchila në'ë Pablo lahuë' Agripa, ate' gusí lahuë' ru'ë didza', rnnë':

² —Bönni' unná bë', Agripa. Raza ládxa'a tu' dë lataj na'a gu'a didza' uláz quia' lo' li' ca naca yúgu'të le tu'zëguië' bönni' judío neda' didza'. ³ Raza ládxi'ra' tu' núnbë'u yúgu'të le nalébiguequinë' tunë' bönni' judío, enca' yugu' lë ni ridíl-latu' didza'.

Yugu' le benë' Pablo zí'atëlö

⁴ Gunnë' ca' Pablo:

—Nözguequi quézinë' yúgu'të bönni' judío ca na' bena' ga gudéla'të cuídia' ga nacuá' bönachi uládz quia', enca' lu yödzö Jerusalén. ⁵ Nözguequi quézinë' ca', en huáca ila'guíxjö'ë ca na' bena' dza ni'te. Guca' bönni' fariseo. Yugu' bönni' fariseo tu'í ládxi'gacaré' ila'yéaj ládxi'gaquië' Dios ca tunë' ia'zica're' bönni' judío. ⁶ Na'a, zoa' ni loli' para nu uchi'a usörö neda' tu' runa' löza Dios, usubanë' bönni' nati, en gunë' ca na' guzxí' lu në'ë lógaquië' xuz xtó'otu'. ⁷ Tunë' löza yugu' bönni' idxinu cö' di'a dza queëtu' ila'déli'në' lë na' guzxí' lu në'ë Dios. Que lë ni na' ta'yéaj ládxi'gaquië' Dios, en

tunë' xichinë' rëla, en të dza. Tu' runa' löza lë ni, nuzéguigaquië' bönni' judío neda'. Caní naca, bönni' unná bë', Agripa. ⁸ Na'a, ¿naru' réquitseli' libí'ili' biti' naca le tséajlë'ëru', usubanë' Dios bönni' nati?

Pablo gudxía ládxe'ë bönachi queë' Cristo

⁹ Gunné' ca' Pablo:

—Lëzca' neda', zí'atëlö gúquida' le zían ral-la' guna', tá'baga'a-në' Jesús, bönni' Nazaret. ¹⁰ Caní bena' lu yödzo Jerusalén. Gulu'a zían bönachi ta'yéajlë' Jesús lidxi guíë, tu' bulu'dödë' yugu' bixúz unná bë' lu na'a yöl-la' unná bë'. Cate' gulútië' bönachi ni', bénlena' légaquië' tuz didza'. ¹¹ Zían luzuí busaca' zí'a yugu' bönni' ni' para ulu'sán ládxi'gaquië' ca ta'yéajlë'ë Cristo. Caní bena' gapa naca lu yu'u ga tu'dubë' bönni' judío, en tu'sédë' queë' Dios. Guléde'eda' légaquië', ate' gudxía ládxa'a légaquië' ga bidxintë' guyija' gapa nacuá' yödzo zítu' para tsöjxóngaca'-në'.

Rigúxjö'ë Pablo ca böáquië' queë' Cristo

¹² Gunné' ca' Pablo:

—Para guna' caní guyija' yödzo Damasco, ate' bixúz unná bë' nasól-la'gaquië' neda' nudódigaquië' lu na'a yöl-la' unná bë'. ¹³ Caní guca, bönni' unná bë', Agripa. Cate' ni' sa'yija' la' nözä, ni' naca idú huagubidza, bilé'eda' tu bení' lúzxiba le buzení'rö ca gubidza. Buzení' ga na' zoa', en ga nacuá' nupa sójacalen neda'. ¹⁴ Ní'irö yúgu'tëtu' gudzó'ötu' lu yu, ate' biyönda' chi'i nu bulidza neda'. Bë'ë didza' hebreo, gunné': "Saulo, Saulo, ¿bixz que ribía ládxi'u neda'? Run zí' cuinu', ridá'bagu'u neda'. Raca quiu' ca raca queéba' bédxi, run zí' cuinba', richégu'ba' yaga tuchi' le túndë'ë-ba' zí'." ¹⁵ Ní'irö gudxa'-në': "¿Nuzxi li', Xan?" Xanru' gudxë' neda': "Neda' ni Jesús, Nu na' ribía ládxi'u. ¹⁶ Na'a, guyasa, en guzú, tu' buluí' lahua' li' na'a, para uzóa' li' gunu' xichina', en gunu' ba nalí que lë ni chibilé'enu', enca' quégaca le uluí'ida' li', uluí' lahua' ga zu'. ¹⁷ Usölá' li' lu ná'agaquië' bönni' uládz quiu', en lu ná'agaquië' bönni' izá'a, lógaca nupa ni' risól-la'a li' na'a. ¹⁸ Risól-la'a li' ga na' nacu'ë para gunu' ga ulu'huóalaj guió'j lógaquië', en ulu'huóáquië' queë' Dios, en ulu'cá'anë' le naca chul-la' que dul-la', en ila'dxinë' lu bení'. Ulu'rúajë' lu na' Satanás tu' xihui', en ila'yázië' lu në'ë Dios. Channö ila'yéajlë'ë neda', Dios uniti lahuë' légaquië', en ugúë' dul-la' nabága'gaquië', ate' ila'déli'në' ila'bábalenë' bönachi chinubéajë' Dios quez queë'."

Benë' Pablo ca naca le buluí'inë' Xanru' lë'

¹⁹ Gunné' ca' Pablo:

—Qui lë ni na', bönni' unná bë', Agripa, biti' gudá'baga'a guna' le buluí'inë' Dios, zoë' yehua' yubá, neda'. ²⁰ Buzéajni'ida' nupa nacuá' yödzo Damasco, en gudödi ni' nupa nacuá' Jerusalén, en nupa nacuá' luyú Judea, en bönachi yugu' yödzo zítu' para ulu'bí'i ládxi'gaca, en ulu'huóáca queë' Dios, en ilún le ilaca bë' chibulu'bí'i ládxi'gaca. ²¹ Tu' bena' caní, yugu' bönni' judío gula'zönë' neda' cate' ni' zoa' lö'a yudo', en gulé'ënnë' ilútië' neda'. ²² Ní'irö gúcalenë' Dios neda', ate' ga ridxintë na'a dza zoa' idú ládxa'a, runa' ba nalí lógaquië' bönni' cá'asö, en lógaquië' bönni' lo. Biti' ruá'a didza' yúbölö, pero ca gula'nnasë' zí'alö bönni' gulu'ë didza' uláz queë' Dios, enca' ca gunné' Moisés ca ral-la' gaca. ²³ Gula'nnë': "Qui'i sáquë'ë Cristo, en tödi gátië', gáquië' nu isí lo ubán tsaz lu yöl-la' guti, para ulu'ë lahui naca löza ila'dxín bönachi lataj bení', en gaca libán que lë ni lógaca bönachi uládz queëtu', enca' lógaca bönachi izá'a."

Pablo ruzéajni'inë' Agripa para tséajlë'ë Cristo

²⁴ Cate' chibé'ë Pablo yugu' didza' ni, le bë'ë uláz queë', ní'irö bë'ë zidzaj didza' Festo, gunné':

—¿Nachixi icju', Pablo! ¿Tu' nazédado'o, chiguchixi icju'!

²⁵ Ní'irö Pablo gudxë' lë':

—Biti' nachixi icja', rea' li', Festo, ate' didza' ni ruá'a naca idútë li, en naca lesaca'.
²⁶ Lë cazë' Agripa, bönni' ni rinná bë'ë, nózinë' yugu' lë ni, en que lë ni na', idú ládxa'a ruá'a didza' lahuë' lë'. Nózinë' yugu' lë ni, tu' cabí guca bagáchi'sö lë na' guca. ²⁷ Bönni' unná bë', Agripa. ¿Naru' réajlë'u le gula'nné' bönni' gulu'ë didza' uláz queë' Dios? Nözda' réajlë'u lë ni.

²⁸ Ní'irö Agripa gudxë' Pablo:

—Ia'láti'sö la' réquinu' idéli'nu' neda' para gaca' queë' Cristo.

²⁹ Pablo gudxë' lë':

—Ni'a queë' Xanru' Dios ré'ënda', sal-la' ia'láti'sö o yenni', calégasö li', pero lësca' yúgu'të nupa ni ta'yöni neda', gácali' idú ca naca' neda', néquida' queë' Cristo, pero calëga gága'li' du guié ca ni nága'a neda'.

³⁰ Cate' budxi bë'ë Pablo didza' ni, guzuínë' bönni' lo unná bë' na', ate' gulazuínë' ca' bönni' rinná bë'ë, en Berenice, en nupa ró'lengaca légaquië'. ³¹ Cate' bila'ruájë' quez, gulu'i xtídza'gaquië', ta'nné':

—Biti' bi nunë' bönni' ni le nabáguë'ë xíguia' gátie', en calëga tsázië' lidxi guié.

³² Agripa gudxë' Festo:

—Huáca usanu'-né' bönni' ni la'tu' cabí gunabë' tsejë' lahuë' César ga uchi'a usöröë' lë'.

27

Ta'sól-lë'ë Pablo yödzö Roma

¹ Cate' chigulunë' quégaquië' ila'sól-lë'ë netu' lë'e barco para tséajtu' yödzö Roma, luyú Italia, gula'guélé'ë Pablo, en ia'bal-lë' nupa nadzúngaca, ate' bulu'dödë' légaquië' lu në'ë Julio, tu bönni' rinná bé'enë' tu cö' bönni' röjáquië' gudil-la nazí'i le: Bönni' Queë' Augusto Röjáquië' Gudil-la. ² Gurentu' tu lë'e barco que luyú Adramitio, le ralla' tódi yugu' yödzö gapa ta'dxín barco ga naca luyú Asia, ate' yú'usötu' ca' lë'e barco na', buzá'atu' yödzö Cesarea. Aristarco, tu bönni' yödz Tesalónica, le nababa luyú Macedonia dzáguië' netu'. ³ Cate' za' reni' ia'tú dza, bidxintu' yödzö Sidón, ate' ni' Julio, bönni' na' rinná bé'enë' bönni' röjáquië' gudil-la, lu yöl-la' dxi'i ladxi' queë', bë'ë Pablo lataj tsejë' ga nacu'ë böchi' luzé'ë para ilácalenë' lë' bi riyadzaj queë'. ⁴ Gudödi ni', bubentu' lë'e barco, ate' buzá'atu' ni'. Gudóditu' tsölá'a ga dë luyú bidxi Chipre ga rö'ö dxi bö' na' recja, tu' za' saca' lotu' bö' recja lu nísado' na'. ⁵ Ní'irö gudóditu' lu nísado' ga nalá' luyú Cilicia, en luyú Panfilia, ate' bidxintu' Mira, tu yödzö nababa luyú Licia.

⁶ Bönni' na' rinná bé'enë' bönni' röjáquië' gudil-la, en naché'ë netu', yöjxáquië' tu barco ni' narúaj yödzö Alejandría que luyú Egipto, barco na' zeaj luyú Italia ga rö' yödzö Roma. Gulu'ë netu' lë'e barco na'. ⁷ Guzá' barco na' tsahui' ládxi'do' zían dza, ate' len yöl-la' rizáca'sö bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudóditu' tsölá'a luyú bidxi nazí'i le Creta ga rö'ö dxi bö' na' recja, en bidxintu' ga nalá' yödzö Salmón luyú Creta na'. ⁸ Lu yöl-la' rizáca'sö gudóditu' tsölá'a ga dë luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dë gala' ga na' dë yödzö Lasea.

⁹ Tu' chigudzéda'atu', chigula' zoa bönadxi gaca ditaj bíti'tës barco rizá' lu nísado' na', tu' chigudödi yugu' dza tunë' gubasa cate' si' idxín beo' ziaga cate' récjada' bö'. Que lë ni na' Pablo buzéajni'inë' légaquië', ¹⁰ rnnë':

—Libi'ili', bönni', réquibe'eda' ga tseaj barco ni, huazóa bönadxi gaca ditaj barco ni, en yua' dzö'ö lë'e, en lësca' soa bönadxi queë'ru' gátiru'.

¹¹ Bönni' na', rinná bé'enë' bönni' röjáquië' gudil-la, guyéajlë'erë' le gula'nné' bönni' na' dë lu në'ë barco, en bönni' xan caz, ca le gunné' Pablo. ¹² Tu' cabí naca dxi'a lataj ni' ga ta'dxín barco, nazí'i le Buenos Puertos, para ulu'gá'anë' ni' yugu' beo' ziaga, que lë ni

na' la'tu'biqúi' yúgu'të bönni' nacu'ë lë'e barco na' gulún tuz xtídza'gaquië' ulu'zé'ë ni', channö huáca ila'dxinë' ga ta'dxín barco lu yödzö Fenice, lësca' dë luyú bidxi na' nazí'i le Creta, le dë tsölá'a ga ribía gubidza, ate' gulé'ënnë' ulu'gá'anë' ni' yugu' beo' ziaga.

Recja bö' budunu' lu nísado'

¹³ Tu' recja tu bö'do' le za' saca' tsölá'a ga ridödi gubidza beo' ziaga, téquinë' chiraca ilunë' ca té'ënnë', ate' bulu'lisë' guíë zi'i naga' du guíë le ruzóa dxisö barco, ate' gudödi barco na' gala' ra' luyú bidxi na' nazí'i le Creta. ¹⁴ Ia'tú chí'isö ca', guyecja tu bö' budunu' za' lotu', nazí'i le Euroclidón. ¹⁵ Tu' ruzéaj bö' na' recja barco na' tsölá'alö, ate' tu' cabí guca tseaj barco ga za' bö', ní'irö bé'ëtu' lataj bö' na' buzéaj barco na' ga ré'ëni. ¹⁶ Cate' gudödi barco na' ga bidxintu' tsölá'a tu luyú bídxido' nazí'i le Cauda, tsölá'a ni' ga bití' récjada' bö', lu yöl-la' rizáca'sö buchísatu' bárcodo' ná'ayöj barco zxon na' yú'utu'. ¹⁷ Gudödi burentu' le lahui barco zxon na', ní'irö béga'ratu' barco zxon na'. Zxante barco na' buchólitu' du, para cabí ilá'a lu le ridxía nisa na'. Tu' gúdxitu' tödi barco na', en inídxí' lu yuzxi lu nísado' na', buzótjatu' lari' que, le rutubi bö' rusá' barco na'. Canísö bé'ëtu' lataj bö' na' recja buzéaj barco. ¹⁸ Cate' za' rení' ia'tú dza, en ni' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö lë'e barco na'. ¹⁹ Dza bunni, len na' cuintu' gurú'unatu' le tun dxin que barco na' lu nísado'. ²⁰ Cate' chiguca zían dza bití' rilé'etu' gubidza, en nitú böljaj, en tu' récjada' bö' na' ruzéaj barco na' yú'utu', bítí'rö runtu' löza ulatu'.

²¹ Tu' chiguca zían dza bití' nágutu', guzuínë' Pablo gatsaj láhui'lö légaquië', en gudxë' légaquië':

—Libí'ili', bönni', dxí'arö guca la'tu' uzé nágali' neda', en cabí uzá'aru' luyú Creta, en cabí udutságaru' lë ni riguí'i rizáca'ru', en yugu' lë ni raca ditaj que barco ni. ²² Na'a, rea' libí'ili': Tsutsu guli'gún ládxi'li', tu' cabí gátili' nituli' libí'ili' tscali' zóali' ni, sal-la' gaca ditaj barco ni. ²³ Caní gaca tu' budulu'í' lahuë' neda' gudiyëla tu gubáz lá'ayi queë' Dios. Dios ni néquida' queë', en runa' xichinë'. ²⁴ Gubáz lá'ayi na' gudxë' neda', gunné': "Pablo, bití' gádxinu'. Run bayudxi idxinu' lahuë' César. Tu' nadxí'inë' Dios lí', usölé' yúgu'të bönachi nacuá'len lí' lë'e barco ni." ²⁵ Que lë ni na', tsutsu guli'gún ládxi'li', tu' ruzxöni ládxa'a-në' Dios, gaca ca na' chigudxë' gubáz lá'ayi queë' neda'. ²⁶ Caní gaca sal-la' run bayudxi gaca ditaj barco ni tu luyú bídxido', ga ni' tsójcá'ana ré'u.

²⁷ Cate' ni' chigudödi chidá' dza, ate' bö' na' recja ruzéaj barco na' lu nísado' nazí'i le Adriático, idú ladxi' yëla guléquinë' bönni' tunë' dxin lu barco na' chizóa idxín barco gala' tu luyú bidxi. ²⁸ Gula'ru'unë' du lu nísado' na', ate' gula'nózinë' galaj ösa naca ga bidxintë ga ré' lu nisa. Cate' gudödi barco na' ia'látido', gula'ru'unë' du na' leyúbölö, en gula'nózinë' chinaca chinu ösa. ²⁹ Tu' guládxinë' tsöjdín barco na' lu guíój, que lë ni na', tsölá'a láhuilö que barco gula'ru'unë' lu nísado' tapa guíë zi'i nága'gaca du guíë le tu'zóa dxisö barco lu nisa. Lu yöl-la' ruúbi ruguí'isö ládxi'do'gaquië' gula'bözë' tsení'. ³⁰ Ní'irö gulé'ënnë' bönni' tunë' dxin lu barco ulu'zxúnajë' lë'e barco na'. Bulu'zötjë' bárcodo' na' dë lahui barco zxon na' lu nísado'. Gulunë' ca té'ënnë' ilu'ë ia'lati' zi'tu' guíë zi'i na' naga' du guíë le ruzóa dxisö barco na', le zoa saca' tsölá'a láhuilö. ³¹ Ní'irö Pablo gudxë' bönni' na' rinná bé'enë' bönni' röjáquië' gudil-la, tsözxón len bönni' na' röjáquië' gudil-la, gunné':

—Channö cabí ulu'gá'anë' bönni' ni lë'e barco ni, bití' gaca uláli'.

³² Ní'irö bönni' na' röjáquië' gudil-la gula'chúguië' du naga' bárcodo' na', ate' gulu'ë lataj gubixi lu nísado'.

³³ Cate' chizá' rení', Pablo gúta'yue' lógaquië' bi ilahuë' yúgu'të'. Gudxë' légaquië':

—Na'a chiguca chidá' dza rubéaj yëla loli', en runlí' gubasa, bití' bi náguli'. ³⁴ Que lë ni na', ráta'yua' loli' gáguli' para huóáca ládxi'li', tu' cabí gátili' nituli' libí'ili'.

³⁵ Cate' Pablo budxi bé'ë didza' ni, gudélé'ë yöta xtila, en gudxë' Dios: "Xclenu'." Caní benë' lógaquië' yúgu'të'. Ní'irö buzuxzjë' yöta xtila na', en gusí lahuë' rahuë'. ³⁶ Ní'irö

bila'dipa ládxi'gaquië' yúgu'të', en gulahuë'. ³⁷ Tscatu' zóatu' lë'e barco na', gúcatu' idú chopa gayuá' yu' tsónnalalaj yu' chixzópatu'. ³⁸ Gudödi gulahuë', en bulu'huóljanë', ní'irö gula'ru'unë' zxa' xtila dë lë'e barco na' lu nisa, para ulu'lahuë' yua' dzö'ö lë'e barco na'.

Raca ditaj barco lu nísado'

³⁹ Cate' chiguca lahui' dza, yugu' bönni' tunë' dxin lu barco na' biti' bulu'únbë'ë luyú na'. Bila'lë'enë' ga röjro' nisa zxön na' gatsaj lálhui'lö luyú bidxi na', en dë lataj ni' ga naca lachi' ra' nísado'. Gulé'ënnë' ilunë' ga tsaza barco na' ga ni'. ⁴⁰ Ní'irö bulu'sedxë' yugu' du guié nága'gaca yugu' guié zi'i tu'zóa dxisö barco na', en bulu'sanë' léguequi, ate' gula'bixi lu nísado'. Bulu'sedxë' ca' du naga' në'e yaga le ruzecaj rudxí'i barco. Ní'irö bulu'chisë' lari' que le rutubi bö', le zoa tsölá'a lálhuilö barco na', ate' ní'irö gusí lo ridödi barco saca' ga röjro' nísado' gatsaj lálhui'lö luyú bidxi na'. ⁴¹ Cate' bidxín barco na' tu lataj ga ridzaga chopa nisa, ni' binidxi' tsölá'a lálhuilö barco na' lu yuzxi lu nísado' na', ate' bugá'anasö barco na' ga ni'. Bítirö guca bi utá le, ate' tsölá'a cúdezi'lö barco na', gusí lo riguitsaj nísado' na' le, len yöl-la' rizá' que. ⁴² Ní'irö bönni' röjáquië' gudil-la gulé'ënnë' ilútië' bönni' nadzúngaquië', para cabí ila'zxúnnajë', ila'zxóë' lu nisa na'. ⁴³ Bönni' na' rinná bé'enë' bönni' na' röjáquië' gudil-la gú'unnë' usölé' Pablo, ate' gunná bé'enë' bönni' na' röjáquië' gudil-la cabí ilunë' ca na' té'ënnë'. Ní'irö gunná bé'enë' bönni' taca ila'zxóë' lu nisa, zí'alö légaquië' ila'yázië' lu nisa para ila'dxinë' luyú bidxi. ⁴⁴ Gunná bé'enë' ca' yugu' bönni' nagá'anagaquië' ila'zxóë' lu yaga dzö'ö lálhuilö barco, en ia'bal-lë' lálhuigaca yágado' que barco na'. Caní guca, bulu'lë' yúgu'të'. Canísö bila'dxinë' luyú bidxi na'.

28

Le benë' Pablo luyú bidxi nazí'i le Malta

¹ Cate' chibulatu' yúgu'tëtu', gunöztu' luyú bidxi ga na' zóatu' nazí'i le Malta. ² Bönni' xidza' nacu'ë luyú bidxi na' lu yöl-la' dxi'i ladxi' quegaquië' gulunë' netu' bal. Gula'béquië' guí', ate' bulu'lidzë' netu' yúgu'tëtu' iditsë'e cuintu', tu' ralaj guió'j, en runda' ziaga. ³ Ní'irö Pablo gúché'ë tu tsölén huága zxisi bídxido', en cate' gulu'ë le lu guí', birúajba' tuba' bëla sínia' lë'e huágado', rizxúnnajba' bóchila que guí' na', ate' yöjtí'iniba' yen në'ë Pablo. ⁴ Cate' bönni' xidza' na' bila'lë'enë' bëla na', nála'ba' yen në'ë Pablo, gulé' tuë' ia'túé':

—Le nácatë bönni' ni náquië' nu ruti bönachi. Sal-la' bulé' lu nísado', dios queéru' lë' Tsahui' biti' ru'ë lë' lataj soë' ibanë'.

⁵ Gudxibi në'ë Pablo, en busládzu'ë-ba' bëla sínia' na'. Yöjxóatëba' lu guí', ate' lë' biti' bi guca queë'. ⁶ Bönni' xidza' nacu'ë ni' tu'yúé' Pablo, bátacalö cö'ë gui, o tsó'ötë' gátie'. Ní'irö cate' chigudzé ta'bözë', en bila'lë'enë' biti' bi raca queë', ia'tú le guléquinë', ate' gula'nne' naca cazë' tu dios.

⁷ Lataj ní'isö dë xiyúé' Publio, bönni' lo que luyú bidxi na', ate' bönni' ni benë' netu' bal. Lu yöl-la' dxi'i ladxi' queë' gulu'ë netu' lidxë' idú tsonna dza. ⁸ Dza na' dë' ré'enë' xuzë' Publio na', yu'ë xilá, en ré'enë' huë' rön. Guyázië' Pablo söjyúé' lë', en gudödi bulidzë' Dios, ní'irö guxó'a në'ë bönni' huë' na', en bunë' lë'. ⁹ Tu' benë' Pablo lë' ni, lësca' bila'dxín nupa te'e ga zoë', nacua' luyú bidxi ni', en bulu'huóáquië'. ¹⁰ Yugu' bönni' ni gulunë' netu' bal, en zían le gulunë' queétu'. Cate' chizó'a uzá'atu' luyú ni', bulu'nödzjé' yugu' le naquínitu' queétu'.

Ridxinë' Pablo lu yödzö Roma

¹¹ Cate' chiguca tsonna beo' zóatu' ni', ní'irö gurentu' tu lë'e barco que yödzö Alejandría, le bugá'ana luyú bidxi na' yugu' beo' ziaga. Barco ni dá'gaca tsölá'a lálhuilö budó' yaga léguequi Cástor, en Pólux, dios bilidi' quégaca bönachi Alejandría na'.

¹² Buzá'a barco na' ga ni', ate' bidxín yödzö Siracusa, ga ni' bugá'anatu' tsonna dza.

¹³ Buzá'atu' ni', ate' gudóditu' tsölá'alö luyú ni', en bidxintu' yödzö Regio. Cate' za' rení'

ia'tú dza, tu' recja bö' za' saca' ga ridödi gubidza beo' ziaga, buzá'atu' ni', ate' dza buropi na' bidxíntëtu' yödzo Puteoli luyú Italia. ¹⁴ Lu yödzo na' yöjxáca'tu' yugu' bóchi'ru' ta'yéajlë'ë Cristo, ate' guláta'yuë' lotu' ugá'analentu' légaquië' idú xunu' dza. Cate' bizá'a dza na' buzá'atu' ni' para tséajtu' yödzo Roma, rizë'e ní'atu'. ¹⁵ Chibila'yönnë' bóchi'ru' nacu'ë Roma chizóa idxintu' ni', ate' bila'rúajë' idixí'gala'gaquië' netu'. Bila'dxinë' tu yödzo' nazí'i le Yé'ëyi Que Apio. Ia'bal-lë' bila'dxinë' tu lataj nazí'i le Tsonna Yu'u Quégaquië' Bönni' Yú'ugaquië' Nöza. Cate' Pablo bilé'enë' légaquië', bidipa ládxe'ë, en gudxë' Dios: "Xclenu'."

¹⁶ Cate' bidxintu' Roma, bönni' na' rinná bé'enë' bönni' röjajúie' gudil-la, guché'ë bönni' na' nadzúngaquië', ate' budödë' légaquië' lu në'ë tu bönni' lo rinná bé'enë' bönni' röjajúie' gudil-la, ate' bë'ë Pablo lataj soë' queéze', zóalenë' lë' tu bönni' rejë' gudil-la ruyúe' lë'.

Runë' Pablo libán lu yödzo Roma

¹⁷ Cate' chigudödi tsonna dza, bulidzë' Pablo yugu' bönni' lo quégaquië' bönni' judío nacu'ë Roma. Cate' chibulu'dubë' ga na' zoë' Pablo, lë' gudxë' légaquië':

—Libí'ili', bócha'a, sal-la' bití' bi bena' quégaca bönachi ládzarú', en calëga que le nalébiru' runru' ca na' gulunë' xuz xtó'oru', yugu' bönni' judío nacu'ë Jerusalén bulu'dödë' neda' lu ná'agaquië' bönni' Roma nacu'ë Jerusalén, ate' bulu'sayjë' neda' lidxi guíë. ¹⁸ Ní'irö cate' chigula'nabi yúdxinë' neda' bönni' Roma, gulé'ënnë' ulu'sané' neda', tu' gulé'quibe'enë' bití' nabága'a xíguia' gátia'. ¹⁹ Yugu' bönni' judío ni' gula'dá'báguë'ë nupa na' gulé'ëni ulu'sán neda', ate' ben bayudxi gunaba' tseja' lahuë' César ga uchi'a usöröë' neda', en calëga para uzéguia' bönachi uládz queéru' didza'. ²⁰ Que lë' ni na' bulidza' libí'ili' para ilé'eda' libí'ili', en güi'ilena' libí'ili' didza', tu' nága'a du guíë ni tu' runa' löza le runru' löza rë'u, bönachi Israel, gácatë lë' na' guzxi' lu në'ë Dios gata' queéru'.

²¹ Ní'irö légaquië' gulé' Pablo:

—Bití' ridxini queétu' guichi le za' luyú Judea ca naca lë' na' raca quiu', en cuntú nu ridxini nu naca bóchi'ru' judío, nu usiyöni netu' channö nu bi rinnë quiu' le ruá' dö'.

²² Na'a, ré'ënitú' yónitú' xtídzú'u, lë' na' riguinnaj icju', tu' chinózitú' ta'nnë bönachi yúgu'të lataj quégaca nupa nazí' lu në'eguequi xibá cubi ni.

²³ Caní guca, bulu'dxië' bë' tu dza, ate' dza na' bila'dxinë' zíanë' ga na' zoë' Pablo. Gusí lahuë' Pablo zílado', ate' ni' gúl-li'ni buzéajni'inë' légaquië', en buchila lá'anë' le rinná bë'ë Dios. Gú'unnë' ulu'inë' légaquië' naca idútë li libán runë' queë' Jesús. Para gunë' caní bugunë' dxin le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios. ²⁴ Bal-lë' gula'zí' lu ná'agaquië' didza' bë'ë Pablo, pero ia'bal-lë' bití' ca' gula'yéajlë'ë. ²⁵ Tu' bila'rúajë' choplö, gula'sí lógaquië' tu'zë'ë ni', ate' Pablo gudxë' légaquië', rinnë':

—Didza' nácatë bë'ë Dios Bö' Lá'ayi, lë' na' gunné' Isaías, bönni' bë'ë didza' uláz queë' Dios, ca na' buzéajni'inë' xuz xtó'oru', gunné':

²⁶ Guyéaj lógaca bönachi ni', yöjödxi légaquië':

Yöni nágali', pero bití' tséajni'ili'.

Uyuli' iná'ali', pero bití' ilé'eli'.

²⁷ Yugu' bönni' ni chinazidi icja ládxi'do'gaquië', en bití' bi riyaza icja nágagaquië'.

Gulunë' ca tun nupa nachul-la guiój lóguequi

para cabí ila'lé'e len guiój lóguequi,

en cabí ila'yöni nágaguequi

para cabí ulu'zéajni'i ládxi'guequi,

en cabí ilé'ëni ulu'huóaca queë' Dios

para gaca una' léguequi.

²⁸ Na'a, ral-la' inózili' lë ni. Dios risól-lë'ë netu' lógaca bönachi izá'a para ulu'lágaca, ate' légaquië' ila'yönnë'.

²⁹ Cate' Pablo budxi bë'ë didza' ni, bila'rúajë' bönni' judío, ta'díl-lada' dídzë'ë la' légacasë'.

³⁰ Idú chopa iz bugá'anë' Pablo ni', zoë' tu lu yu'u ga na' riguizxjë', ate' benë' bal yúgu'të nupa buduyúgaca Lë'. ³¹ Lu yöl-la' rugu ladxi' benë' libán ca rinná bë'ë Dios. Busédinë' bönachi ca naca queë' Xanru' Jesucristo, ate' cuntu nu buzaga' xinözë'. ¡Ca' naca!

DIDZA' GUSÓL-LË'Ë PABLO YÖDZÖ ROMA

Pablo rugapë' Dios bönachi queë' Cristo nacu'ë Roma

¹ Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en guró cazë' neda' para guna' libán que didza' dxi'a queë'.

² Dza ni'te guzxi' lu në'ë Dios isól-lë'ë didza' dxi'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios. ³ Bulu'zúajë' lu guichi yúgu'të le ral-la' gunë' Zxi'inë' Dios, Nu na' naca Xanru' Jesucristo. Lu yöl-la' bönachi queë' náquië' zxi'ini xi'sóë' David, ⁴ pero ca naca bö' naca cazë', le naca lá'ayi, naca bë' náquië' Zxi'inë' Dios, en nápadë'ë yöl-la' huáca. Naca bë' náquië' caní tu' bubanë' lu yöl-la' guti. ⁵ Ni'a que le benë' Jesucristo ruzí'iru' xibé le ruzá' ládxë'ë queëru' Dios, ate' benë' ga naca' gubáz queë' para uláz queë' Lë' guna' ga ila'yéajlë' bönachi idútë yödzölió Lë', en ilún ca rna xtídzë'ë. ⁶ Bít'sa'li' libí'ili' ládjagaca bönachi yödzölió na', pero na'a nulidzë' Dios libí'ili' para guéquili' queë' Jesucristo.

⁷ Rugapa' Dios libí'ili', yúgu'tëli' zóali' Roma. Dios nadxi'inë' libí'ili', en bulidzë' libí'ili' para gácali' quez queë'. Rinábida'-në' Xúziru' Dios, enca' Xanru' Jesucristo, gunnë' queéli' le ruzá' ládxë'ë queëru', en le ribequi dxi' ládxi'ru'.

Ré'ënë' Pablo tsöjyüë' bönachi queë' Cristo nacu'ë Roma

⁸ Lë' ni risí lahua' ruzúaja' lu guichi: Tu' néquiru' queë' Jesucristo rea'-në' Dios: "Xclenu'" ca naca queéli' yúgu'tëli', ate' ta'guixjö' bönachi idútë yödzölió ca réajlë'ëli' Jesucristo. ⁹ Idú ládxa'a runa' xichinë' Dios, runa' libán que didza' dxi'a ca naca queë' Zxi'inë'. Nózinë' Dios rulídzatica'sa'-në', en rinábida'-në' gaca tsahui' queéli'. ¹⁰ Rinábitica'sida' Dios, channö naca le ré'ënë' Lë', gunnë' neda' lataj uduyú'a' libí'ili'. ¹¹ Caní rinábida'-në' tu' raca ládxa'a ilé'eda' libí'ili' para gaca guna' ga gata' queéli' tu' le unödzjë' Dios Bö' Lá'ayi queéli', le gun ga gácali' tsutsu. ¹² Lë' na' ré'ënda' naca utipa ládxi'ru' turu' ia'turu', tu' réajlë'ëru' Jesucristo yúgu'tëru'.

¹³ Böchi' luzá'ado', ré'ënda' inózili' lë' ni. Zían luzuí bë' ládxa'a guída' ga zóali', pero ga ridxintë na'a bití' runni quia'. Ré'ënda' guída' ga zóali' para guna' ga uzí'ili' xibé libán na' runa', ca na' tu'z'í' xibé ia'bal-la' bönachi yödzölió ni. ¹⁴ Dë' le ral-la' guna' quégaca yúgu'të bönachi, quégaca bönachi nazédagaca, en quégaca bönachi cabí nazédagaca, quégaca bönachi ta'yéajni'i, en quégaca bönachi cabí ta'yéajni'i. ¹⁵ Que lë' ni na', tsca gaca guna', zoa' riböza' guna' ca' libán que didza' dxi'a ga ni' zóali' libí'ili', zóali' Roma.

Yöl-la' huáca zxon que didza' dxi'a

¹⁶ Bití' ca' rutuí'ida' runa' libán que didza' dxi'a, tu' napa yöl-la' huáca queë' Dios para gun ga ulu'lágaca yúgu'të nupa ta'yéajlë' le. Ga risí lo, ré'ënë' Dios ila'yönnë' bönni' judío le, ate' tödi na' ila'yöni ca' bönachi izá'a. ¹⁷ Didza' dxi'a ni rulu'i' rë'u gunë' Dios ga huöácaru' tsahui', channö uyéajlë'ëru' Lë', en bití' gaca chopá ládxi'ru'. Ca naca lë' ni nazúaj ca' lu guichi lá'ayi, rna: "Nu naca tsahui' tu' réajlë' Dios, gata' yöl-la' na'bán que nu na'."

Xíguia' nabága' gaca bönachi

¹⁸ Dios, Nu zoa yehua' yubá, bulu'e lahui bití' rilé'enë' dxi'a yúgu'të le ruá' dö', en le cabí naca tsahui' tun bönachi. Gunë' xíguia' yugu' bönni' na', lu yöl-la' bití' naca tsahui' quégaquië' ta'dá'baguë'ë le naca idútë li. ¹⁹ Caní gaca quégaquië' tu' nalá' lahui lógaca yúgu'të bönachi le naca bë' zoa cazë' Dios, tu' bulu'i' quézinë' Dios lë' ni ga na' nacu'ë. ²⁰ Dza ni'te cate' si' guta' yödzölió, ga ridxintë na'a dza, yugu' le nunë' Dios nácagaca bë' le cabí gaca ilé'ëru' queë' Dios, ca naca yöl-la' huáca idú queë', en le naca cazë' Dios. Que

lë ni na', biti' gaca ila'nné' biti' nabága'gaquië' xíguia'. ²¹ Cate' ni' gulúnbë'ë Dios, biti' gula'yéaj ládxi'gaquië' Lë' ca ral-la' tseaj ládxi'ru'-né' Dios, en biti' gulé' Lë': "Xclenu'." Que lë ni na', cá'asö böáca le gula'zá' ládxi'gaquië', ate' gula'chul-la gula'nítië' tu' nazidi icja ládxi'do'gaquië'. ²² Sal-la' guléquinë' ta'yéajni'inë' yenni', bulu'huóáquië' bönni' biti' bi nózguequinë' ²³ tu' bulu'cá'anë' yöl-la' beni' queë' Dios Nu zóatica'sö, ate' gula'yéaj ládxi'gaquië' budó' guiöj budó' yaga, budó' na' nácagaca ca yugu' bönni' tati cazë', en ca yugu' böa'do' zoa xiligacaba', en ca yugu' böa' guixi' ta'daba' lu yu, en ca yugu' böa' bëla tá'ayöj lé'ëba' lu yu ni.

²⁴ Que lë ni na' Dios guléaj ládxe'ë légaquië' para ilunë' yugu' le ta'zé ládxi'gaquië' le ruá' dö', ate' caní guca, bulu'cá'ana cuíngaquië' lu yöl-la' stu' tuë' len ia'túë'. ²⁵ Guca caní tu' bulu'cá'anë' xtídzë'ë Dios, le naca idútë' li, ate' gula'zí' lu ná'agaquië' tu le cabí nácatë. Gulunë' bal, en gula'yéaj ládxi'gaquië' yugu' le benë' Dios, en caléga Lë cazë' Dios, Nu na' ral-la' gácatica'sö queë' yöl-la' ba. ¡Ca' gaca!

²⁶ Que lë ni na' Dios guléaj ládxe'ë légaquië' para ilunë' yugu' le ta'zé ládxi'gaquië' le ruá' dö'. Yugu' nigula bulu'cá'ananu yöl-la' rizóalen bönni', para ilunnu le ruá' dö'. ²⁷ Lësca' caní gulunë' yugu' bönni' biguíú', bulu'cá'anë' yöl-la' rizóalen nigula, ate' gula'zé ládxi'gaquië' le ruá' dö' túnlenë' tuë' ia'túë', en gulunë' le tun ga nu rutu'i, tu' gula'cuá'lenë' la' luzá'a bönni'gacasë'. Que lë ni na' gula'gu'i gula'záquië' lu xipéla'gaquië' yugu' bönni' gulunë' caní tu' bubí'ë Dios quégaquië' ca sa'yéaj dul-la' na' gulunë' tu' nucá'anagaquië' Dios.

²⁸ Tu' cabí gulé'ënnë' ilunë' Dios bal, que lë ni na' guléaj ládxe'ë Dios légaquië' para ila'zá' ládxi'gaquië' le biti' naca dxi'a, en ilunë' le cabí nazaca'.

²⁹ Túntica'së' yúgu'të le cabí naca tsahui', en yugu' le naca stu'.

Tunë' le ruá' dö', en tu'huídi'në'.

Biti' ta'lé'enë' dxi'a luzá'agaquië', en tu'zxé'enë' luzá'agaquië'.

Tutië' luzá'agaquië', en ta'díl-lalenë' luzá'agaquië'.

Ta'zí' yé'enë' bönachi, en zi'të nácagaquië' xihui'.

Ta'nnë' que luzá'agaquië'.

³⁰ Ta'nnë' le cabí nácatë que luzá'agaquië'.

Biti' ta'lé'enë' Dios dxi'a, en nácagaquië' bönni' bizxaj.

Tun cuíngaquië' lo, en tun ba zxön cuíngaquië'.

Ta'guiljé' le ruá' dö' ilunë', en ta'dá'baguë'ë xuz xiná'agaquië'.

³¹ Nácagaquië' bönni' biti' ta'yéajni'inë', en tun díjtjagaquië' xtídza'gaquië'.

Biti' nácagaquië' dxi'i ládxi' ca ral-la' ilácagaquië'.

Biti' tu'niti lahuë' luzá'agaquië'.

Biti' tu'huechi' ládxi'gaquië' luzá'agaquië'.

³² Nózguequi quézinë' le nuzóë' tsaz Dios ca ral-la' gaca quégaca nupa tun yugu' le caní, ilátigaca tsaz. Sal-la' nóziguequinë' lë ni, calégasö caní tunë', pero ta'yaza ládxi'gaquië' nupa tun ca' caní.

2

Naca tsahui' ichúguië' Dios quégaca bönachi gátigaca

¹ Que lë ni na', biti' gaca ubéaj tsahui' cuinu', núti'tës nu nacu', richugu bë'u luzó'o. Cate' richugu bë'u luzó'o, rusubaga' cuinu' xíguia', tu' richugu bë'u luzó'o, en lësca' runu' lí'. ² Nöz quéziru' ca ruchi'a rusöróë' Dios. Naca idútë' li ca ruchi'a rusöróë' nupa tun le ruá' dö'. ³ Li' richugu bë'u nupa tun le ruá' dö', en tuz ca runu' lí'. ¿Naru' réquitsenu' uló' lí' cate' uchi'a usöróë' Dios? ⁴ ¿Naru' rucá'anatso' cá'asö yöl-la' dxi'i ládxi' idú queë' Dios, en yöl-la' riböza zxön ládxi' queë', en ca runë', ridzenë' para lenë' lí'? ¿Naru' cabí nöz quézinu' ruzá' ládxe'ë Dios quiu' yöl-la' dxi'i ládxi' queë' para gunë' ga ubí'i ládxi'u? ⁵ Lu yöl-la' ládxi'do' zidi quiu' biti' rubí'i ládxi'u. Que lë ni na' rusubaga' cuinu' xíguia' gunë'

Dios li' cate' uchi'a usöröë' bönachi, ate' gaca bë' naca ca ral-la' gunë' Dios cate' ichúguië' quégaca bönachi ilátigaca. ⁶ La' dza ní'isö ubí'i cazë' Dios que queë' bönni' tsca naca le gulunë' tu tuë'. ⁷ Ünödzejë' yöl-la' na'bán idú quégaca nupa túntica'sö le naca dxi'a, tu' tu'í ládxi'gaquië' ulu'zi'ë xibë' Dios, en ulu'rúajë' dxi'a lahuë' Lë', en ila'cuá'tica'së'. ⁸ Lu yöl-la' rilé queë', Dios gunë' xíguia' nupa ta'dá'baga', en biti' té'ëni ilún ca rnna le naca idútë li, pero tun ca rnna le cabí naca tsahui'. ⁹ Ila'gu'í ila'záquië', en hu'inida' ládxi'ë yúgu'të bönni' tunë' le ruá' dö'. Ga risí lo gaca caní quégaca bönachi judío, en gaca ca' caní quégaca bönachi izá'a. ¹⁰ Dios gunë' ga ilácagaquië' bica' ba, en gunë' légaquië' bal, en gu'ë le cuéqui dxi ládxi'gaquië' yúgu'të bönni' tunë' le naca tsahui'. Ga risí lo gunë' caní quégaca bönachi judío, en gunë' ca' caní quégaca bönachi izá'a.

¹¹ Caní uchi'a usöröë' Dios bönachi, ate' Lë' biti' runë' bal le ta'nnasö bönachi. ¹² Yúgu'të bönni' na' biti' bila'yönnë' le rinná bë' xibá queë' Dios, en gulunë' dul-la', lësca' ilátië', sal-la' biti' téquibe'enë' gula'dá'baguë'ë le rinná bë' xibá na', ate' yúgu'të bönni' bila'yönnë' le rinná bë' xibá queë' Dios, en gulunë' dul-la', Lë' uchi'a usöröë' légaquië' ca naca le rinná bë' xibá na'. ¹³ Caní gaca, tu' cabí nácagaquië' tsahui' lahuë' Dios yugu' bönni' ta'yónisë' xibá queë', pero ulu'huóaca tsahui' lahuë' Lë' yugu' bönni' tunë' ca rnna xibá queë'. ¹⁴ Bönni' na' biti' nácagaquië' judío, en biti' bila'yönnë' le rinná bë' xibá queë' Dios, pero tun cazë' ca rinná bë' xibá queë' na', bönni' ni, sal-la' biti' bila'yönnë' le rinná bë' xibá queë' Dios, zóalen légaquië' tu xibá le nuzóë' Dios icja ládxi'do'gaquië'. ¹⁵ Nupa ni tu'lu'í lahui le run xibá na' nazúaj lu icja ládxi'do'gaquië'. Le yu'u icja ládxi'do'gaquië' naca bë' naca caní. Ca ta'zá' ládxi'gaquië', tu'zéguië' luzá'agaquië' didza', o tu'béaj tsahui' luzá'agaquië' tuë' ia'túë'. ¹⁶ Caní ubi'ë Dios quégaquië' dza ní' uchi'a usöröë' lu na' Jesucristo yugu' le núngaquië', en le gula'zá' ládxi'gaquië' yúgu'të'. Caní rusëdi didza' dxi'a runa' libán que.

Yugu' bönni' judío, en xibá queë' Dios

¹⁷ Núlöli' rnnali' nácali' judío, en ruzxöni ládxi'li' xibá queë' Dios, en run ba zxön cuinli' tu' núnbë'ëli'-në' Dios, ¹⁸ nöz quézili' le ré'ënë' Dios gunli', en le rusëdi libí'ili' xibá queë', en réquibe'eli' le nácaterö dxi'a. ¹⁹ Réquili' gaca ulu'í'ili' nöza dxi'a nupa ta'dá ga yúbölö ca nu nachul-la lahui, en gaca uzéajni'ili' nupa nachul-la nanítigaca. ²⁰ Réquili' gaca usédili' nupa biti' ta'yéajni'i, en nupa ta'yéajni'i láti'do'os, tu' dë lu ná'ali' xibá queë' Dios le rusëdi bönachi ca naca yöl-la' réajni'i idú, en le naca idútë li. ²¹ Na'a, libí'ili' rusédili' ia'zica'rö bönachi. ¿Naru' cabí ral-la' usëdi cuinli'? Libí'ili' rnnali': "Biti' cuanu'." ¿Naru' ribántsali' libí'ili'? ²² Rnnali' ca': "Biti' gunu' dul-la' le riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' biti' rilé'eli' dxi'a yugu' budó' guió'j budó' yaga. ¿Naru' ribántsali' le dzö'ö lu yudo' quéguequi? ²³ Run ba zxön cuinli' tu' dë lu ná'ali' xibá queë' Dios. ¿Naru' rucá'anatsali' Dios cá'asö, en rigútsjali' xibá le gunná bë'ë Lë'? ²⁴ Nazúaj lu guichi lá'ayi ca runli', rnna: Ní'a que le runli' libí'ili' nupa biti' nácagaca judío ta'nnë' zi' queë' Dios.

²⁵ Le nácate ruzi'u xibé lë na' narugu lu xipélu'u le naca bë' nazí' lu ná'ali' xibá queë' Dios channö runu' ca rinná bë' xibá na' queë' Dios, pero channö riguitsju' xibá le gunná bë'ë Lë', nuhuóacu' ca tu bönni' biti' néquinë' queë' Dios. ²⁶ Que lë ni na', channö zoë' tu bönni' biti' narugu lu xipélë'ë lë na' naca bë' nu nazí' i xibá queë' Dios, pero runë' idútë ca rinná bë' xibá queë' Lë', bönni' ni náquië' lahuë' Dios ca tu bönni' narugu caz lu xipélë'ë lë na' naca bë' sal-la' biti' narugu lu xipéla' cazë'. ²⁷ Bönni' na' biti' narugu lu xipélë'ë lë na' naca bë' nu nazí' i xibá queë' Dios, pero runë' idú ca rinná bë' xibá na' queë' Dios, ca runë' bönni' ni rulu'í' nabága'li' libí'ili' xíguia', sal-la' dë lu ná'ali' xibá na' queë' Dios, en narugu lu xipéla'li' lë na' naca bë' nazí' lu ná'ali' xibá na' queë' Dios, pero biti' runli' ca rinná bë' xibá queë' na'. ²⁸ Biti' náquië' idú bönni' judío tu bönni' nácasë' caní lu yöl-la' bönáchisö queë', ate' biti' naca idú lë na' naca bë' le narúgusö lu xipélë'ë nu bönni'. ²⁹ Náquië' idú

bönni' judío bönni' na' náquië' caní lu icja ládxi'da'ahuë', en le naca idú le narugu lu xipélë'ë nu bönni' le naca bë' nu nazí'i xibá queë' Dios, naca tu le yu'u icja ládxi'do'gaca bönachi. Naca que bö' naca cázaru', en calëga que yöl-la' bönáchisö queëru'. Nu bönni' náquië' caní, biti' tun bönachi lë' bal, pero Dios caz gunë' lë' bal.

3

¹ Channö caní naca, ¿bizxi ruzi'tsë' xibé tu bönni' tu' náquië' judío? ¿Bizxi ruzi'ë xibé tu bönni' judío tu' narugu lu xipélë'ë? ² Yenni' ruzi'ë xibé, en zían ca ruzi'ë xibé. Le nácatërö lo, Dios gulu'ë lu ná'agaquië' yugu' bönni' judío didza' lá'ayi queë'. ³ Bal-lë' biti' ta'yéajlë'ë Dios. ¿Naru' réquitsenu' biti' gunë' Dios ca rnna xtídzë'ë tu' cabí ta'yéajlë'ë Lë'? ⁴ ¿Biti' ca' gaca! Ral-la' guéquibe'eru' rúntica'së' Dios ca rnna didza' bë'ë, sal-la' ta'z'í yë' yúgu'të bönachi. Ca naca queë' nazúaj lu guichi lá'ayi le rnna: Gaca bë' nacu' tsahui' ni'a que didza' ru'u, en uruju' tsahui' channö nu uchi'a usöró Li'.

⁵ Cate' runru' le ruá' dö', Dios rnnë' biti' naca tsahui' le runru'. Lë ni naca bë' tsahui' náquië' Dios. Nacuá' nupa ta'nná: "Le cabí naca tsahui' le runru' naca bë' náquië' Dios tsahui', ate' que lë ni na' biti' ral-la' gunë' rë'u xíguia'." ⁶ ¿Biti' ca' naca caní! La'tu' ruzi'ë xibé Dios le ruá' dö' runru', ¿nacxi caz gaca uchi'a usöróë' bönachi yödzölió ni?

⁷ Cate' nu rizi' yë', Dios rnnë' biti' ru'i didza' nu na' ca runë' Lë'. Lë ni naca bë' naca idútë li didza' ru'ë Dios. Ta'nnë' bönni' le ta'z'í yë'ë légaquië' run ga gaca queë' Dios yöl-la' ba, ate' biti' ral-la' ichúguië' quégaquië', cabí innë' nácagaquië' bönni' dul-la'. ⁸ ¿Naru' huannátsaru': "Guá'aru' dö' para gaca le naca dxi'a"? Nupa na' ta'nnë' zi' queëru' ta'nná rusédiru' caní, ate' tsahui' naca ichúguië' Dios quéguequi.

Yúgu'tëru' nabága'ru' dul-la'

⁹ ¿Bizxi caz innaru' na'a? Ca naca queëtu' netu', bönni' judío, ¿nácárotu' tsahui' ca ia'z'ica'rö bönachi? ¿Biti' ca' nácatu'! Chibulu'a ni, nabága'gaca dul-la' bönachi judío, ate' nabága'gaca ca' dul-la' bönachi izá'a. ¿Yúgu'të' nabága'gaquië' dul-la'! ¹⁰ Nazúaj lu guichi lá'ayi le rnna:

Cuntu nu zoa naca tsahui', cuntu nu caz.

¹¹ Cuntu nu réajni'i.

Cuntu nu riguilaj Dios.

¹² Yúgu'të' ta'dé' ga yúbölö.

Yúgu'të' nanítigaquië'.

Cuntu nu run le naca dxi'a, cuntu nu caz.

¹³ Lubá'agaquië' nácagaca ca yeru ba nayáljagaca.

Len yöl-la' rinnësö quégaquië' ta'z'í yé'enë' luzá'agaquië'.

Didza' rirúaj ruá'agaquië' naca ca le yudzu láya'ba' bëla s'ínia'.

¹⁴ Len yugu' didza' tu'ë, tu'didza' yúdxinë' bönachi,

en ta'nnë' zi'ë quégaca bönachi na'.

¹⁵ Nacu'ë sina' tútigaquië' bönachi.

¹⁶ Gátitës ga ta'dödë' tu'sunítie', en tu'saca' zi'ë luzá'agaquië'.

¹⁷ Biti' ta'zéqui'në' ila'bözë' dxí'ado'.

¹⁸ Biti' ca' tádxinë' Dios.

¹⁹ Nóziru' yúgu'të didza' ni bë'ë Dios, rë' yugu' bönni' na' dë lu ná'agaquië' xibá queë'. Que lë ni na' cuntu nu gaca inná biti' nabága' dul-la', ate' yúgu'të bönachi idútë yödzölió, uchi'a usöróë' Dios quéguequi. ²⁰ Tu'í ládxi'gaquië' yugu' bönni' judío ilunë' yugu' le rinná bë' xibá queë' Dios para ulu'huóáquië' tsahui', pero cuntu nu huóaca tsahui' caní, tu' nuzóë' Dios xibá queë' para guéquibe'eru' nabága'ru' dul-la'.

Uláru' tu' réajlë'ëru' Jesucristo

²¹ Na'a, chibulu'i lahui ca gaca huöácaru' tsahui' lahuë' Dios. Biti' gaca huöácaru' tsahui' tu' runru' ca rinná bē' xibá queë' Dios, sal-la' lu xibá queë' na', en lu guichi lá'ayi ga nazúajgaca le gula'nné' bönni' gulu'ë didza' uláz queë' Dios, ru'i didza' ca gaca huöácaru' tsahui'. ²² Dios caz runé' ga huöácaru' tsahui' tu' réajlë'ëru' Jesucristo, ate' guné' ga ulu'huöáca tsahui' yúgu'të nupa ila'yéajlë' Lë'. Tuz ca nácgaca yúgu'të bönachi ²³ tu' núnqaquië' yúgu'të' dul-la', en biti' ca' nácgacaquië' tsahui' ca na' náquië' Dios idú tsahui'. ²⁴ Dios ruzá' ládxe'ë queëru', en nunsé' rë'u tsahui' tu' böá'uë' Jesucristo rë'u. ²⁵ Dios budödë' Jesucristo uláz queëru'. Lë' bulaljë' xichönë', le rigúa dul-la', lë na' uzi'iru' xibé channö uyéajlë'ëru' Lë'. Caní benë' Dios para gaca bē' náquië' tsahui' Lë' sal-la' lu yöl-la' riböza zxön ladxi' queë' budódise' cá'asö yugu' dul-la' benru' dza ni'te. ²⁶ Caní benë' Dios, bulu'i cuiné' tsahui' dza ni zóaru' na'a, ate' rugá'anë' tsahui' sal-la' rugúë' dul-la' nabága'gaca bönachi, runé' ga tu'huöáca tsahui' nupa ta'yéajlë' Cristo.

²⁷ ¿Naru' huácatsö gun ba zxön cuinru' ca naca queëru'? ¿Biti' ca' gácaru'! ¿Bizx que na'? Naca tu' nuláru', calëga tu' runru' ca rinná bē' xibá queë' Dios, pero tu' réajlë'ësi ru' Jesucristo. ²⁸ Na'a, rusáca' ru' queëru' nuhuöáquië' tsahui' tu' bönni' tu' réajlë'ë Jesucristo, en calëga tu' runé' ca rinná bē' xibá queë' Dios.

²⁹ Ca naca Dios, ¿náquië' Dios quégacasö bönachi judío? ¿Naru' cabí náquië' ca' Dios quégaca bönachi izá'a? Ön, náquië' ca' Dios quégaca bönachi izá'a na' ³⁰ tu' zoa Tuz Nu naca Dios. Dios ni guné' ga ulu'huöáquië' tsahui' yugu' bönni' judío tu' ta'yéajlë'ë Jesucristo, yugu' bönni' na' narugu lu xipéla'gaquië' lë na' naca bē' nu nequi queë' Dios, en lësca' caní guné' ga ulu'huöáquië' tsahui' yugu' bönni' zi'tu' tu' ta'yéajlë'ë Jesucristo, en biti' narugu lu xipéla'gaquië' lë na' naca bē'. ³¹ Na'a, channö nuláru' tu' réajlë'ësi ru' Jesucristo, ¿ba nagá'ana cá'asö xibá queë' Dios? ¿Biti' ca' naca ca', pero nagá'anarö tsutsu xibá queë' na'!

4

Le benë' Abraham rusedi rë'u

¹ ¿Bizxi caz innaru' na'a? ¿Bizxi bidéli'në' Abraham, xuz xtó'otu' netu', nácatu' judío? ² La'tu' böáquië' tsahui' Abraham tu' zoa le ben cazé' lë', gunna gun ba zxön cuiné', pero calëga lahuë' Dios. ³ Ca naca lë ni nazúaj lu guichi lá'ayi, le rnna: "Abraham guyéajlë'ë Dios, ate' que lë ni na' Dios benë' ga böáquië' tsahui' lahuë' Lë'." ⁴ Channö zoa nu bönni' runé' xichinru', le riguízjaru'-në' bití' naca tu le ruzá' ládxi'ru' queë', pero naca tu le ral-la'ru' queë' bönni' na'. ⁵ Lësca' caní channö tu bönni' réajlë'ë Dios, sal-la' bití' bi dxin benë' bönni' na', Dios, Nu run ga ulu'huöáca tsahui' bönachi bití' nácgaca tsahui', rnnë' náquië' tsahui' lahuë' Lë' bönni' na', tu' réajlë'ë Lë'. ⁶ Lësca' caní bē'ë didza' David ca náquië' bica' ba bönni', Dios rnnë' náquië' tsahui' sal-la' bití' bi dxin nunë' bönni' na'. ⁷ Caní gunné' David:

¿Bica' ba bönni' na' Dios runiti lahuë' le bití' naca tsahui' nunë', en rugúë' yugu' dul-la' nabáguë'ë!

⁸ ¿Bica' ba bönni' na', Dios bití' rusubáguë'ë lë' xíguia' tu' nözi dul-la' benë' bönni' na'!

⁹ ¿Naru' nácgacsë' bica' ba bönni' narugu lu xipéla'gaquië' lë na' naca bē', o nácgaca ca' caní nupa na' cabí narugu lë na' lu xipéla'gaquië'? Chigunná cázaru' böáquië' Abraham tsahui' lahuë' Dios tu' guyéajlë'ë Lë'. ¹⁰ ¿Bátaxi böáquië' tsahui' caní Abraham? ¿Naru' guca cate' ni' chinarugu lu xipélë'ë lë na' naca bē', o guca zí'alö? Bití' guca cate' chinarugu lu xipélë'ë, pero zí'alö guca. ¹¹ Abraham guyéajlë'ë Dios cate' ni' bití' narúguni lu xipélë'ë lë na' naca bē'. Gudödi na' gurugu lu xipélë'ë lë na' naca bē', le rulu'isö chinuhuöáquië' tsahui' lahuë' Dios. Guca caní para gáquië' Abraham ca xúzgaquië' yugu' bönni' ila'yéajlë'ë Dios sal-la' bití' narugu lu xipéla'gaquië' lë na' naca bē'. Tu' ta'yéajlë'ë Dios, huáca inné' Dios nácgacaquië' tsahui' lahuë' Lë'. ¹² Náquië' Abraham xuz

xtó'ogaquië' yugu' bönni' judío ta'yéajlë'ë Dios. Calégasö náquië' xúzgaquië' bönni' na' narugu lu xipéla'gaquië' lë na' naca bë', pero lësca' náquië' xúzgaquië' bönni' na' tunë' ca benë' Abraham, ta'yéajlë'ë Dios ca na' benë' Abraham cate' ni' biti' narúguni lu xipélë'ë lë na'.

Le guxzí' lu në'ë Dios gata' queéru' tu' réajlë'ëru' Lë'

¹³ Guxzí' lu në'ë Dios bi unödzejë' queë' Abraham, en quégaca xzí'ini xi'sóë', gata' quégaquië' la' yödzölió nisö. Gaca caní, caléga tu' tunë' ca rinná bë' xibá queë' Dios, pero tu' nuhuóacagaquië' tsahui' lahuë' Lë' tu' ta'yéajlë'ë Lë'. ¹⁴ La'tu' gata' yödzölió ni quégacasö nupa tun ca rinná bë' xibá queë' Dios, biti' gun bayudxi nu tséajlë' Lë', ate' nítisö gaca le guxzí' lu në'ë Dios. ¹⁵ Rulu'i xibá queë' Dios rë'u nabága'ru' xíguia', le run ga ichúguië' Dios queéru' gátiru'. Ga ni' biti' ridxini xibá queë' na', biti' gaca ila'dá'baga' bönachi le rinná bë' xibá na'.

¹⁶ Que lë ni na' uzí'iru' xibé le guxzí' lu në'ë Dios tu' réajlë'ëru' Lë', para gaca bë' naca tu le ruzá' ládxë'ë queéru'. Caní naca, para gaca bë'da' gata' quéguequi yúgu'të xzí'ini xi'sóë' Abraham lë na' guxzí' lu në'ë Dios, calégasö quégaquië' bönni' na' dë lu ná'agaquië' xibá queë' Dios, pero lësca' quégaca nupa ta'yéajlë' Dios ca na' guyéajlë'ë Abraham Dios. Abraham na' náquië' ca xuz xtó'oru' yúgu'tëru' rë'u, réajlë'ëru'-në' Dios. ¹⁷ Caní náquië' ca na' nazúaj lu guichi lá'ayi, le rnna: "Nuzóa' li' ca xúzgaca bönachi idütë yödzölió."

Caní naca, lahuë' Dios, Nu na' guyéajlë'ë Abraham, náquië' xuz gudödi queéru' yúgu'tëru'. Dios ni rusubanë' nupa chinátigaca, en ru'ë didza' que nu biti' zuíni tsca chizóa caz nu na' biti' zuíni.

¹⁸ Caní naca tu' gudxë' Dios Abraham na': "Ziántërö ila'cuá' xzí'ini xi'sú'." Abraham guyéajlë'ë Dios, en benë' löza lë na' guxzí' lu në'ë Dios, sal-la' biti' guca il'éenë' lë na' runë' löza, ate' caní guca, bidéli'në' náquië' xúzgaca bönachi idütë yödzölió. ¹⁹ Biti' guca Abraham chopá ládxë'ë ca na' réajlë'ë Dios, sal-la' chiyu'ë ca tu gayuá' iz, en yöjnenë' ca naca que le naca cazë', chinati caz tu' chinagúladë'ë, enca' ca naca queénu Sara queë', nácanu nigula huödx. ²⁰ Biti' guca chopá ládxë'ë, en biti' gúquië' tu' caréajlë' ca naca le guxzí' lu në'ë Dios gunë' queë', pero bidipa ládxë'ë tu' guyéajlë'ë Dios, ate' gulu'ë Dios yöl-la' ba. ²¹ Idú ládxë'ë benë' löza Dios, napë' yöl-la' huáca gunë' idütë lë na' guxzí' lu në'ë. ²² Que lë ni na', tu' guyéajlë'ë Abraham Dios, Dios buzóë' queë' náquië' tsahui'.

²³ Nazúaj lu guichi lá'ayi le rnna: "Dios buzóë' queë' náquië' tsahui'." Nazúaj lu guichi caní, calégasö para uzi'ë xibé Abraham, ²⁴ pero para uzí'iru' xibé ca' rë'u. Rë'u ni, Dios gunë' ga huóácaru' tsahui' lahuë' Lë' channö uyéajlë'ëru' Lë', busubanë' Xanru' Jesús lu yöl-la' guti. ²⁵ Jesús na', Dios budödë' Lë' para gútië' tu' nözi dul-la' nabága'ru', ate' busubanë' Lë' lu yöl-la' guti, para gaca gunë' ga huóácaru' tsahui' lahuë' Lë'.

5

Le rata' queéru' tu' rnnë' Dios nuhuóácaru' tsahui'

¹ Na'a, rnnë' Dios nuhuóácaru' tsahui' lahuë' Lë' ni'a que le benë' Xanru' Jesucristo, channö réajlë'ëru' Lë', ate' que lë ni na' nuhuóácaru' tuz len Lë'. ² Tu' réajlë'ëru' Jesucristo, ruzí'iru' xibé le ruzá' ládxë'ë Dios queéru', le rutipa ládxi'ru'. Rudzéjaru' tu' runru' löza uzí'iru' ca' xibé yöl-la' zxön queë' Dios. ³ Calégasö caní rudzéjaru', pero rudzéjaru' ca' cate' riguí'i rizáca'ru', tu' chinóziru' le riguí'i rizáca'ru' rusedi rë'u cózaru' zxön ladxí'. ⁴ Cate' ribózaru' zxön ladxí' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' rë'u. ⁵ Cate' runru' löza Lë', biti' ca' raca chopá ladxí'ru'. Caní naca, tu' nuhuólaj nudzë'e icja ladxí'do'oru' yöl-la' nadxí'i queë' Dios rë'u. Runë' Dios Bö' Lá'ayi, Bönni' gusól-lë'ë Dios queéru' ga raca caní.

⁶ Cate' ni' biti' ca' guca uláru' rácasö queéru', cate' gúla'rö dza queë', Cristo gútië' uláz queéru', ni' nácaru' bönachi dul-la'. ⁷ Cuntu nu gué'ëni gati uláz queë' tu' bönni'

tsahui'. Nadxi ca' nu urugui gati uláz queé' tu bönni' náquié' idú dxi'a. ⁸ Dios rulu'íné' rē'u ca nadxí'ide'ené' rē'u, tu' gútié' Cristo uláz queéru' cate' ni' nácaru' bönni' dul-la'. ⁹ Chinuhuóácaru' tsahui' lahué' Dios tu' bulaljé' Cristo xichöné', gútié' uláz queéru'. Que lē ni na' chinácada' löza usölé' Lē' rē'u lu dza ichúguié' Dios quégaca bönachi dul-la' gátigaca. ¹⁰ Cate' ni' biti' rilé'eru'-né' Dios dxi'a, gútié' Zxí'iné' Dios uláz queéru' para huóácaru' tuz len Lē'. Na'a, tu' zoé' nabané', en chinuhuóácaru' tuz len Lē', chinácada' löza uláru'. ¹¹ Rudzéjaru' lahué' Dios ni'a que le bené' Xanru' Jesucristo, tu' nuhuóácaru' tuz len Dios ni'a que lē na' bené' Lē'.

Le bené' Adán, en le bené' Cristo

¹² Guyú'u dul-la' yödzölió ni tu' nözi le bené' tuzé' bönni', ate' tu' bené' dul-la', guyú'u ca' yöl-la' guti. Que lē ni na' ilátigaca yúgu'té bönachi tu' nabága'gaca yúgu'té bönachi dul-la'. ¹³ Zí'atélö ga bidxinté xibá queé' Dios, gulún bönachi yödzölió ni dul-la', pero biti' busubágué'ë Dios bönachi na' xíguia' ca nupa ta'dá'baga' xibá queé' tu' nözi dul-la' na', tu' biti' ridxini xibá queé' quégaquié'. ¹⁴ Ga gudela' zoé' Adán ga bidxinté zoé' Moisés gulati yúgu'té bönachi tu' gula'baga' dul-la', sal-la' biti' gula'dá'baga' tu le gunná bē'ë Dios ca bené' Adán. Nácagaca yúgu'té bönachi tuz len Adán tu' nácagaca zxi'ini xi'sóé'. Lē ni rulu'i rē'u ca ilaca tuz len Cristo yúgu'té nupa ila'yéajlé' Lē'.

¹⁵ Le rúnнасé' queéru' Dios biti' naca ca le guca queéru' tu' nözi dul-la' bené' Adán. Tu' nözi dul-la' bené' tuzé' bönni', ilátigaca yúgu'té bönachi. Dxi'atērö naca le ruzá' ládxé'ë queéru' Dios, en le rúnнасé' queéru'. Ruzá' ládxé'ë queéru' lē ni ni'a que le bené' yetuzé' Bönni', Jesucristo. ¹⁶ Le rúnнасé' Dios queéru' biti' naca ca le guca queéru' tu' nözi dul-la' na' bené' tuzé' bönni' na'. Le guchúguié' Dios queé' Adán gátie' tu' nözi dul-la' na' bené', guchúguié' ca' Dios quégaca yúgu'té bönachi gátigaca. Le rúnнасé' Dios queéru' naca para huóácaru' tsahui' lahué' Lē' sal-la' nabága'ru' dul-la' zían. ¹⁷ Guyú'u yöl-la' guti tu' nözi dul-la' bené' tuzé' bönni'. Nácaterö löza ila'deli' yöl-la' na'bán nupa ulu'huóaca tsahui' lahué' Dios tu' zoa le ruzá' ládxé'ë queéru' Dios ni'a que le bené' yetuzé' Bönni', Jesucristo.

¹⁸ Dios guchúguié' quégaca yúgu'té bönachi ilátigaca tu' nözi dul-la' bené' tuzé' bönni' na'. Lēscá' caní gaca ulu'huóaca tsahui' yúgu'té bönachi ni'a que le naca tsahui' bené' yetuzé' Bönni' na', gata' yöl-la' na'bán idú quégaquié'. ¹⁹ Bulu'huóaca huen dul-la' bönachi zían tu' cabí bené' tuzé' bönni' ca rnna xtídzé'ë Dios. Lēscá' caní ulu'huóaca tsahui' bönachi tu' bené' yetuzé' Bönni' na' ca rnna xtídzé'ë Dios.

²⁰ Guyú'u xibá queé' Dios yödzölió ni para gaca bē'da' nabága'gaca bönachi dul-la'. Tu' guca bē'rö nabága'gaca dul-la', guca bē'rö ca' zxöntērö naca le buzá' ládxé'ë Dios quégaca bönachi. ²¹ Guta' yöl-la' huáca unná bē' que dul-la' guti rē'u. Lēscá' caní le ruzá' ládxé'ë Dios queéru' napa yöl-la' huáca gun ga huóácaru' tsahui' lahué' Lē', ate' gata' yöl-la' na'bán idú queéru' ni'a que le bené' Xanru' Jesucristo.

6

Naca tsca chinátiru' para cabirö gunru' dul-la' tu' nabániru'-né' Jesucristo

¹ ¿Bizxi caz innaru' na'a? ¿Naru' gúntsaru' dul-la' para gáta'rö queéru' le ruzá' ládxé'ë Dios queéru'? ² ¿Biti' gun cázaru' ca! Naca queéru' ca tsaz chinati cázaru' para cabirö gunru' dul-la'. ¿Naru' gúntica'siru' dul-la'? ³ ¿Naru' cabí nózili' ca na' naca queéru'? Channö bidílaru' nisa para huóácaru' tuz len Cristo, lē na' bidílaru' nisa rulu'i rē'u chigudódiru' lu yöl-la' guti tsözxón len Lē'. ⁴ Ca na' guca, gútilenru'-né' Cristo tsözxón, lēscá' caní bigáchi'lenru'-né' tsözxón niu' yeru ba cate' ni' bidílaru' nisa. Ca na' busubané' Dios Cristo lu yöl-la' guti len yöl-la' huáca zxón queé', lēs caní ca' rē'u nubánlenru'-né' Jesús tsözxón para gácaru' bönachi idúté cubi queé'.

⁵ Channö nunru' Cristo tsözxón, gútiru' ca na' gútié' Lë', lësca' caní gunru'-në' tsözxón, ubanru' lu yöl-la' guti ca na' bubanë' Lë'. ⁶ Chinóz quéziru' lë ni, yöl-la' bönachi queéru' le guzóa zí'alö gudá'len Lë' tsözxón lë'e yaga cruz, para initi yöl-la' bönachi queéru' na' bénlenru' le dul-la', para cabirö inná be'e le naca dul-la' rë'u. ⁷ Channö nácaru' tuz len Nu na' guti tu' nözi dul-la', nuhuóácaru' tsahui' lahuë' Dios tu' cabirö nabága'ru' dul-la' na', ate' bíti'rö yú'uru' lu na' dul-la'. ⁸ Na'a, channö nátilenru'-në' Cristo tsözxón, réajlë'ëru' ubánlenru'-në' ca' tsözxón, ⁹ tu' chinóziru' bubanë' Cristo lu yöl-la' guti, en bíti'rö gátie'. Que lë ni na' bíti'rö bi gaca gun yöl-la' guti na' queë' Lë'. ¹⁰ Ca na' guca, gútié' Lë', tu luzuísö gútié' tu' nözi dul-la' quégaca yúgu'të bönachi, pero ca na' naca, zoë' nabanë', nabánlenë' Dios. ¹¹ Lësca' caní ral-la' usáca'li' queéli' naca queéli' ca chinati cázali' para cabirö gunli' dul-la', pero zóali' nabanli' para gunli' ca rnna xtídzë'ë Dios tu' nácali' tuz len Xanru' Jesucristo.

¹² Que lë ni na', bití' gü'ili' lataj le naca dul-la', para cabí gun ga gunli' dul-la' lu le naca cázali' le gati caz. Bití' gunli' ca naca le rizé ládxi'li' le ruá' dö', lu le naca cázali'. ¹³ Bití' udödi cuinli' lu dul-la', bití' gunli' le ruá' dö', pero guli'dödi cuinli' lu në'ë Dios tu' nubanli' lu yöl-la' guti, en guli'dödi lu në'ë idútë le naca cázali' para ugúnlenë' le le naca dxi'a. ¹⁴ Bití' gü'ili' lataj le naca dul-la', para cabí gun ga gunli' dul-la', tu' nuzóë' Dios libí'ili', calëga para inná be'e libí'ili' xibá queë', pero para inná be'e libí'ili' le ruzá' ládxi'ë queéru'.

Le rucudzu' didza' ca naca que nu bönni' nadó'o

¹⁵ ¿Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queë' Dios rë'u, pero rinná be'e le ruzá' ládxi'ë Dios rë'u? ¿Bití' ca' gunru' caní! ¹⁶ Chinóz quézili' dxi'a channö udödi cuinli' lu në'ë nu bönni' para gácali' bönni' nadó'ogaca queë', en gunli' ca rnna xtídzë'ë, tsaz nácali' bönni' nadó'ogaca queë' bönni' na' runli' ca rnna xtídzë'ë. Lësca' caní gaca channö udödi cuinli' para gunli' dul-la' le gun ga gátili', o channö udödi cuinli' para gunli' ca rnna xtídzë'ë Dios, Nu gun ga huóácali' tsahui'. ¹⁷ Na'a, ¡Xclenë' Dios! Sal-la' zí'alö gúcali' bönni' nadó'ogaca lu na' dul-la', na'a idú ládxi'li' runli' ca rinná bë' xibá na' budödi cuinli' lu në'e. ¹⁸ Tu' chinulali' lu na' dul-la', nuhuóácali' ca yugu' bönni' nadó'ogaca lu na' le naca dxi'a. ¹⁹ (Ruí'ilena' libí'ili' didza' ca tuí' didza' bönachi, tu' cabí réajni'ili' idútë lu yöl-la' bönachi queéli'.) Zí'alö budödi cuinli' len idútë le naca cázali' lu na' le ruá' dö', en lu na' le cabí naca tsahui', ate' gúcali' ca yugu' bönni' nadó'ogaca lu në' eguequi, en benli' xichini le ruá' dö' na'. Na'a, guli'dödi idútë le naca cázali' lu na' le naca tsahui', para gácali' ca yugu' bönni' nadó'ogaca lu në'e, en gunli' xichini lë na' naca tsahui' para gácali' bönachi narúajgaca quez queë' Dios.

²⁰ Cate' ni' nácali' ca yugu' bönni' nadó'ogaca lu na' dul-la', bití' benli' xichini le naca tsahui'. ²¹ Na'a, ¿naru' buzí'itsali' xibé lë na' benli' zí'alö? Na'a lë na' benli' run ga rutu'ili', en run ga nu gati tsaz. ²² Na'a chinulali' lu na' dul-la', en nácali' ca yugu' bönni' nadó'ogaca queë' Dios, en ruzí'ili' xibé le run ga nácali' bönachi narúajgaca quez queë' Dios, en le run ga dë queéli' yöl-la' na'bán idú. ²³ Lazxaj nu run dul-la' naca yöl-la' guti, pero le rúnnasë' Dios queéru' naca yöl-la' na'bán idú, le rata' queéru' tu' nácaru' tuz len Xanru' Jesucristo.

7

Le rucudzu' didza' yöl-la' nutsaga na'

¹ Bócha'ado', núlöli' núnbë'ëli' xibá queë' Dios. Nöz quézili' rinná be'e xibá na' nu bönni' tsanni ni zoë' nabanë'. ² Naca queéli' ca naca que tu nigula nutsaga ná'lennu-në' bönni', yú'unu lu në'ë bönni' queénu tsanni ni zoë' nabanë' ca rinná bë' xibá que yöl-la' nutsaga na', pero channö chinátie', nurúajnu lu na' xibá na'. ³ Caní naca, tsanni ni zoë' nabanë' bönni' queénu, channö utsaga ná'lennu-në' ia'túë' bönni', gunnu dul-la' le

riguitsaj xibá que yöl-la' nutsaga na', pero channö chinátië' bönni' queénu na', nurúajnu lu na' xibá na', ate' na'a, channö utsaga ná'lennu-në' nu bönni' yúbölö, biti' gunnu dul-la' le riguitsaj xibá que yöl-la' nutsaga na'.

⁴ Lësca' caní raca queéli', bócha'a. Tu' dzágali'-në' Cristo chinati cázali' libí'ili' para cabirö inná be'e libí'ili' le rinná bë' xibá na', para guéquili' que Nu yúbölö. Na'a chinéquili' queë' Cristo, Nu na' bubán lu yöl-la' guti. Caní naca, para gaca gunru' le raza ládxi'ë Dios. ⁵ Tsanni ni' guyú'uru' lu na' yöl-la' bönáchisö queéru', le rinná bë' xibá na' ben ga gulaca bë' le guzé ládxi'ru' le ruá' dö', le gulún dxin lu idútë le naca cázaru' para ilún ga gátiru'. ⁶ Na'a nuláru' lu na' xibá na' tu' nati cázaru' tsca naca le rinná bë' xibá na' gunná be'e rë'u zí'alö. Caní naca para gaca gunru' xichinë' Dios lu yöl-la' na'bán cubi le runnë' queéru' Dios Bö' Lá'ayi, en calëga gunru' xichinë' lu lë na' chinaca gula, le naca xibá na'.

Le dzaga neda' le naca dul-la'

⁷ ¿Bizxi caz innaru' na'a? ¿Naru' runtsö xibá queë' Dios ga runa' dul-la'? ¿Biti' ca' run caní! La'tu' cabí buzéajni'i le rinná bë' xibá na' neda', biti' gunözda' naca dul-la' le runa'. La'tu' cabí zoa lu xibá na' le rnna: "Biti' së ládxi'u le dë que luzó'o", biti' gunözda' naca dul-la' yöl-la' rizé ládxi' le dë que luzá'a. ⁸ Cate' bidxín quia' xibá na', guca bë' le naca dul-la' na' run dxin lu idútë le naca', ate' ben ga gúquibe'eda' rizé ládxi'a yúgu'të le ruá' dö'. Ga biti' ridxini xibá na', biti' naca bë' le naca dul-la'. ⁹ Dza ni'te, zí'atëlö ga bidxín quia' xibá queë' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'. ¹⁰ Dios gunná bë'ë xibá na' para gun ga gata' queéru' yöl-la' na'bán, pero ben ga gúquibe'eda' chinati caza'. ¹¹ Guca bë' nazí' yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

¹² Que lë ni na', lá'ayi naca xibá queë' Dios, ate' lá'ayi, en tsahui', en dxi'a naca le gunná bë'ë. ¹³ ¿Naru' bentsö lë na' naca dxi'a ga bidxín quia' yöl-la' guti? ¿Biti' ca' naca ca! Le naca dul-la' bugún dxin lë na' naca dxi'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatërö xihui' yúgu'të le naca dul-la'.

¹⁴ Nóziru' Dios Bö' Lá'ayi bennë' queéru' xibá na', pero neda' naca' bönáchisö, en yu'a lu na' dul-la' ca tu bönni' nadó'o que. ¹⁵ Na'a, biti' réajni'ida' le runa'. Ré'ënda' guna' ca rinná bë' xibá na', pero biti' runa' lë na' ré'ënda' guna'. Le naca dul-la' le cabí rilé'eda' dxi'a, lë na' runa'. ¹⁶ Runa' dul-la' sal-la' biti' ré'ënda' guna' dul-la' na'. Xibá na' rusëdi neda' naca dul-la' le cabí naca dxi'a. Que lë ni na' naca bë'da' naca dxi'a le rinná bë' xibá na'. ¹⁷ Caní naca, calëga néda'sö runa' dul-la' na', pero dul-la' na' dzaga neda' run ga runa' dul-la' na'. ¹⁸ Nözda' biti' zóalen neda' le naca dxi'a, o huáca innía', lë na' naca dxi'a biti' zóalen le naca yöl-la' bönáchisö quia'. Ré'ënda' guna' le naca dxi'a, pero la' néda'sö biti' gaca guna' lë na' naca dxi'a. ¹⁹ Biti' runa' le naca dxi'a le ré'ënda' guna', pero rúntica'sa' le biti' naca dxi'a le cabí ré'ënda' guna'. ²⁰ Que lë ni na', channö runa' dul-la' na' biti' ré'ënda' guna', calëga neda' caz runa' le, pero dul-la' na' dzaga neda' run ga runa' dul-la' na'.

²¹ Caní naca le raca queéru' yúgu'tëru'. Cate' ré'ëniru' gunru' le naca dxi'a, dzaga rë'u le run ga runru' le ruá' dö'. ²² Lu icja ládxi'da'ahua' raza ládxi'a xibá queë' Dios ²³ pero réquibe'eda' dzaga idútë le naca' le rinná be'e neda', ate' lë ni ridá'baga' xibá queë' Dios yu'u icja ládxi'da'ahua'. Lë na' dzaga idútë le naca' run ga runa' dul-la'.

²⁴ ¿Bica' bayechi' neda'! ¿Nuzxi caz gaca usólá neda' lu yöl-la' bönáchisö quia' le run ga runa' dul-la'? ²⁵ ¿Xclenë' Dios, chinularu' na'a ni'a que le benë' Xanru' Jesucristo! Que lë ni na', tsca naca le yu'u icja ládxi'da'ahua' runa' ca rinná bë' xibá queë' Dios, sal-la' yöl-la' bönáchisö quia' run ga ré'ënda' guna' dul-la'.

8

Le runru' tu' zóalenë' Dios Bö' Lá'ayi rë'u

¹ Que lë ni na', bítirö bi xíguia' nabága'gaquië' yugu' bönni' néquiguequinë' queë' Jesucristo, bönni' na' bítirö tunë' ca ré'ëni yöl-la' bönáchisö queégaquië', pero ca ré'ënë' Dios Bö' Lá'ayi tunë'. ² Tu' naca' tuz len Jesucristo, Dios Bö' Lá'ayi, Nu na' nabániru', rácalenë' neda'. Que lë ni na', nulá' lu lë na' ben ga bena' dul-la', enca' lu yöl-la' guti. ³ Chinunë' Dios le cabí guca gun xibá na', tu' cabí bi guzxéqui' gun tu' nácaru' bönáchisö. Dios gusól-lë'ë Zxí'ini cazë', ate' guljë' bönachi ca nácaru' rë'u, nácaru' bönachi dul-la', pero bití' bi dul-la' benë' Lë'. Busubaga' cuinë' dul-la' nabága'ru' rë'u, ate' caní guca, guchúguië' que dul-la' runru' lu yöl-la' bönáchisö queéru'. ⁴ Caní benë' para gaca gunru' idútë le naca tsahui' le rinná bë' xibá queë', núlöru' na' bítirö runru' ca ré'ëni yöl-la' bönáchisö queéru', pero ca ré'ënë' Dios Bö' Lá'ayi runru'.

⁵ Bönni' tunë' ca ré'ëni yöl-la' bönáchisö queégaquië', tu'í ládxi'gaquië' le naca que yöl-la' bönáchisö queégaquië', pero bönni' tunë' ca ré'ënë' Dios Bö' Lá'ayi, tu'í ládxi'gaquië' le naca queë' Dios Bö' Lá'ayi. ⁶ Channö ru'í ládxi'siru' le naca que yöl-la' bönáchisö queéru', tsaz gátiru', pero channö ru'í ládxi'ru' le naca queë' Dios Bö' Lá'ayi, chidé yöl-la' na'bán idú queéru', en ribózaru' dxi ladxi'. ⁷ Núti'tës nu ru'í ládxi'sö le naca que yöl-la' bönáchisö que, bití' rilé'e Dios dxi'a, tu' cabí run nu na' ca rinná bë' xibá queë' Dios, en bití' ca' gaca gun caní. ⁸ Que lë ni na', bönni' na' tunë' ca ré'ëni yöl-la' bönáchisö queégaquië' bití' gaca ilunë' le raza ládxi'ë Dios.

⁹ Na'a, bítirö runli' ca ré'ëni yöl-la' bönáchisö queéli', pero runli' ca ré'ënë' Dios Bö' Lá'ayi tu' zóalen cazë' Lë' libí'ili'. Tu bönni' bití' zóalenë' Dios Bö' Lá'ayi lë', Nu na' risól-lë'ë Cristo queéru', bití' néquinë' queë' Cristo. ¹⁰ Tu' zóalenë' Cristo libí'ili', chinati caz idútë le guca cázali' tu' nözi dul-la', ate' na'a nabánili'-në' Dios Bö' Lá'ayi tu' nunë' Dios libí'ili' tsahui'. ¹¹ Bö' Lá'ayi queë' Dios, Nu na' busubán Jesús lu yöl-la' guti, zóalenë' libí'ili'. Lë cazë' Dios, Nu busubán Jesucristo lu yöl-la' guti, runë' ga nubanli' lu idútë le gúcali' le rati caz. Caní nunë' tu' zóalenë' Dios Bö' Lá'ayi libí'ili'.

¹² Que lë ni na', libí'ili' bócha'a, dë tu le ral-la'ru', pero calëga que yöl-la' bönáchisö queéru', para cabirö gunru' ca ré'ëni yöl-la' bönáchisö queéru' na'. ¹³ Channö runli' ca ré'ëni yöl-la' bönáchisö queéli', gátili' tsaz, pero channö len yöl-la' huáca queë' Dios Bö' Lá'ayi runli' ga ila'niti le runli' lu yöl-la' bönáchisö queéli', gata' yöl-la' na'bán idú queéli'.

¹⁴ Yúgu'të nupa tun ca ré'ënë' Dios Bö' Lá'ayi nácacaca zxí'inë' Dios. ¹⁵ Dios Bö' Lá'ayi na' zóalenë' libí'ili' bití' nuzóë' libí'ili' leyúbölö ca bönni' nadó'ogaca para gadxi idzóbili', pero chinunë' ga nácali' zxí'inë' Dios caz, en runë' ca' ga rulídzaru'-në' Dios, rnaru': "Abba", le rnna: Dad. ¹⁶ Lë cazë' Dios Bö' Lá'ayi ruzéajni'inë' bö' naca cázaru', en runë' ga nóziru' nácaru' zxí'inë' Dios. ¹⁷ Channö chinácaru' zxí'inë' Dios, gata' ca' queéru' tsözxón len Cristo le nequi queë' Xúziru' Dios. Caní gaca queéru' channö riguí' rizáca'lenru'-në' tsözxón Cristo para uzí'iru' xibé tsözxón len Cristo yöl-la' zxón queë' Dios.

¹⁸ Runi neda', yugu' lë ni riguí' rizáca'ru' na'a naca tu le cuídido'os tsca naca yöl-la' zxón na' gata' queéru' dza si' za'. ¹⁹ Ta'böza yúgu'të le nunë' Dios, en ta'zé ládxi'gaca idxintë dza na' ulu'ë lahui Dios yugu' bönni' nácacagaquië' zxí'ini cazë'. ²⁰ Yúgu'të lë na' nunë' Dios gula'dödi lu na' le run ga ila'niti, calëga tu' gulé'ëni caz gaca caní, pero tu' benë' Dios ga naca caní. Benë' ca' ga naca löza que idútë lë na' nunë', ²¹ ate' ulu'lágaca yúgu'të le nunë' Dios lu lë na' run ga ila'niti. Caní gaca, yúgu'të lë na' ulu'zi' ca' xibé yöl-la' rusólá le nazáca'da' na' ulu'zi'ë xibé yugu' zxí'inë' Dios. ²² Nóziru' ta'gu'í ta'zaca' yúgu'të le nunë' Dios ga ridxintë na'a dza, ca na' riguí' rizáca'nu tu nigula chizóa sóabi' bí'ido' queénu. ²³ Riguí' rizáca'a, calégasö yödzölió ni, pero riguí' rizáca'ru' ca' rë'u, sal-la' zóalenë' Dios Bö' Lá'ayi rë'u, Nu na' naca queéru' le ruluí' rë'u ca ral-la' gaca cázaru'.

Riguí'i rizáca'ru' tsanni ni ribózaru' dza ni' ulu'ë lahui Dios nácaru' idú xzí'iné', dza ni' úné' ca' idútë le naca cázaru'. ²⁴ Tu' runru' löza lë ni, nuláru' rë'u, pero channö gaca ilé'eru' lë na' runru' löza, bití' naca tu le ribózaru'. Bití' ribózaru' le chirilé'eru'. ²⁵ Na'a, channö runru' löza tu le cabí gaca ilé'eru', lu yöl-la' riböza xzön ladxi' ribózaru' le.

²⁶ Lësca' caní rácalenë' Dios Bö' Lá'ayi rë'u cate' rudú ládxi'ru', tu' cabí nóziru' bi ral-la' inábiru'-në' Dios, pero Lë cazë' Dios Bö' Lá'ayi rudödë' xtídza'ru' lahuë' Dios, ate' lu yöl-la' rinaba yudxi queë' rinnëda' ládxi'ë, tsca cabí gaca nu inná. ²⁷ Dios ruyúë' le yu'u icja ládxi'do'gaca bönachi, en nózinë' le ré'ënë' innë' Dios Bö' Lá'ayi na', ate' Lë', ca ré'ëni quézinë' Dios, rudödë' xtídza'gaca nupa néquiquequi quez queë' Cristo lahuë' Dios.

Nadéli'tëröru' tu' zóalenë' Cristo rë'u

²⁸ Nóziru' tu'zi'ë xibé bönni' yúgu'të le raca quégaquië', bönni' na' nadxí'iguequinë' Dios, ate' bulidzë' Dios légaquië' ca nuzóa cazë' gunë'. ²⁹ Yugu' bönni' na' guró cazë' queë' Dios zí'atëlö, buzóë' ca' quégaquië' zí'atëlö ilácagaquië' ca naca cazë' Xzí'iné', para gáquië' Xzí'iné' lo ladaj zían bóché'ë. ³⁰ Nupa na' buzóë' Dios quégaquië' zí'atëlö ca ral-la' ilácagaquië', bulidzë' ca' légaquië', ate' yugu' bönni' na' bulidzë', benë' légaquië' tsahui', ate' yugu' bönni' na' benë' légaquië' tsahui', benë' ga tu'zi'ë ca' xibé yöl-la' xzön queë'.

³¹ ¿Bizxi caz innaru' na'a ca nácgaca lë ni? Channö rácalenë' Dios rë'u, bití' ral-la' gádxiru' sal-la' bi ilún bönachi queëru'. ³² Dios, idú ládxi'ë bennë' queëru' Xzí'ini cazë'. Budödë' lë' para gútië' uláz queëru'. Channö caní benë' Dios, ¿naru' cabí gúnnadë'ë queëru' tsözxón len Xzí'iné' yúgu'të le dë? ³³ ¿Nuzxi caz gaca bi usubaga' nupa na' guró cazë' queë' Dios? ¿Cuntu nu gaca, tu' run cazë' Dios ga nuhuóácaru' tsahui'? ³⁴ ¿Nuzxi caz gaca ichugu queëru' gátiru'? ¿Cuntu nu gaca, tu' guti cazë' Cristo uláz queëru', en le nácarö lo, bubanë' lu yöl-la' guti, ate' na'a zoë' cuita lë'ë ibëla Dios ga nácatëré' xzön, ate' rnnë' dxi'a uláz queëru' lahuë' Dios! ³⁵ Sal-la' bi raca queëru', nöz quéziru' nadxí'iné' Cristo rë'u. Nóziru' nadxí'iné' rë'u:
sal-la' riguí'i rizáca'ru', o sal-la' risëbi ládxi'ru',
o sal-la' ta'bía ládxi'gaca bönachi rë'u,
o sal-la' ridunru', o sal-la' riyadzaj le gácuru',
o sal-la' zoa bönadxi queëru', o sal-la' ilútië' bönni' rë'u.

³⁶ Ca nácgaca lë ni nazúaj lu guichi lá'ayi, rnna:
Tu' néquitu' quiu' Li', túntica'sö bönachi ga gátitu'.
Nácatu' ca yugu' bö'cu' zxila',
nadódigacaba' lu na' nu guti légacaba'.

³⁷ Na'a, tu' zóalen rë'u Nu na' nadxí'i rë'u, nácatëré löza idéli'ru' lu le raca queëru'.

³⁸⁻³⁹ Que lë ni na' runi neda':

Bití' bi sequi' gun ga bítí'rö idxí'iné' Dios rë'u.
Nadxí'iné' rë'u tu' néquiru' queë' Xanru' Jesucristo.
Bití' sequi' gun caní yöl-la' guti o yöl-la' na'bán,
o yugu' gubáz lá'ayi o nupa ta'nná bë',
o yugu' yöl-la' huáca que tu' xihui',
o bítí'tës bi zoa o bítí'tës bi si' za',
o tu le dë xitsá'alö o tu le dë cadxí'ilö,
o bítí'tës bi nunë' Dios.

9

Dios guró cazë' queë' bönachi Israel

¹ Ruá'a didza' idútë li tu' néquida' queë' Cristo, ate' röjllöz didza' ni le naca queë' Dios Bö' Lá'ayi le yu'u icja ládxi'da'ahua'. ¿Bití' rizí' yë'a! ² Ruhuí'inide'eda', en risëbitica'sö ládxa'a ³ tu' raca ládxa'a guna' ga ulu'lé' böchi' luzá'a, bönni' uládz quia'. La'tu' huácalen légaquië', gué'ëni quézida' ubéaj ládxi'ë Dios neda', en ulá'alena' Cristo. ⁴ Yugu' bönni'

uládz quia' na' nácagaquië' xzí'ini xi'sóë' Israel, ate' Dios bë'ë légaquië' lataj ilácagaquië' xzí'ini cazë'. Yöl-la' zxön queë' Dios guzóalen légaquië', ate' Dios budödë' lu ná'agaquië' didza' rucá'ana tsahui', enca' xibá queë'. Bulidzë' légaquië' para tseaj ládxi'gaquië' Lë', ate' budödë' lu ná'agaquië' yugu' le guzxi' lu në'ë gunë' le ilún tsahui' bönachi. ⁵ Nácagaquië' xzí'ini xi'sóagaquië' xuz xtó'otu' Abraham, en Isaac, en Jacob, ate' ladaj di'a dza quégaquië', ca naca yöl-la' bönachi queë', guljë' Cristo, Nu naca caz Dios, en rinná bë'enë' yúgu'të. ¡Rácatica'só queë' yöl-la' ba! ¡Ca' gaca!

⁶ Sal-la' yúgu'të bönni' uládz quia' bití' nazí' lu ná'agaquië' Cristo, bití' ral-la' innaru': Nítisö böaca xtídzë'ë Dios. Calëga yúgu'të xzí'ini xi'sóë' Israel nácagaquië' idú bönachi Israel, nupa néquiguequi queë' Dios. ⁷ Sal-la' gúljagaquië' zían xzí'ini xi'sóë' Abraham, bití' guláquië' yúgu'të idú xzí'ini xi'sóë' Abraham, pero guca ca na' nazúaj lu guichi lá'ayi, le rnna: "Yugu' xzí'ini xi'sóë' Isaac ilaca idú xzí'ini xi'sú'." ⁸ Caní naca, nupa nácagaca xzí'inë' tu bönni' néquinë' queë' Dios, calëga yúgu'të' nácagaquië' xzí'inë' Dios. Lësca' caní, nácagaca idú xzí'ini xi'sóë' Abraham núpasö na' náljagaca ni'a que lë na' guzxi' lu në'ë Dios. ⁹ Lë na' guzxi' lu në'ë Dios unödzejë' queë' Abraham rnna caní: "Ia'tú iz na'a dza huöda', ate' Sara quiu' uzóanu-bi' tubi' bi'i bönni'do'."

¹⁰ Calégasö lë ni guca caní, pero lësca' cate' Rebeca ni' nuá'anu-bi' yugu' bi'i bönni'do' queë' Isaac, xuz xtó'otu', ¹¹⁻¹³ cate' ni' si' iláljabi', en bití' bi núnigacabi' le naca dxi'a o le ruá' dö', Dios gudxë'-nu Rebeca na', gunné': "Bi'i bönni' zí'alö quiu' gunbi' xichinbi' bi'i buropi." Didza' ni röjlóz lë na' nazúaj lu guichi ca gunné' Dios, le rnna: "Bidxí'ida'-në' Jacob, en calëga Esaú." Caní guca, bugá'ana tsutsu le buzóë' tsaz Dios ca naca lë na' chiguró cazë'. Que lë ni na' bití' raca caní ni'a que tu le gaca ilún bönachi, pero naca caní tu' ribó cazë' Dios nu rulidzë'.

¹⁴ ¡Bizxi caz innaru' na'a? ¡Naru' runtsë' Dios le cabí naca tsahui'? ¡Bití' ca' runë' caní! ¹⁵ Dios gudxë' Moisés, gunné': "Huéchi' ládxa'a nu ré'ënda' huéchi' ládxa'a, en gü'i ládxa'a nu ré'ënda' gü'i ládxa'a." ¹⁶ Que lë ni na', bití' raca caní ni'a que le té'ëni caz bönachi, o tu' runë' bayudxi nu bönni', pero naca tu' ré'ëni quézinë' Dios, ruhuéchi' ládxe'ë bönachi. ¹⁷ Ca naca lë ni nazúaj lu guichi lá'ayi ca na' Dios gudxë' Faraón, gunné': "Que lë ni na' buzóa' li' ga rinná bë'u para ulu'a lahui yöl-la' huáca quia' ga zu', en guna' ga ilunbë' bönachi iduté yödzülió le naca' neda'." ¹⁸ Caní naca, Dios ruhuéchi' ládxe'ë nu ré'ëni quézinë', en lësca' caní runë' zidzaj icja ládxi'da'ahuë' nu bönni' ré'ëne' gunë' zidzaj icja ládxi'da'ahuë' bönni' na', ca na' benë' queë' Faraón na'.

¹⁹ Na'a guiéli' neda': "Channö caní naca, ¡bizx que rusubáguë'ë Dios bönachi xíguia'? ¡Nuzxi caz gaca tá'baga' le ré'ëni quézinë' Dios gunë'?" ²⁰ ¡Bití' ca' naca caní! ¡Nuzxi caz li' rnnió' que Dios? ¡Naru' huácatsö tu yusu' néquini yu guíë bönni' huen rö'ö, inná: "¡Bizx que benu' neda' caní?" ²¹ ¡Naru' cabí dë lu në'ë bönni' huen rö'ö gunë' que guna' na' tu yusu' nu ugún le dxin ga liná', en que la' guna' ná'asö gunë' ia'tú yusu' nu ugún le dxin ga bití' naca liná'?"

²² Ré'ëni quézinë' Dios ulu'ë lahui ca gunë' xíguia' nu ruá' dö' en gunë' ga gaca bë' yöl-la' huáca queë', pero lu yöl-la' riböza zxön ládxi' queë' biá' gulénë' yugu' bönni' ni' ral-la' ichúguië' quégaquië', yugu' bönni' na' nabága'gaquië' xíguia', en run bayudxi usunítie' légaquië'. ²³ Caní runë' Dios para gaca bë' nácatëro lesaca' yöl-la' ruzá' ládxi' queë', lë na' rulu'ë lahui lógaca nupa na' ruhuéchi' ládxe'ë, bönni' na' buzóë' quégaquië' zí'atëlö ulu'zi'ë xibé yöl-la' zxön queë'. ²⁴ Yugu' bönni' caní bulidzë' Dios. Calégasö bulidzë' netu', bönachi judío, pero lësca' bulidzë' bönachi izá'a. ²⁵ Ca naca lë ni nazúaj lu guichi lá'ayi ca na' bë'ë didza' Oseas uláz queë' Dios, gunné':

Nupa bití' nácagaca bönachi quia',
gu'a láguequi: Bönachi quia',
ate' nupa na' bití' bidxí'ida',
gu'a láguequi: Nupa nadxí'ida'.

²⁶ La' ná'asö ga gunnía' quéguequi:
 “Biti' nácali' bönachi quia” ,
 si' láguequi: “Yugu' xzí'inë' Dios ban.”

²⁷ Na'a, ca naca quégaca xzí'ini xi'sóë' Israel, Isaías gunné':
 Sal-la' ila'yanë' xzí'ini xi'sóë' Israel,
 en iláquië' tsa naca yuzxi tu ra' yegu zxön,
 ulu'lé' nabábasë'.

²⁸ Xanru' Dios la' guntë' ga gaca idútë
 lë na' ichúguië' quégaca bönachi yödzölió ni.

²⁹ Lësca' caní Isaías bë'ë didza' zí'atëlö, gunné':
 Dios, Xanru' unná bë' idú,
 la'tu' cabí buca'anë' queéru' yugu' xzí'ini xi'sóaru',
 ugá'anaru' ca yödzö Sodoma, en yödzö Gomorra,
 yugu' yödzö na' busunítië' Dios.

Bönachi Israel, en didza' dxi'a

³⁰ ¿Bizxi caz innaru' na'a? Yugu' bönni' bití' nabábagaquië' Israel chibila'déli'në' nuhuóacagaquië' tsahui' lahuë' Dios, en bití' gulunë' bayudxi ulu'huóáquië' tsahui' lahuë' Dios, pero nuhuóacagaquië' tsahui' tu' ta'yéajlë'ë Dios. ³¹ Na'a, sal-la' gulunë' bayudxi yugu' bönni' Israel ilunë' ca rinná bë' xibá queë' Dios, le ral-la' gun ga ilácagaquië' tsahui', bití' bila'déli'në' le ral-la' gata' quégagaquië' tu' tunë' ca rinná bë' xibá na'. ³² ¿Bizx que na' guca caní? Caní guca, tu' cabí gulunë' caní lu yöl-la' réajlë' quégagaquië' Dios, pero rácasö quégagaquië' gulé'ënnë' ilunë' ca rinná bë' xibá na', ate' que lë ni na' gula'chíxinë', o huáca innaru': Yöjchegu'gaquië' lu lë na' nazí'i le: Guió'j Ga Nu Röjchegu'. ³³ Ca naca lë ni nazúaj lu guichi lá'ayi, rnna:
 ¡Buli'yú! Uzóa'-në' yödzö Sión bönni' na'
 gáquië' ca tu guió'j ga nu tsöjchegu',
 guió'j na' gun ga nu ichixi inigui.
 Nu tséajlë' Lë', bití' ca' utuí'i nu na'.

10

¹ Libí'ili', bócha'ado', le rizé ládxa'a, en le rinábida'-në' Dios gunë' quégaca bönachi Israel naca gunë' ga ulu'lé'. ² Runa' ba nalí quégagaquië', idú ládxi'gaquië' tuí'i ládxi'gaquië' Dios, pero calëga len yöl-la' réajni'i idú. ³ Bití' nózguequinë' ca runë' Dios, runsë' ga nácaru' tsahui', pero té'ënnë' ilún cuíngaquië' tsahui' rácasö quégagaquië', en bití' ta'cu'ë nöxaj ladxi' lahuë' Dios para gaca gunë' légaquië' tsahui'. ⁴ Budxi benë' Cristo le ré'ëni gun xibá queë' Moisés, benë' ga gaca ulu'huóaca tsahui' yúgu'të nupa ila'yéajlë' Lë'.

⁵ Ca naca que nu huóaca tsahui' tu' run ca rinná bë' xibá queë' Dios, buzúajë' Moisés lu guichi le rnna caní: “Bönni' na' gunë' idútë ca rinná bë' xibá na', soë' ibanë' tu' gunë' caní.” ⁶ Na'a, ca naca que nu huóaca tsahui' tu' réajlë' Dios, rnna caní: “Bití' innó' lu icja ládxi'do'o, bití' innó': ¿Nuzxi caz cuen ni' yehua' yubá?” Lë ni naca, para gun nu na' ga huötjë' Cristo, ⁷ en bití' innó': “¿Nuzxi caz huötaj ga dë lataj que nupa chinátigaca?” Lë ni naca, para gun nu na' ga cuenë' Cristo, urúajë' lu yöl-la' guti. ⁸ Na'a, ¿bizxi caz rnna? Caní rnna: “Gala' ga zu' zoa caz xtídzë'ë Dios. Lu ru'u, en lu icja ládxi'do'o zoa xtídzë'ë na'.” Lë ni naca didza' que le réajlë'ëru' Dios runtu' libán que, rnnatu': ⁹ “Channö didza' gu'u gaca bë' Jesús náquië' Xanu', en uyéaj lë'u idú ládxi'u Dios busubanë' Lë' lu yöl-la' guti, uló' li'.” ¹⁰ Lu icja ládxi'do'oru' réajlë'ëru' Jesús para gácaru' tsahui', ate' len didza' ruí'iru', ruluí'iru' lahui le náquië' Jesucristo para uláru'.

¹¹ Nazúaj lu guichi lá'ayi le rnna: “Bití' ca' ulu'tuí'i yúgu'të nupa ta'yéajlë' Lë'.” ¹² Dios, la' tuz ca ruí'i ládxi'ë yugu' bönni' judío, enca' yugu' bönni' idútë yödzölió, tu' Lë cazë' Xanru' náquië' Xángagaquië' yúgu'të', en nápadë'ë bi unödzjë' quégaca yúgu'të nupa

tu'lidza Lë'. ¹³ Ca naca lë ni nazúaj lu guichi lá'ayi, rnna: "Ulu'lá yúgu'të nupa ulu'lidza Lë' Xanru'." ¹⁴ ¿Nacxi gaca ulu'lidzë' Lë' channö cabí ta'yéajlë'ë Lë'? ¿Nacxi gaca ila'yéajlë'ë Lë' channö catu caz bila'yönnë' ca naca queë'? ¿Nacxi gaca ila'yönnë' channö cunt nu zoa nu gun libán lógaquië'? ¹⁵ ¿Nacxi caz gaca ilunë' libán channö cunt nu isó-la' légaquië'? Ca naca lë ni nazúaj lu guichi, rnna: "Bica' bágaca nupa na' ila'dxinë' ga nacuá' bönni' röjéngaquië' libán que le ribequi dxi ládxi'ru', en tunë' libán que didza' dxi'a."

¹⁶ Na'a, calëga yúgu'të' gula'zì' lu ná'agaquië' didza' dxi'a. Ca naca lë ni, Isaías gunné': "Xan, ¿nuzxi caz guyéajlë' le bentu' libán que?" ¹⁷ Caní naca, ila'yéajlë' Lë' nupa ila'yöni, ate' lë na' ral-la' ila'yöni naca didza' ru'ë Cristo.

¹⁸ Na'a rnníá: ¿Naru' cabí bila'yönnë'? Le nácatë bila'yönnë', ca na' nazúaj lu guichi lá'ayi, le rnna:

Idútë yödzölió bila'yöni chí'iguequi.

Yúgu'të lataj bila'dxín xtídza'guequi.

¹⁹ Lësca' rnníá: ¿Naru' cabí guléquibe'enë' bönni' Israel lë ni? Le nácatë guléquibe'enë' le. Ga risí lo, bë'ë didza' Moisés uláz queë' Dios, gunné':

Gun caza' ga uzxé'elí,

tu' idxí'ida' bönachi biti' nabábagaca libí'ili'.

Ní'a quégaca bönachi cabí ta'yéajni'i guna' ga leli'.

²⁰ Gudödi ni' gúcadë'ë rugu ladxí' Isaías na', en bë'ë didza' uláz queë' Dios, gunné':

Bila'dzöli neda' nupa biti' gula'guílaj neda'.

Bulu'i lahua' lógaquië' bönni' biti' bi gula'nábinë' neda'.

²¹ Na'a, ca naca quégaquië' bönni' Israel, Isaías na' bë'ë didza' uláz queë' Dios, gunné': "Idú dza bulí na'a, bulidza' bönachi biti' túngaca ca rnna xtídza'a, en ta'dá'baga' neda'."

11

Nupa nulágaca ladaj bönachi Israel

¹ Na'a rnníá: ¿Naru' nusán në'ë Dios bönachi Israel? ¿Biti' ca' naca caní! Neda' caz naca' bönni' Israel. Naca' xzí'ini xi'sóë' Abraham, en nababa' di'a dza queë' Benjamín, xzí'ini cazë' Israel na'. ² Dios biti' nusán në'ë bönachi queë', nupa na' guró cazë' queë' dza ni'te. ¿Naru' cabí núnbë'ëli' lë na' nazúaj lu guichi lá'ayi ca na' benë' Elías? Bulidzë' Dios, en buzéguië' bönachi Israel didza', gunné': ³ "Xan, chigulútië' bönni' gulu'ë didza' uláz quiu', en bulu'quinnajë' yugu' bucugu lá'ayi quiu' ga buzéguigacatu'-ba' böa' bédxido' lo' Li'. Tuza' neda' nagá'ana' quiu', ate' té'ënnë' ilútië' ca' neda'." ⁴ Na'a, ¿bizxi didza' bubí'ë Dios? Caní gunné': "Nun chí'igaca caza'-në' quia' tsónnalalaj yu' chi gáyu'ë bönni' biti' tu'zechu xzíbigaquië' lo budó' guió'j na' nazí'i le Baal." ⁵ Lësca' caní naca dza ni zóaru' na'a, nagá'anagaca bal-la bönachi Israel, nupa na' guró cazë' queë' Dios tu' ruzá' ládxe'ë caní quégaquië'. ⁶ Channö naca le ruzá' ládxe'ë caní quégaquië', biti' naca ní'a que tu le gaca ilunë'. La'tu' guca ní'a que tu le gaca gunru', lë na' ruzá' ládxe'ë queéru' Dios bítí'rö gaca tu le ruzá' ládxe'ë queéru'.

⁷ ¿Bizxi caz innaru' na'a? Lë na' gula'guílje' bönni' Israel, biti' bila'déli'në', pero chibila'déli' le nupa ní' guró cazë' queë' Dios, ate' ia'zícá'rë' na', Dios benë' zidi icja ládxi'do'gaquië'. ⁸ Ca naca lë ni nazúaj lu guichi lá'ayi, rnna: "Dios benë' ga nácagaquië' chul-la niti." Caní benë', en sal-la' gaca ila'lé'enë' le runë', en ila'yönnë' xtídze'ë, biti' ca' ta'yéajni'inë'. Caní naca quégaquië' ga ridxintë dza ni zóaru' na'a. ⁹ Ca naca lë ni bë'ë ca' David didza', gunné':

Yugu' laní quégaquië' ulu'huóaca le ila'zón légaquië',

en ca tu yalaj ga ila'rólinë'.

Ilaca ca' le ilún ga ila'chíxinë',

en ca tu le uzi' lëbi légaquië'.

¹⁰ Ila'chul-la guió'j lógaquië', para cabí ila'lé'enë'.
Ila'yechu tsaz cúdzu'gaquië' tu' ilu'ë yua'.

Ca gaca ulu'lágaca bönachi bití' nácagaca judío

¹¹ Na'a rnní'a: ¿Naru' gula'chíxinë' yugu' bönni' judío ga bidxintë gula'nítië' tsaz? ¿Biti' ca' guca ca! Gula'dá'baguë'ë xtídzë'ë Dios, ate' na'a Dios ru'ë lataj ulu'lágaca nupa bití' nácagaca judío para gunë' ga ulu'zxé'enë' yugu' bönni' judío léguequi. ¹² Le gulunë' bönni' judío, gula'chíxinë', ben ga bidxín quégaca bönachi yödzölió ni le naca ca tu yöl-la' tsahui'. Channö caní guca, guta' yöl-la' tsahui' quégaca nupa bití' nácagaca judío tu' gula'nítië' yugu' bönni' judío, zxóntërö gaca le gata' quéguequi cate' yugu' bönni' judío na' ulu'huóáquië' queë' Dios.

¹³ Na'a rea' libí'ili' bití' nácali' judío, rnní'a: Tu' naca' gubáz nasól-lë'ë Dios lógaca nupa bití' nácagaca judío, runa' zxön lë na' dë lu na'a ¹⁴ para nadxi ca' huáca guna' ga ulu'zxé'enë' bönni' uládz quia' libí'ili', en caní guna' ga ulu'lé' bal-lë'. ¹⁵ Channö bulu'huóáca bönachi nacua' idú yödzölió queë' Dios tu' bulu'nítië' yugu' bönni' judío xilátjagaquië', zxóntërö gaca le gata' quéguequi cate' ulu'huóázië' xilátjagaca cazë' na'. Gaca ca raca cate' tu'bángaca nupa chinátigaca. ¹⁶ Channö rigú'uru' quez queë' Dios cúa nílado' rubéajru' zí'alö, lësca' cúa na' nagá'ana naca quez queë', en channö uzóaru' quez queë' Dios luí yaga, lësca' ilaca quez queë' ni'a në'e yaga na'.

¹⁷ Nácagaquië' bal-lë' bönni' judío ca ni'a në'e tu yaga olivo narúgugaca, ate' libí'ili', ca ni'a në'e tu yaga olivo guí'a, yójtá'ali' yaga olivo dxi'a na', en buázili' xilátjagaca nupa na' gurúgugaca, en ruzí'ili' xibé luí, en xichöni yaga olivo dxi'a na'. ¹⁸ Que lë ni na', bití' gun ba zxön cuinli', bití' uzóali' tsölá'alö nupa nácagaca ca ni'a në'e na' narúgugaca. Channö run ba zxön cuinli', ral-la' inózili' calëga libí'ili' rugáguli' luí yaga na', pero luí yaga na' rugagu libí'ili'.

¹⁹ Nadxi ca' innó': "Gula'rugu ni'a në'e yaga na' para gaca tsázia' neda' xilátjagaca."

²⁰ Nácate didza' ru'u, pero gula'rúguië' tu' cabí gula'yéajlë'ë, ate' yójtó'o li' yaga na' tu' réajlë'u Dios. Que lë ni na', bití' ral-la' gun ba zxön cuinu', pero ral-la' gádxinu' Dios.

²¹ Channö benë' Dios léguequi xíguia', nupa na' nácagaca caz ni'a në'e yaga dxi'a na', ¿naru' cabí gunë' xíguia' ca' li'? ²² Buyútsöca' na'a ca náquië' dxi'i ladxi' Dios, en ca rúndë'ë ca' xíguia'. Le nácate rúndë'ë xíguia' nupa na' gula'chixi, pero náquië' dxi'i ladxi' len li'. Que lë ni na', ral-la' gúntica'su' ca sa'yéaj yöl-la' dxi'i ladxi' queë' na', para cabí ichúguië' ca' li' lu yaga queë' na'. ²³ Lësca' caní gaca quégaquië' channö cabí ulu'gá'anë' lu yöl-la' cabí réajlë' quégaquië', tsójtá'gaquië' leyúbölö lu yaga na', tu' napë' Dios yöl-la' huáca gunë' ga tsójtá'gaquië' le leyúbölö. ²⁴ Nacu' li' ca tu ni'a në'e gurugu lu yaga olivo guí'a, en yójtó'o yaga olivo dxi'a ga cuntú nu udá' tu ni'a në'e yaga guí'a. Yénni'tërö huáca quégaquië', nácagaca cazë' ni'a në'e yaga dxi'a na', huáca tsójtá'gaquië' leyúbölö lu yaga quéguequi cazë' na'.

Ca gaca ulu'lágaca bönachi Israel

²⁵ Bócha'ado', ré'ënda' inózili' lë ni bigachi', para cabí gun ba zxön cuinli' ca naca yöl-la' réajni'i queé'li'. Bulu'huóáca bal-la bönachi Israel zidi ladxi', ate' caní iláquië' ga idxinrö dza chinayá'z gaca yúgu'të bönachi bití' nácagaca judío ga rinná bë'ë Dios, nupa na' ral-la' ulu'lágaca. ²⁶ Tödi na' gata' lataj ulu'lé' ca' yúgu'të bönni' Israel, ca na' nazúaj lu guichi lá'ayi, rna:

Iruáj yödzö Sión Nu rusölá,
en ugúa le ruá' dö' nabága'gaca xzí'ini xí'sóë' Jacob.

²⁷ Lë ni naca didza' dzaga gúnlena' légaquië'
cate' ugúa' dul-la' nabága'gaquië'.

²⁸ Caní naca, gula'dá'baguë'ë didza' dxi'a, ate' Dios guléaj ládxë'ë légaquië' para gaca uláli' libí'ili', pero nadxí'inë' ca' légaquië', tu' guró cazë' queë' xuz xtó'ogaquië'. ²⁹ Tsaz

runödzejë Dios le runödzejë, en tsaz ruidzë' bönachi. ³⁰ Ca na' naca queé'li', zí'atëlö bití' benlí' ca rna xtídzë'ë Dios, ate' na'a ruhuéchi' ládxë'ë Dios libí'ili' tu' cabí gulunë' yugu' bönni' judío ca rnnë'. ³¹ Lësca' caní naca quegaquië' na'a, bití' tunë' ca rnnë' Dios, pero caní gácasö ga idxinrö dza huéchi' ládxë'ë Dios légaquië', ca ruhuéchi' ládxë'ë libí'ili' na'a. ³² Dios guléaj ládxë'ë yúgu'të bönachi para ila'dá'baguë'ë xtídzë'ë, para gaca huéchi' ládxë'ë yúgu'të'.

³³ Zxöntë'rö naca yöl-la' tsahui' queë' Dios, lë na' naca yöl-la' huáca zxön, en yöl-la' réajni'i queë'. Cuntu nu gaca tséajni'i le nuzóë' Dios gunë', en bití' gaca nu inözi yugu' le runë' Dios. ³⁴ ¿Nuzxi caz guyéajni'i le guzá' ládxë'ë Xanru'? ¿Nuzxi caz buzéajni'i Lë'? ³⁵ ¿Nuzxi caz bi bunödzej queë' Dios para gun bayudxi bi ubi'ë Dios que? ³⁶ Yúgu'të le dë narúajgaca lu në'ë Dios, en taca lu në'ë, en nácgaca para uzi'ë xibéguequi. ¿Gácatíca'sö queë' Dios yöl-la' ba! ¿Ca' gaca!

12

Ral-la' udödi cuinru' quez queë' Dios

¹ ¿Böchi' luzá'ado! ¿Ruhuéchi' ládxë'ë Dios rë'u! Que lë ni na' ráta'yua' loli' udödi cuinlí' lu në'ë Dios, gácali' ca tu le naca ban rigú'uru' lahuë' Dios, para gácali' quez queë', le gaca tu le tsaza ládxë'ë Dios. Lë ni ral-la' gunlí', ca sa'yéaj le reaj ládxi'ru'-në' Dios. ² Bítí'rö gunlí' la' lébisö ca tun bönachi dza ni zóaru' na'a, pero guli'gaca bönachi cubi tu' nucubë' Dios icja ládxi'do'oli'. Guli'gún caní para gaca inózili' le naca dxi'a ré'ënë' Dios gunlí', lë na' raza ládxë'ë, en le naca idú.

³ Na'a, tu' zoa le buzá' ládxë'ë quia' Dios, rea' yúgu'tëli': Bití' gun ba zxön cuinlí', le cabí ral-la' gunlí', pero ral-la' gácali' nöxaj ladxi' ca ribequi ícjali', tsca naca yöl-la' réajlë' queé'li' Dios le bennë' que queé'li'. ⁴ Ca na' naca tuz idútë le naca cázaru', sal-la' zían le nagudi' dzágalenru', en calëga tuz dxin tun yúgu'të le zían na' nagudi' dzágalenru', ⁵ lësca' caní naca queé'ru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, ate' que lë ni na' yúgu'tëru' nácaru' tuz turu' len ia'turu'.

⁶ Tu turu' dë lu ná'aru' tu le bennë' queé'ru' Dios, ate' nadzá'gaca tu tu tsca naca le buzá' ládxë'ë que queé'ru'.

Bönni' na' Dios bunödzejë' queë' gu'ë didza' uláz queë', tsca réajlë'ë Lë', ral-la' gu'ë didza' bönni' na'.

⁷ Bönni' na' Dios bunödzejë' queë' gunë' xichinë', dxí'ado' ral-la' gunë' dxin na'.

Bönni' na' Dios bunödzejë' queë' usédinë' bönachi, dxí'ado' ral-la' usédinë' bönachi.

⁸ Bönni' na' Dios bunödzejë' queë' uzéajni'inë' bönachi, dxí'ado' ral-la' uzéajni'inë' légaquië'.

Bönni' bi unödzejë' que nu yúbölö, idú ládxë'ë ral-la' unödzejë'.

Bönni' rinná bé'enë' bönachi, idú ládxë'ë ral-la' gunë' caní.

Bönni' rácalenë' luzé'ë, len yöl-la' rudzeja ral-la' gunë' caní.

Yugu' le ral-la' gun nu nequi queë' Cristo

⁹ Ral-la' idxi'ili' luzá'ali' idú ládxi'li'. Bulí'cá'ana le ruá' dö'.

Guli'güi' ládxi'li' gunlí' le naca dxi'a.

¹⁰ Guli'dxi'i-guéquinë' luzá'ali' ca nadxi'iguecli'-në' böchi' cázali'.

Ca runlí'-në' bal luzá'ali' ral-la' gunlí' ga gácarë' lo ca nácali' la' cuínsili'.

¹¹ Buli'típatica'sö ládxi'li', en biti' gácali' xöhuëdi.
Guli'gún xichinë' Xanru' idú ládxi'li'.

¹² Buli'dzeja tu' zoa le runli' löza.

Guli'cóz zxön ladxi' cate' bi riguí'i rizáca'li'.

Buli'lídzatica'së' Dios.

¹³ Buli'nödzej quégaca bönachi queë' Cristo
tsca nayádzjaguequinë'.

Guli'güí' lataj ga ila'cuá' nupa ta'dxín queéli'.

¹⁴ Guli'nábinë' Dios gunë' dxi'a

quégaca nupa ta'bía ládxi'gaca libí'ili'.

Guli'naba gaca dxi'a quégaquië',

en biti' udxíali' légaquië' dö'.

¹⁵ Buli'dzéjalen nupa tu'dzeja.

Guli'códxilen nupa ta'bödxi.

¹⁶ Guli'gaca tuz len luzá'ali'.

Biti' gun ba zxön cuinli',

pero guli'gún tsözxón yugu' bönni' nöxaj ladxi'.

Biti' guéquili' chinadéli'li' idútë yöl-la' réajni'i.

¹⁷ Cuntu nu ubí'ili' que,

biti' guá'ali' dö' que nu ruá' dö' queéli'.

Guli'gún dxi'a quégaca yúgu'të bönachi.

¹⁸ Channö huáca, tsca séqui'li', guli'cóz dxi'a

len yúgu'të bönachi.

¹⁹ Böchi' luzá'ado', biti' uzí' lébili' bönachi la' libí'isili', pero guli'güí' lataj ubi'ë Dios
quégaca bönachi na', tu' nazúaj lu guichi lá'ayi le rnna:

Neda' caza' uzí' lëba'.

Neda' ubi'a quégaca bönachi.

Caní gunné' Xanru' Dios. ²⁰ Lësca' caní rnna:

Channö zoë' nu bönni' biti' ridzáguië' li' dxi'a,

en ridunë', bë'ë le gahuë'.

Channö ribidxë' nisa, bë'ë le guí'jë'.

Cate' gunu' caní, gunu' ga utuí'inë' bönni' na'.

²¹ Biti' gu'u lataj inná be'e le ruá' dö' li',

pero gunná be'e le ruá' dö' na',

ugunu' dxin le naca dxi'a.

13

¹ Yúgu'tëli' ral-la' gunli' ca ta'nnë' bönni' yúlahui'. Dios caz budödë' lu ná'agaquië' yöl-la' unná bë' nápaagaquië', en nucu'ë xilátjagaquië' bönni' ni dë lu ná'agaquië' yöl-la' unná bë'. ² Que lë ni na', nu ridá'baga' yúlahui' ridá'baga' le nuzóa cazë' Dios, ate' nupa ta'dá'baga' caní, nabága' gaca xiguaia'. ³ Nacu'ë bönni' yúlahui', calëga para ulu'zenë' bach nu run le naca dxi'a, pero para ulu'zenë' bach nu ruá' dö'. Channö ré'ënu' gunu' ga biti' ulu'zenë' li' bach, ben le naca dxi'a, ate' uruju' dxi'a lógaquië'. ⁴ Náquië' bönni' yúlahui' ni'a në'ë Dios para gácalenë' li', pero channö runu' le ruá' dö', ral-la' gádxinu', tu' cabí nu'ë nítisö xiyaga yúlahui'. Náquië' ni'a në'ë Dios para uzí' lëbë', gunë' xiguaia' nu ruá' dö'. ⁵ Que lë ni na' run bayudxi gunli' ca rnnë' bönni' na' dë lu në'ë, calégasö tu' budödë' Dios lu në'ë gunë' libí'ili' xiguaia', pero lësca' para soa dxi ládxi'do'oli' lahuë' Dios. ⁶ Que lë ni na' ca' riguíxaj lázali' que yúlahui', tu' nácagaquië' bönni' yúlahui' ni'a në'ë Dios, en tunë' le nudödi cazë' lu ná'agaquië'.

⁷ Guli'guíxaj yúgu'të bönachi le rál-la'li' quégaquië'. Guli'guíxaj lázali' lu na' nu ral-la' quíxaj lázali'. Guli'guíxaj dumí nu ral-la' quíxajli'. Guli'gadxi nu ral-la' gádxili', en

guli'gún bal nu ral-la' gunli' bal. ⁸ Cuntu nu bi ral-la' gál-la'li' que, pero tuz ral-la' idxí'ili' luzá'ali', tu' chibén idú ca rinná bē' xibá queē' Dios nu nadxí'i luzé'e. ⁹ Caní ta'nná bē' xibá na':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácatē.

Biti' sē lādxi'u le dē que luzó'o.

Yugu' xibá ni, en yúgu'tē xibá ia'zica'rō, údxi gun nu run ca rnna didza' rnna caní:

Biti' luzó'o ca nadxí'i cuinu'.

¹⁰ Nu na' nadxí'i luzé'e bití' bi run que luzé'e le ruá' dō'. Caní naca, nu na' nadxí'i luzé'e run idú ca rinná bē' xibá queē' Dios.

¹¹ Guli'gún caní tu' nózili' ca raca dza ni zóaru' na'a, en nózili' ca' chibidxín dza usubán lādxi'li' ca rubán nu chiguxi, tu' chizóarō gal-la' dza uláru' lu le ruá' dō' ca guca cate' ni' gusí loru' réajlē'ēru' Cristo. ¹² Ga zóaru' na'a naca ca chi'i dzó'ölō, ate' chizóa tōdi rēla na', pero ga na' zoē' Cristo naca ca lahui' dza, ate' chizóa tsōjsóaru' ni'. Que lē ni na' ral-la' ucá'anaru' le tun bönachi ga naca chul-la' que dul-la'. Ca na' rugacu cuinē' tu' bönni' rejē' gudil-la' le run chi'i lē' lu gudil-la, ral-la' taru' lu bení' queē' Dios, le gun chi'i rē'u lu na' tu' xihui'. ¹³ Para gunru' caní ral-la' gunru' dxi'a ca ral-la' gun nu ridá lahui' dza.

Biti' ral-la' súdxiru', en cabí gágulē'ēru'.

Biti' ral-la' gunru' le ruá' dō', en calēga le gun ditaj rē'u.

Biti' ral-la' tíl-lalenru' luzá'aru', en cabí uzxé'ēru' luzá'aru'.

¹⁴ Na'a, ral-la' un cuinli' lu icja lādxi'do'oli' ca náquiē' Xanru' Jesucristo, en bití' güi'i lādxi'li' gunli' le rizé lādxi'li' lu yöl-la' bönáchisō queé'li'.

14

Biti' ral-la' si' quídza'ru' böchi' luzá'aru'

¹ Guli'güi' lataj nu réajlē' Cristo gun libí'ili' tsözxón sal-la' bití' naca idú ca réajlē' nu na' Lē'. Biti' tíl-lalenli' nu na' ca nácacaca le runi nu na' huáca nu gun. ² Ca naca lē ni, nacu'ē bönni' runi légaquiē' huáca ilahuē' yúgu'tē le tagu bönachi, pero ia'bal-lē' bönni', tu' cabí naca idú ca ta'yéajlē'ē Cristo, tágusē' le raza ruzóaru'. ³ Na'a, bönni' na' rahuē' yúgu'tē bití' ral-la' uzóē' tsölá'alō nu bönni' bití' rahuē' yúgu'tē, en lēscá' caní, bönni' na' bití' rahuē' yúgu'tē bití' ral-la' si' quídzē'ē bönni' na' rahuē' yúgu'tē, tu' nazí' lu nē'ē Dios iropē' bönni' na' ta'yéajlē'ē Cristo. ⁴ ¿Nuzxi caz lí', rizi' quídzu'u bönni' huen dxin que nu yúbölō? Bönni' na' náquiē' huen dxin queē' Dios, lahuē' Xan cazē' urúajē' tsahui' o bití' urúajē' tsahui'. Channō urúajē' tsahui' lahuē' Dios, naca tu' gun cazē' Xanru' Dios ga urúajē' tsahui'.

⁵ Nadxi ca' zoē' nu bönni' runrē' bal tu dza ca runē' bal ia'zica'rō dza, ate' bönni' yúbölō, tuz ca runē' bal yúgu'tē dza. Tu turu' ral-la' usédada'aru' channō naca dxi'a le runru'. ⁶ Bönni' na' runē' bal tu dza, runē' le bal para tseaj lādxi'ē' Xanru', ate' bönni' na' bití' runē' bal dza na', para tseaj lādxi'ē' Xanru' bití' runē' bal dza na'. Lēscá' caní, bönni' na' rahuē' yúgu'tē, rahuē' caní para tseaj lādxi'ē' Xanru', en rē'ē Dios: "Xclenu'", ate' bönni' na' bití' rahuē' yúgu'tē, bití' rahuē' le para tseaj lādxi'ē' Xanru', en rē'ē ca' Dios: "Xclenu'".

⁷ Biti' zoē' nabanē' queé'zē' nitúē' bönni' nabábalenē' rē'u, en bití' ratiē' queé'zē' nitúē' bönni'. ⁸ Channō zóaru' nabanru', para tseaj lādxi'ru'-nē' Xanru' zóaru' nabanru', en channō gátiru', para gaca yöl-la' ba queē' Xanru' gátiru'. Caní naca, channō zóaru' nabanru' o channō gátiru', nequi quéziru' queē' Xanru'. ⁹ Que lē ni na' ca' gútiē' Cristo, en bubanē', para gáquiē' Xángaca nupa chinátigaca, en nupa nabángaca.

¹⁰ Na'a li', ¿bizx que richugu bë'u böchi' luzó'o? ¿Bizx que ruzú' tsölá'alö böchi' luzó'o? Yúgu'tëru' idxinru' lahuë' Cristo ga uchi'a usöröë' rë'u. ¹¹ Ca naca lë ni nazúaj lu guichi lá'ayi, rnna:

Rnnë' Xanru': "Ni'a quia' neda' caz, ulu'zechu zxíbigaca yúgu'të bönachi lahua' neda'. Ila'guixjö' yálajdo' naca' Dios."

¹² Caní naca, uchi'a usöröë' Dios yúgu'tëru'.

Biti' ral-la' gunru' ga ichixi iníguinë' böchi' luzá'aru'

¹³ Que lë ni na', bítirö ral-la' ichugu bé'ëru' luzá'aru', pero ral-la' gun yúdxiru' cabí gunru' ga ichixi iníguinë' böchi' luzá'aru', en para cabí gunru' ga gunë' dul-la'. ¹⁴ Nöz quézida' bití' bi dë le ráguru' le gaca gun ga bítirö nácaru' tsahui' lahuë' Dios, ate' röjlöz lë ni didza' bë'ë Xanru' Jesús. Channö réquinë' tu bönni' zoa bi gaca gun ga bítirö náquië' tsahui' lahuë' Dios, queë' bönni' ni, caní naca. ¹⁵ Channö rusuhu'innu' böchi' luzó'o, tu' ragu' le runi lë' bití' ral-la' gáguru', bití' runu' ca ral-la' gun nu nadxí'i böchi' luzé'e. Bití' bi ral-la' gagu' le gun ga gaca chopá ládxe'ë bönni' na', gútië' Cristo uláz queë'. ¹⁶ Que lë ni na', bití' bi gunlí' le gun ga ila'nné xihui' bönachi que le rusáca'li' queéli' naca tsahui'. ¹⁷ Cate' rinná bé'enë' Dios rë'u, bití' ru'í ládxi'ru' le gu'aj gáguru', pero ru'í ládxi'ru' gácaru' tsahui', en sóaru' dxi ládxi', en udzéjaru', yugu' le gaca gunru' tu' zóalenë' Dios Bö' Lá'ayi rë'u. ¹⁸ Núti'tës nu run xichinë' Cristo ca nácagaca lë ni, run le raza ládxe'ë Dios, ate' urúaj dxi'a lógaca bönachi.

¹⁹ Que lë ni na' ral-la' gunru' le ilún ga gata' le ribequi dxi ládxi'ru' len yúgu'të bönachi, en le ilún tsutsu turu' ia'turu' ca réajlë'ëru' Cristo. ²⁰ Bití' bi ral-la' gagu' le gun ga gaca chopá ládxi' nu na' nuzóë' Dios. Nácatë lë na' ta'nná bönachi: "Yúgu'të dë lataj gáguru'", pero gunru' le ruá' dö' channö gunru' ga ichixi iníguinë' luzá'aru' tu' nözi lë na' ráguru'. ²¹ Gácarö dxi'a cabí gagu' bëla', en cabí gu'ju' xisi uva nal-la, en bití' bi gunu' le gun ga ichixi iníguinë' böchi' luzó'o, o le gun ga gaca chopá ládxe'ë, o le gun ga huóaj ládxe'ë ca réajlë'ë Cristo. ²² Channö réajlë'u dë lataj bi gunu', ral-la' gunu' le lahuë' Dios ga zu' tuzu'. Bica' ba bönni' na' bití' ruxösa ládxi'da'ahuë' lë tu' nözi lë na' runi lë' dë lataj gunë', ²³ pero bönni' na' raca chopá ládxe'ë tu' nözi le rahuë', nabáguë'ë xíguia', tu' runë' le cabí runi lë' dë lataj gunë'. Naca dul-la' yúgu'të le runru', le cabí runi rë'u dë lataj gunru'.

15

Ral-la' gunru' le raza ládxe'ë böchi' luzá'aru'

¹ Que lë ni na', channö nácaru' tsutsu ca réajlë'ëru' Cristo, ral-la' guá' ilenru' nupa na' nagul-la ládxi'gaca ca ta'yéajlë' Cristo. Bití' ral-la' gunru' le raza ládxi'ru' la' cuínsiru'. ² Yúgu'tëru' ral-la' gunru' le raza ládxe'ë böchi' luzá'aru' para gaca dxi'a queë', en idipa ládxe'ë ca réajlë'ë Cristo. ³ Caní ral-la' gunru', tu' cabí benë' Cristo le guyaza ládxe'ë la' cuínsë', pero guca queë' ca na' nazúaj lu guichi lá'ayi, le rnna: "Budubága'gaca neda' yugu' didza' xihui' gulu'í nupa gula'nné xihui' quiu' Li', Dios." ⁴ Yúgu'të le bulu'zúajë' lu guichi lá'ayi dza ni'te, bulu'zúajë' lu guichi para usëdi rë'u. Lë na' nazúaj lu guichi lá'ayi run ga ribózaru' zxön ládxi', en ruhué tsahui' rë'u. Que lë ni na' zoa le runru' löza. ⁵ Rinábida'-në' Dios, Nu run ga ribózaru' zxön ládxi', en Nu ruhué tsahui' rë'u, gunë' ga gunlí' tuz ca rusáca'li' queéli', para gácali' ca na' ré'ënë' Jesucristo. ⁶ Caní ral-la' gunlí' para gácali' tuz, cú'uli'-në' tsözxón yöl-la' ba Dios, Xuzë' Xanru' Jesucristo. ⁷ Que lë ni na', para gaca yöl-la' ba queë' Dios, guli'sí' lu ná'ali' tuli' ia'tuli' ca na' Cristo guzxi' lu në'ë ca' rë'u. ⁸ Caní ral-la' gunlí', tu' rea' libí'ili': Bidë' Jesucristo, en gúcalenë' bönachi judío, ate' caní bulu'e lahui naca idútë li didza' ru'ë Dios, ate' benë' ga bulu'dxín le guzxi' lu në'ë Dios unödzejë' quégaquië' xuz xtó'otu'.

Yugu' bönachi izá'a ila'yöni didza' dxi'a

⁹ Bidë' ca' Cristo para benë' ga ila'gú'u Dios yöl-la' ba nupa biti' nácagaca judío tu ruhuéchi' ládxë'ë Dios légaquië'. Ca naca lë ni nazúaj lu guichi lá'ayi le rnna:

Que lë ni na', ulu'a lahui le nacu' Li' lógaca bönachi idútë yödzölió, en gul-la' quiu' yöl-la' ba.

¹⁰ Ga yúbölö nazúaj lu guichi lá'ayi le rnna:

Libí'ili', bönachi idútë yödzölió, buli'dzéjalen bönachi queë' Dios.

¹¹ Ga yúbölö nazúaj ca' lu guichi lá'ayi le rnna:

Guli'cu'ë Xanru' yöl-la' ba, yúgu'tëli' biti' nácali' judío. Guli'tséaj ladxi' Lë', yúgu'tëli' zóali' idútë yödzölió.

¹² Lësca' caní buzúajë' Isaías lu guichi le rnna:

Ilá' lahui Nu nababa dí'a dza queë' Isaí. Gaca lo Nu na' para inná be'e nupa biti' nácagaca judío. Nupa ni ilún löza Lë'.

¹³ Rinábida'-në' Dios, Nu run ga runru' löza, gunë' ga udzëjade'eli', en ga soa dxi' ládxi'li' tu' réajlë'ëli' Lë', en gunë' ga gaca idú ca runli' löza, tu' zóalen yöl-la' huáca queë' Dios Bö' Lá'ayi libí'ili'.

¹⁴ Böchi' luzá'ado'. Chinóz quézida' rúntica'sili' le naca dxi'a, en dëda' yöl-la' réajni'i queé'li' para gaca uzéajni'ili' luzá'ali'. ¹⁵ Na'a naca' rugu ladxi', ruzúaja' queé'li' lu guichi ni, bócha'a, en rusá'a ládxi'li' tu' zoa le buzá' ládxi'ë Dios quia' neda'. ¹⁶ Que lë ni na' runa' xichinë' Jesucristo lógaca bönachi biti' nácagaca judío, en runa' libán que didza' dxi'a queë' Dios, para gaca ugu'a bönachi biti' nácagaca judío lu në'ë Dios, nupa na' guró cazë' Dios Bö' Lá'ayi queë' Lë'. Ilácagaquië' ca tu le rigú'uru' lu në'ë Dios, le raza ládxi'ë Lë'.

¹⁷ Na'a, tu' rúnlena' tsözxón Jesucristo dxin, dë lu na'a tsaza ládxa'a ca naca le nuna' lu xichinë' Dios. ¹⁸ Lësca' rurúguida' innía' ca naca lë na' benë' Cristo lu na'a neda', benë' ga tun bönachi biti' nácagaca judío ca rnna xtídzë'ë Dios. Lë ni benë' Lë', bugunë' dxin didza' bë'a neda', en yugu' dxin bena' neda'. ¹⁹ Lu na'a neda' bugunë' dxin ca' le nácagaca bë' bulu'e lahui Lë', en yugu' yöl-la' huáca zxön benë', en yöl-la' huáca na' queë' Dios Bö' Lá'ayi le guzóalen neda'. Caní guca, gusí lahua' runa' libán lu yödzö Jerusalén, ate' idú gásibi'iló ga ridxintë luyú Ilírico, chinuna' libán que didza' dxi'a ca naca queë' Cristo. ²⁰ Bë' ládxa'a bena' libán que didza' dxi'a ga biti' bila'yöni bönachi ca naca queë' Cristo. La'tu' guna' libán ga chibila'yöni bönachi, guna' neda' ca runë' tu bönni' ruguélë'ë lahui dxin zxön chinunë' bönni' yúbölö. ²¹ Ca bena' neda' naca ca na' nazúaj lu guichi lá'ayi le rnna:

Ilá'lé'e nupa nacuá' ga cuntú nu ben libán queë' Lë', en ila'yéajni'i nupa catu caz bila'yöni ca naca queë'.

Ré'ënë' Pablo tsejë' yödzö Roma

²² Que lë ni na', sal-la' zían luzuí gú'unida' guída' ga zóali', biti' guca guída'. ²³ Na'a, chibudxi bena' dxin quia' yugu' lataj ni, en chiré'ënda' zían iz guída' ga zóali'. ²⁴ Que lë ni na', cate' tseja' luyú España, töda' ga zóali' libí'ili', tu' runa' löza uduyú'a libí'ili', en udzëjalenda' libí'ili'. Tödi ni' huáca ugú'uli' neda' nöza. ²⁵ Na'a ral-la' tseja' Jerusalén, tsöju'a tu le gácalen nupa ni' néquiguequi queë' Cristo. ²⁶ Caní guna', le gula'yaza ládxi'gaquië' bönni' nacu'ë luyú Macedonia, en luyú Acaya, bulu'tubë' bi tu'nödzjë' quéguequi bönachi yechi' dzágagaca bönachi queë' Cristo, nacu'ë Jerusalén. ²⁷ Gula'yaza ládxi'gaquië' bönni' biti' nácagaquië' judío gulunë' lë ni. Le nácatë naca tu le rál-la'gaquië' quégaca bönachi judío ni'. Channö bönni' biti' nácagaquië' judío tu'zi'ë xibé

le nácagaca queë' Dios ni'a que le núngaca bönachi judío, lësca' ral-la' ilácalenë' bönachi judío na', ulu'gunë' dxin le dë quégaquië'. ²⁸ Que lë ni na', cate' údxi udöda' lu ná'agaca bönachi judío lë na' bulu'nödzjë' bönni' ni, ní'irö töda' ga zóali' libí'ili' cate' tseja' luyú España. ²⁹ Cate' guída' ga zóali', runa' löza idxínlena' yúgu'të le ruzí'iru' xibé ni'a que didza' dxi'a queë' Cristo.

³⁰ Ni'a queë' Xanru' Jesucristo, en ni'a que yöl-la' nadxí'i ruchízië' Dios Bö' Lá'ayi icja ládxi'do'oru', ráta'yua' loli', bócha'ado', ulídzali'-në' Dios tsözxón len neda', inábili'-në' gácalenë' neda'. ³¹ Guli'nabi-në' Dios gunë' ga ulá' neda' lu ná'agaquië' bönni' bití' ta'yéajlë'ë nacu'ë luyú Judea, en gunë' ga ila'yaza ládxi'gaquië' ila'zi'ë lë na' tsöju'a lu ná'agaquië' bönni' nácagaquië' queë' Cristo, nacu'ë Jerusalén. ³² Guli'nabi-në' ca', channö naca ca ré'ënë' Dios, gunnë' neda' lataj idxina' queéli' len yöl-la' rudzeja quia', para uzí' ládxi'lëna' libí'ili'. ³³ Na'a rinábida'-në' Dios, Nu run ga zoa dxi ládxi'ru', sóalenë' yúgu'tëli'. ¡Ca' gaca!

16

*Tu'gapa Dios luzé'*eguequi bönachi queë' Cristo

¹ Rigu'a-nu lu ná'ali' Febe, nigula zanru' dá'anu Xanru'. Nácanu nigula huen dxin queë' Dios dzáganu bönachi queë' Cristo nacuá' yödzö Cencrea. ² Uláz queë' Xanru' guli'sí' lu ná'ali'-nu nigula na', ca ral-la' ilún bönachi queë' Cristo. Guli'gácalen lënu, unódzjali' queënu bítí'tës bi riquínnu. Lë cázanu gúcalennu bönachi zían, en gúcalennu ca' neda'.

³ Guli'gapa Dios Priscila, en Aquilo, nupa na' gulunlen neda' tsözxón dxin queë' Jesucristo. ⁴ Chopë' ni gula'dödë' ga guzóa bönadxi ilátië' para gulunë' ga cabí gátia' neda', ate' rea' légaquië': "Xclenli'", en calégasö neda', pero lësca' yúgu'të böchi' luzá'aru' nabábagaquië' gapa nacuá' bönachi queë' Cristo bití' nácagaca judío, të'ë légaquië': "Xclenli'." ⁵ Guli'gapa Dios bönachi queë' Cristo tu'dubë' lu yu'u lídxigaquië' Priscila, en Aquilo na'. Guli'gapa Dios Epeneto, bönni' na' nadxí'ida'. Bönni' ni guyéajlë'ë Cristo zí'atëlö ca yúgu'të bönachi luyú Acaya. ⁶ Guli'gapa Dios María, nigula na' bennu dxin zxón queë' Cristo ga ni' rudúbili' libí'ili'. ⁷ Guli'gapa Dios Andrónico, en Junias, yugu' bönni' uládz quia'. Yugu' bönni' ni gula'dzúnlenë' neda' tsözxón lidxi guíë, en nadéli'gaquië' lataj lo ladaj bönni' gubáz nasól-lë'ë Cristo. Lësca' gula'yéajlë'ë Cristo zí'alö ca neda'.

⁸ Guli'gapa Dios Amplias, bönni' na' nadxí'ida', en néquinë' queë' Xanru'. ⁹ Guli'gapa Dios Urbano, bönni' na' bénlenë' netu' tsözxón dxin queë' Jesucristo. Guli'gapa Dios Estaquis, bönni' na' nadxí'ida'. ¹⁰ Guli'gapa Dios Apeles, bönni' na' naca bë' réajlë'ë Cristo. Guli'gapa Dios nupa nacuá' lidxë' Aristóbulo. ¹¹ Guli'gapa Dios Herodión, bönni' uládz quia'. Guli'gapa Dios nupa nacuá' lidxë' Narciso, en ta'yéajlë'ë Xanru'. ¹² Guli'gapa Dios Trifena, en Trifosa, nigula na' tunnu dxin queë' Xanru'. Guli'gapa Dios Pérsida, nigula na' bennu dxin zxón queë' Xanru', ate' nadxí'iru'-nu. ¹³ Guli'gapa Dios Rufo, bönni' rö queë' Xanru'. Guli'gapa Dios xiné'ë Rufo na', nácanu ca' ca xiná' caza'. ¹⁴ Guli'gapa Dios Asíncrito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacuá'lenë' légaquië'. ¹⁵ Guli'gapa Dios Filólogo, en Julia, en Nereo, en nigula zanë' Nereo na', enca' Olimpás, en yúgu'të böchi' luzá'aru' ta'yéajlë'ë Cristo, nacuá'lenë' légaquië'.

¹⁶ Guli'gapa Dios luzá'ali', unída'li' luzá'ali' lu yöl-la' nadxí'i queéli'. Tu'gapë' Dios libí'ili' yúgu'të böchi' luzá'aru' nabábagaquië' gapa nacuá' bönachi queë' Cristo luyú ni.

¹⁷ Na'a, ráta'yua' loli', bócha'ado', guli'gún ga ilaca bë' nupa tun ga irúajli' choplö, en tun ga ichixi iníguili', tu' tu'sédinë' le cabí röjlöz le nazédali'. Guli'cufta ga nacuá' bönachi caní ¹⁸ tu' cabí tun xichinë' Jesucristo. Tunë' dxin para bi gata' quégacasë', en ta'zí' yé'enë' yugu' bönni' nöxaj ladxi', tu'gunë' dxin didza' nöxaj ladxi', en didza' tséajlë'ëru' le cabí nácatë. ¹⁹ Rizé didza' ca na' runli' ca rna xtídzë'ë Xanru', ate' ta'yöni yúgu'të

bönachi. Que læ ni na' rudzėjada' ni'a que le runli' libí'ili'. Na'a, ré'ënda' gácali' sina' gunli' le naca dxi'a, en calëga gunli' le ruá' dö'. ²⁰ Dios, Nu run ga zóaru' dxi ladxi', si' gunë' ga ucúl-lali' Satanás, tu' xihui'. Rinábida'-në' Xanru' Jesucristo uzá' ládxë'ë queéli' le gácalen libí'ili'.

²¹ Bi'i Timoteo, bi'i na' rúnlenbi' neda' tsözxón dxin, rugápabi' Dios libí'ili'. Lucio, en Jasón, en Sosípater, yugu' bönni' uládz quia', tu' gapë' Dios libí'ili'.

²² Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguië' Xanru' neda'.

²³ Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të bönachi queë' Cristo ni, rugapë' Dios libí'ili'. Erasto, bönni' yu'u lu në'ë dumí que yödzö ni, rugapë' Dios libí'ili'. Bóchi'ru'do' Cuarto rugapë' Dios libí'ili'.

²⁴ Rinábida'-në' Xanru' Jesucristo uzá' ládxë'ë queéli' yúgu'tëli' le gácalen libí'ili'. ¡Ca' gaca!

Yöl-la' ba Dios

²⁵ Na'a, rigú'utu'-në' yöl-la' ba Dios, Nu gaca gun tsutsu libí'ili' ca naca didza' dxi'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', læ na' bucáchë'ë Lë' dza ni'te ga bidxintë na'a dza. ²⁶ Na'a chibulu'ë lahui læ ni yugu' lu guichi bulu'zúajë' bönni' gulu'ë didza' uláz queë' Dios ca na' gunná cazë' Dios, Nu zóatica'sö. Na'a raca libán que lógaca yúgu'të bönachi para gaca ila'yéajlë' Cristo, en ilún ca rnna xtídzë'ë.

²⁷ ¡Ni'a que le benë' Jesucristo, gácatica'sö yöl-la' ba queë' la's dui Dios, Nu rácatërö caz! ¡Ca' gaca!

DIDZA' ZÍ'ALÖ GUSÓL-LË'Ë PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

¹ Ca ré'ëni quézinë' Dios bulidzë' neda', Pablo, para gaca' gubáz queë' Jesucristo. Bóchi'ru' Sóstenes runë' neda' tsözxón. ² Rugapa' Dios libí'ili', böchi' luzá'ado', rudúbili' queë' Dios lu yödzo Corinto, en nácali' quez queë' Dios tu' nácali' tuz len Jesucristo. Dios caz bulidzë' libí'ili' para guéquili' quez queë' tsözxón len yúgu'të nupa nacua' yúgu'të lataj, en tu'lidzë' Dios, tu'gunë' dxin La la'ayi queë' Xanru' Jesucristo, Xángaquië', enca' Xanru'. ³ Ráta'yua' lahuë' Xúziru' Dios, en lahuë' Xanru' Jesucristo uzá' ládxë'ë queéli', en gunë' ga soa dxi icja ládxí'do'oli'.

Yugu' le ruzí'iru' xibé tu' néquiru' queë' Cristo

⁴ Rética'sa'-në' Dios: "Xclenu'" ca naca queéli', tu' zoa le buzá' ládxë'ë Dios queéli' tu' nácali' tuz len Jesucristo. ⁵ Tu' nácali' tuz len Cristo, Dios chinagú'udë'ë xinózili' yúgu'të le nequi queë'. Rácalenë' libí'ili' ca naca yúgu'të didza' ruí'ili', en runë' ga réajni'ili' yúgu'të. ⁶ Caní naca, tu' guzxi' lu ná'ali' idú ládxí'li' le runtu' liná' lo ca naca queë' Cristo. ⁷ Que lë ni na', bití' bi riyadzaj queéli' que le runnë' Dios Bö' Lá'ayi queëru', tsanni ni ribózáli' dza na' ilá' lahuë' Xanru' Jesucristo. ⁸ Lë cazë' utipë' ládxí'li' para gaca guá' ilenli' yúgu'të ga idxintë dza údxi, para cabí gaca nu bi innë' queéli' dza ni' huödë' Xanru' Jesucristo. ⁹ Dios runë' ca rnnë', en Lë cazë' bulidzë' libí'ili' para gácali' tuz len Zxí'inë', Xanru' Jesucristo.

Narúajgaca choplö bönachi queë' Cristo nacu'ë Corinto

¹⁰ Ni'a queë' Xanru' Jesucristo ráta'yua' loli', böchi' luzá'ado', guli'gún tuz xtídza'li' yúgu'tëli'. Bití' irúajli' choplö, pero guli'gaca tuz ca rizá' ládxí'li', en ca runi libí'ili'. ¹¹ Caní rea' libí'ili', böchi' luzá'ado', tu' gula' guíxjöi'inë' neda' bönni' nacu'ë lídxinu Cloé ca runli', ta'nnë' ridil-la dídzá'li'. ¹² Lë ni rnní'a: Nadzá'lö didza' ruí'ili' tu tuli'. Bál-lali' rnnali' dá'ali' Pablo. Ia'bál-lali' rnnali' dá'ali' Apolos. Ia'bál-lali' rnnali' dá'ali' Cefas, ate' ia'bál-lali' rnnali' dá'ali' Cristo. ¹³ ¿Naru' birúajtsë' choplö Cristo? ¿Naru' gudá'atsa' neda', Pablo, lë'e yaga cruz uláz queéli'? ¿Naru' bidí'atsali' nisa para gácali' tuz len neda'? ¹⁴ Rea'-në' Dios: "Xclenu'", tu' cabí buquila' nisa niturö libí'ili', pero chópasë' Crispo, en Gayo. ¹⁵ Que lë ni na' bití' gaca innali' bidí'lali' nisa para gácali' tuz len neda'. ¹⁶ Lësca' buquila' nisa Estéfanos, en nupa nacua' lidxë'. Bití' rójneda' channö buquila' nisa nu yúbölö. ¹⁷ Gusól-lë'ë Cristo neda', calëga para uquila' bönachi nisa, pero para guna' libán que didza' dxi'a. Ru'a didza', calëga lu yöl-la' rácada' que caza', para cabí ucácha'a yöl-la' huáca que le benë' Cristo lë'e yaga cruz.

Cristo napa cazë' yöl-la' huáca, en yöl-la' réajni'i queë' Dios

¹⁸ Nupa nácgaca chul-la niti téquiguequi cá'asö naca libán runru' ca naca queë' Jesús, ca na' gútië' lë'e yaga cruz, pero ré'u na' nuláru', réquibe'eru' dzaga le yöl-la' huáca queë' Dios le rusölá ré'u. ¹⁹ Caní naca, tu' nazúaj lu guichi lá'ayi le rnna: Guna' ga huóaca nítisö yöl-la' rácada' quégaca nupa taca yenni'. Tsölá'alö ucá'ana' yöl-la' réajni'i quégaca nupa ta'yéajni'i yenni'.

²⁰ ¿Bizxi caz uzi'tsë' xibé bönni' réajni'inë' yenni'? ¿Bizxi caz uzi'tsë' xibé bönni' nazédadë'ë? ¿Bizxi caz uzi'tsë' xibé bönni' nabé'ede'enë' ru'ë didza'? Dios chibenë' ga böaca cá'asö yöl-la' réajni'i quégaca bönachi yödzülió ni. ²¹ Dios, lu yöl-la' réajni'i queë', bití' bë'ë lataj ilúnbe'e bönachi yödzülió ni Lë' ni'a que yöl-la' rácada' quégaquië'. Dios

guyaza ládxe'ë busölé' nupa ta'yéajlé' Lë' ni'a que libán na' runru', sal-la' téquiguequi bönachi cá'asö naca.

²² Té'ennë' yugu' bönni' judío ila'lé'enë' yöl-la' huáca nácagaca bë', ate' bönni' zi'tu' ta'guiljé' yöl-la' réajni'i. ²³ Rë'u ni runru' libán queë' Cristo, ca na' gútië' lë'e yaga cruz. Le nácatë, libán runru' ca gútië' Cristo, run ga ta'chixi ta'nigui bönachi judío, ate' ia'zica'rö bönachi téquiguequi cá'asö naca. ²⁴ Bönni' na' bulidzë' Dios légaquië', sal-la' nácagaquië' bönni' judío o bönni' zi'tu', téquibe'enë' napa cazë' Cristo yöl-la' huáca queë' Dios, en yöl-la' réajni'i queë' Dios. ²⁵ Téquiguequi bönachi yödzölió ni le benë' Dios naca bë' biti' bi nózinë', pero lë na' benë' náparö yöl-la' réajni'i ca yöl-la' réajni'i quégaca bönachi. Téquiguequi le benë' Dios naca bë' nacuídi'në', pero lë na' benë' náparö yöl-la' huáca ca yöl-la' huáca quégaca bönachi. ²⁶ Na'a, böchi' luzá'ado', guli'tsöjné' ca gúcali' cate' bulidzë' Dios lib'ili'. Biti' gula'cu'ë ládjali' zían bönni' ta'yéajni'inë' lu yöl-la' bönáchisö quégaquië', en biti' gula'cu'ë ládjali' zían bönni' unná bë', en calëga zían bönni' nácagaquië' lo. ²⁷ Téquiguequi bönachi yödzölió ni yugu' bönni' na' guróë' Dios biti' bi nózguequinë'. Caní benë' Dios para gunë' ga ulu'tu'i nupa ta'yéajni'i. Lësca' caní guróë' Dios nupa nacuídi'gaca yödzölió ni para gunë' ga ulu'tu'i nupa nál-lagaca. ²⁸ Lësca' caní, téquiguequi bönachi yödzölió ni nupa na' guróë' Dios nácagaca cá'asö, en biti' bi nácagaca, en nacuídi'gaca. Caní benë' Dios para gunë' ga ulu'gá'ana cá'asö lë na' tun zxön bönachi yödzölió ni. ²⁹ Que lë ni na', cuntu nu gaca gun ba zxön cuini lahuë' Dios. ³⁰ Dios caz benë' ga nácaru' tuz len Jesucristo, en benë' ga náparu' yöl-la' réajni'i queë' Cristo. Tu' náquië' Cristo tuz len rë'u, nuhuóácaru' tsahui', en néquiru' quez queë' Dios, en nuláru'. ³¹ Naca ca na' nazúaj lu guichi lá'ayi, le rnna: "Channö zoa nu bi ré'ëni gun zxön, ral-la' gun zxön Xanru'."

2

Libán runru' queë' Cristo, ca gudé'ë lë'e yaga cruz

¹ Caní guca, böchi' luzá'ado', cate' bidxina' queéli'. Bena' libán loli' que xtídzë'ë Dios, calëga len yöl-la' réajni'i quia', en biti' bë'a didza' lu yöl-la' rácada' quia'. ² Cate' ni' guzóalena' lib'ili', bë' ládxa'a cabí gu'a didza' que le yúbölö, pero ca nácatë queë' Jesucristo bë'a didza', ca na' gudé'ë lë'e yaga cruz. ³ Guzóalena' lib'ili' lu yöl-la' ricuidi' quia', ate' lu yöl-la' radxi quia' guxzízida'a. ⁴ Bë'lëna' lib'ili' didza', en bena' libán que xtídzë'ë Dios, calëga ca tu'i didza' bönachi lu yöl-la' rácada' quéguequisö, pero guzóalënë' Dios Bö' Lá'ayi neda', ate' guzóalen yöl-la' huáca queë' Dios neda', le guca bë' naca idütë li didza' bë'a. ⁵ Caní bena' para gaca tséajlé'ëli' Dios, calëga tu' biyónili' yöl-la' rácada' quégaca bönachi, pero tu' bilé'eli' yöl-la' huáca queë' cazë' Dios.

Dios Bö' Lá'ayi runë' ga núnbë'ëru'-në' Dios

⁶ Ru'itu' didza' lu yöl-la' rácada' lógaca nupa chinácarö idú ca ta'yéajlé' Dios. Yöl-la' rácada' ni biti' naca ca le nápagaca bönachi yödzölió ni, en biti' naca ca le nápagaquië' bönni' ta'nná bë'ë dza ni zóaru' na'a, nupa na' ta'niti caz. ⁷ Ru'itu' didza' que yöl-la' rácada' nagachi', lë na' runödzjé' Dios, tu' bigachi' yöl-la' rácada' na' buzóë' Dios dza ni'te para uzí'iru' xibé. ⁸ Yugu' bönni' ta'nná bë'ë dza ni zóaru' na'a biti' gulúnbë'ë yöl-la' rácada' na'. La'tu' gulúnbë'ë le, biti' ulu'dé'ë Xanru' nayépisëtë'rë' lë'e yaga cruz. ⁹ Naca ca na' nazúaj lu guichi lá'ayi le rnna:

Chinupé'ë Dios le ulu'zí' xibé nupa nadxí'iguequi Lë',

yugu' le cuntu nu blë'e, en biti' biyóni,

en biti' gula'zá' ládxi'gaca bönachi ca naca que.

¹⁰ Na'a, Dios nuzéajni'inë' rë'u yugu' lë ni lu në'ë Dios Bö' Lá'ayi, tu' ruyú cazë' Dios Bö' Lá'ayi yúgu'të, enca' le yu'u icja ládxi'da'ahuë' Dios caz.

¹¹ ¿Naru' gaca inózinë' nu bönni' le yu'u icja ládxi'da'ahuë' ia'túë' bönni'? Tuz bö' naca cazë' bönni' na' nözi lë na'. Lësca' caní, cuntú nu nözi le yu'u icja ládxi'da'ahuë' Dios. Tuzë' Dios Bö' Lá'ayi nózinë' lë ni. ¹² Rë'u ni, biti' nazi' lu ná'aru' tu bö' ridasö yödzülió ni, pero nazi' lu ná'aru' Dios Bö' Lá'ayi, Nu na' ruchízië' Dios rë'u para gaca gúnbe'ëru' yugu' le buzá' ládxi'ë Dios queëru'. ¹³ Yugu' lë na' buzá' ládxi'ë Dios queëru' ru'iru' didza' que, calëga len didza' tu'sédinë' bönachi rë'u len yöl-la' rácada' quéguequi, pero len yugu' didza' rusédinë' Dios Bö' Lá'ayi rë'u. Caní naca, ruzéajni'iru' bönachi zóalenë' Dios Bö' Lá'ayi légaquië' ca naca le rusédinë' Dios Bö' Lá'ayi rë'u.

¹⁴ Tu bönni' biti' zóalenë' Dios Bö' Lá'ayi lë' biti' rizi' lu në'ë le rusédinë' Dios Bö' Lá'ayi rë'u, tu' réquinë' cá'asö naca. Biti' gaca tséajni'inë' bönni' na' lë ni, tu' gaca guéquibe'enë' tuzë' bönni' zóalenë' Dios Bö' Lá'ayi lë' le nazaca' lë ni. ¹⁵ Tu bönni' zóalenë' Dios Bö' Lá'ayi lë' gaca guéquibe'enë' le nazaca' yúgu'të, pero cuntú nu gaca guéquibe'e le nazaca' cazë' bönni' na'. ¹⁶ Nazúaj lu guichi lá'ayi le rnna:

¿Nuzxi caz nözi le riza' ládxi'ë Xanru'?

¿Nuzxi caz gaca uzéajni'i Lë'?

Le riza' ládxi'ë Cristo yu'u icja ládxi'do'oru' rë'u.

3

Nácaru' huen dxin tsözxón len Dios

¹ Que lë ni na', böchi' luzá'ado', biti' guca gü'ílena' lib'íli' didza' ca ru'ílena'-në' didza' tu bönni' nudödi cuinë' lu në'ë Dios Bö' Lá'ayi, pero bé'lëna' lib'íli' didza' ca ru'ílena' nu naca bönáchisö didza', biti' zóalenë' Dios Bö' Lá'ayi nu na'. Nácali' ca yugu' bi'i huë'ëni. Biti' nácali' tsutsu ca réajlë'ëli'-në' Cristo. ² Busédida' lib'íli' le cabí naca böniga, lë na' guca ca nidxi' gü'íli'. Biti' busédida' lib'íli' le naca böniga ca bëla' gáguli'. Biti' guca tséajni'ili' le naca ca bëla' gáguli', en biti' rácali' na'a. ³ Caní naca, tu' nácali' ca nu naca bönáchisö ga ridxintë na'a dza. Tsanni ni ruzxé'eli' luzá'ali', en ridil-la dídza'li', en rirúajli' choplò, nácali' ca nu naca bönáchisö, en runli' tuz ca tun bönachi yödzülió ni. ⁴ Cate' zóalen lib'íli' nu rnna da' Pablo nu na', en ia'tú nu rnna da' Apolos, nácali' ca nu naca bönáchisö.

⁵ ¿Nuzxi caz naca' neda', Pablo? ¿Nuzxi caz na' Apolos? Nácatu' huen dxin queë' Dios, ate' ni'a que le bentu' guyéajlë'ëli' Cristo. Tu tutu' runtu' dxin na' bennë' Xanru' que queëtu'. ⁶ Dxin bentu' lu icja ládxi'do'oli' naca ca dxin run nu raza ruzóa. Neda' guza' xisedo', ate' Apolos gulu'ë nisa, pero Dios benë' ga gulén, en guzxón xisedo' na' nadúz icja ládxi'do'oli'. ⁷ Caní naca, láti'do'os nazáquië' bönni' guz, en láti'do'os ca' bönni' rigu'ë nisa, pero nazáca'dë'ë Dios Nu run ga rilén, en rizxón xisedo' na'. ⁸ Tuz ca nácagaquië' bönni' razë', en bönni' rigu'ë nisa. Dios ubi'ë que queégaquië' tsca naca dxin runë' tu tuë'. ⁹ Nácatu' huen dxin tsözxón len Dios, ate' lib'íli' nácali' ca la' yëla queë' Dios ga runtu' dxin.

Lësca' caní nácali' ca tu yu'u runë' Dios. ¹⁰ Ca naca le buzá' ládxi'ë Dios quia', naca' ca tu bönni' huen zö'ö lo. Neda' gulu'a xilibi zö'ö, ate' nu yúbölö richisa zö'ö na'. Tu turu' ral-la' uyuru' ca richíсарu' zö'ö lahui xilibi zö'ö na'. ¹¹ Dios chigulu'ë tu xilibi zö'ö le naca Lë cazë' Jesucristo, ate' cuntú nu gaca cu'u ia'tú xilibi zö'ö caní. ¹² Dxin runru' queë' Cristo naca ca richíсарu' zö'ö lahui xilibi zö'ö na'. Lahui xilibi zö'ö na' gaca nu gun dxin le naca ca richisa zö'ö le naca ca le néquini oro, o plata, o guiój nazáca'da'gaca, o gaca nu gun dxin le naca ca richisa zö'ö le néquini yaga, o guizxi, o guixi' cá'asö. ¹³ Gaca bë' ca naca dxin núngaca tu tu bönachi. Cate' idxín dza ichúguië' Dios quégaca bönachi, ilá' lahui dxin nunru', tu' tödi dxin na' lu guí, ate' guí na' si' bë' dxin núngaca tu tu bönachi. ¹⁴ Channö dxin nunë' tu bönni' urúaj dxi'a lu guí na', le naca ca tu zö'ö guchisë', Dios ubi'ë queë' ca sa'yéaj dxin nunë'. ¹⁵ Channö tsegui dxin nunë' tu bönni' le naca ca tu zö'ö guchisë', unítie' le ré'ënë' ubi'ë Dios queë', pero ulá cazë' lë', ate' gaca queë' ca raza que nu rulá tu lu guí.

¹⁶ ¿Naru' cabí nózili' naca cázali' yudo' queë' Dios, ate' zoë' Dios Bö' Lá'ayi icja ládxi'do'oli'? ¹⁷ Channö nu usuniti yudo' queë' Dios, Dios usunítie' nu na', tu' naca lá'ayi yudo' queë' Dios, ate' libí'ili' naca cázali' yudo' na'.

¹⁸ Biti' si' ye'e cuinli'. Channö réqui nu nutsa' ladjali' rácada' ca tácada' bönachi yödzölió ni, ral-la' huóaca nu na' ca tu bönni' biti' bi nózine', para gata' que yöl-la' rácada' le naca idú. ¹⁹ Nu bönni' napzë' yöl-la' rácada' que yödzölió ni náquie' tu bönni' biti' bi nózine' lahuë' Dios. Nazúaj lu guichi lá'ayi le rnna: "Dios runë' ga ila'chixi ila'nigui nupa tácada', rugunë' dxin yöl-la' rácada' quéguequi." ²⁰ Lësca' caní rnna: "Xanru' nózine' nítisö naca le ta'bequi ícjagaca bönachi tácada'." ²¹ Que lë ni na', biti' ral-la' gunli' zxön le gaca gunë' tu bönni'. Nequi queéli' yúgu'të. ²² Néquiguequi queéli':

Pablo, en Apolos, en Cefas,
 en yödzölió ni,
 en yöl-la' na'bán, en yöl-la' guti,
 en dza ni zóaru' na'a, en dza si' za'.
 Yúgu'të nequi queéli',
²³ ate' libí'ili' néquili' queë' Cristo,
 ate' Cristo néquinë' queë' Dios.

4

Dxin tunë' bönni' gubáz nasól-lë'ë Cristo

¹ Que lë ni na', ral-la' guéquili' nácatu' netu' huen dxin queë' Cristo, en nazi' lu na'tu' le nagachi' queë' Dios. ² Yugu' bönni', Dios nudödë' lu ná'agaquie' ulu'gunë' dxin le nequi queë', run bayudxi ilunë' idú dxi'a le tunë'. ³ Biti' bi ruí'i ládxa'a channö uchi'a usöröli' neda', o channö ulu'chi'a ulu'söró bönachi yödzölió ni neda'. Biti' ca' ruchí'a rusöró cuina'. ⁴ Biti' ruxós ládxi'da'ahua' neda'. Lë ni biti' naca bë'biti' nabága'a xíguia'. Xanru' náquie' Nu ruchí'a rusöróë' neda'. ⁵ Que lë ni na', biti' ral-la' uchi'a usöröli' nu bönni' zí'aló ca idxín dza que. Guli' cóz dza ni' huödë' Xanru', ate' Lë' ubéajë' ga liná' le nagachi' ga chul-la, en ulu'ë lahui le yu'u icja ládxi'do'gaca yúgu'të bönachi. Ní'irö Dios ubi'ë que queégaca bönachi le gun bal léguequi ca ral-la' gaca quéguequi.

⁶ Na'a, böchi' luzá'ado', ca naca lë ni, bë'a didza' que le runtu' netu', Apolos, en neda'. Huáca usédali' ca runtu' netu' para gunli' le nazúajsö lu guichi lá'ayi, en biti' gunli' zxön tuë' bönni', en biti' uzóali' tsölá'aló ia'túë'. ⁷ ¿Nuzxi bentsö ga nacu' li' lo? ¿Bizxi caz bidéli'nu' li' le cabí bennë' Dios quiu'? Channö Lë' bénnasë' quiu' lë na' dë lu no'o, ¿bizx que run ba zxön cuinu', réquinu' rácasö quiu' bidéli'nu' lë na'?

⁸ ¿Naru' réquitseli' nadéli'tëröli'? ¿Naru' réquitseli' rilé'eli' yöl-la' tsahui' queéli'? ¿Naru' réquitseli' rinná bé'ëli', sal-la' biti' rinná bé'ëtu' netu'? Ni'a queë' Xanru' Dios ré'ënda' inná bé'ëli' para gaca inná bé'lentu' libí'ili' tsözxón. ⁹ Runi neda' naca queëtu', bönni' gubáz queë' Dios, ca nuzóë' netu' zéajtu' xibánitë ca na' raca quégaquie' bönni' chinarugu quégaquie' ilátie' lahui' lógaca bönachi. Nácatu' ca tu le tu'yuda' bönachi yödzölió ni, enca' ca tu le tu'yúdë'ë gubáz lá'ayi queë' Dios. ¹⁰ Tu' ré'ënitu' guntu' xichinë' Cristo, ruí'itu' bönachi lataj téquiguequi nácatu' bönni' biti' bi nózquequinë', pero libí'ili' réquili' rácada'ali' tu' nácali' queë' Cristo.

Libí'ili' réquili' chinál-lali',
 pero téquiguequi bönachi nacuídi'tu' netu'.

Tu'zóa bönachi netu' tsölá'aló,
 pero tun libí'ili' bal.

¹¹ Ga ridxintë na'a dza, riduntu', en ribídxitu' nisa.
 Biti' dë lari' gácutu'.

Tun bönachi netu' zí', en biti' zoa lídxitu'.

¹² Rusaca' zí' cuintu', la' nétu'sö runtu' dxin.

Tu'lidza bönachi netu' zi,
pero netu' rinábatu' le gácalen léguequi.
Ta'bía ládxi' gaca bönachi netu',
pero ruá' rilentu' le.

¹³ Ta'nné' queé'tu',
pero lu yöl-la' nöxaj ladxi' ru'ilentu' légaquié' didza'.
Ga ridxinté na'a dza nácatu' ca bëbu que yödzölió ni,
en ca tu le ta'rú'una yúgu'té bönachi.

¹⁴ Ruzúaja' queé'li' caní lu guichi, calëga tu' ré'ënda' guna' ga utu'ili', pero ré'ënda' uzéajni'ida' libí'ili', runa' ca runé' tu bönni' ruzéajni'iné' yugu' xzí'ini cazé' tu' nadxí'iné' légacabi'. ¹⁵ Sal-la' gaca zían gáyu'ë bönni' ila'cuá'alen libí'ili', en ulu'séidiné' libí'ili' ca naca queé' Cristo, tuz nu zoa naca ca xúzili', nu na' ben ga néquili' queé' Cristo. Lu yöl-la' na'bán cubi le nápalí' tu' dzágali' Cristo, neda' caz naca' ca xúzili' tu' busiyönda' libí'ili' didza' dxi'a. ¹⁶ Que lë ni na', ráta'yua' loli' gü'i ládxi'li' gunli' ca runa' neda'.

¹⁷ Que lë ni na' ca' risól-la'a-bi' bi'i Timoteo ga zóali'. Tu' rúnlenbi' neda' dxin queé' Xanru' nácabí' ca xzí'ini caza', en nácabí' idú ladxi', ate' nadxí'ida'-bi'. Gunbi' Timoteo ga tsöjnéli' yugu' xibá rusédida' tu' néquida' queé' Cristo, yugu' le rusédida' yúgu'té lataj lógaca yúgu'té cö' bönachi queé' Cristo. ¹⁸ Bál-lali' run ba zxön cuinli' tu' réquili' bítirö udxina' ga zóali'. ¹⁹ Na'a, la' udxíntea' ga zóali' channö Xanru' gunné' neda' lataj. Ní'irö guéquibe'eda', calégasö didza' tu'ë bönni' tun ba zxön cúngaquié', pero guéquibe'eda' channö zóalen yöl-la' huáca queé' Dios légaquié'. ²⁰ Channö nazí' lu ná'ali' rinná bé'ené' Dios libí'ili', bití' naca bë' naca caní tu' rnnásili' ca'. Naca bë' naca caní channö zóalen libí'ili' yöl-la' huáca queé' Dios. ²¹ ¿Bízxilö ré'ënili'? ¿Naru' ré'ënili' udxina' ga zóali' len gubá'ayi, para guna' libí'ili' zi', o len yöl-la' nadxí'i, en lu yöl-la' nöxaj ladxi'?

5

Pablo ruchi'a rusöröe' tuë' bönni' runé' le ruá' dö

¹ Rizé didza' zóalené' libí'ili' tuë' bönni' runé' le ruá' dö, tu' zóalené' nigula queé' xuzé'. Le ruá' dö' caní bití' ca' tun bönachi bití' núnbë'gaca Dios. ² Libí'ili' run ba zxön cuinli', pero ral-la' hu'ínili', en ubéajli' nu na' run dul-la' na' ga zóali'. ³ Sal-la' bití' zóalena' libí'ili' lu idúté le naca', le nácaté zóalena' libí'ili' lu bö' naca caza'. Ca chizóalen caza' libí'ili' chibuchí'a busöróa' nu na' run dul-la' na'. ⁴ Cate' udúbili' queé' Xanru' Jesucristo guna' libí'ili' tsözxón lu bö' naca caza'. Ní'irö, len yöl-la' huáca queé' Xanru' Jesús ⁵ bulí'dödë' bönni' na' lu na' Satanás tu' xihui' para initi idúté le naca cazé', pero ulá bö' naca cazé' dza ni' huödë' Xanru'.

⁶ Bití' naca dxi'a gun ba zxön cuinli' ca naca le runli'. ¿Naru' cabí nózili' didza' na' rna: "Cua zído'os que yöta xtila gun ga chazxaj idúté cúa nazí'i le"? ⁷ Na'a, guli'cúa ga zóali' dul-la' na' le naca ca tu cúa zi gulás, para gácali' dxi'a. Ní'irö gácali' ca tu cúa cubi le cabí nazí'i cúa zi que, ca na' le nácaté chinácali'. Naca queé'ru' ca chizóaru' Laní Pascua cate' tahué' yöta xtila bití' nazí' cúa zi que, en chigulútié'-ba' uláz queé'ru' bö'cu' zxila' que Laní Pascua na', bö'cu' zxila' na' náquié' Lë cazé' Cristo. ⁸ Que lë ni na' ral-la' gunru' laní na', calëga zóalen rë'u cúa zi gulás na' le rulu'i le ruá' dö', en le cabí nazaca', pero ral-la' ugunru' dxin yöta xtila na' bití' nazí'i cúa zi que, yöta xtila na' rulu'i le naca idú dxi'a, en le naca idúté li.

⁹ Cate' buzúaja' queé'li' lu guichi zí'alö, gudxi caza' libí'ili' bití' gunli' tsözxón bönni' tuné' le ruá' dö'. ¹⁰ Gudxa' libí'ili' caní, calëga para ucuítali' tsaz ga nacua' bönachi yödzölió ni, nupa tun le ruá' dö', en ga nacua' bönachi ta'zé ládxi'gaca le dë que luzé'eguequi, en ga nacu'ë yugu' bönni' gubán, en bönachi ta'yéaj ládxi'gaca budó' guió' budó' yaga. Para gunli' caní gun bayudxi irúajli' yödzölió ni. ¹¹ Le ré'ëni inná didza' na' buzúaja' queé'li' zí'alö naca para cabí gunli' tu' zxön tuë' bönni' rnné' néquiné' queé'

Cristo, pero runë' dul-la' le lë'e, o rizé ládxe'ë le dë que luzé'ë, o reaj ládxe'ë tu budó' néquini, o rinné xihuë'ë, o rizúdxinë', o ribanë'. Biti' ca' gágulenli' tsözxón tuë' bönni' caní. ¹²⁻¹³ Biti' nequi quia' neda' uchi'a usöró'a nupa bití' nabábagaca rë'u. Dios uchi'a usöróë' léguequi. Libí'i cázali' ral-la' uchi'a usöröli' nupa nabábagaca libí'ili'. Que lë ni na', guli'cúë' ga zóali' bönni' xihui' na'.

6

Biti' ral-la' iché'ëru' böchi' luzá'aru' lógaca bönachi yúlahui'

¹ Cate' ridil-la dídza'li' tuli' len ia'tuli', ¿nacxi caz rurúguili' tséajli' yúlahui' ga ulu'chi'a ulu'söró nupa bití' ta'yéajlë' Cristo libí'ili'? Dxí'aró tséajli' lógaca bönachi queë' Cristo para ulu'chi'a ulu'söró libí'ili'. ² ¿Naru' cabí nózili' nupa néquiquequi queë' Cristo ral-la' ulu'chi'a ulu'söró yúgu'të bönachi yödzölió? Channö libí'i cázali' uchi'a usöröli' bönachi yödzölió, ¿naru' cabí náпали' yöl-la' réajni'i uchi'a usöröli' didza' bizxaj caní? ³ ¿Naru' cabí nózili' ral-la' uchi'a usöröru' yugu' gubáz lá'ayi? Rúntërö bayudxi uchi'a usöröru' le taca yödzölió ga ni zóaru' na'a. ⁴ Na'a, channö raca tu le run bayudxi nu uchi'a usöró, lë na' raca yödzölió ni, ¿bizx que rucua'ali' nupa ulu'chi'a ulu'söró le, nupa na' bití' bi dë lu né'eguequi ládjacaca bönachi queë' Cristo? ⁵ Rnnía' caní para guna' ga utu'ili'. ¿Naru' cabí zóalen libí'ili' nu raca lati' nu gaca uchi'a usöró le raca quégaquië' böchi' luzá'ali'? ⁶ ¿Nacxi caz gaca tu bönni' réajlë'ë Cristo iché'ë böchi' luzé'ë yúlahui' ga ulu'chi'a ulu'söró bönachi bití' ta'yéajlë' Cristo légaquië'?

⁷ Le nácatë richixi riníguili' tu' ridil-la dídza'li'. ¿Bizx que bití' guá' ilenli' nu ruá' dö' queéli'? ¿Bizx que bití' guá' ilenli' nu rucáchi'lan le dë queéli'? ⁸ Libí'ili' ruá'ali' dö', en rucachi' lanli', ate' runli' caní quégaquië' böchi' luzá'ali' ta'yéajlë'ë Cristo.

⁹⁻¹⁰ ¿Naru' cabí nózili' bití' ila'yaza bönachi bití' nácacaca tsahui' ga rinná bë'ë Dios? ¿Bití' sí' ye'e cuinli'!

Bití' ca' tsaz ga rinná bë'ë Dios nu run le ruá' dö':
Cuntu nu reaj ladxi' budó' guiój budó' yaga,
en cuntu nu riguitsaj xibá que yöl-la' nutsaga na',
en cuntu nu bönni' run cuinë' ca nigula,
en cuntu nu bönni' zóalenë' la' luzé'e bönni'së',
en cuntu nu bönni' gubán, en cuntu nu ruhuidi',
en cuntu nu rizudxi, en cuntu nu rinné xihui',
en cuntu nu rucáchi'lan.

Bití' ca' tsaz nu run caní ga rinná bë'ë Dios.

¹¹ Caní gúcali' bál-lali' libí'ili', pero na'a chinuhuóacali' dxi'a que dul-la' gubága'li', en chinéquili' quez queë' Dios, en chinuhuóacali' tsahui' ni'a que le benë' Xanru' Jesús. Bö' Lá'ayi queë' Dios runë' ga raca caní.

Idútë le naca cázaru' nequi quez queë' Dios

¹² Ta'nná bönachi: "Yúgu'të dë lataj gunru'." Sal-la' nácatë didza' ni, bití' ral-la' gunru' yúgu'të. Sal-la' dë lataj guna' yúgu'të, bití' gu'a lataj bi inná be'e neda'. ¹³ Ta'nná ca' bönachi: "La' huagu naca le tsaz lé'ëru', ate' lé'ëru' naca ga tsudzu la' huagu." Nácatë didza' ni, pero idxín dza usunítië' Dios la' huagu, enca' lé'ëru'. Dios benë' idútë le naca cázaru', calëga para ugunru' le dxin gunru' le ruá' dö'. Naca para uzi'ë xibé Xanru', ate' Xanru' náquië' para uzí' xibé' idútë le naca cázaru'. ¹⁴ Dios busubanë' Xanru' Cristo lu yöl-la' guti. Lëscá caní, len yöl-la' huáca queë' usubanë' rë'u.

¹⁵ ¿Naru' cabí nózili', idútë le nácali' naca tuz len le naca cazë' Cristo? ¿Nacxi caz gaca cúali' tu le da' Cristo, en gunli' ga ta' tu nigula udá dzaga? ¿Bití' ca' ral-la' gunli' caní! ¹⁶ ¿Naru' cabí nózili' channö tu bönni' zóalenë'-nu nigula udá dzaga, náquië' tuz

len lënu? Ca naca lë ni nazúaj lu guichi lá'ayi le rnna: "Ilácagaquië' ca tuz bönachi iropë' na'." ¹⁷ Na'a, nu bönni' náquië' tuz len Xanru', náquië' tuz len Lë' lu bö' naca cazë'.

¹⁸ Que lë ni na', biti' ca' gunli' le ruá' dö'. Bítitës dul-la' yúbölö runë' tu bönni', ní'ilö lu le naca cazë' runë' dul-la' na'. Nu bönni' runë' dul-la' le lë'ë, runë' dul-la' le dzaga lë cazë'. ¹⁹ ¿Naru' cabí nózili' idütë le naca cázali' naca yudo' queë' Dios Bö' Lá'ayi? Dios caz nuchizë' Dios Bö' Lá'ayi na' libí'ili', ate' Lë' zoë' icja ládxi'do'oli'. Que lë ni na' biti' nequi queézili' idütë le naca cázali'. Na'a, nequi queë' Dios. ²⁰ Dios gú'uë' libí'ili' len tu le zxön le gudizxjë'. Guli'gún dxin idütë le nácali', enca' bö' naca cázali' para gaca queë' Dios yöl-la' ba, tu' néquiguequi queë' Dios idütë le naca cázali', enca' bö' naca cázali'.

7

Rusédinë' Pablo ca naca que yöl-la' nutsaga na'

¹ Na'a, ubi'a didza' yugu' le rinábili' neda', le buzúajli' quia' lu guichi. Gácarö dxi'a queë' nu bönni' channö cabí sóalenë'-nu nigula. ² Tu' tunda' bönachi le ruá' dö' ga ni' zóali', yúgu'të bönni' nabábagaquië' libí'ili' ral-la' ila'cuá'lenë'-nu nigula que queégaquië', ate' yúgu'të nigula ral-la' ila'cuá'lennu-në' bönni' que queégacanu. ³ Bönni' na' zóanu nigula queë' ral-la' gunë' queénu nigula queë' ca naca yöl-la' run que yöl-la' nutsaga na', en la' lébisö ral-la' gunnu nigula len bönni' queénu. ⁴ Biti' dë lu ná'asönu nigula le naca cázanu, pero bönni' queénu dë lu në'ë ca' le. Lësca' caní, biti' dë lu ná'asë' bönni' le naca cazë', pero nigula queë' dë lu ná'anu ca' le. ⁵ Biti' ral-la' ila'dá'baguë'ë luzá'agaquië' bönni', en nigula na', nutsaga ná'agaquië'. Huácasö ca' channö ilunë' tuz didza' biti' ila'dzáguië' tu chí'isö para gaca ulu'lidzë' Dios idú ládxi'gaquië'. Tödi na', bönni' na' ral-la' sóalenë'-nu nigula queë' leyúbölö, para cabí sequi' Satanás tu' xihui' gun ga tsázagaquië' nöza dul-la' tu' cabí gaca ila'nná be'e cuíngaquië'.

⁶ Lë ni rea' libí'ili' naca tu le runnë' Xanru' libí'ili' lataj. Biti' naca le gunná bë'ë. ⁷ Runi neda' gácarö dxi'a ulu'gá'anë' tuz yúgu'të bönni', ca na' zoa' tuza' neda'. Tu tuë' bönni' rizi'ë tsca le runödziejë' Dios queë' gunë'. Tuë' rizi'ë tu le runödziejë', ate' ia'túë' rizi'ë ia'tú le runödziejë'.

⁸ Na'a, rea' nupa zóagaca tuz, enca' yugu' nigula uzëbi, gácarö dxi'a quéguequi ulu'gá'ana tuz ca na' zoa' tuz neda'. ⁹ Channö cabí gaca ila'nná be'e cuíngaquië', huáca ulu'tsaga ná'agaquië', tu' gácarö dxi'a ulu'tsaga ná'agaquië', en cabí ila'zé ládxi'gaquië' le ruá' dö'.

¹⁰ Rinná bé'eda' nupa chinutsaga né'eguequi, en calëga néda'sö runa' xibá ni, pero Lë cazë' Xanru' runë' le, rnnë': "Biti' ulá'alennu tu nigula bönni' queénu." ¹¹ Channö nu nigula ulá'alennu-në' bönni' queénu, ral-la' ugá'ananu túzinu, o huóacanu tuz len bönni' queénu na'. Lësca' caní tu bönni' biti' ral-la' ucá'anë'-nu nigula queë'.

¹² Na'a, néda'sö rea' ia'zica'rö bönachi, en calëga rnnë' Xanru' caní, rnnía': Channö zoë' nu böchi' luzá'aru' réajlë'ë Cristo, ate' nigula queë' biti' réajlë'ënu Xanru', en channö ré'ëninu ugá'analennu lë', biti' ral-la' ulá'alennë'-nu. ¹³ Lësca' caní rnnía': Channö zóanu nu nigula zanru' réajlë'ënu Cristo, ate' bönni' queénu biti' réajlë'ë Xanru', en channö ré'ënnë' ugá'analennë'-nu, biti' ral-la' ulá'alennu lë'. ¹⁴ ¿Caní ral-la' ilunë'! Bönni' cabí réajlë'ë na', Dios ril'éenë' lë' ca tu bönni' néquinë' quez queë' tu' náquië' tuz len nigula queë' réajlë'ënu Cristo, ate' nigula caní, biti' réajlë'ënu, Dios ril'éenë'-nu ca tu nigula néquinu quez queë' tu' nácanu tuz len bönni' queénu náquië' böchi' luzá'aru' réajlë'ë Cristo. La'tu' cabí naca caní, ilácabi' xzí'inigaquië' ca yugu' bi'i lan lahuë' Dios. Na'a, nácagacabi' quez queë' Dios. ¹⁵ Nu bönni' o nigula nu cabí réajlë' Cristo, channö ré'ëni ulá'alennu nu na' nutsaga ná'alennu, huáca ca'. Biti' run bayudxi ugá'analennu nu na' böchi' luzá'aru' o zanru' nu réajlë' Cristo, tu' bulidzë' Dios ré'u para cózaru' tsáhui'do'. ¹⁶ ¿Caní

ral-la' gaca! Nadxi ca' li', nigula, huáca gunu' ga ulé' bönni' quiu', ate' nadxi ca' li', bönni', huáca gunu' ga ulanu nigula quiu'.

¹⁷ Ral-la' gunru' tu turu' tsca le bennë' queéru' Xanru', enca' tsca guca queéru' cate' bulidzë' Dios rë'u para guéquiru' queë'. Rusédida' yúgu'të cö' bönachi queë' Cristo xibá ni. ¹⁸ Channö Dios bulidzë' nu bönni' narugu lu xipélë'ë le naca bë' néquinë' queë' Dios, ral-la' ugá'anë' caní, zoa lu xipélë'ë lë na' naca bë'. Lësca' caní, channö Dios bulidzë' nu bönni' bití' narugu lu xipélë'ë lë na' naca bë', bití' ral-la' ichúguië' lë na' lu xipélë'ë. ¹⁹ Bití' bi nazaca' lë na' narugu lu xipélë'ë tu bönni', en channö bití' narugu lu xipélë'ë bönni' lë na' naca bë', bití' bi nazaca'. Le nácada' lesaca' naca gunru' ca rinná bë' xibá queë' Dios. ²⁰ Ral-la' ugá'anë' tu tuë' bönni' ca na' gúquië' cate' ni' bulidzë' Dios lë'. ²¹ Channö bulidzë' lí' cate' ni' nacu' bönni' nadó'o, bití' cö'u böniga tu' nacu' caní, pero channö gata' quiu' lataj iruju' lu na' xanu', buzí' xibé lataj na' gata' quiu' iruju'. ²² Channö bulidzë' Xanru' nu bönni' cate' ni' nado'ë, lahuë' Xanru' náquië' ca nu bönni' narúajë' lu në'ë xanë' na', para gunë' xichinë' Xanru'. Lësca' caní, channö bulidzë' Xanru' nu bönni' cate' ni' narúajë' lu në'ë xanë' na', bönni' ni náquië' ca tu bönni' nadó'o queë' Cristo. ²³ Zxóntërö le gudizxjë' Dios, gú'uë' libí'ili'. Que lë ni na' bití' ral-la' gutí' cuinli' lu ná'agaca bönachi. ²⁴ Que lë ni na' ca', böchi' luzá'ado', ral-la' sóali' lahuë' Dios tsca guca queéli' tu tuli' cate' ni' bulidzë' Dios libí'ili'.

²⁵ Ca naca quégaca nupa bití' nutsaga ná'agaca, bití' bi gunná bé'enë' Xanru' neda'. Caní runi neda', ate' huáca uzxöni ládxi lí' neda' tu' ruhuéchi' ládxe'ë Xanru' neda'. ²⁶ Tu' taca zían le raca queéru' dza ni zóaru' na'a, runi neda' gácarö dxi'a channö ulu'gá'anë' yúgu'të bönni' ca nácagaquië' na'a. ²⁷ Channö nutsaga ná'lenu'-nu nigula, bití' ulá'alenu'-nu. Lësca' caní, channö zu' tuzu', bití' quilju' tu nigula para utsaga ná'lenu'-nu. ²⁸ Na'a, channö utsaga ná'lenu'-nu nigula, bití' gunu' dul-la', en channö tu bi' i nigula utsaga ná'aleni'-në' bönni', bití' gunbi' dul-la', pero ila'guí' i ila'zaca' nupa nutsaga ná'agaca yödzölió ni, ate' ré'ënda' guna' ga uláli' lu yöl-la' riguí' i rizaca' na'.

²⁹ Na'a, rea' libí'ili' lë ni, böchi' luzá'ado'. ¡Chizóa idxín dza údxi! Que lë ni na', yugu' bönni' nutsaga ná'lengaquië'-nu nigula ral-la' iluí' ládxi'gaquië' Dios, ca runë' nu bönni' bití' nutsaga ná'aleni' nigula. ³⁰ Lësca' caní, nupa ta'bödxi yechi' ral-la' ulu'dzeja lahuë' Dios ca run nu bití' ribödxi, ate' nupa tu'dzeja ral-la' ila'cuá' nöxaj lahuë' Dios ca run nu bití' rudzeja, ate' nupa to'o ral-la' ilaca ca nu bití' bi dë que. ³¹ Nupa tu'gún dxin le dë yödzölió ni ral-la' ilaca ca nu bití' ruí' i ladxí' le dë yödzölió ni, tu' udödi quégaca le rilé'eru' yödzölió ni.

³² Ré'ënda' bití' ubi uguí'ili'. Tu bönni' bití' zóanu nigula queë' ruí' i ládxe'ë le nequi queë' Xanru', naca gunë' le raza ládxe'ë Xanru'. ³³ Tu bönni' nutsaga ná'lenë'-nu tu nigula ruí' i ládxe'ë le raca yödzölió, naca gunë' le raza ládxi' nu nigula queë'. ³⁴ Lësca' caní raca queénu tu nigula nutsaga ná'lennu-në' bönni', en queénu nigula na' zóanu túzinu. Nigula na' zóanu túzinu ruí' i ládxi' nu le nequi queë' Xanru', naca sóanu quez queë' Dios lu le naca cázanu, en lu bö' naca cázanu. Nigula na' nutsaga ná'lennu-në' tu bönni' ruí' i ládxi' nu le raca yödzölió ni, naca gunnu le raza ládxe'ë bönni' queénu.

³⁵ Yugu' lë ni rea' libí'ili' para uzí'ili' xibé lë ni, en calëga para uzága' a xinózili'. Ré'ënda' gunli' le ral-la' gunli', para gunli' xichinë' Xanru' idú ládxi' lí'.

³⁶ Channö zoë' tu bönni' réquinë' bití' naca dxi'a ugá'anabi' túzibi' bi' i nigula ra'bando' queë', en chizóa iz queébi', en ré'ënde' ebi' utsaga ná'aleni'-në' bönni', huáca utsaga ná'aleni'-në'. ¡Bití' gunbi' dul-la'! ³⁷ Channö chinún tsutsu xtídzë'ë bönni' na', en bití' run bayudxi gunë' caní, en dë lu në'ë naca gunë', en chinún tsutsu xtídzë'ë ugá'anabi' túzibi', gunë' le naca dxi'a bönni' na'. ³⁸ Caní naca, nu ruí' i lataj bi' i que utsaga ná'aleni'-në' bönni', run le naca dxi'a, pero nu run ga ugá'anabi' túzibi' run le nácáro dxi'a.

³⁹ Nigula na' nutsaga ná'lennu-në' bönni', rinná be' e xibá que yöl-la' nutsaga na' lënu tsanni ni zoë' nabanë' bönni' queénu. Channö gátie' bönni' queénu, gata' lu ná'anu

utsaga ná'lennu-në' nu bönni' ré'ëninu, channö réajlë'ë Xanru' bönni' na'. ⁴⁰ Runi neda' gácarönu bica' ba channö ugá'ananu túzinu, en réquida' Bö' Lá'ayi queë' Dios runë' neda' tzaxón.

8

Le ta'gú'u bönachi lógaca budó' guió'j budó' yaga

¹ Na'a, gu'a didza' ca naca que le ré'aj ráguru', lë na' gula'gú'u bönachi lógaca budó' guió'j budó' yaga. Ta'nná bönachi: "Yúgu'tëru' náparu' yöl-la' réajni'i." ¡Nácatë didza' ni! Yöl-la' réajni'i caní run ga run ba zxon cuinru', pero yöl-la' nadxi'i queëru' luzá'aru' run ga rácalenru' luzá'aru'. ² Channö zoë' nu bönni' réquinë' chiréajni'inë', bití' bi réajni'ininë' ca ral-la' tséajni'inë', ³ pero nu bönni' nadxi'inë' Dios, Dios caz zóalenë' bönni' na'.

⁴ Na'a, ca naca que le ré'aj ráguru', lë na' gula'gú'u bönachi lógaca budó' guió'j budó' yaga, nóziru' bití' bi nazáca'gaca budó' guió'j budó' yaga na' yödzölió ni, en cúnturö nu zoa naca Dios. ⁵ Sal-la' nacua' le téquiguequi bönachi náca'gaca dios, le nacua' lúxiba, en le nacua' luyú, ate' zían le tu'lidza bönachi, en tu'i lágaca: dios, enca': xan, ⁶ pero queëru' ré'u:

Tuzë' náquië' Dios, Lë' Xuz.

Lë' benë' yúgu'të le rilé'ëru',

ate' zóaru' nabanru' para tseaj ládxi'ru' Lë'.

Tuzë' náquië' Xanru', Lë' Jesucristo.

Lu në'ë Lë', Dios benë' yúgu'të le dë,

ate' nabániru' Lë'.

⁷ Calëga yúgu'të böchi' luzá'aru' ta'yéajni'inë' lë ni. Bal-lë', nupa ni' zí'alö gula'yéaj ládxi'gaca budó' guió'j budó' yaga, ga ridxintë na'a dza të'aj tahuë' le gula'gú'u bönachi lógaca budó' guió'j budó' yaga, ate' téquinë' napa yöl-la' huáca que budó' na'. Tu' cabí naca idú ládxi'gaquië', que lë ni na' téquinë' nabága'gaquië' xíguia' channö tahuë' lë na'.

⁸ Bití' gun le guí'aj gáguru' ga gunë' Dios ré'u bal. Channö gáguru' le, bití' gácaröru' dxi'a, en channö cabí gáguru' le, bití' gácaröru' cá'asö. ⁹ Dë lu ná'alí' guí'aj gáguli' bíti'tës.

Gulí'gún chí'i cuinli' para cabí gunli' ga ila'chixi ila'nigui nupa bití' naca idú ca ta'yéajlë' Cristo. ¹⁰ Nadxi ca' li' réquinu' napu' yöl-la' réajni'i ca naca lë ni, en huáca gagu' bíti'tës.

Channö cö'u xilataj budó' guió'j budó' yaga, en guí'aj gagu' le gula'gú'u bönachi lo budó' guió'j budó' yaga na', ate' channö nu böchi' luzó'o bití' naca idú ládxi'ë ilé'enë' li', rö'u ragu' ni', nadxi ca' gunu' ga gahuë' lë na' gula'gú'u bönachi lo budó' guió'j budó' yaga na'.

¹¹ Caní gaca, tu' réquinu' napu' yöl-la' réajni'i, gunu' ga ichixi iníguinë' böchi' luzó'o bití' naca idú ládxi'ë. ¿Naru' guntso' caní queë' böchi' luzó'o, ni'a que nu na' gútië' Cristo?

¹² Channö caní gunu', gunu' dul-la' tu' usubágu'u böchi' luzó'o xíguia', en gunu' ga ichixi iníguinë' tu' cabí naca idú ládxi'ë, en gunu' ca' dul-la' le ruzóa Cristo tsölá'alö. ¹³ Que lë ni na', channö le guí'aj gahua' gun ga ichixi iníguinë' böchi' luzá'a, bíti'rö gahua' bëla' na', para cabí guna' ga gunë' böchi' luzá'a dul-la'.

9

Le dë lu në'ë nu bönni' gubáz nasól-lë'ë Cristo

¹ ¿Naru' cabí naca' gubáz nasól-lë'ë Cristo? ¿Naru' cabí nadéli'da' yöl-la' rusölá? ¿Naru' cabí bilé'eda'-në' Xanru' Jesús? ¿Naru' cabí nácali' queë' Cristo ni'a que dxin bena' neda' uláz queë' Xanru'? ² Nadxi ca' téquiguequi ia'zica' rö bönachi bití' naca' gubáz nasól-lë'ë Cristo. Libí'ili' run bayudxi guéquili' naca' gubáz queë' Cristo. Tu' nácali' queë' Xanru', le naca cázali' naca bë' naca' gubáz nasól-lë'ë Xanru'.

³⁻⁴ Nacua' nupa ta'zí' quidza' neda'. Caní rubi'a didza', rea' légaquië': Dë lu na'a inaba' le guí'aj gahua' tu' runa' dxin ni. ⁵ Lësca' caní dë lu na'a utsaga ná'alena'-bi' tubi' bí'i

nigula zanru' réajlë'ëbi' Cristo para gunbi' neda' tsözxón ga ridá', ca na' tunë' ia'zica'rë' gubáz nasól-lë'ë Cristo, en yugu' bönni' bóché'ë Xanru', enca' Pedro. ⁶ ¿Naru' réquili' tuza' neda', en Bernabé ral-la' guntu' dxin lahui' dza, para idzólitu' le gágutu'? ⁷ ¿Nuzxi caz bönni' rejë' gudil-la, ate' riguizxjë' la' cuinsë'? ¿Nuzxi caz bönni' rudë'ë tu la' yëla que lubá uva, en biti' rahuë' le ribía lubá na'? ¿Nuzxi caz bönni' rapa chi'ë-ba' bö'cu' zxila', en biti' re'jë' nidxi' quégacaba'? ⁸ Biti' guéquili' la' néda'sö ruá'a caní didza'. Lësca' caní rnna le nazúaj lu guichi lu xibá queë' Moisés. ⁹ Lu xibá queë' Moisés nazúaj lu guichi le rnna: Biti' cu'u du ruá'aba' bëdxi cate' rulfibiba' xzoa' xtila. Bë'ë Dios didza' ni, calégasö tu' ruí'i lãdxë'ë-ba' bëdxi, ¹⁰ pero para uzí'iru' ca' xibé rë'u. Que lë ni na' nazúaj lu guichi didza' na', ate' bönni' na' rugá'anë'-ba' bëdxi, enca' bönni' na' runë' ga tu'libiba' bëdxi xzoa' xtila, iropë' na' ral-la' ilunë' löza ila'zi'ë que le rulá' luyú na'. ¹¹ Na'a, channö bentu' dxin ga zóali', le naca ca dxin guz gú'una, lë na' naca queë' Dios Bö' Lá'ayi, ¿naru' réquitseli' biti' ral-la' uzí'itu' xibé tu le do' dë queéli' ca na' ruzi'ë xibé bönni' guz gú'una le rulapë'? ¹² Ia'zica'rö bönachi tu'zëajni'inë' libí'ili' tu'zi'ë xibé le dë queéli'. ¿Naru' cabí rála'tërö uzí'itu' xibé netu' le dë queéli'?

Catu caz buzi'tu' xibé lë ni dë lu na'tu', pero biá' gulentu' yúgu'të para gaca guntu' libán que didza' dxi'a ca naca queë' Cristo. ¹³ Nöz quézili' ca raca quégaca nupa tun dxin que yudo', tu'zí' xibé gun que yudo'. Lësca' caní nupa ta'gú'u rön quégacaba' böa' bëdxi lu bucugu lá'ayi queë' Dios, tahuë' bëla' quégacaba' böa' bëdxi na'. ¹⁴ Lësca' caní nuzóë' Xanru' ca ral-la' gaca quégaquië' bönni' tunë' libán que didza' dxi'a. Nupa tu'zí' xibé libán na' tunë' ral-la' ulu'gagu légaquië'. ¹⁵ Neda' catu caz buzi'a xibé lë ni dë lu na'a, ate' lë ni ruzúaja' lu guichi ni biti' naca le rinábini nu bi gunna quia'. Run ba zxön cuina' tu' cabí nazxja' cate' runa' libán que didza' dxi'a. Gué'ënitëra' gátia' ca gu'a lataj nu inné runa' libán na' tu' nazxja'.

¹⁶ Biti' dë lu na'a gun ba zxön cuina' tu' runa' libán que didza' dxi'a, tu' run bayudxi guna' libán que. Bica' bayechi' neda' channö cabí guna' libán que didza' dxi'a. ¹⁷ La'tu' runa' libán tu' ré'ëni quézida', huáca inaba' lazxja', pero run bayudxi guna' libán, tu' naca tu le busubáguë'ë Dios neda' guna'. ¹⁸ ¿Bizxi lazxja' uzi'tsa' xibé channö? Ruzi'a xibé le raza lãdxa'a tu' cabí nazxja' cate' runa' libán que didza' dxi'a. Biti' ca' ruzi'a xibé lë na' dë lu na'a tu' runa' libán que didza' dxi'a.

¹⁹ Na'a, sal-la' cuntú nu yu'a lu në'e, chibén cuina' ca tu bönni' nadó'o quégaca yúgu'të bönachi para gaca guna' ga ulu'lágaca zianrö ca' bönachi. ²⁰ Cate' runa' libán lógaca bönachi judío, run cuina' ca tu bönni' judío para gaca guna' ga ulu'lágaca bönachi judío na'. Bönachi judío na' tun ca rinná bë' xibá queë' Moisés. Que lë ni na' run cuina' ca tu bönni' runë' ca rinná bë' xibá na' sal-la' biti' yu'a lu na' xibá na'. Caní runa' para gaca guna' ga ulu'lágaca nupa tun ca rinná bë' xibá na'. ²¹ Cate' runa' libán lógaca bönachi izá'a, nupa biti' rinná be'e xibá queë' Moisés léguequi, run cuina' ca tu bönni' zítu' na', para gaca guna' ga ulu'lé'. Biti' rucá'ana' cá'asö xibá queë' Dios. Neda' runa' ca rinná bë' xibá queë' Cristo. ²² Run cuina' ca tu bönni' biti' naca idú ca réajlë'ë Cristo para gaca guna' ga ulu'lágaca nupa na' biti' naca idú ca ta'yéajlë' Lë'. Run cuina' ca nácagaca yúgu'të bönachi para gaca guna' ga ulu'lágaca bal-la bönachi na'. ²³ Lu yúgu'të lë ni runa', runa' ga ta'yöni bönachi didza' dxi'a, para gaca uzi'a xibé tsözxón len libí'ili' didza' dxi'a na'.

²⁴ Chinóz quézili' ca tunë' bönni' nútsa'gaquië' lu huitaj. Ta'xíti'ë yúgu'të', pero tuzë' bönni' idéli'në' uzi'ë xibé lataj lo. Lësca' caní ral-la' gunli' xichinë' Dios, gácali' ca bönni' nútsa'gaquië' lu huitaj, para idéli'li' uzí'ili' xibé le ubi'ë Dios queéli'. ²⁵ Yúgu'të bönni', cate' tu'pá'a cúngaquië' para gaca ila'yázië' lu huitaj, ta'nná be'e cúngaquië' lu yúgu'të le tunë'. Tunë' caní para ila'déli'në' tu bregui' zin le infitë, pero idéli'ru' rë'u tu le uzí'tica'siru' xibé. ²⁶ Que lë ni na', naca' neda' ca tu bönni' idú lãdxë'ë rixíti'ë. Naca' ca' ca tu bönni', idú lãdxë'ë ridil-lë'. Biti' rucudxa' lu bö'ös. ²⁷ Ca runë' bönni' na' rulidzë' bönachi para tsöjtsázagaca lu huitaj, runa' ca' neda', runa' libán para ulu'lágaca bönachi.

Bönni' na' nútsë'ë lu huitaj runë' ga gaca tsutsu idütë le naca cazë', en rinná bé'enë' le. Lësca' caní runa' neda', para cabí unítia' xilatja' lu dxin queë' Dios.

10

Biti' ral-la' tseaj ládxi'ru' budó' guiój budó' yaga

¹ Ré'ënda' uzéajni'ida' libí'ili', böchi' luzá'ado', ca guca quégaquië' xuz xtó'otu'. Dios benë' ga gulú'u zzul-la tu böaj yúgu'të'. Lësca' caní, gula'dödë' yúgu'të' gatsaj láhui'lö nísado'. ² Lu böaj ni', en lu nísado' ni', guca quégaquië' ca raca que nu ridila nisa. Lë na' guca quégaquië' guca bë' guláquië' tuz len Moisés. ³ Lësca' caní, gulahuë' yúgu'të' yöta xtildo' na' bunödzjë' Dios Bö' Lá'ayi quégaquië'. ⁴ Gulé'ajë' yúgu'të' nisa na' bunödzjë' Dios Bö' Lá'ayi quégaquië', tu' gulé'ajë' nisa birúaj lë'e guiój na' bulu'e lahui Dios Bö' Lá'ayi, guiój na' gula'bánninë' légaquië'. Ca guca guiój na' naca cazë' Cristo, nabániru' Lë'. ⁵ Sal-la' guca caní, bití' guyaza ládxi'ë' Dios yúgu'të'. Que lë ni na' gulátië' lu lataj cá'asó.

⁶ Yúgu'të' lë ni naca tu le ruzéajni'i rë'u, para cabí së ládxi'ru' le ruá' dö', ca na' gula'zé ládxi'gaquië' légaquië'. ⁷ Biti' ral-la' tseaj ládxi'ru' budó' guiój budó' yaga, ca na' gulunë' bal-lë' légaquië'. Nazúaj lu guichi lá'ayi le rnna: "Gula'bö'ë bönni' ni', en gulé'aj gulahuë', ate' gula'yasë', en gulunë' laní que budó' na'." ⁸ Biti' ral-la' gunru' le ruá' dö', ca na' gulunë' bal-lë' légaquië' le ruá' dö', ate' tu dzasó gulátië' idú ca tsonna-uruá' milë'. ⁹ Biti' ral-la' si' bë'ëru' Xanru', ca na' gula'zi' bë'ë Lë' bal-lë' légaquië', ate' gulátië' tu' guláguya'aba' bëla sínia' légaquië'. ¹⁰ Lësca' caní, bití' ral-la' innëru' queë' Dios ca na' gula'nne' queë' bal-lë' légaquië', ate' tuë' gubáz lá'ayi queë' Dios busunítie' légaquië'.

¹¹ Yúgu'të' lë ni le gulaca quégaquië' xuz xtó'otu', tu' zéajni'i rë'u, en nazúaj lu guichi lá'ayi para gun gadxi rë'u, tu' chizóaru' dza chizóa údxi que yödzölió ni. ¹² Que lë ni na', nu réqui chinal-la, ral-la' gun chí'i cuini, para cabí ichixi inigui. ¹³ Ca naca le ta'zi' bë' libí'ili' raca ca' quéguequi yúgu'të' bönachi. Dios runë' ca rnnë', en bití' gu'ë lataj bi si' bë' libí'ili' le cabí gaca guá' ilenlí', pero cate' bi si' bë' libí'ili', uluí'inë' libí'ili' naca gaca irúajli' lu na' tu' xihui', para gaca guá' ilenlí'.

¹⁴ Que lë ni na', böchi' luzá'ado', bití' tseaj ládxi'li' budó' guiój budó' yaga. ¹⁵ Ru'ílena' libí'ili' didza' ca ru'ílena' didza' nupa ta'yéajni'i. Buli'chi'a buli'söró didza' ni gu'a. ¹⁶ Cate' inábiru'-në' Dios gun lá'ayë' le ré'ajru' cate' rusubanru' ca gútië' Cristo, lë na' ré'ajru' ruluí'i nácaru' tuz len Cristo, en ruzí'iru' xibé le benë' Cristo cate' bulaljë' xichönë' cate' gútië' lë'e yaga cruz. Lësca' caní, yöta xtila na' ruzxúzxjaru', en ráguru', ruluí'i dzágaru'-në' Cristo, en ruzí'iru' xibé le benë' Cristo cate' budödë' idütë le naca cazë' uláz queëru'. ¹⁷ Sal-la' zianru' nácaru', yúgu'tëru' ráguru' tuz yöta xtila na', en que lë ni na' nácaru' ca tuz bönachi.

¹⁸ Buli'yútsöca' ca tunë' bönni' Israel. Bönni' ni' tahuë' lahuë' Dios le ta'gu'ë lu bucugu lá'ayi queë', lë na' tahuë' ruluí'i dzágagaquië' Dios. ¹⁹ ¿Bizxi rnna didza' ni ruá'a? Bití' rnní'a' napa budó' guiój budó' yaga yöl-la' huáca, en le ta'gú'u bönachi lógaca budó' guiój budó' yaga na' bití' napa yöl-la' huáca. ²⁰ Caní rnní'a': Lë na' ta'gú'u bönachi bití' núnbë'gaquië' Dios lógaca budó' guiój budó' yaga, ta'gú'u lógaca bö' xihui', en calëga lahuë' Dios. Ré'ënda' bití' idzágalí' yugu' bö' xihui'. ²¹ Bití' gaca guí'jali' le ruluí'i nácaru' tuz len Xanru', enca' lë na' uluí'i nácalí' tuz len yugu' bö' xihui'. Bití' gaca gáguli' le ruluí'i dzágaru'-në' Xanru', enca' le uluí'i dzágali' yugu' bö' xihui'. ²² ¿Naru' gúntsaru' ga uzxé'enë' Xanru'? ¿Naru' réquitseli' nápatërolí' yöl-la' huáca ca napë' Lë'?

Le dë lu ná'aru' gunru', en ca ral-la' idxí'igacru'-në' böchi' luzá'aru'

²³ Naca idütë li didza' na' rnna: "Yúgu'të dë lu ná'aru' gunru'." Na'a, neda' rnní'a': Calëga yúgu'të ral-la' gunru'. Yúgu'të dë lu ná'aru' gunru', pero calëga yúgu'të gun ga gácarö idú ca réajlë'ëru' Cristo. ²⁴ Ral-la' güf'i ládxi'ru' gunru' le gun ga gaca dxi'a quégaquië' böchi' luzá'aru', en calëgasö le gun ga gaca dxi'a que la' cuínsiru'.

²⁵ Bítí'tës bi tuti' bönachi lu yé'ëyi, huáca gáguli', en biti' bi ral-la' inábali' que, para cabí cuéqui böniga ládxi'do'oli'. ²⁶ Nazúaj lu guichi le rnna: "Queë' Xanru' nequi yödzülió ni, enca' yúgu'të le dë yödzülió ni."

²⁷ Channö ulidzë' tu bönni' biti' réajl'ë Dios libí'ili' para guídali' lidxë', ate' gué'ënili' tséajli', guli'gagu yúgu'të le cu'ë loli', en biti' bi inábali' que, para cabí cuéqui böniga ládxi'do'oli'. ²⁸ Channö nútí'tës nu guíë libí'ili': "Lë ni gula'gu'ë lo budó' guió' budó' yaga", biti' gáguli' lë na' para gaca dxi'a que nu na' gudí'xjöi'i caní libí'ili', en para cabí cuéqui böniga ládxi'da'ahuë'. ²⁹ Rnní'a: Para cabí cuéqui böniga ládxi'da'ahuë' bönni' na' gudí'xjöi'inë' caní libí'ili', en calëga para cabí cuéqui böniga ládxi'do'oli' libí'i cázali'.

Nadxi ca' nu inábini neda', inná: "¿Bixx que ral-la' uzó'a tsölá'aló le dë lu na'a guna' tu ribequi böniga ládxi'da'ahuë' bönni' yúbölö?" ³⁰ Huáca inná ca' nu na': "Channö guía'në' Dios: Xclenu', ni'a que lë na' rahua', ¿bixx que nu uzegui neda' didza' ni'a que lë na' rahua'?" ³¹ Channö bi gáguli' o bi gu'jali', o bítí'tës bi gunli', guli'gún yúgu'të para gaca queë' Dios yöl-la' ba. ³² Biti' bi gunli' le gun ga ila'chixi ila'nigui bönachi judío, en biti' gunli' le gun ga ila'chixi ila'nigui bönachi biti' nácagaca judío, en biti' gunli' le gun ga ila'chixi ila'nigui bönachi queë' Dios. ³³ Guli'gún ca runa' neda'. Ruí'i ládxa'a guna' le ila'yaza ládxi'gaca yúgu'të bönachi, en biti' ruí'i ládxa'a guna' le uzi'a xibé la' neda'só, pero le ulu'zí' xibé ia'zica'rö bönachi para ulu'lágaca.

11

¹ Guli'gún ca runa' neda', ca na' neda' ca' runa' ca benë' Cristo.

Le tunnu nigula lógaca bönachi queë' Cristo

² Runa' libí'ili' zxön, böchi' luzá'ado', tu' röjnética'sili' neda', en nazi' lu ná'ali' xibá budóda' lu ná'ali'. ³ Na'a, ré'ënda' tséajni'ili' rinná bé'enë' Cristo yúgu'të bönni', ate' bönni' rinná bé'enë'-nu nigula, ate' Dios rinná bé'enë' Zxí'inë', Bönni' na' náquië' Cristo. ⁴ Channö tu bönni' rulidzë' Dios, o ru'ë didza' uláz queë' Dios, en dxía icjë' xilu'ë, rucá'anë' Cristo cá'asö. ⁵ Na'a, channö tu nigula rulídzanu Dios, o ruí'inu didza' uláz queë' Dios, en biti' bi zxa icjanu, rucá'ananu bönni' queënu cá'asö, en naca queënu ca naca queënu tu nigula narugu guitsa' ícjanu. ⁶ Channö tu nigula cabí bi zxa icjanu, ral-la' irugu ca' guitsa' ícjanu. Channö gun ga utu'ínu nigula na' channö nu chugu guitsa' ícjanu, ral-la' bi ixó'a ícjanu. ⁷ Tu bönni' biti' bi ral-la' udxía icjë' cate' ridxinë' lahuë' Dios, tu' náquië' ca naca cazë' Dios, ate' lë na' náquië' bönni' ruluí'i lahui yöl-la' zxön queë' Dios, pero le nácanu nigula na' ruluí'i lahui yöl-la' zxön queë' bönni' queënu. ⁸ Cate' benë' Dios bönachi, biti' bubéajë' bönni' na' lu nigula. Nigula na', lu bönni' na' bubéajë'-nu. ⁹ Lësca' caní, biti' benë' Dios bönni' para uzí'inu xibé' nigula, pero benë' nigula para uzi'ë xibánu bönni'. ¹⁰ Que lë ni na', nigula na' ral-la' ixó'a ícjanu le ruluí'i zxa nu rinná be'e lënu tu' tu'yúë' gubáz lá'ayi queë' Dios rë'u. ¹¹ Na'a, lahuë' Xanru', tu bönni' riquinnë'-nu nigula queë', ate' nigula na' riquíninu-në' bönni' queënu. ¹² Ca na' benë' Dios, bubéajë'-nu nigula lu bönni', lësca' caní na'a, yúgu'të bönni' náljlengaquië'-nu nigula, ate' yúgu'të rirúaj lu në'ë Dios.

¹³ Buli'chi'a buli'söró la' libí'isili'. ¿Naru' ral-la' ulídzanu-në' Dios tu nigula biti' bi zxa icjanu? ¹⁴ ¿Naru' cabí rusëdi libí'ili' yöl-la' nácate' quégaca bönachi, ral-la' utu'ínë' bönni' na' ru'ë lataj itunna guitsa' icjë'? ¹⁵ Na'a, channö natúnna guitsa' ícjanu tu nigula, naca yöl-la' lachi queënu, tu' bë'ë Dios queënu guitsa' ícjanu para usubín ícjanu. ¹⁶ Channö zxa nu gué'ëni tá'baga' didza' ni, canísö nazi' lu na'tu' runtu', en lébisö tun yugu' cö' bönachi queë' Dios.

Bönachi Corinto tu'cá'ana cá'asö le rë'aj ráguru' para usubanru' ca gútië' Xanru'

¹⁷ Biti' runa' libí'ili' bal ca naca le uzéajni'ida' libí'ili' na'a. Le runli' biti' run ga raca dxi'a queé'li' cate' rudúbili' queë' Cristo, pero run ga raca queé'li' le cabí naca dxi'a. ¹⁸ Risí lahua' ruzéajni'ida' libí'ili' lë ni ta'guíxjöi'i bönachi neda', ta'nná: "Cate' rudúbili' queë' Cristo,

narúajli' choplò", ate' réajlè'a nadxi ca' naca caní. ¹⁹ Run bayudxi ila'cuá'alén libí'ili' nupa tu'sedi le cabí nácate' para ilaca bè' nupa nácagaca idú bönachi queë' Cristo. ²⁰ Que lè ni na', cate' rudúbili', lè na' ráguli' tsözxón biti' naca le rë'aj ráguru' para usubanru' ca gútië' Xanru'. ²¹ Caní naca, tu' runli' bayudxi tu tuli' ráguli' le nuá'ali' que queéli' cate' ráguli' tsözxón, ate' que lè ni na' ridunli' bál-lali', ate' ia'bál-lali' rë'aj ráguli' ga ridxintë rizúdxili'. ²² ¿Naru' cabí zoa lídxili' ga huáca gu'aj gáguli'? Ca na' runli', rucá'anali' bönachi queë' Dios cá'asö, en runli' ga tu'tuí' nupa biti' bi dë quéguequi. ¿Bizxi caz guá' libí'ili'? ¿Naru' guntsa' libí'ili' bal? Biti' ca' runa' libí'ili' bal ca naca lè ni runli'.

Le rë'aj ráguru' para usubanru' ca gútië' Xanru'

²³ Xanru' caz budödë' lu na'a lè na' busédida' libí'ili', ca na' benë' Xanru' Jesús yëla ni' cate' nu budödi Lë' lu ná'agaquië' bönni' gulútië' Lë'. Gudélë'ë yöta xtila, ²⁴ en cate' budxi gudxë' Dios: "Xclenu", buzxuxjë' le, en gunné: "Guli'gagu. Lè ni naca xipéla'a le nayuzxaj uláz queéli'. Guli'gún caní, para usubanli' ca gaca quia' neda'." ²⁵ Lësca' caní, gudödi gulahuë', gudélë'ë tu zxíga'do', en gunné: "Le yudzu zxíga'do' ni naca xichöna', le run tsutsu didza' cubi rucá'ana tsahui'. Guli'gún caní yúgu'të luzuí gu'jali' le, para usubanli' ca gaca quia' neda'." ²⁶ Caní gaca ga idxintë dza huödë' Xanru'. Yúgu'të luzuí gáguli' yöta xtila caní, en gu'jali' que le yudzu zxíga'do' caní, uluí'ili' lahui ca gútië' Xanru'.

Ca ral-la' gunru' cate' gu'aj gáguru' para usubanru' ca gútië' Xanru'

²⁷ Que lè ni na', núti'tës nu gagu yöta xtila ni o gu'aj que le yudzu zxíga'do' ni queë' Xanru', en biti' run le bal, nabaga' xíguia' nu na', en run dul-la', tu' rucá'ana xipélë'ë Xanru', enca' xichönë' cá'asö. ²⁸ Que lè ni na', ral-la' uchi'a usöróru' la' cuínsiru' tu turu', ate' ní'irö huáca gáguru' yöta xtila ni, en gu'ajru' que le yudzu zxíga'do' ni. ²⁹ Núti'tës nu rë'aj ragu lè ni, en biti' run le bal tu' cabí réquibe'e rulu'í' le guca queë' Xanru', rusubaga' cuini dul-la' ni'a que lè na' rë'aj ragu. ³⁰ Que lè ni na' te'e zían nupa dzágagaca libí'ili', en ta'cuídi', ate' zianguequi chinátigaca. ³¹ La'tu' uchi'a usöróru' la' cuínsiru', biti' uchi'a usöróë' Xanru' rë'u. ³² Channö gun bayudxi uchi'a usöróë' Xanru' rë'u, usaca' zí'ë rë'u, para cabí irugu queëru' cate' ichúguië' quéguequi bönachi yödzölió ilátigaca.

³³ Que lè ni na', böchi' luzá'ado', cate' udúbili' para gu'aj gáguli' para usubanli' ca gútië' Xanru', guli' cöza luzá'ali'. ³⁴ Channö zoa nu ridún, ral-la' gagu nu na' ga naca lu yu'u lidxi, para cabí gun bayudxi uchi'a usöróë' Dios libí'ili' cate' udúbili'. Nacuá' ia'bal-la le runli', pero ucá'ana' tsahui' yugu' lè na' cate' uduyúa' libí'ili'.

12

Yugu' yöl-la' huáca runnë' queëru' Dios Bö' Lá'ayi

¹ Na'a, böchi' luzá'ado', ré'ënda' tséajni'ili' ca zeaj naca yöl-la' huáca runnë' queëru' Dios Bö' Lá'ayi.

² Nöz quézili' ca guca cate' ni' biti' réajlë'ënili' Cristo, bé'ëli' lataj gula'ché' bönachi libí'ili' ga yúbölö. Guyéaj ládxi'li' budó' guiój budó' yaga, le cabí ta'nnë. ³ Que lè ni na', ruzéajni'ida' libí'ili' caní, rnní'a': Ladaj yúgu'të nupa tu'í' didza' uláz queë' Bö' Lá'ayi queë' Dios, cuntu nu gaca innë xihui' queë' Jesús, en nitúë' gaca innë: "Jesús náquië' Xanru'", channö cabí zóalenë' Dios Bö' Lá'ayi nu na'.

⁴ Na'a, nadzá'gaca tu tu le runnë' Dios Bö' Lá'ayi queëru', pero tuzë' náquië' Bö' Lá'ayi na'. ⁵ Lësca' caní, nadzá'gaca tu tu dxin rigu'ë Xanru' lu ná'aru', pero tuzë' náquië' Xanru' na'. ⁶ Nadzá'gaca ca' tu tu yöl-la' huáca náparu' le rúniru' xichinë' Dios, pero tuzë' náquië' Dios, Nu na' runna yöl-la' huáca na' queëru' para gunru' xichinë'. ⁷ Dios runnë' que queëru' tu le naca bè' náparu' yöl-la' huáca queë' Dios Bö' Lá'ayi, lè na' ruzí'iru' xibé yúgu'tëru'. ⁸ Dios Bö' Lá'ayi runödzejë' queë' tu bönni' yöl-la' huáca ru'ë didza' len yöl-la' rácada', ate' ia'túë' bönni', Lë cazë' Bö' Lá'ayi runödzejë' queë' yöl-la' huáca ru'ë didza' lu

yöl-la' réajni'i. ⁹ Lësca' caní, Lë cazë' Dios Bö' Lá'ayi na' runödzejë' queë' ia'túë' bönni' yöl-la' réajlë' Cristo bi gunë', ate' ia'túë' bönni' runödzejë' queë' yöl-la' huáca ruúnë' nupa te'e. ¹⁰ Ia'túë' bönni' runödzejë' queë' yöl-la' huáca runë' yugu' yöl-la' huáca que yehua' yubá, ate' ia'túë' bönni' ru'ë lë' lataj ru'ë didza' uláz queë' Dios, ate' ia'túë' bönni' runödzejë' queë' yöl-la' huáca réquibe'enë' channö bö' dzaga nu bönni' nequi queë' Dios, o nequi que tu' xihui'. Runödzejë' queë' ia'túë' bönni' yöl-la' huáca ru'ë didza' yúbölö le cabí nazëdë', ate' queë' ia'túë' bönni' yöl-la' huáca rudödë' didza' yúbölö na' biti' nazëdë'. ¹¹ Yúgu'të lë ni runë' Lë cazë' Dios Bö' Lá'ayi, tu' runödzejë' que tu tu bönachi tsca ré'ëni quézinë'.

Yúgu'tëru' nácaru' ca tuz bönachi

¹² Ca na' naca tuz idütë le naca cázaru', sal-la' zían le nagudi' dzágalenru', ate' le zían na' nagudi' dzágalenru' nácagaca tuz idütë le naca cázaru', lësca' caní naca queë' Cristo. ¹³ Tu' zóalenë' Lë cazë' Dios Bö' Lá'ayi rë'u, lë ni naca queëru' ca tu le nadílaru' nisa, le naca bë' nácaru' ca tuz bönachi, sal-la' nácaru' yugu' bönni' judío, en yugu' bönni' zi'tu', enca' yugu' bönni' nadó'ogaquië', en yugu' bönni' biti' nadó'ogaquië'. Yúgu'tëru', Dios bë'ë rë'u lataj sí'iru' le runödzejë' cazë' Bö' Lá'ayi.

¹⁴ Na'a, lu idütë le naca cázaru', zían le nagudi' dzágalenru', en calëga tuz. ¹⁵ La'tu' huáca güi'i didza' ní'aru', huanná: "Tu' cabí naca' në'ë bönni', biti' néquida' queë'", didza' ni biti' gun ga biti' nequi queë' bönni' na'. ¹⁶ La'tu' huáca güi'i didza' nágaru', huanná: "Tu' cabí naca' guiój lahuë', biti' néquida' queë' bönni' ni", didza' ni biti' gun ga biti' nequi queë' bönni' na'. ¹⁷ La'tu' naca guiój loru' idütë le naca cázaru', ¿nacxi gaca yóniru'? La'tu' naca nágaru' idütë, ¿nacxi gaca ilé'e zxína'ru'? ¹⁸ Na'a, Dios nucu'ë yúgu'të le nagudi' dzágalenru' ca gú'uni quézinë' Lë'. ¹⁹ La'tu' naca tuz le nagudi' dzágalenru', bíti' rō soa idú ca naca cázaru'. ²⁰ Na'a, ca nácaru', zían le nagudi' dzágalenru', pero tuz le nácaru'.

²¹ Que lë ni na', guiój loru' biti' gaca guíë ná'aru', inná: "Biti' riquinda' li'." Lësca' caní, ícjaru' biti' gaca guíë ní'aru', inná: "Biti' riquinda' lib'íli'." ²² Na'a, yugu' le nagudi' dzágalenru', lë na' réquiru' nácagacarö cuídi'sö, lë ni naquíniröru'. ²³ Lësca' caní, yugu' le nagudi' dzágalenru', le réquiru' nácagacarö cá'asö, lë ni rugácuröru' dxi'a, en yugu' le réquiru' biti' ral-la' ilá' lahui, rugácuröru' ca' dxi'a. ²⁴ Biti' run bayudxi gunru' caní que le nácarö lachi que le néquiniru'. Dios benë' idütë le naca cázaru', en benë' ga nácarö lesaca' lë na' réquiru' rë'u nácarö cá'asö. ²⁵ Caní benë', ate' biti' narúajgaca choplö le nagudi' dzágalenru', tu' tun chi'i luzé'eguequi tu ia'tú. ²⁶ Channö gaca zi' tu le néquiniru', ilaca zi' tsözxón len le yúgu'të le néquiniru' na', en channö tu le néquiniru' zoa bi ruzí xibé, yúgu'të le nagudi' dzágalenru' tu'zí xibé tsözxón le.

²⁷ Na'a, libí'i cázali' dzágali' idütë le naca cazë' Cristo, ate' tu tuli' nácali' ca yugu' le nagudi' dzágalenë'. ²⁸ Lësca' caní, ladaj bönachi queë' Cristo, Dios nucu'ë nupa tun xichinë'.

Ga naca lo nucu'ë yugu' bönni' gubáz queë' Cristo.

Ga naca buropi nucu'ë yugu' bönni' tu'ë didza' uláz queë'.

Ga bunni nucu'ë yugu' bönni' tu'sédinë' luzá'aru'.

Ní'irö nucu'ë nupa tun yugu' yöl-la' huáca que yehua' yubá.

Ní'irö nucu'ë nupa tu'ún nupa te'e.

Ní'irö nucu'ë nupa tácalen böchi' luzá'aru'.

Ní'irö nucu'ë yugu' bönni' tu'luf'inë' rë'u dxin gunru'.

Ní'irö nucu'ë yugu' bönni' tu'ë didza' yúbölö biti' nazédagaquië'.

²⁹ Calëga yúgu'të' nácagaquië' gubáz queë' Cristo.

Calëga yúgu'të' tu'ë didza' uláz queë' Dios.

Calëga yúgu'të' tu'sédinë' luzá'aru'.

Calëga yúgu'të' tunë' yugu' yöl-la' huáca que yehua' yubá.

³⁰ Calëga yúgu'të' dë lu ná'agaquië' ulu'únë' nupa te'e.

Calëga yúgu'të' tu'ë didza' yúbölö biti' nazédagaquië'.

Calëga yúgu'të' tu'dödë' didza' yúbölö biti' nazédagaquië'.

³¹ Guli'güí' ládxi'li' cu'ë Dios lu ná'ali' yugu' yöl-la' huáca na' nácagacarö lesaca'. Na'a, ulu'ida' libí'ili' tu le nácarö lesaca' ca yúgu'të' lë ni.

13

Yöl-la' nadxí'i

¹ Sal-la' gaca gu'a xtídza' gaca bönachi le cabí nazëda', enca' xtídza' gaquië' gubáz lá'ayi queë' Dios, pero channö cabí nadxí'ida' luzá'a, didza' gu'a biti' gácarö lesaca' ca bö le run gui rucódxiru' o guíë rutíl-laru' luzé'e. ² Sal-la' nazí' lu na'a gu'a didza' uláz queë' Dios en tséajni'ida' yúgu'të' le nagachi', en yúgu'të' didza' réajni'i, en sal-la' naca idú ca réajlë'a Dios ga ridxintë huáca cúa' yugu' gu'a, pero channö cabí nadxí'ida' luzá'a, biti' bi nazáca'a. ³ Sal-la' quísia' idútë' le dë quia' para ugahua' yugu' bönachi yechi', en sal-la' udöda' idútë' le naca' ga ulu'zegui bönachi le tu' réajlë'a Cristo, pero channö cabí nadxí'ida' luzá'a, biti' ca' uzi'a xibé lë na' runa'.

⁴ Nu bönni' nadxí'inë' luzé'ë, ribözë' zxön ladxi'.

Náquië' dxi'i ladxi', en biti' ruzxé'enë' luzé'ë.

Nadxí'inë' luzé'ë idú ladxë'ë.

Biti' run ba zxön cuinë', en biti' run cuinë' lo.

⁵ Biti' runë' le ruá' dö'.

Biti' rudúli'në' le dë queë'.

Biti' rilétenë', en biti' rönjenë' dö' gulu'i bönachi queë'.

⁶ Biti' ca' rudzéjanë' cate' nu run le ruá' dö'.

Rudzéjanë' cate' nu run le naca idútë' li.

⁷ Ruá' rilenë' bíti'tës bi gun luzé'ë queë'.

Réajlë'tica'së' luzé'ë.

Rúntica'së' löza gun luzé'ë le naca dxi'a.

Ribózatica'së' zxön ladxi'.

⁸ Bíti'rö tödi que yöl-la' nadxí'i. Huadödi que le dë lu ná'agaca bönachi ilu'i didza' uláz queë' Dios. Huadxín dza cate' bíti'rö gata' lu ná'agaca bönachi ilu'i didza' yúbölö le cabí nazédagaca, ate' huadödi que yöl-la' réajni'i quéguequi bönachi. ⁹ Láti'do'os réajni'iru' na'a, en láti'do'os ca' ruí'iru' didza' uláz queë' Dios. ¹⁰ Cate' idxín le naca idú, ní'irö údxi que lë na' naca láti'do'os.

¹¹ Cate' ni' naca' bí'ido', bë'a didza' ca bí'ido', en gulequi icja' ca bí'ido', en guzá' ládxa'a ca bí'ido'. Cate' bigula' bucá'ana' le nequi que bí'ida'ahua'. ¹² Na'a le rilé'eru' naca ca le rilé'eru' cate' ruyú cuinru' tu lu guíë dxí'ido'. Biti' rilé'eru' idú ca naca. Dza ní'irö ilé'eru' idú ca naca yúgu'të'. Na'a núnbë'a láti'do'os. Dza ní'irö gúnbë'a yúgu'të' ca na' Dios caz núnbë'ë neda'. ¹³ Na'a, nacua'tica'sö yöl-la' réajlë' queéru' Dios, en yöl-la' run löza queéru' Dios, en yöl-la' nadxí'i queéru' luzá'aru'. Nacua' yonna ni, pero le naca lo naca yöl-la' nadxí'i.

14

Yugu' yöl-la' huáca runnë' queéru' Dios Bö' Lá'ayi

¹ Guli'gún bayudxi idxí'ili' luzá'ali', en guli'güí' ládxi'li' sí'ili' ca' yugu' yöl-la' huáca runnë' queéru' Dios Bö' Lá'ayi, en le naca lo, yöl-la' huáca güí'ili' didza' uláz queë' Dios.

² Nu ruí' didza' yúbölö le cabí nazëda, calëga bönachi ruí'ilen didza' nu na'. Dios caz ruí'ilen didza' nu na', tu' cuntu nu zoa réajni'i didza' ruí' nu na'. Dios Bö' Lá'ayi ru'ë nu na' lataj ruí' didza' ca nácagaca le nagachi' queë' Dios. ³ Nu na' ruí' didza' uláz queë' Dios, ruí'ilen bönachi didza' para gácarö idú ca ta'yéajlë' Cristo. Rutipa ládxi'guequi, en ruhué tsahui' léguequi. ⁴ Nu na' ruí' didza' yúbölö le cabí nazëda run tsutsu la' cuinsi, pero nu ruí' didza' uláz queë' Dios run tsutsu yúgu'të' bönachi queë' Cristo.

⁵ Raca ládxa'a güf'ili' didza' yúbölö le cabí nazédali' yúgu'téli', pero le naca lo, ré'enda' güf'ili' didza' uláz queë' Dios. Ruzí'iröru' xibé nu ru'í didza' uláz queë' Dios ca ruzí'iru' xibé nu ru'í didza' yúbölö le cabí nazëda, channö cabí zoa nu udödi didza' yúbölö na' le cabí nazëda, para ilaca tsutsu bönachi queë' Cristo. ⁶ Que lë ni na', böchi' luzá'ado', cate' guída' ga zóali', channö güf'ilena' libí'ili' didza' yúbölö le cabí nazëda', bití' bi uzí'ili' xibé. Uzí'isili' xibé didza' na' güf'ilena' libí'ili' le nulu'ínë' Dios neda', o didza' uzéajni'i rë'u, o didza' gu'a uláz queë' Dios, o le naca xibá queë'.

⁷ Lësca' caní raca que le ta'gú'u bö, yugu' le cabí nabángaca, ca naca gui rucódxiru', o ca naca guitarra. Channö cabí tul-la ca ral-la' ilún, ¿nacxi caz gúnbë'ëru' bízxilö le tul-la na', lë na' rul-la gui na', o guitarra na'? ⁸ Channö cabí cödxí ca ral-la' gun lúzuba' böa' na' ulidza rë'u lu gudil-la, ¿nuzxi caz upá' cuini para tseaj lu gudil-la na'? ⁹ Lësca' caní raca queéli'. Channö len lúdxí'li' güf'ili' didza' le cabí taca bönachi, bití' ca' ila'yéajni'i didza' güf'ili'. Caní gaca, nítisö güf'ili' didza'. ¹⁰ Le nácatë nacua' zían didza' yúbölö tu'í zían cö' bönachi izá'a lu yödžolió ni, ate' nacua' bönachi ta'yéajni'i tu tu didza' na'. ¹¹ Na'a, channö cabí réajni'ida' didza' ru'ë tu bönni', gaca' ca tu bönni' zi'tu' lahuë' bönni' na' ru'ë didza', ate' bönni' na' ru'ë didza' gáquië' ca' lahua' neda' ca tu bönni' zi'tu'. ¹² Lësca' caní naca queéli'. Ru'í'ida' ládxi'li' sí'ili' yugu' le runnë' queëru' Dios Bö' Lá'ayi. Que lë ni na', guli'güf' ládxi'li' sí'ili' le ilún ga ilácarö tsutsu bönachi queë' Cristo.

¹³ Que lë ni na' ca', nu ru'í didza' yúbölö le cabí nazëda ral-la' ulidza Dios, en inabi Lë' gunnë' que yöl-la' huáca quixjö' le ré'ëni inná didza' na' ru'í nu na'. ¹⁴ Cate' rulidza'-në' Dios, channö ruá'a didza' yúbölö le cabí nazëda', lu bö' naca caza' rulidza'-në' Dios, pero tu' cabí réajni'ida' didza' ruá'a, lu yöl-la' réajni'i quia' bití' ruzí'a xibé didza' na' ruá'a. ¹⁵ ¿Nacxi caz ral-la' guna' channö? Ulidza'-në' Dios lu bö' naca caza', enca' lu yöl-la' réajni'i quia' ulidza'-në' Dios. Gul-la' yöl-la' ba lu bö' naca caza', enca' lu yöl-la' réajni'i quia' gul-la' yöl-la' ba. ¹⁶ Channö lu bö' naca cazu' rulidza lá'ayu'-në' Dios, ate' zoa ni' nu riyónisö, channö cabí réajni'i didza' ru'u, ¿nacxi caz gaca inná: "Ca' gaca", ni'a que didza' ru'u, rë'u-në' Dios: "Xclenu"?" ¹⁷ Nadxi ca' dxí'ado' ru'u didza', rë'u-në' Dios: "Xclenu'." Channö cabí réajni'i didza' ru'u, bití' bi uzí' xibé nu na' riyöni. ¹⁸ Rea'-në' Dios: "Xclenu'", tu' ru'í'ira' didza' yúbölö le cabí nazëda' ca yúgu'téli'. ¹⁹ Lógaca bönachi queë' Dios gué'ënitë'röda' gu'a gáyu'sö didza' le gaca ila'yéajni'i bönachi ca zían gayuá' didza' yúbölö le cabí nazëda', ate' cunttu nu gaca tséajni'i. Gaca usédida' ia'zica'rö bönachi tuzi channö ila'yéajni'i didza' gu'a.

²⁰ Böchi' luzá'ado', bití' gácali' ca bí'ido' ca naca le rizá' ládxi'li'. Guli'gaca ca bí'ido' para cabí gunli' le ruá' dö', pero guli'gaca bönni' chinácagaca ca naca le rizá' ládxi'li'.

²¹ Nazúaj lu guichi lá'ayi le rnna: "Len didza' yúbölö, en lu ruá'agaca bönachi izá'a güf'ilena' bönachi ni didza'. Sal-la' guna' caní, bití' ulu'zé náagagaca xtídza'a." ¿Caní rnnë' Xanru! ²² Caní naca, Dios ru'ë rë'u lataj ru'iru' didza' yúbölö le cabí nazédaru' para gaca tu le naca bë' lógaca bönachi bití' ta'yéajlë', en calëga lógaca nupa ta'yéajlë' Cristo. Ru'ë rë'u lataj ru'iru' didza' uláz queë' Lë' le ulu'zí' xibé nupa ta'yéajlë' Cristo, en calëga bönachi na' bití' ta'yéajlë'. ²³ Que lë ni na', cate' udúbili' tsözxón, yúgu'téli' na' néquili' queë' Cristo, channö güf'ili' didza' yúbölö le cabí nazédali' yúgu'téli', ate' tsázagaca nupa nazédagaca láti'do'os, o nupa bití' ta'yéajlë' Cristo, ¿naru' cabí ila'nná: "Nachixi ícjali"?"

²⁴ Na'a, channö yúgu'téli' güf'ili' didza' uláz queë' Dios, ate' tsaz nu cabí réajlë' Cristo o nu nazëda láti'do'os, guéquibe'e nu na' nabaga' xíguia', ate' Dios uchi'a usöröö' lë'. Caní guéquibe'e nu na', tu' tseajni'i didza' güf'ili' yúgu'téli'. ²⁵ Guéquibe'e ca naca le rizá' ládxi' nu na', lë na' bigachi', ate' uzóza zxibi nu na', en tseaj ládxi' Dios, ate' inná: "Le nácatë Dios zóalenë' libí'ili'."

Ca ral-la' gunru' ga rudúbiru' queë' Cristo

²⁶ Que lë ni na', böchi' luzá'ado', cate' rudúbili' queë' Cristo, rul-lë' tuë' bönni' dzáguië' libí'ili' tu salmo, ate' rusédinë' ia'tué' tu xibá, ate' ia'tué' riguíxjöi'inë' libí'ili' tu le

bulu'inë' Dios lë', ate' ia'túe' ru'ë didza' yúbölö le cabí nazëdë', ate' ia'túe' rudödë' didza' yúbölö na' le cabí nazëdë'. Yúgu'të le gunli' ral-la' gaca le ulu'zí' xibé nupa tu'dubi queë' Cristo. ²⁷ Cate' nacuá' ni' nupa tu'í didza' yúbölö le cabí nazëdagaca, biti' ral-la' gü'íli' didza' caní zíanrö ca chopa tsónnasili'. Huáca gu'ë didza' tuzë' bönni' na', ate' tödi na' huáca gu'ë didza' ia'túe', pero run bayudxi soa nu udödi didza' yúbölö na' le biti' nazëdali'. ²⁸ Channö cuntu nu zoa nu gaca udödi didza' yúbölö na' le cabí nazëdali', nu na' ru'í didza' yúbölö le cabí nazëda ral-la' soa dxisö ga na' nudúbili', ate' huáca gü'ílen Dios didza' na' lu icja ládxi'da'ahui. ²⁹ Lësca' caní, yugu' bönni' tu'ë didza' uláz queë' Dios ral-la' ilu'ë didza' chopa tsónnasë', ate' ia'zícá'rë' bönni' na' tu'ë didza' uláz queë' Dios ral-la' ulu'chí'a ulu'söröë' didza' ru'ë bönni' na'. ³⁰ Channö Dios ulu'inë' tu bönni' rö'ë ni' le ré'ëni inná xtídzë'ë, ral-la' soa dxisö nu na' ru'í didza'. ³¹ Yúgu'tëli' huáca gü'íli' didza' uláz queë' Dios tu tuli' para izëdali' yúgu'tëli', en idipa ládxi'li' ca' yúgu'tëli'. ³² Yugu' bönni' tu'ë didza' uláz queë' Dios huáca ila'nná be'e cuíngaquië', en ila'cu'ë dxisö. ³³ Calëga Dios nu run ga rutsátsaru', tu' ré'ëne' Lë' gácaru' ba'a ladxi', ca na' runë' ga nacuá' yúgu'të cö' bönachi queë' Cristo.

³⁴ Ral-la' ila'cuá'anu dxisö nigula queéli' ga na' rudúbili'. Biti' dë lu ná'agacanu ilu'ínu didza' ni'. Ral-la' ila'cuá'anu nöxaj ca na' rinná bë' xibá queë' Dios. ³⁵ Channö té'ëninu ila'yéajni'ínu ia'lati', ral-la' ila'nábinu bönni' que queégacanu cate' ni' nacu'ë lédxigaquië'. Biti' ral-la' ilu'ínu didza' yugu' nigula ga na' rudúbiru' queë' Dios.

³⁶ ¿Naru' réquitseli' bunödzejë' Dios xtídzë'ë lu ruá'ali' lib'isili'? ¿Naru' réquitseli' bidxín xtídzë'ë Dios queézili' lib'ili'? ³⁷ Channö nu bönni' nútsë'ë lédjali' réquinë' ru'ë didza' uláz queë' Dios, o réquinë' zóalenë' Dios Bö' Lá'ayi lë', bönni' ni ral-la' si' lu në'ë naca xibá queë' Xanru' le ruzúaja' queéli' lu guichi ni. ³⁸ Na'a, channö cabí ru'í lédxë'ë didza' ni, biti' gü'í ládxi'li'-në' bönni' na'.

³⁹ Que lë ni na', böchi' luzá'ado', guli' gü'í ládxi'li' gü'íli' didza' uláz queë' Dios, en biti' inná bé'eli' nu ru'í didza' yúbölö le cabí nazëda. ⁴⁰ Ral-la' gunru' yúgu'të ca sa'yéaj, en lu yöl-la' ba'a ladxi'.

15

Bubanë' Cristo lu yöl-la' guti

¹ Na'a, böchi' luzá'ado', riguíxjöi'ida' lib'ili' ca naca didza' dxi'a na' bena' libán que ga zóali', lë na' guxzí' lu ná'ali', ate' run ga nácarö idú ca réajlë'ëli' Cristo. ² Ni'a que didza' ni uláli', channö gunli' ca rnna didza' dxi'a na' bena' libán que ga zóali', channö le nácatë guyéajlë'ëli'-në' Cristo.

³ Ga gusí lo budöda' lu ná'ali' le budödë' Dios lu na'a neda'. Caní rnna: "Gútië' Cristo uláz queëru' tu' nabága'ru' dul-la'." Ca naca lë ni nazúaj lu guichi lá'ayi le rnna ben bayudxi benë'. ⁴ Rnna ca: "Bigachë'ë yeru ba, en cate' bizá'a tsonna dza, bubanë' lu yöl-la' guti", ca na' nazúaj ca' lu guichi lá'ayi le rnna ben bayudxi guca queë'. ⁵ Gudödi ni' bulu'í lahuë' Cristo, ate' bilé'enë' Pedro Lë', en gudödi ni' idxínnutë' gubáz queë' bila'lé'enë' Lë'. ⁶ Ní'irö bulu'í lahuë' lógaquië' zíanrö ca gayu' gáyu'ë böchi' luzá'aru' ta'yéajlë'ë Cristo, cate' ni' nudúbigaquië' tsözxón. La'tu'biqui' yúgu'të bóchi'ru' ni nacu'ë nabánagaquië' na'a, sal-la' bal-lë' chinátigaquië'. ⁷ Ní'irö Jacobo bilé'enë' Lë', en gudödi ni' bulu'í lahuë' lógaquië' yúgu'të bönni' gubáz queë'.

⁸ Ga yöjsetë bulu'í lahuë' ca' lahua' neda'. Ca guca lë ni, naca' ca tu bí'ido' gúljabi' cate' chigudödi dza ral-la' gáljabi'. ⁹ Caní naca, tu' nácara' neda' cá'asö ca yúgu'të bönni' gubáz queë', en biti' naca' neda' lesaca' si' la' gubáz queë', tu' gudxía ládxa'a bönachi queë' Dios. ¹⁰ Na'a, tu' buzá' lédxë'ë quia' Dios naca' le naca' na'a, en calëga nítisö buzá' lédxë'ë quia'. Béntëra' neda' xichinë' ca ia'zícá'rë' gubáz queë', sal-la' calëga rácasö quia' bena' dxin na'. Dios caz, lu yöl-la' ruzá' ladxi' queë', bugunë' neda' dxin. ¹¹ Na'a, channö

bená libán neda' o channö gulunë' libán ia'zica're' bönni', lë ni le runtu' libán que, en le guyéajlë'ëli' libí'ili'.

Ubanru' lu yöl-la' guti

¹² Runtu' libán queë' Cristo ca na' bubanë' lu yöl-la' guti. Channö caní naca, ¿nacxi caz naca, rnnali' bál-lali': "Biti' ulu'bán nupa chinátigaca"? ¹³ La'tu' cabí ulu'bán nupa chinátigaca, biti' bubanë' Cristo, ¹⁴ en la'tu' cabí bubanë' Cristo, nítisö naca le bentu' libán que, en nítisö naca yöl-la' réajlë' queéli' Lë'. ¹⁵ Ia'stú, la'tu' cabí bubanë' Cristo, rizi' yé'ëtu' cate' runtu' ba nalí queë' Dios, rnnatu' busubanë' Cristo, ate' la'tu' cabí usubanë' nupa chinátigaca, Dios biti' busubanë' Cristo. ¹⁶ La'tu' cabí ulu'bán nupa chinátigaca, biti' bubanë' Cristo, ¹⁷ en la'tu' cabí bubanë' Cristo, nítisö naca yöl-la' réajlë' queéli' Lë', ate' nagá'anagaca dul-la' nabága'li'. ¹⁸ Lësca' caní, nupa na' chinátigaca, en gula'yéajlë' Cristo, tsaz gulati channö cabí bubanë' Lë'. ¹⁹ Channö tsánnisö ni zóaru' nabanru' huáca uzi'iru' xibé' Cristo, nácaröru' bayechi' ca yúgu'të bönachi.

²⁰ Na'a, le nácatë bubanë' Cristo lu yöl-la' guti, en náquië' nu gusí lo bubán tsaz ladaj yúgu'të nupa ulu'bán tsaz lu yöl-la' guti. ²¹ Ca na' guyú'u yöl-la' guti ni'a que le benë' tuë' bönni', lësca' caní, ni'a que le benë' ia'túë' bönni' guyú'u yöl-la' rubán quégaca nupa chinátigaca. ²² Ca na' tati yúgu'të bönachi tu' náljlengaca Adán, lësca' caní ulu'bán yúgu'të nupa na' náljlengaca Cristo. ²³ Tu tuë' ubanë' ca ral-la' gaca. Zí'alö bubanë' Cristo, ate' tödi ni ulu'bán nupa néquiquequi queë' Cristo cate' huödë'. ²⁴ Ní'irö idxín dza údxi cate' ugüë' Cristo idütë le dë lu në'e, en idütë yöl-la' unná bë', en idütë yöl-la' huáca que tu' xihui', ate' udödë' yöl-la' unná bë' queë' lu në'ë Dios Xuz. ²⁵ Run bayudxi inná bë'ë Cristo ga idxinrö dza chibenë' Dios ga ulu'zechu zxíbigaca lahuë' Lë' yúgu'të nupa ta'dá'baga' Lë'. ²⁶ Le ridá'baga' Lë' le usunítie' ga údxi naca yöl-la' guti. ²⁷ Dios chinudödë' yúgu'të lu në'ë Zxí'inë' para inná bé'enë' le. Nazúaj lu guichi lá'ayi, rnna: "Budödë' yúgu'të lu në'ë para inná bé'enë' le." Na'a, naca bë' biti' budödi cuinë' lu në'ë Zxí'inë', tu' naca cazë' Lë' Nu rudödi yúgu'të lu në'ë Zxí'inë'. ²⁸ Cate' idxín dza ni' chinudödë' Dios lu në'ë Cristo yúgu'të para inná bé'enë' le, ní'irö Lë' cazë' Zxí'inë' udödi cuinë' lu në'ë Dios, Nu na' budödi lu në'ë Zxí'inë' yúgu'të, ate' ga údxi, Dios inná bé'enë' tsaz yúgu'të.

²⁹ Bál-lali' ridí'lali' nisa uláz quégaca nupa chinátigaca. Channö réquili' biti' ulu'bán nupa na' chinátigaca, ¿bizx que ridí'lali' nisa uláz quégaca nupa chinátigaca?

³⁰ Zoa bönadxi queëtu' gátitu' yúgu'të dza. ¿Bizx que ru'itu' lataj gaca caní channö cabí ubanru' lu yöl-la' guti? ³¹ Yúgu'të dza zoa bönadxi gátia'. Riguíxjöi'ida' libí'ili' lë ni, böchi' luzá'ado', tu' raza ládxa'a le bená'. Caní naca tu' bená' ga réajlë'ëli' Xanru' Jesucristo. ³² Channö tu' gú'unisida' gudíl-lalena' böa' guixi' sínia' lu yödzo Éfeso, ¿bizxi caz uzi'a xibé? Channö cabí ulu'bán nupa chinátigaca, ral-la' gunru' ca ta'nná bönachi: "Gui'aj gáguru' tu' huátiru' cuxó huidzaj."

³³ Biti' güí'ili' lataj nu si' ye'e libí'ili'. Channö si' lu ná'ali' láti'do'os le cabí nácatë, idütëli' huóacali' chul-la niti. ³⁴ Buli'bí'i ládxi'li', en biti' gunli' dul-la' tu' cabí núnbë'ëli'-në' Dios bál-lali' libí'ili'. Rnnía' caní para guna' ga utu'ili'.

Ca ilaca nupa ulu'bán lu yöl-la' guti

³⁵ Nadxi ca' zoa nu inná: "¿Nacxi ulu'bán nupa chinátigaca? ¿Nacxi gaca idú ca nácagaca cazë' cate' ulu'dxinë'?" ³⁶ Li', bönni' biti' bi nózinë'. Lë na' rázu' luyú biti' ilén channö cabí initi. ³⁷ Lë na' rázu' luyú naca tu xisédo'os, nadxi ca' que zxoa' xtila o que ia'tú guixi' cuando'. Lë na' rázu' biti' naca guixi' cuando' na' ral-la' ilén. ³⁸ Dios runë' ga gaca guixi' cuando' ca nun cazë' que. Ca naca tu tu xisedo' na' runë' ga gaca guixi' cuando' que. ³⁹ Lësca' caní, biti' naca lébisö bëla' que queégacaba' yúgu'tëba' böa' guixi'. Zoa tu bëla' quégaca bönachi, en ia'tú ca naca bëla' quégacaba' böa' guixi'. Ia'tú ca naca bëla' quégacaba' biguínni, en ia'tú ca naca bëla' quégacaba' böla. ⁴⁰ Lësca' caní nadzá' idú ca nácagaca caz nupa nacua' yehua' yubá ca naca idú ca nácagaca caz nupa nacua' luyú ni. Zoa tu yöl-la' lachi quégaca nupa nacua' yehua' yubá, en ia'tú ca naca

yöl-la' lachi quégaca nupa nacuá' luyú ni. ⁴¹ Zoa tu yöl-la' lachi que gubidza, en ia'tú que beo', en ia'tú quéguequi böljaj lúzxiba. Yöl-la' lachi que tu böljaj lúzxiba nadzá' ca naca yöl-la' lachi que ia'tú böljaj lúzxiba. ⁴² Lësca' caní gaca cate' ulu'bán nupa chinátigaca. Cate' rigachi' lu yeru ba naca tu bëla' initi. Cate' ubán, ní'irö gaca tu le soa tsaz. ⁴³ Cate' rigachi' lu yeru ba naca tu bëla' cá'asö, en le nacuidi'. Cate' ubán, ní'irö gaca tu le lachi, en le nál-la. ⁴⁴ Cate' rigachi' lu yeru ba naca tu bëla' que yödzülió ni. Cate' ubán, ní'irö gaca tu le soa tsaz yehua' yubá. Zoa tu bëla' que yödzülió ni, en ia'tú ca gaca le idzaga bö' naca cázaru'.

⁴⁵ Nazúaj lu guichi lá'ayi le rnna: "Bönni' na' gusí lahuë' zoë' luyú ni, lë' Adán, Dios benë' lë' bönni' ban", pero Bönni' na' guyázië' xilatjë' Adán, Lë' Cristo, Dios benë' ga náquië' Bö' nabániru'. ⁴⁶ Biti' blë'ë zí'alö Bönni' na' náquië' Bö'. Bla' zí'alö nu na' naca bönáchisö, ate' ní'irö blë'ë Bönni' na' náquië' Bö'. ⁴⁷ Bönni' ni' blë'ë zí'alö, gúquinë' yu. Bönni' na' blë'ë burópilö, Nu na' naca Xanru', birúajë' yehua' yubá. ⁴⁸ Nupa nacuá' luyú ni nácagaca ca gúquië' bönni' na' gúquinë' yu, ate' nupa ral-la' tsöjcuá' yehua' yubá ilaca ca naca Nu na' birúaj yehua' yubá. ⁴⁹ Ca na' na'a dë queëru' tu bëla' le naca ca guca bëla' queë' bönni' na' gúquinë' yu, lësca' ral-la' huöëquiru' ca néquinë' Nu na' birúaj yehua' yubá.

⁵⁰ Caní ré'ëni inná lë ni rea' libí'ili', böchi' luzá'ado', rnná': Le néquini bëla', en rön biti' gaca tsaz ga ni' rinná bë'ë Dios, en lësca' caní, lë na' initi biti' gaca ideli' lë na' soa tsaz. ⁵¹ Buli'yútsöca', rea' libí'ili' tu le bigachi': Biti' gátiru' yúgu'tëru', pero Dios utsé'ë ca nácaru' yúgu'tëru'. ⁵² Tsálido'os gaca, tsca naca tu le rutásö guió'j loru', cate' cödxí lúzuba' böa' le röjsetë. Cödxí lúzuba' na', ate' ulu'bán nupa chinátigaca, en iléquini tu le soa tsaz, ate' Dios utsé'ë le néquiniru' yúgu'tëru'. ⁵³ Lë na' nácaru' le riniti ral-la' huöáca le soa tsaz, ate' le néquiniru', lë na' ral-la' gati, huöáca tu le catu caz gati. ⁵⁴ Cate' lë na' riniti chinuhuöáca le soa tsaz, enca' lë na' ral-la' gati chinuhuöáca le catu caz gati, ní'irö idxín lë na' nazúaj lu guichi lá'ayi, le rnna:

Nadúa tsaz yöl-la' guti.

Chibidéli'në' Cristo.

⁵⁵ Bítirö inná be'e yöl-la' guti rë'u.

Bítirö gaca yöl-la' guti bi gun queëru'.

⁵⁶ Huáca bi gun yöl-la' guti queëru' tu' nabágaru' dul-la', ate' nabágaru' dul-la' tu' ridá'bágaru' xibá queë' Dios. ⁵⁷ ¡Xclenë' Dios! ¡Lë cazë' runë' ga nuláru' lu yöl-la' guti ni'a que le benë' Xanru' Jesucristo!

⁵⁸ Que lë ni na', böchi' luzá'ado', guli'sóa tsutsu. Guli'gaca idú lãdxi'li', gúntica'sili' xichinë' Xanru' tu' nöz quëzili' bití' runli' nítisö xichinë' Xanru'.

16

Yugu' bönachi Corinto tu'nödzej quégaquië' böchi'gaca ta'yádzjanë'

¹ Na'a, ca naca que dumí na' unódzjali', le gácalen böchi'ru' ta'yéajlë'ë Cristo nacué Jerusalén, guli'gún na'a ca na' gunná bé'eda' yugu' cö' bönachi queë' Cristo, nacué luyú Galacia. ² Yugu' dza domingo, tu tuli' ral-la' cú'uli' quez lati' dumí, tsca na' Dios runné' queé'li'. Guli'gún chí'i le, para cabí gun bayudxi bi utúbili' cate' idxina' ga zóali'. ³ Cate' ní' idxina' ga zóali', isól-la'a Jerusalén bönni' na' cöli' libí'ili'. Uzúaja' tu lu guichi le gun ga ilaca bé'gaquië', ate' ilu'ë dumí na' unódzjali'. ⁴ Channö ral-la' tseja' ca' neda', tsójacalenë' neda'.

Le ré'ënë' gunë' Pablo

⁵ Guída' ga zóali' cate' údxi töda' yugu' yödzo luyú Macedonia, tu' run bayudxi töda' yugu' yödzo na'. ⁶ Réquida' ugá'analena' libí'ili' tu chí'i, o nadxi ca' ugá'ana' ni' yugu' beo' ziaga. Ní'irö huáca gácalenli' neda', ugú'uli' neda' nöza gátitës ga ral-la' tseja'. ⁷ Cate' guída' uduyúa' libí'ili' bití' ré'ënda' tódisa' ni'. Runa' löza sóalena' libí'ili' xidzé, channö

gunnë' Xanru' neda' lataj. ⁸ Ugá'ana' ni lu yödzö Éfeso ga idxinrö dza Pentecostés ⁹ tu' dë lataj ni guna' tu dxin zxön queë' Xanru', sal-la' zián nupa ta'dá'baga' neda'.

¹⁰ Channö idxinbi' bi'i Timoteo ga na' zóali', guli'güi'í ládxi'li'-bi', para cabí ubi ugu'íbi' tsanni ni' sóalenbi' libí'ili', tu' runbi' xichinë' Xanru' ca na' runa' neda' xichinë'. ¹¹ Que lë ni na', cunttu nu ral-la' uzóa lëbi' tsölá'alö. Guli'gácalen-bi', ugu'uli'-bi' nöza idú tsáhui'do', para udxinbi' ga ni zoa' neda', tu' riböza'-bi' lëbi', enca' yugu' bóchi'ru' túnlenë'-bi' tsözxón dxin.

¹² Ca naca queë' bóchi'ru' Apolos, gúta'yua' lahuë' tsejë' tsöjyüë' libí'ili' tsözxón len yugu' bóchi'ru', pero biti' ré'ënë' tsejë' na'a. Guídë' cate' séqui'në'.

Didza' ru'ë Pablo ga ruúdx

¹³ Buli'subán ládxi'li', en guli'gaca tsutsu ca réajlë'ëli'-në' Cristo. Guli'gaca rugu ladxi', en buli'tipa ládxi'li'. ¹⁴ Len yöl-la' nadxi'í guli'gún bíti'tës bi gunli'.

¹⁵ Na'a, bóchi' luzá'ado', chinóz quezili' ca naca queë' Estéfanos, enca' quégaca di'a dza queë'. Nácagaca nupa gula'sí lógaca ta'yéajlë' Cristo ladaj bönachi nacua' luyú Acaya. Bulu'dödi cuíngaquië' para ilunë' xichíngaca bönachi queë' Dios. ¹⁶ Ráta'yua' loli', bóchi' luzá'ado', gunli' bal nupa nácagaca ca bóchi'ru' na', enca' ca nácagaca nupa tunlen légaquië' tsözxón dxin, en tácalen légaquië'. ¹⁷ Rudzējada' tu' bila'dxinë' Estéfanos, en Fortunato, en Acaico ga zoa', tu' gúcalengaquië' neda' uláz queéli'. ¹⁸ Bulu'hué tsáhuë'ë neda' ca na' bulu'hué tsáhuë'ë ca' libí'ili'. Guli'gún bal bönachi caní.

¹⁹ Yugu' cö' bönachi queë' Dios luyú Asia ni tu'gapa Dios libí'ili'. Aquilo, en Priscila, enca' nupa tu'dubi queë' Dios ga naca lu yu'u lídxigaquië' tu'gapë' Dios libí'ili'. ²⁰ Yúgu'të bóchi'ru' ni tu'gapë' Dios libí'ili'. Guli'gapa Dios tuli' ia'tuli', en unída'li' luzá'ali'.

²¹ Neda', Pablo, len na' cuin caza' ruzúaja' lu guichi lë ni, rnnía': Rugapa' Dios libí'ili'.

²² Nu biti' nadxi'í Xanru' Jesucristo, chinabía dö' nu na'.

Gudá Xanru'.

²³ Rinábida'-në' Xanru' Jesucristo uzá' ládxe'ë queéli'. ²⁴ Nadxi'ida' yúgu'tëli' tu' nácaru' tuz len Xanru' Jesucristo. ¡Ca' gaca!

DIDZA' BUROPI GUSÓL-LĒ'Ē PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

¹ Neda', Pablo, naca' gubáz queë' Jesucristo tu' ré'ënë' caní Dios. Bi'i bóchi'ru' Timoteo runbi' neda' tsözxón. Rugapa' Dios libí'ili', rudúbili' queë' Dios lu yödzo Corinto, enca' yúgu'téli' néquili' quez queë' Dios luyú Acaya ga na' nababa Corinto. ² Rinábida'-në' Xúziru' Dios, en Xanru' Jesucristo uzá' ládxë'ë queéli', en gunë' ga soa dxi icja ládxi'do'oli'.

Yugu' le gudí'i guzxaquë'ë Pablo

³ ¡Yöl-la' ba Dios, Xuzë' Xanru' Jesucristo, tu' náquië' Xúziru', en ruhuéchi' ládxë'ë ré'u, en náquië' ca' Dios, Nu ruhué tsáhui'tica'sö ré'u! ⁴ Dios ruhué tsáhuë'ë ré'u cate' raca bíti'tës bi raca queëru', para gaca huë tsáhui'ru' ca' nupa bi raca queguequi. Ruhué tsáhui'ru' légaquië' ca na' Dios ruhué tsáhuë'ë ré'u.

⁵ Tsa ta'yán le riguí'i rizáca'ru', ca na' gudí'i guzxaquë'ë Cristo, lësca' caní ta'yán le tu'hué tsáhui' ré'u, tu' nácaru' tuz len Cristo. ⁶ Que lë ni na', channö bi riguí'i rizáca'tu', raca caní queétu' para gaca huë tsáhui'tu' libí'ili', en guntu' ga uláli'. Channö Dios ruhué tsáhuë'ë netu', raca caní para gaca huë tsáhui'tu' libí'ili', ate' lu yöl-la' riböza zxön ladxi' queéli', gaca guá' ilenli' yugu' le quí'i sáca'li', ca na' raca ca' queétu'. ⁷ Ruzxöni ládxi'tu'-në' Dios gúntica'së' ga gaca dxi'a queéli', tu' chinózitu' ca na' riguí'i rizáca'li' tsözxón len netu', lësca' caní ruzí'ili' xibé tsözxón len netu' le ruhué tsáhuë'ë Dios ré'u.

⁸ Ré'ënitú' inózili', böchi' luzá'ado', ca naca le zían le gulaca queétu' luyú Asia. Gudóditë bë' lë na' guca queétu', ate' guca zítërö ca le guca guá' ilentu'. Ca' guca, bíti'rö bentu' löza sóatu' ibantu'. ⁹ Gúquitu' guca queétu' ca raca quegaquië' bönni' chinarugu quegaquië' ilatië'. Guca caní queétu' para cabí uzxöni ládxi'tu' la' cuínsitu', pero uzxöni ládxi'tu'-në' Dios, Nu rusubán nupa chinátigaca. ¹⁰ Dios busölé' netu' lu lë na' ben ga guzóa bönadxi gátitu', ate' rusölé' netu' yúgu'të dza. Runtu' löza usölé' Lë' netu' caní leyúbölö ¹¹ channö gácalenli' netu', ulídzali'-në' Dios, en inábili'-në' gácalenë' netu'. Dios gunë' ca na' inábili'-në' tsözxón len bönachi zían, uzá' ládxë'ë queétu', ate' ila'nná: "Xclenë' Dios" ni'a queétu'.

Rigúxjö'ë Pablo bizx que ridzenë' idxinë' Corinto

¹² Lë ni le run ga rudzéjatu'. Bö' naca caztu' rulu'i netu', len yöl-la' ba'a ladxi' queétu', en idú ládxi'tu' runtu' bi runtu' yödzülió ni, ate' caní bentu' ca' ga ni' zóali'. Caní bentu', tu' gúcalen netu' le buzá' ládxë'ë Dios queétu', en calëga len yöl-la' réajni'i queéztu' bentu' caní. ¹³ Ruzúajsötu' queéli' lu guichi le gaca ulábali', en le gaca tséajni'ili'. Raca ládxa'a tséajni'ili' idú ¹⁴ lë na' réajni'ili' lati'. Ní'irö cate' idxín dza huödë' Xanru' Jesucristo, gaca gunli' netu' zxön ca na' netu' guntu' libí'ili' zxön.

¹⁵⁻¹⁶ Tu' bena' löza lë ni, guzá' ládxa'a guída' ga zóali' zí'alö cate' gudöda' luyú Macedonia, ate' guída' ga zóali' leyúbölö cate' uzá'a ni para uzí'ili' xibá' chopa luzú. Tödi ni' huáca gácalenli' neda' ugú'uli' neda' nöza tseja' luyú Judea. Caní gú'unida' guna'. ¹⁷ ¿Naru' réquitseli' guzxi' yë'a tu' butsa'a ca guna'? ¿Naru' réquitseli' lu yöl-la' bönáchisö quia' runa' le rizá'sö icja', en bé'ësa' ca' didza' cate' gunnía': "Caní guna'?" ¹⁸ Ni'a queë' Xanru' Dios, Nu run idútë ca rnna xtídzë'ë, bití' bé'ësa' ca' didza' cate' bé'lëna' libí'ili' xtídzë'ë Dios. ¹⁹ Jesucristo, Zxí'inë' Dios, Nu na' bentu' libán que ga zóali', neda' len Silvano, en Timoteo, bití' ru'isë' ca' didza'. Lë' ru'ë didza' idútë li. ²⁰ Cristo caz runë' ga naca idútë löza yúgu'të le guzxi' lu në'ë Dios, ate' ni'a queë' Lë' gaca innaru': "Ca' gaca", para gaca queë' Dios yöl-la' ba. ²¹ Dios caz runë' ga runtu' löza tsözxón len libí'ili'

néquiru' queë' Cristo, en budödë' lu na'tu' dxin queë' runtu'. ²² Bennë' queëru' le naca bë' néquiru' queë', tu' guchízië' icja ládxi'do'oru' Dios Bö' Lá'ayi, Nu naca queëru' le run ga naca löza yúgu'të le gunnë' Dios queëru'.

²³ Ni'a queë' Xanru' Dios, Nu nözi le rizá' ládxa'a, ruá'a didza' idútë li. Nózinë' Lë' bití' bida' ga zóali' lu yödzö Corinto, para cabí gun bayudxi guna' ga huí'inili'. ²⁴ Bití' ré'ënitú' inná bé'etu' libí'ili' ca réajlë'ëli' Cristo, tu' chinácali' tsutsu ca réajlë'ëli' Lë'. Ré'ënitú' guntu' le gun ga udzeja ládxi'li'.

2

¹ Que lë ni na' bë' ládxa'a cabí guídatea' queé'li' zí'alö, para cabí guna' ga huí'inili'. ² Channö guna' neda' ga huí'inili', ¿nuzxi caz gun ga udzëjada' neda'? ¿Naru' guntsa' ga huí'ini nu ral-la' gun ga udzëjada' neda'? ³ Que lë ni na' buzúaja' queé'li' lu guichi zí'alö. Bití' gú'unida' guída' ga zóali', para cabí gunli' libí'ili' ga huí'inida' neda', tu' ral-la' gácali' libí'i cázali' le gun ga udzëjada' neda'. Tu' ruzxöni ládxa'a libí'ili', nözda' udzëjali' yúgu'tëli' channö udzëjada' neda'. ⁴ Cate' ni' buzúaja' queé'li' lu guichi lë na', gusé'bide'e ládxa'a, en buí'inide'e ládxa'a ga bidxintë gurödxá'. Buzúaja' caní lu guichi, calëga para guna' ga huí'inili', pero para inözili' ca nadxí'ide'eda' libí'ili'.

Ral-la' uniti loru' nu ruá' dö' cate' rubí'i ladxí'

⁵ Channö zoë' tu bönni' ni', bönni' na' busuhuí'ininë' rë'u, calëga néda'sö busuhuí'ininë', pero huáca innaru' busuhuí'ininë' yúgu'tëli' libí'ili'. Rnnía': "Huaca innaru'", para cabí tödi bë' ichugu bë'a queë' bönni' na'. ⁶ Tscati' gaz xíguia' chibenli' látu'biquí' yúgu'tëli' queë' bönni' na'. ⁷ Na'a, ral-la' uniti loli' bönni' na', en utí'pali' ládxe'ë, para cabí tödi bë' huí'ininë', en para cabí gaca tsaz chopa ládxe'ë. ⁸ Que lë ni na' ráta'yua' loli' gunli' le gaca bë' nadxí'ili'-në' idú ládxi'li'. ⁹ Que lë ni na' ca' buzúaja' queé'li' lu guichi lë na'. Gú'unida' si' bë'a libí'ili' para inözda' channö rúntica'sili' ca rna xtídzá'a. ¹⁰ Cate' nu runiti loli' libí'ili', neda' ca' runiti lahua' nu na'. Cate' nu runiti lahua', channö bi ben nu na' runiti lahua', runa' caní uláz queë' Cristo para gaca bi uzí'ili' xibé. ¹¹ Caní runa', para cabí sequi' Satanás tu' xihui' ucúl-la rë'u, tu' chinóziru' yugu' le ré'ëni gun queëru'.

Gurö'ë böniga Pablo lu yödzö Troas

¹² Cate' bidxina' lu yödzö Troas para guna' libán que didza' dxi'a queë' Cristo, bénnadë'ë Xanru' neda' lataj guna' libán ni'. ¹³ Sal-la' guca caní, gurö'a böniga tu' cabí yöjxáca'a-bi' bi'i bóchi'ru' Tito ni'. Que lë ni na' buzá'alena' bönachi ni', ate' guyija' luyú Macedonia.

Idéli'ru' tu' zóalenë' Cristo rë'u

¹⁴ ¿Xclenë' Dios! Riché'tica'së' rë'u ca tu le naca bë' bidéli'në' Cristo yöl-la' rusölá queëru'. Dios rugunë' dxin rë'u para rulu'ë lahui ca gaca ilúnbë'e bönachi Cristo. Le nácaru' naca ca tu le rilá' zxixi, le riguisi gátitës. ¹⁵ Nácaru' ca tu nöri rilá' zxixi, le ruzégui'ë Cristo lahuë' Dios, en le riguísië' lógaca nupa nulágaca, en nupa nanítigaca. ¹⁶ Lógaca nupa na' nanítigaca nácaru' ca tu le rilá' siguti le naca bë' ilátie'. Lógaca nupa na' nulágaca nácaru' ca tu le rilá' zxixi le naca bë' ibántica'siru'. ¿Nuzxi caz naca lesaca' gaca que caní? ¹⁷ Bití' runtu' ca tun zían bönachi, nupa tu'gún dxin xtídzë'ë Dios ca tu le tuti', en to'ó. Tu' nasól-lë'ë Dios netu', idú ládxi'tu' ruí'itu' didza' lahuë' Lë' tu' nácatu' tuz len Cristo.

3

Ca naca didza' le ruún rë'u tuz len Dios

¹ ¿Naru' réquitseli' run ba zxön cuintu' cate' ruí'itu' caní didza'? ¿Naru' runtsö bayudxi ulu'itu' libí'ili' tu guichi le rulu'i le nácatu'? ¿Naru' ral-la' inábitu' libí'ili' gúnnali' queé'tu' tu guichi caní, ca na' tun bal-la bönachi? ² Libí'i cázali' nácali' ca tu guichi le rulu'i le nácatu', le nazúaj lu icja ládxi'do'otu', ate' yúgu'të bönachi gaca ulu'laba le, en

tséajni'iguequi le. ³ Le nácali' nalá' lahui ca tu guichi nuzúajé' Cristo, le gusól-lë'ë lu na'tu'. Biti' nazúaj tu lu guichi, pero Bö' Lá'ayi queé' Dios ban nuzúajé' le, calëga tu lu guiójtá'a, pero lu icja ládxi'do'oli' nuzúajé'.

⁴ Ruí'itu' caní didza' tu' ruzxöni ládxi'tu'-në' Dios tu' zóalenë' Cristo rë'u. ⁵ Biti' réquitu' bi gaca guntu' rácasö queé'tu', pero Dios runné' queé'tu' yöl-la' huáca bi guntu'. ⁶ Dios caz bennë' queé'tu' yöl-la' huáca guntu' xichinë' lu didza' cubi na', le ruún rë'u tuz len Dios. Didza' ni bití' naca tu xibá nazúaj lu guichi, pero naca tu le nusédinë' Dios Bö' Lá'ayi rë'u. Xibá na' nazúaj lu guíchisö richugu queéru' gátiru', pero Dios Bö' Lá'ayi nabániru'.

⁷ Yugu' xibá queé' nazúajgaca lu guichi, Dios buzúajé' yugu' lu guiójtá'a, atë' bulu'e lahui yöl-la' bení' queé' cate' budödë' le lu në'ë Moisés. Sal-la' gudödi que, guyépitëro yösa bení' lahuë' Moisés. Caní guca, bití' guca ulu'yú bönachi Israel lahuë' Moisés. Channö yöl-la' bení' caní yöjtsaga xibá na', atë' xibá na' richugu quégaca bönachi ilátigaca, ⁸ zxöntëro naca yöl-la' bení' na' dzaga yugu' le runë' Dios Bö' Lá'ayi. ⁹ Yöjtsaga yöl-la' bení' lë na' ben ga narugu quégaca bönachi ilátigaca. Zxöntëro naca yöl-la' bení' que lë na' run ga rnnë' Dios nácacagaca tsahui' bönachi. ¹⁰ Tu' nácatëro lesaca' yöl-la' bení' na' nalá' lahui na'a, cuídí'sö nagá'ana yöl-la' bení' na' bilá' lahui cate' Dios bunödzejé' xibá queé' quégaca bönachi. ¹¹ Channö guzóa yöl-la' bení' que lë na' guzóa tu chí'ido'osö, zxöntëro naca yöl-la' bení' que lë ni sóatica'sö.

¹² Tu' zoa lë ni runru' löza, ruí'itu' didza' lu yöl-la' rugu ladxi'. ¹³ Biti' runtu' ca benë' Moisés, bucachë' lahuë' len tu lári'do', para cabí ulu'yú bönachi Israel yöl-la' bení' na' zeaj riniti. ¹⁴ Gula'chul-la gula'nítië' yugu' bönni' ni'. Ga ridxintë na'a dza cate' tu'labë' guichi que didza' gula na' le ruún bönachi tuz len Dios, naca tsca nagá'ana la' leze lári'do' na' lógaquië', lë na' gaca ugúë' tuzë' Cristo. ¹⁵ Ga ridxintë na'a dza, cate' tu'labë' guichi ga na' nazúaj didza' queé' Moisés, zxa ca tu lári'do' guiójt lógaquië' le run ga nachul-la nanítigaquië'. ¹⁶ Cate' nu ruhuóaca queé' Xanru', rigúa lë na' run ga nachul-la naniti nu na'. ¹⁷ Cate' ni rnnatu': "Xanru'", ruí'itu' didza' queé' Dios Bö' Lá'ayi. Ga zoë' Bö' Lá'ayi queé' Xanru', ni' zoa caz yöl-la' nadzán. ¹⁸ Yúgu'tëru' rë'u bití' bi nusayaj loru'. Nácaru' ca tu guié dxili ga nalá' yöl-la' bení' que lahuë' Xanru', atë' yöl-la' bení' na' queé' Xanru', Nu naca Bö' Lá'ayi, rutsá' rë'u, en run ga zeaj rácaröru' ca náquië' Cristo caz, en ráta'rö queéru' yöl-la' bení' queé'.

4

¹ Dios buéchi' ládxi'ë netu', en budödë' lu na'tu' dxin ni runtu'. Que lë ni na' bití' raca chopá ládxi'tu'. ² Chibucá'anatu' le tun bönachi bagáchi'sö, en le tun ga rutuí'iru'. Cuntu nu rizi' yé'etu', en bití' rutsá'atu' xtídzë'ë Dios. Tu' ruí'itu' didza' que le naca idútë li, ruí'i ládxi'tu' guntu' le iléquibe'e yúgu'të bönachi naca dxi'a lahuë' Dios. ³ Channö zoa nu bití' réajni'ini didza' dxi'a runtu' ba nalí que, nácacagacasö nupa nachul-la nanítigaca bití' ta'yéajni'i le. ⁴ Bití' ta'yéajlë' bönachi na'. Ben tu' xihui' ga naca caní, nu na' nun cuini ca dios, en rinná be'e bönachi dza ni zóaru' na'a. Ben ga nachul-la nanítigaca, para cabí ila'lé'e bení' que didza' dxi'a ca naca yöl-la' bení' queé' Cristo, Nu na' naca idú ca náquië' Dios caz. ⁵ Bití' runtu' libán que la' cuínsitu', pero runtu' libán queé' Jesucristo, en riguixjö'ötu' náquië' Xanru', atë' netu' ni nácatu' huen dxin queéli' tu' nadxí'itu'-në' Jesús. ⁶ Dios, Nu ben ga buzení' bení' ga ni' guca chul-la, náquië' Nu rigú'u bení' icja ládxi'do'oru', le ruzéajni'i rë'u para gúnbë'ëru' yöl-la' bení' queé' Dios, lë na' ruzeni' lahuë' Jesucristo.

Tu' réajlë'ëru' Dios runru' ca ré'ënë' Lë'

⁷ Yöl-la' tsahui' ni yu'u icja ládxi'do'oru' rë'u. Nácaru' ca yugu' yusu' yu, para gaca bë' nequi queé' Dios yöl-la' huáca zxön na', en calëga que cázaru'.

⁸ Tu'saca' zi' bönachi netu', pero bití' rudú ládxi'tu'.

Ró'ötu' böniga, pero bití' raca chopá ládxi'tu'.

⁹ Ta' bía ladxi' bönachi netu', pero biti' rubéaj ládxë'ë Dios netu'.
Ta' zé'ede'e netu' yu, pero biti' tu' suniti netu'.

¹⁰ Lu idú le naca caztu' rátitica'stu' tsözxón len Jesús,
na' naca bë' lu le naca caztu' nabánitu' Lë'.

¹¹ Tsanni ni zóatu' nabantu', zóatica'sö bönadxi gátitu' tu' néquitu' queë' Jesús para gaca bë' nabánitu' Lë' lu le naca caztu' le riniti. ¹² Caní naca, zoa bönadxi queëtu' gátitu', pero ni'a que lë ni rata' yöl-la' na'bán queéli'.

¹³ Nazúaj lu guichi lá'ayi le rnna: "Guyéajlë'a Dios, ate' que lë ni na' bë'a didza'." Lësca' caní raca queëtu', réajlë'ëtu' Dios, en que lë ni na' ru'itu' didza'. ¹⁴ Nöztu' ca gunë' Dios, Nu busubán Xanru' Jesús, usubanë' ca' netu' tsözxón len Jesús, en usudxinë' netu' tsözxón len libí'ili' lahuë' Lë'. ¹⁵ Raca caní yúgu'të lë ni para gaca bi uzí'ili' xibé. Channö ila'deli' zianró ca' bönachi le ruzá' ládxë'ë Dios queëru', ila'nnë': "Xclenë' Dios", ate' gaca yöl-la' ba queë' Dios.

¹⁶ Que lë ni na', biti' raca chopa ládxi'tu'. Sal-la' riniti idú le naca caztu', yúgu'të dza rucubë' Dios le nácatu' lu icja ládxi'do'otu'. ¹⁷ Le cuídi'sö riguí' rizáca'ru' ni tu chí'ido'osö run ga gata' queëru' le uzí'da'aru' xibé le sóatica'sö, en le nácatëro lesaca' ca gaca gúnbë'ëru'. ¹⁸ Biti' ru'í' ládxi'ru' le rilé'ëru' luyú ni, pero le biti' gaca ilé'ëru' ru'í' ládxi'ru'. Lë na' rilé'ëru', tu chí'ido'osö zoa, pero le cabí gaca ilé'ëru' sóatica'sö.

5

¹ Nóziru' cate' initi idútë le naca cázaru', le naca ca tu yu'u lári'do' yödzölió ni, Dios chinupé'ë tu le cubi queëru', le naca ca tu yu'u le zoa tsaz ni' yehua' yubá, lë na' nun cazë' Lë'. ² Que lë ni na' rinnë' ládxi'ru' tu' ré'ëni'ru' tsú'uru' le cubi ni', lë na' naca ca tu lídxiru' ni' yehua' yubá. ³ Tsú'uru' le cubi ni' ca na' rácuru' tu lari', para cabí sóaru' ga biti' zoa idútë le naca cázaru'. ⁴ Tsanni ni zóaru' lu idútë le naca cázaru', le naca ca tu yu'u lári'do', rinnë' ládxi'ru' lu yöl-la' risëbi ladxi' queëru'. Biti' runru' caní tu' ré'ëni'ru' ucá'anaru' idútë le naca cázaru', pero ré'ëni'ru' tsú'uru' tsaz le cubi ni'. Caní gaca, ucá'anaru' idútë le naca cázaru' le riniti, ate' tsú'uru' lu yöl-la' na'bán idú. ⁵ Dios chinupé'ë yúgu'të lë ni queëru', ate' guchízië' rë'u Dios Bö' Lá'ayi, Nu naca queëru' le naca bë' naca löza sí'iru' lë na' nupé'ë queëru'.

⁶ Que lë ni na' nadipa ládxi'ru'. Tsanni ni yú'uru' lu le naca cázaru', nóziru' zóaru' zítu' ga zoa lidxë' Xanru'. ⁷ Runru' ca runru' tu' réajlë'ëru'-në' Dios, en calëga tu' zoa bi rilé'ëru'. ⁸ Tu' runru' löza lë ni, ré'ëni'ru' ucá'anaru' le naca cázaru' ni para tsöjsóalenru'-në' Xanru'. ⁹ Que lë ni na' ru'í' ládxi'ru' gunru' le raza ládxë'ë Xanru', channö ugá'anaru' lu idútë le naca cázaru' ni, o channö tsöjsóalenru'-në' Xanru' ni'. ¹⁰ Caní runru' tu' run bayudxi idxinru' yúgu'tëru' lahuë' Cristo ga ni' rö'ë ruchi'a rusöróë'. Ní'irö ubi'ë que queëru' tsca naca le benru' tsanni ni yú'uru' lu le naca cázaru', channö benru' le naca dxi'a o le cabí naca dxi'a.

Le ruún rë'u tuz len Dios

¹¹ Que lë ni na', tu' rádxitu'-në' Dios, ru'í' ládxi'tu' uzéajni'itu' bönachi. Nözinë' Dios ca naca le yu'u icja ládxi'do'otu', ate' ruzxöni ládxa'a nózili' dxi'a ca' libí'ili' lë na' yu'u icja ládxi'do'otu'. ¹² Biti' rubéaj cuintu' dxi'a loli'. Ré'ëni'tu' gata' lataj queéli' gunli' netu' bal, para gaca ubí'ili' didza', bi guiéli' yugu' bönni' tun ba zxön cuíngaquië' ca na' tu'lu'isö lahui cuíngaquië', en calëga ca nácagaquië' lu icja ládxi'do'gaquië'. ¹³ Channö nachixi ícjatu', naca para gaca yöl-la' ba queë' Dios, en channö cabí nachixi ícjatu', naca para gaca bi uzí'ili' xibé. ¹⁴ Run bayudxi bi guntu' tu' nadxí'inë' Cristo rë'u, tu' chinóziru' tuz Nu guti uláz quégaca yúgu'të bönachi, en que lë ni na' naca quégaca yúgu'të bönachi tsca nátilengaca Lë' tsözxón. ¹⁵ Lë' gútië' uláz quégaca yúgu'të bönachi para cabirö ilunë' bönni' nabángaquië' le nequi quégacasë', pero le nequi que Nu na' guti uláz quégaquië',

en bubán lu yöl-la' guti. ¹⁶ Que læ ni na', bítirö gúnbë'ëtu' bönachi tsca naca le nalá'gaca láchui'lö, en sal-la' canísö bënbe'ëtu'-në' Cristo, bití' núnbe'ëtu'-në' caní na'a. ¹⁷ Channö nuhuóaca nútí'tës bönachi tuz len Cristo, chinaca bönachi cubi nu na'. Chigudödi que le gulaca zí'alö, ate' chinucúbigaca yúgu'të.

¹⁸ Yúgu'të læ ni nunë' Dios, Nu bun rë'u tuz len Lë' lu në'ë Cristo, en budödë' lu na'tu' guntu' libán ca gaca ulu'huóaca yúgu'të bönachi tuz len Lë'. ¹⁹ Libán runtu' rna caní: "Dios guzóalenë' Cristo, en benë' ga gaca ulu'huóaca bönachi yödzölió ni tuz len Lë', en bití' röjnenë' dul-la' gula'baga'." Budödë' lu na'tu' didza' dxi'a ni, ca gaca ulu'huóaca bönachi tuz len Dios. ²⁰ Na'a, nácatu' gubáz queë' Cristo, en raca na'a ca Dios caz ráta'yue' loli' lu rú'atu' netu'. Que læ ni na' ráta'yutu' loli' uláz queë' Cristo, guli'huóaca tuz len Dios. ²¹ Cristo bití' bi dul-la' benë', pero Dios budödë' Lë' ca tu bönni' dul-la' uláz queëru', para gata' queëru' lataj gácaru' tsahui' ca náquië' Dios caz tu' nácaru' tuz len Cristo.

6

¹ Tu' runtu' dxin tsözxón len Dios, ráta'yutu' loli', rnatu': Bití' udódili' cá'asö le ruzá' láchxë'ë Dios queëli'. ² Nazúaj lu guichi lá'ayi ca gunné' Dios le rna:

Tu dza buzá' láchxa'a quiu', biyönda' li',
ate' dza bena' ga gaca uló', gúcalena' li'.

¡Buli'yútsöca'! ¡Na'a naca dza ruzá' láchxë'ë queëru'! ¡Na'a naca dza gaca uláru'!

³ Bití' rë'ënitú' bi guntu' le gun ga nu ichixi inigui, para cabí soa nu ucá'ana cá'asö dxin ni runtu'. ⁴ Ni'a que bítí'tës bi runtu', ruí'i láchxi'tu' gaca bë' nácatu' huen dxin queë' Dios. Que læ ni na', len yöl-la' riböza zxön láchxi' ruá' rilentu' yugu' le riguí' rizáca'tu', en yugu' le riyadzaj queëtu', en yugu' le tun ga ró'ötu' böniga. ⁵ Caní bentu' sal-la' gula'zé'ede'e bönachi netu' yu, en gula'gu'ë netu' lidxi guíë, en gula'bía di'i netu'. Gudödi bë' bentu' dxin, en bití' guta' lataj queëtu' gásitu' o bi gágutu'. ⁶ Bë' láchxi'tu' gaca bë' nácatu' huen dxin queë' Dios. Guca bë' læ ni:

Tu' nácatu' ba'a láchxi', en tu' nápatu' yöl-la' réajni'i,
en tu' riböztu' zxön láchxi', en tu' nácatu' dxi'i láchxi',
en tu' zóalenë' Dios Bö' Lá'ayi netu',
en tu' naca idú ca náchxi'itu' luzá'atu'.

⁷ Ruí'itu' didza' idútë li, ate' zóalen netu' yöl-la' huáca queë' Dios. Le naca tsahui' naca ca tu le rudí'initu' lu gudil-la, enca' le run chi'i netu' lu gudil-la na'.

⁸ Nacuá' nupa tun netu' bal, enca' nupa tu'zóa netu' tsölá'alö.
Nacuá' nupa tu'lidza ditaj netu', enca' nupa tu'lidza tsahui' netu'.

Sal-la' ta'nná bönachi rizí' yé'ëtu', ruí'itu' didza' idútë li.

⁹ Sal-la' nacua' bönachi bití' núnbe'gaquië' netu',
nacua' ca' nupa núnbe'gaca netu'.

Ridatu' ga zoa bönadxi gátitu', pero ni zóatu' nabantu'.

Tunë' netu' xíguia', pero bití' tutië' netu'.

¹⁰ Tu'suhuí'ini netu', pero rudzéjatica'stu'.

Nácatu' bönni' yechi', pero runtu' ga rata' yöl-la' tsahui' idú quégaca bönachi zían.

Sal-la' bití' bi dë queëtu', nequi queëtu' yúgu'të le dë.

¹¹ Idú láchxi'tu' ruí'ilentu' libí'ili' didza', böchi' luzá'ado', zóali' Corinto. Buluí'itu' libí'ili' ca ruí' láchxi'da'tu' libí'ili'. ¹² Channö cabí nácaru' tuz bití' naca tu' cabí ruí' láchxi'tu' libí'ili', pero libí' cázali' bití' ruí' láchxi'li' netu'. ¹³ Na'a, ruí'ilena' libí'ili' didza' ca runë' tu bönni' ruí'ilenë'-bi' zxí'inë' didza', rnní'a': Bulí'bí' queëtu' ca rúnlentu' libí'ili'. Guli'güü' láchxi' netu'.

Nácaru' ca tu yudo' ga yu'ë Dios ban

¹⁴ Bití' gácali' tuz len bönachi bití' ta'yéajlë'.

¿Nacxi gácatsö ilaca tuz le naca tsahui', en le cabí naca tsahui'?

¿Nacxi gácatsö ilaca tuz le naca chul-la, en le naca bení'?

15 ¿Nacxi gácatsö ilácagaquië' tuz Cristo, en Satanás, tu' xihui'?
¿Nacxi gácatsö ilácagaquië' tuz tu bönni' réajlë'ë Cristo, en tu bönni' biti' réajlë'ë?

16 ¿Nacxi gácatsö ilaca tuz yudo' queë' Dios, en budó' guió'j budó' yaga?

Libí'i cázali' nácali' ca tu yudo' ga yu'ë Dios ban. Ca naca lë ni, Dios caz gunné':
Sóalena' légaquië', en tálena' légaquië'.

Gaca' Dios quégaquië', ate' légaquië' iláquië' bönachi quia'.

17 Que lë ni na', gunné' ca' caní:

Guli'ruáj ladjagaquië', en buli'lá'alén légaquië'.

Rnnë' Xanru': "Biti' gútsa'li' le ruá' dö', ate' si' lu na'a libí'ili'.

18 Neda' gaca' xuz cázali', ate' libí'ili' gácali' xí'ina', bönni', en nigula."

Caní rnnë' Xanru', Nu napa caz idútë' yöl-la' huáca.

7

1 Böchi' luzá'ado', néquiquequi queéru' yugu' lë ni guzxí' lu në'ë Dios. Que lë ni na' ral-la' un cuinru' dxi'a, en ubéajru' yúgu'të le rucá'ana cá'asö idútë le naca cázaru', en bö' naca cázaru'. Lu yöl-la' radxi queéru' Dios ral-la' guéquiru' quez queë' Lë'.

Ca bulu'bí'i ládxi'gaca nupa ta'yéajlë' Cristo

2 Guli'sí' lu ná'ali' netu'.

Cuntu nu biá'atu' dö' que, nu dzaga libí'ili'.

Cuntu nu bentu' ga ichixi inigui.

Cuntu nu guzxí' yé'etu'.

3 Ruá'a caní didza', calëga para usubága'a libí'ili' xíguia', pero naca ca na' chigunnía' zí'alö, rnnía': Zoa' sina' ibánlena' libí'ili' o gátilena' libí'ili' tu' ruí' ládxa'a libí'ili'.

4 Ruzxónida' ládxa'a libí'ili', en rúnda'a libí'ili' zxön. Sal-la' zían le riguí'i rizáca'tu', nadípada' ládxa'a, en rudzëjade'e ládxa'a.

5 Cate' bidxintu' luyú Macedonia, ga ridxintë na'a dza, biti' rata' queétu' lataj uzí ládxi'tu', pero zían le taca queétu'. Ta'díl-lalen bönachi netu', ate' lu icja ládxi'do'otu' yú'ugaca le tun ga rádxitu'. 6 Ní'irö Dios, Nu rutipa ladxí' nu chizóa gaca chopá ladxí', butipë ládxi'tu' cate' budxinbi' bí'i Tito ga guzóatu'. 7 Biti' gúcasö tu' budxinbi' queétu', pero tu' gudí'xjöi'ibi' ca' netu' ca na' libí'ili' butípali' ládxi'bi'. Gudí'xjöi'ibi' netu' ca na' ré'ënide'eli' ulé'eli' neda', en ca na' ruhu'í'nili' ni'a que lë na' guca ni', enca' ca ruí'i ládxi'li' neda'. Yúgu'të lë ni ben ga rudzeja ládxa'a.

8 Sal-la' le buzúaja' queéli' lu guichi zí'alö ben ga buí'nili', biti' ruhu'í'inda' na'a. Zí'alö buí'nida' cate' gúquibe'eda' ben ga buí'nili' libí'ili' tu' chí'ido', 9 pero na'a rudzëjada', calëga tu' buí'nili', pero tu' ben yöl-la' ruhu'í'ini queéli' na' ga bubí'i ládxi'li'. Dios bugunë' dxin yöl-la' ruhu'í'ini queéli', para cabí ichixi iníguli' ni'a que le bentu' netu'. 10 Yöl-la' ruhu'í'ini na' rugunë' dxin Dios run ga nu ubí'i ladxí' para ulá nu na', ate' que lë ni na' biti' ral-la' huí'iniru' que. Yöl-la' ruhu'í'ini le naca que yödzölió ni run ga ilátigaca bönachi. 11 Buli'yútsöca' ca bugunë' Dios dxin yöl-la' ruhu'í'ini queéli' na'.

Ben ga ruí'i ládxi'li'-në' Dios.

Ben ga gú'unili' urúajli' dxi'a.

Ben ga guléli' nu na' ben dul-la'.

Ben ga rádxili'-në' Dios.

Ben ga bë' ládxi'li' gunli' ca rnna xtídzë'ë Dios.

Ben ga nadxí'ili'-në' Dios idú ládxi'li'.

Ben ga gú'unili' gunli' xíguia' nu na' ben dul-la'.

Benli' le naca bë' biti' bi dul-la' nabága'li' ni'a que lë na' guca.

12 Que lë ni na', sal-la' buzúaja' caní lu guichi na', biti' guca ni'a que nu na' ben dul-la', en calëga ni'a que nu na' gudí'i guxzaca', pero para gaca bë' lahuë' Dios le nácatë

ru'i ládxi'li' netu'. ¹³ ¡Lë ni butipa ládxi'tu'! Calégasö bidipa ládxi'tu', pero rudzėjade'e ládxi'tu' tu' rudzėjabi' bi'i Tito ni'a que le benli' libí'ili', tu' butí'pali' ládxi'bi'.

¹⁴ Bena' libí'ili' zxön lobi' Tito, ate' biti' benli' ga utu'ida'. Bé'lentica'stu' libí'ili' didza' idútë li, ate' lësca' caní naca idútë li didza' bé'lentu'-bi' Tito cate' bentu' libí'ili' bal. ¹⁵ Zeaj rácarö idú ca nadxí'ibi' bi'i Tito libí'ili' cate' röjnebi' ca na' benli' ca rnna xtídza'tu', en ca na' benli'-bi' bal lu yöl-la' radxi Dios queéli' en lu yöl-la' nöxaj ladxi' queéli'. ¹⁶ Rudzėjade'eda' tu' gaca uzxöni ládxa'a libí'ili' idú ládxa'a.

8

Ca ral-la' unödzej nu réajlë' Cristo le dë que

¹ Na'a, böchi' luzá'ado', ré'ënitü' quíxjöi'itu' libí'ili' ca naca le buzá' ládxe'ë Dios quegaca yugu' cö' bönachi queë' Cristo luyú Macedonia. ² Sal-la' yenni' gula'gu'i gula'záquië' lu yugu' le guxzí' bë' légaquië', bulu'dzėjade'enë', en idú ládxi'gaquië' bulu'nódzjadë'ë sal-la' nácagaquië' bönachi yechi'. ³ Neda' runa' ba nalí' quegaquië', idú ládxi'gaquië' bulu'nódzjadë'ë tsca gula'zéqui'në', en bulu'nódzjarë' tsca gula'zéqui'në'. ⁴ Gula'nábide'enë' netu', en guláta'yudë'ë lotu' güi'itu' légaquië' lataj tsözxön len netu' ilácalenë' böchi'ru' ta'yéajlë'ë Cristo. ⁵ Gulunrë' ca guqui ícjavu' ilunë'. Bulu'dödi cuíngaquië' zí'alö lu në'ë Xanru', enca' lu na'tu' netu', le naca le raza ládxe'ë Dios. ⁶ Que lë ni na' gunábitu'-bi' bi'i Tito údxi gunbi' xichinbi' ga ni' zóali', en utúbibi' dumí runódzjali' lu yöl-la' dxi'i ladxi' queéli', ca na' gusí lobi' benbi' zí'alö. ⁷ Nácali' lo ca naca yúgu'të le runli', ca réajlë'ëli' Cristo, en ca réajni'ili', en ca ruzéajni'ili' bönachi, en ca ru'i ládxi'li' luzá'ali', enca' ca nadxí'ili' netu'. Lësca' caní ral-la' gácali' lo ca gácalenli' luzá'ali', lu yöl-la' dxi'i ladxi' queéli' bi unódzjali' quegaquië'.

⁸ Biti' rinná bé'eda' libí'ili' gunli' caní. Ruá'a didza' ca tun ia'zíca'rö bönachi, tu'nödzej idú ládxi'gaca, para guna' ga gunli' le gaca bë' naca idú ca nadxí'ili' luzá'ali'. ⁹ Nöz quezili' le buzá' ládxe'ë Xanru' Jesucristo queëru'.

Bilé'enë' yöl-la' tsahui' pero para gácalenë' libí'ili' böáquië' yechi' para gata' queéli' yöl-la' tsahui', tu' gúquië' Lë' yechi'.

¹⁰ Caní runi neda': Dxi'arö gaca queéli' údxi gunli' lë na' gusí loli' runli' chiguca tu iz. Gúcali' lo, calégasö ca bunódzjali', pero lësca' ca gú'unili' unódzjali'. ¹¹ Na'a, idú ládxi'li' buli'siyudxi gunli' lë na' gusí loli' runli', idú ládxi'li' bunódzjali'. Buli'nödzej na'a tsca séqui'li'. ¹² Channö ré'ënili' bi unódzjali', Dios runë' bal le runódzjali' tsca naca le dësö queéli'. Biti' rinabë' unódzjaröli' tsca le dësö queéli'.

¹³ Biti' ré'ënda' guna' ga unódzjali' le gácalen ia'zíca'rö bönachi ga idxintë yadzaj queéli'. ¹⁴ Ré'ënda' gaca tuz ca dë queéli', en quegaquië'. Na'a dëda' queéli' le gaca unódzjali' para bi gata' quegaca nupa ni' riyadzaj queguequi. Ní'irö cate' bi yadzaj queéli', légaquië' huáca bi ulu'nódzjë' queéli' para caní gaca tuz ca dë queéli', en quegaquië' yúgu'tëli'. ¹⁵ Lësca' caní nazúaj lu guichi lá'ayi le rnna: "Nu na' butúbida', biti' bugá'ana que, ate' nu na' butubi láti'do'os, biti' biyadzaj que."

Ca runbi' bi'i Tito, enca' nupa dzágagaca lëbi'

¹⁶ ꞑXclenë' Dios, tu' benë' Lë' ga ruí'i ládxi'bi' bi'i Tito libí'ili', ca na' ruí'i ládxa'a neda' libí'ili'! ¹⁷ Calégasö runbi' ca rna xtídza'a bi rinábida'-bi', pero tu' ruí'i ladxi' cázabi' libí'ili', rácasö queébi' gu'unibi' tsöyubi' libí'ili'.

¹⁸ Risól-la'tu'-në' tsözxón len lëbi' bóchi'ru' na' tun lë' bal yúgu'të cö' bönachi queë' Cristo, tu' runë' dxi'a dxin que didza' dxi'a. ¹⁹ Ia'stú, gula'bó yugu' cö' bönachi queë' Cristo bönni' ni, para tséajlenë' tsözxón netu' guá'atu' lë na' runódzjali', para gaca yöl-la' ba queë' Xanru', en gaca bë' ca' ruí'i ládxi'ru' luzá'aru' ta'yéajlë'ë Cristo. ²⁰ Caní gaca, gunë' netu' tsözxón para cuntú nu bi gaca innë' queé'tu', ca rúnlentu' dumí na' runódzjada'ali', le gácalen bönachi yechi'. ²¹ Ruí'i ládxi'tu' guntu' le naca dxi'a, calégasö lahuë' Xanru', pero lësca' lógaca bönachi.

²² Risól-la'tu'-në' ca' ia'túë' bóchi'ru' tsözxón len légaquië', ate' zían luzuí guzxi' bé'ëtu' lë', ate' naca bë' ré'ënë' gácalenë' rë'u idú ládxe'ë. Ia'stú, tu' ruzxöni ládxe'ë libí'ili', ré'ënitëronë' ca' gácalenë' rë'u lu dxin ni. ²³ Channö nu bi inaba ca nácabi' bi'i Tito, nácabi' luzá'a, rúnlenbi' neda' tsözxón dxin para gácalentu' libí'ili'. Channö nu bi inaba ca nácagaquië' ia'zica'rë' bóchi'ru' na', nasól-la'gaca yugu' cö' bönachi queë' Cristo légaquië', ate' tunë' ga gaca yöl-la' ba queë' Cristo. ²⁴ Guli'gún ga gaca bë' nadxi'ili' légaquië' para iléquibe'e yugu' cö' bönachi queë' Cristo runli' caní, en ila'nözi naca idútë li didza' dxi'a ruí'itu' ca naca queé'li'.

9

Ca naca dumí rutúbiru' le gácalen yugu' bóchi'ru'

¹ Ca naca le runódzjali' quégaquië' bóchi'ru' ta'yéajlë'ë Cristo, biti' run bayudxi uzúaja' queé'li' lu guichi ni. ² Chinözda' ca ré'ënili' gunli' lë ni, ate' ruá'a didza' lógaca bönachi ta'yéajlë' Cristo luyú Macedonia ni ca naca le dxi'a runli'. Riguíxjöi'ida' légaquië' ca naca queé'li', zóali' luyú Acaya, chiguca tu iz chizóa gunli' lë ni, ate' tu' ruí'i ládxi'li' gunli' lë ni, bidipa ládxi'gaca lá'tu'biqui' yúgu'të bönachi ni ta'yéajlë' Cristo. ³ Na'a, risól-la'a yugu' bóchi'ru' ni queé'li' para gaca bë' naca idútë li didza' ruí'itu' ca naca queé'li', ate' naca ca na' chigunnía' queé'li', chizóa gunli' lë na' gácalen yugu' luzá'aru'. ⁴ Channö ila'zá'alen bal-la bönachi Macedonia ta'yéajlë' Cristo neda' tsözxón, ate' gaca bë' biti' zuñi gunli' lë na', ní'irö utuí'itu' tu' buzxöni ládxi'tu' libí'ili', ate' libí'i cázali' ca' ral-la' utuí'ili'. ⁵ Que lë ni na' gúquida' ral-la' isól-la'a yugu' bóchi'ru' ni para ila'dxinë' ga zóali' zí'alö ca neda', ate' ilácalenë' libí'ili' para udxí utúbili' lë na' guzxi' lu ná'ali' unódzjali'. Caní gaca, údxí utúbili' dumí na' zí'alö ca idxina', ate' gaca bë' runódzjali' tu' ré'ëni cázali', en calëga tu' rinná bé'etu' libí'ili' bi unódzjali'.

⁶ Guli'tsöjné lë na' rna:

Nu raza ruzóa láti'do'os, láti'do'os ca' uzí'.
Nu raza ruzóa sizxöni, sizxöni ca' uzí'.

⁷ Tu tuli' ral-la' unódzjali' tsca na' chinuzóali' icja ládxi'do'oli', en calëga lu yöl-la' ruhuí'ini queé'li' o tu' run bayudxi, tu' nadxi'inë' Dios nu runódzaj idú ladxi'. ⁸ Dios gaca gúnnadë'ë queé'li' ca riquínili' para gata' queé'li' yúgu'të lë na' riquínili', ate' ugá'ana queé'li' para gaca gácalenli' nu bi riyadzaj que. ⁹ Lësca' caní nazúaj lu guichi lá'ayi le rna: Idú ládxe'ë bunódzjë' quégaca bönachi yechi'.

Naca bé'tica'sö yöl-la' dxi'i ladxi' queë'.

¹⁰ Dios, Nu runna queé'ru' bi gaz uzóaru', enca' bi guí'aj gáguru', gunnë' ca' queé'li' bi unódzjali', le naca ca lë na' nu raza ruzóa, en gunë' ca' ga ila'yán le ilápali' le nácagaca yugu' le dxi'a runli'. ¹¹ Dios gunë' ga gáta'da' queé'li' yöl-la' tsahui' para gaca unódzjada'ali'. Caní gaca, yugu' le unódzjali', lë na' quísitu' uláz queé'li', gun ga ila'nná

bönachi zían: “Xclenë Dios.” ¹² Lë na’ runódzjali’ le gácalen yugu’ bóchi’ru’, calégasö güi’i quégaquië’ le ta’yádzjanë’, pero gun ga ila’nnë’: “Xclenë Dios.” ¹³ Cate’ gunli’ caní, ila’gu’ë Dios yöl-la’ ba tu’ gaca bë’ runli’ ca rnna didza’ dxi’a queë’ Cristo ca na’ rnnali’ runli’. Ila’gu’ë Lë’ yöl-la’ ba ca’, tu’ nácali’ dxi’i ladxi’, runódzjali’ quégaquië’, enca’ quégaca ia’zíca’rö bönachi. ¹⁴ Ulu’lidzë’ Dios, en ila’nábinë’ Lë’ gácalenë’ libí’ili’ tu’ nadxí’iguequinë’ libí’ili’ ni’a que le buzá’ ládxi’dë’ë Dios queéli’. ¹⁵ ¡Xclenë’ Dios, bennë’ tu le nácada’ lesaca’ queéli’!

10

Yöl-la’ unná bë’ dë lu në’ë Pablo

¹ Ta’nná bönachi naca’ nöxaj ladxi’ cate’ zóalena’ libí’ili’, pero cate’ zoa’ zi’tu’ ga zóali’ naca’ rugu ladxi’ ca ruzúaja’ lu guichi. Tu’ náquië’ nöxaj ladxi’, en dxi’i ladxi’ Cristo, neda’, Pablo, ráta’yua’ loli’ ² cabí gunli’ ga gun bayudxi gaca’ rugu ladxi’ len libí’ili’ cate’ idxina’ ga zóali’. Chizóa gaca’ rugu ladxi’ len nupa ni’ ta’nná runtu’ dxin ni lu yöl-la’ bönáchisö queé’tu’. ³ Le nácatë nácatu’ bönachi, pero caléga rácasö queé’tu’ runtu’ xichinë’ Dios. ⁴ Yugu’ le rudí’initu’ lu gudil-la, biti’ nácatu’ ca le tu’dí’ini bönachi yödzülió ni lu gudil-la, pero yugu’ le rudí’initu’ lu gudil-la nápagaca yöl-la’ huáca queë’ Dios, le ruguntu’ dxin para usunítitu’ le nál-lagaca que tu’ xihui’.

⁵ Rusunítitu’ yugu’ didza’ biti’ nácatë le tu’zxöni ládxi’gaca bönachi, en yúgu’të le tun ga tun ba zxön cuínguequi, en le tun ga cabí ilunbë’ Dios. Runtu’ ga gaca ila’nná bé’enë’ yúgu’të le ta’zá’ ládxi’gaquië’, lë na’ tun ga ta’dá’bague’ë Dios, ate’ runtu’ ca’ ga tunë’ ca rnnë’ Cristo. ⁶ Tödi gunli’ le gaca bë’ naca idú ca runli’ ca rnna xtídzë’ë Cristo, sóatu’ sina’ guntu’ xíguia’ yúgu’të nupa ni’ ta’dá’baga’ xtídzë’ë.

⁷ Ruyuli’ le nalá’ láchuisö. Channö réquinë’ nu bönni’ dzáguië’ libí’ili’ néquinë’ queë’ Cristo, ral-la’ guéquite’ enë’ ca’ lë ni: Ca na’ lë’ néquinë’ queë’ Cristo, lësca’ caní netu’ néquitu’ queë’ Cristo. ⁸ Biti’ ca’ rutuí’ida’ sal-la’ gudödi bë’ ben ba zxön cuina’ ca naca yöl-la’ unná bë’ budödë’ Xanru’ lu na’tu’. Lë na’ dë lu na’tu’ naca para guntu’ ga gácarö idú ca réajlë’ëli’ Cristo, en caléga para usunítitu’ libí’ili’. ⁹ Biti’ ré’ënda’ guéquili’ ré’ënda’ gun gádxida’ libí’ili’ ni’a que le ruzúaja’ queéli’ lu guichi ni. ¹⁰ Nacuá’ ni’ nupa ila’nná: “Yugu’ le ruzúajë’ Pablo queéru’ lu guichi, rulidza zí’ë rë’u, en ralë’ didza’, pero cate’ zóalenë’ rë’u runë’ nöxaj ladxi’, en didza’ gúlado’ ru’ë.” ¹¹ Nu na’ ruí’i caní didza’ ral-la’ guéquite’ e lë ni: Ca na’ nácatu’ cate’ bi ruzúajtu’ queéli’ lu guichi tsanni ni sóatu’ zi’tu’ ga zóali’, gácatu’ ca’ lu le guntu’ cate’ ni’ sóalentu’ libí’ili’.

¹² Le nácatë biti’ nácatu’ rugu ladxi’ para innatu’ nácatu’ lëbi ca nácatu’ nupa ni’ tun ba zxön cuínguequi. Nácatu’ nupa ni’ yugu’ bönni’ biti’ bi nózguequinë’. Lu le ta’za’sö ládxi’gaquië’ tu’zöë’ ca ral-la’ ilaca bönachi, en tu’chi’a tu’söröë’ la’ légasasë’ tsca naca lë na’ ta’za’sö ládxi’gaquië’. ¹³ Netu’ biti’ gunrö ba zxön cuintu’ ca ral-la’ guntu’, pero ca nácatë dxin budödë’ Dios lu na’tu’, ate’ lu dxin ni, ral-la’ guntu’ le ga ni’ zóali’ libí’ili’. ¹⁴ Channö budödë’ Dios lu na’tu’ dxin guntu’ ga zóali’, biti’ ca’ gudödi bé’ëtu’ ca bentu’ cate’ bidxintu’ ga zóali’, en bentu’ libán que didza’ dxi’a ga na’ zóali’. ¹⁵ Biti’ run ba zxön cuintu’ ca naca dxin núngaca ia’zíca’rö bönachi, pero ca nácasö dxin na’ budödë’ Dios lu na’tu’. Runtu’ löza gácarö idú ca réajlë’ëli’ Cristo para gaca guntu’ dxin ga zóali’ le nácarö lesaca’, tsca naca le budödë’ Dios lu na’tu’ guntu’. ¹⁶ Ní’irö gaca guntu’ libán que didza’ dxi’a ga nacua’ yödzo dzö’ö zítu’rö ga zóali’. Caní gaca, biti’ gun bayudxi gun ba zxön cuintu’ ni’a que dxin núngaca ia’zíca’rö bönachi, lë na’ budödë’ Dios lu né’eguequi.

¹⁷ Nazúaj lu guichi lá’ayí le rnna:

Nu ré’ëni bi gun zxön,
le ben cazë’ Xanru’ ral-la’ gun zxön.

¹⁸ Nurúajë’ dxi’a tu bönni’ cate’ rnnë’ Xanru’ nurúajë’ dxi’a, en caléga cate’ ru’ë caní didza’ bönni’ na’ que la’ cuinsë’.

11

Ca nácagaquië' Pablo, en bönni' tun cuíngaquië' gubáz queë' Cristo

¹ Ré'ënda' guá' ilenli' neda' tsanni ni gu'a didza' lu yöl-la' biti' bi nözi quia'. Buli'sá' ládxi'li' quia'. ² Ruí'i ládxa'a libí'ili' ca na' Dios caz ruí'i ládxe'ë libí'ili', tu' nácali' ca nácabi' tubi' bi'i nigula ra'bando', naca idú ládxi'bi', rusudxina'-bi' lahuë' Cristo para utsaga ná'alenbi' Lë cazë'. ³ Rádxida' idxín queé'li' nu si' ye'e libí'ili', en gun ga usanli' ca nádxi'ili'-në' Cristo idú ládxi'li', ca na' guca queé'nu Eva, nigula queë' Adán, cate' guzxi' ye'e Satanás tu' xihui' lënu lu yöl-la' sina' que. ⁴ Caní rnnía' tu' idú ládxi'li' ruí'ili' nu za' queé'li' lataj, en run libán que xibá queë' Jesús, le nadzá' ca naca xibá na' bentu' netu' libán que, ate' rizi' lu ná'ali' tu bö', en tu didza' dxi'a le nadzá'gaca ca nácagaca Bö' Lá'ayi na', en didza' dxi'a na' guzxi' lu ná'ali' lu na'tu' netu'. ⁵ Réquida' biti' nácara' cuídi'sö ca nácagaquië' bönni' ni' nácaterögaquië' lo, ate' réquili' nácagaquië' gubáz queë' Cristo. ⁶ Nadxi ca' naca' cuídi'sö ca ruá'a didza', pero biti' naca' cuídi'sö ca naca yöl-la' réajni'i napa'. Zían luzuí, en zían ca buluí'itu' libí'ili' ca naca yöl-la' réajni'i nápatu'.

⁷ Nadxi ca' biti' naca dxi'a tu le bena', biti' bi buquixja' libí'ili' cate' bena' libán ga zóali' que didza' dxi'a. Ben cuina' cá'asö, ate' bena' ga gúcali' libí'ili' zxön. ⁸ Buguna' dxin le nequi quéguequi ia'zica' rö cö' bönachi queë' Cristo, tu' guzxi'a dumí bulu'nödzjé' légaquië' quia' para guca bena' dxin ga zóali' libí'ili'. ⁹ Cate' guzóalena' libí'ili', en biyadzaj quia', biti' busaca' zi'a nituli' libí'ili', pero lë na' biyadzaj quia', gulunnë' quia' bóchi'ru' bila'ruájé' luyú Macedonia, en bila'dxinë' ga zoa'. Catu caz busaca' zi'a libí'ili', ate' la' lébisö ca guna'. ¹⁰ Ni'a que le naca idútë li queë' Cristo le zóalen neda', biti' soa' dxisö, gun ba zxön cuina' ca naca lë ni idú luyú Acaya. ¹¹ ¿Naru' réquitseli' rnnía' caní tu' cabí nádxi'ida' libí'ili'? Nózinë' Dios nádxi'ida' libí'ili'.

¹² Gúntica'sa' ca runa' na'a, para cabí gata' quégaquië' lataj ilún ba zxön cuíngaquië' bönni' ni' ta'nnasë' nácagaquië' gubáz queë' Cristo, en ta'nné' tunë' xichinë' Lë' ca runtu' netu'. ¹³ Biti' ca' nácagaquië' gubáz nasól-lë'ë Cristo. Ta'z' yë'ë ca naca dxin tunë', en tun cuíngacasë' gubáz queë' Cristo. ¹⁴ Biti' ral-la' ubániru' ca tunë' bönni' na'. Lësca' Satanás caz, tu' xihui', ruluí'i cuini ca tu gubáz lá'ayi queë' Dios, ridé' lu bení'. ¹⁵ Que lë ni na' biti' ral-la' ubániru' channö yugu' huen dxin que tu' xihui' na' tu'luí'i cuíngaquië' ca nupa tun xichini Nu na' naca tsahui'. Udxí quégaquië' ca sa'yéaj le tunë'.

Yugu' le gudí'i guzxaquë'ë Pablo

¹⁶ Leyúbölö rea' libí'ili': Cuntu nu ral-la' guequi nachixi icja'. Channö réquili' nachixi icja', guli'güf' neda' lataj gu'a didza' ca tu bönni' nachixi icjé', para gun ba zxön cuina' tu chí'ido'. ¹⁷ Didza' ni ruá'a biti' naca le rinná bë'ë Xanru', pero ruá'a didza' ca tu bönni' nachixi icjé', run ba zxön cuina'. ¹⁸ Nacu'ë zían bönni' tun ba zxön cuíngaquië' ca nácagaca le tunë' lu yöl-la' bönáchisö quégaquië'. Que lë ni na', neda' ca' gun ba zxön cuina'. ¹⁹ Tu' réquili' rácada'ali', idú ládxi'li' ruí'ili' lataj ilu'ë didza' yugu' bönni' nachixi ícjagaquië'. ²⁰ Ruí'ili' ca' lataj nu gun libí'ili' bönni' nadó'ogaca, o nu cúa le dë queé'li', o nu inná be'e libí'ili', o nu ucá'ana libí'ili' cá'asö, o nu capa' rú'ali'. ²¹ Rutuí'ida' rnnía' lë ni: Biti' bentu' caní queé'li' tu' gudödi bë' gúcatu' nöxaj ladxi'.

Channö zoa nu naca rugu ladxi' para gun ba zxön cuini, neda' ca' gaca' rugu ladxi', en gu'a didza' ca tu bönni' nachixi icjé'.

²² ¿Naru' nácagaquië' bönni' hebreo?

Lësca' naca' neda'.

¿Naru' nácagaquië' bönni' Israel?

Lësca' naca' neda'.

¿Naru' nácagaquië' xzí'ini xi'sóë' Abraham?

Lësca' naca' neda'.

²³ ¿Naru' nácagaquië' huen dxin queë' Cristo?

Lësca' nácatera' neda'.

(Na'a ruá'a didza' ca tu bönni' nachixi icjé' cate' rnní'a caní.)

Béntëra' dxin ca gulunë' légaquië'.

Guyu'a lidxi guíë' zianró luzuí ca gula'yu'ë légaquië'.

Gula'zé'eda' neda' yu bönnachi zianró luzuí ca guca quégaquië'.

Guzóa bönadxi gátia' zianró luzuí ca guzóa quégaquië'.

²⁴ Gayu' luzuí yugu' bönni' judío gula'guínë' neda' guídi.

Tu tu luzuí na' gula'guínë' neda' chënna uruá' luzuí.

²⁵ Tsonna luzuí gula'guínë' neda' gubá'ayi.

Tu luzuí bulu'ladxë' neda' guiój.

Tsonna luzuí guzóa' tu lë'e barco le guca ditaj, en bötaj lu nísado'.

Tu luzuí guzóa' idú tu yëla, en tu dza lu nisa que nísado'.

²⁶ Zían luzuí cate' ni' yu'a nöza,

gudöda' gapa guzóa bönadxi quia' yugu' lu yegu,

en gapa guzóa bönadxi quia' lu ná'agaquië' gubán,

en gapa guzóa bönadxi quia' lu ná'agaquië' bönni' uládz quia',

en gapa guzóa bönadxi quia' lu ná'agaquië' bönni' zi'tu',

en gapa guzóa bönadxi quia' lu yödzö,

en gapa guzóa bönadxi quia' lu lataj cá'asö,

en gapa guzóa bönadxi quia' lu nísado',

en gapa guzóa bönadxi quia' lu ná'agaquië' bönni' ta'zí' yë'ë, ta'nnë' nácagaquië'
böchi'ru' ta'yéajlë'ë Cristo.

²⁷ Bena' dxin zi'i, en gudú ládxa'a.

Zían luzuí biti' guta' quia' lataj gásia'.

Guduna', en gubidxa' nisa.

Zían luzuí biti' guta' quia' bi gahua', o ga utsë'e cuina', o lari' gácua'.

²⁸ Ia'stú, yúgu'të dza ruúbi ruguí'ida' tu' ruí'ida' ládxa'a yúgu'të cö' bönnachi queë' Cristo. ²⁹ Cate' nu ricuidi', neda' ca' ricuídi'da'. Cate' nu run ga ichixi iníguiné' tu

böchi'ru', rileda' nu run caní. ³⁰ Channö run bayudxi gun ba zxön cuina', gun ba zxön cuina' ca naca le nácagaca bë' ricuídi'da'. ³¹ ¡Dios, Xuzë' Xanru' Jesucristo, gácatica'sö

queë' yöl-la' ba! ¡Lë' nózinë' ruá'a didza' idútë li! ³² Cate' ni' guzóa' lu yödzö Damasco,

bönni' ni' guta' lu në'ë uláz queë' bönni' rinná bë'ë, lë' Aretas, bucu'ë yugu' bönni'

gula'bó' nísie' para ila'zönë' neda', ³³ pero yugu' böchi'ru' ni' bulu'dödë' neda' tu ga ra'a

bení' que yu'u, yu'a tu ga'böra zxön, en bulu'zötjë' neda' ní'ilö lu zö'ö run chí'i yödzö na'.

Caní guca, bulá' lu ná'agaquië' bönni' ni' gula'bó' nísie' neda'.

12

Yugu' le bulu'inë' Dios Pablo

¹ Le nácate' biti' ral-la' gun ba zxön cuina'. Sal-la' caní naca, na'a gu'a didza' ca nácagaca le bulu'inë' Xanru' neda', en le buzéajni'inë' neda'.

² Núnbë'a-në' tu bönni' réajlë'ë Cristo, chiguca chidá' iz zoa nu guché' lë' yehua' yubá. Biti' nözda' channö guyijë' ni'

lu idútë le naca cazë', o lu bö' naca cazë'. Tuzë' Dios nózinë'. ³ Nözda' guyázië' lataj lachi

queë' Dios, nazí'i le paraíso. Biti' nözda' channö guyijë' ni' lu idútë le naca cazë', o cabí.

Tuzë' Dios nózinë'. ⁴ Tsanni ni' zoë' ga na', biyönnë' le tun ga nu rubani, yugu' le biti' dë

lataj nu gü'i didza' que. ⁵ Bönni' ni huáca guna' lë' zxön, pero biti' gun ba zxön cuina'.

Tuz gun ba zxön cuina' tu' ricuídi'da'. ⁶ La'tu' gué'ënida' gun ba zxön cuina', biti' gaca'

bönni' biti' bi nózinë', channö inní'a le naca idútë li. Na'a, biti' gun ba zxön cuina' tu'

cabí ré'ënda' nu gunró neda' bal tsca le bilé'e bena' neda', o tsca naca didza' biyóni bë'a neda'.

⁷ Ní'irö, para cabí tödi bë' gun ba zxön cuina' tu' bilé'eda' lë na' tun ga nu rubani, Dios buzóë' tu huë' lu xipéla'a le riláda' ca rilá ga riné' tu yötsi'. Huë' na' guca ca tu le

bugún dxin tu' xihui', para busaca' zi' neda'. Caní guca quia' para cabí tödi bë' gun ba zxon cuina'. ⁸ Tsonna luzuí gúta'yua' lahuë' Xanru', en gunábida' Lë' ugúë' xihuë'a na'. ⁹ Xanru' gudxë' neda': "Nácatë quiu' le ruzá ládxa'a quiu'. Uzí'tëru' xibé le ruzá ládxa'a quiu' cate' ricuídi'nu'." Que lë ni na', rudzëjade'eda' tu' ricuídi'da'. Tu' raca caní quia', rácalentëro' yöl-la' huáca queë' Cristo neda'. ¹⁰ Que lë ni na', tu' nadxí'ida'-në' Cristo, rudzëjada' cate' ricuídi'da', en cate' nu rulidza neda' zi', en cate' bi riyadzaj quia', en cate' nu ribía ladxi' neda', en cate' bi raca quia'. Cate' nacuídi'da', nápatëro' caza' yöl-la' huáca queë' Lë'.

Pablo ru'i ládxe'ë bönachi queë' Cristo nacuá' Corinto

¹¹ Naca' tu bönni' biti' bi nózinë' tu' bë'a didza' ca naca le dxi'a bena' neda'. Libí' cázali' benli' bayudxi bena' caní. Libí'ili' ral-la' gunli' neda' bal, ate' sal-la' biti' bi naca' neda', biti' ca' nácara' cuidi' ca nácaquië' bönni' ni' nácada'gaquië' lo, ta'nnë' nácaquië' gubáz queë' Cristo. ¹² Yugu' le bena' lu yöl-la' riböza zxon ladxi' quia' ga ni' zóali' náca gaca bë' naca' gubáz queë' Cristo. Bilé'eli' yugu' le bena', le náca gaca bë', en le tun ga nu rubani, en yugu' yöl-la' huáca zxon que yehua' yubá. ¹³ Tuz le cabí bena' ga zóali' le bena' ga nacuá' ia'zica'rö cö' bönachi queë' Cristo. Biti' busaca' zi'a libí'ili' bi gúnnali' le gu'aj gahua'. Buli'niti lo neda' tu' cabí bena' caní queéli'.

¹⁴ Chizóa guída' ga zóali' le bunni luzuí. Biti' bi inaba' gúnnali' quia'. Ré'ënda' gunna cuin cázali' quia', en calëga bi dë queéli'. Yugu' bi'i hué'ënido', biti' run bayudxi ulu'gágubi' xuz xiná'agacabi'. Xuz xiná'agacabi' na' ral-la' ulu'gahuë' xzí'inigaquië'.

¹⁵ Idú ládxa'a utóa' yúgu'të le dë quia', en udödi cuina' ni'a queéli' para gaca bi uzí'ili' xibé, sal-la' réquida' cate' nadxí'iröda' libí'ili', zeaj ruhuéchi' yöl-la' nadxí'i queéli' neda'.

¹⁶ Nöz quézili' biti' busaca' zi'a libí'ili'. Na'a, bál-lali' innali' guca' sina', ate' len didza' biti' nácatë buzi'a xibali'. ¹⁷ ¿Naru' réquitseli' guzxi' yé'eda' libí'ili' cate' gusól-la'a yugu' gubáz quia' ga zóali'? ¹⁸ Gúta'yua' lobi' bi'i Tito tséajbi' ga zóali', ate' gusól-la'a-në' bóchi'ru' na' tsözxón len lëbi'. ¿Naru' réquitseli' buzi'ibi' xibali' bi'i Tito? ¿Naru' cabí bentu' la' lébisö ca runtu' bi'i Tito, en neda', enca' la' lébisö didza' bé'ëtu'?

¹⁹ ¿Naru' réquitseli' rubéaj cuintu' dxi'a loli' libí'ili'? Lahuë' Dios ruí'itu' didza' uláz queë' Cristo, böchi' luzá'ado', ate' yúgu'të le runtu' náca gaca para gácarö idú yöl-la' réajlë' queéli' Cristo. ²⁰ Rádxida' biti' gácali' ca ré'ënda' gácali' cate' guída' ga zóali', ate' neda' biti' gaca' ca ré'ënili' libí'ili' gaca'. Rádxida' ridil-la' dídza'li', en ruzxé'eli' luzá'ali', en rileli' luzá'ali', en rulidza dítjali' luzá'ali', en rnnëli' que luzá'ali', en run ba zxon cuinli', en rutsátsali'. ²¹ Cate' guída' ga zóali', channö caní raca queéli', rádxida' gunë' Dios ga utuí'ida' ca naca queéli', ate' gun bayudxi cödxá' ni'a quégaca zían nupa ni' gulún dul-la', en biti' bulu'bí' ládxi'gaca ca náca gaca le cabí naca tsahui' gulúngaca, en yugu' le gula'zé ládxi'guequi le cabí naca dxi'a.

13

Pablo ruzéajni'inë' bönachi Corinto, en rugapë' Dios légaquië'

¹ Le bunni luzuí ni guída' ga zóali'. Nazúaj lu guichi lá'ayi le rnna: "Run bayudxi ila'cuá' chopa tsonna nupa ilún ba nalí channö nu bi uzegui luzé'e didza'." ² Chibuzéajni'ida' nupa gulún dul-la' cate' ni' guzóalena' libí'ili' le buropi luzuí, ate' na'a ruzéajni'ida' légaquië' leyúbölö, enca' yúgu'të nupa tun dul-la', sal-la' ni zoa' zi'tu', rnnía': Channö guída' ga zóali' leyúbölö biti' gaca' nöxaj ladxi' para til-la' légaquië'. ³ Rinábali' tu le gaca bë' ruá'a didza' uláz queë' Cristo. Lë na' guna' gaca bë' ruá'a caní didza'. Biti' ca' ricuídi'në' Cristo cate' bi runë' queéli', pero lu yöl-la' huáca zxon queë' runë' bi runë' queéli'. ⁴ Le nácatë gudé'ë lë'e yaga cruz ca nu ricuidi', pero zoë' nabanë' tu' zóalen yöl-la' huáca queë' Dios Lë'. Netu' ca' ricuídi'tu' tsözxón len Lë', pero tu' nácatu' tuz len Lë' nabantu', ate' zóalen netu' yöl-la' huáca queë' Dios bi guntu' ga ni' zóali'.

⁵ Buli'yú cuinli' channö réajlë'ëli' Cristo o cabí. Guli'sí' bë' la' cuínsili'. ¿Naru' cabí nózili' zóalenë' Jesucristo libí'ili' channö le nácatë réajlë'ëli' Lë'? ⁶ Runtu' löza chinóz quézili' le nácatë netu' réajlë'ëtu' Cristo. ⁷ Rulídzatu'-në' Dios rinábitu'-në' gácalenë' libí'ili', para cabí guá'ali' dö', calëga para urúajtu' dxi'a netu', pero para gunli' libí'ili' le naca tsahui' sal-la' guéquili' richixi riníguitu' netu'. ⁸ Biti' ca' gaca tá'baga'tu' le naca idútë li, pero gácasö guntu' ca sa'yéaj le naca idútë li. ⁹ Que lë ni na' rudzëjatu' cate' ricuíditi'tu', ate' libí'ili' ridipa ládxi'li'. Rulídzatica'stu'-në' Dios, rinábitu'-në' gunë' ga gaca idú ca réajlë'ëli' Cristo. ¹⁰ Que lë ni na' ruzúaja' queéli' lu guichi lë ni tsanni ni zoa' zi'tu' ga zóali'. Ní'irö cate' guída' ga zóali' bití' gun bayudxi usaca' zi'a libí'ili', pero uguna' dxin yöl-la' unná bë' nudödë' Xanru' lu na'a, le naca para utipa' ládxi'li', en calëga para usunítia' libí'ili'.

¹¹ Na'a, böchi' luzá'ado', dipa ládxi'li'.

Guli'güí' ládxi'li' gaca idú ca réajlë'ëli' Cristo.

Guli'güí' ládxi'li' ca' lë ni rea' libí'ili'.

Guli'gaca tuz len luzá'ali', en guli'cöza dxí'ado'.

Rinábida'-në' Dios sóalenë' libí'ili'.

Lë' nadxí'inë' rë'u, en runë' ga ribózaru' dxí'ado'.

¹² Guli'gapa Dios luzá'ali', tuli' ia'tuli', en unída'li' luzá'ali'. ¹³ Yúgu'të böchi' luzá'aru' ni tu'gapë' Dios libí'ili'.

¹⁴ Rinábida'-në' Dios gunë' ga gata' queéli' yúgu'tëli' le ruzá' ládxe'ë Xanru' Jesucristo queéru', en idxí'inë' ca' libí'ili', en gunë' ga gácali' tuz len Dios Bö' Lá'ayi. ¡Ca' gaca!

DIDZA' GUSÓL-LĒ'Ē PABLO LUYÚ GALACIA

Ruzúajë' Pablo quégaca bönachi luyú Galacia

¹ Neda', Pablo, naca' gubáz queë' Cristo. Biti' gula'söl-la' bönachi neda'. Jesucristo caz gusól-lë'ë neda', en nunë' Xúziru' Dios tu zxön Lë'. Lë' busubanë' Jesús lu yöl-la' guti. ² Ruzúaja' queéli' lu guichi ni, libí'ili', yugu' cö' bönachi tu'dubi queë' Cristo luyú Galacia. Núnqaquie' yugu' bóchi'ru' ni tu zxön neda'. ³ Rinábida' Xúziru' Dios, enca' Xanru' Jesucristo uzá' ládxe'ë queéli', en gunë' ga soa dxi icja ládxi'do'oli'. ⁴ Jesucristo caz budödi cuinë' lu yöl-la' guti tu' nözi dul-la' nabága'ru' para busólé' rë'u lu le naxihui' raca dza ni zóaru' na'a. Benë' caní tu' naca ca ré'ëni quézinë' Xúziru' Dios. ⁵ ¡Gácatíca'sö queë' Dios yöl-la' ba! ¡Ca' caz!

Tuz naca le rinné dxi'a queë' Jesucristo

⁶ Rubánide'eda' ca runli', rucá'anatëli' Dios. Lë' bulidzë' libí'ili' para guéquili' queë' tu' nözi le ruzá' ládxe'ë Jesucristo queëru', ate' na'a ré'ënili' sí' ladxí' ná'ali' tu le rinné dxi'a izá'a. ⁷ Le nácatë bití' ca' zoa ia'tú le rinné dxi'a pero ruá'a caní didza' tu' nacu'ë bönni' tu'ts'é libí'ili', en té'ënë' ulu'ts'é'ë le rinné dxi'a queë' Cristo. ⁸ Channö zoa nu gun ba nalí que tu le rinné dxi'a le cabí naca tuz ca naca lë na' bentu' ba nalí que loli' libí'ili', rinábida'-në' Dios udxíé' dö' nu na' run caní. Ral-la' udxíé' neda' dö' channö guna' caní, en channö gunë' caní tu gubáz queë' Dios zë'ë yehua' yubá, Dios caz udxíé' ca' lë' dö'. ⁹ Chigunná caza' caní zí'alö, ate' na'a rnní'a' caní leyúbölö: Channö zoa nu gun ba nalí que tu le rinné dxi'a le cabí naca tuz ca naca lë na' chiguzxí' ladxí' ná'ali', rinábida'-në' Dios udxíé' dö' nu na'.

¹⁰ ¡Réquitseli' ré'ënda' cú'uli' neda' yöl-la' zxön cate' ru'a caní didza'? ¡Biti' ca'! Ré'ënda' urúaja' tsahui' lahuë' Dios. ¡Réquili' ré'ënda' uzaca' baládxí'lengaca bönachi neda'? La'tu' ré'ënda' uzaca' baládxí'lengaca bönachi neda', bití' gaca' huen dxin queë' Cristo.

Naca böáquie' Pablo bönni' gubáz queë' Cristo

¹¹ Ral-la' inózili' lë ni, böchi' zána'do'. Le rinné dxi'a na' runa' ba nalí que bití' gulén icja lo ládxi'da'ahuiguequi bönachi. ¹² Cuntu nu bönni' budödë' lu na'a le rinné dxi'a na', en calëga nu bönni' busédinë' neda' le. Jesucristo caz buzéajni'inë' neda' ca naca le rinné dxi'a queë'. ¹³ Chibiyón quézili' ca na' ben caza' neda' zí'atëlö cate' ni' nazí' lu na'a ca tequi le bach Dios bönni' judío. Nózili' ca bena', yenni' gudxía nahua' bönachi queë' Dios ta'yija ladxí' Cristo, en gú'unda' usulu usunítia' léguequi. ¹⁴ Lu le tequi le bach Dios bönni' judío, guyépisëtëra' neda' ca lá'tu'biqui' yúgu'të luzá'a bönni' judío yú'ugaquie' iz ca yu'a neda', tu' guzxi'rö ladxí' na' ca léguequi le bulu'dödë' xuz xtó'oru' loru' ca tun cazë'. ¹⁵ Caní bena' neda', pero tu' náquie' dxi'i ladxí' Dios, guró cazë' neda' zí'atëlö ca gulja', ate' bulidzë' neda' para guna' xichinë'. ¹⁶ Ní'irö, cate' gú'uni quézinë' Dios, benë' ga núnbë'a-në' zxf'inë', en gusól-lë'ë neda' tsöjena' libán que le rinné dxi'a ca naca queë' Lë' lógaca bönachi izá'a. Cate' benë' caní, bití' yödilja' nu naca bönachi nu usedi neda'. ¹⁷ Cabí guyija' yödzö Jerusalén para tsöyúa' nupa ni' nácagaca bönni' gubáz queë' Cristo zí'alö ca neda', pero guyija' luyú Arabia, ate' gudödi ni' böja' yödzö Damasco.

¹⁸ Caní guca, chigudödi tsonna iz cate' ni' guyija' yödzö Jerusalén, yöyúa'-në' Pedro, ate' bugá'analena' lë' idú ca chidá' gubidza. ¹⁹ Tsanni ni' zoa' ni' bití' ca' bilé'eda' ia'turë' bönni' gubáz queë' Cristo, pero tuzë' Jacobo, bönni' bóché'ë Xanru' bilé'eda'. ²⁰ Didza' ni ruzúaja' queéli' lu guichi nácatë. Ní'a queë' Dios bití' ca' rizí' yë'a.

²¹ Gudödi ni' guyija', gudöda' yugu' yödz luyú Siria, en luyú Cilicia. ²² Yugu' dza ni' biti' núnbë'gaquië' neda' bóchi'ru' tu'dubë' queë' Cristo gapa naca luyú Judea. ²³ Gula'nózisiné' lë na' gula'guixjö' quia' ia'zica'rö bönachi, gula'nná: "Bönni' na' gudxa' nahuë' rë'u zí'alö, runë' libán na'a que le reja ládxi'ru', lë na' gú'unë' usulu usunítie'." ²⁴ Caní guca, gula'gu'ë yöl-la' ba Dios tu' nözda' neda'.

2

Bönni' gubáz queë' Cristo guzxi' lu ná'agaquië' Pablo

¹ Cate' chigudödi chidá' iz, guyéajlena' Bernabé, en budxina' yödzö Jerusalén. Guchë'a-bi' Tito, dzágabi' neda'. ² Guyija' ni', en bë'lena' didza' tsölá'alö bönni' ni' yu'u lu ná'agaquië' dxin queë' Cristo, ate' gudíxjöi'ida' légaquië' ca naca libán runa' que le rinné dxi'a lógaca bönachi izá'a. Caní bena' tu' gú'unda' cabí ugá'ana nítisö dxin na' chibena', enca' dxin ni runa' na'a. ³ Sal-la' nácabi' Tito, bi'i luzá'a, bi'i griego, biti' gulunë' bönni' ni ga irugu lu xpéla'bi' lë na' naca bë' bönachi queë' Dios ca tun cazë' bönni' judío. ⁴ Le nácatë gula'cuá' bal-la bönachi ni', nupa ni' ta'zí' yë', ta'ná nácagaca bóchi'ru', ate' gulé'ëni ilún ga irugu lu xpéla'bi' Tito lë na' naca bë'. Yugu' bönni' ni núnagaquië' tu zxön rë'u pero tu'yusë' ca runru' para iléquibe'enë' ca nuláru' lu yöl-la' unná bë' que le rinná bë' xibá queë' Moisés tu' nácaru' tuz len Jesucristo. Gulé'ënë' ilunë' ga huócaru' leyúbölö huen dxin tsaz lu xibá na'. ⁵ Biti' ca' bë'tu' légaquië' lataj. Caní bentu' para gun chí'itu' le nácatë que le rinné dxi'a para gaca uzí'ili' xibé le rinné dxi'a na'.

⁶ Yugu' bönni' ni' réquiru' yu'u lu ná'agaquië' dxin queë' Cristo biti' bi gula'nná be'e neda' le naca cubi, pero biti' ru'i ládxa'a ca nácagaquië'. Dios biti' ruchi'a rusöröë' rë'u ca tu'chi'a tu'sörö bönachi rë'u. ⁷ Biti' bi gula'nná be'e neda' tu' guléquibe'enë' Dios nudödë' lu na'a dxin queë', para tsöjena' libán que le rinné dxi'a lógaca bönachi izá'a, ca na' nudödë' lu në'ë Pedro dxin queë', para gunë' libán que le rinné dxi'a lógaca bönachi judío. ⁸ Len yöl-la' huáca queë', Dios benë' neda' bönni' gubáz queë' para usédida' bönachi izá'a, ca na' benë' Pedro bönni' gubáz queë' para usédinë' bönachi judío.

⁹ Jacobo, en Pedro, en Juan, bönni' ni' réquiru' yu'u lu ná'agaquië' dxin queë' Cristo, guléquibe'enë' Dios nudödë' lu na'a dxin ni. Que lë ni na' guzxi' ladxi' ná'agaquië' neda', enca' Bernabé, ate' bentu' tuz didza' tsöjentu' xichinë' Dios lógaca bönachi izá'a neda', en Bernabé, ate' légaquië' ilunë' xichinë' Dios lógaca bönachi judío. ¹⁰ Gulá'ta'yusë' lotu' tsönetu' gácalentu' bönachi yechi', ate' lë ni naca tu le ru'ítica'sö ládxa'a runa'.

Ca guca cate' Pablo gudíl-lalenë' Pedro lu yödzö Antiquía

¹¹ Cate' bidxinë' Pedro lu yödzö Antioquía, gudíl-lalena' lë didza' tu' lë cazë' guchíxinë' ca benë'. ¹² Caní guca tu' zí'atëlö gudágulenë' tsözxón yugu' bönachi izá'a ni'. Benë' caní ga bila'dxinrë' bal-la bönni' dá'gaquië' Jacobo. Ní'irö gusí lahuë' rubíguië', en bítirö gudágulenë' tsözxón bönachi izá'a na' tu' gúdxinë' bi ilunë' bönni' na' nazí' lu ná'agaquië' ilunë' ga irugu lu xpéla'gaca bönachi izá'a ca rinná bë' xibá queë' Moisés. ¹³ Ní'irö ia'zica'rë' bönni' judío ni' ta'yija ládxe'ë Cristo gulunë' tu zxön Pedro ca runë' lu yöl-la' radxi queë', ate' caní guca ga bidxintë gulunë' ga gúdxinë' ca' Bernabé, ate' lë benë' tu zxön légaquië'. ¹⁴ Cate' bilé'eda' biti' tunë' ca naca le nácatë le rusedi rë'u le rinné dxi'a, gudxa'-në' Pedro lógaca yúgu'të nupa ni' nudúbigaca queë' Cristo, gunnía': "Li' nacu' bönni' judío, pero runu' li' ca túngaca bönachi izá'a, en calëga ca tunë' bönni' judío. ¿Bizx queë' rë'ënu' gunu' ga ilúngaca bönachi izá'a ca tunë' bönni' judío?"

Nulágaca bönachi judío ca na' nulágaca ca' bönachi izá'a

¹⁵ Gudxa' ca' Pedro: "Rë'u ni nácaru' bönni' judío tu' nácagaquië' xuz xiná'aru' judío, en calëga bönachi izá'a, nupa cabí núnbë'gaca Dios. ¹⁶ Nöz quéziru' cuntu nu huóaca tsahui' lahuë' Dios tu' run nu na' tsca rinná bë' xibá queë' Moisés, pero huóaca tsahui' tuzi nu na' reja ladxi' Jesucristo. Lës caní ca' rë'u reja ládxi'ru' Jesucristo para huócaru'

tsahui' lahuë' Dios, en calëga tu' runru' tsca rinná bë' xibá queë' Moisés. Cuntu caz nu huöáca tsahui' lahuë' Dios tu' run tsca rinná bë' xibá queë' Moisés.

¹⁷ 'Na'a, réquiru' nuhuöácaru' tsahui' tu' reja ládxi'ru' Cristo, pero channö naca bë' nácaru' bönni' dul-la' ca nácgaca bönnachi izá'a, ¿innátsaru' runë' Cristo ga runru' dul-la'? ¿Biti' caz! ¹⁸ Channö ru'i ládxa'a uchisa' le chibuquinja', lë ni naca bë' riguitsja' xibá le gunná bë'ë Dios. ¹⁹ Tu' cabí guca uzóa' didza' xibá na' gunná bë'ë Moisés, guca quia' tsca chinátia'. Tu' caní naca, nulá' na'a lu xibá na' para soa' ibana', en guna' ca ré'ënë' Dios. ²⁰ Naca quia' ca chigútilena' tsözxón Cristo lë'e yaga cruz ga na' gútië' Lë'. Que lë ni na' calëga neda' ni zoa' nabana', pero Cristo zoë' nabanë' lu icja ládxi'da'ahua'. Tsca naca zoa' nabana' na'a, naca tu' reja ládxa'a Lë' zxi'inë' Dios, Bönni' na' bidxi'inë' neda', en budödi cuinë' lu yöl-la' guti uláz quia' neda'. ²¹ Biti' ré'ënda' uzóa' tsólá'alö le ruzá' ládxi'ë' queëru' Dios. Channö huáca huóquíë' tsahui' tu' bönni' lahuë' Dios tu' runë' tsca rinná bë' xibá queë' Moisés, ní'irö nítisö gútië' Cristo."

3

Le rinná bë' xibá queë' Moisés, en le reja ládxi'ru' Cristo

¹ Libí'ili', tu' canóz, libí'ili', bönni' Galacia. ¿Nuzxi gulú'utsö libí'ili' nëbi para cabirö uzóali' didza' le nácatë? Gate ga ré' bulu'itu' libí'ili' le sa'yéaj ca gútië' Jesucristo lë'e yaga cruz. ² Gudíxjöi'i neda' lë ni. ¿Bidisóalenë' libí'ili' Dios Bö' lá'ayi tu' benli' ca rinná bë' xibá queë' Moisés o tu' guyija ládxi'li' le rinné dxi'a biyónili'? ³ ¿Nacxi guca nácali' tu' canóz caní? Gusí loli' nácali' bönnachi queë' Dios tu' zóalenë' libí'ili' Dios Bö' lá'ayi. ¿Réquitseli' huáca udxí gunli' ga guéquili' queë' Dios rácasö queé'li'? ⁴ ¿Guca nítisö guca queé'li' yúgu'të lë na' guzxaca' gudí'ili'? ¿Biti' ca' guca caní! ⁵ Cate' Dios risól-lë'ë queé'li' Dios Bö' lá'ayi, en ru'ë libí'ili' lataj gunli' yugu' yöl-la' huáca que yehua' yubá, ¿runë' caní tu' runli' ca rinná bë' xibá queë' Moisés o tu' reja ládxi'li' le rinné dxi'a na' biyónili'?

⁶ Lu guichi lá'ayi rna: Abraham guyija ládxi'ë' Dios, ate' Dios gunné' náquië' bönni' tsahui' tu' guyija ládxi'ë' Lë'. ⁷ Que lë ni na' ral-la' inózili', nupa na' ta'yija ladxi' Dios nácgaca idú zxi'ini xi'sóë' Abraham. ⁸ Lu guichi lá'ayi ru'i didza' zí'atëlö ca gunë' Dios, inné' nácgacquië' tsahui' bönni' izá'a ila'yija ládxi'ë' Lë'. Que lë ni na' Dios gudíxjöi'inë' Abraham zí'atëlö ca naca le rinné dxi'a, gunné': "Lu në'ë Zxi'ini xi'sú' guna' ga gaca dxi'a quégaca bönnachi idutë yödzölió." ⁹ Caní naca, Abraham guyija ládxi'ë' Dios, ate' Dios benë' ga guca dxi'a queë'. Lës caní ca' na'a, Dios runë' ga raca dxi'a quégaca yúgu'të nupa ta'yija ladxi' Lë'.

¹⁰ Nupa na' tu'zxi'ni ladxi' ulu'huöáca tsahui' tu' túngaca ca rinná bë' xibá queë' Moisés, nabága'gaca xíguia'. Caní naca tu' nazúaj lu guichi lá'ayi, le rna: "Yúgu'të nupa na' cabí túngaca idutë ca rinná bë' xibá na' nabága'gaca xíguia'." ¹¹ Na'a, naca bë' cuntu nu huöáca tsahui' lahuë' Dios tu' run nu na' le rinná bë' xibá na', tu' zoa lu guichi lá'ayi le rna: "Nu na' nuhuöáca tsahui' lahuë' Dios soa' ibán tu' reja ladxi' Lë'." ¹² Ca na' nuhuöáca tsahui' lahuë' Dios nu na' reja ladxi' Cristo nadzá' ca naca que nu na' ruzxi'ni ladxi' nuhuöáca tsahui' tu' run ca rinná bë' xibá queë' Moisés. Zoa lu guichi lá'ayi le rna: "Nu na' run idutë ca rinná bë' xibá na' soa' ibán tu' run caní."

¹³ Cristo busölé' rë'u lu le richugu queëru' le rinná bë' xibá na' tu' bë'ë latja nu guchugu queë' uláz queëru'. Caní naca tu' zoa lu guichi lá'ayi le rna: "Narugu quégaca yúgu'të nupa na' dá'gaca lë'e yaga." ¹⁴ Caní guca queë' Cristo para gaca gunë' Dios ca na' guzxi' lu në'ë queë' Abraham, gunë' ga gaca dxi'a quégaca bönnachi izá'a lu në'ë Jesucristo, en para gaca gunë' ga idisóalenë' Dios Bö' lá'ayi rë'u channö uyija ládxi'ru' Lë', ca na' guzxi' lu në'ë Dios gunë'.

Le rinná bë' xibá queë' Moisés, en le guzxi' lu në'ë Dios gunë' queëru'

¹⁵ Na'a, böchi' zána'do', uzúaja' queé'li' tu le rucudzu' didza', tu le raca queé'ru'. Cate' chopa bönni' chiguluné' tuz xtídza' gaquié', en chiguluné' tsutsu didza' na', cuntu nu gaca utsá' didza' na', en cabí gaca nu bi udá' lè'e didza' na'. ¹⁶ Dios guzxi' lu në'ë bi guné' queé' Abraham, en que zxi'ini xi'sóé'. Ga zoa lu guichi lè ni, biti' rna: "Quégaca zxi'ini xi'sú'", le ru'i didza' que zían bönachi, pero rna: "Que zxi'ini xi'sú'." Lè ni ru'i didza' que tuz bönni', Lè' Cristo. ¹⁷ Lè ni na' le ré'ënda' innía': Dios bené' tuz didza' len Abraham, en guzxi' lu në'ë guné' ca na' gunné'. Le nazúaj lu xibá queé' Dios, le bené' Dios tapa gayuá' yu' chi-uruá' iz gudödi ni' cate' gudxé' caní Abraham, biti' gaca ugúa lè na' guzxi' lu në'ë Dios guné', en cabí gaca usulu le. ¹⁸ Na'a, channö ral-la' gunru' ca rinná bē' xibá na' para sí'iru' le guzxi' lu në'ë Dios gunsé', bíti'rö naca tu le guzxi' lu ná'asé' guné'. Dios runsé' caní tu' caní guzxi' lu në'ë bi guné' queé' Abraham.

¹⁹ Channö caní naca, ¿bizx queé' gunná bē'ë Dios xibá na' nazúajgaca lu didza' queé'? Dios gunná bē'ë caní para gaca bē' xíguia' nabága'ru', pero gúcasö caní ga bidxinté dza na' bilá' lahué' zxi'ini xi'sóé' Abraham na', Bönni' na' guzxi' lu në'ë Dios guné' queé' lè na'. Yugu' le gunná bē'ë Dios lu xibá queé', gusól-lè'ë yödzölió ni lu ná'agaquié' gubáz lá'ayi queé', ate' Moisés budödé' didza' ca nácagaca xibá na'. ²⁰ Biti' naquín nu udödi didza' cate' naca tuz nu run tuz didza', ate' Dios, tuz náquié'.

Bizx queé' gunná bē'ë Dios le zóagaca lu xibá queé'

²¹ Le nazúajgaca lu xibá queé' Dios, ¿ta'dá' gaca lè na' guzxi' lu në'ë Dios guné'? ¿Biti' ca! La'tu' gunná bē'ë Dios tu xibá le gaca gun ga sóaru' ibanru' tsaz, ní'irö huáca huóácaru' tsahui' lahué' Dios channö gunru' ca na' rinná bē' xibá na'. ²² Tsca naca lè na' nazúaj lu guichi lá'ayi, yúgu'tèru' nabága'ru' dul-la'. Caní naca para gaca sí'iru' lè na' guzxi' lu në'ë Dios gata' queé'ru' cate' tseja ládxi'ru' Jesucristo.

²³ Zí'atèlö ga bidxín dza gaca tseja ládxi'ru' Cristo, le rna xibá na' gunná be'e rē'u, ca na' zoa le rinná be'e tu bönni' yu'ë lidxi guíé. Caní guca ga bidxinté dza bilá' lahui gaca huóácaru' tsahui' channö uyija ládxi'ru' Lè'. ²⁴ Caní naca, le nazúaj lu xibá queé' Dios gunná be'e rē'u, lè na' busesi rē'u ca tu bönni' usedi ga bidxinté dza bilá' lahué' Jesucristo, para gaca huóácaru' tsahui' lahué' Dios channö uyija ládxi'ru' Lè'. ²⁵ Na'a, tu' bidxín dza gaca huóácaru' tsahui' channö uyija ládxi'ru' Cristo, bíti'rö inná be'e rē'u lè na' busesi rē'u.

²⁶ Yúgu'tèli' nácali' bi'i queé' cazé' Dios tu reja ládxi'li'-nē' Jesucristo, en chinácali' tuz len Lè'. ²⁷ Yúgu'té nupa nadílagaca nisa para huóácagaca tuz len Jesucristo, nuhuóácagaca ca náquié' Lè' cazé'. ²⁸ Bíti'rö narúaj choplö bönni' judío, en bönni' izá'a, en cabí narúaj choplö bönni' náquié' tsaz huen dxin, en bönni' nazán, en cabí narúaj choplö bönni', en nigula, tu' cate' böácali' tuz len Jesucristo, yúgu'tèli' böácali' ca' tuz len luzá'ali' tuli' ia'tuli'. ²⁹ Na'a, channö néquili' queé' Cristo, nácali' ca' zxi'ini xi'sóé' Abraham, ate' nazí'ili' lè na' guzxi' lu në'ë Dios gunné' queé' Abraham.

4

¹ Lè ni le ré'ënda' innía': Tsanni ni ribózábi' tu bi'i' bönni'do' sí'ibi' bi ral-la' gunné' xúzibi' queé'bi', ni' nácabi' bí'ido', en biti' nayépisètèröbi' ca raca que tu nu naca tsaz huen dxin, sal-la' le nácate' nequi queé'bi' yúgu'té. ² Tsanni ni' nácabi' bí'ido', nacuá' nupa tun chi'i' lébi', en tu'gún dxin le nequi queé'bi' ga idxinté dza chinuzóé' xúzibi' queé'bi'. ³ Lès caní raca ca' queé'ru'. Tsanni ni' gúcaru' ca bí'ido', gunná be'e xibá na' rē'u ca raca quégaca bönachi yödzölió ni. ⁴ Cate' bizá'a dza, Dios gusól-lè'ë zxi'ini cazé' ni. Gúquié' zxi'ininu tu nigula ca nácaru' rē'u, en gunná be'e le zoa lu xibá quégaca bönni' judío Lè'. ⁵ Caní guca queé' para guca busölé' nupa na' rinná be'e le zoa lu xibá léguequi, para gaca huóácaru' bi'i queé' Dios.

⁶ Para gaca bē' chinácali' bi'i queé' cazé', Dios guchizé' Dios Bö' lá'ayi ládxi'do'oli', ate' Lè' cazé' rulidzè' Dios uláz queé'li', rnné': "Xuza'." ⁷ Caní naca, chinácali' bi'i queé' Dios,

en bíti'rö nácali' ca yugu' bönni' tsaz nácaquië' huen dxin. Na'a, tu' nácali' bi'i queë cazë' Dios, Lë cazë' nazi' ladxi' në'ë guequi queéli' le nequi queë' tu' nácali' tuz len Cristo.

Pablo ru'i ládxë'ë bönni' Galacia ta'yija ládxë'ë Cristo

⁸ Cate' ni' biti' núnbë'ëli'-në' Dios, gúcali' ca yugu' bönni', tsaz nácaquië' huen dxin, en benli' dxin quégaca budó' néquini. Biti' ca' nácaquië' budó' na' Dios. ⁹ Na'a, tu' núnbë'ëli'-në' Dios, o huáca innaru': Tu' núnbë'ë Dios libí'ili', ¿bizx queë ré'ënili' ubí'ili' yugu' lu xibá cané na' cabí nu uzí' xibé? ¿Ré'ënili' huócali' huen dxin tsaz, en gunli' ca rinná bë' xibá na'? ¹⁰ Rápali' tu ia'tú dza, enca' tu ia'tú beo', enca' tu ia'tú cusu na, en tu ia'tú iz. ¹¹ Rádxida' bi gaca queéli'. ¿Naru' nuhuóaca nítisö dxin bena' para gúnbë'ëli' le nácatë? ¹² Ráta'yua' loli', böchi' zána'do', gácali' ca naca' neda', nulá' na'a lu na' xibá benë' Moisés. Caní ral-la' gácali' tu' böaca' neda' ca gúcali' libí'ili'. Biti' bi le cabí naca dxi'a benli' quia' neda'.

¹³ Chinóz quézili' bizx queë na' gusí lahua' runa' libán loli' que le rinné dxi'a. Bena' libán ni' tu' güí'ida'. ¹⁴ Biti' bucá'anali' neda' cané, en cabí buzóali' neda' tsölá'alö sal-la' bigútili' ca guca yödzöhué' quia' na'. Benli' neda' bal, tuz ca gunli' bal tu gubáz lá'ayi queë' Dios, o ca runli' bal Jesucristo caz. ¹⁵ Budzëjalë'ëli' dza ni'. ¿Bizxi guca queéli' tu' cabirö raca caní? Lë ni gaca innía' ca guca queéli': La'tu' huáca gunli', bubéajli' guió'j lo quézili', le gúnnali' quia'. ¹⁶ Na'a, ¿réquili' nuhuóaca' tu nu riléde'e libí'ili' tu' gudxa' libí'ili' le nácatë?

¹⁷ Bönni' ni' tu' tsé'ë libí'ili' tu'i ládxë'ë libí'ili', pero calëga para gaca dxi'a queéli'. Té'ënë' ilunë' ga ucá'anali' netu' para güf'i ládxi'li' légaquië'. ¹⁸ Na'a, naca dxi'a zoa nu ru'i ladxi' libí'ili', pero tuz channö naca para gaca dxi'a queéli'. Caní ru'ítica'sö ládxa'a libí'ili', en calégasö cate' ni' zóalena' libí'ili'. ¹⁹ Libí'ili', xzí'ina'do'. Ca na' raca queënu nigula chizóa sóabi' bí'ido' queënu, riguí' rizáca'nu, lës caní riguí' rizáca'a neda' ni'a queéli' leyúbölö ga idxinrö dza gácali' idú ca náquië' Cristo. ²⁰ Nácaru la' zóalena' libí'ili' na'a para gaca güí'ilena' libí'ili' didza' nadzá'alö, tu' ruúbi ruguí'ilë'ëda' ni'a queéli'.

Le rucudzu' didza' ca guca quégacanu Agar en Sara

²¹ Na'a, libí'ili', nuli' ré'ënili' uzóa cuinli' lu xibá queë' Moisés, guli'ná'tsöca' didza' ni gu'a. ¿Catu caz buzé nágali' le rnna xibá na'? ²² Rnna xibá na' caní: gula'cuá'abi' chópabi' bi'i bönni'do' queë' Abraham. Tubi' gúcabi' xzí'ininu tu nigula tsaz nácanu huen dxin, atë' ia'tubi' gúcabi' xzí'ininu nigula nazannu. ²³ Xzí'ininu nigula huen dxin na' gúlajbi' lu ni'a lu na' tu bönni' tsca tálajbi' yúgu'të bí'ido', pero xzí'ininu nigula nazannu na' gúlajbi' tu' guxzí' lu në'ë Dios gunë' ga gálajbi'. ²⁴ Lë ni naca ca tu le rucudzu' didza'. Ca guca quégacanu chópanu nigula ni sa'yéaj ca naca chopá didza' Dios bënlenë' bönachi. Tu didza' na' naca le buzóë' Dios lu guí'a Sinaí, le sa'yéaj lë na' guca queënu Agar. Nupa na' rinná be'e xibá na' léguequi, nácaquië' ca xzí'ininu Agar, en nácaquië' ca huen dxin tsaz lu xibá na'. ²⁵ Le gúcanu Agar na' sa'yéaj ca' ca naca guí'a Sinaí na' le zoa luyú Arabia, en sa'yéaj ca' ca naca yödzö Jerusalén na'a dza, tu' naca yödzö na' ca tu bönni' tsaz náquië' huen dxin tsözxón len nupa nacua' lu yödzö na'. ²⁶ Jerusalén na' zoa yehua' yubá nazán, atë' ré'u ni nácaru' bönachi uládz que yödzö ni'. ²⁷ Nazúaj lu guichi lá'ayi le rnna: Budzeja, nigula huödx, cabí nacua' xzí'inu'.

Lu yöl-la' rudzeja quiu' guródx'i'a,
sal-la' catu caz quiu' le riguí' rizáca'nu nigula
chizóa sóabi' bí'ido' queënu.

Budzeja tu' sal-la' nusán né'eguequi bönachi li',
gunë' Dios ga ila'yántërö xzí'inu'
ca bi'i queënu nigula zóalennu bönni' queënu.

²⁸ Libí'ili', böchi' zána'do', rë'u ni nácaru' ca gúcabi' Isaac, zxi'inë' Abraham. Nácaru' ca yugu' zxi'ini xi'sóe' Abraham, guzxi' lu në'ë Dios gata' queë'. ²⁹ Dza ni', bi'i na' gúlajbi' ca tálajbi' yúgu'të bí'ido', gudxía ná'abi' bi'i na' gúlajbi' tu' nözi yöl-la' huáca queë' Dios Bö' lá'ayi. Lës caní raca ca' queéru' na'a, ta'bía no bönachi yödzölió ni rë'u. ³⁰ ¿Bizxi' rna le zoa lu guichi lá'ayi? Caní rna: "Gurú'una-nu nigula na' tsaz nácanu huen dxin tsözxón len zxi'ininu, tu' biti' gaca zxi'ininu nigula na' sí'ibi' tsözxón zxi'ininu nigula nazannu le guzxi' lu në'ë Dios guequi queébi' zxi'ininu nigula nazannu na'." ³¹ Caní naca, böchi' zána'do'. Biti' nácaru' ca nácabi' zxi'ininu nigula na', tsaz gúcanu huen dxin, pero nácaru' ca zxi'ininu nigula nazannu na'.

5

Guli'gún chi'i cuinli', ugá'anali' lu yöl-la' nazán

¹ Chinazanru' tu' busané' Cristo rë'u. Guli'sóa tsutsu channö, ugá'anali' lu yöl-la' nazán na'. Biti' uzóa cuinli' leyúbölö lu xibá queë' Moisés para cabí gácali' ca tu bönni', tsaz náquië' huen dxin.

² Buli'zé nágali' neda'. Neda', Pablo, rea' libí'ili', channö ru'ili' lataj nu ichugu lu xpéla'li' ca rinná bë' xibá na', biti' ca' uzí'ili' xibé le benë' Cristo. ³ Leyúbölö ré'ënda' gufa' núti'tës bönni' ru'ë lataj nu ichugu lu xpélë'ë caní, run bayudxi gunë' idutë ca le rinná bë' xibá queë' Moisés. ⁴ Nuli' réquili' huóacali' tsahui' lahuë' Dios tu' runli' ca rinná bë' xibá na', chibulá'alenli'-në' Cristo. Chibusán ná'ali' le ruzá' ládxe'ë Dios queéru'. ⁵ Rë'u ni ruzxöni ládxi'ru' huóacaru' tsahui' lahuë' Dios ni'a que yöl-la' huáca queë' Dios Bö' lá'ayi tu' reja ládxi'ru' Cristo. ⁶ Channö nácaru' tuz len Jesucristo, biti' bi run channö narugu lu xpéla'ru' ca rinná bë' xibá na' o channö cabí narugu caní lu xpéla'ru'. Le run bayudxi naca tseja ládxi'ru' Cristo, le run ga idxí'iru' luzá'aru'.

⁷ Dxí'ado' guca ca gusí loli' runli' dza ni'. ¿Nuzxi ben ga bucá'anali' le nácatë? ⁸ Biti' benë' Dios, Bönni' rulidzë' libí'ili', ga benli' caní. ⁹ Biti' gal-la ládxi'li' lë na' rna: "Látí'sö cúa zi que yöta xtila ruhuóázx idutë cúa ga nayú'u cúa zi na'." ¹⁰ Tu' nácaru' tuz len Xanru', runa' löza ca naca queéli', sa' ládxi'li' tuz ca rizá' ládxa'a neda', ate' Dios gun zi'ë bönni' na' rutsé'ë libí'ili', núti'tës nu naca bönni' na'.

¹¹ Ca naca quia' neda', böchi' zána'do', nacua' nupa ta'nná rusédida' bönachi ral-la' irugu lu xpéla'guequi ca rinná bë' xibá queë' Moisés. Channö runa' caní, ¿bizx queë' ta'bía nahuë' bönni' judío neda'? La'tu' rusédida' caní, cuntu nu ilé neda' tu' runa' libán ca gútië' Cristo lë'e yaga cruz. ¹² Ca naca que nupa ni' tu'tsá' libí'ili', té'ëni irugu lu xpéla'li' lë na', nácöru la' ila'chugu tsaz cúnguequi.

¹³ Ca naca queéli', böchi' zána'do', Dios bulidzë' libí'ili' para gácali' bönachi nazángaca. Biti' ugunli' dxin yöl-la' nazán na' para gunli' ca rizësö ládxi'li', pero para gunli' dxin que luzá'ali', tuli' ia'tuli', tu' nadxí'ili' luzá'ali'. ¹⁴ Yúgu'të le rinná bë' xibá queë' Dios rusudxín nu na' run ca rinná bë' xibá na' rna: "Ral-la' idxí'inu' luzó'o ca nadxí'i cuinu'." ¹⁵ Channö rizí' quídza'li' luzá'ali' tuli' ia'tuli', runli' ca tunba' böa' gu'a sínía', táguya'aba', en táguba' luzá'aba'. Buli'yú tsate' usulu usunítili' luzá'ali' tuli' ia'tuli'.

Le runru' lu yöl-la' bönáchisö queéru', en le runru' len yöl-la' huáca queë' Dios Bö' lá'ayi

¹⁶ Lë ni na' rea' libí'ili': Guli'güf' latja inná bé'enë' libí'ili' Dios Bö' lá'ayi, ate' ní'irö bíti'rö gunli' ca rizësö ládxi'li' lu yöl-la' bönáchisö queéli'. ¹⁷ Yugu' le rizé ládxi'ru gunru' lu yöl-la' bönáchisö queéru' biti' röjlöz le ré'ënë' Dios Bö' lá'ayi gunru', ate' lë na' ré'ënë' Dios Bö' lá'ayi biti' röjlöz le ré'ëni'ru' gunru' lu yöl-la' bönáchisö queéru'. Chopa ni, biti' röjlözgaca, en que lë ni na' biti' gaca gunli' ca ré'ëni' quézili'. ¹⁸ Channö ru'ili' lataj inná bé'enë' Dios Bö' lá'ayi libí'ili', bíti'rö inná be'e xibá queë' Moisés libí'ili'.

¹⁹ Naca bë' le tun bönachi lu yöl-la' bönáchisö quéguequi. Tun dul-la' le riguitsaj xibá que yöl-la' nutsaga na', enca' dul-la' le lë'ë.

Tun yugu' le naxihui', en yugu' le catsahui'.

²⁰ Téquiguequi le bach budó' néquiniguequi.

Tun yöl-la' gudzá'.

Tu'dí'i luzé'eguequi, en ta'díl-lalen léguequi.

Tu'zxé'e luzé'eguequi, en ta'lé nupa na', en tu'huídi'.

Ta'rúaj choplö, en tu'béaj tsölá'alö nupa dá'gaca léguequi.

²¹ Ta'zé ladxi' le dë que luzé'eguequi, en ta'guilaj xíguia'.

Ta'zudxi, en tagu lë'e.

Tu'dödi bë' ca túnguequi.

Le zían le caní túnguequi. Neda' ruxösa' ládxi'li' na'a para cabí gunli' caní ca na' buxösa' ládxi'li' zí'alö, rnnía': Nupa túngaca caní bití' ca' ila'deli' ila'yú'u ga na' rinná bë'ë Dios.

²² Channö zóalen Dios Bö' lá'ayi rë'u runru' caní:

Nadxí'iru' luzá'aru'.

Rudzeja ládxi'ru'.

Zoa dxi ládxi'do'oru'.

Ribózarú' zxön ladxi'.

Ruí'i ládxi'ru' luzá'aru'.

Nácaru' dxi'i ladxi'.

Rusudxinru' xtídzaru'.

²³ Nácaru' nöxaj ladxi'.

Rinná be'e cuinru'.

Bití' ca' gunná bë'ë Moisés rë'u para cabí gunru' yugu' le caní. ²⁴ Nupa néquiguequi queë' Cristo bíti'rö tun ca té'ëni quez, en cabí tun le ta'zësö ladxi' lu yöl-la' bönáchisö quéguequi. ²⁵ Dios Bö' lá'ayi runné' yöl-la' na'bán queéru'. Lë' cazë' ral-la' inná bé'enë' rë'u ca naca yúgu'të le runru'.

²⁶ Bití' ral-la' gun ba zxön cuinru', en cabí utsá'aru' luzá'aru', en cabí uzxé'eru' luzá'aru' turu' ia'turu'.

6

Ral-la' gácalenru' luzá'aru' turu' ia'turu'

¹ Na'a, böchi' zána'do', channö ilé'eli' runë' dul-la' tu bönni' böchi'li', nuli' zóalenë' Dios Bö' lá'ayi libí'ili', ral-la' gunli' ga ubí'i ládxi'ë bönni' na', pero run bayudxi gunli' caní lu yöl-la' nöxaj ladxi' queéli', en uyú cuinli' tsate' cu'u tu' xihui' libí'ili' nöza dul-la'.

² Guli'gácalen luzá'ali' tuli' ia'tuli' tsca naca yuá' nabága'li'. Channö gunli' caní uzóali' didza' le gunná bé'enë' Cristo rë'u.

³ Channö zoa nu réqui chinadeli' yöl-la' nayépisë, en bití' bi nadeli' nu na', nu ni na' rizí' ye'e la' cuinsi. ⁴ Tuhuéaj tuhuéajë' bönni' ral-la' uchi'a usöröö' que le runë'. Ní'irö channö urúajë' dxi'a, huáca gun ba zxön cuinë' ni'a que le chinunë', en bití' gun bayudxi uyúë' ca núngaca ia'zíca'rö bönachi channö ba benrë' dxi'a o cabí. ⁵ Tuhuéaj tuhuéajë' bönni' ral-la' gu'ë le nusubáguë'ë Dios lë'.

⁶ Channö zoa nu rusedi libí'ili' ca naca le rinné dxi'a, ral-la' unódzjali' nu na' rusedi libí'ili' lati' que yúgu'të le do' dë queéli'.

⁷ Bití' si' ye'e cuinli' tu' cuntú nu gaca si' ye'e Dios. Ulápali' tsca naca le rázali'. ⁸ Channö le rázali' naca yugu' le runli' ca rizësö ládxi'li' lu yöl-la' bönáchisö queéli', le ulápali' gaca yöl-la' guti. Channö le rázali' naca yugu' le runli' ca raza ládxi'ë Dios Bö' Lá'ayi, ulápali' le gunné' Dios Bö' lá'ayi queéli', le naca yöl-la' na'bán idú. ⁹ Caní naca, bití' ral-la' huöa ládxi'ru' gunru' le naca dxi'a, tu' channö cabí huöa ládxi'ru', idxín dza uláparu'. ¹⁰ Que lë ni na', bátati'tës gata' queéru' lataj, ral-la' gunru' le naca dxi'a quégaca yúgu'të bönachi, en le naca lo, ral-la' gunru' caní quégaca böchi' zanru' ta'yija ladxi' Cristo.

Le buzúajë' Pablo lu guichi ga ruúdx

¹¹ Buli'yú cate' bach didza' ni ruzúaja' lu guichi len na' cuina'. ¹² Nupa na' té'ëni ilún ga irugu lu xpéla'li' ca rinná bë' xibá queë' Moisés, túngaca caní para ulu'ruáj dxi'a lógaca bönachi, en cabí bi ilún quéguequi tu' túngaca libán ca gútië' Cristo lë'e yaga cruz. ¹³ Yugu' bönni' na' ta'zí' lu ná'agaquië' le narugu lu xpéla'gaquië' ca rinná bë' xibá queë' Moisés, biti' tu'zöë' didza' idutë ca rnna xibá na'. Té'ëné' ilunë' ga irugu lu xpéla'li' para gaca ilún ba zxön cuíngaquië' tu' ta'nná bé'enë' libí'ili' para irugu lu xpéla'li' caní. ¹⁴ Ca naca quia' neda', cú'usa' yöl-la' ba le benë' Xanru' Jesucristo cate' gútië' lë'e yaga cruz. Tu' nözi le benë' Cristo lë'e yaga cruz, yugu' le dë yödzölió ni naca quia' ca tu le chinati, biti' ru'i ládxa'a le, ate' neda' naca' quégaca bönachi yödzölió ni ca tu bönni' nati, biti' tu'i ládxi' neda'. ¹⁵ Channö nácaru' tuz len Jesucristo, biti' bi run channö narugu lu xpéla'ru' ca rinná bë' xibá na' o channö cabí narugu lu xpéla'ru' caní. Le run bayudxi naca gácaru' bönachi cubi niu' lë'e ládxi'do'oru'. ¹⁶ Yúgu'të bönni' na' tunë' ca rinná bë' xibá runa' ni, en yúgu'të bönni' na' néquiguequinë' queë' Dios, rinábida'-në' Dios gunë' ga soa dxi ládxi'do'gaquië', en huéchi' ládxe'ë légaquië'.

¹⁷ Na'a zë lo, cuntú nu bönni' ral-la' utsé'ë neda', tu' nácagaca bë' butsóa zóagaca lu xpéla'a naca' huen dxin queë' Xanru' Jesús.

¹⁸ Na'a, böchi' zána'do', rinábida'-në' Xanru' Jesucristo uzá' ládxe'ë queéli' yúgu'tëli'. Ca' caz.

DIDZA' GUSÓL-LĚ'Ě PABLO YÖDZÖ ÉFESO

Pablo rugapë' Dios bönachi queë' Cristo nacua' Éfeso

¹ Neda', Pablo, naca' gubáz nasól-lě'ě Jesucristo tu' gú'uni quézině' Dios gaca' caní. Rugapa' Dios libí'ili', zóali' Éfeso. Néquili' quez queë' Dios, en réajlě'ěli' Jesucristo. ² Rinábida'-ně' Xúziru' Dios, enca' Xanru' Jesucristo uzá lădxě'ě queéli', en guně' ga soa dxi icja lădxi'do'oli'.

Le naca queë' Dios Bō' Lá'ayi rata' queéru'

³ ¡Ral-la' cú'uru'-ně' yöl-la' ba Dios, Xuzě' Xanru' Jesucristo! Tu' nácaru' tuz len Cristo, Dios chibuzá' lădxě'ě queéru' yúgu'tě le naca dxi'a que yehua' yubá, le runě' Dios Bō' Lá'ayi ga rata' queéru'. ⁴ Zí'atělō ca beně' Dios yōdzōlió ni, guró cazě' rě'u para guéquiru' quez queë' tsōzxón len Cristo, en gácaru' bönachi lá'ayi queë', en gácaru' idú dxi'a lahuě' Lě'. ⁵ Dios bucözě' zí'atělō si' lu ně'ě rě'u ca zxi'ini cazě' tsōzxón len Jesucristo, tu' guyaza lădxě'ě gaca caní, en tu' naca le gú'uni quézině' guně'. ⁶ ¡Ral-la' cú'utica'siru'-ně' Dios yöl-la' ba ni'a que le buzá' lădxě'ě queéru', yugu' le bėnnasě' queéru' tu' nácaru' tuz len Zxi'ině', Nu na' nadxi'ině'! ⁷ ¡Cristo bōá'uě' rě'u cate' ni' gútiě' uláz queéru' para gaca uniti lahuě' Dios rě'u ca naca dul-la' nabága'ru'! ¡Zxóntěrō naca le buzá' lădxě'ě Dios queéru', ⁸ lě na' rúnnadě'ě Lě' queéru'! ¡Lu yöl-la' rácada' queë', en lu yöl-la' réajni'i queë' ⁹ beně' Dios le bucözě' queéru', ate' buluí'ině' rě'u lě na' bigachi', le buzóa cazě' zí'atělō usudxině' lu ně'ě Cristo! ¹⁰ Lě na' buzóa cazě' Dios usudxině' cate' izá'a dza, naca guně' ga ilaca tuz, en ila'cuá' lu ně'ě Cristo yúgu'tě le dē, le nacua' yehua' yubá, en le nacua' yōdzōlió ni.

¹¹ Tu' nácaru' tuz len Cristo, Dios guró cazě' rě'u zí'atělō para guequi queéru' le nequi queë' Xúziru' Dios, lě na' bucözě' queéru' ca naca le gú'uni quézině' Dios, Nu run yúgu'tě ca ré'eni quézině' Lě'. ¹² Caní beně' Dios para cú'uru'-ně' yöl-la' ba ca naca yöl-la' zxón queë', rě'u ni ruzxōni lădxi'ru'-ně' Cristo zí'atělō ca ia'zica'rō bönachi. ¹³ Lěsca' caní guca queéli'. Cate' biyónili' didza' idútě li, didza' dxi'a ca gaca uláru', guyéajlě'ěli' Cristo, ate' Dios buzóe' queéli' le naca bē' nácali' queë', tu' guchíziě' icja lădxi'do'oli' Dios Bō' Lá'ayi, Nu na' guzxi' lu ně'ě Dios isól-lě'ě queéru'. ¹⁴ Tu' zóaleně' Dios Bō' Lá'ayi rě'u, naca löza guequi queéru' le nequi queë' Xúziru' Dios cate' údxi huóá'uě' rě'u, rě'u na' chinéquiru' queë'. Caní naca para gaca yöl-la' ba que yöl-la' zxón queë'.

Pablo rinábině' Dios gunně' queéru' yöl-la' réajni'i

¹⁵ Que lě ni na', cate' biyōnda' ca réajlě'ěli'-ně' Xanru' Jesús, en ca nadxi'ili' yúgu'tě bönachi queë' Dios, ga ridxintě na'a dza ¹⁶ bití' ca' rusana' rea'-ně' Dios: "Xclenu", ca naca queéli'. Rōjneda' libí'ili' cate' rulidza'-ně' Dios. ¹⁷ Rinábida'-ně' Dios queë' Xanru' Jesucristo, Dios na' náquiě' Xúziru' nayépisětěre', rinábida'-ně' isól-lě'ě Dios Bō' Lá'ayi queéli', Bō' na' runna yöl-la' réajni'i queéru', en rulu'i rě'u ca naca cazě' Dios, para gaca idú ca núnbě'ěru'-ně'. ¹⁸ Rinábida'-ně' Dios uzéajni'ině' libí'ili' lu icja lădxi'do'oli' para gaca inózili' ca naca le runru' löza, lě na' bulidzě' libí'ili' para uzí'ili' xibé, en para inózili' ca naca yöl-la' tsahui' que yehua' yubá, le guequi quégaca nupa néquiquequi queë' Dios, ¹⁹ enca' para inózili' cate' zxón naca yöl-la' huáca queë', le rácalen rě'u ni réajlě'ěru' Lě'. Yöl-la' huáca zxón ni naca la' lěbisō na' bulu'e lahui Dios ²⁰ cate' ni' busubaně' Cristo lu yöl-la' guti, en beně' ga gurō'ě cuita lě'ě Lě cazě' ga nayépisětěre' ni' yehua' yubá. ²¹ Rinná bé'eně' nupa ni' ta'nná bē', en nupa ni' dē lu né'eguequi, en nupa ni' nadéli'gaca yöl-la' huáca, en nupa ni' nácgaca xan. Cristo nayépisětěre' ca yúgu'tě nupa nadéli'gaca

yöl-la' unná bë' yödzölió ni, en lu yödzölió si' za'. ²² Dios budödë' lu në'ë Cristo yúgu'të le dë para inná bé'enë' le, en buzóë' Lë' quégaca bönachi queë' para gáquië' Xanru' lu yúgu'të le nequi queëru'. ²³ Yugu' bönachi queë' Cristo nácagaca ca idútë le naca cazë', ate' raquië' Lë' idú lu le naca cazë' na'. Run cazë' Lë' ga raca idú yúgu'të le dë.

2

Nuláru' tu' nadxí'inë' Dios rë'u

¹ Dios chibennë' yöl-la' na'bán idú queéli', sal-la' gúcali' zí'atëlö ca bönni' nátigaca tu' nözi dul-la' nabága'li', en ni'a que dö' biá'ali'. ² Dza ni' benli' lébisö ca tun bönachi biti' nácagaca tsahui' nacuá' yödzölió ni, en benli' ca gú'uni tu' xihui', nu rinná bë' lu bö'ös, en rugún dxin nupa biti' túngaca ca rnna xtídzë'ë Dios. ³ Lësca' caní gúcaru' yúgu'tëru' rë'u. Benru' ca guzësö ládxi'ru', en ca guyaza ládxi'ru' lu yöl-la' bönáchisö queëru'. Que lë ni na' gubága'ru' dul-la' lahuë' Dios le nun ga gunë' rë'u xíguia' ca gunë' quéguequi ia'zica'ró bönachi. ⁴⁻⁵ Ní'irö cate' ni' nácaru' ca bönni' nátigaca tu' nözi dul-la' gubága'ru', Dios busubanë' rë'u lu yöl-la' guti tsözxón len Cristo tu' buéchi' ládxi'ë rë'u, en bidxí'ide'enë' rë'u. Nuláli' tu' zoa le buzá' ládxi'ë Dios queéli'. ⁶ Dios busubanë' rë'u tsözxón len Cristo para gunë' ga có'öru' tsözxón len Lë' ga ni' rinná bë'ë yehua' yubá. ⁷ Caní benë' Dios, en buluí'inë' bönachi si' zá'gaca ca naca yöl-la' tsahui' que le buzá' ládxi'ë queëru', tu' budödë' Jesucristo ni'a queëru', le naca bë' ca nadxí'ide'enë' rë'u. ⁸ Nuláli' tu' zoa le buzá' ládxi'ë Dios queéli' tu' réajlë'ëli' Cristo. Busölé' libí'ili', calëga tu' nacuá' le naca dxi'a benli' libí'ili', pero tu' naca le runsë' Dios. ⁹ Cuntu nu gaca gun ba zxon cuini tu' nulá, tu' cabí nulá nu na' tu' nacuá' le naca dxi'a nun nu na'. ¹⁰ Le nácaru' naca le nun cazë' Dios. Tu' nácaru' tuz len Jesucristo, bucu'ë rë'u para gunru' le nácagaca dxi'a, le bucözë' zí'atëlö gunru'.

Rö'ö dxi icja ládxi'do'oru' lahuë' Dios ni'a que le benë' Cristo

¹¹ Gulí'tsöjné ca gúcali' zí'atëlö. Gúcali' bönachi izá'a, en que lë ni na' yugu' bönni' judío, bönni' na' ta'chúguië' lu xipéla'gaquië' le naca bë' dá'gaquië' Dios, en nazí' lágaquië' bönni' narugu lu xipéla'gaquië', ta'nné' nácali' libí'ili' bönni' biti' narugu lu xipéla'gaquië'. ¹² Dza ni' nubíga'li' ga zoë' Cristo. Gúcali' bönni' zí'tu' lógaca bönachi Israel, en biti' buzí'ili' xibé didza' benë' tsutsu Dios, en guzxí' lu në'ë bi gata' quégaca bönachi queë'. Guzóali' yödzölió ni, biti' zoa le runli' löza, en biti' núnbë'ënili'-në' Dios. ¹³ ¡Na'a, nácali' tuz len Jesucristo! ¡Zí'atëlö nubíga'li' libí'ili' zí'tu' ga zoë' Dios, pero na'a nudxíguë'ë Dios libí'ili' gála'sö tu' gútië' Cristo uláz queëru'! ¹⁴ Lë cazë' Cristo runë' ga rö'ö dxi icja ládxi'do'oru' lahuë' Dios. Lë' benë' ga yugu' bönni' judío, en yugu' bönni' zí'tu' bulu'huóáquië' tuz bönachi, en busúluë' yöl-la' rilé le guléaj légaquië' choplö ca tu zö'ö zxon. ¹⁵ Lë ni benë' Cristo cate' gútië' uláz queëru', en gudúë' yugu' xibá, en yugu' le rinná bë' nazúajgaca lu xibá quégaca bönachi judío, ate' chopa cö' bönachi na', bunë' tuz bönachi cubi, nupa nácagaca tuz len Lë cazë'. Caní benë', en gulequi dxíë' yöl-la' rilé na'. ¹⁶ Cate' gútië' Cristo lë'e yaga cruz, busúluë' yöl-la' rilé na', ate' chopa cö' bönachi na', bunë' légaquië' ca tuz bönachi, en gulequi dxíë' icja ládxi'do'gaquië' lahuë' Dios.

¹⁷ Caní guca, buluí'i lahuë' Cristo, en benë' libán que didza' dxi'a ca ribequi dxíë' yúgu'të bönachi, libí'ili' na' nácali' bönachi izá'a, en zóali' zí'tu' ga zoë' Dios, enca' bönachi judío nacuá' gála'sö. ¹⁸ Na'a, ni'a que le benë' Cristo, gaca ibíga'ru' lahuë' Xúziru' Dios, tu' zóalenë' Lë cazë' Dios Bó' Lá'ayi rë'u, sal-la' nácaru' bönachi judío o bönachi izá'a. ¹⁹ Que lë ni na', libí'ili', bönachi izá'a, bítirö nácali' ca bönachi zí'tu' zóali' tu luyú biti' nequi queéli', pero nabábalenli' bönachi queë' Dios. ¡Chinácali' ca bi'i queë' cazë' Dios! ²⁰ Libí'ili' nácali' ca tu yu'u zoa tsaz. Nácali' ca yugu' guiój zxóagaca lahui xilibi zö'ö, le bulu'cu'ë yugu' bönni' gubáz queë' Cristo, en yugu' bönni' gulu'ë didza' uláz queë' Dios, ate' Lë cazë' Jesucristo náquië' ca guiój lo que xilibi zö'ö na'. ²¹ Idútë yu'u na' le nácali'

libí'i cázali' riyasa lahui xilibi zö'ö na' naca cazé' Cristo, en nacuá' tu'lapa yugu' guiój que, para gaca tu yudo' lá'ayi le naca tuz len Xanru'. ²² Libí'i cázali' nácali' tuz len Cristo Nu buzóa libí'ili' para gácali' ca tu yu'u ga na' yu'ë Dios, tu' dzáguë' Dios Bö' Lá'ayi libí'ili'.

3

Náquië' Pablo huen libán que didza' dxi'a lógaca bönachi izá'a

¹ Que læ ni na', neda', Pablo, yu'a lidxi guié tu' runa' libán queë' Jesucristo para uzí'ili' xibé', libí'ili', bönachi izá'a. ² Réquida' chinóz quézili' ca benë' Dios, budödë' lu na'a dxin runa' para uzí'ili' xibé le ruzá' ládxë'ë queéru'. ³ Dios bulu'e lahui le bigachi' queë', en buzéajni'inë' neda' ca naca. Ca naca læ ni chibuzúaja' láti'do' queéli' lu guichi. ⁴ Cate' ulábali' læ ni, gúnbë'ëli' le réajni'ida' ca naca le bigachi' ca naca queë' Cristo. ⁵ Dza ni'te cuntú nu buzéajni'inë' Dios ca naca le bigachi' na', pero na'a, lu në'ë Dios Bö' Lá'ayi, chibulu'ë lahui Dios ca naca, tu' buluí'inë' yugu' bönni' gubáz lá'ayi queë', en yugu' bönni' tu'ë didza' uláz queë'. ⁶ Caní rna læ na' bigachi': "Ni'a que didza' dxi'a ila'deli' bönachi izá'a tsözxón len bönachi judío le nequi queë' Dios, ate' ulu'huóáquië' ca tuz bönachi, en ulu'zi'ë xibé tsözxón len légaquië' le guzxi' lu në'ë Dios unödzejë' quégaquië' tu' dá'gaquië' Jesucristo." ⁷ Dios buzá' ládxë'ë quia' le bennë' quia'. Lu yöl-la' huáca zxön queë' benë' neda' huen libán que didza' dxi'a queë'. ⁸ Nacra' cá'sö ca yúgu'të bönachi queë' Dios, pero Lë' buzá' ládxë'ë quia' gaca' huen libán lógaca bönachi izá'a que didza' dxi'a ca naca yöl-la' tsahui' queë' Cristo, le nazáca'da'. ⁹ Dios budödë' lu na'a guna' ga iléquibe'e yúgu'të bönachi ca naca le buzóa cazé' Dios dza ni'te, læ na' naca tu le bigachi' queë' Dios, Nu ben yúgu'të le rilé'ëru'. ¹⁰ Caní guca, para iléquibe'e yúgu'të nupa ta'nná bë', en nupa dë lu në'eguequi ni' yehua' yubá, idú ca naca yöl-la' réajni'i queë' Dios cate' ila'lé'e ca nácagaca bönachi queë' Cristo. ¹¹ Dios benë' læ ni, busudxinë' læ na' buzóa cazé' dza ni'te, le benë' lu në'ë Xanru' Jesucristo. ¹² Tu' nácaru' tuz len Cristo, nazí'iru' lataj ibíga'ru' idú ladxí'ru' lahuë' Dios, tu' réajlë'ëru' Lë'. ¹³ Que læ ni na' ráta'yua' loli' bití' gaca chopá ladxí'li' tu' nözi le riguí' rizáca'a neda' para gácalena' libí'ili', le naca tu le uzí'ili' xibé.

Ca naca yöl-la' nadxí'i queë' Cristo

¹⁴ ¡Que læ ni na', ruzechu zxiba' lahuë' Xuzë' Xanru' Jesucristo! ¹⁵ Ca læ', nazí'i ca' lágaca yúgu'të bönachi queë', nupa nacuá' yehua' yubá, en nupa nacuá' yödzölió ni. ¹⁶ Rinábida'-në' Xúziru' Dios, lu yöl-la' zxön queë', le nazáca'da', gunnë' queéli' yöl-la' huáca queë' Dios Bö' Lá'ayi, en gunë' ga gálali' lu icja ladxí'do'oli'. ¹⁷ Rinábida'-në' Cristo soë' icja ladxí'do'oli' tu' réajlë'ëli' Lë'. Rinábida'-në' gunë' ga sóali' tsaz lu yöl-la' nadxí'i queë', en bití' tséaj bö' icja ladxí'do'oli' ca nadxí'ili'-në', ¹⁸ para gaca tséajni'ili' tsözxón len yúgu'të bönachi queë' Cristo ca naca yöl-la' nadxí'i queë', tsca ga ridxín ní'ilö, en ná'alö, en cadxí'ilö, en xitsá'alö. ¹⁹ Rinábida'-në' Dios gunë' ga gúnbë'ëli' yöl-la' nadxí'i na', le cabí gaca gúnbë'ëru' idú ca naca, para sóalen libí'ili' idú le naca cazé' Dios.

²⁰ ¡Na'a, yöl-la' ba Dios, Nu gaca gúntëro ca gaca inábaru' o ca gaca sa' ladxí'ru', ugunë' dxin yöl-la' huáca queë' lu icja ladxí'do'oru'! ²¹ ¡Gácatíca'sö queë' Dios yöl-la' ba lógaca bönachi queë' Cristo, en lahuë' Lë' cazé' Jesucristo, na'a dza, en yúgu'të dza zá'gaca! ¡Ca' gaca!

4

Dios Bö' Lá'ayi nunë' rë'u tuz

¹ Na'a, neda' ráta'yua' loli', yu'a lidxi guié ni tu' runa' libán queë' Cristo, rinábida' libí'ili' gunli' idú ca ral-la' ilún nupa bulidzë' Dios para ilequi queë', ca na' bulidzë' ca' libí'ili'. ² Guli'gaca nöxaj ladxí', en dxi'i ladxí'. Guli'cóz zxön ladxí'. Guli'güü' ladxí' luzá'ali' tuli' ia'tuli' lu yöl-la' nadxí'i queéli'. ³ Guli'güü' ladxí' gácatíca'sili' tuz ca na' chinunë' Dios Bö' Lá'ayi libí'ili', gunli' caní lu yöl-la' riböza tsáhuí'do' queéli' le rutsaga libí'ili'.

⁴ Tuz naca idütë le naca cazë' Cristo le nadzägaru' rë'u.
Tuzë' náquië' Dios Bö' Lá'ayi dzáguië' rë'u.
Tuz naca le runru' löza, lë na' bulidzë' rë'u Dios para uzí'iru' xibé.

⁵ Tuzë' náquië' Xanru'.
Tuz le réajlë'ëru'.

Tuz le bidílaru' nisa.

⁶ Tuzë' náquië' Dios Nu naca Xúziru' yúgu'tëru'.
Lë' rinná bé'enë' yúgu'tëru'.

Rugunë' dxin yúgu'tëru'.

Riböza cazë' Lë' lu icja ládxi'do'oru' yúgu'tëru'.

⁷ Tu turu' nazí'iru' tu yöl-la' huáca queë' Dios tsca naca le bennë' Cristo que queëru'.

⁸ Naca caní ca na' nazúaj lu guichi lá'ayi le rnna:

Buëpë' yehua' yubá, guchë'ë zían bönachi gula'dzúngaca.

Gudísië' quégaca bönachi le runódzjasë' quégaquië'.

⁹ ¿Bizxi rë'ëni inná lë na' rnna: buëpë'? Rusëdi rë'u bötjë' zí'alö, en bidxinë' yödzölió cadxí'ilö ni. ¹⁰ Nu na' bötaj naca Bönni' na' buëpë' xitsá'tërö ni' yehua' yubá para budzë'ë yúgu'të len le naca cazë' Lë'. ¹¹ Cristo caz bennë' que queëru' yugu' yöl-la' huáca queë': Bë' lataj bal-lë' bönni' iláquië' gubáz queë'.

Benë' ga tu'ë didza' uláz queë' Dios ia'bal-lë' bönni'.

Gusól-lë'ë ia'bal-lë' tsöjéngaquië' libán que didza' dxi'a.

Bucu'ë ia'bal-lë' para ilún chi'ë bönachi queë'.

Bucu'ë ia'bal-lë' para ulu'sédinë' bönachi queë'.

¹² Cristo caz bupé'ë bönachi queë' caní para gaca ilún xichinë', para ilún ga ilaca idú nupa nácagaca ca idütë le naca cazë' Lë'. ¹³ Caní gaca ga idxintë dza huóácaru' tuz yúgu'tëru' ca réajlë'ëru' Cristo, en ca núnbë'ëru'-në' Zxí'inë' Dios. Gácaru' nál-la, en huóácaru' idú ca náquië' Lë' cazë' Cristo. ¹⁴ Bítí'rö gácaru' ca yugu' bí'ido', ca nácagaca nupa na' tu'tsa'të ca túngaca, en nácagaca ca tu le naché' lu yegu, o ca tu le røjché' bítí'tës bö' recja, tu' ta'zí' lu né'eguequi bítí'tës didza' nu rusëdi léguequi, nu na' rizí' ye'e léguequi len yöl-la' sina' que, en run ga ta'chixi ta'nigui. ¹⁵ Na'a, rë'u ni, tu' nadxí'iru' luzá'aru', ral-la' güí'iru' didza' le naca idütë li para gaca huóácaru' idú ca náquië' Cristo, en gácaru' tuz len Lë', Nu naca Xani idú le naca cazë', le nácaru' rë'u. ¹⁶ Cristo caz runë' ga rutsaga dxi'a idütë le naca cazë', le nácaru' rë'u, ate' idütë le naca cazë' na' naguela' tsözxón ni'a que lë na' run tuz idütë le naca cazë'. Cate' tu turu' runru' xichinru', rë'u na' dzágaru' le naca cazë', idütë rizxón, en raca idú, ca na' zeaj rácarö idú ca nadxí'iru' luzá'aru'.

Yöl-la' na'bán cubi náparu' tu' nácaru' tuz len Cristo

¹⁷ Uláz queë' Xanru' rea' libí'ili' lë ni, en rigu'a le lu ná'ali', rnní'a: Bítí'rö gunli' ca tun nupa bití' núnbë'gaquië' Dios, nupa na' tun ca ta'za'sö ládxi'guequi, ¹⁸ en nachulla naníftigaca icja ládxi'do'guequi. Tu' cabí nózguequinë' le nácatë, en nazídigaquië', bití' nazí'gaquië' yöl-la' na'bán na' runnë' Dios queëru'. ¹⁹ Bití' ca' tu'tuí'inë'. Nudödi cuíngaquië' lu le ruá' dö'. Idú ládxi'gaquië' tunë' yúgu'të le cabí naca tsahui'. ²⁰ Nupa ni' bulu'sedi libí'ili' ca naca queë' Cristo, bití' ca' bulu'sedi libí'ili' gunli' ca tun bönachi caní.

²¹ Le naca idütë li biyónili' ca naca queë' Cristo, en le nácali' queë' tu'sédinë' libí'ili' le naca idütë li na' zóalen Jesús. ²² Guli'nná be'e yöl-la' bönáchisö queéli' le gúcali' zí'alö, lë na' riniti ni'a que yöl-la' rizé ládxi' queéli' le ruá' dö' le guzxi' ye'e libí'ili'. ²³ Ral-la' huóácali' cubi lu icja ládxi'do'oli', en lu bö' naca cázali'. ²⁴ Ral-la' sí'ili' yöl-la' bönachi cubi le nunë' Dios ca naca cazë' Lë', le rulu'í' cuini ni'a que le naca dxi'a, en le naca tsahui' runli', en run ga gaca gunli' caní.

²⁵ Que lë ni na', bítirö si' yé'ëli'. Yúgu'tëru' ral-la' güf'ilenru' luzá'aru' didza' le nácatë, tu' dzágaru' yúgu'tëru' idütë le naca cazë' Cristo.

²⁶ Channö hualéli', bití' ral-la' gunlí' dul-la'. Bití' ilelí' xidzé. ²⁷ Bití' bi gunlí' le güf'i lataj tu' xihui' ucúl-la libí'ili'.

²⁸ Nu bönni' ribanë' ral-la' usanë' yöl-la' gubán queë', en tsázië' huen dxin para gata' queë' bi unödzjë' quégaca nupa ta'yadzaj.

²⁹ Bití' güf'ili' didza' xihui', pero guli'güf' didza' dxi'a, yugu' le ilácalen nu yöni, en ilún ga gaca dxi'a que nu na'. ³⁰ Bití' usuhu'ínilí' Dios Bö' Lá'ayi, tu' naca bë' néquili' queë' Dios tu' zóalenë' Dios Bö' Lá'ayi libí'ili', ate' idxín dza údxi usölé' libí'ili' lu dul-la'.

³¹ Guli'cúa ladaj libí'ili' yöl-la' ruzxë'e, en yöl-la' ridzá'a, en yöl-la' rilé, en yöl-la' ridil-la didza', en yöl-la' rutsaga yudxi, en yúgu'të yöl-la' bití' rilé'e luzá'ali' dxi'a.

³² Ral-la' gácali' dxi'i ladxi', en huéchi' ládxi'li' luzá'ali' tuli' ia'tuli', en uniti loli' luzá'ali' tuli' ia'tuli', ca na' benë' Dios, buniti lahuë' libí'ili' tu' nácali' tuz len Cristo.

5

Ca ral-la' ilaca nupa nácatë ca bi'i queë' cazë' Dios

¹ Tu' nácali' ca bi'i queë' cazë' Dios, ate' nadxí'inë' libí'ili', guli'güf' ladxi' gácali' ca náquië' Lë'. ² Ca naca yúgu'të le runlí':

Ral-la' idxí'ili' luzá'ali' ca na' benë' Cristo.

Bidxí'inë' rë'u, en budödi cuinë' lu yöl-la' guti uláz queëru'.

Ben cuinë' ca böa' bédxido' rútiru'-ba' lahuë' Dios tu' nözi dul-la' nabága'ru'.

Gúquië' ca' ca tu le rilá' zxixi le raza ládxe'ë Dios le rigú'uru' lu bucugu lá'ayi queë'.

³ Tu' nácali' queë' Dios, bití' ca' gunlí' le ruá' dö', en bití' gunlí' le cabí ral-la' gunlí', en bití' uhuídi'li'.

Ní'irö cuntú nu gaca bi inné queé'li'.

⁴ Bití' güf'ili' didza' xihui',

o didza' canóz, o didza' cá'asö,

yugu' le cabí ral-la' gunlí',

pero nácarö dxi'a guié'li'-në' Dios: "Xclenu'."

⁵ Chinóz quézili' nitüé' bönni' runë' le ruá' dö' bití' ca' tsázië' ga rinná bë'ë Cristo tsözxón len Dios, o nu bönni' runë' le cabí ral-la' gunë', o nu bönni' ruhuídi'në'. Nu na' ruhuidi' naca ca nu reaj ladxi' budó' guió'j budó' yaga.

⁶ Bití' güf'ili' lataj nu si' ye'e libí'ili' len didza' bití' nácatë. Tu' nözi dul-la' caní Dios gunë' xíguia' nupa bití' túngaca ca rna xtídzë'ë.

⁷ Bití' ca' gunlí' tuz bönachi caní.

⁸ Zí'atëlö guzóali' ga naca chul-la que dul-la', pero na'a zóali' lu bení', tu' nácali' tuz len Xanru'. Guli'gaca ca bönachi ta'dá lu bení', ⁹ tu' run bení' na' ga gácaru' dxi'i ladxi', en ga güf'iru' didza' le naca idütë li, en ga gácaru' tsahui'. ¹⁰ Guli'güf' ladxi' inózili' le raza ládxe'ë Xanru'. ¹¹ Bití' gútsa'li' nupa tun le ruá' dö', lë na' tunë' ga naca chul-la que dul-la', pero buli'béaj ga liná' yugu' lë na' tunë'. ¹² Utuí'iru' güf'iru' didza' ca naca le tun bönachi na' bagáchi'sö. ¹³ Cate' bi ubéajru' ga liná', gaca bë' yúgu'të tsca nácatë, tu' gun le naca bení' ga gaca bë' yúgu'të. ¹⁴ Que lë ni na' nazúaj lu guichi lë na' rna:

Bubán, lí' na' rasiu'.

Guyasa ladaj nupa nácatë.

Cristo uzení'ë quiu'.

¹⁵ Buli'yú cuinli' ca runli'. Biti' gácali' nupa biti' ta'yéajni'ini, pero guli'gaca bönachi ta'yéajni'i. ¹⁶ Guli'sí' xibé lataj dë queé'li' tu' chizóaru' dza biti' raca dxi'a queé'ru'. ¹⁷ Biti' gácali' bönni' biti' bi nózguequiné'. Guli'güí' ladxi' tséajni'ili' le ré'ënë' Xanru' gunli'.

¹⁸ Biti' súdxili', tu' gun yöl-la' rizudxi ga nítili' tsaz.

Guli'güí'ida' lataj inná bé'ené' Dios Bö' Lá'ayi libí'ili'.

¹⁹ Guli'güí'ilen luzá'ali' didza' tuli' ia'tuli',

ugunli' dxin yugu' le rul-la lé'gaca salmo,

en yugu' le rul-la yöl-la' ba Dios,

en yugu' le rul-la nagu'ë Dios Bö' Lá'ayi icja ládxi'do'oru'.

Idú ládxi'ru' ral-la' gúl-laru' queé',

le cú'uru'-né' Dios yöl-la' ba.

²⁰ Guli'gún dxin Lë' Xanru' Jesucristo,

en guli'guética'së' Xúziru' Dios: "Xclenu'" ca naca yúgu'të.

Ca ral-la' gunru' que'gaca di'a dza queé'ru'

²¹ Guli'gún ca rnna xtídza' luzá'ali' tuli' ia'tuli' para caní gunli'-né' Dios zxön.

²² Libí'ili', yugu' nigula, guli'gún ca rnna xtídza'gaquié' bönni' que queé'li', ca na' ral-la' gunli' ca rnna xtídzë'ë Xanru'. ²³ Caní ral-la' gunli', tu' rinná bé'ené' bönni' nigula queé' ca na' runé' Cristo, rinná bé'ené' bönachi queé'. Cristo náquié' ca' Nu rusölá bönachi queé', nupa na' dzágagaca le naca cazë' Lë'. ²⁴ Ca na' tun bönachi queé' Cristo ca rnna xtídzë'ë, lësca' caní ral-la' ilunnu nigula ca rnna xtídza'gaquié' bönni' que queé'gacanú ca naca yúgu'të le raca.

²⁵ Libí'ili', yugu' bönni', ral-la' idxí'ili'-nu nigula que queé'li' ca na' Cristo nadxí'iné' bönachi queé', en budödi cuiné', gútié' uláz queé'gaquié'. ²⁶ Gútié' Cristo para bubéajé' quez queé' Dios bönachi queé' na', ate' nayárigaca tu lu nisa le naca xtídzë'ë. ²⁷ Gútié' uláz queé'gaquié' para gaca usudxiné' légaquié' lahué' Dios, nácagaquié' ca tu lari' lachi, biti' nuá' bösaj le né'aj, en biti' naxú'una, en biti' zoa nitú le run ditaj le, pero runé' ga ilácagaquié' idú dxi'a, cuntú nu gaca bi inné' queé'gaquié'. ²⁸ Ral-la' idxí'ili'-nu nigula que queé'li' ca na' nadxí'i cuinli'. Nu bönni' nadxí'iné'-nu nigula queé', nadxí'i cuiné'. ²⁹ Cuntú nu bönni' runi zí' cuiné', pero rugahué', en run chi'i cuiné', ca runé' ca' Cristo, ca rúnlené' bönachi queé', ³⁰ nupa dzágagaca idütë le naca cazë'.

¡Rë'u ni dzágaru' le naca cazë' Lë'!

¡Néquiniru' xipélë'ë, en dxita queé'!

³¹ Lësca' caní nazúaj lu guichi lá'ayi le rnna: "Que lë ni na' tu bönni' ral-la' ucá'ané' xuz xiné'ë para tsöjsóalené'-nu nigula queé', ate' irópatë' ulu'huóáquié' tuz." ³² Lë na' nazúaj lu guichi ni rulu'i lahui tu le naca idütë li, ate' neda' réquida' ru'i didza' ca' ca naca queé' Cristo, en que'gaca bönachi queé' na'. ³³ Lësca' ru'i didza' ca naca queé'li'. Yúgu'tëli' libí'ili', bönni', ral-la' idxí'ili'-nu nigula que queé'li' ca na' nadxí'i cuinli', ate' yugu' nigula ral-la' ilunnu bal bönni' que queé'gacanú.

6

¹ Libí'ili', yugu' bí'ido', ral-la' gunli' ca rnna xtídza'gaquié' xuz xiná'ali' para caní gunli' ca rnna xtídzë'ë Xanru'. Ral-la' gunli' le naca tsahui'. ² Xibá zí'alö na' bené' Dios le naché' tu le guzxi' lu në'ë guné', naca lë na' rnna: "Ben bal xuz xinó'o, ³ ate' gaca dxi'a quiu', ate' xidzé su' ibanú yödzülió ni."

⁴ Libí'ili', yugu' xuz, biti' gun leli' zxí'inili', pero buli'xón lé'gacabi', en guli'sína' lé'gacabi', en buli'sëdi lé'gacabi' ca raza ládxe'ë Xanru'.

⁵ Libí'ili', núlöli' nácali' bönni' nadó'ogaca, guli'gún ca rnna xtídza'gaquié' xanli' luyú ni idú ládxi'li', gunli' légaquié' bal lu yöl-la' radxi queé'li', en gunli' xichíngaquié' ca ral-la' gunli' xichiné' Cristo. ⁶ Guli'gún xichíngaquié', calé'gasö cate' ni' tu'yúé' libí'ili' para

urúajli' dxi'a lógaquië', pero idú ládxi'li' guli'gún xichíngaquië' ca raza ládxe'ë Dios, ca na' ral-la' gunli' xichinë' Cristo. ⁷ Idú ládxi'li' guli'gún xichíngaquië', ate' caní gaca, gunli' xichinë' Xanru', en calégasö xichíngaca bönachi. ⁸ Nöz quézili' ca gunë' Xanru'. Ubi'ë que queéru' tsca naca le dxi'a runru' sal-la' nadzanru', o sal-la' nácaru' bönni' nadó'ogaquië'.

⁹ Libí'ili', nacuá' queé'li' bönni' nadó'ogaca, guli'gún dxi'a caní quégaca huen dxin queé'li' na', en biti' uzéli' ba nadx légaquië'. Guli'tsöjné ca naca queé'li', yú'uli' lu në'ë Xanru' zoë' yehua' yubá la' ca nácaté quégaquië', ate' Lë' biti' rutsé'ë ca runë' que que bönachi.

Dios runnë' queéru' le tun chi'i rë'u

¹⁰ Na'a, böchi' luzá'ado', guli'gaca tsutsu tu' nácali' tuz len Xanru', en zóalen libí'ili' yöl-la' huáca zxön queë'. ¹¹ Guli'gún chi'i cuinli', ugunli' dxin yugu' le runnë' Dios queéru', le tun chi'i rë'u, para gaca sóali' tsutsu cate' gué'ëni si' bë' tu' xihui' libí'ili'. ¹² Biti' ridíl-lalenru' bönachi néquiguequini bëla', en dxita, pero ridíl-lalenru' yöl-la' unná bë' quégaca bö' xihui' ta'dá lu bö'ös, en dzágagaca nupa ta'nná bë', en nupa nadéli'gaca yöl-la' unná bë', en nupa dë lu ná'agaca, nupa nacuá' yödzölió ni ga naca chul-la que dul-la'. ¹³ Que lë ni na':

Guli'sí' yúgu'të le runnë' queéru' Dios le tun chi'i rë'u,
para cate' idxín queéru' dza ni' ilaca le nácgaca xihui',
gaca guá' ilenli',
en cate' údxi gunli' caní, ugá'anali' tsutsu.

¹⁴ Guli'sóa tsutsu.

Guli'sí' le naca idútë li,
le gaca queé'li' ca tu guídi guga' lé'ëli'.
Guli'gaca tsahui' tu' gun chi'i libí'ili' le naca tsahui'
ca run tu lari' yödx run chi'i luchu'ë bönni' rejë' gudil-la.

¹⁵ Guli'sóa sina' para gunli' libán que didza' dxi'a
le ribequi dxi icja ládxi'do'oru' lahuë' Dios,
ca na' ruzóa cuinë' sina',
en ridé'ë xiráchuë' tu bönni' rejë' gudil-la.

¹⁶ Le naca lo, yöl-la' réajlë' queé'li' Cristo
gaca queé'li' ca tu le naca tsutsu uzéli' loli',
para cabí gál-la' yugu' le usán tu' xihui' libí'ili',
le nácgaca ca yaga túchi'do' zoa guí' láhuilöguequi.

¹⁷ Yöl-la' rusöla' gaca queé'li' ca tu lu'u guié le gun chi'i ícjali'.
Xtídzë'ë Dios gaca queé'li' ca tu guíë tuchi'
le runnë' Dios Bö' Lá'ayi queéru',
para utíl-lalenru' le naca xihui'.

¹⁸ Guli'gún yúgu'të lë ni,
en buli'lidzë' Dios inábili'-në' gácalenë' libí'ili'.
Buli'lidzatica'së' Dios zóalenë' Dios Bö' Lá'ayi libí'ili'.
Para gunli' caní ral-la' usubán ládxi'li' en cabí huóaj ládxi'li',
inábili'-në' Dios gácalenë' nupa néquiguequi queë'.

¹⁹ Buli'lidzë' Dios, inábili'-në' gácalenë' ca' neda', en gunnë' quia' didza' cate' ral-la' gu'a didza', en gunë' ga gaca' rugu ladxí' cate' guna' libán para uzéajni'ida' bönachi ca naca le bigachi' que didza' dxi'a. ²⁰ Dios budödë' lu na'a didza' dxi'a na' para guna' libán que, ate' tu' bena' caní yu'a lidxi guíë ni. Buli'lidzë' Dios channö, inábili'-në' gunë' ga gaca' rugu ladxí' para guna' libán que didza' dxi'a ca ral-la' guna'.

Ruúdx didza' bë'ë Pablo

²¹ Tíquico, bóchi'ru' na' nadxí'iru'-në', en runë' xichinë' Xanru' idú ládxe'ë, quíxjöi'inë' libí'ili' idú ca raca quia', en ca runa' neda' ni. ²² Que lë ni na', isól-la'a-në' queéli', ate' ulu'í'inë' libí'ili' ca raca queétu', ate' caní utipë' ládxi'li'.

²³ Rinábida'-në' Xúziru' Dios, enca' Xanru' Jesucristo gunë' ga soa dxi icja ládxi'do'oli', en gata' queéli' yöl-la' nadxí'i le dzaga yöl-la' réajlë' queéli' Cristo, yúgu'tëli' na' néquili' queë'. ²⁴ Le ruzá' ládxe'ë Dios queéru' gaca queéli', yúgu'tëli' na' nadxí'ili'-në' Xanru' Jesucristo, naca idú yöl-la' nadxí'i queéli' Lë'. ¡Ca' gaca!

DIDZA' GUSÖL-LË'Ë PABLO YÖDZÖ FILIPOS

Pablo rugapë' Dios bönachi queë' Cristo nacua' Filipos

¹ Neda', Pablo, enca' bi'i Timoteo, nactu' huen dxin queë' Jesucristo. Rugapa' Dios libí'ili', réajlë'ëli' Cristo, en libí'ili', dë lu ná'ali' xichinë' Cristo, en libí'ili', run chí'ili' bönachi queë' Cristo. Zóali' Filipos, en néquili' queë' Dios, en nácali' tuz len Jesucristo. ² Rinábida'-në' Xúziru' Dios, enca' Xanru' Jesucristo gunnë' queé'li' le ruzá' ládxë'ë queé'ru', en gunë' ga soa dxi icja ládxi'do'oli'.

Pablo rinábinë' Dios bi gunë' quégaca bönachi ta'yéajlë' Cristo

³ Rea'-në' Dios: "Xclenu'", cate' rizá' ládxa'a queé'li'. ⁴ Cate' rulidza'-në' Dios, en rinábida'-në' gácalenë' libí'ili', rudzeja ládxa'a ⁵ tu' röjneda' ca bënlenli' neda' tsözxón dxin que didza' dxi'a. Gusí loli' runli' dxin na' dza ni' si' biyónili', en runli' le ga ridxintë na'a dza. ⁶ Dios gusí lahuë' runë' tu le naca dxi'a lu icja ládxi'do'oli'. Ruzxöni ládxa'a Lë' gúntica'së' caní ga idxintë dza huödë' Jesucristo. ⁷ Ca na' rizá' ládxa'a queé'li' naca ca ral-la' guna' tu' nadxí'ide'eda' libí'ili'. Yúgu'tëli' ruzí'ili' xibé tsözxón len neda' le ruzá' ládxë'ë Dios queé'ru', tsanni ni yu'a lidxi guié, en lësca' caní benli' cate' ni' bë'a didza', cate' na' bena' libán que didza' dxi'a le bena' ga bidxín queé'li' tsaz. ⁸ Nózinë' Dios ca nadxí'ide'eda' libí'ili'. Naca ca na' nadxí'ide'enë' Lë' cazë' Jesucristo rë'u. ⁹ Rinábida'-në' Dios gunë' ga idxí'iröli' luzá'ali', en gáta'da' queé'li' yöl-la' rácada', en yöl-la' réajni'i idú ¹⁰ para gaca cöli' le nácatë'rö dxi'a. Channö gaca caní queé'li', gácali' idú dxi'a, ate' cuntun nu gaca bi innë' queé'li' dza ni' huödë' Cristo. ¹¹ Le nácali' naca bë' le naca dxi'a runë' Cristo lu icja ládxi'do'oli' para ilá' lahui yöl-la' zxön queë' Dios, en gaca queë' yöl-la' ba.

Zóaru' nabanru' para gácaru' ca náquië' Cristo

¹² Böchi' luzá'ado', ré'ënda' inózili' lë ni: Yúgu'të le guca quia' gulácalen neda' para guxzéqui'röda' bena' libán que didza' dxi'a. ¹³ Caní guca, yúgu'të ni'a ná'agaquië' bönni' yúlahui', en ia'zica'rë' bönni' ni nózguequinë' yu'a lidxi guié ni tu' runa' xichinë' Cristo. ¹⁴ Tu' yu'a neda' lidxi guié ni ben ga látu'biqui' yúgu'të böchi'ru' nácagacarë' rugu ladxi', ate' tu'zxöni ládxi'gaquië' Xanru', en bítirö' tádxinë' tunë' libán que xtídzë'ë Dios.

¹⁵ Le nácatë' bal-lë' tunë' libán queë' Cristo tu' tu'zxé'enë' neda', en ta'dil-lë', pero ia'bal-lë' tunë' libán queë' idú ládxi'gaquië'. ¹⁶ Yugu' bönni' tu'zxé'enë' na' tunë' libán queë' Cristo lu yöl-la' run ba zxön cuíngaquië', en calëga idú ládxi'gaquië'. Té'ënnë' ulu'saca' zí'ë neda' tsanni ni yu'a lidxi guié. ¹⁷ Yugu' bönni' idú ládxi'gaquië' na', lu yöl-la' nadxí'i quégaquië' tunë' libán queë', tu' nózguequinë' Dios caz budödë' lu na'a dxin runa', runa' libán que didza' dxi'a. ¹⁸ Biti' run lë na' ga rö'a böniga. Rudzëjada' tu' raca libán queë' Cristo nácati'tës, sal-la' tunë' libán idú ládxi'gaquië' o bití' tunë' le caní.

Na'a, rudzëjaröda' ¹⁹ tu' chinózida' ulá' lu le raca quia', yu'a lidxi guié ni, tu' rulídzali'-në' Dios, en tu' rácalenë' Dios Bö' Lá'ayi neda'. Náquië' Bö' risól-lë'ë Jesucristo queé'ru'. ²⁰ Caní ré'ënda', en ruzxöni ládxa'a-në' Dios, gunë' ga bití' utuí'ida', en gunë' ga gaca gu'a didza' lu yöl-la' rugu ladxi', ate' lu na'a neda' gácatíca'sö yöl-la' ba queë' Cristo na'a dza, en yugu' dza zá'gaca, sal-la' gun bayudxi gátitea', o soa' ibana'. ²¹ Ca runi neda', channö zoa' nabana', naca para gaca' ca náquië' Cristo, en channö gátia', naca tu le uzí'ira' xibé. ²² Channö huáca guna' dxin le gácalen didza' dxi'a queë' Cristo channö sóasa' ibana', bití' nözda' bízxilö ral-la' cóa'. ²³ Naca böniga cóa'. Ré'ënda' gátitea' para tsöjsóalentea'-në' Cristo, tu' gácatë'rö dxi'a quia', ²⁴ pero runrö bayudxi sóasa' ibana' para séqui'da' gácalena' libí'ili'. ²⁵ Tu' chinózida' naca caní, nözda' ca' ugá'analena' libí'ili' para gácalena' libí'ili' para gácarö idú ca réajlë'ëli' Cristo, ate' udzëjaröli' tu' réajlë'ëli'

Lë'. ²⁶ Caní naca, udusóalena' libí'ili' leyúbölö, le gun ga tsaz ládxi'li'-në' Jesucristo ni'a que le gunë', gácalenë' neda'.

²⁷ Guli'güí'sö ladxi' gácali' ca sa'yéaj didza' dxi'a queë' Cristo. Caní gaca, channö uduyúa' libí'ili' o channö soa' zi'tu', huayónida' nácali' tsutsu, en nácali' tuz, runli' tsözxón dxin que le réajlë'ëru' le za' queéru' ni'a que didza' dxi'a. ²⁸ Biti' güí'ili' nupa bití' ta'lé'e libí'ili' dxi'a lataj ilún gadxi libí'ili'. Lë ni uluí'i légaquië' ila'nítië', pero uláli' libí'ili', le gaca bë' rácalenë' Dios caz libí'ili'. ²⁹ Dios ru'ë libí'ili' lataj gunli' xichinë' Cristo, calégasö ca réajlë'ëli' Lë', pero lësca' ca riguí'i rizáca'li' cate' runli' xichinë'. ³⁰ Na'a, gaca gunli' neda' tsözxón güí'i ládxi'ru' gunru' libán que didza' dxi'a. Bilé'e quézili' ca gudí'i guzxáca'a cate' bena' caní zí'alö, atë' riyónili' ca riguí'i rizáca'a ca' na'a.

2

Gúquië' Cristo nöxaj ladxi', ate' bidéli'në' yöl-la' zxön

¹ Cristo runë' ga rutipa ládxi'li', en lu yöl-la' nadxí'i queë' ruhuéchi' ládxi'ë libí'ili', en runë' ga nácali' tuz len Dios Bö' Lá'ayi, en ga nadxí'ili' luzá'ali', en ga ruhuéchi' ládxi'li' luzá'ali' tuli' ia'tuli'.

² Na'a guli'gún ga udzéjarö ládxa'a. Para gunli' caní, ral-la' gácali' tuz len luzá'ali', en gaca lébisö ca nadxí'ili' luzá'ali' tuli' ia'tuli'. Lësca' caní ral-la' gácali' tuz lu bö' naca cázali', en ca rizá' ládxi'li'. ³ Ca naca le runli', bití' bi ral-la' gunli' lu yöl-la' rudul-li' queé'li', o para gun ba zxön cuinli', pero dxí'ado' ral-la' gunli' yúgu'të, en cabí guéquili' nadéli'röli' libí'ili' ca luzá'ali'. ⁴ Guli'güí' ladxi' gaca dxi'a ca' que luzá'ali', en calëga queézili'.

⁵ Ral-la' gácali' nöxaj ladxi' ca na' gúquië' Jesucristo nöxaj ladxi'. ⁶ Lë' naca cazë' lébisö ca náquië' Dios caz, pero bití' gúquinë' ral-la' gunë' bayudxi ugá'anë' lébisö ca na' náquië' Dios. ⁷ Bucá'ana cazë' yúgu'të le napë', en ben cuinë' ca tu bönni' nadó'o. Guljë' ca talaj bönachi, en gúquië' idú bönachi. ⁸ Cate' ni' náquië' bönni', gúquië' nöxaj ladxi', en benë' ca rnna xtídzë'ë Dios, en gútië'. Gudé'ë lë'e yaga cruz ca na' raza queë' nu bönni' nabáguë'ë dul-la'. ⁹ Que lë ni na' Dios buchisë' Lë', en benë' ga náquië' lo ni' yehua' yubá, en benë' ga lë' tu le nácatërö lo ca yúgu'të lágaca bönachi. ¹⁰ Caní benë' Dios para cate' ila'yöni ca na' lë' Jesús, ulu'zechu zxíbigaca yúgu'të nupa nacua' yehua' yubá, en lu yödzölió, en lu lataj chul-la. ¹¹ Yúgu'të' ila'guíxjö'ë yálajdo' Jesucristo náquië' Xanru' para gaca yöl-la' ba queë' Xúziru' Dios.

Ral-la' gácaru' ca tu le ta'gú'u beni' yödzölió ni

¹² Que lë ni na', böchi' luzá'ado', ca na' benli' ca rnna xtídzä'a cate' ni' zóalena' libí'ili', runrö bayudxi gunli' ca rnna xtídzä'a na'a, tsanni ni zoa' zi'tu' ga zóali'. Guli'gún xichinë' Xanru' ga idxintë dza údxi usölé' libí'ili'. Guli'gún caní lu yöl-la' radxi queé'li' Lë', en lu yöl-la' rizxizi. ¹³ Lë cazë' Dios runë' dxin lu icja ládxi'do'oli'. Runë' ga ré'enili' gunli' le raza ládxi'ë Lë', en runë' ca' ga séqui'li' gunli' lë na'.

¹⁴ Guli'gún yúgu'të le ral-la' gunli', en bití' bi innëli' que, en bití' til-la dídza'li'. ¹⁵ Caní ral-la' gunli', para cabí gaca nu bi innë queé'li', pero caní gácali' ca zxí'ini cazë' Dios, nácali' idú dxi'a yödzölió ga ni zóali' ladaj bönachi bití' nácagaca tsahui', en nucá'anagaca Dios. Libí'ili' rigú'uli' beni' ladjagaquië' ca na' ta'gú'u beni' bölay lúzxiba cate' ni naca chul-la, ¹⁶ cate' ru'í'ili' lógaquië' didza' ibániguequinë'. Channö caní gunli', huáca udzëjade'eda' ni'a que le naca cázali' dza huödë' Cristo, tu' inözda' bití' guca nítisö guzóa bönadxi gátia', en calëga nítisö bena' dxin. ¹⁷ Yöl-la' réajlë' queé'li' Cristo naca tu le raza ládxi'ë Dios. Sal-la' gun bayudxi gátia' para gaca idú yöl-la' réajlë' queé'li' Lë', udzëjada', en uzí'lena' xibé tsözxón yúgu'tëli'. ¹⁸ Lësca' caní ral-la' udzëjali' libí'ili', en uzí'lenli' tsözxón neda' xibé.

Ca tunbi' bi'i Timoteo, en bi'i Epafrodito

¹⁹ Channö caní ré'ënë' Xanru' Jesús, runa' löza isól-la'tea'-bi' bi'i Timoteo ga zóali', ate' ní'irö udzējada' cate' huódabi' ududíxjöi'ibi' neda' cátēze raca queé'li'. ²⁰ Túzibi' lēbi' rizá' lādxi'bi' ca na' rizá' lādxa'a neda', en ru'ida' lādxi'bi' lib'ili'. ²¹ Yúgu'tē bönni' ia'zica'rö, le naca quégacasē' tu'í lādxi'gaquiē'. Biti' tu'í lādxi'gaquiē' xichinē' Cristo. ²² Nöz quézili' ca benbi' bi'i Timoteo, ca na' burúajbi' dxi'a. Bénlenbi' neda' tsözxón dxin que didza' dxi'a, ate' nácabi' quia' ca tubi' bi'i bönni' rúnlenbi'-nē' tsözxón xúzibi' dxin. ²³ Isól-la'a-bi' bi'i Timoteo ga zóali' cate' inözda' nacxi gaca quia' ni ²⁴ sal-la' ruzxöni lādxa'a-nē' Xanru' gunē' ga uduyútea' lib'ili'.

²⁵ Lēasca' réquida' run bayudxi isól-la'a-bi' bi'í bóchi'ru' Epafrodito ga zóali'. Bi'í ni bénlenbi' neda' tsözxón dxin queē' Cristo, ate' gudíl-lalentu' tu' xihui'. Lib'í cázali' gusól-la'li'-bi' ga zoa' para gácalenbi' neda'. ²⁶ Lē cázabi' ré'ënibi' uduyúbi' lib'ili', en ru'ida' lādxi'bi' lib'ili' tu' biyónili' ben bayá' queé'bi'. ²⁷ Le nácate' gú'íbi', en guqui gátibi', pero buéchi' lādxe'ë-bi' Dios, en calégasö lēbi', pero buéchi' lādxe'ë ca' neda', para cabí isébirö lādxa'a ca na' risēbi lādxa'a na'a. ²⁸ Que lē ni na', gú'uniröda' isól-la'a-bi' queé'li' para gaca udzējali' leyúbölö cate' ulé'eli'-bi', en bíti'rö isēbi lādxa'a neda'. ²⁹ Gulí'sí lu ná'ali' lēbi' lu yöl-la' rudzeja queé'li', tu' nácabi' bi'í bóchi'ru' réajlē'ēbi' Cristo. Gulí'gún bal yúgu'tē bönachi nácagaca ca nácabi' lēbi', ³⁰ tu' guzóa bönadxi queé'bi' gátibi' tu' benbi' xichinē' Cristo, en tu' gúcalenbi' neda' uláz queé'li'.

3

Le naca idú tsahui'

¹ Na'a, bóchi' luzá'ado', buli'dzeja tu' nácali' tuz len Xanru'! Biti' rupizxaj neda' uzúaja' queé'li' leyúbölö lē na' buzúaja' queé'li' zí'alö, tu' gácalen lē ni lib'ili'. ² Gulí'gún chi'í cuinli' lógaca nupa ni' tuá' dö'. Nácagaca ca yugu' bö'cu' sínia', nupa na' tun bayudxi irugu lu xipéla'gaquiē' bönni' le naca bē' nazi' lu ná'gaquiē' xtídzē'ë Dios. ³ Ré'u nadéli'ru' lē na' naca idútē li, le naca bē' nazi' lu ná'aru' le runnē' queé'ru' Dios. Tu' réajlē'ēru' Dios, zóalenē' Dios Bö' Lá'ayi ré'u, ate' rudzējaru' tu' nácaru' tuz len Jesucristo. Biti' ca' ruzxöni lādxi'ru' tu le runru' rácasö queé'ru'. ⁴ La'tu' ruzxöni lādxi'ru' lē ni, lēasca' neda' chinadéli'da' bi uzxöni lādxa'a. Channö zoē' nu bönni' réquinē' ulé' tu' nacua' le nuné', neda' nadéli'röda' ca bönni' na':

⁵ Gurugu lu xipéla'a lē na' naca bē' cate' ni' gúquida' xunu' dza.

Gulja' ladaj di'a dza quégaca bönachi Israel.

Nababa' xzí'ini xi'sóë' Benjamín.

Xuz xiná'a nácagaquiē' idú bönachi hebreo.

Guca' bönni' yudo' fariseo ca na' bena' ca rinná bē' xibá queē' Dios.

⁶ Bē'da' lādxa'a xibá na' ga bidxintē gudxía lādxa'a bönachi queē' Cristo.

Tsca gaca gáquiē' tsahui' tu bönni' tu' runē' ca rinná bē' xibá na', cuntu nu bi guca inné quia'.

⁷ Na'a, yúgu'tē lē na' bena' zxön zí'alö, nuzóa' tsölá'alö tu' néquida' queē' Cristo. ⁸ Calégasö yugu' lē na', pero nuzóa' ca' tsölá'alö yúgu'tē le dē, para gaca gúnbe'eda'-nē' Xanru' Jesucristo, le nácaterö lesaca' ca yúgu'tē lē na'. Para gúnbe'eda' Lē' gurú'una' ní'ilö yúgu'tē, en réquida' naca ca bēbu, para uzi'a xibé' Cristo, ⁹ en para gaca' tuz len Lē'. Nuhuóaca' tsahui', calēga tu' runa' ca rinná bē' xibá na', pero Dios caz bunē' neda' tsahui' tu' réajlē'a Cristo, ca na' ruúnē' tsahui' yúgu'tē nupa ta'yéajlē' Lē'. ¹⁰ Ré'énisida' gúnbe'a-nē' Cristo, en sóalen yöl-la' huáca queē' Dios neda', lē na' busubán Cristo lu yöl-la' guti, ate' guna' Lē' tsözxón, qui'í saca'a ca na' gudí'í guzxáquē'ë Lē', en soa' sina' gátia' ca gútiē' Lē', ¹¹ tu' runa' löza Dios, usubanē' ca' neda' lu yöl-la' guti.

Le runru' para idxinru' xilátjaru'

¹² Biti' rnnía' chinadéli'da' yúgu'të læ ni gunnë' quia', en biti' réquida' chinaca' idú tsahui'. Na'a, runa' bayudxi idéli'da' yúgu'të læ na', tu' chibidéli'në' Jesucristo neda'. ¹³ Böchi' luzá'ado', biti' ca' nadéli'da' yugu' læ ni, pero tuz le runa' bayudxi. Ruzál-la ládxa'a le chibidéli'da', ate' runa' bayudxi idéli'da' le za'. ¹⁴ Runa' ca runë' tu bönni' rixíti'dë'ë para idxinë' xilatjë' para idéli'në' tu le uzi'ë xibé. Caní runa' para idéli'da' læ na' bulidzë' Dios rë'u para gata' queéru' ni' yehua' yubá tu' nácaru' tuz len Jesucristo.

¹⁵ Caní ral-la' gunru' yúgu'tëru' rë'u, naca idú ca réajlë'ëru' Cristo. Channö réquili' bál-lali' ral-la' gunli' tu le yúbölö, rinábida'-në' Dios uzéajni'inë' libí'ili'. ¹⁶ Na'a, ca naca læ na' bidéli'ru', ral-la' gúntica'siru' caní.

¹⁷ Böchi' luzá'ado', guli'gún ca na' runa' neda'. Chibulu'itu' libí'ili' ca ral-la' gunli'. Buli'yú ca tun nupa na' tun ca na' bentu' netu'. ¹⁸ Chigudxi caza' libí'ili' zían luzuí, ate' rea' libí'ili' leyúbölö len yöl-la' ribödxu quia', rnnía': Le tunë' zían bönni' run ga nácaquie' ca nupa biti' ta'lé'e Cristo dxi'a, tu' tu'zöë' tsölá'alö le ben cazë' Lë' læ'e yaga cruz. ¹⁹ Yugu' bönni' tunë' caní, tsöjajúie' lu guí' gabila, tu' naca le ta'zësö ládxi'gaquie' dios quégaquie', ate' tun ba zxon cuíngaquie' ni'a que læ na' ral-la' gun ga ulu'tuí'inë'. Tuí'i ládxi'së le dë yödölió ni, ²⁰ pero rë'u ni ru'í'i ládxi'ru' le dë yehua' yubá ga nabábaru', en ribózaru' dza huödë' Xanru' Jesucristo, Nu rusölá rë'u, urúajë' yehua' yubá na'. ²¹ Lë' utsë'ë idútë le naca cázaru', le riniti caz, en gunë' ga huóaca ca naca idútë le naca cazë' Lë', le sóatica'sö. Caní gunë' len yöl-la' huáca zxon queë' le ugunë' dxin para inná bé'enë' yúgu'të.

4

Ral-la' udzéalentica'siru'-në' Xanru'

¹ Que læ ni na', böchi' luzá'ado', guli'gaca tsutsu ca réajlë'ëli'-në' Xanru'. Nadxí'ide'eda' libí'ili', en ré'ënda' uduyúa' libí'ili'. Runli' ga rudzėjada', en nácali' ca tu le ruzi'a xibé.

² Libí'ili', Evodia, en Síntique, ráta'yua' lolí' gácali' tuz ca ral-la' ilaca nupa néquiguequi queë' Xanru'. ³ Na'a, bócha'a idú, ré'ënda' gácalenu' irópanu ni, tu' gulúnlennu neda' dxin, cate' bentu' libán que didza' dxi'a. Lësca' bulu'dzágúie' Clemente, en ia'zíca'rë' luzá'a na' netu'. Chinazúajgaca lágaquie' yehua' yubá ga na' nazúajgaca lágaca nupa chinadéli'gaca yöl-la' na'bán idú.

⁴ ¡Buli'dzéalentica'sö-në' Xanru'!

Leyúbölö, rnnía': ¡Buli'dzeja!

⁵ ¡Guli'gaca dxi'i ladxi' len yúgu'të bönachi!

¡Chizóa huödë' Xanru'!

⁶ Biti' ubi uguí'ili', pero guli'nabi-në' Dios le riquínili', en guli'guie': "Xclenu'" ca naca yúgu'të læ na' rinábali'. ⁷ Dios gunë' ga gaca queé'li' le cuéqui dxi icja ládxi'do'oli', læ na' nadódirö bë' ca le gaca ila'yéajni'i bönachi. Lë na' ribequi dxi icja ládxi'do'oru' gun chi'i icja ládxi'do'oli', en le rizá' ládxi'li' tu' nácali' tuz len Jesucristo.

Ral-la' sa' ládxi'ru' le náca gaca dxi'a

⁸ Ga ruúdxitë, böchi' luzá'ado', guli'sá' ládxi'li':

Yúgu'të le naca dxi'a, en le naca bica' ba,

en le naca idútë li, en le naca idú,

en le naca tsahui', en le naca ba'a,

en le naca lachi, en le ral-la' gunru' bal.

⁹ Guli'gún ca na' busédida' libí'ili', læ na' guzxí' lu ná'ali' tsca na' bé'lëna' libí'ili' didza', en tsca na' bena' ga ni' zóali'. Dios, Nu runna queéru' le ribequi dxi icja ládxi'do'oru' sóalënë' libí'ili'.

Le tsahui' gulunë' yugu' bönni' Filipos queë' Pablo

¹⁰ Rudzėjaldenda'-ně' Xanru' tu' ru'í' ládxi'li' neda' leyúbölö. Biti' rnnía' gul-la ládxi'li' neda', pero bití' guta' queé'li' lataj gácalenli' neda' zí'alö. ¹¹ Lësca' caní, bití' rnnía' caní tu' zoa bi riyadzaj quia', tu' nazëda' tsaza ládxa'a le dësö quia'. ¹² Chigudöda' lu yöl-la' yechi', en lu yöl-la' tsahui'. Nazëda' soa' nácati'tës, sal-la' nóljada' o nabila riduna', en sal-la' dëda' quia' o zoa bi riyadzaj quia'. ¹³ Yúgu'të huazéqui'da' tu' rutipë' Cristo ládxa'a. ¹⁴ Benlí' dxi'a cate' ni' gúcalenli' neda', en butí'pali' ládxa'a cate' gudí' guzácá'a.

¹⁵ Libí'ili', bönni' Filipos, nöz quézili' ca guca quia' dza ni' cate' buzá'a luyú Macedonia, para yöjena' libán que didza' dxi'a. Tsca nacua' bönachi queë' Cristo, cúnturö nu gúcalen neda', pero libí'isili' gúcalenli' neda'. Gusól-la'li' quia' bi bunódzjali', tu' guzxi' lu ná'ali' libán bena' neda'. ¹⁶ Tsanni ni' guzóa' yödzo Tesalónica, tu chopá luzuí gusól-la'li' quia' le bunódzjali' cate' ni' biyadzaj quia'. ¹⁷ Biti' ru'í' ládxa'a bi si'a, pero ré'ënda' gáta'rö queé'li' le uzí'ili' xibé yehua' yubá. ¹⁸ Rea' libí'ili': Chiguzxi'a yúgu'të lë na' gusól-la'li' quia', ate' gudóditë bë' tsca le biyádzjada'. Ben ga naca caní lë na' gusól-la'li' lu ná'abi' bi'i Epafrodito. Lë na' bunódzjali' naca ca tu le rilá' zxixi le ridxintë lahuë' Dios, en ca tu le rigú'uru' lahuë' Dios le raza ládxe'ë. ¹⁹ Dios gunnë' queé'li' yúgu'të le riyadzaj queé'li', tsca naca yöl-la' tsahui' rö'ö yehua' yubá, tu' nácali' tuz len Jesucristo. ²⁰ ¡Gácatíca'sö queë' Xúziru' Dios yöl-la' ba! ¡Ca' gaca!

Yugu' bönachi queë' Cristo tu' gapa Dios luzé' eguequi

²¹ Uláz quia' neda', guli' gapa Dios nupa ni' néquiguequi queë' Dios tu' nácagaca tuz len Jesucristo. Tu' gapë' Dios libí'ili' böchi' luzá'aru' núnqaquië' neda' tsözxón ni. ²² Lësca' yúgu'të nupa ni' néquiguequi queë' Dios, tu' gapa Dios libí'ili', en lësca' caní, yugu' bönni' huen dxin nacué' lidxe' bönni' rinná bë'ë idú luyú Roma tu' gapë' Dios libí'ili'.

²³ Rinábida'-ně' Xanru' Jesucristo uzá' ládxe'ë queé'li' yúgu'tëli'. ¡Ca' gaca!

DIDZA' GUSÓL-LĒ'Ē PABLO YÖDZÖ COLOSAS

Pablo rugapë' Dios bönachi queë' Cristo nacu'ë Colosas

¹ Neda', Pablo, naca' gubáz queë' Jesucristo tu' ré'ënë' Dios caní, ate' dzágabi' bí'i bóchi'ru' Timoteo neda'. ² Rugapa' Dios libí'ili', zóali' Colosas. Nácali' bóchi'tu' réajlë'ëli' Cristo, en nácali' quez queë' Dios. Rinábida'-në' Xúziru' Dios uzá' ládxë'ë queé'li', en gunë' ga soa dxi icja ládxi'do'oli'.

Pablo rulidzë' Dios, en rë' Lë': "Xclenu"

³ Rética'stu'-në' Dios, Xuzë' Xanru' Jesucristo: "Xclenu" cate' rulidztu'-në' Dios, en rinábitu'-në' bi gunë' queé'li' ⁴ tu' biyónitu' didza' ca réajlë'ëli' Jesucristo, en ca nadxí'ili' yúgu'të nupa néquiquequi quez queë' Dios. ⁵ Caní runli' tu' runli' löza le nuzóë' Xanru' queé'li' ni' yehua' yubá, lë na' biyónili' que cate' bé'lentu' libí'ili' didza', le naca löza sí'ili' ni'a que didza' dxi'a. ⁶ Didza' dxi'a na' bidxín queé'li' ca ridxín ca' idútë yödzölió. Run dxin, en raca libán que, idútë yödzölió, la' tuz ca raca ga zóali', dza ni'te ga ridxintë na'a dza, cate' ni' biyónili', en bënbë'ëli' idútë le ruzá' ládxë'ë queéru' Dios. ⁷ Epafras, bönni' nadxí'iru'-në', busédinë' libí'ili' lë ni. Lë' rúnlenë' netu' tsözxón dxin, en rácalenë' libí'ili'. Náquië' huen dxin idú queë' Cristo. ⁸ Bönni' ni gudíxjöi'inë' netu' ca nadxí'ili' luzá'ali', ate' runë' Dios Bö' Lá'ayi ga gaca gunli' caní.

⁹ Que lë ni na' netu' ca', dza ni'te ga ridxintë na'a dza, tu' réquibe'etu' lë ni, biti' ca' rizóa dxitu' rulidztu'-në' Dios, en rinábitu'-në' gácalenë' libí'ili', en gunë' ga gúnbë'ëli' idú le ré'ëni quëzinë' Lë', en gunnë' queé'li' yúgu'të yöl-la' rácada', en yöl-la' réajni'i le rigu'ë Dios Bö' Lá'ayi rë'u. ¹⁰ Caní rinábitu'-në' para gaca gunli' ca ral-la' ilún nupa néquiquequi queë' Xanru', gunli' yúgu'të le raza ládxë'ë Lë', en séqui'li' gunli' yúgu'të le naca dxi'a, en gácarö idú ca núbë'ëli'-në' Dios. ¹¹ Rinábitu'-në' utipë' ládxi'li', en gunnë' queé'li' yöl-la' huáca idú queë', para gaca guá' ilenli' yúgu'të, en cózali' zxön ladxi', en udzeja ládxi'li'. ¹² Lu yöl-la' rudzeja queé'li' guli'guíë' Dios Xuz: "Xclenu", tu' budödë' lu ná'aru' gata' queéru' lataj lu bení' queë', en gunru' tsözxón nupa néquiquequi quez queë'. ¹³ Dios Xuz na' busölë' rë'u lu na' nu rinná bë' lataj chul-la, en budödë' rë'u ga na' rinná bë'ë Zxí'ini cazë', Nu nadxí'inë'. ¹⁴ Zxí'inë' na' böá'uë' rë'u, tu' gútië' uláz queéru', ate' buniti lahuë' rë'u ca naca dul-la' gubágaru'.

Nuhuóácaru' tuz len Dios tu' gútië' Cristo uláz queéru'

¹⁵ Cristo náquië' tuz ca náquië' Dios caz, Nu biti' gaca ilé'eru'. Zoa cazë' Lë' zí'atëlö ca yúgu'të le benë' Dios. ¹⁶ Lu në'ë Cristo benë' Dios yúgu'të le dë, le nacua' lúzxiba, en le nacua' luyú, yugu' le rilé'eru', en yugu' le cabí gaca ilé'eru', lë na' nacagaca lataj lo, en yugu' yöl-la' unná bë', en le nápagaca yöl-la' zxön, en yugu' yöl-la' huáca que yehua' yubá, en que luyú ni. Yúgu'të benë' Dios lu në'ë Cristo para uzi'ë xibé Lë'. ¹⁷ Cristo zoa cazë' zí'alö ca yúgu'të le dë, ate' yúgu'të nacua'tica'sö ni'a queë' Lë'. ¹⁸ Cristo náquië' Xángaca bönachi queë', en runödzejë' quégaquië' yöl-la' na'bán. Náquië' ca' Nu gusí lo bubán tsaz lu yöl-la' guti. Zí'alö Lë' bubanë' tsaz lu yöl-la' guti para tsépisëtërë' ca yúgu'të le dë. ¹⁹ Caní guca, tu' guyaza ládxë'ë Dios Xuz sóalen Cristo idútë le naca cazë' Lë'. ²⁰ Ni'a que le benë' Cristo, Dios benë' ga gaca ulu'huóáca tuz len Lë' yúgu'të le dë, le nacua' luyú, en le nacua' lúzxiba. Bunë' léguequi tuz len Lë' tu' bulaljë' Cristo xichönë' cate' gútië' lë'e yaga cruz.

²¹ Libí'ili', zí'atëlö nulá'aleni'-në' Dios, en gúcali' ca yugu' bönni' biti' ta'lé'enë' Dios dxi'a lu icja ládxi'do'oli' ni'a que dö' bíá'ali', pero na'a chibunë' libí'ili' tuz len Lë'. ²² Caní guca, tu' budödi cuinë' Cristo, en gútië' uláz queé'li' para gaca usudxinë' libí'ili' lahuë'

Dios, nácali' quez queë', en idú dxi'a, ate' cuntu nu bi gaca inné queéli'. ²³ Caní gaca channö ugá'anali' tsutsu ca réajlë'ëli' Cristo. Gácali' ca tu yu'u xzoa ga rë' xilibi zö'ö que, en biti' tseaj bö' ládxi'do'oli' ca runli' löza didza' dxi'a biyónili', lë na' raca libán que idútë yödzölió le benë' Dios znan lúzxiba. Dios buzóë' neda', Pablo, para gaca' huen dxin que didza' dxi'a na'.

Dxin budödë' Dios lu në'ë Pablo

²⁴ Rudzëjada' na'a ca naca le riguí' rizáca'a para gácalena' libí'ili', en ruúdxí rizá'a lu idútë le naca' le riguí' rizáca'lena' tsözxón Cristo uláz que idú le naca cazë' Lë', le naca bönachi queë'. ²⁵ Dios benë' ga naca' huen dxin quégaca bönachi queë' Cristo, ate' runa' xichinë' Dios, le budödë' lu na'a guna' para gácalena' libí'ili', quíxjõ'a idú ca naca xtídzë'ë Dios. ²⁶ Ruzéajni'ida' bönachi le nagachi', lë na' bigachi' dza ni'te, ate' cuntu nu benbë' le, pero na'a Dios chibulu'ínë' bönachi néquiquequi quez queë' ca naca que. ²⁷ Dios gú'uni quézinë' gunë' ga ilúnbë'e yugu' yöl-la' tsahui' idú que le nagachi' ni, lë na' ta'yóni bönachi izá'a. Caní rna lë na' bigachi': "Cristo náquië' tuz len libí'ili', en náquië' le naca löza idéli'li' tsazli' lu bení' queë'."

²⁸ Runtu' libán queë' Cristo, en rusá'atu' ládxi'gaca yúgu'të bönachi, ate' ruséditu' léguequi idútë yöl-la' réajni'i, para gaca usudxintu' yúgu'të bönachi lahuë' Dios, naca idú ládxi'gaca tu' nácgaca tuz len Jesucristo. ²⁹ Para gaca caní runa' dxin, en ru'í ládxa'a údxí guna' lë ni, rugúna' dxin yöl-la' huáca idú na' runnë' Cristo quia'.

2

¹ Ré'ënda' inózili' ru'ida' ládxa'a runa' le gácalen libí'ili', enca' le gácalen bönachi yödzö Laodicea, en le gácalen ca' yúgu'të nupa biti' ila'lé'eni neda'. ² Runa' caní para ila'dipa ládxi'gaquië', en iláquië' tuz lu yöl-la' nadxí'i, en ulu'zi'ë xibé yúgu'të yöl-la' tsahui' que yöl-la' run löza idú le runna yöl-la' réajni'i queéru'. Caní raca para ilúnbë'ë le bigachi' queë' Dios Xuz, lë na' naca cazë' Cristo. ³ Lu në'ë Cristo ruzí'iru' xibé yúgu'të yöl-la' tsahui' que yöl-la' rácada', en yöl-la' réajni'i. ⁴ Lë ni rea' libí'ili', para cabí gaca nu si' ye'e libí'ili', nu güi' didza' tséajlë'ëru' le cabí nácatë. ⁵ Sal-la' zoa' zi'tu' ga zóali' lu idútë le naca', lu bö' naca caza' zóalena' libí'ili', en rudzëjada' tu' rilé'eda' rö'ö xibá queéli', en nácali' tsutsu ca réajlë'ëli' Cristo.

⁶ Que lë ni na', ca na' guzxí' lu ná'ali' Xanru' Jesucristo, lësca' caní ral-la' gunli' yúgu'të le gunli', dzáguie' Lë' libí'ili'. ⁷ Ca na' nun ga rë' luí yaga, enca' ca na' nayás zö'ö lu xilibi zö'ö, guli'sóalen Cristo. Guli'sóa tsutsu ca réajlë'ëli' Lë', ca na' chinazédali'. Guli'guíetica'së' Dios: "Xclenu'."

Le cubi nácaru' tu' dzágaru'-në' Cristo

⁸ Guli'gún chí'i cuinli' para cabí güf'ili' lataj nu si' ye'e libí'ili', nu ugún dxin yöl-la' réajni'i quégaca bönachi, en yugu' didza' ta'nnsë' nácgaca idútë li, ca naca le ta'lébi tun bönachi, en ca naca le tu'sedi bönachi le naca que yödzölió ni, en calëga le naca xtídzë'ë Cristo.

⁹ Idútë le naca cazë' Dios zóalen Cristo sal-la' böáquië' bönachi, ¹⁰ ate' libí'ili' nápalí' idútë le náquië' Dios tu' dzágali'-në' Cristo, Nu rinná be'e yúgu'të nupa ta'nná bë', en yugu' bönni' dë lu ná'agaquië'. ¹¹ Narugu lu xipéla'gaquië' bönni' judío le rulu'í dá'gaquië' Dios, pero libí'ili', tu' dzágali' Cristo, zóalen libí'ili' le rulu'í néquili' queë' Dios, le cabí néquini lu ni'a lu ná'agaca bönachi. Yugu' bönni' judío tu'gúë' tu' guídido', pero libí'ili', nadúa idútë yöl-la' bönachi queéli' le bënlenli' dul-la'. Caní naca queéli' tu' benli' tsözxón Cristo cate' gútië' lë'e yaga cruz. ¹² Cate' bidí'fali' nisa guca ca bigáchi'lenli'-në' Cristo tsözxón yeru ba, en bubánlenli'-në' tsözxón tu' guyéajlë'ëli' Dios, len yöl-la' huáca queë' busubanë' Cristo lu yöl-la' guti. ¹³ Zí'atëlö gúcali' ca nupa chinátigaca tu' nözi dul-la' gubága'li', en biti' guzóalen libí'ili' le rulu'í néquili' queë' Dios, pero na'a Dios nunë' ga nabánlenli'-në' tsözxón Cristo, en buniti lahuë' libí'ili' ca naca yúgu'të dul-la' gubága'li'.

¹⁴ Dios busúluë' yugu' le nabága'ru' le nazúajgaca lu xibá queë', lë na' tu' zegui rë'u didza'. Bugúë' lë na' nabága'ru', en budé'ë le lë'e yaga cruz ca tu le nabáguë'ë Cristo. ¹⁵ Cate' gútië' Cristo lë'e yaga cruz, bugúë' yöl-la' huáca unná bë' quégaca bö' xihui' unná bë', en quégaca bö' xihui' dë lu né'eguequi yöl-la' huáca, tu' bulu'e lahui le nácagaca bö' xihui' na', en bugúë' idutë le guta' lu né'eguequi.

Ral-la' güi' i ládxi' ru' le naca que yehua' yubá

¹⁶ Que lë ni na', bití' güi'ili' lataj nu uzegui libí'ili' didza' ca naca le rë'aj ráguli', o tu' cabí runli' xzön yugu' dza laní, o tu' cabí runli' xzön beo' si' ruzé, o tu' cabí runli' xzön yugu' dza lá'ayi quégaca bönachi. ¹⁷ Yúgu'të lë ni naca ca tu bixín que le ral-la' gaca, ate' le rulu'i yúgu'të lë ni náquië' Cristo caz. ¹⁸ Bití' güi'ili' lataj nu gun ga unítli' le ral-la' sí'ili', nu runda' bayudxi ga ilaca nöxaj ládxi'gaca bönachi, en ilún xzön yugu' gubáz lá'ayi. Tu'gutsa' cuíngaquië' le cabí bila'lé'enë', en tun ba xzön cuíngaquië' ca naca le dzó'ösö ícjagaquië' lu yöl-la' bönáchisö quégaquië'. ¹⁹ Nu run caní bití' da' Cristo. Náquië' Xanru', en ruzóë' tsutsu idútë le naca cazë', le nácaru' rë'u. Rugahuë' le, en runë' ga naca tuz ni'a que le zeaj lu dxita lu bin, ate' rizxón idútë le naca cazë' ca ré'ënë' Dios uxönë' le.

²⁰ Libí'ili' chinátlenli'-në' Cristo para cabirö ila'nná be'e xibá que yödzölió libí'ili'. ¿Bizx que runli' tsca ni nácali' que yödzölió, en runli' ca ta'nná bë' xibá que? ²¹ Caní ta'nná yugu' xibá que yödzölió ni:

Bití' quítjanu' lë ni.

Bití' gagu' lë na'.

Bití' canu' ia'tú le dë.

²² Yúgu'të lë ni ila'niti cate' chibugunru' léguequi dxin. Caní nácagaca le ta'nná bë' bönachi, en yugu' xibá nazi' lu né'eguequi. ²³ Le nácate, yugu' xibá ni, téqui bönachi nápagaca yöl-la' réajni'i. Tun ga tu'lu'i cuínguequi ca bönachi yudo', en ga tu'lu'i cuínguequi nöxaj ladxi', en ga tu'saca' zí'gaca idútë le zeaj naca caz, pero xibá ni bití' ca' tácalen rë'u para gaca inná bé'eru' yugu' le rizé ládxi'ru' lu yöl-la' bönáchisö queéru'.

3

¹ Na'a, channö nubánlenli'-në' Cristo, guli'güi' ladxi' le nácagaca que yehua' yubá ga ni' rö'ë Cristo cuita lë'ë ibëla Dios, ga náquië' lo. ² Guli'sá' ladxi' le taca xitsá'alö, en calëga le taca luyú ni. ³ Naca queéli' tsca chinátli', ate' yöl-la' na'bán queéli' rapa chi'ë Cristo ga ni' zoa cazë' Dios. ⁴ Cristo nabánili' libí'ili'. Cate' ulu'i lahuë' Lë', ní'irö ulu'i loli' ca' libí'ili' tsözxón len Lë' lu bení' queë'.

Yöl-la' na'bán gula, en yöl-la' na'bán cubi

⁵ Que lë ni na', guli'gún ga ila'niti le nacuá'len libí'ili' que yödzölió ni:

Yugu' le ruá' dö', en le nácagaca xihui',

en yugu' le rizé ládxi'li' le ruá' dö',

en yugu' le rizé ládxi'li' le naca xihui',

en yöl-la' ruhuidi'.

Yöl-la' ruhuidi' naca lëbi ca nu reaj ladxi' budó' guiój budó' yaga, tu' cabí reaj ladxi' Dios nu ruhuidi'. ⁶ Tun bönachi yugu' le caní, ate' gunë' Dios xíguia' yúgu'të nupa bití' túngaca ca rna xtídzë'ë. ⁷ Yugu' dul-la' caní benli' ca' libí'ili' cate' ni' nadó'dili' lu né'eguequi. ⁸ Na'a, bíti'rö gunli' yugu' lë ni:

Bíti'rö idzá'ali', en bíti'rö leli'.

Bíti'rö nu gunli' zi', en bíti'rö inné xíhui'li'.

Bíti'rö innali' le ruá' dö'.

⁹ Bití' sí' yé'eli' luzá'ali' tuli' ia'tuli' tu' chinucá'anali' le gúcali' zí'alö, en yugu' le benli' zí'alö. ¹⁰ Chinácali' bönachi cubi, ate' tu tu dza ricúbili', ruhuöácaröli' ca naca Nu na' bun libí'ili', para gúnbë'ëli' Lë' idú ca náquië' Lë'. ¹¹ Tu' chidzágaru'-në' Cristo:

Bíti'rö nácaru' bönni' zi'tu', en bönni' judío.

Bíti'rö nácaru' bönni' narugu lu xipéla'gaquië' le naca bë' nu da' Dios, en bönni' biti' narugu lu xipéla'gaquië' lë na' naca bë'.

Bíti'rö nácaru' bönni' ta'yéajni'inë', en bönni' biti' ta'yéajni'inë'.

Bíti'rö nácaru' bönni' nadó'ogaquië', en bönni' biti' nadó'ogaquië'.

Na'a, Cristo náquië' yúgu'të le nácagaca lesaca', en dzáguië' yúgu'tëru'.

¹² Dios nadxí'inë' libí'ili', en guróë' libí'ili' para guéquili' quez queë'. Que lë ni na', ral-la':

Güi' ládxi'li' luzá'ali', en gácali' dxi'i ladxi',

en nöxaj ladxi', en cuidi' ladxi',

en cózali' zxön ladxi'.

¹³ Channö raca didza' bizxaj tuli' len ia'tuli', guli'guá' ilén luzá'ali' tuli' ia'tuli', en buli'niti lo luzá'ali' tuli' ia'tuli' ca na' benë' Cristo, buniti lahuë' libí'ili'. ¹⁴ Le nazáca'tërö ca yúgu'të lë ni, ral-la' idxí'ili' yúgu'të bönachi, tu' naca yöl-la' nadxí'i le run ga nácaru' tuz, en ga nácaru' idú. ¹⁵ Guli'güi' lataj le ribequi dxi icja ládxi'do'oru' inná bë' lu icja ládxi'do'oli', lë na' runnë' Dios queéru'. Que lë ni na' bulidzë' libí'ili', para gácali' tuz lu idútë le naca cazë' Cristo. Guli'guíë' Dios: "Xclenu'."

¹⁶ Guli'sí' lu ná'ali' xtídzë'ë Cristo le gaca queéli' tu yöl-la' tsahui' zxön. Tu' zóalen libí'ili' yöl-la' réajni'i queë' Dios, buli'sedi, en buli'zëjni'i luzá'ali' tuli' ia'tuli'. Idú ládxi'li' guli'gul-la yugu' salmo queë' Dios, en yugu' le rul-la yöl-la' ba, en yugu' le rul-la lá'ayi, ate' guiéli'-në' Dios: "Xclenu'." ¹⁷ Yúgu'të le runli', le naca didza' ruí'ili' o le naca dxin runli', guli'gún yúgu'të lu Lë' Xanru' Jesús, en guiéli'-në' Dios Xuz: "Xclenu'", dzáguië' Cristo libí'ili'.

Le ral-la' gunru' que luzá'aru' tu' néquiru' queë' Cristo

¹⁸ Libí'ili', nigula nutsaga ná'aleni' bönni' queéli', guli'gún ca rnna xtídzá'gaquië' bönni' que queéli' ca ral-la' gunli', tu' néquili' queë' Xanru'.

¹⁹ Libí'ili', bönni' nutsaga ná'aleni' nigula queéli', guli'dxí'i nigula que queéli', en biti' uzéli' bach légacanu.

²⁰ Libí'ili', bi'i ra'bán, guli'gún ca rnna yúgu'të xtídzá'gaquië' xuz xiná'ali'. Lë ni raza ládxi'ë' Xanru'.

²¹ Libí'ili', núlöli' nácali' xúzgaca bí'ido', biti' tödi bë' usína'li' zxi'inili', para cabí huóaj ládxi'gacabi'.

²² Libí'ili', núlöli' nácali' bönni' nadó'ogaquië', guli'gún ca rnna yúgu'të xtídzá'gaquië' xanli' luyú ni. Calégasö gunli' caní cate' tu'yúë' libí'ili'

ca na' tun nupa té'ëni ilún ga ila'yaza ládxi'gaca bönachi, pero idú ládxi'li' guli'gún xichíngaquië' ca ral-la' ilún nupa tadxi Dios.

²³ Ca naca yúgu'të le runli', guli'gún idú ládxi'li', gaca ca runli' xichinë' Xanru', en calégasö ca runli' xichíngaca bönachi.

²⁴ Chinóz quézili' ubi'ë Xanru' queéli', gunnë' queéli' le chinupé'ë Dios quégaca nupa nácagaca zxi'ini cazë'. Caní gaca, tu' runli' xichinë' Xanru' Jesucristo.

²⁵ Nu ruá' dö', ubi'ë Xanru' que nu na' ca naca dö' ruá' nu na', tu' cabí utsé'ë Dios ca ral-la' ubi'ë que queégaca bönachi.

4

¹ Libí'ili', núlöli' nácali' xángaca bönachi, guli'gún le naca tsahui', en le naca dxi'a ca rugunli' dxin yugu' bönni' huen dxin queéli'. Guli'tsöjné zoa ca' Xanli' yehua' yubá.

² Libí'ili', yúgu'téli', buli'lídzatica'së' Dios. Buli'subán ládxi'li' ulídzali'-në' Dios, en guli'guíé': "Xclenu'."

³ La' ná'asö cate' rulídzali'-në' Dios, guli'nabi-në' ca' gácalenë' netu', en gunnë' netu' lataj quíxjö'ötu' xtídzë'ë Xanru', para gaca uzéajni'itu' bönachi le bigachi' ca naca queë' Cristo. Tu' runa' caní nadzuna' lidxi guíé ni. ⁴ Guli'nabi-në' ca' Dios, gunnë' neda' lataj usalaj lá'ana' le bigachi' na' ca ral-la' guna'.

⁵ Lu yöl-la' réajni'i queéli', guli'gún le runli' lógaca nupa biti' ta'yéajlé' Cristo. Guli'gunda' dxin yugu' dza uzá' ládxe'ë Dios queéli', gunli' xichiné'. ⁶ Ral-la' güf'ili' didza' ca raza ládxe'ë Dios, en ca ral-la' gun nupa néquiquequi queë'. Ral-la' inózili' ca' naca ral-la' ubí'ili' didza', bi guíé'li' tu tu bönachi.

Yugu' bönachi queë' Cristo tu' gapa Dios luzé' eguequi

⁷ Tíquico quíxjö'i'në' libí'ili' le raca quia' ni. Náquië' bóchi'ru' nadxí'iru'-në'. Náquië' ca' huen dxin idú queë' Xanru', en rúnlenë' neda' tsözxón dxin queë' Xanru'. ⁸ Que lé ni na' risól-la'a-në' ga zóali', para uzéajni'inë' libí'ili' le raca quia', en utipë' ládxi'li'. ⁹ Onésimo, bóchi'ru' na' nabábalenë' libí'ili' sa'yéajlenë' lé' tsözxón. Náquië' ca' bóchi'ru' nadxí'iru'-në', en réajlé'ë Xanru'. Chopë' ni ulu'siyönnë' libí'ili' yúgu'të le raca ni.

¹⁰ Aristarco, bönni' na' yú'ulenë' neda' tsözxón lidxi guíé rugapë' Dios libí'ili'. Bi'i Marcos, bi'i bönni' queënu nigula zanë' Bernabé rugápabi' Dios ca' libí'ili'. Chigudxa' libí'ili' bi gunli' queébi' bi'i Marcos na'. Channö huídabi' ga zóali', guli'gún-bi' bal. ¹¹ Bönni' ni lé' Jesús, en zoa ia'tú lé' Justo lësca' rugapë' Dios libí'ili'. Nacuá' zían bönachi judío ta'yéajlé' Cristo, pero tsónnasë' ni ladaj bönachi judío tunë' dxin que le rinná bë'ë Dios tsözxón len neda', en tu'huí' zxóndë'ë neda'. ¹² Epafras, bönni' ni nababë' ca' libí'ili' rugapë' Dios libí'ili'. Náquië' huen dxin queë' Cristo, en idú ládxe'ë rulidzë' Dios, en ráta'yutica'së' lahuë' gácalenë' libí'ili' para gácali' idú ládxi', en sóali' ca' sina' gunli' yúgu'të le ré'ëni quéziné' Dios. ¹³ Runa' ba nalí queë' Epafras na', ruí'ida' ládxe'ë libí'ili' enca' nupa nacua' yödzö Laodicea, en nupa nacua' yödzö Hierápolis. ¹⁴ Demas, enca' Lucas tu'gapë' Dios libí'ili'. Náquië' Lucas bönni' na' ruúnë' bönachi, ate' nadxí'iru'-në'.

¹⁵ Guli'gapa Dios bóchi'ru' nacu'ë Laodicea, enca' Ninfas, en bönachi queë' Cristo nacua' lídxinu Ninfas na'. ¹⁶ Cate' údxi ulábalí' guichi ni ga ni' zóali', guli'gún ga ulu'laba le bönachi queë' Cristo nacua' Laodicea. Buli'laba ca' libí'ili' guichi na' ila'söl-la' bönachi Laodicea na' queéli'. ¹⁷ Guli'guíé' Arquipo: "Bë' ládxi'u gunu' dxin na' budödë' Xanru' lu no'o."

¹⁸ Neda', Pablo, ruzúaj caza' lu guichi dídza'do' ni, rnnía': Rugapa' Dios libí'ili'. Guli'tsöjné ca raca quia' nadzuna' lidxi guíé ni. Rinábida'-në' Dios uzá' ládxe'ë queéli' le naca dxi'a. ¡Ca' gaca!

DIDZA' ZÍ'ALÖ GUSÓL-LĒ'Ē PABLO YÖDZÖ TESALÓNICA

Pablo rugapë' Dios bönachi queë' Cristo nacua' Tesalónica

¹ Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzagagaquië' neda' Silvano, en bi'i Timoteo. Rinábida'-në' Xúziru' Dios, enca' Xanru' Jesucristo uzá' ládxë'ë queéli', en gunë' ga soa dxi icja ládxi' do'oli'.

Yugu' le taca bë' ta'yéajlë' bönachi Tesalónica Dios

² Rética'stu'-në' Dios: "Xclenu" cate' röjnetu' ca naca queéli' yúgu'tëli'. Röjnética'stu' libí'ili', bi rinábitu'-në' Dios ni'a queéli' cate' rulidztu'-në'. ³ Röjnética'stu' lahuë' Xúziru' Dios ca naca le runli' tu' réajlë'ëli' Cristo, en ca naca dxin runli' tu' nadxí'ili'-në', en ca na' nácatuca'sili' tsutsu tu' runli' löza Xanru' Jesucristo. ⁴ Böchi' luzá'atu', Dios nadxí'inë' libí'ili', ate' nöztu' guró'cazë' Lë' libí'ili'. ⁵ Caní naca, tu' bidxín queéli' didza' dxi'a runtu' libán que, calëga len dídza'sö, pero lësca' len yöl-la' huáca bidxín queéli', ate' Dios Bö' Lá'ayi benë' tsutsu le, ate' idú ládxi'li' benli' löza le. Nöz quézili' ca gúcatu' ga zóali' tu' nadxí'itu' libí'ili'.

⁶ Libí'ili' butsó' cuinli', ate' runli' ca runtu' netu', enca' ca benë' Xanru', tu' guxzí' lu ná'ali' xtídzë'ë, ate' sal-la' gudí' guxzáca'da'ali', budzéjali' tu' zóalenë' Dios Bö' Lá'ayi libí'ili'. ⁷ Caní naca, chinácali' tu le naca bë' lógaca yúgu'të bönachi ta'yéajlë' Cristo nacua' luyú Macedonia, en luyú Acaya. ⁸ Caní naca, tu' guzé xtídzë'ë Xanru' ni'a queéli'. Calégasö luyú Macedonia, en luyú Acaya, pero lësca' yúgu'të lataj guzé didza' ca réajlë'ëli' Dios. Caní naca, biti' bi run bayudxi innatu', ⁹ tu' ta'guixjö' la' léguequisö bönachi ni' queëtu' ca benli' netu' bal, en ca na' butsó' cuinli'. Bucá'anali' yugu' budó' guió' budó' yaga, en böácali' queë' Dios para gunli' xichinë' Dios ban, Nu naca idú Dios. ¹⁰ Na'a, ribózali' dza huödë' Zxí'inë' Dios, irúajë' yehua' yubá. Dios busubanë' Lë' lu yöl-la' guti. Nu ni naca Jesús, Nu rusólá rë'u lu dul-la', para cabí soa le gun ga ichúguië' Dios queëru' dza si' za'.

2

Xichinë' Dios benë' Pablo yödzö Tesalónica

¹ Böchi' luzá'atu', nöz quézili' biti' guca nítisö dxin queë' Dios bentu' cate' ni' bidxintu' ga zóali'. ² Nózili' ca guca queëtu' lu yödzö Filipos, ca na' gudí' guxzáca'tu', ate' guluá' dö' bönachi ni' queëtu'. Ní'irö cate' bidxintu' ga zóali' gúcatu' rugu ladxí' tu' guzóalenë' Dios queëru' netu', ate' bentu' libán loli' que didza' dxi'a le budödë' Dios lu na'tu'. Caní bentu' sal-la' gula'dá'baga'da' bönachi ládzali' netu'. ³ Cate' ni' guchízatu' icja nágali' xtídzë'ë Dios, bë'ëtu' didza', calëga tu' nazí'ie ye' netu', en calëga tu' bi guzé ládxi'tu' le dë queéli', en biti' guxzí' yé'etu' libí'ili'. ⁴ Tu' nuzxöni ládxë'ë Dios netu', budödë' lu na'tu' guntu' libán que didza' dxi'a queë', ate' canísö ruí'itu' didza'. ⁵ Nöz quézili' catu' caz bë'lentu' libí'ili' didza' le gun zxön libí'ili', en biti' guléaj tsahui' cuintu' ca run nu bi rizé ladxí' le dë queéli'. Nöz quézinë' Dios naca caní. ⁶ Biti' gudí'ljatu' yöl-la' ba le naca que yödzölió ni, lë na' cú'uli' libí'ili' netu', en calëga le ila'gú'u bönachi netu'. Sal-la' dë lu na'tu' inná bë'etu' libí'ili' tu' nácatu' gubáz nasól-lë'ë Cristo ⁷ guzóalentu' libí'ili' dxi'i ládxi' do', en bentu' ca runnu xiná'agacabi' bi'i huë'ënido', run chí'inu légacabi' dxi'i ládxi' do'. ⁸ Caní guca, bidxí'ide'etu' libí'ili', ga bidxintë gú'unitu' udóditu' lu ná'ali', calégasö didza' dxi'a queë' Dios, pero lá'tu' biqui' udódi caztu' yöl-la' na'bán queëtu', tu' nadxí'ide'etu' libí'ili'. ⁹ Röjneli', böchi' luzá'atu', ca na' guca cate' ni' bentu' libán loli' que didza' dxi'a queë'

Dios, ca béntica'stu' dxin zi'i, ate' rëla, en të dza bentu' dxin para cabí usaca' zí'itu' nitili' libí'ili'.

¹⁰ Libí'ili' na' réajlë'ëli' Cristo, huáca gunli' ba nalí, ate' nózinë' Dios ca na' gudáentu' libí'ili' idú ca raza ládxë'ë Dios, en idú dxí'ado', en ca na' cuntu nu gaca bi inné que.

¹¹ Lësca' caní nózili' ca bentu' ca runë' tu bönni' quégacabi' xzí'inë', guchízatu' icja nágali', en butípatu' ládxi'li' tu tuli'. ¹² Busá'atu' ládxi'li' gunli' ca ral-la' gun nu nequi queë' Dios. Lë cazë' bulidzë' libí'ili' para gaca tsú'uli' ga na' rinná bë'ë Lë' lu bení' queë'.

¹³ Que lë ni na' ca', rética'stu'-në' Dios: "Xclenu'." Caní runtu' tu' guzxi' lu ná'ali' xtídzë'ë Dios le biyónili' bé'ëtu' didza', calëga ca xtídzä' bönáchisö, pero ca le nácatë naca, xtídzë'ë Dios naca. Xtídzë'ë na' run dxin lu icja ládxi'do'oli' libí'ili', réajlë'ëli' Cristo.

¹⁴ Böchi' luzá'atu', raca queéli' ca raca quégaca bönachi queë' Dios, nupa néquiquequi queë' Jesucristo luyú Judea. Caní naca tu' chigudí' guzjáca'da'ali' lu ná'agaca bönachi uládz queéli', lébisö ca na' gula'guí' gula'záquië' légaquië' lu ná'agaca bönachi uládz quégaquië', nupa ni' nácgaca bönni' judío. ¹⁵ Yugu' bönni' judío na' gulútië' Xanru' Jesús, en gulútië' ca' yugu' bönni' gulu'ë didza' uláz queë' Dios. Gula'bía ládxi'gaquië', en bulu'láguë' ca' netu'. Biti' tunë' le raza ládxë'ë Dios, tu' cabí ta'lé'enë' dxi'a yúgu'të bönachi izá'a. ¹⁶ Tu'záguë'ë ca' xinöztu', para cabí guntu' libán lógaca bönachi izá'a na' biti' nabábagaca légaquië', tu' ru'íleentu' léguequi didza' para ulu'lágaca. Caní raca, tu'zántica'së' dul-la' nabága'gaquië', en chinabága'gaquië' xíguia' le run ga ichúguië' Dios quégaquië'.

Pablo ré'ënë' tsöjyüë' böchi'ru' nacu'ë Tesalónica

¹⁷ Na'a, böchi' luzá'atu', ruhu'ínitu' ca runë' tu bönni' uzëbi tu' nulá'alentu' libí'ili' tu chí'ido', pero sal-la' biti' rilé'etu' libí'ili', biti' nál-la ládxi'tu' libí'ili'. Que lë ni na', ruí'i ládxi'rötu' ulé'etu' loli', tu' rizëda' ládxi'tu' guntu' caní. ¹⁸ Que lë ni na' ca' gú'unitu' guídatu' ga zóali', ate' neda', Pablo, le nácatë bë' ládxa'a guída' chopa tsonna luzuí, pero Satanás, tu' xihui', buzaga' xinöztu'. ¹⁹ ¿Bizxi caz naca le run ga runtu' löza, o le run ga rudzëjatu', o le ral-la' idéli'tu', le uzí'itu' xibé lahuë' Xanru' Jesucristo cate' huödë'? ¿Naru' cabí libí'i cázali' na'? ²⁰ Libí'i cázali' nácali' le run ga nácatu' bica' ba, en le run ga rudzëjatu'.

3

¹ Que lë ni na', cate' bíti'rö guca guá' ilentu', ben xtídzä'tu' ugá'anatu' chópatu' lu yödzö Atenas, ² ate' gusól-la'tu'-bi' bi'i böchi'ru', Timoteo ga zóali'. Nácabi' bi'i huen dxin queë' Dios, en rúnlenbi' neda' tsözxón libán que didza' dxi'a queë' Cristo. Gusól-la'tu'-bi' ga zóali' para cuéquibi' libí'ili' tsutsu, en ichízabi' icja nágali' ca ral-la' tséajlë'ëli' Cristo, ³ para cabí soa nu gaca chopa ladxi' ni'a que le tu'saca' zi' bönachi ni netu'. Nöz quézili' zóaru' yödzölió ni para guá' ilenru' le caní. ⁴ Lësca' cate' ni' guzóalentu' libí'ili', busiyöntu' libí'ili' ca chizóa gaca le ulu'saca' zi' rë'u, le gaca ca na' chiguca queëtu', ate' nöz quézili' lë na'. ⁵ Que lë ni na', cate' bíti'rö guca guá' ilena', gusól-la'a-bi' bi'i Timoteo ga zóali', para ududíxjöi'ibi' neda' ca naca queéli' ca réajlë'ëli'-në' Cristo, en channö cabí gulú'u tu' xihui' libí'ili' nöza dul-la', nu na' rigú'u bönachi nöza dul-la', en channö cabí böáca nítisö dxin na' bentu' ga zóali'.

⁶ Cate' buzá'abi' bi'i Timoteo ga zóali', en budxinbi' ga zóatu', busiyönbi' netu' le naca dxi'a. Bé'ëbi' didza' ca na' réajlë'ëli' Cristo, en ca na' nadxí'igacali'-në' yugu' böchi' luzá'aru', en ca na', lu yöl-la' dxi'i ladxi' queéli' röjnética'sili' netu', enca' ca na' raca ládxi'li' ulé'eli' netu', ca na' netu' raca ládxi'tu' ca' ulé'etu' libí'ili'. ⁷ Que lë ni na', böchi' luzá'atu', cate' ni' gudí' guzjáca'tu' yúgu'të lë ni, en zían le guca queëtu', bidxín didza' queëtu' le buí' zxön netu' cate' biyónitu' ca réajlë'ëli'-në' Cristo. ⁸ Na'a, nuhuóaca ládxi'tu' tu' riyónitu' ró'öli' tsutsu ca réajlë'ëli'-në' Xanru'. ⁹ ¿Nacxi caz gaca guíëtu'-në' Dios: "Xclenu'" ca ral-la' guntu' ni'a que yúgu'të le run ga rudzeja ládxi'tu' lahuë' Dios

queéru' ni'a que le nácali' libí'ili'? ¹⁰ Bayudxi rulidztu'-në' Dios, en rinábitu'-në' rëla, en të dza para gaca ulé'etu' libí'ili', en usá'atu' le riyadzaj queéli' ca naca le réajlë'ëli'-në' Cristo.

¹¹ Na'a rinábitu'-në' Xúziru' Dios, enca' Xanru' Jesucristo, cu'ë netu' nöza ga idxintu' ga zóali'. ¹² Lësca' rinábitu'-në' Xanru' gunë' ga gala, en gaca idú ca nadxí'ili' luzá'ali' tuli' ia'tuli', en ca nadxí'ili' yúgu'të bönachi, ca na' netu' nadxí'itu' ca' libí'ili'. ¹³ Rinábitu'-në' gunë' ga gaca tsutsu, en idú dxi'a icja ládxi'do'oli' lahuë' Xúziru' Dios ca sa'yéaj le naca lá'ayi, ate' gunë' caní ga idxinrö dza huödë' Xanru' Jesucristo, dzágagaca bönachi lá'ayi queë' Lë'.

4

Le runru' le raza ládxe'ë Dios

¹ Ia'stú, böchi' luzá'atu', ni'a queë' Xanru' Jesús ráta'yutu' loli', en richízatu' icja nágali' para gunli' ca naca le chinazédali' lu na'tu' ca ral-la' gunli' le raza ládxe'ë Dios. Ca na' chirunli', ca' ral-la' gúntica'sili'.

² Chinóz quézili' yugu' le gunná bé'etu' libí'ili' uláz queë' Xanru' Jesús. ³ Le ré'ënë' Dios naca gácali' idú dxi'a, en bíti'rö gunli' le cabí naca tsahui', ⁴ en inózili' tu tuli' nacxi ral-la' sóalenli'-nu nigula que queéli' idú ca sa'yéaj le naca lá'ayi, en gunli' légacanu bal. ⁵ Biti' ral-la' sóalenli'-nu nigula queéli' lu yöl-la' rizé ladxí' le ruá' dö', ca na' tun bönachi bití nabábagaca Dios, en bití' núnbë' gaca Dios. ⁶ Ca nátagaca lë ni, cuntú nu ral-la' tódi bë', en cabí si' ye'e böchi' luzé'e bagáchi'sö, tu' ichúguië' Lë cazë' Xanru' quégaca yúgu'të nupa tun le caní, gunë' ca na' chigúdxitu' libí'ili', en bentu' ba nalí que loli'. ⁷ Dios bulidzë' rë'u, calëga para gunru' le ruá' dö', pero para gácaru' idú dxi'a. ⁸ Caní naca, nu ruzóa tsölá'alö lë ni, calëga bönáchisö ruzóa tsölá'alö, pero Dios caz ruzóa tsölá'alö, tu' gusól-lë'ë Lë cazë' Dios Bö' Lá'ayi queéru', Nu ru'i caní didza'.

⁹ Biti' run bayudxi uzúaja' queéli' lu guichi ca ral-la' idxí'igacali'-në' böchi' luzá'ali', tu' chinazédali' la' libí'isili' lu në'ë Dios idxí'ili' luzá'ali' tuli' ia'tuli'. ¹⁰ Le nácatë nadxí'igacali'-në' yúgu'të böchi' luzá'aru' nacué' luyú Macedonia. Na'a, ráta'yutu' loli', böchi' luzá'atu', para idxí'igacaröli'-në' ca' yúgu'të böchi' luzá'ali'. ¹¹ Ráta'yutu' loli' ca', güi'i ládxi'li' cózali' dxí'ado', en gunli' yugu' le dë lu ná'asili', en gunli' dxin len na'a cuinli' ca na' chigunná bé'etu' libí'ili'. ¹² Gunná bé'etu' libí'ili' caní para gaca gunli' le naca dxí'ado' lógaca nupa bití' nabábagaca libí'ili', en caní gaca, bití' bi yadzaj queéli'.

Ca gaca cate' huödë' Xanru' Jesucristo

¹³ Lësca', böchi' luzá'atu', ré'ënitú inózili' ca raca quégaca nupa chinátigaca, para cabí huí'inili' ca tun ia'zica'rö bönachi bití' zoa le tun löza. ¹⁴ Channö réajlë'ëru' gútië' Jesús, en bubanë', lësca' caní ral-la' uzxöni ládxi'ru'-në' Dios gunë' ga huódalengaca tsözxón Jesús nupa ni' chigulati, en gula'yéajlë' Lë'.

¹⁵ Que lë ni na' rigúxjöi'itu' libí'ili' xtídzë'ë Xanru' le rnna caní: "Rë'u ni zóaru' nabanru', en ugá'anaru' ga idxinrö dza huödë' Xanru' Jesucristo, bití' tsöjtságaru'-në' Cristo zí'alö ca nupa chigulati." ¹⁶ Caní gaca, tu' huötjé' Lë cazë' Xanru', en irúajé' yehua' yubá, ate' yön chi'ë, len yöl-la' unná bë' ulidzë', ate' yön ca' chi'ë gubáz lá'ayi lo, ate' yön ca' luzu ucödxë' Dios, ate' ulu'bán nupa na' chigulati, en gula'yéajlë' Cristo. ¹⁷ Ní'irö rë'u ni zóaru' nabanru', en nagá'anaru' luyú ni, uchisë' rë'u tsözxón len léguequi lu böaj lúxiba para tsöjtságaru'-në' Xanru' lu bö'ös. Caní gaca, sóaléntica'siru'-në' Xanru'. ¹⁸ Que lë ni na', guli'huí' zxön luzá'ali' tuli' ia'tuli' ca nátagaca didza' ni.

5

¹ Na'a, ca naca dza na', o rëla na' cate' ilaca lë ni, bití' run bayudxi uzúaja' queéli' lu guichi, böchi' luzá'atu'. ² Libí'ili' chinóz quézili' dxi'a ca gaca dza cate' huödë' Xanru'. Idxinë' tsálido'os ca ridxinë' gubán chi'i dzó'ölö. ³ Cate' ila'nná bönachi: "Raca dxi'a

queéru', en bití' bi gaca queéru'", ní'irö la' idxintë le usuniti léguequi, læ na' idxín queéqui ca na' ridxín le rigu'i rizáca'nu nigula na' chizóa sóabi' bí'ido' queénu, ate' cuntú nu nutsa' ladaj bönachi yödžölió ni nu ulá cate' gaca læ na' gaca dza na'. ⁴ Na'a, böchi' luzá'atu', bití' zóali' chul-la niti, en que læ ni na' bití' idxín dza ni' queéli' bagáchi'sö ca ridxinë' bönni' gubán. ⁵ Yúgu'tëli' nácali' bönachi que bení', en que lahui' dza. Bití' nácaru' bönachi que chi'i dzó'ölö, en calëga que le naca chul-la. ⁶ Que læ ni na', bití' ral-la' tödi yëla loru' ca raca queégaca nupa bití' nabábagaca rë'u, pero ral-la' usubán ládxi'ru', en cózaru' ba'a ládxi'do'. ⁷ Nupa tasi, chi'i dzó'ölö tasi, en nupa ta'zudxi, chi'i dzó'ölö ca' ta'zudxi. ⁸ Na'a, rë'u ni, nácaru' que lahui' dza, en ral-la' cózaru' ba'a ládxi'do', tu' chinácuru' xzaru' le run chi'i rë'u, le naca yöl-la' réajlë' queéru' Dios, en yöl-la' nadxí'i, ate' le runru' löza uláru' naca ca tu lu'u guíë le run chi'i ícjaru'. ⁹ Caní naca, tu' nuzöë' Dios rë'u ni, calëga para idxinru' ga ichúguië' queéru', pero para uláru' tu' ruzxöni ládxi'ru'-në' Xanru' Jesucristo, ¹⁰ tu' gútië' Jesús uláz queéru' para sóaru' ibanru' tsözxón len Lë' cate' huödë', sal-la' chinátiru' o sóaru' ibanru' dza ni'. ¹¹ Que læ ni na' ral-la' utípali' ládxi'li' tuli' ia'tuli', en gunli' tsutsu tuli' ia'tuli' ca na' chirunli'.

Pablo richízië' icja nágagaquië' böchi' luzé'ë ta'yéajlë'ë Cristo

¹² Ráta'yutu' loli', böchi' luzá'atu', gúnbë'ëli' nupa tun xichinë' Xanru' ga zóali', nupa na' ta'nná be'e libí'ili' uláz queë' Xanru', en tu'sá' ládxi'li'. ¹³ Ráta'yutu' loli' ca', gunli' légaquië' bal lu yöl-la' nadxí'i queéli', tu' tunë' dxin na'. Guli'cöza dxí'ado' tuli' len ia'tuli'.

¹⁴ Lë'sca' caní richízatu' icja nágali', böchi' luzá'atu', para usá'ali' ládxi'gaca nupa bití' túngaca dxin, en utípali' ládxi'gaca nupa tu'huóaj ládxi'guequi, en gácalenli' nupa bití' naca tsutsu ca ta'yéajlë' Cristo, en gácali' nöxaj ladxí' lógaca yúgu'të bönachi.

¹⁵ Guli'gún chi'i cuinli' para cabí uzi' lëbi luzá'ali', en cabí guá'ali' dö' que nu ruá' dö' queéli', pero guli'güi' ládxi'li' gúntica'sili' le naca dxi'a que luzá'ali' tuli' ia'tuli', en queégaca yúgu'të bönachi.

¹⁶ Buli'dzéjatica'sö,

¹⁷ en buli'lídzatica'së' Dios,

¹⁸ en guli'guíë' Lë': "Xclenu'."

Caní ral-la' gunli' ni'a que yúgu'të le raca queéli', tu' nácgaca læ ni le ré'ënë' Dios gunli' tu' nácali' queë' Jesucristo.

¹⁹ Bití' uzóa dxili' le rulídzatica'së' Dios Bö' Lá'ayi libí'ili'.

²⁰ Bití' uzóali' tsölá'alö xtídzë'ë bönni' ru'ë didza' uláz queë' Dios.

²¹ Guli'sí' bë' yúgu'të, en guli'sí' lu ná'ali' le naca dxi'a.

²² Bití' bi gútsa'li' le ruá' dö'.

²³ Lë cazë' Dios, Nu run ga zoa dxi icja ládxi'do'oru', gunë' ga gácali' idú dxi'a, en gun chi'ë bö' naca cázali', en icja ládxi'do'oli', en idútë le nácali', ate' cuntú nu gaca bi innë queéli' dza ni' huödë' Xanru' Jesucristo. ²⁴ Runë' Dios ca rnnë', Bönni' na' bulidzë' libí'ili'. Lë cazë' gunë' yugu' læ ni.

Pablo rigu'ë yugu' böchi' luzé'ë lu në'ë Dios

²⁵ Böchi' luzá'atu', buli'lidzë' Dios, en inábili'-në' gácalenë' netu'.

²⁶ Buli'gapa Dios yúgu'të böchi' luzá'aru', en unída'li' légaquië' lu yöl-la' nadxí'i queéli'.

²⁷ Ní'a queë' Xanru' Dios ruchi'a libí'ili' ulábali' guichi ni lógaca yúgu'të böchi' luzá'aru' nabábagaquië' Cristo.

²⁸ Rinábida'-në' Xanru' Jesucristo uzá' ládxi'ë queéli' le nácgaca dxi'a queë'. ¡Ca' gaca!

DIDZA' BUROPI GUSÓL-LĚ'Ě PABLO YÖDZÖ TESALÓNICA

Pablo rugapë' Dios bönachi queë' Cristo nacua' Tesalónica

¹ Neda', Pablo, rugapa' Dios libí'ili', zóali' Tesalónica. Nácali' queë' Xúziru' Dios, enca' queë' Xanru' Jesucristo. Silvano, en bi'i Timoteo dzágagaquië' neda'. ² Rinábitu' Xúziru' Dios, en Xanru' Jesucristo, uzá' ládxë'ë queéli', en gunë' ga soa dxi icja ládxi'do'oli'.

Dios ichúguië' quégaca bönachi dul-la' ila'nítigaca cate' huödë' Cristo

³ Ral-la' guíëtica'stu'-në' Dios: "Xclenu'" ca naca queéli', böchi' luzá'atu', ate' naca dxi'a guntu' caní, tu' zeaj rácarö idú ca réajlë'ëli'-në' Dios. Lësca' caní, ca naxí'ili' luzá'ali' tuli' ia'tuli' zeaj rácarö idú. ⁴ Que lë ni na', len yöl-la' rudzeja rigu'xjö'ötu' ca naca queéli' lógaca bönachi queë' Dios ni, tu' ribózali' zxön ladxi', en réajlë'ëli' Dios sal-la' ta'bíada' ládxi'gaca bönachi libí'ili', en rigu'i rizáca'da'ali', pero ruá' rilenli' yúgu'të. ⁵ Yugu' lë ni taca bë' naca tsahui' ca ruchi'a rusöröë' Dios bönachi. Ru'ë lataj rigu'i rizáca'li' na'a, para gácali' lesaca' tsázali' ga ni rinná bë'ë Lë'.

⁶ Naca tsahui' ca gunë' Dios, ubi'ë quégaca nupa tu'saca' zi' libí'ili', gunë' ga ila'gu'i ila'zaca' nupa na'. ⁷ Ia'stú, libí'ili' rigu'i rizáca'li' na'a, ate' ubi'ë Dios queéli', gunë' ga uzí' ládxi'li' tsözxón len netu', dza ni' ilá' lahuë' Xanru' Jesucristo, cate' irúajë' yehua' yubá. Yugu' gubáz lá'ayi ni'a në'ë ilunë' Lë' tsözxón, en ulu'lu'ë lahui yöl-la' huáca zxön queë'. ⁸ Ilá' lahuë' Cristo dza ni' ca tu guí' zxön cate' ni' gunë' zi' nupa biti' núnbë'gaca Dios, en biti' túngaca ca rnna didza' dxi'a queë' Xanru' Jesucristo. ⁹ Yugu' bönni' caní, uzí' lëbë' légaquië', ate' tsaz tsöjtsázagaquië' lu guí' gabila. Ila'cuitë' tsaz lahuë' Xanru', ga nalá'gaca yöl-la' zxön queë', en yöl-la' huáca queë'. ¹⁰ Caní gaca dza ni' cate' huödë' para gaca queë' yöl-la' ba ni'a que le nácagaca bönachi lá'ayi queë', ate' ulu'bani ni'a que le benë' ga nácagaca yúgu'të nupa ta'yéajlë' Lë'. Caní gaca ca' queéli' tu' guyéajlë'ëli' le bentu' ba nalí que loli' ca naca queë' Jesús.

¹¹ Que lë ni na' ca', rulídzatica'stu'-në' Dios queéru', en rinábitu'-në' gácalenë' libí'ili', en gunë' ga gácali' lesaca' idéli'li' lë na' bulidzë' libí'ili' para uzí'ili' xibé. Lësca' rinábitu'-në' gunë' ga gaca idú yúgu'të le ru'i ládxi'li' gunli' le naca dxi'a, en yúgu'të dxin runli' lu yöl-la' réajlë' queéli' Lë'. Len yöl-la' huáca queë' Dios huáca gunli' lë ni. ¹² Caní gaca, gaca yöl-la' ba que Lë' Xanru' Jesucristo ni'a que le runli', ate' gácali' libí'ili' bica' ba ni'a que le gunë' Lë', gaca ca naca le buzá' ládxë'ë queéli' Dios queéru', enca' Xanru' Jesucristo.

2

Ulu'i lahuë' Bönni' Xihui'

¹ Na'a, ca naca que dza huödë' Xanru' Jesucristo, en ca gaca, udutubë' rë'u queë' Lë', ráta'yutu' loli', böchi' luzá'atu', ² para cabí güi'ili' lataj nu gun chixi libí'ili' ca nácagaca le guzxí' lu ná'ali'. Biti' cuéqui böniga icja ládxi'do'oli' ni'a que bi ta'nnë' bönni' ta'z'í' yë'ë, ta'nnë' zóalenë' Dios Bö' Lá'ayi légaquië', o ni'a que bi didza' tu'i bönachi, o ni'a que bi nazúaj tu lu guichi ta'nnë' netu' gusól-la'tu', le rnna: "Chigudödi dza huödë' Xanru'."

³ Biti' ca' güi'ili' lataj nu si' ye'e libí'ili', tu' cabí idxín dza ni' huödë' Jesús channö cabí ila'lá' lahui zí'alö zían nupa ila'dá'baga' Dios, ate' ilá' lahuë' Bönni' Xihui', bönni' na' ralla' tsázië' lu guí' gabila. ⁴ Bönni' ni uzáguë'ë, ate' lu yöl-la' run ba zxön cuinë' tá'baguë'ë yúgu'të le nequi queë' Dios, o le tun zxön bönachi lu yöl-la' run Dios bal quéguequi. Gunë' bönni' na' caní ga idxintë cö'ë ca Dios caz lu yudo' ga naca xilatjë' Dios, en gun cuinë' ca Dios.

⁵ ¿Naru' cabí röjneli' busiyönda' libí'ili' yugu' lë ni cate' ni' zóalena' libí'ili'? ⁶ Na'a, núnbë'ëli' Nu ruzaga' xinözë' Bönni' Xihui' na', para cabí ilá' lahuë' zí'alö ga idxinrö dza queë'. ⁷ Chirún dxin le nagachi' que le naca xihui', pero ná'atë zoa Nu ruzaga' xinözë'

Bönni' Xihui' na' ga idxinrö dza ucuíta cuini Nu na' ruzaga' xinözë'. ⁸ Ní'irö ilá' lahuë' Bönni' Xihui' na', ate' Xanru' Jesucristo ucul-lë' lë' len bö' irúaj ru'ë, en usunítië' lë' len le tsëpi yösa bení' que dza huödë'. ⁹ Cate' idxinë' Bönni' Xihui' na', len yöl-la' huáca que Satanás tu' xihui' ilá' lahuë'. Len yöl-la' huáca que le cabí nácatë, gunë' yúgu'të yöl-la' huáca zxön, en yúgu'të le ilaca bë', en yúgu'të le ilún ga ulu'bani bönachi. ¹⁰ Len yöl-la' huáca que le cabí nácatë, gunë' caní lógaca nupa ila'niti tu' cabí gula'zí' lu né'eguequi idú ládxi'guequi le naca idútë li, para ulu'láguequi. ¹¹ Que lë ni na' Dios gu'ë lataj idxín quéguequi tu nu run yöl-la' huáca, nu si' ye'e léguequi para ila'yéajlë' le cabí nácatë. ¹² Caní gaca para ila'baga' xíguia' yúgu'të nupa biti' gula'yéajlë' le naca idútë li, pero gula'yaza ládxi'gaca le cabí naca tsahui'.

Nupa guró cazë' Dios para ulu'lágaca

¹³ Böchi' luzá'atu', libí'ili' na' nadxí'inë' Xanru' libí'ili', ral-la' guiéctica'stu'-në' Dios: "Xclenu'" ni'a que le naca queé'li', tu' chiguró cazë' Dios libí'ili' dza ni'te para uláli' ni'a que le runë' Dios Bö' Lá'ayi, para gácali' idú tsahui' tu' réajlë'ëli' le naca idútë li. ¹⁴ Para gaca caní queé'li', Dios caz bulidzë' libí'ili', para idéli'li' gunli' tsözxön Xanru' Jesucristo lu bení' queë'. Caní gaca ni'a que didza' dxi'a runtu' libán que.

¹⁵ Que lë ni na', böchi' luzá'atu', guli'sóa tsutsu, en guli'gún chi'i didza' na' nazédali', le bé'lentu' libí'ili', en buzúajtu' queé'li' lu guichi. ¹⁶⁻¹⁷ Rinábitu'-në' Xanru' Jesucristo, en Xúziru' Dios, utipë' ládxi'li', en gunë' ga gácali' tsutsu ca naca yúgu'të le naca tsahui' runli', en yúgu'të didza' dxi'a ruí'ili'. Lë cazë' nadxí'inë' rë'u, en bennë' queéru' le ruhuí' zxóntica'sö rë'u, en le naca dxi'a runru' löza, yugu' lë na' buzá' ládxi'ë Dios queéru'.

3

Le ral-la' inábiru'-në' Dios

¹ Ia'stú, böchi' luzá'atu', buli'lidzë' Dios, en inábili'-në' gácalenë' netu', runtu' libán ni, para së xtídzë'ë Xanru', ate' ilún le bal bönachi, para gaca ni ca na' guca ga ni' zóali' libí'ili'. ² Inábili'-në' ca' para ulatu' lu ná'agaquië' bönni' xihui' tuá' dö', tu' cabí ta'yéajlë' yúgu'të bönachi Dios. ³ Na'a, tu' runë' Xanru' ca rnnë', gunë' ga gácali' tsutsu, en gun chi'ë libí'ili', para cabí idzunli' lu na' tu' xihui'. ⁴ Ruzxöni ládxi'tu'-në' Xanru' ca naca queé'li', gunli' yugu' lë ni si' gunábitu' libí'ili', ca na' chirunli'. ⁵ Rinábitu'-në' Xanru' usé'ë ládxi'li' para idxí'ili'-në' Dios, en cózali' zxön ládxi' ca na' benë' Cristo.

Ca run bayudxi gunru' dxin

⁶ Ni'a que Lë' Xanru' Jesucristo ruchí'atu' libí'ili', böchi' luzá'atu', icuítali' ga nacu'ë böchi' luzá'aru' ta'dasë' ca', en biti' tunë' ca naca xibá buséditu' libí'ili'. ⁷ Nöz quézili' ral-la' gunli' ca runtu' netu'. Biti' gudásitu' ca' netu' ga ni' zóali'. ⁸ Biti' gudágusötu' le bénnali' queétu', pero lu yöl-la' ruúbi rugu'i, en lu yöl-la' ricuidi' bentu' dxin rëla, en te dza para cabí usaca' zí'itu' nituli' libí'ili'. ⁹ Caní bentu' para gácatu' loli' ca tu le rulu'i libí'ili' ca ral-la' gunli', sal-la' dë lu na'tu' inábatu' bi gunli' queétu'. ¹⁰ Lësca' cate' ni' guzóalentu' libí'ili', buchí'atu' libí'ili' caní, le rnna: "Channö cabí ré'ënë' nu bönni' gunë' dxin, biti' gü'ili' le gahuë'." ¹¹ Canísö rnnatu' tu' riyónitu' nútsa'gaquië' ládjali' yugu' bönni' ta'dasë' ca', biti' bi dxin tunë', pero ta'dasë' ca' bi tun bi ta'nnë'. ¹² Ni'a queë' Xanru' Jesucristo ruchí'atu' yugu' bönni' tunë' caní, en richízatu' icja nágagaquië' ilunë' dxin lu yöl-la' riböza dxí'ado', para gaca ilahuë' le nequi quégacasë'.

¹³ Na'a, böchi' luzá'atu', biti' soa dxili', gúntica'sili' le naca dxi'a. ¹⁴ Channö núti'tës bönni' biti' gunë' ca rnna xtídzä'tu', le ruzúajtu' lu guichi ni, guli'gún ga gaca bë'ë bönni' na', en biti' gunli' tsözxön lë' para utuí'në'. ¹⁵ Biti' ral-la' ilé'eli'-në' ca tu bönni' biti' rilé'enë' libí'ili' dxi'a, pero guli'sá' ládxi'ë ca böchi' cázali'.

Pablo rigu'ë lu në'ë Dios yugu' böchi'ru' nacu'ë Tesalónica

¹⁶ Rinábitu'-në' Xanru' gúntica'së' ga cuía dxi icja ládxi'do'oli' ca naca yúgu'të le runli', en sóalenë' yúgu'tëli'. Lë cazë' runë' ga rö'ö dxi icja ládxi'do'oru'.

¹⁷ Neda', Pablo, len na' caza' ruzúaja' lu guichi ni le rugapa' Dios libí'ili', ate' naca tu le naca bë' yúgu'të guichi risól-la'a. Canísö ruzúaja' lu guichi. ¹⁸ ¡Le ruzá' ládxe'ë Xanru' Jesucristo queéru' gaca queéli' yúgu'tëli'! ¡Ca' gaca!

DIDZA' ZÍ'ALÖ GUSÓL-LĚ'Ě PABLO QUEĚBI' BÍ'I TIMOTEO

Pablo rugapë' Dios bi'i Timoteo

¹Neda', Pablo, naca' gubáz nasól-lě'ě Jesucristo. Caní naca' tu' caní gunná bē'ě Dios, Nu rusólá rē'u, enca' tu' gunná bē'ě caní Xanru' Jesucristo, Nu na' runru' löza. ²Rugapa' Dios li', bócha'ado' Timoteo. Nacu' ca zxi'ini caza' tu' benru' tsözxón xichiné' Dios. Rinábida'-nē' Xúziru' Dios, enca' Xanru' Jesucristo uzá' ládxě'ě quiu', en huéchi' ládxě'ě li', en guně' ga soa dxi icja ládxi'do'o.

Pablo rusé'ě ládxi'bi' Timoteo ca naca xibá cabí naca idú

³Ráta'yua' lo' na'a gunu' ca na' gúta'yua' lo' cate' ni' guyija' luyú Macedonia, para ugá'anu' lu yödzö Éfeso, en inná bē'enu' bal-lě' bōnni' ni' cabí ulu'sédinē' tu xibá yúbölö, ⁴en cabí ilunē' zxön yugu' didza' ridasö, en lágaca ziántērö cō' xuz xtó'ogaca bōnachi, yugu' le tun ga tu'i ládxi'gaca bōnachi le nácagaca nítisö. Yugu' le caní bití' tun tsutsu bōnachi queē' Dios ca naca le ta'yéajlě' Lě'.

⁵Le ré'ēni gun lě ni rea' li', naca para ila'dxi'i bōnachi luzé'eguequi, naca idú ládxi'gaca, en gaca dxi'a le ta'zá' ládxi'gaca, en gaca idú le ta'yéajlě' Dios. ⁶Ca nácagaca lě ni, bití' bulu'rúajě' bal-lě' bōnni' dxi'a, pero gula'guélé'ě tu nōza yúbölö, en tunē' bal yugu' le bití' nácate. ⁷Té'ēnnē' ulu'sédinē' bōnachi ca naca le rinná bē' xibá queē' Dios, sal-la' bití' ta'yéajni'inē' lě na' tu'sédinē', en bití' ta'yéajni'inē' le ta'nnē' nácate.

⁸Rē'u nóziru' naca dxi'a xibá gunná bē'ě Dios, channö nu rugún le dxin ca ral-la' gun. ⁹Lě ni nóziru': Dios gudixjě' xibá queē', calēga para inná be'e bōnachi tsahui', pero para inná be'e bōnachi caní:

Nupa ta'dá'baga' le rinná bē' xibá na'.

Nupa bití' túngaca ca rinná bē' xibá na'.

Nupa tu'cá'ana Dios cá'asö.

Nupa tun le naca xihui'.

Nupa bití' túngaca Dios zxön.

Nupa tu'cá'ana le nequi queē' Dios cá'asö.

Nupa tuti xuz xiná'aguequi.

Nupa tuti bōnachi.

¹⁰Nupa tun le ruá' dö'.

Yugu' bōnni' nacua'lenē' la' löjödxi bōnni'gaquiē'.

Nupa ta'bán yugu' bí'ido'.

Nupa ta'z'í' yě'.

Nupa tun tsutsu xtídza'guequi, ta'nná le cabí nácate.

Nupa ta'dá'baga yugu' xibá tsahui'.

¹¹Nóziru' naca caní tu' bidxín queéru' didza' dxi'a buzá' ládxě'ě Dios queéru'. Lě' náquiē' lá'ayi, en budödě' lu na'a didza' dxi'a na' runa' libán que.

Pablo rē' Cristo: "Xclenu" tu' buéchi' ládxě'ě lě'

¹²Rea'-nē' Xanru' Jesucristo, Nu rutipa ládxa'a, "Xclenu" tu' buzxōni ládxě'ě neda', en buzóē' neda' guna' xichiné'. ¹³Caní benē' sal-la' z'í'alö neda' gunné' z'í'a queē', en gudxia ládxa'a bōnachi queē', en zían le bí'a dö' quéguequi, pero Cristo buéchi' ládxě'ě neda', tu' bena' caní lu yöl-la' bití' réajni'i quia' cate' ni' bití' réajlě'ēnida' Lě'. ¹⁴Na'a, zxöntērö naca le buzá' ládxě'ě quia' Xanru' Jesucristo, lě na' run ga réajlě'ēru' Lě', enca' ga nadxí'iru'-nē'.

¹⁵Didza' idútě li lě ni, en le naca lesaca' ila'z'í' lu ná'agaca yúgu'tě bōnachi, le rnna: Lě cazě' Jesucristo bidě' yödzölió ni para busölé' bōnachi dul-la', ate' busölé' neda' sal-la' nácara' bōnni' dul-la' ca yúgu'tě bōnachi. ¹⁶Que lě ni na' buéchi' ládxě'ě neda', ate' bulu'e

lahui Jesucristo ni'a quia' neda', bönni' dul-la', ca naca yöl-la' zxön ladxi' idú queë', para gaca' tu le rulu'i lógaca nupa ila'yéajlë' Lë', en gata' quéguequi yöl-la' na'bán idú. ¹⁷ Na'a rnnía': ¡Yöl-la' ba Dios, Nu rinná bé'tica'sö, Nu catu caz údxi que, en Nu biti' gaca ilé' eru', la's dui Dios Nu nözi caz yúgu'të! ¡Queë' Lë' gácatuca'sö yöl-la' run bal, en yöl-la' ba, na'a dza, en yúgu'të dza zá'gaca! ¡Ca' gaca!

¹⁸ Zxí'ina'do' Timoteo, rudöda' lu no'o xibá ni para gunu' xichinë' Dios ca runë' tu bönni' idú ládxë'ë rejë' gudil-la, en para uzi'u xibé yugu' le gula'guíxjö' z'älö nupa ni' gulu'i didza' uláz queë' Dios ca gaca quiu'. ¹⁹ Len yöl-la' réajlë' quiu' Cristo ral-la' gunu' caní, naca idú dxi'a icja ládxi'do'o. Chigula'chixi gula'nigui bal-la bönachi, nupa bulu'zóa tsölá'alö le réajlë'ëru' Cristo. ²⁰ Caní gulunë' Himeneo, en Alejandro, nupa na' busana' lu na' Satanás tu' xihui' para ila'zëdë' ca ral-la' ilunë', para cabirö ila'nné' zi'ë que le nequi queë' Dios.

2

Le rusedi rë'u ulídzaru'-në' Dios

¹ Que lë ni na' le naca lo le richízia' icja nágagaca bönachi naca ca ral-la' ulídzaru'-në' Dios, en ca ral-la' gáta'yuru' lahuë', en ca ral-la' inábiru'-në' gunnë' bi riquíniru', en ca ral-la' guiéru'-në': "Xclenu'." Yugu' lë ni ral-la' gunru' uláz quéguequi yúgu'të bönachi. ² Lësca' caní ral-la' gunru' uláz quégaca nupa ta'nná bë', en quégaca yúgu'të nupa nácagaca lo. Caní ral-la' gunru' para gaca dxi'a queëru', en gata' queëru' yöl-la' riböza tsáhui'do'. Ral-la' gunru' caní lu yöl-la' réajlë' queëru' Dios, en lu yöl-la' ba'a ladxi' queëru'. ³ Lë ni naca dxi'a, en le raza ládxë'ë Dios, Nu rusölá rë'u. ⁴ Dios caz ré'ënë' ulu'lágaca yúgu'të bönachi, en ré'ënë' ilúnbë'e le naca idútë li. ⁵ Tuzë' náquië' Dios, en tuzë' bönni' ruúnë' dzaga Dios, en bönachi. Nu ni naca Jesucristo, Nu gulaj bönachi. ⁶ Lë cazë' budödi cuinë' lu yöl-la' guti, le benë' tu' nözi dul-la' nabága'gaca yúgu'të bönachi. Dios benë' ba nalí queë' cate' bidxín dza queë' gútië'. ⁷ Ca naca lë ni, Dios buzóë' neda' para guna' libán que, en gaca' gubáz nasól-lë'ë Cristo, para usédigacada' bönachi izá'a ca naca le réajlë'ëru' Cristo, en ca naca le naca idútë li. Rilítëda', en biti' ca' rizí' yë'a.

⁸ Na'a, ré'ënda' ulu'lidzë' bönni' Dios, en iláta'yuë' lahuë' gátitës, nácagaquië' idú dxi'a, en cabí ila'lenë' luzá'agaquië', en cabí ila'dil-la dídza'gaquië'. ⁹ Lësca' caní, ré'ënda' ilácunu nigula le naca ba'a. Le naca lachi le ral-la' ulu'lu'ínu lahui naca yöl-la' nöxaj ladxi', en le naca idú ladxi', en calëga le tu'pá'asinu icja lógacanu len oro, en yugu' bugá, en lari' nazáca'da'. ¹⁰ Yugu' le dxi'a tunnu ulu'lu'i lahui le nácagacanu ca na' run le tácunu le naca ba'a. Caní ral-la' ilunnu nigula núnbë'gacanu Dios. ¹¹ Ral-la' ila'cuá'anu yugu' nigula dxisö cate' nu rusedi légacanu, en ila'cuá'anu nöxaj. ¹² Biti' runna' yugu' nigula lataj ulu'sédinu, en calëga ila'nná bé'enu yugu' bönni'. Ral-la' ila'cuá'anu dxisö ga nudúbigaca bönachi queë' Cristo. ¹³ Caní ral-la' gaca, tu' buzóë' Dios z'älö Adán, ate' gudödi na' buzóë'-nu Eva. ¹⁴ Adán na', biti' guzxí' ye'e tu' xihui' lë', pero nigula queë', guzxí' ye'e lënu. Caní guca, gudítsjanu xibá queë' Dios, ¹⁵ pero ulanu nu nigula ruzóanu-bi' bí'ido' channö gúntica'sinu ca röjlöz le réajlë'ëru' Dios, en yöl-la' nadxí'i, en channö gácanu idú dxi'a, en idú ladxi'.

3

Ca ral-la' ilácagaquië' bönni' tapa chi'ë bönachi queë' Cristo

¹ Didza' idútë li lë ni rna: Channö ru'i ládxë'ë nu bönni' gáquië' nu gapa chi'i bönachi queë' Cristo, dxin dxi'a rizé ládxë'ë. ² Nu bönni' rapa chi'ë bönachi queë' Cristo run bayudxi gáquië':

Tu bönni' cuntu nu gaca bi inné' queë'.

Zoa túzinu nigula queë'.

Ral-la' gáquië' ban ladxi', en idú ladxi', en nöxaj ladxi'.

Ral-la' gu'ë ga ila'cu'ë bóchi'ru' ta'dxinë' lidxë'.
Ral-la' gáquië' bönni' nazéqui'de'enë' usédinë' bönachi.

³ Biti' gáquië' bönni' re'jé', en calëga bönni' sínia'.

Biti' gaquië' bönni' rizé ládxi'së' si'ë dumí.

Ral-la' gáquië' bönni' dxi'i ladxi', en zxön ladxi'.

Biti' gáquië' bönni' ruhuídi'në'.

⁴ Ral-la' gáquië' bönni' rinná bé'enë' dxi'a bönachi nacuá' lidxë'.

Ral-la' ilunbi' xzí'inë' ca rnna xtídzë"ë lu yöl-la' run bal xúzgcabi'.

⁵ ¿Naru' huácatsö tu bönni' gapa chi'ë bönachi queë' Dios channö cabí raca inná bé'enë' dxi'a bönachi nacuá' lidxë'? ⁶ Biti' ral-la' gáquië' tu bönni' si' gusí lahuë' tē'ë Cristo, para cabí tödi bë' gun ba zxön cuinë', en bití' gaca queë' ca na' guca que tu' xihui', nu ben ba zxön cuini, ate' Dios guchúguië' que tsöjgá'ana lataj chul-la. ⁷ Lësca' ral-la' gáquië' bönni' ta'nná dxi'a queë' nupa cabí nabábagaca bönachi queë' Cristo, para cabí soa nu uzóa lë' tsölá'alö, en para cabí idzunë' lu yalaj que tu' xihui'.

Ca ral-la' iláquië' bönni' tácalenë' bönachi queë' Cristo

⁸ Lësca' caní ral-la' iláquië' bönni' tácalenë' bönachi queë' Cristo:

Ral-la' iláquië' bönni' idú ládxi'gaquië'.

Biti' iláquië' bönni' tu'rixë' didza'.

Biti' iláquië' bönni' té'ajë'.

Biti' iláquië' bönni' ta'zé ládxi'së' dumí.

⁹ Ral-la' gaca ilapa chi'ë idútë le réajlë"ëru' Cristo.

Ral-la' ilaca idú dxi'a icja ládxi'do'gaquië'.

¹⁰ Yugu' bönni' ni ral-la' si' bë'ëli' légaquië' zí'alö, ate' ní'irö gata' lu ná'agaquië' ilácalenë' bönachi queë' Cristo, channö cabí zoa nu gaca bi inné' quégaquië'. ¹¹ Lësca' caní, nigula que queé'gaquië' ral-la' ila'cuá'anu idú ládxi'gacanu, en cabí ilácanu unné que luzé'e. Ral-la' ilácanu zxön ladxi', en ilácanu li ladxi' lu yúgu'të le tunnu. ¹² Yugu' bönni' ilácalenë' bönachi queë' Cristo ral-la' soa túzinu nigula que queé'gaquië'. Lësca' ral-la' ila'nná bé'enë' dxi'a xzí'inigaquië', enca' bönachi ulidxi que queé'gaquië'. ¹³ Run bayudxi gaca caní, tu' ta'déli'në' lataj ga ilún bal bönachi xtídzá'gaquië', channö tunë' dxi'a dxin tunë' tácalenë' bönachi queë' Cristo, ate' ilácarë' rugu ladxi' para ilu'ë didza' ca naca le réajlë"ëru' Jesucristo.

Le bigachi' que le reaj ládxi'ru'-në' Dios

¹⁴ Yugu' didza' ni ruzúaja' quiu' lu guichi, sal-la' runa' löza uduyútea' li'. ¹⁵ Channö huadzéda', ruzúaja' quiu' didza' ni para inózinu' naca ral-la' gunu' lógaca bönachi nacuá' lidxë' Dios, nupa nácgaca bönachi queë' Dios ban, en nácgaca tsutsu, en ta'guíxjö' dxi'a le naca idútë li. Nácgaca ca yugu' ya'zxón, en le nunída'gaca zö'ö, le nácgaca tsutsu, en ta'zón yu'u. ¹⁶ Le nácatë, zxóntërö naca le bigachi' que le reaj ládxi'ru'-në' Dios, ca na' nazúaj lu guichi le rnna:

Dios buluí'i lahuë', gúquië' bönachi.

Guca bë' náquië' tsahui' tu' guzóalenë' Dios Bö' Lá'ayi Lë'.

Gulácalenë' gubáz lá'ayi queë' Dios Lë'.

Guca libán queë' lógaca bönachi izá'a.

Gula'yéajlë' bönachi yödzölió Lë'.

Dios buchisë' Lë' xitsá' ga nayépisëtëre'.

4

Nupa ulu'huóaj ládxi'gaca ca naca le réajlë"ëru'-në' Cristo

¹ Yálajdo' riguíxjö'ë Dios Bö' Lá'ayi, rnnë': Dza tsöjsëtëgaca, ila'dá'baga' bal-la bönachi Cristo. Ulu'huóaj ládxi'gaquië' ca naca le réajlë"ëru' Cristo. Ulu'zé nácgagaquië'

xtídza'gaca bönachi nacuá'len bö' ta'zì yè' léguequi, ate' ulu'zé nágagaquié' yugu' xibá quéguequi bö' xihui'. ² Ulu'zé nágagaquié' xtídza'gaca bönachi tu'lu'isö tsahui' cuínguequi. Yugu' bönachi na' tu'í didza' le cabí nácatë, en chinazidi ládxi'do'guequi, para cabí uxösa léguequi. ³ Caní naca, tu'záguë'ë xinózguequi nupa té'ëni ulu'tsaga ná'agaca, en ta'nná bé'enë' bönachi para cabí ilágugaca le nagu'ë Dios para uzí'iru' xibé, lë na' huáca ilágugaca nupa ta'yéajlë' Dios, nupa na' chinúnbë'gaca le naca idútë li, en té' Dios: "Xclenu'" cate' tahuë' le. ⁴ Dxi'a naca yúgu'të le benë' Dios, en biti' bi ral-la' uzóaru' tsölá'alö channö ráguru' le, en rëru'-në' Dios: "Xclenu'." ⁵ Rusedi xtídzë'ë Dios rë'u, Lë' únë' dxi'a yúgu'të le gáguru' channö ulídzaru'-në' Dios, en inábiru'-në' gun lá'ayë' lë na' gáguru'.

Ca rurúajë' dxi'a huen dxin queë' Jesucristo

⁶ Channö usédinu' yugu' böchi' luzá'aru' yugu' didza' ni, urúaju' dxi'a, en gacu' huen dxin dxi'a queë' Jesucristo, en gaca bë' nazédu' dxi'a ca naca didza' que le réajlë'ëru'-në' Cristo, en ca naca xibá dxi'a rapa chi'u. ⁷ Gurú'una yugu' didza' ridasö que yödzölió ca naca didza' tu'ínu yugu' nigula gula. Béntica'sö le gun ga gacu' tsutsu para gunu' ca ré'ënë' Dios. ⁸ Láti'do'os uzi'u xibé gunu' le gun ga gácarö nál-la ni'a no'o, pero idú uzi'u xibé gunu' ca ré'ënë' Dios. Cate' runru' caní, lë ni run ga runru' löza sóaru' ibanru' yödzölió ni, enca' sóaru' ibanru' dza zá'gaca, tödi uzá'aru' yödzölió ni. ⁹ Didza' idútë li lë ni, en le naca lesaca' ila'zì lu ná'agaca yúgu'të bönachi. ¹⁰ Que lë ni na', rusáca'da' zì cuinru' runru' dxin, tu' runru' löza Dios ban. Cristo gútië' para usölë' yúgu'të bönachi. Tu'zì xibé le benë' nupa na' ta'yéajlë' Lë'.

¹¹ Gunná be'e, en busedi bönachi ilún yugu' lë ni. ¹² Cuntu nu ral-la' uzóa li' tsölá'alö tu' nacu' bi'i ra'bán, pero ral-la' gunu' le ulu'í nupa ta'yéajlë' Dios ral-la' ilún ca runu' li'. Caní ulu'ínu' légaquië':

Len didza' ru'u, en len le runu'.

Ca nadxí'ínu' luzó'o, en ca ru'u lataj zóalenë' Dios Bö' Lá'ayi li'.

Ca runu' ca rnno', en ca nacu' idú tsahui'.

¹³ Tsanni za'a idxina' quiu', bé'tica'sö ladxí' ulabu' guichi lá'ayi lógaca bönachi nacuá' ga ni' zu'. Guchiza icja nágagaquië' lë ni, en busedi légaquië'. ¹⁴ Biti' udödu' cá'asö le buzá' ládxe'ë Dios quiu', lë na' bennë' quiu' ca na' gula'nná nupa ni' gulu'í didza' uláz queë' Dios, cate' ni' bönni' gula tapa chi'ë bönachi queë' Cristo gula'xóa ná'agaquië' li', en bulu'lidzë' Dios.

¹⁵ Béntica'sö yugu' lë ni. Bé'tica'sö ladxu'u gunu' caní, para ila'lé'e yúgu'të bönachi ca na' zeaj ridéli'nu' le nequi queë' Cristo. ¹⁶ Gudapa chi'i cuinu', en gudapa chi'i xibá rusédiru'. Béntica'sö yugu' lë ni, ate' channö gunu' caní, uló' li', en ulu'lágaca ca' nupa ila'yöni li'.

5

Ca ral-la' gunbi' Timoteo ni'a quégaca bönachi queë' Cristo

¹ Biti' uzenu' bach yugu' bönni' gula, pero guchiza icja nágagaquië' didza', tsca nácagaquië' xuz cazu'.

Guchiza icja nágagacabi' bi'i bönni' ra'bán didza', tsca nácagacabi' bi'i böchi' cazu'.

² Guchiza icja nágagacanu nigula gula didza', tsca nácagacanu xiná' cazu'.

Guchiza icja nágagacabi' bi'i nigula ra'bán didza', tsca nácagacabi' bi'i zan cazu', ca na' röjlóz le naca idú dxi'a.

³ Ben bal yugu' nigula ba guti bönni' que quéégacanu, nácagacanu túzinu. ⁴ Channö zóanu tu nigula caní nacuá'abi' bi'i queënu o xzí'ini xi'sóanu, ral-la' ila'zédabi' ilunbi' ca ré'ënë' Dios, para ilácalenbi' zí'alö bönachi nacuá' lídxigacabi', en ulu'bf'ibi' quégaquië' xuz xiná'agacabi'. Lë ni naca dxi'a, en le raza ládxe'ë Dios. ⁵ Na'a, nigula na' nagá ananu túzinu, runnu löza Dios, ate' rëla, en te dza rinábatica'sinu lahuë' Dios, en rulídzanu

Lë' ni'a quégaca bönachi queë', ⁶ pero nigula túzinu na' runnu ca naca le rizé ládxi'nu nácanu ca tu nigula chinátinu cate' ni zóanu nabannu. ⁷ Lësca' caní, gunná be'e bönachi nacua' ga ni' zu', para ilún ca sa'yéaj yugu' lë ni, para ilaca bönachi cuntu nu gaca bi inné quéguequi. ⁸ Channö zoa nu bönni' cabí rugahuë' yugu' di'a dza queë', en le nácarö lo, channö cabí rugahuë' bönachi nacua' lidxë', chigudá'baguë'ë le réajlë'ëru' Cristo, en nácarë' xihui' ca nu cabí réajlë' Dios.

⁹ Túzinu nigula zoanu túzinu caní chiyú'urönu ca tsónnalalaj iz huáca ibábanu nupa gácalenli', channö cabí buca'ananu-në' bönni' queënu para sóalennu-në' ia'túé' bönni'.

¹⁰ Run bayudxi soa nu gun ba nalí queënu ca nácgaca le dxi'a runnu.

Gácalenli'-nu channö buscúlunu-bi' yugu' bí'ido',

en channö ruí'inu ga ila'cuá' bóchi'ru' zá'gaquië' yödzö zi'tu',

en channö ruí'inu le ilë'aj ilágugaca bönachi queë' Dios,

en channö rácalennu nupa ta'guí'i ta'zaca',

en channö rúntica'sinu yúgu'të le naca dxi'a.

¹¹ Yugu' nigula túzinu bití' yu'igacanu tsónnalalaj iz, bití' ibábagacanu nupa gácalenli', tu' ilunnu ca ta'zësö ládxi'gacanu, en ila'dá'baga'nu Cristo, en ilë'ëninu ulu'tsaga ná'agacanu leyúbölö. ¹² Caní gaca, ila'bága'nu dul-la' tu' tu'zóanu tsölá'alö le gula'yéajlë'ënu Cristo zí'alö. ¹³ Lësca' ilácanu nigula xöhuëdi, en nigula ta'dasö ca', en calégasö ilácanu xöhuëdi, pero lësca' ilácanu nigula unné que luzé'e, en tsöjgútsa'gacanu ga yúbölö, en ila'nnanu le cabí nácatë. ¹⁴ Que lë ni na', ré'ënda' ulu'tsaga ná'gacanu leyúbölö nigula túzinu caní yú'ugacanu iz cuidí', en ulu'scúlanu-bi' yugu' bí'ido', en ila'nná bé'enu bi'i nacua'abi' yu'u que queégacanu, para cabí ilu'í'inu nu ridá'baga' ré'u lataj bi inné queëru', ré'u na' réajlë'ëru' Cristo. ¹⁵ Caní ral-la' gaca, tu' chibulu'bíga'nu bál-lagacacnu, ate' tunnu ca ré'ëni Satanás tu' xihui'.

¹⁶ Channö nútí'tës bönni' o nigula nu réajlë' Cristo, nacua'anu nigula túzinu lídxigaca nupa na', ral-la' ilácalen légacanu, para cabí ulu'saca' zí' bönachi queë' Cristo. Caní gaca, bönachi queë' Cristo na' gaca ilácalen yugu' nigula nagá'anagacanu túzinu.

¹⁷ Benrö bal yugu' bönni' gula tapa chi'ë bönachi queë' Cristo, yugu' bönni' na' ta'nná bé'ë dxi'a, en béntërö ca' bal yugu' bönni' gula na' tunë' dxin, tunë' libán, en tu'sédinë' bönachi. ¹⁸ Nazúaj lu guichi lá'ayi le rnna: "Bití' cu'u du ruá'aba' bédxi na' rulíbiba' zxoá' xtila." Rnna ca': "Náquië' lesaca' nu bönni' huen dxin si'ë lazjé'."

¹⁹ Bití' si' lu no'o didza' ruí' nu ruzegui didza' tu bönni' gula rapa chi'ë bönachi queë' Cristo, channö cabí nacua' chopá tsonna nupa tun ba nalí que le benë'. ²⁰ Nupa túntica'sö dul-la', busidxi léguequi lógaca yúgu'të bönachi queë' Cristo para iladxi ia'zica'rö bönachi ni' Dios. ²¹ Ni'a queë' Xanru' Dios, en Xanru' Jesucristo, en ni'a quégaquië' gubáz lá'ayi rö queë', rinná bé'eda' li' gunu' ca ta'nná didza' ni. Tuz ca ral-la' uchi'a usöróu' yúgu'të bönachi, en bití' gunu' bal tuzë' bönni'. ²² Cuntu nu bönni' ixóatë no'o, cabí gunu' ga gáquië' huen dxin queë' Cristo, para cabí ibágu'u le runë' channö gunë' bönni' na' dul-la'.

²³ Bítí'rö guí'ju' nísasö. Tu' rúntica'sö bayá' lë'u ral-la' guí'ju' láti'do' xisi uva nal-la para cö' dxi'a lë'u.

²⁴ Yugu' dul-la' quéguequi bal-la bönachi ila'lá' lahui zí'alö cate' si' ila'dxín ga uchi'a usöröë' Dios léguequi, ate' tödi ni' ila'lá' lahui dul-la' nabága'gaca ia'zica'rö bönachi.

²⁵ Lësca' caní, ila'lá' lahui dxin dxi'a núngaca bönachi, ate' channö cabí nalá'gaca lahui, cuntu nu bönni' gaca ucáchë'ë tsaz dxin na' nunë'.

6

¹ Yúgu'të bönni' nadó'ogaca ral-la' ilúndë'ë bal xángaqüië', para cabí gaca nu inné zí' que La lá'ayi queë' Dios, en que xibá queë'. ² Nupa ni' nacua'ë xángaca ta'yéajlë'ë Cristo, bití' ral-la' ulu'cá'ana cá'asö légaquië' tu' nácgacaquië' bóchi'guequi. Ral-la' ilunrö dxi'a

xichíngaquië' tu' ta'yéajlë'ë Cristo, bönni' ni' tu'zi'ë xibé dxin dxi'a na', tu' nadxí'inë' Lë cazë' légaquië'. Ca naca lë ni, busëdi bönachi nacua' ni', en guchiza le icja nágagaquië'.

Le reaj ládxi'ru'-në' Dios le ruzí'iru' xibé

³ Channö zoa nu bönni' rusédinë' xibá yúbölö, en biti' rusédinë' yugu' didza' dxi'a queë' Xanru' Jesucristo, ca naca xibá na' rusedi rë'u ca ral-la' gunru' ca ré'ënë' Dios, ⁴ bönni' ni run ba zxön cuinë', en biti' bi nózinë'. Didza' biti' naca dxi'a rizé ládxe'ë ca nácagaca didza' böniga, en didza' bizxaj, yugu' le tun ga tu'zxé'e bönachi luzé'eguequi, en ta'díl-lalen luzé'eguequi didza'. Lësca' tun didza' caní ga ta'nné'zi' bönachi que luzé'eguequi, en ta'zá' ládxi'gaca que luzé'eguequi le cabí nácatë. ⁵ Lësca' caní tun ga ta'díl-latica'së' didza' bönni' biti' ta'yéajni'inë', nupa biti' nazí' lu né'eguequi le naca idútë li. Téquini huáca ila'zí' dumí zían channö ilúngaca tsözxón nupa ta'yéaj ládxi'gaca Dios. Gucuíta ga nacua' bönachi caní. ⁶ Zxön naca le ruzí'iru' xibé cate' len yöl-la' riböza zxön ladxí' reaj ládxi'ru'-në' Dios. ⁷ Biti' bi nuá'aru' cate' ridxinru' yödzölió, en lësca' caní, biti' bi uá'aru' cate' uzá'aru' yödzölió ni. ⁸ Que lë ni na', channö dësö queëru' le gáguru', en le gácuru', ral-la' udzëjaru'. ⁹ Yugu' bönni' té'ënnë' gata' quégaquië' yöl-la' tsahui', gaca quégaquië' le si' bë' légaquië' le xihui', ate' ila'yu'ë lu yalaj que tu' xihui', ate' lu yöl-la' biti' bi nözi quégaquië' zían le ila'zé ládxi'gaquië', le ilún ditaj légaquië'. Yugu' lë ni ulu'suniti légaquië', en ilún ga ila'nítië' tsaz. ¹⁰ Tu' ta'zé ládxi'gaca bönachi dumí, lë ni run ga tun yúgu'të le cabí naca tsahui'. Bal-lë' bönni', tu' ta'zé ládxi'gaquië' le, bulu'cá'anë' le gula'yéajlë'ë Cristo, en chiraca quégaquië' zían le tu'saca' zi' légaquië'.

Nu run dxin queë' Cristo naca ca tu bönni' rejë' gudil-la

¹¹ Na'a, bönni' queë' Dios, gucuíta ga raca le caní.

Bé'tica'sö ládxi'u gunu' le naca tsahui', en le ré'ënë' Dios.

Guyéajlë'tica'së' Cristo, en bidxí'i yugu' luzó'o.

Bë' ladxí' gacu' zxön ladxí', en nöxaj ladxí'.

¹² Ca runë' tu bönni' idú ládxe'ë rejë' gudil-la,

ben dxin que le réajlë'ëru' Cristo, ate' beni quiu' yöl-la' na'bán idú.

Para gaca caní bulidzë' Dios lí'. Dxi'a guca le gunnó' yalaj lulu ca réajlë'u Cristo, lë na' gunnó' lógaca zían nupa tun ba nalí que didza' bë'u. ¹³⁻¹⁴ Ni'a queë' Xanru' Dios, Nu na' nabánigaca yúgu'të le nacua', enca' ni'a queë' Jesucristo, Nu ben ba nalí le naca dxi'a le gunné' yálajdo' lahuë' Poncio Pilato, rinná bé'eda' lí' gun chi'u yugu' lë na' gunná bé'enë' Cristo rë'u. Ral-la' gacu' idú tsahui', en biti' bi gunu' le gü'i lataj nu bi inné' quiu', ga idxintë dza ni' ulu'i lahuë' Xanru' Jesucristo. ¹⁵ Cate' idxín dza na' huödë' Jesús, Dios ulu'ë lahui Lë'.

¡Dios náquië' lá'ayil!

¡Tuzë' Lë' dë lu në'ë yöl-la' unná bë',

en rinná bé'enë' yúgu'të nupa ta'nná bë',

en náquië' ca' Xángaca yúgu'të nupa nácagaca xan!

¹⁶ ¡Tuzë' Lë' zóatica'së'!

¡Zoë' lu bení' ga biti' gaca nu idxín rácasö que!

¡Catu caz nu bilé'e Lë', en biti' gaca nu ilé'e Lë'!

¡Queë' Lë' gácatica'sö le run Lë' bal, en yöl-la' unná bë'!

¡Ca' gaca!

¹⁷ Gunná be'e yugu' bönni' dë quégaquië' yöl-la' tsahui' dza ni zóaru' na'a, para cabí ilún ba zxön cuíngaquië', en para cabí ulu'zxöni ládxi'gaquië' yöl-la' tsahui' na' biti' naca löza. ¡Ral-la' ilunë' löza Dios ban, Nu rúnnada' queëru' yúgu'të le ruzí'iru' xibé! ¹⁸ Gunná be'e légaquië' ilunë' le naca dxi'a, para ila'yanda' dxin dxi'a tunë', lë na' naca tu yöl-la' tsahui' idú. Ral-la' bi ulu'nödzjë' quégaca bönachi yechi', en ilu'i ládxi'gaquië' léguequi.

¹⁹ Channö ilunë' caní, ulu'tubë' yöl-la' tsahui' na' naca idú, le ulu'zi'ë xibé dza si' za', en ila'déli'në' yöl-la' na'bán idú.

Le gulu'ë Pablo lu ná'abi' bi'i Timoteo

²⁰ Bócha'ado' Timoteo, ben chi'i le nadödi lu no'o. Gucuíta ga nacua' nupa tu'i didza' cá'asö, en yugu' didza' biti' nazaca', en yugu' didza' bizxaj, yugu' didza' na' tu'i nupa ta'nnasö tácada', ate' nazi' yé'eguequi ca naca lë na' tun. ²¹ Bal-la bönachi gula'zí' lu né'eguequi yugu' didza' caní, ate' gula'chixi gula'nigui ca naca le réajlë'ëru' Cristo.

Rinábida'-në' Dios uzá' lãdxë'ë quiu' le nácagaca dxi'a queë'.

¡Ca' gaca!

DIDZA' BUROPI GUSÓL-LĒ'Ē PABLO QUEÉBI' BI'I TIMOTEO

Pablo rugapë' Dios bi'i Timoteo

¹ Neda', Pablo, naca' gubáz nasól-lĒ'Ē Cristo. Caní naca' tu' ré'ënĕ' Dios gaca' caní, para caní gaca le guzxi' lu nĕ'ĕ, gunnĕ' queéru' yöl-la' na'bán idú, le ruzá' ládxĕ'ĕ Jesucristo queéru'. ² Rugapa' Dios li', bócha'ado' Timoteo. Nacu' ca zxi'ini caza' tu' benru' tu' zxön xichinĕ' Cristo, ate' nadxi'ida' li'. Rinábida'-nĕ' Xúziru' Dios, enca' Xanru' Jesucristo, uzá' ládxĕ'ĕ quiu', en huéchi' ládxĕ'ĕ li', en gunĕ' ga cö' dxi icja ládxi'do'o.

Timoteo ral-la' gunbi' ba nalí queé' Jesucristo

³ Rea'-nĕ' Dios: "Xclenu'" ca naca quiu' cate' rulidza'-nĕ' Dios. Biti' rizóa dxía rinaba' ni'a quiu' rĕla, en te dza lahuĕ' Dios, Nu na' runa' xichinĕ' idú ládxa'a ca na' gulunĕ' xuz xtá'ahua'. ⁴ Cate' rőjneda' ca na' gurödxu', rizé' ládxa'a ulé'eda' li', para gaca udzėjada' idú ládxa'a. ⁵ Rea'-nĕ' Dios: "Xclenu'" tu' zoa le run ga rőjneda' ca réajlĕ'u Cristo idú ládxa'u. Lĕsca' caní, gula'yéajlĕ'ĕnu xinó'o gula Loida, enca' xinó'o Eunice Lĕ' zí'alö ca li', ate' runa' löza, lĕsca' caní réajlĕ'u Lĕ' na'a.

⁶ Tu' naca caní, rusá'a ládxa'u para usubanu' le bennĕ' Dios quiu', lĕ na' bidxin quiu' cate' ni' guxóa na'a li', en bulidza'-nĕ' Dios. ⁷ Bö' na' bennĕ' Dios queéru' bití' naca tu bö' le gun ga gádxiru', pero bennĕ' queéru' Bö' Lá'ayi Nu run ga náparu' yöl-la' huáca, en run ga nadxi'iru' luzá'aru', en run ca' ga rinná be'e cuinru'. ⁸ Que lĕ ni na', bití' utuí'inu' gunu' ba nalí queé' Xanru', en bití' utuí'inu' ca raca quia' neda' ni, nadzuna' lidxi guíĕ tu' runa' xichinĕ', pero ben tsözxón nupa ta'guí'i ta'zaca' tu' tun libán que didza' dxi'a. Dios gunnĕ' yöl-la' huáca quiu' para gunu' caní. ⁹ Dios caz busölé' rĕ'u, en bulidzĕ' rĕ'u para gácaru' idú dxi'a. Bití' bulidzĕ' rĕ'u tu' zoa le dxi'a benru', pero bulidzĕ' rĕ'u tu' gu'uni quézinĕ' Lĕ', en tu' ruzá' ládxĕ'ĕ caní queéru'. Dza ni'te buzóĕ' caní queéru' zí'atĕlö ca guta' yödžolió ni, tu' néquiru' queé' Jesucristo. ¹⁰ Na'a, chibuluí'i lahui le ruzá' ládxĕ'ĕ Dios queéru', tu' buluí'i lahuĕ' Jesucristo Nu rusölä rĕ'u. Bugúĕ' yöl-la' guti, en bulu'e lahui yöl-la' na'bán idú na', le cabí ca' initi. Caní naca ca rnna didza' dxi'a.

¹¹ Cristo buzóĕ' neda' para guna' libán que didza' dxi'a na', en para gaca' gubáz queé' para usédigacada' bönachi izá'a. ¹² Que lĕ ni na' riguí'i rizáca'a ca' yugu' le raca quia' ni, pero bití' rutuí'ida', tu' núnbĕ'a Nu na' réajlĕ'a. Runa' löza Lĕ', napĕ' yöl-la' huáca gapa chi'ĕ le budöda' lu nĕ'ĕ ga idxintĕ dza ni' huödĕ'.

¹³ Didza' dxi'a na' biyönnu' bena' libán que ral-la' gaca quiu' tu le ruluí'i ca ral-la' usédinu' bönachi ca réajlĕ'ĕru' Jesucristo, en ca nadxi'iru' Lĕ'. ¹⁴ Ben chi'i le naca dxi'a na' nadödi lu no'o, ate' gaca gunu' caní len yöl-la' huáca queé' Dios Bö' Lá'ayi, Nu zóalen rĕ'u.

¹⁵ Chinóz quézinu' ca na' gulunĕ' zian bönni' ta'yéajlĕ'ĕ Cristo nacu'ĕ luyú Asia bulu'béaj ládxi'gaquiĕ' neda'. Figelo, en Hermógenes nabábagaquiĕ' bönni' ni. ¹⁶⁻¹⁷ Rinábida'-nĕ' Xanru' Dios huéchi' ládxĕ'ĕ bönachi nacuá' lidxĕ' Onesiforo, tu' butipĕ' ládxa'a bönni' ni zían luzuí. Cate' bidxinĕ' Roma, idú ládxĕ'ĕ buguiljĕ' neda', ate' budžolinĕ' neda'. Bití' butuí'inĕ' ni'a quia' neda' tu' nadzuna' lidxi guíĕ ni, nága'a du guíĕ. ¹⁸ Rinábida'-nĕ' Xanru' huéchi' ládxĕ'ĕ lĕ' dza ni' idxinĕ' lahuĕ' Dios. Chinóz quézinu' ca na' gúcalenĕ' bönni' ni rĕ'u, cate' ni' guzóaru' yödžö Éfeso.

2

Ral-la' gácabi' Timoteo ca tu bönni' idú ládxĕ'ĕ rejĕ' gudil-la

¹ Na'a, xzí'ina'do', butipa ládxi'u ca naca le ruzá' ládxi'ë Jesucristo quiu'. ² Didza' biyönnu' bë'a lógaca zían nupa tun ba nalí que, didza' ni budödi lu ná'agaquië' bönni' tunë' ca ta'nnë', bönni' gaca ulu'sédinë' ca' ia'bal-la bönachi.

³ Ral-la' guá' ilenu' le ulu'saca' li' zi' ca na' ruá' rilén nu naca bönni' queë' Jesucristo idú ládxi'ë rejë' gudil-la. ⁴ Nu bönni' rejë' gudil-la, biti' ca' gútsë'ë yugu' le tun bönachi yödölió ni, para tsaza ládxi'ë bönni' na' nuzóë' lë' gáquië' bönni' queë' rejë' gudil-la. ⁵ Lësca' caní, nu nutsa' lu huitaj, biti' bi ideli' channö cabí run ca ral-la' gun. ⁶ Nu bönni' gúz gú'una runë' dxin, zí'alö lë' uzi'ë xibé lë na' razë'. ⁷ Busá' ládxi'u lë ni rea' li', ate' Xanru' caz gunë' ga tséajni'inu' yúgu'të.

⁸ Yöjné ca guca queë' Jesucristo. Guljë', en gúquië' xzí'ini xi'sóë' David, en gudödi gútië', bubanë' lu yöl-la' guti. Caní rna didza' dxi'a runa' libán que. ⁹ Tu' runa' libán que didza' dxi'a, riguí' rizáca'a le raca quia', ga ridxintë nága'a lidxi guíë ni, ca raca queë' tu bönni' huía' dö', pero biti' ca' nága'të xtídzë'ë Dios. ¹⁰ Que lë ni na' ruá' riléna' yúgu'të lë ni tu' nadxí'ida' nupa guróë' Dios, para ulu'lé' ca' légaquië'. Jesucristo caz runë' ga ulu'lágaca bönachi na' para ila'cuá' lu bení' idú queë'. ¹¹ Catëz naca lë ni rna:

Channö nátilenru' Lë', sóalenru'-në' ca' ibanru'.

¹² Channö guá' ilenru' le quí'í sáca'ru', inná bé'lenru' ca' Lë'.

Channö ridá'baga'ru' Lë', Lë' tá'baguë'ë ca' rë'u.

¹³ Sal-la' biti' runru' ca rnnaru', Lë' rúntica'së' ca rnnë'.

Lë' biti' gaca tá'baguë'ë le náquië'.

Nu bönni' huen dxin queë' Cristo rurúajë' dxi'a

¹⁴ Busá' ládxi'gaca nupa nacua' ga ni' zu' ca naca lë ni, ate' ni'a queë' Xanru' Dios gunná be'e légaquië' para cabí ila'dil-la dídzë'ë ca nácagaca didza' cabí nazáca'gaca. Yugu' didza' caní tun ga ila'niti nupa tu'zé nagui léguequi. ¹⁵ Bé'tica'sö ládxi'u urúaju' dxi'a lahuë' Dios para gacu' ca tu bönni' huen dxin biti' rutuí'inë' ca naca dxin nunë'. Dxi'ado' ral-la' ugunu' dxin didza' idútë li. ¹⁶ Na'a, gucuíta ga nacua' nupa tuí' didza' biti' nazaca', en didza' cá'asö, tu' tun didza' caní ga ilunrë' le cabí ré'ënë' Dios. ¹⁷ Ila'zé didza' tu'ë ca rizxón huë' nudzu' le ridúdu' rilá. Himeneo, en Fileto nabábagaquië' nupa tuí' didza' caní. ¹⁸ Iropë' ni gula'chixi gula'níguinë' ca naca le naca idútë li, tu' ta'nnë' chigudödi dza ral-la' ulu'bán nupa chinátigaca, ate' gula'béquië' baróli bal-la bönachi ga ridxintë bíti'rö ta'yéajlë' Cristo. ¹⁹ Le benë' tsutsu Dios zóatica'sö, en dë tu le naca bë', le rna: "Núnbë'ë Dios nupa néquiguequi queë'." Rna ca: "Guli'cuíta ga raca le ruá' dö', yúgu'tëli' libí'ili' néquili' queë' Cristo."

²⁰ Tu lu yu'u zxön yú'ugaca le néquini, calégasö oro, en plata, pero lësca' le néquini yaga, en yu. Bal-la tu'gún bönachi léguequi dxin ga liná', ate' ia'bal-la tu'gún léguequi dxin ga biti' naca liná'. ²¹ Para gácaru' ca naca lë na' tu'gún bönachi dxin ga liná', en para gaca gunru' le naca dxi'a, en gácaru' lesaca' ugunë' Xanru' rë'u dxin, ral-la' ucuítaru' ga raca le ruá' dö'. Channö gunru' caní, gácaru' lesaca' gunru' yúgu'të dxin dxi'a.

²² Gurú'una le tun ga nu së ladxi' le ruá' dö' ca raca quégaquië' bönni' ra'bando'. Bë' ladxi' gacu' tsahui'. Ben le run ga réajlë'u Cristo, en le run ga nadxí'inu' yugu' luzó'o, en le run ga ribözu' dxi'ado'. Ca nácagaca lë ni, ben tsözxón nupa tu'lidza Xanru', naca idú dxi'a icja ládxi'do'guequi. ²³ Na'a, gurú'una yugu' didza' cá'asö, en didza' biti' nazaca', tu' chinóz quézinu' tun didza' caní ga ta'dil-la didza' bönachi. ²⁴ Bönni' huen dxin queë' Xanru' biti' ral-la' tíl-lalenë' bönachi didza', pero ral-la' gáquië' nöxaj ladxi' lógaca yúgu'të bönachi. Ral-la' gaca usédinë' bönachi, en gáquië' ca' zxön ladxi'. ²⁵ Lu yöl-la' nöxaj ladxi' ral-la' uzéajni'inë' nupa ta'dá'baga' le runë' libán que. Channö gunë' caní, nadxi' ca' Dios gu'ë légaquië' lataj ulu'bí'í ládxi'gaquië' para ilúnbë'ë le naca idútë li. ²⁶ Caní ulu'lé' lu yalaj que tu' xihui' ga nadzúngaquië', ate' ulu'huóáquië' tsahui' para ilunë' ca ré'ënë' Dios.

3

Ca ilaca bönachi dza tsöjsétégaca

¹ Lësca' ral-la' inózinu' lë ni: Dza tsöjsétégaca ilaca dza ila'guí'i ila'zaca' bönachi.

² Yugu' dza ni' ila'cu'ë bönni' ilácagaquië' caní:

Ila'dxí'i la' cuíngacasë', en ulu'huídi'në'.

Ilún ba zxön cuíngaqië', en ulu'luí'i cuíngaqië' zxön.

Ila'nné' zi'ë que le naca lá'ayi.

Ila'dá'baguë'ë xuz xiná'agaquië'.

Ilácagaquië' bönni' cabí ta'yaza ládxi'gaquië'.

Biti' ilunë' ca ré'ënë' Dios.

³ Biti' ila'dxí'inë' ca ral-la' ilunë'.

Ilácagaquië' zidzaj ladxi'.

Ila'nné' que luzá'agaquië'.

Biti' ila'nná' be'e cuíngaqië'.

Ilácagaquië' bönni' dza'a.

Biti' ila'lé'enë' dxi'a le naca dxi'a.

⁴ Ilácagaquië' hueti luzé'e, en bití' ila'dzáguië' dxi'a.

Ulu'luí'i cuíngaqië' ca bönni' nayépisëgaquië'.

Ila'dxí'inë' le ila'yázaso ládxi'gaquië', en calëga Dios.

⁵ Ulu'luí'i cuíngaqië' ca bönni' núnbë'gaquië' Dios.

Ila'dá'baguë'ë le ruzá' ládxi'ë Dios queéru'.

Gucuíta ga nacua' bönachi caní. ⁶ Lësca' caní, lu yöl-la' banísa quëgaquië' ila'yazë' gapa naca lu yu'u, en ila'zí' yé'enë' yugu' nigula bití' bi nózguequinu para ila'zí' lu ná'agacanu le ulu'sédinë'. Ila'bága'nu nigula na' dul-la' zían, en ilu'í' ládxi'gacanu yugu' le ila'zësö ládxi'gacanu le cabí nazaca'. ⁷ Ila'yónitica'sinu nigula ni didza' ilún libán que bönachi, pero bití' ca' ila'déli'nu ila'yéajni'ininu le naca idútë li. ⁸ Ca na' guláquië' Janes, en Jambres, bönni' ni' gula'dá'baguë'ë Moisés, lësca' caní ilácagaquië' bönni' ni, ila'dá'baguë'ë le naca idútë li. Ilácagaquië' chul-la niti, en ila'chíxinë' ca naca le réajlë'ëru' Cristo. ⁹ Bití' ila'déli'rönë', pero gaca bë' nácagaquië' bönni' bití' bi nózguequinë' lógaca yúgu'të bönachi, ate' gaca quëgaquië' ca na' guca quëgaquië' Janes, en Jambres na'.

Le rigu'ë Pablo lu ná'abi' bi'i Timoteo

¹⁰ Nöz quëzinu' ca naca le rusédida' bönachi, en ca runa'. Nózinu' ca' le ru'í' ládxa'a guna', en ca réajlë'a Cristo, en ca naca' nöxaj ladxi', en ca nadxí'ida' luzá'a, en ca riböza' zxön ladxi'. ¹¹ Nózinu' ca' yugu' le gula'bía ládxi'gaca bönachi neda', en yugu' le gudí'i guxzáca'a, le gulaca quia' lu yödzö Antioquía, en lu yödzö Iconio, enca' lu yödzö Listra. Yugu' le gula'bía ládxi'gaca bönachi ni' neda' biá' guléna', ate' Xanru' Jesús busölë' neda' lu yúgu'të lë na'. ¹² Yúgu'të nupa té'ëni ilaca idú dxi'a tu' néquiguequi queë' Jesucristo, lësca' ila'guí'i ila'záquië' yugu' le ila'bía ládxi'gaca bönachi légaquië'.

¹³ Na'a, bönni' tuá' dö', en bönni' ta'zí' yé'ë ilácarë' xihui'. Ila'zí' yé'enë' bönachi, ate' ila'zí' yé'e bönachi ca' légaquië'.

¹⁴ Na'a, ben chí'i yugu' le buzëdu', en le guxzí' lu no'o, tu' nunbë' cazu' nupa bulu'sedi li'. ¹⁵ Ga gudela' nacu' bí'ido' núnbë'u le nazúajgaca lu guichi lá'ayi, le huáca ulu'zëajni'ide'e li' para uló' tu' réajlë'u Jesucristo. ¹⁶ Yúgu'të le nazúajgaca lu guichi lá'ayi guchízië' Dios icja ládxi'do'gaca bönachi queë', nupa na' bulu'zúaj lu guichi didza' na' bë'ë Dios. Lë na' nazúaj lu guichi nácada' lesaca' usedi rë'u, en ubéaj ga liná' le runru', en ugú'u rë'u tu nöza, en usedi rë'u para gácaru' tsahui'. ¹⁷ Caní run, para gaca sina' nu naca queë' Dios, en gácada' gun yúgu'të le naca dxi'a.

4

¹⁻² Ni'a queë' Xanru' Dios, enca' Xanru' Jesucristo, rinná bé'eda' li' gunu' libán que xtídzé'ë Xanru'. Lë cazë' uchi'a usöröë' nupa ni nabángaca, en nupa chinátigaca, dza ni' huödë' idinná bé'ë. Bë' ladxi' gunu' lë ni channö raca dxi'a quiu' o biti' raca dxi'a. Lu yöl-la' zxön ladxi', guléaj ga liná' le tun bönachi. Busá' ládxi'gaquië', en guchiza icja nágagaquië' ca naca lë na' rusédiru'. ³ Caní ral-la' gunu' tu' idxín dza cate' biti' ulu'zé nágagaquië' xibá tsahui', pero ilé'ëninë' ila'yönnë' le ta'dánisinë'. Ca ta'zësö ládxi'gaquië' ulu'tubë' quégaquië' nupa ulu'sedi légaquië'. ⁴ Ulu'cá'anë' le naca idútë li, en ila'zí' lu ná'agaquië' yugu' didza' ridasö. ⁵ Na'a, ral-la' gacu' zxön ladxi' lu yúgu'të le runu'. Biá' gulén le ulu'saca' li' zi'. Ben libán que didza' dxi'a. Idú ládxi'u ben dxin le budödë' Cristo lu no'o gunu'.

⁶ Ca naca quia' neda', nudödi cuina' lu në'ë Dios, ate' chizóa ilútië' neda' tu' runa' xichinë', ate' dza uzá'a yödzölió ni chizóa idxín. ⁷ Ca runë' tu bönni' idú ládxi'ë rejë' gudil-la, lësca' caní bena' neda' dxin, en chibudxi bena' le budödë' Cristo lu na'a guna', tu' bena' idú ca sa'yéaj le réajlë'ëru' Cristo. ⁸ Ia'stú, naca löza quia' idéli'da' le ral-la' ila'zí' nupa nácagaca tsahui', le gunnë' Xanru' quia' dza ni', ate' tsahui' naca ca ruchi'a rusöröë' rë'u. Calégasö quia' neda' gunnë' le, pero lësca' gunnë' le quégaca yúgu'të nupa ta'dxi'i Lë', en idú ládxi'guequi ta'böza dza huödë'.

Le buzúajë' lu guichi Pablo gunbi' Timoteo

⁹ Bë' ladxi' guídateo' ga ni zoa' ¹⁰ tu' guléaj ládxi'ë Demas neda', tu' naxí'inë' le ruzi'ë xibé yödzölió ni, ate' guyijë' yödzö Tesalónica. Crescente guyijë' luyú Galacia, ate' bi'i Tito guyéajbi' luyú Dalmacia, tu' caní ben bayudxi ilunë'. ¹¹ Tuzë' Lucas zóalenë' neda'. Guché'ë-bi' bi'i Marcos para guídaleni' li' tsözxón, tu' nácabi' gúnlenbi' neda' tsözxón xichinë' Cristo. ¹² Gusól-la'a-bi' bi'i Tíquico lu yödzö Éfeso. ¹³ Cate' guídu', biá' quia' lari' guitsa' na' bucá'ana' lu yödzö Troas lu yu'u lidxë' Carpo, en biá' ca' quia' yugu' guichi, en le naca lo, biá' quia' yugu' guichi néquiguequini guídi.

¹⁴ Alejandro, bönni' gubëdxi guíë, zían le bi'ë dö' quia'. Lë cazë' Xanru' ubi'ë queë' ca nácagaca le benë' bönni' ni quia'. ¹⁵ Ben chi'i cuinu' queë' bönni' ni, tu' ridá'baga'dë'ë didza' runru' libán que.

¹⁶ Cate' le zí'alö luzuí bidxina' lógaquië' bönni' yúlahui', cuntú nu gúcalen neda', pero bulu'béaj ládxi'gaca yúgu'të bönachi neda'. Biti' ré'ënda' uzí' lëbë' Dios légaquië'. ¹⁷ Guzóalenë' Xanru' neda', en butipë' ládxi'a para údxi guna' libán que xtídzé'ë para ila'yöni yúgu'të bönachi izá'a le. Caní guca, busölé' Xanru' neda', ate' guca quia' tsca burúaja' lu ruá'aba' bëdxi guixi'. ¹⁸ Lë cazë' Xanru' usölé' neda' lu yúgu'të le cabí raca dxi'a, en gun chi'ë neda' ga idxíntea' ga rinná bé'ë Lë' ni' yehua' yubá. ¡Gácatíca'sö queë' yöl-la' ba yúgu'të dza zá'gaca! ¡Ca' gaca!

Pablo rugapë' Dios bönachi queë' Cristo

¹⁹ Bugapa Dios Priscila, en Aquilo, enca' bönachi nacuá' lidxë' Onesíforo. ²⁰ Bugá'anë' Erasto lu yödzö Corinto, ate' bucá'ana'-në' Trófimo luyú Mileto tu' ré'enë'. ²¹ Bë' ladxi' guídu' ga zoa' zí'alö cate' idxín beo' ziaga. Eubulo, en Pudente, en Lino, en Claudia, en yúgu'të böchi' luzá'aru' ni tu'gapë' Dios li'.

²² Rinábida'-në' Xanru' Jesucristo sóalenë' li'. ¡Gácalen li' le ruzá' ládxi'ë Dios quiu'! ¡Ca' gaca!

DIDZA' GUSÓL-LĚ'Ě PABLO QUEĚBI' BI'I TITO

Pablo rugapë' Dios bi'i Tito

¹ Neda', Pablo, naca' huen dxin queë' Dios, en gubáz nasól-lě'ě Jesucristo. Gusól-lě'ě neda' para guna' ga ila'yéajlě' bönachi chiguró cazë' Dios, para ulu'únbë' le naca idútë li ca ral-la' gun nu nunbë' Dios. ² Caní naca' tu' runa' löza uzi'a xibé yöl-la' na'bán idú le guxzí lu nē'ě Dios gunnë' queéru' dza ni'te, cate' si' gusí lo rata' yúgu'të le dë, ate' run cazë' Lě' le nazí lu nē'ě gunë'. ³ Cate' bidxín dza que, Dios bulu'e lahui xtídzë'ě, le gulu'ë lu na'a guna' libán que. Caní gunná bé'enë' Dios, Nu busólá rë'u, neda'. ⁴ Rugapa' Dios li', bócha'ado' Tito. Nacu' idú xzí'ini caza' tu' naca lébisö ca réajlë'ëru' Cristo. Rinábida'-në' Dios Xuz, en Xanru' Jesucristo Nu busólá rë'u, uzá' lădxë'ë quiu', en huéchi' lădxë'ë li', en gunë' ga soa dxi icja lădxi'do'o.

Dxin queë' Cristo runbi' bi'i Tito luyú Creta

⁵ Que lë ni na' bucá'ana' li' luyú Creta, para usó'o le riyadzaj quégaca bönachi queë' Cristo nacua' ni', para ilácagaca idú bönachi queë' Cristo, en para ucú'u bönni' gula yúgu'të yödzö para ilún chi'ë bönachi queë' Cristo nacua' tu tu yödzö ni', ca na' chigunná bé'eda' li' gunu'. ⁶ Nu bönni' gula rapa chi'ë bönachi queë' Cristo ral-la' gáquië':

Bönni' cuntu nu bi gaca inné queë'.

Zoa túzinu nigula queë'.

Yugu' xzí'inë' ral-la' ila'yéajlë'ëbi' Cristo.

Biti' soa nu gaca inné quégacabi' ta'dá dzágasibi' ca',
o ta'dá'baga'bi' xuz xiná'agacabi'.

⁷ Nu bönni' rapa chi'ë bönachi queë' Cristo run bayudxi:

Biti' runë' le güi'i lataj nu bi inné queë' ca runë' xichinë' Dios.

Biti' gáquië' bönni' zidi o bönni' icja dza'a,
o bönni' re'jë', o bönni' ribíxjanë',

o bönni' rizé lădxi'së' dumí.

⁸ Ral-la' gu'ë ga ila'cu'ë bóchi'ru' ta'dxinë' lidxë'.

Ral-la' së lădxë'ë gunë' le naca dxi'a.

Ral-la' gáquië' bönni' réajni'i, en bönni' tsahui'.

Ral-la' gádxinë' Dios, en inná be'e cuinë'.

⁹ Ral-la' gun chi'ë didza' idútë li ca chinazëdë',
para gaca ichízië' icja nágagaca bönachi ca sa'yéaj xibá dxi'a,

en para gaca usayjë' rú'agaca bönachi ta'nné que.

¹⁰ Caní ral-la' gáquië' tu' ta'dá'baguë'ë zían bönni', en tu'ë didza' biti' nazaca', en ta'zí yé'enë' bönachi. Zían bönni' tunë' caní nácagaquië' judío. ¹¹ Yugu' bönni' ni, run bayudxi gunu' ga tsayaj ruá'agaquië', tu' tunë' ga ta'chixi ta'nigui yúgu'të bönachi nacua' yu'u gapa ta'yázië', en tu'sédinë' le cabí ral-la' ulu'sédinë'. Caní tunë' para ila'zí isë' dumí.

¹² Tuë' bönni' gubábë' bönachi Creta ga na' zu', bönni' na' bë'ë didza' uláz que yudo' quégaquië', gunné': "Ta'zí yé'tica'së' bönni' Creta, en nácagaquië' ca böa' guí'a sínia'. Nácagaquië' bönni' huágulë'ë xöhuëdi." ¹³ Didza' ni benë' ba nalí quégaquië' naca idútë li. Que lë ni na' gudil-la légaquië' para gaca idú ca ta'yéajlë'ë Cristo, ¹⁴ en para cabí ulu'zé nágagaquië' yugu' didza' ridasö quégaquië' bönni' judío, en biti' ilunë' ca ta'nná bë' bönachi nucá'anagaca le naca idútë li.

¹⁵ Yúgu'të naca dxi'a quégaca nupa nácagaca dxi'a, pero quégaca nupa nácagaca xihui', en biti' ta'yéajlë', biti' bi naca dxi'a, pero nácagaca xihui' ga ridxintë le ta'bequi ícjaguequi, en le ta'zá' lădxi'gaca. ¹⁶ Ta'nné' núnbë'gaquië' Dios, pero le túngaquië' biti'

röjlöz le ta'nné' tu' nácagaquié' bönni' tu'dí'iné' Dios. Ta'dá'baguë'ë xtídzë'ë, en bití' ca' gaca iluné' le naca dxi'a.

2

Xibá dxi'a le ral-la' usédiru'

¹ Na'a, ral-la' gu'u didza' le röjlöz xibá dxi'a.

² Busedi yugu' bönni' gula:

Bití' ral-la' ilé'ajë'.

Ral-la' iláquié' ba'a ladxi', en bönni' ta'yéajni'iné'.

Ral-la' gaca idú ca ta'yéajlë'ë Cristo.

Ral-la' ila'dxí'iné' luzá'agaquié', en ila'bözë' zxon ladxi'.

³ Busedi yugu' nigula gula:

Ilunnu le raza ládxë'ë Dios.

Cabí ila'nnënu que luzá'agacanu, en cabí ilé'ajnu.

Ral-la' ulu'sédinu le naca dxi'a.

⁴ Ral-la' ulu'sédinu' nigula ni' yú'ugacanu iz cuidi'

para ila'dxí'inu bönni' que queégacanu, enca' zxi'inigacanu.

⁵ Ral-la' ilácanu nigula ta'yéajni'inu, en nigula dxi'a ladxi'.

Ral-la' ilún chí'inu le dë lídxigacanu, en ilácanu dxi'a.

Ral-la' ilunnu bal bönni' que queégacanu.

Ral-la' cabí bi ilunnu le güf'i lataj nu inné' zi' que xtídzë'ë Dios.

⁶ Busedi yugu' bönni' ni' nacu'ë iz cuidi':

Ral-la' ilácagaquié' bönni' ta'yéajni'iné'.

⁷ Ral-la' gúntica'su' le naca dxi'a,

ulu'inu' bönachi caní ca ral-la' ilúngaca.

Ca rusédinu' ral-la' ulu'i nacu' idú ladxi', en ba'a ladxi'.

⁸ Ral-la' usédinu' didza' dxi'a le cabí gaca nu bi inné' que.

Caní gunu' ga utu'iné' bönni' ridá'baguë'ë,

en bití' gaca bi inné' queéli' runli' le ruá' dö'.

⁹ Busedi bóchi'ru' ni' ta'yéajlë'ë Cristo, en nadó'ogaquié':

Ral-la' ila'cu'ë nöxaj lógaquié' xángaquié'.

Ral-la' iluné' yúgu'të le ila'yaza ládxí'gaquié' xángaquié'.

Bití' ral-la' tá'baga'gaquié' le ta'nná' bë'ë.

¹⁰ Bití' bi ulu'cáchi'lané'.

Ral-la' ulu'lu'i cuíngaquié' tsahui' ca naca yúgu'të le tuné'.

Caní ulu'i lo naca dxi'a xibá queë' Dios, Nu busölá' rë'u.

¹¹ Cristo, bönni' na' buzá' ládxë'ë Dios queéru' chibulu'i lahué' lógaca yúgu'të bönachi para ulu'lágaca. ¹² Lë' rusédiné' rë'u ucá'anaru' le cabí raza ládxë'ë Dios, en cabí së ládxí'ru' le naca que yödzülió ni, pero cózaru' zxon ladxi', en gácaru' tsahui' dza ni zóaru' na'a, en gunru' ca ré'ëni quéziné' Dios. ¹³ Ral-la' cózaru' le runru' löza le gun ga gácaru' bica' ba, lë na' gaca dza ni' cate' ulu'i lahué' Jesucristo lu bení' idú queë'. Náquié' Dios zxon, Nu rusölá' rë'u. ¹⁴ Lë cazë' budödi cuiné' uláz queéru', para böá'uë' rë'u lu yúgu'të le naca xihui', ate' ruúnë' rë'u tsahui' para gácaru' bönachi queë', en güf'i ládxí'ru' gunru' le naca dxi'a.

¹⁵ Yugu' lë ni bë' didza', en guchiza icja nágagaca bönachi ni', ate' len yöl-la' unná' bë' gudil-la' léguequi. Béntica'sö caní, para cabí sí' lataj nu ucá'ana cá'asó xtídzü'u.

3

Le ral-la' ilún bönachi ta'yéajlë' Cristo

¹ Busá' ládxí'gaquié' bóchi'ru' ni' iluné' ca ta'nné' bönni' dë lu ná'agaquié', en bönni' yúlahui', para iluné' ca rna xtídzá'gaquié'. Ral-la' ila'cu'ë sina' iluné' le naca dxi'a. ² Bití'

bi le ruá' dö' ral-la' ila'nné' que luzá'agaquié', en biti' ila'díl-lalené' légaquié' didza', pero ral-la' ilácagaquié' nöxaj ladxi', en idú ladxi' lógaca yúgu'tè bönachi.

³ Lësca' rë'u, zí'alö gúcaru' yugu' bönni' biti' ta'yéajni'iné', en gudá'baga'ru' Dios. Gudaru' nanítiru', en gúcaru' ca nupa nadó'ogaca, tu' benru' le guzé ládxi'ru' le ruá' dö', en ia'bal-la le guyaza ládxi'ru'. Benru' ca' le ruá' dö', en buxzé'eru' luzá'aru'. Biti' bila'lé'e bönachi rë'u dxi'a, ate' rë'u biti' bilé'eru' dxi'a luzá'aru' turu' ia'turu'. ⁴ Ní'irö bulu'e lahui Dios, Nu rusólá rë'u. Naca bë' náquié' idú dxi'a, en nadxí'iné' yúgu'tè bönachi, ⁵ tu' busolé' rë'u, calëga tu' zoa bi le naca dxi'a benru' rë'u, pero tu' buéchi' ládxe'ë rë'u. Buné' rë'u dxi'a, en bené' ga nácaru' bönachi cubi. Dios Bö' Lá'ayi rucubé' rë'u. ⁶ Dios gusól-lé'ë Dios Bö' Lá'ayi queéru' tu' néquiru' queé' Jesucristo, Nu rusólá rë'u. ⁷ Buzá' ládxe'ë queéru', en buné' rë'u tsahui' para gata' yöl-la' na'bán idú queéru', le runru' löza gunné' queéru'.

⁸ Didza' idúté li lë ni nuzúaja' lu guichi. Ré'ënda' usédide'enu' yugu' bönni' ni' yugu' lë ni para iluí' ládxi'gaquié' ilúntica'sé' le naca dxi'a tu' ta'yéajlé'ë Dios. Lë ni naca dxi'a, en nácada' lesaca' ila'zí' lu ná'agaca yúgu'tè bönachi. ⁹ Na'a, biti' gu'u lataj nu güi' didza' le cabí nazaca', o nu güi' ladxi' ca ná'agaca lágaca zióntërö cö' xuz xtó'ogaca bönachi, o nu tsöjgutsa' yugu' didza' bizxaj, en yugu' le ridíl-la didza' ca naca que xibá queé' Moisés, tu' cabí bi nazáca'gaca le caní, ate' cuntú nu uzí' xibé didza' caní.

¹⁰ Channö zoa nu bönni' ni', rubéajé' choplö bönachi queé' Cristo, tödi usó'o ládxe'ë tu ia'tú luzuí, bubéajé' bönni' na'. ¹¹ Nöz quézinu' chiböáquié' caní nu bönni' biti' náquié' tsahui', en runé' dul-la'. Chinabágué'ë xíguia' ni'a que lë na' runé'.

Le buzúajé' Pablo lu guichi le gunbí' bi'i Tito

¹² Cate' isól-la'a-né' Artemas o Tíquico ga zu', bë' ladxi' guídu' ga ni zoa' lu yödzo Nicópolis, tu' chinuna' quia' ugá'ana' ni yugu' beo' ziaga. ¹³ Zenas, bönni' na' rudödé' didza' ca rinná bë' bönachi yúlahui', enca' Apolos, ila'dxiné' ga ni' zóali'. Bugú'u légaquié' nöza lu yöl-la' rácalen, para cabí bi yadzaj quégaquié'. ¹⁴ Busedi yugu' böchi' luzá'aru' ilúntica'sé' le naca dxi'a, en bi ulu'nödzjé' quégaca nupa bi riyadzaj quéguequi, para gaca bë' caní le ná'agacaquié' queé' Cristo.

Pablo rugapé' Dios bönachi queé' Cristo

¹⁵ Yúgu'tè nupa nacuí'len neda' tu'gapa Dios li'. Bugapa Dios nupa ni' nadxí'igaca rë'u tu' ta'yéajlé' Dios. Le ruzá' ládxe'ë Dios queéru' gácalen yúgu'téli'. ¡Ca' gaca!

DIDZA' GUSÓL-LĒ'Ē PABLO QUEĒ' FILEMÓN

Pablo rugapë' Dios Filemón

¹ Neda', Pablo, dzágabi' neda' bi'i bóchi'ru' Timoteo. Nadzuna' lidxi guié tu' runa' xichinë' Jesucristo. Rugapa' Dios li', Filemón. Nacu' bönni' nadxí'itu', en runu' xichinë' Cristo ca runtu' netu'. ² Rugapa' Dios Apia, nigula quiu'. Nácanu zanru' réajlë'ënu Cristo. Rugapa' Dios ca' xzí'inu', Arquipo. Nácabi' queë' Jesucristo ca tu bönni' rejë' gudil-la, tu' runbi' xichinë' Lë' ca runtu' netu'. Lësca' rugapa' Dios bönachi queë' Cristo tu' dubë' lu yu'u lidxu'. ³ Rinábida'-në' Xúziru' Dios, enca' Xanru' Jesucristo, uzá' ládxe'ë queéli', en gunë' ga soa dxi icja ládxi'do'oli'.

Ca runë' Filemón tu' réajlë'ë Cristo

⁴ Rética'sa'-në' Dios queëru' "Xclenu", en röjnética'sida' li' cate' rulidza'-në'. ⁵ Caní runa' tu' ridxín quia' didza' ca nadxí'inu'-në' Xanru' Jesús, en réajlë'u Lë', en nadxí'inu' ca' yúgu'të bönachi rö queë'. ⁶ Rinábida'-në' Dios gunë' ga gunda' dxin libán runu' ca naca le réajlë'u Cristo, para ulu'zì' xibé nupa nacuá' ni' yúgu'të le naca dxi'a, le ruzá' ládxe'ë Jesucristo queëru'. ⁷ Rudzëjada', en ruzí' zxöna' tu' nadxí'inu' yugu' bóchi'ru', en benu' li', bócha'a, ga bulu'huóaca ládxi'gaca bönachi ta'yéajlë' Cristo.

Filemón ral-la' uniti lahuë'-bi' Onésimo, bi'i nadó'o queë'

⁸ Que lë ni na', sal-la' dë lu na'a tu' naca' gubáz nasól-lë'ë Cristo inná bé'eda' li' ca ral-la' gunu', ⁹ ráta'yua' lo' len yöl-la' nadxí'i, neda' ni chinaca' bönni' gula, en yu'a lidxi guié tu' runa' xichinë' Jesucristo. ¹⁰ Ráta'yua' lo' uláz queëbi' Onésimo, bi'i na' bena' ga böácabi' queë' Cristo, en que lë ni na' nácabi' ca xzí'ini caza' ga ni nadzuna' lidxi guié.

¹¹ Bi'i ni, zí'alö bití' gúcabi' lesaca' quiu', pero na'a nácabi' lesaca' quiu' li', enca' quia' neda'. ¹² Bi'i ni rusól-la'a-bi' ga zu'. Ben bal lëbi' ca neda' caz runu' bal, tu' nadxí'ida'-bi'. ¹³ Gú'unida' ugá'analenbi' neda' ni, para uláz quiu' gunbi' xichina' tsanni ni yu'a lidxi guié tu' runa' libán que didza' dxi'a, ¹⁴ pero bití' bi' ré'ënda' guna' le cabí naca didza' quiu', para cabí guna' bayudxi gácalenu' neda', pero huáca gácalenu' neda' tu' ré'ëni quézinu' ca'. ¹⁵ Nadxi ca' que lë ni na' buzá'abi' Onésimo ga zu' tu' chí'ido' para udxinbi' tsaz ga zu'. ¹⁶ Na'a, bíti'rö gácabi' quiu' ca tu' bi'i nadó'o, pero gácabi' quiu' ca bi'i böchi'cazu', tu' nácabi' bi'i bóchi'ru' réajlë'ëbi' Cristo, en nadxí'iru'-bi'. Nácabi' caní quia' neda', ate' ralla' gácaröbi' ca' caní quiu', calégasö ca böchi' luzó'o, pero lësca' ca bi'i bóchu'u réajlë'ëbi' Xanru' Jesucristo.

¹⁷ Que lë ni na', channö nunu' neda' tuz, ben lëbi' bal ca neda' caz runu' bal. ¹⁸ Channö bi' xíguia' benbi' quiu' o channö bi' rál-la'bi' quiu', gunnátëz neda' ral-la'a. ¹⁹ Neda', Pablo, len na'a caza' ruzúaja' quiu' lu guichi lë ni: Neda' caz quixja' bi' rál-la'bi', en calëga guía' li': Lësca' ral-lu'u quia' yúgu'të le dë quiu' tu' bena' neda' ga napu' yöl-la' na'bán idú. ²⁰ Ca' gaca, bócha'a. Channö dë le uzi'a xibó' tu' néquiru' queë' Xanru', ben lë na' chigúta'yua' lo' tu' naca' bóchu'u réajlë'a Cristo, ate' caní gunu' ga huóaca ládxa'a.

²¹ Ruzúaja' quiu' lu guichi ni, tu' ruzxöni ládxa'a li', gunu' ca rnna xtídza'a, en nözda' gunu' ia'lati' ca lë na' chigúta'yua' lo'. ²² Lësca' rinaba' lo' upó'o quia' ga soa' lu yu'u lidxu', tu' runa' löza urúaja' lidxi guié ni, ate' guída' ga zóali' tu' rulídzali'-në' Dios, en rinábali' lahuë' ni'a quia' neda'.

Pablo ruzúajë' lu guichi le rugapa Dios Filemón

²³ Epafras, bönni' yú'ulenë' neda' tsözxón lidxi guié ni tu' runë' xichinë' Jesucristo, rugapë' Dios li'. ²⁴ Lësca' tu'gapë' Dios li' Marcos, en Aristarco, en Demas, en Lucas, yugu' bönni' ni túnlenë' neda' tsözxón dxin queë' Cristo.

²⁵ Rinábida'-ně' Xanru' Jesucristo uzá' ládxě'ě queé'li'. ¡Ca' gaca!

DIDZA' RUZÉAJNI'I YUGU' BÖNACHI HEBREO

Dios bé'lenë' rë'u didza' lu ru'ë Zxí'ini cazë'

¹ Zián luzuí, en zián ca benë' Dios, bé'lenë' xuz xtó'oru' didza' dza ni'te lu ruá'agaquië' bönni' gulu'ë didza' uláz queë'. ² Na'a, ga ruúdxí xtídzë'ë, dza ni zóaru' na'a, Dios bé'lenë' rë'u didza' lu ru'ë Zxí'ini cazë'. Dios buzóë' Lë' para guequi queë' Zxí'inë' yúgu'të le nequi queë' Lë', ate' lu në'ë Zxí'inë' na', Dios benë' yödzölió ni. ³ Zxí'inë' na' náquië' ca tu le rulu'i lahui yöl-la' zxon queë' Dios, en ca náquië' Zxí'inë' rulu'i lahui idú le náquië' Dios caz. Run cazë' ga nacua'tica' sö yúgu'të, rugunë' dxin didza' ru'ë, en yöl-la' huáca queë'. Cate' budxi benë' le ruún rë'u dxi'a que le naca dul-la' nabága'ru', yöjchö'ë cuita lë'ë ibëla Dios, Nu rö'ö rinná bë' xitsá'tërö.

Zxí'inë' Dios nayépisëtërë' ca yugu' gubáz lá'ayi

⁴ Zxí'inë' Dios nayépisëtërë' ca yugu' gubáz lá'ayi queë' Dios, tu' nácatërö lo le lë', lë na' Dios gulu'ë Lë' tu' náquië' Zxí'ini cazë', ca lágaquië' gubáz lá'ayi queë' na'. ⁵ Dios catu caz gudxë' tuë' gubáz lá'ayi queë' ca na' gudxë' Zxí'inë'. Gunnë': Zxí'ina' nacu'. Buzóa' Li' na'a.

Catu caz bë'ë didza' queë' tuë' gubáz lá'ayi ca na' bë'ë didza' ca naca queë' Zxí'inë'. Gunnë':

Naca' Xuzë', ate' Lë' náquië' Zxí'ina'.

⁶ Lësca' caní, cate' Dios buzóë' Bi'i que cazë' lu yödzölió ni, gunné': Yúgu'të gubáz lá'ayi queë' Dios ila'yéaj ládxi'gaquië' Lë'.

⁷ Ca nácaquië' gubáz lá'ayi queë', rnna: Lë' runë' ga nácaquië' gubáz lá'ayi queë' ca bö' recja, ate' gubáz lá'ayi huen dxin queë', runë' ga nácaquië' ca guí'.

⁸ Na'a, ca naca cazë' Zxí'inë', rnnë': Ga rö'u rinná bë'u, inná bé'tica'su', Dios. Tsahui' naca ca rinná bë'u.

⁹ Nadxí'inu' le naca tsahui', en calëga le ruá' dö'. Que lë ni na' Dios budödë' lu no'o yöl-la' unná bë', en benë' ga ruzí'tëru' Li' xibé yöl-la' unná bë' ca le tu'z'i xibé luzó'o.

¹⁰ Lësca' caní rnnë': Li', Xan, cate' gusí lo, benu' yödzölió, ate' len ná'asu' buzú' lúzxiba.

¹¹ Huadödi quéguequi, pero Li', tsaz idí'u.

Yúgu'të itébigaca ca ritëbi lari',

¹² en ca lari' utubu' léguequi, en utsó'o léguequi, pero Li', catu caz utsá' cuinu' en catu caz igulu'.

¹³ Dios catu caz gudxë' tuë' gubáz lá'ayi queë' ca gudxë' Zxí'inë', gunné':

Guró'ö cuita lë'a ibëla cate' gunra' ga ulu'zechu zxíbigaca lo' nupa bití' ta'lé'e Li' dxi'a.

¹⁴ Yúgu'të gubáz lá'ayi queë' Dios nácaquië' bö' huen dxin queë' Dios, ate' nasól-lë'ë légaquië' para ilácalenë' nupa ni nulágaca.

2

Bití' ral-la' ucá'anaru' cá'asö yöl-la' rusölä

¹ Que lë ni na', ral-la' güi'i lãdxi'röru' le chibiyóniru', para cabí gaca chopa lãdxi'ru'.
² Guca bē' naca idútē li didza' na', le bidxín dza ni'te lu ná'agaquiē' gubáz lá'ayi queē' Dios, ate' yúgu'tē nupa gula'dödi bē' ca rnna didza' na', en biti' gulún ca rnna, Dios benē' léguequi xíguia' ca na' röjlóz le gulúngaca. ³ Lësca' caní biti' ca' uláru' rē'u lu xíguia' na' channö ucá'anaru' cá'asö yöl-la' rusölá ni, le benē' Lë cazē' Xanru' libán que z'älö, ate' nupa bila'yöni Lē' bulu'lu'i rē'u naca idútē li. ⁴ Lësca' caní Dios caz benē' tsözxón légaquiē' ba nalí, tu' benē' le nácagaca bē', en le tun ga rubániru', en yugu' yöl-la' huáca zxon. Gudísiē' ca' yugu' le runödzejē' Dios Bö' Lá'ayi quégaquiē' tsca gú'uni quézinē' Dios.

Dios benē' ga böáquiē' Jesús idú ca nácaru' rē'u

⁵ Dios biti' budödē' yödzölió si' za' lu ná'agaquiē' gubáz lá'ayi que yehua' yubá queē', lë na' ru'iru' didza' que. ⁶ Na'a, ca naca lë ni, nazúaj lu guichi lá'ayi didza' bē' nu run ba nalí le rnna:

Dios, rubánide'eda' tu' ru'i lãdxu'u bönachi.

Rubánide'eda' tu' rácalenu' léguequi.

⁷ Ia'látisö cá'asö ca yugu' gubáz lá'ayi que yehua' yubá quiu' benu' bönachi.

Buzú' quéguequi yöl-la' zxon, en yöl-la' run bal,

en budödu' yúgu'tē le benu' Li' lu né'eguequi.

⁸ Yúgu'tē budödu' lu né'eguequi para ila'nná be'e le.

Nazúaj lu guichi lá'ayi lë na' rnna: "Budödu' lu né'eguequi yúgu'tē." Biti' bi bucá'anē' le cabí budödē' lu né'eguequi, pero ga ridxintē na'a dza, biti' rilé'eru' yu'u lu né'eguequi yúgu'tē. ⁹ Réquibe'eru' le guca queē' Jesús. Tu chí'isö, Dios benē' ga böáquiē' ia'látisö cuidi' ca yugu' gubáz lá'ayi que yehua' yubá queē'. Guljē' bönachi para gútiē', ate' gudí'i guzxáquē'ē' Jesús lu yöl-la' guti uláz quégaca yúgu'tē bönachi, tu' buzá' lãdxē'ē' Dios queēru' caní. Tu' benē' Jesús caní, Dios benē' ga rata' queēru' yöl-la' zxon, en yöl-la' run bal.

¹⁰ Dios benē' yúgu'tē le rilé'eru', en runē' ga nacuá'tica'sö. Dios benē' ca ral-la' gunē' cate' benē' ga naca bē' náquiē' Cristo idú tsahui' ni'a que le gudí'i guzxáquē'ē'. Caní benē' Dios queē' Cristo, Nu bideli' yöl-la' rusölá para gaca iché'ē' bönachi zían yehua' yubá queē'. ¹¹ Cristo ruúnē' tsahui' bönachi para ilequi quez queē' Dios. Tuzē' náquiē' Xúzguequi nupa na' ruúnē' Cristo tsahui', en Xuz cazē'. Que lë ni na', biti' ca' rutuí'inē' Zxí'inē' Dios cate' rnnē' nácagaquiē' böchi' luzē'ē'. ¹² Ca naca lë ni nazúaj lu guichi lá'ayi le rnna:

Usiyönda' böchi' luzá'a ca nacu' Li', Dios.

Gatsaj láhui'lö bönachi tu'dubi quiu',

gul-la' yöl-la' ba quiu'.

¹³ Lësca' caní rnnē':

Uzxöni lãdxa'a-nē' Dios.

Ga yúbölö nazúaj le rnnē':

¡Bulí'yútsöca' neda', en yugu' zxi'inē',

nupa na' Dios bennē' quia'!

¹⁴ Que lë ni na', tu' néquiguequinē' bëla' en rön yugu' zxi'inē' na', lësca' caní Cristo ben cuinē' ca nácagaquiē'. Guljē' bëla' en rön. Caní guljē' para guca gútiē', en caní guca busunítiē' yöl-la' huáca unná bē' que tu' xihui', nu na' dē lu nē'e guti bönachi. ¹⁵ Caní benē' Cristo para guca busanē' yúgu'tē nupa gulaca ca bönni' nadó'ogaquiē' tsanni ni nacuá' nabángaca, tu' guladxi yöl-la' guti. ¹⁶ Naca bē' biti' benē' caní para gácalenē' yugu' gubáz lá'ayi que yehua' yubá queē' Dios, pero para gácalenē' yugu' zxi'ini xi'sóē' Abraham. ¹⁷ Que lë ni na', ben bayudxi böáquiē' Cristo idú ca nácagaquiē' böchi' luzē'ē' na', para gáquiē' lahuē' Dios tu bixúz lo, tu bixúzi runē' ca rnnē', en ruhuéchi' lãdxē'ē' bönachi, enca' para gunē' le gun ga gata' lu nē'ē' ugtúē' dul-la' nabága'gaca bönachi. ¹⁸ Na'a, tu' gudí'i guzxáquē'ē' Lë cazē' Cristo, ate' guzxí' bē' tu' xihui' Lē', que lë ni na' napē' yöl-la' huáca gácalenē' nupa ni, rizí' bē' tu' xihui' léguequi.

3

Jesús nayépisètèrè' ca Moisés

¹ Que lè ni na', böchi' luzá'ado', libí'ili' na' nácali' quez queë' Dios tu' bulidzè' Dios libí'ili', buli'yú dxi'a ca náquië' Jesucristo. Náquië' gubáz nasól-lè'ë Dios, enca' bixúz lo que le nazí' lu ná'aru'. ² Jesús ni runë' ca rnna xtídzè'ë Dios, Nu na' buzóa Lè' xilatjè', ca na' benë' ca' Moisés, benë' ca rnna xtídzè'ë Dios lógaca yúgu'tè bönachi queë' Dios. ³ Nayépisètèrè' Jesús ca Moisés, para gaca queë' yöl-la' ba, ca na' nácarë' lo bönni' nequi queë' tu yu'u ca naca huen dxin zoë' lu yu'u na'. ⁴ Yúgu'tè yu'u, zoa nu ben le, pero Dios náquië' Nu ben yúgu'tè le rilé'eru'. ⁵ Le nácatë Moisés benë' ca rnna xtídzè'ë Dios lógaca bönachi queë' Dios, pero gúquië' ca tu bönni' huen dxin, ate' benë' ba nalí que didza' ral-la' gu'ë Dios, ⁶ pero Cristo runë' ca rnna xtídzè'ë Dios, en náquië' Zxí'ini cazë', ate' nacuá' lu në'ë bönachi queë' Dios. Rë'u ni, nácaru' bönachi na' queë' Dios channö gácaru' tsutsu ga idxinrö dza údxi. Ral-la' gácaru' tsutsu ca ridipa ládxi'ru', enca' ca rudzèjalenru' lè na' runru' löza.

Dë lataj ga ulu'zì ládxi'gaca bönachi queë' Dios

⁷ Que lè ni na', nazúaj lu guichi ca rnnë' Dios Bö' Lá'ayi le rnna:

Na'a, channö riyónili' didza' ru'ë Dios,

⁸ biti' gácali' zidi lu icja ládxi'do'oli'

ca na' gulaca nupa ni' gula'dá'baga' Dios

cate' ni' gula'zì' bë' Lè' lu lataj cá'asö.

⁹ Gula'zì' bë'ë xuz xtó'oli' neda' ni' sal-la' bila'lé'enë' le bena' idú ca choá' iz.

¹⁰ Que lè ni na' guléda' bönachi dza ni', en gunnía':

“Ta'chíxítica'sinë' ca ta'zá' ládxi'gaquië'.

Biti' té'ënnë' ila'nózinë' le ré'ënda' ilunë'.”

¹¹ Que lè ni na' guléda' légaquië', en bena' tsutsu xtídza'a, gunnía':

“Biti' ila'yázië' ga ulu'zì' ládxi'gaquië' tsözxón len neda'.”

¹² Guli'gún chi'i cuinli', böchi' luzá'ado', para cabí gácali' nituli' libí'ili' tu bönni' xihui' cabí réajjlè'ë, en para cabí usanli'-në' Dios ban. ¹³ Na'a, buli'zéajni'i tuli' ia'tuli' yúgu'tè dza, tsanni ni naca dza ni zóaru' na'a, para cabí sí' ye'e le naca xihui' libí'ili', en para cabí gácali' nituli' libí'ili' zidi lu icja ládxi'do'oli'. ¹⁴ Yúgu'tëru' gunru' tsözxón Cristo channö gácaru' tsutsu ga idxinrö dza údxi, ca na' gusí lo ridipa ládxi'ru'.

¹⁵ Caní ral-la' gunru' tsanni ni rnna:

Na'a, channö riyónili' chi'ë Dios,

biti' gácali' zidi lu icja ládxi'do'oli',

ca na' gulaca nupa ni' gula'dá'baga' Dios.

¹⁶ ¿Nupxi na' bila'yöni xtídzè'ë Dios, en gula'dá'baga' Lè'? Gulún caní yúgu'tè nupa ni' bubéajë' Moisés léguequi luyú Egipto. ¹⁷ ¿Nupxi na' gulénë' Dios idú ca choá' iz? Gulaca nupa ni' gulún dul-la', ate' gulati lu lataj cá'asö. ¹⁸ ¿Nupxi ni' benë' tsutsu xtídzè'ë Dios, gunné' biti' ila'yaza ga ulu'zì' ládxi'guequi tsözxón len Lè'? Gulaca nupa ni' biti' gulún ca rnna xtídzè'ë Dios. ¹⁹ Na'a, réquibe'eru' biti' guca ila'yázië' tu' cabí gula'yéajjlè'ë Dios.

4

¹ Na'a, tsanni ni nagá'ana le guzxi' lu në'ë Dios queëru' para gaca tsú'uru' lataj queë' ga uzí' ládxi'ru', ral-la' gádxiru' para cabí unítiru' lataj tsú'uru' ni'. ² Biyönru' rë'u didza' dxi'a ca na' bila'yönnë' légaquië', pero légaquië' biti' bulu'zì'ë xibé didza' na' bila'yönnë', tu' cabí gula'yéajjlè'ë Dios cate' bila'yönnë' le. ³ Rë'u ni réajjlè'ëru' Dios, en tsú'uru' lataj queë' ga uzí' ládxi'ru'. Raca ca na' gunné' Dios:

Que lè ni na' guléda' légaquië'

en bena' tsutsu xtídza'a, gunnía':

Biti' tsú'ugaquië' ga ulu'zì' ládxi'lenë' neda'.

Dë lataj tsú'uru' rë'u ga uzí' ládxi'lenru'-në' Dios, sal-la' budxi benë' Dios xichinë' dza ni'te cate' ni' benë' yödzölió ni, en chiruzí' ládxi'ë. ⁴ Nazúaj lu guichi lá'ayi ga ru'í didza' ca naca que dza igadxi, le rnna: "Buzí' ládxi'ë Dios dza igadxi yugu' lu dxin benë'." ⁵ Ga yúbölö rnna: "Biti' tsú'ugaquië' ga ulu'zí' ládxi'lenë' neda'." ⁶ Nupa ni' bila'yöni zí'aló didza' dxi'a, biti' guyú'ugaca ni' tu' cabí gulún ca rnna xtídzë'ë Dios. Que lë ni na', ral-la' tsú'ugaca bönachi yúbölö ni'. ⁷ Que lë ni na' ca', Dios bulu'e tu dza yúbölö, gunné': "Na'a dza." Caní naca, cate' chigudödi iz zían, bë'ë didza' Dios lu ru'ë David, ca na' nazúaj lu guichi lá'ayi le rnna:

Na'a dza, channö riyónili' didza' ru'ë Dios,
biti' gácali' zidi lu icja ládxi'do'oli'.

⁸ La'tu' benë' Josué ga bulu'zí' ládxi'gaquië' cate' gula'yu'ë lu xiyúgaquië', biti' bë'ë Dios didza' gudödi ni' que ia'turö dza cate' nu uzí' ládxi'len Lë'. ⁹ Que lë ni na', nagá'ana quégaca bönachi queë' Dios lataj ila'déli'në' ga ulu'zí' ládxi'gaquië'. ¹⁰ Nupa tsú'ugaca ga ulu'zí' ládxi'lengaca Dios, ulu'zí' ládxi'gaquië' lu dxin tunë', ca na' buzí' ládxi'ë Dios yugu' lu dxin benë' Lë'. ¹¹ Que lë ni na', ral-la' gü'i ládxi'ru' tsú'uru' ga ni' uzí' ládxi'lenru'-në' Dios. Biti' ral-la' tá'baga'ru' xtídzë'ë ca na' gulún nupa ni' biti' gula'yéajlë' Dios, en biti' gula'yu'ë ni'.

¹² Xtídzë'ë Dios naca ban caz, en napa caz yöl-la' huáca. Richúgurö ga rë' ca guié tuchi' natuchi' iropa ru'í. Richugu ridxín ga ta'dzaga bö' naca cázaru', en le zoa lu icja ládxi'do'oru', enca' röxaj ga ridxintë' lu dxita lu bin. Run ga naca bë' le ribequi ícjaru', en le rizá' ládxi'ru'. ¹³ Biti' bi gaca ucáchi'ru' ga biti' gaca ilé'enë' Dios le. Yúgu'të le nun cazë' Dios nalá' lahui, en narúaj ga liná' lahuë' Dios. Lahuë' Lë' run bayudxi quíxjö'öru' le nunru'.

Jesús náquië' bixúz lo, Nu nácatë'ë zxön

¹⁴ Zoa queëru' tu bixúz lo, nácatë'ë zxön, Nu na' gudödi ni' yehua' yubá, Jesús, Zxí'inë' Dios. Que lë ni na' ral-la' ugá'anaru' tsutsu ca naca le nazí' lu ná'aru'. ¹⁵ Zoa queëru' tu bixúz lo, Nu gaca huéchi' ladxí' rë'u ca nácgaca le raca queëru', tu' guzxi' bë' tu' xihui' Lë cazë' iduté ca na' rizí' bë' tu' xihui' na' rë'u, pero biti' bi dul-la' benë' Lë'. ¹⁶ Que lë ni na', idú ládxi'ru' ral-la' ibíga'ru' gala' ga rö'ë rinná bë'ë Dios, Bönni' ruzá' ladxë'ë queëru', en inábaru' lahuë' huéchi' ládxi'ë rë'u, en uzá' ládxi'ë queëru', para gácalenë' rë'u cate' bi raca queëru'.

5

¹ Dios ribó cazë' núti'tës bixúz lo ladaj bönachi, en ruzóë' lë' para gunë' yugu' le runë' lahuë' Dios uláz quégaca bönachi, en cu'ë lahuë' Dios yugu' le tu'nödzaj bönachi, en yugu' böa' bëdxi tútigaquië'-ba' lu bucugu lá'ayi tu' nözi dul-la' nabága'gaquië'. ² Bixúz lo na', tu' raca queë' lébisö ca raca quégaca bönachi, gaca gáquië' zxön ladxí' len nupa nácgaca yugu' bönni' canó'z, en nupa ta'chixi ta'nigui. ³ Que lë ni na', tu' náquië' bixúz lo na' bönáchisö, ral-la' cu'ë lahuë' Dios böa' bëdxi na' tútigaquië'-ba' lu bucugu lá'ayi ni'a que dul-la' nabaga' cazë', ca na' runë' ca' ni'a que dul-la' nabága'gaca bönachi.

⁴ Cuntu nu gaca gun cuini bixúz lo, pero Dios rulidzë' nu ral-la' gaca bixúz lo, ca na' bulidzë' Aarón. ⁵ Lë'sca' caní guca queë' Cristo. Biti' ben cuinë' bixúz lo, pero Dios buzóë' Lë' ca bixúz lo. Ca naca lë ni, Dios gudxë' Lë':

Li' nacu' Zxí'ina'.

Buzóa' Li' na'a.

⁶ Lë'sca' caní gudxë' Lë' le nazúaj ga yúbölö, gunné':

Li' nácatíca'su' bixúz,

ca na' gúquië' Melquisedec bixúz.

⁷ Cristo, cate' ni' zoa cazë' yödzölió ni, bulidzë' Dios, en gúta'yuë' lahuë'. Guródxí'ë, en guródxë' lahuë' Dios, Bönni' guca usölé' Lë' lu yöl-la' guti, ate' Dios biyönnë' Lë' tu'

gúdxinē Lē' idú ládxi'ē. ⁸ Sal-la' gúquiē' Zxí'inē Dios, bizédē' gunē' ca rna xtídzē'ē Dios tu' gulaca queē' yugu' le gudí'i guzxáquē'ē. ⁹ Cate' chigúquiē' Cristo idú ca ral-la' gáquiē' tu bixúz lo, Dios benē' Lē' Bönni' rusölē' tsaz yúgu'tē nupa tun ca rna xtídzē'ē. ¹⁰ Ní'irö Dios buzóē' Lē' para gáquiē' bixúz lo ca na' gúquiē' Melquisedec na' bixúz lo.

Zoa bönadxi queéru' huóaj ládxi'ru', en tá'baga'ru'-nē' Cristo

¹¹ Ca naca lē ni, zían le ral-la' güf'ilentu' libí'ili' didza', le naca böniga quíxjöi'itu' libí'ili', tu' cabí réajni'inili'. ¹² Chigudödi dza ral-la' gaca usédili' bönachi xtídzē'ē Dios, tu' chibiyónili' xidzé, pero riquínili' nu quíxjöi'i libí'ili' leyúbölö yugu' le cabí naca böniga nazí' lu nē'e nu sí' réajlē'. Nagá'anali' ca yugu' bi'i hué'enido' ta'quínibi' nidxi', en calēga la' huagu tsutsu. ¹³ Yúgu'tē bönni' naquíniguequinē' nu usedi légaquiē' lē na' biti' naca böniga, nácagaquiē' ca yugu' bí'ido' té'ajbi' nidxi'. Biti' nazédagaquiē' ca sa'yéaj le naca tsahui'. ¹⁴ La' huagu tsutsu tu' zí' xibé nupa chinál-lágaca, nupa na' gaca iléquibe'e le naca dxi'a, en le cabí naca dxi'a, tu' nugúngaquiē' dxin yöl-la' réajni'i quégaquiē'.

6

¹ Que lē ni na', biti' ral-la' usédatica'siru' yugu' xibá buzédaru' cate' si' gusí lo riyóniru' ca naca queē' Cristo. Ral-la' tsöjnöröru' para gácaru' idú bönachi queē' Cristo. Biti' naquíni usédaru' leyúbölö yugu' xibá biti' naca böniga:

ca ral-la' ubí'i ládxi'ru',

en ca bíti'rö gunru' le ruá' dö',

en ca ral-la' tséajlē'ēru'-nē' Dios,

² en ca naca xibá que le ridílaru' nisa,

en ca rixóa ná'aru' bönachi ta'yéajlē' Cristo,

en ca ral-la' ulu'bán nupa nátigaca,

en ca gunē' Dios, ichúguiē' quégaca bönachi tuá' dö'.

³ Caní gunru' channö gunnē' Dios rē'u lataj.

⁴⁻⁶ ¿Naru' huácatsö gunru' ga ulu'bí'i ládxi'gaca leyúbölö nupa tu'huóaj ládxi', en ta'dá'baga' Dios? Channö bidxín quéguequi bení' queē' Dios, en bulu'z'í' xibé le runödzejē' Dios zoē' yehua' yubá, en gulaca tuz len Dios Bö' Lá'ayi, en channö bulu'z'í' xibé didza' dxi'a queē' Dios en yöl-la' huáca que dza sí' za', en channö ní'irö tu'huóaj ládxi', en ta'dá'baga' Dios, biti' ca' gaca nu gun ga ulu'bí'i ládxi'gaca leyúbölö, tu' gaca tsca ulu'dá' leyúbölö Zxí'inē' Dios lē'e yaga cruz en ilún tsca ulu'titaj Lē' lahui' lógaca bönachi. ⁷ Nupa tun caní nácagaca ca yu na' ruzí' xibé nisa guiój le ribixi láhuilö zían luzuí. Channö yu na' runödzej le tu'z'í' xibé nupa tá'ana yu na', raza ládxi'ē' Dios le, ⁸ pero channö ruzóasö yu na' lubá yötsi', en bésigá', naca ditaj, en nabía dö', en naca para nu uzegui le.

Le runru' löza le run ga nácaru' tsutsu

⁹ Sal-la' ruí'itu' caní didza', libí'ili' na' nadxi'itu', réquitu' ruzí'ili' xibé le nácagacarö dxi'a, le tu'z'í' xibé nupa nulágaca. ¹⁰ Dios náquiē' tsahui', en biti' gal-la ládxi'ē' dxin tsahui' benli', en yugu' le benli' tu' nadxi'ili' Lē'. Gúcalenli' nupa néquiguequi quez queē' Dios, en runli' xichínguequi. ¹¹ Na'a, ré'énitu' güf'i ládxi'li' luzá'ali' tu ia'tuli', en gunli' caní ga idxinrö dza údxí, para gata' idú queéli' lē na' runli' löza. ¹² Ré'énitu' cabí gácali' xöhuēdi, pero gunli' ca tun nupa ta'yéajlē' Dios, en ta'böza zxön ládxi', para idéli'li' yugu' le guzxí' lu nē'ē' Dios gunnē' queéru'.

¹³ Caní gaca, tu' benē' tsutsu Dios xtídzē'ē cate' guzxí' lu nē'ē' bi gunnē' queē' Abraham. Tu' cabí zoa nu nácarö lo ca Dios, que lē ni na' buzetaj cuiné', cate' ni' benē' tsutsu xtídzē'ē. ¹⁴ Caní gunnē' Dios: "Le nácate' guna' ga gaca dxi'a quiu', en guna' ga ila'yánda'abi' zxi'ini xi'sú'." ¹⁵ Gulözē' Abraham zxön ládxi', ate' bidéli'nē' le guzxí' lu nē'ē' Dios gunnē' queē'. ¹⁶ Cate' tu bönni' runē' tsutsu xtídzē'ē, ruzötjē' nu nácaterö lo ca lē', ate' lē ni ruzóa dxisö yúgu'tē didza' bizaj, tu' nunē' tsutsu xtídzē'ē. ¹⁷ Que lē ni

na' Dios benë' tsutsu le guzxi' lu në'ë gunë', en buzötaj cuinë', tu' gú'unnë' ulu'ínë' nupa ulu'zì' xibé le guzxi' lu në'ë unödzejë' quéguequi, nácada' löza, en tsaz naca le nuzóa lahuë' gunë'. ¹⁸ Le guzxi' lu në'ë Dios, en le benë' tsutsu, chopa ni catu caz idzá'gaca, en ca naca quégaca chopa ni, biti' gaca si' yë'ë Dios. Caní benë' Dios para gácada' löza queéru' tu le huë tsahui' rë'u. Ruzxöni ládxi'ru' Lë' idéli'ru' lë na' runru' löza le gunné' sí'iru'. ¹⁹ Lë na' runru' löza ruzóatica'sö tsutsu icja ládxi'do'oru', en naca ca tu du guíë ruzóa dxisö barco. Lë na' runru' löza run chi'ë Cristo ni'a queéru' ga ni' zoë' Dios yehua' yubá, le nadxín lu lataj lá'ayi na' zoa cúdzi'lö lari' nala' lu yudo' rö'ö yehua' yubá. ²⁰ Guyázië' Jesús uláz queéru' ca Nu röjnöru loru' ga ni' zoë' Dios, ate' Dios nuzóë' Lë' náquië' tsaz bixúz lo ca na' gúquië' Melquisedec bixúz lo.

7

Jesús náquië' bixúz lo ca gúquië' Melquisedec

¹ Melquisedec gúquië' bönni' na' gunná bë'ë lu yödzö Salem, enca' bixúz queë' Dios, nayépisëtëre'. Cate' suzë'ë Abraham, söhuójë' gudödi guca gudil-la cate' bucul-lë' yugu' bönni' ta'nná bë'ë, birúajë' Melquisedec na', yöjtságuië' Abraham, en gunábinë' Dios gun lá'ayë' Abraham. ² Abraham bë'ë queë' tu cö' tu' chi cö' que yúgu'të le bidéli'në' lu gudil-la na'. Ca lë' Melquisedec na' rnna lu didza' xidza': "Bönni' Unná Bë' Tsahui'", en náquië' ca' Bönni' unná bë' que yödzö Salem, le rnna lu didza' xidza': "Bönni' Unná Bë' Ribequi Dxíë'." ³ Biti' zoa lu guichi le rnna gula'cu'ë xuz xiné'ë, o xuz xtá'ahuë', en biti' nazúaj dza guljë' o dza gútië', pero náquië' ca náquië' Zxí'inë' Dios tu' náquië' tsaz bixúz lo.

⁴ Bulí'yútsöca' na'a, ca na' gúquië' zxön Melquisedec na', tu' lë cazë' xúziru' Abraham bë'ë queë' tu cö' tu' chi cö' que lë na' guléajë' lu ná'agaquië' bönni' ta'nná bë'ë ni' bucul-lë' lu gudil-la. ⁵ Lu xibá queë' Moisés, Dios rinná bë'enë' yugu' xzí'ini xi'sóë' Leví, nupa nácagaca bixúz, ila'zi'ë tu cö' tu' chi cö' que le ta'zì' bönachi Israel, sal-la' nácagaca di'a dza quégaquië', tu' nácagaquië' yúgu'të' xzí'ini xi'sóë' Abraham. ⁶ Melquisedec na' biti' náquië' di'a dza quégaquië', pero guzxi'ë tu cö' tu' chi cö' lu në'ë Abraham, nu na' bideli' yugu' le guzxi' lu në'ë Dios gunné' queë'. Lësca' Melquisedec na' gunábinë' Dios gun lá'ayë' Abraham, ⁷ ate' cuntú nu gaca tá'baga' lë na' rnna: Nu nadéli'rö lahuë' Dios rinábini Dios gun lá'ayë' nu nacuídi'rö. ⁸ Na'a, dza ni zóaru' na'a, nupa ta'zì' tu cö' tu' chi cö' lu ná'agaca bönachi nácagaca ca' bönachi tati caz, pero Melquisedec na', zoa le run ba nalí queë' le rnna zoë' nabanë'. ⁹ Na'a, huáca innaru' queë' Leví, en quégaca xzí'ini xi'sóë', nupa na' ta'zì' tu cö' tu' chi cö' lu ná'agaca bönachi, lësca' gula'guíxjë' tu cö' tu' chi cö' cate' ni' Melquisedec na' guzxi'ë tu cö' tu' chi cö' lu në'ë Abraham, xuz gula gudödi quégaquië'. ¹⁰ Caní naca, tu' huáca innaru' Abraham ni' nu'ë lë'ë Leví, en yugu' xzí'ini xi'sóë' cate' ni' yöjtságuië' Melquisedec lë', tu' cabí náljaniguequinë'.

¹¹ Ta'zì' bönachi Israel xibá gunná bë'ë Moisés lu ná'agaca bixúz, nupa nácagaca xzí'ini xi'sóë' Leví ga nababë' ca' Aarón, bixúz lo. Na'a, la'tu' guca ulu'huóaca bönachi idú tsahui' lahuë' Dios tu' tun ca rinná bë' xibá queë' Moisés, biti' ben bayudxi soa ia'túë' bixúz ca gúquië' Melquisedec, en calëga ca gúquië' Aarón. ¹² Channö rutsé'ë Dios ca ral-la' gáquië' bixúz, run bayudxi utsé'ë ca' ca naca xibá queë'. ¹³ Xanru', Nu na' nazúaj lu guichi ca naca queë' yugu' lë ni, nababë' ia'turö cö' xzí'ini xi'sóë' Israel ca le nababë' Leví na', ate' que cö' xzí'ini xi'sóë' ga nababë' Xanru', cuntú nu guca bixúz lahuë' Dios. ¹⁴ Naca caní tu' naca bë' guljë' Xanru' lu cö' di'a dza queë' Judá, ate' Moisés biti' bë'ë didza' queë' Judá na' cate' bë'ë didza' quégaca nupa ral-la' ilaca bixúz.

¹⁵ Nácaterö bë' lë ni ni'a que le raca na'a. Ca na' gúquië' Melquisedec bixúz, chibulu'i lahuë' ia'turë' bixúz, Jesús. ¹⁶ Bönni' ni, biti' gúquië' bixúz tu' rinná bë' xibá ca ral-la' ilaca di'a dza queë', pero náquië' bixúz tu' napë' yöl-la' huáca que yöl-la' na'bán le catu caz údxi. ¹⁷ Nazúaj lu guichi lá'ayi le run ba nalí queë' le rnna:

Tsaz nacú' bixúz

ca na' gúquië' Melquisedec bixúz.

¹⁸ Na'a, nadúa xibá gula ni', tu' cabí gudapa yöl-la' huáca unná bë', en biti' bi guca gun.
¹⁹ Xibá queë' Moisés na' biti' guca un bönachi idú tsahui'. Na'a, chiguyú'u tu le runru' löza le nácarö dxi'a, le run ga gaca ibíga'ru' gala' ga zoë' Dios.

²⁰ Cate' benë' Dios ga náquië' Jesús bixúz, benë' tsutsu xtídzë'ë. ²¹ Dios biti' benë' tsutsu xtídzë'ë cate' bucu'ë bönachi ni' ca bixúz, pero cate' benë' ga náquië' Jesús bixúz, benë' tsutsu xtídzë'ë, gunné':

Bena' tsutsu xtídzä'a neda', Xanu', gunnía':

"Biti' utsá'a ca guna'.

Tsaz nacu' bixúz

ca na' gúquië' Melquisedec bixúz."

²² Que lë ni na', Cristo náquië' Nu run ga naca löza didza' rucá'ana tsahui' le nácarö dxi'a ca lë na' guca zí'alö. ²³ Yugu' bixúz ni' guláquië' bönni' zían, tu' cabí guca ulu'gá'anë' yödzülió ni tu' gulátië', ²⁴ pero tu' zóatica'së' Jesús, tsaz náquië' bixúz, en biti' gaca nu huöáza xilatjë' para gaca bixúz. ²⁵ Que lë ni na', tsaz gaca usölë' nupa ta'biga' gala' ga zoë' Dios, nupa tu'gún dxin Lë', tu' zóatica'së' nabanë', en rnnë' dxi'a uláz quégaquië' lahuë' Dios.

²⁶ Ben bayudxi soa tu bixúz lo caní queëru'. Náquië' lá'ayi, en idú tsahui', en biti' náquië' tsözxón bönachi dul-la', pero nayépisëtërë' ca yúgu'të le nacuá' ni' yehua' yubá.

²⁷ Jesús ni, biti' náquië' ca yugu' bixúz lo yödzülió ni, tu' ben bayudxi gula'gu'ë rön lahuë' Dios yugu' dza, ate' gulútië'-ba' böa' bëdxi lahuë' Lë' tu' nözi dul-la' nabága'gaca cazë', ate' gudödi ni' gulunë' caní tu' nözi dul-la' nabága'gaca bönachi. Na'a, Jesús, tsaz gulu'ë rön lahuë' Dios, cate' ni' budödi cuinë' lahuë' Dios, en bulaljë' xichón cazë' tu' nözi dul-la' nabága'gaca yúgu'të bönachi. ²⁸ Lu xibá queë' Moisés bönachi biti' nácagaca idú dxi'a nácagaca bixúz, pero gudödi bidxín xibá queë' Moisés, Dios benë' tsutsu xtídzë'ë, cate' benë' ga náquië' Zxí'ini cazë' bixúz lo, tu' náquië' idú tsahui' ca ral-la' gáquië' bixúz.

8

Jesús náquië' Bixúz Lo queëru'

¹ Na'a, ca rnna lë na' si' gunnía', naca caní: Zoa queëru' tu Bixúz Lo caní. Gurö'ë cuita lë'ë ibëla Dios, ate' rö'ë, rinná bë'ë yehua' yubá ni'. ² Lë' runë' dxin ca Bixúz Lo lu lataj nácatërö lá'ayi, le naca yudo' le naca idútë, lë na' buchisë' Xanru', en calëga bönachi. ³ Dios rucu'ë yúgu'të bixúz lo para ila'gu'ë yugu' le tu'nödzej bönachi, enca' xichóngacaba' böa' bëdxi lahuë' Dios. Que lë ni na' ben bayudxi soa bi gulu'ë Cristo lahuë' Dios. ⁴ La'tu' zoë' luyú ni, biti' ca' gáquië' bixúz, tu' nacuá'tica'së' bixúz ni, nupa ta'gú'u yugu' le tu'nödzej bönachi lahuë' Dios ca rinná bë' xibá queë' Moisés. ⁵ Yugu' bixúz ni tunë' dxin que tu le rulu'isö, en le naca ca tu bixín que lë na' rö'ö yehua' yubá. Caní naca, tu' gúdxidë'ë Dios Moisés cate' si' uchisë' yú'udo' na' néquini guídi, gunné': "Buyútsöca', ben yúgu'të idú ca naca lë na' bulu'ida' li' lu guí'a ni'." ⁶ Na'a, Bixúz Lo queëru' ni runë' dxin que le nácatërö lesaca', ate' ni'a que le benë' Lë' zoa tu didza' rucá'ana tsahui' queëru' le nácatërö lesaca', en le ru'i didza' que le nácatërö lesaca' guzxí' lu në'ë Dios gata' queëru'.

⁷ La'tu' gudapa didza' na' rucá'ana tsahui' le guzóa zí'alö idútë yöl-la' huáca, biti' ben bayudxi soa didza' buropi ni rucá'ana tsahui'. ⁸ Na'a, Dios rulu'ë biti' gulaca bönachi ni' idú dxi'a cate' bë'ë didza' ca na' nazúaj lu guichi lá'ayi, gunné':

Buli'yútsöca', gunné' Xanru': Zá'gaca dza

cate' uzóa' tu didza' cubi ucá'ana tsahui',

le gúnlena' bönachi Israel, en bönachi Judá.

⁹ Biti' gaca ca guca didza' rucá'ana tsahui' na',

lë na' bënlena' xuz xtó'ogaquië',

dza ni' gudéla'a ná'agaquië',

en bubéaja' légaquië' luyú Egipto.

Tu' bulu'cá'anë' didza' quia' rucá'ana tsahui',
neda' bucá'ana' légaquië', rnnë' Xanru'.

¹⁰ Que lë ni na', caní gaca didza' ucá'ana tsahui'
gúnlena' bönachi Israel
tödi yugu' dza ni', rnnë' Xanru'.

Uchízia' icja ládxi'do'gaquië' xibá quia'
en uzúaja' le lu icja ládxi'do'gaquië'.

Ní'irö gaca' Dios quégaquië'
ate' légaquië' iláquië' bönachi quia'.

¹¹ Biti' gun bayudxi nu usedi luzé'e, inná:
Bénbë'ë Xanru', tu' ilúnbë'ë yúgu'të' neda',
ga isí lo nu naca cá'asö, ga idxintë nu naca lo.

¹² Huéchi' ládxa'a légaquië',
en uniti lahua' le cabí naca tsahui' gulunë',
en bítirö tsöjneda' dul-la' nabága'gaquië'.

¹³ Cate' ni' ru'ë Dios didza' que tu didza' cubi rucá'ana tsahui', naca tu' chibigula lë na'
guzóa zí'alö, ate' chizóa idúa lë na' nagula, en chinaca gulasi.

9

Lataj lá'ayi dë luyú, en lataj lá'ayi dë yehua' yubá

¹ Na'a, didza' rucá'ana tsahui' na' guzóa zí'alö, dzágagaca xibá le ca ral-la' ila'yéaj ládxi'gaca bönachi Dios, en lataj lá'ayi bidzága le guca que luyú ni. ² Caní naca lataj lá'ayi na' néquini guídi. Lu lataj na' dë láhuilö, nazí'i le Lataj Lá'ayi, gula'cuá' le nuá' guí', en bucugu lá'ayi ga ni' gula'gu'ë yugu' yöta xtildo' lahuë' Dios. ³ Cúdzi'lö le buropi lari' nal-la' lu yu'u na' zoa lataj ni' nazí'i le, Lataj Idú Lá'ayi, ⁴ ate' lu lataj ni' gula'cuá' tu bucugu néquini oro ga na' bulu'zégui'ë nöri, enca' tu guí'ina ga yu'u didza' rucá'ana tsahui', en nacu guí'ina na' oro. Lu guí'ina na' gula'cuá' zxíga'do' na' néquini oro, le nadzá' yöta xtildo' na' nazí'i le maná, enca' xuyaga queë' Aarón, lë na' bubó' ni'a në'e, enca' yugu' guiój blaga na', nazúaj láhuilöguequi didza' rucá'ana tsahui'. ⁵⁻⁶ Lahui guí'ina na' gula'cuá' chopa gubáz lá'ayi néquiguequini oro, légaca querubín que lataj ga buluí'i lahuë' Dios, ate' bulu'zxóa xíliguequi láhuilö lataj ga ni' gulu'ë bixúz lo rön tu' nözi dul-la'. Caní bulu'cu'ë yugu' lë ni. Biti' dë lataj uzúaja' na'a idútë ca nácagaca lë ni.

Ta'yázatica'sé' yugu' bixúz lu lataj zoa láhuilö, ga na' tunë' dxin quégaquië' que le ta'yéaj ládxi'gaquië' Dios. ⁷ Tuzë' bixúz lo guyázië' lu lataj buropi ni' tu luzuísö tu iz, en bi'ë rön le gulu'ë lahuë' Dios tu' nözi dul-la' nabaga' cazë', enca' tu' nözi dul-la' nabága'gaca bönachi, dul-la' gulunë' le cabí guléquibe'enë'. ⁸ Caní ruzéajni'inë' Dios Bö' Lá'ayi rë'u, bití' ca' guca idxinru' lahuë' Dios caz tsanni ni' tu'gunë' dxin lataj lá'ayi na' zoa láhuilö lu yu'u lá'ayi na' néquini guídi, lë na' bidzága didza' rucá'ana tsahui' le guzóa zí'alö. ⁹ Yugu' lë ni naca tu le ruluí'isö que le raca na'a dza. Yugu' le gula'gu'ë lahuë' Dios, en rön quégacaba' böa' bédxi na' gulútië'-ba' lahuë' Dios bití' guca ulu'ún idú dxi'a icja ládxi'do'gaquië' bönni' ni' gula'yéaj ládxi'gaquië' Dios caní. ¹⁰ Yugu' lë ni buluí'i lahui quégacasö le gulé'aj gulahuë', en ca ral-la' ila'gu'bi cuíngaquië', en quégaca xibá ca ral-la' gaca que idú ca zeaj naca cazë'. Yugu' lë ni buzóë' Dios quégaquië' ga bidxintë dza ral-la' utsé'ë yúgu'të.

¹¹ Na'a, chibuduluí'i lahuë' Cristo, en náquië' Bixúz Lo que le naca idú dxi'a, le bilá' lahui ni'a que le benë' Lë'. Lataj lá'ayi ga na' guyázië' Lë' nácáro lo, en nácáro idú, en bití' néquini lu ni'a lu ná'agaca bönachi, en bití' naca que luyú ni. ¹² Na'a, chiguyázië' Cristo lu lataj lá'ayi na', caléga len xichóngacaba' bédxido', en xichóngacaba' chivo, pero len rön queë' cazë'. Guyázië' lu lataj idú lá'ayi tu luzuísö, ate' caní guca, benë' ga nuláru' tsaz.

¹³ Le nácátë xichóngacaba' bédxi, en chivo, en dö queé'ba' bédxido' bulu'zégui'ë-ba', yugu' le gula'gu'ë lu íc jagaca nupa nabága'gaca dul-la', guca ulu'gúa dul-la' na' nabága'gaca

bönachi para ulu'ún légaquië' dxi'a idú ca zeaj naca cazë' ca naca que yöl-la' yudo' quégaquië'. ¹⁴ Na'a, gúntërö ca' xichönë' Cristo, tu' budödi cuinë' queë' Dios, en gúquië' idú tsahui', ate' zóalenë' Dios Bö' Lá'ayi Lë', Nu zóatica'sö. Na'a, xichönë' Cristo ruún idú dxi'a icja ládxi'do'oru' lu yugu' le gubága'ru' le tun ga nu gati, para gaca gunru' xichinë' Dios ban.

¹⁵ Que lë ni na' náquië' Jesucristo Nu ben tsutsu didza' cubi rucá'ana tsahui', tu' gútië' Lë', en bugúë' dul-la' gula'baga' bönachi cate' ni' zoa didza' gula rucá'ana tsahui'. Gútië' ca' para gaca ila'zi'ë lë na' guzxi' lu në'ë Dios unödzejë' quégaquië' bönni' bulidzë', le zóatica'sö. ¹⁶ Cate' ratië' nu bönni', en nucá'anë' tu didza' ca ral-la' ila'guísië' le nequi queë', run bayudxi gaca bë' chinátië' bönni' na' para gaca ilunë' ca rnna didza' na' nucá'anë'. ¹⁷ Cate' chinátië' bönni' na', gaca ilunë' ca rnna didza' na', pero tsanni ni zoë' nabanë', biti' ca' gaca ilunë' ca rnna didza' na'. ¹⁸ Que lë ni na', didza' na' rucá'ana tsahui' le guzóa zí'aló guca lesaca' tu' bidzága rön didza' na', le rulu'isö zoa nu guti. ¹⁹ Cate' ni' gudíxjöi'inë' Moisés bönachi ni' ca nácagaca yúgu'të xibá queë' Dios, gudélé'ë rön quégacaba' bédxido', en quégacaba' chivo, le nutsi' nisa, ate' len tu guíxi'do' nazí'i le hisopo, en lítsa'ba' bö'cu' zxila' le në'aj xiná, buchéajë' rön, en nisa na' lahui guichi ga na' nazúaj xibá na', enca' láhuigaca bönachi. ²⁰ Ní'irö gudxë' légaquië': "Lë ni naca rön le run tsutsu didza' rucá'ana tsahui' le gunná bé'enë' Dios rë'u para gunru' ca rnna." ²¹ Lësca' caní buchéajë' Moisés rön na' lu lataj lá'ayi néquini guídi, en lahui yúgu'të le tu'gunë' dxin para ila'yéaj ládxi'gaquië' Dios. ²² Ca na' rinná bë' xibá na', látu'biqui' yúgu'të ral-la' un dxi'a rön léguequi, ate' channö cabí tu'laljë' rön, biti' udúa dul-la'.

Xichönë' Jesucristo rugúa dul-la'

²³ Caní naca, ben bayudxi guzóa le bun dxi'a yudo' luyú ni le naca tu le rulu'isö ca naca lë na' röö'yehua' yubá, pero ca naca lë na' röö'yehua' yubá, ben bayudxi soa le un dxi'a nupa ila'yaza le, le nácáro lesaca' ca xichóngacaba' böa' bédxido' caní. ²⁴ Biti' guyázië' Cristo lataj lá'ayi néquini lu ni'a lu ná'agaca bönachi, lë na' naca tu le rulu'isö ca naca le naca idú, pero guyázië' yehua' yubá caz para gaca ulu'i lahuë' na'a lahuë' Dios uláz queë'ru'. ²⁵ Bixúz lo zoë' luyú ni razië' lataj nácatërö lá'ayi tu tu iz len rön quégacaba' böa' bédxi, pero biti' run bayudxi tsázië' Cristo zían luzuí para udödi cuinë' lahuë' Dios. ²⁶ La'tu' guca caní, gun bayudxi qui'i sáquë'ë Cristo, en gátië' zían luzuí dza ni'te cate' guta' yödzülió ga ridxintë na'a dza, pero na'a cate' naca dza údxi, tsaz bulu'i lahuë' tu luzuí'sö, en budödi cuinë' lahuë' Dios, cate' gútië' para bugúë' dul-la' nabága'ru'. ²⁷ Ca na' run bayudxi ilátigaca bönachi tu luzuí'sö ate' tödi ni' uchi'a usöröë' Dios léguequi, ²⁸ lësca' caní, gútië' Cristo tu luzuí'sö, cate' budödi cuinë' lahuë' Dios para bugúë' dul-la' nabága'gaca bönachi zían. Na'a, ulu'i lahuë' le buropi luzuí, calëga para ugúë' dul-la', pero para usölë' tsaz nupa ta'böza Lë'.

10

¹ Xibá na' gunná bë'ë Moisés guca tu le rulu'isö ca zeaj naca le tsahui' si' zá'gaca, en biti' guca idú ca nácagaca. Que lë ni na', xibá na' queë' Moisés biti' guca un idú tsahui' nupa ni' bila'dxín lahuë' Dios, en biá'gaca rön quégacaba' böa' bédxido', lë na' gula'gú'utica'së' lahuë' Dios yugu' iz. ² La'tu' guca un légaquië' idú tsahui', biti' gula'gú'utica'së' rön ni' lahuë' Dios, tu' cabirö iléquibe'enë' bönni' guca caní quégaquië' nabága'gaquië' dul-la' channö chibulu'huóáquië' idú tsahui'. ³ Rön ni' gula'gu'ë lahuë' Dios yugu' iz busá' ládxi'gaquië' nabága'gaquië' dul-la'. ⁴ Caní guca, tu' cabí guca xichóngacaba' bédxi, en chivo ugúa dul-la'.

⁵ Que lë ni na', cate' bidxinë' Cristo yödzülió ni, gudxë' Dios ca na' nazúaj lu guichi lá'ayi le rnna:

Biti' ré'ënu' nu cu'u rön quégacaba' böa' bédxi lo' pero benu' ga naca' bönáchisö.

⁶ Biti' raza ládxi'u nu uzegui'-ba' böa' bédxi lo',
o nu cu'u xichóngacaba' lo' tu' nözi dul-la'.

⁷ Ní'irö gunniá': Ni zoa' para guna' ca ré'ënu' Li', Dios.
Naca ca na' nazúaj lu guichi lá'ayi ca gaca quia'.

⁸ Lë na' nazúaj zí'alö rnna: "Biti' ré'ënë' Dios nu cu'u rön quégacaba' böa' bédxi lahuë'." Didza' ni ruluí'i ré'u bíti'rö raza ládxi'ë Dios lë ni sal-la' lu xibá queë' Moisés rinná bé'enë' Dios nu gun caní. ⁹ Gudödi ni' rnna: "Ni zoa' para guna' ca ré'ënu' Li', Dios." Didza' ni ruluí'i ré'u rugúë' Dios lë na' gula'gu'ë lahuë' zí'alö, en ruzóë' xilataj le gulu'ë Zxi'ini cazë' lahuë'. ¹⁰ Na'a, Dios ruúnë' ré'u idú tsahui' tu' benë' Cristo ca ré'ënë' Dios cate' ni' budödi cuinë' lahuë' Dios uláz queëru', en gútië' tu luzuísö.

¹¹ Le nácatë yúgu'të bixúz luyú ni zuíguequinë' yugu' dza, en tunë' xichíngaquië', en la' tuz ca tunë', ta'gu'ë lahuë' Dios zían luzuí xichóngacaba' böa' bédxi, yugu' le cabí gaca ulu'gúa dul-la'. ¹² Na'a, Cristo, tu le gulu'ë tsaz lahuë' Dios tu luzuísö tu' nözi dul-la', ate' ní'irö yöjchö'ë cuita lë'ë ibëla Dios. ¹³ Ribözë' ni' dza gunë' Dios ga ulu'zechu zxi'bigaca lahuë' nupa bití' ta'lé'e Lë' dxi'a. ¹⁴ Ni'a que tuz le gulu'ë lahuë' Dios, tsaz benë' ga nácatë idú tsahui' nupa na' bunë' dxi'a, en bubéajë' léguequi quez queë' Dios. ¹⁵ Lësca' caní Dios Bö' Lá'ayi runë' ba nalí loru', tu' gunné' zí'alö lë na' nazúaj lu guichi le rnna:

¹⁶ Caní gaca didza' ucá'ana tsahui' gúnlena' légaquië'
tödi yugu' dza ni', rnnë' Xanru'.

Uchízia' icja ládxi'do'gaquië' xibá quia',
en uzúaja' le lu icja ládxi'do'gaquië'.

¹⁷ Gudödi na' gunné':
Bíti'rö tsöjneda' dul-la' nabága'gaquië'
en dö' biá'gaquië'.

¹⁸ Que lë ni na', channö chinadúa dul-la', bíti'rö run bayudxi nu bi cu'u lahuë' Dios tu' nözi dul-la'.

Huáca ibíga'ru' gala' ga zoë' Dios

¹⁹ Na'a, yugu' böchi' luzá'ado', idú ládxi'ru' gaca idxinru' lahuë' Dios caz, ni'a que xichönë' Jesucristo. ²⁰ Tséajlenru' tu nöza cubi, en idú tsahui' le nuzóë' Cristo, le ridxín cúdzi'lö lari' na' busayaj ga nu riyaza lataj idú lá'ayi na', o huáca innaru', nöza na' gusaljë' Cristo ni'a queëru' tu' budödë' idütë le naca cazë'. ²¹ Jesús náquië' queëru' tu bixúz nayépisëtëre', en rinná bé'enë' bönachi queë' Dios. ²² Que lë ni na' huáca ibíga'ru' gala' ga zoë' Dios idú ládxi'ru', en lu yöl-la' run löza queëru', tu' réajlë'ëru' Cristo, tu' chibunë' dxi'a icja ládxi'do'oru', para cabí uxösa ládxi'do'oru' ré'u, ate' gudibë' idütë le naca cázaru' len le naca tu nisa nácatëro idú. ²³ Ral-la' gácaru' tsutsu, en cabí gaca chopá ládxi'ru' ca naca le runru' löza que le nazí' lu ná'aru', le guzxí' lu në'ë Dios gunné' queëru', ate' Lë' runë' ca rnnë'. ²⁴ Ral-la' utipa ládxi'ru' turu' ia'turu', para gunru' ga idxí'iröru' luzá'aru', en gúnroru' ca' le naca tsahui'. ²⁵ Bal-la' bönachi bíti'rö tu'dubi len ré'u. Bití' ral-la' gunru' ca tun bönachi na', pero ral-la' utipa ládxi'ru' turu' ia'turu', en gúnroru' caní tu' rilé'ëru' chizóa idxín dza huödë' Xanru'.

²⁶ Channö zéajlenru' runru' dul-la' tödi núnbë'ëru' le naca idütë li, bití' ca' nagá'ana bi gaca cú'uru' lahuë' Dios le ugúa dul-la'. ²⁷ Yugu' bönni' tunë' caní, lu yöl-la' radxi ridzöbi quégaquië' ta'bözë' dza ichúguië' Dios quégaquië' ila'yázië' lu guí' gabila, lë na' uzéguitica'sö nupa ta'dá'baga' Dios. ²⁸ Cate' nu bönni' buzóë' xibá queë' Moisés tsölá'alö, gulútië' lë' channö chopá tsonna bönachi gulún ba nalí que le benë', ate' cuntú nu buéchi' ládxi' bönni' na'. ²⁹ Na'a, nu bönni' uzóë' tsölá'alö Zxi'inë' Dios, en uzóë' tsölá'alö ca' xichönë' le run tsutsu didza' rucá'ana tsahui', le ruún ré'u dxi'a, ibága'rë' ca' xíguia'. Nu bönni' gunë' caní ucá'anë' cá'asö Dios Bö' Lá'ayi, Nu ruzá' ládxi' queëru' le riquíniru'. ³⁰ Caní gaca, tu' núnbë'ëru'-në' Dios, Nu gunná: "Quia' neda' nequi yöl-la' ruzí' lëbi. Neda'

ubi'a quegaca bönachi, rnnë' Xanru'." Lësca' caní gunné': "Xanru' uchi'a usöröë' bönachi queë'." ³¹ Ral-la' gadxi idzöbi nu ral-la' si' xíguia' lu në'ë Dios ban.

³² Guli'tsöjné yugu' dza chigula'dödi cate' ni' si' bidxín queéli' bení', ate' biá' gulenli' zían le bulu'saca' zi'ë libí'ili'. ³³ Bulu'lidza ditaj bönachi libí'ili', en bulu'dxía libí'ili' dö' lahui' lógaca bönachi, ate' benli' tsözxón ca' nupa gula'gu'i gula'zaca' caní. ³⁴ Caní guca, tu' buéchi' ládxi'li' nupa nadzúngaca lidxi guíë, en lu yöl-la' rudzeja queéli' biá' gulenli' nupa gula'béaj lídxili' yugu' le guta' queéli'. Caní benli' tu' nózili' nequi queéli' le nácarö dxi'a, en le zóatica'sö ni' yehua' yubá. ³⁵ Na'a, bití' uca'anali' lë na' runlí' löza, le naché' tu' le zxön ubi'ë Dios queéli'. ³⁶ Run bayudxi cózali' zxön ladxi', para cate' chibenli' ca ré'ënë' Dios, sí'ili' le guzxi' lu në'ë gunné' queéli', ca na' nazúaj lu guichi lá'ayi, ca gunné' Dios le rnna:

³⁷ Ia'tú chí'ido'osö idxinë' Bönni' na' ral-la' guíde'.

Bití' ca' tsenë'.

³⁸ Ní'irö nu naca tsahui' lahua' neda',
ulá nu na' tu' réajlé' neda'.

Channö huóaj ladxi', en tá'baga' neda',
bíti'rö tsaz ládxa'a nu na'.

³⁹ Na'a, ré'u ni, bití' nácaru' ca nupa tu'huóaj ladxi', en ta'dá'baga' Dios, en ila'niti, pero réajlé'ëru' Cristo, en nadéli'ru' yöl-la' rusölá.

11

Ca naca yöl-la' réajlé' queëru' Dios

¹ Na'a, tu' réajlé'ëru' Dios, naca löza queëru' sí'iru' le runru' löza, ate' naca bë' zoa le cabí gaca ilé'ëru'. ² Caní gula'yéajlé'ë xuz xtó'oru' Dios, ate' que lë ni na' nazúaj lu guichi lá'ayi ca guca quegaquië' le rnna: Bulu'rúajé' tsahui' lahuë' Dios.

³ Tu' réajlé'ëru' Dios, réquibe'ëru' benë' Lë' yödzölió ni len didza' bé'ësë'. Lësca' caní, cate' benë' Dios yúgu'të le rilé'ëru', bugunë' dxin le cabí nalá'.

⁴ Tu' guyéajlé'ë Abel Dios, gulu'ë rön queéba' böa' bédxido' lahuë' Dios, tu' le nácatërö lesaca' ca le gulu'ë Caín lahuë' Dios, en que lë ni na' Dios benë' ba nalí queë' Abel na', gunné' náquië' tsahui', en benë' bal lë na' gulu'ë lahuë'. Sal-la' chinátie' Abel na', ga ridxintë na'a dza, naca tsca ru'ë didza', tu' guyéajlé'ë Dios.

⁵ Tu' guyéajlé'ë Enoc Dios, gudödë' ni' yehua' yubá, en bití' ca' gútië', ate' bíti'rö nu budzöli lë', tu' buchë'ë Dios lë', ate' nazúaj lu guichi lá'ayi ca naca queë' le rnna: "Zí'alö ca buchë'ë Dios lë', benë' Enoc le raza ládxe'ë Dios." ⁶ Na'a, channö cabí réajlé'ëru' Dios, bití' gaca gunru' le raza ládxe'ë Lë', ate' para ibíga'ru' gala' ga zoë' Dios, run bayudxi tséajlé'ëru' zoa cazë' Lë', en rubi'ë que nu ru'i ladxi' Lë'.

⁷ Cate' ni' Dios buzéajni'inë' Noé ca ral-la' ilaca le cabí rilé'ëninë' Noé na', tu' guyéajlé'ë Noé Dios, benë' ca rnna xtídzë'ë Dios. Bupé'ë barco zxön na' nazí'i le Arca, ate' lë'e barco na' bulu'lá bönachi di'a dza queë' Noé. Tu' guyéajlé'ë Noé Dios, benë' ga naca bë' narugu quegaca bönachi yödzölió ilátigaca, ate' bidéli'në' gúquië' tsahui' lahuë' Dios, le ta'deli' nupa ta'yéajlé' Lë'.

⁸ Cate' ni' Dios bulidzë' Abraham, tu' guyéajlé'ë Abraham Lë', benë' ca rnna xtídzë'ë Dios, en buzë'ë ladzë' para tsejë' lataj ni' ral-la' si'ë ca tu' le guequi tsaz queë', ate' birúajé' ladzë' sal-la' bití' nózinë' gazxi na' ral-la' tsejë'. ⁹ Tu' guyéajlé'ë Abraham Dios, gúquië' ca tu' bönni' zítu', en guzóë' luyú na' Dios guzxi' lu në'ë unödzjë' queë'. Guzóë' lu yu'u guídido', en lébisö ca gulunë' Isaac, en Jacob, xzí'ini xi'söë' Abraham, nupa ni' guzxi' lu në'ë Dios unödzjë' quegüequi lë na' guzxi' lu në'ë unödzjë' queë' Abraham. ¹⁰ Caní benë' Abraham, tu' benë' löza idéli'në' yödzö na' rö'ö tsaz xilibi zö'ö que, le nuzóë' Dios xilibi zö'ö que, ate' gulu'ë le ga na' zoë' Lë' cazë'.

¹¹ Lësca' caní Sara, sal-la' chinácanu nigula huödx, guyéajlë'ënu Dios, ate' Lë' bë'ë queénu yöl-la' huáca buzóanu-bi' bí'ido'. Buzóanu-bi' bi'i bónni'do' sal-la' chigudödi izi queénu, tu' guyéajlë'ënu Dios gunë' ca rnna xtídzë'ë na' guzxi' lu në'ë queénu. ¹² Que lë ni na', sal-la' chibigúladë'ë Abraham, gula'cuá'abi' zíanteröbi' xxi'ini xi'sóë'. Gula'cuá'abi' tsca ró'öba' böljaj lúxiba, en tsca ró'ö yuzxi tu ra' nisa zxön, cuntu nu gaca ulaba lézacabi'.

¹³ Yúgu'të bönni' ni gulátië', en biti' gula'zi'ë lë na' guzxi' lu në'ë Dios unödzjë' quégaquië', pero gula'yéajlë'ë Dios, ate' zi'tu' zítu'sö bila'lé'enë' lë na' ral-la' ila'zi'ë. Gula'yéajlë'ë Dios, en gulunë' ba nalí que lë ni. Caní guca, bulu'lu'ë nácagaquië' ca bönni' zi'tu', en bönni' ta'dazë' yödzölió ni. ¹⁴ Yugu' bönni' tu'ë caní didza', tu'lu'ë ta'guiljë' tu lataj le gaca ládzagaquië'. ¹⁵ La'tu' gula'zá' ládxi'gaquië' caní que luyú ga ni' bila'rúajë', le nácate ulu'dzólinë' nacxi huóajgaquië' ni', ¹⁶ pero gula'zá' ládxi'gaquië' que luyú na' nácáro dxi'a, le rō' yehua' yubá. Que lë ni na' biti' rutuí'inë' Dios cate' ta'nné' náquië' Dios quégaquië', tu' chinupé'ë tu yödzö quégaquië'.

¹⁷ Tu' guyéajlë'ë Abraham Dios, cate' guzxi' bë'ë Dios lë', budödë'-bi' bi'i Isaac queë' lahuë' Dios ca na' tu'dödë'-ba' yugu' böa' bédxi tútigaquië'-ba' lahuë' Dios. Guzóë' sina' Abraham gútië'-bi' bi'i bönni' zí'alö queë' na' lahuë' Dios sal-la' nácabi' bi'i na' guzxi' lu në'ë Dios unödzjë' queë'. ¹⁸ Caní benë' sal-la' gudxë' Dios lë', gunné': "Lu ná'abi' bi'i Isaac quiu' ichísagaca'-bi' xxi'ini xi'sú'." ¹⁹ Caní benë' Abraham, tu' gúquibe'enë' napë' Dios yöl-la' huáca usubanë'-bi' lu yöl-la' guti, ate' ca tu lugá'a luséqui', huáca innaru' buzi'ë-bi' lu yöl-la' guti sal-la' biti' guti cázabi'.

²⁰ Tu' guyéajlë'ë Isaac Dios, gunábinë' Dios gun lá'ayë'-bi' bi'i Jacob, enca' bi'i Esaú ca zeaj naca le ulu'z'í'ibi' xibé dza si' za'. ²¹ Tu' guyéajlë'ë Jacob Dios, cate' ni' chizóa gátie' gunábinë' Dios gun lá'ayë'-bi' tu tubi' xxi'inë' José, ate' guyéaj ládxi'ë Dios, ni' nayéchuë' lu xiyaga queë'. ²² Tu' guyéajlë'ë José Dios, cate' ni' chizóa gátie', bë'ë didza' que dza na' ila'rúajë' xxi'ini xi'sóë' Israel luyú Egipto, ate' gunná bë'ë ca ral-la' ilu'ë dxita queë' luyú ga na' tsöjcu'ë.

²³ Tu' gula'yéajlë'ë Dios, cate' gúljabí' bí'ido' Moisés, xuz xiná'abi' bulu'cáché'ë-bi' idú ca tsonna beo', tu' bila'lé'enë' nácabi' bi'i bónni'do' na' lachi, en biti' guládxinë' bönni' rinná bé'enë' bönachi Egipto, bönni' na' gunná bë'ë ilútië'-bi' yugu' bi'i bónni'do' na'. ²⁴ Tu' guyéajlë'ëbi' Moisés Dios, cate' guzxonbi', bíti'rö bë'ëbi' lataj nu uzóa lëbi' bi'i bönni' queénu nigula xxi'inë' Faraón, bönni' na' rinná bé'enë' bönachi Egipto. ²⁵ Caní benbi' tu' gúquibi' nácáro dxi'a nu usaca' zi' lëbi' tsözxón len bönachi queë' Dios ca uzí'ibi' xibé tu chí'isö yugu' le tu'z'í' xibé nupa tun dul-la'. ²⁶ Gúquibi' nácáro lesaca' nu ulidza ditaj lëbi', ca na' gaca ca' queë' Cristo, ca idéli'bi' yugu' yöl-la' tsahui' quégaca bönachi Egipto, tu' guzá' ládxi'bi' ca naca le ubi'ë Dios queébi'. ²⁷ Gudödi ni', tu' guyéajlë'ë Moisés Dios, birúajë' luyú Egipto, en biti' gúdxinë' yöl-la' rilé queë' bönni' rinná bé'enë' bönachi Egipto, ate' biá' gulënë' ca run nu rilé'e Dios, Nu na' biti' gaca ilé'eru'.

²⁸ Tu' guyéajlë'ë Moisés Dios, benë' Laní Pascua ca gunná bë'enë' Dios lë', en buchéajë' rön ra' yu'u lídxigaquië', para cabí guti xxi'inigaquië' nu na' ral-la' usuniti yugu' bi'i bönni' zí'alö quégaca bönachi Egipto. ²⁹ Tu' gula'yéajlë'ë yugu' bönni' Israel Dios, gula'dödë' luyú bidxi gatsaj láhui'lö nísado' nazí'i le Nisa Xiná. Cate' gulé'ënnë' ila'dödë' ca' bönni' Egipto ni', gula'yépinë' nisa, en gulátigaquië' lu Nisa Xiná na'.

³⁰ Tu' gula'yéajlë'ë bönni' Israel Dios, cate' budxi gula'dödë' idú gásibi'ilö yödzö Jericó yugu' dza idú gadxi dza, bila'guínnaj yugu' zö'ö gulún chi'i yödzö na'. ³¹ Tu' guyéajlë'ënu Rahab Dios, nigula ru'ínu lataj bönachi, biti' gútinu tsözxón len bönachi Jericó na' biti' gulún ca rnna xtídzë'ë Dios, tu' bennu bal bönni' Israel na' buduyúlangaquië' le rácalen bönachi Jericó.

³² ¿Bíxirö ral-la' innía'? Riyadzaj lataj uzúaja' ca gulunë' Gedeón, en Barac, en Sansón, en Jéfté, en David, en Samuel, enca' yugu' bönni' gulu'ë didza' uláz queë' Dios.

³³ Tu' gula'yéajlë'ë Dios, bulu'zõtjë' zían yödzo zxön.

Gulunë' le naca tsahui', ate' gula'déli'në'
le guzxi' lu në'ë Dios unödzejë' quégaquië'.
Bulu'sayjë' ruá'agacaba' bëdxi guixi'.

³⁴ Bulu'lë' yugu' lu guí' zxön.

Bila'rúajë' lu ná'agaca nupa gulë'ëni iluti légaquië' len guíë tuchi'.

Dios bunë' légaquië' tsutsu cate' ni' gula'cuídi'në'.

Bulu'huóáquië' ca' tsutsu lu gudil-la.

Bulu'láguië' bönni' guizxi yu rójáquië' gudil-la quégaquië' bönni' zi'tu'.

³⁵ Yugu' nigula dza ni' bulu'z'ínu bi'i que queégacanu nubángacabi' lu yöl-la' guti.

Ia'bal-lë' bönni' ni' gulátië' lu ná'agaquië' bönni' ni' bulu'saca' zi'ë légaquië', en tu' cabí gulë'ënnë' ulu'cá'anë' Dios, biti' gula'zi'ë lataj nu usán légaquië'. Caní gulunë' para ila'déli'në' yöl-la' rubán lu yöl-la' guti, lë na' guléquinë' nazáca'rö. ³⁶ Ia'bal-lë' biá' guléngaquië' yöl-la' rutitaj, en xíguia' que gubá'ayi, ate' gula'dzunë' lidxi guíë, nága'gaquië' du guíë. ³⁷ Bulu'ladxi' bönachi bal-lë' guiój, en gula'chözë' ia'bal-lë'. Gula'z'í' bë'ë légaquië', en gulútigaca zióngaquië' len guíë tuchi'. Gula'dödë' ná'alö ní'ilö, nácugaquië' guídi zxágacaba' bö'cu' zxila', en chivo. Guláquië' yechi', en gula'guí'i gula'záquë'ë, ate' bulu'dxía bönachi légaquië' dö'. ³⁸ Caní guláquië' bönni' na', ate' biti' gulaca bönachi yödzülió ni lesaca' ulu'z'í' xibégaquië'. Gula'dasë' lu lataj cá'asö, en yugu' lu guí'a, ate' gula'cuá'asë' yugu' zxan bulóaj, en yugu' yeru luyú. ³⁹ Yúgu'të' bulu'rúajë' tsahui' lahuë' Dios tu' gula'yéajlë'ë Lë', sal-la' biti' gula'zi'ë luyú ni le guzxi' lu në'ë Dios unödzejë' quégaquië'. ⁴⁰ Caní guca, tu' nupë'ë Dios ni'a queéru' tu le nácarö dxi'a para cate' únë' légaquië' idú dxi'a, rë'u ni gunru' légaquië' tsözxón.

12

Ral-la' uyuru'-në' Cristo

¹ Que lë ni na', lësca' rë'u, tu' nacua' idú gásibi'ilö ga ni zóaru' zióntërö nupa tun ba nalí ca ta'yéajlë' Dios, ral-la' ucá'anaru' yúgu'të le ruá' dö' le naca ca tu le naca zi'i nuá'aru', enca' yúgu'të dul-la' nazóngaca rë'u, ate' lu yöl-la' riböza zxön ladxi' queéru', ral-la' gunru' xichinë' Dios, le naca tsca xíti'ru' lu huitaj le zoa loru'. ² Ral-la' uyuru'-në' Jesús, Nu na' run ga gaca tséajlë'ëru' Dios, en Nu run ga raca idú yöl-la' réajlë' queéru' Lë'. Jesús gudí'i guzzáquë'ë lë'e yaga cruz, en biá' gulénë' yöl-la' rutuí'i que, tu' gú'unnë' idéli'në' yöl-la' rudzeja na' uzi'ë xibé, ate' yójchö'ë cuita lë'ë ibëla Dios, ga ni' rö'ë rinná bë'ë.

³ Buli'yúë' Jesús, ca na' gudí'i guzzáquë'ë le bulu'saca' zi'ë bönni' dul-la' Lë', para cabí icuídi'li', en para cabí gaca chopa ládxi'li'. ⁴ Ga ridxintë na'a dza, biti' bi biá' gulenli' ga idxintë nu gun libí'ili' huë' tu' ridá'baga'li' le naca dul-la'. ⁵ Nadxi ca' chizá' ral-la ládxi'li' lë na' ruzéajni'inë' Dios libí'ili'. Nácali' ca yugu' zxi'ini cazë', ca na' nazúaj lu guichi le rnnë':

Zxí'ina', biti' uzú' tsölá'alö le gunë' Xanru',

cate' usëdi uzéajni'inë' li',

en biti' huóaj ládxi'u cate' uní'inë' li'.

⁶ Xanru' runí'inë' nu nadxi'inë',

en rusëdi ruzéajni'inë' yúgu'të nupa ta'z'í' lu në'e ilaca zxi'ini cazë'.

⁷ Ral-la' guá' ilenli' le uní'inë' Dios libí'ili', tu' runë' Dios caní queéli' tsca nácali' zxi'ini cazë'. Biti' ca' zóabi' tubi' bí'ido' biti' uní'inë'-bi' xúzibi'. ⁸ Na'a, channö cabí runí'inë' Dios libí'ili' ca na' runë' quégaca yúgu'të zxi'ini cazë', ní'irö nácali' ca yugu' bi'i lan, en biti' nácali' idú zxi'inë' Dios. ⁹ Ia'stú, cate' ni' nácaru' bí'ido', gula'cu'ë xuz xiná'aru' luyú ni, bulu'ní'inë' rë'u, pero runru' légaquië' bal. Ca' naca, ral-la' gúnröru' ca rnna xtídzë'ë Xúziru' zoë' yehua' yubá para sóaru' ibanru' tsaz. ¹⁰ Yugu' xuz xiná'aru', tu chí'isö bulu'ní'inë' rë'u tsca le guléquisinë' naca dxi'a, pero cate' runí'inë' Dios rë'u, naca

para gaca tu le uzí'iru' xibé, para gácaru' idú lá'ayi ca naca cazé' Lë'. ¹¹ Le nácatë bití' nalá' lahui na'a le uzí'iru' xibé que le runí'iné' rë'u, pero run ga ruhuí'iniru'. Channö güí'iru' lataj usëdi rë'u le runí'iné' rë'u, gun ga cózaru' dxí'ado', en ga gácaru' tsahui'.

Soa bönadxi queéru' channö cabí uzé' nágaru' chi'ë Dios

¹² Que lë ni na' bulí'ún tsutsu ná'ali' le röjxéqui' guequi, enca' zxíbili' le ta'zxizi, en idipa ládxi'li' para gunli' le naca dxi'a. ¹³ Guli'sóa nöza tsahui', para cabí gunli' ga ucá'ana nu ricuidí' ladxi' nöza na', pero guli'gún ga huóaca ladxi' nu na'.

¹⁴ Guli'güí' ládxi'li' cózalenli' dxi'a yúgu'të bönachi, en gácali' tsahui' lahué' Dios, tu' channö cabí gunli' caní, bití' gaca ilé'eli'-në' Xanru'. ¹⁵ Guli'gún chi'i cuinli' para cabí soa nu ucá'ana le ruzá' ládxi'ë Dios queéru', en para cabí soa nu gaca ca tu guixi' silá', para cabí utsá' libí'ili', en cabí gun ga cabí gácali' tsahui' zianli' libí'ili'. ¹⁶ Guli'gún chi'i cuinli' para cabí gun nu dzaga libí'ili' le ruá' dö', o le cabí naca tsahui', ca na' benë' Esaú, zxí'iné' Isáac. Esaú na' bétí'ë le ral-la' gata' lu në'ë tu' náquië' bi'i bönni' huaca queë' xuzë' para guzxi'ë tu le do' gudahué'. ¹⁷ Chinóz quézili' ca na' guca queë' Esaú gudödi ni' cate' gú'unnë' idéli'në' le inabë' xuzë' lahué' Dios para gaca le tsahui' queë'. Buéchi' ládxi'ë xuzë' lë', pero bití' guta' lataj ubí'i ládxi'ë Esaú na' sal-la' gudilaj ládxi'ë le len yöl-la' ribödxi queë'.

¹⁸ Ca raca queéli' bití' naca ca guca quégaquië' bönni' Israel. Légaquië' gula'biguë'ë gala' ga zoa tu guí'a le gaca nu can, ate' guyegui guí'a ni', en böaca chul-la lahui' dza tu' guró'ö böaj gasaj, en guyécjada' bö'. ¹⁹ Bila'yönnë' ta'bödxi lúzuba' böa', enca' chi'ë Dios Nu bë' didza'. Cate' bila'yönnë' lë ni, guláta'yue' lahué' Moisés para cabirö güí'ilenë' Dios légaquië' didza'. ²⁰ Caní gulunë' tu' cabí guca guá' iléngaquië' lë na' gunná bé'enë' Dios légaquië', gunné': "Channö tsöjlí'biba' tuba' böa' guíxi'do'os guí'a ni, ral-la' ulu'ládxi'ë-ba' guiój, o ulu'dödë'-ba' yaga tuchi'." ²¹ Lë na' bila'lé'enë' ben gáxdida' légaquië', ate' Moisés gunné': "Radxi ridzóbida', en rizxízida'a."

²² Na'a, libí'ili' ral-la' gádxitërolí' tu' ribíga'li' gala' tu lu guí'a nazí'i le Sión, en ga zoa yödzo queë' Dios ban, le nazí'i le Jerusalén que yehua' yubá, ga na' nacu'ë gubáz lá'ayi guizxi yu queë' Dios. ²³ Ribíga'li' gala' ga ni' nudúbigaca zxí'ini cazé' Dios lahué' Lë', nupa na' nazúajgaca láguequi lu guichi ni' yehua' yubá, enca' ga zoë' Dios Nu ruchi'a rusöröë' yúgu'të bönachi, en ga na' nacua' yugu' bö' gulaca cazé' yugu' bönni' tsahui', tu' bunë' Dios légaquië' tsahui'. ²⁴ Ribíga'li' ca' ga zoë' Jesús, Nu ben tsutsu didza' cubi na' rucá'ana tsahui', enca' ga nagu'ë Jesús rön queë' le run ga runiti lahué' Dios rë'u, rön na' run le nácarö dxi'a ca le ben xichönë' Abel, lë na' ben ga guchúguië' Dios queébi' bi'i bóché'ë.

²⁵ Que lë ni na', guli'gún chi'i cuinli' para cabí tá'baga'li' Nu na' ruí'i didza'. Bití' ca' bulu'lá nupa ni' gula'dá'baga' nu na' bulidza légaquië' luyú ni. Nácatëro löza bití' ca' uláru' rë'u channö tá'baga'ru' Nu na' rulidza rë'u, zoë' yehua' yubá. ²⁶ Dza ni' guzxizi luyú ni tu' biyón chi'ë Dios, pero na'a chiguzxí' lu në'ë, gunné': "Ia'tú luzuísö, en calégasö luyú uxízia', pero lúzxiba ca' uxízia'." ²⁷ Cate' ni' rnnë': "Ia'tú luzuísö", lë ni ruluí'i rë'u ral-la' udúa yugu' le gaca ila'zxízi, lë na' rö'ö yödzo'lió ni, ate' ulu'gá'ana le cabí gaca ila'zxízi, lë na' rö' yehua' yubá. ²⁸ Que lë ni na', tu' ral-la' idéli'ru' tu lataj ga inná bé'ëru', le cabí izxizi, ral-la' guiéru'-në' Dios: "Xclenu'", ate' lu yöl-la' ba'a ladxi', en lu yöl-la' radxi Lë' tseaj ládxi'ru' Lë' ca na' raza ládxi'ë Lë', ²⁹ tu' náquië' Dios queéru' ca tu guí' le rusuniti le cabí naca idú tsahui'.

13

Le ral-la' gunru' le raza ládxi'ë Dios

¹ Ral-la' idxí'ítica'sili' luzá'ali' tuli' ia'tuli'. ² Guli'tsöjné ral-la' uzóali' lídxili' nu idxín ga zóali'. Cate' gulún caní bal-la bönachi, bulu'cuá' lídxiguequi gubáz lá'ayi que yehua' yubá queë' Dios, sal-la' bití' guléqui'be'e nácagaquië' gubáz lá'ayi.

³ Guli'tsöjné nupa nadzúngaca lidxi guié tsca nunli' légaquié' tsözxón, nadzunli' ca' lidxi guié. Guli'güí' ládxi'li' yugu' bönni' ta'bía ládxi'gaca bönachi légaquié', tsca lib'ili' riguí'i rizáca'lenli' légaquié' tsözxón.

⁴ Ral-la' gunli' bal yöl-la' nutsaga na', ate' tu tué' bönni' ral-la' sóalené'-nu nigula queé' lu yöl-la' ba'a ladxi' queé', tu' ichúguié' Dios quégaca nupa tun le ruá' dö', en nupa ta'guítsaj xibá que yöl-la' nutsaga na'.

⁵ Biti' bi uhuídi'li', pero guli'tsaza ládxi'li' tsca le de queé'li' na'a, tu' chigunné' Dios: "Catu caz ucá'ana' li', en biti' ca' ubéaj ládxa'a li'." ⁶ Caní naca, huáca innaru' idú ládxi'ru' lē na' rna:

Xanru' náquié' Nu rácalen neda'.

Biti' ca' gádxida' bi gun bönachi quia'.

⁷ Guli'tsöjné yugu' bönni' tu'yúé' lib'ili', nupa na' tu'sédiné' lib'ili' xtídzé'ē Dios. Buli'yú ca nadéli'gaquié', en guli'gún ca tuné' lu yöl-la' réajlé' quégaquié' Dios.

⁸ Lébisö ca náquié' Jesucristo, néaje, en na'a, en cá'tica'sö. ⁹ Biti' güí'ili' lataj yugu' xibá izá'a, en xibá nadzá' iché'gaca lib'ili' nöza yúbölö. Naca dxi'a gunli' tsutsu icja ládxi'do'oli' ca naca le ruzá' ládxi'ē Dios queé'li', en calēga ca nácagaca xibá que le ré'aj rágurur', lē na' biti' ulu'z' xibé nupa tu'í ládxi'gaca léguequi.

¹⁰ Zoa queé'ru' tu bucugu lá'ayi, le cabí ulu'z' xibé nupa tun dxin que didza' rucá'ana tsahui' na' bilá' z'álö. ¹¹ Bixúz lo que yu'u lá'ayi na' gulu'ē xichóngacaba' böa' bēdxi lu lataj idú lá'ayi tu' nözi dul-la', pero bulu'zéguié' bēla' cá'asö quégacaba' ga naca ní'lö ra' yödzo. ¹² Lēscá' caní gud'í guz'áque'ē Jesús ní'lö ra' yödzo para buné' bönachi dxi'a len rön queé' cazé'. ¹³ Tsöjtá'aru'-né' Jesús, sal-la' ila'béaj bönachi ré'u lu yödzo, en sí'iru' tsözxón len Lē' lē na' bulu'lidza ditaj bönachi Lē'. ¹⁴ Biti' zoa tu yödzo queé'ru' yödzo'lió ni le soa tsaz, pero riguí'jaru' lē na' sí' za'. ¹⁵ Que lē ni na', ral-la' cú'utica'siru'-né' Dios yöl-la' ba, ugunru' dxin Lē' Jesucristo. Yöl-la' ba na' naca ca tu le rigú'uru' lahué' Dios. Len ruá'a cuinru' guié'ru'-né' Dios: "Xclenu'" ní'a que le náquié' Lē'. ¹⁶ Biti' gal-la ládxi'li' gunli' le naca dxi'a, en gácalenli' luzá'ali' tuli' ia'tuli', tu' naca lē ni ca tu le rigú'uru' lahué' Dios le raza ládxi'ē Lē'.

¹⁷ Guli'gún ca rna xtídzá'gaquié' bóchi'ru' tu'yúé' lib'ili', en guli'güí' lataj ila'nná bé'ené' lib'ili', tu' tapa chí'ē bö' naca cázali', ca tuné' yugu' bönni' ral-la' ila'guíxjö'ē lahué' Dios le núngaquié'. Guli'gún caní para iluné' dxin na' lu yöl-la' rudzeja quégaquié', en calēga lu yöl-la' risēbi ladxi' quégaquié', tu' cabí uz'ili' xibé dxin na' iluné' lu yöl-la' risēbi ladxi' quégaquié'.

¹⁸ Buli'lidzē' Dios, inábili'-né' gácalené' netu', tu' runtu' löza soa dxi icja ládxi'do'otu', para cabí uxösa netu', ate' ru'í ládxi'tu' gúntica'situ' le naca dxi'a. ¹⁹ Le nácarö lo, ráta'yua' loli' inábili'-né' Dios ugu'ē neda' tu nöza para udxina' ga zóali' bayóntē.

Dios uzá' ládxi'ē queé'ru' le gácalen ré'u

²⁰ Na'a, rinábitu'-né' Dios, Nu run le rucá'ana ré'u tsahui', en Nu busubán Xanru' Jesucristo lu yöl-la' guti, Nu na' naca Bönni' Lo Uyú Bö'cu' Zxila', tu' bulaljé' rön queé' le run tsutsu didza' rucá'ana tsahui', le zoa tsaz, ²¹ rinábitu'-né' guné' ga gácali' idú tsahui', para gaca gunli' yúgu'tē dxin dxi'a, en gunli' ca ré'ēné' Lē', ate' guné' queé'li' le raza ládxi'ē Lē', tu' néquili' queé' Jesucristo. ¡Queé' Cristo gácatica'sö yöl-la' ba! ¡Ca' gaca!

²² Ráta'yua' loli', bóchi' luzá'ado', güí' ládxi'li' didza' ni ruzéajni' i lib'ili', tu' naca láti'-do'os lē ni ruzúaja' queé'li'. ²³ Ral-la' inózili' chiburúajbi' bi' Timoteo, bi' bóchi'ru'do', lidxi guié, ate' channö idxíntēbi' ga zoa' ni, gunbi' neda' tsözxón uduyútu' lib'ili'.

²⁴ Buli'gapa Dios bóchi'ru' tu'yúé' lib'ili', enca' yúgu'tē bönachi rö queé' Dios. Tu'gapa Dios lib'ili' bönachi ta'yéajlé' Cristo nacua' luyú Italia.

²⁵ ¡Dios uzá' ládxi'ē queé'li' yúgu'tēli'! ¡Ca' gaca!

LE BUZÚAJĚ' LU GUICH SANTIAGO

Santiago rugapë' Dios bönni' judío ta'dé'ë Cristo

¹ Neda', Jacobo, naca' huen dxin queë' Dios, enca' queë' Xanru' Jesucristo. Rugapa' Dios libí'ili', nácali' idxinnu cö' di'a dza quégaca bönachi Israel, násilasili' idú yödzölió ni.

Yöl-la' réajni'i le runnë' Dios queéru'

² Böchi' luzá'ado', cate' gaca bi gaca queéli' le si' bë' libí'ili', ral-la' udzėjali' idú ládxi'li' ³ tu' nöz quézili', cate' bi raca queéli' le rizí' bë' libí'ili' ca réajlë'ëli' Cristo, lë ni rusedi libí'ili' cózali' zxön ládxi'. ⁴ Guli'güü' ládxi'li' gaca idú yöl-la' zxön ládxi' queéli', para údxi gácali' bönni' ta'yéajni'inë', en biti' bi yadzaj queéli' ca nácgaca lë ni.

⁵ Channö zoa ladaj libí'ili' nu biti' réajni'ini, nu na' ral-la' inabi-në' Dios, ate' Dios caz gunnë' yöl-la' réajni'i que, tu' runödzjë' yödxi yana' quégaca yúgu'të bönachi, en biti' ca' réqui quézinë' gunnë' queéru'. ⁶ Na'a, nu bi rinabi-në' Dios, run bayudxi tséajlë' Lë', en cabí gaca chopa ládxi'. Nu raca chopa ládxi', raca que ca raca que bidxina' que nísado' cate' rutá bö' le, ruzéaj bö' le nilö ná'alö. ⁷ Nu naca caní biti' ral-la' gun löza si' bi unödzjë' Xanru'. ⁸ Bönni' na' reaj bö' ládxi'da'ahuë' biti' ridzölinë' nácalö gunë'.

⁹ Channö zoë' tu bönni' bóchi'ru' réajlë'ë Cristo, en náquië' cá'asö yödzölió ni, ral-la' udzëjanë' tu' chinadéli'në' tu lataj lo lahuë' Dios. ¹⁰ Bönni' bóchi'ru' na' rilë'enë' yöl-la' tsahui' queë' ral-la' udzëjanë' cate' runë' Dios ga bíti'rö ruzxöni ládxi'ë lë na' dë queë'. Nu ruzxöni ládxi' yöl-la' tsahui' que, gaca que nu na' ca raca que xiyija guíxi'do', la' ridóditë que. ¹¹ Caní naca, tu' gaca que nu na' ca raca que xiyija guíxi'do' na' cate' rilén gubidza, en rudzá'ada', la' ribídxitë guixi' na', en riguínna'j xiyija, en riniti yöl-la' lachi que. Lësca' caní gaca queë' bönni' rilë'enë' yöl-la' tsahui' queë', inítië' tsanni ni runë' dxin riguiljë' yöl-la' tsahui' na'.

Le ta'zi' bë' rë'u

¹² Bica' ba bönni' bóchi'ru' na' ruá' rilenë' le rizí' bë' lë'. Cate' chiburúajë' tsahui', idéli'në' yöl-la' na'bán idú, ca na' rideli' nu nutsa' lu huitaj, nu rideli' tu bregui' zin. Bönni' bóchi'ru' na' náquië' bica' ba tu' idéli'në' yöl-la' na'bán idú na' guzxi' lu në'ë Dios unödzjë' quégaca nupa nadxi'iguequi Lë'. ¹³ Cate' bi raca queéru' le run ga gué'ëni'ru' gunru' le ruá' dö', biti' ral-la' innaru': "Dios rizí' bë'ë rë'u len le naca xihui'." Dios biti' rizí' bë'ë nu bönni' len le cabí naca dxi'a. ¹⁴ Na'a, channö nu bi raca que le rizí' bë' le len le cabí naca dxi'a, naca tu' rizé ládxi' le ruá' dö', ate' lë ni ben ga gú'uni gun le ruá' dö'. ¹⁵ Lë na' rizé ládxi'ru' le ruá' dö' run ga gunru' dul-la', en cate' chibudxi benru' dul-la' na', la' dul-la' ná'asö rusubaga' rë'u xíguia' gátiru'.

¹⁶ Böchi' luzá'ado', biti' si' ye'e la' cuínsili'. ¹⁷ Yúgu'të le naca dxi'a, en yúgu'të le naca idú le ruzí'iru' xibé, zá'gaca saca' xitsá'alö, en ta'rúaj ga zoë' Xúziru' Dios, Nu ben yugu' le ta'yëpi yösa lúzxiba, yugu' le tu'tsá' cuínguequi, pero Lë' biti' rutsá' cuinë', en biti' rutsé'ë ca runë', rúnnatica'së' queéru' le naca tsahui'. ¹⁸ Ca ré'ëni quézinë' Dios, benë' ga nácaru' bönachi cubi queë'. Bugunë' dxin didza' queë' le naca idútë li, para gácaru' ca tu gulapa zí'alö queë' ladaj yúgu'të nupa na' guró cazë' Dios.

Le reaj ládxi'ru'-në' Dios le naca li ládxi'

¹⁹ Que lë ni na' rea' libí'ili', böchi' luzá'ado', yúgu'tëli' ral-la' sóali' sina' yónili', pero biti' ral-la' innëtëzili', en biti' ilëtëzili'. ²⁰ Nu na' riletëz biti' run le naca tsahui' lahuë' Dios. ²¹ Que lë ni na', guli'cá'ana yúgu'të le ruá' dö', en yúgu'të le zían le cabí naca tsahui', ate'

lu yöl-la' nöxaj ladxi' guli'sí' lu ná'ali' didza' na' chinayaza icja ládxi'do'oli', tu' huáca gun didza' ni ga uláli'.

²² Na'a, guli'gún ca rna didza' ni, en cabí yónisili', tu' channö yónisili' didza' ni, si' yé'eli' la' cuínsili'. ²³ Nu riyónisö didza' ni, en biti' run ca rna, nu ni naca ca tu bönni' ruyúe' lahué' tu lu guíe' dxili, ²⁴ tu' ruyú cuiné', en söhuóje', ate' la' ral-laté ládxe'ë ca riné'ë. ²⁵ Na'a, nu bönni' biti' ral-la ládxe'ë le riyönné', pero ruí'i ládxe'ë xibá queé' Dios le naca idú li, en le gaca gun ga uláru', ate' ugá'ané' tsutsu, en gúntica'sé' ca rinná bé' xibá na', gaquié' bica' ba ca naca yúgu'té le runé'.

²⁶ Channö nu bönni' ladaj libí'ili' réquiné' naca dxi'a ca reaj ládxe'ë Dios, pero biti' rapa chi'ë lúdxé'ë para cabí innésé' ca', bönni' ni rizí' yé'ené' la' cuinsé', ate' biti' raza ládxe'ë Dios ca reaj ládxe'ë bönni' na' Lë'. ²⁷ Le reaj ládxi'ru'-né' Dios, le naca idú, en le naca dxi'a, naca gácalenru' yugu' bi'i uzé'bido', enca' yugu' nigula nagá'ananu túzinu, cate' ta'guí'i ta'zaca' nupa na', en cabí gútsa'ru' le cabí naca tsahui' le raca yödzölió ni.

2

Tuz ca ral-la' gunru' bönachi bal

¹ Böchi' luzá'ado', channö réajlé'ëli' Xanru' Jesucristo, Nu nácatërö lo, biti' ral-la' utsá'ali' ca gunli' bal tu tu bönachi. ² Channö tsázié' tu bönni' ga na' nudúbili', en nagu'é xibón në'ë le néquini oro, en nácué' lari' nazáca'da', ate' tsázié' ca' tu bönni' yéchi'do', nácué' lari' cá'asö, ³ channö gunli' bal bönni' na' nácué' lari' nazáca'da', en guiéli'-né': "Guró'ölen rë'u ga ni naca dxi'a", pero guiéli' bönni' yéchi'do' na': "Ná'asö guzuí", o guiéli'-né': "Guró'i lu yu ni." ⁴ Channö caní runli', rutsá'ali' ca runli' bal tu tu luzá'ali', en run cuinli' ca nu ruchi'a rusöró luzé'e, biti' naca dxi'a ca rizá' ládxi'li'.

⁵ Böchi' luzá'ado', buli'zé nágali' lë ni. Dios guró cazé' yugu' bönni', sal-la' téquiguequi bönachi yödzölió ni nácagaquié' cá'asö, para ila'déli'né' yöl-la' tsahui' lahué' Lë' tu' ta'yéajlé'ë Cristo, en gata' quégaquié' lataj ga ni' rinná bé'ë Lë'. Gata' quégaquié' lë na' guzxi' lu në'ë Dios unödzejé' quégaca nupa ta'dxí'i Lë'. ⁶ Libí'ili' rucá'anali' cá'asö bönachi yechi' ca', en runli' bal yugu' bönni' dë yöl-la' tsahui' quégaquié', ate' bönni' na' dë yöl-la' tsahui' quégaquié' tu'saca' zi'ë libí'ili', tu' tu'guné' libí'ili' dxin. Lësca' tu'dödé' libí'ili' lu ná'agaquié' bönni' yúlahui'. ⁷ Yugu' bönni' na' dë yöl-la' tsahui' quégaquié' ta'nné' zi'ë ca' que Lë' Jesucristo le nazáca'tërö, en ca naca Lë' nazí'i lali': "Nupa Dá'gaca Cristo."

⁸ Runli' dxi'a channö runli' idú ca rinná bé' xibá lo, le nazúaj lu guichi, en rna caní: "Ral-la' idxí'inu' luzó'o ca nadxí'i cuinu'." ⁹ Na'a, channö rutsá'ali' ca runli' bal tu tu bönachi, runli' dul-la', en nabága'li' xíguia' lu xibá queé' Dios, tu' riguítjsali' xibá na'. ¹⁰ Channö runé' tu bönni' idú ca rinná bé' xibá queé' Dios, pero channö ichíxiné' ca naca tuz le rinná bé' xibá na', chinabágué'ë xíguia' que idúté le rinná bé' xibá na'. ¹¹ Lë' cazé' Dios gunné': "Biti' gunu' dul-la' le riguítjsaj xibá que yöl-la' nutsaga na'", en gunné' ca': "Biti' gútiu' bönachi." Na'a, channö cabí runu' dul-la' le riguítjsaj xibá que yöl-la' nutsaga na', pero rútiu' bönachi, nabágu'u xíguia' que idúté xibá queé' Dios. ¹² Ca innali', en ca gunli', ral-la' gunli' ca ral-la' ilún nupa uchi'a usöröé' Dios légaquié' ca rinná bé' xibá na', le run ga uláru'. ¹³ Nupa cabí tu'huechi' ládxi'gaca luzé'eguequi, uchi'a usöröé' Dios léguequi, ate' cuntu nu huéchi' ladxi' léguequi, pero nupa na' tu'huechi' ládxi'gaca luzé'eguequi ulu'rúaj dxi'a cate' uchi'a usöröé' Dios léguequi.

Le ral-la' gunru' tu' réajlé'ëru' Cristo

¹⁴ Böchi' luzá'ado', biti' bi uzi'ë xibé tu bönni' channö innasé': "Réajlé'a Cristo", pero biti' runé' le naca tsahui'. Biti' gaca ulé' bönni' na' channö innasé' réajlé'ë Cristo. ¹⁵ Channö nacué' böchi' luzá'aru' ta'yéajlé'ë Cristo, en biti' dë le ilácué', en calëga le ilahué', ¹⁶ ate' channö tu nu dzaga libí'ili' guiésö légaquié': "Böaj lídxili' tsáhu'i'do'. Chibölaj budzé'eli'", pero channö cabí unödzejé' quégaquié' lë na' ta'yádzjané', biti' ca'

gúcalen légaquié'. ¹⁷ Lësca' caní raca que nu bönni' rnasä' réajlë'ë Cristo. Channö cabí runë' le naca bë' naca idú ca réajlë'ë Lë', bití' naca lesaca' yöl-la' réajlë' queë'.

¹⁸ Nadxi ca' guié' tu bönni' luzé'ë: "Li' réajlë'ësu' Cristo, ate' neda' runa' le naca tsahui'. Bití' gaca ulu'ínu' neda' réajlë'u Cristo channö cabí zoa le naca tsahui' runu'. Neda' ulu'ida' li' réajlë'a Cristo ni'a que le naca tsahui' runa'." ¹⁹ Li' réajlë'u tuzé' náquié' Dios. Naca dxi'a ca runu'. Lësca' caní ta'yéajlë' yugu' bö' xihui', en ta'zxizi tádxida' Lë'. ²⁰ Li', bönni' bití' bi nózinë'. Ral-la' inözi quézinu' channö zoa nu rnasö réajlë' Cristo, pero bití' run le naca tsahui', bití' naca lesaca' yöl-la' réajlë' Lë' que nu na'. ²¹ Naca bë' burúajë' xúziru' Abraham tsahui' lahuë' Dios ni'a que lë na' benë', cate' ni' gulu'ë-bi' bi' Isaac queë' lahuë' Dios. Gulu'ë-bi' ca na' tun bönachi ta'gú'u le tu'zegui' lahuë' Dios, sal-la' bití' buzégui'ë-bi'. ²² Na'a gaca inózili' ca guca queë' Abraham. Lë na' benë' guca bë' guyéajlë'ë Dios. Ca' naca, guca bë' naca idú ca guyéajlë'ë Dios ni'a que lë na' benë'. ²³ Caní guca lë na' nazúaj lu guichi lá'ayi le rnna: "Abraham guyéajlë'ë Dios, ate' Dios bilé'enë' lë na' benë' ca tu le ben ga böáquié' Abraham tsahui'." Que lë ni na' guzxi'i lë: "Luzé'ë Dios."

²⁴ Na'a, rilé'e quézili' naca bë' rurúajë' tu bönni' dxi'a ni'a que le runë', en calégasö tu' réajlë'ë Dios. ²⁵ Lësca' caní guca queënu Rahab, nigula bé'ënu bönachi lataj. Lësca' naca bë' burúajnu dxi'a tu' zoa tu le tsahui' bennu, lë na' bennu cate' ni' bennu bönni' tu'yulan bal, en gúcalennu légaquié' para bulu'guélé'ë yøjhuójgaquié' nöza yúbölö. ²⁶ Ca na' raca que idütë le naca cázaru' channö cabí yu'u bö', chinati, lësca' caní naca que le réajlë'ëru' Cristo channö cabí nalá' yöl-la' run que, bití' naca lesaca'.

3

Yugu' le rnna lúdxiru'

¹ Böchi' luzá'ado', bití' guntëz zían cuinli' bönni' tu'sédinë' bönachi, tu' chinóz quézili' zítërö uchi'a usöröë' Dios rë'u, núlöru' rusédiru' bönachi. ² Yúgu'tëru' runru' zían le richixi riníguiru'. Channö cabí richixi riníguinë' tu bönni' ca naca didza' ru'ë, bönni' ni náquié' idú tsahui', en raca inná be'e cuinë' ca naca yúgu'të le runë'. ³ Cate' rigú'uru' guié ruá'agacaba' böa' para gunru' ga ilunba' ca ré'ëneru', gaca inná bé'ëru' léga'caba' lu idütë le tunba'. ⁴ Buli'yú ca' ca raca quéguequi barco. Sal-la' zxóntërö naca tu barco, en récjada' bö' ruzéaj le, cuídi'do'os naca në'e xiyágui barco na' le ruzecaj rudxi'i barco para tseaj gáti'tës ga gué'ënnë' bönni' rusé'ë le. ⁵ Lësca' caní naca lúdxiru'. Sal-la' cuídi'do'os naca, zióntërö le rnna lúdxiru' na'. Buli'yútsöca' ca run guí'. Sal-la' guí'do'os ribíbiru', tu guí'a sibi huayégui. ⁶ Lësca' lúdxiru' na' naca ca tu guí'. Yúgu'të le ruá' dö' raca yödzólió ni rnna lúdxiru', en tu' dzaga lúdxiru' na' idütë le naca cázaru', que lë ni na' run ga raca xihui' idütë le nácaru'. Le rnna lúdxiru' ribequi guí', le ruzegui' rë'u ca naca yúgu'të le runru', ate' tu' rnna caní lúdxiru' na', naca que tsca chinaguéla'të guí' le nabequi' tu' xihui'. ⁷ Yúgu'tëba' böa' guixi' ta'daba' luyú, en yugu' böa' zoa xiligacaba', en yugu' böa' tá'ayöj lé'ëba' lu yu, enca' yúgu'tëba' böa' dzó'öba' lu nísado', huáca ila'nná be'e bönachi luyú ni léga'caba', ⁸ pero cuntú nu bönni' gaca inná bé'enë' lúdxë'ë, tu' rnna lúdxiru' le ruá' dö', en bití' gaca nu uzaga' xinözi. Zióntërö le rnna lúdxiru' le naca ca tu le naché' yöl-la' guti. ⁹ Len la' lúdxiru' ná'asö rulidza tsáhuiru'-në' Dios Xuz, en rulidza díjtjaru' ca' yugu' bönni', ate' benë' Dios légaquié' ca naca cazë' Lë'. ¹⁰ Caní naca, len la' ruá'asiru' na' rulidza tsáhuiru' bönachi, en rulidza díjtjaru' bönachi. Böchi' luzá'ado', bití' ral-la' gaca caní. ¹¹ Bití' ca' ta'lén nisa siziá', en nisa zöna' la' tuzi ga ta'lén. ¹² Böchi' luzá'ado', tu yaga higo bití' gaca cuía le ribía yaga olivo, ate' tu lubá uva bití' gaca cuía le ribía yaga higo na'. Lësca' caní, nitú ga rilén nisa bití' gaca ila'lén nisa zöna', en nisa siziá'.

Yöl-la' réajni' i le naca idú

¹³ Channö zoë' tu bönni' ladjali' rácadë'ë, en réajni'de'enë', lu yöl-la' nöxaj ladxí' queë' ral-la' ulu'ë náquié' caní ni'a que le naca tsahui' runë'. ¹⁴ Na'a, channö ruzxé'eli' luzá'ali',

en runli' dxin para ila'gú'u bönachi libí'ili' yöl-la' ba, biti' ral-la' gun ba zxön cuinli' ca naca yöl-la' réajni'i queé'li'. Nu run caní rizi' yé', en ridá'baga' le naca idútè li. ¹⁵ Yöl-la' réajni'i caní biti' naca le runödzejé' Dios, pero que yödžölió ni naca, enca' quegaca bönachi yödžölió ni, en que tu' xihui'. ¹⁶ Yugu' bönni' tu'zxé'ené' luzá'agaquié', en té'enné' ila'gú'u bönachi légaquié' yöl-la' ba, lésca' ta'dil-la dídžé'ë, en tuné' yúgu'tè le ruá' dö'. ¹⁷ Yugu' bönni' nápaqaquié' yöl-la' réajni'i na' runödzejé' Dios:

Tuné' le naca idú tsahui', en ta'bözé' dxí'ado'.

Nácagaquié' zxön ladxi', en nöxaj ladxi'.

Tu'huechi' ládxi'gaquié' bönachi,

en tuné' le naca dxi'a,

Tuz ca tu'chi'a tu'söróë' luzá'agaquié',

en biti' ta'béaj bé'ë luzá'agaquié'.

¹⁸ Nupa tu'í' ládxi'gaca ila'bequi dxi le raza, ta'böza dxí'ado', para gaca ca' dxi'a idútè le zeaj naca caz.

4

Nupa tun zxön le nacua' yödžölió

¹ ¿Bixz que na' ridí'l-lali', en raza didza' bizxaj queé'li'? Raza caní queé'li' tu' rizé ládxi'li' zían le rizé ládxi'li' tu tuli', en que læ ni na' ridí'l-lalenli' luzá'ali'. ² Zían le ruhuídi'li', en tu' cabí rizi'ili' le, que læ ni na' rútili' bönachi. Ruzxé'eli' le dè que luzá'ali', en tu' cabí ridéli'li' le, que læ ni na' rizóa ribó'öli', en ridí'l-lali'. Biti' rata' queé'li' le ré'ënili', tu' cabí rinábali'-né' Dios læ na'. ³ Sal-la' zoa bi rinábali', biti' bi rizi'ili', tu' cabí naca dxi'a ca rinábali', tu' ré'ënili' læ na' rinábali' para ugunli' le dxin ca raza ládxi'sili'. ⁴ Libí'ili', bönachi nusanli'-né' Dios, ¿naru' cabí nózili' channö runli' zxön le nacua' yödžölió ni, chinuhuóacali' ca nu biti' rilé'e Dios dxi'a? Núti'tës nu ré'ëni gun zxön le nacua' yödžölió ni, nuhuóaca ca nu biti' rilé'e Dios dxi'a. ⁵ Biti' rnasö cá' le nazúaj lu guichi lá'ayi le rnna: "Dios risól-lé'ë Dios Bö' Lá'ayi queéru', Nu zóalen ré'u, ate' Lè' nadxí'iné' ré'u, en rudúli'né' ré'u channö rusanru'-né'." ⁶ Na'a, zxóntëro le ruzá' ládžé'ë Dios queéru', tu' nazúaj lu guichi lá'ayi le rnna: "Dios ruzágué'ë xinóžguequi nupa tun ba zxön cuínguequi, pero ruzá' ládžé'ë quegaca nupa nácagaca nöxaj ladxi'." ⁷ Que læ ni na', guli'sóa nöxaj ladxi' lahué' Dios. Guli'nná be'e tu' xihui', ate' uzxunnaj ga zóali'. ⁸ Guli'güí' ládxi'li' sóalenli'-né' Dios, ate' Lè' idisóalené' libí'ili'. Libí'ili', bönachi dul-la', guli'gaca tsahui', en bítirö gunli' dul-la'. Libí'ili', núlöli' reaj bö' ládxi'do'oli', en chopa le nadxí'ili', guli'gún dxi'a icja ládxi'do'oli'. ⁹ Guli'sëbi ládxi'li', en buli'huí'ini, en guli'cödxí. Na'a ruzxídxili, pero ral-la' códxili'. Rudzéjali', pero ral-la' huí'inili'. ¹⁰ Guli'gaca nöxaj ladxi' lahué' Xanru', ate' Lè' guné' ga tsépisëli'.

Biti' ral-la' ichugu bé'ëru' le run luzá'aru'

¹¹ Böchi' luzá'ado', biti' innëli' que luzá'ali' tuli' ia'tuli'. Nu bönni' rinné' que böchi' luzé'ë, en rilaga yudxé' le runé', bönni' ni rinné' que xibá queé' Dios, en ruchi'a rusöróë' le rinná bé' xibá na'. Na'a, channö ruchi'a rusöróu' le rinná bé' xibá na', run cuinu' nu ruchi'a rusöróë' le, en biti' runu' ca rinná bé' xibá na'. ¹² Na'a, tuzé' náquié' Dios, Nu ben xibá na', en náquié' ca' Nu ruchi'a rusöróë' le runru'. Lè' cazé' gaca usölé' bönachi o usunítie' bönachi na'. Na'a, ¿núzxité run cuinu', rilaga yudxu' luzó'o?

Biti' gaca gunru' löza le gaca cuxó huidzaj

¹³ Na'a, buli'zé nágali', núlöli' rnnali': "Cuxó huidzaj tséajtu' yödžö ni', ate' sóatu' ni' tu iz, en zían le gá'utu', en úti'tu', ate' caní gáta'da' dumí queé'tu'." ¹⁴ Biti' nózili' bizxi gaca cuxó huidzaj. ¿Nacxi caz naca queéru', tsca zóaru' yödžölió ni? Nácaru' ca bóchila le nalá' tu chí'ido'osö, en la' rinítitè. ¹⁵ Que læ ni na', caní ral-la' innali': "Channö gué'ënné'

Xanru', sóaru' ibanru', en tu ia'tú le gunru'." ¹⁶ Na'a, libí'ili', lu yöl-la' run ba zxön queé'li' rigú'uli' yöl-la' ba la' cuínsili'. Yúgu'tè le caní le runli' zeaj naca le ruá' dö'. ¹⁷ Channö nóziru' le naca dxi'a le ral-la' gunru', en bití' gunru' lè na', runru' dul-la'.

5

Santiago rusé' è ládxi'gaquié' bönni' dè yöl-la' tsahui' quégaquié'

¹ Libí'ili', bönni' rilé'eli' yöl-la' tsahui', guli'cödxí, en guli'cödxí'a, tu' si' za' dza ilé'eli' yöl-la' yechi'. ² Chinaca ditaj yöl-la' tsahui' queé'li', ate' chinutógacaba' le ráculi' bóljado' que. ³ Chinaca que dumí oro, en dumí plata queé'li' ca naca que guíe nazón yöni que, ate' yöni que na' naca ca tu le ruzegui libí'ili' didza', ate' gaca queé'li' ca tu guí' le usuniti libí'ili'. Caní gaca queé'li', tu' busó' butúbili' queézili' yöl-la' tsahui' dza ni zóaru' chiröjsétégaca. ⁴ ¡Buli'yútsöca! Yugu' bönni' huen dxin gula'lapè' yöla queé'li' chita'naba yúdxiné' lázxi'gacaquié', tu' cabí rigú'zxi'anili' légaquié', ate' lè na' ta'nabé' bönni' huen dxin na' chibidxi'n didza' na' lahué' Xanru', ate' Lè rinná bé'ené' ni'a nè'è guizxi yu. ⁵ Benli' ga buné'eli', en gü'i gudáguticá'sili' le rnnasö queé'li' lu yödzölió ni. Buxón cuinli', pero chizóa idxi'n dza údxi queé'li'. Gaca queé'li' ca raca queé'ba' bédxi renni', chibú'u dza gútiru'-ba'. ⁶ Richúguli' quégaquié' bönni' tsahui', en rútili' légaquié', ate' légaquié' bití' ta'dá'baguè'è libí'ili' cate' rútili' légaquié'.

Cózarú' zxön ládxi', en ulídzaru'-né' Dios

⁷ Na'a, böchi' luzá'ado', guli'cöza zxön ládxi' ga idxinrö dza huödè' Xanru'. Buli'yú ca runé' tu bönni' guz gu'una. Lu yöl-la' riböza zxön ládxi' ribözè' guiójsiu', en guiój cusu lin, ate' tödi ni' ulapè', en utubé' yöz zían. ⁸ Lésca' caní, libí'ili' na' réajlé'éli' Cristo, guli'cöza zxön ládxi', en buli'tipa ládxi'li', tu' chizá' gala' dza huödè' Xanru'. ⁹ Böchi' luzá'ado', bití' innéli' que luzá'ali' tuli' ia'tuli', para cabí ibága'li' xíguia'. ¡Buli'yútsöca! ¡Chirudzaga lo udxiné' Xanru', ate' uchi'a usöróè' le runli'! ¹⁰ Böchi' luzá'ado', buli'yú ca guca quégaquié' bönni' gulu'è didza' uláz queé' Xanru'. Nácagaquié' ca tu le rulu'í' rë'u ca ral-la' quí'i sáca'ru', en cózarú' zxön ládxi'. ¹¹ Na'a, nucuá'aru' légaquié' ca yugu' bönni' guláquié' bica' ba, nupa ni' gula'gu'í gula'zaca'. Chibiyónili' ca bené' Job. Gulözè' zxön ládxi' sal-la' gudí'i guzácá'dè'è, ate' nózili' ca' ca bené' Xanru' queé' ga búdxitè. Ruhuéchi'da' ládxi'è Xanru' rë'u, en ru'í' ládxi'è rë'u.

¹² Böchi' luzá'ado', le nácatèrö lo naca lè ni rea' libí'ili': ¡Bití' uzótjali' Nu zoa yehua' yubá, en bití' uzótjali' le nacua' luyú ni, en bití' uzótjali' bítí'tès bi run tsutsu xtídzá'li'! Cate' innali' "Ön" ral-la' innásili' "Ön." Cate' innali' "Bití'" ral-la' innásili' "Bití'." Caní ral-la' gunli', para cabí ibága'li' xíguia' lahué' Dios.

¹³ Channö rigú'í rizáca' nu dzaga libí'ili', ral-la' ulidza Dios nu na'. Channö zoa nu rudzeja, ral-la' gul-la'yöl-la' ba nu na'. ¹⁴ Channö re'e nu dzaga libí'ili', ral-la' ulidza bönni' gula tapa chi'è bönachi queé' Cristo, para ulu'lidzè' Dios, en ila'nábinè' Lè' únè' bönni' hué' na'. Ral-la' ila'gu'è lè' le za, en ulu'gunè' dxin Lè' Xanru'. ¹⁵ Cate' ulu'lidzè' Dios, en ta'yéajlé'è gunè' Cristo ga huóáquié' bönni' hué' na', ní'irö gunè' Xanru' ga huóása uzóè', en channö bené' dul-la' bönni' hué' na', Xanru' uniti lahué' lè'. ¹⁶ Que lè ni na', guli'xóalèpi dul-la' nabága'li' tuli' ia'tuli', en guli'naba que luzá'ali' tuli' ia'tuli' lahué' Dios para únè' libí'ili', para urúaj yödzöhué' na' ré'eli'. Le rulidzè' tu bönni' tsahui' Dios, le runé' idú ládxi'è, nácada' lesaca'. ¹⁷ Elías, bönni' ni' bé'è didza' uláz queé' Dios, gúquié' tu bönni' yödzölió ca nácaru' rë'u, pero cate' bulidzè' Dios, en gunábinè' Lè' para cabí galaj guiój, idú tsonna iz yu' xopa beo' bití' gulaj guiój luyú ni. ¹⁸ Gudödi ni' bulidzè' Dios leyúbölö, ate' böálaj guiój, ate' bunödzej le gulazè' yugu' bönni' dza ni'.

¹⁹ Böchi' luzá'ado', lè ni ral-la' inózili'. Channö nunbè' nu bönni' dzáguié' libí'ili' le naca idútè li, en richixi riníguiné', ate' zoa nu gun ga ubí'í ládxi'è bönni' na' richixi riníguiné',

²⁰ nu na' gun ga ubí'i ladxë'ë bönni' dul-la' na' gudé' ga yúbölö, usölé' bönni' dul-la' na' lu yöl-la' guti, en gunë' ga uniti lahuë' Dios dul-la' zían nabáguë'ë bönni' na'. ¡Ca' gaca!

DÍDZA'DO' ZÍ'ALÖ BUZÚAJĚ' PEDRO

Pedro rugapě' Dios nupa ta'dá' Cristo

¹ Neda', Pedro, naca' gubáz nasól-lě'ě Jesucristo. Ruzúaja' queé'li' lu guichi ni, libí'ili' násilasili' zi'tu' gapa dē lādžali', zóali' luyú Ponto, en luyú Galacia, en luyú Capadocia, en luyú Asia, en luyú Bitinia. ² Guró cazě' Xúziru' Dios libí'ili' ca na' bucözě' dza ni'te, para guéquili' quez queě' lu ně'ě Dios Bō' Lá'ayi, en gunli' ca rna xtídzě'ě Cristo, en gácali' idú tsahui' ni'a que xichöně' Cristo. Rinábida'-ně' Dios uzá' lādxě'ě queé'li', en guně' ga soa dxi icja lādxí'do'oli'.

Le rúntica'siru' löza

³ ¡Yöl-la' ba Dios, Xuzě' Xanru' Jesucristo! ¡Lu yöl-la' ruhuéchi' ladxi' zxon queě' bucubě' yöl-la' na'bán queéru' tu' busubaně' Jesucristo lu yöl-la' guti! ¡Lě ni run ga rúntica'siru' löza, ⁴ en gun ga idéli'ru' lě na' rapa chi'ě Dios queéru' yehua' yubá! Lě na' rapa chi'ě Dios, le unödžě' quégaca bönachi queě', biti' initi, en biti' itěbi, en biti' igula. ⁵ Tu' réajlě'ěli' Lě', lu yöl-la' huáca zxon queě', Dios gun chi'ě libí'ili' cate' idxinrō dza ni' uzí'ili' xibé yöl-la' rusölá idú na' chinupě'ě queéru', en ulu'ě lahui dza údxi.

⁶ Que lě ni na' rudžějade'eli', sal-la' na'a ral-la' quí'i sáca'li' tu chí'ido' tu' taca zían le ta'zí' bě' libí'ili'. ⁷ Tu' ruá' rilenli' yugu' lě na' ta'zí' bě' libí'ili', naca bě' naca idú ca réajlě'ěli' Cristo. Lěsca' caní rizi' bě'ěru' oro, le initi, cate' ruchí'aru' le lu guí'. Que lě ni na', cate' chinazí' bě' yöl-la' réajlě' queé'li' Cristo, le nácarō lesaca' ca oro, gaca queé'li' yöl-la' zxon, en yöl-la' run bal dza ni' ulu'í' lahuě' Jesucristo.

⁸ Libí'ili' nadxí'ili'-ně' Cristo sal-la' catu caz bilé'eli' Lě'. Réajlě'ěli' Lě' sal-la' biti' rilé'eli'-ně' na'a, ate' rudžějali'. Yöl-la' rudzeja zxon queé'li' le cabí gaca quíxjō'ōru' tsca naca, naca idútě li. ⁹ Caní naca, tu' ridéli'li' yöl-la' rusölá que bō' naca cázali', le rata' queé'li' tu' réajlě'ěli'-ně' Cristo.

¹⁰ Dza ni'te yugu' bōnni' gulu'ě didza' uláz queě' Dios bulu'sědě' dxí'ado' ca naca yöl-la' rusölá na' dē queéru' na'a, ate' gulu'ě didza' ca naca le ruzá' lādxě'ě Dios queéru'. ¹¹ Bō' Lá'ayi dzáguiě' Cristo buzěajni'ině' zí'atělō bōnni' na' gulu'ě didza' uláz queě' Dios, en bulu'íně' légaquiě' ca ral-la' quí'i sáquě'ě Cristo, enca' ca gaca queě' yöl-la' zxon tōdi na'. Que lě ni na' gulu'í' lādxí'gaquiě' ila'nózině' bātaxi gaca lě ni, en nuzxi na' gaca que lě na' bulu'íně' Bō' dzáguiě' Cristo légaquiě'. ¹² Dios bulu'íně' bōnni' na' gulu'ě didza' uláz queě' biti' naca tu le ila'lé'eně' légaquiě', pero rě'u ni rilé'eru' lě na' gulu'ě didza' que, ate' libí'ili' riyónili' na'a ca naca que. Yugu' bōnni' tuně' libán que didza' dxi'a tu'ě didza' que lě ni, ate' zóalen yöl-la' huáca queě' Dios Bō' Lá'ayi légaquiě', Nu na' risól-lě'ě Dios zoě' yehua' yubá queéru', ate' tě'ěnně' gubáz lá'ayi queě' Dios ila'nózině' ca naca lě na' gulu'ě didza' que dza ni'te.

Dios rulidžě' rě'u para gácaru' lá'ayi

¹³ Que lě ni na', guli'sóa ban ladxi', en guli'cózatica'sō bā'ado'. Idú lādxí'li' buli'zxon lādxí'li' lě na' uzá' lādxě'ě queé'li' Dios dza ni' ulu'í' lahuě' Jesucristo. ¹⁴ Guli'gún ca rna xtídzě'ě Dios, en biti' gū'ili' lataj yugu' le rizě lādxí'li' ila'ché' libí'ili' ga yúbölō, ca na' benli' dza ni' biti' núnbě'ēnili'-ně' Dios. ¹⁵ Ral-la' gácali' lá'ayi ca naca yúgu'tě le runli', ca na' náquiě' lá'ayi Dios, en bulidžě' libí'ili' para guéquili' queě'. ¹⁶ Lěsca' caní nazúaj lu guichi lá'ayi, ca na' gunně' Dios le rna: "Guli'gaca lá'ayi, tu' naca' neda' lá'ayi."

¹⁷ Rěli'-ně': "Xuztu" cate' rulídzali'-ně' Dios, ate' Lě', lěbisō ca ruchí'a rusōróě' yúgu'tě bönachi tsca naca le núngaca tu tu bönachi na'. Que lě ni na' ral-la' gádxili' Lě' tsanni ni zóali' yödžolió ni, le cabí naca idú lādzali'. ¹⁸ Dios busölě' libí'ili' lu lě na' gúcali' dza ni'

cate' benli' ca nácagaca le cá'asö bulu'dödë' xuz xtó'oli' loli'. Nöz quézili' böá'uë' libí'ili', calëga len tu le initi ca naca oro, en plata, ¹⁹ pero len xichönë' Jesucristo le nácaterö lesaca', tu' budödi cuinë', en gúquië' ca tuba' bö'cu' zxila' nácaba' idú dxi'a, böa'do' tutië'-ba' lahuë' Dios para ugúa dul-la'. ²⁰ Dios guró cazë' Cristo zí'atëlö ca benë' yödzülió ni, ate' dza ni zóaru' na'a benë' ga bulu'i lahuë' para uzí'ili' xibé'. ²¹ Ni'a que le benë' Cristo réajlë'ëli'-në' Dios, busubanë' Lë' lu yöl-la' guti, en benë' ga náquië' lo. Caní naca, réajlë'ëli'-në' Dios, en ruzxöni ládxi'li' Lë'.

²² Na'a, chinún cuinli' dxi'a tu' runli' ca rnna le naca idútë li, en naca idú ca nadxí'ili' yugu' böchi' luzá'ali' ta'yéajlë'ë Cristo. Que lë ni na', idú ládxi'li' ral-la' idxí'ili' luzá'ali' tuli' ia'tuli'. ²³ Chiböáljali' leyúbölö, calëga tu' nuzóagaca bönachi tati caz libí'ili', pero nuzóa Nu zoa caz libí'ili', en náljaleni' xtídzë'ë Dios, le naca ban, en le zóatica'sö. ²⁴ Caní naca, tu' nazúaj lu guichi lá'ayi le rnna:

Yúgu'të bönachi nácagaca ca naca guixi'.

Yöl-la' lachi quéguequi naca ca xiyija guixi' na'.

Ribidxi guixi' na', en riguinnaj xiyija,

²⁵ pero xtídzë'ë Dios zóatica'sö.

Didza' ni bidxín queéli' lu didza' dxi'a.

2

¹ Que lë ni na', guli' cá'ana yúgu'të le ruá' dö'. Bíti'rö si' yé'ëli', en biti' ubéaj dxi'a cuinli' lógaca bönachi. Bíti'rö uzxé'ëli', en biti' innëli' que luzá'ali'. ² Ral-la' së ládxi'li' le naca queë' Dios Bö' Lá'ayi para gálali' ca na' tunbi' bí'i hué'ënido', ta'zë ládxi'bi' nidxi'. Caní ral-la' gunli' ga idxinrö dza uláli', ³ channö réquibe'ëli' náquië' Xanru' dxi'i ladxí'.

Cristo náquië' ca tu guió'j naca ban

⁴ Guli'biga' ga zoë' Xanru'. Náquië' ca tu guió'j naca ban. Náquië' ca tu guió'j bulu'cá'ana bönachi cá'asö pero naca tu le guró cazë' Dios le nazáca'tërö. ⁵ Lësca' caní, libí'ili' nácali' ca yugu' guió'j nabángaca. Guli'güi' Dios lataj ugunë' libí'ili' dxin, ate' gunë' ga gácali' ca tu yudo' ga soë' Dios Bö' Lá'ayi. Lu yudo' na' gácali' ca bixúz néquiguequinë' quez queë' Dios, ate' lu në'ë Jesucristo gaca udódili' yugu' le runnë' Dios Bö' Lá'ayi queéli' lahuë' Dios, lë na' raza ládxe'ë Dios. ⁶ Que lë ni na' nazúaj ca' lu guichi lá'ayi le rnna:

Rigu'a lu zö'ö yödzö Sión tu guió'j lo squin zö'ö,

le guró caza' neda', en naca lesaca'.

Nu réajlë' Lë', biti' ichixi inigui.

⁷ Naca guió'j ni queéli' libí'ili' na' réajlë'ëli' Cristo tu le nazáca'da', pero quégaca nupa biti' ta'yéajlë' Cristo, naca ca na' nazúaj lu guichi lá'ayi le rnna:

Guió'j na' bulu'zöë' bönni' tu'cu'ë zö'ö tsölá'alö,

tu' guléquinë' naca cá'asö,

guió'j ni chinaca guió'j lo squin zö'ö.

⁸ Lësca' caní nazúaj lu guichi lá'ayi le rnna:

Guió'j ni gun ga tsöjchégu'gaca bönachi,

en gun ga tsöjtsó'ögaca.

Le nácate' yöjchégu'gaquië' bönni' biti' ta'yéajlë'ë Cristo, tu' gula'chíxinë' cate' bu-lu'zöë' xtídzë'ë Dios tsölá'alö. Dios bucu'ë légaquië' para ilunë' caní.

Nupa néquiguequi quez queë' Dios

⁹ Libí'ili' nácali' bönachi guró cazë' Dios. Yúgu'tëli' nácali' bixúz queë' Bönni' Unná Bë' Lá'ayi. Nácali' ca tu yödzö nequi quez queë' Dios. Nácali' bönachi que cazë' Dios. Caní nácali' para gaca gunli' libán que le zxön benë' Dios, Bönni' na' bulidzë' libí'ili' para birúajli' ga naca chul-la' que dul-la', en guyázali' lu bení' idú queë'.

¹⁰ Zí'atëlö biti' gúcali' bönachi queë' Dios,

pero na'a chinácali' bönachi queë'.
Zí'atëlö cuntú nu buéchi' ladxi' libí'ili',
pero na'a Dios caz ruhuéchi' ládxë'ë libí'ili'.

Zóaru' nabanru' para gunru' ca ré'ënë' Dios

¹¹ Böchi' luzá'ado', nácali' ca bönachi zi'tu', en ridásili' yödzülió ni. Que lë ni na', ráta'yua' loli', biti' güí'ili' lataj ila'nná be'e le rizësö ládxi'li' libí'ili', yugu' le ta'díl-lalen bö' naca cázali'. ¹² Guli'gún le naca dxi'a lógaca bönachi biti' núnbë'gaquië' Dios. Caní gaca, channö ulu'zegui libí'ili' didza', en ila'nná tútili' bönachi, gaca ila'lé'e bönachi yugu' le dxi'a runli', ate' dza huödë' Xanru' ila'gu'ë Dios yöl-la' ba ni'a que le naca cázali'.

¹³ Tu' néquili' queë' Xanru', guli'gún bal yúgu'të bönni' ta'nná bë'ë, bönni' na' nucuá'agaca bönachi légaquië', sal-la' náquië' bönni' rinná bé'enë' idútë yödzülió, tu' náquië' bönni' lo unná bë', ¹⁴ o channö náquië' bönni' rinná bé'enë' tu yödzü, nu na' nuzóë' bönni' lo unná bë' na' para gunë' xíguia' nupa tua' dö', en gunë' bal nupa tun le naca dxi'a. ¹⁵ Caní ré'ënë' Dios gunli' para ila'bó' dxíë' yugu' bönni' biti' bi nózguequinë', en biti' núnbë'gaquië' Lë', cate' ila'lé'enë' le naca dxi'a na' runli'.

¹⁶ Guli'gaca ca yugu' bönni' nazángaqüië', pero biti' ugunli' dxin yöl-la' nazán queé'li' para gunli' le ruá' dö'.

Guli'gaca ca yugu' bönni' nadó'ogaqüië' queë' Dios.

¹⁷ Guli'gún bal yúgu'të bönachi.

Guli'dxi'i yugu' böchi' luzá'ali'.

Guli'gadxi-në' Dios.

Guli'gún bal bönni' na' rinná bé'enë' idútë yödzülió.

Le gudí'i guzxáquë'ë Cristo ruzéajni'i ré'u ca ral-la' gunru'

¹⁸ Núlöli' nácali' bönni' nadó'ogaca, guli'gadxi bönni' xanli', en guli'gún légaquië' bal, calégasö gunli' bal yugu' bönni' xanli' na' nácagaquië' tsahui', en tuí'i ládxi'gaquië' libí'ili', pero guli'gún bal ca' yugu' bönni' xanli' na' tu'saca' zi'ë libí'ili' lu dxin runli' quégaquië'. ¹⁹ Channö quí'i sáca'li', en biti' bi nabága'li', ate' guá' ilenli' lë na' tu' réquili' naca ca ré'ënë' Dios, urúajli' tsahui' lahuë' Dios. ²⁰ Na'a, channö ruá'ali' dö', ate' yugu' bönni' yúlahui' ilunë' libí'ili' xíguia', ¿nacxi caz uzí'ili' xibé sal-la' len yöl-la' riböza zxön ladxi' queé'li' guá' ilenli' lë na' gaca queé'li'? Channö ribózáli' zxön ladxi', en ruá' rilenli' le riguí'i rizáca'li', ate' benli' le naca dxi'a, ní'irö urúajli' dxi'a lahuë' Dios. ²¹ Dios bulidzë' libí'ili' para quí'i sáca'li' caní, tu' gudí'i guzxáquë'ë Lë cazë' Cristo uláz queé'li', en buzóë' queé'li' tu le rulu'í'i libí'ili' ca ral-la' gunli', para quí'i sáca'li' ca na' gudí'i guzxáquë'ë Lë'. ²² Cristo biti' bi dul-la' benë', en catu caz guzxí' yë'ë.

²³ Cate' bulu'dídza' yúdxinë' Lë',
biti' butsagui yúdxinë' légaquië'.

Cate' bulu'saca' zi'ë Lë',

biti' buzenë' légaquië' le bach,

pero budödi cuinë' lu në'ë Dios,

Nu na' ruchi'a rusöróë' le runru' ca sa'yéaj.

²⁴ Lë cazë' Cristo guzxi'ë dul-la' queéru' lu idú le naca cazë' cate' ni' gútië' lë'e yaga cruz, para gácaru' ca yugu' bönni' nati, para cabirö gunru' dul-la', pero sóaru' ibanru' para gunru' le naca dxi'a. Lë' gúquië' huë' uláz queéru' para huócaru' ré'u dxi'a. ²⁵ Gúcali' ca yugu' bö'cu' zxila' nanítigacaba', pero na'a budxinli' queë' Cristo, Nu ruyú libí'ili', en rapa chi'ë bö' naca cázali'. Náquië' queé'li' ca tu' bönni' uyú bö'cu' zxila'.

¹⁻² Lësca' caní, libí'ili' nigula, ral-la' gunli' bal bönni' que queéli', en channö cabí ta'yéajlë'ë xtídzë'ë Cristo, ila'yéajlë'ë Lë' cate' ila'lé'enë' le naca dxi'a runli', en ca na' nácali' ba'a ladxi', en runli' légaquië' bal, sal-la' biti' bi didza' ru'ilenli' légaquië' ca naca queë' Cristo. ³ Yöl-la' lachi queéli' biti' naca le zoa láhuisö, tsca rupá'ali' ícjali', en tsca nácagaca le néquini oro nusí' cuinli', en lari' nazáca'da' náculi'. ⁴ Yöl-la' lachi queéli' ral-la' gaca le yu'u icja ládxi'do'oli'. Yöl-la' lachi le ridiá'tica'sö naca yöl-la' nöxaj ladxi', en yöl-la' ba'a ladxi', le nazáca'da'gaca lahuë' Dios. ⁵ Lësca' caní guca yöl-la' lachi queégacanu nigula gula'yéaj ládxi'nu Dios, nigula na' gula'cuá'anu dza ni'te. Bulu'zxöni ládxi'nu Dios, en gulunnu bal bönni' que queégacanu. ⁶ Caní bennu Sara, tu' bennu ca rnna xtídzë'ë Abraham, bönni' queénu, en bulídzanu lë', gunnánu: "Xan." Libí'ili' ca' gunli' ca bennu Sara na' channö gunli' le naca dxi'a, en biti' bi gádxili'.

⁷ Lësca' caní, libí'ili', bönni', ral-la' güi' ládxi'li' nigula que queéli'. Guli'gún légacanu bal, calégasö tu' nóta'gacanu ca yöl-la' nál-la queéli', pero lësca' tu' nadéli'gacanu yöl-la' na'bán na' runnë' Dios queéru', lébisö ca nadéli'li' libí'ili'. Guli'gún caní para cabí uzaga' tu' xihui' xinózi' cate' ulídzali'-në' Dios.

Huagu'i huazáca'ru' sal-la' gunru' le naca dxi'a

⁸ Ga ruúdxitë, guli'gaca tuz tuli' len ia'tuli' yúgu'tëli', en guli'güi' ládxi'li' luzá'ali' tuli' ia'tuli'. Guli'gaca dxi'i ladxi', en zxön ladxi'. ⁹ Biti' ubí'ili', cabí guá'ali' dö' que nu ruá' dö' queéli', en biti' utsaga yúdxili' nu rutsaga yudxi libí'ili', pero caní ubí'ili', inábili'-në' Dios gunë' ga gaca bica' ba nu na', tu' bulidzë' Dios libí'ili' para gácali' bica' ba. ¹⁰ Caní naca le nazúaj lu guichi lá'ayi le rnna:

Nu bönni' ré'ënë' uzi'ë xibé yöl-la' na'bán queë', en cözë' dxí'ado', ral-la' ucá'anë' didza' xihui', en cabirö si' yë'ë.

¹¹ Ral-la' ucá'anë' le ruá' dö', en gunë' le naca dxi'a.

Ral-la' güi' ládxi'ë cözë' zxön ladxi', en gúntica'së' caní,

¹² Xanru' rapa chi'ë yugu' bönni' tsahui'

en ruzé náguië' le tu'lidzë' Lë',

pero ruzáguë'ë xinózguequi nupa tua' dö'.

¹³ ¿Nuzxi caz guá' dö' queéli' channö ru'i ládxi'li' gúntica'sili' le naca tsahui'? ¹⁴ Sal-la' quí'i sáca'li' cate' runli' le naca tsahui', gácali' bica' ba. Cuntu nu gádxili', en biti' ubi uguí'ili' ¹⁵ pero buli'zxöni ládxi'li'-në' Cristo, en güi'ili' Lë' lataj inná bé'enë' lu icja ládxi'do'oli'. Guli'sóa sina' quíxjöi'ili' yúgu'të nupa ila'nabi libí'ili' bizx que runli' löza Cristo, en gunli' lë ni lu yöl-la' nöxaj ladxi' queéli', en lu yöl-la' run bal nupa na'. ¹⁶ Guli'gúntica'sö le naca dxi'a lahuë' Dios, en channö nacué' nupa ta'nnë' xihui' que le naca tsahui' runli' tu' réajlë'ëli' Cristo, ní'irö ulu'tuí'i tu' nözi le ta'nnë' queéli'. ¹⁷ Channö quí'i sáca'li', dxí'arö gaca channö naca tu' runli' le naca dxi'a, en calëga tu' ruá'ali' dö', channö Dios ré'ënë' qui' sáca'li' caní.

¹⁸ Lë cazë' Cristo gudí'i guzxáquë'ë, en gútië' uláz queéru' para bugúë' dul-la' nabága'ru'. Lë' náquië' dxi'a, pero gútië' ni'a queéru', yugu' bönni' dul-la'. Caní benë' para bunë' ré'u tuz len Dios. Lu yöl-la' bönachi queë' gútië' pero lu bö' naca cazë' ni zoë' nabanë' lu le cubi le naca cazë'. ¹⁹ Lu bö' naca cazë' guyijë' yöjenë' libán lógaca bö' nadzúngaca. ²⁰ Bö' ni gulaca cazë' yugu' bönni', dza ni'te gula'dá'baguë'ë xtídzë'ë Dios, dza ni' zoë' Noé, cate' ni' gulözë' Dios lu yöl-la' riböza zxön ladxi' queë', en biti' busiúdxë' légaquië', tsanni ni' benë' Noé barco zxön na'. Lë'e barco na' bulu'lá nabábasö bönachi lu nisa. Gulaca xunu' bönachi, bönni', en nigula. ²¹ Nisa ni' naca tu le ruluí'i ca naca nisa ga na' ridílaru' nisa, le naca bë' nuláru' lu yöl-la' guti tu' bubanë' Jesucristo lu yöl-la' guti. Lë na' ridílaru' nisa biti' naca tu le run dxi'a le nácaru' láhuisö, pero ruluí'i ruí'i ládxi'ru' gaca dxi'a icja ládxi'do'oru' lahuë' Dios. ²² Jesucristo bubenë' yehua' yubá, ga na' yöjchö'ë

cuita lë'ë ibëla Dios, en rinná bé'enë' yugu' gubáz lá'ayi, en nupa ni' ta'nná bë', en nupa nadéli'gaca yöl-la' zxon.

4

Ral-la' ugunru' dxin yöl-la' huáca queë' Dios para gunru' xichinë' Cristo

¹ Que lë ni na', ca na' gudí'i guzáquë'ë Cristo lu le naca cazë', lësca' libí'ili' ral-la' soa cózali' quí'i sáca'li'. Nu na' rigu'í'i rizáca'a tu' da' le naca tsahui' chibucá'ana dul-la'. ² Na'a isí lo, ral-la' gúntica'sili' ca ré'ënë' Dios, en calëga ca rizësö ládxi'li' lu yöl-la' bönachi queéli'. ³ Tscá'ti' gaz le chibenli' chibenli'. Bítí'rö gunli' ca na' tun nupa bití' núnbë'gaca Dios. Dza ni'te benli' yugu' le cabí ral-la' gunli'. Guzé ládxi'li' le ruá' dö'. Guzádxili'. Gudödi bë' gü'í'i gudáguli', en guyéaj ládxi'li' budó' guió'j budó' yaga, le rigútinë' Dios. ⁴ Na'a, tu'báninë' bönni' tunë' caní tu' cabirö runli' tsözxón légaquië' cate' tunë' le ruá' dö' caní, en que lë ni na' tu'tsaga yúdxinë' libí'ili'. ⁵ Légaquië' run bayudxi ulu'lu'í'i cuíngaqüë' lahuë' Dios, ate' Lë' chizóa uchi'a usöröë' nupa nabángaca, en nupa chinátigaca. ⁶ Que lë ni na' guca libán que didza' dxi'a lógaca nupa chinátigaca, nupa na' Dios buchi'a busöröë' léguequi cate' ni' gula'cuá' yödzölió ni, ca na' ruchi'a rusöröë' yúgu'të bönachi. Guca libán lóguequi para ila'cuá' lu yöl-la' na'bán lu bö' nácagaca caz, ca na' zoa cazë' Dios lu yöl-la' na'bán.

⁷ Chizóa idxín dza údxi que yúgu'të le dë. Que lë ni na', guli'gaca ba'a ladxi', en buli'subán ládxi'li' para gaca ulídzali'-në' Dios. ⁸ Tu' runtë bayudxi, guli'dxí'i luzá'ali' tuli' ia'tuli', ate' channö dzágali' lu yöl-la' nadxí'i, gácali' sina' uniti loli' yugu' luzá'ali' tua' dö' queéli'. ⁹ Guli'gü'í' lataj ila'cuá' böchi' luzá'ali' lídxili', en bití' innëli' quégaquië'. ¹⁰ Ral-la' ugunli' dxí'ado' dxin yugu' le buzá' ládxi'ë' Dios queéli', en gácalenli' luzá'ali' tuli' ia'tuli'. ¹¹ Nu bönni' runë' ba nalí, ral-la' gunë' ba nalí que xtídzë'ë Dios, ate' nu bönni' runë' xichinë' Cristo, ral-la' ugunë' dxin yöl-la' huáca na' runnë' Dios queë', ate' ni'a que yúgu'të le runli', gaca yöl-la' ba queë' Dios ni'a que le nunë' Jesucristo. ¡Gácatíca'sö queë' Dios yöl-la' ba, en yöl-la' unná bë'! ¡Ca' gaca!

Le ila'gu'í'i ila'zaca' bönachi ta'yéajlë' Cristo

¹² Böchi' luzá'ado', bití' ubánili' tu' nözi le ta'zí' bë'da' libí'ili'. Bití' naca tu le cabí núnbë'gaca bönachi. ¹³ Guli'dzëjade'e tu' dë lataj queéli' gunli'-në' tsözxón Cristo lu le rigu'í'i rizáquë'ë Lë' ni'a que bönachi queë' para gaca udzëjali' ca' dza na' huödë' Cristo, cate' ilé'eli' yöl-la' zxon queë'. ¹⁴ Channö tu'dzaga yudxi bönachi libí'ili' tu' dá'ali' Cristo, bica' ba libí'ili', tu' naca bë' zóalenë' Dios Bö' Lá'ayi libí'ili', Nu na' za' yehua' yubá. Bönachi yödzölió ni tu'dzaga yudxi Lë', pero libí'ili' runli'-në' bal. ¹⁵ Channö rigu'í'i rizáquë'ë nu bönni' dzáguie' libí'ili', ral-la' gaca caní tu' dë'ë Cristo, en calëga tu' rútië' bönachi, o ribanë', o ru'ë dö', o tu' yöjgútsë'ë ga yúbölö. ¹⁶ Na'a, channö nálöli' rigu'í'i rizáca'li' tu' dá'ali' Cristo, bití' ral-la' utuí'ili', pero guli'cu'ë Dios yöl-la' ba tu' nazí' lali' bönachi queë' Cristo.

¹⁷ Chibídxín dza isí lahuë' Dios uchi'a usöröë' bönachi rö queë'. Channö z'älö uchi'a usöröë' rë'u, ¿nácxitëro gaca quégaca nupa bití' túngaca ca rnna didza' dxi'a queë' Dios? ¹⁸ Channö naca böniga ulu'lágaca nupa tun le naca dxi'a, ¿nácxitëro gaca quégaca nupa ta'dá'baga' Dios, en tun dul-la'? ¹⁹ Caní naca, yugu' bönni' ni ta'gu'í'i ta'zaquë'ë tu' ré'ënë' Dios gaca caní, ral-la' ilúntica'së' le naca tsahui', en ulu'dödë' bö' nácagaca cazë' lu në'ë Dios, tu' ben cazë' Lë' légaquië', en runë' ca rnna xtídzë'ë.

5

Pedro ruzéajni'inë' nupa ta'yéajlë' Cristo

¹ Na'a, ruzéajni'ida' libí'ili', bönni' gula tapa chí'ili' nupa néquiguequi queë' Cristo, tu' naca' neda' ca' bönni' gula ca nácali' libí'ili', en bilé'eda' le gudí'i guzáquë'ë Cristo, ate'

guna' ca' tsözxón libí'ili', uzí'iru' xibé yöl-la' zxön na' ilá' lahui. ² Guli'gaca ca bönni' tu'yúë' bö'cu' zxila', gun chí'ili' bönachi na' Dios gulu'ë lu ná'ali'. Guli'gún caní idú ládxi'li' ca ré'ënë' Dios, en calëga tu' run bayudxi queé'li', o tu' rizé ládxi'li' dumí. Guli'gún xichinli' tu ré'ënisili', ³ en calëga tu' ré'ënili' inná bé'esili' nupa na' nagu'ë lu ná'ali'. Guli'güí' ládxi'li' gácali' tu le ruluí'i ca ral-la' ilaca nupa na' run chí'ili'. ⁴ Caní naca, cate' uluí'i lahuë' Cristo, bönni' lo uyú bö'cu' zxila', idéli'li' tu le uzí'ili' xibé le catu caz initi.

⁵ Lësca' caní, bi'i cuidi', guli'gún ca ta'nné' yugu' bönni' gula. Yúgu'tëli' ral-la' gunli' bal luzá'ali', tuli' ia'tuli', lu yöl-la' nöxaj ládxi' queé'li', tu' nazúaj lu guichi lá'ayi le rnna: Dios ruzáguë'ë xinózguequi nupa tun ba zxön cuínguequi pero rácalenë' nupa nácagaca nöxaj ládxi'.

⁶ Guli'sóa nöxaj ládxi' lu në'ë Dios, ate' Lë' uchisë' libí'ili' cate' izá'a dza. ⁷ Guli'cú'u yúgu'të le run ga ruúbi ruguí'ili' lu në'ë Dios, tu' ruí'i ládxi'ë libí'ili'.

⁸ Guli'gaca ba'a ládxi', en buli'subán ládxi'li', tu' zoa tu' xihui', nu bití' rilé'e libí'ili' dxi'a, ridá idú gásibi'ilö, en naca ca tuba' bédxi guixi' ribódxí'aba', riguiljba' nu gáguba'. ⁹ Guli'gaca tsutsu ca réajlë'ëli' Cristo, en guli'zága' xinöza tu' xihui', tu' nózili' ta'guí'i ta'záquë'ë böchi' luzá'ali' idútë yödzölió ni ca na' riguí'i rizáca'li' libí'ili'. ¹⁰ Ní'irö cate' chigudí'i guzxáca'li' tu chí'isö, Dios gunë' ga gácali' idú tsahui', en ga gácali' tsutsu, en ga gálali', en ga sóali' tsaz. Lë cazë' Dios ruzá' ládxi'ë queéru' yúgu'të le ruzí'iru' xibé, en bulidzë' rë'u para uzí'iru' xibé yöl-la' zxön queë' le zóatica'sö tu' nácaru' tuz len Jesucristo. ¹¹ ¡Gácatíca'sö yöl-la' ba, en yöl-la' unná bë' queë' Lë'! ¡Ca' gaca!

Pedro ruzenë' didza' nupa ta'dá' Cristo

¹² Dídza'do' ni ruzúaja' queé'li' lu guichi lu në'ë Silvano. Réquida' náquië' böchi'ru' idú ládxi'. Ré'ënda' utipa' ládxi'li', en runa' ba nalí loli', le nácatë lë ni naca le ruzá' ládxi'ë queéru' Dios. ¡Guli'gaca tsutsu tu' ruzí'ili' xibé lë ni!

¹³ Yugu' bönachi queë' Cristo nacúa' Babilonia tu'gapa Dios libí'ili'. Dios guró cazë' léguequi ca na' guróë' libí'ili'. Lësca' bi'i Marcos rugápabi' Dios libí'ili'. Nácabi' ca zxf'ini caza'. ¹⁴ Guli'gapa Dios luzá'ali' tuli' ia'tuli', en lu yöl-la' nadxi'i queé'li' luzá'ali' unída'li' luzá'ali' tuli' ia'tuli'.

Rinábida'-në' Dios gunë' ga soa dxi icja ládxi'do'oli', yúgu'tëli' na' néquili' queë' Jesucristo. ¡Ca' gaca!

DÍDZA'DO' BUROPI BUZÚAJĚ' PEDRO

Pedro rugapě' Dios nupa ta'dá' Cristo

¹ Neda', Simón Pedro, naca' huen dxin queě' Jesucristo, en gubáz nasól-lě'ě Lě'. Rugapa' Dios libí'ili', réajlě'ěli'-ně' Jesús. Lébisö ca nazáca'gaca yöl-la' réajlě' queé'li' Lě', en yöl-la' réajlě' queé'tu' Lě'. Dios beně' ga réajlě'ěli' Lě' tu' naca cazě' tsahui', en tu' náquiě' ca' Xanru' Jesucristo, Nu na' rusölá rě'u, tsahui'. ² Rinábida'-ně' Dios guně' ga gata' queé'li' idütě le ruzá' ládxě'ě queé'ru', en guně' ga soa dxi icja ládxi'do'oli' tu' núnbě'ěli'-ně' Dios, enca' Xanru' Jesús.

Le nácagaca nupa ta'yéajlě' Cristo

³ Lu yöl-la' huáca zxön queě', Dios chibenně' queé'ru' yúgu'tě le riquíniru' para gata' queé'ru' yöl-la' na'bán idú, en para gácaru' ba'a ladxi', tu' núnbě'ěru' Nu na' bulidza rě'u para gata' queé'ru' yöl-la' zxön queě', en le naca tsahui' queě'. ⁴ Tu' runě' caní, beně' ga gaca uzí'iru' xibé yugu' le zxön, en le naca tsahui' guzxi' lu ně'ě gunně' queé'ru', ate' tu' naca caní nuláru' lu le ruá' dō' raca yödzölió ni tu' ta'zě ládxi'gaca bönachi le cabí naca tsahui'. Nuláru' para gácaru' ca náquiě' Lě cazě' Dios. ⁵ Que lě ni na':

Channö réajlě'ěli' Cristo,

guli'güi' ládxi'li' gácali' dxi'i ladxi'.

Channö chinácali' dxi'i ladxi',

guli'güi' ládxi'li' gata' ca' queé'li' yöl-la' rácada'.

⁶ Channö nápali' yöl-la' rácada',

guli'güi' ládxi'li' inná be'e cuinli'.

Channö rinná be'e cuinli',

guli'cöza zxön ladxi'.

Channö ribózáli' zxön ladxi',

guli'sóa ba'a ladxi'.

⁷ Channö zóali' ba'a ladxi',

guli'dxi'i luzá'ali'.

Channö nadxi'ili' luzá'ali',

guli'dxi'i ca' yúgu'tě bönachi.

⁸ Channö caní runli', en zeaj rácarö idú ca runli' caní, lě ni gun ga bití' gaca nítisö yöl-la' réajlě' queé'li' Lě', ate' tseaj gácarö idú ca núnbě'ěli'-ně' Xanru' Jesucristo. ⁹ Nu bönni' bití' ruí' ládxě'ě guně' caní, náquiě' ca tu bönni' nachul-la nanítiě', tu' chizá' ral-la ládxě'ě buně' Cristo lě' tsahui', en bugú'ě' yugu' dul-la' gubágu'ě' zí'atělö. ¹⁰ Que lě ni na', böchi' luzá'ado', ral-la' güi'titěro ládxi'li' guéquibe'eli' bulidzě' Dios libí'ili', en guró cazě' libí'ili'. Channö gunli' caní, bití' ca' ichixi iníguili'. ¹¹ Caní gaca, idú ládxě'ě Dios gúnnasě' queé'li' lataj tsázali' ga inná bě'tica'sě' Xanru' Jesucristo, Nu rusölá rě'u.

¹² Que lě ni na' gúntica'sa' ga tsöjnéli' yugu' lě ni sal-la' chinóz quézili' le, en rugunli' dxin le naca idütě li na' chiguzxi' lu ná'ali'. ¹³ Runi neda' ral-la' usubana' ládxi'li' ca nácagaca lě ni tsanni ni zoa' nabana'. ¹⁴ Ral-la' guna' caní tu' nözda' si' gátia'. Xanru' Jesucristo chigudxi cazě' neda' gaca caní quia'. ¹⁵ Que lě ni na' ruí'ida' ládxa'a guna' ga tsöjnélica'sili' yugu' lě ni tödi gátia'.

Nupa bila'lě'e yöl-la' zxön queě' Cristo

¹⁶ Bití' bě'lentu' libí'ili' tu didza' ridasö lu yöl-la' sina' queé'tu', cate' buzéajni'itu' libí'ili' ca ral-la' idxín dza huödě' Xanru' Jesucristo, napě' yöl-la' unná bě' zxön. Netu' bilé'e quézitu' yöl-la' zxön queě'. ¹⁷ Bilé'etu' Lě' cate' Xúziru' Dios beně' Lě' bal, en bě'ě Lě' yöl-la' zxön, ate' biyón chi'ě Dios, le birúaj lataj bení' queě', cate' gunně': "Bönni' ni náquiě'

Zxí'ina'. Nadxí'ida' Lë', en raza ládxa'a Lë'." ¹⁸ Netu' biyón quézitu' chi'ë na' le birúaj yehua' yubá cate' ni' guzóalentu'-në' Xanru' lu guí'a lá'ayi na'.

¹⁹ Lë' na' guca, naca bë'da' zeaj nácatë didza' gulu'ë yugu' bönni' uláz queë' Dios, ate' ral-la' güf'i ládxi'li' didza' na', tu' naca ca tu guí' ruzení' tu ga naca chul-la ga idxintë dza uzení' lu icja ládxi'do'oli' Nu na' naca ca bölj hui sila queéru'. ²⁰ Lë' ni runda' bayudxi tséajni'ili': Cuntu nu bönni', rácasö queë' biti' gaca tséajni'inë' didza' bë'ë tu bönni' uláz queë' Dios. ²¹ Yugu' didza' gulu'ë yugu' bönni' uláz queë' Dios biti' ca' gulu'ë tu' gulé'ëni quézinë', pero gulu'ë didza' uláz queë' Dios le guchízië' Dios Bö' Lá'ayi icja ládxi'do'gaquië'.

2

Ca nácgaca nupa tu'sédinë' le cabí nácatë

¹ Yugu' bönni' ta'z' yë'ë gula'cuá'lenë' bönachi Israel, en gula'nnë' nácgacaquië' bönni' tu'ë didza' uláz queë' Dios. Lësca' caní yugu' bönni' ila'z' yë'ë ila'cuá'lenë' libí'ili', en ulu'sédinë' libí'ili' le cabí nácatë. Lu yöl-la' sina' quégaquië' ulu'sédinë' libí'ili' xibá quégacasë' le gun ga soa bönadxi queéli' ucá'anali' le naca idútë li. Ila'dá'baguë'ë ca' Xanru', Nu busölá rë'u. Le ilunë' gun ga usunítië' Dios légaquië'. ² Zianli' libí'ili' gunli' légaquië' tsözxón lu le ruá' dö' ilunë', ate' tu' gunli' bál-lali' caní ila'nnë' xihui' bönachi que didza' dxi'a le naca idútë li. ³ Lu yöl-la' ruhuidi' quégaquië' ulu'sédinë' libí'ili' le cabí nácatë, para gata' quégaquië' dumí queéli'. Chinarugu quégaquië' bönni' ni, ate' naca löza ila'nítië' tsaz.

⁴ Dios biti' buniti lahuë' yugu' gubáz lá'ayi queë' na' gulunë' dul-la', pero gurú'unë' légaquië' lataj chul-la. Nága'gaquië' du guíë ga naca chul-la na', ga na' ta'bözë' dza usiúdxë' Dios légaquië'. ⁵ Lësca' caní, biti' buniti lahuë' bönachi gula'cuá' dza ni'te cate' gusól-lë'ë nisa guió'j le busuniti yödzülió le beti bönachi nácgaca xihui', pero busölë' Noé lu nisa na', bönni' ni' benë' libán que le naca tsahui'. Dios busölë' ca' ia'gadxi di'a dza queë' Noé na' lu nisa. ⁶ Lësca' caní, Dios guchúguië' quégaca bönachi gula'cuá' yödzü Sodoma, en yödzü Gomorra. Busunítië' léguequi lu guí', ate' bulu'huóaca dö. Le guca quéguequi naca tu le rulu'i le run gadxi nupa tua' dö'. ⁷ Cate' busunítië' yugu' yödzü na', Dios busölë' Lot, tu bönni' tsahui', lu guí' na'. Buí'inida' ládxi'ë Lot cate' bilé'enë' le xihui' gulún bönachi tuá' dö' na'. ⁸ Caní guca, tu' guzóalenë' bönni' tsahui' na' léguequi, ate' bilé'enë', en biyönnë' le ruá' dö' na' gulúngaca, ate' tu' gúquië' tsahui' gusëbi ládxi'ë yúgu'të dza ni'a que yugu' le cabí naca tsahui' gulúngaca. ⁹ Caní naca, Xanru' nózinë' usölë' nupa na' tadxí Lë' lu na' nu run ga tsázagaca bönachi nöza dul-la', pero nucózé' xíguia' gunë' nupa biti' nácgaca tsahui' ga idxinrö dza ichúguië' quéguequi ila'niti tsaz.

¹⁰ Ichúguda'arö quégaquië' bönni' ni tunë' yugu' le ta'zë ládxi'ë le ruá' dö', en ta'dá'baguie' yöl-la' unná bë' queë' Xanru'. Nácgacaquië' rugu ladxi', en zidi ladxi'. Biti' tádxinë' tu'lidza ditjë' gubáz lá'ayi ta'dé' lu bení'. ¹¹ Gubáz lá'ayi na' nápagacatëre' yöl-la' unná bë', en yöl-la' huáca ca yugu' bönni' na', pero gubáz lá'ayi na' biti' tu'huázxjanë' nu ulu'zéguië' didza' lahuë' Xanru'.

¹² Yugu' bönni' ni nácgacaquië' ca böa' guixi', biti' bi ta'yéajni'iba', pero náljagacaba' para nu sön légacaba', en guti légacaba'. Ta'nnë' xihuë'ë que le cabí ta'yéajni'inë', ate' ila'nítië' tsaz ca raca quégacaba' böa' guixi' na'. ¹³ Dios ubi'ë quégaquië' le ila'guí' ila'záquë'ë, tu' bulu'saca' z'ie bönachi. Téquinë' naca xibágaquië' tu'zi'ë xibé le raca na'a dza. Nácgacaquië' ca tu huë' nudzu', en tu le run ditaj cate' ni' tahuë' tsözxón len libí'ili', ate' tu'dzéjanë' tu' ta'z' yé'enë' libí'ili'.

¹⁴ Lu yöl-la' rizé ladxi' quégaquië' le ruá' dö' tu'yúë'-nu yugu' nigula. Biti' nacu'ë dxisö túngaquië' dul-la'. Túngaquië' ga ta'chixi ta'nigui nupa biti' nácgaca tsutsu ca ta'yéajlé' Cristo. Ta'guíljatica së' yugu' le tu'huídi'në'. Dios chinuchúguië' quégaquië' ilátigaquië'. ¹⁵ Bulu'cá'anë' le naca idútë li, ate' nachul-la nanítigaquië'. Tunë' ca benë'

Balaam, xzí'inë Beor, bönni' ni' bidxí'inë' dumí, ate' benë' le ruá' dö' tu' nazxjë'. ¹⁶ Dios buzenë' le bach Balaam na' tu' benë' le ruá' dö' na'. Tuba' búrrodo' bé'lenba' lë' didza' ca na' tu' i didza' bönachi, ate' buzága'ba' xinözë' Balaam ga na' sa'yéajë' lu yöl-la' ridá'baga' queë'.

¹⁷ Nácagaquië' bönni' ni ca tu buduá' chibu'i nisa que, enca' ca tu böaj le riché' bö' budunu'. Chinabá'a xilátjagaquië' lataj chul-la. ¹⁸ Caní nácagaquië' tu' tu'ë didza' yugu' le zxön lu yöl-la' biti' bi nözi quégaquië', en tu'gunë' dxin yugu' le ta'zé ládxi'gaca bönachi le ruá' dö', en tunë' ga ta'chixi ta'nigui nupa si' bulu'lá ladaj nupa nácagaca chul-la niti. ¹⁹ Të' bönachi ila'deli' yöl-la' rusölá, pero légaca cazë' nadzúngaquië', en tunë' bayudxi le ruá' dö'. Nadzúngaquië' yúgu'të bönni' lu na' bi rinná be'e icja ládxi'do'gaquië'. ²⁰ Channö bulu'lé' lu le cabí naca tsahui' nacuá' yödzölió ni tu' gulúnbë'ë Xanru' Jesucristo, Nu rusölá rë'u, ate' ní'irö ta'röli le cabí naca tsahui' na' légaquië' leyúbölö, en ta'nná be'e légaquië', le nácatë nabága'gacatërë' xíguia' ga röjsetë ca le gula'báguë'ë zí'alö. ²¹ Dxí'arö gaca quégaquië' la'tu' catu caz ilúnbë'ë Nu ruzóa rë'u nöza tsahui' ca le gaca quégaquië' channö gulúnbë'ë Lë', ate' ní'irö bulu'cá'anë' xibá lá'ayi bë'ë Dios quégaquië'. ²² Chibudxín quégaquië' didza' na' rnna: Ruhuécjaba' bö'cu', ruhuóáguba' le si' gúbaba'. Ruyázaba' cuchi na' si' gudíbiru'-ba' lu guna'.

3

Naca löza huödë' Xanru'

¹ Didza' ni naca le buropi ruzúaja' queéli' lu guichi, böchi' luzá'ado'. Lu irópatë guichi na' ru'i ládxa'a usubana' ládxi'li' ca nácagaca lë ni. ² Guli'tsöjné yugu' didza' gulu'ë bönni' queë' Dios zí'atëlö, ca gulu'ë didza' uláz queë'. Guli'tsöjné ca' xibá na' Xanru', Nu rusölá rë'u, gunná bé'enë' rë'u, lë na' bulu'sédinë' bönni' gubáz nasól-lë'ë Lë' libí'ili'.

³ Ral-la' tsöjnéli' lë ni naca lo. Dza tsösjetëgaca ulu'lu'i lahuë' bönni' ilunë' le ta'zé ládxi'ë le ruá' dö'. ⁴ Ulu'titjë', ila'nnë': "¿Gazxi caz lë na' guzxi' lu në'ë Cristo? Gunnë': Huöda' leyúbölö. Dza ni'te cate' gulátië' xuz xtó'oru', yúgu'të raca tuz ca guca cate' gusí lo rata' yödzölió ga ridxintë na'a dza." ⁵ Tu'zóë' tsölá'alö le guca dza ni'te. Bë'ë didza' Dios, ate' gulata' lúzxiba, en luyú. Birúaj luyú na' lu nisa ate' zoa gatsaj láhui'lö nisa. ⁶ Len nisa ca' busunítië' Dios yödzölió dza ni'te cate' ni' gusól-lë'ë nisa guiój le beti yugu' bönachi dul-la'. ⁷ Lúzxiba, en yödzölió ni le nacuá' na'a dza, Dios nucu'ë léguequi ga idxinrö dza usunítië' léguequi lu guí'. Caní gaca tu' gunné' caní Dios caz. Uzégui'ë léguequi dza ni' ichúguië' quégaca bönachi biti' nácagaca tsahui' gátigaca.

⁸ Biti' gal-la ládxi'li' lë ni, böchi' luzá'ado'. Tu dza naca queë' Xanru' ca zían gayuá' iz, ate' zían gayuá' iz nácagaca queë' ca tu dza. ⁹ Biti' ridzenë' Xanru' gunë' le guzxi' lu në'ë gunë'. Téquiguequi bal-la bönachi ridzenë', pero ribözë' zxön ladxi', en ruá' rilenë' rë'u tu' cabí ré'ënë' initi nitú bönachi, pero ré'ënë' ulu'bí'i ládxi'gaca yúgu'të bönachi.

¹⁰ Tsárido'os idxín dza huödë' Xanru' ca ridxinë' tu bönni' gubán chí'i dzó'ölö. Lu dza na' huadödi que lúzxiba len tu bö zxön. Ila'niti yúgu'të le nacuá' lu guí' zxön. Ila'yegui yödzölió ni, en le nacuá' yödzölió ni.

¹¹ Channö caní gaca, ila'niti yúgu'të lë ni, ¿bizxi caz ral-la' gunli'? Ral-la' gácali' ba'a ladxi', en udödi cuinli' lu në'ë Dios. ¹² Ral-la' cózali' dza huödë' Xanru', en güf'i ládxi'li' gunli' ga idxinrö bayón dza ni' cate' initi lúzxiba, ate' ila'niti yúgu'të le nacuá' ni lu guí'. ¹³ Caní gaca, pero rë'u ribózaru' le guzxi' lu në'ë Dios. Gunë' tu lúzxiba cubi, en tu luyú cubi ga ni' soa le naca tsahui'.

¹⁴ Que lë ni na', böchi' luzá'ado', tsanni ni ribózali' yugu' lë ni, guli'güf' ládxi'li' gácali' idú tsahui' lahuë' Dios, ate' gunli' ga cuntu nu bi gaca innë' queéli', en cózali' dxí'ado' cate' idxinrö dza ni'. ¹⁵ Ral-la' inózili' ribözë' Dios zxön ladxi' para gata' quégaca bönachi lataj ulu'lágaca, ca na' gunné' ca' bóchi'ru' Pablo. Buzúajë' queéli' lu guichi, zóalen lë' yöl-la'

réajni'i na' bë'ë Xanru' queë'. ¹⁶ Yúgu'të lu guichi ruzúajë', ru'ë didza' ca nácagaca lë ni, sal-la' nútsa'gaca ca' léguequi yugu' didza' nácagaca böniga tséajni'iru'. Yugu' didza' caní tu'chíxinë' bönni' bití' nózguequinë', en bönni' bití' naca idú ládxi'gaquië'. Lësca' caní tunë' quégaca ia'bal-la didza' nazúajgaca lu guichi lá'ayi, le gun ga usunítië' Dios légaquië'.

¹⁷ Chinóz quézili' lë ni, böchi' luzá'ado'. Que lë ni na' guli'gún chi'i cuinli', para cabí ila'zí' ye'e bönachi bití' nácagaca tsahui' libí'ili', en para cabí ilún ga tseaj bö' icja ládxi'do'oli' ca réajlë'ëli' Cristo. ¹⁸ Guli'güü' ládxi'li' gácarö idú ca núnbë'ëli'-në' Xanru' Jesucristo, Nu rusölá rë'u, ate' ruzí'ili' xibé'. ¡Yöl-la' ba Lë' na'a dza, en yúgu'të dza zá'gaca! ¡Ca' gaca!

DÍDZA'DO' ZÍ'ALÖ BUZÚAJĚ' JUAN

Didza' nabániru'

¹ Rusiyöntu' libí'ili' ca naca queë' Bönni' na' zoa cazë' dza ni'te, le biyónitu' bë'ë didza', en le bilé'etu' ca naca queë', en le buyutu' benë' Bönni' na'. Gudantu' Lë'. Bönni' ni náquië' Jesús, lë' ca' Didza' Nabánigaca Bönachi. ² Bönni' na' nabánigaca bönachi bulu'í lahuë', ate' bilé'etu' Lë'. Runtu' ba nalí queë', en rulu'itu' libí'ili' ca naca queë' Bönni' na' nabániru'. Bönni' ni guzóalenë' Dios Xuz, en chibudulu'í lahuë' ga zóaru'. ³ Le bilé'etu', en le biyónitu' rusiyöntu' libí'ili' para gácali' ca' libí'ili' tuz len netu'. Le nácatë naca yöl-la' tuz queëru' len Dios Xuz, enca' len Jesucristo Zxí'inë' Dios. ⁴ Ruzúajtu' queéli' lu guichi lë ni para gaca udzéjaru' idú ládxi'ru'.

Dios náquië' bení'

⁵ Lë ni naca didza' biyónitu' bé'lenë' Jesús netu', ate' le rusiyöntu' libí'ili'. Caní rnna: Dios náquië' bení', ate' nitú le naca chul-la' que dul-la' biti' zóalen Lë'. ⁶ Channö innaru': "Nácaru' tuz len Dios", pero channö runru' le naca chul-la' que dul-la', lë ni naca bë' rizí yé'ëru', en biti' runru' le naca idútë li. ⁷ Na'a, channö runru' le naca tsahui', en ridaru' lu bení' ca na' Lë' náquië' tsahui', en zoë' lu bení', nácaru' tuz turu' len ia'turu', ate' xichönë' Jesucristo, Zxí'inë' Dios ruún rë'u dxi'a, en rugúa yúgu'të dul-la' nabága'ru'.

⁸ Channö rnnaru': "Biti' bi dul-la' runru'", rizí yé'ëru' la' cuínsiru', en biti' nazí' lu ná'aru' le naca idútë li. ⁹ Channö ixóalëpiru' lahuë' Dios dul-la' nabága'ru', Lë' runë' ca rnnë', en náquië' tsahui'. Uniti lahuë' dul-la' nabága'ru', en únë' rë'u tsahui', ugúë' yúgu'të le ruá' dö' dzaga rë'u. ¹⁰ Channö innaru': "Biti' bi dul-la' nabága'ru'", naca ca innaru': "Dios rizí yé'ë", ate' biti' runru' ca rnna xtídzë'ë.

2

Cristo náquië' Nu rudödi xtídza'ru' lahuë' Dios

¹ Libí'ili', zxi'ina'do', ruzúaja' queéli' lu guichi lë ni, para cabí gunli' dul-la'. Na'a, channö nútí'tës nu gun dul-la', zoa nu rudödi xtídza'ru' lahuë' Dios Xuz, Lë' Jesucristo, Nu naca tsahui'. ² Naca cazë' Bönni' budödi cuinë', en gútië' para bugúë' dul-la' nabága'ru' lahuë' Dios. Calégasö gútië' para bugúë' dul-la' nabága'ru' rë'u, pero gútië' ca' para bugúë' dul-la' nabága'gaca bönachi idútë yödzölió.

³ Channö runru' ca naca le gunná bé'enë' rë'u, nóziru' chinúnbë'ëru' Lë'. ⁴ Nu rnna: "Neda' núnbë'a-në' Dios" pero biti' run ca rinná bë' xibá queë', nu ni rizí yë', en biti' run le naca idútë li. ⁵ Nu run ca rnna xtídzë'ë Dios, le nácatë nadxí'i nu ni Dios ca ral-la' gun. Channö runru' caní, nóziru' néquiru' queë' Dios. ⁶ Lësca' caní, nu rnna: "Neda' néquida' queë' Cristo", ral-la' gaca nu na' ca na' gúquië' Cristo cate' gudé' yödzölió ni.

Tu xibá cubi

⁷ Böchi' luzá'ado', ruzúaja' queéli' lu guichi xibá ni. Biti' naca tu xibá cubi, pero xibá gula na', le zóalen libí'ili' dza ni'te. Xibá gula na' naca didza' biyónili' dza ni'te. ⁸ Lësca' naca ca ruzúaja' queéli' lu guichi tu xibá cubi, lë na' le nácatë benë' Jesús ca rnna, ate' runli' ca' libí'ili' ca rnna, tu' chiridödi que le naca chul-la' que dul-la', ate' bení' idú chiruzení'.

⁹ Nu rnna: "Zoa' lu bení'", pero biti' rilé'e dxi'a böchi' luzé'e, nu ni ni run le naca chul-la' que dul-la'. ¹⁰ Nu nadxí'i böchi' luzé'e zoa lu bení', ate' le run ga nu ichixi inigui biti' zóalen nu na'. ¹¹ Le naca chul-la' que dul-la' run ga nu biti' rilé'e dxi'a böchi' luzé'e, en ga ridá nu na' ga chul-la. Biti' nözi ga zeaj, tu' run le naca chul-la na' ga nachul-la naniti nu na'.

¹² Ruzúaja' queé'li' lu guichi, xzí'ina'do', tu' chibunít lahuë' Dios dul-la' nabága'li', tu' runë' le guxzí' lu në'ë gunë'. ¹³ Ruzúaja' queé'li' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Ruzúaja' queé'li' lu guichi, bi'i ra'bán, tu' chibucúl-lali' tu' xihui'.

¹⁴ Chibuzúaja' queé'li' lu guichi, xzí'ina'do', tu' núnbë'ëli'-në' Dios Xuz. Chibuzúaja' queé'li' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Chibuzúaja' queé'li' lu guichi, bi'i ra'bán, tu' nácali' bi'i nál-la, en nazí' lu ná'ali' xtídzë'ë Dios, en chibucúl-lali' tu' xihui'.

¹⁵ Biti' idxí'isili' yödzülió ni, en calëga le dë yödzülió ni. Channö zoa nu nadxí'i yödzülió, bití' nadxí'i Dios Xuz. ¹⁶ Caní naca, tu' naca le tun bönachi yödzülió ni le cabí ré'ënë' Dios Xuz, pero naca le té'ëni bönachi yödzülió ni.

Tunë' le riyaza ladxi' yöl-la' bönáchisö quegaquië'.

Tunë' le ruá' dö' le ridani guió'j lógaquië'.

Tun ba zxön cuíngaquië' ni'a que le dë quegaquië'.

Caní nácgaca le ruá' dö' tunë'. ¹⁷ Huadödi que yödzülió ni, enca' que le ta'zé ladxí'gaca bönachi, pero nu run ca ré'ënë' Dios sóatica'sö.

Nu ruí'i didza' idütë li, en nu rizi' yë'

¹⁸ Xzí'ina'do', chizóaru' dza údxi, en ca na' chibiyónili' huidë' bönni' ridá'baguë'ë Cristo, lësca' na'a chigusí lo nacu'ë zían bönni' ta'dá'baguë'ë Cristo. Que lë ni na' nóziru' chizóaru' dza údxi. ¹⁹ Bila'rúajë' bönni' caní ladjaru', pero bití' guláquië' tuz len rë'u. La'tu' guláquië' tuz len rë'u, ila'cuá'lentica'së' rë'u. Na'a, bila'rúajë' para gaca bë' bití' nácgacaquië' yúgu'të' tuz len rë'u.

²⁰ Na'a, Bö' Lá'ayi nagú'u Nu naca lá'ayi rë'u, chizóalen libí'ili', ate' nöz quézili' yúgu'të.

²¹ Buzúaja' queé'li' lu guichi, tu' chinózili' le naca idütë li, en calëga tu' cabí nózili' le. Nózili' ca' bití' ca' rizi' yë' nu nözi le naca idütë li.

²² ¿Nuzxi caz na' nu rizi' yë'? ¿Naru' cabí naca nu na' ridá'baga' náquië' Jesús Nu gusól-lë'ë Dios? Naca nu ni bönni' ridá'baguë'ë Cristo, tu' ridá'baguë'ë náquië' Dios Xuzë' Jesús, en ridá'baguë'ë ca' náquië' Jesús Xzí'inë' Dios. ²³ Núti'tës nu ridá'baga' Dios Xzí'ini, bití' ca' zóalenë' Dios Xuz nu na'. Núti'tës nu rnna yálajdo' Jesús náquië' Xzí'inë' Dios, lësca' zóalenë' Dios Xuz nu na'.

²⁴ Na'a, guli'güí' lataj le biyónili' dza ni'te ugá'analentica'sö libí'ili'. Channö le biyónili' dza ni'te ugá'analentica'sö libí'ili', lësca' libí'ili' ugá'analentica'sili'-në' Dios Xzí'ini, enca' len Dios Xuz. ²⁵ Le guxzí' lu në'ë Dios naca lë ni: Gunnë' gunnë' yöl-la' na'bán idú queëru'.

²⁶ Chibuzúaja' queé'li' lu guichi lë ni ca naca quegaca nupa ta'z' ye'e libí'ili'. ²⁷ Na'a, zóalenë' Dios Bö' Lá'ayi libí'ili'. Cristo gusól-lë'ë Lë' queé'li', ate' Lë' cazë' zóalentica'së' libí'ili'. Que lë ni na' bití' riquínili' nu usedi libí'ili', tu' chizóalen Nu na' libí'ili', en rusedi libí'ili'. Didza' idütë li ru'ë Lë', en bití' rizi' yë'ë. Ca na' chinazédali', guli'sóalentica'së' Cristo.

²⁸ Na'a, xzí'ina'do', guli'sóalentica'së' Cristo para cate' uluí'i lahuë' Lë', gácaru' rugu ladxi', en bití' utuí'iru' sóaru' lahuë' Lë' cate' huödë'. ²⁹ Channö nózili' náquië' Dios tsahui', ral-la' inózili' ca' yúgu'të nupa tun le naca tsahui' nácgaca xzí'inë' Dios.

3

Nupa nácgaca xzí'inë' Dios

¹ Bulí'yú ca nadxí'ide'enë' Dios Xuz rë'u, benë' ga nazí'i laru' xzí'inë' Dios caz. Que lë ni na' bönachi yödzülió ni bití' ca' núnbë'gaca le nácaru', tu' cabí gulúnbe'e Jesús. ² Böchi' luzá'ado', na'a chinácaru' xzí'inë' Dios, en bití' naca bé'eni le ral-la' gácaru'. Nóziru' cate' uluí'i lahuë' Jesús, gácaru' ca náquië' Lë', ate' ilé'eru'-në' catëz náquië' Lë'. ³ Núti'tës nu run löza gaca ca náquië' Jesús, ruí'i ladxi' nu na' gaca dxi'a ca na' náquië' Jesús dxi'a.

⁴ Núti'tës nu run dul-la' riguitsaj xibá queë' Dios, tu' naca dul-la' le riguitsaj xibá.
⁵ Nózili' buluí'i lahuë' Jesús para bugúë' dul-la' nabága'ru', en bití' bi dul-la' runë' Lë'.
⁶ Núti'tës nu dzaga Lë' bití' run dul-la'. Núti'tës nu run dul-la' catu caz bilé'e Jesús, en bití' núnbe'e Lë'.
⁷ Zxí'ina'do', guli'gún chi'i cuinli' para cabí nu si' ye'e libí'ili'. Nu run le naca tsahui', naca tsahui' nu na' ca na' náquië' Jesús tsahui'.
⁸ Nu rúntica'sö dul-la' nequi que tu' xihui', tu' run dul-la' tu' xihui' dza ni'te. Que lë ni na' budulu'i lahuë' Zxí'inë' Dios, para usunítië' yugu' le nun tu' xihui'.

⁹ Núti'tës nu naca zxi'inë' Dios bití' rúntica'sö dul-la', tu' zóaléntica'sö le guzxi' lu në'ë Dios Xuz nu na'.
¹⁰ Caní naca bë' nupa nátagaca zxi'inë' Dios, en nupa nátagaca zxi'ini tu' xihui'. Núti'tës nu bití' run le naca tsahui', en bití' nadxi'i böchi' luzé'e bití' nequi queë' Dios.

Ral-la' idxí'iru' yugu' böchi'ru' ta'yéajlë'ë Cristo

¹¹ Lë ni naca didza' biyónili' dza ni'te, le rna: Ral-la' idxí'iru' luzá'aru' turu' ia'turu'.
¹² Bití' ral-la' gunru' ca na' benë' Caín. Gúquië' Caín que tu' xihui', ate' bëtië'-bi' bi' böché'ë. ¿Bizx que bëtië'-bi' bi' böché'ë? Bëtië'-bi' tu' gulaca le benë' Caín na' le ruá' dö', pero le benbi' bi' böché'ë, gulaca tsahui'.

¹³ Böcha'ado', bití' ubánili' channö cabí ta'lé'e bönachi yödzölió ni libí'ili' dxi'a.
¹⁴ Nóziru' chigudódiru' lu yöl-la' guti, en chidé yöl-la' na'bán idú queéru' tu' nadxi'iru' yugu' böchi'ru'. Nu bití' nadxi'i böchi' luzé'e, chinati caz nu na'.
¹⁵ Núti'tës nu bití' rilé'e dxi'a böchi' luzé'e, naca huëti bönachi nu na', ate' nózili' nu ruti bönachi bití' dë yöl-la' na'bán idú que. ¹⁶ Caní núnbe'ëru' yöl-la' nadxi'i le naca idú. Naca ca budödë' Jesús yöl-la' na'bán queë', en gútië' uláz queéru'. Lësca' caní rë'u ral-la' udódiru' yöl-la' na'bán queéru', para gácalenru' yugu' böchi'ru'.
¹⁷ Na'a, núti'tës nu dë yöl-la' tsahui' que, lë na' dë yödzölió ni, ate' rilé'e böchi' luzé'e, bi riyadzaj queë', en bití' ruhuéchi' ladxí' lë', bi unödzej queë', ¿naru' nadxi'itsö nu na' Dios? ¹⁸ Libí'ili', zxi'ina'do', ral-la' idxí'iru' luzá'aru', calëga len dídza'sö o lu yöl-la' rinnësö queéru', pero idú ladxí'ru', enca' len idútë yöl-la' run queéru' ral-la' idxí'iru' luzá'aru'.

Le runru' löza lahuë' Dios

¹⁹⁻²⁰ Channö caní nadxi'iru' yugu' böchi' luzá'aru', nóziru' néquiru' que Nu na' naca idútë li, ate' lahuë' Dios huáca cö' dxi icja ladxí'do'oru' channö ruxösa ladxí'do'oru' rë'u, tu' rácada'arë' Dios ca ladxí'do'oru', ate' Lë' nózine' yúgu'të.
²¹ Böchi' luzá'ado', channö cabí ruxösa ladxí'do'oru' rë'u, dë le runru' löza lahuë' Dios ²² tu' nóziru' gunnë' queéru' bití'tës bi inábaru' lahuë'. Caní naca, tu' runru' ca rinná bë' xibá queë', en le raza ladxë'ë Lë'.
²³ Lë ni naca xibá queë', para tséajlë'ëru'-në' Jesucristo, Zxí'inë' Dios, en idxí'iru' luzá'aru' ca na' chigunná bé'enë' rë'u.
²⁴ Zóalen Dios nu run ca rinná bë' xibá queë', ate' Dios caz zóalenë' nu na'. Caní nóziru' dzágatica'së' Lë' rë'u, tu' chigusól-lë'ë Dios Bö' Lá'ayi queéru'.

4

Le naca bë' zóalenë' Dios Bö' Lá'ayi rë'u

¹ Böchi' luzá'ado', bití' tséajlë'ëli' núti'tës bönni' rnnë' zóalenë' Dios Bö' Lá'ayi lë', pero guli'sí' bë' bönni' na', channö zóalenë' Dios Bö' Lá'ayi lë', tu' ta'dé' zían bönni' ta'zí' yë'ë yödzölió ni. Ta'nnë' tu'ë' didza' uláz queë' Dios.
² Caní gúnbe'ëli'-në' nu bönni' zóalenë' Dios Bö' Lá'ayi lë'. Nequi queë' Dios bönni' na' rnnë' yálajdo' ca bidë' Jesucristo, Nu gusól-lë'ë Dios, rnnë' guca cazë' bönachi.
³ Lësca' caní, bití' nequi queë' Dios nu bönni' bití' rnnë' yalaj lulu ca bidë' Jesucristo, rnnë' bití' guca cazë' bönachi. Bönni' ni néquinë' que nu na' ridá'baga' Cristo, bönni' na' chibiyónili' ral-la' guídë', ate' na'a chiridé' yödzölió ni.

⁴ Zxí'ina'do', néquili' queë' Dios, en chibucúl-lali' nupa na' ta'z'í' yë', tu' náparö Nu na' zóalen libí'ili' yöl-la' huáca unná' bë' ca nu na' ridá yödzölió ni. ⁵ Légaquië' nácagaquië' bönachi yödzölió. Que lë ni na' tu'ë didza' que le naca que yödzölió, ate' bönachi yödzölió ni tu'zë nágagaca légaquië'. ⁶ Néquiru' rë'u queë' Dios. Nu nunbë' Dios ruzé' nagui rë'u. Nu biti' nequi queë' Dios biti' ruzé' nagui rë'u. Caní núnbë'ëru' nu na' yu'u le Bö' ruí' didza' le naca idútë li, enca' nu na' yu'u le tu bö' rizi' yë'.

Náljalén Dios yöl-la' nadxí'i

⁷ Böchi' luzá'ado', ral-la' idxí'iru' luzá'aru', tu' náljalén Dios yöl-la' nadxí'i, ate' núti'tës nu nadxí'i luzé'e náljalén ca' Dios, en núnbe'e Dios. ⁸ Nu biti' nadxí'i luzé'e, biti' núnbe'e Dios, tu' náljalén Dios yöl-la' nadxí'i. ⁹ Caní bulu'e lahui Dios ca nadxí'inë' rë'u, gusól-lë'ë la's dui Zxí'ini cazë' yödzölió ni, para gata' yöl-la' na'bán idú queëru' ni'a queë' Lë'. ¹⁰ Caní naca bë' yöl-la' nadxí'i idú, calëga ca nadxí'iru'-në' Dios, pero ca na' Lë' bidxí'inë' rë'u, en gusól-lë'ë Zxí'ini cazë' para gútië', en caní bugúë' dul-la' nabága'ru'.

¹¹ Böchi' luzá'ado', channö caní bidxí'ide'enë' Dios rë'u, lësca' rë'u ral-la' idxí'iru' luzá'aru'. ¹² Catu caz nu bilé'e Dios, pero channö nadxí'iru' luzá'aru', Dios zóalenë' rë'u, ate' naca bë' nadxí'iru'-në' Dios idú ladxí'ru'. ¹³ Nóziru' zóalenru'-në' Dios, ate' Lë' zóalenë' rë'u, tu' guchizië' Dios Bö' Lá'ayi rë'u. ¹⁴ Netu' bilé'etu' le benë' Dios Xuz, en runtu' ba nalí que. Lë' gusól-lë'ë Zxí'ini cazë' Nu rusölá bönachi yödzölió. ¹⁵ Nu bönni' rnnë' yálajdo' náquië' Jesús Zxí'inë' Dios, Dios zóalen cazë' bönni' na', ate' lë' zóalenë' Dios.

¹⁶ Rë'u ni nóziru', en réajlë'ëru' nadxí'inë' Dios rë'u. Yöl-la' nadxí'i náljalén Dios, ate' nu bönni' nadxí'inë' luzé'ë, zóalenë' bönni' na' Dios, ate' Dios zóalenë' lë'. ¹⁷ Caní run dxin yöl-la' nadxí'i lu icja ladxí'do'oru', run ga bití'rö rádxiru' dza ichúguië' Dios quegaca bönachi ilátigaca. Ca náquië' Jesús, nácaru' ca' rë'u yödzölió ni. ¹⁸ Channö nadxí'iru'-në' Dios, biti' bi gádxiru'. Cate' nadxí'iru'-në' Dios idú ladxí'ru', runë' ga bití' rádxiru'. Nu radxi, riguí' rizáca'a. Nu na' radxi, biti' nadxí'i Dios idú ladxí'.

¹⁹ Rë'u ni nadxí'iru'-në' Dios, tu' zí'alö bidxí'i quézinë' Lë' rë'u. ²⁰ Channö nu inná: "Neda' nadxí'ida'-në' Dios", pero biti' rilé'e dxi'a böchi' luzé'e, nu ni rizi' yë'. Nu biti' nadxí'i böchi' luzé'e nu rilé'e caz, ¿nacxi caz gaca idxí'i Dios, en catu caz bilé'e Lë'? ²¹ Caní gunná bé'enë' Jesús rë'u. Gunné': Nu nadxí'i Dios, ral-la' idxí'i ca' böchi' luzé'e.

5

Ca gaca idéli'ru' lu le raca queëru' yödzölió ni

¹ Núti'tës bönni' réajlë'ë Jesús náquië' Cristo, náquië' zxí'inë' Dios, ate' núti'tës bönni' nadxí'inë' Dios Nu buzóa lë', ral-la' idxí'inë' ca' luzé'ë nu naca bi'i queë' Dios. ² Caní réquibe'ëru' nadxí'iru' yugu' bi'i queë' Dios. Naca caní channö nadxí'iru'-në' Dios, en runru' ca rinná bé'enë' rë'u. ³ Caní naca bë' nadxí'iru'-në' Dios. Naca caní channö runru' ca rinná bé'enë' rë'u, ate' lë' na' rinná bé'enë' rë'u biti' naca böniga. ⁴ Núti'tës bönni' náquië' bi'i queë' Dios ridéli'në' lu le raca yödzölió ni. Chibidéli'ru' lu le raca yödzölió tu' réajlë'ëru'-në' Dios. ⁵ ¿Nuzxi na' rideli' lu le raca yödzölió? Run caní nu réajlë' náquië' Jesús Zxí'inë' Dios.

Dios Bö' Lá'ayi runë' ba nalí queë' Cristo

⁶ Caní blë'ë Jesucristo. Bidë' bidilë' nisa, en bulaljë' xichönë'. Calégasö bidilë' nisa, pero lësca' bulaljë' xichönë'. Dios Bö' Lá'ayi náquië' Nu run ba nalí queë', tu' naca idútë li didza' ru'ë Dios Bö' Lá'ayi. ⁷ Tsonna nupa tun ba nalí queë' Jesús yehua' yubá ni', Dios Xuz, en Dios Zxí'ini, lë' ca' Didza', en Dios Bö' Lá'ayi. Yonnë' ni nácagaquië' tuz. ⁸ Lësca' caní, tsonna le tun ba nalí queë' luyú ni, ca na' zóalenë' Dios Bö' Lá'ayi Lë', en le bidilë' Jesús nisa, en rön ni' bulaljë' lë'e yaga cruz, ate' yonna ni, tuz ca ta'nná. ⁹ Channö si' lu ná'aru' le tun ba nalí bönachi, le runë' ba nalí Dios nácatëro lesaca'. Lë' na' benë' ba nalí Dios naca le benë' ba nalí queë' Jesús, gunné' náquië' Zxí'ini cazë'. ¹⁰ Nu réajlë' Zxí'inë'

Dios, nazi' lu në'e le nunë' ba nalí Dios. Nu cabí réajlë' Dios, naca ca rnna nu na': Dios rizí' yë'ë. Caní naca, tu' cabí guyéajlë' le benë' ba nalí Dios queë' Zxí'inë'. ¹¹ Lë ni naca le benë' ba nalí Dios. Gunnë' chibennë' yöl-la' na'bán idú queëru', ate' Zxí'inë' na' náquië' Nu nabániru' caní. ¹² Nu bönni' zóalenë' Zxí'inë' Dios lë', dë yöl-la' na'bán idú queë'. Nu bönni' biti' zóalenë' Zxí'inë' Dios lë', biti' dë yöl-la' na'bán idú queë'.

Ca nóziru' dë yöl-la' na'bán idú queëru'

¹³ Libí'ili' na' réajlë'ëli'-në' Zxí'inë' Dios, ruzúaja' queéli' lu guichi lë ni para inózili' chidé yöl-la' na'bán idú queéli', en para gaca idú ca réajlë'ëli'-në' Zxí'inë' Dios.

¹⁴ Lë ni naca le ruzxöni ládxi'ru' Lë'. Channö bi inábiru' Lë' ca ré'ënë' Lë', Lë' riyönnë' rë'u. ¹⁵ Channö nóziru' riyönnë' rë'u ca naca bi rinábiru' Lë', nóziru' ca' ideli' quéziru' lë na' rinábaru'.

¹⁶ Channö ilé'eru' böchi' luzá'aru' runë' dul-la' le cabí naché' yöl-la' guti, ral-la' inábaru' queë' lahuë' Dios, ate' Lë' unödzejë' yöl-la' na'bán queë'. Caní rnniá': Ral-la' inábali' quégaca nupa tun dul-la' le cabí naché' yöl-la' guti. Dë dul-la' le naché' yöl-la' guti. Biti' rnniá' inábali' que nu run dul-la' caní. ¹⁷ Yúgu'të le cabí naca tsahui' naca dul-la', pero dë dul-la' le cabí naché' yöl-la' guti. ¹⁸ Nóziru' biti' rúntica'sö dul-la' nu naca zxí'inë' Dios, tu' rapa chi'ë Zxí'ini cazë' Dios nu na', ate' tu' xihui' biti' sequi' bi gun que.

¹⁹ Nóziru' yú'uru' lu në'ë Dios, ate' yúgu'të bönachi tu'i ládxi'gaca le dë yödzölió ni yú'ugaca lu na' tu' xihui'.

²⁰ Na'a, nóziru' chibidë' Zxí'inë' Dios, en bennë' yöl-la' réajni'i queëru', para gúnbë'ëru' Nu na' naca idútë li. Zóalenru' Nu na' naca idútë li tu' zóalenru'-në' Jesucristo, Zxí'inë' Dios. Nu ni naca Dios idú, en Nu runna yöl-la' na'bán idú queëru'. ²¹ Zxí'ina'do', guli'gún chi'i cuinli' para cabí tseaj ládxi'li' yugu' budó' guió'j budó' yaga. ¡Ca' gaca!

DÍDZA'DO' BUROPI BUZÚAJĚ' JUAN

Núnbě'ëru' le naca idútě li, en yöl-la' nadxí'i

¹Neda', bönni' gula run chi'a bönachi queë' Cristo, rugapa' li' Dios, nigula rö queë' Dios, tsözxón len yúgu'tě zxí'inu'. Nadxí'ida' libí'ili' tu' núnbě'ëru' le naca idútě li, en calégasö neda', pero lësca' yúgu'tě nupa chinúnbě'gaca le naca idútě li ta'dxí'i libí'ili'. ²Nadxí'itu' libí'ili' tu' núnbě'ëru' le naca idútě li, le zóaléntica'sö rě'u. ³Rinábida'-ně' Dios Xuz, en Xanru' Jesucristo, Zxí'ini cazě' Dios, uzá' ládxe'ě queéli', en huéchi' ládxe'ě libí'ili', en guně' ga soa dxi icja ládxi'do'oli' tu' núnbě'ëli' le naca idútě li, en nadxí'ili' luzá'ali'.

⁴Budzéjade'eda' cate' biyönda' tunbi' zxí'inu' ca naca le naca idútě li, tu' tunbi' ca na' gunná bé'eně' Dios Xuz rě'u. ⁵Na'a, ráta'yua' lo', nigúlado', gunu' ca rinná bě' xibá queë' Cristo. Biti' ruzúaja' quiu' lu guichi tu xibá cubi. Ruzúaja' la' lébisö lě na' gunná bé'eně' rě'u dza ni'te. Gunně' ral-la' idxí'iru' luzá'aru'. ⁶Caní naca bě' nadxí'iru'-ně' Dios. Naca caní channö runru' ca rna le gunná bé'eně' rě'u. Lě na' gunná bé'eně' rě'u naca para idxí'iru' luzá'aru' ca na' chibiyónili' dza ni'te.

Nupa té'ëni ila'zı' ye'e rě'u

⁷Lě ni riguıxjöi'ida' libí'ili', tu' chita'dá zıán nupa ta'zı' yě' yödžölió ni, nupa na' bitı' ta'zı' lu ně'eguequi ca bidě' Jesucristo, gúquiě' idú bönachi. Nu na' run canı, naca nu rizı' yě', en nu ridá'baga' Cristo. ⁸Guli'gún chi'i cuinli' para cabı'initi le nadéli'li' tu' guzı' lu na'li' Cristo, pero guli'güı' ládxi'li' idéli'li' idútě le ral-la' s'ıli' lu ně'ě Dios.

⁹Núti'těs nu riguela' nöza yúbölä, en rucá'ana xtıdzě'ě Cristo, bitı' zóaleně' Dios nu na'. Nu dá'tica'sö xtıdzě'ě Cristo, zóaleně' Dios Xuz, enca' Zxı'ině' nu na'. ¹⁰Channö núti'těs nu za' ga zóalı', en rusedi xibá yúbölä, bitı' ulébili' nu na' lıdxili', en bitı' guiéli' le: "Guyú'u len netu'." ¹¹Nu rě le: "Guyú'u len netu'", run tsözxón nu na' ca naca le ruá' dö' run nu na'.

Runě' Juan löza idxině' ga nacu'ě böchi' luzě'ě

¹²Sal-la' le zıán ral-la' uzúaja' queéli' lu guichi, bitı' rě'ěnda' uzúaja' yúgu'tě lu guichi. Runa' löza guıda' ga zóalı', ate' güı'iru' didza' ruá'a cuinru', para gaca udzėjaru' idú ládxi'ru'.

¹³Zxı'ininu nigula zxilu', nigula rö queë' Dios, tu'gápabi' Dios li'. ¡Ca' gaca!

DÍDZA'DO' BUNNI BUZÚAJĚ' JUAN

Le naca tsahui' runě' bönni' lě' Gayo

¹ Neda', bönni' gula run chi'a bönachi queě' Cristo, rugapa' Dios li', Gayo dxi'i ladxi'. Nadxí'ida' li' tu' núnbě'ëru' le naca idútě li.

² Bócha'ado', rinábida'-ně' Dios guně' ga gaca dxi'a quiu' lu yúgu'tě le runu', en su' ca' dxi'a, ca na' raca dxi'a que bö' naca cazu'. ³ Rudzėjada' tu' ta'dxině' yugu' bóchi'ru' ga zoa', en tuně' ba nalí quiu', ta'nně' nacu' li ladxi', en runu' ca naca le naca idútě li. ⁴ Biti' bi dě le runrö ga rudzėjada' ca lě ni, riyönda' tun nupa nácagaca ca bi'i que caza' ca rnna le naca idútě li.

⁵ Bócha'ado', runu' le naca tsahui', rácalenu' bóchi'ru', en runu' ca' le nácáro lesaca', rácalenu' bóchi'ru' biti' núnbe'enu' légaquiě'. ⁶ Yugu' bóchi'ru' ni tuně' ba nalí quiu' lógaca bönachi queě' Cristo ni, ta'guíxjö'ë ca na' nadxí'inu' légaquiě'. Runu' le naca dxi'a, rugú'u légaquiě' nöza, en rácalenu' légaquiě' ca na' sa'yéaj gunu' quégaca nupa tun xichiné' Dios, para ulu'ú'ë nöza. ⁷ Légaquiě' bila'ruájě' ni tu' nadxí'igaquiě' Jesús, en biti' bi ta'zi'ë lu ná'agaca bönachi biti' ta'dá' Cristo. ⁸ Que lě ni na' ral-la' gunru' bal bönachi tun caní, para gúnlenru' légaquiě' dxin que le naca idútě li.

Le cabí naca tsahui' runě' Diótfefes

⁹ Chibuzúaja' lu guichi le uzéajni'i bönachi queě' Cristo ni', pero Diótfefes, bönni' ni' raza ládxe'ë gáquiě' lo ládjagaquiě', biti' runě' netu' bal. ¹⁰ Que lě ni na', channö huida' ga zóali', usá'a ládxi'li' cate' udúbili' ca nácagaca le runě'. Rizí' quídzě'ë netu', en rnně' queětu' le cabí nácate. Biti' rizxón ládxe'ë tsa lě nisö, pero lěsca' biti' runě' bal bóchi'ru' ta'dxině' ni', ate' ruzáguě'ë xinózguequi nupa ni' té'ëni ilún légaquiě' bal, en rubéajě' nupa na' ladaj bönachi queě' Cristo.

¹¹ Bócha'ado', biti' gunu' ca tun nupa tua' dö', pero ca tun nupa tun le naca tsahui' gunu'. Nu run le naca tsahui' nequi queě' Dios, pero nu ruá' dö' catu caz benbě' Dios.

Le naca tsahui' runě' Demetrio

¹² Yúgu'tě bóchi'ru' tuně' ba nalí queě' Demetrio, ate' naca bě' runě' le naca idútě li. Lěsca' netu' runtu' ba nalí queě', ate' nózili' nácate lě ni runtu' ba nalí queě'.

Le rinabě' Juan lahuě' Dios

¹³ Ziánrö ca' le gú'unida' uzúaja' quiu' lu guichi, pero biti' ré'ënda' uzúaja' le lu guíchisö. ¹⁴ Na'a, runa' löza ilé'eteda' li', ate' güi'iru' didza' ruá'a cuinru'.

¹⁵ Rinábida'-ně' Dios guně' ga soa dxi icja ládxi'do'o. Nupa ni ta'dxi'i rě'u tu'gapa Dios li'. Lěsca' li', bugapa Dios tu tu nupa ni' ta'dxi'i rě'u. ¡Ca' gaca!

DÍDZA'DO' BUZÚAJĚ' JUDAS

Judas rugapě' Dios nupa nulidzě' Dios

¹ Neda', Judas, tsaz naca' huen dxin queě' Jesucristo, en naca' ca' bóchě'ě Jacobo. Rugapa' Dios libí'ili', nulidzě' Dios Xuz libí'ili', en nadxí'ině' libí'ili', en rapa chi'ě libí'ili' tu' nácali' tuz len Jesucristo. ² Ré'ěnda' inózili' ca ruhuéchi'da' ládxě'ě Dios libí'ili', en nadxí'ide'eně' libí'ili', enca' ruzóadě'ě dxi icja ládxi'do'oli'.

Nupa tu'sedi le cabí nácatě

³ Libí'ili', böchi' luzá'ado', gúcada' ládxa'a uzúaja' queéli' lu guichi ca naca yöl-la' rusölá nadéli'ru', pero run bayudxi uchízia' icja nágalí' para idú ládxi'li' tíl-lalenlí' nupa ta'dá'baga' le réajlě'ěru'-ně' Dios, lě na' budödě' Dios tsaz lu ná'agaca nupa néquiguequi quez queě' para ulu'zě didza' que lógaca yúgu'tě bönachi. ⁴ Caní run bayudxi guna' tu' bagáchi'sö chigula'yázaleně' bal-lě' bönni' rě'u, Dios buzóe' quégaquiě' dza ni'te ichúguiě' quégaquiě' ila'nítiě' tsaz. Biti' ta'yéaj ládxi'gaquiě' Dios bönni' caní. Tu' zoa le ruzá' ládxě'ě Dios queéru', téquině' huáca iluně' le ruá' dö'. Ta'dá'baguě'ě Xanru' Jesucristo. Tuzě' Lě' rinná bé'eně' rě'u.

⁵ Chinóz quézili' lě ni, pero ré'ěnda' usá'a ládxi'li' ca beně' Xanru' Dios. Sal-la' busölě' bönachi Israel cate' bubéajě' léguequi luyú Egipto, gudödi ni' busunítiě' nupa bítsa'gaca ládjaguequi, en bití' gula'yéajlě' Lě'. ⁶ Lěsca' caní, yugu' gubáz lá'ayi queě' Dios, nupa ni' bití' gulún xichíngaquiě', pero bulu'cá'aně' xilátjagaquiě', Dios busayjě' légaquiě' tu lataj chul-la. Nága'gaquiě' tsaz ni' ga idxinrö dza usiúdxě' Dios yödzölió ni. ⁷ Lěsca' caní guca quégaca yödzö Sodoma, en yödzö Gomorra, enca' yugu' yödzö dzágagaca léguequi. Ca na' guluně' gubáz lá'ayi na', gula'dá'baguě'ě Dios, lěsca' caní guluně' bönni' yugu' lu yödzö na'. Bulu'dödi cúngaquiě' para guluně' le ruá' dö', en le gula'zėsö ládxi'gaquiě' le tun ga nu rutuí'i. Na'a, tu' busaca' zí'ě Dios légaquiě' lu guí' le cabirö ulu, lě na' guca quégaquiě' naca tu le run gadxi yúgu'těru', para cabí gunru' la' lěbisö.

⁸ Sal-la' gulaca lě ni, la' canísö tuně' bönni' ni, bönni' röjácaleně' yěla ta'néně'. Tun dítjaně' idútě le naca cazě'. Ta'dá'baguě'ě le rinná bé'eně' Dios rě'u, en ta'nně' zí'ě quégaca nupa ta'nná bě' yehua' yubá. ⁹ Miguel caz, gubáz lá'ayi lo, cate' gudíl-laleně' tu' xihui' para gaca u'ě idú le naca cazě' Moisés, bití' burúguině' udxíě' dö' tu' xihui' na', pero gudxě' le: "Xanru' uzeně' li' bach." ¹⁰ Yugu' bönni' ni ta'nně' zí'ě quégaca le runě' Dios, yugu' le bití' ta'yéajni'ině', ate' yugu' le ta'yéajni'ině' rácasö quégaquiě' ca na' tunba'böa' guixi' bití' ta'yéajni'iba', lě ni tu'guně' dxin, en caní tu'dxía dö' cúngaquiě'.

¹¹ Bica' bayechi' légaquiě' tu' chiguluně' dul-la' ca na' beně' Caín, ate' lu yöl-la' ruhuidi' quégaquiě' chigula'chixi gula'níguině' ca na' guchixi guníguině' Balaam para si'ě dumí, ate' chinarugu quégaquiě' ilátiě' ca na' gútiě' Coré cate' gudá'baguie' Moisés. ¹² Yugu' bönni' ni táguleně' tsözxón libí'ili' cate' ráguli' yugu' güi' huagu lu yöl-la' nadxí'i queéli'. Tuně' ga ta'chixi ta'nigui nupa dzágagaca libí'ili', tu' tē'aj tagu lizě'. Nácagaquiě' ca yugu' bönni' ral-la' ulu'gágugaquiě'-ba' bö'cu' zxila', pero la' cúngacasě' tu'gahuě'. Nácagaquiě' ca böaj lúzxiba bití' naché'gaca nisa, ate' ruá' bö' léguequi ná'alö ní'ilö. Nácagaquiě' ca' ca yugu' yaga chibidxín dza bi ila'bía, pero bití' bi ta'bía. Nácagaquiě' ca' ca yugu' yaga chigula'bidxi idú luí, en chinaládzu'gaca. ¹³ Nácagaquiě' ca' ca nísado' cate' riyasa ridxía, ate' ribó' bidxina' que, lě na' ruluí'i ca naca yöl-la' stu' tuně'. Nácagaquiě' ca yugu' bölj lúzxiba nucá'anagacaba' xinózgacaba'. Dios chinuně' quégaquiě' ila'yáziě' tsaz lataj chul-la.

¹⁴ Ca naca quégaquiě' bě'ě ca' didza' Enoc uláz queě' Dios. Enoc na' gúquiě' tu bönni' gubábaleně' le igadxi cö' xzí'ini xi'sóe' Adán. Gunně': "Buli'yútsöca', zě'ě Xanru', ate'

dzágagaca Lë' zían gayuá' bönachi néquiquequi quez queë'. ¹⁵ Zë'ë para gunë' xíguia' yúgu'të bönachi, en ichúguië' quégaca yúgu'të nupa tua' dö' ila'niti tsaz." Caní gunë' tu' nözi yúgu'të didza' zi' gula'nné' bönni' dul-la' na' queë' Lë'. ¹⁶ Yugu' bönni' caní ta'nné' queë', en ta'zi' quídzë'ë, en tunë' ca naca le ta'zësö ládxi'gaquië'. Tu'ë didza' lu yöl-la' run ba zxön cuíngaquië', en para ulu'zi'ë xibéquequi, tu'ë didza' le ta'gú'u bönachi yöl-la' zxön.

Judas rusé'ë ládxi'gaca nupa ta'yéajlë' Cristo

¹⁷ Na'a, böchi' luzá'ado', guli'tsöjné yugu' didza' gulu'ë bönni' gubáz queë' Xanru' Jesucristo dza ni'te. ¹⁸ Yugu' bönni' na' gulé' libí'ili': "Yugu' dza tsöjsétëgaca ulu'luí'i lógaquië' bönni' ulu'titjë' le naca lá'ayi, en ilunë' ca naca le ta'zësö ládxi'gaquië' le ruá' dö'." ¹⁹ Yugu' bönni' ni tunë' ga irúajli' choplö. Tu'ë didza' lu yöl-la' bönáchisö quégaquië', en bití' zóalenë' Dios Bö' Lá'ayi légaquië'.

²⁰ Na'a, böchi' luzá'ado', guli'sóa tsutsu lu yöl-la' réajlë' queéli' Dios le naca idú lá'ayi. Buli'lidzë' Dios, ugunli' dxin yöl-la' huáca queë' Dios Bö' Lá'ayi. ²¹ Buli'gá'analenë' Dios, Nu nadxí'i rë'u, en guli'cöza dza ni' ulu'í' lahuë' Xanru' Jesucristo, Nu ruhuéchi' ládxi'ë rë'u para gata' yöl-la' na'bán idú queéru'.

²² Guli'gún ga ila'dipa ládxi'gaca nupa raca chopá ládxi'gaca. ²³ Guli'gún ga ulu'lé', le gaca tsca ubéajli' légaquië' lu guí'. Lu yöl-la' radxi queéli' buli'huéchi' ládxi'li' ia'zica'rö bönachi. Guli'gún chi'i cuinli', para cabí gunli' tsözxön légaquië', en cabí gútsa'li' le ruá' dö' tunë'.

Le rigú'uru' Dios yöl-la' zxön

²⁴⁻²⁵ Dios la's dui, Nu nözi caz yúgu'të, en Nu busölá rë'u ni'a que le benë' Xanru' Jesucristo, napë' yöl-la' huáca gun chi'ë libí'ili', para cabí ichixi iníguili', en usudxinë' libí'ili' lahuë' Lë' ga zoë' lu bení' idú. Gunë' ga gácali' idú tsahui', en ga udzëjade'eli'. ¡Gaca caz queë' Dios yöl-la' ba, en yöl-la' zxön, en yöl-la' naca lo, en yöl-la' unná bë', na'a dza, en yúgu'të dza zá'gaca! ¡Ca' gaca!

LE BULUÍ'INĒ' DIOS JUAN Apocalipsis

Le bulu'e lahui Dios ca naca queë' Jesucristo

¹ Lë ni naca le bulu'e lahui Jesucristo, le bë'ë Lë' lataj Dios ulu'ine' yugu' huen dxin queë' ca naca le run bayudxi ilácatë. Jesucristo gusól-lë'ë tuë' gubáz lá'ayi queë', nu na' buzéajni'i neda', Juan, huen dxin queë' Cristo. Gubáz lá'ayi na' bulu'ine' neda' ca naca lë ni. ² Neda', Juan, ruzúaja' lu guichi ni le naca idútë li ca naca yúgu'të le bilé'eda', en runa' ba nalí que xtídzë'ë Dios, en que le benë' ba nalí Jesucristo.

³ Bica' ba nu ulaba didza' ni, ate' bica' bágaca nupa ulu'zé nágagaca nu na' ulaba xtídzë'ë Dios ni, en ilún ca rnna lë ni nazúaj lu guichi, tu' chizóa gaca.

Juan ruzúajë' le uzéajni'i gadxi cö' bönachi queë' Cristo

⁴ Neda', Juan, ruzúaja' lu guichi didza' ni le uzéajni'i gadxi cö' bönachi queë' Cristo nacua' luyú Asia. Dios, Bönni' zoa cazë', en guzóatica'së', en ral-la' huödë', rinábida'-në' uzá' ladxë'ë queéli', en gunë' ga cö'ö dxi icja ladxí'do'oli', ate' dzágagaca gadxi bö' Lë' nacua' lahuë' Lë' ga ni' rö'ë rinná bë'ë. ⁵ Dzáguië' ca' Jesucristo Lë'. Jesús ni runë' ca rnnë', en runë' ba nalí queë' Dios. Zí'alö Lë' bubanë' tsaz lu yöl-la' guti, en rinná bé'enë' bönni' ta'nná bë'ë yödzölió ni. Lë' nadxí'ine' rë'u, en gudibë' rë'u, tu' bugúë' dul-la' nabága'ru' len xichönë' le bulaljë' lë'e yaga cruz, cate' gútië' uláz queëru'. ⁶ Jesucristo benë' ga rinná bé'ëru', en ga nácaru' yugu' bixúz, para cú'uru'-në' Dios, Xuzë' Jesús, yöl-la' ba. ¡Yöl-la' ba Lë', en gácatica'sö queë' yöl-la' unná bë'! ¡Ca' gaca!

⁷ ¡Buli'yútsöca'! ¡Zë'ë Cristo lu böaj lúzxiba! ¡Ila'lé'e Lë' yúgu'të bönachi, enca' nupa ni' gulún Lë' huë', en bétigaca Lë'! ¡Ila'bödxí yechi' yúgu'të bönachi yödzölió ni cate' ila'lé'e Lë'! ¡La'tu' gácatë caní! ¡Ca' gaca!

⁸ Caní rnnë' Lë': "Neda' naca' Bönni' zoë' zí'alö, enca' Bönni' röjsétië' ca naca le risí lo, en le ruúdxitë." Caní rnnë' Xanru', Bönni' napa cazë' yöl-la' huáca. ¡Zoa cazë' Lë', en guzóatica'së', en si' ulé'ë!

Rilé'enë' Juan yöl-la' zxön queë' Jesucristo

⁹ Neda', Juan, naca' böchi' luzá'ali', en tsözxón riguí' rizáca'léna' libí'ili', en tsözxón len libí'ili' ruzi'a xibé le rinná bë'ë Dios, en nadéli'da' yöl-la' riböza zxön ladxí' na' rnnë' Jesucristo queëru'. Nadzuna' tu luyú bidxi ni gatsaj láchui'lö nísado', nazí' le Patmos. Nadzuna' tu' bena' libán que xtídzë'ë Dios, en tu' bena' ba nalí queë' Jesucristo. ¹⁰ Lu dza lá'ayi queë' Xanru', guzóalenë' Dios Bö' Lá'ayi neda', ate' biyönda' cúdzu'la' chi'ë tu bönni' rulidzë' zidzaj. Biyón chi'ë ca ribödxí lúzuba' böa' bëdxí. ¹¹ Bönni' ni gudxë' neda': "Neda' naca' Bönni' zoë' zí'alö, en Bönni' röjsétië' ca naca le risí lo, en le ruúdxitë. Buzúaj lu guichi le riyönnu', en rilé'enu', ate' gusól-la' le quéguequi gadxi cö' bönachi quia' nacua' luyú Asia, nupa nacua':

Lu yödzö Éfeso,
lu yödzö Esmirna,
lu yödzö Pérgamo,
lu yödzö Tiatira,
lu yödzö Sardis,
lu yödzö Filadelfia,
lu yödzö Laodicea."

¹² Buécja' para ilé'eda' Bönni' na' rulidzë' neda'. Cate' buécja', bilé'eda' gadxi le nuá'gaca guí' le néquiguequini oro. ¹³ Ladaj gadxi le nuá'gaca guí' na' bilé'eda' tu Bönni'

riné'ë ca tu bönni'. Nacuë' tu lari' tunna le ridxín xini'ë, en luchu'ë nasie' tu le néquini oro. ¹⁴ Chiguíchido' os naca guitsa' icjé' ca naca zxila' o ca riná' bögui', ate' rëpi yösa bení' guió'j lahué' ca guí'. ¹⁵ Rëpi yösa bení' ni'ë ca guié bronze dxí'ido', le nudzé'eda' lu guí' ca bo' yalaj. Zidzaj biyón chi'ë ca riyón tu yegu zxön. ¹⁶ Lu në'ë ibëla zxóagacaba' gadxi bö'ljaj bení', ate' rirúaj didza' ru'ë le naca ca tu guié tuchi' natuchi' iropa la'a. Rëpi yösa bení' lahué' ca gubidza cate' rudzá'a.

¹⁷ Cate' bilé'eda' Lë' gudzö'a xini'ë ca tu bönni' nati. Ní'irö Lë' guxóa në'ë neda' len në'ë ibëla, en gudxé' neda': "Biti' gádxinu'. Neda' naca' Bönni' zoé' zí'alö, en röjsétié'. ¹⁸ Naca' Nu nabán caz. Gútiá', ate' na'a zóatíca'sa' nabana'. Dë lu na'a inná bé'eda' yöl-la' guti, en lataj ga nacuá' nupa nátigaca. ¹⁹ Buzúaj lu guichi lë na' chibilé'enu', en le raca na'a, enca' le ral-la' gaca tödi na'a. ²⁰ Lë ni naca le nagachi' ca naca quégacaba' gadxi bö'ljaj bení' na' bilé'enu' zxóagacaba' lu na'a ibëla, en ca naca gadxi le nuá'gaca guí' le néquiquequini oro. Gadxi bö'ljaj bení' na' sa'yéajgacaba' gadxi gubáz quégaca gadxi cö' bönachi quia', ate' gadxi le nuá'gaca guí' na' sa'yéajgaca gadxi cö' bönachi quia' na'."

2

Didza' gusól-lë'ë yödzö Éfeso

¹ Gunné' ca' Bönni' na': "Buzúaj lu guichi didza' ni isól-lu'u queé' gubáz quia' zóalené' bönachi quia' lu yödzö Éfeso. Caní uzúaju' lu guichi: Ru'ë didza' Bönni' na' zxóagacaba' gadxi bö'ljaj bení' lu në'ë ibëla, en ridé' gatsaj láhui'lö gadxi le nuá'gaca guí' na' néquiquequini oro. ² Caní rnníá': Neda' nöz quézida' yugu' le runlí', en ca rúnda'ali' dxin. Nözda' ribózali' zxön ladxi', en biti' gaca guá' ilenli' nupa tua' dö'. Nözda' chiguzxí' bé'ëli' nupa ta'nná nácagaca gubáz quia' pero biti' ca' nácagaca, ate' na'a nózili' ta'z'í yé'. ³ Ribózali' zxön ladxi', en chigudí' guzxacá'li' tu' dá'ali' neda', pero biti' gucuidi' ládxi'li'. ⁴ Na'a, dë tu le ruzegui libí'ili' didza': Bítí'rö nadxí'ili' neda' ca na' bidxí'ili' neda' zí'alö. ⁵ Que lë ni na', guli'tsöjné ca na' benlí' zí'alö, lë na' busanlí', ate' na'a, buli'bí'li' ládxi'li', en guli'gún ca na' benlí' zí'alö. Channö cabí ubí'li' ládxi'li', guídatia' queé'li', ate' ugúa' le nuá' guí' queé'li' xilataj. ⁶ Na'a, zoa tu le rácalen libí'ili'. Biti' rilé'eli' dxi'a le tuné' bönni' nicolaíta, nupa na' ta'yéaj ládxi'gaca budó' guió'j budó' yaga, en tun le ruá' dö', lë na' lësca' biti' rilé'eda' dxi'a. ⁷ Nu riyöni ral-la' uzé' nagui lë ni rnné' Dios Bö' Lá'ayi, ru'ílené' yugu' cö' bönachi quia' neda', Cristo, didza', rnné': Nupa ila'deli' lu le raca yödzölió, guna' ga ilágugaca le ribía yaga da' gatsaj láhui'lö luyú lachi queé' Dios, le gun ga ila'cuá'tica'sö nabán."

Didza' gusól-lë'ë yödzö Esmirna

⁸ Gunné' ca': "Lësca' caní, buzúaj lu guichi didza' ni isól-lu'u queé' gubáz quia' zóalené' bönachi quia' lu yödzö Esmirna. Caní uzúaju' lu guichi: Ru'ë didza' Bönni' na' zoé' zí'alö, en náquié' ca' Nu röjsete, Bönni' na' gútié', en bubané' tsaz. ⁹ Caní rnníá': Neda' nöz quézida' le runlí', en ca riguí' rizáca'li'. Nözda' nácali' yechi', pero le nácate' rilé'eli' yöl-la' tsahui' le naca idú. Nözda' ca' ca ta'nné' queé'li' nupa ni' ta'nná nácagaca bönachi judío, pero biti' ca' nácagaca caní. Nupa ni ta'dá' Satanás, tu' xihui'. ¹⁰ Biti' ca' gádxili' le ral-la' quí'í sáca'li'. Tu' xihui' na' gun ga idzunli' bál-lali' libí'ili' lidxi' guié. Caní si' bé' libí'ili', ate' quí'í sáca'li' idú ca chi dza. Guli'tséajlé' neda' ga idxinté' dza gátili', ate' neda' gunna' yöl-la' na'bán idú queé'li'. ¹¹ Nu riyöni ral-la' uzé' nagui lë ni rnné' Dios Bö' Lá'ayi, ru'ílené' didza' yugu' cö' bönachi quia' neda', Cristo, rnné': Nupa ila'deli' lu le raca yödzölió, biti' bi gun yöl-la' guti' quéguequi, lë na' gaca le buropi luzuí quégaca nupa ila'cuá'tica'sö lu guí' gabila."

Didza' gusól-lë'ë yödzö Pérgamo

¹² Gunné' ca': "Lësca' caní buzúaj lu guichi didza' ni isól-lu'u queé' gubáz quia' zóalené' bönachi quia' lu yödzö Pérgamo. Caní uzúaju' lu guichi: Ru'ë didza' Bönni' na' nu'ë guié

tuchi' na' natuchi' iropa la'a. ¹³ Neda' nöz quézida' le runli'. Nözda' ca' zóali' ga ni' rinná bé' Satanás, tu' xihui', pero ni ruzxöni ládxi'li' neda'. Biti' ca' nusanli' ca réajlé'éli' neda'. Biti' busanli' le yugu' dza ni' cate' gulútié' Antipas, bönni' ni' béntica'sé' ba nalí quia', en gútié' ga ni' zoa Satanás, tu' xihui'. ¹⁴ Na'a, dé tu chopa le tu'zegui libí'ili' didza': Nacuá'len libí'ili' bal-la bönachi lu yödzö Pérgamo, nazí' lu né'eguequi xibá queé' Balaam, bönni' ni' busédiné' Balac bené' ga gula'chixi gula'nigui bönachi Israel, ate' gulahué'-ba' yugu' böa' bédxido' gulútigaquié'-ba' lógaca budó' guiój budó' yaga, en guluné' le ruá' dö'. ¹⁵ Lésca' caní nacuá'len libí'ili' nupa ni' nazí' lu né'eguequi xibá quégaca bönachi nicolaíta, lé na' bití' rilé'eda' neda' dxi'a. ¹⁶ Que lé ni na', buli'bí'i ládxi'li' na'a. Channö cabí ubí'i ládxi'li', guídatea' ga zóali', en tíl-lalena' légaquié' len didza' rirúaj ruá'a, le naca ca tu guié tuchi'. ¹⁷ Nu riyöni ral-la' uzé nagui lé ni rnné' Dios Bö' Lá'ayi, ruí'ilené' yugu' cö' bönachi quia' neda', Cristo, didza', rnné': Nupa ila'deli' lu le raca yödzölió, guna' ga ilágugaca yöta maná nagachi'. Unödzja' ca' tu guiój chiguíchido' quégaquié', ate' lu guiój na' nazúaj tu la cubi, cunttu nu nunbé' le, pero núpaso na' ila'zí' le, ilúnbé'e la na'."

Didza' gusól-lé'ë yödzö Tiatira

¹⁸ Gunné' ca': "Lésca' caní, buzúaj lu guichi didza' ni isól-lu'u queé' gubáz quia' zóalené' bönachi quia' lu yödzö Tiatira. Caní uzúaju' lu guichi: Ru'ë didza' Zxí'iné' Dios, Bönni' na' dxía guiój lahué' nácagaca ca guí', ate' ni'ë nácagaca ca guié bronze dxí'ido'. ¹⁹ Caní rnné': Neda' nöz quézida' le runli'. Nözda' ca nadxí'ili' neda', en ca réajlé'éli' neda'. Nözda' ca' ca runli' xichina' lu yöl-la' riböza zxön ladxí' queéli'. Nözda' nácarö idú ca runli' yugu' lé ni ca benli' zí'alö. ²⁰ Nacuá' tu chopa le tu'zegui libí'ili' didza': Ruí'ili'-nu lataj nigula na' lënu Jezabel, rnnanu ruí'inu didza' uláz queé' Dios, ate' ni'a que le rusédinu rizí' yé'enu bönni' tuné' xichina'. Rusédinu légaquié' le run ga tuné' le ruá' dö', en tahué'-ba' böa' bédxido' ta'gu'ë légacaba' lógaca budó' guiój budó' yaga. ²¹ Neda' bé'a-nu lataj ubí'i ládxi'nu, pero bití' ré'ëninu ucá'ananu le ruá' dö' na' runnu. ²² Que lé ni na' chú'una'-nu tu le gáti'nu ga na' quí'i sáca'nu lu xihué'ënu tsözxón len nupa gulún tsözxón len lënu le ruá' dö'. Caní guna' na'a channö cabí ulu'bí'i ládxi'guequi para cabirö ilún dul-la' na'. ²³ Guna' ga ilátibi' zxi'ininu. Caní gaca, iléquibe'e yúgu'té cö' bönachi quia' ruyúa' le ta'bequi ícjaguequi, en le ta'zá' ládxi'gaca bönachi, ate' ubi'a queéli' tsa naca le runli'. ²⁴ Ia'zíca'li' zóali' yödzö Tiatira, núlöli' bití' nazí' lu ná'ali' lé na' rusédinu, en bití' nazédali' lé na' ta'nná bönachi ni' naca le nayéajni'i idú, pero le nácaté naca xtídza' Satanás, tu' xihui', rea' libí'ili': Bití' usubága'a libí'ili' ia'tú le ral-la' gunli'. ²⁵ Na'a, lé na' chinazí' lu ná'ali', guli'gún chí'i ga idxinté dza huöda'. ²⁶ Bönni' ni' ila'déli'né' lu le raca yödzölió, en iluné' ca ré'ënda' neda' ga údxité, neda' guna' ga ila'nná bé'ené' bönachi idúté yödzölió. ²⁷ Ca na' budödé' Xuza' Dios yöl-la' unná bé' lu na'a, neda' ca' guna' ga ila'nná bé'ené' yugu' yödzö, ate' gata' lu ná'agaquié' tu xiyaga guié, ate' ulu'zuxzjé' bönachi na' ca nu ruzxuzxaj zxiga' yó'öna néquini yu. ²⁸ Gu'a ca' le naca ca bölj hui sila quégaquié'. ²⁹ Nu riyöni ral-la' uzé nagui lé ni rnné' Dios Bö' Lá'ayi, ruí'ilené' yugu' cö' bönachi quia' neda', Cristo, didza'."

3

Didza' gusól-lé'ë yödzö Sardis

¹ Gunné' ca': "Lésca' caní buzúaj lu guichi didza' ni isól-lu'u queé' gubáz quia' zóalené' bönachi quia' lu yödzö Sardis. Caní uzúaju' lu guichi: Ru'ë didza' Bönni' na' nacuá'len Lë' gadxi bö' na', ate' zxóagacaba' gadxi bölj bení' lu né'ë ibéla, rnné': Neda' nöz quézida' le ruá' dö' runli', en nözda' chinati cázali' sal-la' téquiguequi bönachi zóali' nabanli'. ² Buli'subán ládxi'li'. Guli'gún tsutsu le nacuá'len libí'ili', le chizóa ilátigaca, tu' réquibe'eda' le runli' bití' naca idú tsahui' lahué' Dios. ³ Guli'tsöjné' na'a xibá na' biyónili' le guzxi' lu ná'ali'. Guli'gún ca rnna xtídzé'ë Dios, en buli'bí'i ládxi'li'. Channö cabí usubán ládxi'li', guída' ga zóali' tsárido'os ca na' ridxiné' tsárido'os gubán, en bití'

inózili' bizxi dza na' guída' ga zóali'. ⁴ Nacuá'len bal-la bönachi libí'ili' lu yödzo Sardis, nupa biti' nácagaca xihui'. Ila'dalen nupa ni neda', nácugaca lari' chiguí'chido'os le rulu'i nuhuóacagaca idú tsahui', en nácagaca lesaca' gaca caní queguequi. ⁵ Nupa ila'deli' lu le raca yödzo'lió ugá'cua' lé'guequi lari' chiguí'chido'os, en biti' usú'lua' láguequi chinazú'ajgaca lu guichi ga nazú'ajgaca lágaca nupa nadéli'gaca yöl-la' na'bán idú. Si' lu na'a nupa ni lahué' Xuza' Dios, enca' lógaquié' gubáz lá'ayi queé'. ⁶ Nu riyöni ral-la' uzé' nagui lé ni rnné' Dios Bö' Lá'ayi, ru'í'ilené' yugu' cö' bönachi quia' neda', Cristo, didza'."

Didza' gusól-lé'ë yödzo Filadelfia

⁷ Gunné' ca': "Lésca' caní buzú'aj lu guichi didza' ni isól-lu'u queé' gubáz quia' zóalené' bönachi quia' lu yödzo Filadelfia. Caní uzú'aju' lu guichi: Ru'ë didza' Bönni' na' náquié' lá'ayi, en ru'ë didza' idúté li, en dë lu në'ë xí'ini gufé queé' David, bönni' gunná bë'ë. Bönni' na' ru'ë didza' risálajé' ga nu riyaza, ate' cuntú nu gaca usayaj le, en rusayjé' ga nu riyaza, ate' cuntú nu gaca isalaj le. ⁸ Bönni' ni rnné': Neda' nöz quézida' le runli'. Nözda' ná'pali' lá'ti do'os yöl-la' huá'ca, pero runli' ca' rnna xtídza'a, en biti' rutuí'ili' rnnali' néquili' quia'. Que lé ni na' nuzó'a' loli' tu ga nu tsaz le nayalaj, ate' cuntú nu gaca usayaj le. ⁹ Buli'yútsöca', ta'dé' bönni' ni' Satanás, tu' xihui', en ta'z'í' yé'ë, ta'nné' nácagaquié' bönachi judío ta'yé'aj ládxi'gaca Dios, pero biti' nácagaquié' caní, guna' ga ila'dxiné' loli', en ulu'zachu xzí'bagaquié' xini'ali'. Ní'irö ilé'quibe'ené' nadxí'ida' libí'ili'. ¹⁰ Tu' benli' ca' rnna xtídza'a, en guló'zali' zxön ladxí', gun chi'a libí'ili' dza na' ila'gu'í' ila'zaca' yúgu'té bönachi lu yödzo'lió ni, lé na' gaca para si' bë' lé'guequi. ¹¹ ¡Si' guída'! Que lé ni na' guli'gún chi'i le ná'pali', para cabí gaca nu gun ga cabí sí'ili' lé na' ral-la' gunna' queé'li'. ¹² Núlöli' ni' idéla'li' lu le raca yödzo'lió, neda' guna' ga gácali' tsutsu ca nácagaca ya'zxón, ate' sóali' yudo' ga na' zoé' Dios, en catu caz irú'ajli' ni'. Udá'a libí'ili' ca' lé' Dios quia', enca' ca lé yödzo queé' Dios le naca Jerusalén cubi, le huótaj irú'aj yehua' yubá lu në'ë Dios. Lésca' udá'a libí'ili' La' cubi. ¹³ Nu riyöni ral-la' uzé' nagui lé ni rnné' Dios Bö' Lá'ayi, ru'í'ilené' yugu' cö' bönachi quia' neda', Cristo, didza'."

Didza' gusól-lé'ë yödzo Laodicea

¹⁴ Gunné' ca': "Lésca' caní buzú'aj lu guichi didza' ni isól-lu'u queé' gubáz quia' zóalené' bönachi quia' lu yödzo Laodicea. Caní uzú'aju' lu guichi: Ru'ë didza' Bönni' na' zoé' tsaz, Bönni' runé' ca' rnné', en ru'ë didza' idúté li ca' runé' ba nali', en náquié' ca' Bönni' na' gulén lu në'ë yúgu'té le bené' Dios. ¹⁵ Caní rnné': Neda' nöz quézida' le runli'. Ca' runli' naca ca nisa biti' naca ziaga, tu' cabí rucá'anali' tsaz neda', en biti' naca ca nisa zögui', tu' cabí dá'ali' neda' idú ládxi'li'. Dxí'arö gaca la' gácali' ca' nisa ziaga o ca' nisa zögui'. ¹⁶ Na'a, tu' nácali' ca' nisa nati yúlasö, en biti' nácali' ca' nisa ziaga, en biti' nácali' ca' nisa zögui', chú'una' libí'ili' ca' run nu ruhué'bi nisa nati yula na'. ¹⁷ Libí'ili' rnnali' rilé'eli' yöl-la' tsahui' queé'li', en raca dxi'a queé'li', en biti' bi riyadzaj queé'li', pero biti' réquibe'eli' le nácali'. ¡Bayechi' nácali'! ¡Nácali' xizí'! ¡Nácali' yechi', en lo chul-la, en ridali' xiguí'disö! ¹⁸ Que lé ni na', neda' ruzé'ajni'ida' libí'ili' gá'uli' le naca ca oro lu na'a neda' le nuna' dxi'a lu guí', para gata' yöl-la' tsahui' idú queé'li'. Ral-la' gá'uli' ca' lari' chiguichi quia' le gáculi' para igachi' yöl-la' xiguí'didö queé'li' le run ga nu rutuí'i. Ral-la' gá'uli' ca' quia' le gun ga ulu'huó'aca guí'oj loli' para gaca ilé'eli' le naca quia'. ¹⁹ Neda' ruzeda' bach, en run zí'a yúgu'té nupa nadxí'ida' channö cabí tun le naca dxi'a. Que lé ni na', buli'bí'i ládxi'li', en guli'gún xichina' idú ládxi'li'. ²⁰ Buli'yútsöca', neda' caz zuína' ga nu riyaza, en rulidza'. Channö nútí'tés nu yöni chi'a, en isalaj quia', tsázia', en gágulena' nu na', ate' nu na' gágulen neda'. ²¹ Núlöli' idé'li' lu le raca yödzo'lió, neda' guna' ga có'öli' tsözxón len neda' ga na' rö'a rinná bë'a, ca na' bené' ca' Xuza' quia' neda'. Bidéli'da' neda' lu le guca quia', ate' guró'lana' Xuza' tsözxón ga na' rö'ë rinná bë'ë. ²² Nu riyöni, ral-la' uzé' nagui lé ni rnné' Dios Bö' Lá'ayi, ru'í'ilené' didza' yugu' cö' bönachi quia' neda', Cristo."

4

Yöl-la' ba ta'gu'ë Dios yehua' yubá

¹ Gudödi gulaca yugu' lë ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chi'ë bönni' na' biyönda' zí'alö, ate' bulidza zidzaj ca ribödxi lúzuba' böa' bédxi. Chi'i ni bulidza neda', gunná: "Gudá xitsá'alö ni, ate' neda' uluí'ida' li' le run bayudxi ilaca tödi ni."

² La' ní'isö guzóalenë' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'ö rinná bë', en bilé'eda' ca' Nu na' rö'ö lataj na'. ³ Rëpi yösa bení' Nu na' rö'ö lataj na', ca na' rëpi yösa bení' guió'j jaspe, en guió'j cornalina, yugu' guió'j nazáca'da'. Idú gásibi'ilö lataj na' zoa biguita' le naca lachi ca naca guió'j esmeralda, le ré'pida' yösa bení'. ⁴ Idú gásibi'ilö lataj na' nacua' ca' ia'tapa uruá' lataj gapa ta'bó' nupa ta'nná bë', ate' yugu' lataj na' ró'ögaquië' tapa uru'ë bönni' gula, nácugaquië' lari' chiguí'chido'os, en dxíagaca ícjagaquië' le néquiguequini oro. ⁵ Ta'rúaj yösa, en guziú' rinné lu lataj lo ga ni' rö'ö Nu na', ate' bö zxön ru'u. Lahui' lo lataj na' tu'zeni' gadxi le ta'gú'u bení', le nácagaca gadxi bö' dzágagaca Dios. ⁶ Ca dó'dilö lahui lataj ni dë tu ca naca tu nísado' le rëpi yösa bení' ca guió'j jara.

Nacuá' tapa nupa nabángaca cuiti lataj na', tsölá'a huéaj, ate' zían guió'j lógaca dxíagaca zaca' cúdzi'löguequi, en láhuilöguequi. ⁷ Tu nu nutsa' ladaj tapa ni nalá' ca nácaba' bédxi guixi'. Nu na' buropi nalá' ca nácaba' bédxi, ate' nu na' bunni nalá' lahui ca naca lo bönni', ate' nu budapi nalá' ca nácaba' bisiá' ruzuba'. ⁸ Idápatë nupa ni, nacua' xopa xíligaca que queëguequi, ate' idá'alöguequi, en lé'elöguequi xíliguequi dxíada' gaca zían guió'j löguequi. Rëla, en te ža biti' ta'cuá' dxisö, ta'nná:

¡Lá'ayi! ¡Lá'ayi! ¡Lá'ayi náquië' Xanru' Dios!

¡Napa cazë' yöl-la' huáca!

¡Guzóa cazë' Lë', en zoa cazë', en chizóa ulé'!

⁹ Nupa na' nabángaca ta'gú'u yöl-la' ba Nu na' rö'ö rinná bë', en zóatica'sö nabán. Tun bal Nu na', en të Nu na': "Xclenu'." Bátati'tës tun idapa na' caní, ¹⁰ tu'tsaga lógaca tapa uru'ë bönni' gula na' lu yu lahui' lo Nu na', en ta'yéaj ládxi'gaca Nu na' zóatica'sö, en tu'cu'ë le néquiguequini oro dxía ícjagaquië' lahui' lo lataj ga ni' rö'ö rinná bë' Nu na', ta'nné':

¹¹ ¡Xantu' Dios, nacu' lesaca'

cú'utu' Li' yöl-la' ba, en guntu' Li' bal,

en gata' quiu' yöl-la' unná bë' tu' benu' yúgu'të le dë!

¡Ca ré'ëni quézinu' nacua', en gula'sí lo nacua'!

5

Tu guichi, en Bönni' náquië' Bö'cu' Zxíla'do'

¹ Ní'irö bilé'eda' tu guichi lu na' ibëla Nu na' rö'ö lataj lo. Guichi na' naca tu guichi nudubi, en dá'gaca didza' lé'elö, en láhuilö. Naguela' guichi na' gadxi le nusáyajgaca le.

² Bilé'eda'-në' tuë' gubáz lá'ayi lo, ate' bë'ë zidzaj didza', gunné': "¿Nuzxi naca lesaca' uladzu' le naguéla'gaca guichi ni, en usalaj le?"

³ Cuntu nu guca usalaj guichi na', en biti' guca nu uyú le, calëga nu zoa yehua' yubá, en calëga nu zoa luyú, en calëga nu zoa zxánilö luyú. ⁴ Ní'irö gurödxá' tu' cabí bidzöli nu naca lesaca' usalaj guichi na', en biti' bidzöli nu naca lesaca' ulaba le, en cuntu nu naca lesaca' uyú le. ⁵ Ní'irö tuë' bönni' gula ni' gudxë' neda', gunné': "Biti' cödxu'. Bönni' na' náquië' ca bédxi guixi', en nabábalenë' zxí'ini xi'sóë' Judá, en náquië' ca' zxí'ini xi'sóë' David, chibidéli'në' lu yúgu'të le raca, en séqui'në' ulá'dzu'ë le naguéla'gaca guichi ni, en usalajë' le."

⁶ Ní'irö bilé'eda'-në' Bönni' náquië' Bö'cu' Zxíla'do', zuínë' lahui' lo lataj lo na' zoa gatsaj láhui'lö nupa na' nabángaca, en gatsaj láhui'lë' ca' yugu' bönni' gula na'. Dxíë' huë' ca naca que tu bö'cu' zxila' zoa nu bëti læba' lahuë' Dios, nacua' gadxi lúzuba', en gadxi guió'j loba', le tu'lu'i ca nácagaca gadxi bö' na' dzágagaca Dios, nasól-lë'ë léguequi idútë yödzölió. ⁷ Gudödë' Bönni' náquië' Bö'cu' Zxíla'do', en gudélë'ë guichi na' lu na' ibëla Nu na' rö'ö lataj lo na'. ⁸ Cate' chigudélë'ë guichi na', bulu'zóa zxíbiguequi idapa nupa na' nabángaca, en idapa uru'ë bönni' gula na' lahuë' Bönni' na' náquië' Bö'cu' Zxíla'do'. Tu tuë' bönni' gula na' zóngaqüië' le rul-la nazí'i le arpa, en nuá'agaquië' ca' yugu' zxíga'do' néquiguequini oro, yugu' le yúdzugaca yalaj, læ na' rulu'i yöl-la' rulidza Dios quégaca bönachi queë'. ⁹ Tul-lë' tu le rul-la yöl-la' ba, le naca cubi, le rnna caní:

Nacu' lesaca' quélu'u guichi na',

en uládu'u le naguéla'gaca le,

tu' bë'u lataj yugu' bönni' gulútië' Li',

ate' len xichönu' böá'uu' bönachi para ilequi queë' Dios,

nupa nácagaca bönachi izá'a nacua' idútë yödzölió,

bönachi tu'i yúgu'të didza' yúbölö,

en nabábagaca yúgu'të yödzö,

en yúgu'të luyú nacua' idútë yödzölió.

¹⁰ Benu' ga nácagaquië' bönni' ta'nná bë'ë

en ga nácagaquië' bixúz queë' Dios queëru'.

Benu' ga ta'nná bë'ë lu yu yödzölió.

¹¹ Ní'irö buyúa', en biyönda' ch'ígaquië' gubáz lá'ayi zían. Zían gáyu'ë, en gáyu'ë nacu'ë. Nacu'ë idú gásibi'ilö lataj lo na' tsözxón len nupa na' nabángaca, enca' yugu' bönni' gula na'. ¹² Tu'ë zidzaj didza' yúgu'të', ta'nné':

¡Bönni' na' náquië' Bö'cu' Zxíla'do' gulútië',

náquië' lesaca' gata' yöl-la' unná bë' lu në'ë,

en yöl-la' tsahui', en yöl-la' réajni'i, en yöl-la' huáca!

¡Náquië' lesaca' gunru'-në' bal, en tseaj ládxi'ru' Lë',

en cú'uru'-në' yöl-la' ba!

¹³ Ní'irö biyönda' tul-la yúgu'të le benë' Dios yehua' yubá, en lu yu yödzölió, en zxánilö luyú, en lu nísado'. Tul-la yúgu'të le nacua' yugu' lataj na', ta'nná:

¡Yöl-la' ba Nu na' rö'ö lataj lo,

enca' Bönni' na' náquië' Bö'cu' Zxíla'do'!

¡Gúntica'siru'-në' bal

en cú'utica'siru'-në' yöl-la' ba,

ate' inná bë'tica'së' Lë'!

¹⁴ Idápatë nupa na' nabángaca ta'nná: "¡Ca' gaca!"

Ní'irö idapa uru'ë bönni' gula na' bulu'tsaga lógaquië' lu yu, en gula'yéaj ládxi'gaquië' Nu na' zóatica'sö.

6

Yugu' le naguéla'gaca guichi

¹ Ní'irö bilé'eda'-në' Bönni' náquië' Bö'cu' Zxíla'do', ate' buládu'ë tu le naguela' guichi na', ate' biyönda' tu nu nutsa' ladaj idapa na' nabángaca, ate' biyón chi'i ca guziú' rinnë, gunná: "¡Gudá uyú'!"

² Buyúa', en bilé'eda'-ba' tuba' böa' chiguichi, ate' nu na' dxía læba' zön tu uxiti' yaga. Gulu'ë læ' tu le néquini oro udxíë' icjë', ate' birúajë' ca tu nu nácatërö lo para idéli'në' lu gudil-la.

³ Cate' buládu'ë le buropi le naguela' guichi na', biyönda' nu buropi na' nabán, ate' gunná: "¡Gudá uyú'!"

⁴ Ní'irö birúajba' ia'tuba' böa', nácaba' xiná. Bulu'dödë' lu në'e nu na' dxía lëba' yöl-la' huáca unná bë' tsöjtúa yöl-la' riböza dxi'a tsáhui'do' quégaca bönachi, en gun ga iluti luzé'eguequi. Bulu'nödzjé' queë' tu guíë tuchi' zxön.

⁵ Cate' buládzu'ë le bunni le naguela' guichi na', biyönda' nu bunni na' nabán, ate' gunná: "¡Gudá uyú!"

Buyúa', en bilé'eda'-ba' tuba' böa' gasaj, ate' nu na' dxía lëba' zön tu zxicóns. ⁶ Biyönda' ruí'i didza' tu chi'i gatsaj láhui'lö tapa na' nabángaca, ate' gunná: "Chopa guíë xzoa' xtila len lazxaj que tu dza huen dxin tu' gaca gubín, en xopa guíë xzoa' cebada len lazxaj que tu dza huen dxin, pero biti' gunu' ga yadzaj le naca za, en biti' bi gunu' que xisi uva nal-la."

⁷ Cate' buládzu'ë le budapi le naguela' guichi na', biyönda' ruí'i didza' nu budapi na' nabán, ate' gunná: "¡Gudá uyú!"

⁸ Buyúa', en bilé'eda'-ba' tuba' böa' gulaj, ate' nu na' dxía lëba' nazí'i le Yöl-la' Guti, ate' zéajlen nu na' nu nazí'i le Lataj Chul-la. Bulu'dödë' lu në'e nu na' inná be'e gatsaj tu gatsaj bönachi nacua' yödzölió para guti léguequi len guíë tuchi', en len yöl-la' ridún, en len yugu' yödzöhué', en len yugu' böa' guixi' sínía' dzó'öba' luyú.

⁹ Cate' buládzu'ë le guyu' le naguela' guichi na', bilé'eda' zcan bucugu yehua' yubá ni' yugu' bö' gulaca cazé' bönni' ni' gulútié' légaquié' tu' guluné' libán que xtídzé'ë Dios, en tu' guluné' ba nalí queë'. ¹⁰ Guluí'i zidzaj didza' yugu' bö' ni, gula'nná: "¡Xantu' Lá'ayi, runu' ca rnno! ¡Bátaxi caz uchi'a usöróu' queé'tu', en uzí'i lëbu' yugu' bönni' nacu'ë yödzölió tu' gulútié' netu'?"

¹¹ Bulu'nödzjé' quéguequi yugu' lari' chiguíchido'os ilácué', en gulé' léguequi: "Ral-la' uzí' ládxi'li' ia'tú chí'ido'osö, ga idxinrö dza ila'dxín yúgu'të luzá'ali' huen dxin queë' Cristo ni, yugu' bönni' na' ral-la' iluti bönachi légaquié' ca' ca na' bétigaca libí'ili'."

¹² Cate' buládzu'ë le buxzopi le naguela' guichi na', buyúa', en bilé'eda' gudódida' budó' zxu' luyú. Böáca gasaj gubidza, en guca ca tu lari' guitsa' gasaj, ate' böáca beo' xiná ca naca rön. ¹³ Gula'guínnaj böläj lúzxiba lu yu, le guca ca raza que yaga higo, cate' ta'guínnaj le ribía cate' rutá le bö' budunu'. ¹⁴ Gudödi que lúzxiba, ate' guca que ca raza que tu guichi cate' nu rutubi le. Bulu'tsá' xilátjagaca yúgu'të guí'ado', enca' yúgu'të gapa zoa luyú bidxi lu nísado'. ¹⁵ Ní'irö yugu' bönni' ta'nná bë'ë luyú, en yugu' bönni' lo, en yugu' bönni' ta'lé'ené' yöl-la' tsahui', en yugu' bönni' ta'nná bë'ené' bönni' röjáquié' gudil-la, en yugu' bönni' dë lu ná'agaquié', en yúgu'të nupa nadó'ogaca, en yúgu'të nupa biti' nadó'ogaca bulu'cachi' lógaquié' gapa naca zcan bulóaj, en gapa naca lë'e guíój lu guí'ado'. ¹⁶ Gulé' yugu' guí'ado' na', en yugu' lë'e guíój na': "Guli'dubága' netu', en buli'cachi' netu', para cabí ilé'e Nu na' rö'ö lataj lo ni' netu', en para cabí ideli' yöl-la' rilé queë' Bönni' na' náquié' Bö'cu' Zxíla'do' netu'. ¹⁷ Chibidxín dza uluí'i lahui yöl-la' rilé quégaquié', ate' ¿nuzxi caz sequi' guá' ilén le?"

7

Tu gayuá' yu' tapa-un milé' bönni'

¹ Gudödi gulaca yugu' lë ni bilé'eda' tapa gubáz lá'ayi zuíguequiné' idapa la'a yödzölió. Tu'zágué'ë xinózgaca idapa bö' recja tsölá'a huéaj luyú, para cabí tsecja bö' luyú yödzölió, en para cabí tsecja lu nísado', en para cabí utá yaga. ² Bilé'eda' ca' ia'tué' gubáz lá'ayi zë'ë rirúajé' ga rilén gubidza. Nu'ë tu le udé'ë nupa nácagaca queë' Dios ban le gaca bë' léguequi. Bë'ë zidzaj didza', en bulidzë' idapë' gubáz lá'ayi ni' nadödi lu ná'agaquié' yöl-la' huáca unná bë' ilún dítjané' luyú, en nísado'. ³ Gudxé' légaquié': "Biti' gun dítjali' luyú, en nísado', en yugu' yaga cate' udá'arötu' tu le gaca bë' ra' xigágaquié' bönni' huen dxin queë' Dios queé'ru'."

⁴ Biyönda' tsa nácagaquié' bönni' da' légaquié' lë na' naca bë'. Nácagaquié' idú tu gayuá' yu' tapa-un milé' ladaj yúgu'të cö' xzí'ini xi'sóë' Israel. ⁵ Yugu' bönni' na' da' légaquié' lë na' naca bë' nácagaquié':

Chinnu milé' di'a dza queë' Judá.
 Chinnu milé' di'a dza queë' Rubén.
 Chinnu milé' di'a dza queë' Gad.
⁶ Chinnu milé' di'a dza queë' Aser.
 Chinnu milé' di'a dza queë' Neftalí.
 Chinnu milé' di'a dza queë' Manasés.
⁷ Chinnu milé' di'a dza queë' Leví.
 Chinnu milé' di'a dza queë' Isacar.
⁸ Chinnu milé' di'a dza queë' Zabulón.
 Chinnu milé' di'a dza queë' José.
 Chinnu milé' di'a dza queë' Benjamín.

Bönachi quixi yu nácugaca lari' chiguíchido'os

⁹ Gudödi guca lë ni buyúa', en bilé'egacada' bönachi zián, cuntu nu gaca ulaba léguequi. Nabábagaquië' yúgu'të yödzö tu'í didza' yúbölö idútë yödzölió. Zuíguequinë' ca dódilö lahui lataj lo, ga na' rö'ë ca' Bönni' na' náquië' Bö'cu' Zxíla'do', en nácugaquei' lari' chiguíchido'os, en zóngaquei' zin. ¹⁰ Tu'ë zidzaj didza' yúgu'të', ta'nné':

¡Yöl-la' rusölá za' lu në'ë Dios queéru', rö'ë lataj lo ni,
 en za' ca' lu në'ë Bönni' na' náquië' Bö'cu' Zxíla'do'!

¹¹ Zuíguequinë' yúgu'të gubáz lá'ayi idú gásibi'ilö lataj lo na', enca' idú gásibi'ilö ga nacu'ë bönni' gula, enca' idú gásibi'ilö ga nacuá' idapa na' nabángaca, ate' tu'tsaga lógaquië' lu yu ca dódilö lahui lataj lo na', en ta'yéaj ládxi'gaquië' Dios, ¹² ta'nné':

¡Ca' gaca! ¡Yöl-la' ba Li', Dios queétu'!
 ¡Napu' yöl-la' zxön, en yöl-la' réajni'i!
 ¡Rétu' Li': "Xclenu'", en runtu' Li' bal!
 ¡Napu' yöl-la' unná bë', en yöl-la' huáca!
 ¡Gácatíca'sö caní quiu', Dios queétu'!
 ¡Ca' gaca!

¹³ Ní'irö gunábinë' neda' tuë' bönni' gula na', gunné': "¿Nupxi na' nácugaca lari' chiguíchido'os, en gapxi bönni' légaquië'?"

¹⁴ Neda' gudxa' lë': "Xan, li' nöz quézinu'."

Lë' gudxë' neda': "Nupa ni gula'gu'i gula'záca'da'. Gula'guíbë' lari' nácugaqueië', en bulu'ún léguequi chiguíchido'os len xichönë' Bönni' na' náquië' Bö'cu' Zxíla'do'. ¹⁵ Que lë ni na' nacu'ë ca dódilö lahui lataj lo ga rö'ë rinná bë'ë Dios, en tunë' dxin lahuë' Lë' rëla, en tē dza lu yudo' queë'. Nu na' rö'ö lataj lo ni gun chi'i légaquië' tu' zóaléntica'sö légaquië'. ¹⁶ Bítirö ila'dunë', en bítirö ila'bidxë' nisa, en bítirö ila'yéguinë' gubidza, en bítirö iléquinë' xilá ¹⁷ tu' uyúë' Bönni' na' náquië' Bö'cu' Zxíla'do' légaquië' ca nu uyú bö'cu' zxila'. Zoë' gatsaj láhui'lö lataj lo na'. Iché'ë légaquië' gapa ralaj nisa le ru'í yöl-la' na'bán, ate' Dios uzxië' lógaquië' nisa ta'bödxë'."

8

Le igadxi le naguela' guichi

¹ Cate' buládzü'ë le igadxi le naguela' guichi na', guró'ö dxi yehua' yubá idú gatsaj hora. ² Ní'irö bilé'egacada'-në' gadxi gubáz lá'ayi na' zuíguequinë' lahuë' Dios, ate' bulu'dödë' lu ná'agaquië' gadxi lúzuba' böa' bëdxi. ³ Ní'irö bidë' ia'túë' gubáz lá'ayi, nu'ë tu'zxíga'do' néquini oro, en guzuínë' ra' bucugu yehua' yubá ni'. Gulú'udë'ë yalaj lu në'ë para ugutsë' le len yöl-la' rulidza Dios le gulún yúgu'të bönachi queë' Cristo, en uzégui'ë le lu bucugu na' néquini oro, le zoa lahui lo lataj lo na'. ⁴ Gurén dzön que yalaj na' zoa lu në'ë gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate' bidxín ga na' rö'ë Dios. ⁵ Ní'irö gubáz lá'ayi na' bulíë' zxíga'do' na' len bo' yalaj dxía lu bucugu na',

ate' gurú'uné' le luyú. Gunné guziú', ate' bö zidzaj biyón. Guyëpi yösa, en gudödi budó zxu .

Tu'cödxé' lúzuba' böa' bédxi

⁶Ní'irö igádxité' gubáz lá'ayi na' zóngaquié' gadxi lúzuba' böa' bédxi na' gula'cu'ë sina' ulu'cödxé' léguequi.

⁷Bucödxé' gubáz lá'ayi zí'alö lúzuba' böa' bédxi, ate' guró'ö guió'j bögui' yöla sunna, en guí' nutsí'i rön, ate' bulu'huöxaj luyú. Guyegui tu cö' tsa tu tsonna cö' le dë luyú ni, ate' guyegui ca' tu cö' tsa tu tsonna cö' yaga. Guyegui ca' yúgu'të guixi' ya'a.

⁸Bucödxé' gubáz lá'ayi buropi na' lúzuba' böa' bédxi, ate' gubixi tu le naca ca tu guí'a zxon régui lu nísado', ate' ia'láti'do'os ca gatsaj tu gatsaj nísado' na' böaca rön. ⁹Guti tu cö' tsa tu tsonna cö' le nabángaca dzö'ö lu nisa zxon na', ate' guca ditaj tu cö' tsa tu tsonna cö' le ta'dödi láhui'lö nisa na'.

¹⁰Bucödxé' gubáz lá'ayi bunny lúzuba' böa' bédxi, ate' böxaj tu böljaj lúzxiba, le régui ca tu guí' yöri gapa dë nisa yegu, enca' gapa ralaj nisa, ate' guca caní que ia'láti'do'os ca gatsaj tu gatsaj nisa na' rö'ö luyú. ¹¹Böljaj ni lëba' Ajenjo, le naca tu le silá', ate' böaca silá' ia'láti'do'os ca gatsaj tu gatsaj nisa gapa na' dë nisa, en guca ca naca le silá' na', ate' gulati bönachi zían ni'a que nisa na' böaca silá'.

¹²Bucödxé' gubáz lá'ayi budapi lúzuba' böa' bédxi, ate' böaca chul-la ia'láti'do'os ca gatsaj tu gatsaj gubidza, en lësca' caní guca que beo', ate' böaca chul-la tu cö' tsa tu tsonna cö' böljaj. Caní guca, biti' buzení' gubidza ia'láti'do'os ca gatsaj tu gatsaj dza, en biti' bulu'zení' böljaj, en beo' ia'láti'do'os ca gatsaj tu gatsaj rëla.

¹³Ní'irö buyúa', en biyönda' ru'ë zidzaj didza' tué' gubáz lá'ayi ridödë' gatsaj láhui'lö lúzxiba, en rnnë': "¡Bica' bayechi' libí'ili! ¡Bica' bayechi' libí'ili! ¡Bica' bayechi' libí'ili' zóali' luyú ni cate' ulu'cödxé' ia'tsonné' gubáz lá'ayi na' lúzuba' böa' bédxi!"

9

¹Bucödxé' gubáz lá'ayi guyu' lúzuba' böa' bédxi, ate' bilé'eda' nu naca ca tu böljaj lúzxiba böxaj luyú, ate' bulu'nödzjé' nu na' zxi'ini guíë que lataj chul-la. ²Gusaljé' lataj chul-la na', ate' gurén dzön que lataj chul-la, le guca ca dzön rirúaj ga tu zégui'ë bulá'do', ate' gula'chul-la gubidza, en lúzxiba ni'a que dzön na'. ³Lu dzön na' bila'rúajba' bóchi'zu, yugu' le gula'zxoasiba' luyú, ate' Dios bë'ë léga'caba' lataj iládu'ba' bönachi ca tunba' xöjnó' dzó'öba' luyú. ⁴Gunná bë'ené' léga'caba' biti' ilún dítjaba' guixi' rö'ö luyú, en biti' ilún dítjaba' yugu' le naca ya'a, en calëga yugu' yaga, pero gácasö iládu'ba' bönachi na' biti' da' lë na' naca bë' nu nequi queë' Dios ra' xigágaquié'. ⁵Biti' bë'ë léga'caba' lataj ilútiba' léga'quié', pero ulu'saca' zí'isiba' léga'quié' idú ca gayu' beo'. Riláda' ga tádu'ba' ca na' rilá ga rádu'ba' xöjnó'. ⁶Yugu' dza na' ilé'ënë' yugu' bönni' iluti cuíngaquié', pero biti' ila'zéqui'në'. Ilé'ëniné' ilátié', pero ucuíta cuini yöl-la' guti.

⁷Nalá'gacaba' bóchi'zu na' ca náca'gacaba' böa' nácu'gacaba' le néquiguequini guíë, para tsöjácaba' gudil-la. Dxíagaca íc'jagacaba' le náca'gaca ca tu le néquini oro. Naca lógacaba' ca naca lógaca bönachi. ⁸Naca guitsa' íc'jagacaba' ca naca guitsa' íc'janu nigula. Náca'gaca láyi'gacaba' ca náca'gaca láyi'ba' bédxi guixi'. ⁹Nácu'gaca luchú'ugacaba' le néquini guíë. Ta'gú'u bö xíligacaba' ca na' ta'gú'u bö carreta ná'ayöjgacaba' böa' ta'xíti'ba' lu gudil-la. ¹⁰Náca'gaca xibángacaba' ca naca xibángacaba' xöjnó', zoa lí'igacaba'. Lu xibángacaba' na' zoa le tu dí'iniba', para ilunba' zi' bönachi idú ca gayu' beo'. ¹¹Zoa nu rinná be'ë léga'caba', nu na' naca gubáz xihui' que lataj chul-la. Gubáz ni nazí'i le lu didza' hebreo: Abadón, le rna lu didza' griego: Apolión, en lu didza' xidza': Nu Rusuniti.

¹²Chigudödi tu le rusuniti bönachi, le za' zí'alö, pero zá'gaca ia'chopa le ulu'suniti bönachi.

¹³Bucödxé' gubáz lá'ayi buzxopi lúzuba' böa' bédxi, ate' biyönda' tu chi'i ru'í didza' gatsaj láhui'lö tapa le náca'gaca ca lúzuba' bédxi dá'gaca tapa squin bucugu na' néquini oro, le rö' lahuë' Dios. ¹⁴Chi'i ni ru'ílen didza' gubáz lá'ayi buzxopi na' si' bucödxé'

lúzuba' böa' bēdxi, en rnna: "Busedxi idápatē' gubáz xihui' na' nága'gaca ra' yegu Eufrates."

¹⁵ Ní'irö bulu'sedxē' tapa gubáz xihui' na', chinucözē' Dios léguequi para la' ná'asö, le naca dza na', en beo' na', en izi na', para ilútigaca tu cö' tsa tu tsonna cö' bönachi nacua' yödzölió. ¹⁶ Biyönda' tsa nacagaquiē' bönni' röjáquiē' gudil-la dxíagaquiē'-ba' böa', en dzágagaquiē' tapa gubáz xihui' na'. Nácagaquiē' idú chopa gayuá' mil milē'.

¹⁷ Bilé'egacada'-ba' böa' na' ca tu lu bixín, ate' nupa ta'bía légacaba' nacu luchú'uguequi le naca gui'do'os, en ya'a ca lúzxiba, en gulaj. Nácagaca ícjagacaba' böa' na' ca ícjaba' bēdxi guixi', ate' lu ruá'agacaba' ta'rúaj guí', en dzön, en tu le ruzégui'da', nazí'i le azufre. ¹⁸ Yugu' lē na' ta'rúaj ruá'agacaba' bétigaca tu cö' tsa tu tsonna cö' bönachi nacua' luyú, lē na' nácagaca guí', en dzön, en lē na' ruzégui'da'. ¹⁹ Yugu' le tu'dí'iniba' böa' na' ta'rúaj ruá'agacaba', en dzö'ö lu xibángacaba', tu' nácagaca xibángacaba' ca yugu' bëla zoa ícjagacaba' le tu'dí'iniba'.

²⁰ Ia'zica'rö bönachi, nupa biti' gulati lu chopa ni tu'suniti, biti' bulu'bí'i ládxi'guequi para cabirö ilúngaca ca na' túngaca, en biti' bulu'sán ta'yéaj ládxi'guequi yugu' bö' xihui', en yugu' budó' guió'j budó' yaga, yugu' budó' na' biti' ta'lé'e, en biti' ta'yöni, en biti' gaca sá'gaca. ²¹ Biti' bulu'bí'i ládxi'guequi para cabirö iluti bönachi, en calēga para cabirö ilúngaca yöl-la' gudzá' quéguequi, en le ruá' dö' túngaca, en yöl-la' ribán quéguequi.

10

Gubáz lá'ayi, nuá' lu në'ē tu guíchido'

¹ Ní'irö bilé'eda'-nē' ia'túē' gubáz lá'ayi nál-la, bötjē' birúajē' yehua' yubá, nácuē' böaj lúzxiba, en zoa ca tu biguita' ícjalē'. Rēpi yösa bení' lahuē' ca run gubidza, ate' nácagaca ni'ē ca ya'zxón ta'yegui. ² Zoa lu në'ē tu guíchido' nayalaj, ate' tu ni'ē ibēla nulibē' lu nísado', en ia'tú ni'ē yógöla nulibē' luyú bidxi. ³ Ní'irö bë'ē zidzaj didza', ate' biyón chi'ē ca riyón cate' ribódxí'aba' bēdxi guixi', en cate' budxi bë'ē zidzaj didza' na', bila'yöni chí'igaca gadxi guziú'. ⁴ Cate' budxi bila'yöni chí'igaca guziú' na', neda' si' uzúaja' lu guichi, pero biyönda' nu ruí'i didza' yehua' yubá, rē neda': "Bucáchi'sö didza' ni gulu'í gadxi guziú' na'. Biti' uzúaju' didza' na' lu guichi."

⁵ Ní'irö gubáz lá'ayi na' bilé'eda'-nē' zuínē' lu nísado', en luyú bidxi, guchisa në'ē ibēla zaca' lúzxibalö, ⁶ ate' ben tsutsu xtídzē'ē ni'a que Nu na' zoa caz, Nu na' ben yehua' yubá, en le nacua' ni', enca' yödzölió, en le nacua' ni', enca' nísado', en le nacua' ni', ate' gunné': "¡Bíti'rö tsel! ⁷ Cate' ucödxē' gubáz lá'ayi igadxi lúzuba' böa' bēdxi, usudxinē' Dios le nagachi' queē', lē na' bulu'ínē' yugu' huen dxin queē', bönni' ni' gulu'ē didza' uláz queē'."

⁸ Ní'irö chi'i na' biyönda' rirúaj yehua' yubá bë'len neda' didza' leyúbölö. Gunná: "Guyéaj, yöjxí' guíchido' nayalaj na' zönē' gubáz lá'ayi na' nulibē' lu nísado', en luyú bidxi."

⁹ Guyija' ga na' zoē' gubáz lá'ayi na', en gunábida'-nē' gunné' guíchido' na' quia'. Gubáz lá'ayi na' gudxē' neda', gunné': "¡Guzxí', gudagu! Lu ru'u gaca zxixi ca naca bidxína'do' queé'ba' buz, pero lē'u huóaca silá'."

¹⁰ Guzxí'a guíchido' na' zönē', en gudahua' le. Lu ruá'a guca zxixi ca naca bidxína'do' na', pero cate' budxi gudahua' le, böaca silá' lē'a. ¹¹ Ní'irö gudxē' neda': "Ral-la' gu'u didza' leyúbölö uláz queē' Dios lógaca zían cö' bönachi izá'a, en gapa nacua' yúgu'tē yödzö, en gapa tu'í zían didza' yúbölö, en lógaca zían bönni' unná bë'."

11

Chopē' bönni' tunē' ba nalí

¹ Ní'irö bidxín nu benna tu gui quia' le naca ca tu yaga ribixi, en gudxi neda': "Guyasa, en burixi yudo' queē' Dios. Burixi ca' bucugu lá'ayi que, en bulaba nupa nacua' ni' ta'yéaj

ládxi'gaca Dios. ² Bucá'ana ca' lö'a que yudo' na' dë ní'ilö, en bití' urixu' le, tu' nadödi lu ná'agaca bönachi izá'a, ate' ulu'libi ulu'léaj yödzö lá'ayi na' idú ca chopá-un beo'."

³ Gudxë' ca' neda': "Isól-la'a chopë' bönni' ilunë' ba nalí quia', ate' ilu'ë didza' uláz quia' idú ca chinu gayuá' yu' tsónnalalaj dza, nácugaquië' lari' le naca bödzádzado'."

⁴ Chopë' bönni' ni tunë' ba nalí, nácagaquië' chopá yaga olivo na' nazúaj lu guichi lá'ayi ca naca quégaquië', en nácagaquië' ca' chopá le nuá'gaca guí' na' nacuá' lahuë' Dios, Xani yödzölió. ⁵ Channö gué'ëni nu guá' dö' quégaquië', irúaj guí' ruá'agaquië' le usuniti nu na' ré'ëni guá' dö' quégaquië', en guti nu na', enca' nupa ta'dá'baga' légaquië'. ⁶ Chopë' ni dë lu ná'agaquië' ulu'záguë'ë xinöza nisa guiój lúzxiba, para cabí galaj guiój tsa dza na' ral-la' ilu'ë didza' uláz queë' Dios, ate' dë lu ná'agaquië' ca' ilunë' ga huóaca nisa rön, en ilunë' ga gatsaj yödzöhuë' yödzölió. Ilunë' caní bálati'tës luzuí ilé'ënnë'. ⁷ Cate' údxi ilunë' ba nalí, irúajba' böa' sínia' lataj chul-la, en tíl-lalenba' légaquië', en ucúl-laba' légaquië', en gútiba' légaquië'. ⁸ Le gulaca cazë' ila'túlusö ca' la' nöza lu yödzö zxön, ga ni' gudé'ë ca' Xanru' lë'e yaga cruz, en ca rucúdzuru' didza', nazí'i le ca' Sodoma, enca' Egipto. ⁹ Idú ca tsonna dza yu' gatsaj bönachi yúgu'të yödzö, en yúgu'të bönachi izá'a, en bönachi tuí'i zían didza' yúbölö, en bönachi yúgu'të luyú, ila'lé'eni le gulaca cazë', en bití' ilu' lataj nu ucachë' légaquië' yeru ba. ¹⁰ Ulu'dzëjade'e nupa nacuá' yödzölió tu' gulatië', ate' lu yöl-la' rudzeja quéguequi ila'sól-la' le ulu'nödzaj quégaca luzé'eguequi, tu' bulu'saca' zi'ë chopë' ni gulu'ë didza' uláz queë' Dios bönachi nacuá' yödzölió.

¹¹ Ní'irö cate' chibizá'a tsonna dza yu' gatsaj na', Dios busubanë' légaquië', ate' gula'yasë' gulazuinë', ate' guladxi gula'dzöbi yúgu'të nupa bila'lé'e légaquië'. ¹² Ní'irö bë' zidzaj didza' tu chi'i yehua' yubá, en gudxi légaquië': "Guli'cuén ni."

Gula'benë' lu böaj lúzxiba zaca' yehua' yubálö, ate' nupa na' gula'dá'baga' légaquië' bila'lé'e légaquië'. ¹³ La' ní'isö gudódida' budó' xzu', ate' biguinnaj tu cö' tsa tu chi cö' yugu' yu'u dzö'ö lu yödzö na', ate' lu budó' xzu' na', gulati tsónnalalaj yu' chi gayuá' bönachi. Guladxi gula'dzöbi nupa ni' nagá'anagaca, ate' gula'gú'u yöl-la' ba Dios zoë' yehua' yubá.

¹⁴ Chigudödi le buropi le rusuniti bönachi, ate' chizóa idxín le bunny le usuniti léguequi.

Rucödxë' gubáz lá'ayi igadxi lúzuba' böa' bëdxi

¹⁵ Bucödxë' gubáz lá'ayi igadxi lúzuba' böa' bëdxi, ate' gulu'í zidzaj didza' yugu' chi'i yehua' yubá, ta'nná:

Gapa ta'nná bë' bönachi yödzölió

nadódigaca lu në'ë Xanru' Dios,

en lu në'ë Cristo.

Lë' inná bë'tica'së'.

¹⁶ Ní'irö idapa uru'ë bönni' gula na' ró'ögaquië' gapa na' ta'nná bë'ë lahuë' Dios, bulu'tsaga lógaquië' lu yu, en ta'yéaj ládxi'gaquië' Dios. ¹⁷ Ta'nné':

¡Xantu' Dios, napa cazu' yöl-la' huáca!

¡Guzóa cazu', en zoa cazu', en ral-la' guída cazu'!

¡Xclenu', tu' chibugunu' dxin yöl-la' huáca zxön quiu',

en risí lo' rinná bë'u!

¹⁸ ¡Gula'lé bönachi yugu' yödzö

pero chibidxín dza gunu' léguequi xíguia'!

¡Naca dza uchi'a usöróu' nupa chinátigaca!

¡Ubi'u quégaquië' huen dxin quiu',

yugu' bönni' gulu'ë didza' uláz quiu',

nupa néquiguequi quez quiu', en gulún bal Lo',

nupa nácagaca cá'asö, en nupa nácagaca lo!

¡Chibidxín dza usunítu' nupa bulu'suniti yödzölió!

¹⁹ Ní'irö guyalaj yudo' queë' Dios rö'ö yehua' yubá, ate' bilá' lahui guí'ina lá'ayi ga yu'u didza' rucá'ana tsahui' le nunë' Dios. Guyëpi yösa, en gulú'u bö zidzaj, en gunné guziú' luyú. Gudödi budó' zxu', en guró'ö guió'j bögui' yöla sunna.

12

Tunu nigula, en tuba' bëla zxön xitsiní'

¹ Ní'irö bilá' lahui yehua' yubá tu le naca bë'da', buluí'i lonu tu nigula nácunu le naca ca gubidza, en zoa zxan ní'anu beo'. Dxía ícjanu tu le néquini oro ga dxíagacaba' chinnu böljaj bení'. ² Nigula ni chizóa soa bí'ido' queénu, en ribódxinu tu' rúdia' lé'ënu. Riguí'i rizáca'nu ruzóanu bí'ido' queénu. ³ Ní'irö ia'tú le naca bë' bilá' lahui yehua' yubá. Buluí'i loba' tuba' bëla zxön xitsiní'. Nácaba' xiná gui'is, ate' dxíagaca gadxi ícjaba', en chi lúzuba', ate' dxía tu le néquini oro tu tu ícjaba' na'. ⁴ Len xibanba' gú'uyó'jba' tu cö' tsa tu tsonna cö' böljaj lúzxiba, en gurú'unaba' lé'gacaba' luyú. Guzuí'ba' bëla zxön xitsiní' na' lonu nigula na' chizóa sóabi' bí'ido' queénu. Zóaba' sina' gáguba'-bi' bí'ido' queénu na' ca gáljabi' na'. ⁵ Buzóanu-bi' tubi' bi'i bónni'do' ral-la' inná bé'ebi' yúgu'të yödzö len tu xiyaga guië. La' bucuítatë'ë-bi' Dios bí'ido' queénu na', en buchisé'-bi' ga ni' zoa cazë' Lé', rö'ë lataj lo ga na' rinná bë'ë. ⁶ Buzxúnajnu nigula na', zéajnu lu lataj cá'asö, ga ni' chinupé'ë Dios lataj queénu. Ulu'gahuë'-nu ni' idú ca chinnu gayuá' yu' tsónnalalaj dza.

⁷ Gudödi gulaca læ ni, gúcada' gudil-la yehua' yubá. Gubáz lá'ayi lo læ Miguel, en yugu' gubáz lá'ayi dá'gaquië' læ gula'díl-lalenë'-ba' bëla zxön xitsiní' na'. Gula'dil-la bëla zxön na', en yugu' gubáz xihui' dá'gaca læba' ⁸ pero biti' bila'deli' lu gudil-la na'. Que læ ni na' bí'ti' rö bidzöli xilátjagaca yehua' yubá. ⁹ Caní guca, gula'ru'unë'-ba' bëla zxön xitsiní' na' ní'ilö. Nácaba' bëla na' zóaba' dza ni'te, læba' tu' xihui'. Gula'ru'unë' tu' xihui' yödzölió, dzágagaca le gubáz xihui' na' dá'gaca le.

¹⁰ Ní'irö biyönda' tu chí'i ruí' zidzaj didza' yehua' yubá, rnna: "Na'a chibidxín dza nulu'ë lahui yöl-la' rusölá nunë' Dios, en yöl-la' huáca queë', en le rinná bë'ë, enca' le rinná bë'ë Cristo, tu' chigula'ru'unë' ní'ilö nu na' buzegui yugu' böchi' luzá'aru' didza'. Rëla, en të dza buzegui légaquië' didza' lahuë' Dios queéru'. ¹¹ Yugu' böchi' luzá'aru' ni bulu'cul-lë' nu na', tu' bulu'gunë' dxin xichönë' Bönni' na' náquië' Bö'cu' Zxíla'do' queë' Dios, en tu' bulu'gunë' dxin didza' na' gulunë' ba nalı queë'. Biti' guluí'i lądxi'gaquië' yöl-la' na'bán quégaquië', pero gulátië'. ¹² Que læ ni na' gaca yöl-la' rudzeja yehua' yubá. ¡Buli'dzeja libí'ili', zóali' ni'! ¡Bica' bayechi' libí'ili' zóali' yödzölió, en lu nísado', tu' chibötaj tu' xihui', en bidxín ga zóali'! Riléde'e tu' xihui' na' tu' chiréquite'e ia'tú chí'isö dë lataj que."

¹³ Cate' gúquite'eba' bëla zxön xitsiní' na' chigula'ru'unë'-ba' luyú, ní'irö yöjsóa régu'ba'-nu nigula na' buzóanu bi'i bónni'do' na' queénu. ¹⁴ Ní'irö Dios bë'ë-nu nigula na' chopá xíliba' bisiá' nácagaca zxön para gaca sunu, en icuítanu ga na' zóaba' bëla zxön xitsiní' na', en idxinnu xilátjanu lu lataj cá'asö. Ni' ulu'gahuë'-nu idú tsonna iz yu' gatsaj. ¹⁵ Bëla zxön xitsiní' na' gúbaba' nisa zile zaca' cúdzu'lönu, le guca ca tu nisa yegu, en gú'uniba' gua'të nigula na'. ¹⁶ Ní'irö luyú gúcalen nigula na'. Guyalaj luyú na', en güí'i nisa yegu na' gúbaba' bëla zxön xitsiní' na'. ¹⁷ Ní'irö bëla zxön xitsiní' na' guléde'eba'-nu nigula na', ate' guyéajba' yöjtíl-lalenba' nupa nagá'anagaca queénu di'a dza queénu, nupa na' tun ca rnna le gunná bë'ë Dios, en nazi' lu né'eguequi le nunë' Jesucristo ba nalı.

13

Chópaba' böa' sínia'

¹ Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' sínia' dxíagaca gadxi ícjaba', en chi lúzuba'. Dxíagaca lúzuba' chi le néquini oro, ate' láhuigaca ícjaba' da' tu la le naca xihui' le cabí rilé'e Dios dxi'a. ² Böa' sínia' na' bilé'eda'-ba' riná'aba' ca nácaba' tu bédxito', nacuá' ní'aba' ca nácagaca ní'aba' oso, ate' ruá'aba' naca ca naca

ruá'aba' bédxi guixi'. Bëla zxön xitsini' na' budódiba' lu na'aba' böa' sínia' ni yöl-la' huáca queé'ba', enca' xilátjaba' ga rinná bé'ëba', en yöl-la' unná bë' zxön queé'ba'. ³ Dxía hué' tu ícjaba' böa' sínia' na', le naca le guti lëba', pero buniti hué' na', ate' bulu'bani yúgu'të bönachi yödzölió, en yöjdá'gaca böa' sínia' na'. ⁴ Gula'yéaj ládxi'gaquié'-ba' bëla zxön xitsini' na', tu' budódiba' yöl-la' unná bë' queé'ba' lu ná'aba' böa' sínia' na'. Gula'yéaj ládxi'gaquié'-ba' böa' sínia' na', en gula'nné': "¿Nuzxi caz naca zxön ca naca zxön böa' sínia' na', en nuzxi caz sequi' tíl-lalen lëba'?"

⁵ Guta' lu ná'aba' böa' sínia' na' bé'ëba' didza' ba zxön, en didza' xihui' le rinnëba' queé' Dios. Idú ca chopa-un beo' guta' lu ná'aba' yöl-la' unná bë'. ⁶ Gusí loba' rinnëba' queé' Dios, en rinné xíhui'ba' que Lë' Dios, en que lataj lá'ayi queé', en quégaca nupa nacua' yehua' yubá. ⁷ Guta' lu ná'aba' gudíl-lalenba' nupa néquiquequi quez queé' Dios, en bucúl-laba' légaquié'. Guta' ca' lu ná'aba' gunná bé'ëba' yúgu'të bönachi izá'a, bönachi yúgu'të yödzö, en bönachi tu'i yúgu'të didza' yúbölö, en bönachi idütë yödzölió. ⁸ Yúgu'të bönachi nacua' yödzölió gula'yéaj ládxi'gaca böa' sínia' na', nupa na' biti' nazúajgaca láguequi lu guichi que yöl-la' na'bán, guichi na' buzúajë' Bönni' na' náquié' Bö'cu' Zxíla'do' queé' Dios cate' si' guta' yödzölió. Buzóa cazë' Dios gútié' Bönni' na' ni'a quégaca bönachi queé'.

⁹ Channö nu riyöni, ral-la' uzé nagui. ¹⁰ Nupa nucu'ë Dios idzúngaca, ral-la' idzúngaca, ate' nupa nucu'ë Dios para nu guti léguequi len guíë tuchi', len guíë tuchi' ilátigaca. Que lë ni na', ral-la' ila'böza zxön ladxi' nupa néquiquequi queé' Dios, en ta'yéajlë' Lë'.

¹¹ Gudödi na' bilé'eda'-ba' ia'tuba' böa' sínia' gurenba' birúajba' lu yu. Dxíagaca chopa lúzuba' ca naca lúzuba' bö'cu' zxíla', en ru'íba' didza' ca na' ru'íba' didza' bëla zxön xitsini' na'. ¹² Dë lu ná'aba' böa' sínia' ni yúgu'të yöl-la' unná bë' queé'ba' böa' sínia' bidxinba' zí'alö, cate' dzágaba' lëba'. Runba' böa' sínia' buropi ni ga ta'yéaj ládxi'gaca yúgu'të bönachi nacua' yödzölió böa' sínia' zí'alö na', böa' na' buniti hué' le guti lëba'. ¹³ Böa' buropi na' runba' ca' le nácagaca bë' ga ridxintë runba' ga ruhuóxaj gu' le za' lúzxiba, en ruhuóxaj luyú lógaca yúgu'të bönachi. ¹⁴ Rizí' yé'eba' bönachi nacua' yödzölió len le nácagaca bë' dë lu ná'aba' runba' loba' böa' sínia' zí'alö na'. Rinná bé'ëba' bönachi nacua' yödzölió ilunë' tu budó' ca nácaba' böa' sínia' na' gúcaba' hué' que guíë tuchi', ate' nabanba'. ¹⁵ Dë lu ná'aba' runba' ga soa ibán budó' na' naca ca nácaba' böa' sínia' zí'alö na', en gü'i didza' budó' ni, en gun ga nu guti yúgu'të nupa biti' ila'yéaj ládxi'gaca le. ¹⁶ Benba' ga gudá' yúgu'të bönachi tu le naca bë' dá'gaca lëba', nupa nácagaca cá'asö, en nupa nácagaca lo, nupa ta'lé'e yöl-la' tsahui', en nupa nácagaca yechi', nupa biti' nadó'ogaca, en nupa nadó'ogaca. Budá'aba' le lu ná'agaca ibëla o ra' xigágaca bönachi na'. ¹⁷ Cuntu nu gaca bi ga'u o bi guti' channö cabí da' nu na' lë na' naca bë', o channö cabí da' nu na' laba' böa' sínia' na', o le nabábaba' nuá'aba'. ¹⁸ Na'a riquínnu' yöl-la' réajni'i. Nu napa yöl-la' réajni'i ral-la' ulábatëz tsca le nabábaba' nuá'aba' böa' sínia' na', le naca ca le nababë' tu bönni', ate' le nabábaba' na' naca xopa gayuá' yu' tsónnalalaj yu' xopa.

14

Le tul-lë' tu gayuá' yu' tapa-un milë' bönni'

¹ Gudödi ni' buyúa', en bilé'eda'-né' Bönni' na' náquié' Bö'cu' Zxíla'do' zuínë' lu guí'ado' nazí'i le Sión. Nacua'lenë' Lë' tu gayuá' yu' tapa-un milë' bönni', da' ra' xigágaquié' Lë' Bönni' na' náquié' Bö'cu' Zxíla'do', enca' Lë' Xuzë'. ² Ní'irö biyönda' tu le rigú'u bö yehua' yubá, le rinné zidzaj ca rinné tu yegu zxön, en ca rinné guziú'. Biyönda' le riyón cate' ta'guínnië' lë'e tu le rul-la zë zían du que. ³ Tul-lë' tu le rul-la cubi, nacu'ë ca dódilö lahui lataj lo ni', enca' ca dódilö lahui ga na' nacua' idapa nupa na' nabángaca len yugu' bönni' gula na'. Cúnturö nu gaca gul-la le rul-la ni, pero légacasë' tu gayuá' yu' tapa-un milë' bönni' ni, bönni' na' böá'uë' Cristo légaquié' ladaj bönachi yödzölió. ⁴ Nácagaquié' bönni' ni idú ladxi'. Biti' gula'cuá'lenë' nigula, tu' nácagaquié' idú bönni' ra'bán. Sójacalenë'

Bönni' na' náquië' Bö'cu' Zxíla'do' gáti'tës ga sa'yéajë'. Cristo caz böá'uë' légaquië' ladjagaca bönachi, ate' nácagaca nupa bulu'dödi cuíngaquië' zí'alö queë' Dios, enca' queë' Bönni' na' náquië' Bö'cu' Zxíla'do'. ⁵ Catu caz gula'z' yë'ë, ate' cuntu nu gaca bi inné' quégaquië' ga na' nacu'ë ca dódilö lahui lataj lo ga rö'ë Dios.

Didza' röjuá'gaquië' tsonna gubáz lá'ayi

⁶ Ní'irö bilé'eda' ia'túë' gubáz lá'ayi, ridödë' lu bö'ös lúzxiba, en röju'ë didza' dxi'a zóatica'sö para gunë' libán que lógaca nupa nacua' yödzölió, bönachi idútë luyú, yúgu'të bönachi izá'a, en bönachi tu'í yúgu'të didza' izá'a, en bönachi yúgu'të yödzö. ⁷ Ru'ë zidzaj didza', rnnë': "¡Gulí'gádxí Dios, en guli'cu'ë yöl-la' ba tu' chizóa uchi'a usöróë' bönachi! ¡Guli'tséaj ládxi'ë Dios, nunë' lúzxiba, en luyú, en nísado', en gapa ralaj nisa!"

⁸ Ia'túë' gubáz lá'ayi söjnáhuë' gubáz lá'ayi ni, en rnnë': "¡Chibudxi que yödzö Babilonia! ¡Chibudxi que yödzö zxön na'! Caní guca que, tu' gulún nupa nacua' ni' ga gula'z' lu ná'agaquië' bönni' yúgu'të yödzö ilunë' ca nácagaca le ta'zé ládxi'gaquië' le ruá' dö'."

⁹ Ia'túë' gubáz lá'ayi söjnáhuë' gubáz lá'ayi buropi ni, en ru'ë zidzaj didza', rnnë': "¡Channö nu tseaj ladxí'-ba' böa' sínia' na', enca' budó' queé'ba', en güi'í lataj ta' ra' xigüé o lu në'e le naca bë' da' léba', ¹⁰ gunë' Dios nu ni xíguia' lu yöl-la' rilé queë'! ¡Qui'í saca' nu na' lu guí', en lu lë na' ruzégui'da', lógaca gubáz lá'ayi, en lahuë' Bönni' na' náquië' Bö'cu' Zxíla'do'! ¹¹ Cuéntica'sö dzön que guí' ga ni' quí'í saca' nu na'. Rëla, en te dza qui'í saca', ate' catu caz gata' lataj ulu'z' ládxi'gaca nupa ila'yéaj ládxi'gaca-ba' böa' sínia' na', en budó' queé'ba'. Biti' ulu'z' ládxi'gaca nupa ilu'í'í lataj ta' laba' léguequi. ¹² Que lë ni na' nupa na' néquiquequi queë' Dios, en tun ca rnna le gunná bë'ë, en ta'yéajlë' Jesús, ral-la' ila'böza zxön ladxí'."

¹³ Ní'irö biyönda' chí'í nu ruí'í didza' yehua' yubá, en rë neda': "Buzúaj lu guichi lë ni: ¡Bica' bágaca nupa ilátigaca na'a si lo, nupa na' ta'yéajlë' Xanru'!"

Dios Bö' Lá'ayi rnnë': "¡Ca' gaca! ¡Ulu'z' ládxi'gaquië' lu dxin gulunë', en ulu'zi'ë xibé ca sa'yéaj le gulunë'!"

Tu'zi'ë le rulá' luyú

¹⁴ Ní'irö buyúa', en bilé'eda' tu böaj lúzxiba chiguíchido'os, ate' lu böaj na' rö'ë tu bönni' náquië' ca náquië' Bönni' Guljë' Bönachi, ate' dxía icjë' tu le néquini oro, ate' zönë' tu guíë tuchi' lu në'ë. ¹⁵ Birúajë' tuë' gubáz lá'ayi lu yudo' rö'ö yehua' yubá, ate' bë'ë zidzaj didza', en gudxë' Nu na' rö'ö lu böaj na', gunné': "¡Bugún dxin guíë tuchi' quiu', en guchugu xzoa' xtila, tu' chibidxín dza nu uzí' le! ¡Chinábídx do que le dë yödzölió!"

¹⁶ Ní'irö Nu na' rö'ö lu böaj na' bugún dxin guíë tuchi' idútë yödzölió, ate' buzi'ë le rulá' luyú.

¹⁷ Ní'irö birúajë' tu gubáz lá'ayi lu yudo' zoa yehua' yubá. Nu'ë ca' tu guíë tuchi'. ¹⁸ Birúajë' ia'túë' gubáz lá'ayi ra' bucugu ni', dë lu në'ë inná bé'enë' guí', ate' bë'ë zidzaj didza', en bulidzë' gubáz lá'ayi zí'alö na' nu'ë guíë tuchi', gunné': "¡Bugún dxin guíë tuchi' quiu', en butubi tu'xóa huéaj le ta'bía lubá uva ró'gaca yödzölió, tu' chiná le ta'bía lubá uva!"

¹⁹ Ní'irö gubáz lá'ayi ni bugunë' dxin guíë tuchi' idútë yödzölió, en butubë' le ta'bía lubá uva ró'gaca luyú, ate' yöjchú'unë' le ta'bía lubá uva na' lu yeru zxön ga izí xisi. Yugu' lë ni rulu'í'í ca gunë' Dios, gunë' xíguia' bönachi nacua' yödzölió. ²⁰ Bulu'libë' le ta'bía lubá uva na' lu lerui zoa ní'ilö ra' yödzö, ate' lu lerui na' birúaj rön, en gurén ga bidxintë ruá'agacaba' böa', en gudödi rön na' idú tsa gaca sá'aru' idú chinu dza.

¹ Bilé'eda' ia'tú le nácada' bë' yehua' yubá, le run ga nu rubani. Bila'rúajë' gadxi gubáz lá'ayi, nu'ágaquië' gadxi yödzhüé' röjsétegaca, le ugunë' dxin Dios, údxi gunë' xíguia' bönachi yödzhülió.

² Bilé'eda' ca' tu le naca ca tu nísado' le rëpi yösa bení' ca guiójjara le nutsí'i guí'. Nupa na' bulu'xicja lu böa' sínia' na', en lu budó' queéba', en lu laba', zuígaca lu lë na' naca ca tu nísado', en nu'ágaquië' le tul-la, yugu' le bë'ë Dios quégaquië'. ³ Tul-lë' le rul-la na' bil-lë' Moisés, bönni' huen dxin queë' Dios. Naca tu le rul-la queë' Bönni' na' náquië' Bö'cu' Zxíla'do'. Ta'nnë':

¡Li', Xantu' Dios, zxóntërö nacu' Li'!

¡Zxóntërö naca yúgu'të le benu',

le tun ga rubánitu'!

¡Li' rinná bé'enu' yugu' yödzhö!

¡Idú dxí'ado', en idú tsahui' naca ca bi runu'!

⁴ ¿Nuzxi caz cabí gadxi Li', Xantu'?

¿Nuzxi caz cabí cu'u Li' yöl-la' ba?

¡Tuzu' Li' nacu' lá'ayi!

¡Ila'dxín bönachi yúgu'të yödzhö,

en ila'yéaj ladxí'guequi Li'

tu' ta'lé'e naca tsahui' yúgu'të le runu'!

⁵ Gudödi guca lë ni, buyúa', en bilé'eda' gualaj yudo' yehua' yubá ga ni' dë lataj lá'ayi que le naca bë' zóalenë' Dios bönachi queë'. ⁶ Bila'rúajë' gadxi gubáz lá'ayi lu lataj lá'ayi na', nu'ágaquië' gadxi yödzhüé' na'. Nácugaquië' lari' nazáca'da' le rëpi yösa bení', en núga'gaca luchú'ugaquië' le néquiguequini oro. ⁷ Ní'irö tu nu nutsa' ladaj idapa nupa na' nabángaca, bë' que queégaquië' gadxi gubáz lá'ayi na' gadxi zxíga'do' néquiguequini oro, en yúdzugaca le ruluí'i yöl-la' rilé queë' Dios, Bönni' zoa cazë'. ⁸ Lu lataj lá'ayi na' bidzá'a dzön, tu' zoa ni' yöl-la' bení', en yöl-la' huáca zxön queë' Dios. Cuntu nu sequi' tsaza lu lataj lá'ayi na' cate' gátsjarö gadxi yödzhüé' na' nu'ágaquië' gadxi gubáz lá'ayi na'.

16

Yugu' zxíga'do' yúdzugaca le ruluí'i yöl-la' rilé queë' Dios

¹ Ní'irö biyönda' chí'i nu ruí'i zidzaj didza' lataj lá'ayi na', en rë gadxi gubáz lá'ayi na', rnna: “¡Guli'tséaj! ¡Guli'tsöjlälaj gadxi zxíga'do' na' lu yödzhülió, le yúdzugaca lë na' ruluí'i yöl-la' rilé queë' Dios!”

² Guyijë' gubáz lá'ayi zí'alö, en yöjlaljë' le yudzu zxíga'do' na' zönë' lu yödzhülió. Lë na' yudzu zxíga'do' na' ben ga gutsaj yudzu' ya'a le riláda' idütë le naca caz nupa na' da' léguequi le naca bë' dá'gaca böa' sínia' na', enca' nupa na' ta'yéaj ladxí'gaca budó' queéba'.

³ Ní'irö guyijë' gubáz lá'ayi buropi, en yöjlaljë' le yudzu zxíga'do' na' zönë' lu nísado', ate' nisa na' böáca rön ca naca rön queë' tu bönni' nati, ate' gulati yúgu'të nupa nabángaca nacua' lu nísado' na'.

⁴ Guyijë' gubáz lá'ayi bunny, en yöjlaljë' le yudzu zxíga'do' na' zönë' gapa dë yegu, en gapa ralaj nisa, ate' gapa dë nisa na' bulu'huóaca rön. ⁵ Ní'irö biyönda' ru'ë didza' gubáz lá'ayi na' dë lu në'ë rinná bé'enë' nisa na', rnnë': “¡Xantu' Dios Lá'ayil! ¡Zoa cazu', en guzóa cazu'! ¡Tsahui' nacu' tu' richugu' caní quégaca bönachi ⁶ tu' bulu'laljë' rön quégaca nupa néquiguequi quez quiu', en quégaca nupa guluí'i didza' uláz quiu'! ¡Na'a, Li' runu' ga ilé'ajë' rön, tu' caní ral-la' gaca quégaquië'!”

⁷ Ní'irö biyönda' ruí'i didza' tu nu zoa ra' bucugu yehua' yubá ni', rnna: “¡Ca' gaca, Xantu' Dios, napa cazu' yöl-la' unná bë'! ¡Idütë li, en tsahui' naca ca richugu' quégaca bönachi!”

⁸ Guyijë' gubáz lá'ayi budapi na', en yöjlaljë' le yudzu zxíga'do' na' zönë' lu gubidza, ate' gubidza na', bë'ë Dios le lataj uzégui'da' bönachi len guí' que. ⁹ Gula'yégui'da' yúgu'të bönachi tu ruzégui'da' gubidza, pero biti' bulu'bí'i ládxi'gaca, en biti' gula'gu'u Dios yölla' ba. Gula'nnë' zi'i queë' Dios, Bönni' dë lu në'ë inná bé'enë' yugu' lë ni tu'saca' zi' bönachi.

¹⁰ Guyijë' gubáz lá'ayi guyu' na', en yöjlaljë' le yudzu zxíga'do' zönë' lu xilataj böa' sínia' ga na' rinná bé'ëba', ate' guró'ö chul-la gapa rinná bé'ëba'. Ní'irö, tu' gula'gu'i gula'zaca' bönachi, guláguya'a lúdxi'guequi, ¹¹ pero biti' bulu'bí'i ládxi'gaca para cabirö ilúngaca le ruá' dö' tunë'. Gula'nnë' zi'i queë' Dios zoë' yehua' yubá tu' ta'gu'i ta'zaca', en tu' dxíagaca yudzu' ya'a na'.

¹² Guyijë' gubáz lá'ayi buzxopi na', en yöjlaljë' le yudzu zxíga'do' na' zönë' lu yegu zxön nazí'i le Eufrates, ate' gubidxi nisa yegu na' para íbá'a nöza ga ila'dödi nupa ta'nná bë', nupa ila'rúaj zaca' ga rilén gubidza.

¹³ Ní'irö bilé'eda' bëla zxön xitsiní' na', en böa' sínia' na', en bönni' ru'ë didza' uláz quégacaba'. Bila'rúaj tsonna bö' xihui' tun ditaj bönachi lu ruá'agaca nupa na'. Nalá'gaca ca nalá'gacaba' buludzu. ¹⁴ Nácagaca yonna bö' ni bö' que tu' xihui', bö' na' tun le nácagaca bë' le ilún ga ulu'bani bönachi. Yöjaca bö' xihui' na' idú yödzölió, en yöjtúbigaca nupa ta'nná bë', para tsójáquië' lu gudil-la na' gaca lu dza zxön queë' Dios, Bönni' napa cazë' yöll-la' unná bë'. ¹⁵ Caní' rnnë' Dios: "¡Buli'yútsöca! Guída' tsárido'os ca ridxinë' tu bönni' gubán. Bica' ba nu zoa ban ladxi', en run chí'i le nacu nu na', en rúntica'sö dxi'a, para cabí gun bayudxi ta xiguídisö, en para cabí utuí' nu na' lahui' lógaca bönachi." ¹⁶ Yugu' bö' xihui' na' bulu'tubi yugu' bönni' ta'nná bë'ë, ate' bulu'dubë' tu lataj nazí'i le lu didza' hebreo: Armagedón.

¹⁷ Guyijë' gubáz lá'ayi igadxi na', en yöjlaljë' le yudzu zxíga'do' na' zönë' lu bö'ös, ate' bë' zidzaj didza' tu nu zoa lu lataj lá'ayi zoa yehua' yubá ga dë lataj lo na', rna: "Chinaca."

¹⁸ Ní'irö guyëpi yösa, en guró'öda' bö, en gunné' guziú'. Gudódida' budó' xzu', le gudódida'rö ca gudödi tsanni ni nacuá' bönachi yödzölió. ¹⁹ Birúaj tsonna có'ölö yödzö zxön na', ate' gula'guínnaj yödzö nacuá' yödzölió. Yöjnenë' Dios le naca xihui' gulún bönachi yödzö zxön na' nazí'i le Babilonia, ate' lu yöll-la' rilé queë' benë' xíguia' nupa nacuá' ni'. ²⁰ Bila'gachi' yugu' luyú bidxi dzö'ö lu nísado', ate' bíti'rö gula'lá' yugu' guí'ado'. ²¹ Böxaj ca' guiój bögui' yöla sunna, le za' lúzxiba, en yöjsóa ícjagaca bönachi, ate' nál-li' tu tu guiój bögui' na' ca tu gayuá' guíë, ate' yúgu'të bönachi gula'nnë' xihui' queë' Dios tu' nözi guiój bögui' na' tu' bulu'sáca'da' zi'i léguequi.

17

Dios richúguië' queënu nigula udá dzaga

¹ Ní'irö bidxinë' tuë' gubáz lá'ayi ga zoa', nababë' gadxi gubáz lá'ayi na' gula'zönë' gadxi zxíga'do' na' néquiguequini oro. Bé'lenë' neda' didza', gunné': "Gudá ni, ate' uluí'ida' lí' ca gunë' Dios, gunë'-nu xíguia' nigula udá dzaga na', ró'önu lu nísado' zían. ² Gula'cua'len lënu nupa ta'nná bë' luyú yödzölió, en gulún le ruá' dö', ate' gula'zudxi nupa nacuá' yödzölió ni, tu' gulunlen lënu le biti' naca dxi'a."

³ Dios Bö' Lá'ayi guzóalenë' neda', ate' gubáz lá'ayi na' guché'ë neda' tu lu lataj cá'asö, ate' bilé'eda'-nu tu nigula ni' dxíanu cúdzu'ba' tuba' böa' sínia', nácaba' xiná guí'ido'os. Dxíagaca gadxi ícjaba', en chí lúzuba', en dá'gaca ca' lëba' le ta'nnë' xihui' queë' Dios.

⁴ Nigula na' dxíanu lëba' nácunu lari' xiná chul-la, en lari' xiná guí'ido'os. Nazí'i biquitaj queënu le néquiguequini oro, en yugu' guiój nazaca', en yugu' bugá. Lu ná'anu rö'ö tu zxíga'do' néquini oro, en yudzu le nácagaca xihui', en le ruá' dö' runnu. ⁵ Ra' xigánu dá'gaca ca lënu, le tu'lú'í' tu le nagachi', en ta'nná caní: "Yödzö Babilonia Le Naca Lo", en "Xiná'agacanu Nigula Udá Dzaga", en "Xiná'agaca Le Xihui' Dzö'ö Yödzölió."

⁶ Gúquibe'eda' nazúdxinu nigula na' tu' bennu ga gulaj rön quégaca nupa néquiguequi

queë' Dios, en quégaca nupa na' zoa nu bëti léguequi tu' gulún ba nalí queë' Jesús. Cate' bilé'eda'-nu, bubánide'eda'. ⁷ Gudxë' gubáz lá'ayi na' neda', gunné': "¿Bizx que rubáninu'? Uzéajni'ida' li' lë na' nagachi', le rulu'í ca naca nigula ni, enca' le rulu'í ca naca böa' sínia' na' dxíanu-ba', böa' na' dxíagaca gadxi ícjaba', en chi lúzuba'. ⁸ Böa' sínia' na' bilé'enu' guzóaba' zí'alö, pero biti' zóaba' na'a. Böa' ni chizóa irúajba' lataj chul-la, ate' tséajba' ga nítiba' tsaz. Ulu'bánide'e nupa nacua' luyú cabí nazúajgaca láguequi lu guichi que yöl-la' na'bán, le buzúajé' Dios dza ni'te quez cate' si' gata' yödzölió. Cate' ila'lé'eni böa' sínia' na' guzóaba' zí'atëlö, pero biti' zóaba' na'a, ulu'bani tu' nubanba'.

⁹ Lë ni naca tu le uzéajni'i nu gaca tséajni'i: Gadxi ícjaba' na' tu'lu'í gadxi gu'ado' gapa ró'önu nigula na'. ¹⁰ Lësca' caní gadxi ícjaba' na' tu'lu'í gadxë' bönni' ta'nná bë'ë. Gáyu'ë bönni' ni chigudödi quégaquië'. Tuë' bönni' ni rinná bë'ë na'a, ate' ia'tué' biti' ridxíninë', pero cate' guidë', inná bë'ë tu chí'ido'osö. ¹¹ Böa' sínia' na' guzóaba', pero biti' zóaba' na'a, rulu'í tu bönni' izxunu', inná bë'ë. Nunë' tsözxón bönni' gadxi na', ate' tödi ni nítie' tsaz.

¹² Chi lúzuba' na' bilé'enu' tu'lu'í chië' bönni' ila'nná bë'ë. Biti' ta'zíninë' yöl-la' unná bë', pero ila'zi'ë yöl-la' unná bë' tu chí'ido'osö, en ila'nná bë'ë tsözxón len böa' sínia' na'.

¹³ Chië' bönni' ni, lébisö nácagaquië', ate' ulu'dödë' yöl-la' unná bë' quégaquië', en le nazi' lu ná'agaquië' lu ná'aba' böa' sínia' na'. ¹⁴ Ila'díl-lalenë' Bönni' na' náquië' Bö'cu' Zxíla'do', pero Lë' ucul-lë' légaquië', tu' náquië' Xángaca yúgu'të nupa nácagaca xan, en náquië' Bönni' rinná bé'enë' yúgu'të nupa ta'nná bë'. Nupa nacua' len Lë', bulidzë' Dios léguequi, en guröë' léguequi, ate' tsaz dá'gaca Lë'."

¹⁵ Gubáz lá'ayi na' gudxë' ca' neda', gunné': "Yugu' nísado' na' bilé'enu' gapa ni' ró'önu nigula udá dzaga na', tu'lu'í bönachi yugu' yödzö, en yugu' bönachi izá'a, en bönachi tu'í yugu' didza' yúbölö, en bönachi yugu' luyú. ¹⁶ Chi lúzuba' böa' sínia' na' bilé'enu', en tu'lu'í chië' bönni', biti' ila'lé'enë'-nu nigula udá dzaga na' dxi'a, ate' ulu'cá'anë'-nu cá'asö, en xiguídisö. Ilahuë' xipéla'nu, en ulu'zégui'ë-nu len guí'. ¹⁷ Dios uchízië' icja ladxí'do'gaquië' chië' bönni' na' le gun ga ilunë' ca ré'ëni quézinë' Lë', ate' ilácagaquië' tuz, en ulu'dödë' yöl-la' unná bë' quégaquië' lu ná'aba' böa' sínia' na' para gaca ca rnna xtídzë'ë. ¹⁸ Nigula na' bilé'enu'-nu rulu'í yödzö zxón na' rinná be'e nupa ta'nná bë' yödzölió ni."

18

Riguinnaj yödzö Babilonia

¹ Gudödi na' bilé'eda'-në' ia'tué' gubáz lá'ayi ruhuötjé' rirúajé' yehua' yubá, en dë lu në'ë yöl-la' unná bë' zxón, ate' guyëpi yösa bení luyú ni'a que yöl-la' bení queë' gubáz lá'ayi na'. ² Bë'ë zidzaj didza' gubáz lá'ayi na', gunné':

¡Chibiguínnaj! ¡Chibiguínnaj Babilonia, yödzö zxón na'!

¡Chiböáca xilataj tu' xihui', en xilátjagaca bö' xihui' tun ditaj bönachi!

¡Yugu' biguínni xitsiní', en yugu' biguínni xihui' tu'zóaba' xilátajgacaba' ni'!

³ Caní guca que yödzö na' ni'a que le gulún bönachi nacua' ni'.

Gulunë' ga gulún bönachi yúgu'të yödzö ca nácagaca le ta'zësö ladxi' le ruá' dö'.

Nupa ta'nná bë' luyú yödzölió gulunlen légaquië' le ruá' dö',

ate' guta' yöl-la' tsahui' quégaquië' bönni' to'o tuti' nacu'ë yödzölió

tu' guyánda' yugu' le nazaca' gula'zé ladxi' bönachi ni'.

⁴ Ní'irö biyönda' ru'í didza' ia'tú nu zoa yehua' yubá, rnna:

Guli'ruáj lu yödzö na', libí'ili' néquili' quia'

para cabí gunli' dul-la' tsözxón len légaquië',

en para cabí quí'í sáca'li' le gaca quégaquië'.

⁵ Nayánda' dul-la' nabága'gaquië',

en chinayasa nadxín caz lúxiba,

pero Dios rōjnenē' le ruá' dö' núngaquiē'.

⁶ Buli'bí'i quégaquiē' ca na' gulunē' queéli'.

Buli'bí'i quégaquiē' chopa cō' tsca le gulunē'.

Buli'bí'i quégaquiē' chopa cō' tsca le naca xihui' gulunē' queéli'.

⁷ Guli'gún ga ila'guí'i ila'záquiē', en ila'bōdxi yéché'ë tsca guca yöl-la' ba, en yöl-la' zxön guluí' cuíngaquiē'.

Ta'zá' lādxi'gaquiē', ta'nné':

Ró'ötu' ni, rinná bé'ëtu'.

Biti' nácatu' uzēbi, en catu caz cōdxi yéchi'tu'.

⁸ Que lē ni na', tu dzasō ila'dxín quégaquiē' le ila'guí'i ila'záquiē', yöl-la' guti, en yöl-la' ribōdxi yechi', en yöl-la' ridún.

Iléguiē' lu guí', tu' napa cazē' yöl-la' huáca zxön Xanru' Dios.

Lē cazē' usiúdxē' quégaquiē'.

⁹ Ní'irō gunné': "Ila'bōdxi nupa ta'nná bé' luyú yōdzōlió, en gulún le ruá' dö' tsōzxón len légaquiē', en bulu'zí' xibé le nequi quégaquiē'. Ila'bōdxē', en ila'bōdxi yéché'ë cate' ila'lé'enē' dzön que yōdzō zxön na' régui. ¹⁰ Zi'tu' zí'tu'sō ila'cu'ë tu' iládxinē' ca gaca xíguia' le gaca que yōdzō na', ate' ila'nné': ¡Bica' bayechi' Babilonia, yōdzō zxön ni, le gúcada' lo! ¡Tu dzasō guca xíguia' que!"

¹¹ Ní'irō gunné': "Ila'bōdxē' ca' bönni' to'o tuti' nacu'ë yōdzōlió, en ila'bōdxi yéché'ë ni'a que yōdzō na' tu' cabirō soa nu ga'u bi ilúti'ë ni'." ¹² Cúnturō nu ga'u ni':

Le néquiguequini oro, en plata,

en yugu' guió'j zaca', en yugu' bugá,

en yugu' lari' nazáca'da', en lari' xiná chul-la,

en lari' dxí'ado', en lari' xiná guí'ido'os,

en yugu' yaga rilá' zxixi,

en le néquiguequini dxita nazáca'da',

en le néquiguequini yaga nazáca'da',

en le néquiguequini guíë cobre,

en le néquiguequini guíë,

en le néquiguequini guió'j jara.

¹³ Cúnturō nu ga'u ni':

Canel, en yugu' le rilá' zxixi, en yalaj,

en le rilá' zxixi que mirra, en que yōj olíbano,

en xisi uva nál-la, en le naca za,

en yiōzja dxí'ado', en xoa' xtila,

en yugu' búrrodo', en yugu' bö'cu' zxila',

en yugu' böa', en yugu' carreta,

en yugu' bönni' huen dxin, en ia'bal-la bōnachi.

¹⁴ Nupa na' to'o tuti' ilé légaquiē', ila'nná:

Nadúagaca le guzé lādxi'li'.

Chigudōdi quégaca yöl-la' tsahui',

en le náca'gaca lachi queéli',

ate' bíti'rō idzólili' léguequi.

¹⁵ Ní'irō gunné': "Ila'bōdxē' bönni' to'o tuti' na', tu' guta' quégaquiē' yöl-la' tsahui' tu' gulúti'ë lu yōdzō na', ate' ila'cu'ë zi'tu' zí'tu'sō tu' iládxinē' ca gaca xíguia' le gaca que yōdzō na', en ila'bōdxi yéché'ë." ¹⁶ Ila'nné':

¡Bica' bayechi' yōdzō ni guca zxön!

Guca ca tu nigula nácunu lari' nazáca'da',

en lari' xiná chul-la, en lari' xiná guí'ido'os,

en nazí'i biquitaj queénu le néquiguequini oro

en le néquiguequini guióǵ zaca', en yugu' bugá.

¹⁷ Tu dzasö guniti yöl-la' tsahui' que yödzö ni.

Ní'irö gunné': "Yúgu'të bönni' xan barco, en nupa nacua' lé'egaca barco na', en nupa tu'sá' yugu' barco na', en nupa tun dxin lu nísado', ila'cu'ë zi'tu' zí'tu'sö." ¹⁸ Cate' ila'lé'enë' dzön que yödzö na' régui, ila'bödxë', en ila'nné': "¿Bízxilö yödzö guca zxön ca naca yödzö ni?"

¹⁹ Ní'irö gunné':

Ulu'dxié' bëchtö ícjagaquié'.

Ila'bödxë', en ila'bödxí yeché'ë, ila'nné'.

¡Bica' bayechi' yödzö ni guca zxön!

Yöl-la' tsahui' que yödzö ni ben ga guta' yöl-la' tsahui'

quégaca yúgu'të nupa nácagaca xan barco lu nísado'.

Tu dzasö guniti yödzö ni.

²⁰ Buli'dzeja ca gaca que yödzö ni, libí'ili' zóali' yehua' yubá,

enca' libí'ili' néquili' queë' Dios,

libí'ili', bönni' gubáz queë',

en libí'ili', bönni' ru'íli' didza' uláz queë'.

Buli'dzeja, tu' chiguchúguié' Dios que yödzö ni

ni'a que bi gulún queé'li' nupa nacua' lu yödzö ni.

²¹ Ní'irö tué' gubáz lá'ayi nál-la buchisë' tu guióǵ zxön le naca ca tu guichi riyëtu, ate' gurú'unë' le lu nísado', gunné':

La' canísö gaca que yödzö Babilonia,

tu' iguínna' yödzö na' guca lo,

ate' bíti'rö nu udzöli le.

²² Bíti'rö nu yöni lu yödzö na' nupa ta'guínni lé'e le rul-la,

en calëga nupa tu'cödxí gui

en calëga nupa tu'cödxí lúzuba' böa' bëdxí.

Bíti'rö udzöli bönni' huen dxin ni',

en bíti'rö yöni bö rigú'u le rutu ni'.

²³ Bíti'rö uzení' nitú guí' lu yödzö na',

en bití' yöni chí'ë bönni' rutsaga në'ë ni',

en calëga chí'ibi' bi'i nigula rutsaga ná'abi'.

Caní gaca sal-la' nácali' lo, libí'ili' rá'uli', en rúti'li' lu yödzö ni,

en guxzí' yé'eli' bönachi idútë yödzölió len yöl-la' gudzá' queé'li'.

²⁴ Lu yödzö ni gulaj xichóngaqueië' bönni' gulu'ë didza' uláz queë' Dios,

en xichóngaca nupa néquiguequi queë' Dios,

enca' xichóngaca yúgu'të bönachi yödzölió,

tu' bëtigaca nupa nacua' yödzö ni léguequi.

19

¹ Gudödi lé ni biyönda' tu'i zidzaj didza' bönachi zían nacua' yehua' yubá, ta'nná:

¡Yöl-la' ba Dios! ¡Yöl-la' rusölá runë',

ate' yöl-la' zxön, en yöl-la' unná bë' napë' Dios queéru'!

² ¡Naca idútë li, en tsahui' ca rusiúdxë'!

¡Guchúguië' que yödzö na' naca ca tu nigula udá dzaga,

en quégaca bönachi lu yödzö na' ila'niti tsaz!

¡Gulún ditaj bönachi yödzölió tu' nözi le ruá' dö' gulunë'!

¡Dios buzí' lëbë' légaquië'

tu' gulútië' yugu' huen dxin queë'!

³ Leyúbölö gula'nné': "¡Yöl-la' ba Dios! ¡Cuéntica'sö dzön ga régui yödzö na'!"

⁴ Idapa uru'ë bönni' gula ni' bulu'tsaga lógaquië' lu yu tsözxón len idapa nupa ni' nabángaca, en ta'yéaj ládxi'gaquië' Dios, Bönni' rö'ë lataj lo queë'. Gula'nné': "¡Ca' gaca! ¡Yöl-la' ba Dios!"

⁵ Ní'irö biyönda' ru'í didza' tu nu zoa lataj lo na', rnna:

¡Guli'cu'ë Dios queéru' yöl-la' ba
yúgu'téli' runli' xichiné', libí'ili' na' rádxili' Lë',
nácali' bönachi cá'asö, en bönachi lo!

Laní que yöl-la' rutsaga na' queë' Bönni' náquië' Bö'cu' Zxíla'do'

⁶ Biyönda' ca' nu ru'í zidzaj didza', le biyón ca riyón cate' tu'í didza' bönachi zían, en biyón ca' ca riyón ga ridödi tu yegu zxón, o ca riyón cate' rinné guziú', ate' rnna:

¡Yöl-la' ba Dios tu' risí lahuë' rinná bé'ë!
¡Napa cazë' yöl-la' huáca!

⁷ ¡Ral-la' udzeja ládxi'ru', en uzí'iru' xibé',
en cú'uru'-né' yöl-la' ba

tu' chibidxín dza laní que yöl-la' rutsaga na'
queë' Bönni' na' náquië' Bö'cu' Zxíla'do'!

¡Sí' lu në'ë Cristo nupa néquiguequi queë'!

¡Chinabá'a queébi' bi'í utsaga ná'alénbi' Lë'!

¡Nácabi' le rulu'í nupa na' néquiguequi queë'!

⁸ ¡Dios ru'ë-bi' lataj gácubi' lari' nazáca'da'
le naca idú, en rëpi yösa bení'!

Lari' nazáca'da' na' rulu'í le naca tsahui' núngaca nupa néquiguequi queë' Dios.

⁹ Ní'irö gubáz lá'ayi na' gudxë' neda', gunné': "Buzúaj lu guichi didza' ni: ¡Bica' bágaca nupa na' nulidzë' Dios légaquië' para ila'cu'ë laní que yöl-la' rutsaga na' queë' Bönni' náquië' Bö'cu' Zxíla'do'!"

Gudxë' ca' neda': "¡Yugu' didza' idútë li ni ru'ë didza' Dios caz!"

¹⁰ Buzóa zxiba' xini'ë gubáz lá'ayi na' para tseaj ládxa'a lë', pero gudxë' neda': "¡Biti' gunu' caní! Neda' ca' naca' huen dxin queë' Dios ca nacu' li', en ca nácaagaquië' böchi' luzó'o nazí' lu ná'agaquië' le naca idútë li ca naca queë' Jesús. ¡Guyéaj ládxe'ë Dios!"

Nupa tu'í didza' uláz queë' Dios, tu'í didza' le naca idútë li ca naca queë' Jesús.

Bönni' dxíë'-ba' böa' chiguichi

¹¹ Ní'irö bilé'eda' nayalaj lúzxiba, ate' bulu'í loba' tuba' böa' chiguichi, ate' lë' Bönni' dxíë'-ba', Nu Run Ca Rnna, enca' Nu Ru'í Didza' Le Nácatë. Caní lë' tu' ruchi'a rusöróë' ca naca le naca idútë li, enca' caní tsejé' gudil-la. ¹² Rëpi yösa bení' guió'j lahuë', le náca'gaca ca guí', en dxíagaca icjé' zían le néquiguequini oro. Nazúaj lahuë' tu le lë', le cuntu nu nözi, pero tuzë' Lë' nózinë'. ¹³ Nácue' tu lari' në'aj rön, en lë' ca' "Nu Naca Xtídzë'ë Dios."

¹⁴ Röjnógaquië' Lë' ni'a në'ë guizxi yu nacu'ë yehua' yubá, dxíagaquië'-ba' böa' chiguichi, en náca'gaquië' lari' nazáca'da', le naca chiguíchido'os, en bití' naca bösaj. ¹⁵ Rirúaj ru'ë le naca ca tu guíë' tuchi' le gúninë' zi' bönachi yugu' yödzö. Inná bé'enë' légaquië' len tu xiyaga guíë', en gunë' légaquië' xíguia', le gaca quégaquië' ca raca que le ribía lubá uva, zoa nu rulibi léguequi, tu' riléde'enë' Dios, Bönni' napa cazë' yöl-la' unná bé'. ¹⁶ Nazúaj lu lari' nácue', enca' lu xigatsjé' ca lë', "Bönni' Rinná Bé'enë' Nupa Ta'nná Bë'", enca' "Bönni' Náquië' Xángaca Nupa Náca'gaca Xan."

¹⁷ Ní'irö bilé'eda'-né' tuë' gubáz lá'ayi zuñë' lu gubidza, ate' bé'ë zidzaj didza', en gudxë'-ba' böa' ta'daba' lúzxiba, rnné': "¡Guli'dá, buli'dubi ga ni gáguli' laní zxón queë' Dios! ¹⁸ Gáguli' xipéla'gaca nupa ta'nná bé', en xipéla'gaca nupa ta'nná be'e bönni' röjáquië' gudil-la, en xipéla'gaca nupa nál-lagaca, en xipéla'gacaba' böa', en xipéla'gaca nupa ta'bía léga'caba', en xipéla'gaca yúgu'të bönachi, nupa bití' nadó'ogaca, en nupa nadó'ogaca, nupa náca'gaca cá'asö, en nupa náca'gaca lo."

¹⁹ Ní'irö bilé'eda'-ba' böa' s'inia' na', enca' yugu' bönni' ta'nná' bē'ē' yōdzölió, en bönni' rōjáquiē' gudil-la guizxi yu quegaquiē', nudúbigaquiē' para ilúnlenē' gudil-la Bönni' dxíē'-ba' böa' chiguichi, dzágagaca Lē' ni'a nē'ē' guizxi yu. ²⁰ Bidzunba' böa' s'inia' na', enca' bönni' na' bē'ē' didza' uláz' queé'ba', bönni' na' benē' yugu' le nácada' bē' loba', en guzxi' yé'enē' nupa ni' gulu'i lataj nu uzúaj láhuiguequi lē' na' naca bē' dá'gaca lē'ba', en gula'yéaj lādxi'gaca budó' queé'ba'. Böa' s'inia' na', enca' bönni' na' bē'ē' didza' uláz' queé'ba', gula'rú'unē' léguequi nabángacasö ca' ga rō'ö guí' zxön le réguilen lē' na' ruzégui'da'. ²¹ Bönni' na' dxíē'-ba' böa' chiguí'ch bē'tiē' yúgu'tē' nupa na' gudá'gaca léguequi len guíē' tuchi' na' rirúaj ru'ē', ate' bulu'huóljaba' yúgu'tē'ba' böa' na' ta'daba' lúzxiba, tu' guláguba' xipéla'guequi.

20

Chi gayuá' iz

¹ Gudödi lē' ni bilé'eda' ruhuötjē' tu gubáz' lá'ayi, zē'ē' yehua' yubá, en zönē' xí'ini guíē' que lataj chul-la, ate' nu'ē' tu du guíē' yōdx. ² Guzxönē'-ba' bēla zxön xitsiní' na', nácaba' bēla guzóaba' dza ni'te, bēla na' lē'ba' Tu' Xihui', enca' Satanás, ate' bēguē'ē'-ba', en bucá'anē'-ba' caní' chi gayuá' iz. ³ Yōjchú'unē'-ba' lataj chul-la, en busayjē' lataj na', ate' budē'ē' tu le riguela' le rusayaj lataj na' para cabirö si' yé'eba' bönachi yugu' yōdzö ga izá'arö chi gayuá' iz na', ate' tödi ni' ral-la' yédxiba' tu chí'ido'.

⁴ Ní'irö bilé'eda' yugu' lataj gapa ta'bó' nupa ta'nná' bē', ate' nupa bila'deli' ulu'chi'a ulu'sörö' le raca ta'bó' yugu' lataj na'. Bilé'eda' ca' yugu' bö' gulaca caz bönachi bulu'rixē' yénguequi yugu' bönni' bití' nácagaquiē' tsahui' tu' gulún ba nali' queē' Jesús, en tu' gulún libán que xtídzē' Dios. Yugu' bönachi ni bití' gula'yéaj lādxi'gaca böa' s'inia' na', en budó' queé'ba', en bití' gulu'i lataj nu uzúaj ra' xigáguequi, o lu né'eguequi lē' na' naca bē' nu da' lē'ba'. Bulu'bán nupa ni lu yöl-la' guti, ate' gula'nná' bē'len Cristo chi gayuá' iz, ⁵ pero ia'zica'rö bönachi nátigaca bití' bulu'bán. Cate' izá'arö chi gayuá' iz na' ulu'bán. Yöl-la' rubán lu yöl-la' guti guca ni naca le raca zí'alö. ⁶ ¡Bica' ba, en bica' lá'ayi nupa ta'deli' yöl-la' rubán na' raca zí'alö! ¡Yöl-la' guti le raca burópilö bití' bi gaca gun quéguequi, pero ilácagaca bixúz queē' Dios, enca' queē' Cristo, ate' ila'nná' bē'len Lē' chi gayuá' iz na'!

⁷ Cate' izá'a chi gayuá' iz na', ulu'sanē' Satanás ga na' nadzún. ⁸ Urúaj Satanás, en tsōjxí' ye'e bönachi yugu' yōdzö nacuá' idapa la'a yōdzölió. Si' ye'e ca' bönachi yōdzö Gog, en yōdzö Magog, ate' utubi léguequi lu gudil-la. Tsca nácagaca nupa ni, nácagaca ca naca yuzxi rō'ö tu ra' yegu zxön. ⁹ Guizxi yusö gula'dödē' idútē' luyú, ate' gula'cu'ē' lē'ajlō lataj ga na' nacuá' bönachi néquiguequi queē' Cristo, le naca yōdzö na' nadxí'inē' Dios. Ní'irö benē' Dios ga böxaj guí' le birúaj yehua' yubá, le buzegui' légaquiē'. ¹⁰ Tu' xihui' na' nazí' ye'e légaquiē', yōjchú'unagaquiē' le ga rō'ö guí' zxön que lē' na' ruzégui'da', ga na' chizóaba' böa' s'inia' na', enca' bönni' na' bē'ē' didza' uláz' queé'ba'. Ila'gu'i ila'zaca' ni' rēla, en te dza yúgu'tē' iz zá'gaca.

Ta'dxín bönachi lahuē' Dios ga rō'ē' ruchi'a rusöröē'

¹¹ Ní'irö bilé'eda' tu lataj lo chiguichi, en bilé'eda' ca' Nu rō'ö ruchi'a rusöröē' lataj na'. Lahui' lo Nu ni gula'nítitē' yōdzölió, en lúzxiba, ate' bítí'rö budzöli xilátjaguequi. ¹² Bilé'eda' ca' nupa chinátigaca, nupa nácagaca lo, en nupa nácagaca cá'asö, zuíguequinē' lahuē' Dios. Gula'yálaj guichi, en guyalaj ca' ia'tú guichi ga na' nazúajgaca lágaca nupa nadéli'gaca yöl-la' na'bán idú. Buchi'a busöröē' Dios nupa na' chinátigaca tsca naca le nazúaj yugu' lu guichi na', lē' na' gulúngaca. ¹³ Lu nísado' bulu'rúaj nupa chinátigaca, nacuá' lu nísado'. Lu yöl-la' guti, en lu lataj chul-la bulu'rúaj nupa chinátigaca, gula'cuá' gapa ni', ate' buchi'a busöröē' Dios tu tu tsca naca le gulúngaca. ¹⁴ Ní'irö yōjtsázagaca yöl-la' guti, en lataj chul-la ga ni' rō'ö guí' zxön le naca lataj que yöl-la' guti le raca

burópilö. ¹⁵ Nupa biti' nazúajgaca lu guichi quégaca nupa nadéli'gaca yöl-la' na'bán idú yöjtsázagaca lataj na'.

21

Tu lúzxiba cubi, en tu luyú cubi

¹ Gudödi na' bilé'eda' tu lúzxiba cubi, en tu luyú cubi, tu' chigudödi quégaca lúzxiba na', en luyú na' gula'cuá' zí'alö. Bíti'rö dë nísado'. ² Neda', Juan, bilé'eda' yödzö lá'ayi na', le naca Jerusalén cubi, ruhuötaj, rirúaj yehua' yubá ga zoë' Dios, en chinabá'a que ca nabá'a queébi' bi'i nigula chizóa utsaga ná'aleni' tu bönni'. ³ Biyönda' ruí'i didza' nu rnna yehua' yubá: "¡Buli'yútsöca! ¡Ga zoë' Dios zóalen bönachi! ¡Sóalenë' léguequi, ate' léguequi ilácagaca bönachi queë'! ¡Dios caz sóalenë' léguequi, en gáquië' Dios quéguequi!" ⁴ Dios uzxié' nisa ribödxí zoa guiój lóguequi. Cúnturö nu gati, en cúnturö nu cödxí, en cúnturö nu cödxí yechi', en cúnturö nu qui'i saca', tu' chigudödi quégaca lë na' gulaca zí'alö."

⁵ Ní'irö Nu na' rö'ö lataj lo ni' gunná: "¡Buyútsöca! ¡Yúgu'të ruúna' cubi!"

Gudxi ca' neda': "¡Buzúaj lu guichi lë ni, tu' naca idútë li didza' ni, en naca löza!"

⁶ Ní'irö gudxi neda': "¡Chinaca caz! ¡Neda' naca' Nu zoa zí'atëlö, enca' Nu röjsete ca naca le risí lo, en le ruúdxitë! ¡Nu ribidxi nisa, neda' guna' ga gu'aj nisa na' runna yöl-la' na'bán! ⁷ Nupa ila'deli' lu le raca yödzölió, gaca quéguequi yúgu'të lë ni. Neda' gaca' Dios quéguequi, ate' léguequi ilácagaca xzí'ini caza', ⁸ pero nupa tadxi, en nupa biti' ta'yéajlë' neda', en nupa náacagaca xihui', en nupa tuti bönachi, en nupa tun le biti' naca tsahui', en nupa náacagaca udzá', en nupa ta'yéaj ládxi'gaca budó' guiój budó' yaga, en yúgu'të nupa ta'zí'yë', chizóa riböza xilátjaguequi lu guí', ga ni' rö'ö guí' zxon que lë na' ruzégui'da', lë na' naca yöl-la' guti le raca burópilö."

Yödzö Jerusalén le naca cubi

⁹ Ní'irö tuë' gubáz lá'ayi nababë' gadxë' gubáz lá'ayi ni' gula'zönë' gadxi zxíga'do' yúdxugaca gadxi yödzöhué' yöjsétegaca, bidë' ga zoa'. Gudxë' neda': "¡Gudá ni! ¡Ulu'ida' li' bi'i nigula na' si' utsaga ná'aleni' Bönni' na' náquië' Bö'cu' Zxíla'do'!"

¹⁰ Guzóalenë' Dios Bö' Lá'ayi neda', ate' guchë'ë' gubáz lá'ayi na' neda' tu lu guí'a sibi, en buluf'inë' neda' yödzö lá'ayi Jerusalén, ruhuötaj, rirúaj yehua' yubá ga zoë' Dios. ¹¹ Yödzö ni rëpi yösa bení' tu' zóalen le yöl-la' bení' queë' Dios. Rëpi yösa bení' ca rëpi yösa bení' tu guiój nazáca'da' ca naca guiój guí'do'os nazí'i le jaspe. Naca yödzö na' yení'ido' ca naca guiój jara. ¹² Zoa tu zö'ö zxon, en sibi idú gásibi'ilö yödzö na'. Lë'e zö'ö na' nacua' chinnu gapa nu riyaza. Ra' gapa nu riyaza na' nacu'ë' chínnuë' gubáz lá'ayi tapa chí'ë. Tu tu ga nu riyaza na' nazúaj tu tu lágaca idxinnu cö' di'a dza xzí'ini xi'sóë' Israel. ¹³ Lë'e zö'ö le ruyú saca' ga rilén gubidza nacua' tsonna gapa nu riyaza, en saca' ga za' bö' ziaga nacua' tsonna gapa nu riyaza, en saca' tsölä'a ga ridödi gubidza beo' ziaga nacua' tsonna gapa nu riyaza, en saca' ga ribía gubidza nacua' ca' tsonna gapa nu riyaza. ¹⁴ Zxan zö'ö que yödzö na' nacua' chinnu xilibi zö'ö, ate' lé'egaca xilibi zö'ö na' nazúajgaca lágaquië' idxínnutë' bönni' gubáz queë' Bönni' na' náquië' Bö'cu' Zxíla'do'.

¹⁵ Gubáz lá'ayi na' ruí'ilenë' neda' didza' zönë' tu yaga urixi le néquini oro para urixë' tsca naca yödzö na', en tsca náacagaca gapa nu riyaza, en tsca naca zö'ö que. ¹⁶ Yödzö na', lédi'i náacagaca idapa la'a. Lédi'i naca yöl-la' tunna que, en yöl-la' blaga' que. Len yaga na' burixë' tsca naca yödzö na', naca idú tsca gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' bölága' que. ¹⁷ Burixë' ca' yöl-la' yödx que zö'ö na', naca tu gayuá' yu' tapa-un dxita, tsca naca dxita que na' bönachi, lë na' ruríxinë' gubáz lá'ayi na'.

¹⁸ Zö'ö na' néquini guiój jaspe, ate' yödzö na' néquini órotëz, le naca yení'ido' ca naca guiój jara. ¹⁹ Yugu' xilibi zö'ö que yödzö na' nazí'gaca biquitaj guiój nazáca'da'gaca. Xilibi zö'ö zí'alö néquini guiój jaspe.

Le buropi néquini guióǵ zafiro.
 Le bunni néquini guióǵ ágata.
 Le budapi néquini guióǵ esmeralda.
²⁰ Le guyu' néquini guióǵ ónice.
 Le buzxopi néquini guióǵ cornalina.
 Le igadxi néquini guióǵ crisólito.
 Le izxunu' néquini guióǵ berilo.
 Le igá néquini guióǵ topacio.
 Le idxí néquini guióǵ crisoprasa.
 Le idxinéaj néquini guióǵ jacinto.
 Le idxinnu néquini guióǵ amatista.

²¹ Chinnu gapa nu riyaza na' ta'yáyjani chinnu bugá. Tu tu ga nu riyaza na' riyáyjani tuz bugá. Luyú la' nōza lo que yōdzō na' néquini órotēz, le naca yen'ido' ca naca guióǵ jara.

²² Biti' bilé'eda' tu yudo' lu yōdzō na', tu' náquiē' Xanru' Dios yudo' que, napa cazē' idútē yōl-la' unná bē', en lēscá' caní náquiē' Bōnni' náquiē' Bō'cu' Zxíla'do', náquiē' yudo' que yōdzō na'. ²³ Biti' run bayudxi tsení'gaca gubidza, en beo' lu yōdzō na', tu' uzení' yōl-la' bení' queē' Dios lu yōdzō na', ate' lēscá' Bōnni' náquiē' Bō'cu' Zxíla'do' náquiē' le uzení' ni'. ²⁴ Bōnachi yugu' yōdzō, nupa nulágaca, ila'dá lu bení' que yōdzō na', ate' yugu' bōnni' ta'nná bē'ē yōdzōlió idiguá'agaquiē' yōl-la' tsahui' quégaquiē' lu yōdzō na'. ²⁵ Catu caz tsáyajgaca gapa nu riyaza lu yōdzō na' lahui' dza, ate' lataj na' catu caz gaca rēla. ²⁶ Bōnachi yugu' yōdzō idiguá'agaquiē' ni' le nácagaca lesaca', en yōl-la' tsahui' quéguequi. ²⁷ Tu le ruá' dō' biti' ca' tsaza ni', en calēga tu le naca xihui', en calēga nu rizí' yē', pero tsázagacasō ni' nupa nazúajgaca láguequi lu guichi queē' Bōnni' náquiē' Bō'cu' Zxíla'do', ga na' nazúajgaca lágaca nupa nadéli'gaca yōl-la' na'bán.

22

¹ Ní'irō gubáz lá'ayi na' buluí'inē' neda' tu yegu yen'ido', le naca nisa yegu le runna yōl-la' na'bán. Rēpi yōsa bení' yegu na' ca rēpi yōsa bení' guióǵ jara. Rirúaj yegu na' lu lataj lo ga rō'ē Dios, en ga rō'ē ca' Bōnni' náquiē' Bō'cu' Zxíla'do'. ² Rizá' yegu ni gatsaj láhui'lō nōza lo que yōdzō na'. Tsólá'a huéaj ra' yegu na' rō'ō tu yaga le runna yōl-la' na'bán, ate' ta'bía chinnu luzuí tu iz. Tu tu beo' ta'bía yaga na'. Xilágui'gaca yaga na' nácagaca le tu'ún bōnachi yugu' yōdzō. ³ Biti' soa ni' nitú le dxía dō'. Soa lu yōdzō na' lataj lo ga rō'ē Dios, enca' ga rō'ē Bōnni' náquiē' Bō'cu' Zxíla'do', ate' yugu' huen dxin queē' ila'yéaj lādxi'gaquiē' Lē'. ⁴ Ila'lé'enē' lahuē' Lē', ate' le nazí'i Lē' nazúaj ra' xigágaquiē'. ⁵ Biti' gaca rēla ni', ate' nupa nacué' ni' bití' ila'quínna tu le cu'u bení', en calēga bení' que gubidza, tu' gáquiē' Xanru' Dios bení' quégaquiē'. Nupa nacué' ni' ila'nná bē'tica'sō.

Chizóa huödē' Cristo

⁶ Ní'irō gubáz lá'ayi na' gudxē' neda', gunné': "Didza' ni naca idútē li, en naca löza. Xanru' Dios, Nu ruchiza Bō' Lá'ayi icja lādxi'do'gaquiē' yugu' bōnni' tu'ē didza' uláz queē', chigusól-lē'ē gubáz lá'ayi queē' para uluí'inē' yugu' huen dxin queē' le ral-la' gácatē. ⁷ Caní rnnē' Jesucristo: ¡Chizóa huöda! ¡Bica' ba nu run ca rnna didza' ruá'a uláz queē' Dios, le nazúaj lu guichi ni!"

⁸ Neda', Juan, biyōnda', en bilé'eda' yugu' lē ni. Gudödi biyōnda', en bilé'eda' yugu' lē ni, buzóa zxiba' xini'ē gubáz lá'ayi na' buluí'inē' neda' yugu' lē ni para guna' lē' zxön. ⁹ Ní'irō lē' gudxē' neda': "Biti' gunu' caní, tu' naca' neda' huen dxin queē' Dios ca nacuí' li', en ca nácagaquiē' böchi' luzó'o na' tu'ē didza' uláz queē' Dios, enca' ca nácagaca yúgu'tē nupa tun ca rnna le nazúaj lu guichi ni. ¡Ben zxön Dios!"

¹⁰ Gudxē' ca' neda': "Biti' ucachu'u xtídzē'ē Dios ni, didza' ruá'a uláz queē', en nazúaj lu guichi ni, tu' chizóa ilaca yugu' lē ni. ¹¹ Nu ruá' dō' guá'tica'sō dō'. Nu run le cabí naca

tsahui' gúntica'sö le cabí naca tsahui'. Nu run dxi'a, gúntica'sö dxi'a, ate' nu nequi quez queë' Dios, guéquitica'sö quez queë'." ¹² Rnnë' Jesús: "¡Chizóa huöda! Nu'a lu na'a le nadéli'gaca bönachi, ate' ubi'a que queé'guequi tsca naca le gulúngaca. ¹³ Neda' naca' Nu zoa zí'atélö, enca' Nu röjsete, ca naca le risí lo, en le ruúdxitë. Naca' ca' Nu run ga risí lo, en Nu rusiúdxí."

¹⁴ Ní'irö gunné': "¡Bica' ba nupa nayari le nácugaca, en tun le naca dxi'a! ¡Nazi'guequi lataj ilahuë' le ribía yaga le runna yöl-la' na'bán, en gaca ila'yaza gapa nu riyaza lu yödzö na'! ¹⁵ Nupa nácagaca xihui', en nupa nácagaca udzá', en nupa tun le ruá' dö', en nupa tuti bönachi, en nupa ta'yéaj ládxi'gaca budó' guiój budó' yaga, en nupa ta'yaza ládxi'gaca ta'zí' yé' ila'cuá' ní'ilö ra' yödzö na'. ¹⁶ Neda', Jesús, gusól-la'a gubáz lá'ayi quia', ate' buluf'inë' libí'ili' yugu' lë ni, libí'ili' na' dzágali' yugu' cö' bönachi quia'. Neda' naca' di'a dza queë' David, enca' zxf'ini xi'sóë'. Naca' ca' böljaj hui sila."

¹⁷ Tu'ë didza' Dios Bö' Lá'ayi, enca' bi'i nigula utsaga ná'aleni'-në' Bönni' náquië' Bö'cu' Zxíla'do', ta'nnë': "¡Gudá!"

Nu riyöni didza' ni ral-la' inná: "¡Gudá!"

¡Nu ribidxi nisa, en nu rizé ladxi' le, ral-la' guídi, en guí'aj nisa le runna yöl-la' na'bán!

¹⁸ Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnnía': Channö nu udá' lë'e didza' ni, Dios ubi'ë que nu na'. Gunë' lë' xíguia' ca naca le nazúajgaca lu guichi ni. ¹⁹ Lësca' caní, channö nu cúa bíti'tës didza' ni ruá'a uláz queë' Dios, en nazúaj lu guichi ni, Dios ugúë' ca' xilataj nu na' lu guichi ga nazúajgaca lágaca nupa nadéli'gaca yöl-la' na'bán idú, enca' lu yödzö lá'ayi, ca na' nazúaj quéguequi lu guichi ni.

²⁰ Xanru', Nu run ba nalí quéguequi lë ni rnnë': "¡Ön! ¡Huödatea!"

¡Ca' gaca! ¡Gudá, Xantu' Jesús!

²¹ Rinábida'-në' Xanru' Jesucristo uzá' ládxe'ë queéli' yúgu'tëli'. ¡Ca' gaca!